


Eyacuiñajjija  
Esohui



New Testament in Ese Ejja (BL:ese:Ese Ejja)

**Eyacuiñajjija Esohui**  
New Testament in Ese Ejja (BL:ese:Ese Ejja)

copyright © 2012 Wycliffe Bible Translators, Inc.

Language: Ese Ejja

Translation by: Wycliffe Bible Translators, Inc.

Ese Ejja [ese], Bolivia

**Copyright Information**

© 2012, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Ese Ejja

**© 2012, Wycliffe Bible Translators, Inc. All rights reserved.**

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-23

---

PDF generated using Haiola and XeLaTeX on 4 Mar 2019 from source files dated 1 Oct 2018  
88838088-e20d-51ca-8c91-69194f5ae678

## Contents

MATEO . . . . .	1
MACOSO . . . . .	68
NOCA . . . . .	111
HUANI . . . . .	181
HECHO . . . . .	236
SHOMANO . . . . .	305
1 CONITIO . . . . .	340
2 CONITIO . . . . .	374
JANATA . . . . .	395
EPESIO . . . . .	409
PINIPES . . . . .	420
CONOSENSE . . . . .	427
1 TESANONISESE . . . . .	434
2 TESANONISESE . . . . .	441
1 TIMOTEO . . . . .	445
2 TIMOTEO . . . . .	453
TITO . . . . .	459
PINEMO . . . . .	463
EMEO . . . . .	465
SANTIACO . . . . .	493
1 PENO . . . . .	502
2 PENO . . . . .	511
1 HUANI . . . . .	516
2 HUANI . . . . .	524
3 HUANI . . . . .	525
JODE . . . . .	527
APOCANISI . . . . .	530

MATEOHUA ESOHUI QUEA PAME NEE TEHUE CANAJE JESOSA  
QUITOJA  
MATEO

*Jesosa Quitoja etiiquiana*

(Noca 3.23-38)

<sup>1</sup> Jiquio esohui etehue'yo Jesosa Quitoja etiiquiana. Yahuajo jama poa ba'a: Dabi Jesosaja etiiquiana poa, Amajama pea'ai. <sup>2</sup> E'e, jamaya poa: Amajamaja bacua ejja Isaaca bajjani poa. Isaacaja bacua ejja Jacobo bajjani poa. Jacoboja bacua Joda bajjani poa; echahua mese cuana enequia poa pea'ai. <sup>3</sup> Jodaja bacua cuana Panesi bajjani, pea Sana bajjani poa, Tamaja mejo poa. Panesija bacua Esomo bajjani poa. Esomoja bacua Anami bajjani poa. <sup>4</sup> Anamija bacua Aminanami bajjani poa. Aminanamija bacua Nasoni bajjani poa. Nasonija bacua Sanamo bajjani poa. <sup>5</sup> Sanamoja bacua Bosi bajjani poa, Shajamija mejo poa. Bosija bacua Obeda bajjani poa, Shotija mejo poa. Obedaja bacua Isai' bajjani poa. <sup>6</sup> Isaija bacua emeshi mese Dabi poa. Dabija bacua Sanomoni bajjani poa. Sanomonija enaese e'ahuemano poa, Oniaja quijjojea, Dabija huana'yo poa. <sup>7</sup> Sanomonija bacua Shobiami bajjani poa. Shobiamija bacua Abiase bajjani poa. Abiaseja bacua Asa bajjani poa. <sup>8</sup> Asaja bacua Josapati bajjani poa. Josapatija bacua Jonami bajjani poa. Jonamija bacua Osia bajjani poa. <sup>9</sup> Osiaja bacua Jotami bajjani poa. Jotamija bacua Acasi bajjani poa. Acasija bacua Esequia bajjani poa. <sup>10</sup> Esequiaja bacua Manase bajjani poa. Manaseja bacua Amoni bajjani poa. Amonija bacua Josia bajjani poa. <sup>11</sup> Josiaja bacua Jeconia bajjani poa; echahua mese cuana enequia poa pea'ai. Jeconia nequinajejo, Babinonia dejja cuaa Isaeni cuana iña majje dojo ca poa oja meshi yasijje sosema' chaco meeya.

<sup>12</sup> Majoya Babinonia meshi yasijje dojo majje Jeconiaja bacua Sanati cuaya poa. Sanatija bacua Sonomame bajjani poa. <sup>13</sup> Sonomameja bacua Amioni bajjani poa. Amionija bacua Eniaqui bajjani poa. Eniaquija bacua Asoni bajjani poa. <sup>14</sup> Asonija bacua Sanoco bajjani poa. Sanocoja bacua Aquimi bajjani poa. Aquimija bacua Eniodi bajjani poa. <sup>15</sup> Eniodija bacua Eneasaja bajjani poa. Eneasaja bacua Matani bajjani poa. Matanija bacua Jacobo bajjani poa. <sup>16</sup> Jacoboja bacua Jose bajjani poa. Oya Maniaja yahue poa. Maniaja bacua Jesosa bajjani aca poa, Quito bajjani pea'ai poa, Eyacuiñajjija huoojea'yo ojjaña cuana jaahuanajji.

<sup>17</sup> Jamajjeya Amajamaja bacua ejja tii majje jea ca poa pea. Majoya tii majje ohuaya pea jea ca poa. Jamaya aca poquiapoquia poa. Quijje nei etiiquiana Dabi cuaya poa. Etiiquiana Amajamaja jeaja osecua cuana 14 poa Dabi cuaya jjimahuajo. Majoya oya jayojja Dabija bacua ejja tii majje jea ca poa pea. Tii majje ohuaya pea jea ca poa. Quijje nei Dabija osecuaja jeaja osecua cuana 14 poa majje, dejja mase cuaa etiiquiana cuana Babinonia meshi yasijje dojo ca poa. Majoya Babinonia meshi yasijje poqui majje oya jayojja aca poquiapoquia poa. Majoya quijje nei Jesosa Quito cuaya poa Joseja tii mee. Ma etiiquinaja jeaja osecua cuana 14 poa Jesosa Quito cuaya jjimahuajo. E'e, jamaya poa.

*Ebacua Jesosa Quito cuaya poa*

(Noca 2.1-7)

<sup>18</sup> Jesosa Quitoja ecuaya'yo jama poa ba'a: Joseja Mania emese na poa. Mania bii ania poa; dejja cuana ba jjima poa. Jamatii o'ejji poa. Eyacuiñajjija Edojjoshahua Pameya ebacua ba'e mee ca poa, Maniaja ebacua. <sup>19</sup> Jose quea pame nee poa. Jamajjeya Mania o'ejji poajo jjahuanaqui sa po ajja poa. Jjashahuabaquia poa jama ba'a: —E'e pojja'a Mania pea cojjojji poanaje. Jamajjeya oya jjamejoquinaje. Eyaya oya cajaa aje. Quehuajje cajaa aje Mania, pea cuanaja ba jjima. Jamajjeya pea cuana Maniajo maimai ajja poaje.

<sup>20</sup> Jamaya jjashahuabaquianijo Joseya cahuiba ca poa. Oe Eyacuiñajjija esohuidojojji miminaje onijje. Jama poanaje ba'a: —Jose, ¡a'a Mania cajaa ajji! ¡Oya huanacue! Oja

bacua Eyacuiñajjija Edojjoshahua Pameja ba'e mee. <sup>21</sup> Ojaya ebacua cuayaje. Jamajjeya jiquio ebacua tii majje ojaya epeeji cuanaja mimishi cuijea'yojji poaje. Jamajjeya ojaya ebajjani poaje Jesosa.

<sup>22</sup> E'e, Eyacuiñajjija esohui huohuijijija esohui yahuajo nei nei jayojjaya jjeja nei jamaya poani. Jamaya yahuajo poa ba'a:

<sup>23</sup> “Epona sho'i bii ani jamatii o'eji poanaje. Cuayajo oja bacua bajjani acaje Emanuel. Ese Ejjaja esohuijo ca jama ba'a: Eyacuiñajji ecuana nijje nequi”. Jamaya Joseya cahuiba ca poa.

<sup>24</sup> Majoya shequi'yo majje Eyacuiñajjija esohuidojojijija esohuijo Mania huana canaje, Joseya. <sup>25</sup> Jamatii ebacua cuaya jjimajo, Joseja Mania napa jjima poa. Ebacua cuayajo Jesosa bajjani acanaje.

## 2

### *Dejja cuana majametajo jjashahuaba neineiuijiani poeyanaje Jesosa baa*

<sup>1</sup> Jesosa cuayanaje Jodea meshijo, Benena cuiñajjijo. Cuayanajejo dejja Enode bajjani emeshi mese poa. Jamajjeya Jesosa Quito cuayanajejo, pea dejja cuana majametajo jjashahuaba neineiuijiani, eshequi poeje mijijje meshijo ba'e quea huesha nee poeyanaje Jenosanena cuiñajji yasijje. <sup>2</sup> Majoya oya cuanaa Enode huohui'ajja canaje jama ba'a: —Emeshi mese, ¿achejo jaa ebacua esho'i nei, ma Jodio cuanaja Emeshi Mese poaje'yo? Pea meshijo eshequi poeje mijijjejo nequi ojaya majameta ai quea jiji nee nee ecuaa banaje. Majoya ecuana poeyanaje o bihuiaa —poanaje.

<sup>3</sup> Jama huohui'ajjame acajje emeshi mese Enode quea ajjajja nee nee poanaje. Ojjaña dejja cuana Jenosanenajo ba'e pea'ai quea ajjajja poanaje. <sup>4</sup> Jamajjeya Enodeya ojjaña Eyacuiñajji nijje emimijji etii cuana, ojjaña Moisesija esohui etehue'yo huohuijji cuana pea'ai iyaa canaje o que. Jama huohui'ajjame acanaje ba'a: —¿Achejo shai cuayaje ebacua Quito? Oya Eyacuiñajjija huoojea'yo ese jaahuanajji poaje'yo —acanaje Enodeya.

<sup>5</sup> Oya cuanaa huohui canaje jama ba'a: —Quito Benenajo cuayaje, Jodea meshijo. Yahuajo nei nei huohui canaje Eyacuiñajjija esohui huohuijjiya jama ba'a:

<sup>6</sup> “Cuiñajji sisi Benena bajjani Jodea meshijo yani. Pea cuiñajji cuana quea quemo Jodea meshijo yani pea'ai. Benena cuiñajji quea biso. Jamatii jomajo cuayaje Isaeni dejja cuanaja Emeshi Mese quea pame nee. Ohuaya Eyacuiñajjija epeeji cuana jaahuana caje'yo”.

Jamaya aca poa esohui huohuijjiya yahuajo nei nei —oya cuana poanaje.

<sup>7</sup> Emeshi mese Enodeya dejja cuana eshequi poeje mijijje ba'e iyaa ca o'oyanaje o que. Quehuaje huohui'ajja canaje ebacuajo. Ma dejja cuaa huohui canaje ache mecajje majameta ai quea jiji nee nee ba coo canaje, ebacua cuayajo pojja'a. <sup>8</sup> Ebacuajo huohui mee majje Enodeya oya cuana huoojea canaje Benena huasijje ebacua baa. Jama huohui canaje Enodeya: —¡Poquicue miya! ¡Ebacua sa'ajja neineiuijicue! ¡Ba'yo majje poecue! ¡Eya huohuihuacue achejo ebacua jaa! Jamajjeya eya poquije pea'ai ebacua bihuiaa —Enode sijje poanaje.

<sup>9</sup> Emeshi mese Enodeya huoojea cajje ma dejja cuana poquinaje ejiojjijje. Ejiojjijo poquianijo majameta ai quea jiji nee eyajo ba ca o'oyanaje ehui dojojji, yahuajo jama. Majameta ai nequi cojja nei poqui'yonaje ebacua huasijje. Majameta jijinequinaje tii ebacua jaa cojja nei. <sup>10</sup> Majameta jijiqui ba majje quea bihui nee nee poanaje oya cuana. <sup>11</sup> Equi yasijje dobiquinaje. Ebacua Jesosa ba canaje enaese nijje, Mania nijje. Ba majje ebacua bihuia canaje ecui'oshajjajo nequiya. Bashosoco pichojea majje aqui ana quea nahue quia canaje ebacuaja. Mei huo'o quia canaje, shiyeshiye quea nahue quia canaje, esei quea shiye nee quia canaje pea'ai. <sup>12</sup> Majoya ma dejja cuana jjacahuibaquianijo, Eyacuiñajji onijje miminaje jama ba'a: —¡A'a poqui o'oyajji emeshe mese Enode yasijje! Jamajjeya oya cuana poqui o'oyanaje oja meshi yasijje pea ejiojjijje. Enode bana'yo jjima aca poa.

*Ebacua Jesosa quehua dojo canaje Ejito meshi yasijje*

<sup>13</sup> Majameta eba neinei'yoyji dejja cuana poqui'yo majje Eyacuiñajjija esohuidojojji poeyanaje Jose que, Jose ecahuijaajo. Miminaje Jose nijje jama ba'a: —¡Shequicue oe! ¡Nequisohuacue oe! ¡Ebacua, enaese pea'ai dojocujicue jjeyahua nei Ejito meshi yasijje! ¡Jomajo nequicue! Quijje eyaya miya huohuije miquea meshi yasijje epoe o'oyajji. Jjeya emeshi mese quea maseya Enode bajjaniya ebacua sa'ajja neinei cani equecuajea'yoyji.

<sup>14</sup> Jose nequisohua majje ebacua, enaese pea'ai dojocujaji canaje ejiojjijje Ejito meshi yasijje, mecashono. <sup>15</sup> Ejito meshijo nequi'yonaje emeshi mese Enode eshe nequijo. Enode mano'yajo Isaenija meshi yasijje poe o'oyanaje, Jose. Jamajjeya Eyacuiñajjija esohui huohuijjija esohui yahuajo nei nei jayojja jama poa. Eyacuiñajjija esohui tehue ca poa yahuajo nei nei jama ba'a: “Ecuea ebacua Ejito meshijo ba'e eyaya iyaa'yonaje”.

<sup>16</sup> Emeshi mese Enodeya ba canaje dejja majameta eba neinei'yoyji cuanaa oya dasia ca poa. Jamajjeya oya quea quene nee nee poa. Oja sohuinano cuana huoojea ca'ya poa: — ¡Ojjaña ebacua joya tonatona ai'ai quecuajeaquicue! ¡Benenajo ba'eja ebacua dejja sho'i cuana, Benena pejejo ba'eja pea'ai oe quecuajeaquicue!

Jamajjeya mano'yonaje ojjaña ebacua dejja sho'i daqui she becanejjijji pea'ai epo tonatona ai'ai, esho'i nei pea'ai.

E'e, majameta eba neinei'yoyji dejja cuanaja ehuhui'yojo, majameta ai quea jiji nee poanaje, ojjaña ebacua quecua sa poa Enode. <sup>17</sup> Eyacuiñajjija esohui huohuijji Jenemiaja esohui yahuajo nei nei jayojja jama aca poa Enodeya. Ebacua cuana quecua ca'ya poa jamaya. Jenemiaa aca poa jama ba'a:

<sup>18</sup> “Shama cuiñajjijo eyiyo ao'ao cuiñajjijo quea shajjaquijjo. Ojjaña janobajjima nei nei pa tiitii'yani. Jodio enaese cuana pa'añani oja bacua cuana mano'yajo. Quea yeno nee nee. Papajea'yo ajja”.

Jamaya etehue'yo yahuajo nei nei poa.

*Ebacua Jesosa Ejito meshijo ani poe o'oyanaje*

<sup>19</sup> Emeshi mese Enode mano'yajo Eyacuiñajjija esohuidojojji poeyanaje Jose que, Jose cahuijaajo, Ejito meshijo ba'ejo. <sup>20</sup> Huohui canaje jama ba'a: —¡Nequisohuacue, oe! ¡Ebacua, ojaya enaese pea'ai dojo'yocue Jodio meshi yasijje! Emeshi mese Enode mano'yonaje, ma ebacua Jesosa quecua'yoyji nisho poanaje.

<sup>21</sup> Jamajjeya Joseya nequisohua majje ebacua Jesosa, enaese pea'ai dojo ca o'oyanaje oja meshi yasijje, Jodioja meshi yasijje. <sup>22</sup> Enodeja bacua ejja Aquenao bajjani Jodea meshi mese eyacua poanaje. Jose jama shajja'ajja majje quea mete poanaje ma meshijo eba'ejji. Eyacuiñajjija huohui canaje Jose jjacahuibaquianijo: —¡Janinea meshi yasijje poquicue, Jose!

Jamajjeya Jose poquinaje Janinea meshi yasijje ba'e'yohua. <sup>23</sup> Nasanena cuiñajjijo Jose ba'enaje. Jamajjeya Eyacuiñajjija esohui huohuijjija esohui yahuajo nei nei jayojja jama poa ba'a: “Quijje pishana oya Nasanenajo ba'e dejja bajjani acaje”.

## 3

*Huaniya esohui huohui canaje quima huasijje*

(Macoso 1.1-8; Noca 3.1-9, 15-17; Huani 1.19-28)

<sup>1</sup> Jesosa Nasanenajo ba'yanijo, Huani, ona besameejji poani poeyanaje Jodea meshi yasijje. Dejja cuana meshi jabojo anica huasijje sohuihuohui huicha'a huicha'a canaje Huaniya. Jama acanaje ba'a: <sup>2</sup> —¡Miquea mimishi cuanajo quea yeno pocue; miquea mimishi cuana pajea'yocue! Jjeya nei Eyacuiñajji poeje ojjañaja Emeshi Mese nei nei —acanaje.

<sup>3</sup> Isaiaa Eyacuiñajjija esohui huohuijjija jama huohui ca poa yahuajo nei nei Huanijo ba'a:

“Oe dejja meshi jabojo nequi taaanequije. Jama poaje ba'a: —Jiquio ecua Emeshi Cuiñajji nei nejja ejiojji shabo jea cani jama, quea pojje nee nee acani jayojja jamaya

¡miquera ejjashahuabaquijji tai quea boejea nee nee a'yocue! Emeshi Mese nei nei poeje”.

Jamaya Isaiaa yahuajo nei nei tehue ca poa.

<sup>4</sup> Huaniya huo ña, cameno ña oja sipi huosho canaje. Ejjayica'aquijji ejee iya canaje. Shacui ijia canaje, huini pea'ai ishi canaje Huaniya. <sup>5</sup> Quea huiso dejja cuana Jodea meshijo ba'e, pea cuana Jenosanenajo ba'e pea'ai, pea cuana cuei Jodana sahuajo ba'e pea'ai Huani que poeyanaje o shajja'ajjaa. <sup>6</sup> Oya cuana quea mimishi poanijo quea yeno poani. Jamajjeya oja mimishi cuana huohui ca'yonaje. Mimishi cuana pajea sa poanijo, Huaniya oya cuana Eyacuiñajji nijje epo'yojji besa mee canaje Jodana cueijo.

<sup>7</sup> Jodioja esohui huohuijji Paniseo bajjani cuana, Sanoseo dejja cuana pea'ai poeyanaje Huani que; Eyacuiñajji nijje ejjapeequi'yojji nisho besa'yo sa poani pea'ai. Huaniya oya cuana ba majje tecuea canaje. Jama acanaje ba'a: —Miya peyo jama, jjadasiaquiani. ¿Aya acuae mi huohui canaje? Jama ba'a: “¡Eyacuiñajjijo besa meecue! Jamajjeya ojaya miquianaya enapa'yojji pojjeama”. <sup>8</sup> Chojja. ¡Quea pame tii oe ba'e'yocue! ¡Mimishi cuana oe pajea'yocue; a'a quea jjashahuabaqui tai po o'oyajji! Jamajjeya miya Eyacuiñajjija enapajji pojjeama. <sup>9</sup> A'a jjashahuabaquijji jama ba'a: “Amajama ecuanaja etiiquiana. Oya quea pame nee poanaje. Ecuana Amajamaja bacua poanijojo, Eyacuiñajjija enapajji pojjeama”. Chojja de. Miquiana Amajamaja bacua quea mimishi poanijo, Eyacuiñajjiya cajaa mi acaje'yo. E'e de, ohuaya pea Amajamaja bacua jayojja epojji pana caje'yo pojja'a mei, meshi pojja'a —Huaniya acanaje.

<sup>10</sup> —Jama ba'a: Acui tai sajja jajacajja caje'yo cuaqui cabojjiya. Ejjajja chamajo acui cajaa acaje'yo. Jajajea'yo majje dahuajea caje'yo. Dejja mimishi acui tai jayojja jama acaje'yo Eyacuiñajjiya; cuaqui yasijje jea caje'yo. <sup>11</sup> Eyaya miquianaya Eyacuiñajjijo besa meeje'yo enajo, ca mique mimishi cuana epajea'yojo. Quijje pishana poeje Quito. Ohuaya mi que Eyacuiñajjija Edojjoshahua Pame dobiqúi mee caje'yo. Jamajjeya miya quea pame poaje'yo. Mimishi cuana pajea sa po'yo ajjajo ca ca jeajea caje'yo cuaqui yasijje. Jamaya pea'ai ba'a: Quito oe nei quea ca'a nee nee nequi. Eya ca iña quea ca'a pishana nequi. Jamajjeya eya ca iña onijje nequi sa po ajja miquiana que cojja. Quea bicho. <sup>12</sup> Dejja oja tepeya shaa dojo mee majje anoso iya ca'yani equijo; eshaa dahuajea cani. Jiquio eua anoso shaa dojo mee cani jama eseya acaje'yo Eyacuiñajjiya. Joya quea pame nee ba'yani jaahuana caje'yo tii. Mimishi cuana ca ca quiyojea canequije'yo tii tii.

*Huaniya Jesosa Eyacuiñajjijo besa mee canaje*  
(Macoso 1.9-11; Noca 3.21-22)

<sup>13</sup> Majoya Jesosa Janinea meshi yobijo ani macua huasijje po'oquequinaje Jodana cuei yasijje Huani que. Jesosaa Huani ba majje jama acanaje ba'a: —Huani, ¡eya besa meecue Eyacuiñajjijo, miyaya!

<sup>14</sup> —Chojja, Emeshi Mese —Huani poanaje—. ¡Miyaya eya besa meecue Eyacuiñajjijo, miya quea pame nee neejo! ¿Yajjajje miya e que poe'yonaje? Eya ca ca iña quea pame pishana, de.

<sup>15</sup> —¡Eyaya huohuiaña jama miyaya a'yocue! ¡Jamajjeya Eyacuiñajjija ehuohui'yo ejo acue! —Jesosa poanaje.

Jamajjeya Huaniya Jesosa besa mee canaje Eyacuiñajjijo. <sup>16</sup> Huaniya Jesosa besa mee majje jjequicuaya ca'yajje, ba canaje eyatahuatahua ca'apejo canaje. Eyacuiñajjija Edojjoshahua Pame huia' jama o sapa biajje cuabesa ba'enaje. Ecapashinei ba'eoquenaje. <sup>17</sup> Eyacuiñajjiya oja Bacua Ejja jama acanaje ba'a: —Miya ecue Bacua Ejja quea jea nee nee. Eya mijo quea bihui nee nee poani.

*Jesosa quea mimishi po mee sa acanaje Edosiquiaa*  
(Macoso 1.12-13; Noca 4.1-13)

<sup>1</sup>Jjeyahua nei Edojjoshahua Pameya Jesosa quima huasijje meshi jabo huasijje huoojea canaje. Majoya Edosiquiaa Jesosa quea mimishi po mee sa acanaje. <sup>2</sup>Jesosa jomajo nequinaje peaja ejiojji cahui huisome, 40 cahuime. Mahuiso epojja, mecajje pea'ai nequinaje quimajo bobima' nei nei. Majoya quea shoe poanaje. <sup>3</sup>Majoya aje Edosiquiana poeyanaje Jesosa que; miminequinaje jama ba'a: —Miya Eyacuiñajjija Bacua Ejja jjabaqui majje ¡miyaya jiquio mei cuana pahui jayojja acue, miquea e'ijji! ¡jji!

<sup>4</sup>—Chojja de. ¡Bacue Eyacuiñajjija esohui etehue'yo! Jama poani ba'a: “Dejja cuana bobijo ca'a po majje pojjeama ba'e tiitiije'yo. Ojjaña Eyacuiñajjija esohui jayojja jama añajo ca se ca quea pame nee ba'e tiitiije'yo”. Jamaya aca poa —jamaya Jesosa poanaje.

<sup>5</sup>Majoya Edosiquiaa Jesosa dojo canaje Jenosanena huasijje. Jomajo Eyacuiñajjija equi quea ao nee nee yasijje nequisohuaqui mee canaje; equi jamacoo biajje nequi mee canaje. Jama acanaje ba'a: <sup>6</sup>—Miya Eyacuiñajjija Bacua Ejja jjabaqui majje ¡tohuaacue meshi yasijje! Jamajjeya Eyacuiñajjija esohui jama etehue'yo jaa ba'a:

“Eyacuiñajjija esohuidojojji cuana huoojea caje mi yasijje, mi jaahuanaa. Oquequiajo ojaya emeya miya iñajjequisohua caje'yo, ohuaya. Jamajjeya miya ejjajiojji quecuasajaqui jjima poaje meijo”.

<sup>7</sup>Jesosa onijje miminaje jama ba'a: —Chojja. Yahuajo jama Eyacuiñajjija esohui etehue'yo pea'ai ba'a:

“A'a jama ajji ba'a: —¿A'a e'e jojo nei Eyacuiñajjija oja sohui acaje'yo pojja'a? ¿A'a eya Eyacuiñajjija jaahuana nei caje'yo? ¡Caba'ajjasahua! —a'a pojji”. Jamaya yahuajo nei Moisesiya tehue ca poa —Jesosaa acanaje.

<sup>8</sup>Majoya Edosiquiaa Jesosa dojosohuaqui canaje eyiyo ao huasijje. O shajja'ajjajji nisho jamaya Edosiquiaa Jesosa huohui canaje: —¡Bacue ojjaña meshi cuana, emeshi mese cuana pea'ai, cuiñajji cuana, aquiana quea nahue cuana pea'ai! Ojjaña quea pame nee nee. <sup>9</sup>Ojjaña jiquio aquiana cuana, dejja cuana pea'ai miquea poaje'yo; miya Emeshi Mese nei nei eyaya po meeje'yo jjeya nei ca miyaya eya bihuia'yajo ecui'oshajjajo nequi majje —jama siajje ameya acanaje Edosiquiaa Jesosa.

<sup>10</sup>Jamajjeya Jesosaa jama huoojeajeame acanaje ba'a: —¡Chojja Edosiquiana! Eyaya miya bihuia ajja, de. ¡Poquicue miya! Jamaya Eyacuiñajjija esohui etehue'yo yahuajo pea'ai ba'a:

“¡Eyacuiñajji oe nei bihuiaacue! Oya oe nei ojjañaja Emeshi Mese nei nequi. ¡Ojaya esohui jama oe acue!”

<sup>11</sup>Jamajjeya Jesosaa huoojea cajje Edosiquiana, Satanasa poqui'yonaje. Majoya Eyacuiñajjija esohuidojojji cuana quea huiso poeyanaje Jesosa jaahuanaa, bobiaa pea'ai.

*Jesosaa esohui huohui canaje Janinea meshijo*  
(Macoso 1.14-15; Noca 4.14-15)

<sup>12</sup>Quijje pea cuaa Huani, ma ona besameejji poa jeanobiajea canaje. Shajja'ajja majje Jesosa posohuaqui o'oyanaje oja meshi yasijje, Janinea meshi yasijje. <sup>13</sup>Oya nequiñaqui jjima Nasanenajo. Pea cuiñajji yasijje, Capenaoma huasijje poquinaje ba'eya. Janinea bae sahuajo, Samononi meshi, Netani meshi pea'ai pejeje ba'enaje. <sup>14</sup>Yahuajo nei nei Eyacuiñajjija esohui huohuijija Isaiia huohui ca poa jama ba'a:

<sup>15-16</sup>“Ojjaña cuana quea mimishijo, esohui ba jjimajo quea apo ba'yani. Eyacuiñajji ba majje oya cuana quea ja'a nee ba'e mee caje'yo. Eyacuiñajji ojaya ba jjimajo quea yeno nee ba'yani. Jjeya ca ca quea jaji nee ba'e mee caje'yo. E'e, Samononi meshijo, Netani meshi pea'ajjo, Janinea bae sahuajo ba'eca cuana, Cueji Pashi ma Jodana cuei bajjani sahuajo, ojje ba'eca cuana, Janinea meshijo, pea bajjani Ese Ejja sohuijo ba'a: Eyacuiñajji ba po jjimaja meshijo ba'eca cuana pea'ai quea mimishi poanaje. Jjeya ca ca quea ja'a nee ba'e mee caje'yo”.

Jamaya Isaiia huohui ca poa yahuajo nei nei Jesosaja epoejjijo.



<sup>17</sup> Majoya Jesosaa esohui huohui canaje jama ba'a: —Jjeyahua nei Eyacuiñajji miquea Emeshi Mese nei poeje. Jamajjeya ¡miquea mimishijo quea yeno pocue! ¡Mimishi cuana pajea'yocue miquiaaya! —acanaje.

*Jesosaa nahuoo cuiashajajji iyaa canaje onijje epo'yojji*  
(Macoso 1.16-20; Noca 5.1-11)

<sup>18</sup> Majoya Jesosa poquinaje Janinea bae sahua huasijje. Jomajo ohuaya Anesi, Anesija o'i Peno bajjani, ma Simohui pea'ai bajjani ba canaje. Oya cuana nahuoo cuiashajajji nei nei bajio. Nahuoo cuiashaja cani. <sup>19</sup> Jesosaa oya cuana iyaa canaje: —¡Enijje po'yocue! Eyaya miya dejja cuana jjequi meesahua'yojji aje'yo e que.

<sup>20</sup> Jjeyahua nei nei oya cuana ojaya eshajajji cuana jeana'yo majje onijje poqui'yonaje.

<sup>21</sup> Majoya Jesosaa poqui pishana majje pea cuana ba canaje. Semeneoja bacua ejja Jacobo ba canaje ojaya echahua mese nijje, Huani nijje. Bishe aijo eshajajji je'e'yo po'ani ba canaje. Jjeyahua nei Jesosaa oya cuana iyaa canaje. <sup>22</sup> Jamajjeya Jesosaa iyaa cajje oja chii Semeneo bishejo ani tii jiña ca'ya poa cuaa Jesosa nijje epoqui'yojji.

*Jesosaa pea esohui huohui canaje emanojaa cuana huaquia mee ca'yonaje*  
(Noca 6.17-19)

<sup>23</sup> Jesosa poquinaje ojjaña cuiñajji cuana huasijje Janinea meshijo. Jodio dejja cuanaja equi ojee ejjachichaquijji yasijje dobiquinaje esohui huohuiya. Jama poanaje ba'a: —Eya ojjañaja Emeshi Mese poaje'yo.

Ohuaya quea huiso emanojaa cuana jjaajaqui mee ca'yonaje, huaquia mee ca'yonaje pea'ai. <sup>24</sup> Quea huiso Sinia meshijo ba'eca cuaa Jesosaa huaquia mee ca'yoqui shajja'ajja canaje pea'ai. Jamajjeya o que jjequi canaje quea huiso emanojaa cuana. E'e, ojjaña cuana quea nee poani, pea cuana niñepoqui cuana, jjequi'ihuicajaa cuana pea'ai, jiojjijajja cuana pea'ai o que jjequi canaje. Ojjaña cuana huaquia mee ca'yonaje, jjaaja meequi ca'yonaje, Jesosaa. <sup>25</sup> Jamajjeya Jesosa poquianijo, quea huiso nee nee cuana ojee poquinaje onijje. E'e, dejja cuana quea huiso nee, ponaponaña pea'ai Janinea meshijo ba'e cuana, Jenosanenajo ba'e cuana, Jodea meshijo ba'e cuana, pea Ome miji pea'ai Cuiñajjijo ba'e cuana, Cuei Cueji Pashijo Jodana cuei ojje mijijje ba'e cuana pea'ai; quea huiso nee nee Jesosa nijje poquinaje.

## 5

*Jesosa eyiyojo aniya esohui huohui canaje*  
(Noca 6.20-23)

<sup>1</sup> Dejja quea huiso cuana ba majje Jesosa eyiyo huasijje jaasohua pishanaquinaje. <sup>2</sup> Jomajo anioque majje ojjaña cuana sohuihuohui canaje jama ba'a: <sup>3</sup> —¡Bacue! Beca cuana jjashahuabaquiani jama ba'a: “E'e, de, eya quea mimishi nee. ¡Eyacuiñajjiya ecuea mimishi cacuijea ca'yahua!” Jamaya jjashahuabaquianijo Eyacuiñajjiya oya ba'e tiitii mee caje'yo onijje eyajo. ¡Oya cuana quea bihui nee capo'yahua! <sup>4</sup> Oja epeeji cuana mimishijo quea yeno poanijo, Eyacuiñajjiya quea bihui nee po mee caje'yo mimishi cuijea ca'yajje. <sup>5</sup> Ojaya epeeji cuana quea bei poani Eyacuiñajjiya quea jea nee; onijje ba'e tiitii mee caje'yo. ¡Quea bihui nee capo'yahua oya cuana!

<sup>6</sup> —Ojaya epeeji cuana Eyacuiñajjiya esohui jayojja jama a sa neinei poanijo, Eyacuiñajjiya oya cuana quea jaji nee nee ba'e meesahua caje'yo. ¡Quea bihui nee capo'yahua oya cuana!

<sup>7</sup> —Ojaya epeeji cuana pea cuanajo jjashahuabaquiani pea jaahuanajji. Jamaya poanijo pea cuaa, Eyacuiñajjiya pea'ai oya cuana jaahuana caje'yo. Tecue'ama poaje'yo ona nijje. ¡E'e jojo nei quea bihui nee capo'yahua ojaya epeeji cuana! <sup>8</sup> Ojaya epeeji cuana mimishi cuana a'ajjajo Eyacuiñajji nijje ba'e tiitije'yo. ¡Quea bihui nee capo'yahua oya cuana! <sup>9</sup> Ojaya epeeji cuaa pea cuana quea bei po meesahua canijo, ojjañaja eba oya cuana Eyacuiñajjiya bacua cuana e'e jojo nei; quea pame nee. <sup>10</sup> Ojaya epeeji cuana quea ja'a nee

ba'yanijo, onaaya oya cuana cuia caje'yo. ¡Jamatii oya cuana quea bihui nee capo'yahua! E'e, quijje eyajo oya cuana ojjaña huoojea'yojji enijje poaje'yo —Jesosaa huohui canaje.

<sup>11</sup> Majoya Jesosa Quitohua ojaya epeeji cuana huohui canaje jama ba'a: —Miquianaya ecuea epeeji poanijo, pea cuana minijje mimijajije; miya napa caje pea'ai, sijje poaje mijo pea'ai. Jamatii Eyacuiñajjiya miquianaya quea bihui nee po mee caje'yo. Eyajo onijje ba'e tiitii mee caje'yo. <sup>12</sup> E'e, Eyacuiñajjiya esohui huohuijji yahuajo nei nei ba'ya poa cuana jamaya aca poa mimishi cuaa; napa ca poa pea'ai. Jamajjeya jona jayojja jama pocue, quea bei! Eyacuiñajjiya miquianaya ojee ba'e mee caje'yo tiitii eyajo quea bihui nee nee —Jesosaa huohui canaje.

*Ae jayojja Eyacuiñajjiya epeeji*  
(Macoso 9.50; Noca 14.34-35)

<sup>13</sup> —Ecuea esohui jayojja jama añajo, pea cuana mi jayojja jama ba'eje quea pame nee pea'ai. Jamajjeya miya sane jama, mei sese jama. Mei seseya shicui cajje bobi ihui'yo ajja poani. Jamatii mei sese sese'ama poa jojjemo ¿a'a quea sese po meeje o'oya? Chojja. Sese'amajo quea huesha jeajea'aña seya. Jiquio ecua sane sese'ama jeajea'aña seya jama miya ecuea esohui jama po ajjajo, cajaa achana' eyaya.

<sup>14</sup> —Enijje jjapeequianijo miquianaya cuaquijji jama. Cuiñajji emaco ao'ajo nequi ba caje cuaa quea huesha nee mecajje pea'ai. Jiquio ecua emacojo nequia jama ecuea epeejiya pea cuana Eyacuiñajji ba meesahua caje'yo enijje jjapeequianiya jjejojo. <sup>15</sup> Cuaquijji sisi capaca ajja. Chojja. Cuaquijji sisi nequia cajji acui biajje, ojjaña equijo ani cuana jeaja'ajji. <sup>16</sup> ¡Jiquio ecua cuaquijjiya ojjaña equijo ani jeaja'a cani jayojja jama quea pame nee ba'ecue! Jamajjeya miquianaya quea pame ba majje pea cuanaa Eyacuiñajji, esejaya Chii eyajo bihuia caje'yo —Jesosa poanaje.

*Moisesija esohui etehue'yo quea pame nee*

<sup>17</sup> Jesosaa pea esohui huohui canaje jama ba'a: —Eyaya Moisesija esohui yahuajo etehue'yo cajaa a'ajja. Eyacuiñajjiya esohui huohuijji cuanaja esohui yahuajo nei eyaya cajaa a'ajja pea'ai. Cho. Eya poeyanaje onajaya esohui jama a'yohua. E'e, oya cuaa yahuajo nei nei ejo huohui ca poa. Jjeya eyaya onajaya esohui jayojja jama aje'yo. <sup>18</sup> E'e jojo nei ojjaña Moisesija esohui cuana cajaa pojjeama poaje'yo. Ojaya esohui biso nei pea'ai cajaa pojjeama poaje'yo. Quea pame nee ani tiitije'yo. Jamajjeya ojjaña ojaya esohui yahuajo nei nei etehue'yo jama aje'yo. Ojjaña apoa ajeyo'yo majje ecuea echacojji jiquio meshijo apoa poaje'yo. <sup>19</sup> Jamajjeya jaya Moisesija esohui etehue'yo jama ba'e sa po ajjajo, oja sohui jama pojjeama huohui cajo, enijje ba'e meeme ajja quijje eya ojjañaja Emeshi Mese nei poajo. Jya Moisesija etehue'yo jama acani, oja sohui jama huohui cani pea'ai ca ca enijje ba'eje'yo quijje eya ojjañaja Emeshi Mese oe nei poajo. <sup>20</sup> ¡Bacue! Moisesija etehue'yo huohuijji poani, Jodioja esohui huohuijji Paniseo bajjani cuana pea'aiya quea pame nee huohui ajja; quea pame ba'e ajja pea'ai. Jamajjeya miquiana ona jama ba'yajo, ona jama huohuijjo pea'ai miquianaya ba'e ajja enijje quijje eya ojjañaja Emeshi Mese nei poajo —Jesosa poanaje.

*Moisesija etehue'yo yahuajo nei quea pame pishana Jesosaja ehuohui'yo quea pame nee nee*  
(Noca 12.57-59)

<sup>21</sup> —Miquea eba Moisesija etehue'yo yahuajo jama ba'a: “¡A'a pea quecuajji!” Jamajjeya pea quecuajji epo dojo caje'yo cuaa emeshi meseja dejja huoojeajji yasijje. <sup>22</sup> ¡Jjeya ecuea esohui eyacua shajja'ajjacue oe! Ojjaña jaya pea nijje quea quene nee nee poani aje oe emeshi mese yasijje poquije. Quea tecue poaje emeshi mese onijje. Jya pea nijje mimijajajo, “miya cajaa” acajo, cadojo cahua emeshi meseja esohui huohuijji cuana huasijje jjabahuejjaqui meeya. Jya pea nijje panajaji neineiyajo, cajaa nei nei acajo pea'ai cuaqui yasijje huoojea ca chana' pea'ai —Jesosa poanaje.

<sup>23</sup> —E'e pojja'a miya Eyacuiñajjiya equi yasijje poquiani aquiana quia'yohua Eyacuiñajji bihuiajji. Ma aquiana quia'yo jjimahuajo jjashahuabaquicue miquea epeeji! ¿A'a miquea epeeji quea yeno poani minijje miya quea tai añajo? <sup>24</sup> ¡Jamajjeya miquea epeeji

yasijje poquicue! ¡Onijje mimiquicue! ¡Quea bei minijje po mee o'oyacue! ¡Majoya miquea aquiana quiaquicue Eyacuiñajji bihuiajji! —Jesosa poanaje.

<sup>25</sup> —¡Pea cuana quea quene minijje poajo o que poquicujicue! ¡Quea bei po mee o'oyacue jjeja nei! Ohuaya miya dojo ca chana' emeshi mese yasijje, napa meeya. Emeshi meseya miya huoojea ca chana' sohuinano huasijje. Sohuinanohua miya equi ejjajeanoabiaquijji yasijje jeanobia ca chana'. <sup>26</sup> Jomajo nequi tiitii mee caje. Ma minijje quea quene nee poanaje sosequiajeyo'yo majje miya ejeanobianequi jeacuaya caje'yo, de —Jesosa poanaje—. ¡Iiquio jayojjaya oe pocue! ¡Jamajjeya Eyacuiñajji nijje jjapeequicujicue mano'yo jjimahua, cuaqui yasijje jeajea jjimahua!

*¡A'a jjashahuabaquijji pea eponajo!*

<sup>27</sup> —Cuanaya miquea eba Moisesija etehue'yo jama ba'a: “¡A'a pea cojjoji po-  
jji!” <sup>28</sup> Jjeja ecuea esohui eyacua shajja'ajjacue jama ba'a: Dejja pea eponajo  
jjashahuabaquianijo oya pea cojjoji epojji jayojja jama poani, ojaya ejjashahuabaqui'y-  
ojjijo; quea mimishi poani. <sup>29</sup> Jamajjeya ¡a'a quea mimishi pojji! Miya quea mimishi  
poani epona, aquiana pojja'a baqui majje ¡maya bapajea'yocue! Jea ba majje mimishi po  
majamajañajo cuaqui yasijje dobiquire'yo tii. Jamajjeya ¡a'a jea bajji! <sup>30</sup> Pea'ai miya quea  
mimishi poani aquiana emeya napañajo ¡a'a aquiana napajji! Quea mimishi po chana';  
cuaqui yasijje dobiquire'yo chana'. Jamajjeya ¡a'a onaja aquiana napajji! Sii chanaya —  
Jesosa poanaje.

*Esohui ehuanase huei canijo*

*(Mateo 19.9; Macoso 10.11-12; Noca 16.18)*

<sup>31</sup> —Moisesija etehue'yo jama poa pea'ai ba'a: “Dejjaa ojaya ehuanase cajaa acajo,  
huei canijo ¡esohui catehue cahua ehueijji!” <sup>32</sup> ¡Ecuea esohui eyacua shajja'ajjacue! ¡A'a  
miquea ehuanase pea dejjaja sii jjima hueijji! Epona quea pame ba'e huei'yo majje pea  
dejja nijje jjahueaquiajo, yahue ebionei eshe nequijo, quea mimishi po mee cani ebionei  
yahueya. Oya eshe enequijojo oja yahue eyacua quea mimishi poani pea'ai —Jesosa  
poanaje.

<sup>33</sup> —Moisesija etehue'yo jama poa pea'ai ba'a:

“Miyaya huohuiana jama ba'a: —Eyacuiñajjiya eya shajja'ajja canijo, e'e jojo nei eyaya  
ecuea esohui jama aje'yo. ¡Jamaya mimi majje miquea esohui jama acue; a'a  
pajea'yojji!” <sup>34</sup> ¡Jjeja ecuea esohui eyacua shajja'ajjacue! Jama ba'a: ¡A'a oe sijje  
pojji! ¡Pea nijje mimi majje miquea esohui jayojja jama acue! Jamajjeya pea nijje  
mimianijo a'a huohuijji jama ba'a: “Eyacuiñajji eshe eyajo yanijo, ecuea esohui  
jama eyaya aje'yo. Ecuea esohui e'e nei pojjeama jojjemo eya quea nee po mee  
ca'yome”. Cho. Eyajo Eyacuiñajji ejjahuojeaquijji tii tii. <sup>35</sup> Jamaya a'a mimijji  
pea'ai ba'a: “Meshi yanijo, oe po jjimajo ecuea esohui jama eyaya aje'yo. Ecuea  
esohui e'e nei pojjeama jojjemo meshi jjani yasijje eya mojea ca'yome”. Cho.  
Meshi cuana miquea pojjeama; Eyacuiñajji Emeshi Mese oe nei poani. Jamaya a'a  
mimijji pea'ai ba'a: “Jenosanena yanijo, oe po jjimajo ecuea esohui jama eyaya  
aje'yo. Ecuea esohui e'e nei pojjeama jojjemo Jenosanena cuiñajji esecue yasijje  
mo huoojeacuaya ca'yome”. Cho, Jenosanena miquea pojjeama; Eyacuiñajji  
Jenosanena Meshi Mese poani. <sup>36</sup> Jamajjeya a'a huohuijji miyaya: “Ecuea esohui  
e'e nei pojjeama jojjemo camano mee ca'yome”. Chojja. <sup>37</sup> Jamajjeya huohuicue  
jama ba'a: “E'e, eyaya jama aje'yo”. “Chojja eyaya jama a'ajja” acue —Jesosa  
poanaje.

*Esohui dejja quea quenejo*

*(Noca 6.29-30)*

<sup>38</sup> —Miquea eba Moisesija etehue'yo jama pea'ai ba'a: “¡Peaa cojja cuiasejjajea cajje  
jjasosequiaquicue; cojja cuiasejjajea pea'aicue! ¡Peaa se' cuiasajajea cajo se' cuiasajajea  
pea'aicue!” <sup>39</sup> Ecuea esohui eyacua ca ca jama ba'a: Onaaya miya napa cajje ¡a'a  
jjashahuabaquijji onijje ejjasoseaquijji! ¡Mique shemo ebianeijji mijijje cuia cajje shemo

shani mijijje cuia mee o'oyacue! <sup>40</sup> Peaa miquea daqui sa poanijo miya dojo cani dejja etii bajjani yasijje huohuiya; miquea daqui dojo cajo, jamatii ¡miquea daqui moo quiacue pea'ai! <sup>41</sup> Dejja maseya miya iña cajje ojaya aquiana quea huesha pishana dojo mee cajo, ¡quea huesha nee dojocue, jamatii! <sup>42</sup> Pea Ese Ejja miquea aquiana sa neinei poanijo ja'a quea dejja tai pojji! ¡A'a quea nishhui pojji! ¡Oya quiacue! Pea cuana miquea aquiana dojo sa poanijo ¡oe pojji cahuime dojo meecue! Minijje mimiajo: “¡Che iña jiquio dojo meecue; quijje aje jje jeahuaje'yo!” acajje; “¡E'e, dojocue!” saja'ame acue. Jamajjeya ¡ojjaña cuana nijje quea bei ba'ecue! ¡A'a o jayojjaya quea mimishi, quea tai pojji! — Jesosa poanaje.

*Joya minijje quea quene nee poani quea jea acue*

*(Noca 6.27-28, 32-36)*

<sup>43</sup> —Miquea eba etehue'yo yahuajo nei jama ba'a: “¡Miquea epeeji quea jea nee acue! Miquea epeeji pojjeama, cho. ¡Onijje quea quene pocue epeeji pojjeama jjejojo!” <sup>44</sup> Ecuea esohui eyacua ca ca jama ba'a —Jesosa poanaje—: ¡Miquea epeeji pojjeama quea jea nee acue pea'ai! Miya Eyacuiñajjija epeeji poanijo, miya napa cajje ¡Eyacuiñajji nijje mimicue maa mi napajji poanijo! Jamajjeya e'e pojja'a oya cuana Eyacuiñajji nijje jjapeequije'yo pea'ai. <sup>45</sup> Jamaya poanijo miquianaya Eyacuiñajji eseja Chii eyajo anija bacua cuana poani. E'e, Eyacuiñajjiya eshequi quea ja'a nee jiji mee cani dejja quea pamejo, dejja quea mimishijo pea'ai. Ohuaya ena huoojea cani dejja quea pame neeja que shepajji, dejja quea mimishija que shepajji pea'ai —Jesosa poanaje.

<sup>46</sup> —Joya mi quea jea nee ajji poani miquea quea jea nee pea'ai; minijje quea mase ca ca miquea boti'ama. Eyacuiñajjija epeeji pojjeama cuana aje oe jamaya poani pea'ai, de. Jamajjeya miya jamaya poanijo ¿a'a Eyacuiñajjiya miya bihuia caje? Cho. <sup>47</sup> Miquianaya aje jja oe miquea epeeji cuana nijje quea bei nee mimiani, pea cuana nijje mimi ajja. ¿A'a jamaya poani ojjaña dejja cuana? E'e. Eyacuiñajjija epeeji pojjeama cuana aje oe jamaya poani pea'ai, de. <sup>48</sup> Jamajjeya esejaya Chii eyajo quea pame nee ani. Ojjaña cuana Eyacuiñajjija quea jea nee nee. ¡Eyacuiñajji jayojjaya jama pocue quea bei nee nee! — Jesosa poanaje.

## 6

*¡Quea ja'a nee jjapeequicue Eyacuiñajji nijje!*

<sup>1</sup> Jesosa poanaje pea'ai: —¿Apiojji miya Eyacuiñajjijo chacochoacoani pea cuaa ba canijo? E'e pojja'a jjashahuabaquiani miya bihuia caje cuaa ba majje. Onaja ebajji chacochoacoanijo, quijje eyajo miquea echaco ojo Eyacuiñajjiya miya bihuia ajja, esosequiajji pojjeama —Jesosa poanaje.

<sup>2</sup> —Aquiana aema huasijje quia'yo majje a'a mimijji jama ba'a: “¡Bacue, eya quea pame nee poani!” Chojo. Jamaya poani Eyacuiñajjija epeeji nisho cuana Eyacuiñajjija equijo, ejiojji cuanajo pea'ai. Onaaya Eyacuiñajjijo chaco cani pea cuanaja ebajji. Jamajjeya quijje eyajo Eyacuiñajjija oya ebihuiajji pojjeama; ojaya echaco esosequiajji pojjeama pea'ai. <sup>3</sup> ¡Miyaya aema huasijje aquiana cuana quehuajje quiacue! Jamajjeya ¡miquea epeeji neinei ja ba jjima quiacue! <sup>4</sup> Miquea Chiiya eyajo aniya ca ca oe ba caje; ohuaya miya quijje sosequia caje'yo —Jesosa poanaje.

*Eyacuiñajji nijje jama mimime pocue ba'a*

*(Noca 11.2-4)*

<sup>5</sup> Jesosaa o shajja'ajjajji cuana huohui canaje pea jama ba'a: —Eyacuiñajji nijje mimianijo ja'a joya ecua Eyacuiñajji nijje jjapee nishoquiani jayojja jama mimijji! Oya cuana aje oe Jodioja ojee ejjachichaquijji equijo nequiani, ojjaña ebajji miminequiani. Esecuejo ojjaña anica cojja nei pea'ai miminequiani. Eyaya miya e'e jojo nei huohuiaña oya cuana miminishonequiani —Jesosa poanaje—. Jamajjeya Eyacuiñajjija epeeji nei poso ojjaña oya ba cani. Jamajjeya onaaya bihuia canaje sosejje Eyacuiñajji nijje miminisho'aninajejo quijje eyajo oya cuana enijje enequi'yojji pojjeama, Eyacuiñajjija

epeeji nisho jjejojo. <sup>6</sup> ¡Miquianaya ca ca miquea equi quecuayijji me ne mimi'anicue Eyacuiñajji nijje, pea cuaa eba ca poani jjejojo! ¡Eseja Chii nijje jomajo mimicue! Ohuaya miya ba cani, shajja'ajja cani; mi pejejo nequiani oya. Eseyaya emimi bame bame jayojja jama acaje'yo, eseja Chiiya —Jesosa poanaje.

<sup>7</sup> —Pea cuana Eyacuiñajji ba jjimajo eyacuiñajji nisho nijje mimiani. Oya esohui majamaja acani. Mimi majamajani eyacuiñajji nishohua eshajja'ajja caje poso. <sup>8</sup> ¡A'a o jayojja jama pojji! Eyacuiñajji nijje mimi sa po jjimahuajo, ojaya esejaya ejjashahuabaquijji eba, de, eseja Chiiya eyajo anija —Jesosa poanaje.

<sup>9</sup> —Jamajjeya Eyacuiñajji nijje mimianijo mimicue jama ba'a:

Eyacuiñajji, miya ecuanaja Chii quea bame nee.

Miya eyajo quea ca'a nee ani.

¡Ojjaña cuaa miya cabihuia cahua, oe nei quea ja'a nee!

<sup>10</sup> Miya ojjaña cuanaja Emeshi Mese poani tii tii.

Eyajo miquea ejjashahuabaqui'yojji jayojja jama poani ojjaña.

¡Jamaya oe pocue ojjaña meshijo pea'ai!

<sup>11</sup> ¡Jjeya eya ba'e meesahuacue!

<sup>12</sup> Eya quene'ama pea cuana nijje, joya enijje quea mimishi poani nijje.

Jamajjeya ¡ecuea mimishi cuanajo a'a quea quene pojji pea'ai!

<sup>13</sup> ¡A'a eya quea mimishi po meeji!

¡Nahue neineicue mo, Eyacuiñajji!

¡Edosiquianaja epeejiyo eya jaahuanacue!

E'e Eyacuiñajji, miya ojjañaja Emeshi Mese poani tii tii.

Miya oe nei quea ca'a nee enequi tii tii, quea pame nee.

¡Ojjaña miya cabihuia cahua tii tii!

E'e, jamaya apoa ecuea emimi.

¡Jamaya Eyacuiñajji nijje mimicue! —Jesosa poanaje.

<sup>14</sup> —E'e, ¡jiquio ecua eya jama jjashahuabaquime oe pocue! Pea cuana nijje mimicue jama ba'a: “Miya enijje mimijajinaje quea tai. Jamatii eya miquea mimishijo quene'ama” jamaya pocue. Jamaya pea nijje mimianijo Eyacuiñajji miquea mimishijo quene'ama poaje'yo pea'ai. <sup>15</sup> Pea nijje quea quene tii tii poanijo ca ca Eyacuiñajji eseja Chii miquea mimishijo quea quene tii tii poaje'yo pea'ai; miquea mimishi ecuijea'yojji pojjeama —Jesosa poanaje.

*Eyacuiñajji nijje eseya bobima' mimi cajji ijia'ijia jjima ani majje*

<sup>16</sup> —Eyacuiñajjija epeeji nisho ijia'ijia jjima mimianijo quea yeno jayojja poani, ecojja topo jjima ojjaña cuanaja ebajji. Jamajjeya ojo jama poani ba'a: “E'e, oya Eyacuiñajjija epeeji nei nei; ijia'ijia jjima mimiani Eyacuiñajji nijje, de” poani —Jesosa poanaje—. Chojja, edasia'yojji poani. Eyacuiñajjija epeeji nei poso pea cuaa acani. Jamajjeya ojjañaja ebajji oya mimiani. Quijje oya cuana enijje enequi'yojji pojjeama eyajo Eyacuiñajjija epeeji nisho jjejojo —Jesosa poanaje—. <sup>17</sup> Miquianaya ca ca ecuea epeeji nei. Ijia'ijia jjima Eyacuiñajji nijje mimianijo ¡a'a quea yeno jayojja pojji! ¡A'a jjadasiaquijji jayojja jama pojji! Chojja —Jesosa poanaje—. Ijia'ijia jjima Eyacuiñajji nijje mimi huicha'a huicha'anijo ¡jamatii eme', ecojja pea'ai shacuacue; ehujjaña shiyeshiyejo shacue! <sup>18</sup> ¡Jamajjeya onaja ba jjima Eyacuiñajji nijje mimicue ijia'ijia jjima ani! Jamajjeya eseja Chiiya ohuaye nei miya ba caje, mi pejejo nequiya. Miquea emimi bame bame jayojja jama acaje, ohuaya —Jesosa poanaje.

*Jesosa eseya quijje eyajo quea huiso sosequia caje'yo, ojo chacochoani sosejje*

*(Noca 12.32-34)*

<sup>19</sup> —¡Jiquio meshijo ba'yanijo ¡aquiana echicha'yo quea huisojo a'a quea nahue bajji! —Jesosa poanaje—. Siipojjiya miquea aquiana sii ca chana'. Mojo ca chana'. See'yo chana' pea'ai. <sup>20</sup> Cho. ¡Jjeya Eyacuiñajjijo chacocho neineicue! E'e jojo nei ohuaya quijje miya sosequia caje'yo quea huiso nee nee eyajo. Esii'yojji pojjeama; miquianajaya poaje'yo

tii, miquea eba'e'yojji eyajo. <sup>21</sup> E'e, jamaya jjashahuabaquiajo miqianaya quea ja'a ba'eje'yo, ecuea ehuohui'yo jayojja jjashahuabaquije eyajo eba'e'yojji; aquiana quea huiso yanijo ca ca miqianaya jjashahuabaquije meshijo eba'e'jjijo —Jesosa poanaje.

*¡Quea ja'a nee ba'ecue!*

(Noca 11.34-36)

<sup>22-23</sup> —Miquea ecojja quea pame nee neejo miya quea ja'a nee baje'yo echacojji; quea ja'a nee ba'eje'yo pea'ai. Cojja jamajama ca ca quea ja'a eba'e'jji pojjeama. Quea apo nee nee, de, cojjama' —Jesosa poanaje—. Jiquio ecua quea cojja pame nee jayojja jama miya quea jjashahuabaqui pame nee neejo quea ja'a nee ba'eje'yo Eyacuiñajjiya ejjashahuabaqui'yojji jayojja. Quea jjashahuabaqui tai poanijo onaja aquiana cuana quea jea ba majje ca ca quea dejja tai ba'eje'yo, quea nishehui. Jamajjeya Eyacuiñajjiya miya tecuea caje'yo jama ba'a: “Miya ca mi ca oe quea tai nee nee ba'yani, ejo jjashahuabaqui ajja” acaje'yo Eyacuiñajjiya —Jesosa poanaje.

*¡A'a quea nahue, quea nishehui ba'ejji!*

(Noca 16.13)

<sup>24</sup> —Cuanaya ¿a'a acuae chaco chaco cajji beca dejjaa mee'ajja cajje? Chojja. Oe echacomeejji shajja'ajja caje, quea boti acaje pea'ai. Pea echacomeejji shajja'ajja jjima acaje, boti'ama acaje pea'ai. Jamaya miqianaya aquiana cuanajo jjashahuaba tiitiqianijo Eyacuiñajjiyo echacojji pojjeama —Jesosa poanaje.

*Eyacuiñajjiya oja epeeji cuana jaahuana cani*

(Noca 12.22-31)

<sup>25</sup> Jamajjeya Jesosaa huohui canaje pea jama ba'a:

—E'e jojo nei eyaya miya huohuiaña: ¡A'a quea yeno jjashahuaba tiitiqijji miquea eba'e'jjijo! “E'e pojja'a eya bobimajo manoj'e'yo, bobi yasijje poaje'yo; e'ishijji pojja'a chama' poaje'yo, quea naba taja; ecuea daqui huiñaje pojja'a, daquima' nei nei eya poaje'yo”. ¡A'a jamaya jjashahuabaquijji! Eyacuiñajjiya miya eshe pana canaje, yamijji. Jamajjeya ohuaya miya bobi quia meesahua caje, daqui quia meesahua caje pea'ai. <sup>26</sup> E'e de, ¡bacue cuichojji cuana! Quea jaji ba'yani. Oya cuanaa que chaco ajja, bobi chicha ajja, equi yasijje iya ajja quijje e'ijjia'yojji. Eseja Chiiya oya cuana jaahuana cani. Cuichojji ojaya nahue'ama; miya ca ca oe ojaya quea nahue nee nee. <sup>27</sup> ¡Jashahuabaquicue! ¿A'a miya quea ao nee epoaje poso jjashahuaba neineiquianijo miya tii aoje'yo? Chojja. Jamatii. Jamajjeya oya jayojja aquiana chama' epoaje poso ¡a'a quea mete pojji! —Jesosa poanaje.

<sup>28</sup> —¿Apiojji miya jjashahuabaquiani quea yeno daquijo? ¡Bacue eshasha ebiojo tiiani! Shasha cuana chaco ajja, oja daqui cuana soco ajja. <sup>29</sup> Jamatii quea bame nee nee nequiani. Jodioja emeshi mese yahuajo nei nequiya Sanomo bajjaniya daqui quea nahue nee nee huosho ca poa; jamatii oja daqui quea bame pishana. Shasha ca ca quea bame nee nee. <sup>30</sup> E'e —Jesosa poanaje—, Eyacuiñajjiya shasha cuana tii mee cani quea bame nee. Jjeya shasha cuana enequi; mecahuajje yaa'yani, joca'yani; dahuaajea cani cuaa pojja'a, chama'yo tii poani. Jiquio ecua Eyacuiñajjiya shasha quea bame nee pohua mee cani jamaya ohuaya e'e jojo nei miya ba'e meesahua caje'yo. Miya ojaya quea boti nee nee. Miqianaya jjashahuaba taiquiani jama ba'a: “E'e pojja'a Eyacuiñajjiya eseya jaahuana jjima” jamaya miqianaya poani —Jesosa poanaje.

<sup>31</sup> —A'a jjashahuaba taiquijji jama ba'a: “¿A'ya cuee che ijjiaje, de? ¿A'ya cuee ishije, de, chama' ena? ¿A'ya cuee che huoshoje?” <sup>32</sup> Eyacuiñajjiya epeeji pojjeama cuana ojjaña aquianajo jjashahuabaquiani tii tii. Eyacuiñajjiyo jjashahuabaqui ajja. E'e jojo nei esejaya Chii eyajo ani miquea aquiana eba'e meejjiyo jjashahuabaquiani. Ohuaya miya jaahuana caje'yo —Jesosa poanaje—. <sup>33</sup> Jamajjeya jjashahuabaquicue tii tii jama ba'a: “Quijje Eyacuiñajji ojjañaja Emeshi Mese po majje onijjeya eyaya pea cuana huoojeaje'yo eyajo. ¡Ojaya esohui quea ja'a jayojja jama ca'a'yahua!” acue —Jesosa poanaje—. Jamaya

jjashahuabaquianijo ohuaya miquiiana huasijje aquiiana eba'e meeji quia meesahua caje'yo pea'ai —Jesosa poanaje.

<sup>34</sup> —Jamajjeya a'a quea yeno jjashahuabaquijji jama ba'a: “¿Aya shai ecuana jaahuana caje mecahuaje?” Miya Eyacuiñajjiya jaahuana caje'yo. Quijje quea camaja eba'ejji poaje pojja'a. Jamatiiya ohuaya miya ba'e meesahua caje'yo —Jesosa poanaje.

## 7

*¡A'a pea cuana niñebajji!*

*(Noca 6.37-38, 41-42)*

<sup>1</sup> —¡A'a pea niñebajji! —Jesosa poanaje pea'ai—. Jamaya Eyacuiñajjiya boti'ama. <sup>2</sup> Miya pea cuana niñebajji poanijo Eyacuiñajjiya miya tecuea caje'yo pea'ai. Miquiana pea nijje jjabei'yo Eyacuiñajjiya miquiánajaya mimishi cuijea caje'yo. Ma ecua miyaya onaya aña, jamaya miya acaje'yo Eyacuiñajjiya.

<sup>3</sup> —¿Apiojji acuae jja oe miquea epeeji tecueaña so'o ca mimijajjiya? ¿A'a miquiánaaya mimishi paje'yonaje pea tecuea jjimahuajo ojaya mimishijo? Chojja, miya ca mi ca oe mimijajipaje'yo jjima pea'ai. Jamaya miya poani ba'a: Miyaya baña huenihueni shabo biso nei nei miquea epeejiya ecojjajo nequi. ¿A'a cuae jja oe miyaya miquea ecojja dojjojo nequi huenihueni shabo quea quemo baña so'o? ¡Miquea ecojjajo nequi huenihueni shabo quea quemo jja oe huijjeajea meecue! <sup>4-5</sup> A'a jiquio jama mimijji ba'a: “Epeeji, huenihueni shabo biso neiya mi cojja dobi canaje. Ache ba'ajja cahuijjea'ajja'yo sahua, de shabo biso nei”. Chojja. Shabo quea quemo nee miquea ecojjajo nequi, miya quea cojja shojo poanijo ca jje ca ebajji pojjeama. Miya ca mi ca oe ma shabo miquea ecojjajo nequi jebionei huijjeajea mee'yo socue! ¡Majoya shabo biso nei nei miquea epeejiya ecojjajo nequi huijjeajea'yocue! —Jesosa poanaje.

<sup>6</sup> —Miquea aquiána quea nahue nee nee ¿a'a quiaña iñahuehua huasijje, cuichi yasijje pea'ai? Aquiána nahue quishipasha caje'yo, de. Oya cuana quea mase; ijji ca chana' mi. Jamaya poani de jja jjashajja'ajjaqui ajja nei nei; quea mase iñahuehua jama, cuichi jama. Jamajjeya jona huasijje Eyacuiñajjiya esohui quea pame nee a'a huohui tiitijji! —Jesosa acanaje.

*¡Eyacuiñajji nijje mimi neineicue! Ohuaya miya shajja'ajja caje*

*(Noca 11.9-13; 6.31)*

<sup>7</sup> Jesosa jama poanaje pea'ai ba'a: —Jama acue ba'a: ¡Mimi neineicue Eyacuiñajji nijje! Onijje mimianijo ohuaya miya jaahuana caje'yo. Cuanaya aquiána chama' ba majje sa'ajja neineiaña jama mimi neineimeya pocue Eyacuiñajji nijje! Ohuaya miya shajja'ajja caje'yo. Cuanaya esecuejo nequiya miyaya taaña miquea epeeji nijje emimijji. Esecuejo nequi taa tiitii nequiáni jayojjaya ¡Eyacuiñajji nijje mimi majamajacue! Ohuaya miquea esohui jayojja jama acaje'yo. <sup>8</sup> E'e jojo nei onijje mimianijo Eyacuiñajjiya jaahuana caje'yo; o sa neinei poanijo ohuaya miya saja'a caje'yo. Esecuejo taa nequi jayojja jama pocue; ohuaya miya saja'a caje'yo —Jesosa poanaje.

<sup>9</sup> —Ebacua ejja oja chii nijje jama mimime poajo ba'a: “Ecue chii, ¡che mo oe pahui quiacue e'ijji'ajji!” acajo, ¿a'a oja chiiya mei quia caje? Chojja. <sup>10</sup> “Ecue chii, ¡che mo oe jai quiacue e'ijji'ajji!” acajo, ¿a'a oja chiiya peyo quia caje'yo? Chojja. <sup>11</sup> Jamajjeya miquiánaaya, jamatii quea mimishi jjashahuabaquianiya miquiánajaya bacua cuana jaahuanaña. Jamajjeya esejaya Chii eyajo aniya miya jaahuana caje'yo e'e jojo nei onijje mimianijo. Oya ca ca oe quea pame nee nee enequi tii tii —Jesosa poanaje.

<sup>12</sup> —Miya mimiani pea nijje jama ba'a: “¡Enijje quea pame nee po tiitii'yocue!” Jamajjeya jpea cuana nijje quea pame nee po tiitii'yocue! E'e, jamaya yahuajo Moisesija esohui etehue'yo poa. Jamaya Eyacuiñajjiya esohui huohuijji yahuajo nei ba'ya poa pea'ai —Jesosa poanaje.

*Beca ejiojji*

*(Noca 13.24)*

<sup>13-14</sup> Jesosaa huohui canaje pea jama ba'a: —¡Esecue biso neijje dobiec! ¡Ejiojji biso neijje poquicue, ma eyahuasijje epoquijji ejiojjiije! Jomajo ba'e tiitiije'yo eseya. Eyacuiñajjija esohui ejiojji pame jayojja. Eya ejiojji esecue jayojja pea'ai poani —Jesosa poanaje—. Oe pojji cuana Eyacuiñajjija ejiojjiije poquiani, de. Pea esecue ejiojji ai'aijje epoquijji. Ma ejiojji ai'aijje poqui majje cuaqui yasijje poquije'yo. Jamajje quea huiso poquiani ejiojji ai'aijje, de —Jesosa poanaje.

*Esohui huohuijji nisho, sijjepojji*  
(Noca 6.43-44)

<sup>15</sup> Jesosa jama poanaje pea'ai ba'a: —¡Esohui huohuijji nishoja esohui a'a shajja'ajjajji! Dasia ca chana' mi. Mi que poeje jjapee nishoquiya. Oya cuana quea bei jayojja poe'ani. Cho, quea bei pojjeama. Aquiana quea mase jama poani oya cuana. <sup>16</sup> ¡Quea mimishi poanijo bahuejjacue oya cuana esohui huohuijji nisho! ¿A'a acuae acuisha jjonajo acuijjajja quea pame ba'yani? Cho. ¿A'a shaponajo acuijjajja quea pame chicha cani? Cho. <sup>17</sup> Jamaya esejaya eba ba'a: Acui quea pamejo acuijjajja quea bame. Acui quea taijo ejjajja quea tai poaje. <sup>18</sup> Acui quea pamejo acuijjajja quea tai pojjeama ba'yani. Acui quea taijo ejjajja quea bame pojjeama ba'yani. <sup>19</sup> Acui taijo ejjajja quea tai poani. Jamajjeya jajajeña seya, dahuajea'yaña seya. <sup>20</sup> Acui eseya baje ejjajja ba majje. Acui quea tai ba majje esejaya eba acui quea tai. Jama jayojja esohui huohuijji quea mimishi ba majje eseyaya oya esohui huohuijji nisho bahuejjaje —Jesosa poanaje.

*Jesosa shajja'ajjajji e'e jojo nei*  
(Noca 13.25-27)

<sup>21</sup> —Quea huiso dejja cuana huohui cani jama ba'a: “Jesosa Quito, miya ecuanaja Emeshi Mese e'e jojo nei”. Chojja, beca cuana sijje poani. Ecue Chii eyajo anija ejjashahuabaqui'yojji jayojja jama po ajja. Jamajjeya oya cuana ecue Chii eyajo ani yasijje poqui'yo ajja. Pea cuana e'e jojo nei ecue Chiiya ejjashahuabaqui'yojji jama poani. Oya cuana poquije'yo ecue Chii eyajo ani yasijje, ojaya Emeshi Mese nei yasijje. <sup>22</sup> Quijje e poe o'oyajo quea huiso cuana sijje poaje enijje jama ba'a: “Ecuea Emeshi Mese, Eyacuiñajjija eya huoojea canaje miquea esohui huohuiya. Ohuaya eya eshahua huoojeacuayajea meesahua ca'yonaje. Ohuaya eya ameesahua canaje ma dejjaa ajjima acani”. Quijje jiquio jayojja jama acaje'yo sijjepojjiya. <sup>23</sup> Majoya eyaya oya cuana tecuea neineije'yo jama ba'a: “Chojja. Miquianaya enijje jjapeequi'yo jjima. ¡Miña ca oe poquicue quea huesha nee! Quea mimishi, quea mimijjequijje ca miña” aje'yo —Jesosa poanaje.

*Equi iyajji jama Jesosaja epeeji cuana quea jjashahuabaqui ja'a nee*  
(Macoso 1.22; Noca 6.47-49)

<sup>24</sup> —Joya beca cuaa ecuea esohui shajja'ajja majje jamaya acaje'yo. Ojaya ej-jashahuabaqui'yojji quea pame nee. Jamajjeya jiquio ecua equi quea ca'a emacojo iyaña jayojja jama jjashahuabaquime oya poani. <sup>25</sup> Ena quea quemo poajo, jjayehuequiyajo beni quea quemohua equi jeaquena cani. Jamatii equi quea ca'a emacojo ani; jaabicha jjima acani. <sup>26</sup> Pea cuaa ecuea esohui shajja'ajja ajja. Ecuea esohui jayojja jama a'ajja pea'ai. Oya cuana quea jjashahuabaqui quehua jayojja jama poani, equi quea quemo iya cani meshijajjo jama. <sup>27</sup> Ena quea quemo poajo ohua caje. Beni quea quemohua po majje equi janobajjima nei jeabichajea caje'yo —Jesosa poanaje.

<sup>28</sup> Jesosaa eyiyo quibojo esohui huohui ca poa. Apoa po majje dejja quea huiso cuana shajja'ajja majje jama poanaje ba'a: —E'e de, Jesosaa esohui quea ja'a nee nee huohui cani. <sup>29</sup> Ohuaya huohui cani emeshi mese jayojja jamaa, Moisesija esohui etehue'yo huohuijji jayojja jama pojjeama, de —poanaje ojjaña cuana.

## 8

*Dejja batata epo'yo, ma dejjaa shicui jjima acani jjajja meequi ca'yonaje Jesosaa*  
(Macoso 1.40-45; Noca 5.12-16)



<sup>1</sup> Majoya Jesosa eyiyo biajje ani esohui huohuipajea majje jaoque'yonaje. Quea huiso dejja cuana poquinaje onijje. <sup>2</sup> Oe dejja quea mano nee, batata epo'yo poeyanaje Jesosa que. Ecuí'oshajjajo nequinaje o bihuiajji. Jama poanaje ba'a: —Jesosa, ecuea eba miya ona jjajeaqui mee'yojji nei nei poani. Jamajjeya miyaya eya jjajeaqui mee'yo sa amajje ;mo che jjajeaqui mee'yocue!

<sup>3</sup> Jesosaa ma dejja napa'ajja canaje emeya. Jama miminaje onijje ba'a: —E'e, eyaya miya jjajeaqui mee'yo sa añ. ¡Jjajeaqui'yocue miya!

Jjajeaquinana'yonaje jjeya nei. <sup>4</sup> Jamajjeya Jesosaa oya huohui canaje: —¡Shajja'ajjacue mo! Eyaya miya jjajeaqui mee'yonaje. Jamatii ¡a'a jjeya pea cuana huohuijji! ¡Poquicua-jicue Jenosanena huasijje, Eyacuiñajji equi yasijje, Eyacuiñajji nijje mimiani yasijje! Oya huohuicue miyaya: “Eya huaquia'yonaje, jjajeaqui'yonaje mo” acue. ¡Moisesija esohui jayojja jama oe pocue pea'ai! Miya ehuaquia'yohua jjejojya ¡Eyacuiñajji nijje mimiani yasijje beca huia' quiaquicue Eyacuiñajji bihuiajji! Jamajjeya ojjaña ba caje miya e'e jojo nei ejjajeaqui'yo —oya acanaje Jesosaa.

*Jesosaa sohuinano huoojeajji poanija echacojji huaquia mee ca'yonaje*  
(Noca 7.1-10)

<sup>5</sup> Quijje Jesosa Capenaoma huasijje poqui'yonaje. Jomajo oe dejja sohuinano quea huiso nee, 100 huoojeajji poani Jesosa que poeyanaje. Oya pea, Jodio dejja pojjeama. <sup>6</sup> Ohuaya Jesosa huohui neinei canaje jama ba'a: —Jesosa, ecuea epeeji, ¡shajja'ajjacue mo che! Ecuea echacojji poani quea mano nee nee ecuea equijo jaa. Jeo'yo ajja poanaje. Quea yami nee nee jaa —poanaje.

<sup>7</sup> Jesosaa oya saja'a canaje jama ba'a: —E'e, eya poquije miquea equi yasijje miquea echacojji poani huaquia mee'yohua.

<sup>8</sup> —Chojja, Jesosa —sohuinano huoojeajji poanaje—. Miya Jodio dejja quea pame nee nee poanijo ¿apiojji ecuea equi yasijje dobiquire? Eya Jodio pojjeama; quea pame pojjeama. Miya jjahuaquiameequi'yojji nei nei. Jamajjeya ecuea echacojji quea huesha jaa. ¡Miyaya jiquiojo tii nequiya huohuicue! ¡Huaquia mee'yocue! <sup>9</sup> E'e, jamaya poani ba'a: Pea emeshi mese cuaa eya huoojea cani. Ojaya esohui jama eyaya añ. Pea'ai eyaya sohuinano cuana huoojeaña. Eya huoojeajje poquije. Eya iyaaaje pea sohuinano poeje. Eya huohuijje ecuea echacojji chacochoje ejo. Jamajjeya miya huohuijje ecuea echacojji jjaajaquije'yo, de.

<sup>10</sup> Shajja'ajja majje Jesosa quea bihui nee nee poanaje. Ojjaña cuana huohui canaje: —¡Shajja'ajjacue! Jiquio dejja Jodio pojjeama. Jamatii Eyacuiñajji nijje jjapeequiani e'e jojo nei. Miya ca mi ca oe, oe pojji jjashahuabaquiani Eyacuiñajji. <sup>11</sup> E'e de, quea huiso dejja cuana Jodio pojjeama ojjaña meshijo ba'e enijje jjapeequije'yo. Eyajo eya Emeshi Mese oe nei poaje, oya cuana ojee ijia'ijjiaje Jodio etiquiana cuana nijje, Amajama nijje, Isaaca nijje, Jacobo pea'ai nijje. <sup>12</sup> Beca Jodio cuana ca ca jjashajja'ajjaqui ajja jjejojo enijje eba'eji pojjeama. Eyacuiñajjiya oya cuana jeacuayajea caje'yo quea misi nee yasijje. Jomajo pa neineije'yo. Quea yenohua jjejojo ese' ijjiayajea caje'yo —Jesosa poanaje.

<sup>13</sup> Jamajjeya sohuinano huoojeajji acanaje: —¡Poquicue miya miquea equi yasijje! Miquea eba eya ejjaajaquimee'yojji nei nei. Jamajjeya eyaya miquea echacojji jjaajaqui meeje'yo.

Jesosa mimianijo tii sohuinanoja echacojji jjaajacuajiqui'yonaje.

*Quea huiso cuana huaquia mee ca'yonaje Jesosaa*  
(Macoso 1.29-34; Noca 4.38-41)

<sup>14</sup> Majoya Jesosa poquinaje Penoja equi yasijje. Penoja ano ba canaje quea quiyo nee nee jaa. <sup>15</sup> Emanojaa me' napa caje jjaajaqui'yonaje. Boe canana'yonaje. Jamajjeya anisohua'yo majje Jesosa, pea cuana pea'ai bobia canaje, Penoja anohua.

<sup>16</sup> Majoya aje oe sinecua dejja cuaa quea huiso niñepoqui cuana Jesosa que ye canaje. Jesosaa eshahua cuana huoojeacuayajea ca'yonaje: —¡Cuayaqui'yocue, oe! —poanaje.

Jesosa mimi jeahuajo, o niñepoqui po meeji poani cuayaquinananaje. Ojjaña emano-jaa cuana jjaajaqui mee ca'yonaje, huaquia mee ca'yonaje pea'ai, Jesusaa. <sup>17</sup> Jamaya poanijo Jesosa Isaiaja esohui yahuajo nei jayojja jama aca'yonaje. Isaia Eyacuiñajjija esohui huohuijji yahuajo nei nei Jesosa Quitojo jama poa ba'a:

“Ohuaya ecuana quea mano poanijo, quea nee pea'ai poanijo, quea jaji nee po mee ca'yonaje; huaquia mee ca'yonaje”.

Isaiaa jamaya aca poa yahuajo nei nei Jesosa Quitojo.

*Beca cuana Jesosa nijje poqui sa poani*

(Noca 9.57-62)

<sup>18</sup> Pea pojajajo quea huiso dejja cuana Jesosa que jjachichaquinaje. Poqui sa poanijo Jesusaa ojaya epeeji cuana huohui canaje: —Cua'a jbae ojje miji yasijje besapoquicue!

<sup>19</sup> Poqui jjimahuajo oe dejja Jesosa que poeyanaje, Moisesija etehue'yo huohuijji poani. Ohuaya Jesosa huohui neinei canaje: —Miya esohui huohuijji quea pame nee. Eya miquea epeeji nei poaje'yo. Minijje tii eya po'ayequi sa poani —poanaje.

<sup>20</sup> Jesusaa oya saja'a canaje jama ba'a: —E'e pojja'a, de. Eya ojjaña cuanaja Edoe Mese poani. Jamatii ecuea equi chama' ejomishocajji, de. Samao ca ca oja jjanijo cahuijaa. Cuichoiji cuana pea'ai oja ejajo cahuiani. Jiquiojo ecuea equi chama'.

<sup>21</sup> Majoya Jesusaja pea epeeji poeyanaje o que. Ohuaya Jesosa huohui canaje: —Ecuea esohui huohuijji, eya ecue chii cuiña poaje so'lo. Oya etii nei nei. Quijje oya mano'yajo ohuajeaje'yo. Majoya aje mo oe minijje poquije'yo chachacohua.

<sup>22</sup> —Chojja —Jesusaa oya saja'a canaje—. Pea cuaa, Eyacuiñajjija epeeji pojjeama cuaa mique chii cacuiña cahua; ohuaya camojea cahua mano'yajo. jJeyahua nei enijje po'yocue!

*Beni pajji*

(Macoso 4.35-41; Noca 8.22-25)

<sup>23</sup> Majoya Jesosa bishe ai yasijje nequisohuaqui majje ojje besapoquinaje. O shajja'ajjaji cuana nijje besapoquinaje. <sup>24</sup> O besapoquianijo beni quea quemo nee nee poeyanaje. Enashajohua bishe nanejea canaje. Jeasohuajea canaje. Bishe ai yiyedojojo Jesosa cahuijaanaje. <sup>25</sup> O shajja'ajjaji cuaa Jesosa ishe acanaje. Jama poanaje ba'a: —Emeshi Mese Jesosa, ¡shequicue oe! ¡Coya aje se hui'i'ya! —taanaje.

<sup>26</sup> Shequi'yo majje Jesusaa oya cuana saja'a canaje: —¿Apiojji acuae nequiana quea mete nee nee poani? ¿A'a mi ejo e'e nei pojjeama poani?

Jamaya mimi majje Jesosa nequisohuanaje. Beni tecuea canaje: —¡Beni, jamaya, nequioquequicue oe!

Majoya bae ena nijje jama poanaje ba'a: —¡A'a enashajo pojji! ¡Enashajo popajea'yo-ocue!

O jama mimime poajo, enashajo popajea'yonaje. Beni popajea'yonaje. <sup>27</sup> Jamajjeya bishe aijo anica Jesusajo quea bihui nee nee poanaje. Ojee mimimiminaje jama ba'a: —¡Ache dejja shai jiquio quea sohui poja nee nee! Beniya, enashajo cuaa pea'ai oja sohui shajja'ajja cani, de.

*Eshahua ojo nequijajo, dejja quea mase nee Jesusaa niñe poquipajea mee ca'yonaje*

(Macoso 5.1-20; Noca 8.26-39)

<sup>28</sup> Jesosa bae ojje miji yasijje ba'eñaquinaje, Jjanana meshi yasijje. Majoya beca dejja Jesosa que poeyanaje. Oya cuana ba'enaje mei jjanijo, ma emano'yo cuana sajaajo. Eshahuaa oja eyami yasijje dobiquinajejo, quea mase nee nee, niñepoqui poanaje. O ani chipi nei jjayejjequi ca ajja pea cuana. <sup>29</sup> Niñepoqui cuana Jesosa ba majje taanaje jama ba'a: —Miya Eyacuiñajjija Bacua Ejja. ¿Apiojji miya ecuana que poeyanaje? ¿A'a jJeyahua nei ecuana cuaqui yasijje jeajeaje'yo? Eyacuiñajjiya eshahua cuana cuaqui yasijje huoojea caje'yo quijje, jJeya nei pojjeama, de —taaame poanaje niñepoqui.

<sup>30</sup> Quea chipi nee cuichi cuana quea huiso ijia'ijia nequi. <sup>31</sup> Eshahua cuaa Jesosa jama huohuime acanaje ba'a: —Miyaya ecuana dejjajo nequi cuayaqui mee'yo majje ¡cuichi cuana huasijje ecuana huoojea'yocue!

<sup>32</sup> —E'e, ¡poquicue cuichi cuana huasijje! ¡Dobiquicue! —Jesosa poanaje.

Jamajjeya dejja cuana jeanana'yo majje eshahua cuana cuichi cuana huasijje do-biquinaje, ojjaña. Dobiqui majje cuichi cuana cuajicuaji jaoquequinananaje. Bae quea sahua doe nee nee yasijje cuichi cuana hui'i'yonaje, ojjaña.

<sup>33</sup> Ba majje cuichi jaahuanajji cuana jjajjasoquinaje. Cuajicuajipoquinaje cuiñajji yasijje. Ojjaña cuana ma cuiñajjijo ba'e huohui capoquinaje. Eshahua cuanajo, cuichi cuanajo, dejja cuana niñepoqui jjima' po mee canaje pea'ai huohui canaje. <sup>34</sup> Jamajjeya ojjaña cuana ma cuiñajjijo ba'e quea mete poeyanaje Jesosa que. Jesosa quea sohui poja nee nee jojoya ojjaña onijje quea mete miminaje jama ba'a: —¡Poquicue miya pea meshi yasijje!

Ojjaña ojo quea mete poanijo Jesosa ojje besapoqui o'oyanaje.

## 9

### *Jesosaa pea emanojaa jjaajaqui mee ca'yonaje, quibojjisha*

*(Macoso 2.1-12; Noca 5.17-26)*

<sup>1</sup> Jamajjeya Jesosa bishejje besapoqui o'oyanaje ojje miji yasijje, Capenaoma huasijje.

<sup>2</sup> Jomajo pea dejja cuaa quibojjisha quea mano nee jaa ye canaje Jesosa que, equipajaajjijo. Ma ba majje Jesosa jjashahuabaquinaje jama ba'a: —E'e, jiquio dejja cuana jjashahuabaquiani eya ejjaajaqui mee'yojji nei nei.

Jamajjeya Jesosaa emanojaa huohui canaje: —E'e ecuea epeejji, ¡quea bihui nee pocue! Eyaya miquea mimishi cuana cuijea'yonaje.

<sup>3</sup> Jesosaja esohui shajja'ajja majje Moisesija etehue'yo huohuijji poani cuana quenequenaje. Jjashahuaba taiquinaje jama ba'a: —¡De! Jiquio oya Eyacuiñajji pojjeama. ¿Apiojji Eyacuiñajji jayojja jama nei nei mimiani, de? Jamaya quea mimishi.

<sup>4</sup> Jamajjeya Jesosa ojaya ejjashahuaba taiquijji ba majje jama poanaje: —¿Yajjaje acuae quiana quea quene enijje poani so'o? <sup>5</sup> ¿Ache shai quibojjishajo quea camaja eyaya anaje? ¿A'a ojaya mimishi cuijea'yojji quea camaja? ¿A'a jja oya nequisohua meeje'yo eyaya? Ba'ajja —Jesosa poanaje—. <sup>6</sup> Jamajjeya eyaya ojjañaja Edoe Meseya miquianaya ba meeña eya ca ca iña Emeshi Cuiñacoojji quea ca'a nee nee nequi. Jamajjeya eyaya mimishi cuijeaje'yo nequianaja.

Majoya Jesosaa quibojjisha acanaje: —¡Nequisohuacue! ¡Miquea equipajaajji bebo majje miquea equi yasijje poquicue!

<sup>7</sup> Jjeya nei quibojjisha nequisohua majje jeo'yonaje. Jeojeopoquinaje ojaya equi yasijje.

<sup>8</sup> Ba majje ojjaña cuana quea bihui nee nee poanaje: —¡E'e nei, joya quibojjisha jeo'yonaje jjeya nei! ¡E'e e, Eyacuiñajji nijjeya Jesosaa emanojaa cuana huaquia mee ca'yani! ¡Mimishi cuijea mee ca'yani pea'ai! —poanaje ojjaña.

### *Jesosaa dejja Mateo bajjani iyaa canaje*

*(Macoso 2.13-17; Noca 5.27-32)*

<sup>9</sup> Majoya Jesosa poquinaje pea cuiñajji cuana huasijje. Poquijeya Mateo ba canaje equi ejjeshejji jaahuanajjijo ani. Mateo ona sose jjeshejji poani, eba'ejji sosejje. Ojjañaja emeshi meseja esohuijo jjeshe mee cani, dejja cuana eba'ejji sosejje. Ba majje Jesosaa Mateo iyaa canaje: —Mateo, jenijje po'yocue!

Jamajjeya Mateo nequisohua majje Jesosa nijje poqui'yonaje.

<sup>10</sup> Majoya Mateohua ojaya epeejji cuana iyaa canaje ojaya equi yasijje e'ijjia'ijjiajji Jesosa nijje. Jamajjeya Jesosa o shajja'ajjajji cuana nijje Mateoja equi yasijje poquinaje ijia'ijjiaa. Quea huiso dejja cuana Mateo jama ona sose jjeshejji poani, dejja mimishi cuana pea'ai poquinaje. Ojee ijia'ijjia'aninaje Jesosa nijje, Jesosa shajja'ajjajji cuana nijje pea'ai. <sup>11</sup> Ba majje Jodio esohui huohuijji Paniseo cuana Jesosa shajja'ajjajji cuana nijje

mimijainaje jama ba'a: —¿Apiojji miquea esohui huohuijji ijia'ijiani dejja mimishi nijje, ejjeshejji chichajji cuana nijje pea'ai? ¿Apiojji, de?

<sup>12</sup> Jesusaa oya cuana shajja'ajja canaje. Huohui canaje: —¿A'a dejja cuana quea mano pojjeama eshicuijji quiajji sa poani? Quea mano poanijo ca ca eshicuijji quia cajji. Jamaya miquianaya joya mimishi'ama poso jjabaquiani ecuea esohui shajja'ajja sa po ajja. Mimishi cuaa ca ca shajja'ajja cani. Jamajjeya eya dejja quea mimishi nijje jjapeequiani quea ja'a nee epo meeji. <sup>13</sup> ¡Bacue oe! Siajjepojji jama poani ba'a: “Eya ca ca ña quea pame nee, mimishi'ama nei nei”. Jamajjeya joya quea pame poso jjabaquiani ecuea e'iyaa'yojji pojjeama enijje ejjapeequijji. Chojja. Eya poeyanaje dejja joya quea mimishi nee nee iyaaa, mimishi pajea mee'yojji. Jamajjeya esohui etehue'yojo jjabahuejjaquicue jama ba'a: Yahuajo nei nei Eyacuiñajjiya Osea tehue mee ca poa jama ba'a:

“Huo cuana cuia cani. Cuia majje na sho cani e bihuiajji. Jamaya ecuea quea boti pishana. ¡Pea cuana oe ba'e meecue tii quea bei! Jamaya ecuea quea boti nee nee”.

Jamaya tehue mee ca poa yahuajo —jamaya Jesusaa Paniseo cuana acanaje.

*Bobi ijia jjima yajji huohui'ajja canaje cuaa*

*(Macoso 2.18-22; Noca 5.33-39)*

<sup>14</sup> Majoya Huani, ma ona besameejji poa ejeanobiajea jaa. Ojaya eshajja'ajjajji cuana poeyanaje Jesosa que. Jama huohui'ajjame acanaje ba'a: —Ecuana, Paniseo cuana pea'ai Jodio etiquianaja esohui jama poanijo bobi ijia'ijia jjima ani Eyacuiñajji jjashahuaba neineiuanijo, onijje mimi neineiuanijo. Jesosa, ¿apiojji acuae mi mi shajja'ajjajji cuana jama po ajja? —oya cuana poanaje beshahua nei quea tecue.

<sup>15</sup> Jesusaa oya cuana saja'a canaje: —Chojja, eya ecuea epeeji cuana nijje yanijo ca'ijia cahua. Ejjahuanaquijji yahueja epeeji cuana onijje yanijo ca'ijia'ijiaquiahua. ¿A'a yahueja epeeji cuana onijje yanijo quea yeno? Chojja. Quea bihui nee. Yahue poqui'yajo ca ca oe ojaya epeeji cuana ijia'ijia sa po ajja poaje, quea yeno jjejojo jjashahuaba neineiuaniani. Eya jiquio ecua yahue poquiani jayojjaya jama poaje: Quijje eya poqui'yo majje ecuea epeeji cuana Eyacuiñajji jjashahuaba neineiuanijo ijia'ijia ajja poaje.

<sup>16</sup> Majoya Jesusaa huohui canaje pea esohui ejjashahuabaqui meeji: —Eseyaya baacojja esee'yohua caca ajja bishe eyacuajo. Cho. Baacojja etii enajo nequi see'yani, ca'a'ama. Jjasajaequije'yo. Bishe ihuicujicujije. Bishe eyacuajo ca ca baacojja eyacuaa cacaña.

<sup>17</sup> —Pea'ai ena sese cuatatanijo iya ajja meshimisi etiijo. Ena sese cuatata neineiuanijo, meshimisi ca'a'ama jjaajaequi majje ena sese jjashojeaequije'yo. Cho, ena sese cuatatanijo meshimisi eyacua quea ca'ajo iya cajji.

Jamaya Jesusaa huohui canaje o jjabahuejjaquijji ba'a: Ojaya esohui eyacua quea ja'a jama ca'a cahua. Jamajjeya Eyacuiñajjiya oya cuana quea boejea nee ba caje'yo.

*Epona sho'i emano'yojaa Pea epona najji poani tii tii*

*(Macoso 5.21-43; Noca 8.40-56)*

<sup>18</sup> Jesosa jamaya dejja cuana nijje mimianijo, pea Jodio dejja o que poeyanaje, ma Jodioja ojee ejjachichaquijji equi jaahuanajji poani. Ecu'oshajjajo nequinaje o bihuiajji. Jama poanaje ba'a: —Esohui huohuijji, ecuea ebacua piona mano'yonaje jjeya nei. ¡Poecuajicue o napa'ajjaa emeya! Jamajjeya oya shequije o'oya, de.

<sup>19</sup> Nequisohua majje Jesosa epona sho'ija chii nijje poquinaje. Jesosa shajja'ajjajji cuana onijje poquinaje pea'ai. <sup>20</sup> Jesosa poquije oe eponaa ba canaje. Oya quea mano, najji popaje'yo ajja. Ome miji pea beca, 12 eshequijame na cuayapaje'yo ajja poa. Jesosa que quehuajje poeyanaje. Ohuaya oja daqui cuema ña canaje, emeya. <sup>21</sup> Jjashahuabaquinaje jama ba'a: —Eya Jesosaja daqui cuema ña majje najji popaje'yo.

Ohua daqui cuema ña caje Jesosa jjabajaequinaje. <sup>22</sup> Epona nama'yo ba canaje. Jama poanaje onijje ba'a: —She, ¡quea bihui nee pocue! Miya quea ja'a jjashahuabaquinaje ojo jama ba'a: “E'e jojo nei Jesusaa eya najji popajea mee caje'yo”. Jamajjeya eyaya miya najji popajea mee'yonaje.

Jamajjeya ma epona najji popajea'yonaje.

<sup>23</sup> Majoya Jesosa equi jaahuanajjija equi yasijje poquinaje. Dobiquinaje. Ba cañaquinaje quea huiso dejja cuana, ponaña pea'ai equijo nequi. Epona sho'i emano'yojo ojee pa'ani. Ojjaña quea shajjaquijjo poani. Dehue mia cani emojea'yojjijo pea'ai.

<sup>24</sup> Jesosaa ojjaña cuana huoojeacuayajea canaje: —¡Cuayaquicue nequiana esecue yasijje! Jiquio epona sho'i cahuijaa; epoquijeyo'yo pojjeama —poanaje.

—Chojja de. Oya mano'yonaje, de; shequi'yo ajja —poanaje cuana.

<sup>25</sup> Ojjaña cuana esecue yasijje cuayaqui'yajo, Jesosa epona sho'i jaa huasijje do-biquinaje, pea equecuayijji yasijje. Me' iña majje epona sho'i shequi mee ca'yonaje.

<sup>26</sup> Jamajjeya ojjaña ma meshijo ba'e yasijje huohuiqui canaje cuaa: —¡Jesosa jjashequi meequi'yojji, de! ¡Jiquio epona sho'i ma emano'yo poanaje shequi'yonaje! —poanaje.

*Jesosaa beca dejja cojjama' quea cojja ja'a po mee ca'yonaje*

<sup>27</sup> Quijje pishana Jesosa ma equijo ani cuayaqui'yonaje. Ejiojjijje poquianijo beca dejja o quiquishijji poquinaje, cojjama' cuana. Taaanaje jama ba'a: —Jesosa, miya emeshi mese Dabija bacua. ¡Ecuanaajo jashahuabaquicue! ¡Cojjajji mo po mee'yoque!

<sup>28</sup> Jesosa pea equi yasijje dobiquiajo cojjama' cuana o que poeyanaje. Jesosaa oya cuana huohui'ajja canaje: —Miquianaya ejo jashahuabaquiani jama ba'a: “E'e, Jesosa ca ca quea cojja ja'a jjapo meequi'yojji, de”.

—E'e, Jesosa, miya quea cojja ja'a jjapo meequi'yojji —poanaje cojjama'.

<sup>29</sup> Jamajjeya Jesosaa ojaya ecojja napa'ajja canaje emeya. Huohui canaje jama ba'a: —E'e, miquianajaya ejjashahuabaquijji ejo quea ja'a nee nee. Jamajjeya eyaya cojjajji po meeje'yo nequiana.

<sup>30</sup> Jjeya nei quea cojja ja'a nee nee po'yonaje. Jesosaa huohui neinei canaje pea'ai: —E'e, eyaya miquianaya quea cojja ja'a po mee'yonaje. Jamatii ja'a jihuohuijji so'o! —acanaaje.

<sup>31</sup> Jamatii poqui majje huohui poanaje ojjaña huasijje: —¡Jesosaa ecuana quea cojja ja'a nee nee po mee ca'yonaje, de! —jamaya poanaje.

*Dejja mimi'ajja mimi mee ca'yonaje Jesosaa*

<sup>32</sup> Majoya ma cojjama' poanaje cuana poqui'yajo, pea cuaa dejja mimi'ajja jjequi canaje Jesosa que. Eshahuaa oja yami yasijje dobiqui majje mimi'ajja po mee canaje. <sup>33</sup> Jesosaa eshahua huoojeacuayajea'yo majje dejja mimi'ajja quea ja'a nee mimi o'oyanaje. Ba majje ojjaña cuana quea bihui nee nee poanaje. Miminaje jama ba'a: —¡Chama' beca dejja Jesosa jama, de! Ohuaye nei eshahua huoojeacuayajea ca'yani, mimi'ajja mimi mee ca'yonaje, de —poanaje.

<sup>34</sup> Jamatii Paniseo cuanaa Jesosa quehua niñeba canaje. Jama acanaaje ba'a: —Chojja de, Jesosa eyamiquecua pojja'a. Pea eshahua huoojeacuayajea mee cani Edosiquiana nijjeya —sijje pome poanaje.

*Jesosa Quito ojjaña cuanaajo jashahuabaquinaje quea yeno*

<sup>35</sup> Jamajojya Jesosa poquinaje ojjaña cuiñajji quea quemo huasijje, ojjaña cuiñajji sisi cuana huasijje pea'ai. Jodioja equi ojee ejjachichaquijji cuana huasijje dobiquinaje esohui huohuiya.

—Eya quijje eyajo ojjañaja Emeshi Mese oe nei poaje'yo —Jesosaa acanaaje.

Ojjaña quea mano jaa jjaajaqui mee ca'yonaje, huaquia mee ca'yonaje pea'ai. <sup>36</sup> Dejja cuana quea huiso nee nee jjachichaquinaje o que. Jesosaa oya cuana ba canaje ñajjajja jama. Ejaahuanajji quea pame chamajo ñajjajja nequi mee ajja quea pame nee. Jamaya ojjaña cuana quea yeno poani; eba'ejji quea camaja ba'yani, ejaahuanajji quea pame chama' pea'ai, de. Jamajjeya Jesosa ojjañajo quea yeno poanaje. <sup>37</sup> O shajja'ajjajji cuana nijje miminaje dejja cuanaajo. Jama poanaje Jesosa ba'a: —Anoso quejo jahua majje echacojji cuanaa cachicha cahua. Dejja cuana anoso jahuajahua jayojja jama, quea huiso nee nee. E'e de, jjeya ojjaña cuana jashahuabaquiani e'e jojo nei epojji; shajja'ajja caje eya Emeshi Mese nei poeyanaje o jaahuanaa. Jamatii oe pojji Eyacuiñajjijo chaco sa

poani. ¿Aya acuae oya cuana jjabahuejjaqui mee caje'yo Eyacuiñajji? <sup>38</sup> Jamajjeya ¡Eyacuiñajji nijje mimicue! Jama acue ba'a: “Eyacuiñajji, ¡huojeacue oe miquea echacojji cuana esohui huohuiya, pea cuana minijje ejjapeequi mee'yojji!” —Jesosa poanaje.

## 10

*Jesosaa iyaa canaje o shajja'ajjajji cuana 12 huisome*  
(Macoso 3.13-19; Noca 6.12-16)

<sup>1</sup> Jamajjeya Jesosaa o que iyaa canaje o shajja'ajjajji cuana. Oya cuana quea ca'a po mee canaje eshahua cuana huoojeacuayajea mee'yojji, ojjaña emanojaa cuana huaquia mee'yojji, ejjaajaqui mee'yojji pea'ai.

<sup>2</sup> Jesosa shajja'ajjajji nei 12 poa, yohua bajjani ba'a: Simohui ojaya pea bajjani Peno, oja chahua Anesi; Semeneoja bacua ejja Jacobo, oja chahua Huani; <sup>3</sup> Penipe, Matonome, Tomasi, Mateo ma bejjo chichajji emeshi mesejo poa; Apeoja bacua ejja Satiaco; <sup>4</sup> Simoni Senote; Nemeo ojaya pea bajjani Taneo; Jodasa Isicaniote, ma Jesosa iña meesahuajji poanaje dejja mimishija quecua'yojji. Mahuiso Jesosaa babaca ca'yonaje ojaya esohui huohuijji epojji.

*Jesosaa o shajja'ajjajji huoojea canaje esohui huohuiya*  
(Macoso 6.7-13; Noca 9.1-6)

<sup>5</sup> Jamajjeya Jesosaa jiquio 12 huoojea canaje onijje chacohua. Jamaya huohui canaje: —¡A'a poquijji Jodio dejja pojjeama cuanaja meshi yasijje! ¡Dejja cuana Samania meshijo ba'e cuana huasijje pea'ai a'a poquijji jjeja! <sup>6</sup> Chojja, ¡jjeja poquicue Jodio cuana huasijje! Oya cuana poquiquehuanaje; Eyacuiñajji nijje jjapeepajequinaje ñajjaja epoquiquehua jayojja jama, de. <sup>7</sup> Ojjaña cuana huohuicue jama ba'a: “Jjeja Jesosa ojjaña huoojeajji poani” acue. <sup>8</sup> ¡Emanojaa cuana jjaajaqui mee'yocue! ¡Emano'yo cuana shequi mee o'oyacue! ¡Dejja batata epo'yo cuana jjajeaqui mee'yocue pea'ai! ¡Eshahua cuana dejja cuana huasijje dobiqiajo huoojeacuayajea'yocue pea'ai! Eyaya miquianaya huaquia meesahuaña pea dejja cuana sosema'. Jamajjeya ¡pea cuana quea bihui nee oe huaquia mee'yocue sosema'! <sup>9</sup> Jjeja ¡ejjeshejji, mei huo'o pea'ai, bejjo pea'ai a'a dojojji! <sup>10</sup> ¡Bashosoco bobi dojojji a'a dojojji! ¡A'a beca daqui dojojji! ¡Miquea ejjojji nequi ejjojji shejee dojocue! ¡Oe acui ejjaquecuaca'aquijji dojocue, beca pojjeama! Miquea esohui shajja'ajja majje pea cuaa miya cabobia cahua. E'e, miyaya esohui huohuiañajo, bobi caquia cahua. <sup>11</sup> Miquianaaya pea cuiñajji yasijje poqui majje ¡sa'ajjacue oe dejja miquea epeeji epojji, joya bei bei! ¡Ojaya equijo anicue ma cuiñajji ani majje! <sup>12</sup> Ojaya equi yasijje dobiqiu majje huohuicue jama ba'a: “¡Eyacuiñajjiya miquianaya cajaanahua cahua!” <sup>13</sup> Ojjaña ma equijo ba'eya miya quea pame nee acajo, Eyacuiñajjiya miquea esohui jayojja jama oya cuana jaahuana caje. Miya quea pame nee mi ba'e mee cajo, cho; Eyacuiñajjiya oya cuana ejaahuanajji pojjeama. <sup>14</sup> E'e pojja'a beca equijo, beca cuiñajji miquea esohui shajja'ajja sa po'yo ajjajo, niñeba cani pea'aijo, ¡oya cuana jeajeana'yocue! Poquije'yohua jama acue ba'a: “Eyaya miquianaya cajaa aje'yo, ¡quea mimishi mi coma. Eyacuiñajjiya miya ba cani quea mimishi nee nee. Ohuaya miya quea nee nee po mee caje'yo” acue —Jesosa poanaje—. <sup>15</sup> Eyaya miya e'e jojo nei huohuiaña jama ba'a: Quijje Emeshi Mese nei poeje o'oya, ojjaña quea mimishi poani quea nee nee po meeje'yo. Yahuajo nei nei dejja cuana Sonomajo ba'e, Jomoshajo ba'e pea'ai quea mimishi nee ba'yanijo, Eyacuiñajjiya quea nee po mee ca'ya poa, yahuajo. Ma dejja shajjama' cuana ca ca Eyacuiñajjiya quea nee nee po tiitii mee caje'yo, de. Sonomajo ba'e cuana ca ca quea nee pishana po tiitii mee caje'yo.

*Quijje dejja cuana quea mase nee poaje*

<sup>16</sup> Jesosaa o shajja'ajjajji cuana huohui canaje pea'ai: —Eyaya miya huoojeaña dejja quea mase ibia jama huasijje. Miquianaya quea bejjo ohuaya mi napa ca chana'. Jamajjeya ¡quea jjashahuabaqui ja'a pocue! ¡Quea bei pocue; mimishi'ama pea'ai! <sup>17</sup> ¡A'a

pajea'yojji dejja cuana quea mase poaje'yo minijje! Miya iña majje dojo caje Jodio etii ani yasijje jeanobiaa. Janobajjima nei cuia caje Jodioja equi ojee ejjachichaquijjijo. <sup>18</sup> Miya cuana enijje jjapeequianijo dojo caje cuaa pea emeshi mese cuana huasijje, ona huoojeajji nei nei yasijje pea'ai. ¡Jamajjeya miqianaaya esohui quea pame nee ejo huohuicue ona huasijje, Jodio pojjeama cuanaja ejjahuojeaquijji nei nei yasijje pea'ai! <sup>19</sup> Dojo majje huohui'ajja caje jama ba'a: “¿Ae poani miqianaya?” Jamaya acajje ¡a'a quea mete pojji! A'a jjashahuabaquijji jama ba'a: “¿Ae shai eyaya huohuije?” <sup>20</sup> E'e nei Eyacuiñajjiya miya mimi meesahua caje. Ohuaya huoojea caje Edojjoshahua Pame mi que. Edojjoshahua Pameya miqianaya huohui meesahua caje —Jesosa poanaje.

<sup>21</sup> —E'e, quijje pishana dejja cuana, ponaña pea'ai quea mase nee poaje ecuea epeeji cuana nijje. Jamajjeya e'o'i mese oja chahua iña meesahua caje'yo onajaya equecua'yojji. Ejeajji cuaa jamaya acaje'yo oja bacua. Ebacua cuana shajjama' poaje. Dejja mase oja chii, oja enaese pojja'a iña mee caje'yo equecua'yojji. <sup>22</sup> Miquiana enijje jjapeequianijo, quea huiso cuana quea quene nee nee poaje'yo minijje. Jamatii enijje jjapeequi pajea'yo ajjajo nequi tiitii meeje'yo enijje eyajo, eya ojjaña Emeshi Mese oe nei, ejjahuojeaquijji nei nei poaje. <sup>23</sup> Dejja cuaa oe cuiñajjijo ba'eya miqianaya janobajjima napa cajo, ¡poquicue pea cuiñajji yasijje! Eyaya miya e'e jojo nei huohuiaña: Ojjaña Jodio dejja cuanaja cuiñajji cuana huasijje poqui jjimahuaajo, ojjaña cuana huasijje ecue sohui huohui jjimahuaajo pea'ai eya, ojjaña Edoe Mese poeje o'oya —Jesosa poanaje.

<sup>24</sup> —Ojjaña cuana enijje quea mase poani. Jamajjeya minijje quea mase poaje pea'ai e shajja'ajjaji poani jojoya. <sup>25</sup> Echacoji poani o chacomeejji nijje chacochacoanijo, pea cuaa echacomeejji napa cajo, echacoji poani pea'ai napa caje cuaa. ¿A'a e'e? Dejja mimishi cuana ejo sijje poanaje jama ba'a: “Miya Edosiquiana Meesemo bajjani”. Jamaya enijje quea tai mimijajianijo quijje quea tai nee nee mimijajije minijje ecuea epeeji poani jojoya. Jamajjeya miya e jayojjaya acaje'yo; ¡jamatii quea bihui nee pocue! —Jesosa poanaje.

*¡A'a quea mete pojji dejja cuanajo!*

*(Noca 12.2-7)*

<sup>26</sup> —Jamajjeya dejja mimishi cuanajo ¡a'a quea mete pojji! Ojjaña esohui quehuajje acani, pea cuanaja shajja'ajja jjima, quijje shajja'ajja caje. Ojjaña quehuajje amajje quijje ojjaña ba mee caje'yo.

<sup>27</sup> —Jjeya eyaya esohui huohuiaña miqiana huasijje, ma pea cuanaja shajja'ajja jjima. Quijje pishana miqianaaya ojjaña huasijje huohuiquije ecuea esohui. ¡Quea ja'a nee huohuicue! <sup>28</sup> Ojjaña cuanajo, eshahua cuanajo pea'ai ¡a'a quea mete pojji! Oya cuanaa miya quecua caje'yo pojja'a. Jamatii, miquea edojjoshahua mano meemee ajja. ¡Eyacuiñajji oe neijo jjashahuabaquicue! Shajjama' poajo ohuaya miya mano mee'yo majje cuaqui yasijje jea caje'yo miquea edojjoshahua —Jesosa poanaje.

<sup>29</sup> —E'e —Jesosa poanaje—, beca anohuii jjeshe cajji beshahua nei sosema'. Nahue'ama nei cuichoiji cuana. Jamatii Eyacuiñajjiya, esejaya Chiya cuichoiji cuana ba cani, bobi ijji mee cani. <sup>30</sup> Pea'ai ¿ache huiso ehoojjaña miquea esapajo ba'e? Eyacuiñajjiya eba. Ojjaña ojaya ehoojjaña esico, de. <sup>31</sup> Jamajjeya ¡a'a quea mete pojji! Cuichoiji cuana Eyacuiñajjiya nahue'ama; miya ca ca ojaya quea nahue nee nee —Jesosa poanaje.

*¡A'a quea bicho pojji Jesosa nijje jjapeequiani!*

*(Noca 12.8-9)*

<sup>32</sup> —Beca cuaa bicho'ama huohui cani: “E'e, eya ca iña bicho'ama Jesusaja epeeji e'e jojo nei”. Jamajjeya eyaya ecue Chii eyajo ani huohuije bicho'ama jama ba'a: “E'e, oya cuana ecuea epeeji e'e jojo nei”. <sup>33</sup> Pea cuana quea bicho poani: “Cho, eya Jesosa Quitoja epeeji pojjeama”. Jamajjeya eyaya ecue Chii eyajo ani huohuije jama ba'a: “Cho, oya cuana ecuea epeeji pojjeama. Cajaa” eyaya aje —Jesosa poanaje.

*Ojjaña dejja Jesusajo ojee ba'e meemee ajja quea bei*

*(Noca 12.51-53; 14.26-27)*

<sup>34</sup> —¡A'a jjashahuabaquijji eya poeyanaje ojjaña cuana ojjaña meshijo ojee quea bei ba'e meeya! Chojja, de. Pea cuana quea mase poaje ecuea epeeji cuana nijje. <sup>35</sup> E'e, ecuea esohui ohua shajja'ajja canijo, oja chii nijje oja bacua ejja cuana quea quene poaje. Ecuea esohui jayojja jama ohua acanijo, oja enaese nijje ojaya ebacua piona quea quene poaje pea'ai. Enijje jjapeequianijo, oja ano nijje oja bacua ejjaja huanase quea quene poaje pea'ai. <sup>36</sup> Jamajjeya ecuea epeejiija huapa pojjeama cuana quea quene poaje onijje ecuea epeeji pojjeama jjejojo; pea cuana quea quene pishana poaje onijje —Jesosa poanaje.

<sup>37</sup> —Ojjaña joya oja chii, ojaya enaese pojja'a quea jea nee nee acanijo eya quea jea pishana acani ecuea epeeji pojjeama, de. Pea'ai ojjaña joya oja bacua ejja, oja bacua piona pojja'a quea jea nee nee acanijo eya quea jea pishana acani enijje jjapeequi meeme ajja. Cajaa. <sup>38</sup> Eyaya Eyacuiñajjiija esohui huohuiañajo, pea cuana enijje quea quene poaje'yo. Dejjja mimishiya enapa ca poani jjejojo enijje mi jjapeequiani. Ojjaña joya e jayojjaya ba'e sa po ajja ecuea epeeji pojjeama. E'e, jiquio ecua acui ecueata'apee quea camaja e'abojji jama jayojja enijje jjapeequiyajo quea camaja poaje. <sup>39</sup> Dejjja mimishi cuaa ecuea epeeji quecua ca chana'. Jamajjeya quea mete nee neejo enijje jjapeequi sa po ajja. Cuaqui yasijje dobiquire'yo tiitii. Joya enijje jjapeequiani ca ca dejjja mimishi cuaa quecua caje'yo pojja'a. Jamatii. Mano'yo majje enijje ba'e tiitiije'yo quea pame nee eyajo —Jesosa poanaje.

*Ojjaña joya quea pame poani sosequia caje'yo quijje Eyacuiñajjiya  
(Macoso 9.41)*

<sup>40</sup> —E'e —Jesosa poanaje pea'ai—, beca cuana minijje jjapeequije'yo miya ecue sohui huohuiañajo. Jamajjeya oya ecuea epeeji poani pea'ai. Eyacuiñajji e huoojeajji poani; ojjaña joya enijje jjapeequiani Eyacuiñajjiija epeeji poani pea'ai. <sup>41</sup> Quijje Eyacuiñajjiya ojaya esohui huohuijji sosequia caje'yo ojaya esohui huohui cani sosejje. Pea cuana ojaya esohui huohuijji nijje jjapee neineiquianijo, sosequia caje'yo esohui huohuijji jayojja jama. Ojjaña joya Eyacuiñajjiija epeeji nijje e'e jojo nei jjapeequiani Eyacuiñajjiya sosequia caje'yo quea pame nee oya quea pame nee poanijo. <sup>42</sup> E'e jojo nei ojjaña joya ecuea eshajja'ajjajji poani ba'e meesahua cani, ena e'ishijji quia cani pojja'a eya ojaya quea boti neejo, Eyacuiñajjiya oya quijje sosequia caje'yo oya quea pame nee poanijo —Jesosa o shajja'ajjajji cuana huohui canaje mahuiso huoojea jjimahuajo.

## 11

*Huaniya Jesosa que huoojea canaje o shajja'ajjajji cuana  
(Noca 7.18-35)*

<sup>1</sup> Majoya Jesosaa ojaya ome miji becanejijji pea'ai, 12 eshajja'ajjajji cuana huasijje esohui huohui majje pea cuiñajji quea chipi nee yasijje poquinaje esohui huohuiya.

<sup>2</sup> Yahujajo pea dejjja cuaa Huani iña ca poa, ma ona besameejji poa. Dejjja maseja equi ejjajejanobiaquijji yasijje jeanobiajea ca poa, eme' jeyo'yo. Ejeanobiajaaa Huaniya shajja'ajja canaje onaja ehuhui'yo Jesosajo. Jamajjeya o shajja'ajjajji cuana huoojea canaje Jesosa que. <sup>3</sup> Oya cuana Jesosa huohui'ajjaña meequi canaje jama ba'a: —Jesosa, yahujajo Huaniya huohui canaje jama ba'a: “Eyacuiñajjiya Emeshi Mese nei ojjaña jaahuanajji huoojea caje'yo ecuaa huasijje”. ¿A'a miya ma Emeshi Mese nei? E'e pojja'a ecuaa pea ishoaje. ¡Jamajjeya huohuicue miyaya! ¿Yajja shai ecuaa Huani aje'yo so'o? —Huaniya eshajja'ajjajji cuana poanaje.

<sup>4</sup> Jesosaa oya cuana saja'a canaje: —¡Poqui o'oyacue Huani que! ¡Ecuea esohui miquianaaya shajja'ajjaña, jiquio miya eya banajeya pea'ai oe Huani huohuicue! Jama acue ba'a: <sup>5</sup> “Huani, Jesosaa cojjama' cuana quea cojja ja'a po mee ca'yani. Jiojjijajja jeo mee ca'yani. Dejjja batata epo'yo cuana jjajeaqui mee ca'yani. Shajjaqueba pea'ai quea shajja ja'a po mee ca'yani. Emano'yo cuana shequi mee ca'yani pea'ai. Esohui quea pame nee huohui ca'yani ojjaña dejjja quea yeno huasijje”. <sup>6</sup> E'e, eya Eyacuiñajjiija huoojea'yo ojjaña jaahuanajji. Quea bihui nee capo'yahua ojjaña joya ejo jjashahuabaquiani jama



ba'a: "E'e jojo nei Jesosa Eyacuiñajjija huoojea'yo ojjaña jaahuanajji". ¡A'a jjashahuaba quehuaquijji! —Jesosa poanaje.

<sup>7</sup>Jamajjeya Huanija epeeji cuana poqui o'oyanaje Huani que. Majoya poqui'yajo Jesosa miminaje pea cuana nijje: —Yahuajo Huani meshi jabojo, quimajo aninaje. Miquianaya o que poquinaje. ¿Ae shai banaje miyaya? ¿Ae jjashahuabaquinaje Huanijo? ¿A'a jjashahuabaquinaje Huani esohui huohuijji quea ja'a pojjeama? Chojja. <sup>8</sup>Miquianaya Huani que poquinaje ¿ae baa? ¿A'a dejjaja daqui quea nahue nee ehusho ba'e banaje? Chojja. Dejjaa daqui quea nahue nee huoshosho cani equi quea quemajo ba'eya. <sup>9</sup>¿Achajja Huani ba'ya poa? ¿A'a miya jjashahuabaquinaje Huani Eyacuiñajjija esohui huohuijji nei nei? E'e, de. Jamatii Eyacuiñajjija esohui huohuijjiya ba cani oe pojji. Huanija eba quea huiso nee. <sup>10</sup>Yahuajo nei Eyacuiñajjija esohui etehue'yo Huanijo jama poa ba'a:

"Jiquio dejja ecuea esohui huohuijji nei poani. Jamaya eya sa poani. Eyaya oya huoojeaje ebionei, mi hui dojojji. Ohuaya dejja cuana huasijje huohui caje miquea epoejjijo".

Jamaya yahuajo nei nei Eyacuiñajjiya ojjaña ba mee ca poa Huanija poe majje ejo jjabahuejjaqui mee caje cuana. <sup>11</sup>Ecuea pea esohui a'a pajea'yajji jama ba'a: Ojjaña pea cuana quea pame. Huani ma ona besameejji poa quea pame nee nee. Jjeya pea chama' Huani jayojja jama. Jamatii quijje eya Emeshi Mese nei poaje, ojjaña ecuea epeeji cuana Huani jayojja jama poaje'yo, quea pame nee nee. <sup>12</sup>Eya poeyanajejo Huanija ojjaña pojajajo ejo huohui canaje jama ba'a: "Jjeya nei Emeshi Mese nei Quito poeje". Jamatii dejja mase cuaa Huani napa cani ojjaña pojajajo. Eya, Emeshi Mese nei jeabichajea sa acani cuaa pea'ai. Oya cuana emeshi mese jayojja jama huohui sa poani —Jesosa poanaje.

<sup>13</sup>—Yahuajo nei Eyacuiñajjija esohui huohuijji cuaa huohui ca poa, Moisesija esohui etehue'yojo jama poa pea'ai ba'a: "Quijje Eyacuiñajjija huoojea'yo ojjaña jaahuanajji Emeshi Mese oe nei poeje". Jamaya Huanii miminaje. Jamaya pea cuana miminaje Huanii poe jjimahuajo pea'ai. <sup>14</sup>E'e, yahuajo nei Eyacuiñajjija esohui huohuijjiya tehue ca poa jama ba'a:

"Ecuea ehoojea'yo ojjaña jaahuanajji poe jjimahuajo, eyaya Enia huoojeaje ebionei, ehui dojojji".

—Huanija Enia jayojja jama huohui canaje, ma Eyacuiñajjija esohui huohuijji yahuajo nei nequia poa jama. <sup>15</sup>Jamajjeya ¡bacue; a'a shajjama' pojji, ca miquiana ba sa poanijo! <sup>16</sup>Ojjaña cuana jjeya nei ba'e ecuea eba. Oya cuana esho'iquiana quebanei poani jayojja jama. Quebanei poanijo jama poani: Esho'i cuaa pea esho'i taaa cani. <sup>17</sup>Jjamimihue'equiani jama ba'a: "Ecuaa dehue miaña epona ejjahueaquijjijo jama. Jamatii miquianaya majamaja ajja. Pea'ai e pa nishoanijo, emano'yojo pa'ani jayojjayajo, miquianaya pa nisho ajja. Jamajjeya miquianaya quebanei po ajja ecuaa nijje" poani esho'iquiana —Jesosa poanaje—. Jamaya miquianaya jjeya poani, de. <sup>18</sup>E'e, yahuajo pishana Huani poeyanaje. Eyacuiñajji nijje mimi tiitiani bobo ijji'ijji ajja. Ecahuishi ishi jjima pea'ai. Jamajjeya ojjaña cuaa huohui canaje ojo jama ba'a: "Huani jja ca niñepoqui jama". <sup>19</sup>Eya ojjaña cuanaja Edoe Mese poeyanaje. Eya ca jja ca ijji'ijjiani; ojjaña nijje mimimimiani. Jamajjeya miquianaya ejo sijje poani jama ba'a: "¡Bacue jiquio dejja Jesosa! Oya jejje ajja tii. Dejja mimishi nijje jjapeequiani, bejjo chichajji cuana nijje pea'ai, de". Jiquio ecua esho'iquiana pea nijje jjapeequi sa po ajja jama jayojja miquianaya ecuaa nijje jjapeequi sa po ajja. Miquianaya jjashahuaba quehuaquiani Huanijo, ejo pea'ai. Jamatii ecuaa Eyacuiñajjija ejjashahuabaquijjijo quea ja'a nee jayojja jama añajo ecuaa quea pame nee añajo —Jesosa poanaje.

*Beca cuiñajjijo ba'e cuana shajjama' poanaje*  
(Noca 10.13-15)

<sup>20</sup>Quea huiso cuiñajjijo Jesosaa ma dejja cuaa ajjima acani ahuicha'a huicha'a canaje. Jamatii quea huiso cuana mimishi pajea sa po'yo ajja. Jamajjeya Jesosaa oya cuana tecuea canaje. <sup>21</sup>Jama poanaje ba'a: —Miquianaya quea mimishi nee nee. ¡Quea yeno nee nee

miquianaya poaje Conasijo ba'e, Betesainajo ba'e pea'ai! Ma dejjaa ajjima acani eyaya ahuicha'a huicha'anaje miquianaja cuiñajji cuanajo miquea ebajji nisho. Yahuajo nei nei pea dejja cuana Tinojo, Sinonojo pea'ai ba'ejja ojaya ba jjima eyaya ma dejja cuaa ajjima aña. Eba jojjemo oya cuana mimishi cuana pajea ca'yo queaye mimishijo quea yeno po majje. <sup>22</sup> ¡Bacue oe! Quijje Eyacuiñajjiya ojjaña cuana sosequia caje'yo ojaya eba'e'yojji sosejji. Ohuaya yahuajo nei nei Tinojo ba'e cuana, Sinonojo ba'e cuana pea'ai quea nee po mee caje'yo mimishijo. Miquianaya Conasijo ba'e, Betesainajo ba'e pea'ai ca ca quea nee nee po mee caje'yo ecuea esohui miquiaaya mi shajja'ajjajo. <sup>23</sup> Miquianaya Capenaomajo ba'e quea pame poso jjabaquiani, jjashahuabaquiani jama ba'a: “Ecuana quea pame nee nee; pea meshijo ba'e cuana quea pame pishana”. Chojja, de. Siajje miya poani. Quijje Eyacuiñajjiya janobajjima nei napa cajje miquianaya quea yeno poaje. Eyaya ma dejjaa ajjima acani aña miquianajaya cuiñajjiyo quea huiso. Jamatii miquea mimishi cuana pajea sa po'yo ajja. Yahuajo nei nei pea cuiñajji Sodoma bajjani yania poa. Eyacuiñajjiya ma dejjaja ba jjima acani eba jojjemo oya cuana quiyo jeyojeyo'yo jjima poqueaye. Jamatii jjeya Sodoma chama'yo tii. <sup>24</sup> ¡Bacue oe! Quijje aje Eyacuiñajjiya ojjaña cuana sosequia caje'yo ma ecua oya po nequia poa jama. Ma pojajajo ohuaya dejja cuana yahuajo nei Sodomajo ba'e quea nee po mee caje'yo quea mimishijo. Miquianaya Capenaomajo ba'e ca ca quea nee nee po mee caje'yo ecuea esohui miquiaaya mi shajja'ajjajo —Jesosa poanaje.

*Jesosa Quitohua eseya jomishoca mee caje*  
(Noca 10.21-22)

<sup>25</sup> Jamaya dejja cuana tecuea majje Jesosa eseya Chii ai nijje miminaje jama ba'a: —Ecuea Chii, miya eyajo Emeshi Mese nei poani. Ojjaña meshi cuana miquea poani pea'ai. Eyaya miya bihuiaña. E'e, beca cuana jjashahuabaquiani jama ba'a: “Ecuea eba quea huiso esohui, quea huiso aquiana pea'ai”. Jamajjeya miyaya oya cuana ba meesahua ajja. Jamajjeya oya cuanaja ba jjima eya Emeshi Mese oe nei poani. Pea cuana esho'i cuana jama ca ca miyaya jjashahuabaqui meesahuaña quea ja'a nee eya Emeshi Mese nei poani. Jamajjeya eyaya miya bihuiaña. <sup>26</sup> E'e ecue Chii, jamaya miyaya aña miquea ejjashahuabaquiiji. Apoa —jamaya Jesosa miminaje eseya Chii ai nijje.

<sup>27</sup> Majoya Jesosa jama poanaje ba'a: —Eyacuiñajji ecue Chii e huoojeajji epo. Eya ojaya esohui huohuiiji poani. Ecue Chiiya eyajo anija ecuea ejjashahuabaquiiji ojaya eba nei nei, ojaye nei. Ecue Chiiya ejjashahuabaquiiji ecuea eba nei nei pea'ai, ecuee nei. Eyaya ecuea epeeji ba meesahuaña quea ja'a nee ecue Chiiya ejjashahuabaquiiji —Jesosa poanaje.

<sup>28</sup> —¡Enijje jjapeequicue quea bei! Mique mimishi cuanajo miya quea yeno. Miquea echaco quea camajajo miya quea yeno poani pea'ai. ¡Enijje jjapeequicue! Eyaya miya jomishoca meeje'yo camaja'ama eba'e'yojji. <sup>29</sup> Eyaya quiana ca ca oe miquianaya jama pojjeamaa jjejojo quea jea aña; tecue'ama; quea bei pea'ai. Ecuea epeeji po majje miquianaya quea bei poaje'yo. Ba'e tiitii meeje'yo enijje eyajo pea'ai. Jamajjeya ¡ecuea esohui jayojja jama acue! ¡Jjashajja'ajjaquicue quea ja'a nee ecuea esohuijo! <sup>30</sup> Camaja'ama ecuea esohui jama eba'e'yojji. Ecuea esohui aquiana pejapeja e'abojji jayojja poani —Jesosa poanaje.

## 12

*Esohui epojja ejomishocajjijo*  
(Macoso 2.23-28; Noca 6.1-5)

<sup>1</sup> Majoya epojja ejomishocajjijo Jesosa o shajja'ajjaji cuana nijje ejiojjijje poquinaje. Que yiyeje poquije quea shoe poanaje; quejo nequi anoso ai sejja canananaje eshe tii e'ijjiajji, o shajja'ajjajiya. <sup>2</sup> Maya Paniseo cuaa ba canaje. Jamajjeya Jesosa nijje mimijajinaje jama ba'a: —¡Bacue oe! Mi shajja'ajjaji poani cuaa chaco cani. Anoso ai sejja cani epojja ejomishocajjijo. Moisesija etehue'yo jama poani ba'a: “¡A'a chacojji epojja ejomishocajjijo!”

<sup>3</sup> Jesosaa oya cuana saja'a canaje jama ba'a: —¿A'a miquea ba jjima esohui etehue'yo emeshi mese Dabija? <sup>4</sup> Yahuajo nei nei ojaya epeeji cuana quea shoe po majje ojee Eyacuiñajjija equi yasijje dobiquinananaje. Ijjia ca poa ejji ecabeje, maya Eyacuiñajji yasijje quia ca poa cuaa ojaya ebajji. Jiquio ca oe Eyacuiñajji nijje mimianiya ca'ijjia cahua; pea cuanaja e'ijjiajji pojjeama. <sup>5</sup> ¿A'a miquea ba jjima Moisesija esohui etehue'yo? Jama poa ba'a: Ojjaña epojja ejomishocajjijo Eyacuiñajji nijje mimiani cuaa ca oe Eyacuiñajjija equijo cachaco cahua. Jamatii mimishi'ama, mimijaji ajja, de; ojaya yajjijo cachaco cahua.

<sup>6</sup> —E'e, eyaya miya e'e jojo nei huohuiaña jama ba'a: Moisesija esohui Eyacuiñajjija equijo quea ja'a pishana yahuajo nei poa. Ecuea esohui ca ca quea ja'a nee nee —Jesosaa acanaje—. <sup>7</sup> E'e, miqianajaya Eyacuiñajjija esohui etehue'yo eba neinei'yo jojjemo dejja cuana mimishi'ama jjaniñebaqui ajja pome. Jamaya quea tai. Yahuajo Eyacuiñajjija esohui etehue'yo jama poa ba'a:

“Huo cuana cuia cani. Cuia majje na sho cani e bihuiajji. Jamaya ecuea quea boti pishana. ¡Pea cuana oe ba'e meecue tii quea bei! Jamaya ecuea quea boti nee nee”.

Jamaya tehue ca poa yahuajo.

<sup>8</sup> —Jamajjeya eya ojjañaja Edoe Mese Emeshi Mese nei poani. Eyaye nei huohuije epojja ejomishocajjijo; ¡quea pame nee nee acue! ¡Pea cuana quea jea nee acue! —Jesosa poanaje.

*Meshahuama'yo epo jjameshahuanequi mee ca'yonaje  
(Macoso 3.1-6; Noca 6.6-11)*

<sup>9</sup> Majoya Jesosa poquinaje pea huasijje. Equi ojee ejjachichaquijji yasijje dobiquinaje. <sup>10</sup> Jomajo dejja meshahuama'yo epo aninaje. Jamajjeya Jesosa ba majje Paniseo cuana jama jjashahuabaquinaje ba'a: —E'e pojja'a Jesosaa chaco caje epojja ejomishocajjijo; e'e pojja'a eme' jeapisa mee caje'yo epojja ejomishocajjijo. Caba'ajja sahua —poanaje Paniseo.

Jesosa nijje mimijaji sa poanaje. Jamajjeya oya huohui'ajja canaje Paniseo cuaa: —Jesosa, ¿a'a dejja quea mano jaa miyaya huaquia mee'yome epojja ejomishocajjijo?

<sup>11</sup> —Epeeji cuana, e'e pojja'a miquea ñajjajja jjani quea doe yasijje oquequije epojja ejomishocajjijo. ¿A'a miyaya ñajjajja iña majje ma pojjaajo jjequisohuaje'yo? E'e, de. <sup>12</sup> ¡Bacue oe! —Jesosa poanaje—, dejja Eyacuiñajjija quea boti nee; ñajjajja ca ca quea boti pishana. Jamajjeya e'e, pea cuana ca'a meesahua'yahua epojja ejomishocajjijo. Jamaya Moisesija esohui etehue'yojo poani pea'ai —Jesosa poanaje.

<sup>13</sup> Ma mimi majje Jesosaa meshahuama'yo epo jama acanaje ba'a: —Epeeji, ¡miquea eme' jeapisa'ajja'yo socue!

Jamajjeya eme' jeapiihui majje eme' jeapisa ca'yonaje; pea mijijje jayojjaya po'yonaje.

<sup>14</sup> Majoya Paniseo cuana esecue yasijje cuayaqui majje ojee miminaje: —¿Yajja amajje Jesosa quecua ca'yojji so'o, de? —jamaya poanaje Paniseo cuana.

*Jesosa Eyacuiñajjija echacojji ojaya yajjijo*

<sup>15</sup> E'e, Paniseo cuaa oya quecuapana canaje. Ma shajja'ajja majje Jesosa poquinaje pea meshi yasijje. Quea huiso dejja cuana onijje poquinaje. Ojjaña cuana huaquia mee ca'yonaje, jjaajaqui mee ca'yonaje, Jesosaa. <sup>16</sup> Jama poanaje ba'a: —E'e, eyaya miya huaquia mee'yonaje. ¡Jamatii a'a jihuohuijji so'o!

<sup>17</sup> E'e, Jesosaa ojjaña cuana huaquia mee ca'yonaje, sohuihuohui canaje pea'ai. Jamaya Isaiaja esohui etehue'yo ojo yahuajo nei nei jayojja jama poa. Eyacuiñajjiya Isaia yahuajo nei nei tehue mee ca poa Jesosajo jama ba'a:

<sup>18</sup> “¡Bacue! Jiquio dejja ecuea echacojji ecuea yajjijo. Eyaya oya huoojeaje'yo. Oya ecuea quea jea nee nee. Ojo eya quea bihui nee nee. Ecuea Edojjoshahua Pame o que eyaya huoojeaje'yo; ohuaya ojjaña Jodio pojjeama cuana huasijje huohui caje jama ba'a: —¡Ojjaña cuana ecuea esohui e'e jojo neijo jjabahuejjaqui'yajo Eyacuiñajjiya quea bojea po mee caje'yo! <sup>19</sup> Oya ecuea echacojji jjamimicuiajea

nobiajeaqui ajja. Quea bei nee mimije'yo. Ejiojjijje poquiani quea shajjaquijjo po'yo ajja. <sup>20</sup> Joya quea mimishi nee nee aje jja oe ohua mimishi cuana cuijea ca'yajje quea boejea poaje'yo. Cuanaya jiquio ecua cuaquijji quijjo'yo jjimahuajo esei sho o'oyaña jama jayojja ecuea epeeji quea mimishi po o'oya chanajo ohuaya quea ja'a nee nee po mee caje o'oya, de. E'e, ohuaya ejo chaco tiitii caje'yo; quea huiso nee nee ba'e mee caje'yo quea ja'a nee nee. <sup>21</sup> Jodio pojjeama quea huiso nee nee ojjaña meshijo ba'e cuanaya e'e jojo nei onijje jjapeequije'yo pea'ai”.

Jamaya Eyacuiñajjiya Isaia tehue mee ca poa yahuajo nei nei Jesosa Quitojo.

*Jesosa niñeba canaje cuaa*

*(Macoso 3.20-30; Noca 11.14-23; 12.10)*

<sup>22</sup> Majoya Jesosa que jjequi canaje cuaa dejja niñepoqui. Oya cojjama', mimi'ajja pea'ai. Jesosaa eshahua huoojeacuayajea ca'yonaje. Jamajjeya oya quea cojja ja'a poanaje, emimijji pea'ai. <sup>23</sup> Ba majje ojjaña cuana quea bihui nee poanaje. Jama acanaje ba'a: —E'e de, a'ya shai de, ¿a'a pojja'a Jesosa Eyacuiñajjiya huoojea'yo Quito?

<sup>24</sup> Ma shajja'ajja majje Paniseo cuaa Jesosa niñeba canaje. Jama poanaje ba'a: —Chojja, de. Jesosa aje oe eyamiquecua pojja'a. Ohuaya aje jja oe eshahua cuana huoojeacuayajea canaje Edosiquiana etii nijjeya, Satanasa bajjani, pea bajjani Meesemo nijjeya —poso acanaje Paniseo cuaa.

<sup>25</sup> Paniseo cuanaja ejjashahuabaqui'yojji quea tai Jesusaja eba poanaje. Jamajjeya oya cuana tecuea canaje jama ba'a: —¡Shajja'ajjacue oe! Joya emeshi mese shajja'ajja sa po ajjajo ojee jjaquecuaqui majje jjaquecua iyaiyaquije'yo; dejja cuana ma meshijo ba'e chama'yo tii poaje'yo. Cuiñajji ba'e cuana jamaya po pea'aje, chama'yo tii poaje emeshi meseje echacojji cuana. Huapa pojjeama cuana jjacuaquiajo chama' epeeji cuana poaje'yo pea'ai. <sup>26</sup> Jamaya pea'ai Edosiquiana, Satanasa pea eshahua ehoojeacuaya'yo jojjemo dejja huoojea'yojji pojjeama po'yoqueaye —Jesosa poanaje. <sup>27</sup> —¿A'a ya eya Edosiquiana nijjeya niñe, pea eshahua cuana pea'ai huoojeacuayajeaña poso aña? Jamajjeya miquea epeeji cuanaa ¿ae nijje eshahua huoojeacuayajea cani? Eyacuiñajjiya asahua canijo. Jamajjeya ojaya eba miquianaya ejo sijje poani. <sup>28</sup> E'e, Eyacuiñajji nijjeya eyaya eshahua huoojeacuayajea'yaña. Jamajjeya bacue eya e'e jojo nei Eyacuiñajji, Emeshi Mese oe nei jjeya poani tii. <sup>29</sup> Cuanaya ¡bacue! ¿A'a dejja quea ca'a neeja equi yasijje dobiqiani oja aquiana siiya o jeyo jjima nequijo? Chojja. O jeyo majje ojaya aquiana cuana sii caje cuaa. Jiquio ecua e'aquiana mese ebionei jeyo cani jama amajje eyaya eshahua cuana jeacuayajeaña —Jesosa poanaje pea'ai.

<sup>30</sup> —Cuanaya ojjaña joya enijje jjapeequi ajja aje oe e quecuapanajji poani, ojjaña enijje chaco ajja ecuea epeeji pojjeama aje oe e ejeabichajeajji nisho poani —poanaje.

<sup>31</sup> —Jamajjeya eyaya miya e'e jojo nei huohuiaña: Eyacuiñajjiya ojjaña mimishi cuana, sijjepojji cuana pea'ai cuijea caje'yo. Jamatii joya Edojjoshahua Pame niñeba cani tii ca ca Eyacuiñajjiya maya emimishi cuijea'yojji pojjeama tii tii. <sup>32</sup> E'e —Jesosa poanaje—, eya niñeba cajo Eyacuiñajjiya ma mimishi cuijea caje'yo. Joya Edojjoshahua Pame niñeba cani tii ca ca Eyacuiñajjiya maya emimishi cuijea'yojji pojjeama tii tii. Jjeya ecuijea'yojji pojjeama; quijje ecuijea'yojji pojjeama tii tii poaje'yo, eya ecue Chii nijje eyajo ojjaña huoojea'yojji poaje —Jesosa poanaje.

*Dejja mimishi acui tai jjajja ajja jayojja*

*(Noca 6.43-45)*

<sup>33</sup> Jesosaa Paniseo tecuea canaje pea'ai jama ba'a: —Acui quea pame jjajjani. Acui quea tai jjajja ajja, quea jjajja biso. Jamajjeya miyaya baña dejja mimishi acui tai jayojjaya; ohuaya quea tai acani. ¿A'a miyaya eya baña quea pame nee? Jamajjeya eya quea pame acui quea pame jayojja. <sup>34</sup> Miquianaya aje oe peyo quea se nee nee jama, quea mase. Miquianaya quea tai poanijo quea pame mimi ajja. E'e, quea jjashahuabaqui tai po tiitianijo quea tai mimiani —Paniseo cuana acanaje Jesosaa—. <sup>35</sup> E'e, joya quea jjashahuabaqui ja'a nee poanijo quea ja'a nee ba'yani. Quea jjashahuabaqui taijo ca

ca quea tai ba'yani. <sup>36</sup> Jamajjeya eyaya miya huohuije e epoe o'oyajjijo ojjaña mimishi tecueaa, ojjaña joya jjaniñebaquiani, mimijajiani, sijaje poani pea'ai quea nee nee po tiitii meejeyo. <sup>37</sup> E'e, miquea esohui quea ja'a nee poanijo, Eyacuiñajjiya miya etecueajji pojjeama. Quea sho'i taijo ca mi ca Eyacuiñajjiya quea nee nee po tiitii mee caje'yo — Jesosa poanaje.

*Paniseo cuana Jesusaa acani ba o'oya sa poanaje*  
(Macoso 8.12; Noca 11.29-32)

<sup>38</sup> Majoya beca Paniseo cuaa, Moisesija tehue huohuijjiya pea'ai Jesosa huohui canaje jama ba'a: —Esohui huohuijji Jesosa, ¡quea pame acue! ¡Ma dejjaa ajjima acani a'o'oyacue so'o, Eyacuiñajjiya miya huoojea canaje ecuanaja ebajji! —poanaje.

<sup>39</sup> —Chojja. Miquianaaya Eyacuiñajjiya esohui cajaa anaje. Jamajjeya miya peapea ba sa poani. Jamatii Eyacuiñajjiya yahuajo nei Jjonajo aca poa jayojja jama ohuaya jjeya acaje o'oya miquianaja ebajji. <sup>40</sup> Ma ecua yahuajo Eyacuiñajjiya esohui huohuijji Jjona jai ai'aija seejo ba'ya poa pea beca peejjima cahuime jama jayojjaya aje eya ojjaña Edoe Mese bajjani quijje pishana mano'yo majje mei jjanijo ehuananobia jaa shequije o'oya —Jesosa poanaje.

<sup>41</sup> —Yahuajo nei nei dejja cuana Ninebejo ba'eya Jjonaja esohui shajja'ajja majje mimishi cuana pajea ca'ya poa. Jjona quea ca'a pishana poa; eya ca iña quea ca'a nee nee. Jamatii miquianaya ecuea esohui shajja'ajja sa po ajja. Jamajjeya quijje eya poe o'oya majje mimishi cuana tecueajeaje. Ninebe dejja cuaa miya tecuea caje jama ba'a: “Miquianaya ca ca oe quea mimishi nee nee poanaje”. <sup>42</sup> Jama pea'ai poaje ba'a: Yahuajo nei nei Sama mese epona quea huesha nee poeya poa Jodioja emeshi mese Sanomoja esohui shajja'ajjaa. Sanomo quea jjashahuabaqui ja'a pishana poa; eya ca quea jjashahuabaqui ja'a nee nee. Jamatii miquianaya ecuea esohui shajja'ajja sa po'yo ajja. Jamajjeya quijje eya poe o'oyaje mimishi cuana tecuejeaa, eeno poejjijje emeshi mese pona, Sama meseya jama miquianaya tecueame acaje pea'ai ba'a: “Miquianaya ca ca oe quea mimishi nee nee poanaje” acaje nequiana —Jesosa poanaje.

*Eshahua dejjaja yami yasijje poe o'oyanaje*  
(Noca 11.24-26)

<sup>43</sup> Jesusaa esohui ejjabahuejjaqui meejji huohui canaje pea'ai jama ba'a: —Eshahua dejjaja yamijo nequi cuayaqui'yo majje quea huesha poquinaje. Sa'ajja canaje pea huasijje enequijji. Jamatii ba'yo jjima. Oya po'ayequequi tii. <sup>44</sup> Jamajjeya oya jjashahuabaquiani jama ba'a: “Eya poquije o'oya huacuaya oya' dejja huasijjeya, ma e cuayaquinaje yasijjeya, ma ecuea equi jayojja huasijjeya”. Jamajjeya oya' dejja huasijje poe o'oya majje ba cañaquiyani chama' enahuejji Eyacuiñajjiya epeejji nei pojjeama jjejojo. Ojaya eyami equi ecuiashaba jayojja jama, ehua bame bame jayojja, equi se ejjama' jayojja. <sup>45</sup> Jamajjeya oya poquije pea eshahua cuana sa'ajjaa. Ba caje quea huiso, me mijijje beca onijje enequijji. Oya cuana quea mase nee nee; pea quea mase pishana. Majoya ojjaña dobiQUIAJJO ma dejja quea yeno nee nee poani. Yahuajo oe eshahua nequia huajo quea yeno pishana poanaje.

Jamaya poanaje Jesosa shajjama' cuana nijje, oya cuana onijje jjapeequi sa po ajjajo. —Ma dejja jayojjaya miya poaje, quea mimishi nee nee tii tii poaje —Jesosa poanaje.

*Jesosaja huapa pojjeama poeyanaje*  
(Macoso 3.31-35; Noca 8.19-21)

<sup>46</sup> Jesosa mimianijo ojaya enaese, oja chahua cuana pea'ai o que poeyanaje. Esecuejo nequinaje. <sup>47</sup> Majoya Jesosa huohui canaje cuaa: —Miquea enaese, mique chahua cuana esecuejo nequi. Minijje mimi sa poani.

<sup>48-49</sup> Jesusaa saja'a canaje: —¿Ache shai ecuea huapa pojjeama cuana? ¡Bacue! Jiquio ecuea shajja'ajjajji cuana ecuea huapa pojjeama cuana, ecuea quea jea nee nee ecuea ecue nae quea jea aña jayojja jama. <sup>50</sup> E'e, ecue Chii eyajo ani; ojjaña jjashajja'ajjaquiani ojaya

esohuijo ecuea huapa pojjeama, ecue chahua, ecue jjo'i, ecuea enaese pea'ai —Jesosaa acanaje.

## 13

*Eso' jeaajajji*

(Macoso 4.1-9; Noca 8.4-8)

<sup>1</sup> Majoya Jesosa equijo ani cuayaquinaje. Bae sahua huasijje poqui majje anioquenaje. <sup>2</sup> Majoya o que jjachichaquinaje dejja cuana quea huiso nee nee. Jamajje bishe yasijje nequisohuaqui majje anioquenaje esohui huohuiya. Dejja cuana meshijajji aninaje. <sup>3</sup> Bishe quecuayijeja cajo, Jesosaa oya sohuihuohui canaje quea huiso nee nee. Pea esohui ona jjashahuabaquijji huohui canaje o ba meesahuajji. Jama acanaje ba'a: <sup>4</sup> — Ebanajji cuana poquinaje banaa. Eso' jeaaja canijo, oe pojji eso' oquequinaje ejiojji yasijje. Poeyanaje cuichojji cuana; ijji ca'yonaje eso'. <sup>5</sup> Pea eso' oquequinaje mei biajje. Meshi chamajo eso' pohua'ajja'yonaje. <sup>6</sup> Quijje cuayanaje eshequi. Quiyo'yonaje, esajja joca'yonaje, mano'yonaje. <sup>7</sup> Pea eso' oquequinaje acuisha huasijje. Pohua'yo majje jjonohua bebo ca'yonaje. Tatajo nequi jjajja ajja poanaje. Mano'yonaje. <sup>8</sup> Pea eso' oquequinaje meshi quea pame yasijje. Pohua'yonaje eso' cuana. Ejjajja quea pame nee nee poanaje. Oe esajo ejjajja iye huiso aninaje; pea esajo ejjajja quea huiso, pea esajo quea huiso nee nee aninaje. Sejja canaje quea huiso nee. <sup>9</sup> ¡Miya jjashajja'ajjaquicue! ¡A'a shajjama' pojji! —Jesosa poanaje.

*Esohui eba meesahuajji Jesosaa sohuihuohui canaje ona jjashahabaqui meejji*

(Macoso 4.10-12; Noca 8.9-10)

<sup>10</sup> Quijje o shajja'ajjajji cuana poeyanaje Jesosa que. Huohui'ajja canaje: —Jesosa, ¿apiojji miyaya esohui eba meesahuajji quea quehua huohuiaña jiquio dejja cuana huasijje?

<sup>11</sup> Oya cuana saja'a canaje Jesosaa: —Miya ca ca oe Eyacuiñajjiya ba meesahua cani eya ojjañaja Emeshi Mese nei poaje'yo. Yahuajo ba mee jjima poa. Pea cuana ca ca eba meesahuajji pojjeama. <sup>12</sup> Jamajjeya joya Eyacuiñajjiya esohui ba cani quea huiso pishana quijje quea huiso ba mee caje'yo. Joya ojaya esohui ba sa po ajjaa ca ca pajea caje'yo. <sup>13</sup> Jamajjeya eyaya peapea esohui eba meesahuajji huohuinaje o ba meesahuajji. Jamatii ecuea esohui shajja'ajja majje oya cuana jjashahuabaqui ajja, de, shajja'ajja jjima jama acani, de. <sup>14</sup> E'e, oya cuana quea sapa ca'a nee poani. Jamajjeya Eyacuiñajjiya Isaia tehue mee ca poa yahuajo nei nei jama ba'a:

“Shajja'ajja huicha'a huicha'a majje jamatii jjashajja'ajjaqui ajja poaje. Eyacuiñajjiya acani ba huicha'a huicha'a majje jamatii jjashahuabaqui ajja poaje. <sup>15</sup> Quea sapa ca'a nee nee poani, shajja dojjoma' jama, cojjama' jama pea'ai. Ecuea esohui eba jojjemo, eshajja'ajja jojjemo jjabahuejjaqui'yome. Pea'ai enijje ejjapeequi'yo jjemo eyaya mimishi cuijea'yome”.

Jamaya yahuajo nei nei tehue ca poa etiiquiiana Isaiaa —Jesosaa acanaje.

<sup>16</sup> Jamajjeya Jesosaa o shajja'ajjajji cuana jama acanaje pea'ai ba'a: —Miquianaya ca ca quea cojja ja'a, quea shajja ja'a pea'ai. ¡Jamajjeya quea bihui nee pocue! <sup>17</sup> E'e jojo nei eyaya miya huohuiaña jama ba'a: Quea huiso Eyacuiñajjiya esohui huohuijji yahuajo, ojaya epeejji nei yahuajo ba'e pea'ai e ba sa neinei poa. Ecue huohui shajja'ajja sa neinei poa pea'ai. Jamatii ojaya eya ba jjima poa. Ecue huohui shajja'ajja jjima pea'ai poa. E'e jojo nei eya Eyacuiñajjiya huoojea'yo ojjaña jaahuanajji. Ma ba sa poa Eyacuiñajjiya esohui huohuijji yahuajo nei nei.

*Jesosaa esohui ebanajji ba mee canaje*

(Macoso 4.13-20; Noca 8.11-15)

<sup>18</sup> Majoya ojjaña cuana acanaje Jesosaa: —Jamajjeya eyaya miquianaya ba meesahuaje ecuea esohui ebanajji. <sup>19</sup> Maya: Beca cuana ejiojji yasijje oquequi eso' cuana cuichojjiya ijjiayeyo ca'yonaje. Jamaya beca cuana ecuea esohui eya ojjañaja Emeshi Mese oe nei

poaje shajja'ajja majje jamatii jjashahuabaqui ajja. Jamajjeya Edosiquiaa o que poe majje ecuea esohui pajea mee cani. <sup>20</sup> Beca cuana eso' mei biajje oquequinaje jayojja jama ecuea esohui shajja'ajja majje quea bihui nee enijje jjapeecuaji'ajjaquiiani. Jamatii ecuea esohui jayojja jama ba'e tiitii ajja. <sup>21</sup> Eso' mei biajje pohua esajja joca'yajo mano'yani jayojja jama poani; pea cuaa oya napa cajje Eyacuiñajji nijje jjapeequipajeani. <sup>22</sup> Beca cuana eso' acuisha nijje pohuani jama poani. Acuishaa bebo cajje jjajja ajja jayojja jamaya ecuea esohui shajja'ajja majje jjapee nishoquiiani. Jamatii oya cuana quea bejjo nahue poanijo, aquianajo quea huiso jjashahuabaquiiani, quea mete pea'ai poanijo Eyacuiñajjijo chaco ajja. <sup>23</sup> Eso' meshi quea pame neejo pohua majje quea jjajja huiso poanaje jayojja jama beca cuana; ecuea esohui shajja'ajja majje jjabahuejjaquiiani; ecuea epeeji quea ja'a nee nee poani, pea cuana ejo jjabahuejjaqui meesahua cani iye huiso pojja'a, quea huiso pojja'a, quea huiso nee nee pojja'a —Jesosaa mahuisoya oya cuana acanaje.

#### *Esohui acuisha cuanajo*

<sup>24</sup> Majoya Jesosaa oya cuana huohui canaje pea esohui eba meesahuajji. Jama poanaje ba'a: —Eyacuiñajjija esohui ejo ebanajjiya eso' bana canaje jama. Eso' ache bame nei quecua canaje quejo, anoso. <sup>25</sup> Majoya ojjaña echacojji cuana ecahuijaajo, dejja quea mimishi, o jeabichajeajji epo poeyanaje. Sipone so' quea huiso quehuajje nei jeaajaqui canaje quejo. <sup>26</sup> Anoso pohua'yo majje jjajjanaje. Sipone pohuanaje anoso tejjee, jjajjanaje pea'ai. <sup>27</sup> Quijje pishana eque meseja echacojji cuana o que poeyanaje. Jama poanaje ba'a: “Emeshi mese, ¿a'a miquea anoso sipone tejjee quecua pojjeama poanaje?” huohui'ajja canaje.

<sup>28</sup> —Echacojji meseya saja'a canaje: “E'e, quea pame poanaje. Dejja quea mimishiya quehuajje jeaajaqui canaje sipone so' ecuea quejo, de” poanaje.

—Echacojji cuaa huohui'ajja canaje: “¿A'a sipone chiyojeaje'yo?”

<sup>29</sup> —“Chojja” poanaje eque mese. “Anosoya miyaya chiyojea chana'. Jamatii. <sup>30</sup> Ojee sipone nijje catiiquiahua. E'e, majoya anoso jahuajo eyaya huoojeaje anoso sejjayojji cuana anoso sejjaa. Sejjajeyo majje anoso chichaje. Ecuea equi yasijje iyanobiaje anoso, ecuea ejaahuanajji. Sipone ca oe caquiyojeaqui'yahua pasi'yo majje” poanaje eque mese.

—E'e, jiquio eque meseya sipone dahuajea cani jama dejja mimishi Eyacuiñajjiya acaje'yo. Anoso sejjajeyo majje equijo huana cani jamaya ecuea epeeji aje'yo —Jesosa poanaje.

#### *Esohui acui so' che biso nei neijo motasa bajjanijo*

(Macoso 4.30-32; Noca 13.18-19)

<sup>31</sup> Majoya Jesosaa pea esohui eba meesahuajji huohui canaje jama ba'a: —Eyacuiñajjija ehuhui ojaya epeeji cuanajo jama pea'ai ba'a: Pea eso' motasa che biso nei eso' bana cani equi quibojo. <sup>32</sup> Jiquio eso' che biso nei nei; tii majjeya quea cui quemo nee poaje apo'e cui quemajja. Jamajjeya cuichojji cuana poeyani motasa acui biajje cahuiya —jamaya Jesosaa huohui canaje ojjaña ba meejji quijje Eyacuiñajjija epeeji cuana quea huiso nee, quea ca'a nee poaje'yo.

#### *Esohui eba meesahuajji eshejee meejjijo*

(Noca 13.20-21)

<sup>33</sup> Pea esohui eba meesahuajji huohui canaje Jesosaa jama ba'a: —Eponaa pahui dahuaajjiya quea huiso nee pohuipohui tejjee oe pojji nei nei eshejee meejji iñahuahuo neinei cani, ojjaña eshejee meejji. Jiquio eshejee meejjiya ojjaña pohuipohui shejee mee cani jamaya poaje ecuea epeeji cuana. Jama ba'a: Jjeya beca cuana jjashajja'ajjaquiiani. Majoya aje quea huiso nee ojjaña pojja'a jjashajja'ajjaqui mee caje'yo Eyacuiñajjijo —Jesosa poanaje.

#### *Esohui eba mee'yojji*

(Macoso 4.33-34)

<sup>34</sup> E'e, jiquio esohui ehuhui'yo cuana Jesosaa ma bishejo nequiya huohui canaje. Esohui eba meesahuajjijo ca ca huohui canaje. <sup>35</sup> Jamaya poanijo ohuaya Eyacuiñajjija

esohui huohuijijia esohui yahuajo nei nei jama acanaje. Jamaya aje yahuajo nei nei Eyacuiñajjiya ojaya esohui huohuijii huohui mee ca poa Jesusajo ba'a:

“Eyaya aje jja esohui huohuije esohui eba meeji. Yahuajo jiquio meshi panajeyo majje ecuea dejja cuana ba meesahua jjima poanaje ecuea ejjashahuabaqui'yojji. Jjeyahua ca ca ecuea ejjashahuabaqui'yojji ba meeje'yo, eyaya”.

*Ehuohui'yo siponejo ba mee canaje Jesusaa*

<sup>36</sup> Majoya Jesusaa —Poquia iña —acanaje dejja cuana. Bishejo ani cuayaqui'yo majje poquinaje equi yasijje. Dobiqui majje o shajja'ajjajji cuana o que poeyanaje. Huohui'ajja canaje: —Jesusa, ¡ba meesahuacue ehuohui'yo siponejo! Maya ecuanaja quea quehua.

<sup>37</sup> Jamajjeya Jesusaa oya cuana huohui canaje: —E'e, eya ojjañaja Edoe Mese anoso banajji nei nei jama. <sup>38</sup> Que quea pame jayojja ojjaña dejja ojjaña meshijo ba'e cuana. Eso' quea pame nee Eyacuiñajjiya epeeji nei jayojja jama. Sipone so' quea tai jayojja eshahua epeeji cuana. <sup>39</sup> Joya dejja sipone so' jeaajajji epo jayojja jama dejja mimishi, e cuiajji nisho epo, Edosiquiana, de, Satanasa. Jiquio ecua epojja anoso jahuajo sejjajeyo ca'yonaje jama meshi oe poaje. Joya anoso sejja'yojji ca ca Eyacuiñajjiya esohuidojojji cuana jama. <sup>40</sup> Jamajjeya jiquio ecua sipone pasi'yo majje dahua jea canaje jayojja jamaya poaje dejja mimishi meshi oe poajo.

<sup>41</sup> —E'e, eyaya ojjañaja Edoe Meseya esohuidojojji cuana huoojeaje dejja mimishi cuana iña, ona mimishi po meeji poani pea'ai iña. <sup>42</sup> Iña majje jeajea caje'yo cuaqui quea quiyo nee nee yasijje. Jomajo pa neineje'yo; ese' ijjiayajjea caje'yo cuaqui quea quiyo nee nee. <sup>43</sup> Ecuea epeeji ca ca ecuea esohui jama acanajo ba'e tiitiije'yo eyajo eseja Chii nijje quea ja'a nee nee, eshequi ja'ajja, de —Jesusa poanaje.

*Aquiana quea nahue ehuanaquehua'yo*

<sup>44</sup> Majoya Jesusaa huohui canaje pea esohui eba meesahuajji jama ba'a: —Eyacuiñajjiya esohui cuana ojaya epeeji cuanajo jama pea'ai ba'a: Quejo aquiana pame quea nahue nee nee ba majje dejja jjataqui canaje jomajo tii. Majoya oya quea bihui nee poquinaje. Ojjaña ojaya aquiana cuana dojo canaje; quia canaje que sosejje. Jiquio ecua aquiana quea nahue nee nee jjeshe canaje jama jayojja dejja Eyacuiñajji nijje jjapeequiani —Jesusa poanaje.

*Pea esohui aquiana quea nahue nee nee*

<sup>45</sup> —Eyacuiñajjiya esohui ojaya epeeji cuanajo jama pea'ai ba'a: Dejja aquiana nahuejjiya sa'ajja tiitii canaje mei sisi siyosiyo copocopo quea nahue nee. <sup>46</sup> Oe mei sisi siyosiyo copocopo quea nahue nee nee ba majje ojjaña ojaya aquiana quiaa dojo canaje mei siyosiyo quea pame nee nee jjesheji. Eya ca ca iña mei quea nahue nee nee quea pame nee nee jama, ojjaña jaahuanajji —Jesusa poanaje.

*Esohui nahuoo cuiashajajji*

<sup>47</sup> —E'e jojo nei pea ba'eme epojji jamaya pea'ai ba'a: Nahuoo cuiashajajji jea cani cuaa bae yasijje. Nahuoo cuiashaja cajje dobiquiani. Peapea nahuoo cuiashaja cani. <sup>48</sup> Quea huiso yanijo nahuoo cuiashajajji cuaa meshijaji sahua huasijje jjequisohua cani. Majoya pejo majje nahuoo cuana ba cani. Ojjaña nahuoo quea pame nee bio cani jjepai yasijje; peajja ijji ca ajja jojoya ca ca jeajea cani. <sup>49</sup> Jamaya poaje e poe o'oyajo. Esohuidojojji cuana poeje; Eyacuiñajjiya epeeji cuana ojjaña quea pame ba'e chicha caje'yo. Dejja mimishi cuana ca ca jeajea caje'yo cajaajojo. <sup>50</sup> Cuaqui quea quiyo nee nee yasijje dobiquije'yo tii tii. Jomajo siasia'yoquije tii; ese' ijjiayajjea caje'yo quea nee poanajo —Jesusa poanaje.

*Esohui eyacua*

<sup>51</sup> Majoya Jesusaa oya cuana huohui'ajja canaje: —¿A'a ecuea esohui quea ja'a nee? ¿A'a jjabahuejjaquinaje?

—E'e, quea ja'a nee.

<sup>52</sup> Jamajjeya Jesusaa o shajja'ajjajji cuana acanaje: —E'aquiana meseya ojaya aquiana cuana etii, aquiana eyacua pea'ai ojjaña cuana huohui'ajja cani. Jiquio ecua pea



huohui'ajja pea huohui'ajja acani jayojja jama esohui huohuijji poani, jjabahuejjaqui majje, Jodio esohui huohuijjiya Eyacuiñajjija esohui yahuajo etehue'yo, ecuea esohui eyacua pea'ai pea cuana ba meesahua cani —poanaje.

*Jesosa Nasanena meshi yasijje poquinaje*

*(Macoso 6.1-6; Noca 4.16-30)*

<sup>53</sup> Majoya esohui huohui'ajja majje Jesosa jomajo ani poqui o'oyanaje ojaya cuiñajji yasijje, Nasanena huasijje. <sup>54</sup> Jodioja equi ojee ejjachichaquiiji yasijje dobiquinaje. Esohui huohui canaje. Ojaya esohui shajja'ajja majje Nasanenajo ba'eca cuana quea tecue poanaje. Oya Jesosa Joseja jea poso acanaje cuaa: —¿Yajjajje shai jiquio dejjaa Jesusaa esohui quea ja'a nee nee huohui cani, de? ¿Eyacuiñajji jayojjaya jjaajaqui mee cani emanojaa quea huiso nee, de? <sup>55</sup> Oya aje oe acui cacajji nei neija bacua ejja pojja'a, oja nae Mania bajjani, oja chahua cuana Jacobo, Jose, Simohui, Jonasa pea'ai bajjani. <sup>56</sup> Oja jjo'i cuana pea'ai jiquiojo ba'e, de. Jamajje ¿achejo joya Jesusaa ojjaña jiquio esohui ba canaje so'o? —jamajjeya quea quene poanaje Jesosa nijje. Joseja jea poso cajaa acanaje.

<sup>57</sup> Jamajjeya Jesusaa oya cuana jama acanaje ba'a: —E'e de, pea cuaa Eyacuiñajjija esohui huohuijji shajja'ajja cani. Jamatii oja meshijo ba'e cuana ojaya huapa pojjeama cuana ca ca oe jjashajja'ajjaqui sa po'yo ajja.

<sup>58</sup> Jamajjeya oya cuana jjashajja'ajjaqui sa po ajja. Jesosa Eyacuiñajjija bacua pojjeama posojo, ohuaya emanojaa cuana oe pojji jjaajaqui mee ca'yonaje, ma dejjaa ajjima acani oe pojji nei acanaje Nasanenajo, Jesusaa.

## 14

*Enodeya Huani sapa jajasejjajea mee canaje*

*(Macoso 6.14-29; Noca 9.7-9)*

<sup>1-2</sup> Jesosa Janinea meshijo anijo, Janinea meshi mese Enode bajjaniya shajja'ajja canaje onaja ehuohui'yo Jesusajo. Ma Enode pea emeshi mese, Enode pea'ai bajjani. Oya emeshi mese Enodeja bacua ejja; oya Enode Antipa bajjani pea'ai poanaje. Shajja'ajja majje ma Enodeya Huani shequi o'oya posoya acanaje: —E'e de, jiquio dejja aje oe Huani, ma ona besameejji poa. E'e pojja'a oya mano'yo majje shequi o'oyanaje. Jamajjeya ohuaya Eyacuiñajjija jayojjaya acani —jamaya ohuaya ojo chacochoani acanaje.

Yahuajo nei Jesusajo shajja'ajja jjimahuajo ma Enodeya Huani sapa jajasejjajea mee canaje. <sup>3</sup> E'e, yahuajo ma emeshi mese Enodeja edoe mese Penipeja ehuanase Enodias bajjani Huani nijje quea quene poa. Jamajjeya ma Enodeya Huani iña mee canaje; jeanobiajea mee canaje. <sup>4</sup> E'e, Huaniya yahuajo ma Enode jama tecueame aca poa ba'a: —¡Miyaya aje oe mique doeja Penipeja ehuanase Enodias a'a huana'yojji! Jamaya pojjeama Jodioja etehue'yo; quea mimishi.

<sup>5</sup> Jamajjeya ohua tecuea cajje quenequenaje Huani nijje. Quecua sa aca poa. Jamatii quecua jjima; quea mete poanaje pea Jodio cuanajo. E'e, quea huiso Jodio cuana jjashahuabaquinaje Huani Eyacuiñajjija esohui huohuijji nei nei poanaje. <sup>6</sup> Jamatii ma Enodeya o cuaya poa pojjaajo ojjaña ojaya epeeji cuana iyaa canaje ojee ijja'ijjiaa, majamajaqui baa pea'ai. Enodiasja bacuase pea'ai oe nei majamaja nequinaje ojjañaja ebajji, quea bihui nee epo meeji. Enode Antipa quea bihui nee nee poanaje epona sho'ijo. <sup>7</sup> Jamajjeya onijje miminaje jama ba'a: —¿Ae shai sa poani miya? ¡Huohuicue mo! Eyaya miya quiaje. E'e jojo nei nei she, coya miya sañaya aje mi quiaje —acanaje Enodeya.

<sup>8</sup> Jamajjeya epona sho'i poquinaje ojaya enaese Enodias huohuiya.

—E'e —oja nae poanaje—, e'e ¡Huani sapa jajasejjajea meequicue, she!

Epona sho'i poe o'oyanaje Enode que. Huohui canaje jama ba'a: —Huani, ma ona besameejji poani ejeanobia jaa. ¡Ojaya esapa jajasejjajea'yo majje piatojo jjequicue jjeyahua nei! Maya eya sa poani.

<sup>9</sup> Shajja'ajja majje emeshi mese Enode quea ajjajja nee nee poanaje. Jamatii ojaya esohui epona sho'i nijje ojjaña ojaya epeeji cuana shajja'ajja canaje. Jamajjeya ojaya

esohui pajea ajja, Enodeja. Jamajjeya ohuaya sohuinano cuana huoojea canaje: —¡Epona sho'ija esohui jayojja jama acue!<sup>10</sup> ¡Huani ma ejeanobia jaa oe sapa jajasejjajeaquicue! —poanaje.

<sup>11</sup> Jjeya nei sohuinano cuana poquinaje Huani que. Huani sapa jajasejjajea ca'yonaje. Esapa jjequi canaje piatojo. Epona sho'i quia canaje. Majoya ohuaya Huanija esapa oja nae yasijje quia cañaqui'yonaje, epona sho'iya.

<sup>12</sup> Majoya Huani shajja'ajjajji cuana poe'yonaje o dojo'yohua emojea'yojji. Mojea'yo majje papoqui'yonaje Jesosa huohuiya.

*Jesosaa 5.000 dejja cuana bobia canaje*

*(Macoso 6.30-44; Noca 9.10-17; Huani 6.1-14)*

<sup>13</sup> Jesosa Huani emano'yo shajja'ajja majje o shajja'ajjajji cuana nijje sohuaquinaje bishe aijo quima huasijje.

Jamatii ma ba majje quea huiso dejja cuana cuiñajji cuanajo ba'e ejiojjijje poquinaje Jesosa baa. Poquicuajinaje ma Jesosa besapoquije yasijje. Onaya jjaja ebionei aniñaquinaje Jesosa hui que añaquiya. <sup>14</sup> Quijje pishana Jesosa o shajja'ajjajji cuana nijje ba'eñaquinaje. Bishe aijo ani nequisohuaquinaje etaja huasijje. Quea huiso nee nee dejja cuana ba cañaquinaje. Onajo quea yeno jjashahuabaquinaje, quea huiso emanojaajo, quea nee jaajo pea'ai. Jamajjeya ojjaña huaquia mee ca'yonaje, jjaajaqui mee ca'yonaje, Jesosaa.

<sup>15</sup> Siniajo Jesosa que poe majje o shajja'ajjajji cuaa huohui canaje jama ba'a: —Jesosa, sinia coma, de. Jiquiojo chama' equi, chama' bobi pea'ai. ¡Dejja cuana huoojeacue cuiñajji sisi cuana huasijje oja bobi jjesheya!

<sup>16</sup> —Chojja. Ca'aniahua cuana. ¡Bobiacue oe miquiaaya! —Jesosaa acanaje.

<sup>17</sup> —¿Yajja yajji? Oya cuana quea huiso nee nee añe ebobajji. Ecuanaja bobi oe pojji yani. Me oejje pahui, beca nahuoo sisi pea'ai yani —poanaje cuana.

<sup>18</sup> —¡Comaya jjajja oe yacua yecue! —Jesosa poanaje—. <sup>19</sup> Ojjaña cuana jama acue pea'ai ba'a: “¡Ojjaña anioquecue sipone biasje!” acue.

Anioque mee canaje sipone biasje. Majoya pahui me oejje huiso, nahuoo sisi becanajjijji pea'ai jjeshe majje Jesosaa eyahuasijje jjabajeasohuaquinaje. Eyacuiñajji bihuia canaje. Eyacuiñajji nijje bobijo mimi majje pahui miji canaje, nahuoo sisi pea'ai. O shajja'ajjajji que quia canaje, Jesosaa. Majoya ohuaya bobi quia canaje dejja cuana huasijje. Quia ca poquije quea huiso nee nee jjapanaquei poquipoquinaje bobi, de. <sup>20</sup> Ojjaña jeje majje eshajja'ajjajji cuaa chicha ca'yonaje bobi ojjañaja ijjiasejja. Jjepai ai yasijje iya ca'yonaje. Quea huiso nee poanaje; <sup>12</sup> jepai huisome bobi e'ijjiasejjaja ecuatajea poanaje. <sup>21</sup> Quea huiso nee nee bobi ijji mee canaje, de, 5.000 dejja. Epona cuana, esho'i cuana pea'aiya quea huiso nee nee ijji canaje.

*Jesosa bae ena biasje poquinaje*

*(Macoso 6.45-52; Huani 6.16-21)*

<sup>22</sup> Majoya siniajo Jesosaa o shajja'ajjajji cuana huoojea canaje. Jama acanaje ba'a: —¡Bishe ai yasijje nequisohuaquicue! ¡Bae ojje miji yasijje besapoquicue! Quijje eya poquije mi que pea dejja cuana quea huiso nee nee cuana huoojea'yo majje —poanaje.

<sup>23</sup> Majoya dejja cuana quea huiso cuana huoojea'yo majje eyiyo huasijje jaasohuaquinaje oe nei oja Chii nijje mimiya. Mecajje Jesosa oe nei aninaje eyiyojo. <sup>24</sup> Jesosa eyiyojo anijo o shajja'ajjajji cuaa bishe ai quea huesha nee dojo canaje. Bae yiyesamajo o epajo beni quea quemio poeyanaje. Enashajohua bishe ai janobajjima nei nane canaje, cuio canaje enaa. <sup>25</sup> Mecashono Jesosa eyiyojo ani o que poquinaje ena biasje. <sup>26</sup> O shajja'ajjajji cuaa Jesosa quea huesha pishana ena biasje jeojejebeje ba majje quea ajjajja nee nee poanaje. Quea metejo taaanaje; jama poanaje ba'a: —¡Coya ae shai poeje ba'a! —siasianaje—. ¡Coya eshahua, de!

<sup>27</sup> Jamajjeya Jesosa onijje miminaje. Jama poanaje ba'a: —¡A'a quea mete pojji! Eya jja iña iquio, eshahua pojjeama. ¡Quea jaji nee pocue!

<sup>28</sup> Jamajjeya Penohua jama huohuime acanaje ba'a: —Ecuea Emeshi mese, miya enequiya jjejojya, jeya mi que poqui meecue ena biajje!

<sup>29</sup> —E'e Peno, jpoecue! —oya acanaje Jesusaa.

Jamajjeya Peno bishe aijo ani nequioquequinaje. Ena biajje Jesosa que poquinaje.

<sup>30</sup> Jamatii poqui pishana majje beni tii tii, enashajo quea quemo nee nee ba majje metenaje, de. Mete majje jaadobi'ajjaquinaje Peno. Taaanaje: —Jesosa, jeya hui'ije'yo! jIñacue mo, oe! —poanaje.

<sup>31</sup> Jesusaa me' iñacuaji canaje. Peno jama acanaje ba'a: —¿Apiojji acuae mi meteani so'o? ¿A'a eya quea ca'a nee nee miquea ba jjima?

<sup>32</sup> Majoya Jesosa Peno nijje bishe ai yasijje anisohuaqui'yajo beni nequioquequinaje.

<sup>33</sup> Jamajjeya ojjaña cuana bishe aijo aniya Jesosa bihuia canaje. Jama poanaje ba'a: —jE'e jojo nei miya Eyacuiñajji Bacua Ejja oe nei!

*Cuichi cuana hui'i ca ya poa meshi yasijje Jenesane' meshi yasijje besapoqui o'oyanaje (Macoso 6.53-56)*

<sup>34</sup> Majoya bae ai ojje miji yasijje Jenesane' meshi yasijje besapoqui o'oyanaje Jesosa. Ba'eñaquinaje. <sup>35</sup> Dejja cuanaja jomajo ba'eja Jesosa eba poanaje yahuajo. Jamajjeya oya ba o'oya majje ojjaña cuana iyaa meequi canaje Jesosa que. Jamajjeya ojjaña emanojaaca cuana Jesosa que ye canaje. <sup>36</sup> Jama huohui'ajjame acanaje cuaa ba'a: —Jesosa, jojjaña emanojaaca cuana che mique daqui iña'ajja meecue ehuaquia'yojji! —acanaje.

Ojjaña oja daqui cuema iña'ajja majje jjaajacuajiqui'yonaje, huaquia'yonaje pea'ai, de.

## 15

*Dejja quea jjashahuabaqui tai po majje quea tai poani (Macoso 7.1-23)*

<sup>1</sup> Majoya Paniseo cuana Jodio esohui huohuijji cuana pea'ai Jenosanenajo ba'e Jesosa que poeyanaje. Oya huohui'ajja canaje: —Esohui huohuijji, ¿apiojji acuae mi mi shajja'ajjaji cuana etiiquianaja ehuhui'yo jama po ajja? <sup>2</sup> E'e, ijji'ijji jjimahuajo eme' topo neinei ajja, de.

<sup>3</sup> Jesusaa saja'a canaje jama ba'a: —Miquianaya acuae ¿ae poani pea'ai? ¿Apiojji acuae miquianaaya Eyacuiñajji esohui pajea'yaña etiiquianaja ehuhui'yo yajji nisho?

<sup>4</sup> E'e, Eyacuiñajji esohui jama poani ba'a: “jMique chii, miquea enaese etii pea'ai jaahuanacue! jJoya oja chii, oja nae pea'ai cajaa acajo cajajahuejjajea ca'yahua cuaa, meiya!” <sup>5</sup> Miyaya ca ca jama huohui taime yaña ba'a: “Dejja oja chii etii nijje, oja nae etii nijje pojja'a mimije jama ba'a: “Eyaya miya eba'e meesahuajji pojjeama. Chojja, eyaya ecuea aquiana Eyacuiñajji yasijje quiaña o bihuiajji”. <sup>6</sup> Jamajjeya oja chii etii, ojaya enaese etii pea'ai pajea meeaña. Pea'ai Eyacuiñajji esohui pajea mee'yo sa aña etiiquianaja ehuhui'yo yajji nisho. <sup>7</sup> jMiya ca mi ca oe jjadasiaquijji nei nei! Eyacuiñajji esohui huohuijji Isaija esohui mijo e'e jojo nei yahuajo nei poa. E'e, yahuajo nei Eyacuiñajji Isaija tehue mee ca poa jama ba'a:

<sup>8</sup> “Jiquio dejja cuanaa eya bihuia nisho cani. Jamatii jjashajja'ajjaqui ajja.

<sup>9</sup> Jamajjeya ecuea equi yasijje jjachichaquiani ejjachichajequijji. Ohuaya ojaya ej-jashahuabaqui'yojji huohui cani, ecuea esohui pojjeama”.

Jamaya Isaija yahuajo nei tehue ca poa miquianajo —Jesosa poanaje.

<sup>10</sup> Jamajjeya Jesusaa pea cuana huasijje jama huohuime acanaje ba'a: —jShajja'ajjacue, jjabahuejja neinei quicue oe! <sup>11</sup> Bobi cuana, ojjaña aquiana enabajje dobiquianijo pojjeama miquianaya quea mimishi poani. Chojja. Quea jjashahuabaqui tai po majje esohui quea tai enabajje cuayaquianijo ca ca quea mimishi poani. Eyacuiñajjiya miquianaya ba cani quea mimishi —Jesusaa acanaje.

<sup>12</sup> Quijje o shajja'ajjaji cuaa Jesosa huohui canaje jama ba'a: —Jesosa, miquea esohuijo Paniseo cuana quea quene poani minijje —poanaje.

<sup>13</sup> Jesosaa oya cuana saja'a canaje jama ba'a: —Ojjaña acui ecue Chiija eyajo anija bana pojjeama ohuaya chiyojea caje'yo jiquio ecua ohuaya ojaya epeeji nisho acaje'yo jama. <sup>14</sup> Jamajjeya ja'a Paniseo cuanajo quea mete pojji! Oya cuaa aje oe esohui huohui cani quea tai, quea ja'a pojjeama. Cojjama' jayojja jama poani, de. Cojjamaa pea cojjama' mepejjejea cani jayojja o pea'ai oquejeaquiye'yo jjani yasijje. Cojjama' jayojja dejja mimishi pea dejja mimishiya dojo cajje cuaqui yasijje poquiye'yo onijje tii —jamaya Jesosaa acanaje.

<sup>15</sup> Penohua Jesosa huohui'ajja canaje: —Jesosa, ecuanajaya ca ca esohui quea quehua miquea. ¡Ba meesahuacue mo!

<sup>16</sup> —¿A'a ecuea esohui miquianajaya ba jjima pea'ai? —Jesosa poanaje—. ¿A'a miquea eba pojjeama? <sup>17</sup> Ojjaña bobi, pea aquiana pea'ai enabajje ijiajea see ai yasijje dobiquiani. Quijje jamatii seejea caje'yo. <sup>18</sup> Joya quea tai jjashahuabaquianiya ca ca esohui tai jeacuaya cani. Maaya oya quea tai po mee ca'yani; quea mimishi Eyacuiñajjiya oya ba cani. <sup>19</sup> E'e, jjashahuaba taiqui majje pea quecua cani, onaja eponajo ba'e sa poani, peaja yahuejo ba'e sa poani, quehuajje cojjo cani, sii cani, siajje poani, mimijajiani pea'ai. <sup>20</sup> E'e, joya jama acanijo Eyacuiñajjiya ba cani quea mimishi; bobi ijia cani eme' shacua neinei jjimajo pojjeama quea mimishi poani.

*Cananea epona Jesosa que poeyanaje  
(Macoso 7.24-30)*

<sup>21</sup> Majoya Jesosa Jenesane' meshijo ani poquinaje Sinono meshi yasijje, Tino meshi yasijje pea'ai. <sup>22</sup> Jomajo poquiani oe Cananea epona ma meshijo ba'e o que poeyanaje. Oya Jodio pojjeama. Jamatii ejiojjijje poquiye taaa majamaja poquinaje: —Emeshi Mese nei, Dabija osecua, jejo jjashahuabaquicue! Ecue bacua piona quea sapa niñe jaa. Quea nee nee poani, quea mano.

<sup>23</sup> Jamatii Jesosaja oya saja'a jjima. Jamajjeya ojaya eshajja'ajjajji cuana Jesosa nijje miminaje: —Jesosa, jepona huoojeacue! Joya ese nijje taaajebeje.

<sup>24</sup> Jamajjeya oya cuana saja'a canaje Jesosaa: —Oya Jodio pojjeama. Eyacuiñajjiya eya huoojea canaje Jodio cuana sa'ajja'yohua. Oya cuana ñajjajja ecuaquisho'yo jayojja jama poquiquehuani Eyacuiñajjiyo.

<sup>25</sup> Jamatii epona Jesosa que poe majje ecui'oshajjajo nequiñanaje; jama poanaje ba'a: —Emeshi Mese nei, jecuea ebacua piona jjaajaqui mee'yocue, quea mano nee nee jaa!

<sup>26</sup> Ma epona Jodio pojjeamajo huapa jayojja saja'ame acanaje Jesosaa: —¿A'a acuae ecue bacuaja bobi jeaje iñahuehua que? ¿A'a cuae jamaya quea pame? —poanaje.

<sup>27</sup> Epona quea shoe jama jjejojo jama poanaje ba'a: —E'e, Emeshi Mese. Jamatii o huonejjiya ijia canijo, iñahuehuua ehuonejjiya ijiajjeja ca'ijjia cahua —poanaje.

<sup>28</sup> —Epona, miya ca mi ca oe quea ja'a nee, quea pame nee ejo jjashahuabaquiani. Jamajjeya eyaya miquea esohui jayojja jama aje'yo. Jjeya nei miquea ebacua piona jjaajaqui meeje'yo —Jesosaa acanaje.

Jamajjeya jjeya nei oja bacua piona jjaajaqui'yonaje; quea aja nee po'yonaje.

*Jesosaa quea huiso emanojaaca huaquia mee ca'yonaje*

<sup>29</sup> Majoya Jesosa jomajo ani ejiojjijje poqui o'oyanaje Janinea bae sahuajje. Eyiyo huasijje jaasohuaqui majje anioquenaje. <sup>30</sup> Quea huiso nee nee poeyanaje; o que jjachichaquinaje. Jjequi canaje emanojaaca cuana: quibojjisha cuana, cojjama' cuana, jiojjijajja cuana, mimi'ajja cuana pea'ai, peapea epo'yo cuana pea'ai huanaoquea canaje cuaa Jesosa pejejo ejaajaqui'yojji. Ojjaña cuana jjaajaqui mee ca'yonaje, huaquia mee ca'yonaje, de, Jesosaa. <sup>31</sup> Ba majje ojjaña cuana quea bihui nee nee poanaje. Eyacuiñajji bihuia neinei canaje: —E'e, e, mimi'ajja cuana quea ja'a mimi mee ca'yonaje; jiojjijajja jeo mee ca'yonaje; quibojjisha jjaquibopiqui mee ca'yonaje; cojjama' quea cojja ja'a po mee ca'yonaje, jjabaqui mee ca'yonaje pea'ai. Ma ecua ohuaya jjaja'aqui jjimahua Isaeni cuana nijje acaninaje, jamaya aje jja oe jjeya acani, Jesosaa —acanaje cuaa.

*Jesosaa quea huiso cuana bobia canaje, 4.000*  
(Macoso 8.1-10)

<sup>32</sup> Majoya Jesosaa o shajja'ajjajji iyaa canaje. O que poeyajo huohui canaje jama ba'a: —Jiquio dejja cuana enijje poani beca cahuime. Ojaya bobi oe poanaje. Jamajjeya ojo eya quea yeno jjashahuabaquiani bobimajo. Oja equi yasijje huoojea sa po'yo ajja. Quea shoe nee nee; ejiojjijo bobi yasijje po chana'.

<sup>33</sup> O shajja'ajjajji cuaa Jesosa saja'a canaje: —Jiquiojo chama' bobi, dejjama'. ¿Yajja yajji? Oya cuana quea huiso nee nee ebobaijji. ¿Achacua pahui ejjeshejji ojjaña bobaijji?

<sup>34</sup> —¿Ache huiso pahui miquea yani? —Jesosaa huohui'ajja canaje.

—Me oejje beca pea'ai, 7 pahui yani. Nahuoo sisi oe pojji yani pea'ai —acanjje cuaa.

<sup>35</sup> Jamajjeya Jesosaa ojjaña ejjachichaquiani cuana jama acanjje ba'a: —¡Meshijo anioquecuel! —acanjje.

<sup>36</sup> Majoya ma 7 pahui, nahuoo sisi pea'ai jjeshe majje Eyacuiñajji nijje, oja Chii nijje miminaje bobijo. Pahui, nahuoo pea'ai miji canaje, Jesosaa. O shajja'ajjajji que quia canaje. Majoya ohuiya dejja cuana huasijje quia canaje. Quia ca poquije quea huiso nee nee jjapanahui poquipoquinaje, bobi. <sup>37</sup> Jamajjeya ojjaña cuaa ijja canaje, quea jejje poanaje, de. Ijja majje o shajja'ajjajji cuaa bobi e'ijjiasejja jjepai aijo chicha ca'yonaje. Quea huiso poanaje, 7 jjepaime. <sup>38</sup> E'e, dejjaa quea huiso nee neeya bobi ijja canaje, 4.000 dejjaa. Quea huiso nee epona cuana, esho'i cuana pea'aiya ijja canaje. <sup>39</sup> Majoya Jesosaa ojjaña cuana huoojea canaje ojaya equi yasijje. Majoya Jesosa o shajja'ajjajji cuana nijje bishe ai yasijje nequisohuaquinaje. Besapoquinaje ojje, pea meshi yasijje, Majadana meshi yasijje.

## 16

*Jodio etiiya Jesosaa acani quea pame ba sa acanjje*  
(Macoso 8.11-13; Noca 12.54-56)

<sup>1</sup> Majoya Paniseo cuana, Sanoseo cuana pea'ai poeyanaje Jesosa que. Oya cuaa Jesosa Eyacuiñajjija huoojea'yo pojjeama poso acanjje. Jamajjeya jama anisho canaje ba'a: —Esohui huohuijji Jesosa, ¿a'a miya Eyacuiñajjija huoojea'yo nei ojjaña jaahuanajji pojja'a? ¡Ejjaba'ajjaqui so'o! ¡Eyacuiñajjiya jayojja jama acue ecuanaja ebajji! ¡Eyajo oe panacuel! —acanjje Paniseo cuaa.

Jamatii Paniseo cuaa Jesosa Eyacuiñajjija huoojea'yo pojjeama poso acanjje. Jamajjeya pea Paniseo cuana nijje jama poanaje ba'a: —Chojja, Jesosa Eyacuiñajjija huoojea pojjeama. Jamajjeya Eyacuiñajjiya jama pojjeama mi pana cajo, capajea ca'yahua.

<sup>2</sup> Jesosaa oya cuana saja'a canaje: —Eshequi oquequijajo bo huo'ohuo'o poanijo miquianaaya huohuiaña: “E'e, de, mecahuajje quea jea poaje eshequi, ena epojji pojjeama”. <sup>3</sup> Mecajjeahua ca ca quea apo nee nee poanijo miquianaya jama poani ba'a: “E'e de, quea apo; jjeya ena poaje”. E'e —Jesosa poanaje—, eyahuasijje bo ba majje miquianaaya huohuiaña ena chama' pojja'a, ena poaje pojja'a. Jamatii Eyacuiñajjija esohuijo miquianajaya ba jjima ache shono ojjaña jaahuanajji poeje. ¿Apiojji miquea ba jjima? <sup>4</sup> Miquianaaya Eyacuiñajjija esohui pajea yaña. Jamajjeya Eyacuiñajjiya pana cani ba majamaja sa poani. Jamatii Eyacuiñajjiya Jjona yahujajo nei nei aca poa jayojja jama ohuaya jjeyahua acaje miquea ebajji.

Jamajjeya Jesosaa oya cuana jea cana'yonaje jjabahuejjaqui ajjajjo.

*Paniseoja esohui tai pahui shejje meeji jayojja*  
(Macoso 8.14-21)

<sup>5</sup> Majoya bae ojje miji yasijje besapoquianijo Jesosa shajja'ajjajji cuana jjashahuabaquinaje. Jama poanaje ba'a: —E'e de, ecuanaa bobi pajea'yonaje.

<sup>6</sup> Jamajjeya Jesosaa oya cuana huohui canaje: —¡Quea ja'a nee jjashahuabaquicuel! Paniseo cuana, Sanoseo cuana pea'aia pahui shejje meeji miya quea tai poaje.

<sup>7</sup> Jamajjeya o shajja'ajjajji cuana ojee mimimiminaje: —E'e pojja'a oya jama poanaje ecuanaja pahui ye jjimajo.

<sup>8</sup> Ojaya ejjashahuabaqui'yojji Jesusaja eba poanaje. Jamajjeya oya cuana acanaje: —¿Apiojji acuae jja nequiana ojee mimimimiani pahuijo? ¿A'a jja nequianajaya eya ba jjima quea ca'a nee nee? <sup>9</sup> ¿A'a jja quiana ejo jjashahuabaqui jjima tii? Eyaya me oejje pahui miji majje quea huiso dejja bobianaje, 5.000 dejja. ¿A'a jja miyaya maya pajea'yonaje? Ijjia'ijjiayeyo majje acuae jjaya ¿ache jjepai huiso chicha'yonaje pahui? <sup>10</sup> Oya jayojjaya me oejje beca pahui, 7 pahui miji majje quea huiso dejja bobianaje, 4.000 dejja. Majoya miyaya pahui ¿ache jjepai huiso chicha'yonaje so'o? ¿A'a ya pajea'yonaje? <sup>11</sup> Eyaya miqianaya huohuinaje jama ba'a: “Paniseo, Sanoseo pea'aia pahui shejje meejjijo quea tai miya poaje” —Jesusa poanaje.

<sup>12</sup> Jamajjeya o shajja'ajjajji cuana jjabahuejjaquinaje Jesusaa huohui cajje: —E'e, Paniseo, Sanoseo pea'aia ehuhui taijo se quea tai poaje; pahui shejje meejjijo pojjeama Jesusaa huohui canaje —poanaje.

*Penoja esohui quea pame Jesusajo  
(Macoso 8.27-30; Noca 9.18-21)*

<sup>13</sup> Majoya Jesusa Pinipo meshi yasijje poquinaje. Sesanea huasijje poquijeya o shajja'ajjajji huohui'ajja canaje Jesusaa: —Dejja cuana acuae jja ¿yajja poani ejo, ojjaña Edoe Mesejo? ¿A'ya cuae eya?

<sup>14</sup> Oya cuaa saja'a canaje: —Beca cuana jja jama poani ba'a: Miya Huani, ma ona besameejji poa shequi o'oyanaje poso ca jja mi ca acani. Pea cuana aje jja oe jama poani: Miya Enia, Eyacuiñajjija esohui huohuijji yahuajo nei nequia poa. Pea poani jama ba'a: Miya Jenemia pojja'a pea esohui huohuijji yahuajo nei nequia poa pojja'a. Oya cuana yahuajo nei mano'ya poa shequi o'oyanaje poso ca jja mi ca acani cuaa —poanaje o shajja'ajjajji.

<sup>15</sup> Jamajjeya Jesusaa oya cuana huohui'ajja canaje: —¿Miya acuae yajja poani ejo? ¿A'ya cuae eya?

<sup>16</sup> —¿Miya ca ca Eyacuiñajjija Bacua Ejja oe nei, oja huoojea'yo ojjaña jaahuanajji! —Simohuiya Jesusa saja'a canaje.

<sup>17</sup> Jamajjeya Jesusaa oya jama acanaje ba'a: —Simohui, Jjonaja bacua, ¿quea bihui nee pocue! Ecue Chii eyajo aniya miya ba meesahua cani eya oja huoojea'yo ojjaña jaahuanajji. Dejjaa pojjeama miya ba meesahua cani, de. <sup>18</sup> Jamajjeya eyaya miya huohuiaña miya bajjani aje Peno, esejaya esohuijo Mei bajjani. Eyacuiñajjija esohui e'e jojo nei ejo eyaya miya huohui meesahuaje'yo ecuea epeejji cuana quea ca'a nee epo'yojji. Equi mei jiyo nei jayojja jama quea ca'a nee nequi tii jayojja jama ecuea epeejji cuana quea ca'a nee nequi tiitiije'yo; ejeabichajea'yojji pojjeama Edosiquianaja, eshahua cuanaja pea'ai.

<sup>19</sup> —Eya Emeshi Mese nei jiquio meshijo poaje'yo. Jamajjeya aje miya huoojeaña ecue sohui huohuiya. Ecuea esohui esecue ca'apejojji jayojja jama eyahuasijje edobiqui mee'yojji. Jamajjeya ecuea esohui ba majje miyaya huohuije ache eba'ejji quea mimishi Eyacuiñajjija boti'ama. Miyaya huohuije pea'ai ache eba'ejji quea pame nee Eyacuiñajjija eyajo anija quea boti nee.

<sup>20</sup> Majoya Jesusaa o shajja'ajjajji cuana huohui neinei canaje jama ba'a: —E'e, eya Eyacuiñajjija huoojea'yo ojjaña jaahuanajji. Jamatii ja'a oe jihuhuijji so'o! —poanaje.

*Ojaya emano'yojji Jesusa miminaje  
(Macoso 8.31-9.1; Noca 9.22-27)*

<sup>21</sup> Majoya Jesusaa o shajja'ajjajji cuana huohui coo canaje ojaya emano'yojji: —Eya quijje Jenosanena huasijje poquije. Jomajo Moisesija etehue'yo huohuijji cuaa, Jodio etii bajjani cuaa pea'ai, Eyacuiñajji nijje emimijji etii cuaa pea'ai eya quea huiso cuia caje'yo. Quea nee nee poaje'yo eya. Quijje ya mo manojje'yo ohua me caca mee cajje. Jamatii beca cahuime po majje mo shequi mee caje o'oya ecue Chiiya —acanaje.

<sup>22</sup> Jamajjeya Peno quea yeno nee poanaje Jesusajo. Oya oe nei iyaa canaje, Penohua. Jama poanaje ba'a: —Chojja, ecuea Emeshi Mese, miya Eyacuiñajjiya jaahuana caje'yo. Peaa aje oe miya enapajji pojjeama, equecua'yojji pojjeama jja mi, de.

<sup>23</sup> Jamajjeya aje jja oe Jesusaa oya Peno cojja ba neinei cani jama tecueame acanaje ba'a: —Peno, ¡a'a jamaya mimijji! Miya e dasiajji nisho epo jayojja mimiani. Miya Edosiquiana Satanasa jama mimiani. Jjashahuabaquiiani quea tai, dejja jama; Eyacuiña-jjiya ejjashahuabaqui'yojji jama pojjeama —poanaje.

<sup>24</sup> Jamajjeya Jesosa ojjaña o shajja'ajjajji nijje jama miminaje ba'a: —¡Ojjaña joya enijje e'e jojo nei jjapeequi'yo sa poani Eyacuiñajjiya esohui jayojja jama ba'ecue! E'e, e jayojjaya jja enijje capoquiahua, jamatii onaa napa cajje aje jja oe quea nee poaje'yo pojja'a. <sup>25</sup> E'e, ojjaña joya Eyacuiñajjiya esohui jayojja jama ba'e sa po ajja aje oe ba'e tiitii ajja enijje. Joya ecuea esohui jayojja jama ba'e sa poani ca ca ba'e tiitiije'yo enijje eyajo. <sup>26</sup> E'e pojja'a dejjaa quea huiso nee nee aquiana ojaya yajji chicha caje. Jamatii oya cuana cuaqui yasijje jeajea cajo, ojjaña ojaya aquiana cuana edojjji pojjeama. ¿A'a ojjaña ojaya aquiana cuana Eyacuiñajji yasijje quia cajo, oya cuana cuaquijo ani cuayaqui mee caje'yo? ¿A'a Eyacuiñajjiya oya cuana onijje eyajo ba'e mee caje'yo ma aquiana quea huiso nee nee sosejje? Chojja. <sup>27</sup> E'e jojo nei eya ojjañaja Edoe Mese poeje o'oya. Quea jeajahua nee nee, quea ca'a nee nee poeje'yo. Eya esohuidojojji quea huiso nee nijje poeje'yo. Poe majje eyaya ojjaña cuana sosequiaje'yo. Ojjaña ba'enaje jayojja eyaya sosequiaje'yo. <sup>28</sup> E'e jojo nei eya ojjañaja Edoe Mese ojjaña huoojea'yojji quea ca'a nee nee poaje'yo. Beca cuaa jiquiojo nequiya jjaja mo jamaya ba caje mano'yo jjimahuaa —Jesusaa o shajja'ajjajji cuana acanaje.

## 17

### *Jesosa quea cojja jji poanaje oja Chii nijje mimianijo (Macoso 9.2-13; Noca 9.28-36)*

<sup>1</sup> Quijje pishana me oejje pea emejje oe cahuime po majje Jesosa poquinaje o shajja'ajjajji nijje pea beca peejjima dejja nijje, Peno nijje, Satiaco, oja doe Huani nijje pea'ai. Mahuiso dejja nijje poquinaje eyiyo huasijje quea huesha nee. <sup>2</sup> Jocuama nequi oya Jesosa jjahuapaqui'yonaje; quea cojja jji nee poanaje, eshequi jayojja poanaje, quea jeajahua nee nee. Oja daqui quea oshe nee nee, bo oshe jayojja poanaje. <sup>3</sup> Moisesi, Enia pea'ai ma yahuajo nei ba'ya poa Jesosa nijje mimimiminequi ba canaje o shajja'ajjajji cuaa. Moisesi, Enia pea'ai Jesosa nijje mimimiminequinaje Jesosa onaja mimishijo emano'yojji jjejojya. <sup>4</sup> Jamajjeya Peno Jesosa nijje jama poanaje ba'a: —E'e Emeshi Mese, jiquiojo ecuaña canequiquiahua, quea pame nee. Pea beca peejjima equi sisi ecuaaya ca'iyahua miquea, Moisesija, Eniaja pea'ai eba'ejji.

<sup>5</sup> Peno mimianijo tii bo quea oshe nee nee nequioquenaje. Queya canaje huojaa. Shajja'ajja canaje Eyacuiñajji jama poani ba'a: <sup>6</sup> —¡Jiquio ecuea ecue Bacua Ejja quea jea nee nee. Eya ojo quea bihui nee nee. ¡Oya oe shajja'ajjacue!

O shajja'ajja majje quea mete nee nee poanaje Peno, Satiaco, Huani pea'ai. Meshi yasijje hui oquequinaje. Ecu'oshajjajo nequinaje. <sup>7</sup> Jamajjeya o que poeyanaje Jesosa. Napa canaje emeya.

—¡Nequisohuacue! ¡A'a quea mete pojji! —Jesusa poanaje.

<sup>8</sup> Jamajjeya oya cuana nequisohuanaje. Jesosa oe nei nequi bajea canaje.

<sup>9</sup> Eyiojo jaaoquequije'yo mimimimi jaaoque'yonaje. Jesusaa ma ojjañaja Edoe Meseya acanaje jama ba'a: —¡Ma miya eyiojo banaje a'a jihuhuijji! ¡Quijje eya emano'yojaa shequi o'oyajo mo oe pea cuana huohucue! —Jesusaa acanaje.

<sup>10</sup> Jamajjeya oya cuaa huohui'ajja canaje: —Jesusa, Moisesija etehue'yo huohuijji poaniya jama acani ba'a: “Enia oe ebionei capoe'yahua Eyacuiñajjiya huoojea'yo ojjaña jaahuanajji poe jjimahuajo”. ¿Yajjaje acuae Moisesija esohui huohuijji cuaa jama acani? —poanaje Peno, Satiaco, Huani pea'ai.

<sup>11</sup> Jesosaa saja'a canaje jama ba'a: —E'e jojo nei Enia jayojja jama oe dejja ebionei epoejji, ojjaña cuana ejo e'e jojo nei ejjashahuabaqui meesahuajji. <sup>12</sup> E'e, Enia jama ca ca oe yahuajo pishana poeyanaje. Jamatii Jodio cuanaja oya ba jjima poa. Pea poso acanaje. Jamajjeya cuia ca'ya poa. Jamaya pea'ai eya acaje'yo cuaa. Eya ojjañaja Edoe Mese quea nee nee po mee caje'yo cuaa —poanaje Jেসosa.

<sup>13</sup> Jamajjeya o shajja'ajjajji cuana jjashahuabaqui nequinaje. Jama poanaje: —E'e de, oya Huanijo mimiani, ma ona besameejji poajo. Eniaa jama sohui huohuime acanaje Huaniya, de —poanaje Peno Satiaco nijje Huani pea'ai nijje.

*Esho'i niñepoquipajea mee ca'yonaje Jেসosaa  
(Macoso 9.14-29; Noca 9.37-43)*

<sup>14</sup> Eyiyajo nequi jaoque'yo majje Jেসosaa, o shajja'ajjajjiya pea'ai ba cañaquinaje quea huiso cuana ejjachichaqui nequica. Oe dejja Jেসosa que poeyanaje. Ecuio'oshajjajo nequiya huohui'ajja canaje: <sup>15</sup> —Emeshi Mese Jেসosa, jecuea ebacua ejjajo quea yeno jjashahuabaquicue! Oya quea mano nee nee, niñepoqui poani. Niñepoqui majje ena huasijje jea cani, cuaqui yasijje pea'ai jea cani. <sup>16</sup> Eyaya oya yenaje mi shajja'ajjajji cuana huasijje. Jamatii niñepoquipajea ajja.

<sup>17</sup> Jেসosaa ojjaña cuana acanaje: —¡De! ¿Ache shono acuae jja nequiana ejo jjashahuabaquije e'e jojo nei? Quea sapa ca'a mi coma. ¿Ache cahui huiso minijje nequi majje miyaya eya baje'yo Eyacuiñajjija huoojea'yo ojjaña jaahuanajji quea ca'a nee nee? ¡Miquea ebacua ejja e que jjequicue!

<sup>18</sup> Jjequi canaje Jেসosa que. Jেসosaa o niñepoquimeejji poani huoojeacuayajea ca'yonaje: —Eshahua, ¡cuayaqui'yocue, esho'i niñepoquimeejji poani! —Jেসosa poanaje.

Cuayaqui'yonaje. Jamajjeya oja bacua ejja niñepoquipajea'yonaje, quea aja nee po'yonaje.

<sup>19</sup> Quijje ojjaña cuana poqui majje Jেসosa que poeyanaje o shajja'ajjajji cuana. Huohui'ajja canaje: —¿Yajjajo acuae ecuaaya eshahua mi huoojeacuayajea mee'ajja'yonaje?

<sup>20</sup> Jেসosaa saja'a canaje: —Miquianaya jja ejo jjashahuabaqui ja'a jjima. Jjashahuabaquiani jama ba'a: “E'e pojja'a Jেসosaa ecuanaja eshahua huoojeacuayajea mee ajja”. Jamajjeya mi huoojeacuayajeaña. ¡Bacue oe! Ejo jjashahuabaquicue jama ba'a: “Jেসosaa e'e nei ohuaya jayojja jama ecuaña ameesahua caje'yo”. Miya jama jjashahuabaquijajo, Eyacuiñajjiya miya amee caje'yo ojjaña eyaya aña jayojja jama, ma dejjaa ajjima acani amee caje'yo pea'ai. <sup>21</sup> E'e, jamatii jiquio eshahua jayojja quea huoojeacuayajea camaja. Eyacuiñajji nijje mimi huicha'a huicha'a majje, ojo jjashahuabaquianijo ijia'ijia jjima po majje pea'ai huoojeacuayajejaje'yo miyaya — Jেসosa poanaje.

*—Quijje eya manaje'yo —Jেসosa poanaje  
(Macoso 9.30-32; Noca 9.43-45)*

<sup>22-23</sup> Majoya Janinea meshijo ojee poquijjeya Jেসosaa o shajja'ajjajji cuana huohui canaje: —E'e, quijje eya iña meesahuaje onaja equecua'yojji. Quecua caje'yo cuaa. Jamatii beca cahuime po majje mo shequi mee caje'yo Eyacuiñajjiya.

O shajja'ajja majje o shajja'ajjajji cuana quea yeno nee nee poanaje. Quea mete pea'ai poanaje.

*Eyacuiñajjija equi iya bame'yojji bejjo chicha canaje bejjo chichajji poaniya*

<sup>24</sup> Majoya Capenaoma huasijje poeyajo, bejjo chichajji poani Peno que poeyanaje; huohui'ajja canaje jama ba'a: —¿A'a acuae mi mi sohui huohuijjiya bejjo quia cani, ma Eyacuiñajjija equi iya bame'yojji?

<sup>25</sup> —E'e de, quia cani —Peno poanaje.

Majoya Simohui Peno equi yasijje dobiquijajo, Jেসosaa oya huohui'ajja canaje: —Simohui, ¿yajjaje acuae mi jjashahuabaquiani? ¿Emeshi mese neiya aja bejjo sosequia mee cani? ¿A'a quea huesha ba'eja? ¿A'a oja meshijo ba'eja pojja'a?

—Quea huesha ba'eya poe majje sosequia caje'yo —poanaje Peno.



<sup>26</sup> —E'e —Jesosa poanaje—. Jamajjeya emeshi mese neiya echacojji cuana esosequia'y-ojji pojjeama. <sup>27</sup> Jamatii oya quene'ama epojji ejjasosequiaquijji. ¡Poquicue miya bae yasijje! ¡Joya ebionei ijia caje oe jjequiquiayacue! ¡Oja nabajo ba'e oe bacue ejjeshejji quea sose huiso nee nee, ejo, mijo pea'ai esosequia'yoyji! ¡Dojocue! ¡Bejjo chichajji poani yasijje quiacue! “Ma'aje esohui huohuijija, ecuea pea'ai” acue —Jesosa poanaje.

## 18

*¿A'ya ona huoojeajji jayojja nequije eyajo?*

*(Macoso 9.33-37; Noca 9.46-48)*

<sup>1</sup> Majoya ojjaña o shajja'ajjajji cuaa Jesosa que poe majje huohui'ajja canaje: —Jesosa, quijje miya ojjaña huoojeajji poaje. ¿A'ya cuae mi jayojja jama poaje minijje ona huoojeajji? ¿A'a ecuanaya pojja'a?

<sup>2</sup> Jamajjeya Jesusaa oe esho'i nei o que iyaa canaje. O cojja nei nequinaje. <sup>3</sup> O shajja'ajjajji cuana huohui canaje Jesusaa: —¡Bacue oe! ¡Jiquio esho'i nei jama pocue! ¡Jjashajja'ajjaquicue oe! Esho'i nei pojji mi po'yajo ca ca enijje eba'e'yoyji pojjeama quijje eya ojjaña huoojea'yoyji poaje. <sup>4</sup> Jamajjeya joya esho'i jama quea bei jjashajja'ajjaquiani e que poquije'yo, e jayojja ona huoojea'yoyji eyajo poaje. <sup>5</sup> E'e, ecuea epeejji esho'i quea pame jama jjashajja'ajjaquiani. Ojjaña joya ecuea epeejji quea jea acani eya pea'ai quea jea acani —Jesosa poanaje.

*Quea mimishi mi po o'oya chana'*

*(Macoso 9.42-48; Noca 17.1-2)*

<sup>6</sup> —Ecuea epeejji jjeya nei jjapeequi ca'a'ama ja'a quea mimishi po meeji cuana! Joya o mimishi pomeejji poani Eyacuiñajjiya quea nee nee po mee caje'yo, de. Jamajjeya ¡quea mimishi epo mee cuahuajje oe mano'yocue! ¡Jjanaayipecaqui majje mei quea quemonee jeyocue; bae quea doe yasijje oe tohuaacue! <sup>7</sup> Mimishi pomeejji cuanajo quea yeno nee nee ojjaña poani. Jamatii mimishi pomeejji yani, de. Quea yeno ca ca oe mimishi pomeejji poaje, quea nee nee po mee caje'yo tii Eyacuiñajjiya —Jesosa poanaje.

<sup>8</sup> —Jamajjeya miya quea mimishi po mee cani emeya, ejiojjiya pojja'a. ¡Ejiojji, eme' pojja'a ejajasejjajea jayojja jama acue mimishi'ama epojji! Eme', ejiojji pea'ai chamajo eyahuasijje poqui'yajo Eyacuiñajji nijje eba'e tiitii'yoyji quea pame nee nee. Miquea beca eme', ejiojji pea'ai yanijo pojja'a quea mimishi tii poani ca ca cuaqui yasijje poquije'yo. Quea tai nee nee, quea nee nee; cuaqui jijipajea'yo ajja, de. <sup>9</sup> Ecojjajo jjabaqui majje miya quea mimishi poani pojja'a. Jamajjeya ¡ecojja ecajjajea jayojja jama acue! Cojjama', mimishi'ama miya eyahuasijje poquije'yo quea pame nee nee poaje'yo. Cojjajji, quea mimishi tii poani miya cuaqui yasijje poquije'yo ca ca quea tai nee nee, quea nee nee poaje'yo tii tii. E'e, ¡quea jjashahuabaqui ja'a oe pocue! ¡Mimishi cuana oe pajea'yocue! —Jesosa poanaje.

<sup>10</sup> —Jamajjeya ¡ecuea epeejji eyacua a'a boti'ama ajji! E'e jojo nei eyaya miya huohuaña eyajo esohuidojojjiya, o jaahuanajjiya ecue Chii yasijje huohuiqui cani. <sup>11</sup> Eya ca iña ojjañaja Edoe Mese poeyanaje mimishi cuana cuijea'yohua cuaqui yasijje miqianaya epoqui poani jjejojo —Jesusaa o shajja'ajjajji huohui canaje.

*Esohui eba meesahuajji ñajjajja epoquiquehuajo*

*(Noca 15.3-7)*

<sup>12</sup> —Jamajjeya eyaya miqianaya huohuije esohui ejjashahuabaquijji —Jesosa poanaje —. Oe dejjaja quea huiso ñajjajja yaninaje, 100 huisome. Oe nei poquiquehua'ya poa, ¿ae poanaje oya? ¿A'a sa'ajja canaje? E'e. Pea cuana, 99 huisome ñajjajja ojee ijia'ijjiaqui jeanana canaje epoquiquehua sa'ajja'yohua. <sup>13</sup> Ba'yo majje quea bihui nee po'yonaje. Pea ñajjajja poquiquehua jjimajo quea bihui pishana poanaje: “¡Jiquioya ecuea ñajjajja bacua, de!” poanaje eñajjajja mese. <sup>14</sup> Ñajjajja jaahuanajji ñajjajja ba'yo majje quea bihui nee nee poa. Jamaya poaje ecue Chii: Ecuea epeejji eyacua quea mimishi jjejojo

epoquiquehua'yo jayojja jama ojo jjashahuabaqui o'oyajo, Eyacuiñajji quea bihui nee poaje'yo —Jesosa poanaje.

*¡Miquea epeeji minijje quea mimishi poajo oja mimishi pajea'yocue, quea bei po o'oyacue onijje!*

*(Noca 17.3)*

<sup>15</sup> —Ecuea epeeji minijje quea mimishi poanijo, ¡onijje mimiquicue! ¡Ojaya mimishijo jjashahuabaqui meesahuacue! Jjashahuabaqui majje mimishi capajea ca'yahua. Jamajjeya minijje jjapeequije o'oya. <sup>16</sup> O mi jjashajja'ajjaquiajo ¡pea iyaacue, beca pojja'a, ecuea epeeji pea'ai! ¡Ojee poquicue onijje mimiya! Jamajjeya oya cuaa miya ba caje e'e jojo nei miquea epeeji nijje jjapeequi o'oya sa poani. <sup>17</sup> Ohuaya oya cuana mi jjashajja'ajjaquiajo ¡ojjaña Eyacuiñajjija epeeji cuana huasijje iyaacue emimijji, ojaya mimishi epajea'yojji! Ojjaña niñeshe'ajja cajo mi jjashajja'ajjaquiajo, Eyacuiñajjija epeeji jama pojjeama oya. Jamatii jjadasiaquijji jama, de —Jesosa poanaje.

<sup>18</sup> —Jamajjeya ojjaña ecuea epeeji cuana miquianaaya huohui meeje ache eba'ejji quea mimishi, ma Eyacuiñajjija eyajo anija boti'ama pea'ai. Huohui meeje pea'ai ache eba'ejji quea pame nee, ma Eyacuiñajjija eyajo anija quea boti nee pea'ai —Jesosa poanaje.

<sup>19</sup> —E'e jojo nei miquianaya meshijo ba'e ojee mimiajo, Eyacuiñajjija, ecue Chiia eyajo aniya miquianajaya esohui saja'a cani. <sup>20</sup> Beca cuana enijje jjapeequiani ejjachichaquian-ijo, eya o pejjejo nequiani —Jesosa poanaje.

*Esohui ejjashahuabaqui meeji oe dejja onaja mimishijo quea quene tii tii poani*

<sup>21</sup> Majoya Penohua Jesosa huohui'ajja canaje: —Emeshi Mese Jesosa, ecuea epeejiya quea mimishi ahucha'a huicha'a cajo, ¿a'a eyaya oja mimishi capajea huicha'a huicha'a'yahua? ¿Ache huiso huohui'yome amajje jjabei qui ca'yoyji? ¿A'a quea huiso pojja'a, me oeje pea beca, 7 pojja'a?

<sup>22</sup> Jesusaa saja'a canaje: —Chojja, Peno, me oeje pea beca, 7 pojjeama. Quea huiso nee nee huohui'yome amajje jjabei neinei qui ca'yoyji, jama tii tii epo'yoyji —Jesusaa acanaje.

<sup>23</sup> Jamajjeya Jesusaa pea esohui ejjashahuabaqui meeji huohui canaje jama poani ba'a: —Eyacuiñajji ojjaña huoojea'yoyji poaje. Jamaya poaje ba'a: Emeshi meseya aquiana oja quia sosequia mee ca'yani echacojji cuana. <sup>24</sup> Sosequia mee canijo o que jjequi canaje oe echacojji poani. Aquiana quea huiso nee nee oja jjeshe poanaje. Jamajjeya sosequia ajja'ajja jjima, ojaya. <sup>25</sup> Ma echacojji sosequiaquia ajja; yajja sosequia'yome yajji joyoya mi sosequiajeyo ca'yonaje. Jamajjeya emeshi meseya quea quene huohui canaje: “¡Oya oe quiacue ejjeshejji sosejje! Sosema' cachaco cahua. ¡Ojaya ehuanase, oja bacua cuanaya quiacue pea'ai, ojaya aquiana cuana pea'ai quia'yocue e sosequia'yoyji!”

<sup>26</sup> —O shajja'ajja majje echacojji o que poquinaje. Ecuil'oshajjajo nequi oya mimi nequinaje: “Ecuea emeshi mese, ¡a'a ecuana dojojji equia'yoyji bejjo sosejje! ¡Ishoa'ajjacue! Eyaya ojjaña sosequia jeyojeyo'yo miya”.

<sup>27</sup> —Emeshi mese ojo jjashahuabaquinaje. Quea aquiana huiso nee nee nee sosequia jjima. Jamatii oja bajjani cuijea ca'yonaje, sosequia jjima tii. Poqui mee ca'yonaje, de.

<sup>28</sup> —Majoya echacojji poquinaje quea bihui nee nee. Jamatii poqui majje ma echacojjiya pea echacojji onijje nequi sa'ajja canaje. Ba majje iñasibijea canaje. Jama poanaje ba'a: “¡Jjeya nei mo sosequiacue mique jjeshe cuana!” oya poanaje. Ojaya oe pojji nei sosequia jjima poanaje. <sup>29</sup> Ecuil'oshajjajo nequi mimi nequinaje jiquio pea echacojji: “Epeeji, jejo jjashahuabaquicue! ¡Ishoa'ajja socue! Ojjaña aje mi sosequia jeyojeyo'yo de”.

<sup>30</sup> —“¡Chojja! ¡Ishoa sa po ajja iña!” poanaje. Jeanobiaa dojo canaje; ohua sosequiajeyo ca'yajje huoojea ca'yonaje.

<sup>31</sup> —Pea echacojji cuaa ba canaje. O dojo cajo quea yeno jjashahuabaquinaje. Poquinaje emeshi mese huohui'yohua. <sup>32</sup> Ma shajja'ajja majje emeshi meseya huoojea canaje ojaya echacojji jjequi'yohua. Poeyajo tecuea canaje emeshi meseya: “Miya ca mi ca oe quea mimishi nee. Miquea aquiana quea huiso nee nee sosequia jjima. Jamatii

enijje mimi'yajo eyaya miquea bajjani cuijea'yonaje, sosequia jjima tii. <sup>33</sup> Jamajjeya ¿yajjajo miquea epeejjijo mi jjashahuabaquinaje miya? ¡E jayojja oe miya mi poanaje!” emeshi mese poanaje. <sup>34</sup> Quenequene neinei'yonaje emeshi mese. Ejeanobiajji huoojea ca'yonaje quea nee nee po meeya ohua sosequiajeyo ca'yajje —jamaya Jesosa poanaje.

<sup>35</sup> —Jamajjeya jiquio ecua emeshi meseya acani jayojjaya jamaya miqianaya acaje'yo ecue Chiiya, ca onaja mimishi miya mi pajea neinei'yajo. Miquea mimishi cuana pajea'yo ajja, cuijea'yo ajja pea'ai —Jesosaa acanaje.

## 19

*Esohui huohui canaje ehueijji, Jesosaa*  
(Macoso 10.1-12; Noca 16.18)

<sup>1</sup> Majoya esohui huohui majje Jesosa Janinea meshijo ani po'oquequinaje Jodea meshi yasijje, Jodana cuei ojje miji yasijje. <sup>2</sup> Jomajo quea huiso dejja cuana onijje poquinaje. Ohuaya ojjaña jjaajaqui mee ca'yonaje, huaquia mee ca'yonaje. <sup>3</sup> Paniseo cuana ca ca o que poeyanaje jjadasiaquiya nisho. Jamaya jjashahuabaquinaje ba'a: —E'e pojja'a Jesosa Moisesija etehue'yo jayojja jama pojjeama mimije. Jamajjeya ecuaaya oya tecueaje.

Jamajjeya Jesosa huohui'ajja canaje cuaa jama ba'a: —Esohui huohuijji, ¿a'a acuae ehuanase huei cajji? ¿Yajjajo acuae ehuanase hueijea cajji so'o? ¿Achajja tehuemeya acuae oe Moisesiya aca poa?

<sup>4</sup> Saja'a canaje Jesosaa: —¿A'a miquea Moisesija etehue'yo ba jjima esohui? Yahuajo nei nei tehue ca poa Moisesiya jama ba'a:

“Yahuajo Eyacuiñajjiya pana coo ca poa yahue, epona pea'ai. <sup>5</sup> Huohui ca poa ohuaya: —Jamajjeya yahueya oja chii, ojaya enaese pea'ai cajiñayiya ca'yahua oja huanase nijje eba'ejji”.

<sup>6</sup> Oya cuana beca. Jamatii oe nei jayojja Eyacuiñajjiya oya ba cani, becanejjiiji pea'ai pojjeama, oe nei jayojjaya. Cuanaya Eyacuiñajjiya oe jayojja aca poa. Jamajjeya ¡a'a oe jea meejji! ¡Jama tii tii oe nei oe acue! —Jesosaa acanaje.

<sup>7</sup> Huohui'ajja o'oya canaje Paniseo cuaa: —Jamajjeya ¿yajjajo acuae Moisesiya tehueme aca poa? Jama ba'a:

“Huei'yo majje yahueya ehueijejji papeni etehue'yo caquia cahua oja huanase. Majoya cahoojea cahua”.

<sup>8</sup> Saja'a canaje Jesosaa: —Miquea etiiquiana quea mimishi nei jjejojya Moisesiya huei mee'ajja canaje. Quijje nei Moisesiya jamaya tehue ca poa; jamatii Eyacuiñajjiya jamaya pojjeama pana coo ca poa. <sup>9</sup> Jamajjeya eyaya miya huohuiaña e'e jojo nei ehuanase pea dejjaja sii jjima huei ca ajja. Joya ehuanase hueijji epo pea epona ehuanayojji quea mimishi nee, epona siijji epo jama. Eyacuiñajjiya oya ba cani quea mimishi. Joya ma eponajo jjahuanaquiajo quea mimishi pea'ai poani; onaja ehuanase nijje poani —Jesosa poanaje.

<sup>10</sup> —¡De! Jamajojoya eseya jjahuanaqui ca ajja. Jamatii shacuima' nequi cajji ojjaña eseya cuana. —o shajja'ajjaji poanaje.

<sup>11</sup> —Cho, ojjaña pojjeama shacuima' nequi cajji —Jesosa poanaje—. Beca cuana Eyacuiñajjiya huoojea caje'yo shacuima' tii enequijji. <sup>12</sup> Beca cuana jjahuanaqui ajja, jamatii ejjahuanaqui pojjeama. (Jamaya joya quibojjisha nei, biñajjajama' cuana pea'ai.) Beca cuana jjahuanaqui ajja jamatii yajjajje shai jjahuanaqui sa po'yo ajjajo. Beca cuana Eyacuiñajjiya esohui ehuhui aiquijji, ojo echaco neinei cajji Eyacuiñajjiya huoojea canaje jjahuanaqui jjima tii tii enequijji. Jamatii Eyacuiñajjiya ojjaña huoojea'yo ajja shacuima' tii enequijji. Jamajjeya ¡ojaya ejjashahuabaqui'yojji mijo jamaya acue, miyaya! —Jesosa poanaje.

*Esho'iquianajo Eyacuiñajji nijje miminaje Jesosa*  
(Macoso 10.13-16; Noca 18.15-17)

<sup>13</sup> Majoya Jesosa que esho'i nei cuana jjequi canaje cuaa. Huohui canaje: —Jesosa, jiquio esho'i nei sapa napa'ajja majje ¡Eyacuiñajji nijje mimicue ojaya ejaahuanajji! — poanaje.

Jesosa shajja'ajjajji cuaa oya cuana tecuea canaje: —¡A'a jja oe Jesosa que jjequi majajji esho'iquiana! ¡Esohui oe cahuohui cahua!

<sup>14</sup> Ma ba majje Jesosa poanaje: —¡Esho'iquiana e que capoe'yahua! ¡A'a quea huesha nequi meeji! E'e, esho'iquiana jjashahuabacuajiquiani; enijje jjapeecuajiquiani. Jamaya ecuea epeeji esho'i jayojja eyaya jaahuana mee sa aña pea'ai. Jamajjeya e que poquije'yo, eya eyajo ojjaña huoojea'yojji poaje —poanaje.

<sup>15</sup> Jamajjeya esho'i cuana biajje eme' huana majje Jesosa poquinaje.

*Edejja etii pishana quea aquiana huiso Jesosa nijje miminaje*

*(Macoso 10.17-31; Noca 18.18-30)*

<sup>16</sup> Majoya oe dejja Jesosa que poeyanaje. Huohui'ajja canaje jama ba'a: —Emeshi Mese, ¿achajja po majje acuae mo eyahuasijje poqui ca'yojji Eyacuiñajji nijje eba'e tiitii'yojji? ¿Achajja acuae ba'e cajji quea pame nee epojji?

<sup>17</sup> —¿Apiojji miyaya eya huohui'ajjaña: “¿Ae quea pame nee epo'yojji?” Eyacuiñajji ca oe nei quea pame nee. Jamajjeya onijje ba'e tiitii'yo sa po majje ca oe ¡oya shajja'ajjacue! ¡Ojaya esohui etehue'yo jayojja jama oe ba'ecue! —Jesosa poanaje.

<sup>18</sup> —¿Ache esohui etehue'yo? —huohui'ajja canaje.

<sup>19</sup> Jesosaa saja'a canaje: —Eyacuiñajji esohui etehue'yo jama poani ba'a:

“¡A'a pea quecuajji!

¡A'a sii pojji!

¡A'a sijje pojji!

¡A'a pea siijji!

¡Mique chii, mique nae pea'ai oe shajja'ajjacue!

¡Pea cuana mi pejejo ba'e mique huapa pojjeama jayojja quea jea oe acue!”

<sup>20</sup> —E'e, eyaya jamaya aña, esho'yahuaa jama tii tii sohuaqui eya. ¿Pea acuae yajja po cajji eyajo eba'e tiitii'yojji? —jiquio dejjaa Jesosa huohui'ajja canaje.

<sup>21</sup> —E'e, miya quea pame nee nee Eyacuiñajji jayojjaya po sa po majje ¡poquicue, miquea aquiana cuana quiaquicue ejjesheji soseje! ¡Ejjesheji quia'yocue aema' cuana huasijje! ¡Majoya poecue, enijje epo'yojji! Jamajjeya eyajo Eyacuiñajjiya miya aquiana quea pame nee quea huiso quia caje'yo quijje.

<sup>22</sup> Jesosaja esohui shajja'ajja majje dejja etii pishana quea dejja tai jjejojo quea yeno poquinaje; ojaya aquiana quea huiso nee nee yani jojoya quia sa po'yo ajja.

<sup>23</sup> Jamajjeya Jesosaa o shajja'ajjajji cuana huohui canaje: —E'e, dejjaa quea mimishiya jjejojya aquiana quea huiso, meshi quea quemo pojja'a nahue canijo beshahua nei e que poqui ajja, eya eyajo ojjaña huoojea'yojji poaje'yo.

<sup>24</sup> —E'e, eyaya huohuiaña pea'ai jama ba'a: Ahuoja quii huejjajje ino jeanobiaña jamaya, ¿a'a mapichi jeanobia cajji ahuoja quii huejjajje? Quea camaja coma. Jiquio ecua mapichi ahuoja quii huejjajje jeanobia cajji pome jamaya dejja quea aquiana huiso nee nee nahue cani eyahuasijje edobiquijji pojjeama.

<sup>25</sup> O shajja'ajja majje jjashahuaba neineiquinaje o shajja'ajjajji. Ojee mimimiminaje: —Jamajjeya ¿a'ya shai eyahuasijje dobiqui mee caje'yo?

<sup>26</sup> Cojja ba neinei canaje Jesosaa. Huohui canaje: —Dejjaa jamaya amee ajja tii. Eyacuiñajjiya oe neiya ojjaña acani. (Eyahuasijje dobiqui mee cani pea'ai joya quea aquiana huiso nee) —Jesosa poanaje.

<sup>27</sup> Jamajjeya Peno jjashahuabaquinaje ma dejja aquiana quea huiso nee nee jeana'yo sa po ajjajo. Huohui'ajja canaje: —Jesosa, ecuaaya ojjaña aquiana jeana'yonaje minijje epoqui'yojji. Jamajjeya ¿ae acuae ecua quiaje so'o, de?

<sup>28</sup> Jesosaa saja'a canaje: —E'e jojo nei quijje Eyacuiñajjiya ojjaña eyacua pana ca'yajo eya eyajo nequije'yo ojjaña huoojea'yojji nei. Miquianaya, 12, e shajja'ajjajji poani enijje

nequije'yo, enijje ona huoojea'yoyji poaje'yo. E'e, miquianaaya Jodio cuana, ecuea pea epeeji cuana pea'ai huoojeaje'yo tii. <sup>29</sup> E'e nei beca cuana ecuea esohui jama a sa poanijo aquiana cuana jeana ca'yani: Ojaya equi, oja huapa pojjeama, oja chii, oja nae pojja'a, oja bacua cuana pojja'a, oja huanase pojja'a jeana ca'yani. Jamajjea e'e jojo nei quijje Eyacuiñajjiya oya cuana quea huiso nee nee o jayoyja quia caje'yo; quea bihui nee nee ba'e tiitii mee caje'yo pea'ai eyajo onijje. <sup>30</sup> Jamatii beca cuana jjea ona huoojeajji poani eyajo ona huoojea'yoyji pojjeama poaje'yo. Joya jjea ona huoojea'yoyji pojjeama ca ca eyajo ona huoojea'yoyji nei nei poaje'yo e jayoyja —Jesosa poanaje.

## 20

### *Esohui ese jjashahuabaqui meeji huohui canaje Jesosaa e'acuijjajja mesejo*

<sup>1</sup> —E'e —Jesosa poanaje—, quijje eya ojjaña huoojea'yoyji poaje, ojjaña sosequiaje'yo jjea enijje chaco canaje sosejje. Jamaya poaje ba'a: Oe dejja, e'acuijjajja mese mecajjeahua poquinaje. Echacoji cuana iyaa canaje. Huohui'ajja canaje: <sup>2</sup> “¿A'ya cuae jjea poquije acuijjajja huojohua? Ojjaña miya eyaya sosequiaje oe esodojjo quea sose huiso nee nee sosejje”. “E'e” poanaje, “chacoje ecuaaya oe esodojjo quea nahue nee sosejje”. Majoya huoojea canaje chacohua.

<sup>3</sup> —Quijje pishana eshequi jaasohua pishana majje ona ijia'ijia'ani yasijje poquinaje e'acuijjajja yiye mese. Beca dejja chachaco jjima ani ba canaje. <sup>4</sup> Huohui'ajja canaje: “¿A'a miyaya acuijjajja yiyejo chacoje pea'ai? Miya eyaya sosequiaje quea sose huiso pea'ai”. “E'e, chacoje” poanaje. Poquinaje chacohua.

<sup>5</sup> —Quijje eshequi biacojjajja nequijo, sinecua nei pea'ai oya poqui majamajanaje pea cuana iyaa echacoji. <sup>6</sup> Eshequi ejjajeapaaquijo pea'ai poqui o'oyanaje. Dejja cuana chachaco jjima ani ba canaje. “¿Apiojji acuae mi chachaco jjima ani?” acanaje e'acuijjajja meseya. <sup>7</sup> “Chama oya ecuea echacomeeji aña, de; ajea esosequia'yoyji” saja'ame acanaje cuaa. “E'e. ¡Ecuea acuijjajja yiyejo chacoquicue pea'ai!” poanaje.

<sup>8</sup> —Meca nei e'acuijjajja meseya ona chacomeeji huohui canaje: “¡Echacoji cuana iyaacue! ¡Sosequiacue! ¡Joya quijjeyejje nei dobiquinaje ebionei sosequiacue! ¡Joya ebionei dobiquinaje quijje yejje nei sosequiacue!”

<sup>9</sup> —Majoya echacomeejiya joya eshequi ejjajeapaaquijo dobiqiu cuana sosequia canaje oe esodojjo quea nahue. <sup>10-11</sup> Jamajje quijje joya mecajjeahua dobiqiu cuana poeyanaje. Sosequia canaje oe esodojjo quea nahue pea'ai. Ba majje quea yeno poanaje, quea huiso nee nee esosequia caje poso. Jamatii oya sose huisoajja pea'ai sosequia canaje. E'acuijjajja mese nijje quenequenaje. <sup>12</sup> Mimijajinaje jama ba'a: “Joya eshequi ejjajeapaaquijo poeyanajeya aje oe oe pojji chaco canaje. Ecuanaaya ca chaco neineinaje eshequi quea quiyojo. Jamatii miyaya oya sose huisoajja pea'ai sosequianaje. ¿Apiojji acuae jja ecuaa jayoyja pea'ai sosequianaje so'o?” poanaje. <sup>13</sup> “E'e epeeji cuana, eyaya miya sosequianaje quea pame nee” poanaje. “Mi poeyajo jama poanaje ba'a: —E'e, chacoje oe esodojjo quea nahue sosejje —poanaje. ¿A'a e'e? Jamajjea eyaya jamaya miya quia meenaje. Jamajjea ja'a quea quene pojji! <sup>14</sup> Eyaya jiquio dejja quijjeyejje nei cuana oe esodojjo quea nahue nee quia sa poani mi jayoyjaya. Jamaya quea pame. <sup>15</sup> Mi jayoyjaya quea huiso sosequianaje. ¡A'a jja oe miya quea quene pojji! Bejjo ecuea jojaya eyaya quia sa amajje eyaya quiaña” e'acuijjajja mese poanaje —Jesosa poanaje.

<sup>16</sup> —E'e, e'acuijjajja meseya ojjaña sosequia canaje ojaya ejjashahuabaqui'yoyji jayoyja jama. Jamaya Eyacuiñajjiya acaje'yo. Joya quijje nei jjapeequije'yo quea bihui nee ba'e tiitii mee caje'yo eyajo onijje pea'ai. Ojjaña ojaya ejjashahuabaqui'ji jayoyjaya jama sosequia caje'yo pea'ai. Eyacuiñajjiya quea huiso iyaa caje onijje eba'e tiitii'yoyji. Jamatii oe pojji babaca caje'yo oja epeeji huoojea'yoyji epojji —Jesosa poanaje.

—Quijje eya manoje'yo —Jesosa po o'oyanaje  
(Macoso 10.32-34; Noca 18.31-34)

<sup>17</sup> Majoya Jenosanena huasijje poquinaje. Jesusaa o shajja'ajjajji cuana dojo canaje ejiojji sahua huasijje esohui huohuijji: <sup>18</sup> —¡Bacue oe! Eya jiquio ojjañaja Edoe Mese. Eseyá Jenosanena huasijje poquije. Jomajo mo ña meesahuaje eya Jodio cuanaja equecua mee'yojji. E'e, Moisesija etehue'yo huohuijjiya, Eyacuiñajji nijje emimijji etii cuaa pea'ai eya ña mee caje. Taaa neineije cuana: “¡Oya quecuajeacue!” poaje. <sup>19</sup> Jodio pojjeama cuana huasijje mo huoojea caje. Ejo soa neineije cuana; cuia caje'yo mo cuaa huaca jee ejeapashajjajjaa; acui ecueata'apeejo me cacajea majje mo ba'ehuanasohuajea caje cuaa emano'yojji. Jamatii mo beca cahuime po majje Eyacuiñajjiya shequi mee caje'yo —Jesusaa huohui canaje.

*Semeneoja ehuanase Jesosa nijje miminaje oja bacua ejjajo*  
(Macoso 10.35-45)

<sup>20</sup> Majoya Jacobo, Huani pea'ai enaese nijje Jesosa que poeyanaje. Ecuí'oshajjajo nequiñanaje onijje emimijji.

<sup>21</sup> —She, ¿ajeo ami poeyanaje? —Jesosa poanaje.

—Jesosa, ecuea ebacua ejja cuana mi pejejo canequi'yahua quijje miya ojjaña huoojea'yojji poaje. Oe shani mijijje, pea ebianeí mijijje canequi'yahua minijje, ona huoojea'yojji. ¡Jamaya oe acue! —poanaje enaese.

<sup>22</sup> —Chojja. Miquianajaya ba jjima —Jesusaa oya cuana acanaje—. Eya quea nee nee po mee caje'yo cuaa. ¿A'a miquianaya e jayojja quea nee nee poajo quea ca'a poaje? Eya quecua caje'yo pea'ai cuaa. Enijje jjapeequianijo miquiana quecua caje'yo pea'ai pojja'a cuaa. ¿A'a jamatii miquianaya quea ca'a poaje?

—E'e —saja'a canaje Jacobohua, Huaniya pea'ai—. Quea ca'a poaje mi jayojja onaa quea nee nee po mee ca'yajje. ¡Jamaya capoahua, jamatii caquecua cahua cuaa mo!

<sup>23</sup> —E'e —poanaje Jesosa—, jamajjeya e'e jojo nei miquiana e jayojja quea nee nee po mee caje'yo cuaa; e jayojja quea ca'a nee nee poaje, onaa mano mee ca'yajje. Jamatii, e pejejo eyajo eyaya miya enequi mee'yojji pojjeama enijje ona huoojea'yojji. Chojja, ecue Chiiya eyajo aniya yahuajo nei pea cuana babaca ca'yonaje. Ohuaye nei nequi mee caje'yo e pejejo quijje, eya ojjaña huoojea'yojji poajo —Jesosa poanaje.

<sup>24</sup> Jesosa pejejo nequi sa pea'ai poanijo onijje ona huoojea'yojji epojji, Jacobo, Huani nijje pea'ai quea quene poanaje pea shajja'ajjajji cuana, ome mijijje pea'ai. <sup>25</sup> Jamajoya aje oe Jesusaa oya cuana iyaa canaje. Jama huohuime acanaje ba'a: —¡A'a onijje quea quene pojji! Miquea eba dejja cuana, Eyacuiñajjiya epeejji pojjeama. Onajaya emeshi mese cuaa, ona huoojeajji cuanaa pea'aiya pea cuana huoojea neinei cani; quea quene nee nee poani, quea mase. <sup>26</sup> Jamaya pojjeama miquianaya poaje, ecuea epeejji cuana. ¡E jayojjaya po sa poanijo pea cuana ba'e meesahuacue! <sup>27</sup> Joya ona huoojea'yojji po sa poani ca ca echacojji sosema' jayojja capoahua. <sup>28</sup> E'e, ¡e jayojja jama pocue! Eya ca ca ña ojjañaja Edoe Mese poeyanaje ojjaña cuana ba'e meesahuaa; ojjañaja eya eba'e meesahuajji pojjeama. Ojjañaja mimishi sosequia'yojji mo manoj'e'yo, ojjaña cuaqui yasijje epoqui'yo poani jjejojya —Jesosa poanaje.

*Cojjama' cuana quea cojja ja'a po mee ca'yonaje Jesusaa*  
(Macoso 10.46-52; Noca 18.35-43)

<sup>29</sup> Jenosanena huasijje poquije Jesosa dobiquinananae Jenico huasijje. Majoya dobinana majje poquinaje Jenosanena huasijje. Quea huiso nee nee cuana onijje poquinaje. <sup>30</sup> Becanejjijji pea'ai cojjama' ejiojji sahuajo e'anioque ani. Jesosa shajja'ajja canaje poeje. Taaa neineinaje cuana: —Jesosa, miya emeshi mese Dabija osecua. ¡Ejo jjashahuabaquicue quea yeno! —taananaje.

<sup>31</sup> —¡A'a oe taaa majajji! ¡Esohui oe ca'acue! —acanaje cuaa.

Jamatii taaa neineinaje cojjama' cuana: —Jesosa, Dabija osecua, ¡ejo jjashahuabaquicue!

<sup>32</sup> Jamajjeya o shajja'ajja majje Jesosa nequiñaquinaje. Cojjama' cuana iyaa canaje: —E'e, ¡poecue! ¿A'ya so'o? —poanaje.

<sup>33</sup> —Emeshi Mese, ¡miyaya iña jjacojjapojjaqui mee'yocue! —poanaje.

<sup>34</sup> Jamajjeya Jesosa cojjama' cuanajo jjashahuabaquinaje. Cojja napa canaje. Cojja napa cajje ecojja jjabapojjaqui'yonaje. Quea bihui nee nee po'yonaje jjacojjaja'aqui mee ca'yajje. Jamajjeya Jesosa nijje poquinaje.

## 21

### *Jenosanenajo Jesosa nequiñaquinaje*

(Macoso 11.1-11; Noca 19.28-40; Huani 12.12-19)

<sup>1</sup> Majoya Jesosa Mepajejo nequiñaquinananaje Jenosanena pejjejo, acui tii'ajja yiyejo, Onimo bajjani eyiyo pejjejo pea'ai. Nequiñaquinana majje o shajja'ajjajji becanejjijji pea'ai huoojea canaje Jesusaa. <sup>2</sup> Jama poanaje ba'a: —¡Poquicue Mepaje yasijje! ¡Dobiqui majje mapichi sisi, ebaqua sho'i ai nijje ejeyo nequia nequi bañaquicue! ¡Ba majje, picho majje yecue e que! <sup>3</sup> Onaa: “¿Apiojji acuaeya ecua mapichi sisi pichojeaña so'o?” acajje, “Ecuea Emeshi Mese sa poani” saja'ame acue. Jamajjeya: “Ee, ocue dojo'ajja joya mapichi” acaje dejjaa Mepajejo ba'eya —Jesosa poanaje.

<sup>4</sup> E'e, jamaya acanaje Jesusaa, Eyacuiñajjija esohui huohuijji yahuajo nei nei ojo tehue ca poa jama ba'a:

<sup>5</sup> “Ojjaña Jenosanenajo ba'e huohuicue jama ba'a: —¡Bacue oe! Mi huoojea'yojji nei poeyani; oya quea bei nee. Jamajjeya mapichi sisija daasa biajje poeyani, mapichi sisija ebacuaja daasa biajje”.

Jamaya yahuajo nei nei Jesusajo tehue ca poa Eyacuiñajjija esohui huohuijjiya.

<sup>6</sup> Jamajjeya Jesusaa huoojea cajje o shajja'ajjajji poquinaje. <sup>7</sup> Mapichi sisi bacuajji dojo canaje. Daqui ao cuana mapichi sisija bacuaja daasa' biajje iya canaje. Jesosa anisohuaquinaje mapichija bacua sho'i aija daasa' biajje. <sup>8</sup> Ojjaña cuana ejjachichiqui nequi canaje, quea huiso nee nee. Ojaya daqui ao cuana ejiojji jeapiihui canaje Jesosa ja'ajjequijji. Pea cuaa acui iña jajasejja canaje. Huana yiyoyiyo canaje ejiojjiyo. Jama yahuajo nei Jodio cuaa emeshi mese cuana ja'ajjequi caninaje cuiñajji yasijje, jama ja'ajjequimeya acaninaje ohua ba cahuajje. <sup>9</sup> Ojjaña ehui dojojji poquije, Jesosa quishishijji poquije pea'ai taaaca poquinaje quea bihui nee nee: —E'e Jesosa, emeshi mese Dabi yahuajo ba'e miquea etiiquiiana. Mi poeyajo ecuana quea bihui nee nee. Quea pame nee nee miya, Jesosa. ¡Eyacuiñajji eyajo aniya miya cahaahuana cahua! ¡Eyacuiñajji cabihuia cahua, ojjaña!

<sup>10</sup> Jamajjeya Jesosa Jenosanena huasijje dobiquianijo, ojjaña cuana jomajo ba'e cuajicuaajjebenaje jjachichiquiya, ojjaña. Huohui'ajja canaje: —¿A'ya shai poeje? —poanaje.

<sup>11</sup> —Jesosa poeje, Eyacuiñajjija esohui huohuijji nei, ma Nasanenajo ba'enaje —saja'ame acanaje cuaa.

### *Aquiiana quiajji poani Eyacuiñajjija equijo nequi cuana huoojeacuayajea canaje Jesusaa*

(Macoso 11.15-19; Noca 19.45-48; Huani 2.13-22)

<sup>12</sup> Quijje pishana Jesosa ojjaña cuana nijje Eyacuiñajjija equi yasijje poqui o'oyanaje. Dobiquinaje. Aquiiana quiajji poani Eyacuiñajjija equijo nequi cuana huoojeacuayajea canaje Jesusaa, aquiiana jjeshe poequi pea'ai. Aquiiana cuana jjahuojjojeajeaqui canaje; bejjo, pea bejjo sosejje quia cani cuanaja bejjo nequijji cuana jeapajjajea canaje; huia' quiajji pea'aija huia' nequijji cuana jeabichajea canaje: <sup>13</sup> —¡A'a jja oe Eyacuiñajjija equijo aquiiana quiajji! —tecueame acanaje Jesusaa—. Eyacuiñajjija esohui jama poani ba'a: “Ecuea equi ojjaña cuana enijje emimijji”. Miquianaaya ca ca siipojji nequijji jayojja ameeña Eyacuiñajjija equi.

<sup>14</sup> Majo tii aniya cojjama' cuana, jeo'ajja cuana pea'ai Jesosa que poeyanaje. Ojjaña cuana Jesusaa quea pame nee po mee ca'yonaje. <sup>15</sup> Jesusaja jjaajaqui mee'yo cuana quea pame nee ba canaje; esho'iquiana majo tii ani sohuicuayanaje shajja'ajja canaje pea'ai. Jamatii Jodio etii cuana aje oe Jesosa nijje quea quene poanaje. Jesosa Eyacuiñajjija Bacua Ejja pojjeama poso tecuea canaje Moisesija etehue'yo huohuijji poaniya, Eyacuiñajji nijje

emimijji etii cuaa. Jama poanaje ba'a: <sup>16</sup>—¿Apiojji acuae jiquio esho'iquiana sohuicuaya meeña mi bihuiajji? ¿A'a shajja'ajja jjima?

—E'e, shajja'ajjaña —Jesosa poanaje—. ¿A'a miquea ba jjima Eyacuiñajji esohui etehue'yo ejo? Jama poani ba'a:

“Joya esho'i ai'ai, esho'i jjonajjona ai pea'ai quea pame nee esohui cuaya mee'yojji mi bihuia'yojji”.

Jamaya Eyacuiñajji esohui yahuajo nei ejo etehue'yo poani —Jesosa poanaje.

<sup>17</sup> Mimi majje Jesosa poquinaje. Jea cana'yonaje. Jenosanenajo ani poquinaje Betania huasijje cahuiya.

*Acui etona jjajja jayojja, iquena bajjani sajjai mee ca'yonaje Jesosaa*  
(Macoso 11.12-14, 20-26)

<sup>18</sup> Mecajjehua Jenosanena huasijje poe o'oyanaje; quea shoe poanaje Jesosa. <sup>19</sup> Ba canaje ejiojji sahuajo nequi acui etona jjajja jayojja. Acuijjajja ba'ajjaqui canaje. Chama' poanaje ejajja. Eña oo pana nequi'yo. Jamajjeya oya Jesosaa huohui canaje: —¡Jamajjeya jjajjama' tii capo'yahua acui! —Jesosaa jama acajje jjeya nei sajjainana'yonaje acui.

<sup>20</sup> Quijje pishana acui esajjai'yo ba majje o shajja'ajjajji cuana jjajjasoaquinaje: —¡De! ¡Jjeya nei ca ca sajjai'yonaje! —poanaje.

<sup>21-22</sup> —E'e —Jesosa poanaje—. ¡Miya Eyacuiñajji quea ja'a nee jjashahuabaquicue! A'a jjashahuabaquijji jama ba'a: “E'e pojja'a Eyacuiñajji eya shajja'ajja'yo jjima”. Cho, jama jjashahuabaquicue ba'a: “Eyacuiñajjiya e'e jojo nei nei eya saja'a caje'yo”. Jamaya miya jjashahuabaquijjo, Eyacuiñajjiya miquea esohui saja'a caje. E'e, Eyacuiñajjiya e jayojja jama ameesahua caje'yo pea'ai, ma dejjaa ajjima acani.

*¿Aya acuae Jesosa huoojea canaje esohui huohuiya?*  
(Macoso 11.27-33; Noca 20.1-8)

<sup>23</sup> Majoya Jesosa Eyacuiñajji equi yasijje dobiqui o'oyanaje. Esohui huohui canijo, Jodio etii cuana, Eyacuiñajji nijje emimijji etii cuana pea'ai o que poeyanaje. Jesosa ojaya ba jjimajo huohui'ajja canaje: —¿Aya acuae mi huoojea canaje? ¿Apiojji acuaeya esohui huohuiana so'o? ¿Apiojji acuaeya aquiana quiajji poani huoojeacuayajeanae oma mecajje? —acanaje Jodio etii cuaa.

<sup>24-25</sup> Jesosaa oya cuana saja'a canaje: —E'e, eyaya miya ebionei huohui'ajjaje. ¿Aya Huani huoojea canaje ona besa meeya? ¿A'a Eyacuiñajjiya? ¿A'a dejja cuaa pojja'a? ¡Huohuicue mo! Eyaya majoya huohuije e huoojea'yojji epo.

<sup>26</sup> Shajja'ajja majje Jodio cuana ojee mimimiminaje: —¿Yajja saja'ame shai eseya aje so'o, de? Quea mete ojjaña dejja cuanajo. Ojjaña ba cani Huani Eyacuiñajjiya huoojea canaje esohui huohuiya. Jamajjeya: “Dejja Huani huoojea canaje” eseya ajje se jajahuejjajje ca chana' meiya. “Eyacuiñajjiya Huani huoojea canaje” eseya ajje aje se oe jama acaje ba'a: “Jamajje, ¿apiojji miyaya Huani shajja'ajja jjima aña?” Jesosaa acaje.

<sup>27</sup> Jamajjeya jjashahuabaqui majje Jesosa huohui canaje Jodio cuaa: —Cua'a, de. Ecuana ba jjima —anisho canaje.

—Jamajjeya ecuea miya ehuohuijji pojjeama e huoojea'yojji epo —Jesosaa acanaje Jodio esohui huohuijji cuana, etii cuana pea'ai.

*Esohui ejjashahuabaqui meeji beca ebacua ejjajo*

<sup>28</sup> Jesosaa oya Jodio cuana huohui canaje pea'ai jama ba'a: —Shajja'ajjacue oe ecue sohui ejjashahuabaqui meeji jama ba'a: Oe dejjaja becanajji pea'ai ebacua ejja yaninaje, shacuima' nequi cuana. Ejeajjiya oja bacua ejja etii huohui canaje: “Cha, ¡che oe jjeya que chacoquicue!” <sup>29</sup> “Cho, cajaa. Mijo chaco sa po'yo ajja ca iña” poanaje. Jamatii, jjashahuabaqui majje “Cachacoquiahua” poanaje. Poquinaje que yasijje.

<sup>30</sup> —Ejeajjiya oja pea ebacua ejja, echahua mese huohui canaje pea'ai: “Cha, ¡che oe que chacoquicue jjeya!” poanaje. “E'e ecue Chii, jaaya chacoquije aje ca eya” poanaje. Jamatii poqui jjima poanaje, de.



<sup>31</sup> —Jamajjeya ¿ache esho'i oja chiiya ehuohui jama poanaje? ¿Achajja acuae miña jjashahuabaquiani?

—E'o'i mese —acanjaje cuaa.

—E'e —Jesosa poanaje—. Eyaya miya e'e nei huohuiaña jama ba'a: Jiquio ecua e'o'i mese jjashahuabaqui majje oja chiiya huohui canaje jayojja jama acanjaje jama jayojja dejja mimishi cuana, epona pea cojjojji poani pea'ai. Eyacuiñajji nijje jjapeecuajiquiani oja ejaahuanajji. Miquiana ca mi ca oe, cho. Eyacuiñajji nijje jjapeequi jjima. <sup>32</sup> E'e, Huani, ma ona besameejji poa yahuajo nei poeya poa miquiana ba meesahuaa. Huohui ca poa jama ba'a: “¡Miquea mimishijo quea yeno pocue! ¡Mimishi cuana pajea'yocue Eyacuiñajjija esohui jama eba'ejji, onijje ejjapeequijji!” Huani poa. Miquianaya aje oe Huani shajja'ajja sa po ajja poanaje. Dejja mimishi cuana, epona quea mimishi cuanaya ca ca shajja'ajja majje: “E'e, ¡Eyacuiñajji nijje ejjapeequi, mimishi cuana ejjapajaequi'yo!” poanaje. Ma ba majje jamatii miquianaya jjashahuabaqui jjima, Eyacuiñajjija esohui jama sa po ajja tii poanaje —Jesosaa acanjaje Jodio etii cuana.

*Pea esohui ejjashahuabaqui meeji jjonojjajja yiyejo  
(Macoso 12.1-12; Noca 20.9-19)*

<sup>33</sup> —¡Jiquio shajja'ajjacue pea esohui ejjashahuabaqui meeji! —Jesosa poanaje—. Oe dejjaa emeshi meseya que quea quemo nee neejo bana canaje jjonojjajja oo pana, uva. Que peeyi canaje meija peeyi. Majoya que yiyesamajo equishipashajji iya canaje, mei cueehue iñaca canaje jjonojjajja na quishipashajji. Majoya mei iyasohua ao'ao majje peehuana canaje que jaahuanajji quea huesha nee ojaya ebajji. Pea echacojji cuana iyaa canaje. Huohui canaje emeshi meseya: “¡Ecuea que jaahuanacue! Jaahuana sosejje quiaje'yo oya jjonojjajja quea huiso nee” poanaje. Majoya emeshi mese quea huesha poquinaje. <sup>34</sup> Quijje jjonojjajja jahuajo emeshi meseya pea o chacosahuajji poani beca huoojea canaje que jaahuanajji que, jjonojjajja jjequiya. Que jaahuanajji bañaqui majje huohui canaje jama ba'a: “¡Che mo jjonojjajja joya ecuea emeshi meseya pa cadojo'yahua, de!” poanaje.

<sup>35</sup> —Que jaahuanajji cuana quea mimishi poanaje. Jjonojjajja quia sa po ajja, joya emeshi meseja iya tepe mee. Jamajjeya o chacosahuajji cuana iña canaje, cuiajea canaje, pea quecua canaje, pea jajahuejjajea canaje meiya. <sup>36</sup> Emeshi meseya pea huoojea ca o'oyanaje huacuaya o chacosahuajji poani quea huiso pishana. Jamatii yahuajo jama acanjaje que jaahuanajji cuaa. Cuiajea ca o'oyanaje pea'ai. <sup>37</sup> Quijje yejje nei oja bacua ejja oe nei huoojea canaje que jaahuanajji baa: “E'e, ohuaya ecuea ebacua ejja shajja'ajja caje” poanaje emeshi mese. <sup>38</sup> Cho, oja bacua ejja poeje ba majje jama poanaje ba'a: “Joya emeshi meseja bacua ejja poeje. Jiquio meshi quijje ojaya poaje, ejeajji mano'yajo. ¡Cua'a, ejjaquecuajaequi oya eque mesena'yojji! Jamajjeya meshi esejaya tii poaje'yo, de” poanaje que jaahuanajji quea mimishi cuana.

<sup>39</sup> —Jamajjeya aje oe ebacua ejja iña canaje, quecuajea canaje, jaequi canaje quea huesha nee, que jaahuanajji cuaa. Mahuiso esohui.

<sup>40</sup> —Jamajjeya emeshi meseya poe o'oya majje ¿yajja acuae acaje'yo jiquio que jaahuanajji quea mimishi cuana? —Jesosaa huohui'ajja canaje Jodio cuana.

<sup>41</sup> —Oya quea quene nee nee poaje'yo. Ma que jaahuanajji quea mimishi cuana quecuajea caje'yo, de. Que cuiña meequi caje'yo pea cuana, joya ojjaña jjonojjajja shejo jjasosequiaquijji cuana —acanjaje Jodio cuaa.

<sup>42</sup> —E'e —Jesosa poanaje—. ¿A'a miquea eba Eyacuiñajjija esohui etehue'yo yahuajo nei? jama ba'a:

“Oe equi yamajjana equi iyajji cajaa aca poa cuaa. Jamatii Eyacuiñajjiya ma eyamajjana equi yamajjana quea ca'a nee nequi mee ca poa. Jamajoya ojjaña ojaya epeeji cuanaa Eyacuiñajji bihuia cani”.

Jamaya yahuajo nei tehue ca poa ejo; eya ma eyamajjana equi iyajji jayojja jama quea ca'a nee nee nequi —Jesosaa acanjaje.

<sup>43</sup> —E'e, jiquio esohui eba meesahuajji jayojja jama Eyacuiñajjiya acaje'yo —Jesosa poanaje—. Ohuaya yahuajo nei miquianaya babaca ca'ya poa ojo echaco'yoyji, onijje eba'e tiitii'yoyji. Jjeya ca ca Eyacuiñajjiya miquianaya, Jodio cuana, cajaa acaje'yo shajjama' joyoya. Pea cuana babaca caje'yo ojo echacojji, onijje eba'e tiitii'yoyji pea'ai, joya e'e jojo nei ojo jjashahuabaquiiani.

<sup>44</sup> —Jiquio ecua eyamajjana cajaa aca poa cuaa jjeya quea ca'a nee nequi jama eya miqianaaya cajaaya anaje; jjeya ca ca iña quea ca'a nee eya nequi'yo. Ojjaña joya e ba jjima e cajaa amajje quea yeno poaje, de. E cajaa tiitii amajje ca ca quea nee nee po tiitii'yo —Jesosa poanaje.

<sup>45</sup> Jesosaja esohui shajja'ajja majje Moisesija etehue'yo huohuijji cuana, Eyacuiñajji nijje emimijji etii cuana pea'ai quea quene nee poanaje: —¡De! Ecuanajo oya mimiani, equi yamajjanajo pojjeama. Eseyá que jaahuanajji quea mimishi jayojja pea'ai ohuaya acani —poanaje Jodio cuana.

<sup>46</sup> Jamajjeya Jesosa iña sa acanaje ejeanobiajajji. Jamatii iña jjima; quea mete poanaje. Ojjaña dejja echicha'yo nequica'yo cuaa Jesosa Eyacuiñajjiya esohui huohuijji nei nei ba cani. Onajaya quea nahue nee nee Jesosa e'iñajji.

## 22

### *Ebacua ejjaja ejjahuanacuijjiyo ojjaña ijji mee'ajja ca poa ejeajjiya* (Noca 14.15-24)

<sup>1</sup> Jamajjeya Jesosaa o poe o'oyajjiyo pea esohui ejjashahuabaquiijji huohui canaje Jodio cuana huasijje jama ba'a: <sup>2</sup> —Eyacuiñajjiya ojjaña cuana huoojja'yoyji poajo jamaya poaje: Oe emeshi meseya oja bacua ejjaja ejjahuanacuijjiyo bobi quea huiso dahua mee canaje ojaya epeejiya e'ijjiijji nisho. <sup>3</sup> Ojjaña apoa poajo, o chacosahuajji huoojja canaje epeeji cuana iyaaa, bobi ijjiijji. Cho, poe sa po ajja poanaje. <sup>4</sup> Jamajjeya emeshi meseya pea chacosahuajji cuana huoojja canaje. “¡Jamaya acue!” poanaje: “Epeeji, ¡poecujajicue oe! Ojjaña apoa. Ana'ai quea sei quecua meenaje. Bobi cuana apoa, ojjaña. ¡Poecue ecue ebacua ejjaja ejjahuanacuijjiyo quea bihui nee epojji! acue” emeshi mese poanaje.

<sup>5</sup> —Jamatii jjashajja'ajjaqui ajja poanaje cuana. Poe ajja. Beca cuana que yasijje poquinaje; peaa aquiana quiaa poquinaje; <sup>6</sup> pea cuaa emeshi meseja echacosahuajji iña majje cuia canaje, quecua ca'yonaje. <sup>7</sup> Ma shajja'ajja majje emeshi mese quea quene poanaje. Sohuinano cuana huoojja canaje dejja shajjama' iña. Quecuajeyo ca'yonaje; equi cuana dahuaajea canaje, sohuinano cuaa. <sup>8</sup> Majoya emeshi meseya o chacosahuajji iyaa canaje pea cuana: “Ojjaña apoa e'ijjiijji ejjahuanacuijjiyo. Pea cuana epeeji nisho poanaje, jamajjeya epoeji pojjeama. Cajaa. <sup>9</sup> ¡Poquicue! Quea huesha ba'e cuana iyaaquicue: —¡Poecue emeshi meseja bacua ejjaja ejjahuanacuijji yasijje! ¡Bobi quea huiso ijjiahuacue! —acue” emeshi mese poanaje.

<sup>10</sup> —Jamajjeya poquinaje. Ojjaña cuana iyaa canaje; dejja quea pame, dejja quea mimishi cuanaya. Quea huiso poeyanaje. Dobiquinaje. Equi cuio canaje. Chama' pea e'anijji poanaje. <sup>11</sup> Majoya emeshi meseya ojjaña cuana baa poeyanaje, ojjaña cuana nijje mimiya. Ba canaje oe dejja daqui jehuejji. <sup>12</sup> “Epeeji, ¿apiojji acuae miya poeyanaje daqui quea jehuejji? ¡Jamaya pojjeama ecue bacua ejjaja ejjahuanacuijji yasijje epoeji!” poanaje. Saja'a jjima ma dejjaja. <sup>13</sup> Jamajjeya emeshi mese quea tecue poanaje. Iyaa canaje o chacosahuajji: “¡Oya jeyo majje jeaquicue quea misi nee yasijje! Jomajo pa neineije'yo, ese' ijjiayaijea caje'yo quea nee neejo” poanaje. Mahuiso ecuea esohui —Jesosa poanaje.

<sup>14</sup> —E'e, ojjaña cuana iyaa'ajja caje Eyacuiñajjiya. Jamatii oe pojji dobiquije'yo onijje eba'e tiitii'yoyji —Jesosaa ojjaña cuana acanaje. (E'e, Eyacuiñajjiya Jodio cuana iyaa coo canaje onijje eba'e'yoyji quea bihui nee. Jamatii shajjama' poanaje. Ojaya huoojja'yo quecuajea canaje. Jamajjeya Eyacuiñajjiya Jodio pojjeama iyaa canaje. Quea huiso poeyanaje. Ma dejja daqui jehue jayojja jama beca cuanaja mimishi cuijea'yo jjima. Jamajjeya jeacuayajea caje'yo quea nee nee epo'yoyji.)

*Bejjo oe pojji quia cajji ba'e sosejje emeshi meseja yajji*  
(Macoso 12.13-17; Noca 20.20-26)

<sup>15</sup> Jesosa mimije shajja'ajja majje Paniseo cuana quea quene poanaje: —Oya Jesosa jjashahuabaquiani eseya epeeji nisho jayojja jama, de —poanaje.

Poqui majje ojee mimimiminaje: —Cua'a, Jesosa ejjadasiaquiqui; esohui quea camaja nee ejjahuhui'ajjaquiqui, ojaya yajja saja'ame ya'yoyji. Jamajjeya Moisesija etehue'yo jayojja jama mi saja'a cajo, cacuijaja meequi'yahua.

<sup>16</sup> Jamajjeya Paniseo cuaa o shajja'ajjajji cuana, jaya Enodeja esohui quea boti nee poani pea'ai huoojaja canaje Jesosa que. Huohui'ajja mee canaje jama ba'a: —Esohui huohuijji, miyaya e'e jojo nei huohuiaña Eyacuiñajji ejjashahuabaqui'yoyji jama. Miya etii cuanajo jjashahuabaqui ajja; emeshi mese cuanajo pea'ai mete'ama. Jamajjeya quea ja'a nee huohuiaña. <sup>17</sup> E'e. Jamajjeya mo oe che huohucue: ¿A'a bejjo quia cajji Shomano meshi mese Sesa bajjanija yajji? ¿A'a equiajji pojjeama esejaya pojja'a? ¿A'a cuae jja ma Sesaja meshijo ba'e sosejje quia cajji so'o? —acanaje cuaa.

<sup>18</sup> Ma Jodio cuanaja ejjashahuabaquijji Jesusaja eba poanaje. Jamajjeya: —¡Miquianaya ca mi ca oe e dasiajji nisho cuana, epeeji nisho quea tai nee nee! ¿Apiojji nequiaa eya dasia sa aña? <sup>19</sup> ¡Bejjo mo huohui'ajjacue esodojjo! —poanaje.

<sup>20</sup> Jjequi canaje cuaa. Esodojjo ba majje huohui'ajja canaje Jesusaa: —¿Ae ecajja'yo jiquio? ¿Ae bajjani tehueme'ya?

<sup>21</sup> —Emeshi mese ecajja'yo, Sesa bajjani —acanaje Jodio cuaa.

—E'e —poanaje Jesosa—. Jamajjeya ¡Sesaja bejjo quiaquicue ohua sa cajo! ¡Eyacuiñajji a'a pajea'yoyji; oya bihuiaque, shajja'ajjacue pea'ai!

<sup>22</sup> Jesosa shajja'ajja majje ojjaña cuana quea mete nee poanaje: —¡Quea jjashahuabaqui ja'a nee nee oya Jesosa! ¡Jjadasia meequi ajja!

Jamajjeya poquinaje, jeana ca'yonaje Paniseo cuaa.

*¿A'a e'e jojo nei mano'yo majje shequije o'oya quijje? —huohui'ajja canaje cuaa Jesosa*  
(Macoso 12.18-27; Noca 20.27-40)

<sup>23</sup> Ma pojajjo tii beca Sanoseo cuana poeyanaje Jesosa huohui'ajjaa. Sanoseo cuana aje oe jama poani ba'a: —Mano'yo majje jama tii tii; eshequi o'oyajji pojjeama quijje.

Jesosaja ca ca jama sohuihuohuime ajjima. Jamajjeya Jesosa huohui'ajja canaje Sanoseo cuaa; edasiajji nisho jama acanaje ba'a: <sup>24</sup> —Esohui huohuijji, Moisesiya jama tehue ca poa yahuajo nei nei ba'a: “Dejja ejjahuanacui, bacuama' mano'yajo, oja chahuua ehuanase equijjojaja ani cahuana ca'yahua, oja o'ija bacua jea jayojja jama epojji”. ¿A'a e'e? <sup>25</sup> Jamajjeya jama poso ba'a: Quea huiso edoe mese, me oeje pea beca nequia poa. E'o'i mese ebionei jjahuanacui poa eponajo. Mano'yonaje bacuama' tii. Oja chahuua epona equijjojaja ani huana ca o'oyanaje, bacuama' tii ani. <sup>26</sup> Oya jayojja mano'yonaje bacuama' tii. Jamajjeya peaa echahua meseya huana ca o'oyanaje. Mano'yonaje bacuama' pea'ai. Jamaya ojjaña manojeyo'yonaje. <sup>27</sup> Quijje ehuanase pea'ai mano'yonaje. <sup>28</sup> Jamajjeya shequi o'oya majje eyajo, ¿ajaja ehuanase epona poaje, ache edoe meseja? Ojjaña echahua cuana huea'ajja'yo epo —Sanoseo cuaa acanaje.

<sup>29</sup> Jesusaa saja'a canaje jama ba'a: —Chojja. Jamaya pojjeama. Miquea ba jjima Eyacuiñajji esohui; oya quea ca'a nee nee miquea ba jjima pea'ai. <sup>30</sup> E'e, shequi o'oya majje ejjahuanacui'yoyji pojjeama. Esohuidojojji eyajo ani jama poaje. <sup>31</sup> Cuanaya ¿a'a miquea ba jjima dejja cuana ojjaña mano'yo majje shequije o'oya? Jamajjeya Eyacuiñajji yahuajo nei esohui tehue mee ca poa miquiana jjabahuejjaquijji. Jamaya poa ba'a: <sup>32</sup> “Eya ca ca iña Amajama jaahuanaajji, Isaaca, Jacobo pea'ai jaahuanaajji”. ¿A'a Eyacuiñajji emano'yo cuana meshijo e'ohuajaja jaa jaahuana cani? Cho. Ojaya epeeji cuana eshe nequi, mano'yo majje shequi'yo pea'ai jaahuana cani Eyacuiñajji —Jesusaa acanaje.

<sup>33</sup> Jesusaja esohuijo ojjaña cuana quea bihui nee poanaje: —¡Quea pame nee ohuaya Jesusaa huohui cani! —poanaje cuana.

*¡Eyacuiñajji quea jea nee acue, mi pejjejo nequi cuana pea'ai!*  
(Macoso 12.28-34)

<sup>34</sup> Majoya Paniseo cuaa shajja'ajja canaje Jesosa quea jjashahuabaqui ja'a nee; Sanoseo cuana jjadasia meequi ajja. Jamajjeya jjachichaqui majje ojee jjashahuabaqui o'oyanaje Jesosa dasiaquijji, esohui quea camaja nee ehuohui'ajjaquijji. <sup>35</sup> Majoya Jesosa que poe o'oyanaje Paniseo cuana. Dasia'yohua nisho Moisesija etehue'yo huohuijjiya huohui'ajja canaje jama ba'a: <sup>36</sup> —Esohui huohuijji, yahuajo Moisesiya tehue ca poa Eyacuiñajjiya esohui. ¿Ache esohui quea pame nee nee e'ajji?

<sup>37</sup> Jesosaa acanaje: —E'e, jamaya quea pame nee acue ba'a:  
“¡Eyacuiñajji miquea Emeshi Mese nei quea jea nee nee acue! Miquea huapa pojjeama cuana miquea quea jea; ¡quea jea nee neeya oe acue Eyacuiñajji! Jamajjeya ¡ojja jjashahuaba tiitiiquicue!”

<sup>38-39</sup> Jiquio ehuohui'yo quea pame nee. Pea oya jayojja quea pame nee jama ba'a:  
“¡Ojjaña pea cuana quea jea nee acue, miquea huapa pojjeama jama quea jea neeya oe acue!”

<sup>40</sup> Jamaya miya poajo miya Moisesija etehue'yo jama ba'e; Eyacuiñajjiya esohui huohuijji yahuajo nei ba'eja esohui jama ba'e pea'ai —Jesosa poanaje.

*Eyacuiñajjiya huoojea'yo dejja jaahuanajji Quito*  
(Macoso 12.35-37; Noca 20.41-44)

<sup>41</sup> Jamajjeya ojjaña Paniseo cuana jjachichaquiajo oya cuana huohui'ajja canaje Jesosaa: <sup>42</sup> —¿Yajja huohuime acuae nequiaa ña Eyacuiñajjiya huoojea'yo dejja jaahuanajji Quitojo? ¿Ache etiiquianaja osecua oya?

—Quito emeshi mese Dabija osecua, ma yahuajo ba'ya poaja —acanjaje Paniseo cuaa.

<sup>43</sup> —Jamajjeya ¿yajjajje acuae Eyacuiñajjiya Edojjoshahua Pameya emeshi mese Dabi jama amee ca poa yahuajo ba'a: “Eyacuiñajjiya huoojea'yo ojjaña jaahuanajji Quito ecuea Emeshi Mese nei”? Yahuajo nei Dabiya jama huohui ca poa pea'ai ba'a:

<sup>44</sup> “Eyacuiñajjiya ecuea Emeshi Mese Quito jama aca poa: —¡Enijje anioquec ue ebiane mijijje ojjaña cuana huoojea'yojji! Eyaya mi quecuajji nisho epo jeabichajea jeyojeyo'yo”.

Jamaya huohui ca poa yahuajo Dabiya ejo. <sup>45</sup> E'e, Dabiya Eyacuiñajjiya huoojea'yo Quito aca poa “Ecuea Emeshi Mese”. Jamajjeya Quito Dabiya Emeshi Mese nei poani. Jamatii oya Dabiya osecua pea'ai, de —Jesosaa acanjaje—. Eya, Eyacuiñajjiya huoojea'yo, dejjaja jea pojjeama; Eyacuiñajjiya Bacua Ejja. Jamajjeya eya ojjañaja Emeshi Mese nei.

<sup>46</sup> Jesosa mimije shajja'ajja majje Paniseo cuana quea mete poanaje. Jeca poanaje, mimima'yo aninaje; huohui'ajja beca'yo jjima tii acanjaje.

## 23

*—¡A'a Jodio esohui huohuijji jama ba'ejji! —Jesosa poanaje*  
(Macoso 12.38-40; Noca 11.37-54, 20.45-47)

<sup>1</sup> Majoya Jesosaa ojjaña cuana, o shajja'ajjajji cuana pea'ai huohui canaje jama ba'a: <sup>2</sup> —Moisesija etehue'yo huohuijji, Paniseo cuana pea'ai miquea esohui huohuijji. <sup>3</sup> Jamajjeya ¡oya cuana shajja'ajjacue! ¡Ojaya esohui jayojja jama acue ojjaña! Jamatii oya cuana aje oe esohui jama ba'e ajja; quea mimishi. Jamajjeya ¡a'a o jayojja ba'ejji! —poanaje—.

<sup>4</sup> E'e, jamaya poani ba'a: Dejjaa aquiana quea biquie abo mee cani pea dejja. Jamatii huanasohua sahua ajja, de, quea mimishiya jjejojo. O jayojja Jodio esohui huohuijjiya pea cuana ba'e meesahua ajja Eyacuiñajjiya etehue'yo jama —Jesosa poanaje.

<sup>5</sup> —Quea pame poso oya jjabaquiani onaja ebihuijji: “E'e de, oya esohui huohuijji quea pame nee” epo meeji acani. Jamajjeya esohui etehue'yo quea quemo jjasapahuahuo iyaquiani, aa huahuo pea'ai ojjañaja ebajji. Daqui quea pame nee nee, quea ao nee huosho cani ojjañaja ebajji pea'ai. <sup>6</sup> Ojee ijia'ijjianijo, emeshi mese pejjejo anioqueani ebionei ijia sa poanijo. Jodioja equi ojee ejjachichaquijjiyo pea'ai ebionei anioque sa

poani Eyacuiñajjija esohui huohuijji pejeje, ojjaña nijje emimimimijji. “E'e, oya cuana Eyacuiñajjija esohui huohuijji nei quea pame nee” epo meeji acani. <sup>7</sup> Ejiojjijje poquiani ojjaña aquiana quia cani yasijje anicuaa, pea cuaa jama bihuia cani ba'a: “Esohui huohuijji, miya quea pame nee nee.” Jamaya aje oe ojaya quea boti nee, jiquio Jodio etii cuanaja, esohui huohuijji quea pame nee poso jjabaquiani —Jesosa poanaje.

<sup>8</sup> Jamajjeya o shajja'ajjajji cuana Jesosaa acanaje pea'ai jama ba'a: —¡A'a miqianaya o jayojja jama pojji! Pea cuana a'a jjabihuia meequijji: “¡Miya esohui huohuijji quea pame nee nee!” a'a jjapo meequijji cuana. Cho. Miquea Esohui Huohuijji quea pame nee oe nei yani, miquea Emeshi Mese nei. Miquianaya ecuea epeeji cuana ca ca Eyacuiñajjiya ba cani pea epeeji jayojjaya. <sup>9</sup> Oe nei eyajo ani eseja Chii. Jamajjeya jesohui huohuijji oya jayojja “Esejaya Chii” a'a ajji! <sup>10</sup> Cuanaya Eyacuiñajjija huoojea'yo ojjaña jaahuanajji, Quito miqiana huoojea'yojji nei nei. Jamajjeya pea cuana “ese huoojea'yojji nei” a'a jjapo meequijji. <sup>11</sup> E'e, jemeshi mese jayojja jama nequi sa poani ca ca pea cuana chacosahuacue! <sup>12</sup> Jamajjeya joya emeshi mese poso jjabaquiani Eyacuiñajjiya emeshi mese pojjeama acaje'yo. Echacosahuajji jjabaquiani ca ca Eyacuiñajjiya emeshi mese jayojja po mee caje'yo —jamaya acanaje Jesosaa o shajja'ajjajji cuana.

### *Jesosaa Jodio etii cuana tecuea canaje*

<sup>13</sup> Majoya Jesosaa Paniseo cuana, Moisesija etehue'yo huohuijji poani pea'ai jama tecueame acanaje ba'a: —Miquianaaya aje oe Moisesija etehue'yo huohuiaña, Jodioja esohui huohuijji poaniya pea'ai. Jamatii miya ca mi ca oe esohui huohuijji nisho, sijjepojji. E'e, miqianaya Eyacuiñajji nijje jjapeequi ajja. Pea cuana Eyacuiñajji nijje jjapeequi sa poani miyaya jjapeequipajea meeyaña, de. E'e, jiquio ecua esecue ca'a cani cuaa ona edobiqui poani jjejojo jama jayojja miqiaaya pea cuana dobiqui mee ajja eyahuasijje Eyacuiñajji nijje eba'e tiitii'yojji. Jamajjeya miqianaya quea nee nee po mee caje'yo quijje, quea nee nee tii tii, de —Jesosa poanaje.

<sup>14</sup> —E'e, miqianaya ca ca oe e'ahuemanoja equi cuana jjesheaña sosema!. Majoya Eyacuiñajji nijje mimi nishoani quea huiso nee. Jamajjeya Eyacuiñajjiya miqianaya cajaa acaje'yo. Quea nee nee po mee caje'yo tii tii —Jesosa poanaje.

<sup>15</sup> —Jodioja esohui huohuijji cuana, Moisesija etehue'yo huohuijji cuana pea'ai, miqianaya aje oe esohui huohuijji nisho, peajja. Miquianaaya chaco neineiaña; quea huesha poquiani pea'ai pea cuana Moisesija etehue'yo shajja'ajja meeya. Jamatii mi shajja'ajjajji cuana mi jayojja quea mimishi nee nee. Jamajjeya oya cuana e'e jojo nei quea nee nee po mee caje'yo, mi jayojjaya —Jesosa poanaje.

<sup>16</sup> —E'e, miqianajaya ehuohui quea quehuajo cojjama' jama poani. Cojjama' cuana pea cojjama' cuaa me iña majje mepejejea cani jayojja. Ojjaña poquiquehuaje'yo —Jesosa poanaje—. Miquea ehuohui jama ba'a: “Eyacuiñajjija equi nequianijo, ecuea ehuohui jama eyaya e'e jojo nei aje”. Pea cuana jama poani ba'a: “Chojja, jamaya mimi majje miquea ehuohui jama e'ajji pojjeama”. Jamaya huohui cani cuaa pea'ai ba'a: “Ma mei huo'o Eyacuiñajjija equijo anijo, ecuea ehuohui'yo jayojja jama eyaya aje”. “E'e, jjamaya mimi majje miquea ehuohui jayojja jama e'e jojo nei acue!” pea cuana poani. Jamaya mimi quehuani miqianaya —Jesosa poanaje.

<sup>17</sup> Oya cuana tecuea canaje jama pea'ai ba'a: —Chojja, de. Miquianaya jjashahuaba quehuaquiani. Mei huo'o Eyacuiñajjija equijo quea pame ani; Eyacuiñajjija equi quea pame nee pea'ai. <sup>18</sup> Miquianajaya pea ehuohui quea quehua pea'ai jama ba'a: “Mei ehuaña huicha'a huicha'a pea mei biajje yani Eyacuiñajjija equijo aquiana dahuajji, Eyacuiñajji bihuiajji. Ma mei e'iya cuana nequianijo, eyaya ecuea ehuohui jayojja jama e'e jojo nei aje” amajje, dejja ojaya ehuohui jama e'ajji pojjeama, miqianaya poani. Jiquio jama poani ba'a: Aquiana mei e'iya biajje huana cani cuaa. Majoya jama mimiani ba'a: “Ma aquiana mei e'iya biajje yanijo, ecuea ehuohui jayojja jama eyaya aje”. “E'e, jjamaya mimi majje ca ca miquea ehuohui jayojja jama e'e jojo nei acue!” ¡Miquianaya jamaya mimi quehua'ani cuana! <sup>19</sup> ¡Ma ehuohui'yo cajaa! —Jesosa poanaje—. Mei e'iya

quea pame nee; aquiانا mei e'iyaya biajje ani quea pame pea'ai. Pea jayojjaya. <sup>20</sup> Jamajjeya dejja mei e'iyajo mimianijo oya ojjaña aquiانا mei e'iyaya biajjejo mimiani pea'ai. Pea jayojjaya poani. ¡Jamaya a'a mimijji ma aquiانا cuanajo! —Jesosa poanaje. <sup>21</sup> — Miquianaya Eyacuiñajjija equi yasijje mimiani cuana jama ba'a: “Eyaya ecuea ehuohui'yo jayojja jama e'e jojo nei aje Eyacuiñajjija equi yanijo”. Jamaya aje oe miya mimiani Eyacuiñajjijo, ma equijo ba'yanijo pea'ai. Jamajjeya ¡Eyacuiñajjija equi yasijje a'a jama mimijji! <sup>22</sup> Pea cuana mimianijo eyahuasijje jama poani ba'a: “Eyajo Eyacuiñajjija eba'ejji yanijo eyaya ecuea ehuohui'yo jayojja jama e'e jojo nei aje. Ecuea esohui e'e nei pojjeama jojjemo eya quea nee capoahua”. Jamaya amajje miya Eyacuiñajjija eba'ejjijo mimiani; “Eyacuiñajji eyajo aniya eya ba canijo, eyaya ecuea ehuohui'yo jayojja jama e'e jojo nei aje”. “Ecuea ehuohui'yo jayojja jama ajjima jojjemo eya quea nee po mee ca'yome” beshahua nei aña; oya jayojjaya. Jamajjeya ¡a'a jamaya mimijji Eyacuiñajjijo; quea tai! —Jesosa poanaje.

<sup>23</sup> Majoya Jesosaa Moisesija etehue'yo huohuijji cuana, Paniseo cuana pea'ai jama tecueame acanaje ba'a: —Miquea aquiانا bobi quea johua e'ajji equi pejjejo pohuani. Tiiyajo quiaña iye huiso Eyacuiñajjija epojji, ojaya ehuohui'yo jayojja jama poani: “Miquianajaya aquiانا ipiacue; ome miji pea'ai, 10 oya jayojjaya, oe Eyacuiñajjija epojji, pea me oejje ebeca pee pea'ai, 9 miquea epojji”.

Eyacuiñajji yahuajo nei jamaya poa. Jamaya miya poani. Quea pame. Jamatii de, Moisesija etehue'yojo quea ja'a jjashahuaba tiitiiqui ajja. Jamaya quea tai aña ba'a: Miya e'e jojo nei jjashahuabaqui jjima, sijje poani, jjashahuabaqui ajja aema' cuana ba'e meesahuajji. Eyacuiñajjija esohui jayojja jama po tiitii ajja. Jamajjeya ¡Eyacuiñajjija etehue'yo jama ba'ecue! ¡Majoya Eyacuiñajji yasijje iye huiso quiacue ojjaña miquea aquiانا pea'ai! —Jesosa poanaje.

<sup>24</sup> —Miquianaya cojjama' jama; jjashahuabaqui ajja pea'ai. ¿A'a huashapa bobijo anidobiquiajo jeajea'aña, jamatii aquiانا quea quemo anidobiquiajo ijjiajeaña? Jamaya miya poani; ojjaña miquea aquiانا quea biso pea'ai ipia'ajja majje iye huiso quiaña Eyacuiñajjija epojji. Jamatii pea cuana ba'e meesahua ajja, de. Jamajoya Eyacuiñajjiya miquianaya cajaa acaje'yo; quea nee nee po mee caje'yo —Jesosa poanaje.

<sup>25</sup> —E'e Paniseo cuana, miquianaya Moisesija etehue'yo huohuijji pea'ai. Jamatii miquianaya ca ca oe esohui huohuijji nisho de, quea tai. ¿A'a caneco cueehue topo cani cuaa ena ishi jjimahuajo, jamatii eyiyedojojje quea ihui shacua jjima? Jamaya miya. Jjabaquiiani quea pame jayojja. Jamatii quea jjashahuabaqui tai nee; sii poani; epona, onaja aquiانا jea baña pea'ai. <sup>26</sup> Paniseo cuana, miquianaya aje oe quea jjashahuabaqui quehua. Jamajjeya Eyacuiñajjiya miquianaya cajaa acaje'yo; quea nee nee po mee caje'yo, de. ¿A'a caneco yiyedojojje ebionei topo cani cuaa? Jamajjeya e'e jojo nei quea pame nee. ¡Caneco topo cani jayojja jama acue miquiaaya; ebionei jjashahuabaqui tai pajea'yocue e'e jojo nei quea pame epojji! —Jesosa poanaje.

<sup>27</sup> —Paniseo cuana, Moisesija etehue'yo huohuijji pea'ai, miquianaya esohui huohuijji nisho de, quea mimishi. Emano mojea'yoyji cuia'asha cani cuaa quea pame jayojja. Jamatii eyiyedojojje quea ihui, emano'yo sajaajji. <sup>28</sup> Emano'yo mojea'yoyji jayojja jama miquianaya cuana; quea pame jayojja ojjaña ba cani; jamatii quea jjashahuabaqui tai. Shajjama', quea pame po nishoani pea'ai. Jamajoya Eyacuiñajjiya miquianaya cajaa acaje'yo; quea nee nee po mee caje'yo —Jesosa poanaje.

<sup>29</sup> —Moisesija etehue'yo huohuijji, Paniseo cuana pea'ai, miquianaya aje oe esohui huohuijji nisho, quea mase. Jamajjeya Eyacuiñajjiya miquianaya quea nee nee po mee caje'yo. E'e, miquianaya emano sajaajji mo'yaña, quea pame a'yaña ma Eyacuiñajjija esohui huohuijji yahuajo mojea jaa. Esajaajji cuia'asha'aña quea pame nee Eyacuiñajjija epeeji nei yahuajo emano'yo bihuia'yoyji —Jesosa poanaje—. <sup>30</sup> Sijje miya poani jama ba'a: “Yahuajo ecuanaja etiiquiiana cuana nijje eba'e'yo jojjemo ecuanaja ca ca oe Eyacuiñajjija esohui huohuijji cuana ecuiajea'yoyji pojjeama poqueaye. Chama' ecuanaja ejjashahuabaquiiji etiiquiiana jama; ecuanaja ca ca pea” miquianaya poani —Jesosa

poanaje—. <sup>31</sup> Chojja. Jamaya miqianaya po nishoani. Jamatii miqianajaya etiiquiana jama Eyacuiñajjija esohui huohuijji quecuajji nei nei pea'ai. <sup>32</sup> Jamajjeya o jayojja jama poani quiana; Eyacuiñajjija huoojea'yo cuana cuiajea jeyojeyo'yo, de —Jesosa poanaje —. <sup>33</sup> Miqianaya peyo quea se nee nee jama de, quea mase nee nee, esohui huohuijji quecuajji, miquea etiiquiana cuana jama. Jamajjeya ¿a'a acuae nequiana Eyacuiñajjijo jjanequiquehuaquijji? Chojja. E'e jojo nei ohuaya miya huohui caje'yo: “¡Poquicue nequiana! ¡Cuaqui yasijje dobiqicue! ¡Quea mase nee nee aje oe nequiana!” —Jesosa poanaje.

<sup>34</sup> —Jamajjeya eyaya miqiana huasijje huoojeaña Eyacuiñajjija esohui huohuijji, esohui bameesahuajji, dejja quea jjashahuabaqui ja'a nee pea'ai. Jamatii beca cuana cuiajeaje'yo; pea cuana acui ecueata'apeejo me cacajeaje'yo; pea cuana cuiasejjajeaje'yo miquea equi ojee ejjachichaquijji yasijje; pea cuana ocuenaje'yo ojjaña cuiñajji yasijje equecua'yoyji, miqianaaya —Jesosa poanaje—. <sup>35</sup> E'e Jodio cuana, miquea etiiquiana cuaa dejja mimishi'lama quecuajea ca'yonaje quea huiso. Eyacuiñajjija etehue'yo ebionei tehue ca poa jama ba'a: Abeni cuiahuejjajea ca poa miquea etiiquiana Cainiya. Oya jayojja quea huiso cuiajea ca poa cuaa. Quijje nei Eyacuiñajjija etehue'yo quijje yejje nei tehue ca poa oja sohui huohuijji Sacania, Benequiaja bacua ejja cuiahuejjajea ca poa cuaa Eyacuiñajjija equijo, aquiana dahuajeajji pejejo —Jesosa poanaje—. <sup>36</sup> Jamajjeya eyaya miya e'e jojo nei huohuiaña: Jjeya nei apoa poaje; Eyacuiñajjiya miqiana cuana quea nee nee po mee caje'yo ojjaña miquea etiiquianaja mimishi cuanajo, o jayojja jama miqianaya poani jojoya.

Jamaya Jesosaa Jodio cuana tecuea canaje quea mimishi nee jojoya.

*Jesosa quea yeno poanaje ojjaña Jenosanenajo ba'e cuanajo*  
(Noca 13.34-35)

<sup>37</sup> Majoya Jesosa quea yeno nee nee ojjaña cuana Jenosanenajo ba'e cuanajo jama poanaje ba'a: —Jodio cuana Jenosanenajo ba'e, miqiana cuana ecuea quea jea nee nee. Jamajjeya eya miqianajo quea yeno poani. E'e, miqianaaya aje oe Eyacuiñajjija esohui huohuijji quecuajea'ya poa; ojaya huoojea'yo jajahuejjajea'ya poa meiya pea'ai. ¡Bacue oe! Cachina enaeseya ebacua huojje cani ejaahunajji jama jayojja eyaya miqiana iyaa sa neineiaña e que, ejaahunajji. Jamatii enijje jjapeequi sa po ajja. Cajaa aña jama ba'a: “Chojja, Eyacuiñajjija miya huoojea jjima ojjaña jaahunajji”. <sup>38</sup> Jamajjeya ¡bacue! —Jesosa poanaje—, Eyacuiñajjiya miqianaya cajaa acaje'yo. Jeajea caje'yo ejaahuana majajji pojjeama. <sup>39</sup> E'e, eya jiquiojo tii nequi tii ajja. Jamajjeya eya miqianajaya ba o'oya jjima poaje e poe o'oya jjimahuajo. Quijje e poe o'oyajo ca nequiana ca oe jama poaje ba'a: “Jesosa miya Eyacuiñajjija huoojea'yo ojjaña jaahunajji. ¡Eyacuiñajjiya miya cajuahuana cahua quea pame!” poaje miqianaya quijje —Jesosa poanaje Jenosanenajo ba'e cuana nijje.

## 24

*—Eyacuiñajjija equi cajjajeajea caje'yo cuaa mei cuana —Jesosa poanaje*  
(Macoso 13.1-2; Noca 21.5-6)

<sup>1</sup> Jesosa Eyacuiñajjija equijo ani poquinaje. Poquijjeya o shajja'ajjajji cuaa oya huohui canaje: —¡Bacue Eyacuiñajjija equi! Quea quemo, quea pame mei cuana.

<sup>2</sup> —E'e. ¿A'a jiquio equi quea pame nee baña? E'e jojo nei quijje mei cuana cajjajeajea caje'yo cuaa. Chama'yo tii acaje'yo —Jesosa poanaje.

*Dejja cuana quea mase nee poaje quijje*  
(Macoso 13.3-13; Noca 21.7-19)

<sup>3</sup> Quijje Jesosa eyiyo huasijje Onimo acui yiye yasijje jaasohuaquinaje o shajja'ajjajji cuana nijje. Anioquenaje. Pea dejja poqui jjima. Jamajjeya o shajja'ajjajji cuaa huohui'ajja canaje: —Jesosa, ¿ache shono acuae mei cuana cajjajeajea caje'yo cuaa so'o?

¿Ae acuae poaje mi epoe o'oya cuahuajje? ¿A'ya ba majje ecuanaja eba poaje miya poeje o'oya, meshi chama'yo tii epojjijo?

<sup>4</sup> Jesusaa saja'a canaje: —¡Jashahuaba neineiquicue onajaya miya edasiajji pojjeama!

<sup>5</sup> Quea huiso siajjepojji poeje, ecuea ehoojea'yo pojjeama: “Eyacuiñajjiya eya huoojea canaje, eya ca ca iña ojjaña jaahuanajji” siajje poaje. Quea huiso dasia caje'yo. <sup>6</sup> “Ojjaña jjaquecuaquiani ojjaña meshi yasijje” huohui caje peaaya pea'ai. Jamatii ja'a quea mete pojjii! Jamaya poaje. Jamatii apoa pojjeama, oe po ajja jjima poaje so'o —Jesosa poanaje—. <sup>7</sup> E'e, jjaquecuaquí caje'yo cuana ojjaña meshi yasijje, ojjaña cuiñajji yasijje pea'ai. Quea huiso emanomeejjiya mano mee caje'yo; bobi yasijje po majje manojeyo'yo quea huiso; meshi huehuahuehuaje ojjaña meshi yasijje pea'ai —Jesosa poanaje—. <sup>8</sup> E'e, jiquio ecua epona bacua cuayaje ebionei jipashineijje nee'ani; quijje quea nee nee. Jamaya poaje e poe o'oya jjimahuajo. Quea nee pishana po majje quea nee nee poaje ojjaña cuana —Jesosa poanaje.

<sup>9</sup> —Majoya pea cuaa miquianaya iña majje jeanobiajea caje'yo ecuiasejjajeajji, equecua'yojji pea'ai. Enijje jjapeequianijo miquianaya boti'ama nei poaje ojjaña meshijo ba'e cuanaja. <sup>10</sup> Jamajoya quea huiso enijje jjapeepajeaqui'yo majje mimishi aje o'oya. Peaja epeejjiya boti'ama poaje'yo —Jesosa poanaje—. Jamajoya dejja mase iña mee caje'yo equecua'yojji. <sup>11</sup> Quea huiso pea cuana poeje: “Eya Eyacuiñajjiya esohui huohuijji” siajje poaje. Cho, Eyacuiñajjiya pojjeama. Jamatii, ecuea epeejji dasia caje'yo quea huiso. Poquiquehua mee caje'yo eshahua nijje. <sup>12</sup> Dejja cuana shajjama' jayojja po majje emeshi mese cuana shajja'ajja sa po ajja poaje'yo. Jamajjeya pea cuana boti'ama poaje'yo. <sup>13</sup> Jamatii e poe o'oya jjimahuajo, enijje jjapeequi pajea'yo ajja tii ca ca Eyacuiñajji nijje ba'e tiitiije'yo, enijje pea'ai —Jesosa poanaje.

<sup>14</sup> —Eya poeje o'oya. Eyacuiñajji nijje ojjaña cuanaja Emeshi Mese nei poaje'yo. Ma huohui'yo quea pame nee ojjaña meshi cuana huasijje huohui caje, ojjaña dejja cuana huasijje pea'ai ojjañaja eshajja'ajjajji. Majoya e poe o'oyajo ojjaña oe poaje —Jesosa poanaje.

*Aquiana quea tai nee ojjaña quea mete nee nee epo meejji*

*(Macoso 13.14-23; Noca 21.20-24, 17.22-24)*

<sup>15</sup> —Eyacuiñajjiya esohui huohuijji Dañeniya yahuajo nei huohui ca poa jama ba'a: “Quijje Eyacuiñajjiya equijo nequije aquiana quea tai nee nee, ojjaña quea mete nee nee epo meejji”.

<sup>16</sup> Jamajjeya ma ba majje ca ca, ma pojjajo tii ojjaña Jodio meshijo ba'e capoquicuajiahua eyiyo cuana huasijje. (Jiquio huohui'yojo cjjashahuabaquiahua quea ja'a epojji.)

<sup>17</sup> ¡Joya equi huisa biajje chacochoani a'a equi yasijje dobiquinanajji aquiana cuana biohua edojjii! <sup>18</sup> ¡Joya quejo chacochoqui pea'ai a'a equi yasijje poquinanajji daqui moojo! Eyiyo huasijje poquicuaji ajja aje oe mano'yo chana'. <sup>19</sup> Epona cuana o'ejji, bacua sho'ijji pea'ai quea yeno poaje; quea camaja equehua poquicuajijji poaje. <sup>20</sup> Jamajjeya Eyacuiñajji nijje mimicue jama ba'a: “Eyacuiñajji, jeenojo pojjeama capoahua, epojja ejomishocajjiyo pojjeama pea'ai ecuanaja epoquijji eyiyo cuana huasijje!” acue —Jesosa poanaje—. <sup>21</sup> E'e, ma pojja cuanajo ojjaña quea mete nee nee, quea yeno nee nee poaje. Jamaya pojjeama yahuajo, meshi pana majje, jjeya nei pea'ai, quijje pea'ai; quea mete pishana, quea yeno pishana. Ma pojja cuanajo ca ca quea nee nee poaje dejja cuana —Jesosa poanaje.

<sup>22</sup> —Eyacuiñajjiya oe pojjii cahuime quea camaja po mee caje'yo; oe pojjii cahuime epo'yo jojjemo ojjaña cuana mano'yome. Ojaya epeejji jaahuana canijo, ojaya quea nahue nee emano jeyojeyo'yojji, Eyacuiñajjiya oe pojjii cahuijo quea camaja po mee caje'yo, quea cahui huiso pojjeama —Jesosa poanaje.

<sup>23</sup> —Ma pojja cuanajo a'a jashajja'ajjaquijji ona siajje poajo jama ba'a: “¡Bacue oe, Eyacuiñajjiya huoojea'yo Quito jiquiacua poe'yonaje!” jama poso, ja'a shajja'ajjajji! “¡Bacue oe, Quito jocuama pa poe'yonaje!” Jama onaa acajje ja'a jashajja'ajjaquijji, a'a poquijji! <sup>24</sup> E'e, Eyacuiñajjiya huoojea'yo ojjaña jaahuanajji e jayojja nisho, Eyacuiñajjiya



esohui huohuijji nisho pea'ai poeje quea huiso nee nee. Ohuaya ma pea dejjaa ajjima acani acaje'yo Eyacuiñajjija epeeji cuana dasia'yoyji nisho. Dasia caje'yo quea huiso nee; ecuea epeeji nei pea'ai beshahua nei eya pajea mee caje'yo o jayoyja epoyji; chojja, jjadasia meequi ajja. <sup>25</sup> E shajja'ajjajji cuana, eyaya miya huohuinaje quijje oya poeje ejjadasiaqui'yoyji. ¡A'a oya cuana shajja'ajjajji! —Jesosa poanaje.

<sup>26</sup> —Jamajjeya a'a jjashajja'ajjaquijji onaa miya sijje acajje jama ba'a: “¡Baquicue oe, Quito jocuama huenihuenei aijo nequi!” Jama acajje ¡a'a baquijji! “¡Bacue oe, Quito equi equecuayijji dojjojo ejja'aniquehuaqui ani!” acajje ¡a'a jjashajja'ajjaquijji; a'a o que dobiquijji! <sup>27-28</sup> Cho, shajja'ajjacue ecue sohui: ¿A'a joya e'ihuijaa huasijje be'o cuana cuabesajebeje? E'e jojo nei miquianaaya eya baje joya ecua be'o e'ihui yasijje oqueani jama. Cuanaya pojjeje nei nei poajo jeaja'a cani eyajo; ojjaña ba caje quea huesha nee. Jamaya eya ojjañaja Edoe Mese poeje o'oya, pojjeje jama. Jeaja'ajeajebeje. Eya ojjaña ba caje'yo. Quehuajje pojjeama eya poeje'yo —Jesosa poanaje.

*Jesosa ojjañaja Edoe Mese poeje o'oya*  
(Macoso 13.24-37; Noca 21.25-28)

<sup>29</sup> —E'e, quea camaja nee nee po majje majoya eshequi quea apo poaje'yo. Ba'i jijji'yo ajja poaje'yo. Majameta cuana jjacajjaqui'yo majje jijijijioqueje'yo ojjaña pea'ai. Majameta nequijji cuana huehuahuehuaje'yo janobajjima nei pea'ai.

<sup>30</sup> —Majoya miquianaaya baje aquiana eyajo. Ma ba majje huohuije jama ba'a: “¡E'e jojo nei Jesosa Quito ojjañaja Edoe Mese jjeyahua nei poeje o'oya, del!” poaje.

—Jamajjeya ojjaña cuana ojjaña meshijo ba'e quea mete nee nee poaje'yo. Ecuea epeeji pojjeama siasiaje jama ba'a: “Coya aje oe ¿ae shai poeje ba'a? ¡Bacue, ojjañaja Edoe Mese Jesosa Quito poeje o'oya bo biaje! Oya oe nei quea ca'a nee nee, quea sohui poja nee nee. Quea jeajahua nee nee pea'ai. Esohuidojojji quea ca'a nee onijje poeje quea huiso nee nee” poaje cuana —Jesosa poanaje—. <sup>31</sup> Esohuidojojji quea ca'aa aquiana eshe'ana ai jayoyja mia cajo, eyaya esohuidojojji cuana huoojeaje'yo biacua, macua huasijje pea'ai ojjaña ecuea epeeji cuana jjequiya —Jesosa poanaje.

*Esohui acuijo, iquenajo, huohui canaje Jesosaa*  
(Macoso 13.18; Noca 21.29-33)

<sup>32</sup> Jesosaa huohui canaje pea esohui jama ba'a: —E'e, eyaya miquianaaya esohui ejjashahuabaqui meejji huohuije iquena acuijo. Eseyaya meshijo acui iña'vani ba majje eseya jama poani ba'a: “E'e nei, nayaja po'yonaje. Jjeya eshequiaja po pajea'yonaje”. <sup>33</sup> —Jamaya eshequi, ba'i quea misi, majameta eyajo jijijijioque'ani ba majje pea'ai quea bihui jjashahuabaquicue jama ba'a: “E'e, jjeya nei apoa poaje. ¡Jjeyahua nei esejaya Emeshi Mese nei Jesosa Quito poeje o'oyal!”

<sup>34</sup> —E'e jojo nei ojjaña ma pojja cuanajo ba'e cuana mano jeyojeyo'yo jjimahuaajo ojjaña apoa poaje'yo; eya ojjañaja Emeshi Mese oe nequije'yo. <sup>35</sup> E'e, aquiana eyajo nequi chama' poaje'yo; ojjaña meshi chama'yo tii poaje'yo pea'ai. Jamatii ecuea esohui oe epo'yoyji pojjeama; shajja'ajja tiitii caje'yo cuaa —Jesosa poanaje—. <sup>36</sup> ¿Ache shono shai jamaya poaje, ojjaña apoa poaje'yo? Dejja cuanaja ba jjima; esohuidojojji cuanaja ba jjima pea'ai; ecuea ehuhuijji pojjeama. Ecue Chijja eba ojaye nei. Ohuaye nei huohui caje'yo ojjaña apoa epo'yoyji —Jesosa poanaje.

*¡Jesosa poe o'oyajjijo jja'ishoa'ajjaqui anicue!*  
(Noca 17.26-30, 34-36)

<sup>37</sup> —Yahuajo nei nei dejja Noe bajjani nequia poa. Noe enequiahuaajo ojjaña cuana quea mimishi poa. Quijje eya ojjañaja Edoe Mese poe o'oyajo, ojjaña cuana quea mimishi poaje o'oya, yahuajo nei nei jayoyjaya poaje o'oya. <sup>38</sup> Yahuajo ojjaña meshi ohua jjimahuaajo jamatii dejja cuana ijja'ijjia ania poa. Ishi'ishi nequia poa pea'ai. Jjahuanaqui nequia poa. Jamaya poanaje Noe bishe ai yasijje dobiqui jjimahuaajo. <sup>39</sup> Ona ojjaña jjashahuabaqui jjima anijo ena quea quemo poa. Jjyehuequia poa; johui oquea poa; hui'i ca'ya poa. Jamaya poaje o'oya eya ojjañaja Edoe Mese epoe o'oya cuahuajo:

jjashahuabaquije cuana jama ba'a: "Jamatii ecuana quea pame nequi". Ojjaña ba jjima meshi ojjaña tii chama'yo tii poaje'yo. <sup>40</sup> E'e, e poe o'oyajo beca dejja nequije quejo. Oe dojosohuaqui caje'yo; pea jea canaje'yo. <sup>41</sup> Beca epona quecuapasha pashaqui, oe dojosohuaqui caje'yo; pea jea canaje'yo, Eyacuiñajjiya —Jesosa poanaje—. <sup>42</sup> ¡Jamajjeya jjashahuabaqui tiitii anicue! Ache pojjajo Emeshi Meseja epoe o'oyajji miquea ebajji pojjeama. <sup>43</sup> Jiquio jama poaje ba'a: Equi mese siipojji ache shono poeje poso jjabaquiani. Ojaya eba jojjemo ohuaya ishoa ca'anime, equi jaahuanajjiya. <sup>44</sup> Eya miquianajaya Edoe Mese ache pojjajo miquiana que poeje o'oya ebajo ese. Jamajjeya ¡jja'ishoa'ajjaqui anicue! —Jesosa poanaje.

*Pea echacomeejji quea pame nee poanaje*  
(Noca 12.41-48)

<sup>45</sup> —Ecuea esohui shajja'ajjacue echacomeejji cuanajo jama ba'a: Equi ai meseya poqui jjimahuaa echacomeejji iyaa canaje. Huoojea canaje: "¡Ecuea equi cuiñacue, miyaya! ¡Ecuea pea echacojji cuana oe bobiacue pea'ai! Quijje eya poeje o'oya".

<sup>46</sup> —Equi mese poe'yo majje ojjaña quea pame nee ba caña'ya poa; quea bihui nee poña'ya poa. Jamajjeya echacomeejji quea bihui nee poanaje. <sup>47</sup> Jamajjeya equi meseya echacomeejji quea pame huoojea caje'yo ojjaña ojaya aquiiana cuiña. <sup>48</sup> Pea echacomeejji siipojji ca ca jjashahuaba taiquiani jama ba'a: "Equi mese poquinaje quea huesha nee. Quijje nei nei poeje'yo". <sup>49</sup> Quea tecueya jjejojo ohuaya echacojji cuana cuia cani. Pea cuana nijje ishi'ishiani, huooani. Apoa pojjeama nequi. <sup>50</sup> Equi mese ache pojjajo epoeje'yo poso acani. Jamajjeya equi mese quehua poeje'yo. <sup>51</sup> Ojaya equi cuiñajji poani ehoo jaa baña'yo majje tecuea cañaje'yo. Jeacuayajea cañaje'yo ojjaña quea mimishi poani nijje. Jomajo quea nee nee poaje'yo tii tii; ese' ¡jjiayajjea caje'yo quea neeje —Jesosa poanaje—. Jiquio ecua equi meseya ojaya equi cuiñajji shajjama' tecueajea majje jeacuayajea caña'yonaje jayojja jamaya eyaya aje'yo ojjaña ejo ishoa'ajja, poe o'oya majje —Jesosa poanaje.

## 25

*Epona sho'i cuana poquinaje pea epona sho'i jjahueaquequi baa*

<sup>1</sup> —¡Pea esohui shajja'ajjacue Eyacuiñajji ojjaña Emeshi Mese oe nei poajejo! Jiquio jayojja jama poaje ba'a: Epona sho'i ahuema'ani ome miji pea'ai huisome, 10 poa. Ma jjahueaquequi baa cuaquijji dojo canaje. <sup>2</sup> Me oeje epona jjashahuabaquinaje. Pea me oeje jjashahuabaqui jjima. <sup>3</sup> Joya jjashahuabaqui jjimaa cuaquijji dojo canaje; jamatii esei dojo jjima ejijijji, de. <sup>4</sup> Peaa jjashahuabaqui majje cuaquijji dojo canaje esejji. Tahuoojo dojo canaje pea'ai ejijijji.

<sup>5</sup> —Epona sho'i cuana quea cojja jee mano po majje cahuinaje. Shacuima' nequi mecashono poeyanaje. <sup>6</sup> Jamajjeya mecashono pea equi yasijje poe'yo majje taaanaje; "Shacuima' nequi aje poe'yonaje. ¡Cua'a, baquicue!"

<sup>7</sup> —Taaaje shajja'ajja majje ojjaña epona sho'i cuana shequinaje. Ejijijji hui jeacuaya canaje. <sup>8</sup> Epona sho'i jjashahuabaqui jjima cuaa ma ejjashahuabaqui cuana huohui'ajja canaje jama ba'a: "¡Esei mo quiacue! Esei ecuanaja oe poanaje. Cuaquijji ecuanaja jiji'yo ajja".

<sup>9</sup> —Epona sho'i ojaya ejjashahuabaqui'yo cuaa saja'a canaje: "Miquea esei chama' eshojji. Ecuea ca ca jiquio che oe pojji. ¡Poquicue miya ma esei quia caqui yasijje; jocuama jjequicue!"

<sup>10</sup> —Jocuama o poquiahuaajo, shacuima' nequi poeyanaje. Ojjaña dobiqui'yonaje, joya apoa epo, o jjahueaquejji equi yasijje. Dobiqui majje esecue ca'a canaje. <sup>11</sup> Joya esei jjequiya poquiya cuana poe'yo majje esecue eca'a nequi ba caña'yonaje. Taaa aninaje: "¡Che esecue ca'apejocue!"

<sup>12</sup> —Shacuimaa eyiye dojjojo nequiya saja'a canaje: "Chojja, ecuea miya ba jjima" acanaje. Jamaya poanaje —Jesosa poanaje.

<sup>13</sup> —E'e —Jesosa poanaje oja epeeji cuana nijje—, jjamajjeya jja'ishoa'ajjaqui ani tiitiicue pea'ai! Ecuea epoe o'oyajji miquea ebajji pojjeama.

*Esohui ejjeshejjijo*  
(Noca 19.11-27)

<sup>14</sup> Jesosaa pea esohui eba meesahuajji huohui canaje: —Jjeya eyaya pea esohui huohuije, eya ojjañaja Emeshi Mese poe o'oyajo —Jesosa poanaje—. Jama poaje ba'a: Oe dejjaa, emeshi meseya quea huesha poqui jjimahuajo iyaa canaje ojaya echacojji cuana, ojjaña ojaya aquiana jaahuana meeji. <sup>15</sup> Majoya ohuaya oe echacojji quea jjashahuabaqui ja'a huasijje esodojjo me oeje, 5 huisome quea nahue nee nee quia canaje aquiana jjeshejji, quea huiso bejjo chichajji. Pea echacojji quea jjashahuabaqui ja'a pishana huasijje beca esodojjo quea nahue nee nee quia canaje aquiana jjeshejji, quea huiso bejjo chichajji. Pea echacojji beshahua nei jjashahuabaqui ajja huasijje oe esodojjo quea nahue nee nee quia canaje bejjo chichajji nisho. Esodojjo quia majje emeshi mese poquinaje.

<sup>16</sup> —Echacojji quea jjashahuabaqui ja'aa ojaya esodojjo me oeje huisome quea nahue quia canaje aquiana jjeshejji. Majoya chicha canaje ome pea'ai huisome. <sup>17</sup> Oya jayojjaya pea echacojjiya ojaya beca esodojjo quea nahue quia canaje aquiana jjeshejji. Majoya ohuaya chicha canaje ebeca pee pea'ai huisome esodojjo. <sup>18</sup> Pea echacojji aje oe jjashahuabaqui ajja poanaje. Ojaya emeshi meseja esodojjo oe nei quehuajje nei ohua canaje.

<sup>19</sup> —Quijje nei emeshi mese poe o'oyanaje ojaya echacojji cuana huasijje. Jjashahuabaquinaje jama ba'a: “¿Ae shai poani so'o echacojji cuana ecuea esodojjo?” Jamajjeya echacojji cuana iyaa majje huohui'ajja canaje: “¿Ache huiso esodojjo yani so'o jjeja?”

<sup>20</sup> —Echacojji esodojjo me oeje huisome jaahuanajji ojaya emeshi mese nijje jama poanaje ba'a: “Yahuajo nei miyaya me oeje esodojjo quia'yonaje eya. Ma'aje miquea. Pea me oeje huisomeya miquea poanaje. Ma'aje pea me oeje ecue chicha” poanaje echacojji.

<sup>21</sup> —Ojaya emeshi mese onijje quea bihui nee poanaje jama ba'a: “E'e de, miya echacojji quea pame nee. Yahuajo eyaya miya quianaje me oeje esodojjo. Miyaya maya quea pame nee chichanaje. Jamajjeya jjeya eyaya miya ecuea aquiana quea huiso jaahuana meeje'yo. Cua'a, jenijje anicue quea bihui nee!” emeshi mese poanaje quea bei nee.

<sup>22</sup> —Majoya pea echacojji poeyanaje, ma beca esodojjo yahuajo quia canaje. Ma echacojji jama poanaje ba'a: “Emeshi mese, yahuajo nei miquea esodojjo becanejjijji pea'ai quia'yonaje eya. Ma'aje miquea beca esodojjo. Pea esodojjo becanejjijji pea'ai ecue chicha yenaje. Ma'aje ecue chicha esodojjo pea'ai” echacojji poanaje.

<sup>23</sup> —Emeshi mese onijje quea bei miminaje jama ba'a: “E'e, de, miya echacojji quea pame nee. Yahuajo eyaya miya quianaje esodojjo becanejjijji pea'ai. Miyaya pea chichanaje quea pame nee. Jamajjeya jjeya eyaya miya ecuea aquiana quea huiso jaahuana meeje'yo. Cua'a, jenijje anicue quea bihui nee!” emeshi mese poanaje.

<sup>24</sup> —Majoya pea echacojji poeyanaje, ma esodojjo oe nei quia canaje. Emeshi mese huohui canaje ohuaya jama ba'a: “Emeshi mese, ecuea eba miya quenequene cuajiani. Miyaya miquea echacojji chaco meeña sosema'. Quea dejja taija jjejojo miquea aquiana quea huiso yani” jama posoya acanaje echacojjiya. <sup>25</sup> “Jamajjeya eya quea mete poanaje. Miquea esodojjo emoquehua aninaje onaa esii ca poani jjejojo. Ma'aje miquea bejjo, ma miyaya quianaje huisome tiya” echacojji poanaje.

<sup>26</sup> —Ojaya emeshi meseya oya acanaje: “Miya echacojji quea mimishi, quea huea. Miya quea jjashahuabaqui tai poanaje jama ba'a: —Ecuea echaco sosema' poanaje. Ecuea emeshi mese quea dejja tai. Jamajjeya quea huiso ojaya aquiana yani —miya poanaje. Siajje miya poani. Miquea ejjashahuaba taiquijji jayojja jama eyaya miya aje. <sup>27</sup> ¿Apiojji acuae miyaya ecuea ejjeshejji mi quianaje bejjo jaajji yasijje? Quijje pishana ohuaya eya quea huiso quia ca'yo queaye”.

<sup>28</sup> —Emeshi mese ma echacojji nijje quea tecue poanijo pea cuana huoojea canaje jama ba'a: “Echacojji quea hueaa jjejojo ecuea esodojjo mi chicha canaje. ¡Maya esodojjo oe nei jjeshe majje quia'yocue pea echacojji huea'ama huasijje, maya ecuea esodojjo me oeje ecue quia poanaje yasijje quiacue! <sup>29</sup> E'e, joya huea'ama poani aquiana cuana quia caje cuaa. Dejja aema' quea hueaja aquiana ojjaña jjeshe'yo majje dojo caje'yo cuaa. <sup>30</sup> Jiquio echacojji cajaa ajeaje'yo; quea huea coma. Enijje oya enequijji pojjeama. Huoojeacuayajeaje'yo. Oya quea yeno nee nee poaje'yo. Quea nee nee pea'ai poaje'yo” emeshi mese poanaje —jamaya Jesusaa acanaje.

E'e, jiquio Jesusaja ejjashahuabaqui'yojji jama ba'a: Poe o'oya majje Jesusaa ojaya epeeji quea jjashahuabaqui ja'a quea pame ba'e mee caje'yo onijje eyajo. Onijje ona huoojea'yojji po mee caje'yo. Pea echacojji quea huea ba majje ca ca cajaa acaje'yo. Quea nee nee poaje'yo oya cuana.

*Esohui Jesosa Quitoja ojjañaja Edoe Meseja epoe o'oyajjijo*

<sup>31</sup> Jesusaa huohui canaje pea'ai: —Eya poe o'oya majje quea ca'a poaje'yo. Ojjaña huoojea'yojji poaje'yo. Ojjaña esohuidojojji cuana enijje poeje'yo. Majoya eya ba'eso-huaqui'yo majje eyahuasijje, jocuama eya nequije'yo, Emeshi Mese nei. <sup>32</sup> Ojjaña cuana e que jjachichaqui meeje'yo. Majoya eyaya ñajjajja cuiñajji jayojja jama aje jama ba'a: Ñajjajja cuiñajjiya ñajjajja cuana, chivo cuana nequiashiña cani. <sup>33</sup> Ñajjajja oo pana nequiashiña cani ebianeijje. Chivo ca ca huapa nequia acani, shanijje. <sup>34</sup> Ñajjajja cuiñajji jayojja jama eyaya, ojjañaja Emeshi Meseja ojjaña dejja cuana nequishiñaje'yo. Ecuea epeeji quea pame nee ebianeijje nequijaje'yo. Oya cuana aje'yo jama ba'a: “Miquianaya ecue Chijja bacua cuana e'e jojo nei poanaje, ojaya huapa pojjeama. Jamajjeya onijje nequi tiitijje'yo. Eyacuñajji jamaya jjashahuabaqui'ya poa yahuajo nei nei, meshi pana jjimahuajo. <sup>35</sup> Jamaya poaje'yo jjeya miquianajo, miya quea pame nee nee poanajejo. E'e, yahuajo eya quea shoe poajo, eya bobi quianaje miyaya. Eya quea naba taja poajo, ena quianaje miyaya. Eya miquianajaya ba jjima poanaje. Jamatii miquea equi yasijje dobiqui meenaje. <sup>36</sup> Eya daquima' poajo, miquianaaya daqui huosho meenaje. E emanojaajo, ejeanobiajaajo pea'ai, miquianaya poeyanaje enijje jjapeequiya” jamaya eyaya aje'yo —Jesusa poanaje.

<sup>37</sup> —Majoya dejja pame cuaa eya huohui'ajja caje jama ba'a: “¿Ache shono acuae ecuaaya miya bobianaje, miya quea shoe poanajejo? ¿Ache shono ena quianaje miya quea naba taja poanajejo? <sup>38</sup> ¿A'a miya ecuanaja equi yasijje dobi meenaje? ¿A'a daqui huosho meenaje miya daquimajo? ¿Ache shono shai ecuaaya jamaya anaje? <sup>39</sup> Mi emanojaajo, ejeanobiajaajo pea'ai, ¿a'a ecuanaja mi que poeyanaje? ¿Ache shono acuae jja jama ecuaaya mi anaje so'o?” Jamaya dejja pame cuaa quijje huohui'ajja caje eya eyajo.

<sup>40</sup> —Jamajjeya eyaya, Emeshi Mese neiya saja'aje'yo quijje eyajo jama ba'a: “Miyaya ecuea huapa pojjeama aema' yahuajo jaahuananajejo, eya jaahuananaje. Jamajjeya ecuea eba miquianaya ecuea epeeji e'e jojo nei poanaje. Ecuea ejjashahuabaqui'yojji jayojja jama ca ca miyaya a'yonaje”.

<sup>41</sup> —Mayoja eyaya, Emeshi Mese neiya dejja tai cuana shanijje nequi tecueaje'yo jama ba'a: “¡Poquicue miya! Cajaa'yo ca mi ca ecua. Edosiquiana etii Satanasa, esahua cuana pea'ai cuaqui yasijje poquije'yo. Miya cuana pea'ai anije'yo cuaquijo tii. <sup>42</sup> Yahuajo eya quea shoe, bobia jjima poanaje miquea. Eya quea naba taja, ena quia jjima poanaje. <sup>43</sup> Eya miquea eba pojjeama, miquea equi yasijje dobi mee jjima poanaje. Eya daquima', daqui huosho mee jjima poanaje miquea. E emanojaajo, ejeanobiajaajo pea'ai miya poe jjima poanaje e jaahuanaa” jamaya eyaya aje dejja mimishi cuana —Jesusa poanaje.

<sup>44</sup> —Majoya dejja mimishi cuaa eya huohui'ajja caje jama ba'a: “¿Ache shono acuae miya bobia jjima apoa? ¿Ena cuana quia jjima apoa? ¿A'a ecuanaya miya ecuanaja equi yasijje dobi mee jjima apoa? ¿A'a daquimajo, ecuanaya daqui huosho mee jjima apoa? ¿A'a mi emanojaajo, ejeanobiajaajo pea'ai, a'a miya ecuanaja jaahuana jjima apoa? ¿Ache shono shai, de?” dejja mimishi cuaa huohui'ajja caje —Jesusa poanaje—. <sup>45</sup> Majoya eyaya,

Emeshi Mese neiya saja'aje'yo jama ba'a: “Ecuea huapa pojjeama cuanajje jaahuana jjima. Jamajjeya miqianaaya eya cajaa a'yonaje pea'ai”.

<sup>46</sup> —Majoya eyaya, Emeshi Mese neiya dejja quea mimishi cuana quea huesha nee huoojeaje'yo cuaqui yasijje edobiqui'yoyji. Quea nee nee po tiitiije'yo. Dejja pame cuana ebianeijje nequi ca ca ba'e tiitii meeje'yo Eyacuiñajji nijje —jamaya huohui canaje Jesusaa.

## 26

*Jodio etii cuana jjashahuabaquinaje Jesosa quecua'yoyji*  
(Macoso 14.1-2; Noca 22.1-2; Huani 11.45-53)

<sup>1</sup> Majoya Jesusaa o shajja'ajjajji cuana jjabahuejjaqui mee canaje. Pea esohui huohui canaje jama ba'a: <sup>2</sup> —Quijje pishana, becanejjijji pea'ai cahuime po majje, Jodio cuana jjashahuabaquije o'oya etiiquianaja bacua cuana yahuaajo Ejitojo mano'yo jjima poajo. Jamajjeya ojee ijia'ijjiaje o'oya quea bei nee. E'e, yahuaajo nei nei Ejito meshijo ani Jodioja ebacua ejja cuia'yo jjima aca poa esohuidojojjiya. Ma shejo ijia jjimahuajo Jodio cuaa eya iña majje dejja quea mase yasijje quia caje'yo equecua'yoyji. Acui ecueata'aapeejo me caca majje ba'ehuanasohuajea caje'yo —Jesusa poanaje.

<sup>3</sup> Majoya Eyacuiñajji nijje emimijji etii cuana, Jodio dejja jaahuanajji cuana pea'ai ojee jjachichaquinaje Eyacuiñajji nijje emimijji etii equi aijo, Caipa bajjanija equijo. <sup>4</sup> Caipa jjashahuaba taiquinaje pea cuana huoojeajji Jesosa iñajji, quijje equecua'yoyji. <sup>5</sup> Jodio etii cuana ojee miminaje jama ba'a: —Jesusa quehua neijje iñacue ojjaña Jodio cuana jjachichaqui jjimahuajo, ojee ijia'ijjia jjimahuajo! ¡Oya iñacue jjeyahua nei, de! Quijje pishana ojjaña ojee ijia'ijjia anijo, ecuanajaya Jesosa e'iñajji pojjeama. Chojja. Ojjaña Jodio cuana quea quene nee nee ecuaña nijje po chana', Jesosa onajaya quea nahue nee equecua mee'yoyji. Quea shajjaquijjo po chana' pea'ai —jamaya acanaje Jodio etii cuaa.

*Jesosa Betaniajo ani sapa sha canaje shiyeshiyeya eponaa*  
(Macoso 14.3-9; Huani 12.1-8)

<sup>6</sup> Jesosa Betaniajo aninaje dejja Simoni bajjanija equijo. Yahuaajo nei Simoni quea mano nee nee batata epo'yo poa, ma dejja cuaa jjajeaqui mee'yo jjima acani. Jesusaa oya yahuaajo huaquia mee ca'yonaje, jjajeaqui mee ca'yonaje. Simonija equijo Jesosa e'anioque aninaje. Ijia'ijjia aninaje bobi ijiajji pejejo. <sup>7</sup> Jesosa ijia'ijjia anijo, oe epona poe'yonaje o que. Ohuaya tahuoo quea nahue neejo shiyeshiye ye canaje Jesosa huojja shajji. Huojja sha canaje. <sup>8</sup> Ba majje Jesosa shajja'ajjajji cuaa epona tecuea canaje: —¿Apiojji acuae miyaya shiyeshiyeya shaña so'o? <sup>9</sup> ¿Sha jjima yajjijo poso ca mi ca oe shiyeshiye dojo meenaje esodojjo quea huiso sosejje? E'e, aema' cuana huasijje esodojjo equiajji poso —Jesusa shajja'ajjajji cuana poanaje.

<sup>10</sup> Jesusaa oya cuana shajja'ajja majje huohui canaje: —¿Apiojji acuaeya epona tecueaña so'o? E'e, eya ohuaya huojja sha canaje. Jamaya quea pame nee. <sup>11</sup> Aema' cuana minijje po tiitiije'yo. ¡Oya cuana jaahuana'yocue quijje pea'ai! Eya ca ca nequi tiitii ajja minijje. <sup>12</sup> Eya huojja sha cajo epona jjashahuabaquinaje jama ba'a: “Jesusa mano'yo jjimahuajo eyaya oya huojja shaña shiyeshiyeya, onaja mojea jjimahua shaña” poanaje epona —Jesusaa acanaje—. <sup>13</sup> Jamajjeya quijje ojjaña meshijo ecuea esohui huohui caje. Jiquio eponajo huohui caje pea'ai jama ba'a: “Oe eponaa Jesosa huojja sha ca poa shiyeshiyeya, quea jeajojo”. Jiquio epona pajea'yo ajja tii tii, e'e jojo nei —jamaya Jesusaa acanaje.

*Jodasaa onaya iña meesahua canaje Jesosa*  
(Macoso 14.10-11; Noca 22.3-6)

<sup>14</sup> Yaninaje quea huiso Jesosa shajja'ajjajji cuana, 12. Oe nei Jodasa Isicaniote bajjani poquinaje Eyacuiñajji nijje emimijji etii cuana huasijje. <sup>15</sup> Miminaje jama ba'a: —Eyaya miya Jesosa iña mee sahuaje. ¿Ache sose huiso acuae mo ya oe sosequiaje'yo so'o?

<sup>16</sup> Onaaya saja'a canaje jama ba'a: —Quea huiso, 30 esodojjo quea nahue nee sosequiaje'yo miya.

Jamajjeya Jodasa jjashahuaba neinei qui aninaje achajja iña meeme aje so'o cuana: —Caba'ajjaquisahua —poanaje.

*Jesosaa o shajja'ajjajji cuana bobi ijia mee canaje*

*(Macoso 14.12-25; Noca 22.7-23; Huani 13.21-30; 1 Conitio 11.23-25)*

<sup>17</sup> Jodio cuana quea bihui ojee ijia'ijjianaje yohua shejo ba'a esohuidojojijja yahuajo nei etiiquianaja bacua cuana cuia'yo jjima ñajjajja na' esecuejo ecuipepa ba majje shejo. Pahui quea ca'a eshejee meeji chama' ijia ca poa. Ebionei epojja e'ijia'ijjajjijo, Jesosa que poe majje o shajja'ajjajji cuaa huohui'ajja canaje jama ba'a: —Jesosa, ¿ache equijo acuae seya pahui ca'a ijiaje so'o? ¿Ecuana huoojeacue aqui ana iyajea, miquiana ishoajji!

<sup>18</sup> Jesosaa huohui canaje jama ba'a: —¡Poquicue miya cuiñajji yasijje! ¡Jomajo ecuea epeeji baquicue! Onijje mimicue jama ba'a: “Ecuana sohui huohuijji jama poanaje ba'a: —E mano'yajo aje apoa poaje. Miquea equijo eyaya e shajja'ajjajji cuana nijjeya pahui ca'a ijiaje'yo, esohuidojojijja etiiquianaja bacua eja cuana cuia'yo jjima poa shejo” acue —Jesosaa huohui canaje.

<sup>19</sup> Jamajjeya o shajja'ajjajji cuana ojaya ehoojea'yo jayojjaya jama poanaje. Bobi iyajea canaje pahui ca'a ijiajji.

<sup>20</sup> Majoya sinecua neijo Jesosa o shajja'ajjajji cuana nijje anioquenaje bobi ijiajji pejejo ijia'ijjiaa. <sup>21</sup> Ojee ijia'ijjia'anijo Jesosa jama poanaje ba'a: —E'e jojo nei jiquiojo ani oe dejja poquije ona jjequiya e iña'yojji. Ohuaya eya huohui caje cuana.

<sup>22</sup> Eshajja'ajjajji cuana quea yeno nee nee poanaje. Pea mimiajo pea poanaje jama ba'a: —Ecuea Emeshi Mese, eya ca ca o jayojja pojjeama, e'e jojo nei.

Jamaya ojjaña miminaje. <sup>23</sup> Majoya Jesosa onijje miminaje jama ba'a: —Oe dejjaa e shajja'ajjajjiya joya enijje pahui shapeshi po'aniya eya onaya cuana iña mee caje'yo.

<sup>24</sup> E'e, yahuajo nei Eyacuiñajjija esohui tehueji cuaa esohui tehue ca poa jama ba'a: “Quijje oe dejjaa Eyacuiñajjija huoojea'yo ojjaña jaahuanajji onaya cuana iña meesahua caje'yo equecua'yojji”. Jamajjeya ma dejja quijje quea yeno poaje. Jjashahuabaquije jama ba'a: “¿Apiojji shai eya ecue naeya mejo ca poa? Eya ca ca nequi sa po ajja. Ecuea ejjashahuaba taiquijjijo mano'yo sa poani” oya poaje. Quijje oya quea nee nee po tiitiije'yo —Jesosa poanaje.

<sup>25</sup> Majoya Jodasa Jesosa nijje miminaje jama ba'a: —Emeshi Mese, eya ca ca o jayojja pojjeama. Eyaya miya onaya e'ña meesahuajji pojjeama —poanaje.

Jesosa onijje miminaje: —E'e, Jodasa, miya jama quea tai poaje, e'e jojo nei —Jesosa poanaje.

<sup>26</sup> Majoya ojee ijia'ijjia'anijo tii Jesosaa pahui ca'a jjeshe canaje. Eyacuiñajji bihuia majje, pahui mijisisi majje quia canaje o shajja'ajjajji cuana. Jama huohuime acanaje Jesosaa ba'a: —¡Ijjiacue! Jiquio ecuea eyami —poanaje.

<sup>27</sup> Pahui ijia majje caneco jjeshe canaje, Jesosaa. Eyacuiñajji bihuia majje quia canaje ojjaña o shajja'ajjajji cuana. —¡Ishicue! Jiquio ecuea ena'. <sup>28</sup> Ecuea ena' cuayaquijajo eya manojje'yo. Jamajjeya eyaya Eyacuiñajjija esohui eyacua jayojjaya aje. E'e, ojjaña ecuea epeeji mimishi cuana cuijeaje'yo. <sup>29</sup> Jjeya eyaya jiquio jjonojjajja na, uva na e'ishi o'oyajji pojjeama miquiana nijje; eya manojje'yo. Quijje nei poe o'oya majje eyaya jiquio ishije o'oya miquiana nijje. E'e, eya poe o'oyajo ecue Chiiya eya ojjaña huoojea'yojji po mee caje'yo. Ojjaña eya shajja'ajja caje'yo —jamaya Jesosaa acanaje.

*Jesosa miminaje Peno nijje*

*(Macoso 14.26-31; Noca 22.31-34; Huani 13.36-38)*

<sup>30</sup> Majoya ojee sohuicuaya majje poquinaje eyiyo huasijje Onimo yiye yasijje.

<sup>31</sup> Majoya Jesosa o shajja'ajjajji cuana nijje miminaje jama ba'a: —Jiquio mecayje ojjaña miquianaya enijje jjapeequi pajaje'yo. E'e, yahuajo Eyacuiñajjija esohui tehueji cuaa tehue ca poa ejo: Eya ñajjajja cuiñajji jayojja jama poaje. E mano'yajo ecuea epeeji cuana

ñajjajja cuana jayojja jama poaje; jjajeaajajeaquinanaje'yo. Etehue'yo yahuajo nei nei jama poa ba'a:

“Quijje eyaya ñajjajja cuiñajji jaahuana neinei ajja. Jamajjeya onaaya oya cuia caje'yo. Ñajjajja cuiñajji chamajo, ñajjajja cuana jjajeaajajeaquinanaje'yo”. Jamaya aca poa yahuajo nei nei —Jesosa poanaje—. <sup>32</sup> Jamatii, shequi o'oya majje eya poquije Janinea meshi yasijje. Jomajo aje mi poeyajo ishoañaquije —Jesosa poanaje.

<sup>33</sup> Penohua Jesosa jama acanaje ba'a: —E'e pojja'a pea cuana minijje jjapee tiitiqui'yo ajja. Eya ca ca pea jayojja jama pojjeama. Eya jjapee tiitiquije'yo minijje —Peno poanaje.

<sup>34</sup> Jesosaa Peno jama acanaje ba'a: —Eyaya e'e jojo nei miya huohuiaña Peno, jiquio mecajje tii cachina yahue pea beca peejjima taaame po jjimahuajo, pea beca peejjima huohui'ajjame amajje miya ejo poaje jama ba'a: “Chojja, ¡ecuea Jesosa ba jjima nei nei!” miyaya saja'ame aje quea meteya jjejojo —Jesosaa Peno acanaje.

<sup>35</sup> —Chojja, Jesosa —Peno poanaje—. E'e pojja'a eya minijje jjapeequianijo, pea cuaa eya cuiajea caje'yo. Jamatii ¡ecuea ca mi ca epajea'yoyji pojjeama!

Oya jayojja pea cuaa jama acanaje pea'ai ba'a: —E'e Jesosa, ¡ecuanajaya ca mi ca epajea'yoyji pojjeama tii!

*Jetesemani quejo Jesosa miminaje oja Chii nijje*  
(Macoso 14.32-42; Noca 22.39-46)

<sup>36</sup> Majoya Jesosa o shajja'ajjajji cuana nijje Jetesemani que yasijje poquinaje. Jesosa jama poanaje ba'a: —¡Anioquecue jiquiojo tii! Jocuama eya poquije ecue Chii nijje mimiya.

<sup>37</sup> Jesosaa Peno, Huani, Satiaco pea'ai dojo canaje jocuama, ma Semeneoja bacua ejja cuana bajjani Huani, Satiaco pea'ai. Jesosa jjashahuabaquinaje quea yeno nee nee.

<sup>38</sup> Jamajjeya onijje jama poanaje ba'a: —Eya quea yeno nee nee, emano ca'yoyji jayojja. ¡Anioquecue enijje; a'a cahuijji! —Jesosa poanaje.

<sup>39</sup> Jesosa cuama pishana ani poqui majje ecui'oshajjajo nequinaje. Oja Chii nijje miminaje jama ba'a: —Ecue Chii, miquea ejjashahuabaqui'yoyji jayojja jama aje'yo eyaya. Miyaya eya huoojeanaje dejjaja mimishi cuanajo mano'yohua. Quea camaja nee nee ejo. ¿A'a miyaya che onaaya eya quecua mee'yo jjima aje so'o? ¿A'a onaaya eya iña mee'yo jjima aje'yo? Jamatii ¡miquea ejjashahuabaqui'yoyji jayojja jama acue! ¡Ecuea ejjashahuabaqui'yoyji jayojja jama a'a ajji! —Jesosa jamaya poanaje.

<sup>40</sup> Majoya oya poqui o'oyanaje o shajja'ajjajji cuana que. Ba cañaqui'yonaje cahuijaa. Tecue'ama Peno nijje miminaje jama ba'a: —¿A'a mi cahuijaa? ¿A'a che enijje cahui jjima nequi jjima so'o? <sup>41</sup> ¡A'a cahuijji! ¡Eyacuiñajji nijje mimi majamajacue! Jamajoya pea cuaa miya quea mimishi epo mee'yoyji pojjeama. E'e, miquianaya enijje jjapeequi sa poani e'e jojo nei. Jamatii miya ca'a'ama; quea mimishi poaje o'oya pojja'a —Jesosa poanaje.

<sup>42</sup> Majoya Jesosa poqui o'oyanaje jocuama pishana oja Chii nijje mimi o'oyaa. Mimi o'oyanaje jama ba'a: —Ecue Chii, eya ojjañaja mimishijo mano'yo ajjajo, ¿a'a onajaya mimishi ecuijea'yoyji pojjeama poaje'yo? Jamajjeya ¡miquea ejjashahuabaqui'yoyji jayojja jama acue! —Jesosa poanaje.

<sup>43</sup> Oja Chii nijje mimi'yo majje Jesosa poqui o'oyanaje o shajja'ajjajji cuana que. Oya cuana quea cojja jee mano poanaje; cahui o'oyanaje. Jamatii Jesosaa onijje mimi jjima; shequi mee'yo jjima acanaje. <sup>44</sup> Ona jeana o'oya majje jocuama pishana poqui o'oyanaje Jesosa, oja Chii nijje mimi o'oyaa. Oya jayojja mimi o'oyame poanaje. <sup>45</sup> Mimi o'oya majje poe o'oyanaje o shajja'ajjajji cuana que. Onijje mimi o'oyanaje: —¿A'a mi cahuijaa tii? ¿Jomishocajaa pojja'a ca mi ca oe? Jjeyahua nei dejjaa eya onaya iña meesahua caje'yo. <sup>46</sup> ¡Cua'a, jjeya nei ecuea epeeji nisho poeje'yo! Joya aje poeje ba'a.

*Jesosa iña canaje*  
(Macoso 14.43-50; Noca 22.47-53; Huani 18.2-11)

<sup>47</sup> Jesosa mimianijo tii, Jodasa o que poeyanaje, ma eshajja'ajjajji cuana sohuihuohui poequi yasijje. Oya aje oe Jesosaja epeeji pea'ai poanaje; pea 11 nijje nequinaje tii.

Quea huiso nee nee dejja nijje Jodasa poeyanaje; yohuajji poeyanaje acuijji, baajji, mejejji pea'ai poeyanaje. Jodio etii cuaa, Eyacuiñajji nijje emimijji etiiya pea'ai ojjaña huoojea canaje Jesosa iña. <sup>48</sup> Jodasaa, Jesosa e'iña meejjiya yahuajo jama huohuime aca poa ba'a: —¡Bacue oe! Eyaya oe dejja ba majje cuiapashi nishoje. ¡Majoya oe miquianaaya iñacue!

<sup>49</sup> Jamajjeya Jodasa Jesosa que jjanequichipiquinaje: —¡A'a mi ecuea Emeshi Mese nei jiquio! —amajje cuiapashi nisho canaje.

<sup>50</sup> Jesusaa acanaje: —Ecuea epeeji Jodasa, ¿ajeo ami poeyanaje? —Jesosa poanaje.

Pea dejja cuaa ba majje, Jesosa que poe majje iña canaje edojjji. <sup>51</sup> Jesosa iña cajo, oja epeejiya onijje nequiya baa iña canaje. Onaja sapa jajapojojeajji nisho shajja jajasejja canaje, Eyacuiñajji nijje emimijji etiiya echacojji poanija eshajja.

<sup>52</sup> —Chojja. ¡A'a jja oe jajajji! —Jesusaa oya huohui canaje—. ¡Baa oe ejee yasijje nequianobia'yocue! Ojjaña jjajajaquiani manojeyo yacua ca'yajje. <sup>53</sup> ¿A'a miquea eba pojjeama eyaya ecue Chii ehuhui jojjemo ohuaya esohuidojojji ache huiso nei nei huoojea came jjeyahua nei, e jaahuanaa? <sup>54</sup> Jamatii eya jama po ajja. E'e, yahuajo nei Eyacuiñajji esohui etehue'yo jama tehueme ejo aca poa ba'a: “Onaaya iña mee majje dojo caje emano mee'yojji”. Jamaya ejo yahuajo nei tehue ca poa. Jamaya eya acaje'yo cuaa jjeya —Jesosa poanaje.

<sup>55</sup> Jamajjeya Jesusaa ojjaña dejja ejjachichaqui'yo nequi yasijje huohui canaje: —¿Apiojji miya poeyanaje baajji, acuijji, mejejji pea'ai e iña? ¿A'a cuae jja iña siipojji so'o? Ojjaña pojajjo eya ojjaña nijje esohui huohuijji po nequinaje Eyacuiñajji equijo. Jamatii eya miquianajaya iña jjima poanaje. ¿Apiojji miquianaya mecajje poeyanaje e iña? <sup>56</sup> Jamatii jamaya nequiana poani. Miquianaaya ca mi ca oe Eyacuiñajji esohui huohuijji etehue'yo yahuajo nei nei miquianajo jayojja jama quea tai aña.

Majoya o shajja'ajjajji cuana cuajicujinanajje; Jesosa jeajea canananaje.

#### *Jodio etiiya Jesosa cuia mee canaje*

*(Macoso 14.53-65; Noca 22.54-55, 63-71; Huani 18.12-14, 19-24)*

<sup>57</sup> Jamajjeya joya Jesosa iñajji cuaa oya dojo canaje Eyacuiñajji nijje emimijji etiiya equi yasijje, Caipaja equi yasijje. Jocuama Jodio cuana jjachichaquinaje, Jodio etii cuana, Moisesija etehue'yo huohuijji poani pea'ai. <sup>58</sup> Penohua ca ca equijje aca poquinaje Jesosa onaa dojo caje. Caipaja equi yasijje Peno nequiñaquinaje. Dobiquinaje epeeyi nequi yasijje, sohuinana cuana nijje anioquenaje ae onaa Jesosa acaje ebajji.

<sup>59</sup> Eyacuiñajji nijje emimijji etii, ojjaña Jodio etii cuana, Jodio esohui huohuijji poani pea'aiya ojee mimimiminaje Jesusajo, ojjaña ejjachichaqui nequiya o quecua'yo sa acani. Jamajjeya sa'ajja canaje dejja cuana Jesosa huohuijji nisho, Shomano emeshi mese Pinato bajjani yasijje dojo majje Jesosa huohuijji nisho: —Jesosa ca ca jama acanaje ba'a —sijje yajji.

<sup>60</sup> Quea huiso dejjaa Jesosa sijje acanaje. Jamatii peaa sijje'a, peaa sijje'a acanaje Jesusajo. Chama' beca oya jayojja mimime epojji Jesosa mano mee'yojji. <sup>61</sup> Quijje yejje nei beca dejja poeyanaje e'e jojo nei jayojja emimijji. Jama poanaje ba'a: —Eyaya oya shajja'ajjanaje. Jama poanaje Jesosa ba'a: “Eyaya Eyacuiñajji equi jeabichaje'yo. Jeabichaje'yo majje pea equi iyaje'yo pea beca peejjima cahuime”.

<sup>62</sup> Ma shajja'ajja majje Eyacuiñajji nijje emimijji etiiya nequisohua majje Jesosa huohui'ajja canaje: —¿A'a pa miya jama poanaje? ¿Jesosa, a'a acuaeya dejja cuana miyaya saja'aje'yo so'o?

Jamatii Jesosa jjamimisaja'aqui ajja poanaje.

<sup>63</sup> Jamajjeya Eyacuiñajji nijje emimijji etiiya huohui neinei canaje: —¡Eyacuiñajji eshe nequi tiya eseya ba canijo, ecua huohuicue e'e nei! ¿A'a acuae miya Eyacuiñajji Bacua Ejja nei, oja huoojea'yo ojjaña jaahuanajji? ¡Huohuicue mo oe!

<sup>64</sup> Jamajjeya Jesusaa huohui canaje: —E'e, joya ecua miya mimiani jayojjaya eya. Cuanaya eyaya miya e'e nei huohuiaña: Quijje miyaya eya baje'yo ecue Chii nijje ebianeijje ani. Oya quea ca'a nee nee enequi tii tii. Eya miquianaaya baje pea'ai poeje o'oya; bo biajje poeje'yo —Jesosa poanaje.



<sup>65</sup> Shajja'ajja majje Jodio etii quea quene nee nee poanaje. Quea quene nee nee po majje ojaya daqui, oja huosho ba'e daqui isajea canaje. Jodio dejjaa jamaya oja daqui isajea cani quea quene po majje. Ojjaña cuana huohui canaje jama ba'a: —De, ¡pea dejja a'a iyaajji Jesosa huohuijji! Jamatii. ¡Oya Jesosa mimiqui Eyacuiñajjija Bacua Ejja miame! ¿A'a acuae mi quiaaya shajja'ajjanaje oja sohui? Jamajjeya ¿yajja acuae seya aje so'o, de, Jesosa?

<sup>66</sup> —¡Oya oe manojea mee'yocue; quea tai ca esohui acanaje! —jamaya acanaje Jodio dejja cuaa, Jesosa Eyacuiñajjija Bacua Ejja pojjeama posojo.

<sup>67</sup> Majoya aje oe Jodio dejjaa Jesosa cojja cuichojea canaje. Ejjachichaqui nequiya cuia canaje pea'ai emeya. <sup>68</sup> Cuia majje huohui'ajja canaje: —¡Miya Eyacuiñajjija huoojea nei jjabaqui majje jja ca oe huohui pocuel! ¿Aya acuae mi cuia canaje so'o? —acanaje cuaa.

*Penohua sijje acanaje Jesosa oja ba jjima nisho acanaje*

*(Macoso 14.66-72; Noca 22.56-62; Huani 18.15-18, 25-27)*

<sup>69</sup> Ojjaña cuaa napa caqui Penohua ba canaje Jesosa; esecuejo sohuinano pejjejo e'anioque aniya ba ca'arinaje. Oe echacojjiya ahuema'aniya Peno ba majje huohui'ajja canaje: —¡Miya ca jja mi ca oe Jesosa nijje aninaje Janinea meshijo!

Eponaa huohui cajje ojjaña cuaa Peno baja canaje. Jamajje Peno metenaje. Jama saja'ame acanaje ba'a: <sup>70</sup> —¡Chojja, ecuea oya ba jjima! ¿Ajeo acuae mi mimiani? —Peno sijje poanaje. <sup>71</sup> Majoya Peno epeeyijo nequi cuayaquinaje quea mete jjejojo. Pea epona echacojjiya Peno ba canaje esecuejo nequi. Ohuaya ojjaña dejja cuana huohui canaje: —E'e jojo nei oya Jesosa nijje aninaje, ma Nasanenajo ba'e nijje —poanaje.

<sup>72</sup> —Chojja, ecuea oya ba jjima nei nei. Eyacuiñajjija eba eya e'e jojo nei mimiani —Penohua saja'a canaje.

<sup>73</sup> Quijje pishana beca cuana Peno que ojee nequi jjanequichipiquinaje. Jama poanaje ba'a: —E'e nei miya Jesosaja epeejji pea'ai pea cuana nijje. Jamaya miquea emimi, pea Janinea meshijo ba'e jayojja jama miya mimiani, de —poanaje.

<sup>74</sup> Ojaya esohui shajja'ajja majje Peno quea mete nee nee poanaje; ona nijje mimi-jajinaje: —¡Sijje miya poani! Jiquio dejja ecuea ba jjima. Eya e'e jojo nei pojjeama poani jójjemmo Eyacuiñajjiya eya mano mee ca'yome —Peno poanaje. Jamatii Peno sijje poanaje.

Peno jamaya poajo, cachina yahue taaanaje. <sup>75</sup> Cachina taaajo Penohua shahuaba ca'yonaje ma Jesosaa oma mecajje o jama acanaje jama ba'a: —Peno, cachina yahue taaa jjimahuajo miyaya eya ba jjima nei nei nisho aje'yo, ebeca pee peejjima huohuime aje'yo —jamaya Jesosaa Peno acanaje.

Jamajjeya jjashahuabaqui majje Peno quea yeno nee nee poanaje; pa neinei poqui'y-onaje Jesosa ba jjima nisho epo jjejojo.

## 27

*Jesosa emeshi mese Pinato huasijje dojo canaje*

*(Macoso 15.1; Noca 23.1-2; Huani 18.28-32)*

<sup>1</sup> Mecajjeahua ojjaña Jodio etii cuana, Eyacuiñajji nijje emimijji etii cuana ojee miminaje Jesosajo: —¿Achajja amajje acuae seya Jesosa quecua meeje'yo so'o? Cua'a, ¡ejjaquecua meequiqui! —poanaje.

<sup>2</sup> Jamajjeya Jesosa me jeyo majje dojo canaje Shomano emeshi mese Pinato bajjani yasijje.

*Jodasa jjanaayisibijeaqui'yonaje Jesosa quecua mee'yo majje quea yeno jjejojo*

*(Hecho 1.18-19)*

<sup>3</sup> Jamajjeya Jodasa, ma Jesosa iña meesahuajji epo Jesosa quecua caje'yo ba majje quea yeno nee nee poanaje. Poquicuajinaje Jodio etii yasijje, Eyacuiñajji nijje emimijji etii yasijje pea'ai. <sup>4</sup> Huohui cañaquinaje: —Eya Jesosa iña mee majje quea mimishi poanaje;

oya ca ca Jesosa mase'ama nei nei poanaje, mimishi'ama nei. ¡Ma'aje miquea esodojjo, 30, ma miyaya eya quianaje Jesosa iña meesahua sosejje!

—E'e pojja'a, de. E'e jamatii, Jesosa caquecuajea cahua —Jodio etiiya saja'a canaje—. Miquea mimishijo ca jja mi ca jjashahuabaquiani, de —poanaje.

<sup>5</sup> Jamajjeya Jodasaa esodojjo meshi yasijje huojjojeajea canaje. Pa poquinaje ebio huasijje jjanaayisibijeaqui'yohua. Mano'yonaje. Chama'yo tii Jodasa po'yonaje.

<sup>6</sup> Jodio cuaa aje oe esodojjo meshijo ani chicha canaje: —¿Yajja acuae jja seya jiquio esodojjo aje so'o? Jesosa sosequia'yojji ya ca coma, de. Eyacuiñajjija equi yasijje iya sa po ajja. Jamaya pojjeama eseyaya aña —poanaje.

<sup>7</sup> Jamajjeya mimimimi majje meshimisi iñabajijjija meshi, Apaneno meshi jjeshe canaje emano ohuajejji, Jodio pojjeama ohuajejji, ma 30 esodojjo sosejje jjeshe canaje.

<sup>8</sup> Jjeya ca ca yohua bajjani ba'a ma ena' cuayaquinaje meshi bajjani'yo, Jesosaja ena' cuayaquinajejo.

<sup>9-10</sup> E'e, yahuajo nei nei Eyacuiñajjija esohui huohuijji Jenemiaa tehue ca poa jama ba'a: “Ecuea Emeshi Meseya eya huohui canaje: —¡Ma 30 esodojjo sosejje meshi jjeshequicue! —aca poa —, ma bajjanija ba'a meshimisi iñabajijji poanija meshi. Mahuiso esodojjo quia canaje Jodio cuaa Eyacuiñajjija huoojea'yo Quito iña meesahuajji, equecua'yojji”.

Jamaya Jenemia poa yahuajo nei nei.

*Emeshi mese Pinatohua Jesosa ba canaje*

*(Macoso 15.2-5; Noca 23.3-5; Huani 18.33-38)*

<sup>11</sup> Jamajjeya Jesosa emeshi mese Pinato huasijje dojo canaje, eme jeyo. Pinatohua ba majje huohui'ajja canaje: —¿A'ya acuae mi so'o? ¿A'a miya Jodioja Emeshi Mese poaje'yo?

—E'e, joya ecua miyaya huohuiaña jamaya epo'yojji eya —Jesosaa saja'a canaje.

<sup>12</sup> Jodio etii cuaa, Eyacuiñajji nijje emimijji etiiya pea'ai sijje acanaje Pinato Jesusajo. Jamatii Jesusaa saja'a jjima acanaje. <sup>13</sup> Jamajjeya Pinatohua huohui'ajja canaje: —¿Yajjajje acuae mi mi jjasaja'aquiani so'o? ¿A'a jje shajja'ajja jjima?

<sup>14</sup> Chojja, Jesosa jjasaja'aqui ajja nei nei. Ba majje Pinato jjashahuaba neineiquinaje: —¿Yajjajje shai Jesosa jjasaja'aqui ajja, de?

<sup>15-16</sup> Jamajjeya Pinatohua niñeba ca'yonaje jama ba'a: —Ojjaña eshequiaja eyaya oe Jodio dejja jeacuaya'yaña Jodio quea bihui nee poanijo. E'e, ojjaña Jodio cuana jjashahuabaquiani jama ba'a: Yahuajo Ejito meshijo Jodio etiiquianaja bacua ejja cuia'yo jjima aca poa esohuidojojjiya, ena' ecuipepa jojoya —Pinato poanaje.

Jiquio shejya Pinatohua oe Jodio dejja ejeanobia nequi huoojeacuayajea mee ca'yaninaje. Jamajjeya oya Pinato jjashahuabaquinaje: —E'e, eyaya oe Jodio huoojeacuayajea meeje'yo jjeyahua nei. Jesosa pojja'a pichojea meeje'yo. Pea yani Mashama bajjani, ojjañaja eba nei. Oya ejeanobia nequi quea masejojo. ¿Ache dejja shai Jodio cuaa sa cani so'o? Caba'ajja sahua —jamaya Pinato jjashahuabaquinaje.

<sup>17</sup> Jamajjeya Pinatohua ojjaña Jodio cuana ehuhui'ajjajji iyaa canaje. Jjachichaquiajo huohui'ajja canaje: —Jjeyahua nei eyaya jeacuayajeaje'yo oe Jodio dejja. ¿Ache acuae jja oe jeacuayajeaje'yo so'o? ¿A'a Mashama? ¿A'a Jesosa Quito pichojeaje'yo? —poanaje.

<sup>18</sup> Pinatoja eba poanaje Jodio etiiya quea quene nee poani ojjaña cuana Jesosa nijje jjapeequianijo. Jamajjeya Jesosa iña mee canaje equecuajea'yojji, Jodio etiiquiaa.

<sup>19</sup> Emeshi mese chacochoañani yasijje Pinato Jesosa nijje mimimiminequianijo, oja huanaseya pea echacojji huoojea canaje Pinato huohuiya. Jama huohuime acanaje ba'a: —Huee, mecajje eyaya cahuibanaje Jesosa mimishi'ama nei nei. ¡A'a oya quecua mee'yojji! Eya quea mete ani ojo. E'e, jjacahuibaqui majje piopionaje quea mete jjejojo —Pinatoja huanaseya echacojji huohui mee canaje.

<sup>20</sup> Oja huanase quea mete poanijo, Pinatohua Jesosa pichojea'yo sa acanaje. Jamatii Jodio etii cuaa, Eyacuiñajji nijje emimijji etiiya pea'ai ojjaña ejjachichaqui nequi taaa mee

canaje: —¡Mashama oe huoojeacuayajea'yocue! ¡Jesosa a'a pichojeajji! ¡Quecuajea'yocue ca oma oe!

<sup>21</sup> Jamajjeya Pinatohua: —¿Ache acuae jja oe pichojeaje'yo?

Jamaya acajje, taaa neinei canaje cuana: —Mashama, ¡Mashama jeacuayajea'yocue! —poanaje cuana.

<sup>22</sup> —Jamajje ¿Yajja acuae oe eyaya Jesosa Quito aje so'o? Eyacuiñajji huoojea'yo ojjaña jaahuanajji ca pa coma —Pinatohua huohui'ajja canaje.

—¡Me cacajeacue oe acui ecueata'apeejo! —acanaje cuaa.

<sup>23</sup> —¿Yajja acuae jja so'o? ¿Yajjajo acuae jjaya quecua'yo sa ña Jesosa? —Pinatohua huohui'ajja canaje.

Jamatii taaa majamajanaje Jodio cuana: —¡Me cacajeacue oe; me cacajeacue oe Jesosa! —jama taaameya Jodio cuana poanaje.

<sup>24</sup> E'e, Jesosa pichojea mee jjima acanaje cuaa; quea quene nee neejo janobajjima nei siasianaje; taaa nequinaje Jodio. Taaa majamajajo Pinatohua huoojea canaje ena eme shacuajji jjequiya. Majoya ojjaña cuanaja ebajji Pinatohua eme topo canaje: —¡Eyaya pojjeama me cacaje Jesosa emano'yojji! ¡Jamaya pojjeama ecuea esohui! ¡Miyaya ca jja ca oe jamaya ña! —Pinatohua acanaje.

<sup>25</sup> Taaajebenaje ojjaña Jodio etii cuana: —E'e, ¡ecuaaya oya mano meeje'yo Jesosa; quea tai coma! ¡Oya mimishi'ama joyaya, ecuanajaya ebacua, osecua cuana pea'ai cacua ca'yahua, Eyacuiñajjiya! —Jesosa quea mimishi poso acanaje cuaa.

<sup>26</sup> Jamajjeya Pinatohua ohua sa canijo Mashama jeacuayajea mee ca'yonaje; Jesosa ca huoojea canaje cuiasejjajea majje me cacajeaa, emano'yojji.

### *Sohuinano soa neineinaje Jesusajo*

*(Macoso 15.16-20; Huani 19.2-3)*

<sup>27</sup> Majoya emeshi meseja sohuinano cuaa Jesosa dojo canaje emeshi mese chacochoañani equi dojjo huasijje. Ojjaña sohuinano o que jjachichaquinaje. <sup>28</sup> Oja daqui huijjiajea mee majje daqui huo'o nei huosho mee canaje emeshi mese nisho'yajji. <sup>29</sup> Acuisha sipi majje sapahuahuo iya canaje emeshi mese jayojja nisho epojji. Emeshi meseja acui ejehuijjajja ñanequia mee canaje ebiane meje. Majoya ecui'oshajjajo nequianaje ojjaña, Jesosa bihuiajji nisho. Jama bihuia nishome acanaje cuaa ba'a: —¡Miya Jodioja Emeshi Mese quea ca'a nee! ¡Ba'e tiitii'yocue! —jama sajeameya anisho canaje cuaa Jesosa.

<sup>30</sup> Majoya cuichojea canaje oja yami yasijje; acui ejehuijjajja jjequisejjajea ca'yonaje oja emejo nequi. Jjequisejjajea'yo majje sapa cuiape'ejea canaje. <sup>31</sup> Ojo soa neinei'yo majje daqui huo'o nei huijjeajeajea ca'yonaje; ojaya daqui quia ca o'oyanaje. Majoya Jesosa dojo canaje me cacajeaa, ba'ehuanasohuajjea pea'ai, sohuinano cuaa.

### *Jesosa acui ecueata'apeejo me cacajea canaje sohuinano cuaa*

*(Macoso 15.21-32; Noca 23.26-43; Huani 19.17-27)*

<sup>32</sup> Jenosanenajo aniya Jesosa dojo caje, ba cajjequinaje pea dejja Simoni bajjani, Sinene meshijo ba'e poe'yo. Sohuinano cuaa Simoni acui ecueata'apee dojo mee canaje Jesosa quishishijji, Jesosa ba'ehuanasohuajjeajji. <sup>33</sup> Jamaya oya poquinaje Jonijota eyiyo huasijje, Ese Ejjaja esohuijo Esapa Jjii anijji bajjani yasijje. <sup>34</sup> Nequiñaquiajo Jesosa ishi mee'ajja canaje cuaa acuijjajja na quea sese, quea pase. Ishi mee'ajja canaje quecua ca'yajje nee'ama epojji. Sio majje ishi jjima acanaje Jesusaa. Majoya me cacajea ca'yonaje. Me caca majje nequiasohuajjea canaje. Majoya oja daqui cuana chicha ca'yonaje, sohuinano cuaa. Iyachicha'yo majje, hue'e nisho majje daqui majjo ca'yonaje, ojaya pojji epo'yojji. <sup>35-38</sup> Etehue'yo o ba'e sapa biajje oja bajjani caca canaje, Jesosa bajjani, oya apiojji me cacajea ca'yonaje huohui epo'yojji. Etehue'yo jama poa ba'a: OYA JESOSA JODIOJA EMESHI MESE EPO'YOJJI

Jesosa ba'e pejejo beca siipojji pea acui ecueata'apee cuanajo ba'ehuanasohuajea pea'ai ca'yonaje, Jesusaja ebianeijijje, pea shani mijijje. Majoya e'anioque aniya ojjaña cuaa ba neinei ca aninaje oja epeejiya eba'ehuanaoquea ca'yo poajeje.

*Ejiojijje poquije Jesosa nijje mimijajinaje cuana*

*(Salmos 22.7; 109.25; Mateo 26.61)*

<sup>39</sup> Pea dejja cuaa ejiojijje poquianiya Jesosa que poe majje esapa jeacajjajja canaje, soa huisahuisa nequinaje. Jama mimijajime poanaje ba'a: <sup>40</sup> —¿A'a acuae oe miyaya Eyacuiñajjija mei equi ñajeabichajea'yo majje pea equi iyaje o'oya so'o pea beca peejjima cahuime? ¡Ba'ajja socue! Ache ba'ajja; miya Eyacuiñajjija Bacua Ejja nei jjabaqui majje ca oe jacui ecueata'apeejo ba'e nequioque'ajja'yo socue emano'yojji pojjeama! —poanaje cuana.

<sup>41</sup> Jamaya pea'ai Jodio etii bajjani cuaa, Moisesija etehue'yo huohuijji cuaa, Eyacuiñajji nijje emimijji etii cuaa pea'aiya Jesosa niñeba canaje: <sup>42</sup> —¿A'a Jesosa ojjaña jaahuanajji epo'yojji? Oya ona nahuejji pojjeama. Oya ca ca oma nequioque'yo jjima poani, de. ¿A'a acuae jja oe oya Jodioja Emeshi Mese poaje'yo? ¡Jjaba'ajjaqui socue! Jodioja Emeshi Mese nei epo'yojji jjabaqui majje jacui ecueata'apeejo ba'e jja ca oe canequioqueahua jjeyahua neiya ecuanaja ebajji! Ba majje ecuaaya: “Jesosa e'e jojo nei Eyacuiñajjija Bacua Ejja poanaje” aje'yo. <sup>43</sup> Ohuaya: “E'e, eya ca ca ña Eyacuiñajjija Bacua Ejja; ohuaya eya jaahuana cani” acanaje yahuajo. Jamajjeya oya Jesosa Eyacuiñajjija quea boti nee neejo, ¡Eyacuiñajjiya oya canahue cahua jjeyahua nei! —Jodio cuana poanaje.

<sup>44</sup> Siipojji cuaa ma o pejejo eba'ehuanasohuajea ba'eya pea'ai Jesosa jamaya niñebame acanaje, quea huiso nee.

*Jesosa mano'yonaje*

*(Macoso 15.33-41; Noca 23.44-49; Huani 19.28-30)*

<sup>45</sup> Majoya eshequi biacojjajja nequijo shequima' jayojja poanaje; quea misi nee poanaje ojjaña meshi yasijje. Quijje eshequi jjajeapaaqui'yo majje jiji o'oyanaje. <sup>46</sup> Sinecua, quea misi poajo Jesosa quea yeno nee neejo taaa neineinaje: —¿Eli, Eli, lama sabactani? —taame poanaje—; ecue Chii, ecue Chii, ¿yajjajo acuae moya jeana'yonaje so'o? —Jesosa poanaje Jodioja esohuijo.

<sup>47</sup> Shajja'ajja majje joya quea chipi nee nee nequi jama poanaje ba'a: —¡Bacue oe! ¡Ohuaya etiiquiana Enia iyaa cani pojja'a!

<sup>48</sup> Jamajjeya oe dejja poquicujajinaje acuijjajja na sese jjequiya. Jjequi majje shajashaja iyanobia canaje ena ejjequi yasijje. Majoya bequiobo sajo quecuahuosho majje Jesusaja enaba huasijje huoo canaje ojaya e'ishijji nisho.

<sup>49</sup> —Chojja, ¡ishoa socue! ¡Enia pojja'a poeje o nahueya! ¡Ba'ajja socue! —Jodio cuana poanaje.

<sup>50</sup> Jamatii taaa neinei o'oya majje Jesosa mano'yonaje. Chama'yo tii poanaje. <sup>51</sup> Jesosa mano'yajo tii, Eyacuiñajjija equijo daqui quea moo eba'ehuana ba'e Eyacuiñajjiya eyajje jja'isajea meequi canaje; biacuajje ebionei jja'isajeaquinaje. Meshi janobajjima nei huehuahuehuanaje pea'ai. Mei quea quemo cuana jjayajjejeaquinaje pea'ai. <sup>52</sup> Mei jjani, esajaajji cuana pea'ai jjayajjejeaquinaje. <sup>53</sup> Quijje Jesosa eshe o'oya poajo, Eyacuiñajjija epeeji yahuajo emano'yo ma jjani cuanajo jaa cuayaqui'yonaje, quea huiso Jenosanena huasijje poquinaje cuana; quea huiso dejjaa ba canaje ma emano'yo cuana.

<sup>54</sup> Ojjaña ba majje, meshi huehuahuehuani ba majje pea'ai sohuinano quea huiso nee, 100, huoojajji poaniya pea sohuinano cuana nijjeya, ma Jesosa nahuejji poani, quea mete nee nee poanaje.

—¡E'e jojo nei, de, oya Jesosa Eyacuiñajjija Bacua Ejja nei poanaje! —sohuinano poanaje.

<sup>55</sup> Quea huesha nequiya epona cuaa pea'ai Jesosa eba'ehuanasohuajea ba'e ba canaje. Oya cuana yahuajo Jesosa nijje Janinea meshijo ania poa. Onijje Jenosanena huasijje poeyanaje oja bobi cuacua meesahuaa. <sup>56</sup> Oya cuana ma bajjani ba'a: Mania Madanena;

Satiaco, oja chahua Jose pea'aija enaese Mania bajjani; Semeneoja ehuanase pea'ai; Jesusaja enaese pea'ai.

*Jesosa mei jjani yasijje huananobia ca'yonaje*

(Macoso 15.42-47; Noca 23.50-56; Huani 19.38-42)

<sup>57</sup> Jamajjeya sinecua nei Jesosa mano'yajo, dejja quea aquiana huiso nee Jose bajjani poeyanaje, pea Jose, Amatea meshijo ba'e. Oya Jesosa nijje jjapee tiitiquia poa yahuajo nei. <sup>58</sup> Jamajjeya poe majje oya Pinato baa poquinaje. Huohui cañaquinaje: —Emeshi mese Pinato, Jesosa mano'yonaje. Eyaya oya cadojo'yahua ecuea mei jjani yasijje ehuananobiaqui'yojji —poanaje.

Pinatohua huoojea canaje: —E'e, ¡dojocue! Eyaya sohuinano cuana jamaya huohuime aje —poanaje.

<sup>59</sup> Jamajjeya Joseya Jesosa acui ecueata'apeejo emano'yo ba'e jjequioquea'yo majje dojo ca'yonaje. <sup>60</sup> Daqui oshe eyacua neijo bebo majje huananobia ca'yonaje ojaya mei jjani yasijje, ma oja jjeya nei tio huasijje. Majoya mei quea quemio jeacajjajja canaje mei jjani naba capa'yojji. Jesosa mei jjani dojjojo jaa capajea canaje. Capa'yo majje poquinaje Jose pea cuana nijje. <sup>61</sup> Mania Madanena, pea epona Mania bajjani pea'ai mei jjani yasijje poeyanaje pea'ai Jesosa jjanijo ehuananobia jaa baa. Jomajo e'anioque aniya ba canaje, epona cuaa.

*Sohuinano cuaa mei jjani nahue canaje*

<sup>62</sup> Jamajjeya mecahuaje epojja ejomishocajji jjayejequiajo Paniseo cuana, Eyacuiñajji nijje emimijji etii pea'ai poqui o'oyanaje Pinato que. <sup>63</sup> Huohui caña'yonaje: —Emeshi mese, ecuana jjashahuabaquiani yahuajo Jesosa mano'yo jjimahua sijje poanaje jama ba'a: “Beca cahuime po majje eya emano'yojaa shequije'yo” —Jodio poanaje, Jesosa sijje poanajejo poso—. <sup>64</sup> Jamajjeya ijyehua nei sohuinano huoojeacue jjani baa, beca cahuime pohua, Jesusaja epeejiya oe equehua dojo'yo bacue! Jamaya po majje ojjaña cuana dasia ca chana' jama ba'a: “¡Bacue oe! ¡Jesosa ca jja ca emano'yojaa shequi o'oyanaje!” huohui ca chana' oja epeejiya. Ojjaña cuana sijje nei nei aca'yo chana' —Jodio cuana jamaya poanaje, Jesosa eshequi o'oyajji pojjeamajo poso.

<sup>65</sup> Jamajjeya Pinatohua huoojea canaje: —¡Ma'aje sohuinano cuana! ¡Dojo'yocue mei jjani yasijje, ma Jesosa ehuananobia jaa huasijje! ¡A'a acuae jjani ca'aje'yo ba'ajja socue! —poanaje Pinato.

<sup>66</sup> Jamajjeya poquinaje Jodio cuana sohuinano cuana nijje mei jjani yasijje. Jjani capajji ijja ca'a meequi ca'yonaje baacuiya. Majoya esecue jjanijo emeshi mese nisho iya canaje ona edobiqui poaje jjejojo. Etehue iya canaje, emeshi mese nisho. Majoya Jodio cuana poquinaje. Sohuinano ca ca enequinaje tii, esecue jaahuanajjiya.

## 28

*Jesosa shequi'yonaje*

(Macoso 16.1-10; Noca 24.1-12; Huani 20.1-10)

<sup>1</sup> Jamajjeya epojja ejomishocajji jjayejequiajo mecajjeahua nei nei, ebionei jjapoj-jaquiajo, nomico pojjaajo, Mania Madanena, pea Mania nijje poquinaje mei jjani yasijje.

<sup>2</sup> Epona cuana jjani pejje yasijje poeyajo, meshi huehuahuehuanaje janobajjima nei. Eyacuiñajji esohuidojojji eyajo ani nequioquenaje. Mei jeacajjajjae canaje. Majoya esohuidojojji mei biajje anioquenaje. <sup>3</sup> Oya quea jiji nee nee poanaje pojjeje jayojja; ojaya daqui quea oshe nee nee, bo oshe nee nee jayojja ani ba canaje epona cuaa. <sup>4</sup> Sohuinano cuana quea mete nee nee poanaje. Piopio neineinaje; meshi yasijje jaabichajeaquinaje, emano'yo jayojja jama jaanaje esohuidojojji yajjajo. <sup>5</sup> Majoya esohuidojojjiya epona cuana jama huohuime acanaje ba'a: —¡A'a quea mete pojji! Ecuea miya eba. ¿A'a Jesosa, ma acui ecueata'apeejo mano'yonaje sa'ajja'yo poequi? <sup>6</sup> Chama' oya jjeya jiquiojo. Shequi'yonaje ca jja coma; ma ecua ohuaya huohui canaje jamaya e'e jojo nei po'yonaje; oya shequi'yonaje jjeya. E'e, ¡quia'o jiquio ba'ajjahua'yo! Jiquiojo jaanaje. <sup>7</sup> ¡Jyehua

nei poquicuajicue oja epeeji cuana huohuiya! ¡Jama huohuime acue ba'a: “Jesosa pa shequi'yonaje” acue! “Oya jjeja nei Janinea meshi yasijje poquije miquiana poqui jjimahuajo. ¡Oya oe jocuama baquicue!” jamaya o shajja'ajjaji cuana huohuicue! ¡Ecue sohui ma eya huohuinaje oe a'a pajea'yojji; pea huasijje huohui neiquicue! — esohuidojojji jamaya poanaje.

<sup>8</sup> Jamajjeja epona cuana poqui cuajicuajinaje. Quea mete, quea bei nee nee poanaje. Cuajicuajinanaje Jesosa shajja'ajjaji cuana esohuidojojji esohui huohuiya.

<sup>9</sup> Ejiojjijje poquijejo Jesosa jjanequipanaquinaje. Ehui dojojji nequinaje. Huohui canaje: —Jjo'i, ¡ejo quea bei pocue! Eya poeyanaje —Jesosa poanaje.

O que poe majje o que jjanequichipiquinaje. Ecui'oshajjajo nequinaje; jiojji napa canaje. Quea bihui nee nee yajji epona cuaa oya bihuia canaje. <sup>10</sup> Jamajjeja Jesosaa oya cuana huohui canaje: —¡A'a quea mete pojji! ¡Poquicue; ecuea epeeji cuana huohuicue, miyaya! ¡Jama oe acue ba'a: “¡Jjeyahua nei oe Janinea meshi yasijje poquicue! ¡Jocuama oe Jesosa baquicue, Janinea meshi yasijje!” acue! —Jesosa poanaje.

#### *Sohuinano cuana Jesosajo sijje poanaje*

<sup>11</sup> Epona cuana poqui'yajo sohuinano cuana meshijo jaa nequisohua'yonaje. Jenosana huasijje poquinaje Jodio etii baa. Eyacuiñajji nijje emimijji etii huohui caña'yonaje ojjaña ohua jama acanaje, sohuinano cuaa. <sup>12</sup> Huohui poña'yonaje. Sohuinanoja esohui shajja'ajja majje Jodio etii cuana jjachichaquinaje emimimimijji. Majoya sohuinano cuana quea huiso bejjo quia canaje o sijje poani sosejje. <sup>13</sup> Jama huohuime acanaje ba'a: —¡Miyaya ojjaña cuana jama huohuime acue ba'a: “Mecajje ecuaana ecahuijaajo Jesosa sii ca'yonaje jjanijo jaa, o shajja'ajjajiya” acue! <sup>14</sup> Emeshi mese Pinato miquea ehuhui shajja'ajja cajo ecuaana onijje mimije, e'e jojo nei, miya ojaya enapa'yojji pojjeama. Pinato quea bei po meeje'yo ecuaana —Jodio cuana poanaje.

<sup>15</sup> Jamajjeja Jodio etii cuaa sohuinano bejjo quia canaje. Bejjo jjeshe majje sohuinano cuana poquinaje ojjaña huasijje huohui pohua. Jodio etijja esohui jayojja jama acanaje. Jamajjeja quea huiso Jodio cuana sohuinanoja esohui shajja'ajja majje e'e jojo nei poani posojo jjashajja'ajjaquinaje. Jjeja jiquio pojjaajo cuanaya jamaya Jodio cuaa huohui cani tii: —¡Jesosa ca jja ca ojaya epeejiya quehuadojo ca'yonaje; shequi o'oya ajja! —sohuinano sijje poanaje jayojja jama poani tii, Jodio cuana.

#### *Jesosa ba canaje o shajja'ajjaji cuaa*

*(Macoso 16.14-18; Noca 24.36-49; Huani 20.19-23; Hecho 1.6-8)*

<sup>16</sup> Jamajjeja Jesosa shajja'ajjaji cuana 11 huisome poquinaje Janinea meshi yasijje Jesosa baa. Poquinaje eyiyo huasijje ma Jesosa huohui poequi baa. <sup>17</sup> Poqui majje, Jesosa ba majje bihuia canaje cuaa. Jamatii beca cuana ca ca jama poanaje ba'a: —E'e pojja'a. Edojjoshahua pojja'a coma, Jesosa pojjeama —jjashahuabaquinaje.

<sup>18</sup> Jamajjeja Jesosa o que jjanequichipichipiqui majje jama huohuime acanaje ba'a: —Eyacuiñajjiya eya Emeshi Mese nei epojji aca'yonaje eyajo, meshijo pea'ai. <sup>19</sup> Jamajjeja ¡poquicue ojjaña dejja cuana huasijje! ¡Ojjaña pea esohui mimiani yasijje ecuea esohui ba meequicue pea'ai! ¡Enijje jjapeequi meequicue! Enijje jjapeequiyajo, ¡ena huasijje besa meecue, eseja Chii nijje epojji, enijje epojji, Edojjoshahua Pame nijje pea'ai epojji! <sup>20</sup> ¡Ojjaña cuana ecue sohui ba meesahuacue oe! ¡Ojjaña oe jjashajja'ajja meequicue quea bame nee nee eba'ejji, mimishi'ama eba'ejji! ¡Bacue oe! Eya e'e jojo nei minijje nequi tiitijje'yo ojjaña pojjaajo, jiquio meshi oe epojji jiquio epojja huisome tii —Jesosa poanaje.

Mahuiso ecuea esohui etehue'yo. Eyaya Mateo bajjaniya tehuejeyonaje. Apoa.

MACOSOHUA ESOHUI QUEA PAME NEE TEHUE CANAJE JESOSA  
QUITOJA  
MARCOS

*Huaniya, ma ona besameeji poaniya esohui huohui canaje Jesosa Quitoja*  
(Mateo 3.1-12; Noca 3.1-9, 15-17; Huani 1.19-28)

<sup>1</sup> Eyaya, Macoso bajjaniya esohui quea pame nee tehueña Jesosa Quitoja, Eyacuiñajjiya Bacua Ejjaja, ojjañaja ebajji. Jamaya poanaje ba'a:

<sup>2</sup> Yahuaajo nei nei ecuanaja etiiquiiana Isaia bajjani Eyacuiñajjiya esohui huohuiji poa. Eyacuiñajjiya Bacua Ejja Jesosa Quitoja Isaiaa tehue ca poa Eyacuiñajjiya esohui. E'e, Eyacuiñajjiya oja Bacua Ejja jama aca poa ba'a:

“¡Shajja'ajjacue! Eyaya ecuea esohui huohuiji huoojeaje mi huoojea jjimahuajo. Ohuaya miquea ejioji shabojea caje. <sup>3</sup> E'e, oya quimajo, meshi jabojo nequi taaanequiye. Jama poaje ba'a: —¡Iquiuo ecua emeshi cuiñajji nei nejia ejioji shabojea cani jama, quea pojje nee nee acani jayojja jamaya miquea ejjashahuabaquiji tai quea bojea nee nee a'yocue! Emeshi Mese nei pojeje. ¡Jamajjeya oe apoa pocuajicue!”

Jamaya Isaiaa yahuaajo nei nei tehue ca poa Jesosajo.

<sup>4</sup> Jamajjeya Isaiaja esohui jayojjaya Huaniya, ma ona besameeji poaniya, meshi quimajo aniya esohui quea bihui nee Jesusajo huohui canaje. Jama acanaje ba'a: —¡Miquea mimishijo quea yeno pocue! ¡Mimishi jja oe pajea'yocue! E'e, jamaya poajo, Eyacuiñajjiya miquea mimishi cuana cuijea caje'yo. Jamajjeya eyaya miya besa meeje ojjañaja ebajji miya Eyacuiñajjiya epeeji po'yonaje —acanaje Huaniya.

<sup>5</sup> Quea huiso nee nee cuana Jenosanena cuiñajjiyo ba'eca, ojjaña Jodea meshijo ba'eca pea'ai poquinaje Jodana cuei yasijje Huani baa. Huani shajja'ajja majje oya cuana quea yeno nee poanaje ojaya mimishijo. Miminaje Eyacuiñajji nijje. Ojaya mimishi huohui canaje. Majoya Huaniya oya cuana besa mee canaje Jodana enajo, Eyacuiñajjiya epeeji epoji.

<sup>6</sup> Huaniya huo ña, cameno ña oja sipi huosho canaje. Ejjayiica'aquiji ejee iya canaje. Shacui ijia canaje, huini pea'ai ishi canaje, Huaniya. <sup>7</sup> Ohuaya huohui canaje jama ba'a: —Quijje pishana poeje Jesosa Quito. Oya oe nei quea ca'a nee nee nequi. Eya ca ña quea ca'a pishana nequi. Jamajjeya eya ca ña onijje nequi sa po ajja miquiana que cojja. Quea bicho. <sup>8</sup> Eyaya miquianaya Eyacuiñajjiyo besa meeaña enajo. Poe majje ohuaya, Jesosa Quitohua miquiana que Eyacuiñajjiya Edojjoshahua Pame dobiqúi mee caje'yo. Jamajjeya miquianaya quea pame nee poaje'yo —acanaje Huaniya ojjaña.

*Huaniya Jesosa besa mee canaje Eyacuiñajjiya esohui jayojja jama epo'yojji*  
(Mateo 3.13-4.11; Noca 3.21-22)

<sup>9</sup> Majoya Huaniya Jodana cuei sahuajo sohuihuohui canijo tii, Jesosa Janinea meshijo ba'enaje, Nasanena cuiñajjiyo. Macua huasijje po'oquenaje Huani que. Huani jama acanaje ba'a: —Huani, ¡eya besa meecue Eyacuiñajjiyo, miyaya! Jamajjeya Huaniya Jesosa besa mee canaje Eyacuiñajjiyo Jodana enajo. <sup>10</sup> Huaniya Jesosa besa mee majje, jjequicuaya ca'yajje ba canaje eyatahuatahua ca'apejo caje. Eyacuiñajjiya Edojjoshahua Pame huia' jama Jesosa sapa biajje cuabesa ba'enaje. Ecapashi nei ba'eoquenaje. <sup>11</sup> Eyacuiñajjiya eyajo aniya oja Bacua Ejja jama acanaje ba'a: —Miyaya ecue Bacua Ejja quea jea nee nee. Eya mijo quea bihui nee nee poani.

*Jesosa mimishi po mee sa acanaje Edosiquiaa*  
(Mateo 4.1-11; Noca 4.1-13)

<sup>12</sup> Jjeyahua nei Edojjoshahua Pameya Jesosa quima huasijje, meshi jabo huasijje huoojea canaje. <sup>13</sup> Jesosa jomajo nequinaje peaja ejioji huiso cahuime, 40 cahuime. Mahuiso epojja cuana, mecajje cuana pea'ai aninaje. Oe nei nei aninaje. Ijjiacajji quea

mase cuana jomajo nequinaje pea'ai. Edosiquiana aje Jesosa que poeyanaje. Quea mimishi epo meejji nisho acanaje. Majoya Eyacuiñajjija esohuidojojji cuana quea huiso poeyanaje Jesosa bobiaa.

*Jesosaa sohuihuohui canaje Janinea meshijo, Eyacuiñajji ba po jjimaja meshijo*  
(Mateo 4.12-17; Noca 4.14-15)

<sup>14</sup> Majoya pea cuaa Huani, ma ona besameejji poani iña canaje; equi ejjajeanobiaquijji yasijje jeanobiajea canaje. Jamajjeya Jesosa posohuaquinaje Janinea meshi yasijje. Eyacuiñajjija esohui quea pame nee huohui canaje. <sup>15</sup> Jama poanaje ba'a: —Jyehua nei Eyacuiñajji miquea Emeshi Mese nei poaje. ¡Jamajjeya miquea mimishijo quea yeno pocue! ¡Mimishi cuana pajea'yocue miquiaaya! ¡Ecuea esohui quea pame shajja'ajjacue! E'e, enijje jjapeequiajo, eyaya miya ba'e tiitii meeje'yo enijje —Jesosaa huohui tiitii canaje.

*Jesosaa nahuoo cuiashajajji iyaa canaje onijje epo'yojji*  
(Mateo 4.18-22; Noca 5.1-11)

<sup>16</sup> Majoya Jesosa poquinaje Janinea bae ai sahua huasijje. Jomajo ohuaya Anesi, Anesija o'i Peno bajjani, Simohui pea'ai bajjani ba canaje. Oya cuana nahuoo cuiashajajji nei nei bajio. Nahuoo cuiashaja poequi. <sup>17</sup> Jesosaa oya cuana iyaa canaje: —¡Enijje po'yocue! Eyaya miya dejja cuana jjequi meesahua'yojji aje'yo e que.

<sup>18</sup> Jjeyahua nei nei oya cuana ojaya eshajajji cuana jeana'yo majje onijje poqui'yonaje.

<sup>19</sup> Majoya Jesosaa poqui pishana majje pea cuana ba canaje. Semeneoja bacua ejja Jacobo ba canaje oja chahua mese nijje, Huani nijje bishe aijo eshajajji je'e'yo po'ani oja chii nijje. <sup>20</sup> Jjeyahua nei Jesosaa oya cuana iyaa canaje. Jamajjeya Jesosaa iyaa cajje oja chii Semeneo bajjani echacojji cuana nijje bishejo ani tii jiña ca'yonaje cuaa, Jesosa nijje epoqui'yojji.

*Dejja niñepoqui*  
(Noca 4.31-37)

<sup>21</sup> Majoya quiije pishana Jesosa o shajja'ajjajji nijje posohuaquinaje Capenaoma cuiñajji yasijje. Epojja ejomishocajjijo oya cuana poquinaje Jodio cuanaja equi ojee ejjachichaquijji yasijje. Dobiqui majje Jesosaa ojjaña jomajo ani sohuihuohui canaje. <sup>22</sup> O shajja'ajja majje ojjaña cuana jama poanaje ba'a: —¡De! Ohuaya Jesosaa esohui huohui cani quea ja'a nee. Huohui cani emeshi mese jayojja jamaa quea ja'a nee nee. Moisesija esohui etehue'yo huohuijjiya quea ja'a pishana esohui huohui cani, de. ¡Cashajja'ajja'yahua Jesosa! —poanaje ojjaña cuana.

<sup>23</sup> Jjeyahua nei dejja niñepoqui dobinaje ma equi yasijje. <sup>24</sup> Jesosa ba majje eshahua o niñepoqui meejji poani siasianaje jama ba'a: —Jesosaa, Nasanenajo ba'e, ¿apiojji miya poeyanaje ecuanaja que ecuanaja quea nee nee po meeya? Ecuana eba miya Eyacuiñajjija Bacua Ejja quea pame nee. ¡A'a jjeyahua nei ecuanaja cuaqui yasijje jeajeajji! Eyacuiñajjiya eshahua cuana cuaqui yasijje huoojeajea caje'yo quiije, jjeya nei pojjeama, de —taaame poanaje eshahua.

<sup>25</sup> Jamajjeya Jesosaa eshahua, o niñepoqui meejji poani huoojeacuayajea ca'yonaje: —Eshahua, ja'a mimijji! ¡Cuayaqui'yocue oe, jiquio dejjajo nequi! —Jesosaa acanaje.

<sup>26</sup> Jesosa mimi jeahuajo, eshahuaa o niñepoqui meejji poaniya dejja jjequi'ihui mee majje, siasia mee majje cuayaquinananaje. Dejja jea cana'yonaje. <sup>27</sup> Ba majje ojjaña cuana quea mete nee nee poanaje. Ojee miminaje jama ba'a: —¡De! ¿Yajja shai poani? Jamaya yahuajo ecuanaja ba jjima, de. Jesosaa quea ja'a nee huohui cani emeshi mese jamaa, oya quea sohui poja nee nee. Ojaya esohui shajja'ajja cani eshahuaa. Oja sohui jayojja jama acani, de —poanaje ojjaña.

<sup>28</sup> Jjeyahua nei ojjaña Janinea meshijo ba'ecaa shajja'ajja canaje Jesosajo. Jama poanaje ba'a: —Jesosaa quea ja'a nee ojjaña acani. Oya Eyacuiñajjija huoojea'yo ojjaña jaahuanajji e'e jojo nei —ojjaña poanaje.



*Jesosaa Simohuija yano mese huaquia mee ca'yonaje**(Mateo 8.14-15; Noca 4.38-41)*

<sup>29</sup> Jesosa Jodio cuanaja equi ojee ejjachichaquiijji nequi cuayaqui'yo majje poquinaje Simohuija equi yasijje, Anesija pea'ai equi yasijje. Dobiquinaje Jacobo nijje, Huani pea'ai nijje. <sup>30</sup> Simohuija ano quea quiyo nee jaa. Jamajjeya Jesosa huohui canaje jama ba'a: — Jesosa, ecue ano, ecue huanaseja enaese quea quiyo nee nee jaa, quea mano, de — Simohui Peno poanaje.

<sup>31</sup> Jamajjeya Jesosa o que poquinaje. Emanojaa ba canaje. Napa'ajja canaje emeya. Me napa'ajja cajje, boe canana'yonaje. Jamajjeya me iña majje jjequisohua canaje Jesosaa. Majoya ohuaya, Simohuija anohua, bobi ojjaña huasijje jjequi canaje.

*Jesosaa quea huiso emanojaaca cuana jjaajaqui mee ca'yonaje**(Mateo 8.16-17; Noca 4.40-41)*

<sup>32</sup> Majoya sinecua neiyo, eshequi e'oquequiajo, dejja cuaa quea huiso emanojaa cuana, niñepoqui cuana pea'ai Jesosa que jjequi canaje ejjaajaqui mee'yojji. <sup>33</sup> Ojjaña jiquio cuiñajji ba'eca Jesosa que jjachichaquinaje Simohuija equi yasijje. <sup>34</sup> Jesosaa ojjaña emanojaa jjaajaqui mee ca'yonaje, huaquia mee ca'yonaje pea'ai. Eshahua cuana huoojeacuayajea ca'yonaje pea'ai. Eshahua cuana, o ebajo, jama acanaje Jesosaa ba'a: —Eya miqúanajaya ebajo ja'a mimijji! Eya Eyacuiñajji huoojea'yo ojjaña jaahuanajji, oja Bacua Ejja ja'a pea cuana huohuijji! —poanaje Jesosa.

*Jesosaa esohui huohui ca o'oyanaje Janinea meshijo**(Noca 4.42-44)*

<sup>35</sup> Mecajjeahua nei, eshequi jjaja'a'ajjaqui jjimahuajo, Jesosa shequi majje cuiñajji esecue yasijje poquinaje dejjama huasijje. Jocuama oya miminaje Eyacuiñajji nijje, oja chii nijje. <sup>36</sup> Jamajjeya shequi majje pea cuaa Simohui nijjeya oya sa'ajjaqui canaje. <sup>37</sup> O ba majje jama poanaje ba'a: —Jesosa, ojjaña miya sa'ajja caqui —poanaje.

<sup>38</sup> Jamajjeya Jesosaa oya cuana jama acanaje ba'a: —¡Cua'a, enijje poquicue pea cuiñajji cuana huasijje! Eyacuiñajjiya eya huoojea canaje pea cuiñajji yasijje ojaya esohui jocuama huohuiya pea'ai.

<sup>39</sup> Jamajjoya Jesosa Janinea meshijo ojjea poquinaje ojjaña cuiñajji cuana huasijje. Ojjaña Jodioja equi ejjachichaquiijji yasijje dobiquinaje; esohui huohui canaje. Eshahua cuana huoojeacuayajea ca'yonaje pea'ai.

*Dejja batata epo'yo, ma dejjaa shicui jjima acani jjajea meequi ca'yonaje Jesosaa**(Mateo 8.1-4; Noca 5.12-16)*

<sup>40</sup> Majoya oe dejja quea mano nee batata epo'yo poeyanaje Jesosa que. Ecui'oshajjajo nequinaje o bihuijji. Onijje miminaje jama ba'a: —Jesosa, ecuea eba miya jjajea meequi'yojji nei nei poani. Jamajjeya miyaya jjajeaqui mee'yo sa amajje ¡mo che jjajeaqui mee'yocue! —poanaje.

<sup>41</sup> Jesosa ma dejja quea mano ba majje quea yeno poanaje. Oya napa'ajja canaje emeya. Jama poanaje ba'a: —E'e, eyaya miya jjajeaqui meeje'yo. ¡Jjajeaqui'yocue, miya! —Jesosaa acanaje.

<sup>42</sup> Jjajeaquinana'yonaje jjeya nei. Quea pame nee po'yonaje. <sup>43-44</sup> Jamajjeya Jesosaa oya huohui canaje jama ba'a: —¡Shajja'ajjacue mo! Eyaya miya jjajeaqui mee'yonaje. ¡Jamatii a'a oe jjeya huohuijji ecue jjajeaqui mee'yo! ¡Poquicuajicue Jenosanena huasijje, Eyacuiñajji equi yasijje, ma onajo Eyacuiñajji nijje mimiani yasijje! Oya huohuicue jama ba'a: “Eya jjajeaqui'yonaje” acue. ¡Moisesija sohui jayojja jama oe pocue pea'ai! Miya ehuaquia'yohua jjejojya ¡Eyacuiñajji nijje mimiani yasijje beca huia' quiaquicue Eyacuiñajji bihuijji! Jamajjeya ojjaña ba caje miya e'e jojo nei ejjajeaqui'yo —oya acanaje Jesosaa. <sup>45</sup> Jamatii poqui majje huohui canaje ojjaña huasijje jama ba'a: —¡Jesosaa eya jjajeaqui mee ca'yonaje de, huaquia mee ca'yonaje jjeya nei!

Jamajjoya dejja quea huiso nee nee o ba sa poanaje, ejjaajaqui'yojji. Quea huiso nee nee jjachichaqui majje Jesosa cuiñajji cuana huasijje dobiqui mee jjima acanaje.

Oya quimajo nequinaje. Quea huiso nee nee o que poeyanaje, ojjaña huapajje aequiana poeyanaje o baa.

## 2

*Quibojjisha quea mano nee nee jaa jeo mee ca'yonaje*  
(Mateo 9.1-8; Noca 5.17-26)

<sup>1</sup> Majoya quijje pishana Jesosa Capenaoma huasijje poe o'oyanaje. Jamajjeya pea cuaa jomajo nequiya huohui canaje jama ba'a: —Jesosa poe'yonaje ojaya equi yasijje. ¡Cua'a, ejjabaquiqui! <sup>2</sup> Jamajjeya quea huiso nee nee jjachichaquinaje ojaya equi yasijje. Dobi qui mee ajja quea dejja huisojojo. Esecuejo nequinaje; equi shajjaquibojo aequiana nequi canaje pea'ai. Jesosaa oya cuana Eyacuiñajjija esohui huohui canaje. <sup>3</sup> Majoya pea dejja cuaa, ebeca pee pea'aiya, quibojjisha quea mano nee nee equipajaajjijo jaa sejjaiña majje Jesosa que dojo canaje. <sup>4</sup> O que poe meemee ajja, quea huiso equijo ejjachichaqui nequijojo. Jamajjeya oya cuanaa equi biajjeje quibojjisha dojosohuaqui canaje. Equi huejja ca'yonaje. Huejjajje equipajaajji ecapashinei jeoquea ca'yonaje jjonajo. <sup>5</sup> Ma ba majje Jesosa jjashahuabaquinaje jama ba'a: —E'e, jiquio dejja cuana jjashahuabaqui ani eya ejjaajaquimee'yojji nei nei poani.

Jamajjeya quibojjisha nijje jama poanaje ba'a: —Cha, ¡quea bihui nee pocue! Eyaya miquea mimishi cuana cuijea'yonaje.

<sup>6</sup> Jesosaja esohui shajjaajja majje Moisesija etehue'yo huohuijji poani jomajo ani quenequenaje. Jesosa Eyacuiñajjija Bacua pojjeama posojo jjashahuaba taiquinaje jama ba'a: <sup>7</sup> —¡De! Jiquio oya Eyacuiñajji pojjeama. ¿Apiojji Eyacuiñajji jayojja jama nei nei mimiani, de? Jamaya quea mimishi. ¿A'a acuae ohuaya mimishi cuijea mee caje'yo jjabaqui ani? Chojja, Eyacuiñajji oe nei mimishi cuijea'yoyji poani —poanaje Jodio etii cuana, Jesosa Eyacuiñajjija Bacua Ejja pojjeama poso acanaje.

<sup>8</sup> Jamajjeya Jesosa Jodio etijja ejjashahuaba taiquijji ba majje jama poanaje ba'a: —¿Yajjajje acuae nequiana enijje quea quene poani so'o? <sup>9</sup> ¿Ache shai quibojjishajo quea camaja eyaya aje'yo? ¿A'a ojaya mimishi cuijea'yoyji quea camaja? ¿A'a jja eyaya oya nequisohua mee'yo? Ba'ajja —Jesosa poanaje—. <sup>10</sup> Jamajjeya eyaya ojjañaja Edoe Meseya miqianaya ba meeaña eya ca ca iña Emeshi Mese nei quea ca'a nee nee nequi. Jamajjeya eyaya mimishi cuijeaje'yo nequianaja.

<sup>11</sup> Majoya Jesosaa quibojjisha acanaje: —¡Nequisohuacue! ¡Miquea equipajaajji bebo majje miquea equi yasijje poquicue!

<sup>12</sup> Jjeya nei quibojjisha nequisohua majje jeo'yonaje. Equipajaajji bebo canaje. Jeojeopoqui'yonaje oja equi yasijje. Jamajjeya ba majje ojjaña cuana quea bihui nee nee poanaje. Eyacuiñajji bihuia canaje jama ba'a: —¡E'e nei, joya quibojjisha jeo'yonaje jjeya nei! ¡E'e, e, Eyacuiñajjiya Jesosa quea ca'a nee po mee cani; emanoojaa cuana huaquia mee ca'yani! ¡Mimishi cuijea mee ca'yani pea'ai!

*Jesosaa Mateo pea bajjani Nemi iyaa canaje onijje epo'yoyji*  
(Mateo 9.9-13; Noca 5.27-32)

<sup>13</sup> Majoya Jesosa poqui o'oyanaje meshijaji yasijje, bae sahua huasijje. Quea huiso nee nee o que poeyajo, oya cuana Eyacuiñajjija esohui huohui canaje. <sup>14</sup> Majoya Jesosaa poquijeya Apeoja bacua ejja Mateo ba canaje, ma Nemi pea'ai bajjani. Oya yaninaje equi ejjeshejji jaahuanajjijo, ojjañaja emeshi meseja esohuijjo jjeshe mee cani dejja cuana eba'ejji sosejje. Oya bejjo jjeshejji poani. Ba majje Jesosaa oya iyaa canaje: —Nemi, jenijje po'yocue!

Jamajje Nemi nequisohua majje Jesosa nijje poqui'yonaje. <sup>15</sup> Majoya Nemiya Jesosa iyaa canaje ojaya equi yasijje ijja'ijjiaa. Jamajjeya Jesosa o shajja'ajjaji cuana nijje Nemiya equi yasijje poquinaje ijja'ijjiaa. Quea huiso dejja cuana Nemi jama bejjo jjeshejji poani, dejja mimishi cuana pea'ai poquinaje. Ojee ijja'ijjia aninaje Jesosa nijje, Jesosa shajja'ajjaji cuana nijje pea'ai. <sup>16</sup> Jesosa ma dejja mimishi cuana nijje ijja'ijjia ani ba

majje Jodio esohui huohuijji Paniseo cuana bajjani, Moisesija esohui etehue'yo huohuijji cuana pea'ai quea quene poanaje. Jesosa shajja'ajjajji cuana nijje mimijajinaje jama ba'a: —¿Apiojji miquea esohui huohuijji ijia'ijiani bejjo jjeshejji cuana nijje, dejja mimishi nijje pea'ai? ¿Apiojji, de?

<sup>17</sup> Jesosaa oya cuana shajja'ajja canaje. Huohui canaje jama ba'a: —¿A'a dejja cuana quea mano pojjeama eshicuijji quia sa poani? Quea mano poanijo ca ca eshicuijji quia cajji. Oya jayojja eya dejja quea mimishi nijje jjapeequiani quea ja'a nee epo mee'yojji. ¡Bacue! Beca cuana jama poani ba'a: “Eya ca ca ña quea pame nee, mimishi'ama nei nei” poso jjabaquiani. Jamajjeya ma dejja cuana ecuea e'iyajji pojjeama enijje ejjapeequi'yojji. Chojja, eya poeyanaje dejja quea mimishi iyaaa, mimishi pajea mee'yojji.

*Bobi ijia ajjajo huohui'ajja canaje cuaa*  
(Mateo 9.14-17; Noca 5.33-39)

<sup>18</sup> Majoya Huani, ma ona besameejji poani, jeanobiajea canaje cuaa. Jamajjeya Jodio etiiquianaja esohui jama poanijo o shajja'ajjajji cuanaa bobi ijia jjima aninaje Eyacuiña-jji ejjashahuabaquijji, onijje emimijji pea'ai. Jamaya Paniseo shajja'ajjajji cuana poa pea'ai. Jamajjeya beca cuana Jesosa que poeyanaje. Jama huohui'ajjame acanaje ba'a: —Jesosa, ecuana, Paniseo cuana pea'ai, Jodio etiiquianaja esohui jama poanijo bobi ijia ajja Eyacuiñajji ejjashahuaba neineiquijji. ¿Apiojji acuae mi shajja'ajjajji poani jama po ajja? —poanaje; beshahua nei tecuea canaje.

<sup>19</sup> Jesosaa oya cuana acanaje jama ba'a: —Chojja, ¿eya ecuea epeeji cuana nijje yanijo, ca'ijia cahua! Ma jayojja jama ba'a: Ejjahuanaquijji yahueja epeeji cuana onijje yanijo ca'ijia cahua quea bihui nee. ¿A'a yahueja epeeji cuana onijje yanijo quea yeno? Chojja, quea bihui nee. <sup>20</sup> Yahue poqui'yajo ca ca oe ojaya epeeji cuana ijia'ijia sa po ajja poaje. Quea yeno jjejojo jjashahuaba neineiquiani. Eya jiquio ecua yahue jama poani: Quijje eya poqui'yajo, ecuea epeeji cuana ijia'ijia ajja poaje, Eyacuiñajji ejjashahuaba neineiquijji, onijje emimi neineijji pea'ai.

<sup>21</sup> Majoya Jesosaa huohui canaje pea ejjashahuabaquimeejji: —Eseyaya baacojja esee'yohua bishe eyacuajo caca ajja. Cho. Baacojja etii enajo nequi see'yani, ca'a'ama po'yani. Jjasajajeaquije'yo. Bishe ihuije'yo. Bishe eyacuajo ca ca baacojja eyacuaa cacaña.

<sup>22</sup> Pea esohui huohui canaje jama ba'a: —Ena sese cuatatanijo iya ajja meshimisi etiijo. Ena sese cuatata neineianijo, meshimisi ca'a'ama jjaajajeaqui majje ena sese jjashojeaquequije'yo. Cho, ena sese cuatatanijo meshimisi eyacua quea ca'ajo iya cani cuaa —jamaya Jesosaa huohui canaje ejjashahuaba meequijji onijje jjapeequi majje eyacua caba'yahua, yahuaajo jama pojjeama, etiiquianaja esohui jama pojjeama.

*Esohui epojja ejomishocajjijo*  
(Mateo 12.1-8; Noca 6.1-6)

<sup>23</sup> Majoya Jodioja epojja ejomishocajjijo Jesosa o shajja'ajjajji cuana nijje ejiojjiije poquinaje. Que yijeje poquije quea shoe poanaje. Quejo nequi anoso ai sejja canana majje oe pojji ijia canaje, o shajja'ajjajjiya. <sup>24</sup> Maya Paniseo cuaa ba canaje. Jamajjeya Jesosa nijje mimijajinaje jama ba'a: —¡Bacue oe! Mi shajja'ajjajji poani cuaa chaco cani. Anoso ai sejja cani esejaya epojja ejomishocajjijo. Eseyaya etiiquiana Moisesija etehue'yo jama poani ba'a: “¡A'a chacojji epojja ejomishocajjijo!”

<sup>25</sup> Jesosaa oya cuana acanaje jama ba'a: —¿A'a miquea ba jjima esohui etehue'yo emeshi mese Dabija, ojaya epeeji cuanaja pea'ai? <sup>26</sup> Yahuaajo nei nei Abiata Eyacuiñajji nijje emimijji etii poanijo, Dabija epeeji cuana quea shoe nee po majje Dabi Eyacuiñajji equi yasijje dobiquia poa. Ijia ca poa pahui, maya Eyacuiñajji yasijje quia ca poa cuaa o bihuiajji. Ojaya epeeji cuana ijia mee ca poa pea'ai. Jiquio ca oe Eyacuiñajji nijje mimianiya ca'ijia cahua; pea cuanaja e'ijiajji pojjeama.

<sup>27</sup> Majoya Jesosa ojjaña nije jama poanaje ba'a: —Dejja, epona pea'ai pana majje Eyacuiñajjiya oe epojja ejomishocajji aca'yonaje dejja cuana jomishocajji. A'a jjashahuabaquijji jama ba'a: “Epojja ejomishocajjiyo eya jamatii anije”. ¡Cho, quea pame nee acue ma pojjajo! —Jesosa poanaje—. <sup>28</sup> Eya, ma ojjañaja Edoe Mese Emeshi Mese nei poani. Jamajjeya eyaya eyaye nei huohuije epojja ejomishocajjiyo: ¡Quea pame nee nee acue! ¡Pea cuana quea jea nee acue! —Jesosa poanaje.

### 3

#### *Meshahuama'yo epo jjameshahuanequi mee ca'yonaje* (Mateo 12.9-14; Noca 6.6-11)

<sup>1</sup> Majoya Jesosa Jodioja equi ejjachichaquijji yasijje poqui o'oya majje dobiquinaje. Jomajo dejja meshahuama'yo epo aninaje. <sup>2</sup> Jamajjeya Jesosa ba majje Paniseo cuana jama jjashahuabaquinaje ba'a: —Esejaya etiiquiana jama poani ba'a: “¡A'a chacojji epojja ejomishocajjiyo!” poani. E'e pojja'a Jesosa esejaya etiiquianaja esohui jama poaje, chaco ajja pojja'a jjeja. E'e pojja'a oya chaco caje jjeja, epojja ejomishocajjiyo; meshahuama'yo epo pojja'a jjameshahuanequi mee caje'yo. ¡Caba'ajja sahua! —poanaje.

Jesosa nije mimijaji sa poanaje. Jamajjeya oya ba neinei canaje Paniseo cuaa.

<sup>3</sup> Jamajjeya Jesusaa meshahuama'yo epo iyaa canaje jama ba'a: —¡Poecue e que! ¡Ojjaña cojja nei nequicue, eyiyesama neijo!

<sup>4</sup> Majoya oya nequisohuajo, Jesosa esohui jaahuanajji nije, Paniseo cuana nije jama poanaje ba'a: —¿Yajja poani etiiquiana Moisesija esohui etehue'yo? ¿A'a epojja ejomishocajjiyo pea cuana quea pame acajji pojja'a? ¿A'a quea tai acajji pojja'a? Jamajjeya ¿a'a emanojaa huaquia mee ca'yojji epojja ejomishocajjiyo? ¿A'a mano mee cajji pojja'a? —poanaje Jesosa.

Jamatii Jesosa Paniseo cuanaja saja'a jjima quea mimishi nejja jjejojo.

<sup>5</sup> Jamajjeya Jesosa ojjaña baja majje quea quene nee nee poanaje. Ojjaña shajjama' poanijo oya quea yeno poanaje. Jamajjeya ohuaya meshahuama'yo epo jama acanaje ba'a: —¡Epeeji, miquea eme jeapisa'ajja'yo socue! —acanaje Jesusaa.

Jamajjeya mejjajjaa eme' jeapisa ca'yonaje; pea mijijje jayojjaya po'yonaje. <sup>6</sup> Jjeja nei Paniseo cuana esecue yasijje cuayaqui majje pea Jodio etii cuana nije miminaje, emeshi mese Enodeja epeeji cuana nije pea'ai. Jama poanaje ba'a: —¿Yajja amajje Jesosa quecua ca'yojji so'o, de? —poanaje Paniseo cuana.

#### *Dejja quea huiso bae sahuajo sohuihuohui canaje Jesusaa* (Mateo 4.24; 12.15-16; Noca 6.17)

<sup>7</sup> Majoya Jesosa o shajja'ajjajji cuana nije poquinaje. Janinea bae sahua huasijje poe o'oyanaje. Quea huiso nee nee onijje poquinaje Janinea meshijo ba'eca cuana, Jodio meshijo ba'eca cuana, <sup>8</sup> Jenosanenajo ba'eca cuana, Idomea meshijo ba'eca cuana, Jodana cuei ojje mijijje ba'eca cuana, Tinojo ba'eca, Sinonojo ba'eca cuana pea'ai. Jesusaa jjaajaqui mee ca'yoqui shajja'ajja majje o que poeyanaje quea huiso nee nee, de. <sup>9</sup> Jamajjeya Jesusaa o shajja'ajjajji cuana huoojea canaje bishe jjequiya. Jama poanaje ba'a: —¡Bishe jjequicue! Quea huiso nee nee nequicua quishi ca chana' cuaa mo. Jamajjeya eyaya bishejo nequi majje ojjaña cuana sohuihuohuije.

<sup>10</sup> E'e, yahujajo pishana Jesusaa quea huiso jjaajaqui mee ca'yonaje. Jamajjeya quea huiso emano cuana Jesosa que jjachichaquinaje; mojoiya ca'yonaje oja daqui napajji. Jama poanaje ba'a: —E'e, Jesosa daqui cuema napa majje jjaajaquije'yo.

<sup>11</sup> Jesosa ba majje eshahua cuana siasianaje. Niñepoqui cuana Jesosa cojja nei ecui'oshajajo nequinaje o bihuiajji. Jama poanaje ba'a: —Jesosa Quito, miya Eyacuiñajjiya huoojea'yo ojjaña jaahuanajji, oja Bacua Ejja quea pame nee —poanaje eshahua cuana.

<sup>12</sup> Jamajjeya Jesusaa eshahua cuana tecueahuoojeacuayajea ca'yonaje jama ba'a: —¡Eshahua cuana, esohui oe ca'acue! ¡A'a ona huohuijji eya Eyacuiñajjiya huoojea'yo ojjaña jaahuanajji! —Jesusaa acanaje.

*Jesosaa o shajja'ajjajji cuana iyaa canaje 12 huisome*  
(Mateo 10.1-4; Noca 6.12-16)

<sup>13</sup> Majoya Jesosa jaasohuaquinaje eyiyo huasijje. Ojjaña ohua sa cani ohuaya iyaa canaje onijje epoqui'yoyji. Jiquio dejja cuana o que poeyanaje. <sup>14</sup> Majoya ohuaya ome miji pea beca huisome, 12 huisome dejja babaca ca'yonaje ojaya esohui huohuijji nei epojji. Oya cuana huohui canaje jama ba'a: —Eyaya miquianaya babacanaje enijje e'anijji. Miquianaya huoojeaje ojjaña meshi yasijje ecuea esohui huohuiya.

<sup>15</sup> Jesosaa oya cuana quea ca'a po mee canaje eshahua cuana huoojeacuayajea mee'yoyji, ojjaña emanoojaa cuana huaquia mee'yoyji, ejjaajaqui mee'yoyji pea'ai.

<sup>16</sup> Jesosaja huoojea'yo esohui huohuijji ma bajjani ba'a: Simohui, ma pea bajjani Peno; oja chahua Anesi; <sup>17</sup> Semeneoja bacua ejja Jacobo, oja chahua Huani pea'ai Jesosaa pea bajjani aca'yonaje Cueji bajjani, oja sohuijo ca ca Boaneje bajjani; <sup>18</sup> Penipe; Matonome; Tomasi; Mateo, ma bejjo jjeshejji poani; Apeoja bacua ejja Satiaco; Simoni Senote; Taneo; <sup>19</sup> Jodasa Isicaniote, ma Jesosa iña meesahuajji poanaje dejja mimishija quecua'yoyji. Mahuiso Jesosaa babaca canaje ojaya esohui huohuijji epojji.

*Jesosa niñeba canaje cuaa*  
(Mateo 12.22-32; Noca 11.14-23; 12.10)

<sup>20</sup> Majoya Jesosa eyiyojo ani equi yasijje jaoque o'oyanaje o shajja'ajjajji nei cuana nijje. Quea huiso nee nee o que jjachichaqui o'oyanaje. Quea huiso nee neejo Jesosa, o shajja'ajjajji cuana pea'ai, ijja'ijjia mee jjima acanaje. <sup>21</sup> Ma shajja'ajja majje ojaya enaese poeyanaje oja chahua cuana nijje Jesosa nahueya, Jesosa dojhua pea'ai. E'e, onaaya Jesosa niñeba canaje jama ba'a: —Oya Jesosa niñe poquinaje —siajje poanaje cuana.

<sup>22</sup> Paniseo cuaa pea'ai Jesosa niñeba canaje: —E'e, Jesosa aje oe eyamiquecua pojja'a. Ohuaya aje jja oe eshahua cuana huoojeacuayajea canaje Edosiquiana etii nijjeya, Satanasa bajjani, pea bajjani Meesemo nijjeya —poso acanaje Paniseo cuaa.

<sup>23</sup> Paniseo cuanaja ejjashahuabaqui'yoyji quea tai Jesosaja eba poanaje. Jamajjeya oya cuana tecuea canaje jama ba'a: —¡Shajja'ajjacue oe! ¿A'a acuae jja Edosiquiaa, Satanasa pea eshahua huoojeacuayajea came? <sup>24</sup> Chojja. Joya emeshi mese shajja'ajja sa po ajjajo, jjacuaquianijo, dejja cuana ma meshijo ba'e chama'yo tii poaje'yo. Cuiñajjijo ba'e cuana jamaya po pea'aije, chama'yo tii poaje'yo pea'ai. <sup>25</sup> Huapa pojjeama cuana jjacuaquianijo chama'yo tii poaje'yo pea'ai. <sup>26</sup> Jamaya pea'ai Edosiquianaa, Satanasa pea eshahua ehoojeacuaya'yo jojjemo, chama'yo tii po'yoqueaye —Jesosa poanaje—. <sup>27</sup> Cuanaya bacue ba'a: ¿A'a dejja quea ca'a nee jeyo jjima nequijo oja aquiiana sii cajji? Chojja, o jeyo majje ojaya aquiiana cuana sii caje cuaa. Jiquio ecua e'aquiiana mese ebionei jeyo cani jama amajje eyaya eshahua cuana jeacuayajeaña —Jesosa poanaje pea'ai—. <sup>28</sup> Jamajjeya eyaya miya e'e jojo nei huohuiaña: Eyacuiñajjiya ojjaña mimishi cuana, siajjepojji cuana pea'ai cuijea caje'yo. E'e, eya ojjañaja Edoe Mese niñeba cajo cuaa, Eyacuiñajjiya ma mimishi cuijea caje'yo pea'ai, ojjaña mimishi cuana ohuaya cuijea caje'yo. <sup>29</sup> Jamatii Edojjoshahua Pamejo siajje poajo ca ca, Edojjoshahua Pame niñeba cajo ca ca, Eyacuiñajjiya ma mimishi ecuijea'yoyji pojjeama tii tii. Jjeya ecuijea'yoyji pojjeama; quijje eya ecue Chii nijje eyajo ojjaña huoojea'yoyji poaje ecuijea'yoyji pojjeama tii tii poaje pea'ai —Jesosa poanaje.

<sup>30</sup> Yahuajo Paniseo cuana Edojjoshahua Pamejo siajje poanaje jama ba'a: —Jesosaa Edosiquiana nijjeya aje oe eshahua cuana dejjajo ani huoojeacuayajea cani —jamaya siajje poanijo, Jesosaa oya cuana tecuea canaje.

*Jesosaja enaese, echahua mese cuana pea'ai poeyanaje*  
(Mateo 12.46-50; Noca 8.19-21)

<sup>31</sup> Majoya Jesosa mimianijo tii, ojaya enaese, oja chahua cuana pea'ai poeyanaje. Esecuejo nequinaje. Onaaya Jesosa huohui canaje jama ba'a: <sup>32</sup> —Mique nae poeyanaje; esecuejo nequi, minijje emimijji —o pejjejo e'anioque'aniya huohui canaje.

<sup>33</sup> Jesosaa ojjaña ejjachichaqui'yo baja majje jama acanaje ba'a: —¿Ache acuae ecuea huapa pojjeama cuana so'o? <sup>34</sup> ¡Bacue! Jiquio ecuea epeeji cuana ecuea huapa pojjeama cuana jama ecuea quea jea nee nee, ecuea ecue nae quea jea ña jayojja jama. <sup>35</sup> E'e, ecue Chii eyajo ani; ojjaña joya ojaya ejjashahuabaqui'yojji jayojja jama ba'yani, ojaya esohuijo jjashajja'ajjaquiiani pea'ai ecuea huapa pojjeama, ecue chahua, ecue jjo'i, ecuea enaese pea'ai —Jesosaa acanaje.

## 4

*Eso' jeaajaji**(Mateo 13.1-9; Noca 8.4-8)*

<sup>1</sup> Majoya Jesosa equijo ani cuayaquinaje. Bae sahua huasijje poqui majje anioquenaje. Majoya o que jjachichaquinaje dejja cuana quea huiso nee nee. Jamajjeya bishe yasijje nequisohuaqui majje anioquenaje esohui huohuiya. Dejja cuana ca ca meshijajijo aninaje. <sup>2</sup> Jesosaa oya cuana sohuihuohui canaje quea huiso nee nee. Pea esohui ebameesahuajji huohui canaje ona jjashahuabaquijji. Jama acanaje ba'a: <sup>3</sup> —¡Bacue! Ebanajji poquinaje banaa. <sup>4</sup> Eso' jeaaja canijo, oe pojji eso' oquequinaje ejiojji yasijje. Poeyanaje cuichojji cuana; ijja canaje eso'. <sup>5</sup> Pea eso' oquequinaje mei biajje. Meshi chamajo eso' pohua cuaji'ajja'yonaje. <sup>6</sup> Quijje cuayanaje eshequi. Eshequi quea quiyo nee poajo, eso' quiyomano'yonaje. Esajja joca'yajo mano'yonaje. <sup>7</sup> Pea eso' oquequinaje acuisha huasijje. Pohua'yo majje jjonohua bebo ca'yonaje. Tatajo nequi jjajja ajja poanaje; mano'yonaje. <sup>8</sup> Pea eso' ca ca oquequinaje meshi quea pame yasijje. Pohua'yonaje eso' cuana. Ejjajja quea pame nee nee poanaje. Oe esajo ejjajja iye huiso aninaje; pea esajo ejjajja quea huiso aninaje, pea esajo quea huiso nee nee aninaje. Sejja ca'yonaje quea huiso nee. <sup>9</sup> ¡Jamajjeya ecuea esohui shajja'ajjacue! ¡Jjashahuabaquicue! —Jesosaa acanaje.

*Esohui ebameesahuajji Jesosaa sohuihuohui canaje ona jjashahuabaquijji**(Mateo 13.10-17; Noca 8.9-10)*

<sup>10</sup> Quijje pea cuana o shajja'ajjaji cuana nijje poeyanaje Jesosa que. Huohui'ajja canaje jama ba'a: —Jesosa, ¿apiojji acuae miyaya esohui ebameesahuajji huohuiaña? Maya ecuanaja quea quehua pishana. ¡Ba meesahua socue! —poanaje.

<sup>11</sup> Oya cuana saja'a canaje Jesosaa: —Miquianaya ca ca oe Eyacuiñajjiya ba meesahua cani eya ojjañaja Emeshi Mese nei poaje'yo. Yahuajo ba mee jjima poa. Pea cuana ca ca ba meesahua ajja. Jamajjeya eyaya esohui ebameesahuajji huohuinaje ona jjashahuabaquijji. <sup>12</sup> Jamatii ecuea esohui shajja'ajja majje oya cuana jjashahuabaqui ajja, jjashajja'ajjaqui ajja, de. E'e, Eyacuiñajjiya esohui huohuijji Isaia yahuajo nei nei jama poa ba'a:

“Shajja'ajja huicha'a huicha'a majje jamatii jjashajja'ajjaqui ajja poaje. Eyacuiñajjiya acani ba huicha'a huicha'a majje jamatii jjashahuabaqui ajja poaje. Ecuea esohui eba jojjemo, eshajja'ajja jojjemo jjabahuejjaqui'yome. Pea'ai enijje ejjapeequi'yo jojjemo, eyaya mimishi cuijea'yome”.

Jamaya yahuajo nei nei tehue ca poa etiiquiana Isaiaa shajjama' cuanajo —Jesosa poanaje.

*Jesosaa esohui ebanajjijo ba mee canaje**(Mateo 13.18-23; Noca 8.11-15)*

<sup>13</sup> Majoya Jesosaa oya cuana jama acanaje ba'a: —¿A'a ma esohui ebameesahuajji miquianajaya quea quehua? ¿Jamajjeya achajja acuae oe miquianajaya eba poaje pea esohui ebameesahuajji? ¡Shajja'ajjacue! Eyaya miquianaya ba meesahuaje ecuea ehuhui'yo ebanajjijo: <sup>14</sup> Jiquio ecua ebanajjiya eso' jeaaja cani jayojja jama Eyacuiñajjiya esohui huohuijjiya esohui huohui canaje ojjaña huasijje. Beca cuana ejiojji yasijje oquequi eso' cuana cuichojjiya ijjaajeyo ca'yonaje. <sup>15</sup> Jamaya pea'ai beca cuana ecuea esohui eya ojjañaja Emeshi Mese oe nei poaje shajja'ajja majje jamatii jjashahuabaqui ajja. Jamajjeya Edosiquiaa o que poe majje ecuea esohui pajea mee cani. <sup>16</sup> Beca cuana

eso' mei biajje oquequinaje jayojja jama ecuea esohui shajja'ajja majje quea bihui nee enijje jjapeecuaji'ajjaquiani. <sup>17</sup> Jamatii ecuea esohui jayojja jama ba'e tiitii ajja. Eso' mei biajje pohua esajja joca'yajo mano'yani jayojja jama poani; pea cuaa oya napa cajje, Eyacuiñajji nijje jjapeepajeaqui'yani. <sup>18</sup> Beca cuana eso' acuisha nijje pohuani jama poani. Acuishaa bebo cajje jjajja ajja jayojja jamaya ecuea esohui shajja'ajja majje jjapee nishoquiani. <sup>19</sup> Jamatii oya cuana quea bejjo nahue poanijo aquianajo quea huiso jjashahuabaquianijo, quea mete pea'ai poanijo Eyacuiñajjijo chaco ajja. Esohui pajea cani. <sup>20</sup> Eso' meshi quea pame neejo pohua majje quea jjajja huiso poanaje jayojja jama ca ca beca cuana; ecue sohui shajja'ajja majje jjabahuejjaquiani; ecuea epeeji quea ja'a nee nee poani, pea cuana ejo jjabahuejjaqui meesahua cani; iye huiso pojja'a, quea huiso pojja'a, quea huiso nee nee pojja'a —Jesosaa oya cuana acanaje. Mahuiso.

*Esohui ebameesahuajji cuaquijijjo*  
(Noca 8.16-18)

<sup>21</sup> Majoya Jesosaa pea esohui ebameesahuajji huohui canaje cuaquijijjo jama ba'a: —¡Bacue! Cuaquijiji dedo majje eseyaya nequia ajja tepe quimejjeje. Ejaajji quimejjeje pea'ai nequia ajja. Chojja, de. Acui ecaca biajje nequia'aña equi jeaja'ajji. <sup>22</sup> Jiquio ecua dedo majje cuaquijijjiya eyajo nequia ojaña jeaja'a cani jama jayojja Eyacuiñajjiya ojaña ecuea esohui onaya ba mee caje'yo quijje. E'e, ojaña ecuea esohui miquianajaya eba jjeya, Eyacuiñajjiya quijje pea cuana ba mee caje'yo. Quea ja'a nee poaje'yo. <sup>23</sup> ¡Jamajjeya miquianaaya quea shajja ja'aa shajja'ajjacue! ¡Ecuea esohuijjo jjashahuabaquicue!

<sup>24</sup> Majoya Jesosa ojaña nijje jama poanaje pea'ai ba'a: —¡Ecuea esohui shajja'ajja majje ecuea esohui shahuaba neineicue; jama acue! E'e jjashahuaba neineiquianijo, Eyacuiñajjiya miquianaya quea huiso nee nee ba meesahua caje. Oe pojji jjashahuabaquianijo ca ca oe pojji ba meesahua caje. <sup>25</sup> Jamajjeya joya Eyacuiñajjiya esohui ba cani quea huiso pishana, quijje quea huiso nee ba mee caje'yo. Joya ojaya esohui ba sa po ajja ca ca pajea caje'yo. Mahuiso —Jesosa poanaje.

*Esohui ebameesahuajji eso' pohuanijo*

<sup>26</sup> Majoya Jesosaa oya cuana huohui canaje pea esohui ebameesahuajji. Jama poanaje ba'a: —Eyacuiñajjiya esohui ejo ebanajjiya eso' bana canaje jama. Eso' ache bame nee quecua canaje quejo, anoso pojja'a. <sup>27</sup> Majoya ojaña echacojji cuana ecahuijaajo, epojjajo po'ayequeiquijo pea'ai eso' pohuani, tiiani pea'ai. Jamatii ojaya ba jjima achajja shai eso' tiiani. <sup>28</sup> E'e, meshi quea pame neejo bana eso' jamatii pohuani, tiiani. Tii majje jjajjani. Majoya jamatii jahuani. <sup>29</sup> Jahuajo, eque meseya echacojji cuana huoojea cani anoso sejja'yohua. Jiquio ecua eso' tii majje quea jjajja huiso poani jayojja jama ecuea epeeji cuana jjeya oe pojji yani; jamatii quijje quea huiso nee nee poaje'yo. Majoya ojaña jjachichaqui mee caje'yo Eyacuiñajji cojja nei enequijji —jamaya Jesosaa huohui canaje.

*Esohui acui so' che biso nee neejo, motasa bajjanijo*  
(Mateo 13.31-32; Noca 13.18-19)

<sup>30</sup> Majoya Jesosaa pea esohui eba meesahuajji huohui canaje jama ba'a: <sup>31</sup> — Eyacuiñajjiya esohui ojaya epeeji cuanajo jama pea'ai ba'a: Motasa bajjani eso' bana cani equi quibojo. Jiquio eso' che biso nee nee. <sup>32</sup> Tii majjeya ca ca quea cui quemo nee poaje, apo'e cui quemajja. Jamajjeya cuichoiji cuana poeyani motasa acui biajje cahuiya —jamaya Jesosaa huohui canaje ojaña ba meeji quijje Eyacuiñajjiya epeeji cuana quea huiso nee, quea ca'a nee nee po mee caje'yo.

<sup>33</sup> Quea huiso nee pea esohui ebameejji Jesosaa huohui canaje Eyacuiñajjiya esohui eba meesahuajji. Onaya quea jjashahuabaqui ja'a pishanajo mi huohui tiitii canaje. <sup>34</sup> Esohui ebameesahuajjijo ca ca oe ojaña sohuihuohui canaje Jesosaa. Majoya ona poqui'yajo ohuaya o shajja'ajjajji nei ba meesahua canaje.

*Beni quea quemo nee nee*  
(Mateo 8.23-27; Noca 8.22-25)

<sup>35</sup> Ma pojajoyá siniajo Jesúsaa o shajja'ajjajji cuana iyaa canaje; jama acanaje ba'a: —Cua'a, Janinea bae ojje miji yasijje ebesapoqui —poanaje.

<sup>36</sup> Jamajjeya ojjaña cuana bae sahuajo ani equi yasijje huoojea majje o shajja'ajjajji cuana bishe ai yasijje nequisohuaquinaje Jesúsaa ani yasijje, ojje besapoquinaje. Pea cuana ca ca bishe sisi cuanajo besapoquinaje Jesúsaa quishishi. <sup>37</sup> O besapoquianijo beni quea quemo nee nee poeyanaje. Ena shajohua bishe nane canaje. Jeasohuajea canaje. Cuio canaje enaa. <sup>38</sup> Bishe ai yiyedojojo Jesúsaa cahuijaanaje, ehoojjajajji biajje jaa. O shajja'ajjajji cuaa quea mete po majje Jesúsaa ishe acanaje. Jama poanaje ba'a: —Emeshi Mese Jesúsaa, ¡shequicue oe! ¡Coya aje se hui'i'ya! —taanaje.

<sup>39</sup> Shequi'yo majje Jesúsaa nequisohuanaje. Beni tecuea canaje jama ba'a: —Beni, jamaya, ¡nequiquequicue oe! —majoyá bae ena nijje jama poanaje—; ¡a'a enashajo pojji!

O jama mimime poajo, enashajo popajea'yonaje. Ena shajoma'yo poanaje. Beni popajea'yonaje. <sup>40</sup> Majoyá Jesúsaa o shajja'ajjajji cuana jama acanaje ba'a: —¿Apiojji acuae nequiana quea mete nee nee poani? ¿A'a mi ejo e'e nei pojjeama poani? Jamajjeya meteani.

<sup>41</sup> Jamajjeya oya cuana bishe aijo ani Jesúsajo quea bihui nee poanaje. Ojee miminaje jama ba'a: —¡Ache dejja shai jiquio quea sohui poja nee nee! Beniyya, enashajo cuaa pea'aiya oja sohui shajja'ajja cani —ojjaña poanaje.

## 5

### *Dejja quea mase nee nee Jesúsaa niñe poquipajea mee ca'yonaje*

*(Mateo 8.28-34; Noca 8.26-39)*

<sup>1</sup> Jesúsaa o shajja'ajjajji cuana nijje besapoquinaje Janinea bae ojje miji yasijje, Jjanana meshi yasijje, Jenesane dejja cuanaja meshi yasijje. Jesúsaa bishe aijo ani ba'eñaqui majje etaja huasijje nequisohuaquinaje. <sup>2</sup> Ma meshijo dejja niñepoqui quea mase nee nequi. Eshahua quea huisohua oja eyami nequijji aca'yajje, ma dejja jjanijjo emano'yo sa' jaajo nequinaje. <sup>3</sup> Majo tii oya ba'e'yonaje jjanijjo, ma emano'yo huananobia cajjijo tii. Oya quea mase nee nee jjejojo jeyo'ajja canaje cuaa cadenaa. Jjajeyo meequi ajja, quea ca'a nee nee poanaje. <sup>4</sup> Yahuajo onaaya ojaya eme', ejiojji pea'ai jeyo'ajja huicha'a huicha'a canaje cadenaa, jjonohua pea'ai. Jamatii ohuaya cadena cuana jjequisejjajea canaje, sejjaquipiqipijea canaje. Onaaya oya jjabahuone meequi ajja, quea mase, quea ca'a, de. <sup>5</sup> Mecajje, epojjajo pea'ai oya eyiyo cuanajo, jjanijjo cuanajo pea'ai siasia'ani'yonaje. Jjajehuijjeaqui'aninaje meiya. <sup>6</sup> Jamajjeya oya niñepoqui Jesúsaa quea huesha nee ba majje o que jaoquecuajinaje. Quea ajjajja jjejojo ecui'oshajjajo nequinaje Jesúsaa bihuijji. <sup>7-8</sup> Jamajjeya Jesúsaa eshahua huoojeacuayajea ca'yonaje; jama poanaje ba'a: —¡Eshahua dejjajo nequi, cuayaqui'yocue! —Jesúsaa acanaje.

Eshahua taaa neineinaje jama ba'a: —Jesúsaa, miya Eyacuiñajji quea ca'a neeja Bacua Ejjá. ¡A'a jjeya eya quea nee nee po meeji! Eyacuiñajji huohuicue jama ba'a: “Jjeya eshahua ecuea enapajji pojjeama” acue —eshahua poanaje.

<sup>9-10</sup> —¿Ae bajjani miya? —Jesúsaa oya acanaje.

—Ecuana quea huiso neejo Quea Shahuá Huiso bajjani —saja'a canaje niñepoquiya —. Che mo miyaya ecuaña dejjajo nequi cuayaqui mee'yo majje ¡a'a quea huesha nee huoojeajji! —poanaje eshahua cuana.

<sup>11</sup> Quea chipi nee cuichi cuana quea huiso ijji'ijji nequi. <sup>12</sup> Jamajjeya eshahua cuaa Jesúsaa jama huohuime acanaje ba'a: —Che ecuaña dejjajo nequi huoojeacuayajea majje ¡cuichi cuana huasijje ecuaña huoojea'yocue!

<sup>13</sup> —E'e, ¡poquicue cuichi cuana huasijje! ¡Dobiquicue! —Jesúsaa poanaje.

Jamajjeya dejja niñepoqui jeanana'yo majje eshahua cuana cuichi cuana huasijje dobiquinaje, ojjaña. Dobiqui majje cuichi cuana cuajicuaji jaoquequinananaje. Bae quea sahua doe nee nee yasijje cuichi cuana hui'i'yonaje, ojjaña, beca mil huisome.

<sup>14</sup> Ba majje cuichi jaahuanajji cuana jjajjasoquinaje. Cuajicuajipoquinaje cuiñajji yasijje huohui pohua. Ojjaña equi yasijje huohui capoquinaje eshahua cuanajo. Cuichi cuanajo,



dejja niñepoqui'yo jjima po mee canajejo pea'ai huohui canaje. Jamajjeya ojjaña cuana ma cuiñajji ba'e poeyanaje Jesosa baa; dejja niñepoqui'yo jjima baa pea'ai: —¿Ae shai poanaje, de? —poanaje cuana.

<sup>15</sup> Jesosa que poe majje ojjañaa dejja niñepoqui'yo jjima ba canaje. Jjeya oya quea bei nequi, daquiiji, quea pame nee jjashahuabaquiani. Eshahua cuana chama'yo. Jamajjeya ojjaña cuana quea mete poanaje Jesusajo, <sup>16</sup> eshahua huoojeacuayajea mee ca'yonajejo, cuichi cuana ehui'i'yojojo pea'ai. Jamajjeya cuichi jaahuanajji cuaa pea cuana huohui majamaja canaje niñepoquiyo, Jesusaa eshahua huoojeacuayajea canajejo, cuichi ehui'i'yojojo pea'ai. <sup>17</sup> Ojjaña quea mete nee poanaje. Huohui canaje jama ba'a: —¡Jesosa, pea meshi yasijje poqui socue oe! Quea mete ca ña mijo mi quea sohui poja nee nee jojoya —poanaje ojjaña.

<sup>18</sup> Jamajjeya Jesosa bishe ai yasijje nequisohuaquinaje ojje ebesapoqui'yojji. Dejja ma niñepoqui poanaje onijje poqui sa poanaje, onijje e'anijji. <sup>19</sup> Jamatii Jesusaa oya jama acanaje ba'a: —Chojja, ¡miquea equi yasijje poquicue! ¡Miquea huapa pojjeama cuana huohuicue ejo, Emeshi Mese neiyo, ma miya ecuea quea boti neejo quea pame nee anaje huohuicue! —Jesosa poanaje.

<sup>20</sup> Jamajjeya ojaya equi yasijje poqui majje ohuaya Jesusajo huohui canaje. Ome Miji pea'ai Cuiñajji yasijje huohui canaje pea'ai. Ojaya esohui shajja'ajja majje ojjaña quea bihui nee poanaje: —¡Ache dejja quea ca'a nee nee Jesosa! ¡Eshahua cuana huoojeacuayajea ca'yonaje, de. E'e e, dejja niñepoqui quea pame nee jjeya, de! —poanaje ojjaña.

*Jainoja ebacua piona emano'yojaa; pea epona najji poani tii tii*  
(Mateo 9.18-26; Noca 8.40-56)

<sup>21</sup> Majoya Jesosa o shajja'ajjajji cuana nijje bae ojje miji yasijje poqui o'oyanaje bisheje. Quea huiso cuana jjachichaqui o'oyanaje o que, Janinea bae sahuajo. <sup>22</sup> Jesosa ojjaña cuana nijje mimianijo, pea Jodio dejja o que poeyanaje Jaino bajjani, ma Jodioja ejjachichaqui equi jaahuanajji poani. Ecu'i'oshajjajo nequiya oya bihuia canaje. <sup>23</sup> Jama poanaje ba'a: —Esohui huohuiiji, ecuea ebacua piona quea mano nee nee jaa, beshahua nee poquijeyonaje. ¡Ecuea equi yasijje poecuaicue o napa'ajjaa emeya! Jamajjeya oya huaquiaje'yo. Quea aja nee poaje'yo.

<sup>24</sup> Nequisohua majje Jesosa o shajja'ajjajji cuana nijje poquinaje Jaino nijje. Quea huiso cuana poquinaje onijje pea'ai, ojjaña Jesosa nijje nequi canaje cuana. <sup>25</sup> Poquije, oe eponaa Jesosa ba canaje. Oya quea mano, najji popajea'yo ajja. Ome miji pea beca, 12 shequiajame na cuayapajeaqui'yo ajja poa. <sup>26</sup> Quea huiso eshicuiiji quiaiji cuaa oya na cuayapajeaqui mee'yo jjima acanaje. Jamajjeya eshicuiiji soseje ojjaña ojaya ejjesheji oe poanaje. Jamatii na' huosa jjima tii, quea nee tii. Yahuajo quea mano pishana poanaje; jjeya ca ca quea mano nee nee. <sup>27</sup> Jesusajo shajja'ajja majje, ma Jesusaa ojjaña huaquia mee cani shajja'ajja majje oya poeyanaje o que. Quea huiso nequi dejja tejee poeyanaje epona. <sup>28</sup> Jamaya oya jjashahuabaquinaje ba'a: —Eya Jesosa daqui napa majje na huosaje'yo —jama jjashahuabaquimeya poanaje epona.

<sup>29</sup> Jamajjeya Jesusaja daqui quehuajje napa canaje. Jjeyahua nei najji po pajea'yonaje. Ma epona quea bihui nee jjashahuabaquinaje: —E'e e jjeya nei eya na cuayapajeaqui'yonaje, apoa po'yonaje.

<sup>30</sup> Jesosa epona nahuosa mee'yo jeahuajo jjashahuabaquinaje jama ba'a: —E'e nei, jjeyahua nei Eyacuiñajjiya a'ya shai huaquia mee ca'yonaje e daqui napa'ajja cajo.

Jjeyahua nei Jesosa jjabajeaquinaje. Ojjaña cuana ejjachichaqui nequi huohui'ajja canaje jama ba'a: —¿Aya acuae ecuea daqui napa'ajja canaje so'o?

<sup>31</sup> O shajja'ajjajji cuana onijje jama poanaje ba'a: —Jesosa, quea huiso nee nee ejjachichaqui nequi minijje. Jamajjeya ¿yajjajje shai miyaya huohui'ajjaña jama ba'a: “¿Aya shai ecue daqui napa'ajja canaje?”

<sup>32</sup> Jesusaa ca ca baja neinei canaje epona ena huosa'yo ebajji. <sup>33</sup> Jamajjeya ma epona ojaya emanomeejji chama'yo ba majje Jesosa que poqui'yonaje; Jesosa yajjajo piopionaje. Ecuio'oshajjajo nequiya Jesosa huohui canaje ohua na' huosa mee ca'yajje. Ojjaña huohui canaje eponaa. <sup>34</sup> Majoya Jesusaa oya acanaje jama ba'a: —¡She, quea bihui nee pocue! Miya quea ja'a jjashahuabaquinaje jama ba'a: “E'e jojo nei Jesusaa eya huaquia mee caje'yo”. Jamajjeya eyaya miya huaquia mee'yonaje. ¡Quea quiijiji jaji oe po'yocue! ¡A'a manoshishi o'oyajji! —Jesusaa acanaje.

*Epona sho'i eshe po mee ca o'oyanaje*

*(Mateo 9.23-26; Noca 8.49-56)*

<sup>35</sup> Majoya Jesosa epona nijje mimianijo tii, Jainoja epeeji poeyanaje. Jama poanaje ba'a: —Jaino, miquea ebacuase mano'yonaje. Chama'yo tii po'yonaje. ¡Jamajjeya esohui huohuijiji a'a iyaajji equi yasijje o baa! —poanaje.

<sup>36</sup> Jiquio esohui shajja'ajja majje Jesusaa Jaino jama acanaje ba'a: —¡A'a quea yeno pojji! Jamaya jjashahuabaquicue ba'a: “Jesosa quea ca'a nee nee. Ohuaya ecuea ebacuase shequi mee caje'yo e'e jojo nei” acue.

<sup>37</sup> Majoya Jesusaa pea cuana huoojea canaje jama ba'a: —¡A'a enijje poquijiji! —poanaje.

Jamajjeya Jesosa, Peno, Satiaco, oja chahua Huani ca ca oe Jaino nijje poquinaje oja equi yasijje, oja bacua baa. <sup>38</sup> Jainoja equi yasijje poqui majje ba cañaquinaje quea huio de jja cuana, ponaña pea'ai equijo nequi. Epona sho'i emano'yojo ojee pa'ani. Ojjaña quea shajjaquijjo poani. Dehue mia cani emojea'yojjijo pea'ai. <sup>39</sup> Equi yasijje dobiqui majje Jesosa jama poanaje ba'a: —¿Yajjaje acuae pa neinei, quea shajjaquijjo nee poani nequi? Jiquio epona sho'i epoquijeyo'yo pojjeama. Oya cahuijaa.

<sup>40</sup> —Chojja de, oya mano'yonaje, de; shequi'yo ajja —poanaje cuana.

Ojjaña cuana esecue yasijje huoojeacuayajea majje Jesosa o shajja'ajjaji cuana nijje, ejeajji nijje, enaese nijje cuanaya epona sho'i jaa huasijje dobiquinaje pea equacuayijji yasijje. <sup>41</sup> Me' iña majje epona sho'i oja sohuijo huohui canaje: —¡Tanitacomi!

Ese Eja esohuijo ca jama poanijje ba'a: —¡Epona sho'i, nequisohuacue! —Jesusaa acanaje.

<sup>42</sup> Me' iña majje epona sho'i shequi mee ca'yonaje. Jjeyahua nei oya nequisohua majje jeo'yonaje. E'e, oya etii pishana, ahuema' ani, 12 shequiajame.

Jamajjeya epona sho'i shequi mee ca'yonaje ba majje ojjaña cuana jjajjasoquinaje; jama poanaje ba'a: —¡E'e jojo nei Jesosa jjashequimeequi'yojji, de! Jiquio epona sho'i emano'yojaa jjeya nei shequi mee ca'yonaje, de —poanaje.

<sup>43</sup> Jesusaa ojjaña huohui canaje jama ba'a: —E'e, jmatii a'a jjeya pea cuana huohuijiji jiquio eya miquea bacua shequi mee'yonajejo!

Majoya Jesosa jama poanaje enaese nijje, ejeajji pea'ai nijje ba'a: —¡Miquea ebacua piona bobiacue! —poanaje.

## 6

*Jesosa Nasanena meshi yasijje poqui'yonaje*

*(Mateo 13.53-58; Noca 4.16-30)*

<sup>1</sup> Majoya Jesosa jomajo ani poqui o'oyanaje ojaya cuiñajji yasijje, Nasanena huasijje. O shajja'ajjaji cuana nijje poquinaje. <sup>2</sup> Epojja ejomishocajjijo Jodioja equi ejjachichaquijji yasijje poqui majje dobiquinaje. Esohui huohui canaje. Ojaya esohui shajja'ajja majje ojjaña cuana quea tecue nee poanaje, Nasanenajo ba'eca cuana. Oya Jesosa Joseja jea poso acanaje cuaa.

—¡De! ¿Yajjaje shai jiquio de jja Jesosa esohui quea ja'a nee nee huohui cani? ¿Eyacuñajji jayojjaya jjaajaqui mee ca'yani emanojaa quea huio nee, de? <sup>3</sup> Oya aje oe acui cacajjija bacua ejja pojja'a. Oja nae Mania bajjani, oja chahua cuana Jacobo, Jose, Simohui, Jonasa pea'ai bajjani. Oja jjo'i cuana pea'ai jiquiojo ba'e.

Jamajjeya quea quene poanaje Jesosa nijje; Joseja jea poso cajaa acanaje cuaa.

<sup>4</sup> Jamajjeya Jesusaa oya cuana jama acanaje ba'a: —E'e de, pea cuaa Eyacuñajjija esohui

huohuijji shajja'ajja cani. Jamatii ojaya cuiñajjijo ojaya huapa pojjeama cuana ca ca oe o shajja'ajja sa po'yo ajja. Oya jayojjaya miqúanaya e shajja'ajja sa po'yo ajja.

<sup>5</sup> Jamajjeya oya cuana shajja'ajja sa po'yo ajjajo, oya Eyacuiñajjija Bacua pojjeama posojo, Jesosaa oe pojji napa'ajja cajje jjaajaqui mee ca'yonaje. Ma dejjaa ajjima acani oe pojji nei acanaje Nasanenajo. <sup>6</sup> Jamajjeya Jesosa jjashahuabaquinaje jama ba'a: — ¿Yajjajje shai Nasanenajo ba'eca cuana quea sapa ca'a poani? Ejo e'e nei jjashahuabaqui ajja —poanaje.

Jamajjeya Jesosa o shajja'ajjajji cuana nijje poquinaje quea huiso cuiñajji sisi cuana huasijje esohui huohuiya.

*Jesosaa o shajja'ajjajji huoojea canaje esohui huohuiya*

*(Mateo 10.5-15; Noca 9.1-6)*

<sup>7</sup> Majoya Jesosaa o shajja'ajjajji 12 huisome iyaa canaje o que. Oya cuana quea ca'a po mee canaje eshahua cuana huoojeacuayajea'yojji, ojjaña emanojaa cuana huaquia mee'yojji, ejaajaqui mee'yojji pea'ai. Oya cuana becamejijji pea'ai huoojea canaje ojaya esohui shajja'ajjajji cuana pea cuiñajji cuana huasijje ojaya esohui huohuiya. <sup>8</sup> Huohui canaje jama ba'a: —¡Jjeya a'a aquiana dojojji! ¡Oe acui ejaquecuaca'aquijji dojocue, beca pojjeama! ¡Bashosoco bobi dojojji a'a dojojji! ¡Ejjeshejji, bobi pea'ai a'a dojojji! <sup>9</sup> ¡Ejiojji shejee oe huosho'yocue! ¡Daqui oe nei, ma miquea eyamijo ba'e nei oe dojocue, beca pojjeama! <sup>10</sup> ¡Pea cuiñajji yasijje poqui majje sa'ajjacue oe dejja miquea epeejji epojji, joya bei bei! ¡Ojaya equijo anicue ma cuiñajjijo nequi majje! <sup>11</sup> E'e pojja'a beca equijo, beca cuiñajjijo miquea esohui shajja'ajja sa po'yo ajjajo, niñeba canijo pea'ai, ¡oya cuana jeajeana'yocue! Poquije'yohua jama acue ba'a: “Eyaya miqúanaya cajaa aje'yo, quea mimishi mi coma. Eyacuiñajjiya miya ba cani quea mimishi nee nee. Ohuaya miya quea nee nee po mee caj'e'yo” acue —Jesosaa poanaje.

<sup>12</sup> Jamajjeya Jesosa shajja'ajjajji cuana poquinaje. Ojjaña cuiñajji cuana huasijje esohui huohui canaje. Jama poanaje ba'a: —¡Miquea mimishi cuanajo quea yeno pocue! ¡Mimishi pajea'yocue Eyacuiñajjija epeejji epo'yojji! —acanaje cuaa.

<sup>13</sup> Quea huiso eshahua cuana dejja cuanajo nequi huoojeacuayajea ca'yonaje. Quea huiso emanojaa cuana acuijjajja seiyya shicui majje jjaajaqui mee ca'yonaje, huaquia mee ca'yonaje pea'ai, Jesosa shajja'ajjajji cuaa.

*Enode Antipaa Huani sapa jajasejjajja mee canaje*

*(Mateo 14.1-12; Noca 9.7-9)*

<sup>14</sup> Jesosa Janinea meshijo anijo, Janinea meshi meseya Enode Antipa bajjaniya shajja'ajja canaje onaja ehuohui'yo ojo. Beca cuana Jesosa Huani shequi o'oyanaje poso acanaje jama ba'a: —E'e nei jiquio dejja aje oe Huani, ma ona besameejji poa. E'e pojja'a oya mano'yo majje shequi o'oyanaje. Jamajjeya ohuaya Eyacuiñajjiya jayojjaya acani, ma dejjaa ajjima acani —poanaje beca cuana.

<sup>15</sup> Pea cuana ca ca jama poanaje ba'a: —Chojja, oya etiquiana Enia, ma yahuajo nei Eyacuiñajjija esohui huohuijji poanaje poe o'oyanaje.

Pea cuana ca ca jama poanaje ba'a: —Oya ca ca oe Eyacuiñajjija esohui huohuijji eyacua, yahuajo nei nei ba'e Eyacuiñajjija esohui huohuijji jayojja jama.

<sup>16</sup> Enode Antipa ca ca onajaya ehuohui'yo Jesosajo shajja'ajja majje quea mete nee jama poanaje ba'a: —E'e de, yahuajo ecuea esohuijo Huani sapa jajasejja ca poa. Oya shequi o'oyanaje e'e jojo nei. Jamajjeya Eyacuiñajjiya jayojjaya acani ma dejjaa ajjima acani; quea huiso huaquia mee cani —poanaje Enode.

<sup>17</sup> E'e, yahuajo emeshi mese Enode Antipaja edoe mese Penipeja ehuanase Enodiasi bajjani Huani nijje quea quene nee nee poa. Jamajjeya Enode Antipaya Huani iña mee ca poa; jeanobiajea mee ca poa. Enodiasiya aje oe oja yahue huei ca poa Enode nijje eba'ejji, ojaya esha mese nijje eba'ejji. <sup>18</sup> Jamajjeya Huaniya yahuajo Enode Antipa jama tecueame aca poa ba'a: —¡Miyaya aje oe mique doeja, Penipeja ehuanase Enodiasi a'a huana'yojji! Jamaya quea mimishi —Huaniya aca poa.

<sup>19</sup> Jamajjeya ohua tecuea cajje quenequenea poa Enodiasi Huani nijje. Quecua sa aca poa. Jamatii quecua jjima; <sup>20</sup> oya Enode quea mete poanaje. Oya jjashahuabaquinaje Huani Eyacuñajjija esohui huohuijji nei neiyojo, ojaya epeeji nei poanaje. Jamajjeya nahue canaje Enodiasiya equecua ca poaje jjejojo. Huanija esohui shajja'ajja sa poa Enode Antipa, jamatii ojaya quea quehua. Huani equi ejjajejanobiaquijjijo jaa iyaa huicha'a huicha'a canaje esohui huohuiya. <sup>21</sup> Jamatii quijje Enodiasiya Huani sapa jajasejja mee canaje. Jiquio jama poanaje ba'a: Enodeya o cuaya poa pojajajo ojjaña ojaya epeeji cuana iyaa canaje ojee ijjia'ijjiaa, majamajaqui baa pea'ai. Ojaya echaco meesahuajji, dejja etii cuana, sohuinano huoojeajji poani cuana pea'ai, Janinea meshijo ba'e dejja etii cuana pea'ai quea huiso nee nee iyaa canaje. <sup>22</sup> Ojjaña ijja'ijjia'anijo, Enodiasija bacuase pea'ai oe nei majamaja nequinaje ojjaña ebaaji, quea bihui nee epo meeji. Enode Antipa quea bihui nee nee poa epona sho'ijo. Jamajje onijje miminaje jama ba'a: —¿Ae shai sa miya poani? ¡Huohuicue mo! Eyaya joya miya sañaya quiaje e'e jojo nei, she —acanaje Enodeya —. <sup>23</sup> E'e jojo nei she coya miya saje aje mi quiaje; miya huohuiañaya ca mi ca quiaje, ecue meshi sejja aje mi quiaje miquea epojji —huohui neinei canaje Enodeya.

<sup>24</sup> Jamajjeya epona sho'i poquinaje ojaya enaese Enodiasi huohui'ajjaa.

—E'e —oja nae poanaje—, e'e, ¡Huani sapa jajasejjajea meequicue she!

<sup>25</sup> Epona sho'i poe o'oyanaje Enode que. Huohui canaje jama ba'a: —Huani, ma ona besameeji poani ejeanobiajaa. ¡Ojaya esapa jajasejjajea'yo majje piatojo jjequicue jjeyahua nei! Maya eya sa poani.

<sup>26</sup> Ma shajja'ajja majje emeshi mese Enode quea ajjajja nee nee poanaje. Jamatii ojaya esohui epona sho'i nijje ojjaña ojaya epeeji cuanaa shajja'ajja canaje. Jamajjeya ojaya esohui pajea ajja, Enodeja. <sup>27</sup> Jamajjeya ohuaya sohuinano cuana huoojea canaje: —¡Epona sho'ija esohui jayojja jama acue! ¡Huani ma ejeanobiajaa oe sapa jajasejjajeaquicue! ¡Jjequicue jjeyahua nei! —poanaje.

<sup>28</sup> Jjeyahua nei sohuinano cuana poquinaje Huani que. Huani sapajajasejjajea ca'yonaje. Esapa jjequi canaje piatojo. Epona sho'i quia canaje. Majoya ohuaya Huanija esapa oja nae yasijje quia cañaqui'yonaje, epona sho'iyaa. <sup>29</sup> Majoya aje oe Huani shajja'ajjajji poani huohui canaje cuaa. Jamajjeya oya cuana poeyanaje o dojo'yohua, emojea'yojji. Mojea'yo majje papoqui'yonaje Jesosa huohuiya.

*Jesosaa 5.000 dejja cuana bobia canaje*

*(Mateo 14.13-21; Noca 9.10-17; Huani 6.1-14)*

<sup>30</sup> Majoya quijje pishana Jesosaja huoojea'yo cuana ojjaña cuiñajji yasijje esohui huohuiya poqui huacuaya poe o'oyanaje o que. Oya cuana huohui poñaquinaje ojjaña ohua acanaje, ojjaña ojaya esohui ma ohua huohui canaje pea'ai huohui canaje Jesosa huasijje. <sup>31</sup> Quea huiso nee nee dejja poe majamajanijo ijja'ijjia meemee ajja. Jamajjeya Jesosaa oya cuana acanaje: —¡Cua'a, dejjama huasijje ejomishocaqui! Quea huiso nee nee ejjachichaqui nequi cuaa se ijja'ijjia mee jjima acaje —Jesosaa acanaje.

<sup>32</sup> Jamajjeya Jesosa o shajja'ajjajji nijje nequisohuaquinaje bishe ai yasijje. Besapoquinaje quima huasijje. <sup>33</sup> Jamatii Jesosa besapoquije ba majje quea huiso dejja cuana cuiñajji cuana ba'e ejiojjijje poqui canaje Jesosa baa. Poquicuajinaje ma Jesosa besapoquije yasijje. Ebionei jjaja onaya aniñaquinaje, Jesosa hui que añaquia. <sup>34</sup> Quijje pishana Jesosa o shajja'ajjajji cuana nijje ba'eñaquinaje. Bishe aijo ani nequisohuaquinaje etaja huasijje. Quea huiso nee nee cuana ba cañaquinaje. Onajo Jesosa quea yeno jjashahuabaquinaje. E'e, oya cuana quea yeno, quea mano nee ñajjajja jaahuana jjima jayojjaya. Jamajjeya oya cuana sohuihuohui canaje quea huiso nee nee Jesosaa. <sup>35</sup> Siniajo Jesosa que poe majje o shajja'ajjajji cuaa huohui canaje jama ba'a: —Jesosa, sinia coma, de. Chama' jiquiojo bobi, equi pea'ai. <sup>36</sup> ¡Dejja cuana huoojeacue cuiñajji sisi cuana huasijje oja bobi jjesheya!

<sup>37</sup> —Chojja. Ca'aniahua cuana. ¡Bobiacue oe miquiaaya! —Jesosaa acanaje.

—¿Yajja yajji? Ecuanaa bobi quea huiso nee nee jjeshe ajja. Quea nahue nee nee, de, 200 epojja echacojji sosejje. E'e, quea huiso pojajjo chaco majje sosejje, pahui jjeshe cajji, ca ojjaña bobiajji.

<sup>38</sup> Jamajjeya Jesusaa jama acanaje ba'a: —¿Ache huiso pahui yani esejaya? ¡Pahui baquicue!

Ba majje oya cuana jama poanaje ba'a: —Jesusa, esejaya bobi oe pojji yani. Me oejje pahui, beca nahuoo sisi yani pea'ai —poanaje o shajja'ajjajji cuana.

<sup>39</sup> Jesusa jama poanaje ba'a: —Ojjaña cuana jama acue ba'a: “¡Ojjaña anioquecue sipone biajje!” acue —Jesusaa acanaje—. ¡Ojee jja'anichicha meequicue! ¡Anijji becabeca anioque meeme acue!

<sup>40</sup> Jamajjeya quea huiso sipone yanijo, ojjaña cuana anioque mee canaje sipone biajje. Jomajo iye huiso anioquenaje, 50; quea huesha pishana iye huiso anioquenaje, 100. Jamaya anioque bamebamenaje cuana ojjaña, de.

<sup>41</sup> Majoya Jesusaa me oejje huiso pahui, nahuoo sisi becanejjijji pea'ai jjeshe majje eyahuasijje jjabajeasohuaquinaje Eyacuiñajji nijje emimijji. Bobijo mimi majje pahui miji canaje. O shajja'ajjajji cuana quia mee canaje dejja cuana e'anioqueani yasijje. Nahuoo sisi pea'ai miji majje quia mee canaje ojjaña huasijje. Quia capoquijeya quea huiso nee nee jjapanaqui poquipoquinaje bobi, de. <sup>42</sup> Jamajjeya ojjaña ijji neinei canaje. Quea jeje poanaje. <sup>43</sup> Ojjaña jeje majje eshajja'ajjajji cuaa chicha ca'yonaje bobi ojjañaja ijjiasejja. Jjepai ai yasijje iya ca'yonaje. Quea huiso nee poanaje, 12 jjepai huisome quea cuata poanaje bobi e'ijjiasejja. <sup>44</sup> E'e, Jesusaa quea huiso nee nee bobia canaje, de, 5.000 dejja.

*Jesosa bae ena biajje poquinaje*

*(Mateo 14.22-27; Huani 6.16-21)*

<sup>45</sup> Jjeyahua nei siniajo Jesusaa o shajja'ajjajji cuana huoojea canaje. Jama acanaje ba'a: —¡Bishe ai yasijje nequisohuaquicue! ¡Bae ojje miji yasijje besapoquicue Betesaida cuiñajji yasijje! Quijje eya poquije mi que, pea cuana huoojea'yo majje —poanaje.

<sup>46</sup> Majoya dejja cuana quea huiso cuana huoojea'yo majje Jesusa eyiyo huasijje jaasohuaquinaje oe nei oja Chii nijje mimiya. <sup>47</sup> Mecajje Jesusa oe nei jomajo aninaje, eyiyojo. O shajja'ajjajji cuaa ca ca bishe ai quea huesha nee yo canaje, bae yiyesama huasijje. <sup>48</sup> Jomajo ani Jesusaa oya cuana ba canaje, janobajjima nei yoyo'ajja ba'e. E'e, beni quea quemo nee poeyanaje. Bishe cuiaje ca'yonaje huacuaya. Enashajohua bishe janobajjima nei nane canaje, cuio canaje enaa. Mecashono quea apo nee nee poanaje. Jamatii Jesusa eyiyojo ani o que poquinaje ena biajje. <sup>49</sup> Jesusa ena biajje jeojejebeje ba majje o shajja'ajjajji cuana quea mete nee nee poanaje. Quea metejo taaanaje jama ba'a: —¡Coya ae shai poeje ba'a! —siasianaje—. ¡Coya eshahua, de!

<sup>50</sup> Jamajjeya Jesusaa oya cuana huohui canaje jama ba'a: —¡A'a quea mete pojji! Eya jja iña jiquio, eshahua pojjeama. ¡Quea jaji nee pocue!

<sup>51</sup> Majoya Jesusa bishe ai yasijje aniajo, beni nequioquequi'yonaje. Jamajjeya ojjaña cuana bishe aijo aniya jjajjasoaquinaje. Quea jaji nee po'yonaje: —E'e pojja'a, e'e jojo nei, de —poanaje.

<sup>52</sup> E'e, Jesusaa ma dejjaja ba jjima acanaje; 5.000 dejja cuana bobia canaje me oejje pahuijo. Jamatii oya cuanaja eba pojjeama Jesusa quea ca'a nee nee, ojjaña acani. Oya cuana ca ca quea jjashahuabaqui ja'a po jjima.

*Cuichi cuana hui'i'ya poa meshi yasijje Jenesane' meshi yasijje besapoqui o'oyanaje*

*(Mateo 14.34-36)*

<sup>53</sup> Quijje pishana bae ojje miji yasijje, Jenesane' meshi yasijje besapoqui o'oyanaje Jesusa. Ba'eñaquinaje o shajja'ajjajji cuana nijje. <sup>54</sup> Bishejo ani nequisohuaquinaje etaja huasijje. Dejja cuaa jomajo ba'eya Jesusa ba canaje yahuajo. <sup>55</sup> Jamajjeya o ba o'oya majje ojjaña iyaaqui canaje Jesusa que epoecuajijji. Ojjaña emanojaaca cuana equipajaajjijo jaa Jesusa que ye canaje. <sup>56</sup> Jamajjeya Jesusa cuiñajji quea quemo huasijje, pea cuiñajji sisi

cuana huasijje pea'ai, equi cuana huasijje pea'ai dobiqúi yajo, dejja cuaa emanojaa cuana jjequi canaje o que, jjaajaqui mee'yohua. Huohui canaje cuaa jama ba'a: —Jesosa, ojjaña emanojaa cuana mique daqui che napa'ajja meecue ehuaquia'yojji, ejjaajaqui'yojji — acanaje.

Ojjaña Jesusaja daqui napa'ajja majje jjaajananaqui'yonaje, huaquia'yonaje pea'ai, de.

## 7

*Quea jjashahuabaqui tai poanijo quea tai poani*

*(Mateo 15.1-9)*

<sup>1</sup> Majoya Paniseo cuana, Jodio esohui huohuijji cuana pea'ai Jenosanenajo ba'e Jesosa que poeyanaje. <sup>2</sup> Poe majje o shajja'ajjajji cuana ba canaje ijia'ijia'ani eme' shacua neinei jjimajo. Jamajjeya Jesosa tecuea canaje Jodio etii cuaa. Jama poanaje ba'a: —Esohui huohuijji, ¿apiojji acuae mi mi shajja'ajjajji cuana eme' shacua neinei jjimajo ijia'ijiani? — acanaje Jodio etii cuaa.

<sup>3</sup> E'e, ojjaña Jodio cuaa aje oe ijia jjimahuajo eme' shacua neinei cani; quea huiso shacuame acani, 7 huisome, ojaya etiiquiana cuanaja esohui jama. <sup>4</sup> Equi aquiana jjeshejji yasijje bobi jjeshe majje eme' shacua neinei cani ijia jjimahuajo pea'ai Jodio cuanaja etiiquianaja esohui jayojja jama. Quea huiso etiiquianaja esohui jayojja jama acani pea'ai: piato cuana, oña cuana, caneco cuana jamaya topo neinei cani pea'ai; meshimisi ca'a quea quemo cuana, e'anioquejji cuana jamaya topo neinei cani pea'ai. <sup>5</sup> Jamajjeya Paniseo cuana, Jodio etii cuana Jesosa nijje mimijajinaje: —Jesosa, ¿apiojji acuae mi mi shajja'ajjajji poanija esejaya etiiquianaja esohui jama po ajja? ¿Apiojji acuae ijia'ijia jjimahuajo eme' shacua neinei ajja, de? — poanaje.

<sup>6</sup> Jesusaa oya cuana quea tecue saja'a canaje jama ba'a: —¡Miquianaya ca mi ca oe jjadasiaquiijji nei nei! Eyacuiñajji esohui huohuijji Isaiaja esohui miquianajo e'e jojo nei poa. E'e, yahuajo nei Eyacuiñajjiya Isaija tehue mee ca poa jama ba'a:

“¡iquio dejja cuaa eya bihuia nisho cani. Jamatii jjashajja'ajjaqui ajja. <sup>7</sup> Jamajjeya ecuea equi yasijje jjachichaquiani ejjachichajeaquiijji. Ohuaya ojaya ejjashahuabaqui'y-  
ojji huohui cani, ecuea esohui pojjeama”.

Jamaya Isaiaa yahuajo tehue ca poa miquianajo —Jesosa poanaje—. <sup>8</sup> De, ¡yajja acuae nequiana poani so'o? ¿Apiojji acuae Eyacuiñajji esohui pajea'yaña etiiquianaja esohuijo? <sup>9</sup> E'e, miquianaya jama poani ba'a: <sup>10</sup> Yahuajo nei Eyacuiñajjiya Moisesi tehue mee ca poa oja sohui jama ba'a: “¡Mique chii, miquea enaese etii pea'ai jaahuanacue! Joya oja chii, oja nae pea'ai cajaa acajo ¡cajajahuejjajea ca'yahua cuaa, meiya!” Jamaya tehue mee ca'ya poa yahuajo nei. <sup>11</sup> Miquianaaya ca ca huohui tai yaña jama ba'a: “Dejja oja chii etii nijje, oja nae etii nijje pojja'a camimiyahua jama ba'a: “Eyaya miya eba'e meesahuajji pojjeama. Chojja, eyaya ecuea aquiana Eyacuiñajji yasijje quiaña o bihuiajji”. Jamaya huohui taiyaña miquianaaya. <sup>12</sup> Jamajjeya oja chii etii, oja nae etii pea'ai pajea meeyaña, miquianaaya. <sup>13</sup> Eyacuiñajjiya pea esohui quea huiso nee pajea mee'yo sa'aña etiiquianaja esohui yajji nisho —Jesusaa Jodio etii acanaje.

<sup>14</sup> Jamajjeya Jesusaa ojjaña cuana iyaa majje huohui canaje jama ba'a: —¡Shajja'ajjacue mo, jjabahuejja neineiquicue oe! <sup>15</sup> Bobi cuanajo, ojjaña aquiana enabajje dobiqúianajo pojjeama miquianaya quea mimishi poani. Chojja. Quea jjashahuabaqui taijo, esohui quea tai miquea enabajje cuayaquianajo ca ca quea mimishi poani. Eyacuiñajjiya maya ba cani quea mimishi —Jesusaa acanaje.

<sup>16</sup> —E'e, ¡miquianaaya quea shajja ja'aa ecuea esohui shajja'ajja majje jama acue! ¡Jashahuabaquicue oe!

<sup>17</sup> Majoya Jesusaa ojjaña cuana jeanana majje equi yasijje dobiquinaje o shajja'ajjajji cuana nijje. Dobiqúi majje o shajja'ajjajji cuaa huohuijja canaje: —Jesosa, ecuanajaya ca ca esohui quea quehua miquea. ¡Che mo oe ba meesahuacue! — poanaje.

<sup>18</sup> —¿A'a ecuea esohui miquianajaya ba jjima pea'ai? —Jesusaa poanaje—. ¿A'a miquea eba pojjeama? Eme' shacua neinei jjimajo pojjeama miquianaya Eyacuiñajjiya quea

mimishi ba cani. <sup>19</sup> ¡Bacue! Ojjaña bobi, pea aquiana pea'ai enabajje ijjiájae majje see ai yasijje dobiqiuani. Quijje jamatii seejeaje'yo. <sup>20</sup> Joya quea tai jjashahuabaquianiya ca ca esohui tai jeacuaya cani. Maaya oya quea tai po mee cani: Quea mimishi Eyacuiñajjiya oya ba cani. <sup>21</sup> E'e, ejjashahuabaqui'yojji quea taijo pea eponajo ba'e sa poani, peaja yahuejo ba'e sa poani, sii cani, siajje poani, pea quecua cani pea'ai, <sup>22</sup> quehuajje cojjo cani, quea dejja tai poani, quea nishahui poani, ojjaña mimishi acani, ona dasiajji poani, quea mimishi pea nijje ba'yani, pea jayojja ba'e sa poani, mimijajiani pea'ai. Jama poani ba'a: “Eya oe nee quea pame nee” poani, esho'i jayojja mimi naanaani, Eyacuiñajji niñeba cani pea'ai. <sup>23</sup> E'e jojo nei ojjaña joya jama acani Eyacuiñajjiya ba cani quea mimishi, quea mimijequijea; bobi ijji cani eme' topo neinei jjimajo pojjeama quea mimishi poani — jamaya Jesosaa o shajja'ajjajji cuana saja'ame acanaje.

*Cananea epona Jesosa que poeyanaje*  
(Mateo 15.21-28)

<sup>24</sup> Majoya Jesosa ma equijo ani poquinaje pea meshi yasijje. Tino pejeje, Sinono pea'ai pejeje aninaje. Jjeya Jesosa mimi sa po ajja ojjaña cuana nijje. Jamajoya equi yasijje quehua dobiquinaje o shajja'ajjajji cuana nijje. Jamatii oya quehuajje ani meemee ajja; jjanequiquehuaqui meemee ajja. <sup>25-26</sup> E'e, jjeyahua nei oe eponaa shajja'ajja canaje Jesosa jomajo ani. Jamajjeya o que poeyanaje. Oya pea, Jodio epona pojjeama, Jieno pona pea meshijo ba'e, Sinia meshijo, Penisiajo ba'e. Ojaya ebacua piona huasijje eshahua yahuajo dobiquia poa. Jamajjeya enaese Jesosa que poe majje ecui'oshajjajo nequinaje o bihuijji, onijje emimi neinei. Jama poanaje ba'a: —Emeshi Mese nei, ¡ecuea ebacua piona jjaajaqui mee'yocue, quea mano nee nee jaa, quea niñe nee nee jaa! —enaese poanaje.

<sup>27</sup> Ma enaese Jodio pojjeamajo, huapa jayojja. Jesosaa oya saja'a canaje jama ba'a: —¿A'a cuae ecue bacuaja bobi jeajeaje iñahuehuaja e'ijjiajji? ¿A'a cuae jamaya quea pame? —Jesosaa poanaje.

<sup>28</sup> Epona quea shoe jama jjejojo jama poanaje ba'a: —E'e, Emeshi Mese nei. ¡Jamatii o huonejjiya bobi ijji canijo, eshaa oquequianijo ijji cani iñahuehuaa! —acanaje enaeseya.

<sup>29</sup> Jamajjeya Jesosa quea bihui nee poanaje: —Epona, miya ca ca oe quea ja'a nee, quea pame nee ejo jjashahuabaquiani. Jamajjeya eyaya miquea esohui jayojja jama jjeya nei aje'yo. Miquea ebacua piona jjaajaqui mee'yonaje. Eyaya eshahua ojo nequi huojjeacuayajea'yonaje. ¡Quea bihui poquicue miquea equi yasijje! —Jesosaa poanaje.

<sup>30</sup> Jamajjeya jjeya nei ma epona poquicuaji'yonaje oja equi yasijje. Ba cañaqui'yonaje oja bacua piona quea pame nee, eshahua'yo, ejaajji biajje quea bei ani'yo.

*Jesosaa shajjaqueba jjashajja'aqui mee ca'yonaje mimi mee ca'yonaje pea'ai*

<sup>31</sup> Jjeyahua nei Jesosa Tino pejeje ani poquinaje. Sinono yejjenana majje Ome Miji pea'ai Cuiñajji cuana yejjenana majje, Janinea bae yasijje poe o'oyanaje, ma Dejjaja Eyacuiñajji ba po jjimaja bae bajjani yasijje. <sup>32</sup> Majoya pea cuaa dejja shajjaqueba, mimi'ajja pea'ai ye canaje o que. Jama poanaje ba'a: —Jesosaa, ¡iquio dejja shajjaqueba, mimi'ajja pea'ai. ¡Oya che napa'ajjacue emeya quea ja'a nee epojji!

<sup>33</sup> —E'e, —Jesosaa poanaje. Jamajjeya ma dejja oe nei dojo canaje huesha'ama onijje mimiya, o huaquia mee'yohua. Ojaya eme sisi shajjaquebaja eshaja huejja huasijje jeanobia canaje. Majoya jjamecuichoqui majje ana napa canaje emeya. <sup>34</sup> Eyahuasijje jjabajeasohuaquinaje Eyacuiñajji nijje emimijji. Jjajjeanajequinaje jama ba'a: —¡Quea ja'a pocue! —poanaje shajjaqueba nijje. Jesosaja mimijo: —¡Epata! —poanaje.

<sup>35</sup> Jesosa mimi jeahuajo, ma dejjaa quea ja'a nee nee shajja'ajja ca'yonaje. Miminaje quea ja'a nee. <sup>36</sup> Majoya Jesosaa ojjaña cuana huohui canaje jama ba'a: —E'e, eyaya shajjaqueba jjashajja'aqui mee'yonaje, mimi mee'yonaje. ¡Jamatii pea cuana a'a jihuohuiji so'o! —Jesosaa jamaya ojjaña cuana huohui canaje.

Jamatii oya cuaa huohui majamaja canaje ojjaña huasijje. <sup>37</sup> Shajja'ajja majje ojjaña quea bihui nee jama poanaje ba'a: —E'e e, Jesusaa ojjaña acani quea pame nee nee. E'e e, shajjaqueba jjashajja'aqui mee ca'yonaje jjeya nei. Mimi'ajja pea'ai quea ja'a nee mimi mee ca'yonaje —jamaya ojjaña Jesosa bihuia canaje.

## 8

*Jesosaa quea huiso cuana bobia canaje, 4.000 dejja*  
(Mateo 15.32-39)

<sup>1</sup> Majoya quijje pishana quea huiso nee nee cuana poeyanaje. Jesosa que jjachichaqui o'oyanaje. Onijje ani tiitii canaje esohui shajja'ajjaa. Bobima' poanaje. Jamajjeya Jesusaa o shajja'ajjaji cuana iyaa canaje. <sup>2</sup> O que poeyajo, huohui canaje jama ba'a: —Jiquio dejja cuana enijje nequi pea beca peejjima cahuime. Ojaya bobi oe poanaje. Jamajjeya eya ojo quea yeno jjashahuabaquiani, bobimajo. <sup>3</sup> Oja equi yasijje huoojea sa po'yo ajja, quea shoe nee nee; ejiojjijje poquianijo bobi yasijje po chana'.

<sup>4</sup> O shajja'ajjaji cuanaa Jesosa saja'a canaje: —E'e. Jiquiojo chama' bobi, dejjama'. ¿Yajja yajji? Oya cuana quea huiso nee nee ebobajji. ¿Achacua pahui ejjeshejji ojjaña bobajji? —acanjaje cuaa.

<sup>5</sup> —¿Ache huiso pahui miquea yani? —Jesusaa huohui'ajja canaje.  
—Me oejje becanejjijji pea'ai, 7 pahui yani —poanaje.

<sup>6</sup> Jamajjeya Jesusaa ojjaña ejja'anichichaqui'yo ani cuana jama acanjaje ba'a: —¡Meshijo anioquecuel! —acanjaje.

Majoya Jesosa ma 7 pahui jjeshe majje Eyacuiñajji oja Chii bihuia canaje bobijo. Majoya pahui miji canaje. O shajja'ajjaji cuana quia canaje. Majoya oya cuanaa dejja cuana huasijje quia canaje. Quia capoquije quea huiso nee nee jjapanaquipoquinaje, bobi. <sup>7</sup> Ojaya oe pojji nahuo sisi yaninaje pea'ai. Oya jayojja Jesusaa nahuo sisi miji majje quia canaje o shajja'ajjaji cuana que ojjaña cuana huasijje equiajji. <sup>8</sup> Jamajjeya ojjaña cuaa ijja canaje; quea jeje poanaje. <sup>9</sup> Ijja majje, mi ijjaeyo majje bio ca'yonaje jjepai ai yasijje, o shajja'ajjaji cuaa. Mepe ca'yo majje quea huiso poanaje, 7 jjepaime. Jamatii quea huiso nee nee dejja cuana bobia canaje, 4.000 dejja. <sup>10</sup> Majoya Jesusaa ojjaña cuana huoojea canaje oja equi cuana huasijje. Jesosa ca ca bishe ai yasijje nequisohuaquinaje o shajja'ajjaji cuana nijje. Besapoquinaje ojje, pea meshi yasijje Majadana meshi yasijje, pea bajjani Namanota meshi yasijje, ma Ena Ta'a Huoi bajjani yasijje.

*Jodio etiya Jesusaa pana canijo huohui'ajja canaje*  
(Mateo 16.1-4; Noca 12.54-56)

<sup>11</sup> Majoya Paniseo cuana poeyanaje Jesosa que. Onijje mimicuijjeanobiajea sa poanijo jama anisho canaje ba'a: —Esohui huohuijji Jesosa, ¿A'a miya Eyacuiñajji huojea'yo nei ojjaña jaahuanajji pojja'a? ¡Ejjaba'ajjaqui so'o! ¡Eyacuiñajjiya jayojja jama paname a'ajja' eyajo ecuanaja ebajji! —huohui nisho canaje.

Jamatii oya cuaa Jesosa Eyacuiñajji huojea'yo pojjeama poso acanjaje pea Paniseo cuana: —Chojja, Jesosa Eyacuiñajji huojea'yo pojjeama. Jamajjeya Eyacuiñajjiya jayojja jama mi pana cajo, pajea caje'yo cuaa.

<sup>12</sup> Paniseoja ejjashahuaba taiquijji Jesusaja eba poanaje. Jamajjeya quea yeno poanaje jama ba'a: —Chojja. ¿Apiojji miquianaya Eyacuiñajjiya pana cani ba majamaja sa poani? Miquianaaya Eyacuiñajjiya esohui cajaa aña. Jamajjeya miquea ba jjima ache shono ojaya ehoojea'yo ojjaña jaahuanajji poeyanaje. Jamajjeya Eyacuiñajjiya eya pea epana mee'yojji pojjeama miquea ebajji eya ojaya ehoojea'yo —Jesusaa acanjaje.

<sup>13</sup> Paniseo cuana shajjama' poanijo, Jesusaa oya cuana jea cana'yonaje, jjabahuejjaqui ajjajojo. Besapoqui o'oyanaje ojje miji yasijje bishejje o shajja'ajjaji cuana nijje.

*Paniseoja esohuitai pahui shejee meeji jayojja*  
(Mateo 16.5-12)



<sup>14</sup> Majoya bae ojje miji yasijje besapoquije Jesosa shajja'ajjajji poani cuana jjashahuabaquinaje. Jama poanaje ba'a: —E'e de, ecuanaa bobi pajea'yonaje.

<sup>15</sup> Majoya Jesosaa, Paniseoja ehuohui taijo jjashahuabaquianijo oya cuana huohui canaje: —¡Quea ja'a nee jjashahuabaquicue! Paniseoja, Enodeja epeejjija esohui pahui shejje meeji jayojjajo miya quea tai po chana'.

<sup>16</sup> Oya cuana bobijo jjashahuabaquianijo Jesosaja esohui ejjashahuabaquimeejji onajaya quea quehua poanaje. Jamajjeya ojee mimimiminaje jama ba'a: —E'e pojja'a Jesosa jama poanaje ecuanaja bobi ye jjimajo.

<sup>17</sup> Ojaya esohui Jesosaja eba poanaje. Jamajjeya oya cuana jama acanaje ba'a: —¿Apiojji acuae jja nequiana ojee mimimimiani bobijo? ¿A'a jja eya miquianajaya ba jjima quea ca'a nee nee? <sup>18</sup> ¿A'a jja nequiana ejo jjashahuabaqui jjima tii? ¿A'a jja nequiaa pajea'yonaje so'o? <sup>19</sup> Eyaya me oejje pahui miji majje quea huiso dejja bobianaje, 5.000 dejja. Ijjia'ijjiajeyo majje acuae jjaya ¿ache jjepai huiso chicha'yonaje pahui? ¿A'a ya pajea'yonaje? —Jesosaa acanaje.

—Quea huiso nee, 12 jjepaime —poanaje.

<sup>20</sup> —E'e. Oya jayojjaya me oejje beca pahui, 7 pahui, miji majje quea huiso dejja bobianaje, 4.000 dejja. ¿Majoya ojjaña ijja'ijjiajeyo majje miquianaaya ache jjepai huiso pahui chicha'yonaje so'o?

—Quea huiso nee pea'ai, 7 jjepaime quea cuio chicha'yonaje ecuaaya —saja'ame acanaje.

<sup>21</sup> —E'e —Jesosaa poanaje—. ¿A'a jamatii miquianajaya ba jjima eya quea ca'a nee nee mi bobiajji? ¿A'a mi jjabahuejjaqui jjima? —Jesosaa poanaje.

*Betesaidajo nequi Jesosaa cojjama' jjacojjapojjajji mee ca'yonaje*

<sup>22</sup> Majoya Jesosa o shajja'ajjajji cuana nije Betesaida huasijje ba'eñaqui o'oyanaje, Jai Jaajji cuiñajji yasijje. Jomajo pea cuanaa cojjama' ye canaje Jesosa que. Jesosa huohui neinei canaje jama ba'a: —Jesosaa, jiquio dejja cojjama'. ¡Che jja oma quea cojja ja'a po mee'yocue!

<sup>23</sup> Jesosaa cojjama' me iña majje me pejejea canaje cuiñajji esecue yasijje. Jomajo Jesosaa eme' cuicho majje cojja iñapepa canaje cuichohua. Oya napa'ajja canaje emeya pea'ai. Jama poanaje ba'a: —¿Achajja acuaeya miyaya baña so'o, cha? —Jesosaa poanaje.

<sup>24</sup> Bajea majje cojjama' jama poanaje ba'a: —Eyaya dejja cuana jeojeoqui baña, acui jayojja de, quea jama pishana, de —acanaje.

<sup>25</sup> Majoya Jesosaa ma dejja cojja napa'ajja ca o'oyanaje emeya. Jesosaa cojja napa'ajja ca o'oyajje, cojjamaa jjeyahua nei ba neinei canaje. Quea cojja ja'a nee nee po'yonaje.

<sup>26</sup> Majoya Jesosaa oya huoojea canaje oja equi yasijje. Jama poanaje ba'a: —¡Epeejji, quea jaji nee poqui'yocue miquea equi yasijje! ¡A'a jjeya cuiñajji yasijje poqui o'oyajji! ¡Eyaya miya quea cojja ja'a po mee'yonaje a'a jocuama huohuijji! —Jesosaa acanaje.

*Penoja esohui quea pame Jesosajo  
(Mateo 16.13-20; Noca 9.18-21)*

<sup>27</sup> Majoya Jesosa o shajja'ajjajji cuana nije Pinipo meshi yasijje poqui canaje. Sesanea huasijje poquijeya o shajja'ajjajji huohui'ajja canaje Jesosaa: —¿Dejja cuana acuae jja yajja poani ejo? —Jesosaa acanaje.

<sup>28</sup> —Miya Huani, ma ona besameejji poa, shequi o'oyanaje poso ca jja mi ca acani beca cuaa. Pea cuana aje jja poani miya Enia, Eyacuñajjija esohui huohuijji yahuajo nei nequia poa. Pea poani ba'a miya pojja'a pea esohui huohuijji yahuajo nei nequia poa pojja'a. Oya cuana yahuajo nei mano'ya poa shequi o'oyanaje poso ca jja mi ca acani cuaa —poanaje o shajja'ajjajji.

<sup>29</sup> —¿Miya acuae yajja poani ejo? ¿A'ya cuae iña? —Jesosaa poanaje.

—Miya ca ca Eyacuñajjija huoojea'yo ojjaña jaahuanajji Quito bajjani —Simohuiya Jesosa saja'a canaje.

<sup>30</sup> Jamajjeya Jesusaa oya cuana jama acanaje ba'a: —E'e, eya Eyacuiñajjija huoojea'yo ojjaña jaahuanajji. Jamatii ja'a jja oe jjeya huohuijji cuana! —Jesusa poanaje.

*O mano'yojjijo Jesusa miminaje*  
(Mateo 16.21-28; Noca 9.22-27)

<sup>31</sup> Majoya Jesusaa o shajja'ajjajji cuana huohui coo canaje ojaya emano'yojjijo: —Eya ojjañaja Edoe Mese quijje Jenosanena huasijje poquije. Jomajo Moisesija etehue'yo huohuijji cuaa, Jodio etii cuaa pea'ai, Eyacuiñajji nijje emimijji etii cuaa pea'ai eya quea huiso cuia caje'yo. Quea nee nee poaje'yo eya. Quijje ya mo manojje'yo ohua me' caca mee cajje. Jamatii pea beca peejjima cahuime po majje mo shequi mee caje o'oya ecue Chiiya —acanaje.

<sup>32</sup> Jamajjeya Jesusaa jama huohui neineime acajje Peno quea yeno nee poanaje. Oya oe nei iyaa canaje, Penohua. Jama poanaje ba'a: —Chojja, ecuea Emeshi Mese Jesusa, miya Eyacuiñajjiya jaahuana caje'yo. Peaja aje mi oe ecuijji pojjeama, peaja equecua'yoyji pojjeama jja mi, de.

<sup>33</sup> Jamajjeya aje jja oe Jesusaa ojjaña o shajja'ajjajji cuana cojja ba neinei majje jama Peno tecueame acanaje ba'a: —Peno, ja'a jamaya mimijji! Miya e dasiajji nisho epo jama mimiani. Miya Edosiquiana Satanasa jama mimiani. Jjashahuabaquiani quea tai, dejja jama; Eyacuiñajjija ejjashahuabaqui'yoyji jama pojjeama —Jesusa poanaje.

<sup>34</sup> Jamajjeya Jesusaa ojjaña o shajja'ajjajji, ojjaña pea cuana jomajo nequi pea'ai iyaa canaje. Jama poanaje ba'a: —Ojjaña joya enijje e'e jojo nei jjapeequi'yo sa poani Eyacuiñajjija ejjashahuabaquiijji jayojja jama ba'ecue! E jayojjaya jja enijje capoquiahua, jamatii onaa napa cajje aje jja oe quea nee poaje'yo pojja'a. <sup>35</sup> E'e, ojjaña joya Eyacuiñajjija ejjashahuabaquiijji jayojja jama ba'e'yo sa po ajja ba'e tiitii ajja enijje eyajo. Joya ecuea ejjashahuabaquiijji jayojja jama ba'e'yo sa poani ca ca ba'e tiitiije'yo enijje eyajo. <sup>36</sup> E'e pojja'a dejja cuaa quea huiso nee nee aquiana ojaya yajji chicha caje. Jamatii oya cuana cuaqui yasijje jeajea cajo ojjaña ojaya aquiana cuana edojjiji pojjeama. ¿A'a ojjaña ojaya aquiana cuana Eyacuiñajji yasijje quia cajo o cuaquijo ani cuayaqui mee caje'yo? ¿A'a Eyacuiñajjiya oya cuana onijje eyajo ba'e mee caje'yo ma aquiana quea huiso nee nee sosejje? Chojja. <sup>37</sup> Eyacuiñajji cajaa amajje eyajo eba'e'jji pojjeama. Chojja, ejjeshejji pojjeama nequianajaya, aquiana quea huiso sosejje pojjeama, bejjo sosejje pojjeama eba'e tiitii'yoyji. <sup>38</sup> E'e jojo nei jjeya ojjaña cuana Eyacuiñajji nijje jjapeequi ajja, ojjaña quea mimishi poani pea'ai. Ecuea esohuijo quea bicho poanijo jama acani cuaa ba'a: “Cho, eya Jesusa Quitoja epeeji pojjeama”. Jamajjeya eya ojjañaja Edoe Mese esohuidojojji pame cuana nijje poe o'oya majje ecue Chii jayojja quea pame nee nee ojjaña huoojea'yoyji poaje'yo. Jamajjeya eyaya ecue Chii eyajo ani huohuije jama ba'a: “Cho, oya cuana ecuea epeeji pojjeama. Cajaa” eyaya aje —Jesusa poanaje—. E'e, jjeya ejo quea bicho poanijo quijje eya quea bicho poaje'yo ojo, de.

## 9

<sup>1</sup> Majoya Jesusaa o shajja'ajjajji cuana jama acanaje ba'a: —E'e jojo nei beca cuaa jiquiojo nequiya jjaa mo ecojjaa ba caje ojjaña huoojeajji quea ca'a nee nee. Jamaya mo ba caje mano'yo jjimahuaa. Beca cuanaja jjaja mo ba jjima poaje ojjaña huoojeajji; manojje'yo —Jesusaa acanaje.

*Jesosa quea cojja jiji poanaje oja Chii nijje mimianijo*  
(Mateo 17.1-13; Noca 9.28-36)

<sup>2</sup> Quijje pishana me oejje pea emejje oe cahuime po majje Jesusa poquinaje o shajja'ajjajji nijje, pea beca peejjima dejja nijje, Peno nijje, Satiaco, oja chahua Huani nijje pea'ai. Mahuiso dejja nijje poquinaje eyiyo huasijje quea huesha nee. Jocuama nequi oya Jesusa jjahuapaqui'yonaaje. Jjahuapaqui majje quea cojja jiji nee poanaje eshequi jayojja poanaje, quea jeajahua nee nee. <sup>3</sup> Oja daqui quea oshe nee nee poanaje, quea jeajahua nee bo oshe jayojja. Daqui tajjajji jiquio meshijo aniya daqui tajja oshe'yo ajja ojaya daqui

jayojja. <sup>4</sup> Jamaya ojaya epeejiya Jesosa ba canaje. Moisesi, Enia pea'ai ma yahuajo nei ba'ya poa Jesosa nijje mimimimi nequi ba canaje pea'ai. Miminequinaje Jesosa onaja mimishijo emano'yojji jjejojo. <sup>5</sup> Jamajjeya Peno jjashahuabaqui jjimajo Jesosa nijje jama poanaje: —E'e, Emeshi Mese Jesosa, jiquiojo ecuana canequiahua, quea pame nee. Pea beca peejjima equi sisi ecuaaya ca'iyahua miquea, Moisesija, Eniaja pea'ai eba'eji.

<sup>6</sup> Peno quea ajjajja jjejojo jama poanaje, jjashahuaba bamequi jjima jjejojo. E'e, ojjaña quea ajjajja jjejojo yajja mimime epojji. <sup>7</sup> Peno mimianijo tii bo quea oshe nee nee nequioquenaje. Queya canaje huojja. Shajja'ajja canaje Eyacuiñajji jama poani ba'a: —Jiquio ecuea ecue Bacua Eja quea jea nee nee. ¡Oya oe shajja'ajjacue!

<sup>8</sup> O shajja'ajja majje quea mete nee nee poanaje Peno, Satiaco, Huani pea'ai. Majoya baja canaje Jesosa oe nei nequi; Enia, Moisesi pea'ai chama'.

<sup>9</sup> Eyiyojo nequi jaoquequije'yo mimimimi jaoque'yonaje. Jesusaa ma ojjaña Edoe Meseya jama acanaje ba'a: —¡Ma miyaya eyiyojo banaje pea cuana a'a huohuijji jjeja! ¡Quijje eya emano'yo jaa shequi o'oyajo oe pea cuana huohuicue!

<sup>10</sup> Oya cuanaa Jesosa shajja'ajja canaje. Huohui jjima nei nei poanaje. Jamatii ojee mimimiminaje jama ba'a: —¿Yajjajje shai oya Jesosa jama poanaje ba'a: “Eya emano'yo jaa shequije o'oya”? Maya ecuanaja quea quehua —poanaje o shajja'ajjajji cuana.

<sup>11</sup> Jamajjeya Jesosa huohui'ajja canaje: —Jesosa, Moisesija etehue'yo huohuijji poaniya jama acani ba'a: “Enia oe ebionei meshi yasijje capoe'yahua Eyacuiñajjija huoojea'yo ojjaña jaahuanajji poe jjimahuajo”. ¿Yajjajje acuae jamaya acani oya cuaa? —poanaje Huani, Satiaco, Peno pea'ai.

<sup>12</sup> Jesusaa jama acanaje ba'a: —E'e jojo nei Enia jayojja jama oe dejja ebionei epoejji ojjaña cuana ejo e'e jojo nei ejjashahuabaqui meesahuajji. E'e, Eyacuiñajjija esohui huohuijji yahuajo nei ba'eya jama ejo tehue ca poa pea'ai ba'a: “Ojjaña Edoe Mese quea nee nee po mee caje'yo cuaa. Jodio cuanaja oya ba jjima poaje. Pea poso acaje. Jamajjeya cuia caje'yo. Cjaa acaje'yo” jamaya yahuajo nei tehue ca poa ejo —Jesosa poanaje—.

<sup>13</sup> E'e, Enia jama ca ca oe yahuajo pishana poeyanaje. Jamatii Jodio cuanaja oya ba jjima poanaje. Jamajjeya cuia ca'yonaje. Jamaya yahuajo nei Eyacuiñajjija esohui huohuijji cuaa ojo tehue ca poa. Ma jayojja jama acanaje cuaa —jamaya Jesusaa Peno, Satiaco, Huani pea'ai acanaje eyiyojo nequi jaoqueje'yohua.

*Esho'i niñepoquima'yo po mee ca'yonaje Jesusaa  
(Mateo 17.14-21; Noca 9.37-43)*

<sup>14</sup> Eyiyojo nequi jaoque'yo majje Jesosa shajja'ajjajji yasijje poe'yonaje. Ba cañaquinaje quea huiso cuana ejjachichaquei nequica. Moisesija etehue'yo huohuijji cuaa Jesosa shajja'ajjajji cuana mimicuijje nobiajea cani. <sup>15</sup> Ojjaña ejjachichaquei Jesosa ba majje quea quijjiji jaji nee poanaje. Cuajicuajinaje Jesosa bihuiaa jama ba'a: —Jesosa, miya Eyacuiñajjija huoojea'yo ojjaña jaahuanajji.

<sup>16</sup> Majoya Jesusaa huohui'ajja canaje: —¿Ajeo acuae quiana jjamimicuijjea nobiajeaquiani? ¿Yajja poani so'o?

<sup>17</sup> Oe dejja Jesosa que poeyanaje. Huohui canaje jama ba'a: —Emeshi Mese Jesosa, eyaya ecue bacua eja yenaje mi que. Oya quea mano nee nee, quea niñe jjejojo mimi ajja pea'ai. <sup>18</sup> Eshahuaa ojo nequiya oya naba huapa mee cani, jjaami yayequi mee cani pea'ai. Niñepoqui jaabichajeaquiani meshi yasijje ese' ijjiayai cani pea'ai. Eyaya mi shajja'ajjajji cuana huasijje yenaje mi chamajo. Jamatii niñe poquipajea ajja —ejeajji poanaje.

<sup>19</sup> Jesusaa ojjaña cuana jama acanaje ba'a: —¡De! ¿Ache shono acuae jja nequiana ejo jjashahuabaquije e'e jojo nei? ¡Quea sapa ca'a mi coma! ¿Ache cahui huiso minijje nequi majje miyaya eya baje'yo Eyacuiñajjija huoojea'yo ojjaña jaahuanajji quea ca'a nee nee? ¡Esho'i e que jjequicue! —Jesosa poanaje.

<sup>20</sup> Jamajjeya esho'i jjequi canaje Jesosa que. Jesosa ba majje eshahuaa esho'i janobajjima nei cacacaca mee canaje. Meshi yasijje jea majje oya jeacapoquipoquinaje. Naba

huapanaje. <sup>21</sup> Jesosaa ejeajji huohui'ajja canaje: —¿Ache shequiaja huisome jama poanaje oya?

<sup>22</sup> —Jesosa, oya esho'yahua jama po —poanaje ejeajji—. Eshahuaa oya dahuajea majamaja'ajja canaje cuaqui yasijje, ena huasijje hui'i mee'ajja ca'yonaje cuanaya, o mano mee'yoyji nisho. Jamatii ꝑecuanajo jjashahuabaquicue quea pame; ecuana jaahuanacue! ¿A'a miyaya ecue bacua jjaajaqui meeje'yo pojja'a?

<sup>23</sup> Jesosaa ejeajji saja'a canaje: —A'a huohuijji jama ba'a: “¿A'a pojja'a miyaya oya jjaajaqui meeje'yo?” E'e jojo nei jjashahuabaquicue jama ba'a: “E'e jojo nei Jesosa quea ca'a nee nee; ojjaña acani. Ohuaya ecue bacua ejja jjaajaqui meeje'yo pea'ai”. Jamaya jjashahuabaquianijo e'e jojo nei eyaya miquea ejjashahuabaqui'yoyji jayojja jama aje'yo. Miquea ebacua ejja jjaajaqui meeje'yo pea'ai —Jesosa poanaje.

<sup>24</sup> Jamajjeya jjeyahua nei ejeajji jama poanaje ba'a: —Eshui huohuijji Jesosa, eya mijo e'e jojo nei jjashahuabaquiani miya ejjaajaquimee'yoyji. ¡Miyaya eya jjabahuejja neinei qui meesahuacue!

<sup>25</sup> Ojjaña cuana o que jjachicha cuajicuajiquiani ba majje Jesosaa o niñepoquimeejji poani huoojeacuayajea canaje: —¡Eshahua, o queba po meejji poani, mimi'ajja po mee'yoyji poani pea'ai, cuayaqui'yocue oja yamijo nequi! ¡A'a dobiqui o'oyajji! —Jesosa poanaje.

<sup>26</sup> Jesosaa huoojeajea cajeahua, eshahua siasia nananaje; esho'i jjequi'ihui mee majje cuayaqui'yonaje. Esho'i emano'yo jayojja jaa ba majje ojjaña jama poanaje ba'a: —Oya mano'yonaje, poquijeyonaje, de.

<sup>27</sup> Jesosaa me' iña cajje esho'i nequisohua'yonaje. Nequisohua majje quea aja nee po'yonaje.

<sup>28</sup> Quijje ojjaña cuana poqui majje Jesosa equi yasijje dobiquinaje o shajja'ajjajji cuana nijje. Oeya Jesosa huohui'ajja canaje: —Jesosa, ¿yajjajo acuae ecuaaya eshahua mi huoojeacuayajea'ajjaña?

<sup>29</sup> —E'e —Jesosa poanaje—, jiquio eshahua quea huoojeacuayajea camaja. Eyacuiñajji nijje mimi huicha'a huicha'a majje ojo jjashahuabaquiani ijja'ijja jjima po majje pea'ai ca ca oe huoojeacuayajea meeje'yo miyaya —Jesosa poanaje.

*—Quijje eya manaje'yo —Jesosa poanaje*

*(Mateo 17.22-23; Noca 9.43-45)*

<sup>30</sup> Oya cuana ma meshijo ani ojee poquinaje ojjaña Janinea meshi yasijje. Poquijeya Jesosaa o shajja'ajjajji ca ca oe sohuihuohui capoquinaje. Pea cuana sohuihuohui pajea canaje. <sup>31</sup> Jamajjeya Jesosaa o shajja'ajjajji cuana huohui canaje jama ba'a: —E'e, quijje eya iña meesahuaje onaja equecua'yoyji. Quecua caje'yo cuaa. Jamatii beca cahuime po majje mo shequi mee caje'yo Eyacuiñajjiya.

<sup>32</sup> O shajja'ajja majje quea yeno nee nee poanaje. Jamatii oya cuana quea mete poanaje ehuhui'ajjajji: —¿Yajjajo shai Jesosa mano'yome ca oya Eyacuiñajjiya huoojea'yo ojjaña jaahuanajji? —oya cuana poanaje.

*¿A'ya ona huoojeajji jayojja nequije eyajo?*

*(Mateo 18.1-5; Noca 9.46-48)*

<sup>33</sup> Majoya oya cuana Capenaoma huasijje poe'yonaje. Equi yasijje dobiqui'yo majje Jesosaa o shajja'ajjajji huohui'ajja canaje jama ba'a: —Eseya ejiojjijje poeje'yo ¿ajeo acuae nequiana jjamimicuijjea nobiajeaquijebenaje so'o?

<sup>34</sup> Jamatii oya cuanaja Jesosa saja'a jjima. Quea bicho. Oya cuana poeje jjamimicuijjea nobiajeaquijebenaje jama ba'a: —Jesosa quijje ona huoojea'yoyji poaje, eseya o jayojjaya poaje onijje ona huoojea'yoyji. ¿A'ya o pejejo nequije, joya oja quea jea nee neeya?

<sup>35</sup> Jamajjeya Jesosaa anioque majje o shajja'ajjajji 12 huisome iyaa canaje o que. Jama acanaje ba'a: —¡Bacue! Miya e jayojja ona huoojea'yoyji po sa poanijo jama jjashahuabaquicue ba'a: “Ojjaña ecuea quea boti nee. Cajaanahua'yahua”. Jamaya poaje Eyacuiñajjiya miya ba cajje quea pame nee ona huoojea'yoyji epojji.

<sup>36</sup> Majoya Jesosaa oe esho'i nei iyaa majje ojjaña cojja nei nequia canaje. <sup>37</sup> Bishami majje jama poanaje ba'a: —¡Bacue! Ojjaña joya enijje jjapeequianiya jiquio esho'i quea jea ajji poaniya, eya pea'ai quea jea acani. Oya jayojja ojjaña cuaa ecuea epeeji quea jea acani, ohuaya eya pea'ai quea jea acani. Jamajje ecue Chii, e huoojea'yojji quea jea acani pea'ai.

*¿A'ya Jesosaja epeeji poani?*  
(Mateo 10.42; Noca 9.49-50)

<sup>38</sup> Jamajjeya Huaniya Jesosa huohui canaje jama ba'a: —Esohui huohuiji Jesosa, ecuaaya pea dejja banaje eshahua cuana huoojeacuayajea cani. Ma dejja poanaje jama ba'a: “Eyaya eshahua huoojeacuayajeaña Jesosa nijjeya, ojaya epeeji poaniya”. Ma dejja ese nijje poqui ajjajo, oya tecueanaje jama ba'a: “¿Apiojji? Chojja, miya ecuaa nijje poqui ajja; ¡a' eshahua huoojeacuayajeajji!” ecuaaya oya anaje —Huani poanaje.

<sup>39</sup> Jamajjeya Jesosa jama poanaje ba'a: —¡A'a oya tecueajji! Ohuaya enijjeya acani ma dejjaa ajjima acani. Jamajjeya, ohuaya eya niñeba jjima acaje. <sup>40</sup> Ojjaña joya ese niñeba ajja esejaya epeeji nei poani. <sup>41</sup> E'e jojo nei ojjaña joya e shajja'ajjaji poani ba'e meesahua cani, ena quia cani pojja'a eya ojaya quea boti neejo, Eyacuiñajjiya quijje oya sosequia caje'yo oya quea pame nee poanijo —Jesosaa o shajja'ajjaji cuana huohui canaje—. <sup>42</sup> Ecuea epeeji eyacua esho'i nei jama. Joya o mimishi po meeji poani ca ca Eyacuiñajjiya quea nee nee po mee caje'yo, de, quea nee tii tii. ¡Jamajjeya quea mimishi epo mee ca cuahuajje oe mano'yocue! E'e, onaya mei enaajo yiipeca mee majje ¡bae quea doe yasijje jjajea'oqueajea meequi'yocue! <sup>43</sup> ¡Jamajjeya a'a quea mimishi po meeji cuana! Jamajjeya miya emejo quea mimishi po sa po majje ¡eme' ejajasejjajea jayojja jama acue mimishi'ama epojji! Eme' chamajo eyahuasijje poquiyajo Eyacuiñajji nijje eba'e tiitii'yojji quea pame nee nee poaje'yo. Miquea beca eme' yanijo pojja'a quea mimishi tii poani ca ca cuaqui yasijje poquije'yo. <sup>44</sup> Quea tai nee nee, quea nee nee poaje'yo. Jomajo cuaqui jiji tiitije'yo; quijjo'yo ajja tii tii, de. Jamajjeya ¡mimishi paje'yocue! <sup>45</sup> Oya jayojjaya miya ejiojjiya quea mimishi po mee canijo, ¡ejiojji ejajasejjajea jayojja jama acue! Ejiojji chamajo eyahuasijje poquiyajo Eyacuiñajji nijje eba'e tiitii'yojji quea pame nee nee poaje'yo. Miquea beca ejiojji yanijo pojja'a quea mimishi tii poani ca ca cuaqui yasijje poquiyajo quea tai nee nee, quea nee nee poaje'yo. <sup>46</sup> Cuaqui jiji tiitije'yo; quijjo'yo ajja tii tii. Jama tii tii poaje'yo. <sup>47</sup> Cuanaya ecojjajo jjabaqui majje miya quea mimishi poani pojja'a. ¡Jamajjeya ecojja ecajjajea jayojja jama acue! Cojjama', mimishi'ama miya eyahuasijje poquiyajo Eyacuiñajji nijje eba'e tiitii'yojji quea pame nee nee poaje'yo. Cojjajji quea mimishi tii poani miya cuaqui yasijje poquije'yo ca ca quea tai nee nee, quea nee nee poaje'yo tii tii. ¡Jamajjeya mimishi paje'yocue! <sup>48</sup> Cuaqui quijjo'yo ajja tii tii, de —Jesosa poanaje.

<sup>49</sup> —Ojjaña ecuea epeeji poanija eba'ejji quea camaja poaje onaa tecuea cajje. Jamaya ecuea epeeji quea pame, quea ca'a pocue jama ba'a: <sup>50</sup> Jiquio ecua mei seseya, sane quea pame nee'ya bobi shicuiajo ihui'yo ajja jayojja jama ecuea epeeji quea pame nee ba'e'yanijo, pea cuana o jayojja jama ba'eje quea pame nee pea'ai. Jamatii sane sese'ama poajo, ¿a'a quea sese po meeje o'oya? Chojja, sese'amajo jeajea'aña seya. ¡Jamajjeya mei sese quea pame jama pocue, sane jama! ¡Pea cuana quea pame nee ba'e meesahuacue, ecue sohui jama! ¡Pea cuana nijje quea pame nee jjapeequicue! ¡Quea bei pocue pea'ai! —jamaya Jesosaa o shajja'ajjaji cuana huohui canaje.

## 10

*Jesosaa esohui huohui canaje ehueijji*  
(Mateo 19.1-12; Noca 16.18)

<sup>1</sup> Majoya esohui huohui majje Jesosa Capenaomajo ani po'oquequinaje Jodea meshi yasijje, Jodana cuei ojje miji yasijje. Jomajo quea huiso nee nee o que jjachichaqui o'oyanaje. Jesosaa ojjaña cuana sohuihuohui canaje, ohuaya ojjaña meshi yasijje esohui

huohui majamaja canaje jayojjaya. <sup>2</sup> Paniseo cuana ca ca o que poeyanaje jjadasiaquiya nisho. Jjashahuabaquinaje jama ba'a: —E'e pojja'a Jesosa Moisesija etehue'yo jayojja jama pojjeama mimije. Jamajjeya ecuaaya oya tecueaje —poanaje.

Poe majje Jesosa huohui'ajja canaje cuaa jama ba'a: —Esohui huohuijji, ¿a'a cuae ehuanase huei cajji? ¿Yajjajo acuae ehuanase huei cajji so'o? ¿Achajja tehuemeya acuae oe Jodioja etiiquiana aca poa?

<sup>3</sup> Saja'a canaje Jesosaa: —¿Yajja acuae Moisesija esohui etehue'yo poani so'o?

<sup>4</sup> —Moisesiya jama tehueme aca poa ba'a: “Huei'yo majje yahueya ehueijeajji papeni etehue'yo caquia cahua oja huanase que. Majoya cahuojea cahua” —poanaje Paniseo cuana.

<sup>5</sup> —E'e —Jesosa poanaje—, etiiquiana quea mimishi nee neeya jjejojya Moisesiya huei mee'ajja canaje. Quijje nei Moisesiya jamaya tehue ca poa; jamatii Eyacuiñajjiya jama pojjeama pana coo ca poa. <sup>6</sup> Yahuajo nei nei Eyacuiñajjiya pana coo ca poa yahue, epona pea'ai. <sup>7</sup> Huohui ca poa ohuaya: “Jamajjeya yahue cajjaba'eshiñaquiahua ojaya ehuanase nijje eba'ejji”. <sup>8</sup> Oya cuana beca; jamatii oe nei jayojja Eyacuiñajjiya oya ba cani; becanejjijji pea'ai pojjeama; oe nei jayojjaya. Cuanaya Eyacuiñajjiya oe jayojja aca poa. <sup>9</sup> ¡Jamajjeya a'a oe jea meejji! ¡A'a hueijji nequiaa! ¡Jama tii tii oe nei oe acue! Jamaya Moisesiya yahuajo nei tehue ca poa pea'ai —Jesosaa acanaje.

<sup>10</sup> Majoya o shajja'ajjajji cuana Jesosa nijje equi yasijje dobiqui majje ojaya esohuijo huohui'ajja canaje. <sup>11</sup> Jamajjeya Jesosaa oya cuana jama acanaje ba'a: —Eyaya miya huohuiana e'e jojo nei ehuanase pea dejjaja sii jjima huei ca ajja. Dejja ehuanase hueijji epo pea epona ehuanayojji quea mimishi nee, epona siijji epo jama. Eyacuiñajjiya oya ba cani quea mimishi, pea cojjojji. <sup>12</sup> Oya jayojja epona ojaya yahue ¡a'a huei meejji! Yahue huei'yo majje pea dejjajo ejjahueaquijji quea mimishi nee poani, yahue siijji epo jama. Eyacuiñajjiya oya ba cani quea mimishi, pea cojjojji —Jesosaa acanaje.

*Esho'iquianajo Eyacuiñajji nijje miminaje Jesosa*  
(Mateo 19.13-15; Noca 18.15-17)

<sup>13</sup> Majoya Jesosa que esho'i nei cuana jjequi canaje cuaa. Huohui canaje: —Jesosa, ¡jiquio esho'i nei sapa napa'ajja majje Eyacuiñajji nijje mimicie ojaya ejaahuanajji! —poanaje.

Jesosa shajja'ajjajji cuaa ca ca oya cuana tecuea canaje: —¡A'a jja oe Jesosa que jjequi majajji esho'iquiana! ¡Esohui oe cahuhui cahua! —acanaje.

<sup>14</sup> Ma ba majje Jesosa quea yeno nee poanaje. Etii cuana tecuea canaje jama ba'a: —¡Esho'iquiana e que capoe'yahua! ¡A'a quea huesha nequi meejji! E'e, ojjaña esho'iquiana Eyacuiñajji nijje jjapeequi sa poani. Jamaya ecuea epeeji esho'i jayojja eyaya jaahuana sa aña pea'ai. Jamajjeya e que poquije'yo; eya eyajo ojjaña huoojea'yojji poaje. <sup>15</sup> Jamajjeya e'e jojo nei esho'i nei jayojja mi po'yajo ca ca enijje eba'e'yojji pojjeama quijje eya ojjaña huoojea'yojji poaje —Jesosa poanaje.

<sup>16</sup> Majoya esho'i nei cuana bishami majje, sapa biajje eme' huana majje Jesosa Eyacuiñajji nijje miminaje jiquio esho'iquiana jaahuanajji.

*Edejja sho'i pishana quea aquiana huiso*  
(Mateo 19.16-30; Noca 18.18-30)

<sup>17</sup> Majoya Jesosa o shajja'ajjajji cuana nijje poqui o'oyanaje Jodea meshi yasijje. Oe dejja o que cuajicuajjebenaje. Ecui'oshajjajo nequi oya Jesosa nijje jama poanaje ba'a: —Esohui huohuijji, miya ca ca oe quea pame nee nee. Eya huohuicue ¿achajja a mo eya poquije'yo eyahuasijje eba'e tiitii'yojji Eyacuiñajji nijje? ¿Ae quea pame amajje eyahuasijje poqui ca'yojji? —poanaje.

<sup>18</sup> O jjabahuejjaquijji Jesosaa huohui canaje: —E'e, miyaya eya anaje jama ba'a: “Miyaya ca ca oe quea pame nee”. Eyacuiñajji ca oe nei quea pame nee. Pea chama' o jayojja quea pame nee nee. ¡Jamajjeya eya shajja'ajja neineicue! <sup>19</sup> ¡Eyacuiñajji nijje ba'e tiitii'yo sa po

majje ojaya etehue'yo jayojjaya jama oe ba'ecue tii tii! Ojaya esohui ma Moisesiya tehue ca poa miquea eba jama ba'a:

“¡A'a pea quecuajji!

¡A'a pea siijji!

¡A'a sii pojji!

¡A'a sijje pojji!

¡A'a onaya dasiajji!

¡Mique chii, miquea enaese pea'ai oe shajja'ajjacue!”

—Jesosa poanaje.

<sup>20</sup> —E'e, eyaya jamaya aña, jama tii tii esho'yahuaa. ¿Pea acuae yajja po cajji eyajo eba'e tiitii'yojji? —jiquio dejjaa Jesosa huohui'ajja canaje.

<sup>21</sup> Jesosaa oya ba neinei canaje, oya quea boti nee nee poanaje. Jamajjeya jama acanaje ba'a: —E'e, epeeji, miya quea pame nee nee Eyacuiñajji jayojja po sa po majje ¡poquicue; miquea aquiana cuana quiaquicue ejjesheji soseje! ¡Majoya ejjesheji quia'yocue aema' cuana huasijje! ¡Majoya poecue enijje epo'yojji! Jamajjeya eyajo Eyacuiñajjiya miya aquiana quea pame nee nee quea huiso nee quia caje'yo quijje.

<sup>22</sup> Jesosaja esohui shajja'ajja majje ma dejja esho'i pishana quea yeno poanaje; ojaya aquiana quea huiso nee nee yani jojaya quia sa po'yo ajja. Jamajjeya poqui'yonaje quea aquiana yeno jjejojo.

<sup>23</sup> Jamajjeya Jesosaa ojjaña bajea majje o shajja'ajjaji cuana huohui canaje jama ba'a: —E'e, quea mimishiya jjejojaya aquiana quea huiso, meshi quea quemo pojja'a nahue canijo beca cuana beshahua nei e que poqui ajja quijje, eya eyajo ojjaña huoojea'yojji poaje'yo.

<sup>24</sup> O shajja'ajja majje jjashahuaba neineiquinaje oya cuana. Ojee miminaje.

Jamajjeya Jesosaa jama acanaje ba'a: —Ecuea epeeji cuana, eyaya e'e jojo nei huohuiaña jama pea'ai ba'a: <sup>25</sup> Ahuoja quii huejjajje ino jeanobiaña jama ¿a'a mapichi jeanobia cajji ahuoja quii huejjajje? Cho. Quea camaja coma. Jiquio ecua mapichi ahuoja quii huejjajje jeanobia cajji joggemo dejja quea aquiana huiso nee nee dobiqiu'yome eyahuasijje.

<sup>26</sup> —¡De! Jamajjeya ¿a'ya shai eyahuasijje dobiqiu mee caje'yo Eyacuiñajjiya? —oya cuana ojee mimimiminaje.

<sup>27</sup> Cojja ba neinei canaje Jesosaa. Huohui ca o'oyanaje: —Dejaa jama amee ajja tii. Eyacuiñajjiya oe nei ojjaña acani. (Eyahuasijje dobi meequi cani joya quea aquiana huiso nee pea'ai) —Jesosaa acanaje.

<sup>28</sup> Jamajjeya Peno jjashahuabaquinaje ma dejja quea aquiana huiso nee nee jeana'yo sa po ajjajo. Huohui'ajja canaje: —Jesosa, ecuaaya ojjaña aquiana jeana'yonaje minijje epoqui'yojji. Jamajjeya ¿a'a cuee ecua eyahuasijje poquije'yo? ¿Ae acuae ecua quiaje so'o, de? —acanaje Penohua.

<sup>29</sup> —E'e jojo nei beca cuaa ecuea esohui jama asa poanijo aquiana cuana jiña cani. Ojaya equi, oja huapa pojjeama, oja chii, oja nae pojja'a, oja bacua cuana pojja'a jiña cani enijje jjapee neinei'yo'ohua, ecuea esohui quea pame nee quea huesha huohuiya pea'ai.

<sup>30</sup> Jamajjeya e'e jojo nei Eyacuiñajjiya oya cuana quea huiso nee nee o jayojja quia caje'yo equi, huapa pojjeama jayojja, echii mese jayojja cuana, enaese jayojja cuana, e bacua cuana jayojja jama pea'ai. Mimishi cuaa ca ca oya cuana napa caje pea'ai. Jamatii quijje oya cuana quea bihui nee nee ba'e tiitii mee caje'yo pea'ai eyajo onijje. <sup>31</sup> Jamatii beca cuana jjeya ona huoojeajji poani eyajo ona huoojea'yojji pojjeama poaje'yo. Joya jjeya ona huoojeajji pojjeama ca ca eyajo ona huoojeajji nei nei poaje'yo e jayojja —Jesosaa Peno acanaje.

—Quijje eya manaje'yo —Jesosa po o'oyanaje

(Mateo 20.17-19; Noca 18.31-34)

<sup>32</sup> Majoya Jenosanena huasijje poqui o'oyanaje. Jesosa ehui dojji poquinaje. O shajja'ajjaji cuana, pea cuana o quishishijji poquiani pea'ai quea mete jjashahuabaquinaje

jama ba'a: —Jenosanena huasijje poquiyajo, ¿yajja Jesosa acaje Jodio etii cuaa? ¿Quecua ca chana', del!

Jamajjeya Jesosaa o shajja'ajjajji cuana dojo canaje ejiojji sahua huasijje esohui huohuijji. Jama poanaje ba'a: <sup>33</sup> —¡Shajja'ajja neineicue mo! Eya jiquio ojjañaja Edoe Mese. Eseyá Jenosanena huasijje poquije. Jomajo mo Jodio etii cuana iña meesahuaje equecua mee'yojji. E'e, Moisesija etehue'yo huohuijji, Eyacuiñajji nijje emimijji etii cuana pea'aiya eya iña mee caje. Taaa neineiye cuana: “¡Oya quecuajeacue!” poaje. Jodio pojjeama cuana huasijje mo huoojea caje equecua mee'yojji. <sup>34</sup> Ejo soa neineiye cuana; cuia caje'yo mo cuaa huaca jee ejeapashajjajjaa; acui ecueata'apeejo me cacajea majje mo ba'ehuanasohuajjea caje'yo cuaa emano'yojji. Jamatii mo beca cahuime po majje Eyacuiñajjiya shequi mee caje'yo —Jesosaa huohui canaje.

*Semeneoja bacua ejja Jesosa nijje miminaje o pejeje enequi mee'yojji eyajo*  
(Mateo 20.20-28)

<sup>35</sup> Majoya Semeneoja bacua ejja Jacobo, Huani pea'ai Jesosa que poeyanaje. Jama poanaje ba'a: —Esohui huohuijji Jesosa, ¡che ecuanaja esohui mi nijje jama acue ecuanajo! —poanaje.

<sup>36</sup> Jesosa onijje jama poanaje ba'a: —Ecuea epeeji cuana, ¿ae sa poani miquianaya?

<sup>37</sup> —Jesosa, ecua mi pejeje canequi'yahua quijje miya ojjaña huoojea'yojji quea ca'a nee nee poaje. Oe shani mijijje, pea ebianeí mijijje canequi'yahua minijje ona huoojea'yojji epojji. ¡Jamaya oe acue! —poanaje Jacobo.

<sup>38</sup> —Chojja, miquianajaya ba jjima eya quea nee nee po mee caje'yo cuaa. ¿A'a miquiana e jayojja quea nee nee po majje quea ca'a poaje'yo? Eya quecua caje'yo pea'ai cuaa. Enijje jjapee neineiquianijo miquianaya quecua caje'yo pea'ai pojja'a cuaa. ¿A'a jamatii miquianaya quea ca'a poaje'yo? —Jesosa poanaje.

<sup>39</sup> —E'e —saja'a canaje Jacobo, Huani pea'aiya—. Quea ca'a poaje mi jayojja, jamatii quea nee nee po mee caje'yo, jamatii quecua caje'yo cuaa.

—E'e —Jesosa poanaje—, jamajjeya e'e jojo nei miquiana e jayojja quea nee nee po mee caje'yo cuaa; e jayojja quea ca'a nee nee poaje'yo onaa mano mee ca'yajje. <sup>40</sup> Jamatii e ebianeí mijijje, e shani mijijje pea'ai eyajo eyaya miquianaya enequi mee'yojji pojjeama, enijje ona huoojea'yojji poaje. Chojja, ecue Chii eyajo aniya yahuajo nei pea cuana babaca ca poa. Ohuaye nei nequia mee caje'yo e ebianeí mijijje, e shani mijijje pea'ai eyajo quijje, eya ojjaña huoojea'yojji poaje —Jesosa poanaje.

<sup>41</sup> Jesosa pejeje nequi sa pea'ai poanijo onijje ona huoojea'yojji epojji, Jacobo, Huani nijje pea'ai quea quene poanaje pea shajja'ajjajji cuana, ome mijijje pea'ai. <sup>42</sup> Jamajjeya aje oe Jesosaa oya cuana iyaa canaje. Huohui canaje: —¡A'a onijje quea quene pojji! Miquianajaya eba dejja cuana, Eyacuiñajji epeeji pojjeama. Onajaya emeshi mese cuana, ona huoojeajji cuana pea'aiya pea cuana huoojea neinei cani; quea tecue nee nee poani, quea mase. <sup>43</sup> ¡A'a jamaya pojji miquianaya, ecuea epeeji cuana! ¡E jayojjaya po sa poanijo pea cuana ba'e meesahuacue! ¡Jaahuanacue pea'ai! <sup>44</sup> Joya ona huoojea'yojji po sa poani ca ca echacojji sosema' jayojja capoahua. <sup>45</sup> E'e, ¡e jayojja jama pocue! Eya ojjañaja Emeshi Mese nei. Jamatii eya ca ca iña ojjañaja Edoe Mese eyajo ani poeyanaje ojjaña ba'e meesahuua; ojjañaja eya eba'e meesahuajji pojjeama. Ojjañaja mimishi sosequia'yojji mo manoj'e'yo, ojjaña cuaqui yasijje epoqui'yo poaje jjejojya —Jesosa poanaje.

*Batimeo, Timoteoja bacua quea cojja ja'a po mee ca'yonaje*  
(Mateo 20.29-34; Noca 18.35-43)

<sup>46</sup> Jenosanena huasijje poquije Jesosa o shajja'ajjajji cuana nijje dobiquinanajje Jenico huasijje. Majoya quijje pishana poqui o'oyanaje ejiojjijje. Quea huiso nee nee poquinaje onijje cuana. Batimeohua, Timoteoja bacua ejjaa ejiojji sahuajje e'anioqueaniya shajja'ajja canaje Jesosa poeje. Oya cojjama'. <sup>47</sup> Jamajjeya taaa neineinaje jama ba'a: —Jesosa, miya emeshi mese Dabija osecua, jejo jjashahuabaquicue quea yeno! —taanaje.



<sup>48</sup> —¡A'a oe taaa majajji! ¡Esohui oe ca'acue! —acanaje cuaa.

Jamatii taaa neineinaje cojjama': —Jesosa, miya Eyacuiñajjija esohui jayojja jama poeyanaje, emeshi mese Dabija osecua. ¡Ejo jjashahuabaquicue!

<sup>49</sup> Jamajjeya o shajja'ajja majje Jesosa nequiñaquinaje. Cojjama' iyaa mee canaje: —¡Oya cojjama' iyaacue! —poanaje.

Jamajjeya cojjama' iyaa canaje cuaa: —¡Cojjama', poecuajicue oe! Jesosaa miya iyaa cani. ¡Quea bihui nee oe pocue! —poanaje.

<sup>50</sup> Jamajjeya Batimeo nequisohua majje daqui nei jea canananaje, Jesosa que poquicua-jinaje. <sup>51</sup> Poeyajo Jesosaa oya huohui'ajja canaje: —¿A'ya so'o, Batimeo? ¿Ae sa poani miya?

—Esohui huohuijji, ¡miyaya iña jjacojjabapojjaqui mee'yocue, ecuea ecojja quea ja'a epo'yojji! —poanaje Batimeo.

<sup>52</sup> —E'e, Batimeo —Jesosa poanaje —, miyaya e'e jojo nei ejo jjashahuabaquinaje eyaya miya jjacojjaja'aqui meeje'yo. Jamajjeya ¡quea bihui nee pocue! Jjeyahua nei Eyacuiñajjiya miya quea cojja ja'a po mee caje'yo —Jesosa poanaje.

Jjeya nei oya jjacojjabapojjaqui'yonaje. Jesosajo quea bihui nee nee poanaje jjacojja-ja'aqui mee ca'yajje. Jamajjeya Jesosa nijje poqui'yonaje, Batimeo.

## 11

### *Jesosa Jenosanena huasijje poquinaje* (Mateo 21.1-11; Huani 12.12-19)

<sup>1</sup> Majoya Jesosa Jenosanena huasijje poquije pea cuiñajjijo nequiñaquinaje Mepajejo, ma Betania pejejo, acui yiyejo, Onimo eyiyo pejejo. Nequiñaqui majje o shajja'ajjajji becanajjijji pea'ai huoojea canaje Jesosaa jama ba'a: <sup>2</sup> —¡Poquicue miya Mepaje yasijje! ¡Dobiqui majje miyaya mapichi sisija bacua esho'i ai ejeyo nequia nequi bañaquicue! Dejjaja o daasa biajje yahuajo e'anijji ajjima poa. ¡Ba majje pichocue; yecue e que! <sup>3</sup> Onaa: “¿Apiojji miyaya mapichi sisija bacua pichoaña so'o?” acajje: “Ecuanaja Emeshi Mese sa poani. Ohuaya huacuaya huoojea caje o'oya jiquiacua” saja'ame acue. Jamajje: “E'e, ocuae dojo'ajja joya mapichija bacua” acaje dejjaa Mepajejo ba'eya —Jesosa poanaje.

<sup>4</sup> Jamajjeya oya cuana Jesosa shajja'ajjajji poquinaje Mepaje yasijje. Mapichi sisija bacua ejeyo nequia nequi ba cañaquinaje equi secue pejejo. Ohuaya picho canaje. <sup>5</sup> Pea cuana jomajo nequi jama poanaje ba'a: —¿Ae poani miya? ¿Apiojji mapichija bacua pichoaña so'o?

<sup>6</sup> Jamajje Jesosa shajja'ajjajji cuaa saja'a canaje: —Ecuea Emeshi Mese sa poani. —E'e, ocuae dojo'ajja joya mapichija bacua —acanaje Mepajejo ba'e dejjaa.

<sup>7</sup> Jamajjeya mapichi sisija bacua dojo canaje Jesosa que. Onajaya daqui ao cuana mapichi sisija edaasa biajje iya canaje Jesosa anisohuaquijji. Jesosa anisohuaquinaje ma mapichi esho'i aija daasa biajje. Anioquenaje. Ejiojjijje poquinaje. <sup>8</sup> Ojjaña cuana ejjachichaqui nequica cuaa ojaya daqui ao cuana ejiojjijjo jeapihui canaje Jesosa jjayejjequijji. Pea cuaa acui iña jajasejja canaje. Huana yiyoyiyo canaje ejiojjijjo pea'ai quea huiso nee neeya. Jamaya yahuajo Jodio cuaa emeshi mese ja'ajjequi canaje, cuiñajji yasijje poeyajo. <sup>9</sup> Ojjaña ehui dojojji poquiani, Jesosa quiquishijji pea'ai taaa capoquinaje quea bihui nee nee: —¡Mi poeyajo ecuana quea bihui nee! Quea pame nee nee miya, Jesosa. ¡Eyacuiñajji eyajo aniya miya cahaahuana cahua! <sup>10</sup> E'e Jesosa, emeshi mese Dabi yahuajo ba'e miquea etiiquiana. Miya ojjañaja Emeshi Mese nei poeyanaje. ¡Eyacuiñajji mi jaahuanajji cabihuia cahua ojjaña! —taaame poa quea bihui nee nee jjejojo.

<sup>11</sup> Majoya Jesosa Jenosanena huasijje dobiquinaje ojjaña cuana nijje. Eyacuiñajjija equi yasijje poquinaje. Dobiqui majje ohuaya bajea canaje ojjaña. Majoya siniajo oya Betania huasijje poquinaje cahuiya; ome miji pea beca, 12 huisome o shajja'ajjajji poani nijje poquinaje.

*Acui etona jjaajja jayojja iquena bajjani sajjai mee ca'yonaje Jesosaa*  
(Mateo 21.18-19)

<sup>12</sup> Mecajjeahua oya cuana Betaniajo ani Jenosanena huasijje poe o'oyaje quea shoe poanaje Jesosa. <sup>13</sup> Ba canaje ejiojji sahuajo nequi acui etona jjaajja jayojja. Acuijjajja ba'ajjaqui canaje. Chama' poanaje ejjajja. Eña oo pana nequi'yo, acuijjajja she pojjeama jiquio ba'ljo. <sup>14</sup> Jamajjeya Jesosaa huohui canaje: —¡Jamajje jamatii jjaajama' tii capo'yahua acui! Jamajjeya onajaya ejjajja e'ijjajji pojjeama tii.

Jesosa shajja'ajjajji cuaa Jesosaja emimi shajja'ajja canaje pea'ai. Jesosaa jama acanaje ojjaña jjabahuejjaqui meejji jama ba'a: Jiquio acui jjaajama' jojoya Jesosaa tecuea canaje jayojja jama Eyacuiñajjiya Jodio cuana tecuea caje'yo jjashajja'ajjaqui ajja jojoya.

*Aquiana quiajji poani Eyacuiñajji equijo nequi cuana huoojeacuayajea canaje Jesosaa*  
(Mateo 21.12-17; Noca 19.45-48; Huani 2.13-22)

<sup>15</sup> Majoya Jenosanena huasijje poe o'oya majje Jesosa ojaya epeejji cuana nijje Eyacuiñajji equi yasijje poqui o'oyanaje. Dobiquinaje. Ba cañaquinaje quea huiso enequi, Eyacuiñajji nijje mimiani pojjeama. Chojja. Aquiana quia cani cuaa. Jamajjeya Jesosaa aquiana quiajji poani Eyacuiñajji equijo nequi cuana huoojeacuayajea canaje; aquiana jjeshe poequi pea'ai huoojeacuayajea canaje. Aquiana cuana huojjojeaje canaje; bejjo, pea bejjo sosejje quia cani cuanaja bejjo nequijji cuana jeapajjaje canaje; huia' quiajji pea'ajja huia' nequijji cuana jeabichaje canaje. <sup>16</sup> Ojjaña joya aquiana abojji huohui canaje: —¡A'a jja oe aquiana yedobiajji jiquiacua! Eyacuiñajji equi pejeje ojjaña jjachichaquiani esohui shajja'ajjaa —tecueame acanaje.

<sup>17</sup> Jomajo Jesosaa jama acanaje pea'ai ba'a: —¡A'a Eyacuiñajji equijo aquiana quiajji! Eyacuiñajji esohui jama poani ba'a: “Ecuea equi ojjaña cuana ojjaña meshijo ba'e Eyacuiñajji nijje emimijji equi”. Miquianaaya ca ca siipojji nequijji jayojja amee aña Eyacuiñajji equi.

<sup>18</sup> Ma shajja'ajja majje Eyacuiñajji nijje emimijji etii cuana, Moisesija etehue'yo huohuijji poani pea'ai Jesosa nijje quea quene poanaje; oya Eyacuiñajji huoojea'yo pojjeama posojo o quecua sa acanaje. Jamatii Jesosa iña jjima poa, quea meteya jjejojo. Quea huiso cuana Jesosaja esohuijo quea bihui nee nee poanaje. Jamajjeya Jesosa ojjaña quea nahue nee nee poanaje equecua'yojji.

<sup>19</sup> Quijje siniajo Jesosa o shajja'ajjajji cuana nijje Jenosanenajo ani poqui o'oyanaje Betania huasijje cahuiya.

*Acui etona jjaajja jayojja esajjai'yo ba canaje*  
(Mateo 21.20-22)

<sup>20</sup> Mecajjeahua nei Jenosanena huasijje poe o'oyanaje. Jesosa shajja'ajjajji poani cuaa ba canaje acui esajjai'yo, ma Jesosaa tecuea canaje acui. <sup>21</sup> Ba majje Penohua niñeba ca'yonaje. Jama poanaje ba'a: —¡Esohui huohuijji Jesosa, bacue! ¡Miya tecueajje jjeja nei sajjai'yonaje acui!

<sup>22</sup> —E'e —Jesosa poanaje—. ¡Miya Eyacuiñajji quea ja'a nee jjashahuabaquicue! A'a jjashahuabaquijji jama ba'a: “E'e pojja'a Eyacuiñajji eya shajja'ajja jjima”. <sup>23-24</sup> Chojja, jjashahuabaquicue jama ba'a: “Eyacuiñajjiya e'e jojo nei nei ecuea ehuohui onijje jama acaje'yo”. Jamaya miya jjashahuabaquijjo Eyacuiñajjiya miya saja'a caje'yo. E'e, Eyacuiñajjiya miya e jayojja jama ameesahua caje'yo pea'ai ma dejjaa ajjima acani —Jesosa poanaje—. <sup>25</sup> Cuanaya miya Eyacuiñajji nijje mimianijo jiquiajja jjashahuabaquime pocue ba'a: “Onaya enijje mimijajinaje quea tai. Jamatii eya ojaya mimishijo quene'ama” jamaya pocue —Jesosa poanaje—. Jamaya jjashahuabaquianijo Eyacuiñajji miquea mimishijo quene'ama poaje pea'ai. <sup>26</sup> Pea nijje quea quene tii poanijo ca ca Eyacuiñajji eseja Chiija miquea mimishi ecuijea'yojji pojjeama —Jesosa poanaje.

*Eyacuiñajji Jesosa huoojea'yojji poa*  
(Mateo 21.23-27; Noca 20.1-8)

<sup>27</sup> Majoya oya cuana Jenosanena huasijje poe o'oya majje Eyacuiñajji equi yasijje do-biqui o'oyanaje. Jesosaa esohui huohui canijo Jodio etii cuana, Eyacuiñajji nijje emimijji etii cuana, Moisesija etehue'yo huohuiji cuana pea'ai o que poeyanaje. <sup>28</sup> Jেসosa ojaya ba jjimajo huohui'ajja canaje: —¿Aya miya huoojea canaje jiquiacua? ¿Apiojji acuaeya esohui huohuiaña so'o? ¿Apiojji acuaeya aqui ana quiajji poani huoojeacuayajeanaje oma mecaje? —onijje mimijajinaje.

<sup>29</sup> Jেসosa oya cuana acanaje: —E'le, eyaya miya ebionei huohui'ajjaje. <sup>30</sup> ¿Aya Huani huoojea canaje enajje ona besa meeya? ¿A'a Eyacuiñajjiya? ¿A'a dejja cuaa pojja'a? ¡Huohuicue mo! Eyaya majoya huohuije e huoojea'yojji epo.

<sup>31-32</sup> Shajja'ajja majje Jodio cuana ojee mimimiminaje: —¿Yajja saja'ame yajji esejaya? Quea mete ojjaña dejja cuanajo. Ojjaña ba cani Huani Eyacuiñajjiya huoojea canaje esohui huohuiya. Jamajjeya: “Dejja cuaa Huani huoojea canaje” eseya aje se cuia ca chana'. “Eyacuiñajjiya Huani huoojea canaje” eseya aje se oe jama acaje ba'a: “Jamajjeya ¿apiojji miyaya Huani shajja'ajja jjima aña?” Jেসosa acaje —jamaya Jodio cuana miminaje.

<sup>33</sup> Jamajjeya jjashahuabaqui majje Jেসosa huohui canaje Jodio cuaa: —Cua'a, de. Ecuana ba jjima Huani huoojea'yojji epo —anisho canaje.

—Jamajjeya ecuea miya ehuohuiji pojjeama e huoojea'yojji epo —Jেসosa acanaje ma Jodio etii cuana.

## 12

### *Esohui ejjashahuabaquiiji echacojji taijo*

*(Mateo 21.33-46; Noca 20.9-19)*

<sup>1</sup> Jেসosa ma Jodio etii cuana jama acanaje pea'ai ba'a: —¡Jiquio shajja'ajjacue esohui ejjashahuabaquiiji! Jama poanaje ba'a: Oe dejjaa emeshi meseya que quea quemo nee neejo bana canaje jjonojjajja oo pana, uva. Que peeyi canaje meija peeyi. Majoya que yiyesamajo mei cuehue ñaca canaje jjonojjajja na quishipashajji. Majoya mei iyasohua ao'ao majje peehuana canaje. Iya canaje que jaahuanajji, quea huesha nee ojaya ebajji. Pea echacojji cuana iyaa canaje. Huohui canaje eque meseya: “¡Ecuea que jaahuanacue! Jaahuana sosejje quiaje'yo oya jjonojjajja quea huiso nee” poanaje. Majoya eque mese quea huesha poquinaje. <sup>2</sup> Quijje jjonojjajja jahuajo, eque meseya o chacojji huoojea canaje que jaahuanajji que jjonojjajja jjequiya. Que jaahuanajji bañaqui majje huohui canaje jama ba'a: “¡Che mo jjonojjajja joya eque meseja pa cadojo'yahua, del!” poanaje.

<sup>3</sup> —Que jaahuanajji cuaa quea mimishi jjejojo, jjonojjajja, uva quia'yo jjima acanaje, joya eque meseja iyatepe mee. Jamajjeya o chacosahuajji poani ña canaje, cuia canaje. Huoojea ca'yonaje jamatii, emejjee tii. <sup>4</sup> Eque meseya pea huoojea ca o'oyanaje o chacosahuajji. Jamatii yahuajo jama acanaje que jaahuanajji cuaa. Sapa cuiahuejjajja'ajja canaje, quea mimishi acanaje pea'ai. <sup>5</sup> Quijje eque meseya pea huoojea, pea huoojea a'ajja canaje. Jamatii que jaahuanajjiya jjonojjajja quia sa po'yo ajjaa jjejojo oya cuana ña canaje, cuiajea canaje, pea quecua canaje, pea sapa jahahuejjajja canaje meiya. <sup>6</sup> Quijje yejje nei oja bacua ejja oe nei huoojea canaje que jaahuanajji baa: “¡E'le, oya cuana ecue bacua ejja shajja'ajja cajel!” poanaje eque mese.

<sup>7</sup> —Cho, oja bacua ejja poeje ba majje jama poanaje ba'a: “Joya eque meseja bacua ejja poeje. Jjonojjajja yiye quijje ojaya poaje, ejeajji mano'yajo. ¡Cua'a, ejjaquecuajjaequi oe! Jamajjeya que esejaya poaje'yo, de” poanaje que jaahuanajji cuana.

<sup>8</sup> —Jamajjeya aje oe ebacua ejja ña canaje, quecuajja'yo majje jeajjaequi canaje quea huesha nee ma que jaahuanajji mimishi cuaa; eque mese boti'ama acanaje cuaa. Mahuiso esohui —Jেসosa poanaje—. <sup>9</sup> Jamajjeya joya eque meseya poe o'oya majje ¿yajja acaje'yo acuae jiquio que jaahuanajji quea mimishi cuana? Oya quea quene nee poaje'yo. Ma que jaahuanajji cuana quecuajja cajel'yo, de. Que quia cajel'yo pea cuana —Jেসosa acanaje.

<sup>10</sup> —E'le —Jেসosa poanaje pea'ai —, ¿a'a miquea eba Eyacuiñajji esohui etehue'yo yahuajo nei? Jama ejo poa ba'a:

“Oe equi yamajjana equi iyajji cajaa aca poa cuaa. Jamatii Eyacuiñajjiya ma eyamajjana equi yamajjana quea ca'a nee nequi mee ca poa.

<sup>11</sup> Jamajoya ojjaña ojaya epeeji cuanaa Eyacuiñajji bihuia cani”.

Jamaya yahuajo nei aca poa ejo; eya ma eyamajjana equi iyajji jayojja jama quea ca'a nee nee nequi —Jesosaa acanaje.

<sup>12</sup> Jesosaja esohui shajja'ajja majje Jodio cuana quea quene nee poanaje: —¡De! Ecuanao oya mimiani, equi yamajjanajo pojjeama. Eseyá que jaahuanajji quea mimishi jama pea'ai ohuaya acani —poanaje Jodio cuana.

Jamajjeya Jesosa iña sa acanaje ejeanobiajeajji. Jamatii iña jjima; quea mete poanaje. Ojjaña dejja echicha'yo nequica'yo cuaa Jesosa Eyacuiñajji esohui huohuijji nei nei ba cani. Ojjaña cuanaja quea nahue nee nee Jesosa e'iñajji. Jamajjeya Jodio etii cuanaja Jesosa iña jjima, poquinaje.

*Bejjo oe pojji quia cajji ba'e sosejje emeshi mese yasijje*  
(Mateo 2.15-22; Noca 20.20-26)

<sup>13</sup> E'e, Jesosa mimije shajja'ajja majje Jodio edejja tii cuana quea quene nee poanaje. Jamajjeya Paniseo cuana, pea cuana Enodeja ehuhui'yo quea boti nee poanaje pea'ai huoojea canaje Jesosa que. Jama huohuime acanaje ba'a: —¡Poquicue Jesosa dasiaa! ¡Esohui quea camaja nee huohui'ajjaquicue, ojaya yajja saja'ame ya'yojji! Jamajje Moisesija etehue'yo jayojja jama mi saja'a cajo jeanobiajeaje'yo ecuaaya —poanaje Jodio etii cuana.

<sup>14</sup> Jamajjeya Paniseo cuana poquinaje Enodeja epeeji cuana nijje Jesosa baa. Ba majje huohui'ajja nisho canaje jama ba'a: —Esohui huohuijji, miyaya e'e jojo nei huohuiaña Eyacuiñajji ejjashahuabaquijji. Miya edejja tii cuanao jjashahuabaqui ajja, emeshi mese cuanao pea'ai mete'ama. Jamajjeya quea ja'a nee huohuiaña. Jamajje mo che huohuicue: ¿A'a bejjo quia cajji Shomano meshi mese Sesa bajjani yasijje? ¿A'a cuaeya seya sosequiaje so'o Sesaja meshijo ba'e sosejje; equiajji pojjeama pojja'a esejaya? — acanaje cuaa.

<sup>15</sup> Ma Jodio cuanaja ejjashahuabaquijji quea ja'a pojjeama Jesosaja eba poanaje. Jamajjeya: —¡Miquiana ca mi ca oe e dasiajji nisho cuana, epeeji nisho quea tai nee nee! ¿Apiojji eya dasia sa aña? ¡Jamatii oe bejjo esodojjo jjequicue ecuea ebajji! —Jesosaa poanaje.

<sup>16</sup> Jjequi canaje cuaa. Esodojjo ba majje Jesosaa huohui'ajja canaje: —¿Ae ecajja'yo jiquio? ¿Ae bajjani etehue'yo?

—Emeshi mese ecajja'yo, Sesa —poanaje—. Ojaya bajjani etehue'yo yani pea'ai.

<sup>17</sup> —E'e —poanaje Jesosa—. ¡Jamajjeya Sesaja bejjo quiaquicue ohua sa cajo! ¡Eyacuiñajji a'a pajea'yoyji; oya bihuiaque, shajja'ajjacue pea'ai!

Jesosaa shajja'ajja majje ojjaña cuana quea mete nee poanaje: —Quea jjashahuabaqui ja'a nee nee oya Jesosa. Jjadasia meequi ajja —poanaje.

Jamajjeya Jodio etii cuana poquinaje, Jesosa jea cana'yonaje.

*¿A'a e'e jojo nei mano'yo majje eshe o'oya quijje poaje'yo?*  
(Mateo 22.23-33; Noca 20.27-40)

<sup>18</sup> Ma pojjaajo tii beca Sanoseo cuana poeyanaje Jesosa baa. Sanoseo cuana aje oe jama poani ba'a: —Mano'yo majje jama tii tii eshequi o'oyajji pojjeama quijje.

Jesosaa ca ca jama po ajja. Jamajjeya Jesosa dasia sa acanajejo jama anisho canaje ba'a: <sup>19</sup> —Esohui huohuijji, Moisesiya jama tehue ca poa yahuajo nei nei ba'a: “Dejja ejjahua-naqui bacuama' mano'yajo, oja chahuua ehuanase equijjojea ani cahuana ca'yahua oja o'ija bacua jea jayojja jama epojji”. ¿A'a e'e? <sup>20</sup> Jamajjeya jama poso ba'a: Quea huiso edoe mese, me oeje pea beca, nequinaje. Edoe mese ebionei jjahuaquinaje eponajo. Mano'yonaje bacuama' tii. <sup>21</sup> Oja chahuua ehuanase equijjojea ani huana ca'yonaje, bacuama' tii ani. Oya jayojja mano'yonaje bacuama' tii. Jamajjeya peaa echahua meseya huana ca o'oyanaje. Mano'yonaje bacuama' pea'ai. <sup>22</sup> Jamaya ojjaña edoe mese cuana manojeyo'yonaje bacuama' tii. Quijje ehuanase pea'ai mano'yonaje. <sup>23</sup> Jamajjeya eshe

o'oya po majje eyajo, ¿ajea ehuanase epona poaje, ache edoe meseja? Ojjaña echahua mese jjahuea'ajja'yo epo —Sanoseo cuaa acanaje Jesosa dasiajji nisho.

<sup>24</sup> Jesusaa jama acanaje ba'a: —Chojja. Jamaya pojjeama. Miquea ba jjima Eyacuiñajjiya esohui; oya quea ca'a nee nee miquea ba jjima pea'ai. <sup>25</sup> E'e, shequi o'oya majje jjahuanahui'yo ajja. Esohuidojojji eyajo ani jama poaje. <sup>26</sup> E'e, yahuajo nei nei Eyacuiñajjiya Moisesi tehue mee ca poa miquea ebajji e'e jojo nei emano'yo cuana eshe nequije o'oya eyajo. E'e, Moisesi acui quepe jiqui pejeje nequi, Eyacuiñajjiya oya huohui ca poa jama ba'a: “Eya ca ca iña Amajama jaahuanajji, Isaaca, Jacobo pea'ai jaahuanajji”. Jamaya yahuajo nei nei Eyacuiñajjiya aca poa. <sup>27</sup> ¿A'a Eyacuiñajjiya emano'yo cuana meshijo emojea'yojaa jaahuana cani? Cho. Ojaya epeeji cuana eshe nequi, mano'yo majje poqui'yo cuana pea'ai jaahuana cani Eyacuiñajjiya, eshe o'oya epo'yo edojjoshahua jiquio ese mimianinaje. Jamajjeya e'e jojo nei emano'yo cuana shequije o'oya, de. Miquianaya ca mi ca oe quea quehua jjashahuabaquiani —Jesosaa Sanoseo cuana acanaje.

*¡Eyacuiñajji quea jea nee acue mi pejeje nequi cuana pea'ai!*

*(Mateo 22.34-40; Noca 10.25-28)*

<sup>28</sup> Moisesija etehue'yo huohuijji jomajo nequi Jesosa shajja'ajja canaje quea jjashahuabaqui ja'a nee; Sanoseo cuana jjadasia meequi ajja. Jamajjeya Jesosa huohui'ajja canaje jama ba'a: —Esohui huohuijji, yahuajo Moisesiya tehue ca poa Eyacuiñajjiya esohui. ¿Ache esohui quea pame nee nee e'ajji?

<sup>29</sup> Jesusaa oya acanaje: —E'e, jiquio esohui quea pame nee jayojja jama acue ba'a: “¡Isaeni cuana shajja'ajjacue! Eyacuiñajji ca ca oe Emeshi Mese nei. Oya oe nei enequi tii. Pea chama' Eyacuiñajji. <sup>30</sup> Jamajjeya ¡Eyacuiñajji miquianajaya Emeshi Mese quea jea nee nee acue! ¡E'e, miquea huapa pojjeama cuana quea jea nee acue! ¡Quea jea nee neeya oe acue Eyacuiñajji! ¡Jamajje ojo jjashahuaba tiitiicue! ¡Oya shajja'ajja tiitiicue! ¡Ojaya epeeji quea ja'a nee nee acue pea'ai!”

<sup>31</sup> Jiquio esohui quea pame nee. Pea oya jayojja quea pame nee jama ba'a:

“¡Miquea huapa pojjeama jama quea jea neeya oe acue! ¡Ojjaña pea cuana quea jea nee nee acue pea'ai!”

Jamaya quea pame nee nee e'ajji —Jesosa poanaje—. Pea chama' esohui jiquio jayojja quea pame nee nee.

<sup>32</sup> Jesusaja esohui shajja'ajja majjeya Moisesija etehue'yo huohuijji onijje jama poanaje ba'a: —Esohui huohuijji Jesosa, miquea esohui e'e jojo nei. E'e jojo nei Eyacuiñajji Emeshi Mese nei. Oya oe nei enequi tii, pea chama' Eyacuiñajji. <sup>33</sup> Jamajjeya Eyacuiñajji Emeshi Mese nei quea jea nee nee ca'a cahua, ojo cajjashahuaba tiitiiquiahua, cashajja'ajja tiiti cahua, ojaya epeeji quea ja'a nee nee capoahua pea'ai ojjaña. Oya jayojja pea cuana quea jea nee nee ca'a cahua. Jamaya poanijo quea pame nee nee poani. Jodio etiiquiana cuana jayojja jama po majje ca ca quea pame pishana poani. E'e, etiiquiana cuaa ca ca huo cuana, pea aquiana pea'ai mei e'ia'yo biajje dahua caninaje Eyacuiñajji quea bei po meeji mimishijo —poanaje Moisesija etehue'yo huohuijji.

<sup>34</sup> Ojaya esohui quea ja'a nee shajja'ajja majje Jesusaa oya huohui canaje jama ba'a: —E'e, miya beshahua nei Eyacuiñajji sa neinei poani miquea Emeshi Mese nei epojji — acanaje.

Jesosa quea jjashahuabaqui ja'a nee neejo jjadasia meequi ajja ba majje ojjaña Jodio etii cuana quea mete poanaje. Esohui quea camaja, yajja sohui esaja'ame yajjijojo huohui'ajja pajea canaje o dasiajji nisho.

*Jesosa Eyacuiñajjiya huoojea'yo ojjaña jaahuanajji Quito*

*(Mateo 22.41-46; Noca 20.41-44)*

<sup>35</sup> Jamajjeya ojjaña cuana ejjachichacui nequi huohui'ajja canaje Jesusaa: —¿Yajja poani miquianaya Eyacuiñajjiya huoojea'yo ojjaña jaahuanajji Quitojo? ¿Ache etiiquianaja osecua oya, ajea bacua? ¿Yajjaje acuae Moisesija etehue'yo huohuijji cuaa

huohui cani? Jama ba'a: “Quito emeshi mese Dabija osecua, ma yahuajo ba'ya poaja” acani cuaa —Jesosa poanaje—. <sup>36</sup> Yahuajo nei Edojjoshahua Pameya emeshi mese Dabi tehue mee ca poa jama ba'a:

“Eyacuiñajjiya ecuea Emeshi Mese Quito jama aca poa: —¡Enijje anioquecue ebiane mi-jijje, ojjaña cuana huoojea'yojji! Eyaya mi quecuajji nisho epo cuana jeabichajea jeyojeyoje'yo”.

Jamaya huohui ca poa yahuajo Dabiya ejo. <sup>37</sup> E'e, Dabiya Eyacuiñajjiya huoojea'yo Quito aca poa: “Ecuea Emeshi Mese nei”. Jamajjeya Quito Dabija Emeshi Mese nei poani. Jamatii oya Dabija osecua pea'ai —Jesosaa acanaje.

Ojjaña cuaa ejjachichacqui nequiya Jesusaja esohui shajja'ajja canaje. Quea bhui nee poanaje.

*—¡A'a Jodioja esohui huohuijji jama ba'ejji! —Jesosa poanaje*

*(Mateo 23.1-36; Noca 11.37-54, 20.45-47)*

<sup>38</sup> Majoya Jesusaa ojjaña cuana huohui canaje jama ba'a: —¡Jodio esohui huohuijji cuana jayojja jama a'a ba'ejji! Oya cuanaa daqui quea pame nee nee, quea ao nee huosho cani onajaya ebajji. Ejiojjijje poquiani ojjaña aquiana quia cani yasijje anicuaa; pea cuaa jama bihuia cani ba'a: “¡Esohui huohuijji, miya quea pame nee nee!” Jamaya aje oe ojaya quea boti nee, jiquio Jodio etii cuanaja, esohui huohuijji quea pame nee poso jjabaquiani —Jesosa poanaje—. <sup>39</sup> Jodioja equi ejjachichacquiijji ebionei anioque sa poani, Eyacuiñajjiya esohui huohuijji pejjejo, ojjaña nijje emimijji. “E'e, oya cuana Eyacuiñajjiya esohui huohuijji nei jayojja quea pame nee” epo meeji acani. Ojee ijja'ijjianijo emeshi mese pejjejo anioqueani, ebionei e'ijja'ijjiajji. <sup>40</sup> Jamatii oya cuana aje oe siipojji; e'ahuemanoja equi cuana sii cani. Majoya Eyacuiñajji nijje mimi nishoani quea huiso nee. Jamajoya Eyacuiñajjiya oya cuana cajaa acaje'yo. Quijje quea nee nee po mee caje'yo, quea nee tii tii poaje'yo. Pea cuana ca ca quea nee po mee caje'yo. Jamajjeya ¡a'a oya cuana jayojja jama ajji! —Jesosaa ojjaña cuana huohui canaje.

*E'ahuemanohua ejjeshejji quia canaje*

*(Noca 21.1-4)*

<sup>41</sup> Majoya Jesusa Eyacuiñajjiya equijo ejjeshejji iyajji pejjejo anioquenaje. Ba canaje dejjaa quea huiso poe majje ejjeshejji iyanobia cani ma acui ecaca huasijje Eyacuiñajji yasijje equia'yojji. Joya quea aquiana huiso neeya iyanobia canaje quea huiso nee ejjeshejji. <sup>42</sup> Majoya e'ahuemano aema' poeyanaje. Ojaya ca ca esodojjo beca iyanobia canaje, sosema' pishana. <sup>43</sup> Jamatii oya ba majje Jesusaa o shajja'ajjajji cuana iyaa canaje. Jama poanaje ba'a: —¡Bacue! E'e jojo nei jiquio e'ahuemanohua quea huiso nee nee jayojja quia ca'yonaje. Pea cuaa oe pojji jayojja quia ca'yonaje. Jamaya Eyacuiñajjiya oya ba cani. <sup>44</sup> E'e, pea cuana quea aquiana huiso nee nee. Oe pojji ojaya aquiana cuana quia canaje. E'ahuemano ca ca aema' nei nei. Ohuaya ojjaña ojaya ejjeshejji quia canaje; bobi jjeshejji yajji nisho quia canaje pea'ai —Jesosa poanaje.

## 13

*Eyacuiñajjiya mei equi cajjajeajea caje'yo cuaa*

*(Mateo 24.1-2; Noca 21.5-6)*

<sup>1</sup> Majoya Jesusa Eyacuiñajjiya equijo ani poquinaje. Poquianijo, o shajja'ajjajji cuaa oya huohui canaje jama ba'a: —¡Bacue Eyacuiñajjiya equi! Quea quemo, quea pame mei cuana —poanaje.

<sup>2</sup> —E'e, ¿a'a jiquio equi quea pame nee baña? E'e jojo nei quijshe mei cuana cajjajeajea caje'yo cuaa. Chama'yo tii acaje'yo —Jesosa poanaje.

*Jiquio ojjaña aquiana oe poaje'yo*

*(Mateo 24.3-28; Noca 21.7-19)*

<sup>3</sup> Majoya Jesusa poquinaje quea huesha pishana, enata'a ojje miji yasijje. Eyiyo Onimo acui yiye yasijje jaasohuaquinaje. Anioquenaje. Jamajje o shajja'ajjajji cuaa, Penohua,

Anesiya, Huaniya, Jacobohua pea'ai oya huohui'ajja canaje jama ba'a: <sup>4</sup>—Jesosa, ¿ache shono acuae mei cuana cajjajeajea caje'yo cuaa so'o? ¿A'ya ba majje acuae ecuana jjabahuejjaquije so'o ojjaña jiquio meshi chama'yo tii epojji?

<sup>5</sup> Jesosaa saja'a canaje: —¡Jashahuaba neineiquicue onajaya miya edasiajji pojjeama!  
<sup>6</sup> Quea huiso sijjepojji cuana poeje, ecuea ehoojea'yo pojjeama: “Eyacuiñajjiya eya huoojea canaje, eya ca ca iña ojjaña jaahuanajji” jamaya sijje poaje. Quea huiso dasia caje'yo. <sup>7</sup>“Ojjaña jjaquecuaquiiani, ojjaña meshi yasijje pea'ai” huohui caje peaaya pea'ai. ¡Jamatii a'a quea mete pojji! Jamaya poaje. Jamatii apoa pojjeama, oe po ajja jjima poaje so'o —Jesosa poanaje—. <sup>8</sup> E'e, jjaquecuaqui caje'yo cuana ojjaña meshi yasijje, ojjaña cuiñajji yasijje pea'ai. Quea huiso emanomeejjiya mano mee caje'yo; bobi yasijje po majje manojeyo quea huiso; meshi huehuahuehuaje ojjaña meshi yasijje pea'ai —Jesosa poanaje—. E'e, jiquio ecua epona bacua neeani jama ebionei japashineijje neeani; quijje quea nee nee. Jamaya poaje e poe o'oya jjimahuajo. Quea nee pishana po majje quea nee nee poaje ojjaña cuana —Jesosa poanaje.

<sup>9</sup> —Majoya esohui huohuijji nisho cuaa miquianaya iña majje jeanobiajea caje'yo. Cuiasejjajea caje equi ojee ejjachichaquijji pea'ai. Enijje jjapeequianijo, pea cuaa miquianaya iña majje emeshi mese cuana huasijje dojo caje, ona huoojeajji cuana huasijje pea'ai. Jamaya poajo, ¡ecuea esohui huohuicue ojaya eshajja'ajajji, emeshi mese cuanaja eshajja'ajajji! <sup>10</sup> E'e jojo nei e poe o'oya jjimahuajo, ojjaña meshi cuana huasijje ecuea esohui quea pame nee cahuhuiqui cahua, ojjañaja eshajja'ajajji. Majoya e poe o'oyajo, ojjaña oe poaje —Jesosa poanaje. <sup>11</sup> Jamajjeya miquianaya iña cajo emeshi mese yasijje edojjiji, ¡a'a quea mete pojji! A'a jashahuabaquijji jama ba'a: “¿Ae shai eyaya emeshi mese huohuije?” Edojjoshahua Pameya miquianaya sohuihuohui meesahua caje. Jamajjeya Edojjoshahua Pame mijo yaniya ohuaya esohui huohui caje ecuea ejjashahuabaquijji. <sup>12</sup> Majoya pea cuana boti'ama acaje'yo cuanaja. Jamajjeya e'o'i meseya oja chahua iña meesahua caje onaja equecua'yojji; ejeajjiya oja bacua iña meesahua caje onajaya equecua'yojji pea'ai. Esho'iquiana shajjama' po majje oja chii, ojaya enaese pea'ai iña meesahua caje onajaya equecua'yojji pea'ai. <sup>13</sup> Enijje jjapeequianijo miquianaya boti'ama nei acaje ojjaña meshijo ba'eca cuaa. Jamatii e poe o'oya jjimahuajo, enijje jjapeequipajea'yo ajja tii ca ca Eyacuiñajji nijje ba'e tiitii meeje'yo, enijje pea'ai —Jesosa poanaje.

*Aquiana quea tai nee ojjaña quea mete nee nee epo meeji*

*(Mateo 24.15-28; Noca 21.20-24, 17.22-24)*

<sup>14</sup> —Eyacuiñajjiya esohui huohuijjiya yahuajo nei nei jama aca poa ba'a:

“Quijje Eyacuiñajjiya equijo nequije aquiana quea tai nee nee, ojjaña quea mete nee nee epo meeji”.

Jamajjeya ma ba majje ma pojajajo tii ojjaña Jodio meshijo ba'eca capoquicuajiahua eyiyo cuana huasijje. (¡Jiquio esohuijo jashahuabaquicue quea ja'a epojji!) <sup>15</sup> Joya equi huisa biajje chachacoani ¡a'a equi yasijje dobiquinanajji aquiana cuana biohua edojjiji!  
<sup>16</sup> Joya quejo chachacoqui pea'ai ¡a'a equi yasijje poquinanajji daqui moojo! Eyiyo huasijje poquicuaji ajjajo mano'yo chana'. <sup>17</sup> Epona cuana o'ejji, bacua sho'ijji pea'ai quea yeno poaje; quea camaja equehua poquicuajijji poaje. <sup>18</sup> Jamajjeya Eyacuiñajji nijje mimicue jama ba'a: “Eyacuiñajji, ¡eenajo pojjeama capoahua ecuanaja epoquijji eyiyo cuana huasijje!” acue —Jesosa poanaje—. <sup>19</sup> E'e, ma pojja cuanajo ojjaña quea mete nee nee, quea yeno nee nee poaje. Jamaya pojjeama yahuajo, meshi pana majje, jjeya nei pea'ai, quijje pea'ai; quea mete pishana, quea yeno pishana. Ma pojja quea camaja cuanajo ca ca quea yeno nee poaje ojjaña cuana —Jesosa poanaje—. <sup>20</sup> Eyacuiñajjiya oe pojji cahuijo quea camaja po mee caje'yo; quea cahui huiso epo'yo jjojemo, ojjaña cuana mano'yome. Ojaya epeejji jaahuana canijo, ojaya quea nahue nee emano jeyojeyo'yojji, Eyacuiñajjiya oe pojji cahuijo quea camaja amee caje'yo, quea cahui huiso pojjeama —Jesosa poanaje.

<sup>21</sup> —Ma pojja cuanajo a'a shajja'ajjajji ona siajje poajo jama ba'a: “¡Bacue oe, Eyacuiña-jjija huoojea'yo Quito jiquiacua poe'yonaje!” Jama poso, ¡a'a shajja'ajjajji! “¡Bacue oe, Quito jocuama pa poeyanaje!” jama onaa acajje ¡a'a shajja'ajjajji; a'a poquijji! <sup>22</sup> E'e, Eyacuiñajjija huoojea'yo ojjaña jaahuanajji e jayojja nisho, Eyacuiñajjija esohui huohuijji nisho pea'ai poeje quea huiso nee nee. Oya cuanaa ma pea dejjaa ajjima acani acaje'yo Eyacuiñajjija epeeji cuana dasia'yojji nisho. Dasia caje'yo quea huiso nee; ecuea epeeji nei pea'ai beshahua nei eya pajea mee caje'yo o jayojja epojji; cho, jjadasia meequi ajja. <sup>23</sup> Ecuea epeeji cuana, eyaya miya huohuinaje, quijje oya poeje ejjadasiaquijji. Jamajjeya ¡a'a oya cuana shajja'ajjajji! —Jesosa poanaje.

*Jesosa ojjañaja Edoe Mese poeje o'oya*

*(Mateo 24.29-31; Noca 21.25-28)*

<sup>24</sup> —E'e —Jesosa poanaje —, quijje quea camaja nee nee po majje majoya eshequi quea apo poaje'yo. Ba'i jiji'yo ajja poaje'yo. <sup>25</sup> Majameta cuana jjacajjaqui'yo majje jijioqueje'yo ojjaña pea'ai. Majameta nequijji cuana huehuahuehuaje'yo janobajjima nei pea'ai; yahuajo jayojja pojjeama poaje. <sup>26</sup> Majoya ojjaña eya ba caje eyajo. Ba majje huohui caje jama ba'a: “¡Bacue! E'e jojo nei Jesosa ojjañaja Edoe Mese poeje'yo bo cuana biajje. Oya oe nei quea ca'a nee nee, quea jeajahua nee nee pea'ai” acaje cuaa —Jesosa poanaje —. <sup>27</sup> Majoya eyaya esohuidojojji cuana huoojeaje'yo biacua, macua huasijje pea'ai ojjaña meshi yasijje pea'ai ecuea epeeji cuana jjequiya —Jesosa poanaje.

*Esohui acuijo, iquena bajjanijo, huohui canaje Jesosaa*

*(Mateo 24.32-35; Noca 21.29-33)*

<sup>28</sup> Jesosaa huohui canaje pea jama ba'a: —E'e, eyaya miquianaya esohui ej-jashahuabaquimeejji huohuije iquena acuijo. Eseja meshijo acui ña'yani ba majje eseya poani: “E'e nei, nayaja po'yonaje. Jjeya eshequiaja popajea'yonaje”.

<sup>29</sup> —Ma jayojja jama eshequi, ba'i quea misi, majameta eyajo jijijioqueani ba majje jjashahuabaquicue jama ba'a: “E'e, jjeya nei apoa poaje. Jjeyahua nei esejaya Emeshi Mese nei Jesosa Quito poeje o'oya”.

<sup>30</sup> —E'e jojo nei ojjaña ma pojja cuanajo ba'eca cuana mano jeyojeyo'yo jjimahuajo ojjaña apoa poaje'yo; eya ojjañaja Emeshi Mese nequije'yo. <sup>31</sup> E'e, aquiana eyajo nequi chama' poaje'yo; ojjaña meshi chama'yo tii poaje'yo pea'ai. Jamatii ecuea esohui oe epo'yojji pojjeama; e'e jojo nei eyaya jamaya aje'yo tii tii —Jesosa poanaje—. <sup>32</sup> ¿Ache shono shai jamaya poaje, ojjaña apoa poaje'yo? Dejja cuanaja ba jjima; esohuidojojji cuanaja ba jjima pea'ai; ecuea ehuohuijji pojjeama. Ecue Chiija eba ojaye nei. Ohuaye nei huohui caje'yo ojjaña apoa epo'yojji —Jesosa poanaje.

<sup>33</sup> —Jamajjeya jjashahuabaqui tiitii anicue! Ache pojjaajo eya ojjañaja Emeshi Mese nei poeje o'oya miquea eba pojjeama. <sup>34</sup> Jiquio jama poaje ba'a: E'equi mese poqui jjimahuajo echacojji cuana iyaa canaje. Huoojea canaje jama ba'a: “¡Ecuea equi cuiñacue, miquianaaya! ¡Ecuea ehuohui mi yasijje jama chacocue pea'ai! Quijje eya poeje o'oya” e'equi mese poanaje —Jesosa poanaje—. <sup>35</sup> Jamajjeya jja'ishoa'ajjaqui ani tiitiicue! Eya miquianajaya e'equi mese jayojja; ache nei eshequi nequijo poeje o'oya miquianajaya ebajo ese. ¡Sinecua, mecashono, mecajjeahua cuana jja'ishoa'ajjaqui anicue! <sup>36</sup> Apoa pojjeama, ecahuijaa ba majje tecueañaje poe majje —Jesosa poanaje—. <sup>37</sup> Jamaya eyaya ojjaña ecuea epeeji cuana huohuiaña pea'ai: ¡Apoa epo anicue quiana! —jamaya Jesosaa sohuihuohui canaje Jenosanenajo, Onimo yijejo.

## 14

*Jodio etii cuana jjashahuaba taiquinaje Jesosa quecua'yojjijo*

*(Mateo 26.1-5; Noca 22.1-2; Huani 11.45-53)*

<sup>1</sup> E'e, ojjaña Jodio cuana ojee jjachichaqui o'oyanaje Jenosanena huasijje ojee ijia'ijjiaa, quea bihui nee epojji, yahuajo nei esohuidojojjiya Ejito meshijo Jodioja bacua cuana



cuia'yo jjima aca poa niñeba'yojji. Beca cahuime ojee ijia jjimahuajo, noe, pahui eshej-jeemeejjima' ijia jjimahuajo, Eyacuiñajji nijje emimijji etii cuana, Moisesija etehue'yo huohuijji cuana pea'ai jjashahuabaquinaje Jesosa quecua'yojji. <sup>2</sup> Ojee mimimiminaje jama ba'a: —¡Jesosa quehua neiije iñacue, ojjaña Jodio cuana jjachichaqui jjimahuajo! ¡Oya iñacue jjeyahua nei, de! Quijje pishana ojjaña ojee ijia'ijjianijo, ecuanajaya Jesosa e'iñajji pojjeama. Chojja, ojjaña Jodio cuana quea quene nee nee ecuaña nijje po chana' —poanaje Jodio edejja tii cuana.

*Eponaa Jesosa sapa sha canaje shiyeshiyeya*  
(Mateo 26.6-13; Huani 12.1-8)

<sup>3</sup> Jesosa Betaniajo ani poquinaje Simonija equi yasijje. Poquinaje ijia'ijjiaa. Yahuajo nei Simoni quea mano nee nee batata epo'yo quea tai poa, ma dejja cuaa jjajea meequi'yo jjima acani. Jesosaa oya yahuajo jjajeaqui mee ca'yonaje batata epo'yo. Simonija equijo ojee ijia'ijjianijo, oe epona Jesosa que poeyanaje. Tahuoo quea nahue nee nee shiyeshiyeya ye canaje. Tahuoo naba capa majje Jesosa huojja sha canaje shiyeshiyeya, nardo bajjaniya. <sup>4</sup> Ma ba majje beca cuana quea quene poanaje; epona tecuea canaje jama ba'a: —¿Apiojji acuae miyaya jiquio shiyeshiyeya Jesosa sapa quehua shaña so'o? <sup>5</sup> ¡Quea nahue nee nee eshojeajeajji, oe shequiaja echacome jama sosejjeme, de! ¿Sha jjima yajjijo poso ca mi ca oe shiyeshiyeya dojo meenaje esodojjo quea huiso sosejje? E'e, aema' cuana huasijje esodojjo equiajji poso —epona acanaje cuaa.

<sup>6</sup> Jesosaa ca ca oya shajja'ajja majje jama acanaje ba'a: —¿Apiojji acuaeya epona tecueña so'o? ¡A'a oya tecueajji! E'e, eya ohuaya huojja sha canaje. Jamaya quea pame nee. <sup>7</sup> E'e, aema' cuana minijje po tiitiije'yo. ¡Oya cuana jaahuana'yocue quijje pea'ai! Eya ca ca enequi tiitijji pojjeama minijje. <sup>8</sup> Epona e huojja sha jjimahuajo jjashahuabaquinaje jama ba'a: “E'e e, Jesosa manoj'e'yo. Mano jjimahuajo, eyaya oya huojja shaña shiyeshiyeya; onaja mojea jjimahuashaña poanaje epona” —Jesosaa acanaje.

<sup>9</sup> —Jamajjeya quijje ojjaña meshijo ecuea esohui huohui majje jiquio eponajo huohui capoquipoquije pea'ai jama ba'a: “Oe eponaa Jesosa huojja sha canaje shiyeshiyeya, quea jea nee neejojjo”. Jiquio eponajo huohui tiitii caje, e'e jojo nei —jamaya Jesosaa acanaje.

*Jodasaa onaya iña meesahua canaje Jesosa*  
(Mateo 26.14-16; Noca 22.3-6)

<sup>10</sup> Yaninaje quea huiso Jesosa shajja'ajjajji cuana, 12. Oe nei Jodasa Isicaniote bajjani poquinaje Eyacuiñajji nijje emimijji etii cuana huasijje. Jama poanaje ba'a: —Eyaya miya Jesosa iña meesahuaje. ¿Ache sose huiso acuae mo ya oe sosequiaje so'o Jesosa iña meesahua sosejje? —poanaje Jodasa.

<sup>11</sup> Oya cuanaa Jodasa saja'a canaje quea bihui nee jama ba'a: —E'e, Jesosa iña meesahua sosejje miya sosequiaje'yo quea huiso —poanaje Jodio etii.

Jamajjeya Jodasa jjashahuaba neineiqui aninaje: —¿Achajja iña meeme aje so'o? Caba'ajjaquisahua —poanaje.

*Jesosaa o shajja'ajjajji cuana bobi ijia mee canaje*  
(Mateo 26.17-29; Noca 22.7-23; Huani 13.21-30; 1 Conitio 11.23-26)

<sup>12</sup> Jodio cuana quea bihui ojee ijia'ijjianinaje yohua shejo ba'a esohuidojojjiya yahuajo nei etiiquianaja bacua cuana cuia'yo jjima ñajjajja na' esecuejo e'iñapepa ba majje. Jamajjeya ebionei epojjajo e'ijia'ijjajjijo, pahui quea ca'a ijia canijo, ñajjajja cuia cajjijo, Jesosa que poe majje o shajja'ajjajji cuaa huohui'ajja canaje jama ba'a: —Jesosa, ¿ache equijo acuae seya pahui eshejje meejjijo hua jjima ijiaje so'o? ¡Ecuana huoojeacue aquiana iyajjaa, mi ishoajji!

<sup>13</sup> Jamajjeya Jesosaa beca shajja'ajjajji huoojea canaje: —¡Poquicue Jenosanena huasijje! ¡Jomajo ecuea epeejji baquicue ena abo cani! ¡Onijje poquicue! <sup>14</sup> Oya equi yasijje dobiquiyajo, ma equi mese nijje mimicue jama ba'a: “Ecuana sohui huohuijji jama poanaje ba'a: “Miquea equijo eyaya e shajja'ajjajji cuana nijjeya pahui ca'a ijiaje

esohuidojojjiya etiiquianaja bacua ejja cuana cuia'yo jjima poa shejo. ¿Ache equi quecuayijjiyo ijjiaye so'o?" jamaya acue —Jesosaa acanaje—. <sup>15</sup> Majoya equi meseya miya dojo caje eyahuasijje equi quecuayijji ai yasijje. Jomajo ojjaña aquiana apoa, ehua bamebame'yo. ¡Jomajo bobi iyacue esejaya ojee e'ijji! —Jesosa poanaje.

<sup>16</sup> O shajja'ajjaji beca poquinaje Jenosanena huasijje. Jomajo Jesosaja esohui jayojja jama ojjaña ba cañaquinaje. Bobi iyajea canaje pahui ca'a ijji.

<sup>17</sup> Majoya sinecua neijo Jesosa o shajja'ajjaji cuana nijje, 12 huisome nijje ma equi yasijje poquinaje. Dobiqui majje jaasohuaquinaje equi quecuayijji ai yasijje, equi jamacoo huasijje. Majoya ojjaña cuana anioquenaje bobi ijji pejejo ijji'ijjia. <sup>18</sup> Ojee ijji'ijjia anijo Jesosa jama poanaje ba'a: —E'e jojo nei jiquiojo aniya oe epeeji nisho enijje ijji'ijjia ani. Ohuaya onaya cuana eya iña meesahua caje'yo equecua'yojji.

<sup>19</sup> Ma shajja'ajja majje ojjaña cuana quea yeno nee nee poanaje. Pea mimiajo, pea poanaje jama ba'a: —Ecuea Emeshi Mese, eya ca ca o jayojja pojjeama, e'e jojo nei —jamaya ojjaña miminaje.

<sup>20</sup> Majoya Jesosa onijje jama poanaje ba'a: —E'e, miquianaya e shajja'ajjajiya 12 huisome enijje yani; oe aje epeeji nisho, de. E'e, maaya pahui shapshipeshiani enijje; ohuaya eya onaya cuana iña meesahua caje'yo onajaya equecua'yojji. <sup>21</sup> E'e, yahuajo nei Eyacuiñajjija esohui tehueji cuaa esohui tehue ca poa jama ba'a:

“Quijje oe dejja Eyacuiñajjija huoojea'yo ojjaña jaahuanajji onaya cuana iña meesahua caje'yo equecua'yojji”.

Ma etehue'yo jama capoahua. Jamatii ma dejja, e iña meesahuajji epo quijje quea yeno nee poaje'yo. Jjashahuabaquije jama ba'a: “¿Apiojji shai eya ecue naeya mejo ca poa? Eya ca ca nequi sa po ajja. Ecuea ejjashahuaba taiquijjiyo mano'yo sa poani” oya poaje. Quijje oya quea nee nee po tiitijje'yo —Jesosa poanaje.

<sup>22</sup> Majoya ojee ijji'ijjia anijo tii Jesosaa pahui ca'a jjeshe canaje. Eyacuiñajji bihuia majje, pahui mijisisi majje quia canaje o shajja'ajjaji cuana. Jama poanaje ba'a: —¡Jjiacue! Jiquio ecuea eyami —poanaje.

<sup>23</sup> Pahui ijji majje caneco jjeshe canaje Jesosaa. Eyacuiñajji bihuia majje quia canaje ojjaña o shajja'ajjaji cuana. <sup>24</sup> —¡Ishicue! Jiquio ecuea ena'. Ecuea ena' cuayaquijjo, eya manojje'yo. Jamajoya eyaya ojjañaja mimishi cuana cuijeaje'yo enijje jjapeequijjo, Eyacuiñajjija esohui eyacua jayojja jama aje'yo. <sup>25</sup> Jjeya eyaya jiquio jjonojjajja na, uva na, e'ishi o'oyajji pojjeama miquiana nijje; eya manojje'yo. Quijje nei poe o'oya majje eyaya jiquio ishijje o'oya miquiana nijje. E'e, eya poe o'oyajo, ecue Chiya eya ojjaña huoojea'yojji pomee caje'yo, ojjaña shajja'ajja caje —jamaya Jesosaa acanaje.

*Penohua Jesosa ba jjima nisho acaje'yo pa*

*(Mateo 26.30-35; Noca 22.31-34; Huani 13.36-38)*

<sup>26</sup> Majoya ojee sohuicuaya majje poquinaje eyiyo huasijje, Onimo jjajja meshi yasijje.

<sup>27</sup> Ejiojjijje poquije Jesosaa o shajja'ajjaji cuana acanaje jama ba'a: —Jiquio mecajje ojjaña miquianaya enijje jjapeequijjo'yo. E'e, yahuajo Eyacuiñajjija esohui tehueji cuaa ejo tehue ca poa jayojja jama poaje jama ba'a:

“Quijje eyaya ñajjajja cuiñajji jaahuana neinei ajja. Jamajjeya onaaya oya cuia caje'yo. Ñajjajja cuiñajji chamajo, ñajjajja cuana jjajeaajajeaquinanaje'yo”.

Jamaya yahuajo nei nei tehue ca poa ejo —Jesosaa acanaje—. E'e, eya ñajjajja cuiñajji jayojja jama poaje. Eya mano'yo majje ecuea epeeji cuana ñajjajja cuana jayojja jama poaje; jjajeaajaquinanaje'yo.

<sup>28</sup> —Jamatii Eyacuiñajjiya eya shequi mee ca o'oyajje eya poquije Janinea meshi yasijje. Jomajo aje mi poeyajo ishoañaquije —Jesosa poanaje.

<sup>29</sup> Penohua Jesosa jama acanaje ba'a: —E'e pojja'a pea cuana minijje jjapee tiitiqui'yo ajja. Eya ca ca pea jayojja jama pojjeama. Eya jjapee tiitiquije'yo minijje —poanaje Peno.

<sup>30</sup> Jesosaa Peno jama acanaje ba'a: —Eyaya miya e'e jojo nei huohuiana, Peno, jiquio mecajje tii cachina yahue beca taaame po jjimahuajo, pea beca peejjima huohui'ajjame

acajje, miya ejo po huicha'a huicha'aje jama ba'a: “Chojja de, ecuea Jesosa ba jjima nei nei” miyaya saja'ame aje quea meteya jjejojo —Jesosaa acanaje.

<sup>31</sup> Jamatii Penohua Jesosa acanaje: —Chojja, Jesosa. E'e pojja'a eya minijje jjapeequian-ijo, pea cuaa eya cuiajea caje'yo. ¡Jamatii ecuea ca mi ca epajea'yoyji pojjeama!

Oya jayojja pea cuaa acanaje pea'ai: —E'e, Jesosa, ecuanajaya ca mi ca epajea'yoyji pojjeama tii, jamatii onaa cuiajea caje'yo pojja'a.

*Quea yeno nee nee Jesosa oja Chii nijje miminaje Jetesemani quejo*

*(Mateo 26.36-46; Noca 22.39-46)*

<sup>32</sup> Majoya Jesosa o shajja'ajjajji cuana nijje Jetesemani que yasijje poquinaje. Jesosa onijje miminaje jama ba'a: —¡Anioquecue jiquiojo tii! Jocuama eya poquije ecue Chii nijje mimiya.

<sup>33</sup> Jamajjeya Jesosaa Peno, Huani, Satiaco pea'ai dojo canaje jocuama. Oya Jesosa jjashahuabaquinaje quea yeno nee nee. <sup>34</sup> Jamajjeya ojaya epeeji nijje jama poanaje ba'a: —Quea yeno nee nee iña; manoje'yo iña, de. ¡Anioquecue enijje; a'a cahuijji! —Jesosa poanaje.

<sup>35</sup> Majoya Jesosa cuama pishana poqui majje ecui'oshajjajo nequinaje. Oja Chii nijje miminaje quea yeno nee jama ba'a: <sup>36</sup> —Ecue Chii, miquea ejjashahuabaqui'yoyji jayojja jama eyaya aje'yo. Miyaya eya huoojeanaje ojjañaja mimishijo mano'yohua. Quea camaja nee nee ejo. ¿A'a ya iña miyaya che onaaya quecua mee'yo jjima aje'yo? ¿A'a ya iña che iña mee'yo jjima aje'yo? ¡Jamatii miquea ejjashahuabaqui'yoyji jayojjaya jama acue! ¡Ecuea ejjashahuabaqui'yoyji jayojja jama a'a ajji! —Jesosa jamaya miminaje oja Chii nijje.

<sup>37</sup> Majoya oya poqui o'oyanaje o shajja'ajjajji cuana huasijje. Ba cañaqui'yonaje ecahujjaa. Tecue'ama Peno nijje jama poanaje ba'a: —¿A'a mi cahujjaa? ¿A'a mi enijje cahui jjima che nequi jjima?

<sup>38</sup> Majoya Jesosaa ojjaña cuana acanaje: —¡A'a cahuijji! ¡Eyacuiñajji nijje mimi majamajacue! Jamajoya pea cuaa miya quea mimishi epo mee'yoyji pojjeama. E'e, miquianaya enijje jjapeequi sa poani e'e jojo nei. Jamatii miya ca'a'ama; quea mimishi poaje o'oya pojja'a —Jesosa poanaje.

<sup>39</sup> Majoya Jesosa poqui o'oyanaje jocuama pishana oja Chii nijje mimi o'oyaa. Yahuajo jayojja mimi o'oyame poanaje.

<sup>40</sup> Oja Chii nijje mimi o'oya majje Jesosa poqui o'oyanaje o shajja'ajjajji cuana huasijje. Ba caña o'oyanaje quea cojja jee mano poanajejojo cahui o'oyanaje. Jesosa ba majje oya cuana quea bicho poanaje onijje emimijji. <sup>41</sup> Jamajjeya oya cuana jea canana o'oyanaje, Jesosaa. Cuama pishana poqui o'oyanaje. Oja Chii nijje mimi o'oyanaje. Mimi o'oya majje poe o'oyanaje o shajja'ajjajji cuana que. Ish'e'acanaje: —¿A'a miquianaya cahujjaa tii? ¿A'a mi jomishocajaa? Apoa aje, de. Jjeyahua nei eya, ojjañaja Edoe Mese, mimishi cua iña meesahua caje'yo cuaa. <sup>42</sup> ¡Nequisohuacue! ¡Cua'a, jjeya nei ecuea epeeji nisho poeje! ¡Joya aje Jodasa poeje ba'a! —Jesosa poanaje.

*Jesosa iña canaje cuaa*

*(Mateo 26.47-56; Noca 22.47-53; Huani 18.2-11)*

<sup>43</sup> Jesosa mimianijo tii, Jodasa o que poeyanaje. Oya aje oe Jesosaja epeeji pea'ai poanaje; pea 11 nijje nequinaje tii. Quea huiso nee nee dejja nijje Jodasa poeyanaje; yohuajji poeyanaje acuijji, baajji, mejeji pea'ai poeyanaje. Jodio etii cuaa, Jodioja esohui huohuijjiya, Eyacuiñajji nijje emimijji etiiya pea'ai ojjaña huoojea canaje Jesosa iña.

<sup>44</sup> Jodasaa, Jesosa e'iña meejiya, yahuajo jama huohuime acanaje ba'a: —¡Bacue oe! Eyaya oe dejja ba majje cuiapashi nishoje. ¡Majoya oe miquianaaya iñacue; dojo'yocue! —Jodasaa yahuajo acanaje dejja cuana.

<sup>45</sup> Jamajjeya Jodasa Jesosa que jjanequichipiquinaje: —Jesosa, ¡a'a mi ecuea Emeshi Mese nei jiquio! —amajje cuiapashi nisho canaje.

<sup>46</sup> Ma ba majje pea dejja cuaa Jesosa que poe majje iña canaje edojjji. <sup>47</sup> Jesosa iña cajo oja epeejiya onijje nequiya, Penohua, baa iña canaje. Onaja sapa jajapojojeajji nisho shajja jajasejjajea ca'yonaje, Eyacuiñajji nijje emimijji etiija echacojji poanija eshajja.

<sup>48</sup> Jesusaa ojjaña dejja ejjachichaqui'yo nequi huohui canaje: —¿Apiojji miya poeyanaje baajji, acuijji, mejeji e iña? ¿A'a cuae jja iña siipojji so'o? <sup>49</sup> Ojjaña pojajajo eya ojjaña cuana nijje nequinaje esohui huohuijji Eyacuiñajjija equijo. Jamatii eya miquianajaya iña jjima poanaje. ¿Apiojji mecajje poeyanaje e iña? Jamatii jamaya nequiana poani. Miquianaaya ca mi ca oe Eyacuiñajjija esohui huohuijji etehue'yo yahuajo nei nei mijo jayojja jama quea tai aña.

<sup>50</sup> Majoya o shajja'ajajji cuana mete majje cuajicuajinanajaje; Jesosa jea canananaje.

<sup>51</sup> Eya ca ca iña Macoso bajjani. Jesosa ocuenaje o pajea sa po'yo ajjaa jjejojo. Eya daquima' poanaje; oe daqui ao ejjacueabeboquijji poanaje. Majoya dejja mase cuaa eya iña'ajja canaje. <sup>52</sup> Ohua iña cajje eyaya daqui ao jeajeananajaje, cuajicuajipoquinaje daquima' quea mete jjejojo.

*Jodio etiiya Jesosa niñeba canaje*

(Mateo 26.57-68; Noca 22.54-55, 63-71; Huani 18.12-14, 19-24)

<sup>53</sup> Jamajjeya joya Jesosa iñajji cuaa oya dojo canaje Eyacuiñajji nijje emimijji etiija equi yasijje, Caipaja equi yasijje. Jocuama ojjaña Jodio cuana jjachichaquinaje, Jodio etii cuana, Moisesija etehue'yo huohuijji poani pea'ai. <sup>54</sup> Penohua ca ca equijje aca poquinaje Jesosa. Caipaja equi yasijje nequiñaquinaje. Dobiquinaje epeeyi dojo huasijje. Jomajo Peno equi cuiñajji nijje cuaqui pejejo jjayoqui nequinaje yajja Jesosa acaje cuaa ebajji.

<sup>55</sup> Eyacuiñajji nijje emimijji etii, ojjaña Jodio etii cuana, Jodio esohui huohuijji poani pea'aiya ojee mimimiminaje Jesusajo, ojjaña ejjachichaqui nequiya, o quecuajea'yo sa acani. Jamajjeya sa'ajja canaje dejja cuana Jesosa huohuijji nisho epo; Shomano meshi mese Pinato bajjani yasijje dojo majje Jesosa huohuijji nisho. Jamatii Jesosa huohuijji epo chama' poanaje. <sup>56</sup> Quea huiso dejjaa sijje acanaje. Jamatii oe sijjepojjija esohui pea sijjepojjija esohui jama pojjeama Jesosa mano mee'yojji. Chama' beca oya jayojja mimime epojji. <sup>57</sup> Quijje yeje nei beca cuana poe majje Jesosa niñeba canaje jama ba'a: <sup>58</sup> —Eyaya oya shajja'ajjanaje. Jama poanaje Jesosa ba'a: “Jiquio Eyacuiñajjija equi jeabichajea cajo, eyaya pea equi iyaje'yo pea beca peejjima cahuime. Jiquio equi dejjaja iya poanaje; pea ca ca dejjaa pojjeama iya caje'yo” Jesosa poanaje —acanjaje beca cuaa.

<sup>59</sup> Jamatii oya cuanaja esohui pea jayojja jama pojjeama poanaje.

<sup>60</sup> Majoya Eyacuiñajji nijje emimijji etii ojjaña cojja nei nequisohua majje Jesosa huohui'ajja canaje: —¿A'a pa miya jama poanaje ba'a? ¿Jesosa, a'a cuae miyaya saja'aje'yo so'o?

<sup>61</sup> Jamatii Jesosa mimishi'ama jjejojo mimipanajaji jjima poanaje. Jamajjeya Eyacuiñajji nijje emimijji etiiya oya huohui neinei canaje: —Jesosa, ¿a'a cuae mi Eyacuiñajjija Bacua Ejja nei, oja huoojjea'yo ojjaña jaahuanajji? ¡Huohuicue mo!

<sup>62</sup> Jamajjeya Jesusaa acanaje: —E'e, joya ecua miyaya aña jayojjaya eya, Eyacuiñajjija huoojjea'yo ojjaña jaahuanajji. Cuanaya eyaya miya e'e nei huohuiaña: Quijje miyaya eya baje ecue Chii nijje ebianeijje ani. Oya quea ca'a nee nee enequi tii. Eya miquianaaya baje bo biajje poeje o'oya —Jesosa poanaje.

<sup>63</sup> Ma shajjajja majje Jodioja Eyacuiñajji nijje emimijji etii quea quene nee nee poanaje. Quea quene nee po majje ma dejja tiiya ojaya daqui, oja huosho ba'e isajea canaje. Jodio dejja jamaya oja daqui isajea cani quea quene po majje. Ojjaña cuana huohui canaje: —¡De! ¡A'a pea dejja iyaajji Jesosa huohuijji! Jamatii. <sup>64</sup> Oya Jesosa miminaje jama ba'a: “Eya Eyacuiñajjija Bacua Ejja”. Chojja. Sijjepojji. ¿A'a cuae nequiaa shajja'ajjanaje oja sohui? ¿Jamajje yajja acuae seya aje so'o, Jesosa, de? —acanjaje Jodio etiiya.

—¡Oya oe manojea mee'yocue; quea tai ca esohui acani! —acanjaje Jodio edejja tii cuaa, Jesosa Eyacuiñajjija Bacua Ejja pojjeama posojjo.

<sup>65</sup> Majoya aje oe Jodio etiiya Jesosa cojja cuichojea ca poa. Cojja dodo majje ejjachichaquinequiya cuia canaje pea'ai emeya. Cuia majje huohui'ajja canaje: —¡Miya Eyacuiñajjiya huoojea nei jjabaqui majje jja ca oe huohui pocue! ¿Aya acue mi cuia cani so'o? ¡Jjashahuaba'ajjaqui! —acanaje equi cuiñajji cuaa.

*Penohua siajje acanaje Jesosa oja ba jjima nisho*

*(Mateo 26.69-75; Noca 22.56-62; Huani 18.15-18, 25-27)*

<sup>66</sup> Ojjaña cuaa Jesosa napa caqui Penohua ba canaje esecuejo nequiya. Oe epona echacojji ahuema' ani poeyanaje. <sup>67</sup> Peno cuaqui pejejo jjayoqui nequi ba canaje. Ba neinei majje huohui canaje jama ba'a: —E'e jojo nei miya Jesosa nijje aninaje, ma Nasanenajo ba'e nijje —poanaje epona.

<sup>68</sup> —¡Chojja, ecuea oya ba jjima! ¿Ajeo acuae mi mimiani? —Peno siajje poanaje.

Majoya Peno epeeyijo nequi cuayaqui'yonaje, quea mete jjejojo. Jjeyahua nei cachina yahua taaanaje. <sup>69</sup> Peno esecuejo enequi'yojo, epona sho'iya echacojjiya oya ba ca o'oyanaje. Ojjaña cuana huohui canaje: —Oya ca ca oma Jesosa nijje aninaje e'e jojo nei —acanaje.

<sup>70</sup> —Chojja, ecuea oya ba jjima nei nei. Eya ojaya epeejji pojjeama —nisho po o'oyanaje quea mete jjejojo.

Quijje pishana beca cuana Peno que ojee nequi jjanequichipiqui majje jama poanaje ba'a: —E'e jojo nei miya Jesusaja epeejji pea'ai; pea cuana nijje nequinaje. Jamaya miquea emimi, Janinea meshijo ba'e jayojja jama miya mimiani, de —poanaje.

<sup>71</sup> Ojaya esohui shajja'ajja majje Peno quea mete nee poanaje; onijje mimipanajajinaje: —¡Siajje miya poani! Jiquio dejja ecuea ba jjima. Eya e'e jojo nei pojjeama poani jojjemo, Eyacuiñajjiya eya mano mee ca'yome —Peno poanaje. Jamatii oya siajje poanaje.

<sup>72</sup> Peno jamaya poajo chachina yahue taaa o'oyanaje. Cachina taaajo Peno jjashahuabaqui'yonaje ma Jesusaa yahuajo huohui canaje jama ba'a: —Peno, cachina yahue beca taaame poajo miyaya eya ba jjima nisho aje; pea beca peejjima huohuime aje'yo —yahuajo jamaya Jesusaa Peno acanaje. Ma shahuaba'yo majje Peno quea yeno nee nee poanaje. Pa neinei poqui'yonaje.

## 15

*Emeshi mese Pinato huasijje Jesosa dojo canaje*

*(Mateo 27.1-2, 11-14; Noca 23.1-2; Huani 18.28-32)*

<sup>1</sup> Majoya mecajjeahua nei Eyacuiñajji nijje emimijji etii cuana, Jodioja edejja tii cuana, Moisesija etehue'yo huohuijji poani, pea Jodio etii ejjachichaqui nequi cuana pea'ai, 71 huisome jjachichaquinaje. Ojee jjachichaqui majje miminaje Jesosa quecua'yojji: —¿Achajja amajje acuae seya Jesosa quecua meeje'yo so'o? —acanaje oya cuaa.

Jamajjeya Jesosa me jeyo majje dojo canaje Shomano meshi mese Pinato bajjani yasijje. <sup>2</sup> Jesosa ba majje Pinatohua huohui'ajja canaje jama ba'a: —¿A'ya cuae mi so'o? ¿A'a miya Jodioja Emeshi Mese nei poaje'yo?

—E'e, joya ecua miyaya aña jamaya epo'yojji eya —Jesusaa saja'a canaje.

<sup>3</sup> Eyacuiñajji nijje emimijji etii cuaa quea huiso siajje acanaje Pinato Jesusajo. Jamatii Jesusaa saja'a jjima acanaje. <sup>4</sup> Jamajjeya Pinatohua oya huohui'ajja canaje: —¿Yajjaje acuae mi mi jjasaja'aquiani so'o? ¿A'a jje shajja'ajja jjima ojaya esohui mijo? Quea huiso nee miya niñeba cani Jodio etii cuaa.

<sup>5</sup> Jesosa mimishi'ama. Jamajjeya siajjejojji cuana o niñebajji saja'a jjima acanaje. Jjasaja'aqui ajja nei nei ba majje Pinatohua niñeba ca'yonaje: —¿Yajjaje acuae Jesosa mi jjasaja'aquiani so'o, de? —poanaje Pinato.

<sup>6</sup> Majoya Pinatohua niñeba ca'yonaje jama ba'a: —Jjeya nei Jodio cuana ojee ijji'ijjiani esohuidojojjiya yahuajo nei ojaya etiiquianaja bacua cuana cuia'yo jjima shejo. Ojjaña shequiaja jiquio shejo eyaya oe Jodio dejja ejeanobiajaa huoojeacuayajeje'yo, ma Jodio cuaa sa cani, Jodio quea bihui epojji. Jamajjeya jiquio shejo e'e pojja'a eyaya Jesosa pichojea meeje'yo, jjeyahua nei. <sup>7</sup> Pea yani, Mashama' bajjani, Shomano meshi mese

quecua panajji epo. Oya dejja tai, ejeanobiajaa ona quecua'yojji cuana nijje. E'e pojja'a eyaya Mashama' huoojeacuayajea meeje'yo —jamaya Pinato jjashahuabaquinaje.

<sup>8</sup> Jjeyahua nei Jodio dejja cuana Pinato que poeyanaje. Huohui canaje jama ba'a: —Emeshi mese Pinato, ijyehua nei huoojeacuayaje'yocue oe Jodio dejja, ecuana quea bihui nee epojji! —poanaje.

<sup>9</sup> Pinato jama poanaje ba'a: —E'e, jjeyahua nei eyaya pichojeaje'yo oe Jodio dejja. ¿Ache acuae jja oe pichojeaje'yo so'o? E'e pojja'a eyaya Jodio cuanaja Emeshi Mese nei Jesosa bajjani pichojeaje'yo. ¿A'a e'e? —poanaje Pinato.

<sup>10</sup> Pinatoja eba poanaje Jodio etii quea quene nee poani pea cuaa Jesosa nijje jjapeequi majje Jodio etiiquianaja esohui pajea cani. Jamajjeya Jesosa iña mee canaje equecuajea'yojji, Jodio etiiquiaa. Jamajjeya Pinatohua Jesosa pichojea mee sa acanaje. <sup>11</sup> Jamatii Eyacuiñajji nijje emimijji etiiya ojjaña Jodio ejjachichaqui nequi taaa mee canaje: —¡Mashama' oe huoojeacuayaje'yocue! ¡Jesosa a'a pichojea'yojji! —taaame poanaje.

<sup>12</sup> —Jamajjeya ¿yajja acuae oe eyaya Jesosa Quito aje so'o, Jodio cuanaja Emeshi Mese nei ca pa coma? —Pinatohua huohui'ajja canaje.

<sup>13</sup> Jama taaame poanaje ba'a: —¡Oya me cacajea meecue oe, acui ecueata'apeejo! ¡Acui ecueata'apeejo ba'ehuanasohuajjea meecue oe emano'yojji! —taaa neineinaje cuana.

<sup>14</sup> —¿Yajjajo acuae oya quecuaje'yo so'o? Oya mimishi'ama. ¿Apiojji acuaeya jjaya quecua'yo sa aña Jesosa? —Pinatohua huohui'ajja canaje.

Jamatii taaa majamaja canaje Jodio cuana: —¡Jesosa oe me cacajea meecue oe; acui ecueata'apeejo ba'ehuanasohuajjea meecue Jesosa, de! —jama taaameya poa Jodio etii cuana.

<sup>15</sup> Jamajjeya Pinatohua ohua sa cajo Mashama' huoojeacuayajea mee ca'yonaje. Jesosa ca ca huoojea canaje cuiasejjajea majje me cacajeaa emano'yojji.

*Sohuinano cuana soa neineinaje Jesosajo*  
(Mateo 27.27-31; Huani 19.2-3)

<sup>16</sup> Jamajjeya emeshi meseja sohuinano cuaa Jesosa dojo canaje emeshi mese chacochoañani equi dojjo huasijje. Ojjaña sohuinano Jesosa que jjachichaquinaje. <sup>17</sup> Jesosaja daqui oshe huijjiajea mee majje daqui huo'o nei huosho mee canaje emeshi mese nisho epojji. Acuisha sipi majje sapahuahuo iya canaje, emeshi mese jayojja nisho epojji. <sup>18</sup> Majoya ecui'oshajjajo nequinaje ojjaña, Jesosa bihuiajji nisho. Jama bihuia nishome acanaje ba'a: —¡Miya Jodioja emeshi mese quea ca'a nee! ¡Ba'e tiitii'yocue! —sajea nisho canaje cuaa Jesosa. <sup>19</sup> Majoya oya sapa cuiape'ejea canaje acuiya. Cuia huicha'a huicha'a canaje. Jesosa cuichojea huicha'a huicha'a canaje oja yami yasijje. Ecui'oshajjajo nequiya bihuia nisho canaje cuaa. <sup>20</sup> Ojo soa neinei'yo majje daqui huo'o nei huijjiajeajea canaje; ojaya daqui quia ca o'oyanaje. Majoya Jesosa quea huesha dojo canaje me cacajeaa, ba'ehuanasohuajjea pea'ai, sohuinano cuaa.

*Jesosa acui ecueata'apeejo ba'ehuanasohuajjea canaje*  
(Mateo 27.32-38; Noca 23.26-43; Huani 19.17-27)

<sup>21</sup> Jenosanenajo aniya sohuinanohua Jesosa dojo caje, ba cajjequinaje pea dejja Simoni bajjani, Simoni Sinene meshijo ba'e poe'yo; oya Anejanoja ejeajji, oja chahua Shopoja ejeajji. Jamajjeya sohuinano cuaa Simoni acui ecueata'apee quea biquie dojo mee canaje Jesosa ba'ehuanasohuajjeajji. <sup>22</sup> Jamaya oya poquinaje eyiyo bajjani Jonijota eyiyo huasijje, Ese Ejjaja esohuijo Esapa Jjii anijji bajjani yasijje. <sup>23</sup> Esapa Jjii anijji eyiyo huasijje jaasohuajjea cuana. Bañaqui majje Jesosa ishi mee'ajja canaje cuaa acuijjajja na quea sese, pasejo 'ia jayojja. Ishi mee'ajja canaje quecua ca'yajje nee'ama epojji. Sio majje ishi jjima acanaje Jesosaa. <sup>24</sup> Majoya me cacajea ca'yonaje; ba'ehuanasohuajjea ca'yonaje daquima'. Ba'ehuanasohuajjea oja daqui cuana chicha ca'yonaje sohuinano cuaa. Iyachicha'yo majje, onaaya hue'e nisho majje daqui majjo ca'yonaje ojaya pojji epo'yojji.

<sup>25</sup> Eshequi poe pishanajo, onaaya Jesosa acui ecueata'apeejo ba'ehuanasohuajea canaje. <sup>26</sup> Etehue'yo o ba'e sapa biajje oja bajjani caca canaje, Jesosa bajjani, oya apiojji me cacajea ca'yonaje huohui epo'yoyji. Etehue'yo jama poa ba'a: OYA JESOSA JODIOJA EMESHI MESE EPO'YOJJI

<sup>27</sup> Jesosa ba'e pejejo beca siipojji pea acui ecueata'apee cuanajo ba'e huanasohuajea pea'ai ca'yonaje, Jesusaja ebianeij mijijje, pea shani mijijje. <sup>28</sup> E'e, Eyacuiñajjija esohui huohuijija etehue'yo yahuajo nei nei jayojja jama, jamaya acanaje ba'a: "Ojjaña cuana jjashahuabaquije jamaya: —Oya dejja mimishi nijje nequinaje". Yahuajo nei nei jamaya poa.

<sup>29</sup> Pea dejja cuana ejiojjijje poquianiya Jesosa ba majje esapa jeacajjacajja canaje, soa huisahuisa nequinaje. Jama mimijajime poanaje ba'a: —¿A'a cuae oe miyaya Eyacuiñajjija mei equi ñajeabichajea'yo majje pea equi iyaje o'oya so'o, pea beca peejjima cahuime? ¡Ba'ajja socue! <sup>30</sup> Ache ba'ajja; miya Eyacuiñajjija Bacua Ejja nei jjabaqui majje ca oe ¡acui ecueata'apeejo ba'e nequioque'ajja'yo socue, emano'yoyji pojjeama! —poanaje cuana.

<sup>31</sup> Moisesija etehue'yo huohuijji, Eyacuiñajji nijje emimijji etii pea'ai ojo soa neineinaje. Ojee mimimiminaje jama ba'a: —¿A'a Jesosa ojjaña jaahuanajji epo'yoyji? Chojja, ona nahuejji pojjeama. Oya ca ca oma nequioque'yo ajja, de —poanaje.

<sup>32</sup> Jesosa niñeba canaje pea'ai: —¿A'a cuae jja oe miya Jodioja Emeshi Mese nei poaje'yo? ¡Jjaba'ajjaqui socue! Miya Eyacuiñajjija huoojea'yo ojjaña jaahuanajji jjabaqui majje ¡acui ecueata'apeejo ba'e ca oe nequioque'ajja'yo socue jjeyahua nei, ecuanaja ebajji! Ba majje ecuaaya: "Miya e'e jojo nei Eyacuiñajjija Bacua Ejja poanaje" aje'yo.

Siipojji cuaa ma o pejejo eba'ehuanasohuajea ba'eya pea'ai Jesosa jamaya niñebame acanaje quea huiso nee.

#### *Jesosa mano'yonaje*

(Mateo 27.45-56; Noca 23.44-49; Huani 19.28-30)

<sup>33</sup> Majoya eshequi biacojjajja nequijo shequima' jayojja poanaje; quea misi nee poanaje ojjaña meshi yasijje. Quijje sinecua eshequi jjajeapaaqui'yo majje jiji o'oyanaje.

<sup>34</sup> Sinecua, quea misi poajo, Jesosa quea yeno neineijo taaa neineinaje: —¿Eli, eli, lama sabactani? —taaame poanaje—; ecue Chii, ecue Chii, ¿yajjajo acuae mo ya jeana'yonaje so'o? —Jesosa poanaje Jodioja esohuijo.

<sup>35</sup> Shajja'ajja majje joya quea chipi nee nee nequi jama poanaje ba'a: —¡Bacue oe! ¡Ohuaya etiiquiana Enia iyaa cani pojja'a, ma yahuajo nei ba'ya poa Enia iyaa cani chi, de! —jama posoya acanaje cuaa.

<sup>36</sup> Jamajjeya oe dejja poquicujinaje acuijjajja na sese jjequiya. Jjequi majje shajashaja iyanobia canaje ena ejjequi yasijje. Majoya bequiobo sajo quecuahuosho majje Jesusaja enaba huasijje huoo canaje, ojaya e'ishijji nisho: —¡Ishoa socue! ¡Enia pojja'a poeje o nahueya, o jjequioquea'yohua! —poanaje.

<sup>37</sup> Jamatii, taaa neinei o'oya majje Jesosa mano'yonaje. Chama'yo tii poanaje. <sup>38</sup> Jesosa mano'yajo tii, Eyacuiñajjija equijo daqui quea moo eba'ehuana ba'e Eyacuiñajjiya eyajje jjaisajea meequi ca'yonaje; biacuajje ebionei jjaisajeaqui meecoo canaje.

<sup>39</sup> Ojjaña ba majje, Jesosa taaa neinei majje, mano'yonaje ba majje pea'ai sohuinano huoojeajji poani, ma Jesosa nahuejji poani quea mete nee poanaje: —¡E'e jojo nei de, oya Jesosa Eyacuiñajjija Bacua Ejja poanaje! —sohuinano poanaje.

<sup>40-41</sup> Quea huesha nequiya epona cuaa pea'ai Jesosa eba'ehuanasohuajea ba'e ba cani. Oya cuana yahuajo Jesosa nijje Janinea meshijo ania poa. Onijje Jenosanena huasijje poeyanaje, oja bobi cuacua meesahuaa. Oya cuana ma bajjani ba'a: Mania Madanena; Satiaco, oja chahua Jose pea'ajja enaese Mania bajjani; Semeneoja ehuanase Sanome bajjani pea'ai; pea epona cuana quea huiso pea'aiya ba canaje.

#### *Jesosa mei jjani yasijje huananobia ca'yonaje*

(Mateo 27.57-61; Noca 23.50-56; Huani 19.38-42)

<sup>42</sup> Majoya sinenaje. Mecahuajje epojja ejomishocajji, quea bihui nee ojee e'ijjia'ijjiajji pea'ai. Jamajjeya acui ecueata'apeejo eba'ehuanasohua ba'e meemee ajja.

<sup>43</sup> Jamajjeya sinecua nei dejja Jose bajjani poeyanaje, pea Jose, Amatea meshijo ba'e. Oya Jodio etii ejjachichaqui nequi cuana nijje nequi. Oya ojjañaja quea boti nee. Ohuaya Eyacuiñajji ojjaña huoojea'yojji poaje ishoa'ajja cani. Oya Jesusaja epeeji pea'ai yahuaajo. Jamajjeya oya mete'ama po majje Pinato huasijje poquinaje Jesusajo huohuiya. Poe'yo majje ohuaya Pinato huohui caña'yonaje: —Emeshi mese Pinato, Jesosa mano'yonaje. Eyaya oya jjequioqueaje'yo jjani yasijje ehuananobiaqui'yojji —poanaje Jose.

<sup>44</sup> Joseja esohui shajja'ajja majje Pinato jama poanaje ba'a: —¡De! ¿A'a oya Jesosa manocuai'yonaje?

Jamajjeya Pinatohua sohuinano huoojeajji poani, ma Jesosa me cacajeajji epo iyaa canaje. O poeyajo huohui'ajja canaje jama ba'a: —¿A'a e'e jojo nei Jesosa manocuai'y-onaje? —poanaje.

<sup>45</sup> —E'e, oya mano'yonaje —poanaje.

Jamajjeya Pinatohua Jose huoojea canaje jama ba'a: —E'e, ¡Jesosa dojocue! ¡Mei jjani yasijje huananobiaquicue!

<sup>46</sup> Jamajjeya daqui oshe quea ao nee jjeshe majje Jose poquinaje Jesosa acui ecueata'apeejo emano'yo ba'e yasijje. Jesosa emano'yo ba'e jjequioquea ca'yonaje. Daqui oshe eyacua neijo bebo canaje. Dojo canaje mei jjani yasijje, ma oja jjeya nei tio huasijje. Huananobia ca'yonaje. Majoya mei quea quemoo nee jeacajjajjajja canaje mei jjani naba capa'yojji. Jesosa mei jjani dojjojo jaa capa'yo majje poquinaje Jose pea cuana nijje.

<sup>47</sup> Mania Madanena, Joseja enaese Mania bajjani pea'ai mei jjani yasijje poeyanaje pea'ai. Jomajo Jesosa jjani yasijje ehuananobiajaa ba canaje, epona cuaa.

## 16

### *Jesosa shequi o'oyanaje*

(Mateo 28.1-10; Noca 24.1-12; Huani 20.1-10)

<sup>1</sup> Jodioja epojja ejomishocajji jjayejequiajo, sinecua Mania Madanena, Jacoboja enaese Mania bajjaniya, Sanomeya pea'ai shiyeshiye iña jjeshe canaje Jesosa shicuijji nisho.

<sup>2</sup> Jamajjeya mecajjeahua nei jjaja'a'ajjaqui jjimahuajo ebionei epojjajo, nomico pojjajo, oya cuana poquinaje jjani yasijje. <sup>3</sup> Bañaqui jjimahuajo mimimiminaje jama ba'a: —¿Aya shai mei quea quemoo jeacajjajjajja caje'yo ese dobiqijji? Quea quemoo nee nee mei.

<sup>4</sup> Epona cuana jjani yasijje poe majje ba cañaquinaje jjani huejja ecapajea'yo nequi.

<sup>5</sup> Jamajjeya jjani ai yasijje dobiquinaje. Dobiqii majje epona cuaa esho'i ai ba canaje. Oja daqui quea oshe nee nee, quea ao nee. Jesusaja equipajaajji biajje ani ba canaje esohuidojojji ebiane mijiije ani. Jjeya ca ca Jesosa chama'. Ba majje epona cuana quea mete poanaje.

<sup>6</sup> Jamaya oya epona cuana nijje poanaje ba'a: —¡A'a quea mete poiji! Miya ecuea eba. E'e, miyaya Jesosa ma Nasanenajo ba'ya poa sa'ajja'yo poequi, ma acui ecueata'apeejo mano'yonaje. Chama' oya jjeya jiquiojo. Shequi o'oyanaje ca jja coma. ¡E'e, quia'o jiquio ba'ajjahua'yo socue! Jiquiojo jaanaje. <sup>7</sup> Jamajjeya jjeyahua nei poquicuajicue oja epeeji huohuiya! ¡Jama huohuime acue ba'a: “Jesosa pa shequi'yonaje” acue! “Oya jjeya nei Janinea meshi yasijje poquije miquiana poqui jjimahuajo” o shajja'ajjaji cuana huohuiquicue. ¡Peno oe huohuinaquicue Jesusaja esohui ma ohuaya huohui canaje oe a'a pajea'yojji! ¡Oya oe jocuama baquicue! —esohuidojojjiya epona cuana acanaje.

<sup>8</sup> Jamajjeya epona cuana jjani esecue yasijje cuayaqui'yo majje poquicuajicujajjajja. Quea mete neejo oya cuana piopionaje. Pea nijje mimi jjima Jesusajo. Cuajicujajjajja Jesosa shajja'ajjaji cuana esohuidojojjiya esohui huohuiya.

<sup>9</sup> E'e, ebionei epojjajo, nomico pojjajo, Jesosa shequi o'oya majje, jjanequija'aqui'yo majje pea'ai, Mania Madanena ebionei oya ba ca'yonaje. Oya Maniaja yahuaajo eshahua quea huiso dobiqiyajo, Jesusaa eshahua cuana huoojeacuayajja ca'yonaje me oeje pea beca huisome. <sup>10</sup> Majoya Jesosa ba majje Maniaa o shajja'ajjaji cuana huasijje



poquicuajinaje huohuiya. Jesosa emano'yo tii jaa posojo, oya cuana pa neinei aninaje quea yeno. <sup>11</sup> Jamajjeya Maniyaa oya cuana huohui cañaquinaje Jesosa eshe o'oya: —Eyaya oya banaje e'e jojo nei —acanjaje Maniaa.

Jamatii Maniaja esohui shajja'ajja majje oya cuana jama poanjaje ba'a: —E'e pojja'a. Chojja, siajje miya poani, Mania —acanjaje cuaa, Jesosa shequi o'oya ajja poso acanjaje.

<sup>12</sup> Majoya Jesusaja epeeji becanejijji pea'ai ejiojjijje poquijejo, Jesosa pea jayojjaya jjanequija'aquinaje onijje. Jesosa ba jjima poanjaje cuanaja. <sup>13</sup> Quijje yejje nei oya e'e jojo nei Jesosa ba majje oya cuana poquinaje pea eshajja'ajjaji cuana huohuiya. Jamatii ojjaña jama poanjaje ba'a: —E'e pojja'a, de. Chojja de, oya mano'yo tii —ojjaña cuana poanjaje, Jesosa shequi o'oya ajja poso acanjaje.

*Jesosa ba canaje o shajja'ajjaji cuaa*

*(Mateo 28.16-20; Noca 24.36-49; Huani 20.19-23; Hecho 1.6-8)*

<sup>14</sup> Quijje Jesosa shajja'ajjaji cuana 11 huisome oe equijo ojee ijia'ijjia anijo Jesosa onijje jjanequija'aqui'yonaje. Oya cuana tecuea canaje jama ba'a: —¿Apiojji acuae quiana quea sapa ca'a poani? ¿Apiojji shajja'ajja jjima onajaya ehuhui'yo eya eshe o'oya ba majje? ¡Bacue eya e'e jojo nei eshequi'yo, jjabahuejjaquicue! —Jesosaa acanjaje.

<sup>15</sup> Majoya Jesusaa oya cuana jama acanjaje ba'a: —¡Poquicue ojjaña cuana huasijje, ma ojjaña meshijo ba'e yasijje! ¡Ecuea esohui quea pame nee eba'e tiitii'yojjijo ba mee-quicue! ¡Enijje jjapeequi meequicue! ¡Enijje jjapeequiyajo enajo besa meecue! <sup>16</sup> Ojjaña joya enijje jjapeequiani Eyacuiñajjiya ba'e tiitii mee caje'yo. Enijje jjapeequiyajo, ¡ojjañaja ebajji onaaya oya cuana besa meequicue! Ojjaña joya enijje jjapeequi'yo ajja ca ca Eyacuiñajjiya quea nee nee po mee caje'yo, quea mimishi poanjajejo. Jamajjeya Eyacuiñajjiya oya cuanaja mimishi cuanajo quea yeno po mee caje'yo.

<sup>17</sup> —Ecuea epeeji cuana eyaya ameeje'yo ma dejjaa ajjima acani. Oya cuana eyaya quea ca'a nee po meeje'yo, eshahua cuana dejjajo nequi huoojeacuayajea meeje'yo. Pea esohui ojaya cuanaja ba jjima mimi meeje pea'ai. <sup>18</sup> Peyo se najji ba jjima iña majje mano'yo jjima po meeje'yo eyaya. Ena pase nei nei pase'ama poso ishijea majje, mano'yo jjima po meeje eyaya. Ecuea epeeji neiya emano biajje eme huana majje jiquio quea aja poaje; eyaya jjaajaqui meeje'yo, huaquia meeje'yo pea'ai —Jesosaa o shajja'ajjaji cuana huohui canaje.

*Jesosa jjequisohua ca'yonaje eyahuasijje*

*(Noca 24.50-53)*

<sup>19</sup> Majoya Emeshi Mese nei Jesosa pea cuana nijje mimiajo, oja Chiiya, Eyacuiñajjiya jjequisohua ca'yonaje eyahuasijje. Jomajo oya Jesosa anioquenaje oja Chii ebiane mijiijje onijje ojjaña huoojea'yojji epojji. <sup>20</sup> Majoya o shajja'ajjaji cuaa Jesusaja esohui huohuiqui canaje ojjaña cuana huasijje. Ojaya esohui jayojja jama Emeshi Mese nei Jesosa oya cuana ameesahua canaje ma dejjaa ajjima acani ojjañaja ebajji ojaya esohui cuana e'e nei nei. Jamaya ojjaña ba mee canaje Jesosa oya cuana huoojea canaje ojaya esohui huohuiya.

Jesosaa eya Macoso bajjani jiquio esohui tehue mee canaje. Mahuiso. Apoa.

## NOCAA TEHUE CANAJE ESOHUI QUEA BAME NEE JESOSA QUITOJA LUCAS

<sup>1</sup> Eyaya mi que tehuenaje Teopino achajja Jesosa ebajji. Quea dejja huisohua Jesosaja ehuhui'yo cuanajo tehue sa aca cua, huohui mee sa aca cua pea'ai. <sup>2</sup> Ojaya epeeji cuaa, ojaya esohui huohuijji cuaa, Jesosa ba neinei ca cua. Ohuaya ecuanaya huohui neinei ca cua. <sup>3</sup> Jamajjeya eyaya catehue'yahua onaa huohui ca'yoqui Jesosajo. Jjeya eyaya mi que tehuenaje, Teopino. Jiquio esohui e'e jojo nei Jesosajo. Eyaya shajja'ajja neineinaje onaa huohui ca'yoqui Jesosajo. Majoya jjashahuaba neineiquinaje jiquio etehuejji, jamajjeya e'e jojo nei jiquio esohui. <sup>4</sup> Tehuenaje eyaya miquea Jesosa eba neinei. Mi jjashahuaba neineiquijji eyaya tehuenaje, de. Jamajjeya ꞑba neineicue jiquio esohui ecue tehue'yo!

*Oe esohuidojojjiya Sacania huohui ca cua bacuajji cuajo, Huani ona besameejji epoiji cuaje*

<sup>5</sup> Yahujajo pishana Jodioja emeshi mese nequia cua. Yohua bajjani cua ba'a: Enode. Ma eshequiajajo tiya aje ba'ya cua Eyacuiñajji nijje mimiani yohua bajjani ba'a: Sacania. Oya chacochoania cua Eyacuiñajji nijje emimijji cuana nijje, ma dejja yohua bajjani nijje ba'a: Abiase dejja cuana nijje. Oya cuana Eyacuiñajji nijje mimiania cua. Sacaniaja ehuanase yohua bajjani cua ba'a: Isameni. Isamenija etiiquiana cuana Eyacuiñajji nijje mimiani pea'ai cua. Anoni dejja bajjani cua. <sup>6</sup> Sacania Eyacuiñajji epeeji nei nei cua, oja huanase o jayojja nei neiya cua. Oya cuaa shajja'ajja neinei ca cua Eyacuiñajji esohui. <sup>7</sup> Jamatii bacuama' cua; ojaya ehuanase jjamejoqui ajja neinei cua. Ehuanase epona tii cua; oya edejja tii pea'ai cua.

<sup>8-9</sup> Pea pojajajo Sacania jjachichaquia cua Eyacuiñajji nijje emimijji cuana nijje. Pea cuaa oya jama aca cua ba'a: —Sacania, ꞑjeya jiquio pojajajo Eyacuiñajji nijje mimicue! ꞑJjeyahua nei mee nei dobiqicue Eyacuiñajji equi yasijje, equi quecuayijji sisi yasijje! ꞑDobiqui majje acui shaa dahua huichachajecue huichacha shiye epoiji! ꞑMa ojjaña aca cua jayojjaya oe acue!

Dobiqui majje Sacaniaa jamaya aca cua Eyacuiñajji equijo nequia. <sup>10</sup> Beca cuana aje oe esecuejo nequia cua Eyacuiñajji nijje emimijji pea'aiya. <sup>11</sup> Sacaniaa aje oe acui shaa quea shiye dahua huichachajea canequia cua acui shaa edahuajeajji biajje iya ani. Majoya aje oe Eyacuiñajji esohuidojojji jjanequija'aquia cua, edahuajeajji ebañei mijijje nequia cua. <sup>12</sup> Sacania esohuidojojji ba majje piopio neinei'ya cua esohuidojojji ba po jjima jjejojya. <sup>13</sup> Majoya aje oe esohuidojojjiya jama aca cua ba'a: —Sacania, ꞑa'a piopiojji! Miya Eyacuiñajji nijje mimi majamajanaje ebacua yajjijo. Jamajjeya miya Eyacuiñajjiya shajja'ajja canaje miquea esohui ebacua yajjijo. Miquea ehuanase aje oe jjamejoquije. Majoya ꞑebacua cuayajo Huani bajjani acue! <sup>14</sup> Miya o cuayajo quea bihui nee nee cuaje. Pea dejja cuanaya quea bihui nee nee cuaje ebacua cuayajo. <sup>15</sup> Oya Eyacuiñajji epeeji nei nei cuaje, jamajjeya miqianaya quea bihui nee cuaje. Oya acuijjajja na sese ishi ajja cuaje, ecahuishi ishi ajja pea'ai cuaje. Edojjoshahua Bameya jaahuana caje'yo oya cuayajo. <sup>16</sup> Ohuaya Eyacuiñajji esohui huohui bame bame caje. Jamajjeya quea huiso Jodio cuaa shajja'ajja caje Eyacuiñajji esohui. Ohuaya jjapeequi mee caje'yo quea huiso Jodio dejja cuana Eyacuiñajji nijje. <sup>17</sup> Huaniya ebonei esohui huohui caje, majoya aje Quitohua, Eyacuiñajji huoojja'yohua esohui huohui caje. Huani Enia jayojja cuaje. Enia ma etiiquiana cua; Eyacuiñajji esohui huohuijji nei nei cua. Huani Eyacuiñajji esohui huohui po nequije. Shajjama' cuana ohuaya sohuihuohui caje. Majoya shajjama' cuaa ojaya esohui shajja'ajja caje; jjapeequije Eyacuiñajji nijje. Ojaya esohui shajja'ajja majje Quitoja esohui shajja'ajja sa acaje.

<sup>18</sup> Sacaniaa huohui'ajja ca cua esohuidojojji jama ba'a: —De, ꞑachajja acuae po cajji so'o? Oya ca iña edejja tii nojinoji aña, ecuea ehuanase epona tii pea'ai.

<sup>19</sup> Esohuidojojjiya jama tecueame aca cua ba'a: —Eya bajjani Jamieni, eya Eyacuiñajji esohuidojojji nei nei cueyanaje. Ohuaya eya huoojja canaje minijje mimiya. Ecuea

esohui quea bame miyaya shajja'ajjanaje. <sup>20</sup> Miya jjashajja'ajjaqui ajja cuanaje, jamajjeya miya mimi ajja cuaje. Huani cuayajo ca mi ca oe mimije'yo. Ma ecua miya eyaya huohuinaje jayojjaya cuaje miya —jamaya cua esohuidojojji.

Majoya aje Sacania mimi ajja po mee ca'ya cua.

<sup>21</sup> Pea cuaa esecuejo nequia ishoa'ajja ca nequia cua Sacania. Jama huohui'ajjame aca cua ba'a: —¿Yajjajje shai Sacania eyiyedojo tii nequi?

<sup>22</sup> Majoya Sacania esecue yasijje cuaya'yo majje mimi'yo ajja cua. Eme nei ca ca oe huo canequia cua Sacaniaa. Sohuimajojo jama aca cuaa cua ba'a: —Ohuaya pojja'a ba canaje esohuidojojji nei eyiyedojo nequi, de.

<sup>23</sup> Sacania Eyacuiñajjiya equijo chacojeyo majje poquia cua oja equi yasijje. <sup>24</sup> Quijje pishana Sacaniaa ehuanase bacua jea ca cua, o'ejji po majje. Isameni me oeje ba'ime cuayaqui'yo jjima; ania cua oja equijo tii. Oya jjashahuabaquia cua jama ba'a: <sup>25</sup> —Eyacuiñajjiya eya jjamejoqui meesahua canaje quea bihui epojji. Jjeya pea cuana mimijaji'yo ajja e bacuajjiyo —jamaya Isameni cua.

*Esohuidojojjiya Mania huohui ca cua quijje ojaya ebacua ecuayajjiyo*

<sup>26-27</sup> Janinea meshijo oe epona ahuema'ani ania cua, Mania bajjani. Oya Nasanena cuiñajjiyo ania cua. Isameni Maniaja enene mese cua. Isameni me oeje oe ba'ime o'ejji anijo Eyacuiñajjiya ma esohuidojojji huoojea ca o'oya cua Mania que. Mania jjahuaqui jjima cua; dejja ba po jjima ania cua. Oya ca jjahuaqui sa cua dejja yohua bajjanijo ba'a: Josejo. Joseja baba etiiquiana yohua bajjani cua ba'a: Dabi. Dabi Jodio dejjaja emeshi mese yahuajo nei nei cua. <sup>28</sup> Esohuidojojji dobiquia cua Maniaja equi yasijje. Jama mimime cua onijje ba'a: —Mania, yani eya. Eya Eyacuiñajjiya huoojea canaje mi que mimiya. Miya ca ca oe ohuaya bacaca canaje ejjamejoquiiji. Eyacuiñajji miquea Emeshi Mese nei, miya ohuaya jaahuana cani —jamaya cua esohuidojojji.

<sup>29</sup> Mania quea mete cuanaje esohuidojojjiya esohuijo. Majoya oya jama jjashahuabaquime cua ba'a: —¿Apiojji shai oya jama mimime cuani enijje?

<sup>30</sup> Esohuidojojjiya jama aca cua ba'a: —Mania, ja'a quea mete pojji! Eyacuiñajjiya miya quea jea nee acani. <sup>31</sup> Jjeyahua nei miya o'ejji anije, ebacuajje dejja cuaje. ¡Yohua bajjani acue ba'a: Jesosa! <sup>32-33</sup> Oya quea bame nee nee ba'eje. Pea cuaa bajjani caje Eyacuiñajjiya Bacua Ejja nei oya. Eyacuiñajjiya oya po mee caje'yo ojjañaja Emeshi Mese nei epojji; Dabi emeshi mese jayojja oya cuaje. Jodio dejjaja Emeshi Mese po tiitiije'yo —jamaya cua esohuidojojji. <sup>34</sup> Maniaa esohuidojojji huohui'ajja ca cua jama ba'a: —¿Achajja jjamejoquime acuae po cajji so'o, ca dejja ba po jjima?

<sup>35</sup> Esohuidojojjiya jama aca cua ba'a: —Edojjoshahua Bame nei mi que cueje. Bo jayojja mi que anioqueje. Eyacuiñajjiya miquea ebacua ba'e mee caje. Jamajjeya miquea ebacua quea bame nee nee cuayaje oya Eyacuiñajjiya Bacua jjejojo. <sup>36</sup> Ecuea esohui e'e jojo nei, mique nene Isameni esho'yahua bacuama' tii cua. Jjeya ca ca oe jjamejoquinaje. Me oeje oe ba'ime ejjamejoqui ani. Jamajjeya ecuea esohui e'e jojo cuanaje. <sup>37</sup> E'e, Eyacuiñajjiya camaja'ama po mee caje'yo ojjaña —jamaya esohuidojojji cua.

<sup>38</sup> Jamajjeya Mania jama cua ba'a: —Eya Eyacuiñajji niije jjapee neinei qui sa cuani. Miquea esohui jayojja jama ca'a cahua Eyacuiñajjiya —jamaya cuanaje Mania.

Majoya esohuidojojji poqui'yonaje.

*Mania poquia cua e'a'i meseja equi yasijje anicuaa*

<sup>39</sup> Quijje pishana Mania poquia cua e'a'i meseja equi yasijje, Isamenija equi yasijje. Jodea meshi bajjani yasijje poquicuajinaje, eyiyojo ba'eca huasijje. <sup>40</sup> Isamenija equi yasijje dobiqui majje Mania jama cua ba'a: —Eya mi que cueyanaje anicuaa.

<sup>41</sup> O mimiajo Isamenija bacua teejo ba'e moquiquia cua. Isameni quea bihui cua; Edojjoshahua Bameya mimi mee ca cua. <sup>42</sup> Jamajjeya Isameni jjanobajjima nei mimia cua Mania niije jama ba'a: —Mania, miya Eyacuiñajjiya quea jea nee nee pea epona jayojja jama pojjeama. Jamajjeya miquea ebacua teejo ba'e ojaya quea jea nee nee pea'aiya. <sup>43</sup> E'e, miya cueyanaje e que anicuaa, jamajjeya eya quea bihui nee cuani

miya Eyacuiñajjiya Bacua ba'e meejojo. <sup>44</sup> Mi ecue equi yasijje dobiajo ecuea ebacua moquiquinaje teejo ba'e. <sup>45</sup> E'e, miyaya Eyacuiñajjiya esohui shajja'ajja neineinaje, jamajjeya jamaya acaje'yo —jama mimimeya Isamení cua.

<sup>46</sup> Majoya aje Mania jama mimime cua ba'a: —Jjeya eya quea bihui nee nee Eyacuiñajji nijje. <sup>47</sup> Eyacuiñajji ecuea Emeshi Mese nei cuani. Ohuaya ecuea mimishi cuijea ca'yon-aje. <sup>48</sup> Jamatii eya epona, ahuema'ani. Eya ba'e sa cuani Eyacuiñajjiya yajjiyo. ¿Yajjajo shai Eyacuiñajjiya eya bacaca canaje? Jamatii ojjaña cuana aje oe mimi tiitiije'yo ejo jama ba'a: “Mania quea bihui nee nee. Eyacuiñajjiya oya bacaca canaje”. <sup>49</sup> Eyacuiñajji quea ca'a nee nee. Jamajjeya eya ohuaya quea bame acanaje. Oya mimishi'ama nei nei, quea bame nee nee ba'e. <sup>50</sup> Eyacuiñajjiya ojaya epeeji cuana jaahuana cani. E'e, ojjaña joya onijje jjapeequiani Eyacuiñajjiya jaahuana cani etiiquiana yahuajo nei ba'ya cua, esho'iquiana jjeya nei ba'yani pea'ai. <sup>51-52</sup> Beca cuana onijje jjapeequi jjima ohuaya ca'a'ama po mee ca'yani. Dejja mimishi cuana ca'a'ama po mee ca'yani, emeshi mese mimishi cuana ohuaya ca'a'ama po mee ca'yani. Ojaya epeeji ca ca oe ohuaya quea ca'a po mee ca'yani. <sup>53</sup> Ojjaña cuana oja esohuiyo jjashajja'ajjaqui sa cuanijo ohuaya jjashajja'ajjaqui mee caje'yo. Beca cuana ca ca oja esohuiyo jjashajja'ajjaqui sa po ajjajo ohuaya jjashajja'ajjaqui mee jjima acaje'yo; jeajea caje'yo cuaqui yasijje jjashajja'ajjaqui sa po ajjajojo. <sup>54</sup> Eyacuiñajjiya Jodio dejja cuana jaahuana caje. Jamajjeya ohuaya oja Bacua Ejja huoojea caje Jodio dejja jaahuanajji epojji. Ohuaya pajea'yo jjima acaje'yo. <sup>55</sup> Jamaya ohuaya esejaya etiiquiana Amajama jaahuana ca cua. Oja bacua cuana pea'ai jaahuana ca cua. Oja osecua cuana jaahuana tiitii ca cua. Jjeya nei ohuaya eseya jaahuana cani pea'ai —jama bihuíameya Maniaa Eyacuiñajji aca cua.

<sup>56</sup> Majoya Mania pea beca peejjima ba'ime ania cua oja nene nijje. Majoya aje Mania poqui'ya cua oja equi yasijje.

#### *Huani cuaya cua ona besameeji epojji*

<sup>57</sup> Quijje Isamenija bacua cuaya cua; yahue cua. <sup>58</sup> Ojaya huapa pojjeama cuana cueya cua oja bacua baa. Ojjaña Eyacuiñajji nijje quea bihui cua Isamenija ebacua cuayajo. <sup>59</sup> Me oeje pea beca peejjima cahuime po majje ojjaña cue o'oya cua ebacua bajjaniya; oja cuiishasha jehuissejjajea pea'ai. Ojjaña bajjani sa aca cua ejeajjiya bajjani. <sup>60</sup> Isameniya ca jama aca cua ba'a: —Chojja, ¡yohua bajjani oe acue ba'a: Huani!

<sup>61</sup> Pea cuaa jama aca cua ba'a: —¿Apiojji acuaeya ma bajjani aje? Chama' aje jja che pea bajjani Huani.

<sup>62</sup> Jamajjeya aje jja oe ojjaña Sacania huohui'ajja ca cua: —¿Ae bajjani acuae jja cuaje so'o?

<sup>63</sup> Majoya Sacaniaa mimi ajja jjejojo jama tehueme aca cua ba'a: —¡Huani bajjani oe acue!

Ojjaña jama cua ba'a: —E'e, ¿apiojji shai?

<sup>64</sup> Majoya aje Sacania mimi mee ca o'oya cua Eyacuiñajjiya. Jamajjeya ohuaya Eyacuiñajji bihui ca o'oya cua. <sup>65</sup> Ojjaña cuana ca jja ca jama cua ba'a: —De, Sacania mimi'ya, de.

Majoya ojjaña cuana poquia cua huohui pohua, ojjaña eyiyojo ba'eca cuana huohuiya.

<sup>66</sup> Ojjaña shajja'ajja majje huohui'ajja ca cua jama ba'a: —Eyacuiñajjiya jaahuana cani Sacaniaja bacua, Huani. Oya quea ca'a nee nee cuaje; Eyacuiñajjiya quea bame nee nee ba'e meesahua caje Huani.

#### *Sacania sohuicuaya cua*

<sup>67</sup> Sacania Edojjoshahua Bameya sohuicuaya mee ca cua. Jama sohuicuayame po mee ca cua ba'a: <sup>68</sup> —Eseyaya oe Eyacuiñajji ejjabihuiqui, ojjaña. Oya esejaya Emeshi Mese nei, Jodio dejjaja Emeshi Mese nei, de. Ohuaya esejaya mimishi cuana cuijea ca'yani. <sup>69</sup> Ohuaya Quito huoojea caje ese que. Ma ehoojea'yo Quito quea sohui poja nee nee cuaje'yo. Quitohua eseya quea ca'a po mee caje'yo. Ojaya etiiquiana Dabi emeshi mese cua yahuajo nei iye ca'a ca'a cua, Quito ca ca oe ojjaña Emeshi Mese cuaje ese

jaahuanajji. <sup>70</sup> Jamaya yahuajo tehue ca cua Eyacuiñajji esohui huohuijji cuaa. Tehue majamaja ca cua Quitojo. <sup>71</sup> Jama tehue me aca cua ba'a:

“Yani dejja cuana ecuana nijje mimijaji neinei. Ecuana boti'ama cuani, cuiajea sa acani. Jamajjeya aje oe ecuanaya Eyacuiñajji jaahuana caní”.

Jamaya esohui etehue'yo cuana cua.

<sup>72-73</sup> —Eyacuiñajji yahuajo mimia cua ecuanaja etiquiana nijje, Amajama nijje jama ba'a: “Eyaya Quito huoojeaje'yo miquiana ojjaña jaahuanajji”. Jamaya aca cua ohuaya ojaya epajea'yojji pojjeamajojo. <sup>74-75</sup> Jamajjeya eseyaya Eyacuiñajji ejjabihuaqui; Quito-hua dejja mimishi cuanajo mete'ama po mee caní. Esey jaahuana caje'yo. Quea bame ba'e mee caje'yo mimishi'ama epo'yojji —jama sohuicuayameya Sacania cua.

<sup>76</sup> Majoya Sacaniaa oja bacua jama aca cua ba'a: —Miya ecue bacua oe nei. Miya Eyacuiñajji esohui huohuijji cuaje'yo. Ohuaya miya huoojea caje ebonei. Huohuicue jama ba'a: “¡Oya shajja'ajjacue! Oya Quito, Eyacuiñajji huoojea'yo ojjaña jaahuanajji cueje”. <sup>77</sup> Huani, miyaya ojjaña cuana huohuicue jiquio esohui jama ba'a: “Eyacuiñajjiya ojjaña cuanaja mimishi cuijea caje'yo onijje jjapeequianija”. <sup>78</sup> Jamaya esey Eyacuiñajjiya quea jea nee nee acaje'yo. <sup>79</sup> Jamajjeya ecuana mete'ama cuaje onijje jjapeequi majje. Poquije eyahuasijje onijje eba'e tiiti'yojji. Ohuaya esey quea bhui po mee caje'yo —jamaya Sacania cua.

<sup>80</sup> Majoya ebacua tii majje quea ca'a nee nee cua; Eyacuiñajji epeeji nei nei cua. Oya oe nei ba'ya cua quimajo. Majo tiya aje Huaniya esohui huohui ca cua Jodio dejja cuana huasijje.

## 2

### *Jesosa cuayanaje*

*(Mateo 1.18-25)*

<sup>1</sup> Huani cuaya cua shejo emeshi mese yohua bajjani cua ba'a: Agosto Sesa. Emeshi meseya echacjji cuana huohui ca cua jama ba'a: —¡Sicoquicue ecue meshijo ba'e cuana! ¿Ache huiso ba'ajja'yo socue? ¡Huohuicue ojjaña dejja cuana jama ba'a: “¡Poquicue mi cuayacua meshi yasijje mique bajjani tehueya; jamaya emeshi mese cuanaje!” acue! —jamaya Sesaa aca cua.

<sup>2</sup> Emeshi meseya Sesaa jama sico coome aca cua. Ma shejo tiya pea emeshi mese Sineño bajjani cua; ojaya meshi Sania bajjani cua. <sup>3</sup> Jamajjeya aje oe ojjaña poquia cua o cuaya cua meshi yasijje.

<sup>4-5</sup> Jose, Maniaja ejajiba cua. Jose Nasanenajo ba'eja jajiba cua, Janinea meshijo. Oja etiquiana Dabi cua, yahuajo Dabi ba'ya cua Benenajo, Jodea meshijo. Jamajjeya Jose poquia cua Benena huasijje emeshi meseja esohuijo oja bajjani tehue meeya. Jose, oja shiye nijje poquia cua. Quea huesha poquia cua. Mania ebacua cuayajea'yo pana nei poquia cua. <sup>6</sup> Majoya aje Benena bañaqui majje Maniaja bacua cuayañaquinaje. <sup>7</sup> Quea dejja huiso ania cua Benenajo jjabajjani tehue meequiya poqui. Jamajjeya chama' equi ejaachichajji cua. Jamajjeya aje oja bacua cuaya cua ana'ai jaajji equijo. Ojaya ebacua cojjasobo cuaya cua jomajo. Cuayajo ohuaya bebo ca cua daqui oshejo.

### *Ñajjajja jaahuanajji cuaa esohuidojojji ba ca cua*

<sup>8</sup> Ma mecajje aje Benenajo chipi nei pishana ñajjajja jaahuanajji cuana ñajjajja cuiña po ña cua. <sup>9</sup> Majoya aje esohuidojojji jjaja'aquia cua. Majoya aje oe o chipi nei jeajahuajhua ca cua esohuidojojjiya. Mete neinei'ya cua ñajjajja jaahuanajji cuana. <sup>10</sup> Esohuidojojji jama cua ba'a: —¡A'a quea mete pojji! Eyaya esohui quea bame nee huohuiaña ojjaña dejja cuana quea bhui nee po meeji. <sup>11</sup> Jjeya nei cuayanaje oe ebacua Dabija meshijo. Ma ebacua Eyacuiñajji huoojea'yo. Ohuaya miquianajaya mimishi cuijea caje'yo; yohua bajjani cuaje ba'a: Quito. <sup>12</sup> ¡Miquianaya poquicue ebacua baa Benena huasijje! Jomajo aje ana'ai jaajji equijo ebebo jaa oja nae nijjeya, oja chii Jose nijjeya pea'ai —jamaya cua esohuidojojji.

<sup>13</sup> Majoya aje quea huišo esohuidojojji cuana jja'a aquia cua. Sohuicuayanaje ojjaña esohuidojojji cuana Eyacuiñajji bihuiajji. Jama sohuicuayame cua ba'a:

<sup>14</sup> “Eyacuiñajji quea ca'a nee nee. Eyajo ba'e, quea ao nee nee. Eyacuiñajjiya ojjaña ojaya epeeji cuana ojjaña meshijo ba'e quea bihui po mee caje”.

<sup>15</sup> Majoya esohuidojojji ba'esohuaqui'ya cua eyahuasijje. Ñajjajja jaahuanajji cuana jama mimime cua ba'a: —De, cue'ajjaa Benena huasijje. Ma esohuidojojjiya huohui canaje jayojjaya aje seya aje.

<sup>16</sup> Majoya poqui cuajicuajia cua ebacua sa'ajjaa. Majoya ana'ai jaajji equijo jaa ba cañaquia cua ebacua, Mania, Jose pea'ai. <sup>17</sup> Majoya ba majje huohui'ajja cañaquia cua esohuidojojjiya esohuijo ebacujajo. Pea cuana huasijje huohui ca cua pea'ai. <sup>18</sup> Beca cuana shajja'ajja majje jashahuabaquia cua ñajjajja jaahuanajji cuanaja esohuijo. Quea bame cua. <sup>19</sup> Mania jashahuabaquia cua pea'ai. Pajea'yo jjima aca cua ñajjajja jaahuanajji cuaa huohui canaje esohui. <sup>20</sup> Majoya ñajjajja jaahuanajji cuana poqui'ya cua ñajjajja jaahuana'yohua. Poquije'yohua Eyacuiñajji bihuia nei nei ca poqui'ya cua. Esohui quea huišo sohuicuaya cua: —Esohuidojojjiya esohui e'e jojo nei —cuanaje.

*Ebacua Jesosa dojobia cooqui ca cua Eyacuiñajji equi yasijje*

<sup>21</sup> Me oeje pea beca peejjima cahuime cuajo Jesosaja naeya oja chiiya pea'ai bajjani canaje Jesosa. Ma esohuidojojjiya esohui jayojja Mania jjamejoqui jjimahuajo bajjani ca cua. Jesosaja cuiishasha jehusejjajea ca cua pea'ai, ojjaña Jodioja ebacua jayojjaya jama aca cua.

<sup>22</sup> Ba'i oe cuajo Mania Joseya pea'ai Jesosa dojobia ca cua Eyacuiñajji equi yasijje Jenosanena huasijje. Mania Eyacuiñajji equi yasijje dobiqiu jjimahuaa Moisesija etehue'yo jayojja aca cua. Majoya Jesosa dojobiaqui canaje Eyacuiñajji equi yasijje huohuiya. <sup>23</sup> Jamaya aca cua Moisesija etehue'yojo ba'a:

“¡Ebacua cojjasobo dejja huohuicue Eyacuiñajji yasijje! <sup>24</sup> ¡Becanejjiji pea'ai huia' quiacue Eyacuiñajji nijje mimiani yasijje equiyo jeyojeyo'yojji cuaqui pohui pojji epo'yojji! Jamaya miya ajo Eyacuiñajjiya mimishi cuijea caje'yo. ¡Jamaya Eyacuiñajji sosequajji acue!”

Jamaya Moisesija etehue'yo cua.

<sup>25</sup> Oe Jodio etii Simeoni bajjani Jenosanenajo ba'ya cua. Oya Eyacuiñajjiya epeeji nei quea bame nee nee cua. Ohuaya Quito ishoo'ajja ca ania cua Eyacuiñajjiya huoojea'yo ojjaña jaahuanajji. Jamatii jashahuabaquiani Eyacuiñajjiyo, jamajjeya Edojjoshahua Bame ojo nequia cua. <sup>26</sup> Jamaya Edojjoshahua Bame onijje cua ba'a: —Miya emano'yojji pojjeama Eyacuiñajjiya huoojea'yo cue jjimahuajo.

<sup>27</sup> Jamajjeya Edojjoshahua Bameya Simeoni poqui mee ca cua Eyacuiñajjiya equi yasijje. Simeoniya Jose, Mania Jesosa bishamijji nequi ba ca cua Eyacuiñajjiya equijo. <sup>28</sup> Simeoniya ebacua Jesosa aña majje ba ca cua. Eyacuiñajji bihuia ca cua Jesosa ohua ba mee caje. Jama cua ba'a: <sup>29-30</sup> —E'e de, jjeya nei Eyacuiñajjiya huoojea canaje ma ohua huoojepana ca cua; jamajjeya ohuaya eya ba mee canaje. Jjeya eya poquije'yo Eyacuiñajji yasijje quea jaji nee eba'e tiitii'yojji. <sup>31</sup> Ojjaña meshijo ba'e cuaa Jesosa ba caje, Eyacuiñajjiya huoojea'yo ojjaña mimishi cuijea'yojji. <sup>32</sup> Jesosaa ojjaña dejja cuana quea jashahuabaqui ja'a nee po mee caje'yo Eyacuiñajjiya esohuijo. Jesosa Emeshi Mese nei epojjiyojo, Jodio dejja cuana quea bihui cuaje'yo —jamaya Simeoni cuanaje.

<sup>33</sup> Majoya Jesosaja chii, enaese pea'ai jashahuabaquia cua Simeoniya esohuijo jama ba'a: —E'e de, Simeoniya esohui quea bame nee nee Jesosajo.

<sup>34</sup> Majoya aje Simeoniya Mania, Jose pea'ai jama aca cua ba'a: —Miquianaya aje Eyacuiñajjiya quea bame acaje'yo. Mique bacua quea ca'a po mee caje. Jaahuana caje'yo. Mania, miya Jesosaja enaese. Mique bacua Jodio cuana jashahuabaqui mee caje'yo Eyacuiñajjiyo quea huišo nee. Beca dejja cuana jjapeequije'yo Eyacuiñajji nijje. Beca cuaa cajaa acaje, jjapeequi sa po ajja Eyacuiñajji nijje. <sup>35</sup> Mimijajje Jesosa nijje cuana. Oya quecua caje'yo cuaa. Majoya aje oe miquianaya quea yeno cuaje ma cuanajoya —jamaya Simeoni cuanaje.

<sup>36</sup>Jomajo oe epona tii ania cua; Ana bajjani. Eyacuiñajjija epeeji nei nei cua; Panoaneja bacua piona. Ojaya huapa pojjeama Asene bajjani cua. Yahujajo oya jjahuaquia cua. Oja yahue nijje ba'ya cua me oeje beca, 7 shequiajame. Majoya aje ojaya yahue mano'ya cua. <sup>37</sup>Jamajjeya quea huiso nee nee shequiajame, 84 shequiajame ania cua. Etii nojinoji nei e'ahuemano'yo ania cua. Eyacuiñajjija equijo jjeya ani, cuayaqui ajja neinei ania cua. Jamatii mimiania cua Eyacuiñajji nijje, bihuiabihua tiitiana cua ojjaña pojja.

<sup>38</sup>Anaa ba ca cua Jesosa. Quea bihui nee cua. Jamajje dejja cuana nijje mimia cua joya Eyacuiñajjija huoojea'yo ishoa'ajja po ani nijje jama ba'a: —¡E'e ee bacue jiquio ebacua, Jesosa Quito cuayanaje! Ohuaya quea bei ba'e mee caje'yo Jodio cuana. Ojjaña cuanaja Emeshi Mese nei cuaje'yo —jamaya Anaa aca cua cuana.

*Jose poqui o'oya cua oja meshi yasijje Nasanena huasijje*

<sup>39</sup>Ojjaña Moisesija etehue'yo acua ajeyo'yo majje Jose oja huanase nijje, Jesosa pea'ai nijje poquia cua. Ma o ebionei ba'ya cua meshi yasijje poqui o'oya cua, Nasanena huasijje. <sup>40</sup>Jomajo Jesosa tiia cua; quea ca'a nee nee, quea jjashahuabaqui ja'a nee cuanaje. Eyacuiñajjiya oya jaahuana ca cua; quea bei nee nee ojo cua.

*Jesosa etii shacuima' nequi epo oja naeya oja chiiya pea'ai dojo ca cua Eyacuiñajjija equi yasijje*

<sup>41</sup>Jesosaja chii oja nae nijje poqui nequia cua Jenosanena huasijje pea Jodio cuana nijje ojjaña shequiajajo. Pascua pohua poquia cua Eyacuiñajji bihuiaa. Yahujajo nei Jodio etiiquianaja bacua cuana esohuidojojjiya cuia'yo jjima aca cua shejo poquia cua ojjaña nijje ijia'ijjiaa. <sup>42</sup>Jesosa etii shacuima' nequi po majje, 12 shequiajame po majje poqui pea'aiya cua. <sup>43</sup>Oe semana Jenosanenajo aniya ojjaña cuaa Eyacuiñajji bihuia ca ania cua. Majoya Pascua jjayejjequijajo ojjaña cuana poqui ca'ya cua. Jesosa ca ca poqui'yo jjima cua. Jamatii ojaya enaeseja ba'yo jjima cua, oja chiiya pea'ai. Jesosa pea cuana nijje pojebe'yani poso aca cua. <sup>44</sup>Majoya aje oe cahuime cuajo Jesosaja enaeseja niñeba ca'ya cua: —¿Aecue jiquio Jesosa so'o?

<sup>45</sup>—Chama' ca ca Jesosa. ¿Achacua shai poquinaje? —jamaya pea cuana cua.

Majoya aje huacuaya poqui o'oya cua Jenosanena huasijje Jesosa sa'ajja'yohua. <sup>46</sup>Majoya pea beca peejjima cahuime epo ba ca'ya cua Jesosa Eyacuiñajjija equijo nequi. Jesosaa Eyacuiñajjija esohui huohuiji cuequi tii cuana huohui'ajja ca ania cua; Jesosa jjashajja'ajjaqui ania cua pea'ai. <sup>47</sup>Ojjaña jjashahuaba neineiquinaje Jesosaja esohuijo: —E'e de, Jesosa quea ja'a nee nee jjashahuabaquiani, de —pea cuana cua.

<sup>48</sup>Joseya Maniaa pea'ai Jesosa ba majje mimia ca cua jama ba'a: —¿A'a mi quioya Jesosa? ¿A'ya acuae mi po nequinaje so'o? Ecuanaajaya miya ba'yo jjima nei nei cuanaje. Jamajjeya eya mijo quea yeno nee nee cuanaje, Jesosa. Jamajjeya ecuanaya sa'ajjasa'ajja'yoquinaje.

<sup>49</sup>Jesosaa jama aca cua ba'a: —¿Apiojji acuae iña sa'ajja'yaña so'o? ¿A'a miquea ba jjima eya ecue Chiiya equijo enequijji, Eyacuiñajjija equijo?

<sup>50</sup>Jose Mania pea'ai oja esohuijo jjabahuejjaqui jjima cua yajja cuani poso aca cua.

<sup>51</sup>Majoya aje Jesosa oja chii nijje oja nae nijje Nasanena huasijje poqui o'oya cua, ma o ba'e yasijje. Jamatii Jososaa shajja'ajja ca cua Jose, Mania pea'ai. Quea bihui ba'ya cua. Mania jjashahuabaquia cua Jesosaja esohuijo; pajea'yo jjima aca cua. <sup>52</sup>Jesosa tiia cua quea ca'a nee nee; quea ja'a nee nee cua. Eyacuiñajji quea bihui nee cua Jososajo; dejja cuana quea bihui cua pea'ai.

### 3

*Huaniya Eyacuiñajjija esohui huohui ca cua  
(Mateo 3.1-12; Macoso 1.1-8; Huani 1.19-28)*

<sup>1</sup>Quijje nei mahuiso emeshi mese cuana cua ba'a: Shomano dejja cuanaja emeshi mese Timeneo bajjani. Quea huiso shequiajame, 15 shequiajame nequijo Jodea meshija emeshi mese Ponisio Pinato bajjani nequinaje. Janinea meshija emeshi mese Enode bajjani cua.

Oja doe etii Penipe bajjani cua. Oya Itoneaja emeshi mese cua, Taconiteja emeshi mese pea'ai cua. Amininiaja emeshi mese Nisanía bajjani cua. <sup>2</sup> Eyacuiñajji nijje mimiani etii Anasi bajjani cua. Pea ca Caipa bajjani cua.

Jiquio emeshi mese cuana nequijo tiiya aje Huani Sacaniaja bacua ejja nequia cua meshi quimajo. Onijje mimi majje Eyacuiñajjiya Huani huoojea ca cua esohui huohuijji epojji. <sup>3</sup> Jamajjeya Huani po'ayequie nequia cua Eyacuiñajjiya esohui huohuiya Jodana cueijje. Ohuaya pea cuana jama huohuime aca cua ba'a: —¡Jashahuabaquicue Eyacuiñajjiyo; miquea mimishi pajea'yocue! ¡Miquea mimishijo quea yeno pocue! ¡A'a mimishi maja sa po'yojji! Miya mimishi pajea'yajo, aje Eyacuiñajjiya miquea mimishi cuijea caje'yo. Eyaya miya besa meeje enajje pea cuanaja ebajji miya Eyacuiñajjiya epeeji nei nei cuanijo.

<sup>4</sup> Jamaya Isaiaa yahuajo nei Huanijo tehue ca cua. Isaia Eyacuiñajjiya epeeji, esohui huohuijji cua. Oya etiquiana nei nei cua. Jama tehuemeya aje yahuajo aca cua ba'a: “Oe dejja quimajo nequi taaani jama ba'a: ¡Acua pocue! ¡Jashajja'ajjaquicue Eyacuiñajjiya huoojea'yo ojjaña jaahuanajjiyo!

<sup>5</sup> Eyacuiñajjiya dejja quea mimishi cuana jeajea caje cuaqui yasijje jashajja'ajjaqui ajjajojo. Ojjaña joya Eyacuiñajjiya esohui ojaya ehoojea'yo ojjaña jaahuanajjiyo shajja'ajja cani ca ca quea bame nee cuaje'yo. Joya ecua ejiojji quea bame aca yani jama jayojja dejja cuana quea bame acaje'yo. <sup>6</sup> Ojjaña meshijo nequica dejjaa shajja'ajja caje Eyacuiñajjiya esohui. Joya onijje jjapeequije Eyacuiñajjiya mimishi cuijea caje'yo”.

Jamaya cua Isaiaja etehue'yo Huanijo.

<sup>7</sup> Majoya dejja quea huiso cueya cua Huani que mimishi pajea'yohua nisho, oja besa mee yohua nisho pea'aiya. Jamajjeya aje Huaniya jama tecueame aca cua ba'a: —Miquianaya quea tai cuani. Peyo jayojja cuani. Miquianaaya ca jja ca mimishi pajea nisho'yaña. Miquianaya jashahuaba taiquiani jama ba'a: “Eyacuiñajjiya eya jeajea jjima acaje cuaqui yasijje Huanija enajje ebesa meejojo”. Jamatii miquianajaya ca jja ca oe mimishi pajea'yo jjima nei nei. ¡Ebionei oe shajja'ajjacue Eyacuiñajjiya esohui; majoya miquianajaya mimishi pajea neinei'yocue! Majoya oe enajje eyaya besa meeje'yo Eyacuiñajjiya epeeji nei epojji. <sup>8</sup> Miquianaya Eyacuiñajjiya epeeji nei ba'yanijo, mimishi epo beca'yojji pojjeama. ¡Jama jashahuabaquimeya oe pocue enajje ebesaqui cuahuajje! A'a mimijji jama ba'a: “Ecua etiquiana Amajama cua. Oya Eyacuiñajjiya epeeji nei cua, jamajjeya aje oe ecuanaya Eyacuiñajjiya epeeji pea'ai cuani”. Cho, miquianaya ca ca jjapeequi jjima Eyacuiñajji nijje. Miquianaya quea mimishi, de. Eyacuiñajji ojaya epeeji quea huiso sa cuani jojjemo Amajama jayojja epojji, ohuaya mei pana came. <sup>9</sup> Miquianaya joya acui jjajjama' jayojja cuani. Jiquio ecua acui jjajja'yo ajja jajajea ca'yojji jayojja jama Eyacuiñajjiya dejja mimishi acaje'yo, jeajea caje'yo cuaqui yasijje. Jamaya aje miquianaya acaje'yo mimishi pajea'yo ajjajojo, onijje jjapeequi sa po ajjajojo. Beca cuana ca ca joya acui quea jjajja huiso jayojja cuani. Quea bame nee nee ba'yani, Eyacuiñajji nijje jjapeequiani jjejojo. Quea bei ba'yani pea cuana nijje, oya Eyacuiñajjiya quea jea nee nee acani jjejojo.

<sup>10</sup> Majoya aje dejja cuaa jama huohui'ajjame aca cua ba'a: —¿Yajja acuae oe po cajji so'o?

<sup>11</sup> Huani jama cua ba'a: —¡Joya miquea beca yanijo daqui quiacue daquima' cuana huasijje! ¡Miquea bobi yanijo ca bobima' cuana huasijje quiacue!

<sup>12</sup> Emeshi meseja bejjo chichajji cuani cuaa jama huohui'ajjame aca cua ba'a: —Esohui huohuijji, ¿yajja acuae pajjaja po cajji so'o?

<sup>13</sup> Huani jama cua ba'a: —¡A'a quea mimishi pojji! ¡A'a quea sose huiso ajji! ¡Joya emeshi meseja sosehuiso tiiya jjeshecue! —jamaya cua Huani.

<sup>14</sup> Majoya aje sohuinanohua jama huohui'ajjame aca cua ba'a: —¿Yajja acuae ecuanaya cuaje'yo so'o?



Huani jama cua ba'a: —¡A'a miquiaaya dejja cuana iñajji bejjo esiiiji! ¡A'a pea cuana nijje siajje pojji bejjo esiiiji! ¡Miquianajaya bejjojo nei jjaja oe quea bihui pocue! —jamaya Huaniya sohuinano aca cua.

<sup>15</sup> Dejja cuaa Huani Eyacuiñajjija huoojea'yo ojjaña jaahuanajji poso aca cua oja esohui quea bame nee nee cua jojoya. <sup>16</sup> Huani ca ca Eyacuiñajjija huoojea'yo ojjaña jaahuanajji pojjeama cua. Oya jama cua ba'a: —Eyaya miquianaya enajje besa meeje'yo Eyacuiñajjija epeeji jojoya. Eya ca ca Eyacuiñajjija huoojea'yo ojjaña jaahuanajji pojjeama. Oya ca ca Quito bajjani quijje pishana cueje. Ohuaya miquiana que Eyacuiñajjija Edojjoshahua Bame dobiqui mee caje'yo. Jamajjeya miya quea bame cuaje'yo. Mimishi cuana pajea sa po'yo ajjajo ca ca, jeajea caje'yo cuaqui yasijje. Jamaya Quito oe nei quea ca'a nequi. Eya ca ca iña quea ca'a pishana nequi. Jamajjeya eya ca iña onijje nequi sa po ajja miquiana ani cojja nei. Quea bicho eya, de. <sup>17</sup> Quito cueje ojaya epeeji nei chicha'yohua. Pea cuana ca ca cajaa ajea caje'yo. E'e, jiquio ecua seya anoso shaa jea majje equi yasijje iya'yaña jama ojaya epeeji cuana acaje'yo Quitohua. Jiquio ecua seya anoso cuiahuojo majje shaa jeajeña jayojja jama Quitohua ojaya epeeji pojjeama cuana jeajea caje'yo cuaqui quijjo'yo ajja huasijje —jamaya Huaniya aca cua.

<sup>18</sup> Huanija pea esohui jama cua ba'a ojjaña cuanajo: —Eyacuiñajji ojjaña nijje jjapeequi sa cuani, jjeya nei.

<sup>19</sup> Ojaya pea esohui jama cua ba'a: —Esejaya emeshi mese, Enode bajjani quea mimishi nee nee cuanaje. Oja chahuaja, Penipeja huanase sii canaje oja huanase epo'yojji. Ma epona Enodiasí bajjani cuanaje —jamaya cua Huani.

<sup>20</sup> Jamajjeya Enode ma esohui shajja'ajja majje quea quene nee nee cua. Iña mee ca cua Huani ejeanobiaejaji, Enodeya quea mimishi nee neeya jjejojo.

#### *Huaniya Jesosa enajje besa mee ca cua*

*(Mateo 3.13-17; Macoso 1.9-11)*

<sup>21</sup> Huani jeanobiajea jjimahua poquia cua dejja ojjaña cuana nijje Jodana cuei yasijje enajje besa meeya. Jesosa pea'ai poquia cua o que. Huaniya Jesosa besa mee ca'ya cua. Majoya Jesosa Eyacuiñajji nijje mimianijo, eyatahuatahua capajea ca cua. Edojjoshahua Bame huia' jama o sapa biajje cuabesa ba'ya cua. Japashineijje ba'eoquea cua. <sup>22</sup> Majoya esohui shajja'ajja ca cua ojjaña eyahuasijje. Eyacuiñajji Jesosa nijje jama mimime cua ba'a: —Miya ecue Bacua Ejja nei, Jesosa. Eyaya miya quea jea nee aña. Eya mijo quea bihui nee nee —jamaya cua Eyacuiñajji.

#### *Jesosaja etiiquiana*

*(Mateo 1.1-17)*

<sup>23</sup> Jesosa Jodio dejja nei cua. Jesosaa 30 shequiajame tii majje esohui huohui coo ca cua. <sup>24</sup> Ojaya etiiquiana cuana yohua bajjani cua ba'a: Ebionei Jose nequia cua. Oya Jesosa tii meeji cua; Jesosaja chii jayojja cua. Jose ca Enija bacua ejja cua. Eni ca Mata'aja bacua ejja cua. Mata'a ca Nemija bacua ejja cua. Nemi ca Mequija bacua ejja cua. Mequi ca Janaja bacua ejja cua. Jana ca Joseja bacua ejja cua. Jose ca Matatija bacua ejja cua. <sup>25</sup> Matati ca Amosaja bacua ejja cua. Amoso ca Nahuomaja bacua ejja cua. Nahuoma ca Esinija bacua ejja cua. Esini ca Naquiaja bacua ejja cua. <sup>26</sup> Naquia ca Maataja bacua ejja cua. Maata ca Matatija bacua ejja cua. Matati ca Semeja bacua ejja cua. Seme ca Josequija bacua ejja cua. Josequi ca Jonaja bacua ejja cua. Jona ca Joanaja bacua ejja cua. <sup>27</sup> Joana ca Shesaja bacua ejja cua. Shesa ca Sonobabeja bacua ejja cua. Sonobabe ca Sanatija bacua ejja cua. Sanati ca Nenija bacua ejja cua. <sup>28</sup> Neni ca Mequija bacua ejja cua. Mequi ca Adija bacua ejja cua. Adi ca Cosamaja bacua ejja cua. Cosama ca Emanamaja bacua ejja cua. Emanama ca Esheja bacua ejja cua. Eshe ca Jesosaja bacua ejja cua. <sup>29</sup> Jesosa ca Enieseja bacua ejja cua. Eniese ca Jonimija bacua ejja cua. Jonimi ca Mata'aja bacua ejja cua. Mata'a ca Nemija bacua ejja cua. <sup>30</sup> Nemi ca Simeonija bacua ejja cua. Simeoni ca Jodaja bacua ejja cua. Joda ca Joseja bacua ejja cua. Jose ca Jonamija bacua ejja cua. Jonami ca Eniaquimija bacua ejja cua. Eniaquimi ca Meneaja bacua ejja cua. <sup>31</sup> Menea ca

Menaja bacua ejja cua. Mena ca Matataja bacua ejja cua. Matata ca Nataja bacua ejja cua. Nata ca Dabija bacua ejja cua. <sup>32</sup> Dabi ca Isaija bacua ejja cua. Isai' ca Obedaja bacua ejja cua. Obeda ca Boosija bacua ejja cua. Boosi ca Sanaja bacua ejja cua. Sana ca Naasonija bacua ejja cua. Naasoni ca Aminidabija bacua ejja cua. <sup>33</sup> Aminidabi ca Adimija bacua ejja cua. Adimi ca Ashinija bacua ejja cua. Ashini ca Eshaomija bacua ejja cua. Eshaomi ca Panesija bacua ejja cua. Panesi ca Jonaja bacua ejja cua. <sup>34</sup> Jona ca Jacoboja bacua ejja cua. Jacobo ca Isaacaja bacua ejja cua. Isaaca ca Amajamaja bacua ejja cua. Amajama ca Taneja bacua ejja cua. Tane ca Naconija bacua ejja cua. <sup>35</sup> Naconi ca Senocaja bacua ejja cua. Senoca Shacaoja bacua ejja cua. Shacao ca Penecaja bacua ejja cua. Peneca ca Emeneja bacua ejja cua. Emene ca Sanaja bacua ejja cua. <sup>36</sup> Sana ca Cainanija bacua ejja cua. Cainani ca Anajjadaja bacua ejja cua. Anajjada ca Semija bacua ejja cua. Semi ca Noeja bacua ejja cua. Noe ca Nemequeja bacua ejja cua. <sup>37</sup> Nemeque ca Matosaneja bacua ejja cua. Matosane ca Enoqueja bacua ejja cua. Enoque ca Janedija bacua ejja cua. Janedi ca Majananeenija bacua ejja cua. Majananeeni ca Cainanija bacua ejja cua. <sup>38</sup> Cainani ca Enosija bacua ejja cua. Enosi ca Setija bacua ejja cua. Seti ca Adanaja bacua ejja cua. Adana ca Eyacuiñajjija pana cua. Oya ebionei dejja cua.

## 4

*Edosiquiana etiiya Jesosa quea mimishi po mee sa aca cua*  
(Mateo 4.1-11; Macoso 1.12-13)

<sup>1</sup> Jesosa cueyanaje Jodana cuei yasijje Huanija besa meeya. Jomajo Edojjoshahua Bameya Jesosa dojo canaje quima huasijje. Majoya Edosiquiana etii Jesosa nijje miminaje oja emeshi mese nei epo'yojji nisho. <sup>2</sup> Jomajo nequia cua quea huiso nee cahuime, 40 cahuime ijja'ijjia jjima cua. Majoya quea shoe nee nee jjabaquia cua. <sup>3</sup> Edosiquiana etiiya Jesosa jama huohuime aca cua ba'a: —Miya Eyacuiñajjija Bacua jjabaqui majje ca oe jiquio mei pahui pojji acue! ¡Pahui pojji amajje ijjiacue!

<sup>4</sup> Jesosa jama cua ba'a: —Chojja de, eya miquea esohui shajja'ajja sa po ajja. Bacue, Eyacuiñajjija etehue'yo jama cuani ba'a: “Dejja cuana bobijo ca'a po majje pojjeama ba'e tiitiije'yo. Ojjaña Eyacuiñajjija esohui jayojja jama añajo ca se ca oe quea bame nee ba'e tiitiije'yo” —jamaya Jesosa cua.

<sup>5</sup> Majoya aje Edosiquiana ettiya Jesosa dojo ca cua eyiyo ao'ao huasijje. Majoya aje ba mee ca cua ojjaña meshi cuana; Jesosa cahuijo jayojja ba mee ca cua. <sup>6</sup> Edosiquiaa huohui ca o'oya cua jama ba'a: —Eyaya miya quiaje jiquio meshi cuana, miya emeshi mese po meeje'yo. Eyaya ojjaña aquiana quiaje'yo. Ojjaña meshi cuana ecuea, jamajjeya eyaya quia sa cuanijo eyaya aje miquea yajji quiaje'yo. <sup>7</sup> ¡Miyaya eya bihuiacue, shajja'ajjacue ecuea esohui! Majoya miya emeshi mese po meeje'yo eyaya —jama sijje ameya aca cua Edosiquiaa Jesosa.

<sup>8</sup> Jesosa jama cua ba'a: —Chojja, jpoquicue quea huesha, Edosiquiana! Eyacuiñajjija etehue'yo jama cuani ba'a:

“¡Eyacuiñajji oe nei bihuiacue; oya oe nei ojjañaja Emeshi Mese nei nequi! ¡Ojaya ehuhui'yo jama oe acue!” —Jesosaa aca cua.

<sup>9</sup> Majoya aje Edosiquiaa Jesosa dojo ca cua Jenosanena huasijje. Nequia cañaquia cua Eyacuiñajjija equi biajje. Majoya Edosiquiaa Jesosa jama aca cua ba'a: —Miya Eyacuiñajjija Bacua Ejja nei jjabaqui majje jiquiojo nequi tohuua'ajja'yo socue meshi yasijje! <sup>10</sup> Eyacuiñajjija etehue'yo jama cuani ba'a:

“Eyacuiñajjiya huoojea caje esohuidojojji cuana mi jaahuanaa. <sup>11</sup> Oquequiajo ohuaya emeya miya ñajjequi caje'yo. Jamajjeya miya ejjajiojji quecuasajaquijji pojjeama meijo”.

Jamaya cuani, de —Edosiquiana cuanaje.

<sup>12</sup> Jesosaa jama aca cua ba'a: —Chojja, miya jjashahuaba taiquiani, de. Eyacuiñajjija pea etehue'yo jama cuani ba'a:

“A'a jamaya mimijji ba'a: ¿A'a Eyacuiñajjiya oja esohui e'e jojo nei acaje'yo? ¿A'a eya jaahuana nei caje'yo? Caba'ajjasahua. ¡A'a pojji!”

Jamaya yahuajo nei Moisesiya tehue ca cua —jamaya Jesosa cua.

<sup>13</sup> Edosiquiana jjashahuabaqui jjima cua; pea esohui chama' cua Jesosa quea mimishi po meeji nisho. Jamajjeya Edosiquiana poquia cua. Majoya aje quijje cue o'oya cua o quea mimishi po mee'yohua nisho.

*Jesosaa huohui coo ca cua Janinea meshi yasijje*  
(Mateo 4.12-17; Macoso 1.14-15)

<sup>14</sup> Majoya Jesosa posohuaqui o'oya cua oja meshi yasijje, Janinea meshi yasijje. Edojjoshahua Bameya Jesosa quea ca'a po mee ca cua. Jomajo dejja cuana mimia cua Jesosajo, ojjaña meshi yasijje mimia cua. <sup>15</sup> Jamatii Jesosa po'ayeque nequia cua pea cuiñajji cuana huasijje Eyacuiñajjiya esohui huohuiya Jodioja equi ejjachichaquijji cuana huasijje. Ojjaña dejja quea bihui cua onijje. Jama cuana cua ba'a: —E'e, ojaya esohui quea ja'a nee, quea bame nee nee.

*Jesosa poquia cua Nasanena huasijje*  
(Mateo 13.53-58; Macoso 6.1-6)

<sup>16</sup> Jesosa poquia cua Nasanena huasijje, oya tii'ya cua jomajo tii. Ojjaña epojja ejomishocajjiyo Jesosa dobiqúi majamajanaje Jodioja equi ejjachichaquijji yasijje esohui huohuiya. Jamajjeya dobiqúi majje oya nequisohua cua Eyacuiñajjiya etehue'yo ajji. <sup>17</sup> Oe dejjaa, etehue'yo jaahuanajjiya Jesosa quia ca cua etehue'yo. Yahuajo Isaiaja etehue'yo cua. Isaia Eyacuiñajjiya epeeji nei, etiiquiana cua; Eyacuiñajjiya esohui huohuiji cua. Jamajjeya ojaya etehue'yo e'e jojo nei cua. E'e de, Jesosaa she'a ca cua ma etehue'yo, jama ame aca cua jiquio esohui ba'a:

<sup>18</sup> “Edojjoshahua Bameya eya jjashahuabaqui mee cani. Ohuaya eya huoojea canaje jama ba'a: —¡Huohuicue ecuea esohui bame dejja aema' cuana huasijje! ¡Huohuicue dejja ejeanobiajaa cuana huasijje ecuayaqui mee'yojji! ¡Huohuicue cojjama' cuana huasijje ejjacojja ja'a meequi'yojji! ¡Huohuicue pea dejja quea yeno ba'e yasijje quea bihui eba'e meeji!”

<sup>19</sup> Huohuicue jiquio esohui: Emeshi Mese neiya ojjaña cuana quea bihui ba'e mee sa acani”.

Jamaya Isaiaa tehue ca cua yahuajo nei.

<sup>20</sup> Majoya Jesosaa etehue'yo cami ca'yonaje; quia ca o'oya cua ma dejja huasijje. Jesosa anioquea cua huohui epojji. Ojjaña oya ba ca'ya cua; ishoa'ajja ca cua ojaya esohui ehuhuiji. <sup>21</sup> Ohuaya esohui huohui ca cua jama ba'a: —E'e, ma etehue'yo huohui cani ejo. Eya cue'yonaje ma dejja cuana huasijje esohui huohuiya. Eyaya miquianaya huohui'ajjaña jama ba'a: Eyacuiñajjiya quea bihui ba'e mee caje'yo miquianaya —Jesosaa aca cua.

<sup>22</sup> Ojjaña Jesosajo quea bame mimia cua. Jjashahuabaquia cua ojjaña ojaya esohuijo. Pea cuana ca ca Jesosajo jama cua ba'a: —Jesosaja esohui quea ja'a de, oya ca ca Joseja bacua nei, Eyacuiñajjiya Bacua pojjeama —jamaya pea cuana cua Jesosa Eyacuiñajjiya Bacua pojjeamajo poso.

<sup>23</sup> Jesosaa oya cuana tecuea ca cua jama ba'a: —Miquianaya jamaya cuaje miquianajaya ejjashahuabaquijjiyo ba'a: “Ejjashicuiquijji, ¿yajjaje acuae jja miyaya mi jjashicui'ajjaquiani so'o?” ¿A'a nequiana jamaya pea'ai jjashahuabaquiani? Jama cuani ba'a: “Ecuanaaya miya shajja'ajjanaje, Jesosa. Miyaya jjaajaqui mee'yonaje Capenaomajo ba'e cuana. ¿Yajjajo acuaeya oe miquea meshijo ba'e cuana jjaajaqui mee'yo jjima aña so'o?” ¿A'a nequiana jamaya jjashahuabaquime cuani? —Jesosa cua—. <sup>24</sup> E'e jojo nei ecuea esohui, jamatii miquianaya Eyacuiñajjiya esohui huohuiji mimianijo oja meshijo ojaya huapa pojjeama cuana ca ca jjashajja'ajjaqui sa po ajja.

<sup>25</sup> —Miquianajaya eba ma etiiquiana Enia bajjani. Yahuajo nei ohuaya huohui ca cua Eyacuiñajjiya esohui. Beshahua nei pea beca peejjima shequijame ena po'yo jjima cua. Bobi tii jjima cua ena chamajojo. Ojjaña quea shoe nee nee cua. <sup>26</sup> Yahuajo quea

huiso Jodio e'ahuemano ania cua. Jamatii oya cuana ca ca jjashajja'ajjaqui sa po ajja Eniaja esohuijo, Eyacuiñajjija ehuohui'yojo. Jamajjeya Eyacuiñajjija Enia huoojea ca cua pea meshi yasijje Sinono meshi yasijje, Saneta cuiñajji yasijje, Sinono e'ahuemano que. Jomajo e'ahuemanohua shajja'ajja ca cua Eyacuiñajjija esohui. Jamajjeya Enia bobia ca cua.

<sup>27</sup> —Miquianajaya eba pea etiiquiana Eyacuiñajjija esohui huohuijji Eniseo bajjani ba'ya cua Enia nijje. Quea huiso Jodio dejja batata epo'yo jomajo ba'ya cua. Jamatii Eniseoja esohui shajja'ajja sa po ajja. Jamajjeya jjaajaqui mee'yo jjima aca cua Eyacuiñajjija. Pea meshijo ba'e Sinia meshijo oe dejja Naamani bajjani batata epo'yo nequia cua; oya shajja'ajja sa cua Eyacuiñajjija esohui. Jamajjeya oya poquia cua Eniseo que, Eniseoja jjaajaqui mee'yohua. Ohuaya shajja'ajja ca cua ojaya esohui. Jamajjeya jjaajaqui mee ca'ya cua Eyacuiñajjija. Jamaya miquianaya shajjama' cuani miquianajaya etiiquiana jayojja. Jjeya nei shajja'ajja sa po ajja Eyacuiñajjija esohui, jamajjeya jjaajaqui mee'yo jjima acaje Eyacuiñajjija —Jesosa cuanaje.

<sup>28</sup> Ojjaña cuana Jodioja equi ejjachichaquijjijo anica Jesusaja esohui shajja'ajja majje quenequene neinei'ya cua Jesosa nijje. <sup>29</sup> Jesosa iña majje jeacuayajea ca cua esecue yasijje. Majoya poqui mee ca'ya cua eyiyo hui yasijje e'iñajeatohuaajea'yojji nisho. <sup>30</sup> Jamatii Jesosa poquia cua, jjayejequinana cua ona nequi yiyesamajjeya.

*Oe dejjaja eshahua nequia cua*

*(Macoso 1.21-28)*

<sup>31</sup> Pea pojajajo Jesosa poquia cua Capenaoma huasijje, Janinea meshi yasijje. Ejomishocajji pojajajo oya dobiquia cua Jodioja equi ejjachichaquijji yasijje esohui huohuiya. <sup>32</sup> Ojjaña cuaa jama aca cua ba'a: —De, Jesusaja esohui quea ja'a nee. E'e jojo nei pojja'a Eyacuiñajjija oya huoojea canaje, de.

Jamajjeya ojaya esohui shajja'ajja sa aca cua. <sup>33</sup> Oe dejja eshahua nijje tii ania cua Eyacuiñajjija equijo. Eshahuaa oya taaa sajasaja mee ca cua Jesosa que jama ba'a: <sup>34</sup> —E'e de, ¿apiojji shai miya ecuana que cueyanaje, Jesosa? Miya cueyanaje pojja'a ecuana cuayaqui mee'yohua. Ecuanaajaya miya eba, Jesosa. Miya Nasanenajo ba'e, miya Eyacuiñajjija Bacua, miya mimishi'ama, de —jamaya eshahua cua.

<sup>35</sup> Jesusaa eshahua tecueajea ca cua jama ba'a: —¡A'a mimijji; cuayaqui'yocue jiquio dejjajo nequi! —Jesosa cua.

Majoya eshahuaa ma dejja jeabichajea mee ca cua pea cuana pejeje. Eshahua nee'ama nei nei cuayaqui'yome cua ma dejjaja eyamijo nequi. <sup>36</sup> Ojjaña jjajjasohuaquia cua; mimia cua pea cuana nijje jama ba'a: —E'e de, Jesosa quea sohui poja nee nee; ojaya esohuijo eshahua cuayaqui'yonaje, de. ¿Yajjaje shai quea sohui poja nee nee? —jamaya cua ojjaña Jesusajo. <sup>37</sup> Jamaya pea cuaa huohui ca cua ojjaña cuiñajjijo ba'e yasijje.

*Jesosaa boeca mee ca'ya cua Simohuija ano*

*(Mateo 8.14-15; Macoso 1.29-31)*

<sup>38</sup> Majoya Jesosa cuayaquia cua Jodioja equi ejjachichaquijjijo ani. Cuayaqui majje poquia cua Simohuija equi yasijje. Dobiqui majje ba ca cua Simohuija ano. Simohuija ano quea mano jaa, quea quiyo nee nee jaa ba ca cua. Simohuiya Jesosa jama huohui'ajjame aca cua ba'a: —Jesosa, ¿a'a miyaya boeca meeje'yo ecue ano, ecue huanaseja enaese?

<sup>39</sup> Jesusaa Simohuija ano jama aca cua ba'a: —E'e, jjeyahua nei mi quiyoquiyo pajaje'yo —Jesusaa aca cua.

Majoya aje epona tii quiyoquiyo pajaja'ya cua. Boecanana'ya cua. Majoya boeca'yo majje anisohua'ya cua. Anisohua'yo majje bobi cuacua meesahua ca cua epona tiya.

*Jesosaa quea huiso emanojaa cuana jjaajaqui mee ca'ya cua*

*(Mateo 8.16-17; Macoso 1.32-34)*

<sup>40</sup> Quijje pishana eshequi oquequijajo ojjaña emanojaa dojo ca cua Jesosa que jjaajaqui mee'yohua. Jesusaa emanojaa cuana emeya napa cajje jjaajaqui'ya cua. <sup>41</sup> Eshahua cuana

pea'ai cuayaqui mee ca'ya cua. Cuayaqui'yo majje eshahua cuana taaa cua jama ba'a: — Jesosa, miya e'e jojo nei Eyacuiñajjija Bacua Ejja.

Jesosa jama cua ba'a: —¡A'a enijje jama mimijji! Miquea eba eya, Eyacuiñajjija huoojea'yo ojjaña jaahuanajji. Pea cuanaja eya ba jjima, de —jamaya Jesosa cua.

*Jesosa po'ayequie nequia cua Eyacuiñajjija esohui huohuiya*  
(Macoso 1.35-39)

<sup>42</sup> Jjapojjaqui jeahuajo Jesosa oe nei poquia cua dejjama huasijje. Pea cuanaa sa'ajja ca nequia cua: —¿Aecue Jesosa?

Quijje pishana ca ca ba ca'ya cuaa cua Jesosa. Mimia cua onijje jama ba'a: —Jesosa, ¡nequicue ecuanaja cuiñajjijo! ¡A'a poquijji pea cuiñajji yasijje!

<sup>43</sup> Jesosaa jama huohuime aca cua ba'a: —Chojja, jiquio cuiñajjijo eya nequi ajja. Eyaya Eyacuiñajjija esohui cahuohuiquiahua pea cuiñajjijo ba'e cuana huasijje. Jamajoya aje oe eya ecue Chiiya huoojea canaje ojaya esohui bame bame huohuijji pea cuana huasijje. Eyaya iyaaje dejja cuana jama ba'a: “¡Jjashajja'ajja quicue oe! Eyacuiñajjiya miya quea jea nee nee acani, oya miquea Emeshi Mese nei po sa cuani; mi jaahuanajji nei nei po sa cuani. Ohuaya miya ba'e bame mee sa acani. ¡Jamajjeya onijje jjapeequicue!” — jamaya Jesosa cua. <sup>44</sup> Jamaya ohuaya esohui huohui ca ayequi nequia cua Jodioja equi ejjachichaquijji cuana huasijje, ojjaña meshi cuana huasijje.

## 5

*Jesosaja epeejiya nahuoo cuiashaja ca cua quea huiso nee nee*  
(Mateo 4.18-22; Macoso 1.16-20)

<sup>1</sup> Oe pojajajo Jesosa Jenesane bae sahua meshijajji ania cua. Pea cuana huasijje Eyacuiñajjija esohui huohui po ania cua. Quea huiso dejjaa ojaya esohui shajja'ajja sa aca cua. <sup>2</sup> Quea dejja huisojojo shajja'ajja jjima aca cua pea dejja cuaa. Jamajjeya Jesosaa pea e'anijji sa'ajja ca cua ojjañaja eshajja'ajjajji. Majoya becanejjijji bishe ai ba ca cua bae sahuajo ba'e. Ma bishe mese cuana nahuoo cuiashajajji shacua'yo po nequia cua. <sup>3</sup> Oe bishe mese Simohui bajjani cua. Jesosa nequisohuaquia cua oja bishe yasijje. Jesosaa Simohui huohui'ajja ca cua jama ba'a: —¡Quecuayijeacue ena bae pishana huasijje ojjañaja ecuea esohui eshajja'ajjajji!

—E'e —Simohui cua.

Majoya bishe quecuayijejea majje Jesosaa bishejo e'anioque aniya tii esohui huohui ca añña cua. <sup>4</sup> Jesosaa esohui huohuijeyo majje Simohui jama aca cua ba'a: —Simohui, ¡bishe yocue ena bae yiyesama huasijje! ¡Majoya jeacue nahuoo cuiashajajji!

<sup>5</sup> Simohuiya jama aca cua ba'a: —Esohui huohuijji, ecua mecajje poquinaje nahuoo cuiashajaa nisho. Chama' de, chama' nahuoo cuanaje. Eyaya ca ca shajja'ajja sa añña miquea esohui, jamajjeya eyaya jeaje ena huasijje nahuoo cuiashajajji —jamaya Simohui cua.

<sup>6</sup> Majoya yo ca cua ena bae yiyesama huasijje nahuoo cuiashajajji. Jea ca cua nahuoo cuiashajajji; quea huiso nee nee nahuoo dobiquia cua. Quecuaisajja'ajja ca cua. <sup>7</sup> Majoya Simohuiya ojaya epeeji cuana iyaa ca cua: —¡De, yacua oe yecue bishe pea, che nahuoo jjequijeasohuahuacue!

Majoya pea bishe ye ca cua; cuio ca cua beca bishe nahuohua. Beshahua nei bishe jaadobiquia cua. <sup>8</sup> Ma ba majjeya aje Simohui ecui'oshajjajo nequia cua Jesosa pejeje; jama cua ba'a: —De, ecuea Emeshi Mese, e'e jojo nei miquea esohui, eya miquea esohuijo jjashahuaba taiquinaje, de. ¡Quea huesha nequicue Jesosa, eya quea mimishi cuanaje! —jamaya Simohui cuanaje.

<sup>9</sup> Simohuiya epeeji cuana jjajjasohuaquia cua nahuoo quea huiso ohua cuiashaja cajo. O jayojja jjajjasoaquime pea'aiya cua, de. <sup>10</sup> Semeneoja bacua cuana Satiaco, Huani, Simohuiya echacosahuajji cuani pea'aiya jjajjasohuaquia cua.

Majoya Jesusaa Simohui jama aca cua ba'a: —¡A'a jjajjasoaquijji! Miquianaaya banaje ecuea esohui e'e jojo nei nahuoo cuiashajjijjo. Jjeyahua nei miquianaaya dejja quea huiso jjequije ecuea esohuijo ejjashajja'ajjaquijji, ecuea epeeji epojji —jamaya Jesosa cua.

<sup>11</sup> Majoya cuaa bishe yo ca'ya cua etaja huasijje. Aquiana cuana jeana'yo majje poquia cua Jesosa nijje.

*Jesosaa dejja jjajjae meequi ca'ya cua batata epo'yo ma dejjaa shicui jjima acani*  
(Mateo 8.1-4; Macoso 1.40-45)

<sup>12</sup> Oe pojajjo Jesosa ania cua pea cuiñajjijjo. Cue'ya cua oe dejja batata epo'yo. Ojjañaja oya boti'ama cua, o jayojja epo cuani jjejojo. Oya Jesosa ba majje ecui'oshajjajo nequia cua o bihuiajji. Jama huohui'ajjame aca cua ba'a: —Emeshi Mese nei, miya sa cuanijo, ¿a'a mo che miyaya jjajjaequi mee'yome so'o? —aca cua ohuaya.

<sup>13</sup> Majoya Jesusaa napa'ajja ca cua emeya, quea jeajojo huohui ca cua: —E'e, eyaya miya jjajjaequi meeje'yo batata epo'yo. Quea boejea po meeje'yo.

Jjajjaequi mee'yo majje chama'yo cua ojaya batata epo'yo. Quea boejea ojaya ejee po'yonaje.

<sup>14</sup> Majoya Jesusaa jama huohuime aca cua ba'a: —¡A'a oe pea cuana huohuijji! ¡Eyacuñajjija equi yasijje oe poquicue! ¡Jomajo huohuicue Eyacuñajjija esohui huohuijji: “Jjajjaequi'yonaje mo” acue! ¡Moisesija etehue'yo jama oe acue! ¡Quiaquicue beca huia', beca ijjiacajji pea'ai, equiajji Eyacuñajji bihuiajji, miya ojaya ejjajjaequi mee'yohua jjejojo! Majoya esohui huohuijji cuana jjabahuejjaquije miquea batata epo'yo chama'yo cuanajejo. Majoya ojjaña jjabahuejjaquije miya quea bojea po'yonajejo —Jesusaa aca cua.

<sup>15</sup> Jamatii quea huiso dejjaa shajja'ajja ca cua Jesusaa jjajjaequi mee ca'yani batata epo'yo. Ohuaya jjaajaqui mee ca'yani emanojaa cuana. Jamajjeya quea dejja huiso nee cueyanaje shajja'ajjaa, jjaajaqui'yohua pea'ai. <sup>16</sup> Jamatii Jesosa poqui nequia cua dejjama huasijje Eyacuñajji nijje mimiya.

*Jesosaa jjaajaqui mee ca'yonaje oe dejja jeo'ajjajaa*  
(Mateo 9.1-8; Macoso 2.1-12)

<sup>17</sup> Oe pojajjo Jesosa poquinaje onaja equi yasijje esohui huohuiya. Paniseo dejja cuana, Moisesija etehue'yo huohuijji cuana pea'ai cueyanaje Eyacuñajjija esohui shajja'ajjaa. Quea dejja huiso pea meshijo ba'e cuana cueyanaje, Janinea meshijo ba'e cuana. Jodea meshijo ba'e cuana, Jenosanenajo ba'e cuana pea'ai cueyanaje. Jesusaa Eyacuñajji nijjeya quea huiso emanojaa jjaajaqui mee ca'yonaje. <sup>18</sup> Jamajjeya pea dejjaa oe dejja jeo'ajjajaa ye ca cua equi yasijje. Dojodobiaqui sa aca cua Jesosa que. <sup>19</sup> Dobiqui meemee ajja cuana cua quea dejja huisojojo. Jamajjeya aje dojosohua ca'ya cua equi jamacoo huasijje. Huejja ca cua eyiyesama neijje. Jesosa nequi cojja nei jea'oquea ca cua. <sup>20</sup> Jesusaa ba ca cua dejja jeo'ajjajaa ojaya epeeji pea'ai. Jjashahuabaquia cua jama ba'a: —E'e de, jiquio dejja cuanaja eba eyaya jjaajaqui meeje'yo emanojaa cuana.

Jamajjeya jeo'ajjajaa huohui canaje jama ba'a: —E'e ecuea epeeji, jjeya miquea mimishi eyaya cuijeaje'yo.

<sup>21</sup> Majoya Paniseo cuana, Moisesija etehue'yo huohuijji cuana pea'ai jjashahuaba taiquia cua; Jesosa Eyacuñajjija Bacua pojjeama poso aca cua. Jama cua ba'a: —Jesosa quea tai cuani, de. Oya Eyacuñajji jama cuani. Oe nei Eyacuñajjiya mimishi cuijea caje'yo. Jesusaja ca ecuijea'yoyji pojjeama —poso aca cua.

<sup>22</sup> Jesusaja eba ojaya jjashahuabaquijji cuana. Jamajjeya huohui ca cua jama ba'a: —Miquianaya jjashahuaba taiquiani, de. <sup>23</sup> ¿Ache esohui camaja'ama so'o? Jiquio pojja'a ba'a: “¡Eyaya miquea mimishi cuijeaje'yo!” Pea esohui pojja'a: “¡Nequisohuacue, poqui'ajja socue!” <sup>24</sup> E'e de, eyaya huohuije jiquio dejja jeo'ajjajaa huasijje jama ba'a: “¡Nequisohuacue; miquea equipajaajji bebo majje poqui'yocue miquea equi yasijje!”

Pea cuana huasijje Jesosa jama cua ba'a: —¡Pea cuana shajja'ajjacue, ejjabahuejjaquijji! Eyaya ojjañaja Emeshi Mese nei cuani. Eyaya miquianajaya mimishi cuijea mee yaña ojjaña meshijo ba'eja —jamaya Jesosa cua.

<sup>25</sup> Majoya aje dejja ejjachichaqui nequijo jeo'ajjaa nequisohua'ya cua, poqui'ya cua oja equi yasijje. Oya quea bihui cua Eyacuiñajji nijje, Jesosa nijje pea'ai. <sup>26</sup> Pea cuaa Eyacuiñajji bihuia ca cua jama ba'a: —E'e, eseyaya banaje jiquio dejja jeo'ajjaa jjeja jeojeo'yoqui, mimishi cuijea ca'yonaje pea'ai, de.

Ojjaña cuana Jesosa nijje quea bihui nee nee cuanaje jeo'ajjaa jjaajaqui mee ca'yajo.

*Jesosa Nemi iyaa ca cua ojaya epeeji epojji*

*(Mateo 9.9-13; Macoso 2.13-17)*

<sup>27</sup> Majoya Jesosa equijo ani cuayaquia cua. Poquijeya ohuaya ba canaje Nemi ona emeshi meseja esohuijo sosejjesheji cuani eba'eji sosejje. Oya equi sisi e'iyajo ani ejiojji cojja sahuajo. Oya siipojji, de, jamajjeya oya ojjaña boti'ama. Jesosa oya ba majje jama aca cua ba'a: —Nemi, ¡cue'ajja; ecuea epeeji po'yocue!

<sup>28</sup> Jamajjeya Nemi nequisohua cua; ojaya aquiana jeajejanana majje poquia cua Jesosa nijje. <sup>29</sup> Quijje pishana Nemiya iyaa ca cua ojaya epeeji cuana e'ijjia'ijjiajji Jesosa nijje. Iyaa ca cua ona sosejjesheji cuana, pea dejja cuana pea'ai. <sup>30</sup> Paniseo dejja cuana Moisesija etehue'yo huohuijji cuana pea'ajja boti'ama cua ona sosejjesheji cuana. Jjashahuaba taiquia cua jama ba'a: —Quea mimishi Jesosa, o shajja'ajjajji cuana pea'ai. ¿Yajjajje acuae dejja mimishi cuana nijje ijja'ijjiani? Quea mimishi epojji pojja'a.

<sup>31</sup> Jesosaja eba ojaya ejjashahuabaquijji. Jamajjeya huohui ca cua jama ba'a: —¿A'a miquianajaya shajja'ajja jjima jiquio esohui pojja'a? Jama ba'a: “Dejja quea aja eshicuijji bajji yasijje poqui sa po ajja. Emanojaa ca eshicuijji bajji yasijje poquiani”. Jamaya miquianaya joya mimishi'ama poso jjabaquiani. Jamajjeya miquianaya shajja'ajja sa po ajja ecuea esohui. Pea cuana ca quea mimishi nee neeya shajja'ajja cani ecuea esohui. Jamajjeya eya ijja'ijjiani mimishi cuana nijje. <sup>32</sup> Eya cue'yonaje dejja mimishi iyaaa. Dejja mimishi'ama cuani poso iyaa sa po ajja ña. Dejja joya quea mimishi nee nee iyaae mimishi pajea mee'yojji.

*Bobi ijja jjima yajjijo huohui'ajja canaje cuaa*

*(Mateo 9.14-17; Macoso 2.18-22)*

<sup>33</sup> Paniseo cuaa Moisesija etehue'yo huohuijji cuaa Jesosa huohui'ajja ca cua jama ba'a: —Eseyaya etiquiana jamaya huohui cani ba'a: “¡A'a ijja'ijjiajji jiquio pojjaajo! ¡A'a jjashahuabaquijji bobijo; jjashahuabaquicue Eyacuiñajjijo nei! ¡Mimicue onijje, quea yeno pocue!” jamaya eseyaya etiquiaa huohui cani. Huani shajja'ajjajji cuaa jamaya acani pea'ai. Jesosa, mi shajja'ajjajji cuana ca ca ijja'ijjiani tii. ¿Yajjajje shai? Quea mimishi cuani pojja'a.

<sup>34</sup> Jesosaa jama aca cua ba'a: —E shajja'ajjajji cuana enijje ijja'ijjiani. Ecuea eba nei nei Eyacuiñajjija esohui e'e jojo nei. Ma esohui huohuijji cuanaja esohui ecuanajaya jjeyahua e'ajji pojjeama. Ejjahuanajji pojjaajo ojjaña quea bihui cuani, ijja'ijjiani, quea yeno pojjeama cuani. <sup>35</sup> O huanajji epo mano'yajo ojjaña quea yeno cuaje. Ma pojjaajo ijja'ijjia sa po ajja cuaje. Jjashahuabaquije'yo emano'yojo. Eya jiquio ecua yahue mano'yani jayojja cuaje. Jjeja ecuanaya quea bihui cuani ijja'ijjiani. Eya quijje pishana manojje'yo. Majoya ecuea epeeji cuana quea yeno cuaje; ma pojjaajoya bobi ijja jjima acaje —jamaya Jesosa cua.

<sup>36</sup> Majoya ohuaya ojaya esohui huohui ca cua ejjashahuabaquijji jama ba'a: —Daqui eyacua isajea ca ajja daqui chii jaca'yojji. Chojja. Miquea daqui eyacua isajea'yo majje daqui chii jaca'yojji'yajo, daqui eyacua ehuosho'yojji pojjeama. Daqui chii ejaca'yojji poqui ajja cuiñajji yasijje daqui chiiijji jjejojo.

<sup>37</sup> —Ecuea pea esohui jama cuani: Ijjiacajji jee eyacua monsa pojji acajji ena sese nequijji. Ma ena seseya ejee eyacua shejje mee cani. Majoya oe huana cani cuaa pea ena sese ejee chiijo cuiapojjea caje'yo shejje majje. <sup>38</sup> Jamajjeya huana cani cuaa ena sese monsa eyacuajo cuiapojjea jjima yajji.

<sup>39</sup> —Jamaya ecue sohui eyacua cuani. ¡Miquianaya ecuea epeeji nei po sa cuanijo shajja'ajjacue ojjaña ecue sohui! Beca cuana shajja'ajja sa po ajja ecue sohui eyacuajojo.

Jjashahuaba taiquiani, de. Etiquianaja esohui ejee echii jayojja. ¡Jamajjeya ecue sohui oe shajja'ajjacue! —jamaya Jesosa cua.

## 6

*Jesosa shajja'ajjajji cuaa anoso sejja ca cua ejomishocajji pojjajo*  
(Mateo 12.1-8; Macoso 2.23-28)

<sup>1</sup> Oe ejomishocajji pojjajo Jesosa o shajja'ajjajji cuana nijje poquia cua anoso ai nequi yiyesamajje. O shajja'ajjajji cuaa emeya sejja ca cua anoso eshe tii e'ijjajji quea shoeya jjejojo. <sup>2</sup> Majoya Paniseo cuaa Jesosa o shajja'ajjajji cuana ba ca cua. Jesosa nijje mimijajinaje jama ba'a: —¿Yajjajo acuaeya epojja ejomishocajjijo anoso sejja mee yaña so'o? Moisesija etehue'yo jamaya cuani ba'a: “¡A'a chacojji ejomishocajji pojjajo!”

<sup>3</sup> Jesosaa jama aca cua ba'a: —Miya quea sohui tai cuanaje; Eyacuiñajjija esohui nei pojjeama aña miquianaaya. Miquianaya jjashahuaba taiquiani, de. ¿A'a miquea ba jjima pojja'a ma etiquiana, emeshi mese Dabi bajjani? Jama etehue'yo yani Dabijo ba'a: Oya Eyacuiñajjija epeeji nei. Oe pojjajo oya oja epeeji cuana nijje poquije, <sup>4</sup> dobiquinana cua Eyacuiñajjija equi yasijje bobi sa'ajjaa quea shoe nee neejojjo. Ma equijo ani pahui ijja ca'yonaje; quia ca'yonaje ojaya epeeji cuana huasijje pea'ai. Eyacuiñajjija etehue'yo jama cuani ba'a: “Jiquio pahui Eyacuiñajji nijje mimianija e'ijjajjime”. Jamatii Dabi ca mimishi'ama cuanaje. Oya poquianinaje Eyacuiñajjijo chacochocho neineiya. Jamaya aca cua Dabiya. <sup>5</sup> Ecuana Dabi jayojja cuani. Eya Eyacuiñajjijo chacochocho neineiiani. Jamajjeya ecuaaya jiquio anoso ai sejjaña ejomishocajji pojjajo —Jesosa cua.

*Oe dejja meshahuama'yo epo Jesosaa jjameshahuanequi mee ca'ya cua*  
(Mateo 12.9-14; Macoso 3.1-6)

<sup>6</sup> Pea ejomishocajji pojjajo Jesosa poquia cua Jodioja equi ejjachichaquijji yasijje esohui huohuiya. Oe dejja meshahuama'yo epo ania cua jomajo. <sup>7</sup> Paniseo dejja cuana, Moisesija etehue'yo huohuijji cuana jjashahuaba taiquia cua Jesusajo jama ba'a: —Jesosa shajjama' jayojja ecuanaja esohuijjo cuani. Ohuaya chaco caje ejomishocajji pojjajo pojja'a; jjameshahuanequi mee caje'yo dejja meshahuama'yo epo. Jesosa jamaya shajjama' cuajo ecuaaya oya iñaje'yo edojjiji ejeadobiaejjiji.

<sup>8</sup> Jesusaja onajaya ejjashahuaba taiquijji eba cua. Jamajjeya ohuaya ma dejja meshahuama'yo epo ani huohui ca cua jama ba'a: —Meshahuama'yo epo, ¡nequisohuacue ojjaña ebaaji! —Jesosaa aca cua.

Jamajjeya oya nequisohua cua. <sup>9</sup> Jesosaa huohui ca cua pea cuana jama ba'a: —Eyaya miquianaya huohui'ajjaje: ¿Ache quea bame epojji ejomishocajji pojjajo? Quea bame mi ba'e mee cajji chi. Quea tai mi ba'e mee cajji chi. Ba'e mee cajji mi chi. Quecua ca'yojji mi chi.

<sup>10</sup> Jamajjeya ohuaya pea cuana huasijje ba majje ma dejja huohui ca cua jama ba'a: —¡Eme jeapisa'ajja'yosocue!

Majoya eme jeapisa ca'ya cua. <sup>11</sup> Beca cuana quea quene nee nee cua. Jama mimimimia cua ba'a: —Jesosa shajjama' nei nei cuani ecue esohuijjo. Ohuaya jjameshahuanequi mee ca'yonaje ejomishocajji pojjajo. ¿Yajja acuae seya Jesosa aje jjeyahua nei e'iñajji? —jamaya cua Jodio dejja cuana Jesosa iñajji nisho.

*Jesosaa chicha ca cua o shajja'ajjajji cuana 12 huisome*  
(Mateo 10.1-4; Macoso 3.13-19)

<sup>12</sup> Oe pojjajo Jesosa poquia cua eyiyo quibo huasijje mimiya Eyacuiñajji nijje. Ojjaña mecaje mimia cua onijje. <sup>13</sup> Eshequi jaasohuanijo, jjachichaquia cua o shajja'ajjajji cuana nijje. <sup>14</sup> Oya cuana yohua bajjani cua ba'a: Simohui, quijje Jesosaa oya pea bajjani Peno aca'ya cua; Simohuija chahua yohua bajjani ba'a: Anesi; pea o shajja'ajjajji ca yohua bajjani cua ba'a: Jacobo, Huani, Penipe, Manotonome, <sup>15</sup> Mateo, Tomasi, Apeoja bacua bajjani Satiaco; Simoni, ojaya meshi quea boti nee nee cua, <sup>16</sup> Jacoboja bacua Jode



bajjani. Pea dejja yohua bajjani cua ba'a: Jodasa Isicaniote, oya Jesusaja epeeji nisho cua. Mahuiso o shajja'ajjajji cuana e'e jojo nei cua.

*Jesosaa quea dejja huiso huasijje Eyacuiñajji esohui huohui ca cua*  
(Mateo 4.23-25)

<sup>17</sup> Majoya Jesosa o shajja'ajjajji cuana nijje eyiyojo ani jaoque o'oya cua. Jaoque majje nequi'ya cua meshi bame bamejo esohui huohuiya. Quea huiso Jesusaja pea e shajja'ajjajji cuana jomajo ania cua. Quea dejja huiso cueya cua, Jodea meshijo ba'e cuana, Jenosanenajo ba'e cuana, Tinojo ba'e cuana, Sinonojo ba'e cuana pea'ai. Quea huesha ba'e cuana cueya cua Jesosa shajja'ajjaa. <sup>18</sup> Ojjaña shajja'ajja'yo sa aca cua, jjaajaqui'yo sa cua pea'ai. Pea cuanajo nequi eshahua cuayaqui mee ca'ya cua Jesusaa. <sup>19</sup> Ojjaña Jesosa napa sa aca cua pea jjaajaqui mee'yojjiyojo. Jesusaa emeya napa cajje jjaajaqui ca'yonaje cuana.

*Jesosaja esohuiya dejja cuana quea bihui po mee caje beca cuana ca quea yeno po mee caje*  
(Mateo 5.1-12)

<sup>20</sup> Majoya Jesusaa ba majje o shajja'ajjajji cuana huohui ca cua jama ba'a: —Beca cuana jjashahuabaquiani jama ba'a: “E'e de, eya quea mimishi nee. Eyacuiñajjiya ecuea mimishi cacuijea ca'yahua”. Jamaya jjashahuabaquianijo Eyacuiñajjiya oya ba'e tiitii mee caje'yo onijje eyajo. ¡Oya cuana quea bihui nee capo'yahua!

<sup>21</sup> —Ojaya epeeji cuana Eyacuiñajjiya esohui jayojja jama a sa neinei cuanijo Eyacuiñajjiya oya cuana quea jaji nee nee ba'e meesahua caje'yo. ¡Quea bihui nee capo'yahua oya cuana!

—Oja epeeji cuanaja mimishijo pa neineianijo Eyacuiñajjiya quea bihui nee po mee caje'yo mimishi cuijea ca'yajje.

<sup>22</sup> —E'e, ¡miquianaya ecuea epeeji cuana, quea bihui nee nee pocue! Dejja cuana miquiana nijje mimijajje, miquianaya dejja cuaa cuia caje pea'ai, sijje minijje cuaje pea'ai. Jamatii, miquianaya ecuea epeeji cuanijo, dejja cuaa mimishi po mee'yo sa acani. Eyacuiñajjiya ca ca miquianaya quea bihui nee po mee caje'yo. <sup>23</sup> Jamajjeya ijjeyahua nei quea bihui nee nee pocue! Eyacuiñajjiya miquianaya eyajo quia caje'yo miquianajaya aquiana quea bame nee nee, quea huiso nee nee. E'e, Eyacuiñajjiya esohui huohuijji yahuajo nei nei ba'ya cua jamaya aca cua mimishi cuaa; napa ca cua pea'ai. Jamajjeya jona jayojja jama pocue, quea bei!

<sup>24</sup> —Joyaya nequiana oe quea aquiana huiso jjejojo, Eyacuiñajjiyo jjashahuabaqui jjima. ¡Bacue! ¡Jjeya miquianaya quea bihui nee nee jbaquicue! Majoya aje mi oe quijje quea yeno nee nee cuaje'yo cuaqui yasijje poqui majje mano'yo majje.

<sup>25</sup> —E'e de, ¡joyaya nequiana oe bobijo jjashahuabaquiani jjejojo Eyacuiñajjiyo jjashahuabaqui ajja bacue! ¡Jjeya miquianaya quea jjejojo quea bei jbaquicue! Majoya aje mi oe quijje quea shoe nee nee, quea yeno nee nee cuaje'yo. Bobima' nei cuaje cuaqui yasijje poqui'yo majje.

—¡Joyaya mi oe quea bihui jjejojo soa ani jbaquicue! Eyacuiñajjiyo jjashahuabaqui ajja, quijje pa neineije'yo; quea yeno nee nee cuaje'yo cuaqui yasijje poqui'yo majje.

<sup>26</sup> —¡A'a oe esohui huohuijji nisho pojji, dejja quea bihui epo meeji nisho pojji! Ma ecua esohui huohuijji nisho etiquiaa quea bihui po mee ca cua jama. Jama po majjeya aje mi oe quijje cuaqui yasijje poqui'yo majje quea yeno nee nee cuaje'yo.

*Quea boti nee a'yocue dejja cuana minijje quea quene cuani*  
(Mateo 5.38-48; 7.12)

<sup>27</sup> Jesusaa jama aca cua ba'a: —¡Jashajja'ajjaquicue oe! ¡A'a oe ona boti'ama pojji!  
<sup>28</sup> ¡Quea boti a'yocue dejja minijje quea quene cuani! ¡Joya miquiana nijje mimijajianijo mimicue Eyacuiñajji nijje ojo! <sup>29</sup> ¡Onaa shemo cuia cajje shemo mijipeajje cuia mee o'oyacue! ¡Onaa miquianajaya daqui jjequisejjajea cajo dojo mee'yocue miquianajaya pea daqui pea'ai! <sup>30</sup> Onaa: “¡Aquiana che mo quiacue!” acajje, ¡quiacueya oe! Onaa miquianajaya aquiana sii cajo ¡a'a huohui'ajja'yojji! <sup>31</sup> Miquianaya mimiani pea cuana

nijje jama ba'a: “¡Enijje quea bame nee po tiitii'yocue!” ¡Jamajjeya miqúanaya pea cuana nijje quea bame nee po tiitii'yocue!

<sup>32</sup>—Joya miqúanaya quea jea ajji cuani miqúiaaya quea jea nee aña pea'ai; miqúanaya nijje quea quene cuani ca ca miqúanajaya boti'ama. Dejjá mimishi cuana aje oe jamaya cuani pea'ai. ¡A'a dejjá mimishi jayojjaya pojji! ¡Ojjaña quea jea nee nee acue! <sup>33</sup> Miqúanaya miqúanajaya epeeji quea bame aña, pea cuana caya ca oe boti'ama aña. Dejjá mimishi cuana aje oe jamaya acani pea'ai, de. ¡A'a dejjá mimishi jayojja pojji; ojjaña quea bame acue! <sup>34</sup> Miqúanaya joya jjaquiaqui'yojji yasijje quiaña. Joya jjaquiaqui'yo ajja huasijje quia jjima aña. Dejjá mimishi cuana aje oe jamaya cuani pea'ai. ¡A'a dejjá mimishi jayojja pojji! ¡A'a quea dejjá tai pojji! ¡A'a quea nishehui pojji! <sup>35</sup> ¡Miqúanaya miqúanajaya epeeji pojjeama cuana quea jea nee a'yocue! Jamajjeya quea bame ba'eje'yo. ¡Pea cuana miqúanajaya aquiana dojo sa cuanijo oe pojji cahuime dojo meecue! ¡Miqúanaya a'a jjashahuabaquiji miqúanajaya aquianajo, miqúanajaya bejjojo! ¡Eyacuiñajji o jashahuabaquicue! Majoya miqúanaya ojaya epeeji nei cuaje'yo. Eyacuiñajjiya ojjaña cuanaya quea jea nee nee acani. Ojjaña dejjá cuana, ojaya epeeji cuana, ojaya epeeji pojjeama cuanaya quea jea nee acani, de. ¡Jamaya oe pocue! <sup>36</sup> E'e de, esejaya Chii eyajo quea bame nee ani, ojjaña cuana Eyacuiñajjiya quea jea nee nee acani. ¡Eyacuiñajji jayojjaya jama po tiitii'acue!

*¡A'a pea cuana niñebajji!*

*(Mateo 7.1-5)*

<sup>37</sup> Jesúsaa jama aca cua ba'a: —¡A'a pea niñebajji! Jamaya Eyacuiñajji boti'ama. Miqúanaya pea cuana niñebajji cuanijo, Eyacuiñajjiya miqúanaya tecuea caje'yo pea'ai. Miqúanaya pea nijje jjabei'yojjo Eyacuiñajjiya miqúanajaya mimishi cuijea caje'yo. <sup>38</sup> Miqúanaya pea cuana huasijje quea huiso nee quiajo, jamaya quea huiso nee nee miqúanaya Eyacuiñajjiya oya huisoajjaya quia caje'yo pea'ai. Quea huiso nee nee cuaje, de. Oe pojji quiajo ca ca miqúanaya Eyacuiñajjiya oya huisoajjaya quia caje'yo —jamaya Jesúsaa cua.

<sup>39</sup> Jesúsaa pea esohui ejjashahuabaqui meeji jama aca cua ba'a: —E'e de, ¿a'a acuae oe cojjamaa pea cojjama' me pejejea majje dojo caje so'o? Cho, eme pejejeajji pojjeama, o pea'ai oquejaquije mei jjani yasijje, de. Cojjama' jayojja dejjá mimishi pea dejjá mimishiya dojo cajje cuaqui yasijje poquije'yo onijje tii. ¡A'a cojjama' jayojja pojji! <sup>40</sup> Oe esohui huohuijji quea ja'a nee nee cuani. Ohua esohui huohui coo canijo, o shajja'ajjajji cuana quea ja'a pishana cuani. Jamatii ma eshajja'ajjajji quea ja'a cuaje ojaya esohui huohuijji shajja'ajja neinei majje. Jamajjeya ¡ecuea esohui shajja'ajja neineicue quea ja'a epojji! Jamajjeya miqúanaya quea ja'a nee huohuije pea cuana huasijje.

<sup>41</sup> —Jamajjeya jashahuaba bamebamequicue; a'a pea niñebajji! Jamatii miqúanajaya epeeji cuana quea mimishi cuajo, niñebaña. ¡A'a jamaya pojji! ¡Miyaya ebionei miquea mimishi cuana pajea'yocue! ¡Majoya miyaya pea cuana mimishi pajea meesahua'yocue! <sup>42</sup> Oya jayojja yani miquea epeejiya ecojjajo shabo mimishi jayojja. Jamajjeya miya jashahuabaquiani miquea epeejiya ecojjajo nequi shabojo cuaya mee'yo sa aña jama ba'a: “Epeeji, shabo biso neiya mi cojja dobi canaje. Ache ba'ajja; cahuijji'ajja'yosahua”. ¿A'a acuae jja oe miya jjabaquiani acui cojjajji so'o? ¡Ebionei miquea cojjajo nequi acui huijji'yo socue! ¡Majoya miquea epeejiya shabo huijji'yocue! —jamaya Jesúsaa cua.

*¡Acui quea bame nee jayojja jama pocue!*

*(Mateo 7.17-20; 12.34-35)*

<sup>43</sup> Jesúsaa jama aca cua ba'a: —Oe acui quea bame, ojaya ejjajja quea bame pea'ai. Pea acui quea tai, jamajjeya ojaya ejjajja quea tai cuani pea'ai. <sup>44</sup> Oe acui ejjajja nei cuani, pea jjajjame pojjeama cuani. <sup>45</sup> ¡Miqúanaya oe jashahuabaquicue, acui quea bame nee jayojja jama pocue! ¡Quea bame nee jashahuabaquicue Eyacuiñajji! Majoya miqúanaya quea bame ba'eje'yo. ¡A'a jashahuaba taiquiji oe acui quea tai jayojja! Miqúanaya jashahuaba taiquiajo miqúanajaya esohui quea tai cuaje'yo ma acuijjajja

quea tai jayojjaya. ¡Jamatii jjashahuabaquicue Eyacuiñajjijo, ojaya esohuijo! ¡Quea bame ba'e tiitucue pea dejja cuana nijje! —jamaya Jesosa cua.

*Oe dejja jjashajja'ajja neinei quia cua pea jjashajja'ajjaqui ajja cua*  
(Mateo 7.24-27)

<sup>46</sup> Jesosaa pea esohui huohui ca cua jama ba'a: —Miquianaaya eya huohui nishoaña jama ba'a: “Emeshi Mese, eya shajja'ajja sa cuani miquea esohui”. Cho, ecuea esohuijo jjashajja'ajjaqui sa po ajja miquianaya —Jesosa cua—. <sup>47</sup> Eyaya miquianaya huohuije beca dejjajo jama ba'a: Oe dejjaa equi iya bamebame canaje jayojja jama miquianaya jjashajja'ajja neineiquiani ecue esohuijo. Dejja equi iya canaje quea bame nee nee. <sup>48</sup> Ohuaya tio canaje jjani emaco huasijje. Quea doe nee tio canaje. Majoya quea ca'a nee nee nequinaje equi yamajjana. Jama acanaje ojaya equi. Equi iya majje ena quea quemo cueyanaje, beni quea quemo cueyanaje pea'ai. Cui jjayehuequi'yajo jaabichaqui'yo jjima equi cuanaje. Quea ca'a iyame jojoya mi jaabichaqui'yonaje —Jesosa cua—. Jamaya ecuea esohui shajja'ajja majje miquianaya quea ca'a cuaje ma equi jayojjaya.

<sup>49</sup> —Beca cuana jjashajja'ajjaqui ajja ecuea esohuijo jiquio ecua oe dejjaa iya tai canaje ojaya equi. Cui sahuajo ba'e'yonaje. Ohuaya tio canaje jjani sisi; doe'ama. Ena quea quemo cuajo, beni quea quemo cuajo, cui jjayehuequi'yajo ojaya equi jaabichaqui'yonaje; ca'a'ama equi cuanaje, de. Jamaya miquianaya ca'a'ama cuaje, ecuea esohuijo jjashajja'ajjaqui ajjajo —jamaya Jesosa cua.

## 7

*Jesosaa jjaajaqui mee ca ya'cua esohuinano meseja echacojji*  
(Mateo 8.5-13)

<sup>1</sup> Jesosa dejja cuana nijje mimijeyo majje poquia cua Capenaoma cuiñajji yasijje. Oe Shomano esohuinano mese jomajo ba'ya cua. <sup>2</sup> Ojo chacochoani emanojaa cua. Beshahua nei poquijeyoa cua, de. Ma ojo chacochoani quea bame chacocho ania cua. Jamajjeya esohuinano meseya huaquia mee'yo sa aca cua. <sup>3</sup> Ohuaya shajja'ajja ca cua Jesosa yani, Jesosaa pea cuana jjaajaqui mee ca'yani. Jamajjeya esohuinano mese jama jjashahuabaquime cua ba'a: —¿A'a Jesosaa ejo chacochoani jjaajaqui mee caje'yo? Caba'ajja.

Jamajjeya ohuaya huoojea ca cua Jodio etii cuana Jesosa huohui'ajjaa. Oya jama cua ba'a: —¡Poquicue; Jesosa huohui'ajjaquicue jiquiacua ecuejji! “¡Jjaajaqui meehua'yocue ejo chacochoani!” acue —jamaya cua esohuinano mese.

<sup>4</sup> Majoya aje Jodio etii cuana poquia cua Jesosa huohui'ajjaa. Huohui'ajja cañaquia cua esohuinano meseja esohui jama ba'a: —Jesosa, esohuinano meseya ecua mi que huoojea canaje, jojo chacochoani jjaajaqui mee'yo'ocue pa! Esohuinano meseya aje oe quea bame nee nee nequi. <sup>5</sup> Jodio dejja cuana ohuaya quea bame nee ba'e meesahua cani. Ojaya ecuanaya quea boti nee nee, de. Ohuaya iya mee canaje equi ejjachichaquijji ecuanaja meshijo, de —jamaya cua Jodio etii cuana.

<sup>6</sup> Majoya aje Jesosa jama cua ba'a: —E'e, cua'a.

Majoya aje poquia cua esohuinano meseja equi yasijje. Equi chipi nei cuajo esohuinano meseya huoojea ca cua ojaya epeeji cuana Jesosa huohuiya. Jama aca cua ba'a: —Jesosa, ja'a miya cuejji! Miquea esohui quea poja nee nee. Jamajjeya jejo chacochoani miya miquea esohuijo jjaajaqui mee'yo'ocue! Eya esohuinano mese, jamajjeya miya pojja'a dobiqui sa po ajja ecuea equi yasijje. Eya jjashahuabaquiani miya pojja'a enijje mimi sa po ajja. <sup>7</sup> Jamajjeya eyaya ecuea epeeji huoojeanaje minijje mimiya. Jomajo mimicue miquea esohui nei jama ba'a: “¡Ojo chacochoani jjaajaqui'yo'ocue!” Majoya jiquiojo ejo chacochoani jjaajaquije'yo. <sup>8</sup> Jamaya ecuea emeshi meseya huohui cajje eya poquije'yo. Ecuea esohuinano cuana eya huoojeajje poquije. Pea esohuinano eyaya iyaajje cueje. Ecuea echacojji eyaya chaco meeajje chaco caje, de. Jamaya miya huohui'ajje ecuea echacojji jjaajaquije'yo —jamaya esohuinano mese huoojeameya aca cua Jesosa que.

Jamajjeya ma ohua huoojea ca cua poquia cua, huohui cañaquia cua Jesosa esohuinano meseja esohuijo.

<sup>9</sup> Jesosaa shajja'ajja ca cua. Quea bihui cua esohuinano meseja esohuijo. Jesosaa huohui ca cua pea cuana onijje nequi, jama ba'a: —De, ma esohuinano meseja eba eyaya jiquiojo tii ojo chacochoani jjaajaqui mee'yo ecuea esohuijo tiya. Jodio dejja cuana jjashahuabaqui neinei jjima oya jayojja. Oya ca ca oe jjapee neineiquinaje Eyacuiñajji nijje —jamaya Jesosa cua.

<sup>10</sup> Majoya esohuinano meseja epeeji cuana poquia cua oja equi yasijje. Majoya aje dobiqui majje ejjaajaqui'yo ani ba cañaqui'ya cua, Jesosaja esohuijo jjaajaqui'yo ani: —¡E'e de, e'e jojo nei ojaya esohui quea poja nee nee, de! —jamaya cuana cua.

*Jesosaa shequi mee ca'ya cua e'ahuemano'yoja ebacua ejja emano'yojaa*

<sup>11</sup> Quijje pishana Jesosa poquia cua Naini yasijje. O shajja'ajjajji cuana, pea cuana pea'ai poquia cua onijje. Quea huiso poquia cua, de. <sup>12</sup> Jesosaa Naini yasijje poquijeya ba ca cua pea dejja cuaa ebacua ejja emano'yo dojo caje ohuajaea. Enaese pa neinei poquia cua. Oya quea yeno nee nee cua oe nei nei oja bacuajojo, e'ahuemano'yo jjejojya. Quea dejja huiso nee onijje cueya cua ebacua ohuajea sahuua. <sup>13</sup> E'ahuemano'yohua Jesosa quea yeno po mee ca cua, de.

Jesosaa majoya oya jama aca cua ba'a: —¡A'a pajji!

Ohuaya shequi mee'yo sa aca cua oja bacua ejja. <sup>14</sup> Majoya aje Jesosa poquia cua ebacua ejja emano'yojaa huasijje. Majoya aje ma dejja cuana nequiñaquia cua Jesosa cueje ba majje. Jesosaa emano dojojji napa ca cua. Majoya Jesosaa emano'yojaa jama mimiamie aca cua ba'a: —Esho'i, ¡shequi'yocue jjeyahua nei!

<sup>15</sup> Majoya aje ma emano'yojaa anisohua'ya cua. Mimi'ya cua, de. Jesosaa oya jama huohuime aca cua ba'a: —¡Poqui'yocue mique nae nijje!

<sup>16</sup> Ojjaña aje majoya jama cua ba'a: —¡De, esho'i emano neinei'yojaa shequi'yonaje yaña, de! Eyacuiñajjiya oya shequi mee ca'yonaje, de. Ohuaya Jesosa huoojea canaje ecuana huasijje. E'e, oya quea sohui poja nee nee, quea bihui nee nee po mee ca'yonaje ecuanaya. E'e de, e'e jojo nei Jesosa, oya cue'yonaje ecuana ba'e meesahuua —jamaya ojjaña cuana cua.

<sup>17</sup> Jodea meshijo ba'e cuana, quea huesha ba'e cuana, pea meshijo ba'e cuana pea'ai Jesosajo huohui cañaquia cuaa cua.

*Huaniya o shajja'ajjajji cuana Jesosa que huoojea ca cua*  
(Mateo 11.2-19)

<sup>18</sup> Huani Eyacuiñajji esohui huohuijijoje ejeanobiajaa cua. Jamatii Huani ejeanobiajaa o shajja'ajjajji cuaa Jesosaja esohui huohuiqui ca cua Huani que. <sup>19</sup> Huaniya ma esohui shajja'ajja majje beca o shajja'ajjajji cuana huoojea ca cua Jesosa huohui'ajjaa. Jama huohuime aca cua ba'a: —Huohui'ajjacue Jesosa jama ba'a: “Jesosa, Eyacuiñajjiya ojjaña jaahuanajji huoojea caje'yo ecuana huasijje. ¿A'a miya ma ecuana jaahuanajji cuaniya? E'e pojja'a, pea pojja'a ecuaaya ishoa'ajjaje” jamaya acue —Huaniya aca cua.

<sup>20-21</sup> Jamajjeya Huani shajja'ajjajji cuana poquia cua Jesosa huohui'ajjaa. Jesosa ba cañaquia cua emanojaa cuana jjaajaqui mee'yo cuequi. Eshahua cuana cuaya meequi'yo cuequi. Cojjama' cuana jjacojjaja'acui mee'yo cuequi. Majoya oya cuaa huohui'ajja ca cua Huaniya esohuijo.

<sup>22</sup> Jesosaa jama saja'a ca cua ba'a: —E'e, ¡Huani oe huohuiquicue joya miquiaaya shajja'ajjanaje, joya miquiaaya banaje pea'ai! E'e, cojjama' cuana jjacojjaja'acui mee'y-onaje; jio'ajja cuana jeo mee'yonaje; dejja batata epo'yo cuana jjajaequi mee'yonaje; shajjaqueba jjashajjaja'acui mee'yonaje; emano'yo cuana shequi mee'yonaje. Esohui quea bame nee huohuinaje ojjaña dejja quea yeno huasijje Eyacuiñajji epeeji epo'yojji.

<sup>23</sup> Jamajjeya ¡huohuiquicue Huani que! Jama huohuiquime acue ba'a: ¡Jjapee tiitiquicue Eyacuiñajji nijje, enijje pea'ai; quea ja'a nee ba'ecue! Jama miya ajje quea bihui po tiitiije'yo —jamaya Jesosa cua.

<sup>24</sup> Majoya aje Huani shajja'ajjajji cuana poqui o'oyanaje Huani que. Majoya o poqui'yajo, Jesosa pea cuana nijje Huanijo mimia cua: —E'e de, yahuajo Huani quimajo aninaje. Miquianaya aje majoya o que poquinaje. ¿A'ya acuae jomajo banaje? ¿A'ya acuae miquianaya jjashahuabaquinaje Huanijo? ¿A'a jjashahuabaquinaje Huani esohui huohuijji quea ja'a pojjeama? Chojja. <sup>25</sup> Miquianaaya ¿ae banaje Huani que poqui majje? ¿A'a dejjaja daqui quea nahue nee ehuosho ba'e banaje? Chojja, dejjaa daqui quea nahue nee huosho cani equi quea quemojo ba'eya. <sup>26</sup> ¿Achajja acuae Huani ba'enaje? ¿A'a miya jjashahuabaquinaje Huani Eyacuiñajjija esohui huohuijji nei nei? E'e, de. Jamatii Eyacuiñajjija pea esohui huohuijjiya quea ja'a pishana huohui ca cua. Huaniya ca ca quea ja'a nee nee huohui canaje. <sup>27</sup> Yahuajo nei Eyacuiñajjija esohui etehue'yo Huanijo jama cua ba'a:

“Jiquio dejja ecuea esohui huohuijji nei cuani. Jamaya eya sa cuani. Eyaya oya huoojeaje ebionei mi hui dojojji. Ohuaya dejja cuana huasijje huohui caje miquea ecuejjiijo”. Jamaya yahuajo nei nei Eyacuiñajjija ojjaña ba mee canaje Huaniya e cue jjimahuajo, ejo jjabahuejjaqui mee ca'yonaje cuana. <sup>28</sup> Ecuea pea ehuohui a'a pajea'yoyji jama ba'a: Huani ma ona besameejji cua oe dejjaja quea bame nee nee pea cuana jayojja jama pojjeama. Jamatii quiije eya Emeshi Mese nei cuaje, ojjaña ecuea epeeji Huani jayojja jama cuaje'yo quea bame nee nee —jamaya Jesosa cua.

<sup>29</sup> Ojjaña dejja Huaniya besamee Jesosaja esohui shajja'ajja majje quea bihui nee nee cua Eyacuiñajji nijje. Ojjaña dejja quea mimishi nee nee cuani cuaaya Eyacuiñajjija esohui shajja'ajja majje mimishi pajea ca'ya cua. Jamajjeya oya cuana Huaniya ebesamee cua. <sup>30</sup> Paniseo dejja cuaa Moisesija etehue'yo huohuijji cuaa pea'ai ca ca Huaniya esohui shajja'ajja jjima aca cua. Eyacuiñajjijo quea bihui pojjeama cua, Eyacuiñajjija epeeji nei po sa po ajja jjejojo. Jamajjeya Huani que enajje pohua poqui jjima cua, mimishi pajea'yo sa po ajja jjejojo.

<sup>31</sup> Majoya aje Jesosa jama cua ba'a: —Dejja cuana mimishi pajea'yo sa po ajja ¿a'ya jayojja cuani? <sup>32</sup> Joya ecua esho'iquiana quebanei jayojja jama cuani. Esho'i cuana quebanei po majje joya pea que taaani jama cuaje pea nijje jjapeequi sa po ajja jjejojo. Jama jjamimihue'equime cuani ba'a: “Eyaya dehue miaña mi quea bihui epojji nisho. Jamatii miya quea bihui po sa po ajja. Majoya eya pa nishoani, emano'yojo pa ani jayojjaya mi quea bihui epojji nisho. Jamatii miya pa nisho ajja. Jamajjeya ecuea ba jjima eyaya miya achajja quea bihui po meeme aje. Miya niñepoqui jayojja cuani, jamajjeya quebanei po ajja” jamaya esho'iquiana quebanei cuani —Jesosa cua—. E'e de, jamaya dejja mimishi cuana jjeya cuani ma esho'iquiana jayojjaya. <sup>33</sup> Yahuajo pishana Huani cue'yonaje. Eyacuiñajji nijje mimi tiitiianiyo bobi ijia ajja cuanaje. Acuijjajja na sese ishi jjima aca cua. Ojjaña cuaa ca ca huohui canaje Huanijo jama ba'a: “Huani ca jja ca niñepoqui nei”. <sup>34</sup> Eya ca jja ca ijia'ijjiani dejja mimishi cuana nijje. Oya cuana nijje mimimimiani. Jamatii beca cuana ejo siajje cuani jama ba'a: “¡Bacue jiquio dejja Jesosa! Dejja mimishi cuana nijje jjapeequiani; bejjo chichajji cuana nijje pea'ai jjapeequiani, de”. Jamajjeya beca cuana ca ca jjapeequi sa po ajja enijje, Huani nijje pea'ai. Ecuea ba jjima achajja oya cuana eyaya quea bihui po meeme aje. Oya cuana esho'iquiana quebanei po ani jayojja cuani, de. Niñepoqui jayojja cuani. Oya cuana mimijajiani Huani nijje, enijje pea'ai. <sup>35</sup> Eyacuiñajjija esohui e'e jojo nei. Jamaya ojjaña cuana oja esohuiyo jjashajja'ajjaqui majje quea ja'a po mee caje —jamaya Jesosa cua.

*Oe Paniseo dejjaja equi yasijje Jesosa anicuaa poquia cua*

<sup>36</sup> Oe Paniseo dejja yohua bajjani cua ba'a: Simoni. Ohuaya Jesosa e'ijjia'ijjiajji iyaa ca cua. Jamajjeya oja equi yasijje poquia cua ijia'ijjiaa. <sup>37</sup> Jesosa ijia'ijjia anijo oe epona dobiquia cua equi yasijjeya Jesosa baa. Ma epona quea mimishi ba'ya cua. Tahuoojo shiyeshiye ye ca cua, Jesosa ba majje. <sup>38</sup> Ojaya mimishijo quea yeno nee nee cua. Pa neinei ania cua. Ecojja naa shacua ca aña cua Jesosaja ejiojji. Ojaya esao ao'aohua cui ca aña cua. Jesosa quea jeajojo jiojji tojjo ca cua. Jesosaja ejiojji tojjo majje shiyeshiyeya jiojji sha ca cua.

<sup>39</sup> Ma Simoniya epona ba ca cua; jjashahuaba taiquia cua jama ba'a: —Jesosa Eyacuiñajjija esohui huohuiji nei pojjeama pojja'a. Jamajjeya jiquio epona quea mimishi nee nee ohuaya mi huoojea cani. Eyacuiñajjija esohui huohuiji nei nijje mimishi cuana jjanequichipiqui ajja —jamaya e'acaje'yo poso Simoniya aca cua.

<sup>40</sup> Jesosaja eba Simoniya ejjashahuaba taiquiji. Majoya jama huohuime Jesosaa aca cua ba'a: —Simoni, ecuea esohui mi que ehuohuiji yani.

—¡Ocue mo huohui'ajja socue! —Simoni cua.

<sup>41</sup> Jamajjeya Jesosaa jama huohuime aca cua ba'a: —Oe dejja quea bejjo huiso nee ba'enaje. Majoya aje becanajjiji pea'ai dejja poquinaje o que bejjo sosema' jjesheya, quiije esosequia'yojji nisho. Oe dejjaa iye huiso jjeshe canaje 500. Pea dejjaa ca jjeshe canaje ba'a oe pojji nei 50. <sup>42</sup> Ma dejja cuanaja oya sosequia'yo jjima tii cuanaje. Jamajjeya ma dejja quea bejjo huiso jjapeequi sa cuanaje bejjo jjesheji cuanaje cuana nijje. Jamajjeya ejjesheji epo cuanaja ebajjani cuijea ca'yonaje jamatii bejjo sosequia'yo jjimajo tiya. Majoya oya cuana quea bihui po'yonaje bajjani cuijea ca'yajje. E'e, ¿ache dejja quea bihui nee nee cuanaje oja bejjo sosema'yo tiijojo? Ma dejja quea huiso, 500 sosequia jjima pojja'a. Pea dejja iye huiso, 50 sosequia jjima pojja'a —jamaya huohui'ajja ca cua Jesosaa.

<sup>43</sup> Simoni jama cua ba'a: —Ma dejja quea huiso bejjo quia canaje, 500.

Jesosaa jama aca cua ba'a: —E'e de, e'e jojo nei. <sup>44</sup> Jamaya jiquio epona eya mimishi cuijea'yajje quea bihui nee cuani. Eya dobiquinaje miquea equi yasijje. Miya ca mi ca oe ecuea epeeji pojjeama cuanaje, Simoni. Jamatii beca cuana cueanijo equi meseya ojaya epeeji cuana jiojji topo cani. Jamaya miquea ajjima. Ma eponaa ca ca ecuea ejiojji topo canaje oja ecojja naa. Oja sao ao'aohua cui ca'yonaje. <sup>45</sup> E'e, miyaya ecuea epeeji pojjeama jjejojo mi shemo tojjonaje. Jiquio eponaa ca mo ca ejiojji tojjo tiitii canaje ojaya quea jea nee neejojo. <sup>46</sup> Miyaya eya sha jjima anaje shiyeshiyejo ejjapeequiji. Jiquio eponaa ca ca ecue ejiojji sha canaje shiyeshiyeya ecuea epeeji nei sa cuaniya jjejojo. <sup>47</sup> E'e, jamajjeya eyaya miya huohuiaña jama ba'a: Ma epona jjapeequi sa cuanaje Eyacuiñajji nijje. Jamajjeya aje oe ohuaya ecuea ejiojji topo canaje, quea shiye po mee canaje pea'ai. Ma epona quea mimishi nee nee cuanaje. Jamajjeya eyaya, Eyacuiñajjiya pea'ai oya mimishi cuijea'yonaje quea jea nee neejojo —jamaya Jesosa cua.

<sup>48</sup> Majoya Jesosaa epona jama huohuime aca cua ba'a: —Miquea mimishi cuana eyaya cuijea'yonaje jjeya nei.

<sup>49</sup> Pea dejja cuaa equijo ijia'ijia aniya Jesosajo jama huohuime aca cua ba'a: De, ¿a'ya acuae jja che mimishi cuijea'yojji pome so'o?

<sup>50</sup> Jesosaja eba cuanaje ma dejja cuana mimi ca'ani. Jamajjeya ohuaya epona huohui ca cua jama ba'a: —¡Miquea mimishi cuijea'yonaje, jamajjeya quea bame ba'e'yocue mimishi'ama! —jamaya Jesosa cua.

## 8

### *Epona cuaa Jesosa yohua sahua ca cua*

<sup>1</sup> Majoya aje Jesosa pea cuiñajji yasijje poquia cua Eyacuiñajjija esohui huohuiya. O shajja'ajjaji nei cuana, 12 poquia cua onijje. <sup>2-3</sup> Quea huiso epona cuana poquia cua Jesosa nijje, ma ohuaya yahuajo jjaajaqui mee ca'yonaje, edosiquiana cuaya meequi ca'yonaje pea'ai. Oe epona Sosana bajjani; pea epona Mania Madanena bajjani cua. Maniaja 7 edosiquiana cuana Jesosaa cuaya meequi ca'ya cua. Pea epona Huana bajjani cua. Oya Cosaja ehuanase cua. Cosa emeshi meseja, Enode Antipaja echacojji cuana jaahuanajji cua. Quea huiso epona cuaa bobi jjeshe ca cua oja bejjojo Jesosa bobiajji, o shajja'ajjaji cuani cuana bobiajji pea'ai.

### *Eso' jeaajaji*

*(Mateo 13.1-23; Macoso 4.1-20)*

<sup>4</sup> Quea dejja huiso nee nee poquia cua Jesosa shajja'ajjaa. Jjachichaquia cua Jesosa pejeje. Jesosaa huohui ca cua jiquio esohui. Jama huohuime aca cua ba'a: <sup>5</sup> —Oe dejja

poquinaje que yasijje eso' jeaajaa. Oe pojji eso' jeaaja canaje ejiojji yasijje. Cuichojji cuaa ma eso' ijjia ca'yonaje. <sup>6</sup> Pea eso' jeaaja canaje meshi mei biajje ani yasijje. Majoya aje jeaaja cajje pohua'ajja'yonaje. Majoya aje pohua'ajja'yo majje shocana'yonaje. <sup>7</sup> Pea eso' jeaaja cajje oquequinaje acuisha yiye yasijje. Majoya aje jeaaja cajje pohua'yonaje. Majoya aje pohua'yo majje acuishaa mano mee ca'yonaje. <sup>8</sup> Pea eso' ca ca meshi bame bame yasijje jeaaja canaje. Majoya aje jeaaja cajje tii'yonaje. Majoya aje tii'yo majje quea jjajja huiso nee nee cuanaje, de. E'e, mahuiso. ¡Shajja'ajjacue jiquio esohui; a'a shajjama' jayojja pojji! —jamaya Jesosa cua.

<sup>9</sup> Quijje o shajja'ajjajji cuana poquia cua Jesosa huohua'ajjaa. Jama huohua'ajjame aca cua ba'a: —¿Yajjajje ma esohui quea quehua cuanaje ecuanaja? —jamaya cua.

<sup>10</sup> Jesosaa jama huohuime aca cua ba'a: —Miquianaya Eyacuiñajjiya ba meesahua caje ojaya esohui eyacua. Beca cuana shajjama' cuani ca ca ohuaya eba meesahuajji pojjeama. Esohui eba meesahuajji huohuaña beca cuana shajjama' cuanijojo. <sup>11</sup> Jamajjeya eyaya miquianaya huohuije quea ja'a epojji. Ma eso' Eyacuiñajjiya esohui jama cuani; meshi dejja jayojja cuani. <sup>12</sup> Meshi ejiojji quea ca'a huasijje eso' oquequinaje, dejja shajjama' Eyacuiñajjiya esohui shajja'ajja sa po ajja jayojja. Eyacuiñajjiya esohui jjaja'aqui ajja quea sapa ca'a jjejojo. Cuichojjiya eso' ijjia cani jayojja jama Edosiquiana etiya Eyacuiñajjiya esohui pajea mee ca'yani, jjaja'aqui mee jjima acani. Jamajjeya ohuaya dejja jjapeequi mee jjima acani Eyacuiñajji nijke. <sup>13</sup> Meshi mei biajje anijo eso' pohua'ajja'yani jama jayojjaya dejja cuaa Eyacuiñajjiya esohui shajja'ajja cani. Ebioneiya aje ca Eyacuiñajji nijke jjapee nishoquianiya. Majoya aje pea cuana onijke mimijajiajo Eyacuiñajjiya esohui pajea ca'yani. Jjapeequi pajea'yani Eyacuiñajji nijke. <sup>14</sup> Pea dejja meshi acuisha yijejji jayojja jama. Eyacuiñajjiya esohui shajja'ajja cani. Ebioneiya aje ca oe shajja'ajja caniya Eyacuiñajji nijke jjapee nishoquiani. Majoya aje jjashahuabaqui'yani pea aquianajo quea mimishi epo'yojji. Jama jjashahuabaqui'yomeya cuani Eyacuiñajji epajea'yojji. Eyacuiñajjiya esohui ebajji nisho cuani. Ma eso' acuishaa mano mee ca'yani jayojjaya ejjashahuaba taiquijjiya aca'yani Eyacuiñajji nijke epo'pajea'yojji. <sup>15</sup> Pea dejja meshi quea bame nee nee jayojja cuani. Eyacuiñajjiya esohui shajja'ajja neinei cani. Shajja'ajja neinei majje Eyacuiñajjiya epeejji tii tii cuani. Ohuaya ojaya esohui ba neinei cani. Jjashahuaba bamebamequiani. Ma dejja cuana ecuea esohui ba neineiiji epojji —jamaya Jesosa cua.

*Esohui ehuohui'yojji cuaquijji*  
(Macoso 4.21-25)

<sup>16</sup> Jesosaa jiquio esohui jama huohuime aca cua ba'a: —¿A'a eseya eseya cuaquijjiya jeaja'a came eshajajo capa nequiya? Chojja. ¿A'a eseya ejaajji quimejjeje nequiya jeaja'a came? Chojja, de. ¡Eseya quea ja'a po mee sa añajo ca eyajo nequiasohuacue ojjaña quea ja'a epojji! <sup>17</sup> Jama jayojjaya Eyacuiñajjiya ojjaña ecuea esohui onaaya ba mee caje'yo quijje. Quea ja'a nee cuaje'yo. <sup>18</sup> Miya ecuea esohui shajja'ajja sa cuanijo Eyacuiñajjiya miya quea ja'a nee nee po mee caje. Beca cuana ecuea esohui shajja'ajja sa po ajjajo ohuaya quea ja'a po mee jjima acaje —jamaya Jesosa cua.

*Jesosaja nae, oja chahua pea'ai*  
(Mateo 12.46-50; Macoso 3.31-35)

<sup>19</sup> Majoya Jesosaja enaese cue'ya cua equi yasijje Jesosa ba'yohua. Ba'yo jjima cua ojaya, quea dejja huisojojo. <sup>20</sup> Oe dejjaa Jesosa jama huohuime aca cua ba'a: —Mique naeya mi sa'ajja ca'yoqui mique chahuaa pea'ai.

<sup>21</sup> Jamaya Jesosa cua ba'a: —E'e de, ojjaña nei neiya Eyacuiñajjiya esohui shajja'ajja neineiiji cuani ecue nae nei nei cuani, ecue chahua nei nei cuani, Eyacuiñajjiya epeejji nei nei cuanijojo —jamaya Jesosa cua.

*Jesosaa beni nequioque meequi ca cua*  
(Mateo 8.23-27; Macoso 4.35-41)

<sup>22</sup> Oe pojajjo Jesosaa o shajja'ajjajji cuana jama aca cua ba'a: —¡Cua'a; bae ojje miji yasijje besa poquicue!

<sup>23</sup> Jamajjeya bishe ai yasijje ojjaña ania cua. Jesosa onaa dojobesa cajje cahua cua. Majoya aje quea ichi po majje beni quea quemo nee nee cueya cua. Enashajohua bishe nanejea ca cua. <sup>24</sup> Oe dejjaa majoya Jesosa jama ishe'ame aca cua ba'a: —Esohui huohuiji, ¡shequicue oe! Coya aje se hui'i'ya.

Majoya aje Jesosa shequijeana cua onaa ishe'a cajje. Majoya aje shequi majje mimia cua beni nijje, ena nijje pea'ai. Majoya aje o mimiajo beni nequioquequia cua enashajo pea'ai. Majoya aje enashajo po jjima jayojja po'ya cua. <sup>25</sup> O shajja'ajjaji jama mimimeya cua ba'a: —De, Jesosa quea sohui poja nee nee, de. Miminaje beni nijje; beni po jjima jayojja po mee ca'yonaje, de.

Majoya aje Jesosaa jama aca cua ba'a: —¿Yajjaje acuae jja nequiana metenaje so'o, de? Jjashahuabaqui jjima pojja'a jja nequiana Eyacuiñajjijo, de —Jesosa cua.

*Dejjaja eyamijo nequi eshahua cuana Jesosaa cuaya meequi ca'ya cua*  
(Mateo 8.28-34; Macoso 5.1-20)

<sup>26</sup> Majoya oya cuana ba'eñaquia cua Jjanana meshi yasijje. Ba'eñaquia cua pea ojje miji yasijje, Janinea ba'e cojja nei besa poquia cua. <sup>27</sup> Jesosa bishejo ani etaja huasijje nequisohuaquiajo, oe dejja cueya cua. Ma dejja quea shahua huiso jjejojo niñepoqui cua. Daquima' nei nei cua; quima' pea'ai. Oya emojeajaaca huasijje ba'ya cua. <sup>28-29</sup> Jamatii oya quea tai po mee canaje eshahuaa. Jamajjeya oya dejja cuaa jeyo ca cua cadenaaa, poqui ajja epojji. Jamatii ca ca cadena jjasejjajeaqui mee ca cua eshahuaa. Poqui mee ca'ya cua ma quima huasijje, de. Ma dejjaa Jesosa ba neinei ca cua. Majoya aje Jesosa nequi cojja nei ecui'oshajjajo nequioqueña cua. Majoya aje Jesosaa jama aca cua ba'a: —¡Eshahua cuana, cuayaqui'yocue!

Majoya ma dejja jama cua ba'a: —De, miya Jesosa, Eyacuiñajjija Bacua Ejja e'e jojo nei. ¡A'a mo miyaya jinapajji so'o! —jamaya cua.

<sup>30</sup> Majoya Jesosa jama cua ba'a: —¿Ae bajjani acuae miya?

—Eya Quea Shahua Huiso bajjani —jamaya cua ma dejja quea shahua huiso jjejojo.

<sup>31</sup> Eshahua cuaa Jesosa jama huohuime aca cua ba'a: —¡A'a ecuana huoojeajji cuaqui yasijje! <sup>32</sup> ¡Ecuana oe cuichi cuanaja yami yasijje dobiqúi mee'yocue!

—¡E'e ocuae dobi'ajjaqui socue! —jamaya aca cua Jesosaa.

<sup>33</sup> Majoya aje cuayaqui'ya cua dejjaja eshahua cuana, dobiqúi'ya cua cuichi cuana huasijje. Majoya aje cuichi cuana emacojo nequi cuajicuaji jaoquequinana cua bae yasijje; hui'i'ya cua ojjaña. <sup>34</sup> Cuichi hui'ije'yo ba majje cuichi jaahuanajji cuana poquia cua cuiñajji yasijje ojjaña huohuiya. Jama aca cua ba'a: —De, Jesosaa eshahua cuana cuaya mee canaje dejja niñepoqui meeji po nequinaje. Dobiqúi mee canaje ecuanaja cuichi yasijje, hui'i'yonaje ojjaña cuichi, de. Cuajicuajinanana bae yasijje, hui'i'yonaje. ¡Chama'yo tii, de!

<sup>35</sup> Majoya ojjaña dejja cueya cua ae Jesosa po ani baa. Onaaya cue majje ba ca cua ma dejja niñepoqui cuanaje Jesosa pejejo ani. Ma daquima' cuanaje daquijji ani'yo ba ca'ya cua dejja cuaa; quea bei ani'yo ba ca'ya cua. Jesosa quea sohui poja nee neejo ojjaña quea mete po'ya cua. <sup>36</sup> Ma niñepoqui bajji cuanajeya Jesosajo huohui ca nequi'ya cua pea meshijo ba'e yasijje jama ba'a: —Jesosaa eshahua cuana cuaya meequi ca'yonaje.

<sup>37-39</sup> Ojjaña cuana ma meshijo ba'e quea mete nee nee cua. Quea meteya jjejojo Jesosa huoojeajea ca'ya cua. Ma niñepoqui cuanajeya ca ca Jesosa jama huohua'ajjame aca cua ba'a: —Jesosa, eya minijje poqui sa cuani.

Jesosa jama cua ba'a: —Chojja, ¡miya poquicue miquea huapa pojjeama cuana huasijje! ¡Huohuiquicue ojjaña ma mi Eyacuiñajjiya jama acanaje! —jamaya Jesosa cua.

Majoya aje ma dejja poquia cua o ba'e yasijje huohuiya. Huohui ca'ya cua Jesosaa eshahua cuayaqui mee ca'ya cua.

*Jainoja bacua piona emano'yojaa pea epona najji poani tii tii*  
(Mateo 9.18-26; Macoso 5.21-43)



<sup>40</sup> Majoya aje Jesosa besajebe'ya cua. Ba'eña'ya cua ojaya meshi yasijje. Ojjaña cuanaja Jesosa quea boti nee cua. Ishoa'ajja ca nequia cuaa cua. <sup>41</sup> Oe dejja Jaino bajjani Jodioja ejjachichaquijji equi jaahuanajji cua Cesanenajo. Oya cueya cua Jesosa que. O cojja nei ecui'oshajjajo nequioqueña cua. Ohuaya Jesosa huohua'ajja ca cua ojaya equi yasijje epoquijji oja bacua piona jjaajaqui mee'yojji. Ojaya ebacua piona ahueama'ani quea mano nee nee cua. <sup>42</sup> Oja bacua piona oe nei cua, de. Majoya aje Jesosa onijje poquia cua. Beshahua nei poqui jjima cua quea dejja huisojojo. <sup>43</sup> Oe pea epona quea mano dejja quea huiso yiyesamajo nequi. Oya quea mano nee nee, ojaya ena' cuayaqui nequia cua 12 shequiajame, de. Oya eshicuijji jjeshejji jjejojo bejjoma'yo cua. Eshicuijji quiajjija epona na' cuaya pajea meequi'yo jjima cua. <sup>44</sup> Jesosa poquianijo ohuaya Jesusaja daqui cuesha iña ca cua. Ma daqui cuesha iña cajje aje najji popajea mee ca'ya cua. <sup>45</sup> Majoya aje Jesusaa jama aca cua ba'a: —¿Aya acuae mo iña canaje so'o?

O shajja'ajjajjiya, Penohua jama aca cua ba'a: —Cua'a, de. Quea dejja huisohua jjejojo mi, ¿aya shai mi iña canaje Jesosa? Napa jjima ca mi ca ecuanaja —jamaya Jesosa aca cua Penohua.

<sup>46</sup> Jesosa jama cua ba'a: —Cho, ecuea eba Eyacuiñajjiya a'ya shai huaquia mee ca'yonaje e daqui iña cajo.

<sup>47</sup> Ma epona Jesusaja esohui shajja'ajja majje piopio cua. Ojjaña nequijo piopiojea cua. Ecui'oshajjajo nequioqueña cua Jesosa nequi yasijje. Ohuaya Jesosa jama huohuime aca cua ba'a: —E'le ee, Jesosa, eyaya nei miquea daqui cuesha iñanaje. Jjashahuabaqui majje che mi daqui iña majje ena' huosa mee'yojji. Jamajjeya che eyaya jamaya miya anaje —jamaya ma epona cua.

<sup>48</sup> Majoya Jesosa jama cua ba'a: —¡A'a quea mete pojji, she! Eyaya miya na' huosa mee'yonaje, miya jjashahuaba neineiquinajejojo. ¡Poquicue, quea bihui po'yocue!

<sup>49</sup> Jesosa epona nijje mimianijo tii Jainoja epeejji cueya cua Jaino que. Jama cua ba'a: —Jaino, miquea ebacua piona mano'yonaje. Chama'yo tii, de. ¡A'a poqui meeji ma esohui huohuijji nei!

<sup>50</sup> Jesusaa ma esohui shajja'ajja majje jama huohuime aca cua ba'a: —¡A'a miya quea mete pojji! ¡Jjashahuaba neineiquicue oe Eyacuiñajji! Miquea bacua jjeya shequije'yo.

<sup>51</sup> Majoya Jainoja equi yasijje poquiña cua. Jesusaa beca cuana dobiqui mee jjima aca cua equi yasijje. Peno, Satiaco, Huani ca ca oe dobiqui mee ca cua. Ma ebacuaja chii enaese pea'ai dobiqui mee ca cua. Mahuiso dobiquia cua emano'yojaa baa.

<sup>52</sup> Dobiqui majje oya cuaa ba ca cua ojjaña pa'ani quea yeno nee nee jjejojo, ebacua emano'yojaajo. Jesusaa jama huohuime aca cua ba'a: —¡A'a pajji! Ma epona sho'i mano'yo jjima, ecahuijaa.

<sup>53</sup> Majoya ojjaña soa'ya cua. Ojjaña jama aca cua ba'a: —Chojja, mano neinei'yonaje jja coma, de —cuana cua.

<sup>54</sup> Majoya aje Jesusaa epona sho'ija eme iña majje janobajjima nei mimia cua jama ba'a: —¡Esho'i, nequisohuacue!

<sup>55</sup> Majoya aje shequi'ya cua, nequisohua'ya cua: —¡Quiacue oya bobi! —Jesosa cua.

<sup>56</sup> Ma esho'ija chii quea bihui po'ya cua oja nae pea'ai. Jesosa jama cua ba'a: —¡A'a huohuijji cuana jiquio eya mique bacua shequi mee'yonajejo! —jamaya Jesusaa aca cua.

## 9

*Jesosa o shajja'ajjajji cuana 12 huoojea ca cua esohui huohuiya  
(Mateo 10.5-15; Macoso 6.7-13)*

<sup>1-2</sup> Jesosa jjachichaquia cua o shajja'ajjajji cuana nijje, 12 huisome nijje. Ohuaya jama huohuime aca cua ba'a: —Eyaya miquianaya huoojeaña pea cuana huasijje esohui huohuiya, pea cuana jjaajaqui mee'yohua, eshahua cuayaqui mee'yohua pea'ai. ¡Huohuicue jama pea cuana huasijje ba'a: “Eyacuiñajji ojjaña huoojeajji cuaje'yo” acue! <sup>3</sup> ¡Aema' oe poquicue! ¡A'a acui ejjaquecuaca'aquijji dojojji; bashosoco pea'ai a'a dojojji! ¡A'a bobi, bejjo pea'ai dojojji! ¡Ma miquea eyamijo ba'e nei oe dojocue! <sup>4</sup> ¡Po'ayequi nequicue oe

pea cuiñajji yasijje! ¡Miquianaya oe pea cuiñajji yasijje poqui majje miquianajaya epeeji epojji sa'ajjacue; ojaya equijo anicue! <sup>5</sup> Deija cuaa pea cuiñajji ba'eya miquianajaya esohui cajaa acaje'yo pojja'a. ¡Huohuicue jja oe ma deija cuana jama ba'a: “Quea mimishi mi coma” acue! “Eyacuiñajjiya jja miya ba cani. Ohuaya jja miya quea nee nee po mee caje'yo” acue. ¡Ma esohui jama huohui majjeya oe cuayaqui'yocue cuiñajji ani! ¡Majoya cuayaqui'yo majje miquianajaya ejiojji ani meshi pohui cuiayajajana'yocue oya cuana jjashajja'ajjaqui ajja cuanajejojo! ¡Jamajjeya oe pea cuiñajji yasijje poquicue! —jamaya Jesosaa aca cua.

<sup>6</sup> Jamajje o shajja'ajjajji cuana po'ayequi nequia cua Jesusaja esohui huohuiya. Onaaya huohui ca cua Eyacuiñajji esohui; jjaajjaqui mee ca'ya cua emanoojaa cuana.

*Jesosa emeshi meseya Enode Antipaa Huani poso aca cua*  
(Mateo 14.1-12; Macoso 6.14-29)

<sup>7</sup> Emeshi meseya Enode Antipaa shajja'ajja ca cua peaja esohui Jesusajo. Pea cuaa Enode siajje aca cua jama ba'a: —Huani ca jja ca Jesusaya cuanaje. Huani ca jja ca shequi'yonaje —pea cuana cua. Enode quea ajjajja nee nee cua Jesosa Huani poso jojaya.

<sup>8</sup> Pea cuaa Enode siajje aca cua jama ba'a: —Chojja, Jesosa ca jja ca Eniaya, ma etiiquiana shequi o'oyanajeya —posoya aca cua.

Pea cuana jama siajje pomeya cua: —Jesosa pojja'a pea etiiquiana shequi o'oyanaje.

<sup>9</sup> Enode majoya jama cua ba'a: —Eyaya nei ca jjaja ca Huani sapasejjajea meenaje, Huani mano neinei'yonaje, ecuea jjaja eba, de. ¿Ajeo shai jjaja ojjaña mimiani? Ache jja eyaya caba'ajja sahua Jesosa —jamaya Enode cua.

*Jesosaa 5.000 deija cuana bobia ca cua*  
(Mateo 14.13-21; Macoso 6.30-44; Huani 6.1-14)

<sup>10</sup> Quijje o shajja'ajjajji cuana esohui huohuiya poqui cue o'oya cua; Jesosa que huohui poña'ya cua. Majoya Jesosa shajja'ajja majje oya cuana poquia cua Betesaina huasijje.

<sup>11</sup> Jomajo o ba majje ojjaña jjachichaquia cua Jesosa que. Ojjaña quea bihui cua Jesosaa Eyacuiñajji esohui huohui caquijo. Jesosaa jama aca cua ba'a: “Ojjaña joya mimishi pajea'yojji cuani, onijje e'e nei jjapeequiani Eyacuiñajjiya jaahuana caje'yo”. Ohuaya emanoojaa cuana jjaajjaqui mee ca'ya cua pea'ai. <sup>12</sup> Jjasinecuaquijajo ojjaña quea shoe nee cua; ye jjima ojaya bobi cua. O shajja'ajjajji cuaa Jesosa jama huohuime aca cua ba'a: —¡Huoojeacue ojjaña, bobi sa'ajjaa, ecahuijji sa'ajjaa pea'ai! Beshahua nei esejaya bobi jiquiojo chama' ba'a, de.

<sup>13</sup> Jesosa jamaya cua: —Chojja, ¡miquianaaya oe bobi quiacue e'ijji! ¡jji!

Jamaya oya cuana cua: —De, oe pojji bobi yani. Beca nahuoo sisi yani, me oeje pahui yani. ¿A'a ecuanaya capoquiahua cuiñajji yasijje bobi jjequiya pojja'a, ojjaña dejjaja bobi jjequiya; quea bobi huiso epojji? <sup>14</sup> Yani quea deija huiso nee nee, 5.000 yani, de.

Jesosaa jamaya aca cua ba'a: —Chojja, ¡a'a poquijji, ojjaña cuana anioque meecue, jjaanichichiqui meecue pea jjocojo, 50 anioque meecue!

<sup>15</sup> Majoya aje o shajja'ajjajji cuaa deija cuana jama aca cua ba'a: —¡Anioquecue oe nequiana!

<sup>16</sup> Majoya acua po majje Jesosaa ma pahui nahuoo pea'ai jjeshe ca cua oja emeya. Jjeshe majje eyahuasijje jjabajeasohuaquia cua Eyacuiñajji nijje emimijji. Ohuaya Eyacuiñajji bihuia ca cua bobi e'ijji. Majoya Jesosaa miji sisisi ca cua pahui, nahuoo pea'ai. Majoya ohuaya bobi quia ca cua o shajja'ajjajji cuana huasijje. Pea cuana huasijje quia ca cua o shajja'ajjajjiya. <sup>17</sup> Ijja'ijja majje ojjaña deija cuana quea jeje cua, de. Ojjaña deija cuana jejeajo iya ca'ya cua pea eshajajo tiya iya ca poqui'ya cua; 12 shajame bobi e'ijjiasejjaja ecuatajea cua.

*Penohua Jesosa shahuaba ca'ya cua oya Quito*  
(Mateo 16.13-28; Macoso 8.27-9.1)

<sup>18</sup> Oe pojajajo Jesosa oe nei mimia cua Eyacuiñajji nijje. O shajja'ajjajji cuana onijje nequia cua quea huesha pishana. Jesosaa oya cuana huohui'ajja ca cua: —¿Yajja mimime dejja cuana ejo cuani?

<sup>19</sup> Jamajjeya o shajja'ajjajji cuana jama cua ba'a: —De, pea cuana ca jja ca mijo jama mimime cuani ba'a: Miya ca pajja mi ca pea dejja cuaa Huani poso acani. Pea dejjaa ca pajja mi ca Enia poso acani, ma etiiquiana, de. Pea dejjaa ca pajja mi ca pea etiiquiana shequi o'oyanaje poso acani, de.

<sup>20</sup> —De, ¿miquianaya yajja cuani so'o? —cua Jesosa.

Peno ca ca jama cua ba'a: —Miya ca ca Eyacuiñajjija Bacua Ejja oe nei, oja huoojea'yo ojjaña jaahuanajji epojji. Ecuea Emeshi Mese nei nei, de. Miya Quito bajjani ecuea Emeshi Mese nei nei jjejojo.

<sup>21</sup> Majoya Jesosaa Peno jama huohuime aca cua ba'a: —E'e de, e'e jojo nei. ¡A'a huohuijji pea cuana, ecuea bajjani Quito, miquea Emeshi Mese nei! <sup>22</sup> Eya Eyacuiñajjija huoojea'yo. Eya quea nee nee acaje'yo cuaa. Beca cuaa eya cajaa acaje'yo, Jodio etii cuaa, Eyacuiñajji nijje mimiani etii cuaa, Moisesija etehue'yo huohuijjiya pea'ai. Mano mee caje'yo eya, de. Eya mano'yo majje pea beca peejjima cahuime po majje shequije o'oya —jamaya Jesosa cua.

<sup>23</sup> Majoya aje o shajja'ajjajji cuana Jesosaa huohui ca cua jama ba'a: —Ojjaña ca jja ca enijje e'e jojo nei jjapeequi'yo sa cuani, oya Eyacuiñajjija esohui jayojja caba'yahua. E'e, je jayojjaya pocue; enijje poqui'yocue! Jamatii onaa napa cajje aje jja mi oe quea nee nee cuaje'yo. <sup>24</sup> E'e, ojjaña cuana ecuea esohui shajja'ajja sa po ajjajo ba'e tiitii ajja enijje eyajo. Joya ecuea esohui shajja'ajjajji cuani ca ca ba'e tiitii'yo enijje eyajo. <sup>25</sup> E'e pojja'a dejjaa quea huiso nee nee aquiana ojaya yajji chicha cani. Jamatii oya cuana cuaqui yasijje jea cajo ojjaña ojaya aquiana cuana edojojji pojjeama. ¿A'a ojjaña ojaya aquiana cuana quea bame cuaje oya cuaqui yasijje poqui majje? Chojja, de. ¿A'a aquiana sosejje cuayaqui mee caje'yo cuaquijo ani? Chojja, de. <sup>26</sup> Oe dejja pojja'a: “Cajaa” cuani ejo, ecuea esohuijo pea'ai. Jamajjeya eyaya cue o'oya majje oya cajaa aje'yo pea'ai. E'e jojo nei eya ojjañaja Edoe Mese cueje o'oya. Quea jeajahua nee nee, quea ca'a nee nee cueje'yo. Eya esohuidojojji quea huiso nee nijje cueje o'oya, de. <sup>27</sup> E'e jojo nei miquianaaya jiquiojo nequia mano'yo jjimahuaa Eyacuiñajjija epeeji nei quea huiso nee nee baje —jamaya aca cua Jesosaa.

*Jesosa quea cojja jiji cua*

*(Mateo 17.1-8; Macoso 9.2-8)*

<sup>28</sup> Quijje, jiquio esohui huohui majje oe nomico ani'yo Jesosa poquia cua eyiyo huasijje. Peno, Satiaco, Huani pea'ai poquia cua onijje. Poquia cua Eyacuiñajji nijje mimiya. <sup>29</sup> Eyacuiñajji nijje mimi majje Jesosaja ecojja quea jiji nee nee cua eshequi jayojja. Ojaya daqui pea'ai quea oshe nee nee, quea siyo nee nee cua. <sup>30</sup> Beca dejja emano'yo eyajje jjanequija'aqui'ya cua Jesosa nijje. Oya cuana mimia cua Jesosa nijje. Oe dejja Moisesi etiiquianaya cua. Pea ca Enia etiiquiana cua, ma yahuajo nei nei ba'ya cua. <sup>31</sup> Quea bame nee nee quea jiji nee nee miminequia cua Jesosa, Enia, Moisesi pea'ai. Jesosa miminequia cua onaja mimishijo emano'yoyji jjejojo Jenosanenajo. Jama mimimea cua Jesosa. <sup>32</sup> Peno, Satiaco, Huani pea'ai quea cojja mano cua. Majoya aje shequi nei'ya cua, ba ca cua Jesosa, Enia, Moisesi pea'ai; quea jiji nee nee nequi, de. <sup>33</sup> Moisesi Enia mimijeyo majje poqui o'oya cua eyahuasijje. Poquije'yo ba majje Penohua Jesosa jama aca cua ba'a: —De, Esohui huohuijji, quea bame nee nee ecuanaya jiquiojo ani. Pea beca peejjima equi ejja'iyacui, oe miquea, oe Moisesija, oe Eniaja —jamaya cua Peno jjashahuaba bamequi jjima jjejojo.

<sup>34</sup> Peno mimianijo tii bo oshe nee neeya oya cuana quehua ca cua. Bo ba majje quea mete nee nee po'ya cua. <sup>35</sup> Majoya Eyacuiñajjiya bo tejjeyea esohui huohui ca cua jama ba'a: —Jiquio Jesosa ecue Bacua Ejja, ecuea quea jea nee nee, eya ojo quea bihui nee nee. ¡Oya oe oe neiya shajja'ajjacue! —jamaya aca cua bo tejee Eyacuiñajjiya.

<sup>36</sup> Ohuaya cuana ma esohui shajja'ajja majje ba ca'ya cua Jesosa oe nei nequi; pea cuana chama'. Peno, Huani, Satiaco pea'ai mimi'yo jjima nequia cua. Pea o shajja'ajjajji cuana huohui jjima aca cua. Quijje nei nei ca huohui ca cua, de.

*Esho'i niñepoqui Jesosaa eshahua huoojea ca'yajo niñepoqui pajea mee ca'ya cua*  
(Mateo 17.14-21; Macoso 9.14-29)

<sup>37</sup> Mecahuajje jjaopjjaquiajo Jesosa eyiyojo nequi jaaoque'ya cua. Quea dejja huiso nee neeya Jesosa ishoa'ajja ca nequia cua. <sup>38</sup> Oe dejjaa janobajjima nei jama huohuime aca cua ba'a: —¡Esohui huohuijji, bahuacue ecue bacua! Ecuea ebacua oe nei, de. <sup>39</sup> Eshahuaa napa cajje, taaani jeabichajea canaje meshi yasijje; huapani pea'ai. Eshahuaa manojea mee'yo sa acani. Jamatii oya cuani, de. <sup>40</sup> Eyaya huohui'ajjanaje miquea eshajja'ajjajji cuana eshahua cuayaqui mee'yoyji. Eshahua cuaya meequi'yo jjima acanaje mi shajja'ajjajji cuaa —jamaya aca cua niñepoquiija ejeajjiya.

<sup>41</sup> Jesosaa ojjaña cuana jama aca cua ba'a: —De; ¿ache shono acuae jja nequiana ejo jjashahuabaquije e'e jojo nei? ¡Quea sapa ca'a mi coma! ¿Ache cahui huiso minijje nequi majje miyaya eya baje'yo Eyacuiñajjiya huoojea'yo ojjaña jaahuanajji quea ca'a nee nee? —jama tecueameya Jesosaa aca cua.

Majoya ma dejja Jesosaa huohui ca cua jama ba'a: —¡Miquea ebacua jjequicue!

<sup>42</sup> Majoya esho'i jjequi ca cua Jesosa que. Ye cajo eshahuaa esho'i jeabichajea ca cua; niñepoquia cua. Jesosaa eshahua esho'ijo nequi cuaya meequi ca'ya cua. Esho'i niñepoqui pajea'ya cua. Majoya aje Jesosaa ejeajji nijje esho'i poqui mee ca'ya cua. <sup>43</sup> Ojjaña ba majje jama aca cua ba'a: —De, quea sohui poja nee Jesosa cuanaje. Eyacuiñajjiya Jesosa quea sohui poja nee po mee canaje.

*Jesosaa huohui ca o'oya cua o manojeyojo*  
(Mateo 17.22-23; Macoso 9.30-32)

Ma esho'i niñepoqui pajea mee'yo majje ojjaña bihuia ca cua Jesosa, Eyacuiñajji pea'ai. Ohua bihuia cajje Jesosaa o shajja'ajjajji cuana jama aca cua ba'a: <sup>44</sup> —¡Shajja'ajjacue jiquio esohui! ¡A'a pajea'yoyji! Quijje dejja cuaa eya iña caje emano mee'yoyji —jamaya cua Jesosa.

<sup>45</sup> O shajja'ajjajji cuanaja ca quea quehua cua Jesosaja esohui. Eyacuiñajjiya quea quehua po mee ca'ya cua. Jamatii oya cuana quea mete cua ehuhui'ajjajji.

*¿Ache dejja quea bame eyajo cuaje'yo?*  
(Mateo 18.1-5; Macoso 9.33-37)

<sup>46</sup> Jesosa shajja'ajjajji cuana jjaniñebaqui ania cua. Jama cua ba'a: —¿Ache oja eshajja'ajjajji acuae eyajo quea bame nee nee nequije so'o? Eya nei emeshi mese cuaje eyajo, pojja'a, miya pojjeama.

Pea aje oe jama cua ba'a: —Chojja, eya, de.

<sup>47</sup> Jesosaa jama tecueame aca cua ba'a: —Miquianaya jjashahuaba taiquiani. ¡Shajja'ajjacue oe! <sup>48</sup> ¡Bacue jiquio esho'i cuana, emeshi mese po sa po ajja! ¡A'a emeshi mese po sa pojji! ¡Jamaya miquianaya pocue esho'i jayoyjaya! ¡Jjapeequicue jiquio ecua esho'i cuana jayoyja oe pocue, dejja quea bame nee nee epojji! Miquianaya ecuea epeeji nijje jjapeequi majje miya ecuea epeeji cuani, Eyacuiñajjiya epeeji pea'ai. Jamajjeya miquianaya esho'i quea bame jayoyja cuani, majoya miquianaya quea bame nee nee nequije'yo eyajo —Jesosa cua.

*Oe dejja Edosiquianaja epeeji pojjeama cuani jamajjeya oya Jesosaja epeeji nei cuani*  
(Macoso 9.38-40)

<sup>49</sup> Majoya Huaniya Jesosa jama aca cua ba'a: —Esohui huohuijji, ecuaa banaje oe dejja; ohuaya pea cuanaja eshahua cuana cuaya meequi ca'yonaje miyaya jayoyjaya. Miquea epeeji cuani pojja'a, oya ca ca cue ajja tii ecuaa nijje. Jamajjeya ecuaa oya jama huohuinaje ba'a: “¡A'a cuayaqui mee'yoyji eshahua; miya ecuaa nijje poqui ajja!”

<sup>50</sup> Jesosa jama cua ba'a: —Cho, ¡a'a jama pojji! Oya ecuea epeeji nei cuani. Oya Edosiquianaja epeeji pojjeama cuani, jamajjeya oya ecuea epeeji cuani. E'e, ma dejja

quea bame cuani, oya quea tai pojjeama. Jamajjeya oya ecuanajaya epeeji cuani pea'ai —jamaya cua Jesosa.

*Jesosaa Satiaco Huani pea'ai tecuea ca cua*

<sup>51</sup> Beshahua nei acua cua Jesosa emano'yojji, eyahuasijje epoqui'yojji pea'ai Eyacuiña-jjija esohui jayojja yajji. Jamajjeya jjashahuabaqui majje oya poquia cua Jenosanena huasijje o shajja'ajjajji cuana nijje. <sup>52</sup> Poquijeya Jesosaa beca o shajja'ajjajji cuana huoojea ca cua Samania meshi yasijje ecahuijji sa'ajjaa. <sup>53</sup> Jomajo Samania dejja jama cua ba'a: —Chojja, ja'a miquianaya jiquiacua cuejji! Cajaa, miquianaya Jodio dejja jojoya, ecuanaja ca mi ca boti'ama Jodio dejja cuana Jenosanena huasijje poqui majamajajjijojo Eyacuiñajji bihuiaa.

<sup>54</sup> Majoya ma esohui shajja'ajja majje Satiaco, Huani pea'ai poquia cua Jesosa que huohui pohua. Oya cuana jama cua ba'a: —Jesosa, Emeshi Mese nei, ecuaaya cuaqui oque mee sa ña ma esohui quea tai miminaje yasijje. ¿A'a acuae quea bame jama epojji so'o, Jesosa?

<sup>55</sup> Jesosaa jama tecueame aca cua ba'a: —Chojja, ja'a miquianaya jama jjashahuabaquime pojji!

<sup>56</sup> Majoya aje poquia cua pea cuiñajji yasijje cahuiya.

*Jesosa nijje jjapeequi majje quea camaja cuaje*

*(Mateo 8.19-22)*

<sup>57</sup> Ejiojjijje poquijeya, dejjaa Jesosa jama huohuime aca cua ba'a: —Jesosa, Emeshi Mese nei, eya minijje jjapeequi sa cuani. Jamajjeya eya minijje e'e jojo nei po'ayequi sa cuani.

<sup>58</sup> Majoya aje Jesosa jama cua ba'a: —E'e pojja'a de, quea camaja cuaje. Eya ojjaña Edoe Mese cuani. Jamatii ecuea equi chama' ejomishocajji. Samao ca ca jjanijo cahuijaa, cuichojji cuana ejajo cahuiani. Eya ca ca ña quima' ecahuijji. Jamatii beca cuanaja equi quea nahue cuani e boti'amajojo —jamaya Jesosa cua.

<sup>59</sup> Pea pojjaajo pea dejja Jesosaa jama huohuime aca cua ba'a: —Jjeyahua nei enijje cuecue ecuea epeeji epojji!

Ma dejja jama cua ba'a: —Emeshi Mese, quijje pishana poquije minijje. Jjeya ecue chii etii nojinoji, manojje'yo pojja'a. Eyaya camojjea sahua mano'yajo.

<sup>60</sup> Jesosa jama cua ba'a: —Chojja, pea cuaa Eyacuiñajjija epeeji pojjeama cuaa oe cacuiña cahua. Ohuaya cuaa camojjea cahua mano'yajo. ¡Cuecue jjeyahua nei; enijje ejjahuhuiquiqui Eyacuiñajjija esohui pea cuana huasijje!

<sup>61</sup> Pea dejjaa Jesosa jama huohuime aca cua ba'a: —Emeshi Mese, eya po'ayequi sa cuani minijje. Ebionei oe ecuea huapa pojjeama cuana cahuhuiqui'yo sahua jama ba'a: “Poquia ña Jesosa nijje”.

<sup>62</sup> Jesosa jama cua ba'a: —Chojja, jjeya nei cuecue enijje! ¡Miya enijje jjapeequi sa cuanijo cuecue jjeyahua nei enijje! Miya cue sa po ajjaje miya bame'ama cuaje Eyacuiñajjija epeeji epojji.

## 10

*Jesosaa dejja quea huiso huoojea ca cua 72 huisome*

<sup>1</sup> Majoya Jesosaa dejja quea huiso jjequi tepe ca cua, 72 huisome. Ohuaya becanejjijji pea'ai huoojea ca cua ojjaña meshi cuana huasijje joya o poqui sa cuani yasijjeya. <sup>2</sup> Ohuaya jama huohuime aca cua ba'a: —Dejja cuana anoso quejo jahua jayojja jama, quea huiso nee nee. Ojjaña cuana ecuea esohui shajja'ajja sa cuani, oe pojji ca ca Eyacuiñajjija esohui huohuijji yani. Jamajjeya ¡mimicue Eyacuiñajji nijje quea huiso esohui huohuijji epojji, quea huiso anoso sejjayojji cuana jayojja epojji! <sup>3</sup> ¡Poquicue miquianaya ma dejja cuana quea mimishi nee nee nequi yasijje esohui huohuiya! Ma dejja cuanaya pojja'a mimijajje minijje; ba'ajja. <sup>4</sup> ¡A'a bashosoco dojojji; bejjo, ejiojji shejee pea'ai a'a dojojji! ¡A'a pea nijje mimipoquijji; quea cueiji pashi nee oe poquicue! Quea huiso Eyacuiñajjija esohui shajja'ajja sa cuani. <sup>5</sup> Equi yasijje dobiqui majje jja ca oe equi mese

huohuicue jama ba'a: “Eyacuiñajjiya miya quea bei po mee caje”. <sup>6</sup> Ma equi mese quea bei po sa cuanijo, Eyacuiñajjiya oya quea bei po mee caje. Pea equi meseya miya cajaa acanijo, Eyacuiñajjiya oya quea bei pojjeama acaje. <sup>7</sup> ¡Miquianaja epeeji epojji sa'ajjacue; ojaya equijo tiya anicue! ¡Ojaya bobi ijia anicue ma cuiñajjijo ani majje! Equi meseya miya cabobia cahua Eyacuiñajjiya esohui huohuiaña sosejje, ojaya echacojji jayojja cuani jojoya. <sup>8</sup> Pea cuiñajji yasijje poquiajo dejja cuaa miquianajaya esohui shajja'ajja sa cuanijo ohuaya miya bobia caje. ¡Jamajjeya ijia'ijjiacue onijje! <sup>9</sup> ¡Jaaajqui mee'yocue emanoojaa cuana! ¡Huohuicue oe oya Eyacuiñajjiya esohui jama ba'a: “Jjeya nei Eyacuiñajjiya miya oja epeeji po mee sa acani” acue! <sup>10</sup> Pea cuiñajji yasijje poquiajo dejja cuana ca ca miquea esohui shajja'ajja sa po ajja pojja'a cuaje. ¡Ma dejjaya jja oe jama huohuime acue ba'a: <sup>11</sup> “Miquianaaya cajaa ña Eyacuiñajjiya esohui, jamajjeya ecuanaya pea dejja cuana huasijje poquije esohui huohuiya miquianaya shajjama' jojoya. Ecuana quea yeno cuani miquianaaya Eyacuiñajjiya esohui cajaa anaje jojoya. E'e de, ohuaya miquianaya huoojja caje'yo cuaqui yasijje. <sup>12</sup> Yahuajo Eyacuiñajjiya Sonoma cuiñajjijo ba'e cuana aca cua jayojjaya miquianaya acaje'yo, quea nee nee po mee caje'yo” jama huohuimeya acue! —jamaya Jesosa cua.

*Beca cuiñajjijo ba'e cuana shajjama' cua*

*(Mateo 11.20-24)*

<sup>13</sup> Majoya aje Jesosa tecuetecuea cua dejja shajjama' cuana nijje. Jama huohuime aca cua ba'a: —Coya nequianaya quiyo'yo chana', Conasijo ba'e cuana, Betesainajo ba'e cuana pea'ai. Miquianaaya eya banaje, ecuea esohui shajja'ajjanaje pea'ai. Jamatii miquianaya ca mi ca oe shajjama' nei nei cuani, de. Yahuajo Eyacuiñajjiya Tinojo ba'e cuana Sinonojo ba'e cuana pea'ai quiyojja mee ca'ya cua quea mimishi nee neejojo. Ojaya cuanaja ca ca eya shahuaba jjima nei nei cua, de. Ohuaya eya eshahuaba jojjemo ecuea esohui eshajja'ajja jojjemo quea yeno nee nee poqui'aye ojaya mimishijo. Conasijo ba'eja ca jjaja ca ña oe eshahuaba cuanaje, jamatii jjejojya ca nequiana ca oe shajjama' nei nei cuanaje ecuea esohuijo, de. Betesainajo ba'e jayojja ca mi ca oe cuanaje. <sup>14</sup> Jamajjeya Eyacuiñajjiya miquianaya huoojja caje'yo cuaqui yasijje, quea nee nee cuaje'yo miquianaya. <sup>15</sup> Capenaomajo ba'e cuana, miquianaya shajjama' neiya cuani pea'ai. Jamajjeya aje jja miquianaya quiyojja pea'aije'yoya. Miquianaya jama jjashahuabaquiani ba'a: “Ecuana ca ca eyahuasijje poquije'yo”. Cho, miquianaya poquije cuaqui yasijje ecue sohuijo shajjama' cuanijojo —jamaya Jesosa cua.

<sup>16</sup> Majoya aje Jesusaa o shajja'ajjaji cuana jama huohuime aca cua ba'a: —E'e de, miquianaya ecuea esohui huohuijji cuani. Miquianaaya ecuea esohui nei huohuiaña. Jamajjeya dejja cuaa miquianajaya esohui shajja'ajja canijo ecuea epeeji cuaje. Pea dejja cuana ca ca oe shajja'ajja sa po ajjajo ecuea epeeji pojjeama cuaje, Eyacuiñajjiya epeeji pojjeama pea'ai cuaje. E'e de, mahuiso ecuea esohui —jamaya aca cua Jesusaa.

Majoya aje ma dejja cuana iye huiso huoojja ca cua esohui huohuiya.

*Ma dejja cuana, 72 huisome cue o'oya cua Jesosa que*

<sup>17</sup> Majoya ma dejja cuana 72 huisome esohui huohui majje Jesosa que cue o'oya cua; quea bihui nee cua. Oya cuana jama cua ba'a: —Jesosa, ecuea Emeshi Mese nei, ecuanaya quea sohui poja nee cuanaje; mi jayojja cuanaje. Ecuaya miquea bajjanijo eshahua huoojja cuaya'yonaje.

<sup>18</sup> Jesosa jama cua ba'a: —E'e de, ecuea eba. Eyaya Edosiquiana banaje oquequinaje eyajo nequi pojjeje jayojja, de. <sup>19</sup> Eyaya miquianaya quea ca'a po meenaje epoquijji. Peyohua, ajia pea'ai ijia cajje miquianaya mano'yo jjima po meeje'yo eyaya. Edosiquiana miya quecua jjima ameeje'yo eyaya. <sup>20</sup> Miquiaaya eshahua cuayaqui mee'yaña. ¡A'a quea bihui nee pojji miquianaya quea sohui poja nee cuani! ¡Miquianaya ca oe quea bihui pocue miquianajaya bajjani tehue canaje Eyacuiñajjiya eyajo edobiqui meeji! Miquianaya poquije eyahuasijje Eyacuiñajji nijje ba'e'yohua. ¡Jamajjeya ma esohuijya quea bihui pocue! —jamaya Jesosa cua.

*Jesosa quea bihui cua**(Mateo 11.25-27; 13.16-17)*

<sup>21</sup> Majoya aje Edojjoshahua Bameya Jesosa quea bihui po mee ca cua. Jesosaa Eyacuiñajji jama huohuime aca cua ba'a: —De, eya quea bihui nee cuani minijje. Eyacuiñajji, miya ecue Chii nei, miya Emeshi Mese nei cuani, ojjaña meshi cuanajo eyajo pea'ai, de. E'e, beca cuana jjashahuaba taiquiani jama ba'a: “Ecuea quea ja'a nee esohui, jamajjeya eya Eyacuiñajji esohui shajja'ajja sa po ajja”. Miyaya, Eyacuiñajjiya, oya cuana ba meesahua ajja oya cuana jjashahuaba taiquianijojo. Pea cuana ca ca miquea esohuijo esho'iquiana jayojja jjabahuejjaqui sa cuani. Jamajjeya miyaya oya cuana quea ja'a po meeje'yo. E'e ecue Chii, miyaya jamaya aña miquea ejjashahuabaquijji jama — Jesosa cua.

<sup>22</sup> Majoya Jesosaa pea cuana jama huohuime aca cua ba'a: —Eyacuiñajji ecue Chii e huoojea'yojji epo. Eya ojaya esohui huohuijji cuani. Ecue Chiiya eyajo anija ecuea ejjashahuabaquijji ojaya eba nei nei, ojaye nei. Ecue Chiiya ejjashahuabaquijji ecuea eba nei nei pea'ai, ecuea nei. Eyaya ecuea epeeji ba meesahuaña quea ja'a nee ecue Chiiya ejjashahuabaquijji —jamaya Jesosa cua.

<sup>23</sup> Majoya aje o shajja'ajjajji cuana Jesosaa jama huohuime aca cua ba'a: —¡Quea bihui pocue, miquianaaya Eyacuiñajji ejjashahuabaqui'yojji bañajo! <sup>24</sup> E'e jojo nei eyaya miquianaya huohuaña jama ba'a: Yahuajo quea huiso Eyacuiñajji esohui huohuijji cuana, emeshi mese cuana pea'ai Eyacuiñajji ejjashahuabaqui'yojji ba nei nei sa cua. Ecuea esohui shajja'ajja nei nei sa cua pea'ai. Jamatii onajaya eya ba jjima cua, shajja'ajja jjima cua ecuea esohui. E'e, oya cuana shajja'ajja sa cua jiquio miquianaaya jjeya shajja'ajjaña —jamaya Jesosa cua.

*Esohui oe Samania dejja quea bame cuajo*

<sup>25</sup> Oe Jodio dejja Moisesija etehue'yo huohuijji poquia cua Jesosa dasiaa nisho. Huohui'ajja ca cua jama ba'a: —Jesosa, miya esohui huohuijji cuani, ¿yajja acuae po cajji Eyacuiñajji nijje eba'e tiitii'yojji so'o?

<sup>26</sup> Jesosa jama cua ba'a: —¿A'ya acuae Moisesiya tehue ca cua? ¿A'a pojja'a miquea ma esohui ba jjima?

<sup>27</sup> —De, ecuea eba, eya Moisesija etehue'yo huohuijji nei nei cuani. Ojaya esohui jama cuani ba'a: “¡Miyaya Eyacuiñajji quea jea nee nee acue! ¡Ojo nei oe jjashahuabaquicue; oya oe bihuiaecue ojjaña pojja!” Pea etehue'yo jamaya cua ba'a: “Eseya jjajaahua-naquiani. ¡Jama jaahuanameya oe acue mique doe cuana!” jama cua Moisesija etehue'yo yahuajo —jamaya cua ma esohui huohuijji.

<sup>28</sup> Jesosa jama cua ba'a: —E'e de, quea bame nee miquea esohui. ¡Ma esohui jayojjaya oe miyaya acue! Majoya aje miya Eyacuiñajji nijje eyajo ba'e tiitije'yo.

<sup>29</sup> Ma esohui huohuijji Eyacuiñajji nijje, pea cuana nijje pea'ai quea bihui nisho cua. Ojaya pea cuana boti'ama cua. Jamajjeya ohuaya Jesosa edasia'yojji nisho jama huohui'ajjame aca cua ba'a: —¿A'ya acuae ecue doe cuana? —ojaya ba jjima nisho cua.

<sup>30</sup> Jamajjeya Jesosaa esohui jama huohuime aca cua ba'a: —Oe Jodio dejja ba'enaje Jenosanenajo, poquinaje ejiojjijje Jenico huasijje. Ejiojjijje poquianijo siipojji cuana nequinaje ejiojjijo sii epojji. Siipojji cuaa dejja eshema' nei cuiahuejjajeame acanaje e'aquiana jjeshe'yojji. Ojaya daqui sii ca'yonaje, de. Siipojji cuaa ma dejja jea cana'yonaje, beshahua nei emano'yo. <sup>31</sup> Majoya oe Jodio dejjaa, Eyacuiñajji nijje mimiani dejjaa ma dejja ecuiajeajja yejje canananaje. Bajea canananajeya aje jja ca oe. Jjequi sohuasohua'yo ajja jjaja cua. Poquia jjaja oe cua. <sup>32</sup> Quijje pea Jodio dejjaa yejje canananaje bajea canajeya aje jja ca oe pea'ai. Oya Eyacuiñajji equi jaahuanajji cua. Jjequi sohuasohua'yo ajja jjaja cuanaje. Poquia jjaja oe cua. <sup>33</sup> Quijje aje jjaja oe Samania dejja cueyanaje. Samania cuanaja Jodio cuana boti'ama. Jamatii jiquio Samania dejjaa Jodio dejja ecuiajeajja ba canaje. <sup>34</sup> Ohuaya ba majje shicui canaje. Majoya aje iyasohua ca'yonaje mona biajje, dojo canaje ejaachichajji equi yasijje. Majoya aje jaahuana canaje

sosema' tii. <sup>35</sup>Pea cahuijo Samania dejjaa bejjo quia canaje equi mese yasijje, o cahuinaje sosejje. Jama huohuime aca cua ba'a: “Eya poquije chachohua. Ma ecuiajeajaa dejja ca anije, ¡miyaya oya jaahuanacue! Ma'aje bejjo o jaahuana sosejje. Quijje eya cueje o'oya mi sosequia o'oyaa” jamaya cuanaje Samania dejja —Jesosa cua.

<sup>36</sup>Majoya Jesusaa Moisesija etehue'yo huohuijji jama huohuime aca cua ba'a: —Pea beca peejjima dejjaa ecuiajeajaa dejja ba canananaje. ¿Ache dejja acuae oja doe jayojja cuanaje?

<sup>37</sup>—Ma o jjequisohua'yojji cuanaje, Samania dejja ojaya doe jayojja cuanaje —jamaya oya cua.

—E'e de, e'e jojo nei. ¡Miyaya jamaya acue, pea cuana jama jaahuana meeya acue, mique doe jayojja acue! —jamaya Jesosa cua.

*Jesosa, Manta, Mania nijje pea'ai anicuanana cua*

<sup>38</sup>Jesosa o shajja'ajjajji cuana nijje Jenosanena huasijje poquije Mantaja equi yasijje dobiquinana cua ijia'ijjiaa. <sup>39</sup>Mantaja shehue, Mania Jesusaja esohui shajja'ajja sa cua. Jamajjeya Jesosa chipi nei ania cua oja esohui shajja'ajja neinei. <sup>40</sup>Mantaja cuacuacuacuaquija jjejojo Jesusaja esohui shajja'ajja jjima cua. Oya quea quene cua oja shehue nijje. Mantaa Jesosa jama huohuime aca cua ba'a: —Jesosa, eya ecue shehueja cuacuasahua jjima. ¡Huoojeacue oya e cuacuasahua!

<sup>41</sup>Jesosa ca oe jama cua ba'a: —Chojja, Manta, miquea ecuacuajjijo ca ca miña jjashahuabaquiani. Jamajjeya miya ecue esohuijo jjashahuabaqui jjima cuani. <sup>42</sup>Mania ca ca oe quea bame cuani, ohuaya ecuea esohui shajja'ajja neinei cani. ¡Mique shehue jayojja jama pocue! —jamaya Jesosa cua.

## 11

*¡Eyacuiñajji nijje jama mimime pocue!*

*(Mateo 6.9-15; 7.7-11)*

<sup>1</sup>Jesosa pea pojajjo mimia cua Eyacuiñajji nijje. Majoya aje cojjacahuijeyo majje o shajja'ajjajjiya Jesosa jama huohui'ajjame aca cua ba'a: —Emeshi Mese nei, ¡huohuicue iña miyaya achajja mimime acuae po cajji so'o! Yahuaajo Huaniya ona besameejji cuanajeya o shajja'ajjajji cuana huohui ca cua achajja mimime epojji Eyacuiñajji nijje. ¡Jamaya huohuicue ecuanaya!

<sup>2</sup>Majoya aje Jesusaa jama aca cua ba'a: —Jama mimimeya oe pocue Eyacuiñajji nijje ba'a: Eyacuiñajji, miya ecue Chii nei nei. Miya oe nei nei ani, pea mi jayojja chama'. Ecuea eba nei nei miya mimishi'ama nei nei. Miya ojjaña cuanaja Emeshi Mese nei cuani; ojjaña jaahuanajji cuani. Jamajjeya ojjaña cajjapeequiahua minijje.

<sup>3</sup>¡Quiacue mo ecuea bobi eba'ejji!

<sup>4</sup>¡Ecuanaajaya mimishi cuana cuijea'yocue!

Eya quene'ama pea cuana nijje; joya enijje quea mimishi cuani nijje.

Jamajjeya ecuea mimishi cuana oja'a quene pojji pea'ai!

¡A'a ecuanaja quea mimishi po meeji! Acua. ¡Jamaya mimicue Eyacuiñajji nijje! —jamaya Jesosa cua.

<sup>5</sup>Majoya Jesusaa o shajja'ajjajji cuana pea esohui ejjashahuabaqui meeji jama huohuime aca cua ba'a: —Miquianaya pojja'a mee nei poquije miquea epeeji equi yasijje mecashono nei. Miyaya huohuiñaquije jama ba'a: “Jjeya nei ecuea epeeji cue'yonaje.

<sup>6</sup>Chama' bobi ecuea equijo, oya ca ca quea shoe, de. ¡Che mo bobi quiacue ecuea epeeji nijje ebobajji!” jamaya cuaje miya pojja'a. <sup>7</sup>Majoya oya jamaya cuaje ba'a: “Chojja, de. Equiajji pojjeama mi, cahuijaa so'o ca ca iña, de. Ca'a'yonaje oya aña ecuea esecuejani ca mi quiajji”. <sup>8</sup>Miyaya huohui'ajja majamajaje ca mi ca oe quia caje. Ojaya epeeji oja pojjeama ca mi ca oe quia cani miya mi cauime yajje —jamaya Jesosa cua—. <sup>9</sup>E'e de, eyaya huohuinaje maya esohui miquea ebajji achajja mimime Eyacuiñajji nijje epojji. ¡Miquianaaya huohui majamajacue esecuejo nequia jayojjaa! Majoya Eyacuiñajjiya



miquianaya quia caje. ¡A'la Eyacuiñajji nijje mimi pajea'yoyji ohuaya miya saja'la caje'yo!  
<sup>10</sup> E'e, ojjaña cuaa Eyacuiñajji huohui'ajja canijo, Eyacuiñajjiya oya cuana quia caje'yo. Jamaya ma esohui epeejjijo, de. Oya poquinaje bobi sa'ajjaa, huohui'ajja majamaja canequinaje. Majoya aje bobi quia canaje. Jamaya aje Eyacuiñajjiya acaje miquianaa huohui'ajja majamajaje. <sup>11</sup> Miquianaja bacuaa nahuoojo huohui'ajja cajje, ¿ae quiaje? Peyo pojja'a. Chojja, miquianajaya equiajji pojjeama peyo, de. <sup>12</sup> Miquianaja bacuaa cachinajajo huohui'ajja cajje, ¿ae quiaje? Aji pojja'a. Chojja, miquianajaya equiajji pojjeama, de. <sup>13</sup> Miquianaya quea mimishi ba'yani. Jamatii miquianaja bacua nijje quea bame cuani, Eyacuiñajji ca ca mimishi'ama nei nei cuani. Ohuaya quea bame nee nee quia cani miquiaa huohui'ajjaje. Ohuaya miquiana huasijje Edojjoshahua Bame nei huoojea caje miquiaa huohui'ajjaje —jamaya Jesosa cua.

*Jesosa Edosiquiana etiiya quea sohui poja po mee cani poso —aca cuaa cua*  
 (Mateo 12.22-30; Macoso 3.20-27)

<sup>14</sup> Oe dejja mimi'ajja nequia cua eshahua oja yamijo nequi jojo. Oya poquia cua Jesosa que. Jesosaa eshahua cuayaqui mee ca'ya cua. Ma dejja eshahua cuayaqui'yajo mimico'ya cua, de. Majoya aje ojjaña cuana jama cua ba'a: —De, Jesosa quea sohui poja nee nee yaña.

<sup>15</sup> Pea dejja cuanaya jama siajje pomeya cua ba'a: —Edosiquiana etii nijjeya jjejojo, Jesosaa eshahua cuaya meequi ca'yonaje, Edosiquiana etii Meesemo nijjeya.

<sup>16</sup> Pea cuana jjashahuaba taiquia cua Jesosaja epeejji nisho epojji. Jesosa jama aca cuaa cua ba'a: —Ecuanaa ajjima aña Eyacuiñajjiya miya ca ca ameesahua caje pojja'a. ¡Jamajjeya amee'ajja socue oe! Majoya jama miya ajo, ecuanaa baje e'e jojo nei Eyacuiñajjiya miya huoojea canaje ecuana huasijje. Majoya aje oe ecuanaya jjapeequije minijje —jamaya cuana cua Jesosa Eyacuiñajjiya huoojea'yo pojjeama posojo.

<sup>17</sup> Jesosaja eba onajaya ejjashahuaba taiquijji. Jamajjeya aje Jesosaa jama tecueame oya cuana aca cua ba'a: —¡jjashajja'ajjaquicue oe! Joya emeshi mese ojo chachacoani cuaa shajja'ajja sa po ajjajo, ojee jjaquecuaqui majje jjaquecua iyaiyaquije'yo dejja cuana ma meshijo ba'e; chama'yo tii cuaje'yo. Huapa pojjeama cuana nijje jjacuiaquiajo chama' epeejji cuana cuaje'yo. <sup>18</sup> Jamaya pea'ai Edosiquiana etiiya Satanasaa pea eshahua ehoojeacuaya'yo jojjemo, dejja huoojea'yoyji pojjeama po'yoquiaye. Chojja, jama pojjeama ca coma. <sup>19</sup> ¿A'aya eyaya Edosiquiana nijjeya niñe cuana, pea eshahua cuana pea'ai huoojeacuayajeaña poso aña? Jamajjeya miquea epeejji cuanaa ¿ae nijje eshahua huoojeacuayajea cani? Eyacuiñajjiya asahua canijo, jamajjeya ojaya eba miquianaya ejo siajje cuani. <sup>20</sup> E'e, Eyacuiñajji nijjeya eyaya eshahua huoojeacuayajea yaña. ¡Jamajjeya bacue eya e'e jojo nei Eyacuiñajji, Emeshi Mese oe nei jjeya cuani tii! <sup>21</sup> ¡Bacue! ¿A'la dejja quea ca'a neeja equi yasijje dobiquijji oja aquiana siiya o jeyo jjima nequijo? Chojja, o jeyo majje ojaya aquiana cuana sii caje cuaa. <sup>22</sup> Jiquio ecua e'aquiana mese ebionei jeyo cani jama amajje eyaya eshahua cuana jeacuayajeaña. <sup>23</sup> Miquianaya shajja'ajja sa po ajja ecuea esohui, jamajjeya ecuea epeejji nei pojjeama miquianaya cuani. Miquianaaya ecuea esohui pea cuana huasijje huohui sa po ajjajo, jamajjeya miquianaaya pea cuana quea mimishi po mee sa aña, de —jamaya Jesosa cua.

*Eshahua dejjaja yami yasijje cue o'oyani*  
 (Mateo 12.43-45)

<sup>24</sup> Jesosaa esohui ejjashahuabaqui meeji huohui ca cua jama ba'a: —Eshahua dejjaja yamijo nequi cuayajeaqui'yo majje quea huesha poquinaje. Sa'ajja ca'yonaje pea enequi'yoyji. Jamatii ba'yo jjima cuanaje. Eshahua po'ayequequinaje o nequijji sa'ajja'yohua. Jamajjeya oya jjashahuabaquinaje jama ba'a: “Eya poquije o'oya huacuaya ma e cuayaquinaje yasijjeya, ma ecuea equi jayojja huasijjeya”. <sup>25</sup> Jamajjeya oya dejja huasijjeya cue o'oyanaje. Ojaya yami yasijje dobiqui'yonaje Eyacuiñajjiya epeejji pojjeama jojoya, ojaya eyami equi ecuiashaba jayojja jama, ehuaana bamebame jayojja equi se ejjama'. <sup>26</sup> Jamajjeya ma eshahua poquinaje pea eshahua cuana jjequiya onijje

enequi'yojji ma dejjaja yamijo. Oya cuana quea mase nee nee cuanaje. Oe nei yahua ca ca quea mase pishana cuanaje. Majoya aje ojjaña dobiquiajo ma dejja quea yeno nee nee cuanaje. Yahuaajo oe eshahua nequiahuajo ca ca quea yeno pishana cuanaje.

*¿Yajja acuae po cajji quea bihui epojji?*

<sup>27</sup> Jesosa mimianijo oe epona ojjaña yiyesama neijo nequi sohuicuaya cua jama ba'a: — Jesosa, Eyacuiñajjiya miquea enaese quea bihui capo mee ca'yahua, ohuaya miya cuayajo tii mee canajejo.

<sup>28</sup> Majoya aje Jesosa jama cua ba'a: —E'e, quea bame pishana. Eyacuiñajjiya esohui shajja'ajja nei nei majje ca ca oe quea bihui nee nee capo'yahua. Joya Eyacuiñajji niije jjapeequi neinei majje quea bihui nee nee capo'yahua. ¡Jamaya pocue quea bihui nee nee epojji! —jamaya Jesosa cua.

*Dejja mimishi cuaa Jesosa huohui'ajja ca cua*  
(Mateo 12.38-42; Macoso 8.12)

<sup>29</sup> Quea dejja huiso nee nee ejjachichacui nequia cua Jesosa niije. Majoya Jesosaa esohui jama huohuime aca cua ba'a: —Miquiaaya Eyacuiñajjiya esohui cajaa anaje. Jamatii miquianaya ba o'oya sa cuani eyaya yahuaajo anaje jayojja. Ecuea jamaya e'abeca'yojji pojjeama miquea ebajji eya Eyacuiñajjiya huoojea'yo. ¡Jjashahuabaquicue yahuaajo nei Eyacuiñajjiya Jjona jaahuana ca cua jai ai'aia sei aijo ba'e! <sup>30</sup> Jjona emano'yo jayojja cua. Majoya shequi o'oyanaje jayojja cua pea beca peejjima cahuime po majje jaiya ojjajea ca'ya cua. Majoya dejja cuana Ninebe cuiñajjiyo ba'e yasijje poquia cua. Oya jjashahuabaqui'yo aña cua Jjona eshequi o'oya jayojjajo. Jjashahuaba bame nequia cua e'e jojo nei Eyacuiñajjiya Jjona huoojea ca cua oja esohui huohuiya. Eya Jjona jayojjaya cuaje, eya mano'yo majje mei jjanijo jaa shequije o'oya pea beca peejjima cahuime po majje, miquiana jjashahuabaquijji Eyacuiñajjiya eya huoojea canaje miquiana huasijje. <sup>31-32</sup> E'e, yahuaajo Ninebejo ba'e cuaa Jjonaja esohui shajja'ajja majje mimishi pajea ca'ya cua. Jjapeequia cua Eyacuiñajji niije. Jjonaa esohui quea bame huohui ca cua. Jjeya eyaya miquianaya huohui bamebame yaña, de. Jamatii miquianaya ecuea esohui shajja'ajja sa po ajja. Jamajjeya Eyacuiñajjiya miquianaya jeajea caje'yo cuaqui yasijje shajjama' jojoya.

—E'e, jamaya yahuaajo cua ba'a: Eeno cuejjijje emeshi mese pona cua. Oya quea huesha nee nee cueya cua Sanomoja esohui shajja'ajjaa. Sanomo quea jjashahuabaqui ja'a pishana cua. Eya ca iña quea jjashahuabaqui ja'a nee nee cuani. Jamatii miquianaya ecuea esohui shajja'ajja sa po'yo ajja. ¿Yajjajo acuae miquianaya ma epona jayojja mi po'ajjani so'o? Jamajjeya Eyacuiñajjiya miquianaya jeajea caje'yo cuaqui yasijje shajjama' jojoya, de —jamaya Jesosa cua.

*Esohui ecojja cuaquijji jayojjajo*  
(Mateo 5.15; 6.22-23)

<sup>33</sup> Jesosa jama cua ba'a: —¿A'a miquianaya cuaquijji dedo majje capanequiaña eshajaa? Chojja. ¿A'a miquianaya enequia quehua nequia jeaja'a came? Chojja. E'e, eyajo nequia jeaja'a cani. <sup>34</sup> Miquianajaya ecojja cuaquijji jama, de. Miquianajaya ecojja quea ja'a cuanijo miquianaya poqui bameje. Miquianajaya ecojja ja'a'ama cuanijo epoqui bamejji pojjeama. Jamaya miquianajaya ejjashahuabaquijjiya quea ja'a cuanijo, ba'e bameje. Miquianaya jjashahuaba taiquianijo, miquianaya cuaquijji enequia quehua jayojja cuaje. <sup>35-36</sup> ¡Jamajjeya ma cuaquijji eyajo nequiasohua nequi jayojja jama jjashahuaba bamebamequimeya oe pocue! —jamaya Jesosa cua.

*Jesosaa Paniseo dejja cuana Moisesija etehue'yo huohuijji tecuea ca cua*  
(Mateo 23.1-36; Macoso 12.38-40; Noca 20.45-47)

<sup>37</sup> Jesosa mimipajea'yajo oe Paniseo dejjaa Jesosa iyaa ca cua ijja'ijjiaa ojaya equi yasijje. Jesosa dobiqui majje e'anijjijo anioquea cua. Oya jjametopo neineiqui jjima cua, Jodio etiquiaa acani jayojja ajjima aca cua. <sup>38</sup> Jamajjeya Paniseo dejjaa Jesosa ba majje

jjashahuaba taiquia cua jama ba'a: —E'e de, Jesosa quea tai cuani, eme topo neinei ajja, etiiquiaa jayojja jama ajjima acani, de.

<sup>39</sup> Jesosaja eba onajaya ejjashahuabaquijji; jamajjeya jama tecueame aca cua ba'a: —De, miquianaya, Paniseo dejja cuana jamatii esohui huohuijji nisho cuani, quea tai, de. Miquianaya joya caneco yiye topo jjimajo jayojja cuani. Jamaya miquianaaya dejja cuana jjashahuabaqui meeaña, miquianaya Eyacuiñajjija epeeji cuani poso acani dejja cuaa. Miquianaya ca mi ca ojaya epeeji pojjeama, ojaya miquianaya eba, de. Ojjaña miquianaya quea bame cuani poso acani. Miquianaya ca ca quea tai nee nee cuani; jjashahuaba quehuaquiani, de. <sup>40-41</sup> Miquianaya Eyacuiñajjijo jjashahuaba nishoquiani, ojaya epeeji nisho cuani. Jamajjeya beca cuaa miquianaya quea bame ba'e poso acani. Eyacuiñajjiya miquianaya quea bame nee jjashahuabaqui mee sa acani. Jamajjeya jja oe jonijje jjapeequicue e'e jojo nei epojji! Majoya aje miquianaya quea bame cuaje'yo.

<sup>42</sup> —E'e de, miquianaya Paniseo dejja cuana jjashahuaba taiquiani, de. ¡A'a quea dejja tai pojji! Shajja'ajjaña ajeya ca oe Eyacuiñajjija esohui, ojjaña ojaya esohui aje jje oe shajja'ajja jjima cuani, e'e nei. ¡Miquianaaya ojjaña Eyacuiñajjija esohui shajja'ajja jeyojeyocue! ¡Huapa pojjeama cuana quea jea acue, Eyacuiñajjiya ojjaña cuana quea jea acani jayojja oe acue! E'e de, ¡a'a pajea'yojji quea jea ajji! Jamajjeya miquianaya quea bame cuaje.

<sup>43</sup> —E'e de, miquianaya ca jja ca oe quea tai cuani, Paniseo dejja cuana. Jamatii miquianajaya equi ejjachichaquijjijo e'anjiji quea bame sa'ajjaña. Pea nijjeya aje jja mi ca oe quea bame jayojjaya cuani, majoya aje jja mi oe pea cuaa quea bame poso acani. Miquianaya ca jja mi ca sijjepojji, de. E'e, ejiojjijje pea'ai miquianaya po'ayequequijo dejja cuanaja esohui shajja'ajja sa cuani jama ba'a: “Paniseo dejja cuana ca jja ca quea bame nee nee, de”. Ma esohui ca jja ca e'e jojo nei pojjeama acani.

<sup>44</sup> —E'e miquianaya quea tai po majamajani. Miquianaya dejja equehua mojea'yojaa jayojja, ma onajaya ba jjimajojo quishi cani jayojjaya cuani. Pea cuana jjashahuabaquiani ma meshi joya quea bame poso acani. Jamaya miquiana ma emojea'yojaa jama cuani. Pea cuana jjashahuabaquiani miquiana quea bame, onajaya miquianaya ba jjima quea tai nee nee cuani. Miquianaya jjashahuabatai tiitiquiani; quea bame pojjeama cuani —jamaya Jesosa cua.

<sup>45</sup> Oe Moisesija etehue'yo huohuijji cuani jama cua ba'a: —Jesosa, miya pojja'a ecuaa nijjeya pea'ai tecuetecueani.

<sup>46</sup> Jesosaa oya jama huohuime aca cua ba'a: —E'e jojo nei eyaya miquianaya tecueaña. Miquianaya Moisesija etehue'yo huohuijji nisho cuani pea'ai, de. Miquiaaya pea cuana huasijje esohui quea camaja huohui nishoña. Jamatii miquianaya ma esohui jayojja ba'e ajja; ona asahua ajja.

<sup>47-48</sup> —E'e, miquianaya quea tai nee nee cuani, miquianaja etiiquiana jayojja, de. Miquianaja etiiquiaa Eyacuiñajjija esohui huohuijji quecua ca'ya cua jjashajja'ajjaqui ajjaa jjejojo. Jamatii miquianaaya cuia'asha poquia tiitiaña etiiquiaa quecua ca'ya cua shahuaba poquia tiitijji, equecua'yo sajaa quea pame epojji epajea'yo cuani jjejojo. Jamajjeya miquianajaya etiiquiana jayojja jama jjashahuabaquime cuani. <sup>49</sup> E'e, Eyacuiñajjija eba, jamajjeya ohuaya jama huohuime aca cua yahuajo ba'a: “Eyaya ecuea esohui huohuijji cuana, e shajja'ajjajji cuana huoojeaje pea cuana huasijje. Ecuea ehoojea'yo cuana beca cuaa quecua caje'yo nei nei. Beca ca mimi panajajije onijje” jamaya Eyacuiñajji cua. <sup>50-51</sup> E'e, miquianajaya etiiquiana huasijje huoojea ca cua Eyacuiñajjija huoojea'yo cuana. E'e, yahuajo miquianajaya etiiquiaa quecua ca'ya cua Eyacuiñajjija huoojea'yo cuana, de. Yahuajo Eyacuiñajjija esohuijo tehue ca cua Abenijo. Miquianajaya etiiquiaa Cainiya Abeni cuiahuejjajea ca'ya cua. Majoya oya jayojjaya quea huiso cuiahuejjajea ca'ya cua Eyacuiñajjija esohui huohuijji cuana. Quijje yejje nei Eyacuiñajjija etehue'yojo tehue ca cua ojaya pea esohui huohuijji, Sacaniajo. Oya Eyacuiñajji nijje mimiani cuiahuejjajea ca'ya cua cuaa Eyacuiñajjija equijo, aquiana dahuajeajji pejjejo, de. Jamajjeya eyaya miya e'e jojo nei huohuiaña jama ba'a: Jjeya

nei Eyacuiñajjiya miqúanaya quea nee nee po mee caje'yo ojjaña etiquianaja mimishi cuanajo, miqúanaya etiquiana jayojja cuani jojya. <sup>52</sup> E'e jojo nei miqúanaya, Moisesija etehue'yo huohuijji cuana quea tai nee cuani. Jamatii miqúanaya ca mi ca oe esohui huohuijji nisho, sijjepojji. E'e, miqúanaya Eyacuiñajji nijje jjapeequi ajja nei. Pea cuana Eyacuiñajji nijje jjapeequi sa cuani, miqúanaaya jjapeequi pajea meeyaña, de. Jamajoya miqúanaya quea nee nee po mee caje'yo quijje, de, quea nee tii tii cuaje'yo —jamaya Jesosa cua.

<sup>53-54</sup> Jesosa mimipajea'yajo Paniseo dejja cuana, Moisesija etehue'yo huohuijji cuana quea quene nee nee cua Jesusaja esohuijo. Oya cuana jjashahuaba taiquia cua. Ohuaya cuana Jesosa huohui'ajja neinei ca cua esohui quea tai ojaya yajji nisho, ejjajejanobiaquijji yasijje edojjiji nisho.

## 12

*Jesosaa esohui huohui ca cua ona jjashahuaba taiquianijo*

*(Mateo 10.26-27)*

<sup>1</sup> Quea dejja huiso nee nee ejjachichacui nequia cua Jesosa shajja'ajjajji. Jjiojji quishi canequia cuaa cua quea dejja huisohua jjejojo. Jesusaa o shajja'ajjajji cuana jama huohuime aca cua ba'a: —Paniseo dejja cuana jjashahuabatai majamajaquiani. Jamajjeya aje esohui huohuijji nisho cuani, Eyacuiñajji epeeji nisho cuani, de. Coya mi o jayojja po chana'. <sup>2-3</sup> Eyacuiñajjiya oya cuana ba cani ojaya epeeji nisho cuani. Ojaya ojjaña eba o jjashahuabaquiyojji cuani cuana. Eyacuiñajji eba ojjaña, de. Jamajjeya joya Eyacuiñajjiya quea ja'a po mee caje huiso tiya, quehua'ama cuaje'yo tii ojjaña ebaaji.

*¡A'a quea mete pojji dejja cuanajo!*

*(Mateo 10.28-31)*

<sup>4</sup> E'e ecuea epeeji nei, ¡a'a quea mete pojji ojjaña cuanajo, eshahua cuanajo pea'ai! Oya cuaa miqúanaya quecua caje'yo pojja'a. Jamatii miqúanajaya edojjoshahua mano jjima cuaje. <sup>5</sup> ¡Miqúanaya jja oe jjashahuabaquicue Eyacuiñajji, de! Shajjama' cuajo ohuaya miqúanaya mano mee'yo majje cuacui yasijje jeajea caje'yo miquea edojjoshahua.

<sup>6</sup> —E'e de, quea anohui huiso nee nee yani. Anohui beshahua nei sosema' quea huisojojo. Eyacuiñajjiya oya cuana pajea'yo jjima acani. Ojaya eba ojjaña. <sup>7</sup> Ohuaya anohui jaahuana cani, jamajjeya ohuaya miqúanaya jaahuana neinei cani pea'aiya, de. Ojaya esico miqúanajaya ehoojjaña. Jamajjeya ¡a'a pajea'yojji miqúanaya ohuaya nahue cani! Anohui ohuaya nahue cani pishana —jamaya Jesosa cua.

*¡A'a quea bicho pojji Jesosa nijje jjapeequi majje!*

*(Mateo 10.32-33; 12.32; 10.19-20)*

<sup>8</sup> Jesosa jama cua ba'a: —Ecuea epeeji cuaa ejo huohui cani jama ba'a: “E'e, eya ca iña bicho'ama Jesusajo. Eya ojaya epeeji nei nei, e'e jojo nei”. Jamajjeya eyaya Eyacuiñajji esohuidojojji cuana o que huohuije jama ba'a: “E'e, oya cuana ecuea epeeji nei, e'e jojo nei”. <sup>9</sup> Pea cuana ca jja ca quea bicho cuani ejo. Jamajjeya oya cuaa huohui caje jama ba'a: “Cho, eya Jesusaja epeeji pojjeama”. Jamajjeya eyaya Eyacuiñajji esohuidojojji cuana huohuije jama ba'a: “Cho, oya cuana ecuea epeeji pojjeama, cajaa” eyaya aje —Jesosa jamaya cua—. <sup>10</sup> Beca cuaa eya niñeba cani; Eyacuiñajjiya maya mimishi cuijea sa acani. Peaa pojja'a Edojjoshahua Bame niñeba cani, Eyacuiñajji ca ca maya emimishi cuijea'yojji pojjeama. Ma mimishi ani tiitiije'yo.

<sup>11</sup> —Pea cuaa miqúanaya dojo caje esohuinano mese ani yasijje, Jodio dejja etii ani yasijje ecuea epeeji jojo. Miqúanaya pojja'a quea mete nee nee cuaje. Miqúanaya jama jjashahuabaquije pojja'a ba'a: “¿Achajja shai huohuime acajji? ¿Achajja shai saja'ame aje?” ¡A'a jamaya jjashahuabaquijji! ¡Mete'ama nei onijje mimicue! <sup>12</sup> Edojjoshahua Bameya miqúanaya mimi bame meesahua caje esohuinano mese nijje. Quea bame cuaje miqúanaya —jamaya Jesosa cua.

*¡A'a bejjojo jjashahuaba majamajaquijji!*

<sup>13</sup> Oe dejjaa Jesosa jama huohuime aca cua ba'a: —Esohui huohuijji, ecuanaja chii mano'yonaje. Ecue o'ija che eya bejjo esejja quia'yo jjima ecue chiija quijjojea. Jamajjeya jama huohui'ajjame acue ecue o'i ba'a: “Che pa ¡chahua bejjo esejja quia'yocue!” acue —jamaya cuanaje oja chahua bejjo sa cuanijo.

<sup>14</sup> Jesusaa jama huohuime aca cua ba'a: —Chojja de, ¿yajjajo acuae moya jama huohui'ajjame aña? Eya ca iña mique chiija quijjojea bejjo quia'yohua cue pojjeama. Maya ecuea echacojji pojjeama, de. <sup>15</sup> Ojjaña dejja manojeyo quea bejjo huiso cuana, aema' cuana pea'ai. Miquea aquiana miquea bejjohua miya ba'e meesahua jjima acaje'yo, de. Jamajjeya ¡a'a aquiana bejjo pea'ai sa majamajajji! —jamaya Jesosa cua.

<sup>16</sup> Majoya Jesusaa jiquio esohui ebajji huohui ca cua jama ba'a: —Oe dejja quea bejjo huiso nee ba'enaje. Anoso que quea huiso nee nee cuanaje. Sejjajeyo'yo majje quea huiso nee nee cuanaje. <sup>17</sup> Oya jama jjashahuabaquinaje ba'a: “De, eya quea bihui nee, quea bejjo huiso nee nee cuaje. ¿Achejo shai eyaya anoso quea huiso nequijaje? <sup>18</sup> Eyaya pojja'a cajjajeajeaje'yo anoso nequijji, equi quea quemo nee nee iyaje'yo anoso quea huiso nee nee nequijaji, de. <sup>19</sup> Majoya anoso iyajeyo'yo majje eya quea bihui cuaje, ecuea bejjo quea huiso nee nee cuaje. Quea shequija huiso nee nee eya chachaco'yo jjima cuaje quea huiso jjejojo. Eyaya bobi quea huiso nee nee ijijaje quea bihui epojji” jamaya cuanaje ma dejja. <sup>20</sup> Majoya aje Eyacuiñajjiya ma mecajje huohui canaje jama ba'a: “De, miya ca ca niñepoqui cuanaje. Miya jjeya nei manojeyo. ¿Ajea acuae cuaje'yo miquea aquiana jiquio miya jaahuaña? Poquijeyo'yo miya jiquio mecajje. Chama'yo tii cuaje. Miquea aquiana, anoso, bejjo pea'ai dojo'yo jjima cuaje. Miya aema' poquije'yo cuaqui yasijje enijje jjapeequi jjima jjejojo” cuanaje Eyacuiñajji. Majoya aje mano'yonaje ma dejja; chama'yo tii cuanaje —jamaya Jesosa cua—. <sup>21</sup> E'e de, ma dejja jayojjaya miquianaya cuaje miya bejjojo jjashahuaba majamajaquianijo. Oe dejja jjashahuaba majamajaquiani ojaya bejjojo Eyacuiñajji oya jjashahuabaqui jjima cuani —jamaya Jesosa cua.

*Eyacuiñajjiya ojaya epeejji cuana jaahuana cani*  
(Mateo 6.25-34)

<sup>22</sup> Majoya Jesusaa o shajja'ajjaji cuana jama huohuime aca cua ba'a: —E'e jojo nei eyaya miquianaya huohuaña: ¡A'a quea yeno jjashahuaba tiitiquijji miquianajaya eba'ejjijo! Jama ba'a: “E'e pojja'a eya bobimajo manojeyo; bobi yasijje cuaje'yo. Ecuea daqui pojja'a huiñaje'yo, daquima' nei nei eya cuaje'yo”. ¡A'a jamaya jjashahuaba tiitiquijji! <sup>23-24</sup> E'e de, cuichojji cuana ca ca quea jaji nee ba'e. Oya cuana ca ca chachaco ajja, bobi chicha ajja equi yasijje quijje e'ijjia'yojji. Eseja Chiiya jja oya cuana jaahuana cani, de. Miquianaya ca ca oe ohuaya jaahuana neinei cani. ¡Jama jjashahuabaquimeya jja oe pocue ca quea bame eba'ejji, daquijo, bobijo! <sup>25</sup> ¿A'a miya quea ao cuaje'yo jjashahuabaquime cuani? Chojja, jamatiiya cuaje'yo. <sup>26</sup> Jamajjeya oe ¡a'a aquianajo jjashahuaba tiitiquijji! —Jesosa cua—. ¿Apiojji miquianaya jjashahuaba tiitiquiani miquianajaya daquijo? <sup>27</sup> ¡Bacue shasha tiiani! Shasha cuana chachaco ajja; oja daqui cuana soco ajja. Jamatii quea bame nee nee nequiani. Jamaya Eyacuiñajjiya shasha pohua mee cani. Jodioja emeshi mese yahuajo nei nequia cua Sanomo bajjani. Ohuaya daqui quea nahue nee nee huosho ca cua. Jamatii oja daqui quea bame pishana cua, shasha ca ca oe quea bame nee nee cuani. <sup>28</sup> E'e, Eyacuiñajjiya shasha cuana pohua mee cani quea bame nee. Jjeya shasha cuana enequi; mecahuajje yaa'yani, joca'yani; dahuajea cani cuaa pojja'a, chama'yo tii cuani. Jiquio ecua Eyacuiñajjiya shasha quea bame nee pohua mee cani jamaya ohuaya e'e jojo nei miquianaya ba'e meesahua caje'yo quea bame nee nee. Miquianaya ojaya quea boti nee nee cuani. Miquianaya jjashahuaba taiquiani jama ba'a: “E'e pojja'a eseya jaahuana jjima Eyacuiñajji”. Cho, ¡a'a jamaya jjashahuabaquijji! —jamaya Jesosa cua.

<sup>29</sup> —E'e, a'a jama pea'ai jjashahuabaquime pojji ba'a: “¿A'ya shai che ijijaje? ¿A'ya shai che ishije; chama ena? ¿A'ya shai che ecuaa huoshoje?” <sup>30</sup> Ojjaña cuana Eyacuiñajjiya epeejji pojjeama cuana aquianajo jjashahuabaquiani tii tii. Eyacuiñajjiyo

jjashahuabaqui ajja. E'e jojo nei esejaya Chii eyajo ani miquianajaya aqui anaajo, eba'ejjijo jjashahuabaquiani. Ojaya eba ojjaña, de. Jamajjeya ohuaya miya jaahuana cani.  
<sup>31</sup> ¡A'a pea cuana jayojja pojji! ¡Jashahuabaquicue oe Eyacuiñajjijo! ¡Onijje oe jjapee tiitiiquicue! ¡Ojaya esohuio jashajja'ajja tiitiiquicue! Jamaya jjashahuabaquianajo ohuaya miqiana huasijje aqui ana eba'e meeji quia caje'yo —jamaya Jesosa cua.

*Jesosaa eseya ojo chacochoani quea huio sosequia caje'yo*

*(Mateo 6.19-21)*

<sup>32</sup> —E'e ecuea epeejji cuana, ¡a'a quea mete pojji Eyacuiñajji nijje jjapeequi majje! Ohuaya miquianaya quea bihui po mee caje. Ohuaya miquianaya ba'e tiitii mee caje'yo eyajo. <sup>33</sup> ¡Quiacue miqianaaya aqui ana aema' cuana huasijje! Miquianaaya quia jjima ajje miquianajaya aqui ana sii ca chana'; nojjo ca'yo majje huiñaje'yo. ¡Jjeya Eyacuiñajjijo chacochoani neineicue! E'e jojo nei ohuaya quijje miquianaya sosequia caje'yo quea huio nee nee eyajo. Miquianajaya esijji pojjeama, miquianajaya epo'yo tii tii. <sup>34</sup> E'e jojo nei miquianajaya aqui ana equijo jaahuanaña, jamatii jjashahuabaquiani miquianajaya equijo. Miquianajaya aqui ana ca ca eyajo jaahuanaña, jamatii jjashahuabaquiani eyajo eba'e'yojjijo —jamaya Jesosa cua.

*¡Acua epo oe anicue!*

<sup>35-36</sup> Jesosaa jama huohuime aca cua ba'a: —Shajja'ajjacue jiquio esohui ehuhui'yojo: Oe emeshi mese poquinaje cuiñajji yasijje. Ojo chacochoani cuaa emeshi mese ishoa'ajja canaje. Echacojjija ba jjima ache shono shai ojaya emeshi mese cueje o'oya. Jamajjeya daqui bame huosho canaje, cuaquijji jinequinaje pea'ai. Cahui jjima cuanaje ishoa'ishoanequi jjejojo. Emeshi mese cue'yojo, ojo chacochoani cuaa dobiqui mee ca'yonaje ojaya equi yasijje. Emeshi mese quea bihui cuanaje ohua ishoa'ajja ca'aninaje jjejojo. <sup>37</sup> Jamajjeya ojjaña ojee anioquenaje e'ijjia'ijjiajji. Majoya aje ojee ijja'ijjia majje ojaya echacojji cuana quea bihui nee nee cuanaje. <sup>38</sup> Jamaya oya cuana quea bame cuanaje ishoa'ajja neinei canequinajejo. Mecajje, mecashono, epojjajo pea'ai ishoa'ajja canequinaje, de. ¡Jamaya miquianaya pocue! ¡Ejo jja'ishoa'ajjaqui anicue! <sup>39</sup> E'e, jiquio jama cuaje ba'a: Equi meseya siipojji ache shono cueje poso acani. Ojaya eba jjojemo, ohuaya ishoa'ajja ca anime equi jaahuanajjiya. <sup>40</sup> Eya miquianajaya Edoe Mese, ¿ache nei eshequi nequijo eya miqiana que cueje o'oya ebajo ese? ¡Jamajjeya jja'ishoa'ajjaqui anicue! —jamaya Jesosa cua.

*Ojo chacochoani quea bame nee nee cua*

*(Mateo 24.45-51)*

<sup>41</sup> Penohua Jesosa jama huohui'ajjame aca cua ba'a: —Esohui huohuijji, ¿a'a jiquio esohui ecuanajaye nei ebajji? Ojjaña ebajji pojja'a ca coma.

<sup>42</sup> Jesosa jama cua ba'a: —Eyaya huohuinaje jiquio esohui onaa shajja'ajja caje huio tiija ejjashahuabaquijji. Shajja'ajjacue jama ba'a: Oe emeshi mese poquinaje pea cuiñajji yasijje. Poqui jjimahuaa ojo chacochoani huohui canaje pea ojaya echacojji bobajji. Ojo chacochoaniya emeshi meseja sohui shajja'ajja nei canaje.  
<sup>43-44</sup> Emeshi mese cue'yo majje quea bihui cuanaje ojo chacochoani quea bame nee nee chacochoanajejojo. Jamajjeya emeshi meseya oya jama huohuime acanaje ba'a: “¡Miyaya jjeya ojjaña ecuea aqui ana cuana jaahuacue, miyaya ecuea esohui shajja'ajja neineinajejojo!” Jamajjeya ojo chacochoani quea bihui cuanaje. <sup>45</sup> Pea ojo chacochoani jjashahuabaqui jjima cuanaje. Jama jjashahuaba taiquime cuanaje ba'a: “Ecuea emeshi mese quijje nei cueje'yo, jamajjeya eya pea echacojji cuana huasijje bobi quia sa po ajja. Poquije ca iña ishi'ishiya”. Majoya oya ojaya pea echacojji cuana nijje jjacua majamajjaqui nequinaje, huoo majamajanequi jjejojo. Oya chacochoani jjima cuanaje. <sup>46</sup> Majoya aje oe ojaya emeshi mese cue'yonaje. Emeshi meseya ba caña'yonaje ojo chacochoani ehoojaa. Majoya aje quea quene nee nee poña'yo majje quecua caña'yonaje shajjama'jojo. Ohuaya jeajea canaje quea huesha. Jamaya Eyacuiñajjiya ojjaña mimishi cuana acaje'yo, huoojeajea caje'yo cuaqui yasijje —jamaya Jesosa cua.

<sup>47</sup> —E'e de, echacomeejjija eba emeshi meseja esohui, oya ca ca shajjama' nei nei cuanaje. Jamajjeya aje oe emeshi meseya echacomeejji cuia caña'yonaje. <sup>48</sup> Pea echacomeejjija ca ca ba jjima nei emeshi meseja esohui cuanaje. Jamajjeya emeshi meseya echacomeejji oe pojji cuia meeme acanaje oja ba jjimajojo. Jamaya Eyacuiñajjija esohui eba nei nei epo cajiashajja'ajjaquiahua ojaya epeeji nei nei epojji. Shajjama' jojoya ca Eyacuiñajjiya cuaqui yasijje jeajea caje'yo —jamaya aca cua Jesosaa.

*Beca cuana Jesosaja epeeji nei cuaje beca cuaa ca ca cajaa acaje*  
(Mateo 10.34-36)

<sup>49</sup> Jamaya Jesosa cua ba'a: —Eya cueyanaje ojjaña nijje jjapeequiya, beca cuana jjapeequije enijje, beca cuana ca ca enijje ejjapeequijji pojjeama. Jama huojameya eya acanaje Eyacuiñajjiya. <sup>50</sup> Eya quea nee nee cuaje'yo, mano mee caje'yo cuaa. Eya manocuai'yo sa cuani ojjañaja mimishi cuana cuijea'yojji sosejje. Quea camaja eya cuaje'yo, de. Mano'yo majje ca eya camaja'ama cuaje'yo. <sup>51</sup> ¡A'a jjashahuabaquijji eya cueyanaje ojjaña cuana ojjaña meshijo ojee quea bei ba'e mee'yohua! Chojja, de. Pea cuana quea mase cuaje ecuea epeeji cuana nijje. <sup>52</sup> E'e, jamaya cuaje. Oe equijo ba'e beca cuana ecuea epeeji nei, beca cuana ca ca ecuea epeeji pojjeama, Eyacuiñajjija epeeji nijje ba'e sa po ajja oya. <sup>53</sup> Ebacua ejja esohui ba epo ejeajji nijje ba'e sa po ajja ohua quea mimishi e'aca cuani jjejojo. Enaeseya oja bacua piona tecuea cani, ecuea epejjijojjo. Jamajjeya oja bacua piona onijje ba'e sa po ajja. Yano mese osecuajana nijje mimijajiani o esohui ba epo jojoya. Jamajjeya osecuajana onijje ba'e sa po ajja. E'e, jamaya miquianajaya equijo cuaje —jamaya Jesosaa aca cua.

*Ojjañaja eba ena cuaje jamatii Jesosa ba jjima cua*  
(Mateo 16.1-4)

<sup>54</sup> Majoya Jesosa jama cua ba'a: —Mecajjeahua quea ichi nee nequijo, miquianaya jama cuani ba'a: “E'e de, quea ichi nequi, ena cuaje, de”. E'e jojo nei ena cuani. <sup>55</sup> E'e de, jamaya pea'ai miquianaya cuani ba'a: “E'e de, eeno jjayejequiajo quiyo dobi'yani”. E'e jojo nei quiyo dobi'yani. <sup>56</sup> Miquianajaya eba ena cuanijo, quiyo dobi yanijo pea'ai. Jamatii beshahua nei miquianaya ca jja ca oe jjashahuabaqui jjima e cueyanajejo. ¡Miquianaya jja oe jjashahuabaquicue Eyacuiñajjija esohuijo! Jamajjeya eya miquianaaya baje —jamaya Jesosa cua.

*Pea esohui ejjashahuabaqui ja'ajji*  
(Mateo 5.25-26)

<sup>57</sup> —¿A'a miquianajaya eba quea bame eba'ejji? E'e pojja'a, jamajjeya jjashahuabaquicue jiquio esohuijo jama ba'a: <sup>58</sup> Miquiana nijje oe dejja quea quene nee nee cuajo miquianajaya aquiana sosequia jjimajojo, ohuaya miquianaya dojo caje sohuinano huasijje. Jamajjeya ¡dojo jjimahuaa aquiana miquianaaya sosequia'yocue! Miquiaa mi sosequia'yajje ohuaya miquianaya dojo caje sohuinano huasijje ejeadobia meeji. Majoya miquianaya sohuinanohua jeadobia caje. <sup>59</sup> E'e jojo nei ejeadobia tii jaaje. Ejeacuaya'yojji pojjeama miquiaa mi sosequiajje. Miquianaya sosequiajeyo'yajje ca mi ca oe jeacuaya caje'yo. ¡Jiquio jayojjaya oe pocue! Jamajjeya ¡jjeya Eyacuiñajji nijje jjapeequicue miquianaya mano'yo jjimahua, cuaqui yasijje jea jjimahua pea'ai! Jamajjeya miya cuaqui yasijje ejeadobiajji pojjeama —jamaya Jesosa cua.

## 13

*¡Jjapeequicue Eyacuiñajji nijje!*

<sup>1</sup> Majoya pea cuana poquia cua Jesosa baa. Beca cuaa jama huohui'ajjame aca cua ba'a: —De, jjeya nei Pinatohua, emeshi meseya Jodio dejja cuana quecua mee ca'yonaje. Ma dejja cuana Janinea meshijo ba'e poquinaje Jenosanena huasijje Eyacuiñajji bihuiaa. Eyacuiñajjija equi yasijje dobiqui majje ijjiacajji ehuone' cuana quecua canaje edahuajji. Eyacuiñajjija equijo nequi sohuinano cuaa dobiqui majje quecuajea ca'yonaje. Hua canaje quecua'yo cuanaja ena' ijjiacajjija enajo, de. Quea mimishi nee nee cuanaje

emeshi mese Pinato, de. ¿A'a ma Jodio dejja cuana quecua ca'yonaje quea mimishijojo? —jamaya poso aca cua.

<sup>2</sup> Jesosa jama cua ba'a: —Chojja, de. Miquianaya jjashahuaba taiquiani. Jodio dejja cuana quea mimishi cuani quecua'yo jjima. ¿Yajja ajjaja oe pea cuana Jenosanenajo ba'e mi mano'yonaje oya jayojjaya pea'ai ca jja coma? <sup>3</sup> Jamajjeya miquianaya mano'yo majje pea'ai Eyacuiñajji nijje jjapeequi jjima jjejojo cuaqui yasijje poquije'yo. <sup>4</sup> E'e, Sinoe cuiñajjijo pea dejja cuana mano'yonaje. Equi quea ao nee nee iya canaje meshi edahua ca'a. Meshi ca'a jjaajjajaqui'yo majje dejja cuiamo'ijea ca'yonaje meshiya. Quea huiso nee nee, 18 dejja cuana mano'yonaje, de. ¿A'a oya cuana quea mimishi nee neejo mano'yonaje poso añã? Chojja, de. ¿Yajja ajjaja oe pea cuana Jenosanenajo ba'e mi mano'yonaje oya jayojjaya pea'ai ca jja coma? Quea mimishi nee nee cuani; oya cuana eshe, de, mano'yo jjima. <sup>5</sup> Eyaya huohuije o'oya, miquianaya Eyacuiñajji nijje jjapeequi jjima po majje cuaqui yasijje poquije'yo, de —jamaya Jesosa cua.

#### *Esohui acui jjajjama' cuajo*

<sup>6</sup> Jesusaa jiquio ehuhui'yo jama huohuime aca cua ba'a: —Oe dejja acuijjajja banajji epo poquinaje que yasijje. Acui tii majje jjajjama' cuanaje, de. <sup>7</sup> Ma dejjaa ojaya echacojji jama huohuime acanaje ba'a: “De, pea beca peejjima shequiajame ca cuanaje ma acui. Jjajja ajja cuanaje. ¡Jajajea'yocue; pea acui bana'yocue!” <sup>8</sup> Ojaya echacojjiya jama huohuime acanaje ba'a: “Emeshi mese, ¡ishoa'ajjacue oe eshequiajame! Eyaya jaahuana neineije so'o. Meshi tio majje ana'aija see meshi tejee huanaje so'o. <sup>9</sup> Acui eya jaahuana neineiajje quea jjajja huiso nee nee cuaje pojja'a. Jjajjama' po o'oyajo oe cajajajea'yahua” jamaya ojaya echacojji cuanaje —jamaya Jesosa cua—. E'e, ma acui jjajjama' jayojja oe dejja jjapeequi jjima Eyacuiñajji nijje. Ma echacojjiya jjajja meesahua cani jama jayojja eyaya añã, dejja cuana jjapeequi meesahuaña Eyacuiñajji nijje —jamaya Jesosa cua.

#### *Jesosaa oe epona mo'aa jjapiqui meequi ca'ya cua*

<sup>10</sup> Ejomishocajji pojajajo Jesosa poquia cua Jodioja ejjachichaquijji equi yasijje esohui huohuiya. <sup>11</sup> Oe epona mo'aa ania cua jomajo. Edosiquianaja jjamo'aaqui mee'yo cua yahuaajo. Quea huiso nee nee, 18 eshequiajame epona ejjamo'aaqui'yo ania cua. <sup>12</sup> Jesusaa oya ba majje jama huohui'ajjame aca cua ba'a: —¡Epona, cuecue! Eyaya miya jjadaasapiqui meeje'yo.

<sup>13</sup> Majoya Jesosa que cueajo Jesusaa emeya napa cajje epi nei nequi'ya cua. Ma eponaa Eyacuiñajji bihuia ca cua. <sup>14</sup> Jesusaa ma epona jjadaasapi meequi ca'ya cua ejomishocajji pojajajo. Majoya aje Jodioja ejjachichaquijji equi jaahuanajji Jesosa nijje quenequenea cua. Dejja cuana jama huohuime aca cua ba'a: —Me oeje oe cahuime echacojji yani. ¡Ma pojja cuanajo cuecue ejjaajaqui'yojji! ¡A'a ejomishocajji pojajajo Jesusaja jjaajaqui mee'yohua cuejji!

<sup>15</sup> Jesusaa ma esohui shajja'ajja majje jama tecueame aca cua ba'a: —Chojja, ¡a'a jamaya mimijji! Miquianaya jama cuanaje ba'a: “¡A'a chacojji ejomishocajji pojajajo!” Miquianaya ca ca jiquio pojajajo chacochoqui. Miquea ana'ai ejomishocajji pojajajo ijia'ijia mee añã. Miyaya miquea ana'ai ejeyo nequi pichojeaña ena ishi meequijji. <sup>16</sup> E'e, jiquio epona mi jayojja, oe Jodio epona. Quea huiso nee nee, 18 eshequiajame Edosiquianaa jjamo'aaqui mee ca'ya cua, de. ¿Yajjajo acuaya mi cuayajea mee'ajjaqui'yaña so'o ejomishocajji pojajajo? ¿A'a mi o jjapiqui mee'yo ajja jjejojo jama cuani? ¿A'a miya jjashahuaba taiquiani jjejojo jama cuani? —jamaya cua Jesosa.

<sup>17</sup> Jesusaja esohui shajja'ajja majje o ñiñebajji cuana quea bicho po'ya cua. Beca cuana ca quea bihui cua Jesosa nijje, ma epona jjapiqui mee ca'yajo. E'e de, Eyacuiñajjiya Jesosa quea sohui poja po mee ca'ya cua.

#### *Esohui acui so' che biso neijo motasa sojo* (Mateo 13.31-32; Macoso 4.30-32)



<sup>18</sup> Majoya Jesusaa jama huohuime aca cua ba'a: —Ebionei Eyacuiñajji oe pojji dejjaja Emeshi Mese nei cuaje, quijje ca ca Eyacuiñajji ojjañaja Emeshi Mese nei cuaje, oya quea epeeji huiso cuaje. <sup>19</sup> E'e, oe motasa so' biso nei tii majje acui quea quemo jayojja cuani, huapeje cui quemajja. Cuichoiji motasa acuijo jaani. Ma eso' biso nei jayojjaya Eyacuiñajjija epeeji cuani oe pojji jayojjaya cuani ebionei. Majoya quea huiso nee nee ojaya epeeji cuaje motasa acui jayojjaya —jamaya Jesosa cua.

*Esohui ehuohui'yojji pahui shejje meeji*  
(Mateo 13.33)

<sup>20-21</sup> Pea esohui ehuohui'yo Jesusaa jama huohuime aca cua ba'a: —Eyacuiñajji ojjañaja Emeshi Mese nei cuaje pahui shejje yani jayojjaya. Jamaya oe epona pahui dahuajje cuanaje. Oe pojji nei eshejje meeji iya canaje. Majoya aje ohuaya jeahuahuo canaje quea huiso pohuipohui pahui yajji. Majoya aje ojjaña shejje'yonaje pohuipohui. Majoya aje quea huiso pahui cuanaje. Jamaya Eyacuiñajjija epeeji pahui shejje meeji jayojjaya cuani. Ebionei oe pojji epeeji cuana cuani, majoya aje pea cuana jjashahuabaqui mee cani Eyacuiñajjija epeeji epojji. Quea huiso nee nee po mee cani —jamaya Jesosa cua.

*Esohui ehuohui'yojji esecuejjani biso neijo*  
(Mateo 7.13-14, 21-23)

<sup>22</sup> Majoya aje Jenosanena huasijje poquije, Jesosa pea cuiñajji cuana huasijje dobiqui poquia cua sohui huohuiya. <sup>23</sup> Jesosa aniñaquei jjimahuajo pea cuiñajjijo ba'eya oya jama huohui'ajjame aca cua ba'a: —¿A'a oe pojji Eyacuiñajjija epeeji cuana poquije'yo eyahuasijje onijje ba'e'yohua?

Jesosa aje majoya jama cua ba'a: <sup>24</sup> —E'e de, yani oe esecuejjani biso nei edobiquijji eyahuasijje. Joya jjapeequi sa cuani enijje ma esecuejjani biso neijje dobiqui majje poquije eyahuasijje. Beca cuana ca ca poqui ajja eyahuasijje, enijje jjapeequi ajja jjejojo. <sup>25</sup> E'e, oya oe equi mese jayojja. Equi meseya esecuejjani ca'a ca'yonaje, beca cuana edobiqui cuajeje. Majoya esecuejo tii nequijeaje. Oya cuana jama po'ajja nequinaje ba'a: “Equi mese, ¡ca'apejocue ecuana edobiquijji!” Equi mese jama cuanaje ba'a: “Chojja, ecuea miquianaya ba jjima, de”. <sup>26</sup> Majoya oya cuana jama po'ajja nequinaje ba'a: “De, ecuanajaya miya eba, minijje ijja'ijjianaje. Miyaya esohui huohuinaje ecuanaja meshijo”. <sup>27</sup> Majoya aje oya jama cuanaje ba'a: “Chojja, ecuea miquianaya ba jjima. ¡Poquicue quea huesha, quea mimishi nee nee mi ca cuanaje! Miquianaya ecuea epeeji cuana pojjeamajojo, dobiqui mee jjima añá”.

<sup>28</sup> E'e de, miquianaya ma dejja cuana esecuejo nequi tii tii jayojja cuani. Miquianaya dobiqui sajo pa neineije'yo; miquianaya quea yeno nee nee cuaje'yo. Jamaya aje nequiana esecuejo nequi cuaje ba'a: “Ecuea etiquiana ca dobiquia cua, e'e jojo nei oya cuana Eyacuiñajjija epeeji cua. Oya bajjani cua ba'a: Amajama, Isaaca, Jacobo, Eyacuiñajjija esohui huohuiji nei cuana pea'ai. Jjeya Eyacuiñajji nijje nequi. Ecuana capoqui'yahua eyahuasijje”. Cho, miquianaya poqui ajja; quea yeno nee nee cuaje'yo. Shajja'ajja sa po ajja cuanaje ecuea esohui, Eyacuiñajjija esohui pea'ai. <sup>29</sup> Ojjaña dejja joya enijje jjapeequi jjima dobiqui ajja tii eyahuasijje. Ojjaña meshijo ba'e Eyacuiñajji nijje jjapeequiani eyahuasijje poquije'yo. Jomajo onijje ijja'ijjiaje quea bihui epojji. <sup>30</sup> E'e, jjashahuabaquicue jiquio esohuijo jama ba'a: Beca cuana jjeya ona huoojea'yojji cuani eyajo ona huoojea'yojji pojjeama cuaje'yo. Joya jjeya ona huoojea'yojji pojjeama ca ca eyajo ona huoojea'yojji nei nei cuaje'yo e jayojja —jamaya Jesosa cua.

*Jesosa quea yeno cua Jenosanenajo ba'eca cuanajo*  
(Mateo 23.37-39)

<sup>31</sup> Majoya aje Paniseo dejja cuana Jesosa que cueya cua onijje mimiya. Majoya aje oya cuana jama cua ba'a: —¡Poquicuaajicue oe, miya emeshi meseya, Enodeya, quecua sa acani!

<sup>32</sup> Majoya aje Jesusaa jama aca cua ba'a: —Cho, ¡miquianaya jja ca oe poquicuaajicue emeshi mese yasijje, Enode yasijje; oya dejja quea mase nee nee! Jjeya jiquio pojja,

mecahuajje pea'ai eyaya eshahua quea mase cuayaqui mee'yaña, emano cuana jaa jjaajaqui mee'yaña. Ma mecahuajje acua cuaje'yo ecuea echacojji; jjamaya Enode aquicue! <sup>33</sup> E'e jjeya ca iña poquije'yo Jenosanena huasijje. Jomajo eya manoje'yo ma ecua Eyacuiñajji esohui huohuijji cuana mano ca'ya cua huasijjeya.

<sup>34</sup> Majoya Jesosa quea yeno nee nee cua Jenosanenajo ba'e cuanajo. Oya jama cua ba'a: —Jodio cuana Jenosanenajo ba'e, miqianaya ecuea quea jea nee nee. Jamajjeya eya miqianajo quea yeno cuani. E'e, miqianaaya aje oe Eyacuiñajji esohui huohuijji quecua'ya cua; ojaya ehoojea'yo cuana jajahuejjajea'ya cua meiya pea'ai. ¡Bacue! Oe cachina enaeseya ebacua ejaahuanajji huojje cani. Jama jayojjaya eyaya miqianaya iyaa sa neineaña e que ejaahuanajji. Jamatii miqianaya enijje jjapeequi sa po ajja. <sup>35</sup> Jamajjeya eya quea yeno nee nee miqianajo cuani. Miquianaaya Eyacuiñajji eya pea'ai cajaa anaje. Jamajjeya ohuaya jaahuana ajja miqianajaya cuiñajji Jenosanena. Jamatii miqianaaya nei jaahuanaje; ba'ajja, quea camaja cuaje. Miquianaaya eya cajaa anaje, jamajjeya eba beca'yojji pojjeama mo nequianajaya. Miquiaaya eya cue o'oyajo jama aje ba'a: “Miya Eyacuiñajji huoojea'yo ojjaña jaahuanajji. Eyacuiñajjiya miya cajaanahua cahua quea bame” jamaya miqianaya cuaje quijje —jamaya Jesosa cua Jenosanenajo ba'e cuana nijje.

## 14

### *Jesosaa oe dejja eshejee tii tii nequi shacuashacua mee ca'ya cua*

<sup>1</sup> Oe ejomishocajji pojajajo Paniseo dejja etiiya Jesosa iyaa ca cua ijja'ijjiaa. Jamajjeya Jesosa poquia cua oja equi yasijje. Pea Paniseo dejja cuana Moisesija etehue'yo huohuijji cuana pea'ai poquia cua oja equi yasijje ijja'ijjiaa. Oya cuana Jesusajo jama jjashahuaba taiquime cua ba'a: —Jesosaa pojja'a oe jjaajaqui mee caje'yo ejomishocajji pojajajo; ba'ajja.

<sup>2</sup> Jesosa pejeje o e dejja quea mano nee, eshejee tii tii nequia cua. <sup>3</sup> Jesosaa oya cuana jama huohui'ajjame aca cua ba'a: —¿A'a ya che jjaajaqui mee'yome jiquio ejomishocajji pojajajo? E'e pojja'a, chojja pojja'a. ¿A'ya acuae miqianaya jjashahuabaquiani so'o?

<sup>4</sup> Oya cuana mimi jjima nequia cua Jesosa bahuejjajji nisho. Majoya aje Jesosaa ma dejja eshejee tii nequi napa ca cua emeya. Ma dejja shacuashacua mee ca'ya cua. Jesosaa oya jama huohuime aca cua ba'a: —¡Poquicue miquea equi yasijje!

<sup>5</sup> Majoya Jesosaa Paniseo dejja cuana jama huohuime aca cua ba'a: —Miqianaya chacochoani ejomishocajji pojajajo. Bacue miquea ebacua, ana'ai pojja'a ejomishocajji pojajajo jjani quea doe yasijje oquequajjo, miqianaaya jjequisohuaje'yo. Jamaya miya chacochoani ¿a'a e'e? E'e jojo nei. Jama jayojjaya shacuashacua mee'yomeya eyaya anaje —jamaya Jesosa cua.

<sup>6</sup> Paniseo dejja cuana jjashahuabaquiequi jjejojo, mimi jjima nequia cua.

### *E'ijja'ijjajji equi yasijje iyaa ca cua*

<sup>7</sup> Majoya Jesosaa Paniseo dejja cuana nijje ijja'ijjiaa cueaniya ba ca cua Paniseo dejja cuana e'anijji bame bame sa'ajja cuequi. Ba majje jama huohuime aca cua ba'a: <sup>8</sup> —Oe equi meseya miqianaya pojja'a iyaa caje ijja'ijjiaa. ¡A'a e'anijji quea bame sa'ajjajji! <sup>9</sup> Equi meseja epeejji nei cueje, ca'ani'yahua ma e'anijji bame bamejo o pejeje. Jamaya miqianaya nijje mimije ba'a: “¡Nequisohuacue miya; poquicue pea e'anijji yasijje! Ecuea epeejji ca jiquiojo ca'ani'yahua”. Quijjejjenei nequi e'anijjijo anioque'yo majje quea bicho miya cuaje ojjaña ba caje'yo jjejojo. <sup>10</sup> E'e de, jamajjeya miqianaya iyaa cajje ijja'ijjiaa, janioquecua pea cuana nijje quijjejjenei nequi e'anijjijo! Majoya ma equi mese cueje mi que pojja'a, jama huohuime aca ba'a: “¡Miya cuecua e'anijji bame yasijje e pejeje!” Majoya pea cuaa ba caje miya anijji bamejo ani. Jamajjeya miqianaya quea bihui nee cuaje. <sup>11</sup> Jamaya cuaje miqianaya. Eyacuiñajji eba ojjaña jama cuani. Miquianaya jama jjashahuaba taiquime cuani ba'a: “Eya che oe ese eja quea bame nee nee cuani”. Cho, Eyacuiñajji eba miya. Miquianaya jja oe jjashahuaba bamebamequicua jama ba'a: “Eya ca iña pea cuana ba'e meesahua sa cuani oya cuana

quea bame epojji”. Majoya aje Eyacuiñajjiya miquianaya quea bame ba'e meesahua caje. Majoya miquianaya dejja quea bame nee nee cuaje —jamaya Jesosa cua.

<sup>12</sup> Majoya Jesosaa Paniseo dejja etii jama huohuime aca cua ba'a: —Jamatii miquea bobi quea huiso anijo, miquea huapa pojjeama, miquea epeeji nei pea'ai miyaya iyaaña ijia'ijjiaa. <sup>13</sup> Jamajjeya miya ohuaya iyaa caje esosejjeya. ¡A'a jama amajamajaji! ¡Iyaacue aema' cuana, jeo'ajja cuana, poquideja cuana, cojjama' cuana iyaacue bobi ijiaa pea'ai! <sup>14</sup> Ohuaya nequiana ca ca sosequia jjima miya acaje. Majoya miyaya ma jayojja ajo Eyacuiñajjiya miya quea bihui nee po mee caje. Quijje miya eyajo ba'eje'yo Eyacuiñajji nijje. Majoya aje Eyacuiñajjiya miya eyajo sosequia caje'yo quea huiso nee —jamaya aca cua Jesosaa.

*Esohui ehuhui'yo ojee e'ijjia'ijjiajji*

(Mateo 22.1-10)

<sup>15</sup> Oe dejjaa Jesosaja esohui shajja'ajja majje Jesosa jama huohuime aca cua ba'a: —Ojjaña quea bihui cuaje eyajo ojee ijia'ijjiani Eyacuiñajji nijje oja epeeji cuana nijje pea'ai.

<sup>16</sup> Jesosaa jama huohuime aca cua ba'a: —E'e jojo nei, ca joya eyahuasijje poquije'yo quea bihui nee cuaje. Jiquio esohui ehuhui'yojo ca jama jjashahuabaquime pocue ba'a: Oe emeshi meseja bobi quea huiso aninaje. Iyaa canaje dejja cuana quea huiso nee nee. <sup>17</sup> Bobi acua cuajo, huoojea canaje ojaya echacojji ona iyaaa. Iyaa canaje ojaya epeeji cuana. <sup>18</sup> Oe epeeji jama cuanaje ba'a: “De, eya poqui sa po ajja, jjeya jjeshenaje meshi, eya poquije ca iña meshi baa”. <sup>19</sup> Pea epeeji jama cuanaje ba'a: “De, eya poqui sa po ajja pea'ai, eyaya jjeshenaje me oeje huisome ana'ai acuijo she'anayijaca. Poquije ca iña ana'ai jaahuanaa”. <sup>20</sup> Pea epeeji jama cuanaje ba'a: “De, poqui sa po ajja ca iña; oya ca iña jjeya nei jjahuanaquiaña”. <sup>21</sup> Echacojjiya oja meshi mese yasijje cue'yo majje huohui canaje ojjañaja esohui ma cue ajja cuanaje cuanaja. Majoya emeshi mese huohui cajje quea quene nee cuanaje. Huoojea ca o'oyanaje ojaya echacojji pea iyaaa. Jama cuanaje ba'a: “¡Jjequicue jjeyahua nei pea cuana! ¡Iyaaquicue aema' cuana, jeo'ajja cuana, poquideja cuana, cojjama' cuana pea'ai ecuea equi yasijje bobi ijiaa”. <sup>22</sup> Majoya echacojji poquinaje pea jjequiya. Jjequi majje echacojjiya emeshi mese jama huohuime acanaje ba'a: “Emeshi mese, eyaya pea cuana jjequinaje, e'anijji cuiñajeyo jjima cuanaje. Quea dejja huiso cue jjima, de”. <sup>23</sup> Jamajjeya emeshi mese jama cuanaje o'oya ba'a: “¡Poqui o'oyacue quea huesha nee nee; pea cuana ba'e yasijje iyaaquicue! ¡Cue meecue pea cuana: “Ecuea e'anijji cuiñajeyo jjima” acue! Ecuea equi cuio mee sa aña dejjaa. <sup>24</sup> Ecue epeeji cuana ca ca eyaya ebionei iyaa'ajjanaje, jamatii enijje ijia'ijjia jjima cuani” jamaya cuanaje emeshi mese —jamaya aca cua Jesosaa. Jamaya Eyacuiñajjiya dejja cuana quea huiso nee nee iyaa'ajja cani, jamatii oe pojji poquiani onijje ijia'ijjiaa.

*Quea camaja Jesosaja epeeji epojji*

(Mateo 10.37-38)

<sup>25</sup> Ojjaña Jesosa equijje aca poquia cua. Majoya Jesosa jjabajeaqui'ya cua. Ohuaya jama huohuime aca cua ba'a: <sup>26</sup> —¡Miquianaya enijje jjapee neinei qui sa cuani, eya oe quea jea nee nee acue! ¡Miquea huapa pojjeama oe pojji quea jea acue! Miquea enaese, mique chii cuana, mique huanase cuana, mique bacua cuana, mique doe, mique jjo'i jama, ¡quea jea nee ameya mo oe acue! <sup>27</sup> Miquianaya enijje jjapeequiajo pea cuana miquiana nijje mimijajije. E'e, jiquio ecua acui ecueata'apee quea camaja e'abojji jama jayojja enijje jjapeequiajo quea camaja cuaje. E'e de, pea cuaa miquianaya cuia sa acaje, quecua sa acaje pojja'a enijje jjapeepajeaqui'yo ajjajojo. Miquianaya ecuea epeeji nei po tiitiianijo jamajjeya e'e jojo nei miquianaya ecuea epeeji nei nei cuani. <sup>28</sup> ¡Ejo jjashahuaba neinei quicue enijje jjapeequi jjimahua, quea camaja epo cuahuajje! Miya quea nee, quea yeno pojja'a cuaje enijje jjapeequi majje. E'e jojo nei oe dejja equi iya jjimahuajo jjashahuabaquiani ma equi e'iyajji nishojo. <sup>29</sup> Majoya ohuaya cajaa acanaje mi iya majje. Beca cuaa niñeba canaje jama ba'a: <sup>30</sup> “E'e de, ma dejjaa iya'ajja canaje,

jjashahuaba neinei qui jjima jjejojo mi iyajeyo canaje”. E'e, jamaya enijje jjapeequi jjimahuajo jjashahuaba neinei quicue ejjapee tiitii qui jji enijje!

<sup>31</sup> —E'e de, oe emeshi meseya pea emeshi mese nijje jjaquecuaqui mee sa acanaje. Ebionei ohuaya sico canaje ojaya sohuinano cuana. Ojaya yani 10 mil sohuinano cuana, quea huiso pishana. Pea emeshi meseja ca ca sohuinano 20 mil cuanaje, quea huiso nee nee, de. Jamajjeya ma emeshi mese oe pojji pishana sohuinanojo jjaquecuaqui mee jjimahua jjashahuaba neinei quinaje. <sup>32</sup> Oya jama cuanaje ba'a: “De, quea camaja, ecuea oe pojji sohuinano yani”. Jamajjeya emeshi meseya pea emeshi mese yasijje oe sohuinano huohui pohua huoojea canaje jjaquecuaqui mee sa po ajjaa jjejojo. Onijje jjapeequi sa cuanaje.

<sup>33</sup> E'e, jamaya miqianaya jjapeequi sa cuani enijje pojja'a. ¡Jashahuaba neinei quicue ejo jjapeequi jjimahua! Quea camaja cuaje enijje jjapeequi majje —jamaya Jesosa cua.

### *Ehuohui'yo sanejo*

*(Mateo 5.13; Macoso 9.50)*

<sup>34</sup> Jesosaa pea esohui jama huohuime aca cua ba'a: —Sane quea bame nee nee. Jamatii sane sese'ama cua jjemo jeajea cajji. <sup>35</sup> ¿Achacua jeajea cajji? Quea huesha nee nee. E'e, quea huesha jea jjima ca ca meshi quea tai sane tejje cuaje, saneya acui tii mee jjima acaje. Jamaya miqianaya enijje jjapeequiani, majoya jjapeepajeaqui'e'yo pojja'a. Miquianaaya eya pajea'yo majje eyaya miqianaya jeajeaje'yo quea huesha nee nee sane jayojjaya. Jamajjeya jjashahuaba neinei quicue enijje jjapeequi jjimahua! —jamaya Jesosaa aca cua.

## 15

### *Ehuohui'yo ñajjajja epoquiquehua ba'yojjijo*

*(Mateo 18.10-14)*

<sup>1</sup> Dejja cuana emeshi meseja bejjo jjeshejji cuani poquia cua Jesosa que oja esohui shajja'ajjaa. Oya cuana jamatii quea mimishi nee nee cua. Pea dejja cuana quea mimishi nee nee poqui pea'aiya cua Jesosaja esohui shajja'ajjaa. <sup>2</sup> Paniseo dejja cuana, Moisesija etehue'yo huohuijji cuana jjaniñebaqui aña cua pea cuana nijje jama Jesosajo po aña cua ba'a: —De, Jesosa jjapeequiani dejja quea mimishi nee nee cuana nijje, ijja'ijja ani ona nijje, de.

<sup>3</sup> Ma esohui shajja'ajja majje Jesosaa esohui ejjashabaqui meejji jama aca cua ba'a: <sup>4</sup> —Oe dejja yaninaje, ojaya ñajjajja cuana quea huiso nee, 100 huisome. Oe ñajjajja poquiquehuanaje. Dejja poquinaje ñajjajja sa'ajja'yohua. Pea ñajjajja 99 huisome ojee ijja'ijjaqui jea canananaje. Sa'ajja neinei ca'yoquinaje, de. <sup>5</sup> Majoya aje ba'yo majje abo ca'yonaje. Abo majje dojo ca'yonaje o nequi'ijja yasijje, quea jaji nee nee po'yonaje. <sup>6</sup> Ñajjajja meseya ojaya epee'ijji jama huohuime acanaje ba'a: “Ba'yonaje eyaya ecuea oe ñajjajja, de. Jjeya nei enequi'yo, e'e de, jjeya eseya quea bihui epo'yo”.

<sup>7</sup> —E'e, ñajjajja epoquiquehua oe dejja quea mimishi nee nee jama jayojja cuani. Eyacuiñajji ma ñajjajja mese jayojja cuani. Jamatii Eyacuiñajjiya dejja mimishi cuana sa cani ojaya epee'ijji epojji. Ohuaya dojo sa cuani ma dejja eyahuasijje. Eyacuiñajji quea bihui cuaje oe dejja mimishiya ojaya mimishi pajea ca'yajo, Eyacuiñajji nijje jjapeequiajo. Ojjaña eyajo ba'eca cuana quea bihui cuaje'yo ma dejja mimishi Eyacuiñajji nijje jjapeequiajo —jamaya Jesosa cua.

### *Esohui ehuohui'yo eponaa bejjo ba ca'ya cuajo*

<sup>8</sup> Jesosaa pea esohui jama huohuime aca cua ba'a: —Oe eponaja bejjo ome miji pea'ai aninaje. Oe bejjo oquequehuajeaquinaje meshi yasijje equi yiyedojojo tiiya. Jamatii sa'ajja neinei ca'yoquinaje eponaa. Cuaqui'ijjiya bejjo jeaja'a'ajja ca'yonequinaje. Majoya aje cuiashaba'ajja ca'yonaje. Majoya aje cuiashaba'yo majje ba ca'yonaje bejjo. <sup>9</sup> Majoya aje quea bihui po'yonaje bejjo ba majje ojaya epee'ijji cuana huohui ca'yonaje jama ba'a: “E'e ee, eseya jjeya quea bihui epo'yo. Eyaya ba'yonaje bejjo ma oquequehuajeaqui

cuanaje” epona cuanaje. <sup>10</sup> E'e, ma bejjo oe dejja jayojja cuani. Oya quea mimishi nee nee jjapeequi sa cuani Eyacuiñajji nijje; ojaya mimishi pajea'yo sa cuani. Jiquio ecua epona bejjo ba majje quea bihui nee nee cuani jayojja Eyacuiñajji quea bihui cuani dejja mimishi onijje jjapeequiajo. Eyacuiñajji esohuidojojji cuana eyajo ba'e quea bihui nee nee cuaje oe dejja Eyacuiñajji nijje jjapeequiajo —jamaya Jesosa cua.

*Esohui huohui'yo oja chiiya oja bacua nijje jjabeiqui'ya cuajo*

<sup>11</sup> Pea esohui Jesosaa jama huohuime aca cua ba'a: —Oe emeshi meseja becanajji peai e bacua ejja nequinaje. <sup>12</sup> E bacua ejja shacuima' nequi epohua oja chii jama huohui'ajjame acanaje ba'a: “Ecue chii, ¡bejjo mo quia'yocue ecuea yajji; miya mano'yo jjimahua oe mo quia'yocue!” Jamajjeya oja chii jama cuanaje ba'a: “E'e ma'aje”. Ma echahua mesejame oja iya poquia quia ca'yonaje echahua mese que. <sup>13</sup> Majoya aje quijje pishana echahua meseya ojaya aquiana, meshi peai quia canaje bejjo sosejje. Ma bejjo sosejjeya poquinaje pea meshi yasijje quea huesha nee nee. Jomajo quea mimishi nee nee ba'enaje, de. Ohuaya bejjo quia jeyojeyo ca'yonaje huoo majamajjiya jjejojo. <sup>14</sup> Chama'yo tii ojaya bejjo po'yonaje, quea shoe nee nee po'yonaje peai. Ma meshijo bobi chama'yo tii cuanaje ejjeshejji, de. <sup>15</sup> Ohuaya oe dejjaja echacojji sa'ajja canaje. Oe dejjaa oya huoojja canaje cuichi nequi yasijje cuichi cuiñajji epojji. Majoya ohuaya cuichi cuiñaqui canaje. Chama'yo tii ojaya bobi po'yonaje, de. <sup>16</sup> Jamajjeya aje cuichija bobi ijia sa cuanaje quea shoe nee nee jjejojo, bobi peaja quia jjima nei nei cuanaje jjejojo.

<sup>17</sup> —Majoya aje jama jjashahuaba neineiqui'yome cuanaje ba'a: “E'e de, ecue chiija echacojji jomajo yani, bobi quea huiso yani jomajo, de. ¿Yajjajje shai eya jiquiojo quea shoe nee nee po'yo ani, de? <sup>18</sup> Eya capoqui'yahua ecue chiija equi yasijje. Eyaya oya jama huohuiñaqui'yome aje ba'a: —Ecue chii, eya quea mimishi cuanaje minijje, Eyacuiñajji nijje peai —eyaya añaquei'yo ecue chii. <sup>19</sup> Ecue chii enijje quea quene cuaje eya quea mimishi cuanajejojo. Ohuaya eya oja bacua pojjeama jayojja acaje. Jamajjeya mo eya ojaya echacojji capo'yahua. Eya quea shoe nee nee, aema' peai. Quea yeno nee nee eya cuani ecue mimishijo. E'e de, jjeya nei eya poquije'yo ecue chiija equi yasijje” jamaya jjashahuabaquinaje ma e bacua ejja.

<sup>20</sup> —Majoya aje poqui o'oyanaje oja chiija equi yasijje. Majoya oja chiiya oja bacua ejja ejiojijje quea huesha cueje'yo ba canaje. Jama cuanaje ba'a: “Ecue bacua ejja pojja'a joma cueje'yo”. Oya majoya quea jaji nee nee po'yonaje oja bacua ejiojijje cueje'yo ba majje. Majoya aje oja bacua que poquinaje; emeya cuiapashi cajjequi'yonaje; shemo tojjo cajjequi'yonaje quea jeajojo.

<sup>21</sup> —Majoya aje e bacua ejjaa oja chii jama huohuime acanaje ba'a: “Miya ecue chii nei nei, eya quea mimishi nee nee cuanaje minijje, Eyacuiñajji nijje peai, de. Miyaya pojja'a eya niñebaña, jamajjeya pojja'a eya miquea echacojji capo'yahua miquea e bacua pojjeama jayojja”.

<sup>22</sup> —Oja chii jama cuanaje ba'a: “Chojja, miya ecuea e bacua ejja nei, echacojji pojjeama”. Oja chiiya echacojji cuana jama huohuime acanaje ba'a: “¡Yecue ecue bacua ejjaja daqui eyacua nei nei, oe emehua o peai, ejiojji shejee peaiya oe yecue! <sup>23</sup> ¡Quecuacue oe ana'ai esei esejaya ojee e'ijjajji! Jjeya eseya ojee ijia'ijjiaje ecue bacua ejja cue'yonajejo. <sup>24</sup> Eya jjeya quea bihui ecue bacua ejjajo; oya emano'yo jayojja cuanaje, chama'yo tii, jjeya ca cue'yonaje ecue bacua ejja, eshe de. Oya ca ca ecuaquisho'yo cuanaje, jiquio pojja o ca eyaya ba'yonaje ecue bacua ejja”. Majoya aje bobi acua amajje ojjaña ijia'ijjianaje.

<sup>25</sup> —E doe mese chaco chaco aninaje quejo; oja ba jjima echahua mese cue'yonaje. Quijje oya cue'yonaje oja equi yasijje. Shajja'ajja caña'yonaje quea shajjaquijjo cuani ojjaña ijia'ijjiani ojee. <sup>26</sup> Ohuaya oe esho'i huohui'ajja canaje: “¿A'ya acuae po ca ani so'o?” <sup>27</sup> Jama esho'ia acanaje ba'a: “Mique chahua cue'yonaje quea aja nee nee, de. Mique chii quea bihui po'yonaje, de. Jamajjeya ojjaña ijia'ijjia mee cani ojee quea bihui'yohua jjejojo”.

<sup>28</sup> —Majoya aje oja doe quea quene nee nee cuanaje, pea cuana nijje ijia'ijjia sa po ajja cuanaje. Majoya oja chii cuayaquinaje edoe mese jjequidobias nisho. Dobiqúi ajja cuanaje oja bacua ejja equenequene neinei'yo jjejojo. <sup>29</sup> Majoya edoe mese oja chii nijje miminaje: “Eya chacochocho nei'yonaje ee nei, de. Quea shequiaja huiso nee nee. Eya mimishi'ama nei cuanaje minijje; jamatii eyaya miquea esohui shajja'ajjanaje, de. Miyaya che ecue chivo sho'i cuia jjima anaje ecuea epeeji nijje ojee e'ijjiajji. Miquea quea nahue cuanaje ejo, de. <sup>30</sup> Mique bacua ejja sho'i shajjama' cue'yajo ca jjaya ca oe che ana'ai quecua'yonaje. Oya quea mimishi nee nee cuanaje; pea epona cuana nijje jjacojjojeaqui nequi'yonaje miquea bejjo sosejje, de” jama cuanaje edoe mese.

<sup>31</sup> —Majoya oja chii jama cuanaje ba'a: “Miya ecue bacua ejja quea bame nee, miya eyaya jaahuana neineiaña. Ojjaña aquiana ecuea, miquea epo'yojji. <sup>32</sup> Mique chahua cue'yajo ecuanaya quea bihui po'yonaje. Oya ca ca emano'yo jayojja cuanaje. Oya cue'yonaje jjeya, eshe de. Oya ecuaquisho'yo jayojja cuanaje; jjeya nei ca ca eyaya oya ba'yonaje” jamaya oja chiiya oja bacua ejja etii acanaje. E'e de, mahuiso —jamaya Jesosa cua. Jamaya Eyacuiñajjiya quea jea ameya acaje dejja mimishi cuaa oja mimishi pajea ca'yajo, onijje jjapeequiajo pea'ai.

## 16

### *Esohui ehuhui'yo echacomeeji jjadasiaquia cuajo*

<sup>1</sup> Jesosaa o shajja'ajjajji cuana jama huohuime aca cua ba'a: —Oe emeshi mese quea bejjo huiso nee aninaje. Ohuaya shajja'ajja canaje ojaya echacomeejiya sii cani ojaya aquiana. <sup>2</sup> Jamajjeya huohui'ajja canaje ojaya echacomeeji jama ba'a: “Pea cuaa eya huohui canaje miya siipojji cuani. ¿A'a cuae jja miya siipojji nei so'o? ¡Huohui po'ajja socue! Jamajjeya miya ecuea echacomeeji nei pojjeama. ¡Yecue ma papenijo etehue'yo jaa ebajjani cuana!

<sup>3</sup> —Majoya aje echacomeeji jjashahuabaquinaje jama ba'a: “De, chama'yo tii ca ecua echacojji cuaje'yo, ecuea emeshi meseya eya cajaa aca'yonaje, de. Eya jjeya quea aa mano echacochochojji, de. Eya ca iña eme huo sa po ajja quea bicho jjejojo. <sup>4</sup> E'e de, jjeya nei ca iña jjashahuabaquinaje pea dejja cuanaja sosequia'yo jjimajo. Eyaya oe pojji sosejjesheje'yo. Majoya eya ecuea emeshi meseya huoojea cajo pea cuaa ba'e meesahua caje, enijje quea bihui cuaje. E'e de, eyaya tehueje o'oya ojjaña echacojji cuanaja emeshi mese sosequia jjima; oe pojji aje'yo” jamaya echacomeeji jjashahuabaquinaje. <sup>5</sup> Jamajjeya ohuaya pea dejja cuana iyaa canaje emimijji, ache huiso onajaya sosequia'yo jjima ebajji. Ohuaya jama huohui'ajjame acanaje ba'a: ¿Ache sose huiso acuae miquea sosequia'yo jjima so'o? <sup>6</sup> Oe dejjaa jama saja'ame acanaje ba'a: “Ecuea sosequia'yo jjima mahuiso ba'a: ecuea esei 100 natame, quea huiso nee nee eyaya jjeshenaje, de”. Majoya echacomeeji jama cuanaje ba'a: “E'e de, e'e jojo nei miquea papeni yani ecue tehue. Jjeya ca ca miquea sosequia'yo jjima nequi 50 natame, jamaya eyaya tehueje o'oya pea papenijo oe pojji esosequia'yojji”. <sup>7</sup> Majoya ohuaya pea dejja acanaje jama ba'a: “¿Ache huiso acuae miquea sosequia'yo jjima so'o?” Oya jama cuanaje ba'a: “Quea huiso nee nee, 100 natame anoso ai, de”. Echacomeeji jama cuanaje ba'a: “E'e de, jjeya ca ca papenijo tehueje o'oya 80 natame esosequia'yojji” jamaya cuanaje echacomeeji dejja cuana nijje, onijje quea bei epojji.

<sup>8</sup> —E'e de, quijje pishana emeshi meseya ojaya echacomeeji ae po ani shai ba canaje. Ba majje jama cuanaje ba'a: “E'e de, ohuaya eya dasia canaje. Jamatii oya jjashahuaba neinei'yonaje. Oya quea epeeji huiso nee nee po sa cuanaje o ba'e meesahuajji epojji”. Mahuisoya jiquio esohui —Jesosa cua—. <sup>9</sup> ¡Miquianaya ca ca jjashahuaba neinei'quicue quea bame epojji pea cuana nijje! Jamajjeya miya Eyacuiñajjiya ba'e meesahua caje. Majoya miquianaya mano'yajo, ohuaya dobiqúi mee caje'yo eyahuasijje eba'e tiitii'yojji.

<sup>10</sup> —Miquianaaya jjeya oe pojji aquiana jaahuana neineiaña, miquianaya quea bame po majje quijje eyajo miquianaya quea huiso jaahuana neineije'yo. Miquianaya oe

pojji jjadasiaquiiani quijje miquianaya jjadasiaquiiji nei nei cuaje. <sup>11</sup> Miquianaya oe pojji aquiiana jiquiojo jaahuana jjima año, Eyacuiñajjiya miquianaya aquiiana quia jjima acaje'yo eyajo. <sup>12</sup> E'e de, miquianaya pea cuanaja aquiiana jaahuana jjima año Eyacuiñajjiya miquianajaya aquiiana quia jjima acaje'yo eyajo —jamaya Jesosa cua.

<sup>13</sup> —E'e de, ¡miquianaya jja ca oe Eyacuiñajjiyo jjashahuaba majamajaquicue! ¡Oe nei neijo oe jjashahuabaquicue, aquiianajo pojjeama! Jamaya oe Eyacuiñajji nije jjapeequi sa cuanijo, ¡a'a aquiianajo jjashahuabaqui majamajajji! —jamaya cua Jesosa.

<sup>14</sup> Paniseo dejja cuana ma esohui shajja'ajja majje mimijajia cua Jesosa nije bejjo quea huiso sa cuanijo. <sup>15</sup> Jamajjeya aje Jesusaa jama tecueame aca cua ba'a: —Miquianaya jjashahuaba taiquiiani miquianaya oe dejjaya quea bame ba'yani poso cuani. Dejja cuaa ca ca oe miquianaya quea bame poso acani. Miquianaaya dejja cuana dasiaña. Miquianaaya ca ca oe Eyacuiñajji dasia jjima año, ojaya miquianaya eba nei nei, de. Miquianaya jama cuani boti'ama. E'e, joya miquianaaya quea bame poso año Eyacuiñajji boti'ama —jamaya Jesosa cua.

#### *Eyacuiñajjiya esohui ma ani tiitii'yome cuaje*

<sup>16</sup> —Yahuajo nei nei Eyacuiñajjiya esohui huohuiji cuaa huohui ca cua Moisesija etehue'yojo. Jama cua ba'a: “Quijje Eyacuiñajjiya huoojea'yo ojjaña jaahuanajji Emeshi Mese oe nei cueje”. Jjeya nei ca ca Huaniya enajo ona besameejji cuanaje huohui canaje Eyacuiñajjiya pea esohui jama ba'a: “Quito ojjaña Emeshi Mese cueje jjeya nei”. Jamajjeya quea huiso nee nee dejja cuana jjapeequi sa cuani Eyacuiñajji nije. <sup>17</sup> Jamatii Eyacuiñajjiya esohui e'e jojo nei cuani, quea bame cuani. Quijje ojjaña meshi cuana majameta cuana chama'yo tii cuaje, de. Eyacuiñajjiya esohui ca ca ma ani tiitii'yome cuaje —jamaya Jesosa cua.

#### *Esohui ejjahueiquijjiyo*

*(Mateo 19.1-12; Macoso 10.1-12)*

<sup>18</sup> Jesusaa esohui jama huohuime aca cua ba'a: —Oe dejjaya ehuanase huei cuani pea ehuanayojji jamaya pea cojjojji cuani. Oe dejja oe epona ehuei huana'yo majje pea cojjojji cuani pea'ai. Epona yahue hueijji cuani pea cojjojji pea'ai cuani. Jamajjeya dejja cuaa ¡a'a ehuanase hueijji, eponaa pea'ai a'a miquea yahue hueijji! —jamaya Jesosa cua.

#### *Ehuohui'yo oe dejja quea aquiiana huiso nee neejo Nasanojo pea'ai*

<sup>19</sup> Jesusaa pea esohui jama huohuime aca cua ba'a: —Oe dejja quea bejjo huiso nee nee cuanaje. Ojaya daqui quea bame nee; quea nahue nee nee oja jjeshe huosho caninaje. Bobi quea huiso aninaje ojaya equijo; ijji'ijji majamajanaje. <sup>20</sup> Pea dejja ca aema' cuanaje Nasano bajjani. Oya chiji nei nei po'yonaje; oya quea mano cuanaje. Jamatii Nasano dejja quea bejjo huisoja esecuejjani pejejo aniñaquinequinaje. <sup>21</sup> Jamatii ojaya chiji ñahuehuua sio canaje. Oya jama po'ajja aninaje ba'a: “¡Chemo bobi quiacue joya miquea ijji shaa ani!” jamaya Nasano po'ajja aninaje. <sup>22</sup> Nasano Eyacuiñajjiya epeejji cuanaje, jamajjeya mano'yo majje Eyacuiñajji ani yasijje poqui'yonaje. Nasano ani'yonaje Amajama pejejo, Jodioja etiquiana pejejo. Majoya aje ma dejja quea aquiiana huiso mano'yonaje pea'ai. Ohuajea canaje cuaa. <sup>23</sup> Oya Eyacuiñajjiya epeejji pojjeama, jamajjeya emano'yo ojjaña eshahuaja epeejji cuana poqui caquijje poquinaje cuaqui yasijje. Jomajo oya quea nee nee po'yoqui. Jomajo ohuaya Nasano, Amajama pea'ai ba canaje eyajo quea huesha nee nee. <sup>24</sup> Oya jama taaame cuanaje ba'a: “Amajama ecuea etiquiana, ¡che oe ejo jjashahuabaquicue! Eya quea quiyo nee nee po'yoqui jiquiojo, de. ¡Che jjo yana chopeshihuacue! ¡Huoojeacue Nasano ecue yana chopeshiya eya quea naba taja nee nee acue!” jamaya ma dejja quea aquiiana huiso cuaquijo nequi cuanaje Amajama nije. Nasano ca oe poqui jjima cuanaje.

<sup>25</sup> —Amajamaa eyajo jama huohuime acanaje ba'a: “De, miyaya pajea'yonaje pojja'a. Miya esheahua quea aquiiana huiso ba'enaje meshijo. Jamatii Eyacuiñajji nije jjapeequi jjima cuanaje. Nasano ca ca aema' quea mano po'yonaje pea'ai. Oya ca ca Eyacuiñajjiya epeejji cuanaje. Jamajjeya Eyacuiñajjiya oya quea jaji nee nequi mee ca'yani. Miya ca

mi ca oe quea yeno nequi'yo, quea quiyo nequi'yo. <sup>26</sup> Eyacuiñajjiya miya cue mee jjima acani ecuana nequi yasijje ojaya epeeji pojjeama cuanajejojo. Ecuana mi que poqui mee jjima acani pea'ai" jamaya cuanaje Amajama.

<sup>27</sup> —Ma dejjaya cuaqui dojjojo nequi jama taaame po nequinaje ba'a: "¡Che jjo oe ecue huapa pojjeama meshijo ba'e jjashahuabaqui meecue Eyacuiñajjiyo! ¡Huojeacue Nasano ecue chiiya equi yasijje huohuiya! <sup>28</sup> ¡Ecue chahua me oejje huiso tiiya jjashahuabaqui meecue Eyacuiñajjiyo acue! Eyacuiñajji nijje cajjapeequiahua cuaqui yasijje mi cueje'yo acue".

<sup>29</sup> —Majoya aje Amajama jama huohuime aca o'oyanaje ba'a: "Yani aje jja ca Eyacuiñajjiya esohui etehue'yo, Moisesiya tehue ca cua yahuajo nei nei. Pea cuaa tehue ca cua pea'ai yahuajo nei nei, de. Ma esohui oya cuaa cashajja'ajja cahua. Esohui shajja'ajja majje poqui'yo ajja cuaqui yasijje, mi jayojja epo'yoyji pojjeama" jamaya cuanaje Amajama.

<sup>30</sup> —Majoya aje ma dejja cuaquijo nequi jama cua ba'a: "Chojja de, oya cuana jjashajja'ajjaqui ajja. Ma esohui etehue'yojo jjashahuabaqui ajja. ¡Huojeacue oe emano'yoyjaa shequi o'oya esohui huohuiya! Majoya quea bame cuaje, de. Onaaya emano'yoyjaa shequi o'oyajo ba majje jjashahuaba neineiquije Eyacuiñajjiya esohuiyo. Jjapeequije'yo Eyacuiñajji nijje, de" cuanaje ma dejja cuaquijo nequi.

<sup>31</sup> —Majoya aje Amajama jama cuanaje ba'a: "Chojja de, jjashajja'ajjaqui ajja Moisesiya etehue'yojo, Eyacuiñajjiya esohuiyo, jamaya ohuaya shajja'ajja jjima acaje emano'yoyjaa shequi o'oya ca Eyacuiñajjiya epeeji epojji. Chojja, eyaya oya emano'yoyjaa huoojea'yoyji pojjeama esohui huohuiya" jamaya cuanaje Amajama eyajo nequi. E'e de, mahuiso —jamaya Jesosa cua.

## 17

### *Quea mimishi mi po o'oya chana'* (Mateo 18.6-7, 21-22; Macoso 9.42)

<sup>1</sup> Jesosaa o shajja'ajjajji cuana jama huohuime aca cua ba'a: —Jamatii pea cuaa ecuea epeeji eyacua quea mimishi po mee o'oya sa acani. Jamaya o cuajo Eyacuiñajji quea quene nee nee cuaje onijje. Ohuaya oya jeajea caje'yo cuaqui yasijje, de. <sup>2</sup> Jamajjeya jecuea epeeji quea mimishi epo mee cuahuaje oe mano'yocue! E'e, jonaaya mei enaajo yipeca mee majje bae quea doe yasijje jjajeaquejea meequi'yocue! Jamajjeya ja'a quea mimishi po mee'yoyji cuana!

<sup>3</sup> —E'e de, coya mi quea mimishi po o'oya chana'. Miquea epeeji quea mimishi po o'oyajo, ca oe jama huohuime acue ba'a: "Miya quea mimishi cuanaje. ¡A'a quea mimishi po o'oyajji!" Majoya oya pojja'a jama cuaje ba'a: "E'e de, eya quea mimishi cuanaje, jjeya ca ca eya quea mimishi epo'yoyji pojjeama minijje". Jamajjeya jmiqianaya ma mimishijo a'a jjashahuaba majamajaquijji! ¡Jjapeequi o'oyacue onijje! <sup>4</sup> E'e pojja'a ca ca oya mimijaji majamajaje minijje, majoya oya quea yeno nee nee cuaje ojaya mimishijo. Jamajjeya jmatii miquianaya oja mimishijo a'a jjashahuaba majamajaquijji! ¡Jjabeiqui o'oyacue onijje! —jamaya Jesosa cua.

### *Jesosaa o shajja'ajjajji cuana jjabahuejjaqui mee ca cua*

<sup>5</sup> O shajja'ajjajji cuaa Jesosa jama huohuime aca cua ba'a: —¡Ecuanaaya jjabahuejjaqui mee neineicue mijo e'e jojo nei ejjashahuabaquijji, mi jayojja eba'eji!

<sup>6</sup> Jesosa jama cua ba'a: —De, miquianajaya eya eba, eya miquea epeeji nei cuani. Eyaya miquianaya jjabahuejjaqui meenaje yahuajo. Miquianaya pojja'a ca mi ca oe jjashajja'ajjaqui pishananaje. Miquianaya ejo e'e jojo nei jjashahuabaqui pishana majje Eyacuiñajjiya miquianaya amee caje'yo ojjaña eyaya aña jayojja jama, ma dejjaa ajjima acani amee caje'yo pea'ai. E'e, miquianaaya acui jama yajjemo ba'a: ¡Acui, nequisohuacue; ena huasijje poquicue! Majoya acui nequisohua majje ena huasijje poqui'yome. Jamajjeya jmiqianaya ejo e'e jojo nei jjashahuabaquicue! —jamaya Jesosa cua.



*Oe echacojji emeshi meshija esohuijo cajjashajja'ajjaquiahua*

<sup>7-8</sup> Jesusaa pea esohui jama huohuime aca cua ba'a: —Oe echacojji chacojeyo majje cue'yonaje oja emeshi meseja equi yasijje. Jamatii hueahueanaje, oya ijia'ijia sa cuanaje, jomishoca'yo sa cuanaje. Oya jomishoca'yo jjima cuanaje; ijia'ijia jjima pea'ai cuanaje. Ma emeshi meseja oya jama huohuime acanaje ba'a: “¡Besaquicue, pea daqui huoshocue, ecuea bobi cuacuacue! ¡Majoya ecuea bobi yecue! ¡Eya ijiajeyoajo majoya miquea ya'yojjiya cuacua'yocue!” <sup>9</sup> ¿A'a ma emeshi meseja oja echacojji huohui caje oya quea bame cuanaje? Chojja, ma echacojjiya jamatii shajja'ajja cani emeshi meseja esohui. <sup>10</sup> Jamaya miquianaya Eyacuiñajji esohui shajja'ajja majje ¡a'a miquianaya quea bame cuani poso jjabaquijji! ¡A'a jamaya jjashahuabaquijji nequiana! ¡Jamatii miquianaya jjashajja'ajjaquicue oja esohuijo, ma echacojjiya jamatii shajja'ajja canequinaje, emeshi meseja esohui jayojja jama acanaje! —jamaya Jesosa cua.

*Jesosaa jjajaequi mee ca'ya cua ome miji pea'ai dejja batata epo'yo*

<sup>11</sup> Majoya Jesusaa Jenosanena huasijje poquijeya Janinea meshi yejje ca cua. Samania meshi sahuajje jjajejjequia cua. <sup>12</sup> Majoya aje oe cuiñajji yasijje Jesosa dobiqúi jjimahuajo, dejja batata epo'yo ome miji pea'ai mimi sa cua Jesosa nijje. Jamatii nequinaje quea cuiñajji huesha pishana onaja jeajea batata epo'yojojo. Jamajjeya oya cuana nequia cua quea huesha. <sup>13</sup> Onaaya Jesosa jama taaame aca cua ba'a: —Jesosa, miya ecuanaja Emeshi Mese, ¡ecuanaya che batata epo'yo jjajaequi mee'yocue!

<sup>14</sup> Jesusaa oya cuana bajea majje jama huohuime aca cua ba'a: —Eyaya miquiana jjajaequi meeje'yo, ¡poquicue Eyacuiñajji equi yasijje! Jama huohuime acue esohui huohuijji ba'a: “De, bacue, yahuajo pishana ecua batata epo'yo cua, jjeja ca ecua quea yami bame nee nee'yo”.

Majoya aje Jesusaa oya cuana jjajaequi mee ca'ya cua. Majoya aje oya cuana poquije jjayamibamequi'ya cua, quea bihui nee nee cua. <sup>15</sup> Oe dejja ca ca jjashahuabaquia cua Jesosa bihuijji ojaya eyami ejjajaequi mee'yojojo. Majoya aje quea bihui po'yo majje jjanojjaquia cua; Jesosa que cue o'oya cua. Jjanobajjima nei Eyacuiñajji bihuia ca cua. <sup>16</sup> Ecui'oshajjajo nequia cua Jesosa cojja nei; oya jama cua ba'a: —E'de, Jesosa, miyaya eya jjajaequi mee'yonaje, eya quea yami bame po mee'yonaje. Miya quea sohui poja nee nee —jamaya ma batata epo'yo cua. Oya Samania dejja cua, Samania meshijo ba'e, Jodio dejja pojjeama.

<sup>17</sup> Majoya aje Jesusaa ona nijje nequi jama huohuime aca cua ba'a: —¿A'a cuae ome miji pea'ai jjajaequi mee'yonaje? ¿Aecue beca cuana so'o? Oe nei ca ca oe cue'yonaje e bihuiaa, Eyacuiñajji bihuiaa pea'ai. <sup>18</sup> Ma dejja Jodio dejja pojjeama, Samania meshijo ba'e; beshahua nei Eyacuiñajji ojaya ba jjima. Jodio dejja cuana Eyacuiñajji epeejji nisho. Oya cuana quea yami bame nee po'yo sa cuanaje Eyacuiñajji bihuijji pojjeama.

<sup>19</sup> Majoya Jesusaa ma dejja jama aca cua ba'a: —¡Nequisohuacue; poquicue! Miyaya eya quea yami bame epo'yojji huohui'ajjanaje. Miya ejo e'e jojo nei jjashahuabaquinaje ecuea ejjajaequi mee'yojji. Jamajjeya eyaya miya jjajaequi mee'yonaje. E'e jojo nei miya jjapeequinaje Eyacuiñajji nijje.

*Achajja Jesosa Emeshi Mese nei epojji cueje*

(Mateo 24.23-28, 36-41)

<sup>20</sup> Paniseo dejja cuaa Jesosa jama huohui'ajjame aca cua ba'a: —¿Ache shono Eyacuiñajji huoojea'yo ecuea Emeshi Mese nei epojji cueje? ¿A'a ohuaya ojjaña emeshi mese cuana jeajea caje'yo?

Jesosa jama cua ba'a: —Chojja, ma jayojja pojjeama, de. Ojaya emeshi mese cuana ejeabichajeajji pojjeama. <sup>21</sup> Pea cuana pojja'a jama mimime cuaje ba'a: “Eyacuiñajji huoojea'yo cueyanaje pea meshi yasijje”. Sijje ca cuani, Eyacuiñajji huoojea'yo yani jjayahua nei, jaahuana cani ojaya epeejji cuana ojjaña Eyacuiñajji nijje jjapeequiajo. Oya Emeshi Mese cuani, de.

<sup>22-25</sup> Majoya Jesosa o shajja'ajjaji cuana nijje jama mimime cua ba'a: —Ecuea epeeji nei, jjeja Jodio dejja cuaa eya quecua sa acani. Majoya aje eyahuasijje eya poquije'yo. Jiquio tii eya miqiana nijje nequi ajja. Miquianaaya ca ca eya nequi mee sa aje'yo minijje. Cho, nequi ajja. Beca cuaa miqianaya jama acaje ba'a: “Cue'yonaje aje Jesosa jiquiacua”. Pea ca jama cuaje ba'a: “Jesosa yani jomajo”. ¡A'a eya sa'ajjaji onaa siajje acajje! Eya jocuama poqui jjima. E cue o'oyajo pojjeje jayojja cuaje, jeaja'ajeaje ojjaña meshi cuana. Majoya aje ojjaña meshijo ba'e cuaa eya ba neinei caje'yo. Eya meshi yasijje cueje o'oya ojjaña Doe Mese epojji. <sup>26-27</sup> Yahuajo Noe ba'ya cua. Oya dobiqui jjimahuajo bishe ai yasijje, pea dejja quea mimishi nee nee cua, jjashajja'ajjaqui sa po ajja Eyacuiñajjija esohuijo. Jamatii oya cuana ijia'ijia ania cua; ishi'ishi nequia cua; jjahuanaqui nequia cua. Majoya aje Noe dobiquia cua bishe ai yasijje. Ma dejja cuana ca ca jamatii jjashahuabaqui sa po ajja Eyacuiñajjijo. Oya cuana jama jjashahuabaquime pojea'ajja añña cua ba'a: “Eyacuiñajjiya eseya hui'i mee'yo jjima acaje”. Cho, majoya aje Eyacuiñajjiya ena quea quemo huoojea ca'ya cua; hui'i mee ca'ya cua ojjaña dejja cuana, de. Ma jayojjaya e cueyajo, dejja cuana jama cuaje. Quea mimishi tii tii po nequije.

<sup>28</sup> —E'e de, jamaya yahuajo Noti ba'ya cua tii. Dejja cuana quea mimishi nee nee cua. Jamatii ijia'ijia ania cua, ishi'ishi nequia cua, jjeshejjeshe nequia cuanaya cua, quiaquia nequia cuanaya cua, banabana nequia cuanaya cua, equi iya cuanaya po nequia cua. E'e de, Eyacuiñajjijo jjashahuabaqui sa po ajja nei nei cua. <sup>29</sup> Ma pojajajo Noti Sonoma cuiñajjijo ba'e cuayaquijajo Eyacuiñajjiya ena cuani jayojja cuaqui oque mee ca cua Sonomajo. Ojjaña quiyo jeyojeyo'ya cua; chama'yo tii cuanaje.

<sup>30</sup> —Jamaya ojjaña cuana Eyacuiñajjijo jjashahuabaqui jjima anijo, eya cueje o'oya. <sup>31</sup> Jamajjeya miqianaya pojja'a quejo chacochoqui e cue o'oyanijo, ¡a'a miqianajaya equi yasijje poquiji aquiana jjequi'yohua! ¡A'a jjashahuabaquiji miqianajaya aquiana cuanajo! <sup>32</sup> ¡A'a pajea'yoyji Notija ehuanase oja aquianajo jjashahuabaquia cua! Jamajjeya oya sane pojji po mee ca'ya cua Eyacuiñajjiya ojaya aquianajo jjashahuabaquiqui joya. Chama'yo tii oya po'ya cua. <sup>33</sup> Jamaya miqianajaya aquianajo jjashahuabaqui majamaja anijo miqianaya Eyacuiñajjijo jjashahuabaqui jjima cuaje, de. Jamajjeya miqianaya chama'yo tii cuaje'yo. E'e de, miqianaya ca ca jjashahuabaqui majamaja ani Eyacuiñajjijo ojaya epeeji cuaje; ba'e tiitiije'yo onijje.

<sup>34</sup> —E cue o'oyajo becanejjijji pea'ai cahuijaa, oe dojosohuaqui caje'yo, pea ca jeajea canaje'yo. <sup>35</sup> Beca epona quecuapasha cuequi oe dojosohuaqui caje'yo, pea jeajea canaje'yo. <sup>36</sup> Beca dejja quejo chacocho nequi oe dojosohuaqui caje'yo, pea ca jeajea canaje'yo Eyacuiñajjija esohuidojojjiya —jamaya Jesosa cua.

<sup>37</sup> Jesosa o shajja'ajjajiya jama huohui'ajjame aca cua ba'a: —¿Achacua acuae maya cuaje so'o, Jesosa?

Jesosa jama cua ba'a: —Miqianaya eya baje joya ecua be'o e'ihui yasijje oqueani jama —jamaya Jesosa cua.

## 18

### *Jesosaja esohui ehuhui'yo oe epona e'ahuemanojo*

<sup>1</sup> Jesosaa o shajja'ajjaji cuana huohui ca cua emimi majamajaji Eyacuiñajji nijje. Ohuaya jama huohuime aca cua ba'a: <sup>2</sup> —Oe cuiñajjijo oe sohuinano aninaje. Oya jjapeequi sa po ajja pea dejja nijje, Eyacuiñajji nijje pea'ai. <sup>3</sup> Oya cuiñajjijo tiya oe e'ahuemano aninaje. Ma e'ahuemanoja aquiana peaa sii ca'yonaje. Jamajjeya oya poqui majamajanaje sohuinano huasijje. Jamajjeya ohuaya jama huohui'ajjame acanaje ba'a: “¡Che iña yohua sahuacue ma aquiana onaa sii ca'yonajejo!” Poqui majamajanaje sohuinano huasijje huohui'ajjaa. <sup>4</sup> Jamatii sohuinanohua saja'a jjima acanaje, de. E'ahuemano pajeapaje'yo ajja nei nei cuanaje huohui epo tiitiinequiji jjejojo. Sohuinano jama jjashahuabaquime cuanaje ba'a: “E'e de, ma e'ahuemano pajeapaje'yo ajja nei nei, cue majamajani ca coma. Ojaya esohui shajja'ajja sa po ajja

nei nei ca iña. <sup>5</sup> Eyaya aje ca oya yohua sahuajeya ma ca oe oya cue'yo jjima tii epojji".  
<sup>6</sup> Jamajoyaya aje oe yohua sahua canaje —jamaya Jesosa cua.

—Sohuinano yohua sahua sa po ajja cuanaje. Jamatii ohua huohui'ajja majamaja cajje, ohuaya epona yohua sahua canaje. <sup>7</sup> E'e de, Eyacuiñajjiya sohuinano jayojja pojjeama. Jamatii oya shajja'ajja sa cuani miqianajaya emimi. Majoya ohuaya miqianaya yohua sahua bamebame cajje. Miqianaya ojjaña pojajjo mimi tiitiianijo, ohuaya miya shajja'ajja cajje'yo. <sup>8</sup> Ohuaya miya yohua sahua cajje'yo. E'e jojo nei ecuea esohui. Jamatii e cue o'oyajo, ¿ae cuaje dejja cuana? ¿A'a oya cuana mimi majamaja nequije Eyacuiñajji nijje? E'e pojja'a. ¿A'a jjapeequi tiitiinequije Eyacuiñajji nijje? E'e pojja'a, ba'ajja —jamaya Jesosa cua.

*Ehuohui'yo beca dejjajo oe quea bame pea bame'ama cuani*

<sup>9</sup> Jesosaa pea dejja cuana huohui ca cua ejjabahuejjaqui meejjijo. Ma dejja cuana jjashahuaba taiquia cua jama ba'a: —Ecuanaya ca quea bame nee cuani, beca cuana ca ca bame'ama ba'yani.

Jamajjeya ma dejja cuana Jesosaa jama huohuime aca cua ba'a: <sup>10</sup> —Yaninaje beca dejja. Oe dejja Moisesija etehue'yo huohuijji nisho cua, oya Paniseo dejja cuanaje. Pea dejja emeshi meseja bejjo chichajji cuanaje. Oya cuana poquinaje Eyacuiñajji equi yasijje bihuiaa, mimiya Eyacuiñajji nijje. <sup>11</sup> Paniseo dejja dobiqumajje nequiñaquinaje ojjañaja ebajji. Oya jjabajeasohuaqui majje Eyacuiñajji nijje mimi nishonaje ojjañaja eshajja'ajjajji jama ba'a: “E'e de, yani eya jiquiojo, eya quea bame nee nee cuani. Eya mimishi'ama nei, siipojji pojjeama, eya pea cojjojji pojjeama, beca cuana ca quea mimishi nee cuani. <sup>12</sup> E'e de, eya miquea esohui shajja'ajja majje quea bame cuani; miquea esohui jayojja ba'yani. Ecuea 10 bejjo yanijo, eyaya mi yasijje oe quiaña. Jamatii eyaya aña; quea bejjo huiso nee nee eyaya quiaña mi yasijje, Eyacuiñajji. Eya ma dejja bejjo chichajji jomajo nequi jayojja pojjeama, eya ca mimishi'ama nei, oya ca ca quea mimishi nee nee, de. E'e de, mahuiso Eyacuiñajji ecuea esohui” jama mimi nisho nequinaje onaja ebajji Paniseo dejja.

<sup>13</sup> —Majoya ca ma dejja bejjo chichajji cuani jjashahuabaqui majje miminaje Eyacuiñajji nijje. Oya quea yeno cuanaje ojaya mimishijo. Ohuaya Eyacuiñajji mimishi cuana cuijea mee'yo sa acanaje. Jamajjeya jama mimime cuanaje ba'a: “E'e de Eyacuiñajji, eya yani, eya quea mimishi nee nee cuanaje. Jjeya eya quea mimishi po maja sa po'yo ajja. ¡Jjapeequi sa cuani minijje, jamajjeya cuijea'yocue ecuea mimishi cuana! E'e de, mahuiso ecuea esohui, Eyacuiñajji, acua” jamaya cuanaje ma dejja.

—Eyacuiñajji nijje mimijeyo majje Paniseo dejja, bejjo chichajji cuani pea'ai poquinaje. <sup>14</sup> Paniseo dejjaja mimishi cuana cuijea'yo jjima cuanaje quea bame nisho ba'ejajjo. Eyacuiñajjiya bejjo chichajji cuanija mimishi cuijea ca'yonaje, o quea mimishi po maja sa po ajjajjo. E'e de, miqianaya Paniseo dejja jayojja po chana'. ¡Miqianaya ca oe pea dejja jayojjaya pocue! Majoya aje mi jjapee tiitiiquejje'yo Eyacuiñajji nijje —jamaya Jesosa cua.

*Esohui Jesosaa esho'iquiana ohua quea jea nee nee aca cuajo*  
*(Mateo 19.13-15; Macoso 10.13-16)*

<sup>15</sup> Dejja cuaa esho'i cuana dojo ca cua Jesosa que. Jama huohuime aca cua ba'a: —Jesosa, ¡miyaya ecuanajaya ebacua cuana napacue emeya! ¡Miyaya Eyacuiñajji huohuicue ecuanaja bacua jaahuanajji! —jamaya cua ejeajji cuana, enaese cuana pea'ai.

Jesosa shajja'ajjajji cuana quea quene cuanaje ma dejja cuana nijje. Jama cua ba'a: —¡A'a ye majamajajji miqianajaya bacua Jesosa que! —jamaya cua o shajja'ajjajji cuana.

<sup>16</sup> Jesosaa ca ejeajji cuana enaese cuana pea'ai jama huohuime aca cua ba'a: —¡Yacua oe miqianajaya bacua cuana yecue! Eyacuiñajjiya quea jea nee nee ebacua cuana, ecuea pea'ai. Oya cuana quea bame cuani, ojaya epeejji nei cuani. Jamajjeya ¡ebacua cuana a'a poqui meejji! ¡Ebacua cuana e que cacue'yahua, de! <sup>17</sup> ¡Miqianaya Eyacuiñajjiyo jjashahuaba cuajiquicue jiquio ecua esho'iquiana cuani jama! Jamajje e que poquije'yo eya eyajo ojjaña huoojja'yojji cuaje —jamaya Jesosa cua.

*Oe dejja quea aquiana huiso Jesosa nijje mimia cua  
(Mateo 19.16-30; Macoso 10.17-31)*

<sup>18</sup> Pea pojajajo oe dejja quea aquiana huiso poquia cua Jesosa huohui'ajjaa. Oya jama cua ba'a: —Jesosa, miya quea bame cuani, ¿achajja acuae po cajji Eyacuiñajji nijje eba'e tiitii'yojji so'o?

<sup>19</sup> Jesosa jama cua ba'a: —¿Yajjajo acuae moya quea bame añã so'o? Oe neiya ca jja ca oe Eyacuiñajji quea bame nee cuani. <sup>20</sup> Miquea eba ojaya esohui. Jamajjeya miya ba'e tii tii sa cuani onijje, jama shajja'ajjame ojaya esohui acue ba'a:

¡A'a pea pojjojjii pojji!

¡A'a dejja quecuajji!

¡A'a sii pojji; a'a siajje pojji!

¡Miquea chii, miquea enaese pea'ai shajja'ajjacue!

—jamaya Jesosa cua.

<sup>21</sup> Ma dejja quea aquiana huiso jama cua ba'a: —E'e de, jamaya eyaya anaje esohuyahuaa, jama tii tii sohuaqui ca ca iña. Eya oe dejja quea bame nee, de.

<sup>22</sup> Jesosaa ojaya esohui shajja'ajja majje jama huohuime aca cua ba'a: —A'yo sahua oe pea yohua'ajja jjima so'o. ¡Ojjaña miquea aquiana cuana quia jeyojeyo'yocue! ¡Aquiana quiajeyo'yo majje miquea aquiana sosejje jjeshenaje bejjo quiacue joya aema' cuana huasijje! Majoya miya Eyacuiñajji nijje jjashahuaba neineiQuije, ohuaya miya ba'e tiitii mee caje'yo eyajo. Miyaya bejjo aema' cuana huasijje quiajeyo'yo majje majoya miquea aquiana cuanajo jjashahuabaqui'yo ajja cuaje, Eyacuiñajjijo ca ca jjashahuabaquiye. Majoya eyahuasijje poqui'yo majje aquiana quea bame nee nee cuaje miquea epojji. E'e, jjamaya acue majoya cue o'oyacue enijje jjapeequiya! —jamaya Jesosa cua.

<sup>23</sup> Ma esohui shajja'ajja majje dejja quea aquiana huiso quea yeno po'ya cua. Oya quia sa po'yo ajja cua quea bejjo huiso jjejojo, quea aquiana huiso nee nee jjejojo. Poqui'ya cua; aquiana quia'yo jjima aca cua. Jjapeequi jjima Eyacuiñajji nijje, de. <sup>24</sup> Jesosa quea yeno cua ma dejja quea aquiana huiso poquiye ba majje; jama cua ba'a: —Oe dejja quea bejjo huiso anijo, quea camaja ejjapeequijji Eyacuiñajji nijje. Jamatii jjashahuabaquiiani ojaya aquianajo; Eyacuiñajjijo ca ca jjashahuabaqui ajja. <sup>25</sup> Oya cameno, mona ai'ai jama, jjayejjequi jjima cuaje ahuoja quii huejjajje jayojja. Jamaya dejja quea aquiana huiso beshahua nei poqui jjima eyahuasijje cuaje —jamaya Jesosa cua.

<sup>26</sup> Pea cuaa ojaya esohui shajja'ajja majje Jesosa jama huohui'ajjame aca cua ba'a: —Ojjaña cuana quea bejjo huiso sa cuani, de. ¿Ae shai che poquiye'yo eyahuasijje Eyacuiñajji nijje ba'e'yohua?

<sup>27</sup> —E'e de, oe dejjaa oya eyahuasijje epoqui meejjii pojjeama. Eyacuiñajjiya ca mi ca oe poqui mee caje'yo eyahuasijje onijje eba'e tiitii'yojji —jamaya Jesosa cua.

<sup>28</sup> Majoya aje Peno jama cua ba'a: —De, ecuaa poqui sa cuani eyahuasijje, jeajeana'y-onaje ecuea aquiana jiquio meshijo minijje epoqui'yoyji.

<sup>29-30</sup> Jesosa jama cua ba'a: —E'e, ecuea eba. Miquianaaya ojjaña aquiana cuana jeajeana'yonaje epoquijji enijje. Jamajjeya miquianaya mano'yajo, Eyacuiñajjiya miquianaya poqui mee caje'yo eyahuasijje onijje eba'e tiitii'yoyji. E'e de, miquianaaya equi jeajeana'yonaje, jamajjeya Eyacuiñajjiya miquianaya sosequia caje quea huiso nee nee. Quijje miquianaya mano'yajo Eyacuiñajjiya quea huiso nee nee eyajo quia caje'yo. Miquianaaya jeanananaje miquianajaya huanase, ebacua, miquianajaya o'i, miquianajaya chii pea'ai. Eyacuiñajjiya miquianaya huapa pojjeama jayojja quiame acaje mi jaahuanajji. Eyajo pea'ai miquianaya jama quiameya acaje quea huiso nee nee. Jamaya acaje ohuaya joya ojaya aquiana jeana'yoyji cuani enijje chacochohua —jamaya Jesosa cua.

*Jesosaa huohui ca o'oya cua o mano'yoyjijo  
(Mateo 20.17-19; Macoso 10.32-34)*

<sup>31</sup> Jesosaa oja 12 shajja'ajjajji nei cuana jjachichaqui mee ca'ya cua. Ohuaya jama huohuime aca cua ba'a: —E'e de, jjeya eseya poquiye Jenosanena huasijje. Miquianajaya

eba Eyacuiñajjija esohui yahuajo nei nei pea cuaa ejo tehue ca cua. Joya ecua onaja tehue jaa jamaya eya acaje'yo cuaa. Eya mano mee caje'yo ojjañaja Edoe Mese cuanijojo. Jamajjeya eya Jenosanena huasijje poqui majje manoje'yo. <sup>32</sup>Eya pea cuaa iña majje dojo caje Jodio pojjeama huasijje. Oya cuanaja ba jjima Eyacuiñajji, de. Oya cuana mimijajije enijje; ejo soaje; cojja cuichojea caje cuaa mo. <sup>33</sup> Cuia caje mo emeya cuaa, de. Majoya aje mo mano mee caje'yo pea'ai cuaa. Eya mano neineiye'yo. Majoya pea beca peejjima cahuime po majje, eya ca iña shequije o'oya, de —jamaya Jesosa cua.

<sup>34</sup> O shajja'ajjaji cuana ca ca jjashahuabaqui jjima cua Jesosaja esohuijo. Oya cuana ba jjima, yajjajo ohua o mano'yoyji huohui cani poso jjabaquia cua.

*Jesosaa cojjama' quea cojja ja'a po mee ca'ya cua*  
(Mateo 20.29-34; Macoso 10.46-52)

<sup>35</sup> Jesosa Jenico cuiñajji chipi nei poquia cua. Oe dejja cojjama' chemo po aña cua ejiojji cojja sahuajo. <sup>36</sup> Cojjamaa shajja'ajja ca cua dejja quea huiso cueje, jamajjeya huohui'ajja ca cua: —¿A'ya mi so'o?

<sup>37</sup> Pea cuana jama cua ba'a: —Jesosa iquio cueje, de.

<sup>38</sup> Majoya aje jama taaame cua ba'a: —Jesosa, miya Eyacuiñajjija huoojea'yo cuani. Miya ma etiiquiana emeshi mese, Dabi jayojja cuani. Eya ca iña oe che cojjama', de. ¡Che iña jjacojjaja'aqui mee'yocue!

<sup>39</sup> Ehui dojji pea cuana poquije jama cua ba'a: —De, ¡quea shajjaquijjo pajjaja coma a'a taaajji!

Oya ca ca taa o'oya cua; jama cua ba'a: —Jesosa, ¡che iña yohua sahuacue, miya Eyacuiñajjija huoojea'yo!

<sup>40</sup> Jesosa poquije tii nequiñaquia cua. Majoya aje oya jama cua ba'a: —¡Cojjama' e que jjequicue!

Yechipi cajo Jesosaa cojjama' jama huohui'ajjame aca cua ba'a: <sup>41</sup> —¿Apiojji eya miyaya taaña, cojjama'?

—Jesosa, miya ecuea Emeshi Mese nei, mi que e jjacojjaja'aqui mee'yoyji mi taaanaje —jamaya cua cojjama'.

<sup>42</sup> —E'e de, ¡jjeya miya quea cojja ja'a po'yocue! Eyaya miya jjabapojjaqui mee'yonaje ejo e'e jojo nei jjashahuaba bamebamequinajejojo —jamaya Jesosa cua.

<sup>43</sup> Majoya aje quea cojja ja'a nee nee po'ya cua. Oya Jesosa nijje poquia cua. Oya jama cua ba'a: —E'e de, Eyacuiñajji quea bame nee nee, de. Jesosaa ecuea ecojja quea ja'a po mee ca'yonaje, de.

Pea cuaa ma ba majjeya Eyacuiñajji bihuia ca cua.

## 19

*Jesosaa Saqueo ba ca cua*

<sup>1</sup> Jesosaa Jenico yejje canana cua; quea dejja huiso jjachichaquia cua Jesosa bajji. <sup>2</sup> Oe dejja Saqueo bajjani cua. Ojjañaja eba Saqueo quea bejjo huiso nee nee cua. Oya bejjo chichajji cua emeshi meseja yajji. Oya ca jjadasiaquijji cua. <sup>3</sup> Ohuaya ca ca Jesosa ba sa aca cua. Jamajjeya Saqueo poquia cua Jesosa baa pea cuana ejjachichaqui nequi yasijje. Quea chi'aa jjejojya ca ca oe ojaya beshahua nei Jesosa ba jjima cua. <sup>4</sup> Jamajjeya Saqueo cuajicuaji poquia cua, ejiojji cojja sahuajo nequi acui yasijje sohuaquiñaquia cua. <sup>5</sup> Jesosa jjayejje'ajjaquia cua acui aa biajje Saqueo anijje. Majoya aje ohuaya bajeasohua majje jama aca cua ba'a: —Saqueo, ¡oque'yocue! Jjeyahua nei iña poquije miquea equi yasijje aniya!

<sup>6</sup> Majoya aje oya nequioque'ya cua. Majoya aje nequioque'yo majje poquia cua ojaya equi yasijje Jesosa nijje. Oya quea bihui cua. <sup>7</sup> Pea cuaa ca ca niñeba ca cua Jesosa poquije ba majje; jama mimijajime cua ba'a: —De, Jesosa Saqueo nijje poquinaje anicuaa, Saqueo quea mimishi nee nee, de.

<sup>8</sup> Majoya aje dobiquia cua Jesosa Saqueoja equi yasijje. Quijje pishana ijia'ijiajeyo majje Saqueo nequisohua'ya cua. Ohuaya Jesosa jama huohuime aca cua ba'a: —E'e de, jjeyahua eyaya aema' cuana huasijje bejjo quiaje esejja. Eya siipojji nei cuanaje, de. Jjeya ca iña siipo sa po'yo ajja. Jamaya eyaya aje ba'a: Eyaya oe bejjo siinaje, eyaya quiaje'yo ebeca pee pea'ai bejjo. Eya mimishi po sa po'yo ajja. E'e jojo nei ecuea esohui jjeya. Sijje pojjeama cuani —jamaya Saqueo cua.

<sup>9</sup> Jesosaa oya jama huohuime aca cua ba'a: —E'e de, miya Jodio dejja nei, jamatii miya Eyacuiñajji nijje jjapeequi jjima cuanaje. Jjeya ca ca miya e'e jojo nei jjapeequi sa cuani Eyacuiñajji nijje. <sup>10</sup> E'e, eya cueyanaje ojjaña jjapeequi meeya Eyacuiñajji nijje. Eyaya mi jayojja pea cuana ba sa ña —jamaya Jesosa cua.

*Esohui ehuohui'yo bejjojo*  
(Mateo 25.14-30)

<sup>11</sup> Jesusaja esohui shajja'ajja majje pea cuaa jama aca cua ba'a: —Jesosa, Jenosanena huasijje poqui majje miya ojjañaja Emeshi Mese cuaje, jjeya nei pojja'a. Ecuana jamajjeya mijo quea bihui nee nee cuaje'yo —jamaya poso aca cua dejja cuaa.

<sup>12</sup> Jamajjeya Jesusaa oe esohui ejjashahuaba quimeejjijo jama huohuime aca cua ba'a: —Oe dejja emeshi mese epo'yojji pea meshi yasijje poquinaje. Majoya oya emeshi mese epojji bajjani ca'yajje huacuaya cue'yonaje o nequinaje meshi yasijje. <sup>13</sup> Poqui jjimahuaa ohuaya iyaa canaje ojaya ome miji pea'ai echacojji cuana bejjo equiajji. Ojjaña oe ebashosocojo bejjo quea huiso quia canaje. Jama huohuime acanaje ba'a: “E'e de, jiquio bejjo eyaya miquianaya quiaña, aquiana jjeshejji. ¡Esose quea huisojo bejjo jjahuisoqui meecue! Eya cue'yo majje quea huiso bejjo bañaje'yo. Eya majoya quea bihui cuaje” jamaya cua ma emeshi mese poqui jjimahua.

<sup>14</sup> —Majoya aje emeshi mese poquinaje pea meshi yasijje emeshi mese epojji ohua bajjani ca'yajje. Oja meshijo nequi dejja cuanaja boti'ama cua. Jamajjeya dejja cuaa oe dejja huohui pohua ma meshi yasijje huoojea ca cua. Jama huohuime aca cua ba'a: “Ecuana jama ma dejja emeshi mese cuajo boti'ama cuaje”.

<sup>15</sup> —Oya ca ca bajjani ca'yajje emeshi mese cuanaje. Jamajjeya ma dejja huacuaya cue o'oya cua oja meshi yasijje. Cue o'oya majje iyaa mee ca cua ojaya echacojji cuana ehuohui'ajjajji, ache huiso bejjo chicha canaje ebajji. <sup>16</sup> Ebionei oe echacojji poquinaje o que. Jama cua ba'a: “Emeshi mese, miquea bejjo quea huiso nee nee chichanaje. Miyaya eya oe bashosoco bejjo quianaje, jjeya ca ca yani ome miji pea'ai bashosocome bejjo. Eyaya chaco neineinaje, de”. <sup>17</sup> Emeshi meseya jama acanaje ba'a: “E'e de, miya oe echacojji quea bame nee cuanaje. Jjeyahua nei miya emeshi mese jayojja aje, ¡ome miji pea'ai cuiñajji jaahuanacue, miyaya quea bame cuanajeya jjejoj!”

<sup>18</sup> —Pea echacojji poquinaje emeshi mese que. Jama huohuime acanaje ba'a: “Emeshi mese, miyaya bejjo oe bashosoco quianaje. Jjeya ca ca eyaya iyehuiso chichanaje me oeje bashosocome bejjo. E'e de, eyaya chaco neineinaje pea'ai”. <sup>19</sup> Jamajjeya emeshi mese jama cuanaje ba'a: “E'e de, miya quea bame cuanaje. Miya emeshi mese jayojja aje, ¡me oeje cuiñajji jaahuanacue!”

<sup>20</sup> —Pea echacojji poquinaje o que. Oya jama cuanaje ba'a: “Emeshi mese, ma'aje miquea oe bashosoco bejjo. Quia jjimajje bejjo cuanaje. Eja sisijo bebo majje jaahuana neineinaje. <sup>21</sup> E'e de, miya etecueaje poso ca ca mi quianaje. Ecuea miya eba dejja quenequene cuajijji nei nei. Quea dejja taija jjejojjo miquea aquiana quea huiso yani. Jamajjeya eya quea mete cuanaje miquea bejjo quiajji. Jamajjeya jaahuananaje miquea bejjo nei”. <sup>22</sup> Majoya aje emeshi meseya oya tecuea canaje. Oya jama cuanaje ba'a: “Sijje miya, de. Miquea ejjashahuaba taiquijji jayojja jama eyaya miya aje. Miya shajjama' cuanaje; jjahuisoqui mee jjimaya ecua bejjo anaje. <sup>23</sup> ¡Bacue, ecue bejjo oya huiso tii miyaya jaahuananaje! ¿Apiojji miyaya bejjo ejjeshejji jaajji equi yasijje mi iyaquinaje, ejjahuisoquijji? Miyaya chaco chaco jjima cuanaje, de”.

<sup>24</sup> —Emeshi mese oya cuana jomajo nequi jama huohuime acanaje ba'a: “E'e de, jjequisejaje'yocue ecue quia bejjo ma echacojji shajjama' cuanajeja! ¡Quia'yocue ma ebionei echacojji cuanaje yasijje, ma quea huiso bejjo chichajji cuanaje yasijje!” jamaya emeshi meseya acanaje.

<sup>25</sup> —Oya cuana jama cuanaje ba'a: “Emeshi mese, miquea ebionei echacojji ca ca quea bejjo huiso cuani. Yani ojaya ome miji pea'ai huisome, de”. <sup>26</sup> Majoya aje emeshi meseya jama acanaje ba'a: “¡Shajja'ajjacue ecuea esohui e'e jojo nei! Oe dejja chacochocho ani quea bame, shajja'ajja cani ecuea esohui, eyaya quiaje quea huiso nee nee. Oe dejja ca ca chacochocho ajja, shajjama' cuani, eyaya quia jjima aje. Iñaje'yo ojjaña ojaya aqui ana o shajjama' jojoya. <sup>27</sup> E'e de, pea dejja cuanaja eya boti'ama. Oya cuana eya emeshi mese epojji sa po ajja ca ca oya. ¡Ma dejja cuana yecue eque! E cojja nei nequia majje ¡quecuajeacue ojjañaja ebajji!” cuanaje ma emeshi mese, de —jamaya aca cua Jesusaa.

Oya huohui ca cua ma esohui ojjañaja ebajji eseya cachacochocho'yahua Jesusaja yajjijo quea bame nee, eseya cajjashajja'ajjaqui'yahua ojaya esohuijo pea'ai. Eseyaya quea huiso onijje cajjapeequi mee'yahua. Majoya Jesusa cue o'oya majje ojaya epeejji quea huiso cuaje. Majoya oya jama cuaje ba'a: “Miquianaya quea bame cuanaje; jjapeequi meenaje quea huiso nee ecuea epeejji epojji. ¡Jamajjeya poquicue enijje eyahuasijje! Beca cuana ca ca jeajeaje cuaqui yasijje shajjamajojo, de”.

*Jesosa nequiñaquia cua Jenosanenajo*

*(Mateo 21.1-11; Macoso 11.1-11; Huani 12.12-19)*

<sup>28</sup> Majoya Jesusa mimijeyo majje poquia cua Jenosanena huasijje. <sup>29</sup> Poquijeya ba cañaquia cua beca cuiñajji Mepaje, Betania pea'ai. Ma cuiñajji cuana chipi nejjo eyiyo nequi yohua bajjani ba'a: Onimo. Majoya Jesusaa becanajjiji pea'ai o shajja'ajjaji cuana huoojja ca cua. Jesusaa oya cuana jama huohuime aca cua ba'a: <sup>30</sup> —¡Poquicue jocuama ma cuiñajjijo chipi nei! ¡Bañaqui majje bacue mapichi esho'i ai ejeyonequia nequi! ¡Ba majjeya oe pichocue! ¡Picho majje yecue! ¡Joya onaja e'anisohuaquijji ajjima nei nei oe yecue! <sup>31</sup> Onaa: “¿Apiojji acuae ecuea mapichi pichojeaña so'o?” acajje, oe jama huohuime acue ba'a: “¡Mapichi jjequicue!” Jesusa cuanaje. Oya pa mapichi sa cuani, de, acue.

<sup>32</sup> Majoya aje oya cuana poquia cua; bacañaquia cua mapichi. Majoya aje bañaqui majje pichojea ca cua ma ecua Jesusaa huohui ca cua jama pichojeameya aca cua. <sup>33</sup> Majoya aje emapichi mese cuaa ba ca cua, mapichi picho cuequi. Majoya aje ba majje emapichi meseya Jesusaja eshajja'ajjaji cuana jama huohui'ajjame aca cua ba'a: —¿Apiojji acuaeya ecua mapichi pichojeaña so'o?

<sup>34</sup> Oya cuana jama cua ba'a: —Jesusaa sa canijjojo ca ca ecuaaya pichojeaña.

<sup>35</sup> Majoya aje dojo ca cua Jesusa que. Daqui iya ca cua mapichija edaasa biajje. Majoya Jesusa anisohuaquia cua mapichija edaasa biajje; poquia cua Jenosanena huasijje. <sup>36</sup> Jesusa poquianijjo jjachichaquia cua ojjaña dejja cuana ejiojji sahuajo. Onaaya daqui ao jjequi jeapiihui ca cua ejiojjijo Jesusa ja'ajjequijji. Emeshi mese jama ja'ajjequimeya acaninaje cuaa ohua ba cahuajje. <sup>37</sup> Eyiyo Onimojo ani jaoque majje ojjaña Jesusaja epeejji cuana quea bihui nee nee cua. Sohuicuayaña cua jama ba'a: <sup>38</sup> —Eyacuiñajji, miya quea bame nee nee. Miyaya Jesusa huoojeanaje ecuea Emeshi Mese epojji jjeya nei. Ecuana quea bihui nee nee. Ojjaña meshijo ba'e cuana, eyajo ba'e cuana pea'ai quea bei cuani —jama sohuicuayameya cua cuana.

<sup>39</sup> Majoya Paniseo dejja cuaa quea dejja huiso pejejejo nequiya sohuicuayaqui shajja'ajja majje quea quene nee nee cua. Jamajjeya oya cuaa Jesusa jama huohui'ajjame aca cua ba'a: —Jesusa, ¡miquea epeejji cuana huohuicue: “¡A'a sohuicuayajji!” acue! —jamaya cua Paniseo dejja cuana.

<sup>40</sup> Majoya aje Jesusaa jama saja'ame aca cua ba'a: —Chojja de, eyaya ecuea epeejji cuana: “¡A'a sohuicuayajji!” ajo, mei sohuicuayaje, de. Ojjaña jja ca oe jjeya cabihuia cahua Eyacuiñajji —jamaya Jesusa cua.

<sup>41</sup> Quijje pishana Jenosanena bañaqui majje Jesosa pa neineiya cua Jenosanenajo ba'e cuana ojaya esohuijo shajjamajojo. <sup>42</sup> Oya jama mimimeya cua ba'a: —Eya quea yeno nee nee jiquio cuiñajjijo ba'eca cuanajo, oya cuana quea mimishi nee nee jojoya. Oya cuana mimishi cuana pajea'yo sa po ajja nei nei, de. Jamajjeya aje jja oe quea nee nee cuaje'yo, ecuea epeeji po sa po ajja cuanajejojo. <sup>43</sup> Sohuinano cuana cueje o quecua'yohua. Sohuinano cuana jjanequitoquije'yo jiquio cuiñajjijo. Majoya oya cuana cuayaqui ajja nei nei cuaje. <sup>44</sup> Majoya aje oya cuana quecua jeyojeyo caje'yo, chama'yo tii acaje'yo. Equi cuana dahuajea jeyojeyo caje'yo chama'yo epo'yoyji. Jamaya cuaje oya cuana ecuea esohuijo shajjama' cuanajejojo, eya Eyacuiñajjija huoojea'yo ojjaña jaahuanajji cajaa acanajejojo —jamaya cua Jesosa Jenosanenajo ba'e cuana nijje.

*Eyacuiñajjija equi aquiana quiajji pojjeama coma ca equi Eyacuiñajji nijje emimijji*  
(Mateo 21.12-17; Macoso 11.15-19; Huani 2.13-22)

<sup>45</sup> Majoya Jesosa dobiquia cua Eyacuiñajjija equi yasijje. Dobiqui majje Jesusaa beca cuana aquiana quia cuequi ba ca cua. Ma ba majjeya quea quene nee nee cua. Majoya aje Jesusaa ma aquiana quia cuequi jeacuayajea ca cua. <sup>46</sup> Ohuaya jama tecueame aca cua ba'a: —Eyacuiñajjija etehue'yo jama cuani ba'a: “Eyacuiñajjija equi onijje emimijji”. Aquiana quiajji pojjeama, ona siajje ajji pojjeama pea'ai —jama tecuetecuemeya Jesosa cua.

<sup>47</sup> Ojjaña pojajajo Jesusaa esohui huohui ca nequia cua Eyacuiñajjija equijo. Jamatii Eyacuiñajji nijje mimiani etii cuaa, Moisesija etehue'yo huohuijji cuaa, emeshi meseya pea'aiya Jesosa sa'ajja ca cua equecua'yoyji. <sup>48</sup> Jamajjeya esohui huohuijji cuana jama jjashahuabaquimeya cua ba'a: —Quea camaja ca e'iñajji Jesosa equecua'yoyji, oya quea epeeji huiso nee nee año. Shajja'ajja neinei cani ojaya esohui cuaa, de.

## 20

*¿Aya acuae Jesosa huoojea ca cua esohui huohuiya?*  
(Mateo 21.23-27; Macoso 11.27-33)

<sup>1</sup> Oe pojajajo Jesusaa esohui huohui ca cua Eyacuiñajjija equijo. Jesosa que cueya cua Eyacuiñajji nijje mimiani etii cuana, Moisesija etehue'yo huohuijji etii cuana Jodio etiiquiana pea'ai. <sup>2</sup> Oya cuaa Jesosa jama huohui'ajjame aca cua ba'a: —¿Aya acuae mi huoojea canaje esohui huohuiya so'o? —jamaya aca cuaa cua.

<sup>3</sup> Jesosa jama cua ba'a: —Eyaya pea'ai miquianaya huohui'ajjaje. <sup>4</sup> ¿Aya acuae Huani ma ona besameejji cuanaje huoojea canaje so'o? ¿A'a Eyacuiñajjiya pojja'a? ¿A'a dejja cuaa pojja'a? ¿Huohui'ajja socue mo! Majoya eyaya miquianaya huohuije ajea huoojea acuae eya.

<sup>5</sup> Oya cuana mimipanajajia cua. Majoya aje jama aca cua ba'a: —¿Yajja saja'ame seya aje so'o? Esey a quea mete ojjaña dejja cuanajo, de. Esey a saja'ajje jama cuaje ba'a: “Eyacuiñajjiya Huani huoojea canaje”. Majoya pojja'a Jesusaa jama saja'ame acaje ba'a: “¿Yajjajo miquiaaya cajaa Huanija esohui anaje so'o?” <sup>6</sup> Esey a jama ajje ba'a: “Dejja cuaa Huani huoojea canaje”. Ojjaña dejja cuaa se jaja ca'yo chana' meiya, ojjaña dejja jjashahuabaquiani Eyacuiñajjiya Huani huoojea canajejojo.

<sup>7</sup> Jamajjeya jjashahuabaqui majje Jodio cuaa Jesosa jama saja'ame aca cua ba'a: —Cua'a de. Ecuanaajaya ba jjima nei. ¿Aya shai Huani huoojea canaje? —anisho ca cua quea meteya jjejojo.

<sup>8</sup> Majoya Jesosa jama cua ba'a: —E'e de, jamajjeya ecuea miquianaya ehuohuijji pojjeama e huoojeajji epo —jamaya Jesusaa Jodio dejja cuana aca cua.

*Pea esohui ehuohui'yo ejjashahuabaquijji jjonojjajja quejo*  
(Mateo 21.33-44; Macoso 12.1-11)

<sup>9</sup> Jesusaa dejja cuana jama huohuime aca cua ba'a: —¿Jiquio ejjashahuabaqui'yoyji shajja'ajjacue! Oe eque meseya jjonojjajja bana canaje. Ojaya que quea quemo nee nee cuanaje; oopana jjono bana canaje. Ma jjono yohua bajjani cuanaje ba'a: uva. Ma jjono cuana bana majje ohuaya echacojji cuana cuiña mee canaje. Ohuaya ejjajja cuiñajji cuana



jama huohuime aca cua ba'a: "Jjonojjajja jahuaheyajo miquianajaya yajji eseja acue. Pea eseja ca ca ecuea cuaje". Majoya ojaya que cuiña mee majje quea huesha poquinaje quiije nei nei cue'yohua. <sup>10</sup> Quiije jjonojjajja jahuajo ohuaya ma pea meshijo ba'e ojaya pea echacojji huoojea canaje jjonojjajja cuiñajji cuana huasijje. Ma echacojji jjonojjajja cuiñajji cuana huasijje poqui majje jama huohui'ajjame acañaquinaje ba'a: "Eya eque meseya miqiana que huoojea canaje jjonojjajja eseja jehua'yohua. ¿Ache acuae pa eque meseja iya tepe mee?" Majoya ejjajja cuiñajji cuana quea deija ta jjejojo quea quene cuanaje eque meseja huoojeajji nijje. Jama cuanaje ba'a: "Cho, quia sa po ajja iña. Chama' ca jjaja ca oja, ecuea ca jjaja ca oe". Majoya ejjajja cuiñajji cuana echacojji cuiajea canaje. Cuiajea majje huoojeajea ca'yonaje eque mese yasijje; jamatii poqui'yonaje. <sup>11</sup> Majoya eque meseya pea echacojji huoojea ca o'oyanaje huacuayaya. Huohui'ajja cañaqui o'oyanaje jama ba'a: "¿Ache acuae eque meseja jjonojjajja so'o?" Majoya quia sa po ajjaa jjejojo cuiajea ca o'oyanaje. Poqui o'oyanaje jamatiiya, de. <sup>12</sup> Eque meseya pea echacojji huoojea ca o'oyanaje huacuayaya. E'e de, ma pea poqui majje jama huohui'ajjame acañaqui o'oyanaje ba'a: "¿Ache acuae pajjaja eque meseja jjonojjajja so'o? Eyaya cadojo'yahua o que". Majoya jjonojjajja cuiñajji cuana quenequene neineinaje onijje. Quecuajea'ajja canaje jjonojjajja cuiñajji cuana. Poqui'yonaje echacojji jamatii eque mese yasijje.

<sup>13</sup> —Majoya eque mese jjashahuabaqui'yonaje oja quejo. Oya jama cuanaje ba'a: "¿Yajja acuae eyaya aje'yo so'o? Ecue bacua ejja pojja'a cahuojeahua. E'e, oya poqui majje ma jjonojjajja cuiñajji cuana oya ba caje. O ba majje pojja'a jjashajja'ajjaquiije. Ba'ajja". Majoya aje oja bacua ejja huoojea canaje jjonojjajja cuiñajji cuana huasijje. Jjonojjajja jjequi'yohua nisho huoojea'ajja canaje. <sup>14</sup> Majoya aje onaaya ebacua ba canaje. Jama cuanaje ba'a: "Bacue, eque meseja ebacua ejja cueyanaje, de. Cua'a ejjaquecuajeaqui oe eque mesena'yojji" jama jjashahuaba taiquimeya cuanaje cuana. <sup>15</sup> Jamajjeya jjonojjajja cuiñajji cuana eque meseja bacua ejja quecua ca'yonaje. Majoya aje quea huesha nee nee jeajea canaje —jamaya Jesosa cua—. ¿Yajja acuae eque meseya acaje'yo jjonojjajja cuiñajji cuana? <sup>16</sup> Eque mese poquiije jjonojjajja cuiñajji cuana quecuajea oja bacua ejja quecua'yo epo joyaya. Majoya aje pea deija que cuiña meequi caje'yo —jamaya Jesosa cua.

Deija cuana jama cua ba'a: —De, jjonojjajja cuiñajji cuana quea mimishi nee nee, de. Chama' ca jjaja ca deija cuajjama mimishi.

<sup>17</sup> Jesosaa cojja ba oneone ca cua ma deija cuana. Majoya aje oya jama cua ba'a: —E'e de, yani jjaja, de. ¿A'a jjaja miqianajaya ba jjima Eyacuiñajjiya etehue'yo pojja'a? Ba jjima pojja'a jjajaje, jamajjeya aje mi eyaya jama huohuime aje ba'a: Jamatii deija cuana oe equi iyajji, equi yamajjana quea ca'a nee nee sa'ajja cani. Beca cuana jeajea cani acui ca'a quea bame pojjeama posojjo. Pea dejjaja eba nei nei acui yamajjana equi iyajji. Jama cuaje ma acui ca'ajo ba'a: "Jiquio aje jja oe acui quea ca'a nee nee ba'a, de. Jamajjeya aje jja oe eyaya dojje'yo quea bame nee nee joyaya". Jamaya Eyacuiñajjiya eya babaca canaje Emeshi Mese nei quea bame nee nee epojji acui quea bame jayojja. <sup>18</sup> E'e de, miqianaaya ca ca eya cajaa aje, ma acui cajaa onaa acanaje jayojja. Ojjaña joya eya Emeshi Mese epojji cajaa acajo Eyacuiñajjiya jeajea caje'yo cuaqui yasijje —jamaya Jesosa cua.

<sup>19</sup> Jesosaja esohui shajja'ajja majje Eyacuiñajji nijje mimiani etii cuana, Moisesija etehue'yo huohuijji cuana pea'ai quea quene nee nee cua. Oya cuana jjaja'aqui majje jama mimimimime ojee cua ba'a: —¡De! A'a jja ca eseya jama acani, de. Oya mimiani eseya jjonojjajja cuiñajji cuana jayojja, de. Pea cuana Jesosa cajaa acanaje jayojja eseyaya cajaa aje pea'ai pa —jamaya ma Jodio deija cuana cua.

Jamajjeya Jodio deija cuana Jesosa iña sa aca cua ejeanobiajji nisho. Ojaya epeeji cuana quea huisojjo, Jesosa mi iña ca cuana cua. Jama cua ba'a: —De, eseya o iñajo deija cuana quea quene nee nee cuaje ese nijje —jamaya cua Jodio deija cuana; Jesosa iña jjima cua.

*Esohui huohui'yo emeshi mese yasijje bejjo quiajjijo*  
(Mateo 22.15-22; Macoso 12.13-17)

<sup>20</sup> Majoya Eyacuiñajjija esohui huohuijji cuaa pea dejja cuana Jesosa iñajji nisho bejjo quia ca cua. Ma dejja cuana poquia cua Jesosa baa; dejja quea bame nisho cua. Huohui'ajja ca cua Jesosa ojaya yajja saja'ame ya'yojji nisho. Jamajjeya Moisesija etehue'yo jayojja jama mi saja'a cajo dojo ca quiaye sohuinano huasijje jeanobiaa. <sup>21</sup> Ma dejja quea bame nisho cuaa Jesosa jama huohui'ajjame aca cua ba'a: —Jesosa, ecuanaja eba miyaya e'e jojo nei huohuiaña Eyacuiñajjija esohui nei. Miyaya baña dejja cuana oya jayojjaya cuani. <sup>22</sup> ¡Jamajjeya mo oe che huohuicue! ¿A'a jamajjeya Eyacuiñajjija epeeji cuaa bejjo quia cajji emeshi meseja yajji? Quia ca ajja pojja'a.

<sup>23</sup> Jesusaja eba cuanaje Jodio cuanaja ejjashahuabaquijji. Jamajjeya ohuaya jama huohui'ajjame aca cua ba'a: —¿Apiojji acuae nequiaa iña dasia sa aña so'o? Miquianaya ca ca ecuea epeeji nisho cuani, de. <sup>24</sup> ¡Jjequicue bejjo esodojjo ebajji, emeshi meseja epana'yojji!

Majoya oya cuaa oe bejjo jjequi ca cua. Jjequi cajo, Jesusaa jama huohui'ajjame aca cua ba'a: —¿Bejjoje ae ecajja'yo ani? ¿Ae bajjani tehueme'ya bejjo? —jamaya Jesosa cua.

—Emeshi mese oja cajja'yo, Sesa bajjani.

<sup>25</sup> Majoya aje Jesosa jama cua ba'a: —Jamajjeya ¡Sesaja bejjo quiaquicue ohua sa cajo! ¡Eyacuiñajji a'a pajea'yoyji; oya bihuiaque; shajja'ajjacue pea'ai!

<sup>26</sup> Ma epeeji nisho cuana quea mete nee nee cua Jesusaja ojaya ejjashahuabaquijji ebajojo. Jamajjeya jama cuana cua ba'a: —Quea jjashahuabaqui ja'a nee oya, Jesosa. Jjadasia meequi ajja, de —jamaya cua ma epeeji nisho cuana. Jamajjeya mimi o'oya sa po ajja Jesosa nijje. Jamajjeya Jesosa iña jjima cuanaja cua.

*Mano'yo majje eshequi o'oyajji*  
(Mateo 22.23-33; Macoso 12.18-27)

<sup>27</sup> Ma pojajajo tii Sanoseo dejja cuana poquia cua Jesosa huohui'ajjaa. Sanoseo dejja cuana jamatii jjashahuabaquia cua pea cuana mano'yo majje eshequi o'oyajji pojjeama.

Jesosaja ca ca jama sohui huohuime ajjima cua. Jamajjeya Sanoseo dejja cuaa oya edasiajji nisho aca cua. Majoya aje jama huohui'ajjame aca cuaa cua ba'a: <sup>28</sup> —Esohui huohuijji, Moisesiya jama tehueme aca cua yahuajo nei nei ba'a:

“Oe dejja jjahuanacquinaje. Majoya aje mano'ya cua bacuamahua. Ojaya ehuanase quijjojea ca cua. Ahuema' ani'ya cua jjamejoqui jjimahua quijjojea. Majoya aje ahuemano'yajo oja chahuaa cahuana ca'yahua, oja doeja bacua jea jayojja nei epojji”.

<sup>29</sup> Jamajjeya jama cuaje pojja'a ba'a: Oe dejja quea doe huiso cua, me oeje pea becanejijji pea'ai nequia cua. Ma dejjaa epona huana ca cua. Majoya mano'ya cua; bacuamahua quijjojea ca cua. <sup>30</sup> Ma dejjaja quijjojea ani echahua meseya huana ca o'oyanaje. Bacua jea jjimahua quijjojea ca o'oyanaje. <sup>31</sup> Majoya pea echahua meseya huana ca o'oyanaje. Majoya pea echahua meseya huana'ajja ca poquiapoquia cua. <sup>32</sup> Majoya aje oya epona mano'yonaje yahueja quijjojea ani tiya. Jjamejoqui ajja cuanaje, bacuama' nei nei tii pona cuanaje, de. <sup>33</sup> Jamajjeya miquea esohui jama cuani eyajo shequi o'oya majje ¿ajea ehuanase jiquio cuaje eyajo; ache oja doeja? O huanacoojji epoja pojja'a, pea echahua meseja pojja'a; oja chahua cuana ahua'ajja'yo epo —jamaya cua Sanoseo dejja cuana.

<sup>34</sup> Jesusaa jama aca cua ba'a: —De, miquianajaya ba jjima. Jiquio meshijo dejja cuana jjahuanacquiani; epona cuana jjahuaquiani. <sup>35</sup> Jamajjeya jiquio meshijo Eyacuiñajjija epeeji mano'yo majje eyahuasijje poquije'yo. Ejjahuanacui'yoyji pojjeama cuaje'yo eyajo; epona cuana pea'ai ejjahuaquiyoyji pojjeama cuaje'yo eyajo. Jjamejoqui ajja pea'ai cuaje'yo eyajo. <sup>36</sup> Mano'yo ajja cuaje jomajo; esohuidojojji jayojja jama cuaje'yo. Eyajo ojjaña Eyacuiñajjija ebacua cuaje'yo, eshequi'yo jjejojo. <sup>37</sup> ¿A'a miquea ba jjima dejja cuana ojjaña mano'yo majje shequije o'oya? Jamajjeya Eyacuiñajjiya yahuajo nei

esohui tehue mee ca cua miquiiana jjabahuejjaquijji. Moisesiya tehue ca cua yahuaajo nei nei ma acui jijiqui ba majje. Eyacuiñajji mimia cua onijje jama ba'a:

“Eyaya miquea etiquiana cuana jaahuanaña, Amajama, Isaaca, Jacobo pea'ai ecuea epeejjijjojo. Oya cuana enijje enequi tii tii”.

<sup>38</sup> Eyacuiñajji emano'yo cuana meshijo e'ohuajejaa jaahuanajji pojjeama cuani. Eshe nequi cuana, emano'yo shequi'yo cuana pea'ai eyajo ohuaya jaahuana cani ojaya epeejjijjojo —jamaya aca cua Jesosaa.

<sup>39</sup> Pea Moisesija etehue'yo huohuijji cuaa jama huohuime aca cua ba'a: —E'e de, quea ja'a nee nee miquea esohui, Jesosa. Quea bame nee nee, de.

<sup>40</sup> Majoya huohui'ajja beca'yo jjima tii aca cuaa cua quea meteya jjejojo, jjadasia meequi ajjajjojo.

*¿Aya Jesosa huoojea ca cua dejja jaahuanajji pojji?*

*(Mateo 22.41-46; Macoso 12.35-37)*

<sup>41</sup> Jesosaa oya cuana jama aca cua ba'a: —Miquianaya jama jjashahuaba taiquime cuani ba'a: “Jesosaa Dabija osecua poso nequiaa ña. Jamajjeya oya Eyacuiñajjija Bacua pojjeama poso nequiaa ña” jamaya jjashahuaba taiquimeya nequiana cuani. Dabi emeshi mese yahuaajo nei nei ba'ya cua. Eya ojaya eba nei nei, de. Ojaya eya eba dejjaja bacua ejja pojjeama, Eyacuiñajjija Bacua Ejja. <sup>42</sup> Jamajjeya ohuaya esohuicuayajji tehue ca cua Salmojo; jama cua ba'a:

“Eyacuiñajjiya ecuea Emeshi Mese Quito jama huohuime acanaje ba'a: —¡Enijje anioque-cue ebañei mijijje ojjañaja Emeshi Mese epojji!

<sup>43</sup> Eyaya mi quecua'yojji epo jeabichajea jeyojeyoje'yo. Majoya aje miyaya oya cuana jeajeaje'yo cuaqui yasijje cajaajojo —jamaya aca cua Eyacuiñajjiya”.

Jamaya Dabiya ejo tehue ca cua yahuaajo nei nei. <sup>44</sup> Jamajjeya Dabiya Quito oja Emeshi Mesejojo bajjani ca cua. Jamajjeya Quito Dabija osecua cua, ojaya Emeshi Mese nei. Eya jja iña iquio Quito, de, dejjaja bacua pojjeama; Eyacuiñajjija Bacua Ejja, jamajjeya eya ojjañaja Emeshi Mese nei —jamaya Jesosa cua.

*Jesosaa Moisesija etehue'yo huohuijji cuana tecueajea ca cua*

*(Mateo 23.1-36; Macoso 12.38-40; Noca 11.37-54)*

<sup>45-46</sup> Ojjaña Jesosaja esohui shajja'ajja canijo, Jesosaa o shajja'ajjajji cuana jama aca cua ba'a: —Coya mi oe Moisesija etehue'yo huohuijji jayojja po chana'. Oya cuana po'ayequequi daqui aojji ojjañaja quea bame ebajji nishoya. Oya cuana quea bihui cuani shajja'ajja majje ojjañaja esohui jama cuani ba'a: “Ma esohui huohuijji quea bame cuani, oja daqui quea bame, oja esohui quea ja'a nee” jamaya shajja'ajja saya cuani ma esohui huohuijji cuana. ¡E'e jojo nei pojjeama! Jodioja equi ejjachichajji yasijje dobiqui majje ebionei anioque sa cuani Eyacuiñajjija esohui huohuijji pejjejo. E'ijjia'ijjiajjijjo pea'ai anioque sa cuani equi mese pejjejo. Beca cuaa quea bame poso acani. <sup>47</sup> E'ahuemanoja aquiana sii cani o chaco sahuajji nisho po majje. Majoya oya cuana mimi nisho ani Eyacuiñajji nijje. Oya quea mimishi nee nee. Eyacuiñajjiya oya cuana jeajea caje'yo cuaqui yasijje, onijje mimi nishojijjojo —jamaya cuana Jesosaa aca cua.

## 21

*E'ahuemano aemaa bejjo quia ca cua Eyacuiñajjija equijo*

*(Macoso 12.41-44)*

<sup>1</sup> Eyacuiñajjija equijo, Jesosaa dejja cuana quea aquiana huiso nequi ba ca cua. Ma dejja cuaa bejjo iya ca cua ejjeshejji iyajji yasijje. <sup>2</sup> Majoya e'ahuemano aema' nei neiya bejjo iya ca cua. Becanejjijji pea'ai bejjo ojaya cua, oe pojji nei nei cua, de. Chama'yo cua ojaya bejjo ohua iya cajje bejjo iyajji yasijje. <sup>3</sup> Majoya Jesosa jama cua ba'a: —E'e, jiquio e'ahuemano quea bame cuanaje. Ohuaya ojjaña tii bejjo iya ca'yonaje. Jamajjeya Eyacuiñajji quea bihui cuanaje onijje. <sup>4</sup> Quea aquiana huiso nee nee cuaa ca ca oja quiabishi iya canaje. Quea bame pojjeama ca ca oya cuana. Ma e'ahuemanohua iya

canaje ojaya bejjo bobi jjeshejji nisho, de. Chama'yo ojaya bejjo po'yonaje. Jamajjeya quea aquiانا huišo nee nee cuana quea bame pojjeama cuanaje —jamaya Jesosa cua.

*Pea cuaa Eyacuiñajjija equi cajjajeajea mee caje'yo*  
(Mateo 24.1-2; Macoso 13.1-2)

<sup>5</sup> Beca cuana mimia cua Eyacuiñajjija equijo jama ba'a: —¡De, bacue mei quea bame, aquiانا quea bame ani Eyacuiñajjija equijo! Aquiانا quea bame sosema' quia Eyacuiñajjija equi quea bame epojji.

Majoya aje Jesosaa jama aca cua ba'a: <sup>6</sup> —E'e de, quiije pishana jiquio equi, aquiانا pea'ai chama'yo tii acaje'yo, de. Ma mei bame cuana pea biajje e'ia sohua'yojji pojjeama. Pea cuaa ma equi cajjajeajea caje'yo —jamaya cua Jesosa Eyacuiñajjija equijo.

*Dejja cuana quea mase nee cuaje quiije*  
(Mateo 24.3-28; Macoso 13.3-23)

<sup>7</sup> Majoya o shajja'ajjaji cuaa jama huohui'ajjame aca cua ba'a: —Jesosa ecuea esohui huohuijji, ¿ache shono acuae shai pea cuaa Eyacuiñajjija equi mei cuana cajjajeajea mee caje'yo? ¿Yajja acuae acaje so'o?

<sup>8</sup> Jesosa jama cua ba'a: —Ma Eyacuiñajjija equi quea bame cajjajeajea'yo jjimahuajo, jamaya cuaje ba'a: Quea huišo nee nee cueje e bajjani nisho po majje. Jama mimi nishome cuaje ba'a: “Eya Jesosa Quito bajjani, de”. Pea jama cuaje ba'a: “Eya jjeyahua nei cue o'oyanaje, eya Quito, Eyacuiñajjija huoojea'yo”. ¡A'a ojaya esohui shajja'ajjaji! Sijje ca cuaje. <sup>9</sup> Miquiaaya shajja'ajjaje pea meshijo ba'e cuana jjaquecuaquiequi pea meshijo ba'e cuana nijje. ¡A'a miquianaya quea mete pojji! Jamatii acua pojjeama oe po ajja jjima cuaje so'o —Jesosa cua—. <sup>10</sup> Dejja cuana jjaquecuaquije'yo ojjaña meshijo ba'e cuana, cuiñajjijo ba'e cuana pea'ai. <sup>11</sup> Quea huišo emano meejiya mano mee caje'yo. Ojjaña quea mete nee nee cuaje, de. Bobima' cuaje, manojeyo quea dejja huišo cuana bobimajo. Meshi huehuahuehuaje ojjaña meshi yasijje pea'ai, de. Ojjaña quea mete nee nee cuaje'yo eyatahuatahua huehuahuehuajo meshi huehuahuehuajo pea'ai, de —jamaya Jesosa cua.

<sup>12</sup> —Jiquio jama po jjimahuajo beca cuaa miquianaya quea nee po mee caje'yo ecuea epeejji cuanijojo. Oya cuanaja boti'ama nee nee cuaje, de. Miquianaya iña majje dojo caje jeanobiajea Jodioja equi ejjachichaquijji cuana huasijje. Dojo caje miquianaya emeshi mese nequi cojja nei yasijje. Majoya ohuaya jama huohui'ajjame acaje ba'a: “¿A'a miquianaya Jesosaja epeejji nei?” E'e jojo neijojo, miquianaya jeanobiajea caje. <sup>13</sup> Jama po majjeya ¡a'a quea mete pojji! Miquianaya ejo huohuije ma emeshi mese yasijje. Jamajjeya quea huišo emeshi mese cuaa shajja'ajja caje ecuea esohui Eyacuiñajjija esohui pea'ai —jamaya Jesosa cua—. <sup>14</sup> E'e, ¡a'a quea mete pojji ache esohui miquianaaya huohuije'yo! <sup>15</sup> Eyaya nei miquianaya quea ja'a nee po meeje. Eyaya esohui huohui sahuaje ehuhuijji ejo. Ma pojjaajo pea cuanaja miya esaja'ajji pojjeama miquianajaya esohui quea ja'ajojo. Miquianajaya esohui e'e jojo nei cuaje, de. <sup>16</sup> Miquianajaya huapa pojjeama cuaa, miquianajaya epeejji cuaa pea'aiya dojo caje ejjajejanobiajeaquijji equi yasijje miquianaya ecuea epeejjiyojo. Ohuaya miquianaya quecua mee caje'yo, de. <sup>17</sup> Ojjaña miquianaya cajaa acaje'yo ecuea epeejji cuanijojo. <sup>18</sup> Onaa cajaa acaje a'a jjashahuaba taiquijji jama ba'a: “Eyacuiñajjiya ecuana pajea ca'yonaje, de”. Cho, Eyacuiñajjiya miquianaya pajea'yo jjima acaje'yo. Ohuaya ca ca miquianaya jaahuana caje'yo ojaya epeejji cuanijojo. <sup>19</sup> Ojjaña jiquio jayojja cuajo, ¡a'a miquianaaya eya pajea'yoyji! Miquianaya jjapeequipajea'yo ajjajo Eyacuiñajjiya miquianaya ba'e tiitii mee caje'yo eyajo.

<sup>20</sup> —Miquianaaya sohuinano cuana Jenosanenajo ejjanequitoqui'yo nequi ba majje miquianajaya eba ma cuiñajjijo ani cajjajeajea cuajicuaji caje'yo. <sup>21</sup> Ojjaña Jodea meshijo ba'e cuana capoqui'yahua eyiyo huasijje. Ojjaña Jenosanenajo ba'e cuana cacuayaqui'yahua. Quea huesha ba'e cuana, ¡a'a cue'yoquijji Jenosanena huasijje! Capoqui'yahua quea huesha nee, ma sohuinano cuaa quecua ca cuaje jjejojo. <sup>22</sup> E'e de,

jamaya quea nee nee cuaje, Eyacuiñajjija esohui yahuajo tehue ca cua jama jayojjaya cuaje. <sup>23</sup> Epona cuana o'ejji, bacua sho'ijji pea'ai quea yeno nee nee cuaje; quea camaja epoquicuajijji cuaje, de. Eyacuiñajjiya quea nee nee nee po mee caje Jenosanenajo ba'e cuana. <sup>24</sup> Sohuinanohua beca Jodio dejja cuana yacua caje'yo. Beca cuana ca ca iña majje jeyo caje. Jeyo majje dojo caje pea meshi quea huesha nee yasijje. Quea yeno nee nee cuaje, de. Sohuinano cuaa, Jodio dejja pojjeama cuaa Jenosanenajo equi ani cajjajeajea'yo majje pea equi iya caje'yo eba'e'yojji. Majotiiya oya cuana ba'eje'yo jiquio ecua Eyacuiñajjiya ba'e mee caje'yo. Ma shonoya aje oya cuana poquije'yo —jamaya Jesosa cua.

*¿Achajja acuae cuaje Jesosa cue o'oyajo?*

*(Mateo 24.29-35, 42-44; Macoso 13.24-37)*

<sup>25</sup> Majoya aje Jesusaa jama aca cua cuana ba'a: —E cue o'oya jjimahuajo ojjaña quea mete cuaje eshequi, ba'i pea'ai quea apo cuajo. Jiji'yo ajja cuaje, de. Majameta cuana jjacajjaqui'yo majje jijijijioqueje. Ba majje dejja cuana quea mete nee nee cuaje; piopio caje'yo, de. Ena cuana quea shajjaquijjo cuaje enashajo quea quemo nee neejojo. <sup>26</sup> Mete caje'yo majameta huehuahuehuajo. Dejja cuana shacamano caje'yo mete'yo majje. Oya cuaa jama huohui'ajjame acaje ba'a: “¿Yajja shai cuani so'o?” <sup>27</sup> Ojjaña cuaa eya ba caje. Eya ojjañaja Edoe Mese cuani cueje'yo bo biajje. Quea ca'a nee nee; quea sohui poja nee nee cuaje, de. E'e, quea bame cuaje ma pojajoya. <sup>28</sup> ¡Miquianaaya jiquio ba majje nequisohuacue! ¡Jjabajeasohuaquicue! Eya cueje o'oya miquiana dojhua eyahuasijje eba'e'yojji tii tii. Jamajjeya ¡quea bihui pocue! —jamaya Jesosa cua.

<sup>29</sup> Jesusaa pea esohui jama huohuime aca cua cuana ba'a: —E'e de, ¡bacue ma acui, iquena bajjani! ¡Ojjaña acui cuana bacue! <sup>30</sup> Eseyaya meshijo acui iña yani ba majje eseya jama cuani ba'a: “E'e jojo nei nayaja po'yonaje”. <sup>31</sup> ¡Jiquio ecua acui iña yani ba majje acuijjajjajo jjashahuabaquiani jayojja jama eyatahuatahua huehuahuehuani ba majje bacue eya cueje o'oya!

<sup>32</sup> E'e jojo nei ojjaña ma pojja cuanajo ba'e cuana mano jeyojeyo'yo jjimahuajo ojjaña acua cuaje'yo eya ojjañaja Emeshi Mese oe nequije'yo. <sup>33</sup> Eyatahuatahua, meshi pea'ai chama'yo cuaje'yo. Ecuea esohui ca ca ma ani tiitiime cuaje'yo.

<sup>34</sup> —¡Ishoa'ajja anicue iña oe nequia! ¡A'a jjashahuaba majamajaquianijji miquiana-jaya eba'ejjijo! ¡Miquianaya oe che jjashahuabaquicue e ecue o'oyajjijo! <sup>35</sup> Ibia ijjiameejji eshe'a'ani jjacamicuajiqui'yani jayojjaya jama cuecuajimeya eya cuaje. E'e, ojjañaja eya ba jjima cuecuajije. <sup>36</sup> Jamajjeya oe ¡shajja'ajjacue ecuea esohui! ¡A'a pajea'yojji, quea camaja cuaje, de! Ojjaña cuana quea mete nee nee, quea nee nee pea'ai cuaje, de. Jamajjeya ¡jja'ishoa'ajja aniqui tiitiicue! ¡Miquianaya ecuea epeejji po tiitiicue! ¡Eyacuiñajji nijje mimiani tiitiicue quea ca'a epojji! Eya cue o'oyajo miquianaya ecojja nei nequiñaquije. Eya miquianajaya Edoe Mese cuaje, jamajje miquianaya quea bihui cuaje, mete'ama cuaje —jamaya Jesosa cua.

<sup>37</sup> Ojjaña pojajajo Jesusaa esohui huohui canequia cua Eyacuiñajjija equijo. Mecajje poqui nequia cua eyiyo Onimo huasijje cahuiya. <sup>38</sup> Mecajjeahua Jesosa cue o'oya nequia cua Eyacuiñajjija equi yasijje. Ojjaña dejja cue nequia cua oja esohui shajja'ajjaa.

## 22

*Jodio dejja etii cuana jjashahuabaquia cua Jesosa quecua'yojji*

*(Mateo 26.1-5, 14-16; Macoso 14.1-2, 10-11; Huani 11.45-53)*

<sup>1</sup> Majoya aje quijje pishana ojjaña Jodio dejja cuana jjachichaquia cua Jenosanena huasijje ejjashahuabaquijji yahuajo nei esohuidojojjiya cuia jjima oja bacua cuana aca cuajo. Ijjia'ijjia ca cua ojee pahui hua jjimajo, Jodio etiiquianaa jayojjaya. <sup>2</sup> Ma epojja cue jjimahuajo, Eyacuiñajji nijje mimiani etii cuana, Moisesija etehue'yo huohuijji etii cuana pea'ai jjashahuaba taiqui nequia cua jama ba'a: —¿Achajja iñame shai seya Jesosa aje? Eseyaya jjeya Jesosa iñajo ojjaña ejjachichaqui nequi cuana quea quene cuaje ese nijje

—jamaya cua quea mete jjejojo Jesusaja epeeji cuanajo. Jamatii ca ca iña mee sa aca cua Jesosa equecua'yojji.

<sup>3</sup> Jodasa Jesosa shajja'ajjajji nisho cua. Ojaya pea bajjani cua ba'a: Isicaniote. Beca cuanaja Jesosa iña jjimajojo, Edosiquiaa Jodasa jjashahuaba taiqui mee ca cua Jesosa iña meesahuajji. <sup>4</sup> Jamajjeya Jodasa poquia cua Eyacuiñajji nijje mimiani etii cuana que, Eyacuiñajji equi jaahuanajji cuana pea'ai ani yasijje huohui pohua. Jama huohuiñaquime aca cua ba'a: —Ecuea eba Jesosa ma o oe nei poquiani yasijje. Eyaya miquianaya huohuije'yo.

<sup>5</sup> Majoya oya cuana quea bhui cua Jodasaja esohui shajja'ajja majje. Jamajjeya jama cua ba'a: —E'e de, ecuana miyaya ba meecue ma Jesosa oe nei poquiani yasijje. Majoya aje ecuanaaya miya sosequiaje, de.

<sup>6</sup> —E'e de, eyaya aje mi iñasahua meeje'yo —Jodasa cua. Majoya ohuaya sa'ajja ca cua e'iña mee'yojji Jesosa dejjama huasijje poqui.

*Jesosaa o shajja'ajjajji cuana nijje bobi ijia ca cua*

*(Mateo 26.17-29; Macoso 14.12-25; Huani 13.21-30; 1 Conitio 11.23-26)*

<sup>7</sup> Majoya ma epojjajo Jodio cuana ijia'ijjianijo Eyacuiñajji nijje mimianiya oe ñajjaja yahue sho'i quea bame nee nee quecua ca'ya cua Eyacuiñajji bihuiajji. Jodio dejja cuaa pahui hua jjima ijia ca ania cua. <sup>8</sup> Jamajjeya aje Jesusaa Peno, Huani pea'ai huoojea ca cua oe equi yasijje bobi jjequiya.

<sup>9</sup> O shajja'ajjajji cuaa jama huohui'ajjame aca cua ba'a: —Jesosa, ¿ache equijo acuae seya pahui hua jjima ijiaje so'o?

<sup>10</sup> Jesosa jama cua ba'a: —¡Jenosanena huasijje oe poquicue! Majoya aje miquiaaya baje oe dejja meshimisijo ena dojo caje. ¡O ba majje o cuaje jja nei nei poquicue o dobiquije'yo huasijjeya! <sup>11</sup> Majoya ma equi mese jama huohui'ajjame acue ba'a: “Ecuea esohui huohuiji jama cuanaje ba'a: —¿Ache equecuayijji acuae ecuana ijia'ijiaje e shajja'ajjajji cuana nijje so'o? Ecuana ijia sa cuani pahui hua jjima, Eyacuiñajji bihuiajji”. <sup>12</sup> Majoya aje mi huohui caje equi meseya equecuayijji quea quemmo. ¡Majoya aquiana iyajeacue; bobi cuacuacue! —jamaya Jesosa cua.

<sup>13</sup> Majoya aje oya cuana poquia cua; ba ca cua Jesusaja esohui jayojjaya. Majoya iya ca cua.

<sup>14</sup> Majoya siñajo Jesosa o shajja'ajjajji cuana cueya cua ma equi yasijje. Dobiqui majje anioquea cua e'ijia'ijiajji.

<sup>15</sup> Majoya Jesosa jama cua ba'a: —Eya miquiana nijje oe yejje nei ijia'ijiaje'yo, onaa e quecua ca'yo cuahuaje. <sup>16</sup> E'e de, eya e'ijia'ijia beca'yojji pojjeama miquiana nijje mano'yo majje. Jamajjeya quijje eyaya cue o'oya majje jiquio pahui ijiaje o'oya ojjaña cuanaja Emeshi Mese neiya jjejojo —jamaya Jesosa cua.

<sup>17</sup> Majoya ohuaya caneco jjeshe ca cua. Emejo iñanequia majje mimia cua Eyacuiñajji nijje. Majoya aje ohuaya o shajja'ajjajji cuana aca cua jama ba'a: —Ma'aje, ¡jiquio jjonojjajja na ishicie; ishijeyocue oe! <sup>18</sup> E'e de, eyaya ishi beca'yo jjima jjonojjajja na aje, Ecue Chiiya eya ojjaña huoojea'yojji po mee caje'yo; ojjaña eya shajja'ajja caje'yo —jamaya Jesosa cua.

<sup>19</sup> Majoya aje pahui jjeshe ca cua. Pahui jjeshe majje oya mimia cua Eyacuiñajji nijje. Mimi majje pahui miji ca cua. Majoya aje miji majje quia ca cuana cua. Jama huohuime aca cua ba'a: —Jiquio pahui ecuea eyami. Jjeya nei pishana eya manojje'yo, Eyacuiñajji esohui jayojja cuaje miquianaja mimishi cuijea'yojji. ¡Jamajjeya miquianaaya jiquio pahui ijiaje; jamatii apoquiapoquiacue! Jiquiajja ijia majje ¡miquianaya jjashahuabaquicue e mano'ya cuajo!

<sup>20</sup> Majoya ijia'ijiajeyo majje Jesusaa caneco jjeshe ca o'oya cua. Jjeshe majje jama huohuime aca cua ba'a: —Jiquio jjonojjajja na ecuea ena', de. Ecuea ena' cuayaqui'yajo eya manojje'yo. Jamajjeya Eyacuiñajjiya cuijea caje'yo tii ojjaña mimishi cuana. Eyacuiñajjiya esohui eyacua quia caje'yo ba'a: “Ojaya epeeji cuanaja mimishi cuana cuijea mee caje'yo tii ecuea ena' cuayaquijeya”.

<sup>21</sup> Majoya aje Jesosa jama cua ba'a: —Yani oe ese nijje e shajja'ajjajji nisho cuani; ijji'ijjiani ese nijje, de. Maaya eya sohuinano cuana iña mee caje'yo. <sup>22</sup> Eya manojeyo, Eyacuiñajjiya esohui jama cuanaje joyoya. E'e de, ma e shajja'ajjajji nisho Eyacuiñajjiya quea nee nee po mee caje'yo. Ohuaya ma e shajja'ajjajji jeaje caje'yo cuaqui yasijje e ohua sohuinano cuana iña mee caje'yojojo —jamaya aca cua Jesosaa.

<sup>23</sup> Majoya aje o shajja'ajjajji cuana mimia cua jama ba'a: —De, ¿aya shai jama acaje? —jama mimime o shajja'ajjajji cuana cua.

*¿Ache o shajja'ajjajji quea bame nee nee cuaje eyajo?*

<sup>24</sup> O shajja'ajjajji cuana mimipanajaji nequia cua. Oya cuana jama cua ba'a: —¿Ache o shajja'ajjajji quea bame nee nee cuaje eyajo?

<sup>25</sup> Jesosaa jama huohuime aca cua ba'a: —Miquianaya mimiani ecuea epeeji pojjeama jayojja, de. ¡A'a jama jjashahuabaquijji! Jamatii miquianajaya eba emeshi mese cuana quea mase cuani ojaya echacoji cuana nijje. Jamatii ma echacoji cuaa shajja'ajja cani ojaya emeshi meseja esohui jayojja oya quea mase cuanijojo. Ojaya echacoji cuana quea bihui nisho cuani. <sup>26-27</sup> ¡Miquianaya ma emeshi mese jayojja jama a'a pojji! ¡Eyajo emeshi mese jayojja quea bame nee nequi sa cuanijo pea cuana jjeya nei ba'e meesahuacue! ¿Ache shai quea bame nee nee so'o? Emeshi mese, ojaya echacoji pojja'a. Emeshi mese, de. Jamaya Eyacuiñajjiya epeeji pojjeama jjashahuabaquiani. Ecuea epeeji cuana ca e jayojja caba'yahua. Eyaya miquianaya ba'e bame meesahuaña. Eya mase'ama cuani miquiana nijje; miquiana chacosahuajji cuani eya, de. ¡Jamaya pocue e jayojjaya! Majoya quea bame cuaje —jamaya Jesosa cua.

<sup>28</sup> Majoya Jesosaa o shajja'ajjajji cuana jama huohuime aca cua ba'a: —Miquianaya jamatii po'ayequequinaje enijje. Jjapeequi tiitiinequinaje enijje, jamatii beca cuaa eseya cajaa acanaje. <sup>29-30</sup> Jamajojoya aje oe miquianaya Eyacuiñajjiya quea bame quia cani, e ohua acanaje jayojjaya. E'e, ohuaya eya ojjaña dejja cuanaja Emeshi Mese nei po mee ca'yonaje; jamaya eyaya miquianaya Jodio dejja cuanaja emeshi mese jayojja po meeje'yo eyajo. Jomajo eseya ba'e tiitiije'yo; quea bihui cuaje —jamaya aca cua Jesosaa o shajja'ajjajji cuana.

*Jesosa Peno nijje mimia cua*

*(Mateo 26.31-35; Macoso 14.27-31; Huani 13.36-38)*

<sup>31</sup> Majoya Jesosa mimia cua Peno nijje. Penoja pea bajjani cua ba'a: Simohui. Jama Jesosa cua ba'a: —Simohui, shajja'ajjacue jiquio esohui ba'a: Edosiquiaa miquianaya eya pajea mee'yo sa acani. Ohuaya miquianaya mimishi po mee'yo sa acani. <sup>32</sup> Simohui, eya miminaje mijo Eyacuiñajji nijje. Miyaya eya cajaa jayojja aje. Majoya miya enijje jjapeequi neineje o'oya. Jamajjeya enijje jjapeequi o'oya majje ¡pea e shajja'ajjajji cuana jjapee tiitiiqui meesahuacue enijje!

<sup>33</sup> Simohui jama cua ba'a: —Ecuea Emeshi Mese nei, Jesosa, eya aje minijje tiiya poquije mi jeanobia caje yasijje mi jayojja pea'ai mano'yome po'yohua. Ecuea aje mi epajea'yojji pojjeama.

<sup>34</sup> Jesosaa Peno jama aca cua ba'a: —Peno, mecahuajje cachina yahue taaa jjimahuajo, miya jama siajje pome cuaje ba'a: “Chojja, ecuea Jesosa ba jjima”. Pea beca peejjima siajje ameya aje miyaya —jamaya Jesosa cua.

*Beshahua nei acua Jesosa e'iñajji*

<sup>35</sup> Majoya aje Jesosaa o shajja'ajjajji cuana jama huohui'ajjame aca cua ba'a: —Yahuajo pishana eyaya miquianaya huoojeanaje esohui huohuiya. Eyaya miquianaya huoojeanaje aema' jamatii bejjoma', bashosocoma', miquea ejiojjijo nei nequi dojonaje. Eyaya miquianaya jaahuananaje. ¿A'a miquianaya quea shoe cuanaje? Chojja.

Oya cuana jama cua ba'a: —E'e jojo nei, jaahuana neinajeya aje jja ca miyaya ecuana, de.

<sup>36</sup> Majoya aje Jesosa jama cua ba'a: —E'e de, jjeya ca ca beca cuaa eya quecua caje'yo. Eya miquiana nijje nequi tii ajja jiquio meshijo, eya mano'yo majje. ¡Jamajjeya ca

oe miquea bejjo dojocue; miquea bashosocojo biyocuatajeacue quea huesha epoquijji! jJequicue miquea equecuajji! Chamajo jJeshecue miquea daqui moo sosejje. <sup>37</sup> E'e de, yahuajo Eyacuiñajjija etehue'yo ejo jama cua ba'a: "Dejja mase cuanaja boti'ama Eyacuiñajjija huoojea'yo cuaje. Dejja mimishi jayojja acaje'yo. Jamajjeya quecua caje'yo cuaa" jamaya acaje jJeyahua nei, de —jamaya Jesosa cua.

<sup>38</sup> O shajja'ajjajji cuana jama cua ba'a: —Bacue, yani ecuanaja beca equecuajji. Ecuanaa sohuinano cuana quecuaje'yo, de.

Jesosa jama cua ba'a: —Miquianajaya ba jjima ecuea esohui, de. Mahuiso ecuea esohui —jamaya Jesosa cua.

*Jetesemani quejo Jesosa mimia cua Eyacuiñajji nijje*  
(Mateo 26.36-46; Macoso 14.32-42)

<sup>39</sup> Majoya Jesosa poquia cua Onimo eyiyo huasijje mimiya oja Chii nijje. Cuamaya oya poqui majamaja nequia cua mimiya Eyacuiñajji nijje. Onijje o shajja'ajjajji cuana poquia cua pea'ai. <sup>40</sup> Majoya aje Jesusaa jama aca cua ba'a: —¡Mimi majamajacue oe Eyacuiñajji nijje mimishi'ama epojji!

<sup>41</sup> Majoya Jesosa poquia cua quea huesha pishana mimiya Eyacuiñajji nijje oe nei. Majoya oya ecui'oshajjajo nequi majje mimia cua jama ba'a: <sup>42</sup> —E'e de, Eyacuiñajji, eya beshahua nei poqui sa po ajja acui ecueata'apee yasijje. Eya quea mete nee nee ojjañaja mimishi cuanajo, de. Ecue Chii, ecuea eba miyaya eya acui ecueata'apee yasijje poqui mee sa ña emano'yojji ojjañaja mimishijo. Jamajjeya ¡quea ca'a po meecue eya miquea ejjashahuabaqui'yojji jayojja jama e'ajji! —jama mimimeya Jesosa cua.

<sup>43-44</sup> Jesosa quea mano jJabaquia cua emano'yojji jjejojo. Majoya mimi o'oya cua oja Chii nijje jJanobajjima nei. O janobajjima nei mimianijo, shishi majje ena' jayojja oquequia cua meshi yasijje, de. Majoya aje esohuidojojji eyajje nequioquea cua Jesosa mete'ama po meeya. Ohuaya majoya Jesosa quea nee ca'a po mee ca cua; jama cua ba'a: —¡Mique Chiija esohui jayojja jama acue! —jamaya aca cua.

<sup>45</sup> Majoya Jesosa oja Chii nijje mimipajea'yo majje oya poquia cua o shajja'ajjajji cuana huasijje. Ba ca cua oya cuana ecahuijaa quea yeno nee nee jjejojo, de. <sup>46</sup> Ohuaya oya cuana jama aca cua ba'a: —¿Apiojji acuae miquianaya ecahuijaa so'o? ¡Anisohuacue jja oe; mimi majamajacue miquianaya Eyacuiñajji nijje! Jamajoya pea cuaa quea mimishi epo mee'yojji pojjeama —jamaya Jesosa cua.

*Jesosa ña ca cuaa cua*  
(Mateo 26.47-56; Macoso 14.43-50; Huani 18.2-11)

<sup>47</sup> Jesosa mimianijo tii Jodio etii cuana, sohuinano cuana, Eyacuiñajji nijje mimiani etii cuana pea'ai cueya cua. Jodasa, Jesosa shajja'ajjajji nisho cueya cua o que. Oya ehui dojojji nei cueya cua. O e'ñajji jJanequichipiquia cua Jesosa nequi yasijje. JJanequichipiqui majje shemo tojjo nisho ca cua. <sup>48</sup> Majoya aje Jesusaa jama aca cua ba'a: —Jodasa, miyaya eya shemo tojjo nisho majje sohuinano cuana ña mee'yonaje. ¿Yajjajo Jodasa? —jamaya Jesosa cua.

<sup>49</sup> Majoya o shajja'ajjajji cuaa ba majje Jesosa jama huohui'ajjame aca cua ba'a: —Jesosa, ¿a'a ecuaaya sohuinano cuana jajajeaje?

<sup>50</sup> Majoya aje oe oja eshajja'ajjajjiya dejja esapa jajapojojeajji nisho eshajja jajasejjajea ca cua ebañei shajjaje. Eyacuiñajji nijje mimiani etiija echacojji cuanija eshajja, de.

<sup>51</sup> —Chojja, ¡a'a jja oe jajajji! —Jesosa cua.

Majoya Jesusaa ma dejjaja eshajja ejajasejjajea emeya nequia ca'ya cua. Shajja jaja jjima jayojja shajja pana'yome aca cua. <sup>52</sup> Majoya Jesusaa dejja cuana jama huohui'ajjame aca cua ba'a: —¿Apiojji miquianaya cueyanaje baajji, acuijji e'ña? ¿A'a cae jja ña siipojji so'o? <sup>53</sup> E'e de, ojjaña pojajajo eya esohui huohui po nequinaje Eyacuiñajjija equijo. Miquianajaya eya ña jjima cuanaje ma equijo quea meteya jjejojo dejja cuanajo. Jjeya ca ca Edosiquiaa miquianaya ña mee canaje jiquio quejo dejjamajo.



*Peno Jesusaja epeeji nisho jayojja cua*

(Mateo 26.57-58, 69-75; Macoso 14.53-54, 66-72; Huani 18.12-18, 25-27)

<sup>54</sup> Majoya sohuinano cuaa Jesusa iña'yo majje dojo ca cua Eyacuiñajji nijje mimiani etiiija equi yasijje. Penohua ca ca quea huesha pishana quiquishi ca poquia cua. <sup>55</sup> Majoya pea sohuinano cuaa cuaqui dahuahuoje ca cua equi epeeyi dojjojo. Majoya anioquea cua cuaqui pejeje ejjayoquijji. Peno pea'ai anioquea cua ona nijje yajja Jesusa onaa acaje ebajji. <sup>56</sup> Echacojji ahuema'aniya Peno jjayoquiani ba majje cojja ba neinei ca cua. Ba majje pea cuana jama huohuime aca cua ba'a: —E'e, joya Jesusaja epeeji ani ba'a — jamaya cua ahuema'ani.

<sup>57</sup> Peno jama cua ba'a: —Ecuea Jesusa ba jjima nei nei.

<sup>58</sup> Quijje pishana pea dejjaa Peno ba ca o'oya cua. Jama cua ba'a: —Miya jja Jesusaja epeeji, o shajja'ajjajji cuani.

—Chojja, ecuea Jesusa ba jjima nei nei —jamaya aca cua Penohua.

<sup>59</sup> Majoya quijje pishana peaa oya ba ca o'oya cua: —E'e, oya jja Jesusaja epeeji nei nei. Oya jja Janinea meshijo ba'e Jesusa jayojjaya.

<sup>60</sup> Majoya aje Peno jama cua ba'a: —Chojja de, ¿ajeo ajja mi ca mimiani so'o?

Peno miminequijo tii, oe cachina yahue taaa cua. <sup>61</sup> Ma cachina taaajo Jesusa jjanequijea pajjaquia cua Peno bajji. Majoya aje Peno jjashahuabaquia cua Jesusaja ehuhuijo jama ba'a: “Cachina yahue taaa jjimahuajo, pea beca peejjima sijje ameya aje miyaya, eya ba jjima nisho aje”. <sup>62</sup> Majoya Peno cuayaquia cua. Pa neinei'ya cua Jesusa ba jjima nisho epo jjejojo; quea yeno nee nee'ya cua.

*Jesosa Jodio dejja cuaa niñeba ca cua*

(Mateo 26.67-68; Macoso 14.65)

<sup>63</sup> Sohuinano cuaa Jesusa jaahuana ca nequia cua, cuaya meequi'yo jjima yajji. Majoya Jesusa niñeba ca cuaa cua, majoya Jesusa cuia ca cua. <sup>64</sup> Majoya cuia majje cojja japa ca cua. Cojja japa majje shemo cuiasejjajea ca cua. Shemo cuiasejjajea majje ohuaya cuaa Jesusa jama huohui'ajjame aca cua ba'a: —¿Aya acuae mi cuia canaje so'o? ¡Jashahuaba'ajjaquil!

<sup>65</sup> Majoya sohuinano cuaa Jesusa niñebajea neinei ca'ya cua, mimijaji neinei'ya cua onijje.

*Pea cuaa Jesusa dojo ca cua Jodio etii cuana huasijje huohui'ajjaa*

(Mateo 26.59-66; Macoso 14.55-64; Huani 18.19-24)

<sup>66</sup> Jjapojjaquijajo Jodio etii cuana jjachichaquia cua. Ojjaña Jodio etii, Eyacuiñajji nijje mimiani etii, Moisesija etehue'yo huohuijji etii cuana, ojjaña ojee mimia cua Jesusajo. Majoya sohuinano cuaa Jesusa dojo ca cua Jodio etii cuana huasijje. Majoya aje etii cuaa Jesusa jama huohui'ajjame aca cua ba'a: <sup>67</sup> —¡Huohuicue ecuanaya miquea ebajjani! ¿A'a miquea ebajjani Quito, Eyacuiñajjija huoojea'yo, pojja'a?

Jesosaa jama saja'ame aca cua ba'a: —Eya “e'e” cuajo miquianaya jjashajja'ajjaquil ajja, de. <sup>68</sup> Miquianaya eyaya huohui'ajjajje saja'a jjima aje'yo eya. Jamaya eya saja'ajje miquianajaya eya epichojea'yojji pojjeama. <sup>69</sup> E'e, eya poquije'yo jjeya nei pishana eyahuasijje Eyacuiñajji nijje ebañeijje ani'yohua. Jomajo ecue Chii quea sohui poja nee nee enequi tii tii —jamaya Jesusa cua.

<sup>70</sup> Majoya aje Jesusa ojjaña jama huohui'ajjame aca cua ba'a: —¿A'a miya Eyacuiñajjija Bacua Ejja nei so'o?

Jesosaa jama saja'ame aca cua ba'a: —E'e jojo nei miquiaaya esohui ejo aña.

<sup>71</sup> Majoya aje oya cuana jama mimijajime cua ba'a: —¡De, pea dejja a'a iyaajji Jesusa huohuijji! Ecuana jjeya nei shajja'ajjanaje ojaya esohui. Ohuaya Eyacuiñajji niñeba canaje Eyacuiñajjija Bacua Ejja miame —jama mimijajimeya cua Jesusa nijje.

## 23

*Jesosa emeshi mese Pinato huasijje dojo ca cua*  
(Mateo 27.1-2, 11-14; Macoso 15.1-5; Huani 18.28-38)

<sup>1</sup> Majoya ojjaña nequisohua majje poquia cua emeshi mese Pinato huasijje Jesosa dojhua. Pinato esohuinano mese cua, ojjaña emeshi mese cuanaja emeshi mese pea'ai cua. <sup>2</sup> Jesosa dojo majje Pinato cojja nei nequia ca cua Jodio etii cuaa. Onaaya Jesosa jama niñebame aca cua ba'a: —Ecuua jiquio dejja banaje. Mimitecuetecuequi ecuanaja meshijo. Oya jama cuanaje ba'a: “¡A'a bejjo quiajji emeshi mese sosequiajji!” Oya pa Eyacuiñajjija huoojea'yo cuani; oya pa Jodioja emishi mese posa cuani, de —jamaya oya cuana siajje cua Jesusajo.

<sup>3</sup> Majoya Pinatohua Jesosa jama huohui'ajjame aca cua ba'a: —¿A'a miya Jodioja emeshi mese cuani?

Jesosaa jama saja'ame aca cua ba'a: —Miyaya huohuiaña jayojjaya cuani eya.

<sup>4</sup> Majoya Pinatohua etii cuana jama huohuime aca cua ba'a: —De, jiquio dejja jjashahuaba taiqui ajja, capichojea'yahua jja, de.

<sup>5</sup> Oya cuana quea quene nee nee cua. Mimia cua janobajjima nei nei. Jama tecuetecueme cua ba'a: —Oya ca ca jjashahuaba taiquinaje, de. Ohuaya esohui huohui ca ayequequinaje ojjaña cuiñajji yasijje. Ebionei Janinea meshijo hohui canaje, jjeya Jodea meshijo huohui canaje jiquio cuiñajji cuana huasijje, jjeya nei pea'asi, de. Ojjaña quea quene nee nee, quea shajjaquijjo nee nee ohuaya po mee canaje cuana —jama siajje ameya aca cua Jodio etii cuaa.

*Jesosa dojo ca cua pea emeshi mese que, Enode que*

<sup>6</sup> Pinatohua ona shajja'ajja majje jama huohui'ajjame aca cua ba'a: —¿A'a jiquio dejja Janineajo ba'e?

<sup>7</sup> —E'e —oya cuana cua.

Pinatohua ma shajja'ajja majje Jesosa huojea ca cua Enode que, Janinea ameshi mese que. Enode Jenosanenajo ania cua anicuaa poqui. Jamajjeya Pinatohua Jesosa, Jodio etii cuana pea'ai huoojea ca cua Enode que.

<sup>8</sup> Enode Jesosa ba majje jama cua ba'a: —E'e de, jjeya nei eyaya baña jiquio dejja Jesosa. Eyaya oya ba sa anaje ojaya esohui eshajja'ajjajji; emano'yo cuana eshequi mee caje'yo ba sa anaje pea'ai —jamaya cua Enode. Oya ca ca Jesusaja epeeji po sa po ajja nei.

<sup>9</sup> Majoya Enodeya huohui'ajja majamaja ca nequia cua. Jesusaja oya Enode sohui saja'a jjima cua. <sup>10</sup> Jodio etii cuaa Jesosa niñeba neinei ca aña cua. <sup>11</sup> Majoya Enodeya, oja sohuinano cuaa Jesosa hue'e ca cua esoadojjji. Daqui quea sose huiso emeshi meseja jayojja Jesosa huosho mee ca cua emeshi mese nisho yajji. Majoya aje daqui huosho mee majje bihuia nisho ca cua. Majoya aje Jesosa huoojea ca o'oya cua cuaa Pinato que. <sup>12</sup> Ma pojajajo Jesosa nijje mimijaji majje Enode Pinato nijje jjapeequinaje. Yahuaajo Pinato Enodeja epeeji pojjeama cua.

*Jesosa Pinatohua mano mee ca'ya cua*  
(Mateo 27.15-26; Macoso 15.6-15; Huani 18.39-19.16)

<sup>13</sup> Majoya aje Pinato jjachichaquia cua Jodio etii cuana nijje, Jenosanena emeshi mese cuana nijje, pea dejja cuana nijje pea'ai. <sup>14</sup> Jama huohuime aca cua ba'a: —Miquianaya ¿apoiiji Jesosa yenaje so'o? Miquianaya jama cuanaje ba'a: “Ohuaya ojjaña dejja cuana quea quene, quea shajjaquijjo po mee cani” poso anaje. Cho oya ca ca quea mimishi pojjeama cuani. E que miquiaaya yajo aje jja, eyaya Jesosa huohui'ajjanaje. Jjeya nei ecuea eba Jesosa, oya jjashahuaba taiqui ajja. Oya quea mimishi pojjeama. Joya ecua miquiaaya huohui yaña jama pojjeama. <sup>15</sup> Enode jama cuanaje ba'a: “Oya ca jja ca quea mimishi pojjeama, de”. Jamajjeya ohuaya Jesosa huoojea ca o'oyanaje e que. ¡Bacue! Eyaya Jesosa mano mee'yo jjima aje, capichojea'yahua jja Jesosa, de. <sup>16</sup> Jamajjeya eyaya oya cuia meeje. Majoya aje cuia mee majje pichojea meeje'yo —jamaya cua Pinato.

<sup>17</sup> Ojjaña eshequiaja Pascuajo Pinatohua oe ejeanobia nequi huoojeacuaya ca'yaninaje, Jodio cuana quea bei epojji. Jamajjeya Pinato jama cua ba'a: —Jesosa eyaya huoojeacuaya mee'yo jiquio shejo.

<sup>18</sup> Ma esohui shajja'ajja majje ojjaña Jodio cuana quenequene neinei'ya cua; taa cua jama ba'a: —Chojja, ¡Mashama ca oe huoojeacuaya'yocue! ¡Quecua mee'yocue Jesosa!

<sup>19</sup> Mashama jeanobia ca cua yahuajo pishana, oya quea mase nee nee cua. Oya Shomano emeshi mese quecuapanajji epo; ona quecua'yojji epo pea'ai. Oya quea mimishi nee nee cua.

<sup>20</sup> Pinatohua ca ca Jesosa huoojeacuaya'yo sa aca cua, jamajjeya jama mimome po o'oya cua ba'a: —Cho, Jesosa ca ca oe huoojeacuaya mee'yo sa aña.

<sup>21</sup> Ojaya esohui shajja'ajja majje ojjaña cuana janobajjima nei nei jama taaame cua ba'a: —Chojja de, ¡Jesosa ca oe quecua mee'yocue jjeya nei! ¡Acui ecueata'apeejo oe ba'ehuanasohuajecue!

<sup>22</sup> Pinatohua jama huohuime aca o'oya cua ba'a: —¿Apiojji shai miqianaaya oya mano mee'yo sa aña so'o? Oya ca jja ca quea mimishi pojjeama cuani. Eyaya oya cuia neinei mee'yo majje huoojeacuaya meeje'yo. <sup>23</sup> Majoya aje ojjaña cuana taa o'oya cua jama ba'a: —¡Ba'ehuanasohuajecue oe acui ecueata'apeejo Jesosa!

Ojjaña cuana taa majamaja cua. Quenequene neinei'ya cua Pinato nijje. <sup>24</sup> Jamajjeya pinato jama jjashahuabaquime cua ba'a: —E'e de, eyaya Jesosa caquecua meeje'yahua, dejja cuana enijje quea quene cuequijojo. Eyaya ca oe Mashama cahuoojeacuaya mee'yahua.

<sup>25</sup> Majoya aje pinatohua ma ecua ojjaña taaanaje jama jayojjaya aca cua. Jamajjeya ohuaya Mashama huoojeacuaya mee'ya cua; Jesosa ca ca oe huoojea ca cua acui ecueata'apeejo eme' cacajejji emano'yojji.

*Jesosa ba'ehuanasohuajea ca cua acui ecueata'apeejo*

*(Mateo 27.32-44; Macoso 15.21-32; Huani 19.17-27)*

<sup>26</sup> Majoya sohuinano cuaa Jesosa acui ecueata'apeejji dojo mee ca cua o ba'ehuanasohuajejji. Jesosa saja ca cua acui quea biquieya jjejojo. Jamajjeya sohuinano cuaa oe dejja ma acui dojo mee ca cua. Oya Simoni bajjani cua; Sinene meshijo ba'e cue cua. Jamajjeya Simoniya Jesosa quiquishijji dojo ca cua acui ecueata'apee abojji. <sup>27</sup> Ojjaña dejja cuana epona cuana pea'ai pa poquia cua Jesosajo quea yeno jjejojo. <sup>28</sup> Jesosaa epona cuana ba majje jama aca cua ba'a: —Jenosanenajo ba'e epona cuana, ¡a'a oe ejo pajji! ¡Miquianaja pa sa cuanijo pacue miquianajo miquianaja bacuajo pea'ai! <sup>29</sup> Quijje pishana quea camaja cuaje miquianajo. Miquianaaya jama huohuije ba'a: “Oe epona bacuama' camaja'ama ba'yani”. Sohuinano cuana cueje jiquio cuiñajji yasijje miquiana quecuaa, chama'yo tii cuaje miquianajaya bobi. Jamajjeya miquianajaya ebacua yanijo quea yeno nee nee cuaje. Ebacua cuana pa neinei'yo bobimajo. <sup>30</sup> Dejja cuana quea yeno nee nee cuaje pea'ai. Joya ecua atii mano'yo sa cuani jama miquianaya cuaje. Majoya miquianaya jjashahuabaquije jama ba'a: “Eyiyo, jecuaa biajje oe jaabicha cuajicue ecuaa cuia cuaji'yojji” jamaya miquianaya cuaje. E'e epona cuana, miquianaya ani sa po ajja cuaje quea camaja ba'e jjejojo. Jamajjeya ma pojajjo quea nee nee cuaje. <sup>31</sup> Jjeya nei sohuinano cuaa eya quecua caje'yo. Maya ca ca oe quea tai pishana. Quijje ojjaña sohuinano cuaa miquianaya quecua jeyojeyo caje'yo, maya quea tai nee nee cuaje'yo. Jamajjeya ¡a'a pajji ejo; miquianajoya jja oe pa neinei'yo! —jamaya Jesosaa aca cua.

<sup>32</sup> Majoya sohuinano cuaa beca siipojji dojo ca cua Jesosa nijje eba'ehuanasohuajejji.

<sup>33</sup> Majoya oya cuana poquia cua eyiyo Sapa Jjii bajjani yasijje. Bañaqui majje Jesosaja eme' caca ca cua acui ecueata'apeejo; ejiojjijje pea'ai caca ca cua. Cacajeyo majje nequiasohuajea ca cua. Ma becanejjijji pea'ai siipojji pea acui ecueata'apee cuanajo nequiasohuajea ca cua Jesosa pejejo oe ebañei mijijje, pea shani mijijje. <sup>34</sup> Acui ecueata'apeejo ba'ehuanasohuajea cajje Jesosa mimia cua Eyacuiñajji nijje ojjaña nequijo jama ba'a: —Ecue Chii, ecue Chii jiquio dejja cuanaja ba jjima e'e jojo nei eya miquea Ebacua Ejja cuani. Jamajjeya jiquio mimishi cuije'yocue!

Majoya aje sohuinano cuaa Jesusaja daqui huijjiajaja'yo majje hue'e ca cua oja daqui ya'yojjiya. <sup>35</sup> Ojjaña dejjaa Jesosa ba ca nequia cua, Jodio etii cuaa pea'ai. Niñeba ca cua Jesosa jama ba'a: —Dee, ¿a'a Jesosa ojjaña jaahuanajji pojjeama cuanaje? Oya ona nahuejji pojjeama. Jamajjeya mi nequioque'yani acui ecueata'apeejo ba'e. Oya Eyacuiñajjija Bacua Ejja jjabaqui majje jja ca oe jjeyahua neiya canequioque'yahua —jama niñebameya Jodio etii cuaa aca cua.

<sup>36</sup> Sohuinano cuana mimijajia cua pea'ai. Jesosa majoya quia'ajja ca cua jjonojjajja na sese e'ishijji nisho. <sup>37</sup> Jama mimijajime cua ba'a: —¡Miya Jodioja emeshi mese nei jjabaqui majje mee nei nequioque'yocue acui ecueata'apeejo ba'e jjeyahua nei!

<sup>38</sup> Jesosa ba'e sapa biajje oja bajjani etehue'yo caca ca cua jama ba'a:

*Oya Jesosa, Jodioja emeshi mese epo'yojji*

<sup>39</sup> Oe siipojji pea acui ecueata'apeejo ba'e mimijajia cua Jesosa nijje jama ba'a: —¡A'a cuae miya Eyacuiñajjija Bacua Ejja nei jjaba'ajjaqui socue! ¡Ache oe nequioque'ajjaqui'yo socue; ecuanaya pea'ai pajjaja oe che nequioque meequi'yoque!

<sup>40</sup> Pea siipojjiya pea acui ecueata'apeejo ba'eya ca ca ma esohui shajja'ajja majje tanacua ca cua jama ba'a: —¡A'a jjashahuaba taiquijji, de! ¿A'a miya Eyacuiñajjijo jjashahuabaqui ajja nei nei? Jjeya se manojje'yo. <sup>41</sup> Eseyá mano mee ca'yani sohuinano cuaa quea mimishi nee neejojo. Jesosa ca ca mimishi'ama, de.

<sup>42</sup> Majoya aje ohuaya Jesosa jama aca cua ba'a: —Jesosa, ¡miya eyahuasijje poqui'yo majje ejo che jjashahuaba bamequicue!

<sup>43</sup> Majoya Jesusaa jama aca cua ba'a: —E'e, jiquio pojjaajo miya enijje eyahuasijje ba'esohuaquije'yo manojje'yo majje.

*Jesosa mano'ya cua*

*(Mateo 27.45-46; Macoso 15.33-41; Huani 19.28-30)*

<sup>44</sup> Majoya esheque biacojjajja nequijo, shequima'po mee ca'ya cua. Quea apo nee nee po mee ca'ya cua ojjaña meshi yasijje. Quijje nei jjapojjaqui mee ca'ya cua eshequi ejjanequijeapaaquijo. <sup>45</sup> Eshequi quea apo nee nee po'yajo, Eyacuiñajjija equijo ba'ehuana ba'e daqui moo nei jja'isajajaquia cua eyiyesama neijje. <sup>46</sup> Majoya aje Jesosa jjanobajjima nei taaa cua jama ba'a: —Ecue Chii, ecue Chii eyaya mi que ecue dojjoshahua huoojeaje'yo. Jjeyahua mo poquijeyoje.

Jama po majjeya poquijeya cua.

<sup>47</sup> Sohuinano huoojeajji cuani meseya Jesosa manojyajo, ba ca cua. Majoya jama cua ba'a: —E'e de, e'e jojo nei Jesosa mimishi'ama nei nei cuanaje; oya Eyacuiñajjija Bacua Ejja cuanaje, de.

<sup>48</sup> Ojjaña dejja o ba cuequi poqui'ya cua. Ese'lo cuiaqueyajea ca poqui'ya cua quea yeno nee neeya jjejojo sapa cuana cuiapashijea ca poquia cua. <sup>49</sup> Ojjaña Jesusaja epeeji cuana ca ca quea huesha nequia cua. Epona cuaa pea'ai quea huesha aniya ba ca cua Jesosa onaa cuia ca'yoqui acui ecueata'apeejo ba'e. Ma epona cuana yahuaajo nei jjapeequia cua Jesosa nijje, Janinea meshijo ba'e.

*Jesosa mei jjani yasijje huananobia ca cua*

*(Mateo 27.57-61; Macoso 15.42-47; Huani 19.38-42)*

<sup>50-51</sup> Oe dejja Jose bajjani quea aquiána huiso cua. Oya pea Jose, Amatea cuiñajjijo ba'e. Oya jjapee tiitiiquia cua Jesosa nijje. Oya Jodio etii cua. Jesosa manojyo jjimahuajo, oya Jodio etti cuana nijje jjachichaquia cua. Ohuaya beca etii cuana jama huohuime aca cua ba'a: —Chojja de, eya ca iña Jesosa mano mee sa po'yo ajja.

<sup>52</sup> Jamajjeya Jesosa manojyajo Jose poquia cua Pinato que Jesosa epoquijeyo ba'e huohui'ajjaa; jama aca cua ba'a: —E'e de, ¡Jesosa mo quia'yoque! Oya ca ca mano neinei'yonaje. Eyaya oya dojjoje'yo ecuea mei jjani yasijje ehuananobiaqui'yojji.

<sup>53</sup> Majoya aje ohuaya Jesosa manojyo ba'e jjequioquea ca'ya cua acui ecueata'apeejo ba'e. Jjequioquea'yo majje bebo ca'ya cua daqui oshe quea bojea nee neeya. Bebo majje

mei jjani ai yasijje huananobiaa dojo ca cua mano'yo tii cuanaja ejaajji ajjima huasijje.  
<sup>54</sup> Sinecua nei, ejomishocajji epojja po jjimahuajo Jesosa huananobiaa dojo ca cua Joseya.

<sup>55</sup> Janinea meshijo ba'e epona cuana Jose quishishi poquia cua mei jjani yasijje Jesosa emano'yo baa. Jesosa mei jjanijo huana ca cua Joseya. Epona cuaa Jesosa emano nei'yojaa baqui ca cua shiyeshiyejo eshaquijji nisho. Majoya Joseya mei quea quemo jeacajjajja ca cua mei jjani naba capa'yojji. <sup>56</sup> Majoya epona cuaa Jesosa jjanijo ehuananobia jaa ba majje shiyeshiyejo shaqui jjima aca cua. Jamajjeya poqui'ya cua ocuayaya equi yasijjeya. Majoya acui shiye pohuipohui shiyeshiye acua aca cua Jesusaja eyami shaquijji nisho. Shaqui jjima aca cua ejomishocajji pojja jojoya. Jamatii Jodio dejja cuana ma pojajjajya chacochocho aca cua.

## 24

### *Jesosa shequi'ya cua*

*(Mateo 28.1-10; Macoso 16.1-8; Huani 20.1-10)*

<sup>1</sup> Mecajjeahua nei nei nomico pojajjo, epona cuana poqui o'oya cua Jesosa ba o'oyaa. Shiyeshiye acua'ya dojo ca cua jjani jaa huasijje, Jesusaja eyami shaa nisho ihui jjima epojji. <sup>2</sup> Epona cuaa ba cañaquia cua mei jjani eca'apejo'yo cua. <sup>3</sup> Oya cuana dobiquia cua ma mei jjani dojo huasijje Jesosa baa nisho. Dobiqiu majje Jesosa chama' ba ca'ya cua. <sup>4</sup> Majoya quea mete nee nee po'ya cua Jesosa chama' ba majje. Ma mete'yoquiya aje eponaa beca esohuidojojji dejja jayojja ba ca cua o pejjejo nequi. Ojaya daqui quea oshe nee nee, quea siyo nee nee cua. <sup>5</sup> Epona cuana quea mete nee nee cua; ecojja cahui cua quea cojja sajaja jjejojo. Majoya aje esohuidojojjiya jama huohuime aca cua ba'a: —¿Yajjajo acuaeya miqianaya sa'ajjaña Jesosa jiquiojo so'o? ¿A'a emano'yo poso? Chojja, oya shequi'yonaje. ¡Chama'yo ca jja ca jiquiojo! ¡Oya ca jja ca eshe nequi'yo!  
<sup>6</sup> ¿A'a jja miqianaaya Jesusaja esohui paje'yonaje ma ohua yahuajo huohui ca cua Janinea meshijo nequiahuaa? <sup>7</sup> Jesosa yahuajo pishana, mano'yo jjimahuaja, jama cua ba'a: “Mimishi cuaa eya mano mee caje'yo acui ecueata'apejo. Pea beca peejjima cahuime po majje shequije'yo” jamaya cua Jesosa mano'yo jjimahuaja. Jamajjeya ¡a'a quea mete pojji! —jamaya aca cua esohuidojojjiya.

<sup>8</sup> Ma esohui shajja'ajja majje epona cuaa Jesusaja esohui shahuaba ca'ya cua. <sup>9</sup> Majoya aje poqui cuajicuaji'ya cua pea cuana huohui'yohua. Huohui cañaquia cua o shajja'ajjajji cuana, ojjaña cuana pea'ai Jesosa shequi'yonajejo. <sup>10</sup> Mania Madanena, pea Mania Jacoboja nae, Huana, pea epona cuana pea'ai poquia cua huohui po'yohua. <sup>11</sup> O shajja'ajjajji cuaa epona cuana ohua huohui cajje, jama aca cua ba'a: —Epona cuana, sijje mi ca cuani Jesosa eshequi'yojo miame. Miquianajaya esohui shajja'ajja sa po ajja ca iña —jamaya cuaa aca cua.

<sup>12</sup> Peno ca ca quea cuejipashi nei poquia cua mei jjani yasijje ba'ajja'yohua. Bañaqui majje mei jjani ye'e'ajja cañaquia cua ma Jesosa jaa cuajo. Ba ca cua o bebojji oe ani, oja jeajeana'yo jja oe ania cua.

—De, chama'yo Jesosa yaña, de —jamaya Peno cua. Jamaya po majje poqui o'oya cua equi yasijje. Poquianijo oya jjashahuabaquia cua Jesusajo. Ojaya ba jjima; jamajjeya jama cua ba'a: ¿Yajja shai po'yonaje Jesosa? —jamaya cua Peno.

### *Becanejjiji pea'ai o shajja'ajjajjiya Jesosa ba ca cua Emao jiojjije poquijeya*

*(Macoso 16.12-13)*

<sup>13</sup> Oya pojajjo tii, becanejjiji pea'ai o shajja'ajjajji cuana poquia cua Emao cuiñajji yasijje. Quea huesha pishana cua Jenosanena ebañaquijji. <sup>14</sup> Jesosa emano'yo niñeba ca poquia cua. <sup>15</sup> O mimi poquijejo Jesosa jjanequichipiquia cua onijje. Jjanequichipiqui majje onijje poquia cua. <sup>16</sup> Jesosa ba majje ba tai ca'yonaje, pea dejja posoya aca cuaa cua. <sup>17</sup> Majoya aje Jesusaa jama huohui'ajjame aca cua ba'a: —¿A'ya cuae nequiaa ca niñeba poquijje so'o?

<sup>18</sup> Majoya Quiopasiya jama saja'ame aca cua ba'a: —¿A'a miquea eba ma onaa acanaje Jenosanenajo?

<sup>19</sup> Majoya aje jjaja Jesosa jama cua ba'a: —¡Huohui'ajja socue mo yajja acuae mi cuanaje!

Oya jama aca cuaa cua ba'a: —Jesosa Nasanenajo ba'e. Oya quea sohui poja nee nee cuanaje. Ohuaya Eyacuiñajjija esohui huohui canaje, de. Ojjaña dejja jjashahuabaquinaje ojaya esohuijo. <sup>20</sup> Majoya Jodio etii cuaa, emeshi mese cuaa, Jesosa iña mee ca'yonaje, acui ecueata'apeejo quecua mee ca'yonaje. <sup>21</sup> Ecuana jjashahuabaquinaje Jesosa Jodio dejja cuanaja emeshi mese epojjijo Eyacuiñajjija huoojea'yo pea'aijo. Oya ca ca chama'yo tii po'yonaje, de. Pea beca peejjima cahuime oya emano'yojaa. <sup>22</sup> Jiquio pojajo mecajeahua nei nei epona cuana poquinaje mei jjani yasijje Jesosa shaa nisho. Jjajjasoquinaje Jesosa chama'yojojo. <sup>23</sup> Jesosa emano'yojaa ba'yo jjima cuanaje, jamajjeya cue o'oyanaje huohui po'yohua. Majoya aje pa ponaa ohuaya esohuidojojji ani ba canaje jjani dojjojo ani. Jama huohuimeya aje pa pona majoya acanaje ba'a: “Jesosa ca ca emano'yo tii pojjeama jaa, shequi'yonaje ca coma” jamaya pa pona acanaje. <sup>24</sup> Majoya epona cuaa huohui cajje poquinaje beca cuana mei jjani yasijje. Mei jjani bañaqui majje chama' Jesosa ba canaje. Ma ecua epona cuaa esohui acanaje jayojjaya cuanaje. Onajaya Jesosa eshequi'yo ba'yo jjima tii cuanaje, de —jamaya mimia cua o shajja'ajjajji cuana.

<sup>25</sup> Majoya aje Jesusaa jama huohuime aca cua ba'a: —Miquianaya jjashahuabaqui ajja Eyacuiñajjija esohuijo. <sup>26</sup> ¿A'a miquianajaya ba jjima Eyacuiñajjija huoojea'yo ebionei camanoqui'yahua? Majoya shequi'yo majje, eyahuasijje poqui majje Eyacuiñajji ebañeijje anioqueje'yo tii tii ojjañaja Emeshi Mese epo'yojji tii tii. Jamaya yahuajo tehue ca cua Eyacuiñajjija esohuijo. ¿A'a miquiaaya pajea'yonaje pojja'a? —jamaya Jesusaa aca cuana cua.

<sup>27</sup> Majoya poquijeya Jesusaa oya cuana huohui ca poquia cua ojjaña Eyacuiñajjija esohui ojo. Ohuaya huohui coo ca cua Moisesija ojo oja tehue majoya pea esohui huohuijji cuanaja ojo oja tehue huohui ca cua.

<sup>28</sup> Majoya Emao ba cañaquia cua. Majoya aje bañaqui majje Jesosa ca jjayeje'aj-jaquinana cua. <sup>29</sup> Majoya aje o shajja'ajjajji cuaa Jesosa jama aca cua ba'a: —Siña coma, jjaapoquia coma. ¡Ecuana nijje oe cahui chichacue! —jamaya cuaa aca cua.

Majoya Jesosa onijje dobiquia cua oe equi yasijje. <sup>30</sup> Majoya aje anioquea cua e'ijjia'ijjajji. Majoya aje anioque majje Jesusaa pahui jjeshe ca cua. Pahui jjeshe majje Eyacuiñajji nijje mimia cua. Eyacuiñajji nijje mimi majje pahui miji ca cua. Majoya aje miji majje quia ca cuana cua. <sup>31</sup> Pahui quia cajje Jesosa bahuejja ca'ya cuaa cua. Jama cua ba'a: —E'e de, a'a jja mi Jesosa, de. E'e jojo nei miya shequi'yonaje, de —jamaya o shajja'ajjajji cuaa aca cua.

Majoya aje Jesosa jjachamaqui'ya cua, de. <sup>32</sup> Majoya aje cuana jama mimime po ania cua ba'a: —E'e de, e'e jojo nei mi eyaya anaje yaña, de. Ecuea equijjiji peyaanaje o shajja'ajja majje. Quea bihui nee eseya cuanaje Eyacuiñajjija esohui shajja'ajja majje.

<sup>33</sup> Majoya aje o shajja'ajjajji cuana ocuayaya cue'ya cua Jenosanena huasijjeya mecaje tiiya. Bañaqui majje ba ca cua pea Jesusaja shajja'ajjajji cuana, 11 ejjachichacui ani pea epeeji cuana nijje. <sup>34</sup> Pea cuaa majoya jama aca jjequia cua ba'a: —E'e jojo nei, de. Jesosa shequi'yonaje. Simohuija eba nei nei oya cuanaje.

<sup>35</sup> Majoya aje Emao huasijje poqui cuaa jama huohuime aca cua ba'a: —Ecuana poquianijo Emao huasijje, oe dejja poquinaje ecuana nijje. Oya miminaje ecuana nijje, de. Majoya ecuana ijja'ijjianaje ojee. Ohua pahui miji cajo ecuaaya oya bahuejjanaje Jesosa cuanaje, de. Oya ca ca shequi'yonaje, e'e jojo nei, de.

*Jesosa ba ca cua o shajja'ajjajji cuaa*

*(Mateo 28.16-20; Macoso 16.14-18; Huani 20.19-23)*

<sup>36</sup> Jesosa jjapanaquia cua ona mimiani yiyesamajo. Jesosa jama cua ba'a: —¡Yani eya, de! ¡Quea bei oe pocue nequiana!

<sup>37</sup> Jesosa ba majje quea mete nee nee cua o shajja'ajjajji cuana eshahuajo poso. <sup>38</sup> Jesosa majoya jama cua ba'a: —¿Yajjajje acuae nequiana quea mete cuani so'o? ¿Apiojji miquianaya jjashahuaba quehuaquiani? <sup>39</sup> ¡Bacue mo oe! Ecuea eme jjoto huejja namoja quecua huejja yani, ejiojjijje pea'ai, de. Eyami nei jja iña iquio, eshahua pojjeama. Eshahua ca jja ca yamima', sama' pea'ai, de. ¡Napa'ajja socue mo, ecuea eyami; ba neinei'ajja socue mo!

<sup>40</sup> Majoya Jesusaa ojaya eme ja'a ca cua, ejiojji pea'ai. <sup>41</sup> Onaaya ca Jesosa pojjeama poso aca cua quea bihui jjejojo. Jjashahuabajeaqui jjima cua. Jamajjeya Jesusaa oya cuana huohui'ajja ca cua ejjashahuaba meequijji jama ba'a: —¡Bacue eya, eyami nei; che mo bobi quiacue nequiaa! Eya ca ca eshahua pojjeama, eshahua cuana ca ca ijia'ijia'ajja.

<sup>42</sup> Majoya aje onaaya Jesosa nahuoo cuaquijo dahua quia ca cua. <sup>43</sup> Jesusaa nahuoo ijia ca cua, ona cojja nei aniya. <sup>44</sup> Majoya ohuaya jama aca cua ba'a: —Eyaya mano'yo jjimahuaa miquianaya huohuinaje pea cuaa eya quecua mee caje'yo. Majoya eya shequije o'oya. Jamaya Moisesija etehue'yojo, cua, Salmo etehue'yojo pea'ai huohui ca cua ejo. Ojjaña Eyacuiñajjija esohui huohuijji cuaa ejo tehue ca cua pea'ai —jamaya Jesosa cua.

<sup>45</sup> Majoya Jesusaa huohui ca cua Eyacuiñajjija etehue'yo ona jjabahuejjaquijji. <sup>46</sup> Ohuaya jama aca cua ba'a: —Jama tehume'ya cua ba'a: “Eyacuiñajjija huoojea'yo ojjaña jaahuanajji manoje'yo. Mano'yo majje shequije'yo pea beca peejjima cahuime po majje. <sup>47</sup> Ojjaña cuaa ojjaña meshi yasijje cahuohui ca'yahua Eyacuiñajjija esohui, ojaya epeejji epojji. Ebionei Jenosanenajo cahuohui coo ca'yahua. Eyacuiñajji nijje cajjapeequi'yahua, mimishi cuana capajea ca'yahua. Majoya pea cuiñajji cuana huasijje capoquiahua ojaya esohui huohuiya”. <sup>48</sup> Jjeya nei miquianaaya eya banaje, shajja'ajjanaje jiquio esohui. Jamajjeya ja'a pajea'yojji; huohui tiitiicue! <sup>49</sup> ¡Bacue oe, eyaya Edojjoshahua Bame huoojeaje miquiana huasijje, miquiana quea bame ba'e meeji! Ecue Chiiya yahuajo huohui canajeya jjejojo Edojjoshahua Bame huoojeaje'yo eyaya. Jamajjeya jiquiojji tii anicue! ¡Jenosanenajo tii ishoa'ajjacue Edojjoshahua Bame nei cueje eyajo ani! Ohuaya miquianaya quea jjashahuabaqui ja'a po mee caje'yo —jamaya Jesosa cua.

*Jesosa poqui'ya cua eyahuasijje*

*(Macoso 16.19-20)*

<sup>50</sup> Majoya aje Jesusaa o shajja'ajjajjii cuana dojo ca cua Betania huasijje. Bañaqui majje Jesusaa eme jeasohua ca cua, jama mimime cua ba'a: —¡Enijje jjapee neinei'ajja! ¡Jjashahuabaquicue Eyacuiñajjijo miquianaya quea ca'a epojji!

<sup>51</sup> Majoya aje Jesosa eyahuasijje poqui'ya cua. <sup>52</sup> Oya cuana Jesusajo quea bihui nee nee po'ya cua. Majoya aje huacuayaya cue'ya cua Jenosanena huasijje quea bihui nee nee.

<sup>53</sup> Majoya aje poqui majamaja nequia cua Eyacuiñajjija equi yasijje Eyacuiñajji bihuiaa.

E'e de, acua. Eyaya, Nocaa tehuejeyonaje. Mahuisoya.

## HUANIYA ESOHUI QUEA PAME NEE TEHUE CANAJE JESOSA QUITOJA JUAN

*Eseya Eyacuiñajji ba meeya Jesosa Quito meshi yasijje poeyanaje ese jayojja yamijji*

<sup>1</sup> Yahuajo nei nei meshi, aquiana cuana, dejja pea'ai pana jjimahuajo, Jesosa Quito yaña tiya poa Eyacuiñajji nijje. E'e, oya Eyacuiñajji nei neiya e'e jojo nei poa. <sup>2</sup> E'e, oya Eyacuiñajji nijje yaña poa yahuajo nei nei meshi cuana, ojjaña aquiana cuana pana jjimahuajo. <sup>3</sup> Eyacuiñajjiya oya pana mee ca'ya poa aquiana, meshi cuanaya, dejja, epona pea'ai, ojjaña pana ca'ya poa Jesosa Quitohua. Ojjaña aquiana pana jjima jjemo, chama' pome. <sup>4</sup> E'e, oya, Jesosa Quito, yaña tiitia poa. Ohuaya eseya Eyacuiñajji ba mee cani. Jamajjeya ohuaya ba'e tiitii mee cani eseya cuana. Eyacuiñajji quea ja'a jjashahuabaqui mee cani pea'ai. <sup>5</sup> Jamatii mecajje quea apo nee neejo cuaquijjiya jeaja'a cani. Jiquio ecua cuaquijji mecajje jjinequiani jama jayojja Jesusaa dejja mimishi cuana quea ja'a nee jjashahuabaqui mee cani. Eshahuua Jesosa Quito eseya jaahuana pajea mee sa acani. Chojja. Ohuaya ojaya epeeji cuana jaahuana tiitii cani. E'e, oya cuaquijji quijjo'yo ajja jama.

*Huani, Sacaniaja bacua ejja*

<sup>6</sup> Oe dejja Jodea meshijo ba'e Huani bajjani Eyacuiñajjiya huoojea canaje Jesosa Quitojo huohuiya. <sup>7</sup> Eyacuiñajjiya Huani jama acanaje ba'a: —¡Poquicue miya! Ojjaña huohuicue jama ba'a: “Eyacuiñajjiya huoojea'yo ma cuaquijji quijjo'yo ajja jayojja poeyani ojjaña cuana quea ja'a jjashahuabaqui meeya. Jamajjeya ¡onijje jjapeequicue!”

Jamajjeya Eyacuiñajjiya Huani huoojea canaje.

<sup>8</sup> Oya Huani ma cuaquijji jayojja jama pojjeama; oya ca ca oma oe poquinaje Jesosa Quitojo huohuiya, ma cuaquijji jayojjajo huohuiya.

<sup>9</sup> Eyacuiñajjiya Jesosa huoojea canaje meshi yasijje. Ohuaya ojjaña cuana quea ja'a jjashahuabaqui mee caje Eyacuiñajji. <sup>10</sup> E'e, oya ma cuaquijji jayojjaya poeyanaje dejja cuana nijje ba'eya. Yahuajo ohuaya meshi cuana, dejja cuana pea'ai pana ca'ya poa. Jamatii oya dejja cuanaja ba jjima ojjaña cuana pana'yojji epo. <sup>11</sup> E'e, oya poeyanaje Jodea meshi yasijje, ojaya huapa pojjeama cuana huasijje. Jamatii oya cajaa acanaje beca cuaa: —¡Chojja, oya Eyacuiñajji bameeji pojjeama! —poso beca cuaa acanaje.

<sup>12</sup> Beca cuaa ca ca Jesosa Quitoja esohui shajja'ajja canaje. Ojo jama acanaje ba'a: —E'e jojo nei oya Eyacuiñajji ese bameeji poani —acanaje beca cuaa.

Jamaya jjashahuabaquianijo, Jesusaa oya cuana Eyacuiñajjiya bacua cuana po mee canaje jama ba'a: <sup>13</sup> Yahuajo eseja ejeajjiya eseja jea ca poa; eseja enaeseya eseja mejo ca poa. Jamajjeya eseja cuayani ese ejjaja bacua, Eyacuiñajjiya bacua pojjeama. Eyacuiñajjiya ca ca eseja oja bacua a sa acanijo ohuaya ohuaye nei eseja oja bacua po mee cani.

*Esohui quea bihui nee Jesosa Quitojo*

<sup>14</sup> Jamajjeya oya Eyacuiñajji ese ba meeya poeyanaje yamijji, ese cuana nijje ba'eya. Ecuanaa oya banaje quea ca'a nee nee. Oja Chiiya oya, oja Bacua Ejja oe nei quea ca'a nee huoojea canaje meshi yasijje ese cuana jaahuana tiitijji. Ohuaya ojjaña Eyacuiñajjiya esohui e'e nei huohui canaje ojjaña huasijje pea'ai.

<sup>15</sup> Huaniya ojo huohui canaje. Majoya oya ba majje taaanaje jama ba'a: —¡Bacue! Jjeya nei pea dejja quea pame nee poeje. Yahuajo nei nei e cuaya jjimahuajo oya yaña tiitia poa Eyacuiñajji nijje. Jamajjeya oya quea ca'a nee nee; eya quea ca'a pishana —poanaje Huani.

<sup>16</sup> E'e, eseja shajjama' poani. Jamatii ohuaya ojjaña cuana quea jea nee nee atitii cani quea pame nee nee. <sup>17</sup> Yahuajo nei nei esohui huohuiji Moisesiya esohui Eyacuiñajjiya ehuhui'yo cuana tehue majje ba mee ca'ya poa. Jesosa Quitohua, ma Eyacuiñajjiya



huoojea'yo ojjaña jaahuanajjiya ca ca ojjaña cuana ba mee canaje Eyacuiñajjiya eseya cuana quea jea nee nee acani, ojaya esohui e'e nei ba mee cani pea'ai. <sup>18</sup> Eyacuiñajji Echii Ai jjacojja ba meequi ajja tii. Jamatii oja Bacua Ejja oe nei Eyacuiñajji nei pea'ai, Eyacuiñajji nijje nequi, oja Chii nijje tii. Ohuaya eseya Eyacuiñajji ba mee cani, oja Chii.

*Huaniya, ma ona besameejji poaniya huohui canaje Jesosa Quitojo*  
(Mateo 3.11-12; Macoso 1.7-8; Noca 3.15-17)

Huaniya, ma ona besameejji poaniya Betania cuiñajjijo, Jodana cuei ojje mijijje nequi, ojjaña cuana Eyacuiñajjijo besa mee canaje. <sup>19</sup> Jamajjeya Jenosanena cuiñajjijo ba'eya Jodio dejja etii cuaa Huani que huoojea canaje Eyacuiñajji nijje emimijji cuana, Eyacuiñajjija equi jaahuanajji cuana pea'ai. Huani ba majje huohui'ajja canaje: —¿A'ya cuae mi so'o? ¿A'a miya Eyacuiñajjija huoojea'yo ojjaña jaahuanajji?

<sup>20</sup> —Chojja —saja'ame acanaje Huaniya—, chojja, eya Eyacuiñajjija huoojea'yo ojjaña jaahuanajji pojjeama. Eya ca ca iña Quito pojjeama —poanaje.

<sup>21</sup> —Jamajjeya ¿a'ya cuae mi oe so'o? —huohui'ajja canaje—. ¿A'a miya Enia, Eyacuiñajjija esohui huohuijji yahuajo ba'ya poa?

—Chojja —saja'ame acanaje Huaniya—. Eya Enia pojjeama.

Jamajjeya huohui'ajja ca o'oyanaje cuaa jama ba'a: —E'e. Yahuajo Moisesiya huohui ca poa Eyacuiñajjija pea esohui huohuijji nei poeje. ¿A'a miya ma esohui huohuijji neiya?

—Chojja —Huaniya acanaje.

<sup>22</sup> Jamajjeya Jodio cuaa Huani huohui'ajja ca o'oyanaje: —¿A'ya cuae mi oe? ¿A'ya cuae mi poani so'o, de? ¡Huohuicue mo oe! Jodio etii cuaa ecuana huoojea canaje mi baa. ¿Yajja huohuiñaqui'yome acuae oe aje o que poqui o'oya majje so'o?

<sup>23</sup> Jamajjeya Huaniya saja'a canaje jama ba'a: —Yahuajo nei nei Eyacuiñajjija esohui huohuijjiya Isaiaa ejo huohui ca poa jama ba'a:

“Quijje esohui huohuijji poeje esohui huohuiya. Meshi quimajo huohui huicha'a huicha'a caje jama ba'a: “Emeshi mese nei poeje. ¡Jamajjeya oe apoa pocuajicue! ¡Jamajje o poeyajo, ojaya esohui quea ja'a nee shajja'ajja neinei'yocue!”

Jamaya aca'ya poa Isaiaa yahuajo —Huani poanaje.

<sup>24-25</sup> Jamajjeya ma Jodio dejja cuanaa Huani huohui'ajja ca o'oyanaje: —¿A'a e'e jojo nei miya Eyacuiñajjija huoojea'yo ojjaña jaahuanajji pojjeama? ¿A'a cuae mi Enia pojjeama, ma Eyacuiñajjija esohui huohuijji yahuajo ba'ya poa pojjeama so'o? ¿A'a cuae mi Eyacuiñajjija pea esohui huohuijji nei, ma ecuanaja etiquiaa ishoa'ajja caninaje pojjeama so'o? ¿Achajjajo acuaeya oe miyaya ecuana, Jodio cuana, besa meeña Eyacuiñajjijo so'o? —poanaje cuana.

<sup>26</sup> Huaniya jama acanaje ba'a: —Eyaya miquianaya Eyacuiñajjijo besa meeña cuei enajo. Pea dejja jiquio tiijo nequi. Jjeya oya miquianajaya ba jjima. <sup>27</sup> Oya quijje pishana miquianajaya eba poaje Eyacuiñajjija huoojea'yo ojjaña jaahuanajji. Oya ca ca oe nei quea ca'a nee nee nequi. Eya ca iña quea ca'a nee pishana. Jamajjeya aje oe eya Jesosa Quito cojja neijo nequi sa po ajja. Eya quea bicho, de.

<sup>28</sup> Jamaya poanaje Huani Betaniajo, Jodana cuei ojje mijijje nequi, ojjaña cuana Eyacuiñajjijo besa mee canijo.

*Jesosa Quito Eyacuiñajjija huoojea'yo ojjaña cuanaja mimishijo mano'yohua*

<sup>29</sup> Majjeya mecahuajje Huaniya ojjaña huasijje esohui huohui ca o'oyanajo, Jesosa o que poeyanaje. Huaniya Jesosa ba majje ojjaña cuana huohui neinei canaje jama ba'a: —¡Bacue oe, oya poeyani Jesosa, Eyacuiñajjija huoojea'yo! Oya manojje'yo ojjaña cuanaja mimishi cuijea'yojji. E'e, Eyacuiñajji nijje emimijji cuaa ñajjajja cuia majje Eyacuiñajji yasijje dahua cani oya mimishi cuanajo quene'ama epo meeji. Ñajjajja jayojja jama poaje'yo Jesosa; manojje'yo ojjaña cuanaja mimishi cuijea neinei'yojji —Huani poanaje—. <sup>30</sup> E'e, yahuajo pishana eyaya miquianaya huohuinaje ojo jama ba'a: Jjeya nei pea dejja quea pame nee nee poeje. Yahuajo nei nei e cuaya jjimahuajo oya yaña tiiya poa Eyacuiñajji nijje. Jamajjeya oya quea ca'a nee nee; eya quea ca'a pishana —Huani poanaje.

<sup>31-33</sup> —E'e, yahuajo oya ecuea ba jjima poa. Jamatii Eyacuiñajjiya e huoojea jjimahuajo huohui canaje jama ba'a: “¡Dejja cuana besa meecue enajje ejo! Besa meeañajo, miyaya baje oe dejja. Ecuea Edojjoshahua Pame huia' jama ma dejja sapa biajje cuabesa ba'eje; jjapashineijje ba'eoqueje'yo. Maya ecuea ecue Bacua Ejja, ecue huoojea'yo. Ohuaya ojjaña miquiana que Edojjoshahua Pame dobiqúi mee caje'yo, miquiana quea ja'a nee nee ejjashahuabaqui meeji” eya acanaje Eyacuiñajjiya —Huani poanaje.

—E'e, eyaya e'e jojo nei banaje jama ba'a: Eya Jesosa besa meeañajo, eyatahuatahua jjaca'apejoquinaje. Eyacuiñajjiya Edojjoshahua Pame huia' jama o sapa biajje cuabesa ba'enaje. Jjapashineijje ba'eoquenaje. Jamajjeya jjeya oya ecuea eba nei nei, Jesosa. Yahuajo miquianajaya oya ba jjima. Jamajjeya eya poeyanaje ojjaña Eyacuiñajjiyo besa meeya. Miquianaya oya Eyacuiñajjiya huoojea'yo ojjaña jaahuanajji ba meeya eya poeyanaje pea'ai. <sup>34</sup> Jamajjeya eyaya miquianaya huohui neineaña: E'e jojo nei nei eyaya oya banaje. Jesosa ca ca oe e'e jojo nei Eyacuiñajjiya Bacua Ejja oe nei —poanaje Huani Jodio cuana nijje.

*Jesosaa iyaa canaje beca dejja onijje e'ani tiitiijji, o shajja'ajjaji*

<sup>35</sup> Majoya mecahuajje Huaniya, ma ona besameeji poaniya jomajo, Jodana cuei sahuajo nequiya esohui huohui canaje oja epeeji nijje, becanejjijji pea'ai nijje. <sup>36</sup> Jesosa jjayejjequiani ba majje Huaniya oja epeeji cuana huohui canaje jama ba'a: —¡Bacue Jesosa! Oya Eyacuiñajjiya huoojea'yo. Oya manaje'yo ojjaña cuanaja mimishi cuijea'yojji.

<sup>37</sup> Huanija esohui Jesosajo shajja'ajja majje oja epeeji becanejjijji pea'ai Jesosa nijje poquinaje. <sup>38</sup> Jesosaa ejiojjijje poquijeya Huanija beca epeeji o quiquishijji poquije bajea canaje. Ba majje huohui'ajja canaje: —Epeeji cuana, ¿ajeo miya enijje poeyani?

—Esohui huohuijji —saja'a canaje—, ecuana poeyanaje mi baa; mi shajja'ajja sa poani. ¿Achejo ba'e miya? —poanaje.

<sup>39</sup> —E'e —Jesosa poanaje—, ¡ocue poe'ajja! ¡Cua'a, enijje po'yocue!

Jamajjeya Jesosa nijje poquinaje equi yasijje, o ba'e yasijje. Onijje aninaje ma pojjajo, eshequi oquequiajo; o shajja'ajjaji po'yonaje oya cuana, ma bajjani ba'a: Anesi oja epeeji nijje pea'ai. <sup>40</sup> E'e, Anesi pea dejja nijje Huanija ehuhui shajja'ajja majje Jesosa nijje poquinaje. Anesi ca ca Simohuija echahua mese, ma quijje bajjani canaje Penoja echahua mese. <sup>41</sup> Jamajjeya mecajjeahua nei Anesiya oja o'i sa'ajja canaje. Ba majje huohui canaje: —O'i, eyaya Eyacuiñajjiya huoojea'yo ese jaahuanajji banaje, Jesosa Quito.

<sup>42</sup> Majoya Anesiya oja o'i Simohui bajjani Jesosa que dojo canaje. Simohui ba majje Jesosaa huohui'ajja canaje jama ba'a: —Epeeji, miya ecuea eba. Miya Huanija bacua ejja, Simohui bajjani. Eyaya miya bajjanije'yo ecuea esohuijo Sepa bajjani —poanaje. Jienoja esohuijo Peno bajjani canaje, Ese Ejjaja esohuijo Mei bajjani.

*Jesosaa iya canaje pea cuana onijje e'ani tiitiijji, o shajja'ajjaji*

<sup>43</sup> Majoya mecahuajje, mecajjeahua nei Jesosa poquinaje Janinea meshi yasijje, Jodana cuei oje miji yasijje. Poqui jeahuaa Penipe ba canaje. Ba majje iyaa canaje: —Penipe, ¡ocue poe'ajja, enijje po'yocue; ecuea epeeji po'yocue! —Jesosaa acanaje; o que poquiajo ojaya epeeji pojji aca'yonaje.

<sup>44</sup> Penipe, Peno, Anesi pea'ai ca ca oe Betesaida cuiñajjiyo ba'e. <sup>45</sup> Jamajjeya Penipeya oja epeeji Natanaeni sa'ajjaqui canaje. Ba majje huohui canaje: —Ecuea epeeji, ecuanaa Eyacuiñajjiya huoojea'yo ese jaahuanajji banaje. Ojo Eyacuiñajjiya esohui huohuijjiya yahuajo nei nei ba'ya poaa, Moisesiya pea'aiya tehue ca poa, ma ojjaña Jodio cuaa ishoa'ajja caniya. Oya Jesosa bajjani, Joseja bacua ejja, ma Nasanena cuiñajjiyo ba'enaje. Eyaya maya banaje, de —poanaje Penipe.

<sup>46</sup> —¿A'a oya Nasanenajo ba'enaje? Jomajo pa jjaja chama' dejja quea pame —poanaje Natanaeni.

—Chojja —poanaje Penipe—, ¡poecue, oya bahuacue!

<sup>47</sup> Jamajjeya oya cuana poquinaje Jesosa baa. Majoya Natanaeni poeje ba majje Jesosa onijje miminaje jama ba'a: —E'e Natanaeni, miya Jodio e'e jojo nei. Eyacuiñajji shajja'ajjajji poani. Miya ca ca oe sijje po ajja nei nei pea'ai.

<sup>48</sup> Ma shajja'ajja majje Natanaeni jama poanaje ba'a: —¿A'a eya miquea eba? ¿Ache shono acuaeya miyaya eya banaje so'o? —poanaje.

—Natanaeni, miya ecuea eba yahuajo. Penipeja iyaa jjimahuajo, iquena acui yajjanajo ani eyaya miquea ejjashahuabaquijji banaje —Jesosa poanaje.

<sup>49</sup> Jamajjeya Natanaeniya acanaje: —Esohui huohuijji, e'e jojo nei miya Eyacuiñajjija Bacua Ejja oe nei poani tii. E'e, ¡miya Jodio cuanaja Emeshi Mese nei!

<sup>50-51</sup> Jesosaa oya huohui canaje: —Eyaya miya huohuinaje jama ba'a: “Eyaya miya banaje iquena acui yajjanajo ani”. Jamajjeya ecuea esohui shajja'ajja majje miya jjashahuabaquinaje jama ba'a: “E'e jojo nei miya Eyacuiñajjija Bacua Ejja”. Jamajjeya miyaya baje Eyacuiñajjiya eya ma dejjaja ba jjima amee caje'yo. Cuanaya Eyacuiñajjija esohuidojojji cuana nequioqueje e jaahuanaa, ojjañaja Edoe Mese jaahuanaa. Jamaya miyaya baje'yo, Natanaeni, enijje jjapeequianijo —Jesosa poanaje.

## 2

### *Oe dejja jjahuanaquinaje Cana cuiñajjijo*

<sup>1</sup> Majoya beca cahuime po majje oe dejja jjahuanaquinaje Canajo, Janinea meshijo. Ejjahuanaquijjijo quea huiso cuana iyaa canaje ojee ijia'ijjiaa. Jesosaja enaese Mania iyaa canaje pea'ai. <sup>2</sup> Jesosa o shajja'ajjajji cuana nijje poeyanaje pea'ai jjahuanaquije baa, ojee ijia'ijjiaa pea'ai. <sup>3</sup> Ojee ijia'ijjia anijo, acuijjajja na ishijeyo canaje cuaa. Jamajjeya Jesosaja enaese onijje miminaje jama ba'a: —Jesosa, bacue, acuijjajja na ishijeyo canaje cuaa. Oe poanaje. ¿Ae e'ishi'yojji?

<sup>4</sup> —Ecue nae, ¿yajjajo acuae moya huohui'ajjaña acuijjajja najo? ¡Ishoa socue oe! Quijje pishana eyaya oya cuana asahuaje —Jesosa poanaje.

<sup>5</sup> Jamajjeya ojaya enaeseya echacojji cuana huohui canaje jama ba'a: —¡Jesosaja esohui jayojjaya nequiaa oe acue! —poanaje Mania.

<sup>6</sup> Jomajo me oeje oe, 6 meshimisi ena nequijji quea quemo nee nee, quea ao nee nee yani, 60 litros shojji. Ma meshimisi ena nequia cani eme shacua huicha'a huicha'ajji. Jamaya oya cuaa acanaje ijia'ijjia jjimahuajo. <sup>7</sup> Jamajjeya Jesosaa echacojji cuana jama acanaje ba'a: —¡Ena shocue meshimisi ai cuana huasijje! —poanaje.

Echacojji cuana: —E'e —poanaje.

Meshimisi ai cuana huasijje ena sho canaje. Cuatajea mee canaje. <sup>8</sup> Jamajjeya cuatajea cajo, Jesosaa echacojji cuana jama acanaje ba'a: —E'e. ¡Jjeya oe pojji dojocue equi mese yasijje!

Jamajjeya oe pojji dojo canaje e'ishi mee'ajjajji. <sup>9</sup> Ma ena ishi'ajja canaje equi meseya. Jamatii ojaya ba jjima jiquio eteohuejjajo nequi ena Jesosaa acuijjajja na pojji acanaje. Echacojji cuanaja eba ojaye nei Jesosaa eteohuejjajo nequi ena acuijjajja na pojji aca'ya poa; pea cuanaja ba jjima. <sup>10</sup> Jamajjeya equi meseya ishi majje joya ejjahuanaquijji iyaa canaje. Huohui canaje jama ba'a: —Epeejji, jiquio acuijjajja na quea pame nee nee. Pea cuaa acuijjajja na quea pame, quea biquia nee ishi mee cani ebionei. Majoya ojjaña jeje majje acuijjajja na quea biquia pishana quia cani. Miyaya ca ca oe acuijjajja na quea biquia nee, quea pame nee nee quijje nei ishi meeña —poanaje e'equi mese.

<sup>11</sup> Jamaya acanaje Jesosaa Janinea meshijo, Canajo. Jamaya ohuaya ma dejjaa ajjima acani acoo canaje. Ba majje ojjaña cuana jama poanaje ba'a: —E'e jojo nei Jesosa quea ca'a nee nee. Ohuaya ojjaña acani, ma dejjaa ajjima acani pea'ai.

O shajja'ajjajji cuana pea'ai jama poanaje ba'a: —E'e jojo nei Jesosa Eyacuiñajjija huoojea'yo ojjaña jaahuanajji, Quito.

<sup>12</sup> Majoya Jesosa Capenaoma huasijje poquinaje. Oja nae, oja chahua cuana, ojaya epeejji cuana pea'ai onijje poquinaje. Jomajo aninaje cuana oe pojji cahuime.

*Eyacuiñajjija equi yasijje poqui majje Jesusaa aquiana quiajji cuana huoojeacuayajea canaje (Mateo 21.12-13; Macoso 11.15-18; Noca 19.45-46)*

<sup>13</sup> Quijje pishana ojjaña Jodio cuana Jenosanena huasijje poquinaje quea bihui nee ojee ijia'ijjiaa ma shejo ba'a esohuidojojji cuaa yahuajo Ejito meshijo Jodioja ebacua cuana cuia'yo jjima shejo. Ma epajea'yojji pojjeamajo jjachichaquinaje. Jamajjeya Jesusa pea'ai poquinaje Jenosanena huasijje. Poe majje Eyacuiñajjija equi yasijje poquinaje. <sup>14</sup> Dobiqumajje Jesusaa ba canaje quea huiso dejja cuaa aquiana quia cani; ana'ai yahue cuana, ñajjajja cuana, huia' cuana pea'ai quia cani. Bejjo pea bejjo sosejje quia caqui ba canaje pea'ai. <sup>15</sup> Ba majje Jesusaa jono ecuiasejjajeajji ña canaje. Dejja aquiana quiajji cuana, ñajjajja cuana, ana'ai cuana pea'ai cuahuoojeacuayajea canaje esecue yasijje, ojjaña. <sup>16</sup> Bejjo pea bejjo sosejje quiajji cuanaja bejjo nequijji cuana jeapajjajea canaje; bejjo jjahuojjeajeaqui canaje. Huia' quiajji cuana Jesusaa huohui canaje jama ba'a: —Jiquio equi ca ca ecue Chii nijje emimijji. Aquiana quiajji pojjeama equi. ¡Miquea aquiana cuana dojoyocue esecue yasijje! ¡A'a jja oe Eyacuiñajjija equi aquiana quiajji equi jayojja jama ajji! —Jesusa poanaje.

<sup>17</sup> Ma ba majje ecua, Jesusaja epeejji cuana, ojee jjashahuabaquinaje jama ba'a: —E'e, Eyacuiñajjija esohui huohuijjiya yahuajo nei nei tehue ca poa jama ba'a: “Ecue chii, eya jjashahuaba neineiQuiani miquea equi jaahuanajji. Jamajjeya mimishi cuaa eya ñeiba cani”.

Jama tehuemeya aca poa yahuajo nei. Oya cuaa Jesusajo tehue ca poa, de —poanaje Jesusaja epeejji cuana.

<sup>18</sup> Jamajjeya Jodio cuana Jesusa nijje quea quene poanaje, oya Eyacuiñajjija huoojea'yo pojjeama posojo onijje mimijajinaje jama ba'a: —¿Aya acuae mi huoojea canaje ecua Eyacuiñajjija equijo anijo huoojeacuayajea? ¿A'a cuae miya Eyacuiñajjija huoojea'yo nei? ¡Caba'ajja sahua! ¡Ma dejjaa ajjima acani a'ajja socue ecuanaja ebajji, Eyacuiñajjija e'e jojo nei miya a'a huoojea canaje ebajji!

<sup>19</sup> Jesusaa oya cuana saja'a canaje: —¡Bacue! Miquianaa jiquio equi jeabichajea'yajo eyaya jiquio equi iyaje o'oya pea beca peejjima cahuime.

<sup>20</sup> —Chojja, de —Jodio cuana poanaje—. Quea huiso nee nee, 46 shequiajame jiquio equi iya canaje cuaa. ¿Achajja acuae equi jeabichajea majje miyaya iyaje o'oya pea beca peejjima cahuime? ¡Chojja, de! —poanaje.

<sup>21</sup> Jamatii Jesusa Eyacuiñajjija equijo pojjeama miminaje; ojaya eyamijo jjashahuabaquiani. <sup>22</sup> E'e, quijje Jodio cuaa Jesusa quecua'yo majje, Eyacuiñajjija oya shequi mee caje o'oya pea beca peejjima cahuimejo. Jamajje quijje Jesusa shequi o'oyajo, ecua o shajja'ajjajji cuana jiquio esohuijo jjashahuabaquije. Jama poaje ba'a: —E'e de, Eyacuiñajjija esohui e'e nei; Jesusaja ehuohui pea'ai e'e nei —poaje quijje.

<sup>23</sup> Jamajjeya Jenosanena huasijje Jodio cuana ojee jjachichaquinaje. Quea bihui nee ijia'ijjianaje esohuidojojjiya yahuajo nei Jodioja ebacua cuana cuia'yo jjima shejo, ma pajea'yo jjima yajji. Jesusa pea'ai Jenosanenajo aninaje. Jomajo Jesusaa quea huiso ma dejjaa ajjima acani acanaje. Ba majje quea huiso cuana poanaje: —¡E'e jojo nei Jesusa Eyacuiñajjija huoojea'yo ojjaña jaahuanajji! —poanaje cuana.

<sup>24-25</sup> Jamatii Jesusaja eba nei nei ojjaña dejja cuanaja ejjashahuabaquijji. Quea tai, epeejji e'e jojo nei pojjeama beca cuana. Jamajjeya ohuaya ojjaña quea ja'a nee huohui jjima jama ba'a: —E'e jojo nei eya ca ña jiquio Eyacuiñajjija Bacua Ejja —jamaya huohui jjima so'o Jesusaja.

### 3

#### *Jesosa miminaje Nicodemo nijje*

<sup>1</sup> Majoya oe dejja Jesusa que poeyanaje, oya Nicodemo bajjani. Oya Jodio etii cuana nijje pea Jodio cuana huoojeajji poani, Paniseo dejja cuana jama jjashahuabaquime poani.

<sup>2</sup> Oya, Nicodemo Jesusa que poeyanaje mecajje quehuajje. Jama acanaje ba'a: —Esohui

huohuijji, Eyacuiñajjiya miya ameesahua cani ma dejjaa ajjima acani. Jamajjeya ecuanaja eba Eyacuiñajjiya miya huoojea canaje ecuana sohuihuohuiya.

<sup>3</sup> Jesusaa oya huohui canaje Eyacuiñajji niije eba'e tiitii'yojjijo; jama poanaje ba'a: — Nicodemo, eyaya miya e'e jojo nei huohuiaña: ¡Bacue! Jiquio ecua epona jjamejoqui majje bacua cuayani jayojja jama Eyacuiñajjiya miya cacuaya mee ca o'oyahua jiquio ecua esho'i cuayani jama. Jamajjeya Eyacuiñajjiya miya ebacua sho'i jayojja jama acaje'yo, miya ba'e tiitii mee caje'yo onijje, ojjaña Emeshi Mese nei niije —Jesusa poanaje.

<sup>4</sup> —Chojja de, ¿a'a cuae se dejja etii cuaya o'oyame so'o? —Nicodemohua acanaje—. ¿A'a cuae eseja enaeseja yone yasijje ba'edobiqui o'oya majje ebacua jama cuaya o'oyame so'o? Chojja, de —acanaje Nicodemohua.

<sup>5</sup> Jamajjeya Jesusaa oya huohui ca o'oyanaje: —Nicodemo, e'e jojo nei ecuea ehuohui jama ba'a: Jiquio ecua ebacua esho'i cuayani jama Eyacuiñajjiya miya cacuaya mee ca o'oyahua. Joya Eyacuiñajji shajja'ajjajji poani enajo besa mee majje, Eyacuiñajji Edojjoshahua Pameya oya quea pame jjashahuaba tiitiiqui mee majje pea'ai miya pea jjashahuabaquime poaje'yo. Oya Eyacuiñajji niije ba'e tiitii'e'yo. Jamaya po ajjajo ca ca Eyacuiñajji niije eba'e tiitii'yojji pojjeama eyajo. <sup>6</sup> E'e Nicodemo, ojjaña cuana enaeseja mejo bacua cuayani yahueja jea, oja chii jayojja yamijji. Joya Eyacuiñajji Edojjoshahua Pameya pea jjashahuabaquime po mee ca'yani ca ca Eyacuiñajji Edojjoshahua Pame onijje nequi —Jesusa poanaje—. <sup>7</sup> Eyaya miya huohuinaje e'e jojo nei ebacua esho'i cuayani jama Eyacuiñajjiya miya cacuaya mee ca o'oyahua. Jamatii a'a jama jjashahuabaquijji ba'a: “Chojja de, ¿yajja epojji?” <sup>8</sup> Miyaya beni shajja'ajjaña; beni baña pea'ai acui iña dojo cani. Jamatii ache huesha beni poeani miquea ba jjima; achacua poquije miquea ba jjima pea'ai. Jiquio ecua beni achacua poquije ba jjima jayojja jama miquea ba jjima pea'ai ache shono, achejo pojja'a Eyacuiñajji Edojjoshahua Pameya dejja pea jjashahuabaquime po mee ca'yani. Jamaya miquea eba pojjeama. E'e, Eyacuiñajjiya miya cacuaya mee ca o'oyahua ebacua esho'i cuayani jayojja jama —Jesusa poanaje.

<sup>9</sup> —E'e pojja'a. ¿Achajja acuae ebacua esho'i cuayani jayojja jama epojji so'o? — huohui'ajja canaje Nicodemohua.

<sup>10</sup> —Nicodemo, miya Jodio esohui huohuijji; Eyacuiñajji esohui yahuajo nei etehue'yo huohuijji. Jamajjeya ¿yajjajo miquea ba jjima ebacua esho'i cuayani jayojja jama epojji eba'ejji pea ba'eme epo'yojji? —Jesusa poanaje.

<sup>11</sup> —Eyaya, Huaniya ma ona besameejji poaniya pea'ai miya e'e jojo nei huohuiaña jama ba'a: Ma ecuanaja eba poa huohuiaña pea ba'eme epo'yojjijo; ma ecuaa yahuajo banaje pea'ai huohuiaña. Jamatii miya, pea Jodio esohui huohuijji cuana pea'ai ecuanaja esohuijo jama poani ba'a: “Chojja, sijje oya cuana poani”. E'e, miquianaaya ecuana sijjepojji poso aña —Jesusa poanaje—. <sup>12</sup> E'e, eyaya miya huohuiaña ebacua esho'i cuayani jayojja jama Eyacuiñajji Edojjoshahua Pameya miya pea jjashahuabaquime po mee caje'yo, Eyacuiñajji niije eba'e tiitii'yojji. Jamatii ecuea esohui quea quehua miquea. Jamajjeya eyaya miya Eyacuiñajji ejjashahuabaqui'yojji eyajo huohuiajo, ¿a'a ecuea esohui quea ja'a poaje miquea? Chojja, quea quehua poaje pea'ai. <sup>13</sup> ¡Shajja'ajjacue ecuea esohui, Nicodemo! Dejja cuana eyahuasijje dobiqui'yo majje meshi yasijje epoe o'oyajji pojjeama ojjaña eyajo ba'e huohuiya, Eyacuiñajji ejjashahuabaqui'yojjijo pea'ai epoe o'oyajji pojjeama huohuiya. Eya ma ojjaña Edoe Mese eyajo ba'e'yonaje. Eya eyajo ba'e poeyanaje meshi yasijje. Jamajjeya eyaye nei baña ojjaña eyajo, Eyacuiñajji ejjashahuabaquijji ecuea eba pea'ai —Jesusa poanaje—. <sup>14</sup> Cuanaya eya, Eyacuiñajji huoojea'yo ojjaña jaahuanajji ba'ehuanasohuajja caje'yo cuaa. E'e, yahuajo nei nei meshi jabojo Moisesiya baa peyo jayojja acui aojo ba'ehuanasohua ca poa ojjaña ebajji; ojjaña joya peyoja ijja baa peyo jayojja ba cajo, Eyacuiñajjiya huaquia mee ca'ya poa. Jiquio ecua Moisesiya baa peyo jayojja ba'ehuanasohua ca poa jayojja jamaya quijje eya ba'ehuanasohuajja caje'yo cuaa acui ecueata'apejo ojjaña mimishijo mano'yohua, mimishi cuijea'yojji sosejje. <sup>15</sup> Jamajjeya Eyacuiñajjiya ojjaña ba'e tiitii mee caje'yo onijje,

ca ejo jama jjashahuabaquiao ba'a: "E'e jojo nei ohuaya ecuea mimishi cuijea neinei caje'yo". E'e, enijje jjapeequiao, Eyacuiñajjiya quea nee nee epo mee'yojji pojjeama cuaquijo —Jesosa poanaje.

<sup>16</sup>—E'e Nicodemo —Jesosa poanaje pea'ai—, Eyacuiñajjiya ojjaña cuana ojjaña meshijo ba'e quea jea nee nee acani. Jamajjeya eya, oja Bacua Ejja oe nei huoojea canaje ojjaña mimishijo mano'yohua. Jamajjeya ojjaña joya e'e jojo nei enijje jjapeequiani Eyacuiñajjiya ba'e tiitii mee caje'yo onijje eyajo; quea nee nee epo tiitii mee'yojji pojjeama. <sup>17</sup> Ecue Chijja eya huoojea jjima ojjaña tecueaa. Ecuea ejjashahuabaqui'yojji jama pojjeama ba'a: "Ojjaña cuana quea mimishi nee poanijo, quea nee nee po meeje'yo; quea nee tii tii". Chojja, Eyacuiñajjiya eya, oja Bacua Ejja oe nei onijje eyajo ba'ya poa meshi yasijje huoojea ca poa. Ojjaña mimishi cuijea'yo majje enijje ba'e tiitii meeje'yo —Jesosa poanaje—. <sup>18</sup> Jamajjeya ojjaña joya e'e jojo nei enijje jjapeequiani Eyacuiñajjiya huohui caje jama ba'a: "Miquianaya ecue Bacua Ejja epeeji e'e jojo nei poanijo, mimishi cuijeaje'yo. Quea nee nee epo mee'yojji pojjeama cuaquijo" Eyacuiñajjiya acaje —Jesosa poanaje—. Pea cuana enijje jjapeequi ajjajo ca ca Eyacuiñajjiya yahuajo jama acaje ba'a: "Miquianaya ecue Bacua Ejja oe nei nijje jjapeequi ajjajo cajaa aje'yo, mimishi cuana cuijea'yo jjima aje'yo. Jamajjeya quea nee tii tii poaje'yo" Eyacuiñajjiya acaje —Jesosa poanaje—. <sup>19</sup> E'e, Eyacuiñajjiya eya, oja Bacua Ejja huoojea canaje esohui e'e nei huohuiya, ojjaña cuana quea jjashahuabaqui ja'a nee po meeya. E'e, eya cuaquijji jayojja jama poanijo ojjaña quea jjashahuabaqui ja'a po meeje'yo. Jamatii quea huiso cuana ecuea esohui shajja'ajja sa po ajja, mimishi cuana ojaya quea boti neejojo. Quea mimishi nee ba'e, de. Jamajjeya Eyacuiñajjiya oya cuana cajaa acaje'yo. Quea nee tii tii poaje'yo cuaquijo. <sup>20</sup> Quea mimishi ba'aja boti'ama Eyacuiñajjiya esohui e'e nei; cajaa acani quea mimishi ba'yaniya jjejojo. Jamajjeya enijje jjapeequi ajja. Quea mete jjashahuabaquiani jama ba'a: "¡Jesosaa mo tecuea caje ecue mimishijo!" <sup>21</sup> Ojjaña joya quea pame nee ba'eya ca ca Eyacuiñajjiya esohui quea boti nee acani. Enijje jjapeequianijo, eyaya oya cuana quea jjashahuabaqui ja'a po meeaña. Jamajjeya oya cuana jama poani ba'a: "E'e, Eyacuiñajjiya eya quea pame ba'e meesahua cani ojaya esohui jayojja" poani —Jesosaa Nicodemo huohui canaje. Majoya Jesosa Nicodemo nijje mimipajeanae.

*Huaniya ma ona besameeji poaniya Jesusajo huohui ca o'oyanaje*

<sup>22</sup> Majoya Jesosa Jenosanenajo ani poquinaje o shajja'ajjaji cuana nijje Jodea meshi yasijje, pea cuiñajji cuana huasijje. Jomajo nequi cuana Jesusaa sohuihuohui canananaje. O shajja'ajjajiya dejja cuana besa mee canananaje Eyacuiñajjiyo. <sup>23</sup> Huaniya jomajo dejja besa mee canaje pea'ai Enoni cuiñajjiyo, Sanima cuiñajji pejeje pea'ai ena quea doejo. Ojjaña pojajo quea huiso dejja cuana, ponaña pea'ai Huani que poquinaje. Eyacuiñajjiyo enajo besa mee canaje. <sup>24</sup> E'e, ma pojajo emeshi mese Enodeja Huani jeanobia jjima poanaje. <sup>25</sup> Jamajjeya oe Jodio dejjaa Huaniya epeeji cuana mimiciuajeanobia canaje. Jama poanaje ba'a: —¿Ache dejjaa acuae mi Eyacuiñajjiyo enajo besa mee majje eseya e'e jojo nei quea bojea po mee caje'yo so'o? ¿A'a Huaniya pojja'a? ¿A'a cuae peaa besa mee cajji, Jesosa shajja'ajjajiya pojja'a besa mee cajji? —Jodio poanaje.

<sup>26</sup> Jamajjeya Huani que poquinaje ojaya epeeji cuana, huohui'ajjaa jama ba'a: —Esohui huohuiji, ma dejja joya yahuajo minijje nequinaje cuei ojje mijijje, ma ojo miyaya jama huohuinaje ba'a: "Oya Eyacuiñajjiya huoojea'yo ojjaña jaahuanajji", maaya jjeya o shajja'ajjaji nijje onaya besa mee cani; ojjaña cuana aje oe jjeya o que poquiani. Jesusaa quea huiso nee nee Eyacuiñajjiyo besa mee cani. ¿Apiojji shai? —poanaje Huaniya epeeji cuana.

<sup>27</sup> Huaniya oja epeeji cuana saja'a canaje: —¡A'a quea yeno pojji! Jamaya Eyacuiñajjiya oya pea cuana besa mee cani. Yahuajo quea huiso dejja e que poeyanaje; Eyacuiñajjiya oya cuana huoojea canaje. Jjeya ca ca ojjaña cuana Jesosa que poquiani; Eyacuiñajjiya oya cuana huoojea cani. <sup>28</sup> Miquiaaya ecue sohui yahuajo shajja'ajjanaje. Jama poanaje ba'a: "Eya Eyacuiñajjiya huoojea'yo ojjaña jaahuanajji pojjeama. Eyacuiñajjiya eya huoojea canaje ebionei Jesusajo huohuiya". <sup>29</sup> E'e —Huani poanaje—, Jesusajo jama

jjashahuabaquicue ba'a: Ejjahuanauquijjijo, epona yahueja ehuanase poaje'yo. Jamatii yahueja epeejiya poe majje jjahuanauquiequi ba cani. Yahue ojaya ehuanase nijje mimiani shajja'ajja majje quea bihui nee poani ojaya epeeji. Jiquio ecua yahueja epeeji o ba majje quea bihui nee poani jayojja jama eya Eyacuiñajjija huoojea'yo ojjaña jaahuanajji Jesosa bajjani ba coo majje quea bihui nee nee poani; eya Jesusaja epeeji. <sup>30</sup> ¡Ojjaña cuaa oya cashajja'ajja tiitii cahua! Quijje ca ca ojjaña cuana e que poepajeaje'yo. Jamatii capoahua —poanaje Huani, ma ona besameeji poani.

<sup>31</sup> ¡Bacue! Eyacuiñajjija huoojea'yo ojjaña jaahuanajji eyajo tii ania poa, meshi yasijje poeyanaje. Jamajjeya oya ojjaña huoojea'yojji poani tii; ohuaya e'e jojo nei Eyacuiñajjija ejjashahuabaquijji ba mee cani. Huani ca ca jiquiojo anija mejo, dejjaja jea. Jamajjeya aje oe dejja, oja chii jayojjaya. Dejja jama mimiani. Jamajjeya Eyacuiñajjija esohui oe pojji ba mee cani, Huaniya. <sup>32</sup> Eyacuiñajjija huoojea'yo ojjaña jaahuanajji ca ca Eyacuiñajji nijje eyajo ania poa. Jamajjeya ohuaya jama huohui cani ba'a: “Eyacuiñajjija ejjashahuabaquijji ecuea eba nei nei. Maya eyaya miya huohuiaña”. Jamatii ojaya esohui shajja'ajja sa po ajja beca cuana. <sup>33</sup> Ojjaña joya e'e jojo nei oya shajja'ajja sa poani ca ca jama poani ba'a: “Eyacuiñajjija esohui e'e nei; ¡Cashajja'ajja'yahua!” <sup>34</sup> E'e, Eyacuiñajjija huoojea'yo ojjaña jaahuanajjiya, Jesusaa Eyacuiñajjija esohui huohui cani e'e jojo nei. Eyacuiñajjija Edojjoshahua Pameya oya huohui meesahua cani; quea ja'a nee ameesahua cani tii tii. <sup>35</sup> Eyacuiñajjiya oja Bacua Ejja quea jea nee nee acani tii. Jamajjeya oya jama poani Jesosa nijje: —Miya ecuea ecue Bacua Ejja quea jea nee nee. ¡Jamajjeya ojjaña huoojea'yojji pocue tii, meshijo, eyajo pea'ai! —poani Eyacuiñajji.

<sup>36</sup> Jamajjeya ojjaña joya e'e jojo nei Jesosa nijje jjapeequiani, Eyacuiñajjija Bacua Ejja shajja'ajja cani pea'ai onijje ba'e tiitii mee caje'yo eyajo. Ojjaña joya o shajja'ajja sa po ajja ca ca onijje eba'e mee'yojji pojjeama. Eyacuiñajjiya oya cuana cajaa acaje'yo; quea nee nee poaje'yo tii cuaquijo.

## 4

### *Epona Samania meshijo ba'e jjapeequinaje Jesosa nijje*

<sup>1</sup> Jamajje Jesosa Jodea meshijo ani quea huiso dejja cuana o shajja'ajjaa poeyanaje, Eyacuiñajjijo besa meeya pea'ai. Jesosa nijje jjapeequinaje quea huiso nee nee. Majoya aje oe onaaya Jodio esohui huohuijji cuana, Paniseo cuana pea'ai huohui canaje jama ba'a: —Jesusaja epeeji cuana quea huiso nee nee; Huanija epeeji ca ca oe pojji —jamaya poanaje pea cuana.

Ma shajja'ajja majje Paniseo cuana quea quene poanaje Jesosa nijje. Jjashahuabaquinaje jama ba'a: —Ecuana quea huiso epeeji sa poani Jesusaja epeeji huisoajja —poanaje. <sup>2</sup> (Jamatii Jesosa shajja'ajjajji cuaa Eyacuiñajjijo enajo besa mee canaje cuana, Jesosa que poeyajo. Jesusaja ca ca pea cuana Eyacuiñajjijo besa mee jjima.)

<sup>3</sup> Jamajjeya Paniseo cuana onijje quea quene ba majje Jesosa Jodea meshijo ani poqui o'oyanaje Janinea meshi yasijje, ecuana nijje poquinaje.

<sup>4</sup> Janinea meshi yasijje ejiojjijje poquije Samania meshijo aniñaquinaje. <sup>5</sup> Samania meshijo ani poqui majje Sica cuiñajji pejeje Jesosa jomishoca aninaje ena eteohuejja quea doe pejeje. Jomajo yahuajo nei nei Jodio etiiquianaa Jacobohua ma meshijo que quia ca poa oja bacua ejja Jose. <sup>6</sup> Ma quejo yahuajo nei nei Jacobohua teo mee ca poa ena eteohuejja quea doe nee nee. Jamajjeya Jesosa ma ena eteohuejja huasijje poeyanaje eshequi biacojjajja nequijo. Jesosa hueahuea majje anioquenaje ma ena eteohuejja pejeje ejomishocajji. <sup>7-8</sup> Anioque majje Jesusaa ecuana acanaje jama ba'a: —¡Poquicue miquianaya Sica huasijje bobi jjesheya!

Ecuana poquiajo oe Samania epona poeyanaje ena eteohuejja huasijje ena jjequiso-huaa jjonajo. Jesusaa oya huohui canaje jama ba'a: —Epona, ¡che mo ena quiacue e'ishijji! —poanaje.

<sup>9</sup> Jodio cuanaja Samania cuana boti'ama nei. Samania cuana nijje mimi ajja, ojee ijja'ijjia ajja pea'ai Jodio pojjeama jjejojo. Jamajjeya ohuaya Jesosa saja'a canaje: —Miya

Jodio dejja; eya ca ca Samania pona. Jamajjeya ¿apiojji miya enijje mimiani enajo, ena quiajji? —poanaje Samania pona.

<sup>10</sup> —E'e —Jesosa poanaje—, eya miquea ba jjima. Eyacuiñajjija ejjashahuabaqui'yojji quea pame nee miquea ba jjima pea'ai. Maya miquea eba jojjemo miya enijje jama mimime pome ba'a: “¡Che mo oe ena quiacue e'ishijji!” Miya jama enijje emimi jojjemo eyaya miya quiame ena naba taja'ama epo'yojji tii tii —Jesosa poanaje.

<sup>11</sup> —E'e pojja'a —epona poanaje—, ena eteohuejja quea doe nee nee nequi. Miquea chama' ena ejjequisohuajji. Jamajje ¿achejo acuae ena nequi, ma ena ishi majje eya quea naba taja po maja ajja epojji? <sup>12</sup> Eseyaya etiiquianaa Jacobohua jiquio ena teohuejja mee ca poa yahuajo nei. Ohuaya oja bacua cuana, oja ñajjaja cuana, pea huo cuana pea'aiya ishi mee majamaja ca poa jiquio ena. Majoya ojjaña ecuaaya jiquio ena ishi majamajaña. ¿A'a cuae miquea pea ena eba? ¿Achejo nequi pea ena quea pame nee nee? Jacoboja ba jjima poa. Miya pojja'a quea jjashahuabaqui ja'a nee nee. ¿A'a Jacobo quea jjashahuabaqui ja'a pishana? —huohui'ajja canaje eponaa.

<sup>13</sup> —Epona —Jesosa huohui canaje—, ojjaña miquianaya jiquiacua poeyani ena ishiya. Jamatii ishi majje quea naba taja po o'oyani. <sup>14</sup> Eyaya pea ena quiaje ojjaña e'ishijji. Ma ena ishi majje quea naba taja po o'oya ajja. E'e, jjanijo ena oshe quea pame nee cuayani, huosa'yo ajja. Jiquio jayojjaya eyaya quiaje'yo. Jamajjeya eyaya miya ba'e tiitii meeje'yo —Jesosa poanaje.

<sup>15</sup> —¡Che ña maya pea ena quiacue e'ishijji! —Samania pona Jesosa acanaje—. Jamajjeya eya quea naba taja po ajja o'oya poaje. Jamajjeya eya jiquio ena eteohuejja huasijje epoe o'oyajji pojjeama ena jehuaa —poanaje.

<sup>16</sup> —E'e, ¡poquicue! ¡Miqueahue jjequicue! —Jesosa poanaje ma epona nijje.

<sup>17</sup> —Chama' ecueahue —saja'ame acanaje eponaa.

—E'e jojo nei jjeya miquea yahue chama' —Jesosa poanaje—. <sup>18</sup> Ecuea eba jama ba'a: Yahuajo miquea yahue cuana me oeje huisome poa, ojjaña jja miquea yahue ehuei poanaje. Jjeya miya pea dejjajo ba'e, miquea yahue pojjeamajo. Jamajjeya miya e'e jojo nei poani: “Chama ecueahue” —Jesosa acanaje Samania pona.

<sup>19</sup> —E'e jojo nei ojjaña miquea eba. Jamajjeya ecuea eba miya Eyacuiñajjija esohui huohuijji e'e jojo nei. <sup>20</sup> Ecuanaja etiiquianaa Eyacuiñajji bihuia ca poa jiquio Samania meshijo, eyiyo biajje. Miquianaya, Jodio cuana ca ca jama poani ba'a: “Jenosanenajo ca ca oeya Eyacuiñajji bihuiajji, pea eyiyojo pojjeama” miquianaya poani —poanaje Samania pona.

<sup>21</sup> —¡Shajja'ajjacue mo, epona! —Jesosa oya acanaje—. Quijje pishana miquianaaya Eyacuiñajji, esejaya Chii bihuiaje, ojjaña. Jiquio eyiyo huasijje poe jjimaa, Jenosana huasijje poqui jjimaa pea'ai oya bihuiaje. <sup>22</sup> Jjeya ojaya esohui jayojja jama pojjeama aje oe miquianaaya, Samania cuaa Eyacuiñajji bihuiaña. Oya miquianajaya ba jjima. Ecuanaa ca ca Eyacuiñajji bihuiaña ojaya esohui jayojja. Eya oja huoojea'yo ojjaña mimishi cuijea'yojji Jodio dejja. Jamajjeya Eyacuiñajji ecuanaja eba, Jodio cuanaja. <sup>23</sup> Jamajjeya jjeya nei ojjaña esejaya Chii, Eyacuiñajji bihuiaje e'e jojo nei, ojo quea ja'a nee jjashahuabaquije. E'e, Eyacuiñajji jama poani ba'a: “Jamaya eya cabihuia cahua ojjaña. Jamaya ecuea quea boti nee” poani. <sup>24</sup> Eyacuiñajji yani tii tii eshe. Jamatii oya jjaba meequi ajja ecojjaa. Jamajjeya o bihuiajji epohua Eyacuiñajji cabihuia cahua e'e jojo nei, ojaya esohui jayojja jama quea ja'a nee ojo jjashahuabaquiani —Jesosa acanaje.

<sup>25</sup> —E'e —poanaje epona—, ecuea eba quijje Eyacuiñajjija huoojea'yo ojjaña jaahuanajji poeje. Oya Quito bajjani poaje. Poe majje ohuaya ecuana quea ja'a nee ba mee caje Eyacuiñajjija esohui.

<sup>26</sup> —Eya ca ca ña jiquio Eyacuiñajjija huoojea'yoya Quito bajjani. Jjeya nei miya Quito nijje mimiani —Jesosa acanaje.

<sup>27</sup> Majoya Jesosa shajja'ajjajji cuana bobi jjeshe majje poe o'oyanaje Jesosa que. Jesosa ba caña'yonaje Samania pona nijje mimiani. Ba majje jjashahuabaquinaje jama ba'a: —¿Apiojji shai Jesosa epona nijje mimiani? —jamatii huohui'ajja jjima: —Epona, ¿ajeo



miya poeyanaje? —ajjima: —¿Jesosa, ajeo miya Samania epona nijje mimiani? —jamaya ecuana mimi jjima Jesosa nijje poanaje.

<sup>28</sup> Majoya ena jjequijji ohua acani jea canananaje eponaa, poquicuajinaje Sica huasijje huohui pohua. <sup>29</sup> Ojjaña cuana huohui cañaquinaje jama ba'a: —¡Poecuajicue oe! Oe dejja ena eteohuejja pejjejo ani; ohuaya ojjaña ecuea eba'ejji huohui ca'yonaje. ¿A'a oya pojja'a Eyacuiñajjija huoojea'yo ojjaña jaahuanajji? ¡Poe'ajja! ¡Ejjaba'ajjaquiqui! — poanaje epona.

<sup>30</sup> Eponaa huohui cajje ojjaña Sicajo ba'e poqui canaje Jesosa baa.

<sup>31</sup> Ojjaña cuana poe jjimahuajo, ecuana, o shajja'ajjajjiya Jesosa nijje jama poanaje ba'a: —Esohui huohuijji, ¡bobi oe ijja socue!

<sup>32</sup> Jamatii Jesosaa jama acanaje ba'a: —Ecuea pea bobi yani ecuea e'ijjajji, ma miquea ba jjima.

<sup>33</sup> Jamajjeya ecuana ojee miminaje: —¿A'a pojjeama oya pea cuaa bobia canaje? — poanaje.

<sup>34</sup> Jesosa ecuanaja esohui shajja'ajja majje jama poanaje ba'a: —Bobi ijja majje miquianaya quea bei poani. Ecue Chiiya eya huoojea canaje ojjaña jaahuanajji; ojjaña ojaya esohui ajeyo'yo majje eya quea bei poaje, bobi ijja majje jayojjaya —Jesosa poanaje—. <sup>35</sup> Miquianaya jama poani ba'a: “Quijje anoso sejjaje'yo, ebeca pee pea'ai ba'ime po majje. Eyaya ca ca miquianaya huohuiaña jama ba'a: ¡Bacue! Jomajo quea huiso dejja cuana poeani. Anoso ejahua jayojjaya jama oya cuana poeani. E'e, oya cuana Eyacuiñajjijo jjashahuabaquiani. Onijje jjapeequi'yo sa poani. ¡Jamajjeya enijje jjapeequi meesahuacue! <sup>36</sup> E'e, echacojji anoso quecuajji, anoso sejjajji pea'ai eque meseya sosequia cajji. Jamajje ojjaña quea bihui nee poaje'yo —Jesosa poanaje—. Oya jayojjaya Eyacuiñajjiya acaje ojaya echacojji cuana. Joya esohui huohuicoojji cuana sosequia caje; joya pea cuana enijje jjapeequi meesahuajji poani pea'ai sosequia caje. Enijje jjapeequiajo ba'e tiitii meje'yo enijje eyajo. Jamajjeya ojjaña cuana quea bihui nee nee poaje'yo. <sup>37</sup> E'e, yahuajo jama poanaje cuana ba'a: “Oe echacojjiya eso' quecua majje quijje pea echacojjiya chicha caje'yo”. Jjeya jamaya e'e jojo nei poani. <sup>38</sup> Jjeya eyaya miya huoojeaña anoso chichajji jama, ojjaña cuana enijje jjapeequi meesahuua. Yahuajo Eyacuiñajjija esohui huohuijjiya oya cuana esohui ba mee canaje. Jamatii ojjaña cuana jjabahuejjaqui jjima. Jjeya miquianaaya esohui huohui o'oyajo, oya cuana ecuea epeejji e'e jojo nei poaje'yo —Jesosa poanaje ecuana nijje, o shajja'ajjajji cuana nijje.

<sup>39</sup> Majoya quea huiso nee nee Samania cuana poeyanaje Jesosa que. Oya cuana Samania eponaja esohuijjijo jjashahuabaquiani. Ohuaya jama acanaje ba'a: —¡Jiquio dejjaa ojjaña ecuea eba'ejji huohui ca'yonaje. E'e jojo nei jiquio dejja Eyacuiñajjija huoojea'yo ojjaña jaahuanajji, Quito bajjani —epona poanaje.

<sup>40</sup> Jamajjeya Jesosa que poe majje Samania dejja cuana jama poanaje ba'a: —Esohui huohuijji, ¡ecuana nijje che anicue!

—E'e, anije ecuana —Jesosa poanaje.

Jamajje aninaje. Beca cahuime sohuihuohui canaje. <sup>41</sup> Jamajjeya Jesusaja esohui shajja'ajja majje ojjaña cuaa jama acanaje ba'a: —¡E'e jojo nei oya Quito! —poanaje.

<sup>42</sup> Epona nijje jama poanaje: —Yahuajo miquea esohuijjijo ecuana beshahua nei jjashahuabaquinaje oya e'e jojo nei Quito. Jjeya ca ca oja sohui shajja'ajja majje ecuanaja eba nei nei Jesosa e'e jojo nei Eyacuiñajjija huoojea'yo ojjaña jaahuanajji; mimishi cuijea ca'yajje aje se ba'e tiitii mee caje'yo eyajo —poanaje Samania dejja cuana.

*Jesosaa jjaajjaqui mee ca'yonaje onaja bacua ejja beshahua nei poqui jeyoani*

<sup>43</sup> Jamajjeya Samania meshijo beca cahuime ani majje Jesosa poqui o'oyanaje Janinea meshi yasijje, Cana huasijje. <sup>44</sup> Yahuajo Jesusaa ecuana, o shajja'ajjajji cuana jama acanaje ba'a: —E'e jojo nei pea cuaa Eyacuiñajjija esohui huohuijji shajja'ajja cani. Jamatii ojaya cuiñajjijo ojaya huapa pojjeama cuana ca ca oe jjashajja'ajjaqui sa po'yo ajja.

Jamajjeya Jesosa jjeya Nasanena huasijje, ma o esho'yahua ba'ya poa huasijje dobiqii jjima. <sup>45</sup> Jamatii Janinea meshijo ejiojjijje poquianijo, Janinea dejja cuana oya ba majje jama poanaje ba'a: —Esohui huohuijji, mi poe'yajo ecuana quea bihui nee nee. Yahuajo ecuanaa miya banaje Jenosanena huasijje poqui. E'e, esohuidojojji cuaa yahuajo Jodioja ebacua cuana cuia'yo jjima shejo, Jenosanena huasijje ojee ijia'ijjiaa poqui ecuaaya miya banaje. Miyaya quea huiso cuana jjaajaqui mee'yonaje, ma dejjaa ajjima acani anaje quea huiso pea'ai. E'e, miya Eyacuiñajjija esohui huohuijji nei nei —poanaje cuana.

<sup>46</sup> Jamajjeya Jesosa poqui o'oyanaje Cana huasijje, ma ohua yahuajo ejjahuanajjijjo ena acuijjajja na pojji aca'ya poa huasijje. Canajo Jesosa aninaje ecuana nijje, o shajja'ajjajji cuana nijje. Jamajjeya oe emeshi mese neija dejja huoojeasahuajjija Jesosajo shajja'ajja canaje: —Jesosa Jodea meshijo yahuajo ani Janinea meshi yasijje poe'yonaje. Canajo jjeya nequi.

<sup>47</sup> Oja bacua ejja quea mano nee nee jaa quea huesha pishana, Capenaomajo jaa. Jamajjeya maya shajja'ajja majje Jesosa que poquicujicujinaje. Jama acanaje ba'a: —Jesosa, ¡poecuajicue Capenaoma huasijje! ¡Ecue bacua ejja jjaajaqui mee'yocue! Quea mano nee nee jaa, beshahua nei poquijeyo jaa —poanaje.

<sup>48</sup> Jesosa ojjaña cuana nijje jama poanaje ba'a: —Miquiana cuana Janinea meshijo ba'e beshahua nei jjashajja'ajjaqui ajja. Eyaya ma dejjaa ajjima acani mi amajamajajo, miquianaya jjashahuabaqui ajja jama ba'a: “E'e jojo nei Jesosa Eyacuiñajjija huoojea'yo ojjaña jaahuanajji” —Jesosa poanaje.

<sup>49</sup> —Esohui huohuijji Jesosa, jamatii —ejeajji poanaje—. ¡Poecuajicue oe, ecue bacua ejja epoquijeyo cuahuajo!

<sup>50</sup> —Epeejji, ¡quea bihui poquicue miquea equi yasijje! Eyaya mique bacua ejja jjaajaqui mee'yonaje; apoa poanaje —Jesosaa emanojaaja ejeajji acanaje.

Jesosaja esohui shajja'ajja majje ebacuaaja ejeajji quea bihui nee poquinaje jjashahuabaquiani jama ba'a: —E'e jojo nei Jesosa quea sohui poja nee nee; ecue bacua ejja jjaajaqui mee ca'yonaje.

<sup>51</sup> Ojaya equi yasijje poquianijo, oja chacojji cuana poeyanaje. O ba majje taaanaje: —¡Miquea ebacua ejja boeca'yonaje! Quea pame nee jjeya ani'yo. Huaquia'yonaje —poanaje.

<sup>52</sup> —E'e —ejeajji poanaje—, jamaya quea pame nee. ¿Ache nei eshequi nequijo acuae apoa poanaje so'o?

—Yahuajo apoa poanaje, omamecajje tii, eshequi ejjajeapaaquijo oya boeca'yonaje —poanaje echacojji cuana.

<sup>53</sup> —E'e nei —ejeajji jjashahuabaquinaje—, omamecajje tii eshequi ejjajeapaaquijo Jesosaa eya huohui canaje jama ba'a: “Miquea ebacua ejja jjaajaqui'yonaje; apoa poanaje” —ejeajji poanaje.

Jamajje equi yasijje dobiqii majje ojaya huapa pojjeama cuana nijje jama poanaje ba'a: —E'e, Jesosaa ecue bacua ejja jjaajaqui mee ca'yonaje, boeca mee ca'yonaje. ¡Oya ca ca oe Eyacuiñajjija huoojea'yo ojjaña jaahuanajji! —poanaje ebacuaaja ejeajji.

Jamajjeya ojjaña jama poanaje ba'a: —E'e jojo nei oya Jesosa.

<sup>54</sup> Jamaya Janinea meshi yasijje poe o'oya majje Jesosaa Cana cuiñajjijo pea dejjaja ba jjima aca o'oyanaje.

## 5

### *Jesosaa dejja jeo'ajja Metena ena sahuajo jaa jeo mee ca'yonaje*

<sup>1</sup> Majoya quijje ojjaña Jodio dejja cuana poqui o'oyanaje Jenosanena huasijje ojee ijia'ijjiaa Eyacuiñajji bihuiaa. Jamajjeya ecuanaya Jesosa nijje, o shajja'ajjajji cuana nijje pea'ai Jenosanena huasijje poqui o'oyanaje. <sup>2</sup> Jenosanena cuiñajji mei jiyoyo Ñajjajja Dobiqijji esecue yani. Ma esecue pejjejo yani ena, bae sisi jama, ebesajji, Emeo esohuijo Metena ena bajjani. Ena sahuajo yani me oejje equi sisi. <sup>3</sup> Jomajo quea huiso emano cuana jaanaje: cojjama' cuana, jeo'ajja cuana, jiojjijajja cuana pea'ai. Ohuaya esohuidojojji

ishoa'ajja cani; jama jjashahuabaquime poani ba'a: —E'e, Eyacuiñajjija esohuidojojjiya ena cajeaquejjo cahua. Jamajjeya eya ena huasijje nequidobiquiajo, jjaajaqui mee caje'yo.

<sup>4</sup> E'e, Jodio cuaa jama acanaje ba'a: —Esohuidojojjiya quijje nei poe huicha'anijo ena jeaquejjo mee cani. Ena jeaquejjo cajo, ojjaña emano cuana ena huasijje canequidobi cuajiquiahua. Joya ebionei besaje'yo ca ca jjaajaqui mee caje'yo, huaquia mee caje'yo pea'ai Eyacuiñajjiya —poanaje Jodio cuana.

<sup>5</sup> Jamajjeya oe dejja jomajo jeo'ajja jaanaje. Quea shequiaja huiso nee nee jaa poa, 38 shequiajame. <sup>6</sup> Jesusaa poe majje ba canaje dejja emanojaa jeo'ajja. Jesusaja eba ma dejja quea shequiaja huiso nee nee jaa poa. Jamajje oya huohui'ajja canaje: —¿A'a miya jjaajaqui'yo sa poani? ¿A'a miya jeo sa poani? —Jesusa poanaje.

<sup>7</sup> —E'e —emanojaa saja'a canaje—, jamatii chama' pea dejja e dojojji ena jeaquejjo poani yasijje e besa mee'yojji. Jamajjeya eya ebionei ebesa'yojji pojjeama. Eya jipashineijje poquianijo, pea ebionei besacuajiquije —poanaje emanojaa, jeo'ajja.

<sup>8</sup> Jesusaa oya jama acanaje ba'a: —Epeeji, ¡nequisohua'yocue oe! ¡Jeocue! ¡Miquea equi yasijje equipajaajji bebo majje dojo'yocue!

<sup>9</sup> Jjeya nei jeo'ajja jeocuai'yonaaje. Jamajje nequisohua'yonaaje; oja equi yasijje equipajaajji bebo majje dojo ca'yonaaje; jeopoqui'yonaaje. Jesusaa oya jeo mee ca'yonaaje Jodioja epojja ejomishocajji. <sup>10</sup> Jamajjeya ma dejjaa equipajaajji dojo cani ba majje Jodio cuana quea tecue onijje poanaje: —¡De! ¿Apiojji acuae miyaya equipajaajji dojoaña so'o? ¡Jjeya epojja ejomishocajji, de! ¡Aquiana jjeya dojoca ajja! Jamaya eseja esohui huohuijji cuaa huohui cani —poanaje.

<sup>11</sup> Ma dejja ejeo'yohua saja'a canaje jama ba'a: —Jamatii. Oe dejjaa eya jeo mee'yo majje jama acanaje ba'a: “¡Poquicue miya; miquea equipajaajji bebo majje dojocue!” poanaje.

<sup>12</sup> —E'e pojja'a —Jodio cuana poanaje—. “¡Miquea equipajaajji dojocue!” poanaje. ¿Ae bajjaniya acuae maya miya huohui canaje so'o? —huohui'ajja canaje.

<sup>13</sup> —Cua'a, de —saja'ame acanaje—. Ache dejjaa shai eya jeo mee ca'yonaaje. E jeo mee'yo majje oya pea dejja quea huiso nijje poquinaje —poanaje. (E'e, dejja quea huiso nee nee jomajo ani.)

<sup>14</sup> Quijje pishana Jesusaa ma dejja oja jeo mee'yo ba ca'yonaaje Eyacuiñajjija equijo. Jama huohuime acanaje ba'a: —E'e epeeji, jjeya miya quea pame nee nequi'yo, quea aja nee nequi. Jamajjeya ja'a quea mimishi po o'oyajji! Quea mimishi po o'oya majje mi quea mano nee nee po o'oya chana', quea tai nee nee; yahuajo jeo ajja, quea nee pishana poanaje —Jesusaa acanaje.

<sup>15</sup> Jesusa shajja'ajja majje poqui'yonaaje Jodio cuana huasijje. Huohuiqui canaje jama ba'a: —E'e, Jesusa bajjaniya eya jeo mee ca'yonaaje —poanaje.

<sup>16</sup> Jamajjeya jeo'ajja poanajeya huohui cajje Jodio cuaa Jesusa niñeba canaje; quecua'yo sa acanaje pea'ai, Jesusaa jeo'ajja cuana jeo mee ca'yonaaje epojja ejomishocajji.

<sup>17</sup> —Ecue Chiya quea pame nee acani tii tii epojja ejomishocajji pea'ai —Jesusaa oya cuana saja'a canaje—. Jamajjeya eyaya pea'ai ecue Chiya jayojjaya jama quea pame ña ojjaña pojja.

<sup>18</sup> Jamajjeya Jodio etii cuaa Jesusa quecua sa neinei acanaje. Jama huohui canaje ba'a: —Esejaya etiiquiaa yahuajo esohui tehue ca poa jama ba'a: “¡Epojja ejomishocajji a'a chacojji!” aca poa.

Jodio cuaa Jesusa niñeba canaje jama pea'ai ba'a: —Oya, Jesusa etiiquianaja etehue'yo jama po ajja —poanaje.

Yahuajo Jesusa Jodio nijje jama poanaje pea'ai ba'a: —Eyacuiñajji ecue Chii, de.

—Chojja, de, Jesusa siajje poani —niñebame acanaje Jodio cuaa Jesusa.

Jodio cuaa jama acanaje pea'ai ba'a: —Jesusa siajje poani jama ba'a: “Eya Eyacuiñajji jayojjaya poani” siajje, de —jamaya Jodio cuaa acanaje.

*¡Eyacuiñajjija Bacua Ejja Jesusa quea ca'a nee eba'e tiitii mee'yojji!*

<sup>19</sup> Jamajjeya Jesosaa ma Jodio etii cuana huohui canaje jama ba'a: —Eyaya miqianaya e'e jojo nei huohuiaña jama ba'a: Eyacuiñajjiya eya, oja Bacua Ejja oe nei huoojea canaje; eyaya ojaya esohui jayojja jama aña. Eyaya huohuiaña ecue Chiiya ejjashahuabaquijji, ecuea ejjashahuabaquijji pojjeama. Ojjaña ecue Chiiya acani ecuea eba. Jamaya ca ca eyaya aña pea'ai. E'e, ojjaña ecue Chiiya acani eyaya aña pea'ai, eya oja Bacua Ejjaa jjejojya. <sup>20</sup> Eya ecue Chiiya quea jea nee nee. Jamajjeya eya ba mee cani ojjaña joya ohua amee sa acani huiso tii. Eyaya ma dejjaa ajjima acani aña ba majje miqianaya jama poaje ba'a: “E'e nei, yahuajo jamaya ajjima cuanaja poa. Chama' pea Jesosa jayojja” poaje miqianaya. <sup>21</sup> Jamaya ecue Chiiya eya amee caje'yo ba'a: Ecue Chiiya emano'yojaa shequi mee ca o'oyani jayojja jama eyaya ba'e meeje o'oya, ojjaña ecue babaca'yo cuana pea'ai —Jesosa poanaje—. <sup>22</sup> Ecue Chiiya ehuohuijji pojjeama joya ojaya epeeji pojjeama, joya quea nee nee poaje'yo tii cuaquijo. Joya ojaya epeeji poani ba'e tiitii mee caje'yo onijje ehuohuijji pojjeama pea'ai. Chojja, ohuaya jama huohuime acanaje ba'a: “Ecue Bacua Ejjaa cahuhui cahua ecuea ejjashahuabaqui'yojji”. <sup>23</sup> Jamajjeya ojjaña joya ecue Chii shajja'ajjaji poaniya eya oja Bacua Ejja shajja'ajja caje'yo pea'ai. Ojjaña joya eya Eyacuiñajji Bacua Ejja shajja'ajja sa po'yo ajja Eyacuiñajji, e huoojea'yojji shajja'ajja sa po'yo ajja pea'ai —Jesosa poanaje.

<sup>24</sup> —E'e jojo nei nei ecuea ehuohui minijje jama ba'a —Jesosa poanaje—: Ojjaña joya ecue sohui shajja'ajja cani, e huoojea'yojji sohui e'e jojo nei shajja'ajjaji poani pea'ai ba'e tiitii meeje'yo enijje eyajo; cuaqui yasijje epoqui'yojji pojjeama. Chojja, oya cuana yahuajo eshahuaaja epeeji poanajejo cuaqui yasijje poqui'yo quiaye. Jjeya ca ca ba'e tiitii meeje'yo enijje, ecuea epeeji jojya. <sup>25</sup> ¡Shajja'ajjacue mo! —Jesosa poanaje—. E'e jojo nei ojjaña shajjama' poani Eyacuiñajjiya ba cani emano'yo jayojja, epoquijeyo'yo jayojja. Jamatii ehuohui'yo ejo, Eyacuiñajjiya Ebacua Ejja shajja'ajja caje'yo. Ecuea esohui jayojja jama e'e jojo nei atitii cajo, eyaya ba'e tiitii meeje'yo enijje eyajo. <sup>26</sup> E'e, Eyacuiñajji ecue Chii yani tii tii, eshe. Jamajjeya ohuaya eya, oja Bacua Ejja huoojea canaje ojjaña joya onijje jjapeequiani ba'e tiitii mee'yohua. <sup>27</sup> Cuanaya eya ojjañaja Edoe Mese poanijo Eyacuiñajjiya eya huoojea canaje jama ba'a: “¡Miyaya huohuicue joya minijje jjapeequiani ba'e tiitii meeje'yo minijje! ¡Huohuicue pea'ai joya miquea epeeji pojjeamajo quea nee tii tii poaje'yo cuaquijo!” jamaya Eyacuiñajjiya eya acanaje —Jesosa poanaje—. <sup>28</sup> E'e, e'e jojo nei quijje ojjaña yahuajo emano'yo cuana iyaa majje eyaya oya cuana shequi meeje o'oya —Jesosa poanaje—. Ecuea esohuijo ja'a jjashahuabaquijji jama ba'a: “¿Yajja yajji? ¿Achajja shai ohuaya emano'yo cuana shequi mee caje o'oya?” a'a jamaya pojji! <sup>29</sup> E'e jojo nei oya cuana eshe o'oya po mee majje ojjaña ecuea epeeji eyaya ba'e tiitii meeje'yo enijje. Ojjaña shajjama' cuana ca ca shequi o'oya majje quea nee nee poaje'yo tii tii cuaquijo. <sup>30</sup> E'e, Eyacuiñajjiya eya huoojea canaje ojjaña huasijje huohuiya jama ba'a: “Joya ecuea epeeji cuana poani eyaya ba'e tiitii meeje'yo enijje. Beca cuana ca ca ecuea epeeji pojjeamajo quea nee nee poaje'yo tii tii”. Eyacuiñajjiya e huoojea majje jama acanaje ba'a: “¡Ojjaña ecuea ejjashahuabaquijji ojjaña cuana huohuicue!” acanaje. Eyaya ojaya esohui jayojja jama aña, ecuea ejjashahuabaqui'yojji pojjeama. Jamajjeya eyaya Eyacuiñajjiya ejjashahuabaqui'yojji jayojja jama aña ecuea esohui ojjaña e'e jojo nei —Jesosa poanaje.

*Jesosa Eyacuiñajjiya huoojea'yo ojjaña jaahuanajji, oja Bacua Ejja*

<sup>31</sup> Majoya Jesosaa Jodio cuana huohui canaje jama ba'a: —Miqianaya ejo jjashahuaba quehuaquiani jama ba'a: “Jiquio dejjaa jama huohui cani ba'a: —Eya ca iña iquio Eyacuiñajjiya huoojea'yo ojjaña jaahuanajji —acani, de. Jamatii ohuaye neiya jama huohui canijo oya ecuanaja eshajja'ajjaji pojjeama” jjashahuaba quehuaquiani miqianaya —Jesosa poanaje—. Jamatii ecuea esohui e'e jojo nei. <sup>32</sup> Eya ee nei pojjeama; eya ecue Chii nijje. Ohuaya ojjaña ba mee cani eya oja huoojea'yo. Ecuea eba ojaya esohui ejo e'e jojo nei. <sup>33</sup> Yahuajo miqianaaya pea cuana huoojeanaje Huani que e huohui'ajjaa. Huaniya miqianaya e'e nei huohui canaje jama ba'a: “Jesosa e'e jojo nei Eyacuiñajjiya huoojea'yo

ojjaña jaahuanajji, oja Bacua Ejja oe nei” acanaje Huaniya, ma ona besameejji poaniya — Jesosa poanaje.

<sup>34</sup> —Eyacuiñajjiya Huani huoojea canaje ejo huohuiya. Eyaya miqianaya huohui o'oyaña ma Huaniya ejo huohui canaje. Jamatii miqianajaya ejjashahuabaqui'yojji ejo quea ja'a pojjeamajojo eyaya miqianaya huohui o'oyaña. Miquianaaya Huanija esohui ejo eshajja'ajja jojjemo eyaya miqianajaya mimishi cuijea'yome —Jesosa poanaje.

<sup>35</sup> —Cuaquijiji mecajje jijianiya quea ja'a ojjaña ba mee cani jayojja jama Huani poa. Ohuaya miqianaya quea ja'a nee ba mee canaje Eyacuiñajjiya esohui ejo, ma yahuajo miquea ba jjima poa. Ebionei miqianajaya oja sohui ejo quea boti nee poanaje; jamatii quijje shajja'ajja sa po'yo ajja poanaje. <sup>36</sup> E'e —Jesosa poanaje—, Huaniya ejo huohui canaje. Jamatii oya dejja. Pea yani, ecue Chii. Ecue Chiiya miqianaya ba mee cani eya oja huoojea'yo. E'e, ecue Chiiya eya ameesahua cani ma dejjaa ajjima acani. Ma ajeyo'yo majje miqianaya ba meeje e'e jojo nei eya Eyacuiñajjiya huoojea'yo ojjaña jaahuanajji. <sup>37</sup> Ecue Chiiya miqianaya ba mee cani jama ba'a: Ohuaya e'e jojo nei eya huoojea canaje. Jamatii miqianajaya oya ba jjima ecojjaja. Miquianajaya aje oe oja mimi shajja'ajja jjima pea'ai. <sup>38</sup> Ojaya esohui miqianajaya shajja'ajja jjima. Eya oja huoojea'yo. Jamajjeya miqianaya ecue sohui shajja'ajja sa po'yo ajja pea'ai — Jesosa poanaje—. <sup>39</sup> Eyacuiñajjiya esohui yahuajo etehue'yo miqianaaya ba huicha'a huicha'aña, ba majamaja majje miqianaya eba'e tiitijje poso jjabaquiani. Ma esohui etehue'yo yahuajo ejo tehue ca poa. <sup>40</sup> Eyaya ca ca oe eyaye nei miya ba'e tiitii meeje'yo; jamatii miqianaya enijje jjapeequi sa po ajja —Jesosa Jodio cuana acanaje.

<sup>41</sup> —Eya dejja mimishi jama jjashahuabaqui ajja jama ba'a: “Ojjaña dejja cuaa jamatii eya shajja'ajja caje'yo” po ajja eya —Jesosa poanaje—. <sup>42</sup> Chojja, ecuea eba miqianajaya Eyacuiñajji quea jea nee pojjeama. <sup>43</sup> Eyacuiñajjiya, ecue Chiiya eya huoojea canaje. Jamatii miqianaya e shajja'ajja sa po ajja. Pea dejjaa Eyacuiñajjiya huoojea'yo nishohua huohui cani jama ba'a: “Eya quea pame nee”. Ojaya esohui ca ca miqianaaya shajja'ajjaje; sijjepojji nijje miqianaya jjapeequije. <sup>44</sup> Eyacuiñajji oe nei enequi tii tii. Jamatii miqianaaya ojaya esohui jayojja jama a sa po'yo ajja, jama jjashahuabaquime po ajja ba'a: “Eyacuiñajjiya ejo jama cahuohui cahua ba'a: —E'e, miya ecuea epeeji quea pame nee —cahuohui cahua”. Chojja. Jamaya miqianaya jjashahuabaqui ajja — Jesosa poanaje—. Miquianaya jjashahuaba tiitiquiani jama ba'a: “Pea dejja cuana ejo jama camimiquiahua ba'a: —E'e, miya ca ca oe quea pame nee nee —capoahua onaya”. Jamajjeya miqianaya enijje jama po ajja ba'a: “Jesosa, miya Quito, Eyacuiñajjiya huoojea ojjaña jaahuanajji” enijje po ajja. Jamaya huohui sa po ajja miqianaya —Jesosa poanaje.

<sup>45</sup> —¡A'a eya ecue Chii ehuohuije poso pojji jama ba'a: “Oya cuana e shajja'ajja sa po'yo ajja; quea mimishi nee nee” a'a eya ehuohuije poso pojji nequiana! —Jesosa poanaje—. Chojja, ecuea miqianaya ehuohuiji pojjeama. Miquianaya Moisesija etehue'yojo jjashahuabaquiani; jamatii ojaya esohui etehue'yo ajjimajo, Eyacuiñajjiya miqianaya jama acaje ba'a: “¿Apiojji acuae quiana Moisesija etehue'yojo shajjama' poani? Miquianaya quea mimishi nee nee” quijje Eyacuiñajjiya nequiana acaje'yo — Jesosa poanaje.

<sup>46</sup> —E'e, Moisesiya ejo tehue ca poa. Jamajjeya miqianaaya oja tehue e'e jojo nei eshajja'ajja jojjemo enijje jjapeequi'yome. <sup>47</sup> Jamatii miqianaaya Moisesija esohui eshajja'ajja jojjemo, ojaya ehuohui etehue'yo eba pea'ai jojjemo ecuea esohui shajja'ajja'yome pea'ai —Jesosa poanaje.

## 6

*Jesosa bobia canaje quea huiso nee nee dejja, 5.000 dejja*  
(Mateo 14.13-21; Macoso 6.30-44; Noca 9.10-17)

<sup>1</sup> Majoya Jodio dejja cuana nijje mimi majje, quijje Jesosa o shajja'ajjajji nijje, ecuana nijje Jenosanenajo ani poquinaje Janinea bae yasijje, pea bajjani Timenia bae yasijje. Bishe aijo ojje miji yasijje besapoqui o'oyanaje. <sup>2-3</sup> Ba'eñaqui majje eyiyo huasijje

jaasohuaquinaje. Anioquenaje. Yahuaajo Jesusaa quea huiso acanaje ma dejjaa ajjima acani; quea huiso emano cuana jjaajaqui mee ca'yonaje, jjajeaqui mee ca'yonaje pea'ai. Jamajjeya o ba majje quea huiso nee nee poqui canaje jocuama, Jesusa baa. <sup>4</sup> Jamaya poanaje Jodio cuana Jenosanena huasijje poqui o'oyani ojee ijia'ijia'yohua esohui dojojjiya Jodioja ebacua yahuaajo cuia'yo jjima shejo. Ma epajea'yojji pojjeama jjachichaquinaje. <sup>5-6</sup> Jamajjeya Jesusaa baja canaje quea huiso nee nee poeje. Ba majje ohuaya Penipe huohui'ajja canaje: —Penipe, ¿achacua acuae seya che bobi jjesheje so'o dejja cuana quea huiso bobiajji? —Jesusaa acanaje, Penipeya yajja huohui'ajjame acaje ejjabaquijji. Jamatii Jesusaja eba poa Eyacuiñajjiya, oja Chiiya bobi pana caje'yo dejja cuana bobiajji.

<sup>7</sup> Penipeya saja'a canaje jama ba'a: —¿Yajja yajji? ¿Ajeo ebobiajji? Oya cuana quea huiso nee nee añ, de. 200 esodojjo quea nahue ecuanaja yani jojjeme maya oe pojji bobi jjescheme ojjaña cuanaja ijiajji —poanaje Penipe.

<sup>8</sup> Majoya aje oe o shajja'ajjajji Anesi, Simohui Penoja chahua jama poanaje ba'a: <sup>9</sup> —Oe esho'ia ye canaje me oejje pahui, beca nahuoo sisi pea'ai. Jamatii maya oe pojji nei nei, de; dejja cuana quea huiso nee nee ani jeje jjima poaje —poanaje Anesi.

<sup>10</sup> Majoya Jesusaa jama acanaje ba'a: —¡Ojjaña cuana jama acue ba'a: “¡Ojjaña anioquecue sipone biajje!” acue! —Jesusaa acanaje.

Jamajje quea huiso sipone yanijo, ojjaña cuana anioque mee canaje sipone biajje. Quea huiso nee nee poanaje, 5.000 dejja; epona, esho'i cuana pea'ai sico jjima. <sup>11</sup> Majoya Jesusaa pahui me oejje huiso jjeshe majje Eyacuiñajji bihuia canaje. Eyacuiñajji nijje bobijo mimi majje pahui tepe canaje; ecuanaja, o shajja'ajjajji cuana quia mee canaje dejja cuana e'anioquiani yasijje. Jamaya acanaje nahuoo sisi pea'ai. Quia ca poquije quea huiso nee nee jjapanaqui poquipoquinaje bobi, de. Jamajjeya ojjaña cuana ijia neinei canaje. <sup>12</sup> Ojjaña jejeajo, Jesusaa ecuanaja huohui canaje: —¡Chichacue bobi ojjañaja ijiajje! ¡A'a jeana'yojji!

<sup>13</sup> Jamajjeya ecuanaja chicha'yonaje pahui ojjañaja ijiajje. Jjepai ai yasijje iya'yonaje. Quea huiso poanaje, 12 jjepaime. Jamatii yahuaajo me oejje, 5 pahui poanaje. E'e, Eyacuiñajjiya jjapanaqui mee capoquipoquinaje quea huiso bobi, de. <sup>14</sup> E'e, Jesusaa ma dejjaja ba jjima acanaje; 5.000 dejja cuana bobia canaje. Ma ba majje dejja quea huiso cuana ojee miminaje jama ba'a: —E'e jojo nei Jesusa Eyacuiñajjiya huoojea'yo ojjaña jaahuanajji. Yahuaajo Eyacuiñajjiya ojo huohui mee ca poa jama ba'a: “Quijje eyaya miquiana huasijje huoojeaje Quito, ojjaña jaahuanajji”. ¡Cua'a, oya esejaya emeshi mese epojji ejjanequi meequi! —dejja cuana poanaje.

<sup>15</sup> Onajaya ejjashahuabaquijji ba majje Jesusaa ojjaña dejja cuana huoojea canaje equi cuana huasijje. Majoya oya quehua poquinaje. Eyiyo huasijje oe nei jaasohuaqui o'oyanaje oja Chii nijje mimiya.

*Jesosa bae ena biajje poquinaje*  
(Mateo 14.22-27; Macoso 6.45-52)

<sup>16</sup> E'e, sinecua, eyiyo huasijje poqui jjimahuaajo Jesusaa ecuanaja, o shajja'ajjajji cuana huoojea canaje: —¡Bae oje miji yasijje bishe aijo besapoquicue! Quijje eya poquije miquiana que —Jesusa poanaje.

<sup>17</sup> Jamajjeya bishe ai yasijje ani majje ecuaa yonaje. Besapoqui'ajjanaje oje miji yasijje epouijji, Capenaoma huasijje. Mecajje quea apo nee poanaje. Jamatii Jesusa ecuanaja huasijje poe jjima poanaje. <sup>18</sup> Beni quea quemo nee nee poeyanaje. Enashajo quea quemo anicuayanaje. <sup>19</sup> Quea huesha nee yo'ajjanaje enabae yiyesama neijo. Jomajo ecuaaya banaje Jesusa. Eyiyoje ena biajje jeojejebeje banaje. Jesusa ba majje ecuanaja quea ajjajja nee nee poanaje, oya eshahua poso anaje. <sup>20</sup> Jamajjeya Jesusa ecuanaja nijje jama poanaje ba'a: —¡A'a quea mete pojji! Eya ca ca iña iquio, eshahua pojjeama —poanaje.

<sup>21</sup> Jesosa shajja'ajja majje quea jaji nee po'yonaje ecuana. Bishe ai yasijje ani mee'yonaje. Jesosa ani'yajo, bishe ai bae ojje miji yasijje ba'eñaquinaje, Capenaoma huasijje. Jomajo cahuinaje ecuana.

*Ojjaña cuaa Jesosa sa'ajja canaje*

<sup>22</sup> Mecahuajje ojjaña cuana, ma Jesosaa bobia canaje cuana jjachichaqui o'oyanaje bae sahua huasijje. Jama ojee miminaje ba'a: —¿Achejo shai Jesosa? Oe bishe ejaanaje, de. Jamatii Jesosa o shajja'ajjaji cuana nijje besapoqui jjima, de, yaninaje eyiyojo tii —dejja cuaa acanaje. Ojjañaja ba jjima poanaje Jesosa ena biajje jeojeopoquije.

<sup>23</sup> Majoya pea bishe cuana Timenia cuiñajjijo ani poeyanaje. Ba'eñaquinaje bae sahuajo, jomajo yahuajo Jesosaa Eyacuiñajji bihuia majje quea huiso cuana bobia canaje. <sup>24</sup> Jamajjeya ojjaña cuana Jesosa, o shajja'ajjaji cuana pea'ai chama' ba majje bishe cuana huasijje anisohuaquinaje. Capenaoma huasijje besapoquinaje Jesosa sa'ajja'yohua.

*Jesosaa esohui huohui canaje pea cahuijo, eba'e tiitii mee'yojji*

<sup>25</sup> Ojje miji yasijje ba'eñaqui majje oya cuaa Jesosa ba canaje. Ba majje huohui'ajja canaje: —Esohui huohuijji, ¿ache shono acuae mi jiquiacua poeyanaje so'o ba'a? — poanaje.

<sup>26</sup> Jesosaa oya cuana saja'a canaje quea yeno jama ba'a: —Miquianaya ejo jjashahuabaqui ajja jama ba'a: “E'e, Jesosa ma dejjaja ba jjima acanaje; jamajjeya oya e'e jojo nei Eyacuiñajjija huoojea'yo ojjaña jaahuanajji”. Chojja, miquianaya jama ej-jashahuaba meequijji pojjeama. Bobijo ca ca miquianaaya eya sa'ajjaña, bobi quea huiso ijja majje quea jejje poanajeya jjejojo. <sup>27</sup> ¡A'a jjashahuaba tiitiiquijji bobijo, eba'ejjijo! Maya jjeya nei oe poani. Sho caje o'oya. ¡Ecuea esohuijo ca ca jjashahuabaquicue oe! —Jesosa poanaje—. Maya e'e jojo nei shajja'ajjajo, eyaya miya ba'e tiitii meeje'yo enijje eyajo. Ecuea esohui pea bobi jayojja, eba'e tiitii mee'yojji. E'e, eyaya ojjañaja Edoe Meseya ma pea bobi eba'e tiitii mee'yojji quiaje miquianaya, eya Eyacuiñajjija huoojea'yohua jjejojo. Eyacuiñajjiya ecue Chiya eya ma dejjaja ba jjima amee cani; pahui jjapana meequi canaje miquiana bobiajji. Jamajjeya miquea eba eya oja huoojea'yo ojjaña jaahuanajji —Jesosa poanaje.

<sup>28</sup> Majoya aje dejja cuaa Jesosa huohui'ajja canaje jama ba'a: —¿Achajja acuae ecuaa Eyacuiñajjija esohui jayojjaya aje'yo so'o? ¿Jamajjeya oya ecuana nijje quea bihui nee poaje'yo?

<sup>29</sup> Jesosaa oya cuana saja'a canaje jama ba'a: —E'e jojo nei jama acue ejo ba'a: “E'e Jesosa, miya Eyacuiñajjija huoojea'yo ojjaña jaahuanajji” jamaya acue. Jamajjeya Eyacuiñajji quea bihui nee poaje'yo miquianajo —Jesosa poanaje.

<sup>30</sup> —E'e pojja'a —Jodio cuaa huohui canaje—. Jamajjeya ¡miyaya Eyacuiñajjiya jayojja jama acue dejjaa ajjima acani! Jamajjeya ecuanaja eba poaje miya e'e jojo nei Eyacuiñajjija huoojea'yo ojjaña jaahuanajji. ¿Ae poaje miya? ¡Eyacuiñajji jayojja jama acue, Moisesiya aca poa jama oe acue! <sup>31</sup> E'e, yahuajo nei meshi jabojo Eyacuiñajjija esohui huohuijjiya Moisesiya esejaya etiiquiana bobi pahui jayojja quia ca poa ojjaña pojajajo. Yahuajo nei Eyacuiñajjiya Moisesi tehue mee ca poa jama ba'a: “Eyacuiñajjiya Moisesija bobi pahui sisi jayojja eyajo oque mee ca poa meshi yasijje etiiquianaja e'ijjajji” jamaya tehue ca poa —Jodio cuana poanaje.

<sup>32</sup> —Eyaya miya e'e nei huohuiaña —Jesosaa acanaje—, Moisesiya pojjeama etiiquiana quia canaje bobi. Ma eyajo aniya tii bobi oque mee canaje ecue Chiya. Ohuaya jjeya miquianaya quia cani pea bobi ma eyajo ani meshi yasijje poeyanaje. <sup>33</sup> E'e, jjeya nei Eyacuiñajjija bobi eyajo aninaje ohuaya huoojea cani ojjaña ba'e tiitii mee'yojji —Jesosa poanaje.

<sup>34</sup> —E'e, emeshi mese, ¡che ecuana jiquio bobi quiacue ojjaña pojajajo! —poanaje oya cuana.

<sup>35</sup> —Eya ca ca iña jiquio bobi jayojja tiiya Eyacuiñajjija huoojea'yo —Jesosa poanaje—, Eyacuiñajjija huoojea'yo ojjaña jaahuanajji, ojjaña ba'e tiitii mee'yojji pea'ai. Jamaya eya

poani. Bobi ijia majje miya quea yeno poaje o'oya, quea shoe po o'oya majje. Quea naba taja pea'ai poaje o'oya. Enijje ejjapeequi jjemo, e eshajja'ajja jojjemo pea'ai miquiana quea bihui tii po'yome, quea jeje tii jayojja nequi mee'yome —Jesosa poanaje—. <sup>36</sup> Eyaya miquianaya huohuiaña jama ba'a: Miquiaaya ecuea ma dejjaa ajjima acani quea huiso cuana banaje, pahui ecue pana ijjianajejo pea'ai. Jamatii jjashahuabaquiani jama ba'a: “Chojja, Jesosa Eyacuiñajjija huoojea'yo ojjaña jaahuanajji pojjeama, ojjaña ba'e tiitii mee'yojji pojjeama pea'ai” jamaya jjashahuabaquiani miquianaya, eya Quito pojjeama poso aña —Jesosa poanaje—. <sup>37</sup> Ojjaña joya ecue Chiiya ejo e'e nei jjashahuabaqui meesahua cani e que poeje'yo, enijje jjapeequije'yo tii. E que poeyajo, ecuea miquianaya cajaa yajji pojjeama. <sup>38</sup> E'e, eya eyajo ani ecue Chiiya meshi yasijje huoojea canaje. Jamajjeya eyaya ojaya ejjashahuabaqui'yojji jayojja jama aña, ecuea ejjashahuabaqui'yojji jama pojjeama —Jesosa poanaje—. <sup>39</sup> Ecue Chiiya eya niñeshe'a ca poa jama ba'a: “Ojjaña joya eyaya minijje jjapeequi meesahuaña equiyo'yojji pojjeama. ¡Ojjaña oe ba'e tiitii mee'yocue minijje! Quijje miya poe o'oya majje joya emano'yo cuana oe shequi mee o'oyacue, eba'e tiitii'yojji” jama eya niñeshe'ameya ecue Chiiya aca poa —Jesosa poanaje—. <sup>40</sup> E'e, ecue Chii jama sa poani ba'a: Ojjaña joya eya Eyacuiñajjija Bacua ba majje, enijje jjapeequiajo, eyaya oya ba'e tiitii meeje'yo enijje eyajo; joya emano'yo cuana jaa pea'ai shequi meeje o'oya quijje poe o'oya majje —Jesosa poanaje.

<sup>41</sup> Majoya Jodio cuaa Jesosajo niñeba canaje. E'e, Jesusaa yahuaajo jama acanaje ba'a: —Eya Eyacuiñajjija huoojea'yo ojjaña jaahuanajji eyajo yahuaajo ania poa. Ohuaya eya huoojea canaje meshi yasijje —acanaje yahuaajo. <sup>42</sup> Jamajjeya Jodio cuaa Jesosa Joseja bacua ejja poso acanaje: —¡De! Oya Joseja bacua ejja pojja'a jja coma. Oja chii, ojaya enaese pea'ai ecuanaja eba. ¿Yajjajje oya jama poani ba'a: “Eya yahuaajo eyajo ania poa; eyajo ani meshi yasijje huoojea canaje ecue Chiiya”? ¿Yajjajje shai jama poanaje oya?

Jodio cuana quea sapa ca'a jjejojo, Jesosa Joseja jeajo poso ojaya esohui shajja'ajja sa po'yo ajja.

<sup>43</sup> —¡A'a eya niñebajji! —Jesosa poanaje—. <sup>44</sup> Beca cuana jamatii enijje ejjapeequi'yojji pojjeama. Ecue Chiiya eya huoojea canaje. Joya ohuaya beca cuana ejo e'e jojo nei jjashahuabaqui meesahua cani enijje ejjapeequijji; oya cuana ca ca oe eyaya ba'e tiitii meeje'yo enijje poe o'oya majje. <sup>45</sup> E'e, Eyacuiñajjija esohui huohuijji cuana yahuaajo nei ba'eya jama tehueme aca poa ba'a:

“Eyacuiñajjiya ojjaña dejja cuana, epona cuana pea'ai oja sohui ba meesahua caje'yo”. Jamaya tehueme aca poa. Jamajjeya ojjaña joya ecue Chii shajja'ajjajji poaniya, oja sohui jama acaje'yo. Jamaya amajje enijje jjapeequije'yo pea'ai —Jesosa poanaje.

<sup>46</sup> —Jamatii ojjaña cuanaja Eyacuiñajji ba jjima ecojjaja. Eya Eyacuiñajji nijje, ecue Chii nijje ania poa. Jamajjeya eyaya, eyaye nei, oya baña ecojjaa —Jesosa poanaje—. <sup>47</sup> E'e jojo nei ojjaña joya ecue Chiiya enijje jjapeequi meeshahua cani eyaya ba'e tiitii meeje'yo enijje. <sup>48</sup> Miquiaaya bobi ijiaña eba'ejji. Jamajjeya eya bobi jayojjaya. Eyaya ecuea epeeji cuana ba'e tiitii meeje'yo. <sup>49</sup> ¡Bacue! Yahuaajo nei meshi jabojo Moisesiya miquianajaya etiiquiana bobi pahui sisi jayojja quia ca poa ojjaña pojjaajo; jamatii mano'ya poa ojjaña etiiquiana. <sup>50</sup> Eya miquiana nijje mimiani pea bobijo, ma Eyacuiñajji eyajo ania huoojea canaje meshi yasijje. Maya ijia majje ca ca mano'yo ajja tii tii poaje'yo. <sup>51</sup> Eya ca ca iña pahui jayojjaya, Eyacuiñajjija huoojea'yo. E'e, eya yahuaajo eyajo ani meshi yasijje poeyanaje dejja cuana ba'e tiitii mee'yohua. Jamajjeya jiquio ecua bobi ijia majje miquianaya ba'yani jayojja jama eyaya dejja cuana ba'e tiitii meeje'yo. Ojjaña joya enijje e'e jojo nei jjapeequiani ba'e tiitije'yo enijje eyajo. Eyaya ojjaña cuana enijje ba'e tiitii mee'yo sa aña. Jamajjeya eya manojje'yo ojjañaja mimishi cuijea mee'yojji. Jamajoya ecuea eyami ma pea pahui jayojja jama poani —Jesosa poanaje.

<sup>52</sup> —¡Chojja, de! —Jodio cuana ojee jjamimicuijaje nobiajeaquinaje—. ¿Yajja yajji ohuaya aje oe oja yami quia caje'yo bobi jayojja ecuanaja e'ijjiajji, de? —poanaje.

<sup>53</sup> —Eyaya miya e'e jojo nei huohuiaña —Jesosa poanaje—. ¡Shajja'ajjacue! Miquiaaya ecue sohui mi shajja'ajjajo, enijje mi jjapeequiajo pea'ai, enijje eba'e tiitii mee'yojji



pojjeama. Ecue sohui shajja'ajjañaajo, ecue yami ijjaña jama jayojja poani; enijje jjapeequianijo, ecuea ena' ishiaña jama jayojja poani pea'ai. ¡Jamaya pocue, ecuea epeeji poanijo! <sup>54</sup> Jamajjeya ecue sohui shajja'ajjaji cuana, ecuea epeeji nei nei cuana eyaya ba'e tiitii meeña; poe o'oya majje joya emano'yo cuana jaa pea'ai shequi meeje o'oya. <sup>55</sup> —¡Bacue! —Jesosa poanaje—. Miquiaaya bobi ijjaña quea bihui nee eba'eji. Jamaya eya manojeyo miquiana quea bihui nee eba'e tiitii mee'yojji. Miquiaaya ena oshe ishiaña naba taja'ama epojji. Jamaya ecuea ena' cuayaquije'yo miquiana quea bojea po meeji, cuaqui yasijje epoquiji pojjeama, enijje jjapee neineiquianijo —Jesosa poanaje.

<sup>56</sup> —E'e —Jesosa poanaje—, jiquio ecua miquianaya quea jette po majje quea bei nee poani jama jayojja eya miquiana cuanajo mano'yajo, miquianaya quea bei nee poaje'yo. Ecuea ecue ena' cuayaquije'yo miquianaja mimishi cuijea'yojji, miquiana quea bei nee po mee'yojji. Jiquio ecua ena' ishi majje quea bei poani jayojja jama quea bei nee poaje enijje jjapeequi majje. Jamajjeya joya e shajja'ajja neineiji poani enijje jjapeequiani; eya onijje jjapeequiani pea'ai. <sup>57</sup> E'e, Eyacuiñajji enequi tii eshe, ecue Chii e huooejaji epo. Eya ecue Chiija ejjashahuabaqui'yojji jayojja jama poanijo, ohuaya eya ba'e tiitii mee cani. Jamajjeya ojjaña joya enijje e'e jojo nei jjapeequiani eyaya ba'e tiitii meeje'yo enijje —Jesosa poanaje—. <sup>58-59</sup> Etiiquiana yahuajo nei nei bobi Moisesija quia ijja majje jamatii mano'ya poa. Eya ca ca iña jiquio pea pahui jayojja; eya eyajo ania poa, ecue Chiiya meshi yasijje huoojea canaje. Jamajjeya ojjaña joya enijje e'e jojo nei jjapeequiani eyaya ba'e tiitii meeje'yo enijje eyajo —jamaya Jesusaa Jodio cuana sohuihuohui canaje Capenaomajo, Jodioja equi ojee ejjachichaquijji.

*Jesosa huohui ca o'oyanaje esohui eba'e tiitii'yojji*

<sup>60</sup> Jesusaja esohui Capenaomajo shajja'ajja majje quea huiso dejja cuana ojee jjaniñebaquinaje jama ba'a: —¡De! Jesusaja esohui quea tai nee nee, de; shajja'ajja maja sa po'yo ajja iña, ohua oja eyami e'ijja mee ca —poanaje Jodio cuana.

<sup>61</sup> Onajaya ejjashahuabaquiji Jesusaja eba poanaje. Jamajjeya quea huiso cuana oja esohuijo jjaniñebaquianijo, Jesusaa huohui canaje jama ba'a: —Ecuea esohuijo ¿a'a miquiana quea tai jjashahuabaquiani? ¿A'a mi enijje jjapeequi pajaje'yo? <sup>62</sup> Quijje eya ojjañaja Edoe Mese, ma yahuajo eyajo ania poa, jjequisohua caje o'oya iña eyahuasijje; jiquio meshijo enequi tiijji pojjeama iña. Jamajjeya aje mi oe ¿yajja jjashahuabaqui'yome acuae mi poaje'yo e jjequisohua ca'yajo? —Jesosa poanaje—. <sup>63</sup> Eyacuiñajjija Edojjoshahua Pameya pea ejjashahuabaquiji ba mee cani yahuajo jama pojjeama. Miquianaya ca ca jjashahuabaquiani bobijo, jiquio meshijo eba'eji. Jamajjeya miya ba'e tiitii mee ajja enijje. Eyaya ca ca huohuiana Eyacuiñajjija ejjashahuabaquiji. Maaya miquianaya ba'e tiitii mee caje'yo, Eyacuiñajjija esohuijo jjashajja'ajjaquianijo. <sup>64</sup> Jamatii miquianaya quea huiso ejo jama poani ba'a: “Mi shajja'ajja sa po'yo ajja iña; minijje jjapeequi sa po'yo ajja iña” miquianaya poani —Jesosa poanaje.

E'e, yahuajo nei Jesusaja eba poa jama ba'a: “Quijje ecuea epeeji nishohua pea cuana eya iña meesahua caje'yo onaja equecua'yojji. Quijje quea huiso cuana enijje jjapeequi ajja poaje”. Jamaya Jesusaja eba. <sup>65</sup> Jamajjeya Jesusa jama poanaje pea'ai ba'a: —Jamajjeya eyaya miquianaya yahuajo huohuinaje jama ba'a: “Beca cuana jamatii enijje ejjapeequi'yojji pojjeama. Beca cuana joya ecue Chiiya ejo e'e jojo nei jjashahuabaqui mee cani ca ca oe enijje jjapeequije'yo” eyaya yahuajo miquianaya anaje —Jesosa poanaje.

<sup>66</sup> Majoya ma esohui shajja'ajja majje quea huiso dejja cuana Jesusa nijje poqui pajaje'yonaje, o shajja'ajjaji nisho cuana. <sup>67</sup> Jamajjeya Jesusaa ecua, o shajja'ajjaji nei, 12 cuana huohui'ajja canaje: —¿Ae poaje miquianaya? ¿A'a miya pea'ai enijje jjapeequi sa po'yo ajja poaje? —Jesosa poanaje.

<sup>68</sup> —Ecuea Emeshi Mese —Simohui Penohua Jesusa saja'a canaje—, chama' pea mi jayojja. Miyaya ca ca oe esohui e'e jojo nei huohuiana. Mi shajja'ajjaji caya ca oe ba'e tiitii meeje'yo minijje tii. <sup>69</sup> Ecuana minijje e'e jojo nei jjapeequinaje. Ecuana eba miya

e'e jojo nei oya Eyacuiñajjija huoojea'yo ojjaña jaahuanajji quea pame nee nee —poanaje Peno.

<sup>70</sup> —E'e —Jesosa poanaje—. Eyaya miquianaya, 12 cuana babaca'yo majje iyaanaje; jamatii oe dejja minijje nequi ecuea epeeji nisho; oya eshahuaja epeeji poani —Jesosa poanaje.

<sup>71</sup> Jesosa jjashahuabaquiani Jodasajo, ma Simohui Isicanioteja bacua ejjajo. E'e, Jodasa Jesosa shajja'ajjaji 12 cuana nijje nequinaje. Jamatii quijje Jodasaa Jodio etii cuana Jesosa iña meeshahua canaje bejjo sosejje, onaja quecua'yojji.

## 7

### *Jesosaja echahua mese cuana o shajja'ajjaji pojjeama poanaje*

<sup>1</sup> Majoya Jesosaa esohui huohui canananaje Janinea meshijo, Jodea meshijo pojjeama. Jodea meshijo Jodio etii cuaa equecua ca poaje jjejojya mi poqui o'oyanaje.

<sup>2</sup> Quijje pishana ojjaña Jodio dejja cuana Jenosanena huasijje poqui o'oyanaje equi sisi iyaa, ojee quea bihui nee ijia'ijjiaa bobi cuana chichajji shejo. <sup>3</sup> Jamajjeya Jesosaja echahua mese cuana onijje jama poanaje ba'a: —¡A'a jja oe jiquiojo Janinea meshijo tii ani tiitijji! ¡Ecuana nijje Jodea meshi yasijje poqui o'oyacue! ¡Jocuama aje oe miyaya ma dejjaa ajjima acani aquicue, ojjaña mi shajja'ajjaji cuanaja ebajji! <sup>4</sup> ¡A'a quehuajje ajji cuiñajji sisijo! Jamaya po ajja cuana. ¡Jenosanenajo aquicue oe, ojjañaja ebajji! E'e, jjeya jomajo ojjaña dejja cuana jjachichaquiani —poanaje.

<sup>5</sup> Jamaya huohui canaje oja chahua cuaa, Jesosa ba'yo jjimahuajo, oya Eyacuiñajjija huoojea'yo ojjaña jaahuanajji pojjeama poso acanaje. <sup>6</sup> Jamajjeya Jesosaa oja chahua cuana huohui canaje jama ba'a: —Chojja, eya Jenosanena huasijje poqui o'oya jjima so'o. Eya jjeya miquiana nijje epoqui jojjemo ojjaña cuaa eya shajja'ajja jjima acame. Jamatii, ¡miquianaya poqui'yo sa po majje poqui'yocue! Jomajo dejja cuana mijo jjashahuabaqui ajja. <sup>7</sup> Miquianaya ojjaña dejja jayojja jama jjashahuabaquianijo, mi quecua sa po ajja cuana. Eyaya ca ca onaya jama anaje ba'a: “Miquianaya ojjaña quea mimishi poanijo, Eyacuiñajjija esohui jama po ajja” poanaje. Jamajjeya ojjaña ejo quea quene poani; quecua sa acani. <sup>8</sup> ¡Jamajjeya miquianaya jjeya Jenosanena huasijje poquicue quea cahui huiso ojee ijia'ijjiaa! Eya ca ca iña jjeya epoqui'yojji pojjeama. E'e, jjeya nei miquiana nijje poqui'yajo eya shajja'ajja jjima acame cuaa —Jesosa poanaje.

<sup>9</sup> Jamaya huohui majje Jesosa Janinea meshijo aninaje so'o.

### *Jesosa Jenosanena huasijje poquinaje bobi chichajji shejo*

<sup>10</sup> Jamatii oja chahua cuana Jenosanena huasijje poqui'yajo, quijje pishana Jesosa pea'ai poquinaje. Ojjaña pea Jodio dejja cuana nijje pojjeama poquinaje; quehuajje Jenosanena huasijje poquinaje oe nei. <sup>11</sup> Ojee ijia'ijjiaa jjachichaqui majje Jodio etii cuana Jesosaja epoe'yojji ishoa canaje quea quene. Huohui'ajja huicha'a huicha'a canaje jama ba'a: —¿Aecue Jesosa? ¿A'a cuae oya poeyanaje so'o? —acanaje.

<sup>12</sup> Ojjaña cuana echicha'yo pea echicha'yo cuana nijje jjapashineijje maimai aninaje Jesosajo jama ba'a: —Oya quea pame nee nee Jesosa. Siajjepejji pojjeama —beca cuana poanaje.

—Chojja —pea poanaje—, ojjaña cuana se ca dasia cani Jesosaa. E'e, oya Jesosa siajje poani jama ba'a: “Eya ca ca iña Eyacuiñajjija huoojea'yo ojjaña jaahuanajji” poani —pea Jodio cuaa acanaje, Jesosaja esohui shajja'ajja sa po ajja jjejojo. <sup>13</sup> Jamatii Jodio etii cuanajo quea mete jjejojo joya Jesosa shajja'ajjaji epo mi mimi neineinaje; jjapashineijje ojo maimainaje. <sup>14</sup> Jenosanenajo Jodio cuana ojee ijia'ijjiani quea bihui nee quea huiso cahuime, 7 cahuime. Ojee ijia'ijjiani quijje pishana beca cahuime po majje Jesosa Eyacuiñajjija equi yasijje poquinaje. Equi shashajo ojjaña cuana sohuihuohui canaje. <sup>15</sup> Jesosaja esohui shajja'ajja majje Jodio etii cuana jama poanaje ba'a: —¡De! Ojaya eba quea huiso. ¿Achajja shai? Chama' ojaya esohui huohuijji poanaje. Esho'yahua oya dobiqui jjima de, esohui baa.

<sup>16</sup> Jesosaa oya cuana saja'a canaje jama ba'a: —Eyaya huohuiaña miqúanaya ecuea esohui pojjeama. Eyacuiñajjiya eya huoojea canaje. Ohuaya eya huohui meesahua cani ojaya ejjashahuabaquijji. <sup>17</sup> Ojjaña joya Eyacuiñajjiya ejjashahuabaquijji jayojja jama ba'e'yo sa poaniya ba caje e'e jojo nei eyaya huohuiaña Eyacuiñajjiya ejjashahuabaquijji, ecuea ejjashahuabaquijji pojjeama. <sup>18</sup> Joya beca cuaa ojaya ejjashahuabaquijji huohui cani aje oe pea cuana quea bihui po meejji jama ba'a: “Oya esohui huohuijji nei; joya shajja'ajjacue!” Jamaya amee sa acani, pea esohui huohuijji cuaa. Pea jayojja jama pojjeama eya. Eyaya ca ca pea cuana bihuia mee sa ña ca ca, ecue Chii, e huoojea'yojji epo oja sohui e'e nei huohuiañajo. Jamajjeya eya edasajji pojjeama. <sup>19</sup> ¡Bacue! Yahuajo nei Moisesiya miqúanajaya etiiquiana cuana huasijje quia ca'ya poa Eyacuiñajjiya esohui etehue'yo, miqúanajaya ebajji. Jamatii ma esohui etehue'yo jama ba'e ajja miqúanaya. Moisesija etehue'yo jayojja jama eba'e'yo jojjemo e quecua'yo sa po ajja pome —Jesosa poanaje.

<sup>20</sup> Ojjaña Jodio cuaa echicha'yo nequiya huohui canaje jama ba'a: —¿Aya acuae mi quecua'yo sa acani so'o? ¡Chojja, de, miya niñepoquiani pojja'a jja mi coma! Mi quecua sa po'yo ajja ecuanaya —sajje poanaje cuana.

<sup>21</sup> Jesosaa oya cuana saja'a canaje jama ba'a: —Yahuajo eyaya ma dejjaa ajjima acani anaje miquea epojja ejomishocajji; oe dejja jeo'ajja poa. Eyaya oya jeo mee'yonaje. Jamajjeya miqúanaya ejo jama poanaje ba'a: “Ohuaya aje oe epojja ejomishocajji acani; equipajaajji dojo mee cani pea'ai. Jamaya quea tai. Jamaya pojjeama etiiquianaja ehuhui'yo” miqúanaya poanaje. <sup>22</sup> ¡Bacue! Yahuajo nei nei ba'e etiiquiana aca poa jayojja jama Moisesiya huohui ca poa jama ba'a: “¡Mique bacua huo'o nei, eshoi nei cuiishasha biso nei jehusejjajecue!” aca poa. Jamajjeya miquiaaaya ebacua 8 cahuime poajo cuiishasha biso nei jehusejjajeaña, jamatii epojja ejomishocajji. <sup>23</sup> Jamajjeya Moisesija etehue'yo jama poanijojo miqúanajaya ebacua cuiishasha biso nei jehusejjajeaña epojja ejomishocajji. E'e, miqúanaya pea'ai epojja ejomishocajji chacoaña. Jamajoya ¿apiojji acuae quiana enijje quea quene nee nee poani so'o dejja jeo'ajja jeo mee'yonaje epojja ejomishocajji? <sup>24</sup> ¡A'a nequiaa eya niñepoqui poso ajji! Quea ja'a nee nee jjashahuabaqui majje miquea ehuhui ejo e'e jojo nei poaje, quea pame —Jesosa poanaje Eyacuiñajjiya equi pejejo nequiya sohuihuohui canijo.

*Jesosa e'e jojo nei Eyacuiñajjiya huoojea'yo ojjaña jaahuanajji*

<sup>25</sup> Majoya quea huiso dejja cuana Jenosanenajo ba'eca ojee miminaje jama ba'a: —Jodio etii cuaa jiquio dejja quecua sa acani. ¿A'a e'e? <sup>26</sup> ¡Bacue oe! Jjeya ohuaya ojjaña cuana sohuihuohui caqui. Jamatii oya ña jjima, mimi pajea mee jjima pea'ai, de. ¿E'e pojja'a etii cuana jjashahuabaquiani che jama ba'a: “E'e pojja'a oya Jesosa e'e jojo nei Eyacuiñajjiya huoojea'yo ojjaña jaahuanajji”. E'e pojja'a, de. <sup>27</sup> ¡De! Ecuanaja eba jiquio dejjaja ba'ejji; Quito poeyajo ca ca ojaya eba'ejji ba jjima poaje cuanaja —poanaje cuana, Jesosa Nasanenajo cuaya poso aca poa.

<sup>28</sup> Majoya Jesosaa Eyacuiñajjiya equi pejejo sohuihuohui huicha'a huicha'a canijo, oya cuana janobajjima nei saja'a canaje: —E'e, eya miquiaaaya eba poso ña. Ecuea eba'ejji miquiaaaya eba pea'ai poso ña. Eya miqúanaya que jamatii poe jjima. Chojja, ecue Chiiya eya huoojea canaje. Ojaya esohui e'e nei. Oya miqúanajaya ba jjima, de. <sup>29</sup> Eya onijje ania poa; ohuaya eya huoojea canaje. Jamajjeya oya ecuea eba nei —Jesosa poanaje.

<sup>30</sup> Ma shajja'ajja majje Jodio etii cuana oya Jesosa Eyacuiñajjiya Bacua Ejja pojjeama poso acanijo quea quene nee nee poanaje, ña sa acanaje. Jamatii ña jjima, jjeya ña mee jjima acanaje. <sup>31</sup> Quea huiso dejja ejjachichaqui nequi'yo cuana jjashahuabaquiani jama ba'a: —Jesosa e'e jojo nei Eyacuiñajjiya huoojea'yo ojjaña jaahuana'yojji.

Jama poanaje pea'ai ba'a: —E'e nei Jesosa Eyacuiñajjiya huoojea'yo ojjaña jaahuanajji. Chama' pea dejja Jesosa jayojja epoe o'oyajji; ma dejjaa ajjima acani quea huiso acanaje ohuaye nei —poanaje cuana.

*Paniseo cuaa sohuihuohui huoojea canaje Jesosa ña nisho*

<sup>32</sup> Paniseohua shajja'ajja canaje quea huiso dejja cuana jama poani ba'a: "Jesosa Eyacuiñajjija huoojea'yo ojjaña jaahuanajji". Ma shajja'ajja majje Paniseo etii cuaa, Eyacuiñajji nijje emimijji etii cuaa pea'ai Jodio sohuinano cuana huoojea canaje jama ba'a: —¡Jesosa iñaquicue ejeanobiajji! —acanaje. Ma Jodio sohuinano Eyacuiñajjija equi cuiñajji poani.

<sup>33</sup> Majoya Jesusaa jama sohuihuoime acanaje ba'a: —Eya minijje nequi tiitii ajja. Ecue Chiiya eya huoojea ca poa. Quijje pishana eya poquije o'oya o que. <sup>34</sup> Majoya eya sa'ajjaje'yo; jamatii eya miquianajaya eba'yojji pojjeama. Poqui meemee ajja enijje e ba'e yasijje —Jesosa poanaje.

<sup>35</sup> —¿Achacua shai oya poquije'yo, jocuama ecuana epoqui'yojji pojjeama pojja'a? ¿A'a oya pojja'a poquije Jieno dejja cuana huasijje, Jodio cuana Jieno nijje ba'e cuana jjaba'echejjequiani yasijje poquije pojja'a, ojaya esohui huohuiya? —Jodio cuana ojee mimimiminaje Jesusajo.

<sup>36</sup> —¿Ajeo shai Jesosa jama jjashahuabaquiani? —poanaje Jodio cuana—. "Miquiaaya eya sa'ajjaje'yo; jamatii miquianajaya eya eba'yojji pojjeama. Poqui meemee ajja ma e ba'e yasijje enijje" Jesosa poanaje, de —Jodio cuana poanaje.

<sup>37</sup> Jenosanenajo Jodio cuana ojee ijia'ijjianaje quea huiso cahuime, 7 cahuime bobi chichajji shejo. Ma pojja cuanajo quea bihui nee poanaje, yahuajo ijia'ijjia jjimahuajo quea bihui pishana poa. Beshahua nei ijia'ijjia pajea'yanijo, quea bihui nee nee poa. Jamajjeya beshahua nei ojee ijia'ijjia pajea'yanijo Eyacuiñajjija equi pejeje Jesosa que jjachichaqui o'oyanaje. Jesosa taaanaje ojjaña huasijje jama ba'a: —¡Ojjaña miquianaya quea naba taja jayojja poanijo, poecue e que, ecuea e'ishijji ishiya! Enijje jjapeequi sa neinei poanijo quea naba taja jayojja jama poani; jamajjeya eyaya miquianaya ba'e tiitii meje'yo ecuea esohui e'e jojo nei shajja'ajjañajo. <sup>38</sup> Jiquio ecua ena eteohuejja cuayani tii tii jayojjaya, ojjaña ishi majje naba taja'ama poani jayojja jama ojjaña joya enijje jjapeequiani eyaya ba'e tiitii meje'yo. Majoya oya cuaa pea cuana enijje jjapeequi meesahua caje'yo pea'ai —Jesosa poanaje.

<sup>39</sup> Jesosa jjashahuabaquiani jama ba'a: —Edojjoshahua Pame poeje'yo. Dobiquije'yo ecuea epeeji cuana huasijje. Enijje jjapeequi meesahua caje'yo quea pame nee; jiquio ecua ena caneco cuatajea cani jama jayojja quea cuata poaje Edojjoshahua Pame dobiquiajo.

Jesosa jamaya poanaje Edojjoshahua Pame ojaya epeeji cuana huasijje dobiqui jjimahuajo. Quijje Jesosa emano'yojaa shequi o'oya majje eyahuasijje jjequisohua ca'yajo, ohuaya Edojjoshahua Pame huoojea caje ojaya epeeji cuana huasijje.

<sup>40</sup> Jesusaja esohui shajja'ajja majje quea huiso cuana jama poanaje ba'a: —E'e jojo nei Jesosa Eyacuiñajjija esohui huohuijji nei. Yahuajo nei Moisesiya tehue ca poa jama ba'a: "Oya poeje Eyacuiñajjija huoojea'yo ojjaña jaahuanajji poe jjimahuajo" tehue ca poa —poanaje cuana; Jesosa esohui huohuijji poso acanaje, Eyacuiñajjija huoojea'yo ojjaña jaahuanajji pojjeama poso acanaje beca cuaa.

<sup>41</sup> Pea cuana ca ca jama poanaje ba'a: —Chojja. ¡Oya ca ca oe Eyacuiñajjija huoojea'yo ojjaña jaahuanajji e'e jojo nei, de!

Jamatii pea cuana poanaje: —Chojja, Jesosa Janinea meshijo ba'e. Eyacuiñajjija huoojea'yo ojjaña jaahuanajji ca ca Janinea meshijo pojjeama cuayaje —acanaje cuaa, Jesosa Janinea meshijo Nasanenajo cuaya poso.

<sup>42</sup> —Eyacuiñajjija esohui etehue'yo yahuajo jama poani ba'a: "Dabi emeshi mese yahuajo ba'ya poa Eyacuiñajjija huoojea'yo ojjaña jaahuanajji emeshi mese ojaya osecua poaje. Jamajjeya Dabija meshijo cuayaje, Benenajo, Jodea meshijo" —poanaje beca cuana.

<sup>43</sup> Jamaya ojjaña Jodio dejja cuaa mimiciajeanobia canaje Jesusajo. <sup>44</sup> Beca cuaa Jesosa iña mee sa acanaje; jamatii jja'iña meequi jjima poanaje.

<sup>45</sup> Jamajjeya sohuinano cuana, Eyacuiñajjija equi cuiñajji, ma Paniseohua yahuajo huoojea canaje Jesosa iña nisho Jesosa esohui huohui poequi baqui majje huacuaya

poqui'yonaje Eyacuiñajji nijje emimijji etii yasijje, Paniseo cuana pea'ai yasijje. Poeyajo, Sohuinano cuana tecuea canaje Jodio cuaa: —¿Apiojji acuae quianaja Jesosa iña jjima so'o? Ye jjima, de —poanaje.

<sup>46</sup>—Chama' pea dejja Jesosa jayojja jama mimime. Pea dejja o jayojja mimi jjima; ojaya esohui quea pame nee nee, de —sohuinanohua saja'ame acanaje.

<sup>47</sup>—¡De! Ohuaya aje mi oe dasia canaje pea'ai —sohuinano tecueame acanaje Paniseo cuaa—. <sup>48</sup> ¿A'a Jodio etii cuana, ecuana pea'ai onijje jjapeequiani? ¿A'a oya shajja'ajjaña pea'ai ecuaa? Chojja, de —Paniseo cuaa acanaje—. <sup>49</sup> Ojjaña jiquio dejja echicha'yo nequi ca ca Moisesija etehue'yo ba jjimajo, oya cuana Eyacuiñajjiya quea nee nee po mee caje'yo cuaquijo —acanaje Paniseo cuaa, jjashahuaba taiquianiya jjejojo.

<sup>50</sup> Nicodemo, ma yahuajo Jesosa nijje miminaje mecajje Paniseo cuana nijje pea'ai nequinaje. Jamajjeya ohuaya pea Paniseo cuana jama huohui'ajjame acanaje ba'a: <sup>51</sup> —¡Bacuel! Moisesija esohui etehue'yo yahuajo jiquio jama poanaje ba'a: “¡Oe dejja niñeba jjimahuajo, oya iyaacue! Ohuaya huohui cajje, majoya miquianaaya baje'yo oya quea mimishi pojja'a, oya mimishi'ama pojja'a”. ¿A'a e'e? —poanaje Nicodemo.

<sup>52</sup> Paniseo cuaa jja oya saja'a canaje. Quea mimi tecue poanaje jama ba'a: —¿A'a miya pea'ai Janinea dejja, Janinea meshijo ba'e pea'ai? ¡Eyacuiñajjiya esohui ba neineicue! Chama' poaje Eyacuiñajjiya esohui huohuijji Janinea meshijo ba'ecaja, pa —poanaje Paniseo cuana.

<sup>53</sup> Majoya, siniajo ijja'ijja pajea majje ojjaña cuana poquinaje equi cuana huasijje cahuiya.

## 8

<sup>1</sup> Jesosa ca ca eyiyo bajjani Onimo eyiyo huasijje poquinaje. Jomajo aninaje jiquio mecajje.

### *Jodio cuaa epona quea mimishi Jesosa que ye canaje*

<sup>2</sup> Mecajjehua Jesosa poe o'oyanaje Eyacuiñajjiya equi yasijje. Quea huiso nee nee cuana o que jjachichaqui o'oyanaje. Eyacuiñajjiya equi pejjejo anioque majje Jesosaa sohuihuohui ca o'oyanaje ojjaña cuana huasijje. <sup>3</sup> Majoya Paniseo cuaa, Moisesija etehue'yo huohuijji cuaa pea'ai epona quea mimishi ye canaje. Pea cuaa oya ba canaje pea dejja oja yahue pojjeama nijje jaa, pa. Jamajjeya Paniseo cuaa huohui canaje epona jama ba'a: —¡Jesosa nequi cojja nei nequicue!

<sup>4</sup> Majoya Paniseo cuaa Jesosa huohui canaje jama ba'a: —Esohui huohuijji, jiquio epona quea mimishi nee poanaje. Pea dejja oja yahue pojjeama nijje jaanaje —acanaje cuaa—. <sup>5</sup> Moisesiya yahuajo nei jama tehueme aca poa ba'a: “¡Epona pea dejja oja yahue pojjeama nijje jaajo, jajahuejjajecue meiya!” tehueme aca poa yahuajo nei. Jamajjeya, Jesosa, ¿yajja acuae miyaya epona aje so'o? —poanaje Paniseo cuana Moisesija etehue'yo jayojja ohua mi saja'a cajje Jesosa e'iña'yojji nisho jjashahuabaquinaje. <sup>6</sup> E'e, jjashahuabaquinaje jama ba'a: —E'e pojja'a Jesosa Moisesija etehue'yo jayojja jama pojjeama mimije. Jamajjeya ecuana jama poaje: “Oya Jesosa ca ca oma siajjepojji; Moisesija esohui jayojja jama po ajja”.

Jamatii Jesosaa oya cuana saja'a jjima acanaje. Meshi pohuijo tehue canaje eme sisiya.

<sup>7</sup> Paniseo cuaa eponajo huohui majamaja'ajja canaje. Jamajjeya Jesosaa Paniseo cuana cojja ba jeyojeyo neinei majje saja'a canaje jama ba'a: —¡Miquianaaya joya mimishi'ama nei neiya ebionei mei jea coocue, jajahuejjajecue pona! —poanaje.

<sup>8</sup> Mimi majje Jesosaa meshi pohuijo tehue ca o'oyanaje. <sup>9</sup> Jesosaja esohui shajja'ajja majje Jodio dejja cuana oe cuayaqui, oe cuayaqui'yonaje esecue yasijje. Ebionei edejja tii ehui dojojji cuayaqui'ya poa; o quishishijji joya etii pishana cuayaquinaje pea'ai. Quea bicho ojjaña poanaje quea mimishi jjejojo. Epona jeana ca'yonaje Jesosa cojja neijo nequi.

<sup>10</sup> Jamajjeya Jesosaa nequisohua majje bajea canaje epona nequi; chama' Jodio etii cuana. Epona nijje jama poanaje ba'a: —Epona, ¿ae acuae ma mi tecueajji epo? ¿A'a mi mique mimishijo jajahuejjajaja'ajja ca'yonaje cuaa? —ba majje acanaje Jesosaa.

<sup>11</sup> —Esohui huohuijji, jaja'yo jjima mo Jodio etii cuanaja. Poquinaje oya cuana ojjaña —poanaje epona.

—E'e epona, ecuea miya ejajahuejjajeajji pojjeama pea'ai. ¡Poquicue miya; mimishi pajea'yocue! —Jesosa poanaje epona nijje.

Majoya epona poquinaje quea bihui nee.

*Jesosaa ojjaña cuana Eyacuiñajji ba mee caje*

<sup>12</sup> Majoya epona nijje mimi majje Jesosaa sohuihuohui ca o'oyanaje ojjaña ej-jachichaqui anica huasijje. Jama poanaje ba'a: —Jamatii quea apo nee neeya, cuaquijjiya jeaja'a cani mecajje. Oya jayojjaya eya poani. Eyaya dejja cuana jamatii quea mimishi nee nee poa quea ja'a nee jjashahuabaqui meeaña Eyacuiñajji. Ojjaña joya ejo e'e jojo nei jjashahuabaquiani aje oe quea mimishi, quea apo pea'ai ba'e maja ajja. Eyaya oya cuana ba'e tiitii meeje'yo enijje —Jesosa poanaje.

<sup>13</sup> Jamajjeya pea Paniseo cuana Jesosa nijje mimijajinaje jama ba'a: —¡De! Miyaya neiya huohuiaña jama ba'a: “Eyaya dejja cuana ba'e tiitii meeje'yo” poani. Miyaye nei jama huohuiañajo, ecuanaja miya eshajja'ajajji pojjeama. Chojja, de. Moisesiya yahuajo nei jama huohui ca poa ba'a: “¡A'a oe dejjaja ehuohui shajja'ajajji! ¡Becanejjijji pea'aiya huohui canijo oe shajja'ajjacue!” poa —poanaje Paniseo cuana.

<sup>14</sup> Jesosaa oya cuana acanaje jama ba'a: —E'e, eya neiya poanaje eyaya ecuea epeeji cuana ba'e tiitii meeaña. Jamaya e'e jojo nei eyaya aña. Ecuea eba ecue Chii e huoojeajji epo. ¿Achacua eya poquije o'oya? Ecuea eba, de. Jamatii miquianajaya maya ba jjima. Jamajjeya ¡ecuea ehuohui ejo shajja'ajjacue! ¡Jamatii eyaye nei huohuiañajo shajja'ajjacue!

<sup>15</sup> Dejja mimishi cuanaja ejjashahuabaquijji jama miquianaya ejo jjashahuabaquiani, quea quehua. Eya ca ca mi jayojja jama pojjeama. <sup>16</sup> Jamatii eyaya dejja cuanaja eba'eji huohuiañajo, ecuea ehuohui'yo e'e nei poani. E'e, ecue Chiiya eya huoojea canaje. Ojaya ehuohui jayojja jama eyaya aña, ecuea ejjashahuabaquijji pojjeama. Eya ecue Chii nijje beca. Jamajjeya ecuanaja ehuohui'yo dejja cuanajo e'e nei nei poani.

<sup>17</sup> Miquianajaya etiiquianaja Moisesija etehue'yo jama yahuajo poa ba'a: “Becanejjijji pea'aiya oya jayojjaya huohui cajo ¡shajja'ajjacue, miquianaaya!” jamaya tehue ca poa.

<sup>18</sup> Eyaya miya huohuiaña jama ba'a: Eyaya Eyacuiñajji huoojea'yo ojjaña jaahuanajjiya ecuea epeeji cuana ba'e tiitii meeje'yo. Ecue Chiiya pea'ai jama miya ba meesahua cani ba'a: “Jesosa ecue huoojea'yo” ecue Chii poani —Jesosa poanaje.

<sup>19</sup> Jamajjeya Paniseo cuaa Jesosa huohui'ajja canaje jama ba'a: —¿Achejo acuae mique Chii ani so'o?

Jesosaa saja'a canaje jama ba'a: —Miquianajaya eya ba'yo jjima; ecue Chii miquiana-jaya ba'yo jjima pea'ai. E'e, eya miquianajaya eba jojjemo ecue Chii pea'ai bame.

<sup>20</sup> Jamaya Jesosaa sohuihuohui canaje Eyacuiñajji equi pejeje nequiya, Jodio etii cuana ojee chacochoani pejeje. Jamatii Jodio etii cuana Jesosaja esohui shajja'ajja majje iña jjima poanaje jja'iña meequi ajjajojo.

*Jesosaa Jodio shajjama' cuana tecuea canaje*

<sup>21</sup> Majoya Jesosaa ojjaña cuana huohui canaje jama ba'a: —Eya minijje nequi tii ajja; quijje pishana eya poquije o'oya. Quijje miquianaaya eya sa'ajja neineije'yo miquea mimishi cuijea'yojji, mi jaahuanajji pea'ai. Jamatii miquianaya quea mimishi tii manojeyojo, quea nee nee poaje'yo cuaquijo. Ma e poqui yani yasijje miquianaya epoquijji pojjeama —Jesosa poanaje.

<sup>22</sup> Jamajjeya Jodio etii cuana ojee huohui'ajja canaje jama ba'a: —¿Yajjajje oya poquije? ¿A'a oya jayacuaqui'yo majje mano'yo sa poani pojja'a? ¿A'a jamajjeya ohuaya jama acanaje ba'a: “Ma e poqui yani yasijje miquianaya epoquijji pojjeama?” —acanaje Jodio etii cuaa.

<sup>23</sup> Jesosa jama poanaje ba'a: —Miquianaya meshijo ba'e. Jamajjeya Edosiquiana jayojja jjashahuabaquime poani, quea tai. Eya ca ca iña eyajo ba'e, Eyacuiñajji jayojja jama eya jjashahuabaquiani. <sup>24</sup> Jamajjeya eyaya miya huohuinaje jama ba'a: “Miquianaya quea mimishi tii manojeyojo, quea nee nee tii poaje'yo cuaquijo”. Eyaya miquianaya

huohuinaje eya Eyacuiñajjija huoojea'yo ojjaña jaahuanajji. Jamatii miqianaya jjasha-jja'ajjaqui ajja. Jamajjeya miqianaya e'e jojo nei manoje'yo mimishi cuijea'yo jjima tii. Quea nee nee poaje'yo tii tii cuaquijo —Jesosa poanaje.

<sup>25</sup> —E'e pojja'a —Jodio etii cuana poanaje. ¿Aya acuae mi huoojea canaje so'o ecuana que? ¿Ajeo miya poeyanaje jiquiacua? —Jodio cuana poanaje.

—¡De! Aje jja mi huohui huicha'a huicha'a'ajjanaje yahuajo ehuohui coojji —Jesosa poanaje—. <sup>26</sup> Miqianaya ecuea eba quea jjashahuabaqui tai, quea mimishi poani —Jesosaa Jodio cuana acanaje—. Jamajjeya eyaya miqianaya tecueaña. Miqianaaya niñebaña ecuea ehuohui'yojo. Jamatii ecue Chiiya eya huoojea canaje; ojaya eba ojjaña; ojaya esohui e'e nei. Maya eyaya ojjaña cuana huasijje huohuiaña —Jesosa poanaje.

<sup>27</sup> Jesosaja esohui oja Chiijo Jodio etii cuana ba sa po ajja. Oya cuana jjashahuabaquiiani quea tai jama ba'a: —Chojja, Jesosa Eyacuiñajjija huoojea'yo pojjeama —poso acanaje Jodio etii cuana.

<sup>28</sup> Jamajjeya Jesosaa huohui canaje jama ba'a: —¡Bacue! Quijje eya, ojjañaja Edoe Mese miqianaaya ba'ehuanasohuajeaje'yo acui ecueata'apeejo. Majoya miqianajaya eba poaje jama ba'a: “Jesosa e'e jojo nei Eyacuiñajjija huoojea'yo ojjaña jaahuanajji”. E'e, ojaya esohui eyaya huohuiaña, ecue Chiija. Ecuea ejjashahuabaqui'yojji ca ca eyaya huohui jjima aña. <sup>29</sup> Ecue Chiiya eya huoojea canaje. Eyaya oya quea bihui po mee sa aña tii. Jamajjeya oya enijje yani tii tii, ohuaya eya jeanana'yo ajja —Jesosa poanaje.

<sup>30</sup> Quea huiso Jodio cuana Jesosa shajja'ajja majje jama poanaje ba'a: —E'e jojo nei nei Jesosa Eyacuiñajjija huoojea'yo ojjaña jaahuanajji. Oja sohui e'e jojo nei —poanaje.

*Eyacuiñajjija bacua cuana eshahuaa napa ajja*

<sup>31</sup> Jamajjeya quea huiso Jodio cuana Jesosa nijje jjapeequinaje. Oya cuana Jesosaa jama acanaje ba'a: —E'e, ecuea esohui jama ba'yani tiijo miqianaya e shajja'ajjaji e'e jojo nei poani. <sup>32</sup> Jama poanijo ecuea esohui miqianajaya quea ja'a nee poaje'yo. Ecuea esohui e'e jojo nei poani, sijje pojjeama. Jamajjeya ecuea esohui ba neineiyajo, miqianajaya mimishi cuana pajea meeje'yo, Edosiquianaja yajjijo chaco meepajeaje'yo pea'ai —Jesosa poanaje.

<sup>33</sup> Majoya pea Jodio cuana Jesosa nijje jjapeequi ajjajo quea tecue jama poanaje ba'a: —Chojja. Amajama ecuanaja etiiquiana, de. Jamajjeya pea cuanaja ecuana ehoojea'yojji pojjeama peaja yajjijo chacochohua sosema' —sijje poanaje oya cuana—. ¿Yajjaje miya jama poanaje ba'a: “Eyaya miqianaya chacochocho pajea meeje'yo peaja yajjijo?” —poanaje Jodio cuana.

<sup>34</sup> Jesosaa oya saja'a canaje: —E'e jojo nei ojjaña joya quea mimishi poani ca ca o huoojea'yojji Edosiquiana bajjani jayojja jama poani tii, quea mimishi. Ojaya yajjijo chacopajea meeme ajja jama jayojjaya aña miqianaya, miqianajaya mimishi pajea'yo ajjajo. <sup>35</sup> ¡Bacue! Echacojji ba'e tiitii ajja echacojji meseja equijo. Oja bacua ca ca oe onijje ba'e tiitije'yo. Miqiana huoojea'yojji Edosiquiana bajjani quea mimishi; ojaya yajjijo miqianaya sosema' chacochochoani. Jamajjeya miqianaya ba'e tiitii mee ajja Eyacuiñajji nijje. E shajja'ajjaji poani ca ca Eyacuiñajji nijje ba'e tiitije'yo oja bacua jjejojya.

<sup>36</sup> Jamajjeya eyaya, Eyacuiñajjija Bacua Ejja miqianaya mimishi pajea meesahuaje'yo. Jamajjeya miqianaya e'e jojo nei Edosiquianaja huoojea'yo pojjeama poaje'yo. <sup>37</sup> E'e, ecuea eba Amajama miqianajaya etiiquiana poa. Jamatii miqianaya ecuea esohui shajja'ajja sa po'yo ajja nei nei. Jamajjeya miqiaaya eya quecua sa aña. <sup>38</sup> Miqianaaya mi huoojeajji jayojja jama atitiiña quea tai. Oya Edosiquiana huoojeajji poani, Satanasa bajjaniya. Eyaya ca ca huohuiaña ojjaña ecue Chiija ejjashahuabaquiiji quea pame —Jesosa poanaje.

<sup>39</sup> —Chojja —Jodio cuana po nishonaje—, Amajama ecuanaja etiiquiana. Ohuaya jayojja jama aña ecuanaa quea pame —poanaje.

—Chojja —Jesosaa Jodio etii cuana saja'ame acanaje—. Amajama quea pame, miqianajaya etiiquiana mese poa; jamatii miqianaya o jayojja quea pame po'yo ajja. ¿Yajjajo acuae miqianaya o jayojja mi po'yani? <sup>40</sup> Eyaya Eyacuiñajjija esohui e'e nei

huohuinajejo, miqúanaya shajja'ajja sa po ajja. Jamajjeya eya miquianaaya quecua sa aña. Amajama ca ca jama po'yo ajja; quea pame nee oya. <sup>41</sup> Miquianaaya aje oe mi huoojeajjija ehuohui quea tai jayojja jama atiitiaña, Edosiquianaja ehuohui jama —Jesosa poanaje.

Jamatii Jodio etii cuana quenequenaje. Jama poanaje ba'a: —Chojja, Eyacuiñajji e'e jojo nei ecuanaja Chii. Ecuana ojaya ebacua cuana quea pame poani, de —poanaje Jodio etii cuana.

<sup>42</sup> Jesosaa oya cuana huohui canaje jama ba'a: —Eya Eyacuiñajji nijje ani poeyanaje jiquiacua, jiquio meshi yasijje. Eyacuiñajji miqúanaja Chii pojjeamajo eya miquianaaya boti'ama aña. E'e, Eyacuiñajjiya eya huoojea canaje; eya jamatii poe'yo jjima. Chojja, ohuaya eya huoojea canaje. <sup>43</sup> ¿Apiojji acuae miqúanaya ejo jjabahuejjaqui jjima? Miya ca mi ca oe e shajja'ajja sa po'yo ajja tii nequi. <sup>44</sup> E'e, Edosiquiana huoojeajji poani mi huoojeajji poani; ojaya ejjashahuabaquijji jama atiitii'yo sa poani miqúanaya. Yahuajo nei nei oya ona quecua coo'yojji poa. Eyacuiñajji esohui e'e nei jayojja jama ojaya ajjima pea'ai poa; esohui ojaya boti'ama nei nei poa. Oya siajje poani tii tii, siajjepojji nei nei. Oya ca ca oma siajje po coonaje; siajjepojji cuana huoojeajji poani. Ojjaña siajjepojji cuana ojaya epeeji cuana, Edosiquianaja epeeji. <sup>45</sup> Eyaya miqúanaya Eyacuiñajji esohui e'e nei huohuiaña. Jamatii miquianaaya eya shajja'ajja jjima aña. Edosiquiana jayojja miqúanaya jjashahuabaquiani. <sup>46</sup> Miquíanaya ejo jama po ajja ba'a: “Jesosa quea mimishi”. Chojja de. Jamajjeya eya esohui e'e nei huohuiaña, ¿apiojji acuae ecue huohui shajja'ajja jjima tii aña so'o? —Jesosa poanaje—. <sup>47</sup> ¡Bacue! Ojjaña Eyacuiñajji epeejiya oja sohui shajja'ajja cani tii. Miquíanaya ca ca Eyacuiñajji epeeji pojjeama jjejojo ojaya esohui shajja'ajja sa po'yo ajja tii —Jesosa poanaje.

<sup>48</sup> Majoya Jodio etii cuana quenequene majje jama acanaje ba'a: —¡Miya ca mi ca oe Samania dejja tai, niñepoqui!

<sup>49</sup> —Chojja —Jesosaa acanaje—, eya niñepoqui pojjeama. Ecue huohui ecue Chiijo e'e nei. Eyaya oya bihuiaña quea ja'a nee. Miquianaaya ca ca eya niñebaña —Jesosaa Jodio etii cuana acanaje—. <sup>50</sup> Eya onaya ejo mimi mee sa po'yo ajja jama ba'a: “Jesosa quea pame nee, ¡oya bihuiañe!” Chojja, eyaya dejja jamaya epo mee'yoyji pojjeama ejo. Ecue Chii ca ca ejo jjashahuabaquiani quea pame nee; e'e jojo nei ejo huohui cani ohuaya —Jesosa poanaje—. <sup>51</sup> Eyaya miqúanaya e'e jojo nei huohuiaña jama ba'a: Ojjaña joya e shajja'ajja neineijji poani ba'e tiitii meeje'yo, oya cuana ca ca emano'yoyjijo mete'ama poaje'yo pea'ai —Jesosa poanaje.

<sup>52</sup> Maya shajja'ajja majje Jodio cuana Jesosa jama acanaje ba'a: —Miquea ehuohui emano'yoyjijo ecuanaja eba miya e'e jojo nei niñepoqui poani eshahuaa napa canijo. ¡Bacue! Yahuajo ecuanaja etiiquiana Amajama mano'ya poa. Eyacuiñajji esohui huohuijji cuana yahuajo ba'e mano'ya poa pea'ai. Jamatii jjeya miyaya huohuiaña jama ba'a: “Ecuea esohui jayojja jama ba'yanijo emano'yoyji pojjeama miqúanaya cuana poaje”. ¡Dee! <sup>53</sup> Ecuana etiiquiana Amajama quea pame nee, quea ca'a nee poa; jamatii oya mano'ya poa. ¿A'a miyaya ma Amajamaja ajjima aje'yo? Jesosa, ¿a'a miyaya emano'yo cuana shequi meeje'yo? Eyacuiñajji esohui huohuijji cuana yahuajo nei ba'e poquijeyo'ya poa pea'ai, de. ¿A'a miya pea dejja jayojja jama pojjeama? ¿A'a miyaya ojjaña baña quea ja'a nee? Chojja, siajje miya poani —Jodio cuana mimijaji majamajanaje Jesosa nijje.

<sup>54</sup> Jamajjeyaya Jesosaa ojjaña cuana huohui canaje jama ba'a: —Eya onaya ejo mimi mee sa po'yo ajja jama ba'a: “Jesosa quea pame nee, ¡joya bihuiañe!” Chojja de, Eyacuiñajjiya, ecue Chiiya ca ca oe eya quea jea acani. Jamaya eyaya saña. E'e, ecue Chiiya ejo jama huohui cani ba'a: “Jiquio ecuea Ebacua Eja quea pame nee nee, quea ca'a nee nee; ¡joya shajja'ajjacue!” poani ecue Chii. Ecue Chiijo miqúanaya jama siajje poani ba'a: “Ecuana Eyacuiñajji epeeji, oya ecuanaja eba”. <sup>55</sup> Chojja de. Oya miqúanajaya ba jjima, de. Miquíanaya siajje poani. Eya ca ca siajje po ajja. Oya ecuea eba nei nei; eya siajjepojji pojjeama. Eyaya oya baña; ojaya esohui shajja'ajjaña; ojaya esohui jayojja



jama poani tii tii. <sup>56</sup> Yahuajo nei miquianajaya etiiquiana Amajama quea bihui nee nee jjashahuabaquinaje ecuea epoe'yojjijo quijje nei. E'e, Eyacuiñajjiya yahuajo Amajama ba mee ca poa jama ba'a: Eya, Eyacuiñajjiya huoojea'yo ojjaña jaahuanajji quijje meshi yasijje poeje'yo. Ma ba majje quea bihui nee nee Amajama poa —Jesosa poanaje.

<sup>57</sup> Majoya Jodio cuaa Jesosa jama acanaje ba'a: —Chojja de, miya siajje poani, de. Miya esho'i, 50 cui'ao sheme po jjima miya de. Amajama ca ca yahuajo nei nei ba'ya poa. Oya miquea ba jjima, de —poanaje Jodio cuana.

<sup>58</sup> —¡Shajja'ajjacue! —Jesosaa saja'a canaje—. Eyaya miya e'e jojo nei huohuiaña: Amajama cuaya jjimahuajo tii eya yaña tiia poa. Eya ca iña Eyacuiñajji nei —Jesosa poanaje.

<sup>59</sup> Ma shajja'ajja majje Jesosa siajje poani poso Jodio cuaa mei iña canaje o jajahuejjajee-  
jji nisho. Jamatii Jesosa chama' poanaje. Jesosa quea huiso dejja tejjee nequijje quehua cuayaquinaje Eyacuiñajjiya equi esecue jjani yasijje. Poquinaje.

## 9

### *Cojjama' cuaya jjabapojjaqui mee canaje Jesosaa*

<sup>1</sup> Quijje pea pojjaajo, ejomishocajji pojjaajo Jesosa ecuana nijje, o shajja'ajjajji cuana nijje ejiojjijje poquijeya ohuaya ba canaje oe dejja cojjama' cuaya. <sup>2</sup> Ba majje ecuanaa Jesosa huohui'ajjanaje jama ba'a: —Esohui huohuijji, ¿yajjajje acuae jiquio cojjama' cuayanaje so'o? ¿A'a ojaya mimishijo pojja'a? ¿A'a oja chiija, oja naeja mimishijo pojja'a? — poanaje.

<sup>3</sup> —Chojja —Jesosaa ecuana saja'a canaje—, oya cojjama' cuaya poa ojaya mimishijo pojjeama, oja chii, oja nae cuanaja mimishijo pojjeama pea'ai. Oya jamatii cojjama' cuaya mee ca poa. Jamajjeya eyaya oya jjabapojjaqui meeje'yo. Ba majje ojjaña cuaa bihuia caje: “E'e, Eyacuiñajjiya Jesosa jjabapojjaqui mee canaje cojjama'; quea ca'a nee oya, quea pame nee nee” acaje —Jesosa poanaje—. <sup>4</sup> Eyacuiñajjiya eya huoojea canaje o chacojji. Jamajjeya jjeya eya miquiana nijje nequianijo Eyacuiñajjiyo chacoaña. Quijje eya miquiana nijje nequi ajja jiquiojo. Eyacuiñajjiyo chaco majamaja majje eya manoje'yo. <sup>5</sup> Meshijo nequiya eyaya ojjaña cuana Eyacuiñajjiya esohui ba meeaña. Eya cuaquijji jayojja jama poani. Jiquio ecua cuaquijjiya jeaja'a canijo dejja cuana poquiquehua ajja mecajje quea apojo jama jayojja eyaya ojjaña cuana Eyacuiñajjiyo quea ja'a jjashahuabaqui meeaña.

<sup>6</sup> Jamaya mimi majje Jesosaa cuichojea canaje meshi pohui yasijje. Cojjamaja ecojja iñapepa canaje meshi choeya. <sup>7</sup> Majoya cojjama' huohui canaje: —¡Poquicue miya; ecojja shacuaquicue ena eteohuejja huasijje, Sinoe' bajjani yasijje! —poanaje. (Ma ena eteohuejja Ese Ejjaja esohuijo: Eyacuiñajjiya huoojea'yo ena bajjani.)

Jamajjeya cojjama' poquinaje ena eteohuejja huasijje ecojja shacuaa. Ecojja shacua majje jjabapojjaquinaje. Equi yasijje poe o'oyanaje cojjajji. <sup>8</sup> Jamajjeya dejja cuaa o pejjejo ba'ecaa, pea cuaa yahuajo oya meme ani ba canajeya pea'ai oya cojjajji ba ca'yonaje. Ba'yo majje ojee mimimiminaje jama ba'a: —Jiquio dejja yahuajo cojjama' e'anioque ani meme ani eseyaya banaje. ¿A'a e'e? —poanaje.

—E'e, oyaya jja coma —beca cuana poanaje.

—Chojja, pea coma; cojjama' jayojja coma —pea cuana poanaje.

<sup>9</sup> Oya yahuajo cojjama' jama poanaje ba'a: —E'e, eya iquio ma yahuajo cojjama' cuaya poaya. Jjeya eya cojjajji —cojjama' poanaje.

<sup>10</sup> —E'e nei. ¿Yajjajje acuae mi cojjajji'yo? ¿Yajja acuae mi po'yonaje? Jjeya miya cojjajji'yo —jama huohui'ajja neineimeya acanaje cuaa.

<sup>11</sup> Ohuaya saja'a canaje: —Jesosa bajjaniya mo cuichojea canaje meshi pohui tejjee. Ecuea ecojja iñapepa canaje meshi choeya. Majoya eya huoojea canaje Sinoe' ena eteohuejja huasijje ecojja shacuaa. Jamajjeya eya poquinaje. Ecojja shacuaqui majje eya jjabapojjaquinaje —acanaje.

<sup>12</sup> —¿A'a e'e? —ojjaña cuana poanaje—. ¿Achacua acuae ani oya Jesosa jjeya so'o? —poanaje.

—Cua'a de, ecuea oya ba jjima ecojjaja —poanaje.

*Paniseo cuaa dejja yahuajo cojjama' cuaya ba canaje*

<sup>13</sup> Jamajjeya pea mecahuajje o pejjejo ba'e cuaa ma dejja yahuajo cojjama' cuaya poa jjequi canaje Paniseo cuanaja ebajji. <sup>14</sup> Jesosaa meshi pohui ecuichojea ecojja huasijje iñapepa cajje jjabapojjaqui mee canaje epojja ejomishocajjijo. <sup>15</sup> Jamajjeya Paniseo cuaa ma ba majje huohui'ajja ca o'oyanaje jama ba'a: —¿Yajjajje acuae mi cojjajji'yo? ¿Yajja acuae mi poanaje so'o? —poanaje Paniseo cuana.

—Jesosaa ecuea ecojja iñapepa canaje meshi choeya. Majoya ecojja shacuaqui majje eya jjabapojjaquinaje —poanaje ma dejja.

<sup>16</sup> Jamatii beca Paniseo cuaa huohui canaje jama ba'a: —Ma dejja Jesosa bajjaniya ca ca oe epojja ejomishocajjijo chaco cani, de —poanaje Paneseo cuana. Jamajjeya Jesosa Eyacuiñajjija huoojea'yo pojjeama poso jjashahuabaquime poanaje.

Pea Paniseohua jama acanaje ba'a: —Chojja de, ohuaya cojjama' cuaya jjabapojjaqui mee canaje, pa. Jamaya pea cuana poanaje. Jamajjeya oya mimishi'ama. Dejja mimishiya jamaya po meeme'e'yo ajja —poanaje.

Jamajjeya Jesosajo ojee jjamimicuiajea nobiajeaquinaje Paniseo cuana. <sup>17</sup> Jamajjeya oya cuaa ma dejja yahuajo cojjama' cuaya huohui'ajja ca o'oyanaje: —¿Yajja acuae mijo poanaje Jesosa so'o? Jesosaa miya jjabapojjaqui mee canaje, pa cuana poani. Jamajjeya ¿yajja acuae miya poani Jesosajo so'o? ¿A'ya cuae oya? —poanaje Paniseo cuana.

—Jesosa Eyacuiñajjija esohui huohuijji e'e jojo nei —saja'ame acanaje cojjama' cuayaa.

<sup>18</sup> Jamatii Jodio etii cuana jjashahuabaqui sa po'yo ajja jama ba'a: —Oya cojjama' cuaya poa, jjabapojjaqui mee canaje Jesosaa.

<sup>19</sup> Jamajjeya oja chii, ojaya enaese pea'ai iyaa canaje. Poeyajo, huohui'ajja canaje: —¿A'a jiquio miquea ebacua ejja cojjama' cuaya poa? ¿Yajjajje acuae oya jjeya cojjajji? ¡Huohuicue ecuana! —poanaje.

<sup>20</sup> Echii mese jama poanaje ba'a: —E'e, jiquio ecuanaja ebacua ejja. Yahuajo oya cuaya poa cojjama' nei. <sup>21</sup> ¿Yajjajje shai oya cojjajji'yo jjeya? Ecuanajaya ba jjima. ¿Aya acuae oya jjabapojjaqui mee canaje so'o? Ecuanaja ba jjima. ¿Apiojji acuae iñaya nequiaa huohui'ajjaña? Oya oe huohui'ajja socue; oya etii, esho'i pojjeama. ¡Ohuaya oe huohui cacue! —poanaje echii mese, enaese pea'ai.

<sup>22</sup> Jamaya poanaje oya cuana, Jodio etii cuanajo quea mete jjejojya. E'e, Jodio etii yahuajo jama poanaje ba'a: “Jesosa Eyacuiñajjija huoojea'yo ojjaña jaahuanajji, ja'a jama huohuime ajji! Jama mimime poajo jja oe ecuaaya miquianaya Jodioja equi ojee ejjachichaquijjijo esecue yasijje huoojeacuayajeaje'yo” poanaje Jodio etii cuana. <sup>23</sup> Quea mete poanaje oja chii, ojaya enaese cuana pea'ai. Jamajjeya oja chiiya, ojaya enaeseya Jodio etii cuana huohui canaje jama ba'a: —¡Oya oe huohui'ajjacue! Oya esho'i pojjeama, etii nojinoji.

<sup>24</sup> Jamajjeya Jodio etii cuaa ma dejja cojjama' cuaya poa iyaa ca o'oyanaje ehuhuijji jama ba'a: —¡Bacue! Ecuanaja eba jiquio dejja Jesosa quea mimishi. Jamajjeya Eyacuiñajji oe nei bihuicue jama ba'a: “Eyacuiñajji quea pame nee nee; jamajjeya eya ohuaya jjabapojjaqui mee canaje ohuaye nei” —Jodio etii cuaa acanaje.

<sup>25</sup> Cojjama' cuayaa saja'a canaje jama ba'a: —Miquianaya: “Jesosa quea mimishi” poani. Oya quea mimishi poani jjojemo eya jjabaqui ajja tii pome. Ecuea eba nei nei eya cojjama' cuaya poa; eya jjeya cojjajji'yo, oja jjabapojjaqui mee'yo —poanaje cojjama'.

<sup>26</sup> Majoya oya huohui'ajja ca o'oyanaje Jodio etii cuaa jama ba'a: —¿Yajja acuae mijo poanaje Jesosa? ¿Yajja acuae mi cojja aca'yonaje so'o? —poanaje cuana.

<sup>27</sup> —E'e, eyaya miquianaya yahuajo huohuinaje Jesosa. Jamatii miquianaya jjashajja'a-jjaqui ajja —oya poanaje—. ¿Apiojji acuaeya shajja'ajja o'oya sa aña so'o? ¿E'e pojja'a miquianaya o shajja'ajjajji poaje'yo? —poanaje cojjama' cuaya etii cuana nijje.

<sup>28</sup> Majoya Jodio etii cuana onijje mimijajinaje jama ba'a: —Miya ca mi ca oe Jesusaja epeeji. Ecuana ca ca oe Moisesija esohui shajja'ajjajji poani. <sup>29</sup> Ecuana eba e'e jojo nei Eyacuiñajji yahuajo nei Moisesi nijje mimia poa. ¿Jesusa shai ajea huoojea jiquiacua? Cua'a de. Ba jjima ecuanaja —mimitecuetecueame poanaje Jodio etii.

<sup>30</sup> —E'e pojja'a, de, —cojjama' cuayaa oya cuana acanaje—; ¿apiojji shai oya miquianajaya eba pojjeama so'o de? ¿A'a miquianajaya ba jjima Jesusa huoojeajji epo? ¿Bacue oe! Eya ohuaya jjabapojjaqui mee canaje. <sup>31</sup> Eyacuiñajjiya ca ca dejja quea mimishija esohui eshajja'ajjajji pojjeama onijje mimianijo. Ohuaya dejja quea pameja esohui shajja'ajja cani, oja sohui jayojja jama poanijo. <sup>32</sup> Yahuajo nei, jjeya nei pea'ai chama' pea dejja Jesusa jayojja. E'e, eya yahuajo cojjama' cuaya poa. Jjeya eya ohuaya cojjajji po mee canaje. Yahuajo nei nei meshi pana cajeahuajo chama' dejja poa Jesusa jayojja. Jjeya nei pea'ai chama' pea dejja Jesusa jama. Pea cuaa ohuaya jayojja jama a'ajja. <sup>33</sup> Jesusa Eyacuiñajjiya huoojea jjima poa jojjemo ohuaya ma dejjaa ajjima acani ajjima aca quiaye, eya jamatii anijea quiaye —poanaje cojjama' Jodio etii cuana nijje.

<sup>34</sup> Oja sohui quea pame shajja'ajja sa po ajjajojo Jodio etii cuana quea quee nee nee poanaje. Tecuea canaje jama ba'a: —¡De! Miya quea mimishi nee nee jjejojo cojjama' cuaya poa; miya Eyacuiñajjiya cajaa. ¿A'a ecuaaya miya shajja'ajjaje? Chojja. ¡Poquicue miya! ¡A'a jiquicua poe o'oyajji! ¡Ecuana ojee ejjachichaquijji equi yasijje a'a poe o'oya tiitijji! —jamaya Jodio etii cuaa oya huoojeacuayajea canaje.

*Joya Eyacuiñajji ba po jjima cuana cojjama' jayojja*

<sup>35</sup> Majoya pea cuaa Jesusa huohuiqui canaje jama ba'a: —Jodio etii cuaa cojjama' cajaa acanaje; Jodioja equi ojee ejjachichaquijji esecue yasijje huoojeacuayajea canaje, pa —poanaje.

Jamajjeya Jesusaa oya sa'ajja canaje. Ba'yo majje huohui'ajja canaje jama ba'a: —¿A'a miquea eba Eyacuiñajjiya Bacua Ejja, Eyacuiñajjiya huoojea'yo ojjaña jaahuanajji? —acanaje.

<sup>36</sup> —Esohui huohuijji, oya ecuea ba jjima. ¡Oya mo ba meecue! Onijje iña jjapeequi'yo sa poani —poanaje.

<sup>37</sup> —Eya jja iña iquio, de —Jesusa poanaje —, ma Eyacuiñajjiya huoojea'yo ojjaña jaahuanajji poani. Miya jjeyahua nei Eyacuiñajjiya Bacua Ejja nijje mimiani. Eya jja iña iquio, de —Jesusaa acanaje.

<sup>38</sup> Majoya ohuaya Jesusa bihuia canaje ecui'oshajjajo nequi majje. Jama poanaje ba'a: —Ecuea Emeshi Mese, ¡eya miquea epeeji nei nei! —poanaje dejja cojjama' oja jjabapojjaqui mee'yo.

<sup>39</sup> —E'e nei —Jesusa poanaje—, ecue Chiiya eya meshi yasijje huoojea canaje; huohui canaje jama ba'a: “¡Baquicue! ¿Achajja shai ojjaña cuana jjashahuabaquiani mijo? ¡Ba'ajjaqui socue!” Eyacuiñajjiya aca poa eya. Jiquio ecua cojjama' jjabapojjaqui mee'yaña jayojjaya eyaya ojjaña joya yahuajo Eyacuiñajjiya esohui ba po jjima ba meesahuaje'yo. Ojjaña joya Eyacuiñajjiya esohui ba nisho epo ecuea Eyacuiñajjiya esohui eba meeji pojjeama. Jamajjeya oya cuana cojjama' jayojja tii poaje —Jesusa poanaje.

<sup>40</sup> Paniseo cuana jomajo nequi Jesusaja esohui shajja'ajja majje jama onijje poanaje ba'a: —¿A'a miya jjashahuabaquiani ecuanajo; Eyacuiñajjiya esohui eba pojjeama ecuanajaya, jamajjeya cojjama' jayojja poani? —poanaje Jodio etii cuana.

<sup>41</sup> —E'e —Jesusaa saja'a canaje—, miquianajaya Eyacuiñajjiya esohui ba jjima nei nei jojjemo eyaya miquianaya ba mee'yome. Cojjama' jjabapojjaqui meenaje jama eyaya miquianaya amee'yome. E'e, eyaya miquianaya Eyacuiñajjiya esohui ba mee'yome quea ja'a nee. Jamatii miquianaaya Eyacuiñajjiya esohui ba neinei nishoñajo, Eyacuiñajjiya miquianaya tecuea caje'yo; quea nee nee po mee caje'yo cuaquijo —Jesusa poanaje.

<sup>1</sup> Majoya Jesosa ojjaña nijje jama poanaje pea'ai ba'a: —Ecuea esohui ejjashahuabaqui meejji ñajjajja cuiñajjijo jama ba'a: Ñajjajja jaahuanajjiya ñajjajja cuana jiyoyo cahui mee cani, ijjiacajji mase cuaa e'ijjia ca poajejje. Ejaahuanajji jiyo esecue jjanijo jaani, esecue jjanij queya cani. Siipojji cuana ca ca ñajjajja jiyoyje nequisohua majje quehua dobiqiani. Oya cuana siipojji jjejojo esecuejje dobiqij aija. <sup>2</sup> Ñajjajja jaahuanajji ca ca esecuejje dobiqiani, de. <sup>3</sup> Jiyo esecue cuiñajjiya esecue ca'apejo cani ñajjajja cuiñajji dobiqijji. Dobiqij majje ejaahuanajjiya ojaya ñajjajja iyaa cani. Iyaa cajje o que poeyani. Ñajjajja jaahuanajji ehui dojorji poquiani esecue yasijje. <sup>4</sup> Cuayaqui majje ñajjajja cuana o quiquishijji poquiani. E'e, ejaahuanajjiya esohui ojaya ñajjajja eba, eshajja'ajjajji. Jamajjeya o quiquishijji poquiani. <sup>5</sup> Peaa iyaa cajje ñajjajja shajja'ajja jjima acani; poe aija. Jamajjeya oya ñajjajja poqui aija pea nijje; ba jjimajo cuajicuajiquehuajeenanani —Jesosa poanaje.

<sup>6</sup> Jesusaja sohui ejjashahuabaqui meejji ohuaya huohui canaje Jodio cuana huasijje. Jamatii ojaya, Jodio cuanaja quea quehua; jama acanaje ba'a: —¿Ajeo acuae ca oya mimiani ecuana nijje? —poanaje.

<sup>7</sup> Jamajjeya Jesusaa oya cuana huohui ca o'oyanaje: —¡Bacue, oe! Eya, Jesosa esecue jjanij jayojja jama poani. Ecuea epeeji dobiqij meesahuaña. <sup>8</sup> Ojjaña ejaahuanajji nisho cuana ca ca sii sa poani. Jiquio ecua ñajjajja peaja esohui ba jjimajo pea nijje poquiquehua aija jama jayojja ecuea epeeji nei nei esohui huohuijji nishojo jjashajja'ajjaqui aija —Jesosa poanaje—. <sup>9</sup> E'e, eya esecue jjanij jayojja poani; ojjaña eya shajja'ajja canijo, enijje jjapeequianijo pea'ai, eyaya oya cuana ba'e tiitii mee'yo enijje. Jiquio ecua ñajjajja jaahuanajjiya ojaya ñajjajja esecuejje dojocuayaqui cani bobi ijja, jiyo huasijje jaahuana cani pea'ai jayojja jama eyaya ecuea epeeji ba'e meesahuaña quea pame nee, Eyacuiñajjiya esohui jama —Jesosa poanaje—. <sup>10</sup> Siipojji poeyani ñajjajja siya, cuaquisho meeya pea'ai, quecuua pea'ai. Jamaya esohui huohuijji nisho cuana sijje poani, sii cani, ecuea epeeji cuana poquiquehua mee cani eshahua nijje, de. Eya ca ca poeyanaje quea ja'a nee nee ba'e meeya, pea ejjashahuabaquijji ba'e meeya.

<sup>11</sup> —E'e, eya ñajjajja cuiñajji quea pame nee jayojja jama poani. Ñajjajja cuiñajjiya ojaya ñajjajja nahue neinei cani ijjiacajji maseya e'ijjia ca poaje jjejojo. Oya jayojja eya manojeyo ecuea epeeji cuana ba'e tiitii mee'yoyji. <sup>12</sup> Echacojji ca ca eñajjajja mese pojjeama jjejojo ijjiacajji mase ba majje cuajicuajinanani; ñajjajja jeajea cananani. Jamajje ijjiacajji maseya ñajjajja cuana ijja cani; poquiquehuajeenanani mee cani pea'ai. <sup>13</sup> Ñajjajja cuana ojaya nahue'ama. Echacojji cuajicuajijeenanani, ojaya pojjeamajojo mi nahue cani —Jesosa poanaje.

<sup>14</sup> —Eya ca ca ñajjajja cuiñajji quea pame nee jayojja jama poani. Ecue Chiiya eya quea jea nee acani; oya ecuea quea jea nee pea'ai. Oya jayojjaya eyaya ecuea epeeji cuana quea jea nee nee aña; eya ecuea epeeji quea jea nee pea'ai. <sup>15</sup> Jamajjeya eyaya oya cuana nahue neineaña, ecuea epeeji cuana. Jamajjeya ojaya mimishi cuijea'yoyji eya manojeyo ona ba'e tiitii mee'yoyji —Jesosa poanaje—. <sup>16</sup> Pea cuana yani pea'ai, Jodio cuana pojjeama. Ohuaya pea'ai ecuea esohui shajja'ajja caje'yo. Ecuea epeeji poaje'yo pea'ai. Eyaya oya cuana jjapeequi meesahuaje'yo pea'ai. Jamajjeya ojjaña cuana ojee cajapeequiahua; eya ca ca oe o jaahuanajji poaje'yo —Jesosa poanaje.

<sup>17</sup> —Ecue Chiiya eya huoojea canaje ojjaña jaahuanaa. Jamajjeya ecuea epeeji ba'e tiitii mee'yoyji eya manojeyo, ona nahuejo. E'e, e quecuayoyji yani. Jamatii eya quecuca ca'yajje shequije o'oya mo. Jamajjeya eya ecue Chiiya quea jea nee nee. <sup>18</sup> Eya quea ca'a nee nee poani. Jamajjeya ecuea epeejji mano'yo sa po'yo aija jojjemo pea cuaa eya quecuca'yoyji pojjeama pome. Jamatii eya manojeyo jama poani ba'a: “E'e, ecuea epeejji mimishi cuijea'yoyji mano'yo sa poanijo eya manojeyo”. Mano'yo majje eya shequije o'oya. Ecue Chiiya eya jamaya huoojeame aca poa —Jesosa poanaje Jodio cuana nijje.

<sup>19</sup> Jesosaja esohui shajja'ajja majje Jodio cuana ojee jjamimicuijajea nobiajeaquinaje jama ba'a: <sup>20</sup> —¡Oya Jesosa niñepoqui, de! ¡Oya quea jjashahuabaqui tai mimime poani! ¡A'a oya shajja'ajjajji! —poanaje beca cuana.

<sup>21</sup> —Chojja, de oya niñepoqui pojjeama. Esohui quea pame nee nee huohui cani. Ohuaya ca ca oe cojjama' cuaya jjabapojaqui mee ca'yonaje. Jamaya po ajja niñepoqui cuana —poanaje pea cuana.

*Jodio cuana ojee jjachichaqui'yajo, Jesosaa huohui ca o'oyanaje jama ba'a: —Eya Eyacuiñajjija Bacua Ejja e'e jojo nei*

<sup>22</sup> Quijje eeno shejo ojjaña Jodio cuana Jenosanena huasijje ojee jjachichaqui o'oyanaje. Quea bihui nee poanaje ma shejo. E'e, ma shejo yahuajo nei Eyacuiñajjija equi pea iya ca o'oya poa quea bame nee. Jamajjeya ma shejaya ma shahuaba tiitii capoquiani Eyacuiñajji bihuia capoqui tiitiani. Cuaquijji sisi dedo cani quea cahui huiso. <sup>23</sup> Ma shejo Jesosa Eyacuiñajjija equi yasijje poqui o'oyanaje. <sup>24</sup> Equi quibojo jeojeonequinaje. Jodio dejja cuana o que jjachichaquinaje. Jama huohui'ajjame acanaje ba'a: —Jesosa, ¿apiojji miyaya ecuana huohui jjima? ¿A'a miya Eyacuiñajjija huoojea'yo ojjaña jaahuanajji? ¡Ecuana e'e nei huohuicue quea ja'a nee! —poanaje Jodio cuana.

<sup>25</sup> Jesosaa oya cuana jama acanaje ba'a: —E'e, eyaya miquianaya huohui huicha'a huicha'anaje yahuajo. Jamatii jjashajja'ajjaqui ajja. Ecue Chiiya eya ma dejjaa ajjima acani ameesahua cani miquianajaya ebajji nisho eya oja huoojea'yo ojjaña jaahuanajji. <sup>26</sup> Jamatii miquianaya jjashajja'ajjaqui sa po ajja ecuea epeeji pojjeama jjejojaya. Jamaya eyaya miquianaya huohuinaje ba'a: “Ejaahuanajjija emimi ojaya ñajjajaja eba; jamajjeya onijje poquiani”. <sup>27</sup> Jama jayojjaya ecuea epeeji cuaa ecue sohui shajja'ajja cani, enijje poquiani tii pea'aiya. E'e, ecuea epeeji cuana ecuea eba. <sup>28</sup> Eyaya oya cuana ba'e tiitii meeña. Jamajjeya oya cuana quea nee nee epo mee'yojji pojjeama cuaquijo, Eyacuiñajjiya. Eyaya ecuea epeeji cuana jaahuanajajo pea cuaa oya ecuaquisho meeji pojjeama eshahua nijje. <sup>29</sup> Ecue Chiiya, Eyacuiñajjiya ecuea epeeji cuana enijje jjapee meequi cani. Oya oe nei quea ca'a nee nee; pea cuana ca'a'ama. Ohuaya oya cuana jaahuana canijo cuaquisho meeme ajja eshahua nijje. <sup>30</sup> E'e jojo nei eya ecue Chii jayojjaya poani tii —Jesosa poanaje.

<sup>31</sup> Ma shajja'ajja majje Jodio etii cuaa mei iña ca o'oyanaje Jesosa jajahuejjajeajji nisho.

<sup>32</sup> Jamajjeya Jesosaa oya cuana acanaje: —Ecue Chiiya eya quea pame nee ma dejjaa ajjima acani amee cani. Jamajjeya ¿apiojji acuae iña jajahuejjajea sa aña so'o meiya? —huohui'ajjame acanaje Jesosaa.

<sup>33</sup> —Chojja, mi jajahuejjajea sa po ajja ca ca ecuana miyaya ma dejjaa ajjima acani quea pame añajo. Miya sijje poanijo ca mi ca oe jajahuejjajeame. Miya aje mi dejja; jamajjeya ¿apiojji acuae oe miyaya jama huohuime aña ba'a: “Eya Eyacuiñajji jayojja tiiya” poani? —Jodio etii cuaa Jesosa Eyacuiñajjija Bacua pojjeama poso tii acanaje.

<sup>34</sup> Majoya Jesosaa oya cuana jama acanaje ba'a: —Miquianajaya eba Eyacuiñajjiya yahuajo nei nei tehue mee ca poa Jodio jaahuanajji cuanajo jama ba'a: “Miquianaya Eyacuiñajji jayojja poani”. Jama tehuemeya aca poa yahuajo. <sup>35</sup> Jamajjeya ¿Eyacuiñajjija etehue'yo e'e nei shajja'ajja tiitiicue! Ma etehue'yojo ohuaya huohui ca poa Jodio esohui huohuijji Eyacuiñajji jayojjaya poa. <sup>36</sup> Jamajjeya eya ca ca oe ecue Chiiya babaca ca poa ojjaña jaahuanajji; eya eyajo ani huoojea ca poa meshi yasijje. Jamatii: “Eya Eyacuiñajjija Bacua Ejja” anajejo, miquianaaya eya tecueña. Jama poani ba'a: “Miya sijje poani Eyacuiñajji jayojja miame” poani miquianaya. ¿Apiojji jamaya poani? —Jesosa poanaje —. <sup>37</sup> ¡Bacue! Eyaya ecue Chiiya acani jayojja a'ajja jojjemo ja'a eya shajja'ajjame so'o! <sup>38</sup> Miquianaya ecue esohui shajja'ajja sa po ajja; jamatii ecue Chiiya acani jayojja quea pame nee eya añajo, jjashahuabaquicue jama ba'a: “Jesosa Eyacuiñajjija huoojea'yo poani”. ¡Jamajjeya jjabahuejjaquicue e'e jojo nei eya ecue Chii jayojjaya, de; oya e jayojjaya pea'ai poani! —Jesosa poanaje.

<sup>39</sup> Jamatii Jodio cuaa Jesosa sijje poani poso acanaje. Jamajjeya ojee jama poanaje ba'a: —¡Cua'a, oya ejja'iñaquiqui ejeanobiajji! —taaame poanaje.

Jamatii Jesosa quea huiso nee nee dejja nequi tejjee quehuajje poquinaje, jja'ña meequi jjima.

<sup>40</sup> Majoya Jesosa poqui o'oyanaje cuei Jodana ojje miji yasijje, ma yahuajo Huaniya ona besa mee ca poa huasijje.

<sup>41</sup> Jomajo o anijo quea huiso dejja cuana o baa poeyanaje. Jjachichaquí majje jama ojee miminaje ba'a: —E'e, yahuajo Huaniya ajjima aca poa ma dejjaa ajjima acani; jamatii ojjaña ojaya ehuohui'yo Jesusajo e'e nei poanaje —acanjaje cuaa.

<sup>42</sup> Jamajjeya ojjaña jomajo Jesusajo jama poanjaje ba'a: —E'e jojo nei Jesosa Eyacuiña-jjija huoojea'yo ojjaña jaahuanajji.

## 11

### *Nasano mano'yonaje*

<sup>1-2</sup> Pea cuiñajjijo Betania bajjanijo

Jesosaja epeeji cuana ba'enaje: Nasano, oja jjo'i cuana Manta, Mania pea'ai. Maniaa Jesosa ojaya quea jea neejo quijje oya jiojji sha canaje shiyeshiyeya. Sha majje ejiojji cui ca'yonaje ojaya esaohua, Maniaa. Jesosa Jodana cuei ojje mijijje anijo, Maniaja eno mese Nasano quea mano nee nee poanjaje. <sup>3</sup> Jamajjeya ejjo'i mese cuaa pea huoojea canaje Jesosa que: —Nasano quea mano jaa. Jesosa ba majje jama huohuime acue ba'a: “Emeshi Mese Jesosa, miquea epeeji Nasano quea mano nee nee jaa, poquijeyoje pojja'a” acue.

<sup>4</sup> Jamajjeya ma dejja poquinaje Jesosa que. Huohui cañaquinaje. Nasanojo shajja'ajja majje Jesosa jama poanjaje ba'a: —E'e, oya mano'yo majje jamatii emano'yo tii tii pojjeama poaje. E'e, quijje ojo ojjaña cuaa Eyacuiñajji bihuia caje'yo; ejo pea'ai jama huohuime acaje cuaa ba'a: “E'e, miya Eyacuiñajjija Bacua Ejja quea pame nee nee, quea ca'a nee pea'ai; ojjaña miyaya aña” acaje cuaa —Jesosa poanjaje.

<sup>5</sup> Jesosaja quea jea nee nee Manta, Mania pea'ai, oja jjo'i jayojja, oja o'i jayojja Nasano poani pea'ai. <sup>6</sup> Jamatii Nasano quea mano nee nee jaa ba majje Jesosa jomajo tii aninaje becanejjijji pea'ai cahuime, poqui jjima poanjaje.

<sup>7</sup> Majoya ecuana huohui canaje Jesusaa: —Cua'a, jJodea meshi yasijje epoqui o'oya! —poanjaje.

<sup>8</sup> —Chojja, Jesosa —saja'ame anaje ecuaaya—, yahuajo pishana Jodio cuaa jomajo ba'eya miya jajahuejjajjea sa acanjaje meiya. ¿A'a jamatii miya poqui o'oya sa poani jocuama? —anjaje.

<sup>9</sup> —E'e —Jesosa poanjaje—, eya poquije. ¡Bacue! ¿A'a eshequi jaasohua jjimahuajo ejiojjijje poquije? Quea apo. Eshequiya jeaja'a canijo ejjaquecuasajaquijji pojjeama ejiojjijo. E'e, eshequiya jeaja'a canijo, ejiojji baje quea ja'a nee. <sup>10</sup> Mecajje quea misi poanijo ca ca dejja oque chana' ejiojjijje poquianijo. Oya jayojja eyaya ecue Chii nijje chacoañajo, ohuaya eya jaahuana cani, onaya eya quecua'yo jjima amee cani. Ojaya eba nei epojja e mano'yojjijo.

<sup>11</sup> Jamaya ecuana huohui majje Jesusaa jama acanjaje ba'a: —Eseja epeeji Nasano cahui'yonaje. Jamatii eya poquije o ishe'a'yohua.

<sup>12</sup> Jesosa jamaya poanijo, Nasano mano'yo jjima poso ecuaa jama anaje ba'a: —Jesosa, Nasano cacahuiquiahua. Cahui majje oya jjaajaquije'yo.

<sup>13</sup> Jesosaja eba Nasano emano'yo, epoquijeyo'yo jaa. Ecuana ca ca jjashahuabaquiani jama ba'a: “Nasano jamatii cahuijaa” poso anaje ecuaaya. E'e, Jesosaja esohui ecuanaja quea quehua poanjaje.

<sup>14</sup> Jamajjeya Jesusaa huohui ca o'oyanaje jama ba'a: —Epeeji cuana, Nasano epoquijeyo. Chama'yo tii jaa. <sup>15</sup> Eya Nasano nijje ani jjima poanjajejojo oya mano'yonaje. Jamatii jamaya miqianajo quea pame nee poaje'yo. E'e, eyaya Nasano shequi meeje o'oya ba majje miqianaya jjabahuejjajje'yo eya e'e jojo nei Eyacuiñajjija huoojea'yo ojjaña jaahuanajji. ¡Cua'a, Nasano ejjaba'ajjaquiqui! —Jesosa poanjaje.

<sup>16</sup> Jesosa shajja'ajjajji Tomasi, ma Becajaa bajjani miminaje pea shajja'ajjajji cuana nijje, ecuana nijje jama ba'a: —¡Cua'a, Jesosa nijje epoqui! Jodio etii cuaa o cuia ca'yajo ecuana ojee Jesosa nijje tii manojeyo pea'ai.

*Jesosaa Manta, Mania pea'ai yeno'ama po mee sa acani*

<sup>17</sup> Quijje Jesosa poeyanaje Nasanoja equi yasijje. Ba caña'yonaje Nasano epoquijeyo'yo poanaje. E'e, ebeca pee pea'ai cahuime yahuajo oya ehuananobia jaanaje mei jjani yasijje, enaba capa jaanaje.

<sup>18</sup> Betania cuiñajji Jenosanena chipi nei ani. <sup>19</sup> Jamajjeya quea huiso Jodio cuana poeyanaje Manta, oja shehue Mania pa sahuua, oja noo Nasano emano'yojo.

<sup>20</sup> Jamajjeya Jesosa ejiojjijje poeyani shajja'ajja majje Manta cuayaquinaje Jesosa baa. Mania ca ca equijo aninaje, poqui jjima ca oma poanaje. <sup>21</sup> Jamajjeya Mantaa Jesosa ba majje huohui cañaquinaje jama ba'a: —Jesosa, ecue noo mano'yo jjimahuajo, miya jiquiacua epoe jojjemo oya mano'yo jjima poquiaye. <sup>22</sup> Jamatii ecuea eba jjeya nei pea'ai miya Eyacuiñajji nijje mimianijo, ohuaya miquea esohui jama acaje'yo —poanaje Manta.

<sup>23</sup> —Manta, mique noo shequije o'oya, she —poanaje Jesosa.

<sup>24</sup> —E'e —Manta poanaje—, jamaya ecuea eba oya shequije o'oya quijje nei, Eyacuiña-jjiya ojjaña emano'yo cuana shequi mee ca o'yajo, meshi oe poajo.

<sup>25</sup> Jesosa poanaje: —Manta, eya ca ca iña ojjaña shequimee'yojji nei. Eyaya oya shequi meeje o'oya Eyacuiñajji nijje eba'e tiitii'yojji. Jamajjeya ojjaña joya e'e jojo nei enijje japeequiani ba'e tiitii'yo eyajo. Eyaya oya cuana ba'e tiitii meeje'yo jamatii yahuajo emano'yo cuana. <sup>26</sup> Ojjaña ecuea epeeji jjeya nei eshe nequi pea'ai eyaya ba'e tiitii meeje'yo, mete'ama poaje'yo emano'yojji. ¿A'a jamaya miyaya baña? —Jesosa poanaje.

<sup>27</sup> —E'e Jesosa, ecuea eba miya Eyacuiñajji huojea'yo ojjaña jaahuanajji, Eyacuiña-jjiya Bacua Ejja. Miquea epoe'yojjijo yahuajo nei Eyacuiñajji esohui huohuijjiya tehue ca poa —Manta poanaje.

<sup>28</sup> Majoya Manta poqui o'oyanaje Mania que. Ba majje oya quehuajje huohui canaje jama ba'a: —Mania, Jesosa poeyanaje. Ohuaya miya iyaa cani —poanaje.

<sup>29</sup> Mantaja esohui shajja'ajja majje Mania nequisohuanaje. Poquicuajinaje Jesosa baa. <sup>30</sup> Jesosa Betania huasijje dobiqúi jjima; ohuaya Mania ishoa ca aninaje jomajo, ma o Manta nijje mimimimi aninajejo tiya. <sup>31</sup> Jodio cuaa Mania nijje equijo pa aniya oya ba canaje poquicuajije. Jamajje onijje poquinaje; jama poanaje ba'a: —Mania papoquinaje oja noo ehuananobiajaa huasijje quea yeno nee nee jjejojo.

<sup>32</sup> Maniaa poe majje Jesosa ba cañanaje. Ecu'oshajjajo nequiya huohui canaje: —Jesosa, miya jiquiacua epoe jojjemo ecue noo mano'yo jjima poquiaye —Mania poanaje.

<sup>33</sup> Jesosaa Mania pa'ani ba majje, Jodio cuana Mania nijje pani ba majje pea'ai quea yeno poanaje. Quea yeno jjashahuabaquinaje Jesosa onajo. Jamajjeya huohui'ajja canaje jama ba'a: <sup>34</sup> —¿Achacua acuae nequiaa Nasano huananobianaje so'lo, she? —Jesosaa acanaje.

—Esohui huohuijji, ¡poecue; bahuacue! —poanaje cuana.

<sup>35</sup> Jesosa cojjana cuayaquinaje onajo quea yeno po majje. Poquinaje onijje.

<sup>36</sup> Jamajjeya Jodio cuana jama poanaje ba'a: —¡Bacue! Jesosa pea'ai pani. Nasano ojaya quea yeno nee nee ojaya epejjijojo, de —poanaje Jodio cuana.

<sup>37</sup> —E'e pojja'a —beca cuana poanaje—. Yahuajo Jesosa dejja cojjama' cuaya jjabapojjaqui mee ca poa. ¿Apiojji shai oya yahuajo poecuaji jjima Nasano jjaajaqui mee'yohua? Jamajjeya oya mano'yo jjima poquiaye.

<sup>38</sup> Onajaya esohuijo Jesosa quea yeno nee nee poquinaje jjani ai yasijje. Mei copo enequi jjani secue capajji. <sup>39</sup> Jamajjeya Jesosaa jama acanaje ba'a: —¡Esecue jjani capajji'ya mei jeacajjajjaje'yocue! —poanaje.

—Chojja, ecuea Emeshi Mese —Nasanoja jjo'i Manta poanaje—. Oya yahuajo huananobia canaje, ebeca pee pea'ai cahuime. Jjeya quea ihui nee nee —Manta poanaje.

<sup>40</sup> —Manta, eyaya miya huohuinaje: Eya Eyacuiñajjija huoojea'yo ojjaña jaahuanajji ba majje miya jjabahuejjaquije'yo Eyacuiñajji quea ca'a nee nee, quea pame nee nee; ohuaya eya ojjaña amee cani ma dejjaa ajjima nei nei acani pea'ai —Jesosa poanaje.

<sup>41</sup> Majoya secue jjani capajji'ya mei jeacajjajjajea canaje cuaa. Jesosa eyahuasijje jjabajeasohuaquinaje Eyacuiñajji nijje emimijji. Nasanojo jama miminaje ba'a: —Ecue Chii, eyaya miya bihuiña. Ecuea esohui miyaya shajja'ajjaña Nasano shequi mee'yojji.

<sup>42</sup> Ecuea eba miyaya eya shajja'ajja neineaña minijje mimianijo. Jamaya eya poani, ojjaña jiquiojo nequi jjabahuejjaquiji miyaya e'e jojo nei eya huoojeanaje. E'e ecue Chii, apoa —Jesosa poanaje.

<sup>43</sup> Eyacuiñajji nijje mimi majje Jesosa taaanaje jama ba'a: —Nasano, ¡shequi'yocue, oe; cuaya'yocue! —poanaje.

<sup>44</sup> Jamajjeya Nasano shequi'yo majje cuaya'yonaje. Oya daqui osheja bebo tii, oja ejiojji, oja eme cuana pea'ai. Oja sapa ebebo pea'ai poanaje pea daqui osheja.

Jamajjeya Jesusaa huohui canaje jama ba'a: —E'e, ¡oya ebebojji'ya pichojeajea'yocue! ¡Daqui oshe huijiajea'yocue! Oya capoqui'yahua equi yasijje —poanaje.

Jamajjeya Nasano poqui'yonaje.

<sup>45</sup> Jamajjeya quea huiso Jodio cuaa Mania baa poeya ba canaje Jesusaa Nasano emano'yojaa shequi mee ca'yonaje. Ba majje Jesusajo jama poanaje ba'a: —E'e jojo nei oya Eyacuiñajjija huoojea'yo ojjaña jaahuanajji; ¡onijje ejjapeequi'yojji!

<sup>46</sup> Beca cuana ca ca Jenosanena huasijje poqui o'oyanaje Paniseo cuana huohuiya: —Jesusaa Nasano emano'yojaa shequi mee ca'yonaje, de —poanaje cuana.

<sup>47-48</sup> Jamajjeya Eyacuiñajji nijje emimijji etii cuaa, Paniseo cuaa pea'aiya ojjaña Jodio etii ojee iyaa canaje Jesusajo emimimimijji.

—¿Yajja acuae seya Jesosa aje so'o, de? Ohuaya ma dejjaa ba jjima acani quea huiso. ¡Cua'a ejja'iñaquiqui oya! ¡Oya esohui ejjahuohui pajea meequi! Ojjaña aje oe onijje jjapeequije'yo, de. Majoya Shomano meshi mese cuana ojo quea mete poaje, ejjajjequiquije poso. Jamajjeya ese nijje jjacuaqui majje jeabichajea caje'yo. Jiquio Eyacuiñajjija equi jajacajjajea caje'yo pea'ai, Shomano cuaa —poanaje Jodio etii cuana.

<sup>49</sup> Ma shequiajajo dejja Caipa bajjani Eyacuiñajji nijje emimijji etii poanaje Jodioja. Ohuaya pea cuana huohui canaje jama ba'a: —Ae po cajji Jesusajo ecuea ohuejaya eba. ¿A'a miquea ba jjima? <sup>50</sup> ¡Eya shajja'ajjacue! E'e, Shomano cuaa Jesusajo quea mete po majje eseya quecua jeyojeyo ca'yo chana'. Jamajjeya oe dejja, Jesosa camanoqui'yahua ojjaña cuanajo. Jamaya esejaya quea pame poaje'yo. Jamajjeya ojjaña cuana mano jeyojeyo'yo ajja poaje —poanaje Caipa.

Jamatii ohuaya ojaya ejjashahuabaquijjijo pojjeama huohui canaje. <sup>51</sup> Oya, Caipa Eyacuiñajji nijje emimijji etii ma shequiajajo. Jamajjeya Eyacuiñajjiya oya huohui meesahua canaje Jesusajo jama ba'a: —Jesosa quijje pishana ojjaña Jodio cuanajo manojeyo.

<sup>52</sup> E'e, ojjaña quea huesha ba'e cuanajo pea'ai, joya Eyacuiñajjija epeeji quijje poaje ojjaña meshijo ba'e cuanajo pea'ai manojeyo Jesosa. Jamajjeya ojjaña meshijo ba'eca cuana ojee jjapeequi mee caje'yo, Eyacuiñajji bihuiajji cuana.

<sup>53</sup> Jamajjeya Caipaja esohui shajja'ajja majje Jodio etii cuana ojee jjashahuabaquinaje Jesosa quecuajji: —¡Jesosa ejjaquecuajji'yo! —poanaje.

<sup>54</sup> Jamajjeya majoya Jesosa po'ayequi jjima poanaje Jodioja meshijo Jodio cuana nijje. Oya quehuajje poquinaje Epaini cuiñajji sisi yasijje, quima' meshi pejeje. Jomajo ba'enaje o shajja'ajjajji cuana nijje.

<sup>55</sup> Quijje pishana ojjaña Jodio dejja cuana ojjaña meshijo ba'e poqui o'oyanaje Jenosana huasijje. Jamajjeya ma shejo ba'a: Esohuidojojji cuaa yahuajo nei nei Ejito meshijo Jodioja bacua cuana cuia'yo jjima shejo Jenosanena huasijje jjachichacuaqui canaje. Majoya Jodio etiiquianaja ehuhui'yo jayojja jama quea huiso besa majamaja canaje cuana ojee quea bihui nee ijja'ijjia jjimahuajo. <sup>56</sup> Jenosanena huasijje poe majje ojjaña Jodio cuaa Jesosa sa'ajja canaje. Eyacuiñajjija equijo jjachichacuaqui majje ojee mimimiminaje Jesusajo:



—¿Ae jjashahuabaquiani miqúanaya? ¿A'a Jesosa poeje jiquiacua Jenosanena huasijje ojee ijia'ijiaa? ¿A'a poe ajja pojja'a? —poanaje.

<sup>57</sup> Jamaya miminaje Jodio etii esohuijo. Paniseo cuaa, Eyacuiñajji nijje emimijji etii cuaa pea'aiya jama huoojea canaje ba'a: —Jesosa ba majje jecuaa huohuicujihuacue e'iña meeji! —acanaje etii cuaa—. Miquiaa mi huohuajje quea quene nee nee poaje ecuan a.

## 12

*Maniaa Jesosaja ejiojji shacua canaje shiyeshiyeya*

*(Mateo 26.6-13; Macoso 14.3-9; Noca 7.36-50)*

<sup>1</sup> Majoya Jesosa Epainijo nequi Betania huasijje poeyanaje me oeje oe cahuime Jodio cuana ojee ijia'ijiaa jjimahuajo. Jomajo ba'enaje Nasano, ma ohua emano'yojaa shequi mee ca'yonaje. <sup>2</sup> Jomajo Mantaa Jesusajo quea bihui poanijo bobi quea huiso cuacua mee canaje. Quea huiso iyaa canaje Jesosa nijje e'ijia'ijiajji. Nasano pea'ai onijje ijia'ijianaje. <sup>3</sup> Majoya Jesosa ojaya quea jea neejo Maniaa shiyeshiyeya quea nahue nee neeya Jesusaja ejiojji sha canaje. Quea huiso sha canaje, oe tahuoo shiyeshiye oe acanaje. Sha majje Jesusaja ejiojji cui ca'yonaje oja esao aohua, Maniaa. Equi quea shiye nee nee poanaje shiyeshiyeya sha cajje.

<sup>4</sup> Jamajjeya Jesosa shajja'ajjajji Jodasa Isicanioteya, ma quiije Jesosa iña meesahua'yojji epojjiya Mania ba canaje. Ba majje Jodasa quea tecue jama poanaje ba'a: <sup>5</sup> —¡Dee! ¿Apiojji acuaeya shiyeshiyeya shanaje so'o? Ma shiyeshiye quea nahue nee nee baña cuaa, shequiaya oe chaco majje sose huisoajja jiquio shiyeshiye, de. Quea huiso bejjo soseje oya equia jojjemo bejjo quea huiso iña caquiaye, majoya bejjo soseje cuana jja oe aema' cuana bobia quiayeya —poanaje Jodasa.

<sup>6</sup> Jamatii oya Jodasa aemajo pojjeama jjashahuabaquinaje. Chojja, oya ca ca oma siipojji. Ojjaña Jesosa shajja'ajjajji cuanaja ejjesheji cuiña nisho cani bashosoco sisijo. Ma sii poquame beca cuana bejjo, Jodasaa acanaje.

<sup>7</sup> Jesusaa Jodasa tecuea canaje jama ba'a: —Jodasa, ¡a'a jiquio epona tecueajji! Ojaya eba eya quiije pishana manaje'yo. Jamajjeya eya sha canaje shiyeshiyeya, e mano'yojji jojoya. <sup>8</sup> E'e, eya miqúiana nijje e'ani tiitijji pojjeama. Aema' cuana ca ca miqúiana nijje yani tii tii, de.

<sup>9</sup> Quea huiso Jodio cuaa shajja'ajja canaje Jesosa Betania huasijje poe'yonaje. Quea huiso cuana poeyanaje Jesosa baa, Nasano pea'ai baa. Onajaya eba Jesusaa Nasano shequi mee ca'yonaje. Jamajjeya Nasano ba sa poanaje pea'ai. <sup>10-11</sup> Nasano shequi mee ca'yonajejo quea huiso nee nee huohui canaje jama ba'a: —¡E'e jojo nei Jesosa Eyacuiñajji huoojea'yo ojjaña jaahuanajji!

E'e, Nasano shequi mee ca'yonajejo Jodio etii cuanaja esohui shajja'ajja pajea canaje cuaa.

Jamajjeya Eyacuiñajji nijje emimijji etii cuana jjashahuabaquinaje jama ba'a: —¡De, Nasano pea'ai caquecuajja'yahua Jesosa nijje tii!

*Jesosa Jenosanena huasijje dobiquinaje mapichi sisija edaasa biajje*

*(Mateo 21.1-11; Macoso 11.1-11; Noca 19.28-40)*

<sup>12</sup> Jamajjeya mecajjeahua ojjaña Jodio cuaa ma ojee ijia'ijiaa poe'ya shajja'ajja canaje jama ba'a: —Jesosa ejiojji poeyani Jenosanena huasijje.

<sup>13</sup> Jamajjeya ojjaña cuana jememe iña jaja majje poquinaje Jesosa baa. Poquijeya jememe iña cuana jeasohua canaje. Jamaya Jodio cuaa acanaje pea bihuajji, emeshi mese ja'ajjequijji cuiñajji yasijje. Jesosa bihuia canaje pea'ai. Taaanaje jama ba'a: —Jesosa, ¡miya ojjaña jaahuanajji poeyanaje! ¡Eyacuiñajjiya miya huoojea canaje! ¡Ohuaya miya cajaanahua cahua! E'e de, miya ecuanajaya, Isaeni cuanajaya Emeshi Mese oe nei —taaame poanaje ojjaña cuana.

<sup>14</sup> Jesosa mapichi sisi ba majje o daasa biajje anisohuaquinaje. E'e, Jesusajo Eyacuiñajji esohui yahua jo nei etehue'yo jayojja jama poanaje jama ba'a:

<sup>15</sup> “Ojjaña Jenosanenajo ba'e cuana huohuicue jama ba'a: —¡Quea bei pocue! ¡Bacue oe! Miquiana huoojea'yojji nei poeyani. Oya quea bei nee. Jamajjeya mapichi sisija edaasa biajje poeyani —huohuicue cuana”.  
aya yahuajo tehue ca poa Jesusajo.

<sup>16</sup> Ma etehue'yojo jjashahuabaqui jjimahuaa ecuaaya jama anaje ba'a: —¿Yajjajje shai quea huiso nee nee jjachichaquiani Jesosa que, o bihuiaa so'o?

Quijje ca ca Eyacuiñajjiya Jesosa emano'yojaa shequi mee caje o'oya; majoya ecuaana niñebaje'yo jama ba'a: —E'e de, esohui huohuijji cuana yahuajo ba'ea etehue'yo jama acanaje Jesusajo —quijje jamaya niñebaje'yo ecuaana Jesosa shequi o'oyajo.

<sup>17</sup> Yahuajo Jesusaa Nasano shequi mee ca'yajo, quea huiso dejja cuaa ba ca poa Jesusa. Ma dejja cuaa ojjaña huasijje huohui huicha'a huicha'a ca poquia poa jama ba'a: —Nasano mano'yo majje jjanijo ehuananobia jaanaje. Jesusaa iyaa cajje oya shequi o'oyanaje, de —acanaje cuaa Jesusajo.

<sup>18</sup> Jamajjeya Jesusaa acani ma dejjaa ajjima acanijo quea huiso cuana poquinaje o baa, ejiojjijje poeje baa. <sup>19</sup> Jamajjeya Jesosa poeyanaje Jenosanena huasijje. Majoya Paniseo cuana quea quene ojee mimimiminaje jama ba'a: —¡Bacue! Ecuaanaaya pea dejja cuana Jesosa nijje jjapeequi pajea mee ajja. Chojja, de. ¡Bacue oe! Ojjaña tii Jesosa nijje jjapeequiani. Ecuanaja esohui shajja'ajja sa po'yo ajja. Jesosa iña meesahua ajja pea'ai, de —poanaje Paniseo cuana.

*Jesosaa huohui canaje ojaya epoqui'yojji eyahuasijje e'ani'yojji*

<sup>20</sup> Beca Jodio cuana quea huesha Jieno meshijo ba'e pea'ai ma shejo poeyanaje Jenosanena huasijje ojjaña nijje ijja'ijjiaa, Eyacuiñajji bihuiaa. <sup>21</sup> Oya cuana poeyanaje Penipe que, ma Betesaidajo ba'e que. Onijje jama poanaje ba'a: —Penipe, ecuanaya Jesosa ba sa neinei poani —poanaje.

<sup>22</sup> Jamajjeya Penipe ojaya epeeji Anesi que poqui majje pea cuanaja esohui huohui canaje. Majoya ojee poquinaje Jesosa huohuiya.

<sup>23</sup> Shajja'ajja majje Jesusaa oya cuana jama acanaje ojjañaja eshajja'ajjajji ba'a: —E'e, eyaya Eyacuiñajjiya esohui oe a'yonaje. Apoa a'yonaje. Jjeya nei eya, ojjañaja Edoe Mese manoje'yo. Eyacuiñajjiya eya mano'yajo dojosohuaqui caje'yo eyahuasijje. Onijje quea ca'a nee nee ani mee caje'yo. <sup>24</sup> Eyaya e'e jojo nei huohuiaña jama ba'a: Eso' quecua majje pohuani. Jamajjeya jjajja majje quea huiso eso' poaje'yo. Eso' quecua jjima ani jjapapaqui ajja. Jiquio ecua eso' quecua cajje quijje jjajjani jayojja jama poaje ejo. Onaa quecua cajje eya manoje'yo ojjañaja mimishi cuijea'yojji sosejje. Jamajjeya eyaya quea huiso ba'e tiitii meeje'yo enijje eyajo. <sup>25</sup> Jamaya pea'ai joya enijje jjapeequiani dejja mimishi cuaa quecua caje'yo pojja'a. Jamatii enijje jjapeequianijo, mano'yo majje eyajo ba'eje'yo tii tii quea pame nee. Quea mete nee nee jjejojo enijje jjapeequi'yo ajjajo ca ca mano'yo majje cuaqui yasijje dobiquire'yo tii tii, quea nee nee poaje'yo. <sup>26</sup> Ojjaña joya enijje chaco sa poaniya jeya cashajja'ajja cahua! Ecuea echacojji cuana quijje enijje ba'e tiitiije'yo. Ecue Chiiya oya cuana jama huohuime acaje ba'a: “E'e, jamaya. Miya Jesusaja echacojji quea pame nee” acaje Eyacuiñajjiya —Jesosa poanaje—. <sup>27</sup> Jjeya eya quea yeno. ¿Ajeo mimi cajji ecue Chii nijje so'o? ¿A'a jama mimi cajji pojja'a ba'a: “Ecue Chii, ja'a dejja cuana eya napa meeji! ¡A'a eya quea nee nee po meeji!”? Chojja. Jamaya eya mimi ajja ecue Chii nijje. Ohuaya eya huoojea canaje ojjaña cuanaja mimishijo mano'yohua. <sup>28</sup> Jamajjeya eya jama poaje ba'a: “Ecue Chii, jajaña cuana mijo quea bihui po meecue!” —Jesusaa acanaje.

Majoya Eyacuiñajji eyajo ani miminaje jama ba'a: —Eyaya miya amee'yonaje ma dejjaa ajjima acani. Jamajjeya quea huisohua eya bihuia ca'yonaje. Jjeya ojjaña eya jjabihuia meequije o'oya —poanaje Eyacuiñajji eyajo ani.

<sup>29</sup> Ojjaña Jesosa que ejjachichaqui'yo nequi cuaa shajja'ajja canaje Eyacuiñajji eyajo janobajjima nei mimiani. Jamajjeya oya cuana miminaje jama ba'a: —¡De! Cueji pojja'a poanaje.

Beca cuaa jama acanaje ba'a: —¡Chojja! Esohuidojojji eyajo Jesosa nijje miminaje — poanaje cuana.

<sup>30</sup> Jesosa ojjaña nijje miminaje jama ba'a: —Ecue Chii eyajo miminaje miquiana jjabahuejja meequijji jama ba'a: Ohuaya eya shajja'ajja canaje onijje mimianijo —Jesosa poanaje—. <sup>31</sup> Jjeya Eyacuiñajjiya ojjaña joya enijje jjapeequi ajja quea nee nee po mee caje'yo. Eyaya ojjaña jeabichajeaje'yo; Edosiquiana nei Satanasa bajjani, ma ojjaña dejja mimishi huoojeajji poani jeabichajeaje'yo. Quijje oya cuaqui yasijje dobiquije'yo tii tii. <sup>32</sup> Cuanaya eya ojjañaja Edoe Mese acui ecueata'apeejo ba'ehuanasohuajea cajo, quea huiso nee nee ojjaña meshijo ba'e enijje jjapeequi meeje'yo —Jesosa acanaje.

<sup>33</sup> Jamaya Jesosa ojjaña ba mee canaje oya acui ecueata'apeejo manojje'yo. <sup>34</sup> Jodio cuana jomajo ejjachichaqui nequiya huohui canaje jama ba'a: —Ecuana esohui huohuijji cuana jama poani ba'a: “Eyacuiñajjiya huoojea'yo ojjaña jaahuanajji Quito bajjani ba'e tiitiije'yo. Mano'yo ajja poaje”. Jamajjeya ¿apiojji miyaya huohuinaje ojjañaja Edoe Mese manojje'yo acui ecueata'apeejo ba'ehuanasohuajea cajje? ¿A'a miya Eyacuiñajjiya huoojea'yo? ¿A'a miya ojjañaja Edoe Mese ma Quito bajjaniya? —onaaya huohui'ajja canaje.

<sup>35</sup> Jesosa oya cuana saja'a canaje jama ba'a: —Eyaya miquiana huasijje esohui huohuije oe pojji cahuime. Ecuea esohui cuaquijji sisi jayojja. ¡Jjeya nei ecuea esohui jayojja jama acue! Jamajjeya miya poquiquehua ajja. Pea cuana ecuea esohui shajja'ajja sa po ajjajo poquiquehua tiitiije'yo. Jiquio ecua mecajje quea misijo cuaquisho chana' epoquijji jayojja jama ojjaña joya ecue sohui jayojja jama a'ajja, quea mimishi ba'yani. <sup>36</sup> E'e, ecue sohui cuaquijji quea ja'a jayojja jama. Jamajjeya eya minijje nequijo, ¡ecuea esohui jayojja jama acue! Jamaya miquianaya ecuea epeejji quea ja'a nee poaje'yo. Poquiquehua ajja dejja mimishi jayojja jama epojji pojjeama —poanaje Jesosa.

Majoya esohui huohui majje Jesosa poquinaje. Jja'aniquehuaquinaje.

*Jodio cuana Jesosa nijje jjapeequi ajja tii*

<sup>37</sup> E'e, Jesosa quea huiso ma dejjaa ajjima acani acanaje. Ojjaña ba canaje. Jamatii Jodio cuaa huohui canaje jama ba'a: —Chojja, Jesosa Eyacuiñajjiya huoojea'yo ojjaña jaahuanajji pojjeama —poanaje jjashajja'ajjaqui ajja jjejojo.

<sup>38</sup> Yahuaajo nei Eyacuiñajjiya esohui huohuijji Isaia bajjaniya tehue ca poa Jodio cuanajo jama ba'a:

“Eyacuiñajji, Jodio cuana ecuanaja esohui shajja'ajja sa po'yo ajja. Miyaya ma dejjaja ba jjima aña. Ba huicha'a huicha'a majje jamatii oya cuana jjashahuabaqui sa po ajja”.

<sup>39</sup> Jamajoya Isaiaa yahuaajo nei nei oya cuanajo tehue ca poa jama pea'ai ba'a:

<sup>40</sup> “Jodio cuana cojjama' jayojja jama poanijo, miyaya ma dejjaja ba jjima aña ba majje jjabahuejjaqui mee jjima mijo. Quea sapa ca'a jjejojo miquea ejjashahuabaquijji jjabahuejjaqui mee jjima. Jamajjeya minijje jjapeequi ajjajo Jodio cuanaja mimishi cuana ecuijea'yojji pojjeama”.

Jamaya Isaiaa yahuaajo tehue ca poa Jodio cuanajo. <sup>41</sup> E'e, Eyacuiñajjiya yahuaajo nei nei Isaia Jesosa ba mee majje ojo tehue mee ca poa jama ba'a: “Oya quea ca'a nee nee poani. Oya Eyacuiñajjiya huoojea'yo ojjaña jaahuanajji”.

<sup>42</sup> Jamatii quea huiso Jodio etii cuaa quehuajje Jesosajo jama acanaje ba'a: —E'e jojo nei oya Jesosa Eyacuiñajjiya huoojea'yo ojjaña jaahuanajji —quehuajje poanaje Jodio etii cuana, Paniseo cuana yajjajo.

E'e, Paniseo cuana yahuaajo jama poanaje ba'a: —Jesosa nijje jjapeequiajo aje oe ecuanaja equi ojee ejjachichaquijji yasijje edobiqui meeji pojjeama; ¡huoojeacuayajeaje'yo mi! —poanaje Paniseo cuana.

Jamajjeya beca Jodio etii cuana quea ajjajja poanaje ehoojeacuayajea ca poanijje. <sup>43</sup> E'e, Jodio cuana jjashahuabaqui ajja Eyacuiñajji quea bei epo mee'yojji. Chojja, oya cuana aje oe jjashahuabaquinaje pea Jodio cuana quea bei epo mee'yojji onijje.

*Jesosaa quiije ojjaña huohui caje'yo joya ojaya epeeji nei*

<sup>44</sup> Jamajjeya Jesosaa ojjaña ejjachichaqui nequi janobajjima nei, quea ja'a nee huohui canaje jama pea'ai ba'a: —Ecue Chiya, Eyacuiñajjiya eya huoojea canaje. Jamajjeya ojjaña joya enijje e'e jojo nei jjapeequiani ecue Chii nijje pea'ai jjapeequiani. <sup>45</sup> Beca cuana mimiani jama ba'a: “E'e, Jesosa Eyacuiñajjiya huoojea'yo ojjaña jaahuanajji”. Joya e bajji poaniya Eyacuiñajji ba cani pea'ai, eya ecue Chii jayojjaya poani tii. <sup>46</sup> ¡Bacue! Cuaquijjiya jeaja'a canijo, dejja cuana poquiquehua ajja mecajje quea apojo. Eyaya cuaquijji jayojja jamaa ojjaña quea ja'a jjashahuabaqui meesahuaña. Jamajjeya ojjaña joya enijje jjapeequiani mimishi cuana pajea meeje'yo. Jamajjeya Eyacuiñajjiya eya huoojea canaje ojjaña cuana mimishi pajea mee'yohua. <sup>47</sup> Ecuea esohui shajja'ajja majje beca cuana jamaya ba'e sa po'yo ajja. Jamatii eyaya oya cuana tecuea jjima aña. Eya ca iña poeyanaje ojjaña meshijo ba'eca cuanaja mimishi cuijea'yohua, enijje ba'e tiitii mee'yohua; quea mimishi nee poanijo, quea nee nee po mee sa po'yo ajja. Ecuea ejjashahuabaqui'yojji jama pojjeama ba'a: “Ojjaña quea mimishi nee poani quea nee nee po meeje'yo”. Chojja, eya ca iña poeyanaje ojjaña meshijo ba'eca cuanaja mimishi cuijea'yohua, enijje eba'e tiitii'yojji. <sup>48</sup> Ojjaña joya e cajaa ajji epo quiije quea nee nee poaje'yo cuaquijo ecue huohui jayojja jama ajjimajojo. Jjeya nei eyaya esohui huohuaña. Quiije eya poe o'oya majje ojjaña shajjama' cuana nijje mimije jama ba'a: “Ecuea esohui shajja'ajja jjimajo miqianaya cajaa aje'yo”. <sup>49</sup> E'e, ecue Chiya, e huoojea'yojji poaniya eya huohui meesahua cani ojaya ejjashahuabaqui'yojji. <sup>50</sup> Ecuea eba ojjaña joya ojaya esohui jama poani Eyacuiñajjiya pea jjashahuabaquime po mee caje'yo. Ba'e tiitii mee caje'yo onijje pea'ai. Jamajjeya, e'e nei ojjaña Eyacuiñajjiya huohui canajeya eyaya huohuaña —Jesosa poanaj e.

### 13

*Jesosaja epeeji cuanaa ojaya pea epeeji cuana cajaanahuana cahua, caba'e meesahua cahua*

<sup>1</sup> E'e, Jodio cuana ojee jjachichaqui o'oyanaje Jenosanena huasijje ojee ijia'ijjiaa quea bihui nee epojji, eniñeba'yojji esohuidojojjiya yahuajo nei Ejito meshijo Jodioja bacua cuana cuia'yo jjima epajea'yojji pojjeama. Jamajjeya oe cahuime ojee ijia'ijjiaa jjimahuajo, Jesosa jjashahuabaquinaje jama ba'a: —E'e, jiquio shejo eya poquije o'oya eyahuasijje ecue Chii que. Eya ca iña nequi ajja jiquio meshijo.

Jesosaa ojaya epeeji cuana jiquio meshijo ba'e quea jea nee nee acanaje. ¡Quea jea nee nee Jesosaja ojaya epeeji cuana! Poqui jjimahuua ohuaya oya cuana jjabahuejjaqui mee canaje.

<sup>2-4</sup> Edosiquiana neiya Jodasa Isicaniote, Simonija bacua ejja quea tai jjashahuabaqui mee canaje. Jamajjeya Jodasa jjashahuabaquinaje Jesosa iña meesahuajji, onajaya equecua'yojji. Jamatii Jesosaja eba poanaje jama ba'a: Eyacuiñajjiya, oja Chiya oya eyajo ani huoojea ca poa meshi yasijje. Jamajjeya oya oja Chii que poquije o'oya. Oja Chiya oya ojjaña huoojea'yojji po mee ca poa pea'ai. Jamajjeya sinecua ecuaña nijje, o shajja'ajjajji cuana nijje ojee ijia'ijjianijo Jesosa nequisohuanaje. Oja daqui ao huijiajjae majje pea daqui ejjacomayijjiqijji ai jayojjajo jjajeyoca'aquinaje. Ma daqui jjajeyoca'aqui majje ohuaya ena sho canaje tepe ai jayojja huasijje. <sup>5</sup> Majoya ecuaña jiojji topo canaje. Topo majje jiojji cui ca'yonaje ma daquiya, ejjacomayijjiqijji ai jayojjaa, Jesosaa. Jamaya poanaje ecuaña jjabahuejja meequijji jama ba'a: Pea cuana quea jea nee aña, ¡ba'e meesahuacue! Jama jjashahuabaquime epo meeji jiojji topo canaje. <sup>6</sup> Jamajjeya quiije Jesosaa Peno jiojji topo'ajja ca poa.

—Jesosa, miya ecuea Emeshi Mese nei. ¿A'a jjaya iña jiojji topoje pea'ai? —Peno poanaje.

<sup>7</sup> Jamajjeya Jesosaa oya saja'a canaje jama ba'a: —E'e, Peno, jjeya miya jjashahuabaquiani: “¿Yajjajo shai Jesosaa ecuaña jiojji topo cani so'o?” miquea ba jjima; yajjajo eya jama aña poso jjabaquiani. Jamatii quiije pishana miquea eba poaje —Jesosa poanaje.

<sup>8</sup>—Chojja, Jesosa, miquea eya ejiojji topojji pojjeama, de, miya ecuea Emeshi Mese nei poanijo —Peno poanaje.

Jamajjeya Jesusaa oya acanaje: —Peno, miya ecuea epeeji nei pojjeama poaje, ca eyaya miquea ejiojji mi topoajo —Jesusaa oya acanaje.

<sup>9</sup>—¿A'a e'e? Jamajjeya ¡ecuea ejiojji topocue, ecuea eme' cuana, ecuea ecojja pea'ai, ojjaña topocue! —poanaje Peno, Jesosa nijje jjapee neinei qui sa poanijo.

<sup>10</sup>—Peno, miqianaya besanaje. Jamajjeya miya quea boejea. Jamatii jjeya ejiojji nei catopoahua. Jamajjeya miqianajaya mimishi cuijea'yo majje quea boejea a'yonaje. Oe nei nei yani quea boejea pojjeama —Jesusa poanaje.

<sup>11</sup>Oya jjashahuabaquiani Jodasajo. Ojaya eba Jodasa o iña meeji epojji. Jamajjeya: “Oe nei yani quea boejea pojjeama” Jesosa poanaje.

<sup>12</sup>Majoya ecuana jiojji topo majje Jesusaa oja daqui ao huosho ca o'oyanaje. Anioque o'oyanaje ecuana nijje. Jama poanaje ba'a: —¿A'a miquea eba yajjajo miqianaya eyaya jiojji toponaje? ¿A'a jjabahuejjaqui jjima pojja'a? <sup>13</sup>¡Bacue! Miquianaaya eya jama aña ba'a: “Miya ecuea esohui huohuiji”, “Ecuea Emeshi Mese” aña. E'e, jamaya miqianaaya quea pame aña. Eya ca ca iña jiquio, miqianajaya esohui huohuiji, miqianajaya Emeshi Mese pea'ai. <sup>14</sup>E'e, ¡bacue! Eyaya miquea esohui huohuijiya, miquea Emeshi Meseya miqianaya jiojji toponaje. Jamajjeya ¡e jayojja jama pocue! ¡Pea cuana jiojji topojji jayojja jama pocue! <sup>15</sup>E'e, eyaya miqianaya jjabahuejjaqui meeña: ¡Eyaya miqianaya anaje jayojjaya pea cuana acue! <sup>16</sup>Eyaya e'e jojo nei miqianaya ba meeña jama ba'a: ¿A'a echacojjiya ojaya echacomeeji huoojea cani? Chojja. Emeshi meseya ca ca oe echacojji huoojea cani. Eya quea ca'a nee nee; miya ecuea echacojji quea ca'a pishana. Jamajjeya ¡ecue sohui jayojja jama acue! E'e, ¡pea cuana ba'e meesahuacue oe! <sup>17</sup>Jjeya ecuea esohuijo jjabahuejjaquinaje. Jamajjeya miya quea bihui nee poaje'yo ca ecue sohui jayojja jama ba'yajo —Jesusa poanaje.

#### *Jesosa huohui canaje Jodasa o iña meeji epojji*

<sup>18</sup>Majoya Jesusaa jama acanaje ba'a: —Jamatii eya ojjaña miqianajo pojjeama mimiani. Miquianaya ecuea ehabaca; ecuea eba ojjaña. Oe dejja ese nijje nequi ecuea epeeji nisho; Eyacuiñajji esohui etehue'yo ojo yahuajo nei jama poa ba'a: “Oya enijje ijia'ijia anije. Jamatii aje oe ecuea epeeji nisho oya poaje, e quecua mee'yoyji epojji”.

Ecuea eba jiquio etehue'yo jamaya poaje e'e jojo nei. <sup>19</sup>E'e, eyaya miqianaya jjeyahua nei huohuiaña jama po jjimahuaajo. Jamajjeya quijje pea cuaa eya quecua cajo miqianaya jama ejo jjashahuabaquije ba'a: “E'e jojo nei oya Jesosa Eyacuiñajji huoojea'yo ojjaña jaahuanajji. Jamajjeya ohuaya eseya huohui canaje yahuajo” jamaya poaje miqianaya quijje. <sup>20</sup>E'e jojo nei —Jesusa poanaje pea'ai —, ojjaña joya ecuea echacojji nijje jjapeequiani ecuea esohui huohuiji poanijo, enijje jjapeequiani pea'ai. Eyacuiñajji e huoojea'yoyji poanijo, ojjaña joya enijje jjapeequiani Eyacuiñajji epeeji poani pea'ai oya cuana.

#### *Jesosa miminaje Jodasajo*

*(Mateo 26.20-25; Macoso 14.17-21; Noca 22.21-23)*

<sup>21</sup>Majoya Jesosa quea yeno nee nee poanaje Jodasaja ejjashahuabaquijji quea tai ba majje. O shajja'ajjaji cuana jama huohuime acanaje ba'a: —Eyaya miqianaya e'e jojo nei huohuiaña. Oe dejja jiquiojo enijje ijia'ijia ani e iña meesahuajji epojji onajaya equecua'yoyji —Jesusa poanaje.

<sup>22</sup>Jamajjeya o shajja'ajjaji cuana quea metejo pea nijje ecapashe nei jama poanaje ba'a: —De, ¿ache shai o iña meesahuajji poaje so'o? —jjashahuabaquime poanaje.

<sup>23</sup>Eya jiquio esohui tehueji, Huani bajjani Jesosa pejejo aninaje, eya ojaya quea jea nee nee. <sup>24</sup>Jamajjeya Penohua eya Jesosa huohui'ajja mee canaje: —¿Ache shai o iña meesahuajji poaje?

<sup>25</sup>Majoya eyaya ecapashe nei Jesosa huohui'ajjanaje jama ba'a: —Jesusa, ¿aya acuae mi quecua mee'yo sa acani so'o?

<sup>26</sup> Jesusaa acanaje: —Pahui noe najo peshepeshe mee majje eyaya maya quiaje, ma e iña meeji epojji.

Majoya Jesusaa pahui noe najo peshepeshe mee majje quia canaje Jodasa, Simonija bacua ejja: —Ma'aje, Jodasa —poanaje.

—Ocuae, Jesosa —acanaje Jodasaa.

<sup>27</sup> Pahui ijia anijo Edosiquiana neiya Jodasa quea tai jjashahuabaqui mee canaje jama ba'a: “¡Onaya eyaya Jesosa iña meesahuaje!”

Majoya aje Jesusaa jama acanaje ba'a: —¡Poquicue, Jodasa! ¡Miquea ejjashahuabaqui'yojji jayojja jama acuajicue jjeyahua nei! —Jesosa poanaje.

<sup>28</sup> Pea shajja'ajjaji cuana jama poanaje ba'a: —¿Yajja poanaje Jesosa? ¿Ajeo Jesusaa Jodasa huoojea canaje so'o? <sup>29</sup> Jodasaa bashosoco sisi esejaya ejjesheji biojji dojo canaje. E'e pojja'a huoojea canaje bobi jjequiya, quijje ojee e'ijjijaji pojja'a —poanaje.

Beca eshajja'ajjaji cuana jama poanaje ba'a: —E'e pojja'a Jesusaa Jodasa huoojea canaje bejjo quiaa aema' cuana huasijje —poso acanaje cuaa.

<sup>30</sup> E'e, Jesusaa huoojea cajje Jodasa pahui ijia majje poquinaje esecue yasijje. Jjasinecuajajo poquinaje.

### *Jesosaja esohui eyacua*

<sup>31</sup> Majoya Jodasa poqui'yajo, Jesosa ecuana nije jama poanaje ba'a: —Eya ojjaña Edoe Mese. Eyacuiñajjiya jjeyahua nei ojjaña ba mee caje eya quea ca'a nee nee poani. Ma ba cajo, eyaya ojjaña jjabahuejjaqui meeje Eyacuiñajji quea ca'a nee nee, quea pame nee nee. <sup>32</sup> E'e, Eyacuiñajjiya eya ma dejja ajjima acani amee canajejo ojjaña jjabahuejjaqui meenaje oya quea ca'a nee nee. Jamajjeya Eyacuiñajjiya jjeyahua nei ojjaña jjabahuejjaqui mee caje eya quea pame nee nee poani. E'e, Eyacuiñajjiya eya shequi mee'yo majje jjequisohua caje'yo eyahuasijje —Jesosa poanaje.

<sup>33</sup> Majoya Jesusaa ecuana huohui canaje jama ba'a: —¡Miquianaya ecue bacua cuana jayojja, shajja'ajjacue mo! Eya minijje nequije oe pojji cahuime. E poqui'yajo, miquianaaya eya sa'ajjaje'yo. Jamatii jjeya nei poqui meeme ajja e poquiani yasijje. Jamaya yahuajo eyaya pea Jodio cuana huohuinaje pea'ai. <sup>34</sup> Jamajjeya esohui eyacua eyaya huohuiaña jama ba'a: ¡Pea cuana quea jea nee nee atiitiicue! ¡Eyaya miquianaya quea jea nee nee añajo jayojja jamaya pea cuana quea jea nee nee acue! <sup>35</sup> Pea cuana quea jea nee nee añajo, onaya miquianajo jama poaje ba'a: “E'e jojo nei miquianaya Jesosaja epejji poani” —Jesosa poanaje.

<sup>36</sup> Peno Simohuiya Jesosa huohui'ajja canaje jama ba'a: —Emeshi Mese Jesosa, ¿achacua acuae shai mi poquije'yo? —acanaje.

—Peno, jjeyahua nei miya epoquiji pojjeama e nequi yasijje. Quijje poe meeje e ani yasijje —Jesosa poanaje.

<sup>37</sup> Penohua huohui'ajja canaje: —¿Yajjajo acuae jjeya eya minijje mi poqui meeña? Miya ecuea quea jea nee nee eyaya jaahuanaje'yo. Manojeyo mi jaahuanajji.

<sup>38</sup> Jesusaa quea yenohua Peno jama acanaje ba'a: —¿A'a miya manojeyo e jaahuanajji? Chojja Peno, e'e jojo nei jiquio mecayje cachina yahue taaa jjimahuajo, miya ejo jama po huicha'a huicha'aje ba'a: “¡Chojja, Jesosa ecuea ba jjima nei nei!” miya quea mete po majje pea beca peejjima huohuimeya aje —Jesosa po anaj e.

## 14

### *Jesosaa ojaya epejji quea bhui nee po mee canaje*

<sup>1</sup> Jesosaja esohui shajja'ajja majje ecuana quea yeno, quea mete poanaje. Jamajje Jesosa ecuana nije miminaje jama ba'a: —¡A'a quea mete pojji! ¡Jiquio jama jjashahuabaquicue ba'a: “Eyacuiñajjiya eya jaahuana caje'yo tii” pocue! ¡Ejo jama jjashahuabaquicue pea'ai ba'a: “Jesusaa eya jaahuana cani tii” pocue! <sup>2</sup> Ecue Chii Eyacuiñajji eyajo ani. Jocuama ojaya eba'ejji quea huiso nee yani. Ecuea esohui e'e jojo nei, siajje pojjeama. Eya poquije ecue Chii que miquianajaya eba'ejji iyaa, apoa yajji. <sup>3</sup> E'e, eyaya miquianajaya eba'ejji iyaje. Jamajjeya e'e jojo nei eya poeje o'oya. Poe o'oya majje eyaya miquianaya doje

enijje eba'e tiitii'yoyji. <sup>4</sup> Miquianajaya eya eba ecue Chii que poquije. Miquianajaya eba pea'ai ecue Chii que epoquijji —Jesosa poanaje.

<sup>5</sup> Majoya Tomasi Jesosa nijje jama poanaje ba'a: —Jesosa, ¿achacua miya poquije'yo? Joya mi poquije yasijje ecuanajaya ejiojji ba jjima, de. Jamajjeya ecuanaja eba pojjeama ejiojji ma mi poquiani yasijje epoquijji —acanaje Tomasiya.

<sup>6</sup> —Tomasi, ojjaña ecue sohui e'e jojo nei. Eya ejiojji eyahuasijje epoquijji jayojja. E'e, ecuea esohui jayojja jama poanijo, miya ecue Chii ba'yani yasijje poqui meeje'yo. Ojjaña enijje jjapeequiani eyaya ba'e tiitii meeje'yo ecue Chii nijje tii. Ojjaña joya enijje jjapeequi ajja ca ca ecue Chii nijje eba'e tiitii'yoyji pojjeama. <sup>7</sup> Eya miquianajaya eba jojjemo miquianaaya ecue Chii bame pea'ai poaje. Jjeya nei oya miquianajaya eba poaje. Jamajjeya eya ecue Chii yasijje poqui'yajo, oya quea ca'a nee nee ani miquianaaya baje —Jesosa poanaje.

<sup>8</sup> Majoya Penipe jama poanaje ba'a: —Jesosa, ¿eseja Chii ai ecuanaya ba meecue! Jamajjeya ecuanaya quea bihui nee nee poaje'yo —poanaje Penipe.

<sup>9</sup> Jesosaa Penipe acanaje: —Penipe, ¿a'a miquianaya jjabahuejjaqui jjima? Eya miquiana nijje ba'enaje quea shequiaja huiso. ¿A'a jjeya miquianajaya eya ba jjima? ¡Bacue oe! E ba majje esejaya Chii eyajo miquianajaya eba pea'ai. Jamajjeya ¿apiojji acuae miya jama poani so'o ba'a: “¡Esejaya Chii ai ecuanaya ba mee socue!” poani miya? —Jesosa poanaje—. <sup>10</sup> E'e jojo nei eya ecue Chii jayojjaya, de. Oya e jayojjaya pea'ai. ¿A'a miquianaya jamaya jjashahuabaqui jjima? Ecue Chii nijjeya eyaya ohuaya jayojja aña, ma dejjaa ajjima acani aña. Ecue Chiiija ejjashahuabaqui'yoyji eyaya huohuiaña pea'ai, ecuea ejjashahuabaqui'yoyji pojjeama. <sup>11</sup> E'e jojo nei eya ecue Chii jayojjaya, de. Oya e jayojjaya pea'ai. ¡Jamaya jjashahuabaquicue, oe! Ecuea esohuijo miquianaya jjabahuejjaqui jjima, ¡jamajjeya jjashahuabaquicue eyaya ma dejjaa ajjima añajo! ¡Jama acue ba'a: “E'e, Jesosa Eyacuiñajji jayojjaya” acue miyaya! —Jesosa poanaje—. <sup>12</sup> Eyaya huohuiaña e'e jojo nei jama ba'a: Ojjaña enijje e'e jojo nei jjapeequianiya eyaya aña jayojja jama acaje'yo. Eyaya quea huiso pishana jjapeequi mee'yonaje Eyacuiñajji nijje. Eya ecue Chii que poqui'yajo, ecuea epeeji cuaa quea huiso nee nee pea cuana jjapeequi meesahua caje'yo onijje, Eyacuiñajji nijje. <sup>13</sup> Jiquio ecua miquianaya enijje mimijea jamaya eyaya aje'yo, ca ejo jama jjashahuabaquianijo ba'a: “E'e jojo nei Jesosaa ma ecua eya onijje mimiani jamaya acaje'yo”. Jamajjeya ba majje ojjaña ecue Chii bihuia caje jama ba'a: “Eyacuiñajji, ecuanaja Chii ai, miya quea ca'a nee nee eyajo ani”. <sup>14</sup> Enijje mimicue jama ba'a: “¡Jesosa, jiquio ecua eya mimiani minijje jamaya miyaya acue!” Jamajjeya miya enijje poanijo eyaya joya ecua miya enijje mimiani jamaya aje'yo —Jesosaa ecuanaya huohui canaje.

#### *Jesosaa huohui canaje Edojjoshahua Pameja epoejjijo*

<sup>15</sup> Majoya Jesosaa ecuanaya, o shajja'ajjajji cuana huohui canaje jama ba'a: —Eya miquianajaya quea jea nee poanijo, ¡ecuea esohui jayojja jama acue! <sup>16</sup> Jamajjeya eya esejaya Chii nijje mimijea jama ba'a: “Ecue Chii, ¡Edojjoshahua Pame huoojeacue ecuea epeeji cuana jjabahuejjaqui mee'yohua! Oya ecuea epeeji cuana nijje ani tiitiije'yo”. <sup>17</sup> E'e, Edojjoshahua Pameya miquianaya esohui e'e neijo jjashahuabaqui mee caje'yo. Ecuea epeeji pojjeama ca ca Edojjoshahua Pame nijje ejjapeequi meeji pojjeama. Oya miquianajaya eba. Pea cuanaja oya ba jjima. Oya miquiana nijje enequi tii tii. Miquiana que dobiquije'yo, Edojjoshahua Pame —Jesosa poanaje.

<sup>18</sup> —Ecuea epeeji, eya poquije'yo, miquianaya jeanaje'yo jiquiojo tii. Jamatii ecuea miquianaya jaahuana jjima jayojja jeana'yome ajjima. Chojja. Eya miquiana huasijje huoojeaje'yo Edojjoshahua Pame miquiana nijje jjapeequi tiitiiya, miquiana jaahuana tiitii'yoyji. <sup>19</sup> Quijje pishana ecuea epeeji pojjeama cuaa eya ba maja ajja. Miquianaaya ca ca eya baje o'oya. Eya ba'e tiitiije'yo, miquianaya pea'ai ba'e tiitiije'yo —Jesosa poanaje—. <sup>20</sup> Edojjoshahua Pame poeyajo, miquianaya jjabahuejjaquije jama ba'a: Eya ecue Chii jayojjaya tii poani. Eya miquiana nijje nequi, miquianaya enijje nequi pea'ai —Jesosa poanaje—. <sup>21</sup> Ojjaña joya quea e jea nee nee poani ecuea esohui shajja'ajja majje jamaya

poani. Eya ojaya quea jea nee nee poanijo, oya ecue Chiija quea jea nee nee pea'ai, ecuea quea jea nee nee pea'ai. Eyaya oya ba meeje jama ba'a: Eya e'e jojo nei onijje ani tii tii —Jesosa poanaje.

<sup>22</sup> Majoya pea Jodasa, ma Jodasa Isicaniote pojjeama, Jesosa nijje jama poanaje ba'a: —¿Yajjajo acuae miquea epeeji pojjeama mi jjaba meemajaquije so'o? Ecuanaa ca ca miya baje o'oya —huohui'ajja canaje pea Jodasaa.

<sup>23</sup> Jesosaa oya jama acanaje ba'a: —Ojjaña joya quea e jea nee poaniya ecuea esohui jayojja jama acaje'yo tii. Jamajjeya ecue Chiiya oya cuana quea jea nee acaje'yo. Eya, ecue Chii pea'ai onijje jjapeequije'yo. <sup>24</sup> Pea cuana ca ca ecuea esohui shajja'ajja sa po ajja, e boti'ama jjejojo. Miquianaaya shajja'ajjaña. Ecue Chiiya eya huoojea canaje. Ojaya ejjashahuabaquiji eyaya miquianaya huohuiaña, ecuea ejjashahuabaquiji pojjeama. <sup>25</sup> Jamaya eyaya huohuiaña, miquiana nijje nequiya. <sup>26</sup> Ecue Chiija eba miquianaya ecuea epeeji poani. Jamajjeya ohuaya Edojjoshahua Pame huoojea caje miquiana huasijje, miquiana jaahuaana, miquiana enijje ejjapeequiji pea'ai. Poe majje ohuaya miquianaya ba meesahua caje'yo Eyacuiñajjija ejjashahuabaquiji cuana. Ojjaña ecuea esohuijo ohuaya miquianaya jjashahuabaqui mee caje'yo tii tii pea'ai —Jesosa poanaje.

<sup>27</sup> —Eya quea bei nee nee. Eyaya miquianaya quea bei po meeña —Jesosa poanaje—. ¡Jamajjeya quea bei pocue, e jayojja! ¡Mete'ama, yeno'ama pea'ai pocue! Ecuea epeeji pojjeama cuanaja aje oe miquianaya quea bei nee epo mee'yojji pojjeama, de. <sup>28</sup> Eyaya huohuinaje jama ba'a: Eya ecue Chii que poquije'yo. Poqui majje quijje eya poeje o'oya miquiana que. E'e, eyaya miquianaya huohuinaje jama ba'a: Eya poquije'yo ecue Chii que. Ecue Chiiya eyajo aniya ma dejjaja ba jjima quea huiso nee nee acani. Eyaya jiquiojo ma dejjaa ajjima acani oe pojji ña —Jesosa poanaje—. Jamajjeya miquianaya quea e jea nee poanijo, ¡quea bihui nee pocue ejo, eya ecue Chii que poquianijo pea'ai! <sup>29</sup> E'e, eyaya miquianaya jjeyahua nei huohuiaña, eya ecue Chii que poqui jjimahuaajo. Jamajjeya e poqui'yajo miquianaya jama poaje ba'a: “E'e jojo nei Jesosaa poqui jjimahuaa eseya huohui canaje. Oya Eyacuiñajjija Bacua Ejja poeje o'oya” aje quiana oe poaje —Jesosa poanaje—. <sup>30</sup> Eya miquiana nijje jjeya nei mimi majamaja ajja. Edosiquiana nei poeyani e napaa. E'e, Edosiquiana nei, ma ojjaña meshijo dejja mimishi huoojea'yojji poani e napaa poeje. Ojaya eya ejeabichajeajji pojjeama. <sup>31</sup> Jamatii eya quea nee nee poaje. Quea nee nee poaniya ojjaña ba meeje jama ba'a: “Jesosaja oja Chii quea jea nee nee. Oja Chiija ehuhui jayojja jama poani pea'ai” acaje cuaa. Mahuiso —Jesosa poanaje—. E'e. ¡Jjeya nequisohuacue! ¡Cua'a, esecue yasijje cuayaquicue! —Jesosa poanaje.

Jamajjeya equi quecuayijji eyajo ani ijia'ijia ani cuayaquinaje esecue yasijje acui yiye yasijje epoquiji.

## 15

### *Esohui eba meesahuajji uvajo bashococo ai jayojjayajo*

<sup>1</sup> Majoya ejiojjije poquijeya Jesosaa ecua huohui canaje: —Eyaya esohui mi ba meesahuajji huohuije uvajo, bashococo ai jayojjajo. Eya bashococo ai emaijje quea pame jayojja jama poani. Ecue Chii bashococo ai cuiñajji jayojja jama. <sup>2</sup> Bashococo ai cuiñajjiya yaa sisi nojinoji'yajo tetojea ca'yani jjajja ajjajojo. Eña ba chii tetojea ca'yani pea'ai, jjono quea jjajja huiso epoiji. Jiquio ecua jjono bashococo ai cuiñajjiya yaa enojinoji tetojea ca'yani jayojja jama ecue Chiiya ecuea epeeji nisho cuana cajaa acani. Jiquio ecua eña ba chii tetojea ca'yani jayojja jama epeeji e'e jojo nei cuana mimishi pajea mee cani, quea pame nee nee epoiji. <sup>3</sup> Ecuea esohui shajja'ajjanajejo miquianaya quea ja'a poanaje. Jamajjeya miquianaya bashococo ai jjono quea pame jayojja jama poanaje. <sup>4</sup> ¡Enijje jjapee tiitiquicue! Jamajjeya eya miquiana nijje jjapee tiitiquije'yo. Jamajjeya miquianaya ma dejjaa ajjima acani ameeje'yo. ¿A'a jjono emaijje jjasejjaqui majje jjajjaje so'o? Chojja. Jamaya miquianaya enijje jjapee pajeaqui'yo majje quea pame po ajja. Emajje jjasejjaqui'yo jjima jjono jjajjani —Jesosa poanaje.



<sup>5-6</sup> Eya jiono emaijje quea pame nee jayojja. Miquianaya jiono emaijo pohuani jayojja. Jiono emaijje jjasejjaqui'yo majje nojinojije. Joca'yajo chicha'yo majje dahuaajea ca'yani cuaa. Oya jayojjaya ojjaña enijje jjapee pajeaqui'yani cajaa acani. Joya enijje jjapee tiitiquiani ca ca eya jjapee tiitiquije'yo onijje pea'ai. Jamajjeya oya cuana ma dejjaa ajjima acani quea huiso ameeje'yo. <sup>7</sup> E'e, miquianaya enijje jjapee tiitiquianijo, ecue sohui jayojja jama atiitiañajo pea'ai, Eyacuiñajjiya joya ecua miquianaaya huohuinaje jamaya acaje onijje mimiyajo. <sup>8</sup> Miquianaya ma dejjaa ajjima amee cani ba majje pea cuaa huohui caje jama ba'a: “E'e, Eyacuiñajji quea ca'a nee. Jiquio dejja cuana e'e jojo nei Jesosa shajja'ajjajji cuana” acaje cuaa.

<sup>9</sup> —Ecue Chiiya eya quea jea nee nee acani jayojja jama miya ecuea quea jea nee nee. Jamajjeya jeya miquianaaya quea jea nee nee pea'ai acue! <sup>10</sup> E'e, eya ecue Chiiya quea jea nee nee poani, eyaya ojaya esohui jayojja jama atiitiañajo. Jamaya ecuea esohui jayojja jama poanijojo, miquianaya ecuea quea jea nee nee poani pea'ai —Jesosa poanaje.

<sup>11</sup> —Eyaya jiquio esohui huohuiaña miquiana quea bihui po meeji. E'e, eyaya miquianaya quea bihui nee nee po mee sa ña. <sup>12</sup> Eyaya miquianaya huohuina'yaña jama ba'a: ¡Pea cuana quea jea nee nee acue! ¡Jiquio ecua eyaya miquianaya quea jea nee nee ña jamaya acue cuana! <sup>13</sup> Ojaya epeeji quea jea nee nee acani oe dejja manoj'e'yo ojaya epeeji nahuejo. Jamajjeya jayaya oja epeeji quea jea nee nee poanijo nahue cani! <sup>14</sup> Miquianaya ecuea quea jea nee nee; ecuea esohui jayojja jama poanijo ecuea epeeji e'e jojo nei poani. Jamajjeya eya miquiana nahuejo manoj'e'yo. <sup>15</sup> Echacojjiya ba jjima ojaya echacomeejjiya ejjashahuabaqui'yojji. Ojaya epeeji ca ca ba mee cani. Jamajjeya jjeya eya jama po ajja ba'a: “Miquianaya ecuea echacojji poani”. Chojja. Jjeya eya jama poani ba'a: “Miquianaya ecuea epeeji poani”. E'e, ojjaña joya ecue Chiiya huohui canaje eyaya miquianaya ba meenaje ecuea epeeji poanijojo —Jesosa poanaje—. <sup>16</sup> ¡Bacue, oe! Eya miquianajaya ehabaca pojjeama. Eyaya ca ca miquianaya babaca'yonaje ecuea epeeji epojji. Eyaya miquianaya huoojeaña ecue Chii nijje quea pame nee chachhua. Jamajjeya jpea cuana enijje jjapeequi meesahuacue! Jamajjeya enijje jjapeequianijo miquianaya cojjacahuianijo. Eyacuiñajji nijje emimijji ohuaya miquianaya saja'a acaje —Jesosa poanaje—. <sup>17</sup> Jamajjeya eyaya miquianaya huohuina'yaña jama ba'a: ¡Pea cuana quea jea nee nee acue! —Jesosa poanaje.

#### *Eshahuaja epeeji cuanaja boti'ama nei nei poaje miquianaya*

<sup>18</sup> —¡A'a quea yeno pojji dejja mimishi cuana miquiana nijje quea quene poanijo! Dejja mimishi cuana miquiana nijje quea quene nee nee po jjimahuaajo enijje quea quene nee nee poanaje. <sup>19</sup> Miquianaya dejja mimishi jayojja ba'e jojjemo ojaya quea jea pome miya ojaya pea epeeji quea jea jayojja. Jjeyahua nei miquianaya ona jayojja pojjeama, eyaya miquianaya babaca'yonajejo. Jamajjeya miquiana nijje quea quene nee nee poani dejja mimishi cuana. <sup>20</sup> ¿A'a ecuea ehuhui'yo baña? Jama ba'a: Echacomeejji quea sohui ca'a; echacojji ca ca ca'a'ama. Jamajjeya eya napa caje cuaa jayojja jama miquiana napa caje pea'ai. Ecuea esohui shajja'ajja canajejo, miquianajaya esohui shajja'ajja caje'yo pea'ai, onaaya. <sup>21</sup> E'e, e acaje'yo jayojja jama miquianaya acaje'yo cuaa enijje jjapeequianijo. E'e, oya cuaa jamaya acaje'yo, Eyacuiñajji, e huoojea'yojji epo ba jjimajojo. <sup>22</sup> E meshi yasijje, dejja mimishi cuana huasijje poe jjima jojjemo, esohui huohui jjima jojjemo pea'ai Eyacuiñajjiya shajjama' cuana quea nee nee po mee'yo ajja acame. Jamatii jjeya eyaya ojjaña huasijje esohui e'e nei huohuinajejo, jama po mee ajja ba'a: “Ecuea mimishi chama'. Ecuea shajja'ajja jjima”. Chojja. Oya cuana quea mimishi tii —Jesosa poanaje—. <sup>23</sup> Joya e boti'ama ajji poaniya ecue Chii boti'ama pea'ai acani. <sup>24</sup> Eyaya dejja mimishi nijje nequiya ma dejjaa ajjima acani a'yonaje. Ma dejjaa ajjima acani ecuea ajjima jojjemo Eyacuiñajjiya oya cuana tecuea jjima acame. E'e, onaaya ba canaje eyaya ma dejjaa ajjima acani ña. Jamatii eya ecue Chii pea'ai boti'ama nei nei onajaya. <sup>25</sup> Yahuajo nei nei Eyacuiñajjiya esohui huohuijjiya esohui tehue ca poa ejo jama ba'a: “Eya quea pame nee poani. Jamatii dejja mimishi cuanaja eya boti'ama nei nei” —Jesosa poanaje—. Jjeya

jamaya dejja mimishi cuana poanaje enijje, esohui huohuijjija etehue'yo jama —Jesosa poanaje.

<sup>26-27</sup> —Miquianaya enijje aninaje ma eya dejja cuana huasijje esohui huohui coonajejo. Jamajjeya miquianaaya esohui e'e jojo nei ejo huohuicue ojjaña cuana huasijje! —Jesosa poanaje—. E poqui'yajo Edojjoshahua Pame poeje miquiana quea bihui nee po mee'yohua. Jjeya oya ecue Chii nijje yani. Eyaya oya huoojeaje miquiana que miquiana jaahuanaa. Ohuaya Eyacuiñajjija esohui e'e jojo nei ejo miquianaya ba meesahua caje'yo. Jamajjeya miquianaya jjashahuabaquije ejo —Jesosa poanaje.

## 16

<sup>1</sup> —Eyaya miquianaya jamaya huohuiaña jjeya. Jamajjeya ecuea esohuijo quijje miquianaya enijje ejjapee pajequi'yojji pojjeama onaa napa cajje. <sup>2</sup> Jodio cuana miquiana nijje quea quene poaje. Jamajjeya quijje, Jodioja equi ojee ejjachichaquijji yasijje dobiquiyajo miquianaya huoojeacuaya caje'yo esecue yasijje Jodio cuaa. E'e, quijje miquianaya quecua'yo majje oya cuana jjashahuaba quehuaquije jama ba'a: “Ecuaya oya cuana quecua'yonaje. Jamaya Eyacuiñajjija quea boti” jama posoya acaje cuaa.

<sup>3</sup> —Jamaya acaje cuaa Eyacuiñajji ba jjimajojo, eya pea'ai ba jjimajojo. <sup>4</sup> Jjeya eyaya miquianaya huohuiaña. Jamajjeya quijje onaa napa cajje miquianaya jama poaje ba'a: “Jesosaja esohui yahuajo jayojja jama jjeyahua nei acani cuaa. Ecuana napa cani, onaaya” jamaya poaje —Jesosa poanaje—. Yahuajo miquiana nijje mimi coo majje eyaya miquianaya huohui jjima. Miquiana nijje enequiya jjejojo mi huohuinaje —Jesosa poanaje.

### *Edojjoshahua Pame poeje*

<sup>5</sup> —Yahuajo eya eyajo ani ecue Chiiya huoojea ca poa jiquiacua. Jjeyahua nei eya o que poquije o'oya. Jamatii eya miquianajaya huohui'ajja jjima jama ba'a: “¿Achacua miya poquije'yo?” ajjima. <sup>6</sup> Eyaya miquianaya huohuinaje jama ba'a: “Eya poquije'yo”. Jamajjeya miquianaya quea yeno nee poani. <sup>7</sup> Jamatii eyaya miquianaya e'e jojo nei huohuiña: Poqui'yo majje eyaya miquianaya quea bihui nee po meeje'yo. E'e, ecue Chii que poqui'yo majje eyaya Edojjoshahua Pame huoojeaje miquiana que. E poqui'yo ajja jojjemo ca ca oya poe jjima pome. <sup>8</sup> Ecuea epeeji pojjeamaja ejjashahuabaquijji quea quehua. Jamajjeya poe majje Edojjoshahua Pameya oya cuana jjabahuejjaqui mee caje. Oya cuana quea mimishi poani, quea mimijjequijjea poani. Edojjoshahua Pameya oya cuana quea ja'a nee ba mee caje'yo pea'ai. Eyacuiñajjiya ojjaña joya quea mimishi poani tii quea nee nee po mee caje'yo tii tii pea'ai. Jamaya ojjaña ba mee caje'yo, Edojjoshahua Pameya. <sup>9</sup> E'e, Edojjoshahua Pameya ojjaña jjabahuejjaqui mee caje jama ba'a: Enijje jjapeequi sa po'yo ajja jojya aje oe ojjaña quea mimishi poani. <sup>10</sup> Ecue Chiiya eya shequi o'oya mee majje o que jjequisohua ca'yajo, Edojjoshahua Pameya ojjaña ba mee caje eya quea pame nee nee. Jamajjeya eyaya ojjaña quea ja'a nee ba'e meeje'yo. Jjeyahua nei ojjaña ecuea epeeji pojjeamaja eba majajji pojjeama tii. <sup>11</sup> Dejja mimishi huoojeajjijo, Edosiquianajo Eyacuiñajji miminaje jama ba'a: “Eyaya Edosiquiana nei quea nee nee po meeje'yo tii tii. Jamajjeya ojjaña quea mimishi poani quea nee nee po meeje'yo pea'ai”. Jamaya Edojjoshahua Pameya ojjaña jjashahuabaqui mee caje, poe majje —Jesosa poanaje.

<sup>12</sup> —Ecuea pea ejjashahuabaquijji yani quea huiso, miquianaya huohui jjima ecuea. Jamatii jjeya miquianajo quea quehua poaje; jamajjeya jjeyahua eba meeji pojjeama. <sup>13</sup> Jamajjeya Edojjoshahua Pameya poe majje miquianaya ojjaña esohui e'e nei ba meesahua caje'yo ejo. Ojaya ejjashahuabaquijji pojjeama ohuaya miquianaya ba meesahua caje'yo. Chojja, ecue Chiija esohui ba meesahua caje'yo. Edojjoshahua Pameya miquianaya ba meesahua caje'yo ojjaña ma Eyacuiñajjiya quijje acaje. <sup>14</sup> Jamajjeya ecuea esohui ba meesahua cajo, miquianaaya eya bihuiaje'yo jama ba'a: “E'e de, Jesosa quea pame nee nee, quea ca'a nee nee poani” miquianaya poaje. <sup>15</sup> Ecuea ejjashahuabaquijji

ecue Chiija ejjashahuabaquijji jayojjaya tii tii poani. Jamajoya eyaya huohuiaña jama ba'a: Ecuea esohui ba meesahua caje'yo Edojjoshahua Pameya —Jesosa poanaje.

*Jesosa mano'yo majje shequije o'oya*

<sup>16</sup> —E'e, jjeja nei eya miqianajaya ba jjima poaje. Majoya quijje pishana baje o'oya. Majoya ecue Chiiya eya jjequisohua caje'yo o que —Jesosa poanaje.

<sup>17</sup> Jamajjeja ecuana, Jesosa shajja'ajjajji cuana ojee mimimiminaje jama ba'a: —¿Yajjajje shai Jesosa jama poani ba'a: “Jjeja nei miqianajaya eya ba jjima poaje. Majoya quijje pishana baje o'oya. Majoya ecue Chiiya eya jjequisohua caje'yo o que” poani? —poanaje ecuana. <sup>18</sup> Ojee mimi majamajanaje jama ba'a: —¿Ajeo oya mimiani jama ba'a: “Jjeja nei?” Ecuanaja quea quehua ojaya esohui —poanaje ecuana.

<sup>19</sup> Ecuanaja ejjashahuabaquijji Jesosaja eba poanaje. Jamajjeja ohuaya ecuana huohui'ajja canaje: —Eya jama poanaje ba'a: “Jjeja nei miqianajaya eya ba jjima poaje. Majoya quijje pishana baje o'oya” poanaje. Jamajjeja: “¿Ajeo shai oya Jesosa mimiani so'o?” miqianaaya huohui'ajjaña. ¿A'a e'e? <sup>20</sup> E'e jojo nei jjeja nei miqianaya quea yeno nee nee poaje. Ecuea epeeji pojjeama ca ca quea bihui nee nee poaje. E'e, miqianaya pa neineije. Jamatii quijje pishana quea bihui nee nee poaje o'oya, miqianaya. <sup>21</sup> E'e, epona bacua nee majje quea yeno poani, quea bacua nee nee jjejojo. Jamatii bacua cuaya majje quea bihui nee poani. Ebacua ba majje enaese jjashahuabaqui maja ajja ebacua neejo. <sup>22</sup> Jiquio ecua bacua nee majje epona quea yeno nee poani jayojja jama miya jjeja quea yeno nee nee poaje'yo. Jamatii eya ba o'oya majje quea bihui nee nee poaje'yo. Quea bihui nee nee epo pajea mee'yojji pojjeama cuana mi —Jesosa poanaje.

<sup>23</sup> —Jamajjeja eya ecue Chii que poqui'yajo, miqianajaya e huohui'ajja majajji pojjeama; enijje mimi ajja aquiana sa poanijo pea'ai. E'e jojo nei, ecue Chii nijje mimianijo, jaquiana sa poanijo oya huohucue! Ohuaya miya shajja'ajja caje. Miqianaya enijje jjapeequianijo quia caje joya miquiaa saña —Jesosa poanaje.

<sup>24</sup> —Yahuajo miqianajaya jamaya ajjima. Ma miquiaa saña ecue Chii huohui jjima enijje jjapeequianijo. Jamajjeja ¡Eyacuiñajji nijje mimicue! Joya ecua miqianaaya oya huohuiaña jamaya ohuaya acaje, ecuea epeeji poanijo. Ohuaya joya miquiaa huohui'ajjajeya quia caje. Jamajjeja miqianaya quea bihui nee po tiitiije'yo, e'e jojo nei —Jesosa poanaje.

<sup>25</sup> —Jjeja eyaya miqianaya ecuea ejjashahuabaquijji sohuihuohuinaje, esohui ebamee sahuajjijo ca ca oe huohuinaje. Quijje ca ca eyaya miqianaya ecue Chiijo huohui neineije esohui quea ja'a neejo, esohui eba meesahuajjijo pojjeama —Jesosa poanaje—. <sup>26</sup> E'e, quijje pishana eya ecue Chii que poqui o'oyajo, miqianaya ecue Chii nijje mimije, enijje pojjeama. ¡Aquiana sa poanijo ca oe oya huohucue! Ecuea epeeji poanijojo ohuaya miqianaya shajja'ajja caje —Jesosa poanaje—. <sup>27</sup> E'e, miqianaya ecue Chiija quea jea nee nee, eya miqianaja quea jea nee poanijojo, miqiana ejo quea ja'a jjashahuabaquianijo pea'ai. E'e, miqianajaya ejjashahuabaquijji ejo jama ba'a: “Eyacuiñajjiya Jesosa huoojea canaje e'e jojo nei”. <sup>28</sup> E'e jojo nei eya eyajo ani ecue Chiiya huoojea canaje meshi yasijje. Jjeyahua nei eya meshijo nequi jjima poaje. O que poquije o'oya —Jesosa poanaje.

<sup>29</sup> Jamajjeja ecuana jama poanaje ba'a: —E'e Jesosa, jjeja miyaya quea ja'a nee huohuiaña, esohui eba meesahuajjijo pojjeama. Maya ecuana quea quehua poanaje.

<sup>30</sup> Ecuanaja eba miyaya ojjaña baña e'e jojo nei. Minijje mimi jjimahuajo, ecuanaja ejjashahuabaqui'yojji miquea eba. Jamajoya jjeja ecuana jama poani ba'a: E'e jojo nei oya Jesosa Eyacuiñajjiya huoojea'yo —poanaje ecuana.

<sup>31</sup> Majoya Jesosaa ecuana jama acanaje ba'a: —E'e, Eyacuiñajjiya, ecue Chiiya eya huoojea canaje. ¿A'a jjeja jamaya miqianajaya eba e'e jojo nei? —Jesosa poanaje—

. <sup>32</sup> ¡Bacue! Jjeja nei miqianaaya eya quea mete po majje jeananaje'yo. Poquicujje miqianajaya equi yasijje. Jamatii eya ee nei enequijji pojjeama. Chojo, ecue Chii enijje enequi tii —Jesosa poanaje—. <sup>33</sup> Eyaya jamaya huohuiaña. Jamajjeja miqianaya ecuea

epeeji nei poanijo quea bei poaje'yo, mete'ama. Jiquiacua ba'yanijo, onaa napa cajje quea nee poaje. ¡Jamatii yeno'ama pocue! E'e, Edosiquiana nei, ojjaña joya ecuea epeeji pojjeama pea'ai eyaya jeabichajea'yonaje. Oya cuana quea nee nee po meeje'yo tii — Jesosa poanaje.

## 17

*Jesosa miminaje oja Chii nijje ojaya epeeji cuanajo*

<sup>1</sup> Majoya ecuaana nijje, o shajja'ajjajji nijje mimi majje Jesosa oja Chii nijje miminaje. Eyahuasijje jjabajeasohuaqui majje jama poanaje ba'a: —Ecue Chii, jjeja nei eya manoje'yo. ¡Miquea ejjashahuabaqui'yojji ejo yahuaajo, e huoojeanajejo jama acue jjeja, miyaya! ¡Ojjaña ba meecue eya miquea Ebacua Ejja quea ca'a nee nee! Jamajjeja ba majje ojjaña miya bihua caje. <sup>2</sup> E'e, miyaya eya ojjañaja Emeshi Mese nei po mee'yonaje, ojjaña huoojeajji. Jamajjeja ojjaña joya miya enijje jjapeequi meesahuaña ba'e tiitii meeje'yo, eyaya. <sup>3</sup> Ecue Chii, miya ca ca oe Eyacuiñajji nei e'e jojo nei. Pea chama'. Eya mique huoojea'yo ojjaña jaahuanajji, Jesosa Quito bajjani. Ojjaña minijje jjapeequianijo, enijje jjapeequianijo pea'ai, ba'e tiitijje'yo eyajo. <sup>4</sup> Eyaya ojjaña cuana ba meenaje miya quea ca'a nee nee poani. E'e ecue Chii, miyaya eya huoojeanaje miquea echacojji. Ojjaña miquea ehuhui eyaya ajeyojeyo'yonaje. Apoa anaje. <sup>5</sup> Ecue Chii, yahuaajo nei nei meshi pana jjimahuajo, eya minijje quea ca'a nee nequia poa. Jamajjeja jjeja eya mi que poquije'yo; ¡quea ca'a nee nee nequi mee'yocue mo, minijje ojjaña huoojeajji! —jamaya Jesosa miminaje oja Chii nijje.

<sup>6</sup> —Ecue Chii, eya minijje mimiani e shajja'ajjajji cuanajo. Oya cuana yahuaajo miquea epeeji pojjeama poa. Miyaya oya cuana enijje jjapeequi meesahuanaje. Jamajjeja eyaya oya cuana mijo jjabahuejjaqui meenaje. Miquea esohui jayojja jama acanaje. Jjashajja'ajjaquinaje. <sup>7</sup> Jamajjeja jjeja ojjañaja eba ojjaña joya miya e ameesahuanaje eyaya aña. <sup>8</sup> Ecue Chii, miyaya eya huoojeanaje miquea esohui huohuiya esejaya epeeji cuana huasijje. Miquea esohuijo oya cuana jjashahuabaquinaje. Shajja'ajja majje jama acani ba'a: “E'e, Jesosa yahuaajo Eyacuiñajji nijje nequi tiitia poa. Eyacuiñajjiya oya huoojea canaje” poani —Jesosa poanaje.

<sup>9</sup> —Ecue Chii, eya minijje mimiani esejaya epeeji jaahuanajji. Ecuea epeeji pojjeamajo, eshahuaaja epeejjijo eya mimi ajja. Miyaya esejaya epeeji cuana enijje jjapeequi meesahuanaje. Jamajjeja eya minijje mimiani esejaya epeeji cuanajo, ecuea epeeji miquea epeeji pea'ai poani jojoya. <sup>10</sup> E'e, ojjaña joya enijje jjapeequiani miquea epeeji poani pea'ai. Ojjaña joya minijje jjapeequiani ecuea epeeji poani pea'ai. Ojjaña eya bihua cani jama ba'a: “E'e, Jesosa Eyacuiñajji huoojea'yo”. <sup>11</sup> Ecue Chii, miya quea pame nee nee, quea ca'a nee nee. Jjeja eya mi que poquije'yo, meshijo enequi majajji pojjeama. Eseyaya epeeji cuana ca ca jiquiojo nequije. ¡Oya cuana mimishi'ama po meesahuacue! ¡Miquea esohui jayojja jama atiitii meecue! Jamajjeja ¡ojjaña ojee jjashahuabaqui meecue quea ja'a nee! ¡Eya mi jayojjaya jama ojee jjashahuabaquiani! ¡Jamaya oya cuana ojee jjashahuabaqui meecue! <sup>12</sup> Onijje nequiya eyaya ojjaña joya miya enijje jjapeequi meesahuanaje jaahuanaje mijo. Jamajjeja Edosiquiana nei oya cuana dasia mee jjima anaje, mi quea ca'a nee nee poanijojo. Ojjaña eshahua nijje poquiquehua mee jjima anaje pea'ai. Oe nei enijje jjapee pajeaqui'yonaje, poquiquehuanaje. E'e, yahuaajo nei esohui huohuijjiya ojo tehue ca poa jama ba'a: “Oya epeeji nisho po majje quea nee nee poaje'yo cuaquijo” ojo tehue ca poa yahuaajo nei nei —jamaya Jesosa miminaje Jodasajo.

<sup>13</sup> —Ecue Chii, jjeja eya mi que poquije o'oya. Jiquiojo aniya eyaya ecuea epeeji cuana huohuaña jama ba'a: “Ecue Chii que eya poquije o'oya”. Ma esohuijo oya cuana quea bihui nee nee poaje. E'e, jjeja quea bihui nee nee poani jayojja jama capoahua oya cuana! <sup>14</sup> Eyaya ecuea epeeji miquea esohui huohuañaajo, onaaya shajja'ajja canaje. Ecuea epeeji pojjeama cuanaja ecuea epeeji cuana boti'ama. Eya oya cuanaja boti'ama pea'ai, o jayojja po ajjajojo. <sup>15</sup> Ecue Chii, ecuea emimi minijje ecuea epeeji cuanajo jama

ba'a: ¡A'a jjeya nei oya cuana dojosohuauquijji mi que! Chojja, oya cuana ca ca jiquiojo ba'yanijo ¡jaahunacue quea pame nee! ¡A'a Edosiquiana neiya oya cuana dasia meejji!  
<sup>16</sup> Eyaya miquea epeeji pojjeama cuanaja ejjashahuabaquijji jayojja jama jjashahuabaqui ajja. Ecuea epeeji cuana e jayojja jama poani, pea cuanaja ejjashahuabaquijji jayojja jama pojjeama pea'ai. <sup>17</sup> Jamajjeya miquea esohui e'e nei. ¡Esohui jayojja jama poanijo, esejaya epeeji cuana quea ja'a nee nee ba'e meesahuacue, miquea ejjashahuabaquijji jayojjaya!  
<sup>18</sup> Ecue Chii, miyaya eya huoojeana je ojaña cuana huasijje miquea esohui huohuiya. Jamaya eyaya ecuea epeeji huoojeaña pea'ai esohui e'e nei huohuiya ojaña huasijje.  
<sup>19</sup> Miquea ejjashahuabaquijji ejo jayojja jama añña eyaya, oya cuana ecuea quea jea nee nee poanijo. E'e, jamaya eyaya añña oya cuana miquea ejjashahuabaquijji jayojja jama epo meesahuajji. Jamaya onaaya acaje'yo miquea esohui bajji poaniya jjejojo —Jesosa poanaje.

*Jesosa ojaña joya ojaya epeeji quiije poajejo miminaje oja Chii nije*

<sup>20</sup> —Ecue Chii, eya minijje mimiani jiquio epeeji cuanajo —Jesosa poanaje—. Oya cuaa miquea esohui huohui caje pea cuana huasijje. Shajja'ajja majje pea cuana esejaya epeeji poaje'yo pea'ai. Ojaña eya minijje mimiani, ojaña jaahunajji. <sup>21</sup> ¡Ojaña ecuea epeeji cuana jjashahuabaqui meecue miquea ejjashahuabaquijji jayojja, ecuea epeeji pojjeamaja ejjashahuabaquijji jama pojjeama! Ecue Chii, eya mi jayojjaya poani. Miya e jayojjaya poani. ¡Esejaya epeeji cuana ese jayojjaya ameequea pea'ai! Jamajjeya ojaña ba caje miya e huoojeajji epo. <sup>22</sup> E'e, miyaya eya huoojeana je miyaya jayojja yajji. Jamaya eyaya oya cuana huoojeaña ese jayojja epojji pea'ai. Jamajjeya oya cuana ese jayojjaya jama ameeaña, ojaña. <sup>23</sup> E'e ecue Chii, eya ona nije jjapeequiani. Miya enijje jjapeequiani pea'ai. Jamajjeya oya cuana cajjashahuabaquiahua ese jayojja, ojaña. Jamajjeya esejaya epeeji pojjeama cajjabahuejjaquiahua esejo jama ba'a: Miyaya eya huoojea'yonaje. Miyaya eya quea jea nee nee añña jayojjaya esejaya epeeji cuana quea jea nee nee añña pea'ai —Jesosa poanaje.

<sup>24</sup> —Ecue Chii, yahuaajo nei nei, meshi pana jjimahuajo tii, eya miquea quea jea nee nee poa; minijje ojaña huoojea'yojji poa. Jamajjeya ojaña ecuea epeeji, ma miyaya enijje jjapeequi mee'yonaje ¡enijje ba'e tiitii mee'yocue eyajo! Jomajo oya cuaa ba caje'yo tii tii miyaya eya ojaña huoojeajji po mee tiitiaña —Jesosa poanaje.

<sup>25</sup> —Ecue Chii, miya quea pame nee nee, quea ja'a nee nee nequi. Esejaya epeeji pojjeama cuanaja aje oe miya ba jjima. Eyaya ca ca miya baña. Esejaya epeeji cuanaja eba eya mique huoojea'yo. <sup>26</sup> Eyaya oya cuana miya ba meesahua'yonaje. Jamaya po tiitijje'yo. Jamajjeya miyaya eya quea jea nee nee añña jayojjaya jama pea cuana onaaya quea jea nee nee acaje. Eyaya oya cuana esejaya esohui jayojja jama atiitii meesahuaje'yo pea'ai —Jesosa poanaje oja Chii nije. Mahuiso ojaya emimi oja C hii ni jje.

## 18

*Pea cuaa Jesosa iña ca'yonaje*

*(Mateo 26.47-56; Macoso 14.43-50; Noca 22.47-53)*

<sup>1</sup> Majoya oja Chii nije mimi majje Jesosa ecuana nije poquinaje. Eta'a nama' Senono bajjani ojje miji yasijje poqui majje onimo acui yiye yasijje poquinaje. <sup>2</sup> Yahuaajo Jesosa ma acui yiye yasijje poqui majamajanaje ecuana nije. Jamajjeya jiquio acui yiye Jodasaja eba neinei poanaje, ma Jesosa iña meesahuajji epojjija eba neinei poanaje. <sup>3</sup> Jamajjeya mecajje onimo yiye yasijje Jodasa poeyanaje Jesosa que, sohuinano cuana nije. Jodio etii cuaa, Paniseo cuaa pea'ai sohuinano cuana, Eyacuiñajjija equi cuiñajji cuana pea'ai huoojea canaje Jodasa nije, Jesosa iña. Ojaña poeyanaje baajji, cuaquijijiji pea'ai.

<sup>4</sup> Jesusaja ojaña ejjashahuabaquijji cuana ojaya eba poanaje. Jamatii oya cuana que poqui majje huohui'ajja canaje jama ba'a: —¿Ajeo a nequiana ca poeyanaje? ¿Ae sa'ajja'yohua?

<sup>5</sup> —Jesosa ma Nasanenajo ba'enaje sa'ajjaña ecuaaya —poanaje cuana.

—E'e, eya jiquio Jesosa bajjani —Jesosa poanaje.

Jodasa aje oe sohuinano cuana nijje nequinaje, Jesosa iña meeya poe. <sup>6</sup> Jesosaja esohui shajja'ajja majje sohuinano cuana, Eyacuiñajjija equi cuiñajji cuana pea'ai edasajje tii jaabichaquinaje, oquequinaje meshi yasijje mete majje. <sup>7</sup> Jamajjeya Jesosaa oya cuana huohui'ajja ca o'oyanaje: —¿Ae sa'ajjaña?

—Ecuaaya Jesosa sa'ajjaña, ma Nasanenajo ba'enaje —poanaje.

<sup>8</sup> —E'e, eya jiquio Jesosa bajjani —Jesosa poanaje—. Miquianaaya eya oe nei sa'ajjañajo, ¡ecuea epeeji enijje nequi capoquiahua! —Jesosa jamaya poanaje ojaya epeeji cuana nahueji.

<sup>9</sup> E'e, yahuajo Jesosa oja Chii nijje jama poanaje ba'a: “Ojjaña joya miya enijje jjapeequi meesahuanaje eyaya jaahuanaje” jamaya poanaje Jesosa oja Chii nijje yahuajo.

<sup>10</sup> Eyacuiñajji nijje emimijji etijja echacoji Manico bajjani sohuinano nijje nequinaje. Majoya Simohui Penohua baa iña majje Manico shajja jajasejjajea ca'yonaje; esapa jajapojoejajji nisho acanaje. Eshajja ebianeijji mijijje jajasejjajea ca'yonaje, Manicoja.

<sup>11</sup> —Peno, ¡miqua baa jja oe ejee yasijje nequia'yocue! ¡Ecue Chiiija ejjashahuabaquijji ejo jayojja jama capoahua eya, jamatii quea nee nee poaje! —Jesosa poanaje.

*Jesosa iña majje dojo canaje Anasi que*

*(Mateo 26.57-58; Macoso 14.53-54; Noca 22.54)*

<sup>12</sup> Majoya esohuinano huooejajjiya ojaya sohuinano cuana nijjeya, Jodio etii cuanaja huoojea'yo sohuinano cuana nijjeya pea'aiya Jesosa iña ca'yonaje. Me jeyo majje dojo canaje. <sup>13</sup> Anasija equi yasijje ebioneijji dojo canaje, ma Caipaja babaja equi yasijje. <sup>14</sup> Caipa aje oe ma shequiñajjo Eyacuiñajji nijje emimijji etii poanaje. Ohuaya yahuajo pishana Jodio etii cuana huohui canaje jama ba'a: —¡Oe dejja camanoqui'yahua ojjaña cuanajo! Jamaya quea pame nee poaje'yo esejo —poanaje.

*Peno sijje poanaje Jesosajo*

*(Mateo 26.69-70; Macoso 14.66-68; Noca 22.55-57)*

<sup>15</sup> Jesosa dojo canaje cuaa, Peno enijje quea huesha pishana ocuenaje achajja Jesosa onaa acaje baa. Eya jiquio esohui tehueji Huani bajjani. Eya Anasija eba. Jamajjeya eya dobiqumee canaje ojaya equi yasijje, ma ojjaña Eyacuiñajji nijje emimijji cuana ojee mimiani yasijje. <sup>16</sup> Peno ca ca esecuejo nequinaje, dobiqumee jjima jjejojo. Jamajjeya eya Anasija eba neineijjo cuayaqui o'oyanaje. Esecue jaahuanajji nijje epona nijje e mimiajo, ohuaya Peno dobiqumee canaje. <sup>17</sup> Ma eponaa esecue jaahuanajjiya Peno huohui'ajja canaje: —¿A'a miya pea'ai Jesosa nijje poani, o shajja'ajjajji?

—Chojja. Jesosa shajja'ajjajji pojjeama ca ca iña —sijje poanaje Peno quea mete jjejojo.

<sup>18</sup> Quea huoejo echacoji cuana, esohuinano mese cuana pea'ai cuaqui peje nei yasijje poeyanaje. Cuaqui pejejo jjayoqui nequinaje. Jamajjeya Peno jjanequichipiqui majje cuaquijo ejjayoquijji nequinaje ona nijje.

*Anasiya Jesosa huohui'ajja canaje ojaya esohuijo*

*(Mateo 26.59-66; Macoso 14.55-64; Noca 22.66-71)*

<sup>19</sup> Majoya Anasiya Jesosa huohui'ajja canaje ojaya esohuijo, o shajja'ajjajji cuana pea'ajjo.

<sup>20</sup> Jesosaa saja'a canaje: —Eyaya esohui huohuinaje ojjaña cuana huasijje. Esohui huohuinaje Eyacuiñajjija equijo, equi ojee ejjachichaquijjiyo pea'ai ojjaña Jodio cuanaja eshajja'ajjajji. Quehuajje esohui huohui jjima. <sup>21</sup> Jamajjeya ¿apiojji acuae jja oe miyaya eya huohui'ajjaña ecuea ehuhui cuanajo so'o? Ojjaña eya shajja'ajja canaje. ¡Jamajjeya oya cuana huohui'ajja socue! —Jesosa poanaje.

<sup>22</sup> Jesosa shajja'ajja majje sohuinanohua oya shemo cuiasejjajea canaje emeya. Huohui canaje: —¡A'a jamaya mimijji Eyacuiñajji nijje emimijji etii nijje! —tecuea canaje.

<sup>23</sup> —¿A'a jjaya eya esohui quea tai aña? ¡Eyaya esohui quea tai añajoya jja ca iña oe huohuicue! Ecuea sijje ajjima cuana. Jamajjeya ¿apiojji acuae iña emeya cuiaña? —Jesosa poanaje.

<sup>24</sup> Majoya Anasiya Jesosa huoojea canaje Caipaja equi yasijje. Eme jeyo tii, pichojea jjima. Ma Caipa ca ca oe Eyacuiñajji nijje emimijji etii ma shequijajajo poa.

*Peno siajje po o'oyanaje*

*(Mateo 26.71-75; Macoso 14.69-72; Noca 22.58-62)*

<sup>25</sup> Peno aje oe cuaqui pejejo tii nequinaje ejjayoquijji. Jamajjeya pea cuaa oya huohui canaje: —E'e, miya e'e jojo nei Jesosa shajja'ajjajji poani pea'ai —poanaje.

—Chojja. Eya ojaya epeeji pojjeama —Peno siajje poanaje.

<sup>26</sup> Jamajjeya Peno nijje nequinaje Eyacuiñajji nijje emimijji echacojji Manicoja huapa pojjeama, ma Penohua shajja jajasejjajjea canaje huapa pojjeama. Ohuaya Peno jama acanaje ba'a: —Eyaya miya banaje Jesosa nijje Onimo yiyejo, de —poanaje.

<sup>27</sup> —Chojja, de, Jesosa ecuea ba jjima —nisho po o'oyanaje quea mete jjejojo. Peno mimianijo tii cachina yahue taaanaje. E'e, ma ecua Jesusaa oya huohui canaje jamaya Penohua acanaje.

*Shomano emeshi mese Pinato bajjani yasijje Jesosa dojo canaje cuaa*

*(Mateo 27.1-2, 11-14; Macoso 15.1-5; Noca 23.1-5)*

<sup>28</sup> Majoya mecajjeahua nei onaaya Caipaja equijo nequi Jesosa huoojea canaje Shomano emeshi mese Pinato bajjani yasijje. Jomajo Pinatohua ojjaña huoojea cani equi yasijje Jesosa dojobiaqui canaje sohuinano cuaa. Pinato ca ca Jodio pojjeama, Shomano dejja. Jamajjeya Jodio etii cuana ojaya equi yasijje dobiqúi sa po ajja. E'e, Jodioja etiiquianaja etehue'yo jama poani ba'a: “Jodio pojjeamaja equi yasijje dobiquijajo, esohuidojojjiya Jodioja bacua cuana cuia ajja shejo ojee ijji meeme ajja pea Jodio cuana nijje Eyacuiñajji bihuajji”. <sup>29</sup> Jamajjeya Pinato Jesosa ba majje esecue yasijje cuayaquinaje Jodio etii nijje mimiya. Cuayaqui majje huohui'ajja canaje Pinatohua: —¿Ajeo shai miquianaaya jiquio dejja tecueña so'o? ¿Yajja acuae oya poanaje? ¡Huohuicue mo!

<sup>30</sup> —Oya aje oe quea tai pojjeama joggemo ye jjima pome mi que —Jodio etii cuana Jesusajo siajje poanaje.

<sup>31</sup> —¡Miquianaaya jja oe oya dojo'yocue! ¡Miquea etiiquianaja etehue'yo jayojja jama oya acue! —Pinato poanaje.

—Chojja Pinato, Shomano emeshi mese neiya Sesaa ecuana dejja mimishi caca mee'yo jjima acani acui ecueata'apeejo. ¡Miquea esohuijo oe mano mee'yocue! —poanaje Jodio etii cuana.

<sup>32</sup> E'e, jamaya Jodio etii cuaa acanaje ma ecua Jesusaa huohui canaje jayojjaya yajji. E'e, yahuaajo Jesosa jama poanaje ba'a: “Quijje eya ba'ehuanasohuajjea caje'yo cuaa acui ecueata'apeejo” poanaje.

<sup>33</sup> Majoya Pinato equi yasijje dobiqúi o'oyanaje Jesosa nijje mimiya. Sohuinano huohui canaje: —¡Jesusa e que jjequicue!

Sohuinano cuaa Jesosa jjequi cajo, Pinatohua huohui'ajja canaje: —Jesusa, ¿a'a miya e'e jojo nei Jodioja Emeshi Mese? ¡Huohuicue mo oe! —poanaje.

<sup>34</sup> —Pinato, ¿a'a miya jamatii jjashahuabaquiani eya Emeshi Mese poani? ¿A'a pea cuaa miya ejo jamaya huohui canaje pojja'a? —Jesusa poanaje.

<sup>35</sup> —Eya ca ca iña Jodio pojjeama. Jamajjeya miya ecuea eba pojjeama, de. Miya Jodio. Jodio etii cuaa, Jodio Eyacuiñajji nijje emimijji etii cuaaya miya iña majje jjequi canaje e que. Jamajjeya ¡huohuicue mo! ¿Ae poanaje miya? ¿Yajjajje acuae minijje quea quene nee nee poani cuana? —Pinatohua huohui'ajja canaje.

<sup>36</sup> Jesusaa oya saja'a canaje jama ba'a: —E'e, eya Emeshi Mese. Jamatii pea emeshi mese jama pojjeama eya. Jiquio meshi cuanaajo dejja cuana huoojea'yojji pojjeama. Eya jiquiojo emeshi mese poani joggemo ecuea echacojjiya Jodio etii nijje jjaquecuaquime, Jodio etii cuaa e iña mee cajo —Jesusa poanaje.

<sup>37</sup> —Jamajjeya miya emeshi mese poani, Jesosa. ¿A'a e'e? —Pinato poanaje.

—E'e, eya Emeshi Mese poani, miyaya eya e'e jojo nei aña —Jesosa poanaje—. Eya eyajo ani meshi yasijje poeyanaje. Cuayanaje ojjaña cuana Eyacuiñajjija esohui e'e nei ba meeya. Ojjaña joya esohui e'e nei jayojja jama a sa poaniya ecuea esohui shajja'ajja cani —Jesosa poanaje.

<sup>38</sup> —¡Dee! Esohui e'e nei chama' pojja'a —Pinato poanaje. Majoya oya esecue yasijje cuayaqui o'oyanaje Jodio etii cuana nijje mimi o'oyaa. Jama poanaje ba'a: —Eyaya Jesusaja esohui shajja'ajjanaje. Oya ca ca quea tai pojjeama, mimishi'ama, de —Pinato poanaje—. <sup>39</sup> Jamajjeya jjeya miquianaya ojee ijja'ijjiaje esohuidojojjiya yahuajo nei etiiquianaja ebacua cuana cuia'yo jjima aca'ya poa shejo. Ojjaña shequiaja jiquio shejo eyaya oe Jodio dejja ejeanobiajaa huoojeacuayaje'yaña miquianaya quea bihui nee epojji. Jamajjeya ¿e'e pojja'a eyaya Jodio cuanaja Emeshi Mese Jesosa bajjani pichojea'yajo, Jodio cuana quea bihui nee nee poaje? —Pinato poanaje.

<sup>40</sup> Jodio etii cuaa Pinato saja'a canaje quea tecueya: —¡Chojja! ¡A'a jja oe Jesosa pichojea'yojji! ¡Mashama' jja oe pichojea'yocue! —janobajjima nei taaanaje Jodio etii cuana. Mashama' aje oe siipojji quea mas e poan aje.

## 19

*Jesosa mano'yo sa poanaje acui ecueata'apeejo*  
(Mateo 27.15-31; Macoso 15.6-20; Noca 23.13-25)

<sup>1</sup> Jamajjeya Pinatohua sohuinano cuana huoojea canaje Jesosa cuiasejjajee, jjonohua. <sup>2</sup> Majoya Jesosa cuiasejjajee majje sohuinano cuaa sapahuahuo nisho acuisa sipi majje oja sapajo ñape'ejea canaje. E'e, Jesosa emeshi mese nisho poso acanijo ojo soa neineinaje. Oja daqui huijjiajea mee majje daqui huo'o quea ao, emeshi meseja daqui jayojja huosho mee canaje. <sup>3</sup> Majoya aje oe oya bihuia nisho canaje: —Miya Jodio cuanaja emeshi mese quea pame nee —nisho amajje oya shemo cuiasejjajee canaje emeya. Jamaya ahuicha'a huicha'a canaje sohuinano cuaa.

<sup>4</sup> Majoya Pinatohua Jesosa pichojea sa acanaje; esecue yasijje cuayaqui o'oyanaje Jodio etii cuana nijje mimiya. Jama poanaje ba'a: —¡Bacue! Jesosa nijje mimi majje eyaya baña oya mimishi'ama nei nei. Eyaya oya ejeanobia meeji pojjeama. Jamajjeya jjeya eyaya miquianaya ba meeaña oya Jesosa mimishi'ama nei nei —Pinato poanaje.

Jamajjeya Jesosa esecue yasijje cuayanaje. <sup>5</sup> Ojjaña oya ba canaje sapahuahuo nisho acuisa e'ñape'ejea, daqui huo'o quea ao ehuosho ba'e pea'ai.

—Jiquio aje ca Jesosa ba'a. ¿Apiojji onijje quea quene nee nee poani? —Pinato poanaje.

<sup>6</sup> Jamatii Jesosa ba majje Jodio sohuinano cuana, joya Eyacuiñajji nijje mimiani cuana pea'ai taaanaje jama ba'a: —¡Oya acui ecueata'apeejo ba'ehuanasohuajecue! E'e, ¡acui ecueata'apeejo ba'ehuanasohuajecue ca comal! —ojjaña janobajjima nei taaanaje.

—¡Miquiaaya jja oe oya dojo'yo majje acui ecueata'apeejo ba'ehuanasohuajecue! Eyaya ca ca oya baña mimishi'ama nei nei —Pinato poanaje.

<sup>7</sup> Jodio etii cuaa Pinato saja'a canaje jama ba'a: —Jesosa jama poanaje ba'a: “Eya Eyacuiñajjija Bacua Ejja”. ¡Jamajjeya oya cacuiaje'yahua! Jamaya ecuanaja etiiquianaja etehue'yo poani —jamaya poanaje jiquio Jodio etii cuaa; Jesosa Eyacuiñajjija Bacua Ejja pojjeama poso acanaje.

<sup>8</sup> Jamajjeya “Jesosa Eyacuiñajjija Bacua Ejja” Jodio etii cuaa acajo, shajja'ajja majje Pinato quea mete nee nee poanaje. <sup>9</sup> Equi yasijje dobiqui o'oya majje Jesosa huohui'ajja ca o'oyanaje Pinatohua jama ba'a: —Jesosa, ¿achejo ani acuae miya poeyanaje so'o? — poanaje.

Jamatii oya Jesusaa saja'a jjima acanaje. Mimi jjima. <sup>10</sup> Jesusaja oya saja'a jjimajojo Shomano emeshi mese Pinatohua oya huohui canaje: —¡Dee! Miya enijje mimi ajja. ¡Bacue! Ecuea esohuijo pea cuaa miya pichojea caje pojja'a; ecuea esohuijo pea cuaa miya acui ecueata'apeejo me cacajea caje pojja'a. ¿A'a miquea ba jjima eya Jodio huoojea'yojji poani jiquiojo? —Pinato poanaje.



<sup>11</sup> Majoya Jesosa onijje miminaje jama ba'a: —Eyacuiñajjiya miya ejo huohui mee cani. Miyaya miyaye nei jamatii ejo huohui mee ajja. Jamajjeya joya e iña meeji epo cuana quea mimishi nee nee poani. Miya o jayojja quea mimishi nee nee pojjeama —Jesosa poanaje.

<sup>12</sup> Jamajjeya Pinatohua Jesosa pichojea sa neinei acanaje. Jamatii jiquio Jodio etii cuana taaa majamajanaje. Janobajjima nei poanaje: —¡A'a oya pichojea'yojji! Oya miya pichojea'yojo aje oe miya Shomano huoojea'yojji nei Sesa bajjanija epeeji pojjeama poaje, de. Ojjaña joya emeshi mese nei po sa poani ca ca Sesa jeacuayajeajji epo, de — poanaje.

<sup>13</sup> Majoya Jodio cuanaja esohui shajja'ajja majje Jesosa Pinatohua dojo capoquinaje ma ohua ona huoojea cani yasijje. Jomajo anioquenaje yohua bajjanijo ba'a: Mei E'iya nequijo, Jodioja esohuijo ca ca Jabata bajjanijo. <sup>14</sup> Jomajo ojjaña Jodio cuana cojja nei anioque majje Jodio etii cuaa huohui canaje: —¡Bacue oe Jesosa, miquianajaya Emeshi Mese! —Pinato poanaje.

Ojjaña jiquio Jodio etii cuana taaa neineinaje. <sup>15</sup> Jama poanaje ba'a: —Chojja, de. ¡Oya quecua'yocue! ¡Acui ecueata'apeejo ba'ehuanasohuajecue!

—¿A'a eya miquianajaya Emeshi Mese nei me caca meeaña acui ecueata'apeejo emano'yojji? —Pinatohua acanaje.

—Ecuanaja emeshi mese yani, oya Shomano emeshi mese Sesa bajjani. Pea chama! —taaame acanaje Eyacuiñajji nijje emimijji etii cuaa.

<sup>16</sup> Jamajjeya aje oe Jodio cuaa a sa acani jayojja jama Pinatohua amee canaje. Jesosa dojo mee canaje me caca meeya acui ecueata'apeejo eba'ehuanasohuajejji. Jamaya poanaje epojja ejomishocajjijo eshequi biacojjajja nequijo, Jodio cuaa bobi chicha cani pojajjo, yahuajo nei esohuidojojjiya Jodio etiiquianaja bacua cuana cuia'yo jjima aca poa shejo. E'e, Jodio cuaa Jesosa manocuaji mee'yo sa acanaje emojea'yojji ojee ijia'ijia jjimahuajo.

*Jesosa acui ecueata'apeejo ba'ehuanasohuajea canaje cuaa*

*(Mateo 27.32-44; Macoso 15.21-32; Noca 23.26-43)*

<sup>17</sup> Jamajjeya Pinatohua Jesosa Jodio etii cuana huasijje quia ca'yonaje. Sohuinanohua Jesosa iña majje acui ecueata'apee quea biquie nee bao mee majje dojo mee canaje. Dojo mee canaje eyiyo sisi yasijje, Sapa Jjii anijji bajjani meshi yasijje, Jodioja esohuijo ca ca Jonijota eyiyo huasijje. <sup>18</sup> Sapa Jjii bajjani eyiyo huasijje jaasohuaqui majje majo tii acui ecueata'apeejo Jesosa me cacajea canaje sohuianano cuaa. Me caca majje ba'ehuanasohuajea canaje. Beca dejja mimishi pea acui ecueata'apee cuanajo me jeyo canaje pea'ai. Ba'ehuanasohuajea canaje Jesosa pejejo, oe shanijje, pea ebianeijje. Jesosa ca ca eyiyesamaneijje ba'ehuanasohuajea canaje.

<sup>19</sup> Pinatohua acuijo esohui tehue mee canaje Jesusajo. Etehue'yo acui ecueata'apeejo Jesosa ba'e sapa biacua caca mee canaje. Etehue'yo jama ba'a: OYA JESOSA NASANENAJO BA'E JODIOJA EMESHI MESE NEI

<sup>20</sup> Jonijota ma Sapa Jjii eyiyo bajjani Jenosanena pejejo nequi. Huesha'ama. Jamajjeya Jodio cuaa quea huisohua Pinatoja etehue'yo ba canaje. Ma etehue'yo Jodioja esohuijo tehue mee canaje, Shomano dejjaja esohuijo pea'ai, Jienoja esohuijo pea'ai tehue mee canaje, Pinatohua. <sup>21</sup> Jamajjeya Jodioja Eyacuiñajji nijje emimijji etii cuana Pinatoja etehue'yo Jesusajo ba majje Pinato que poqui o'oyanaje. Huohui cañaquinaje jama ba'a: —¿Apiojji acuae miyaya tehue meenaje Jesusajo maya? Chojja, a'a jama tehueji ba'a: “Jesosa Jodio cuanaja Emeshi Mese nei”. Jama tehueme acue ba'a: “Oya aje ca jja oe jama pojea'ajja nequinaje ba'a: —Eya Jodio cuanaja Emeshi Mese —poso poanaje”. Oya Jesosa ecuanaja Emeshi Mese nei pojjeama, de —Jodio etii cuana poanaje.

<sup>22</sup> —Chojja. Jamatii. Apoa ecuea etehue mee'yo —Pinatohua oya cuana acanaje.

<sup>23</sup> Majoya Jesosa ba'ehuanasohuajeyo'yo majje ebeca pee pea'ai sohuinano cuaa oja daqui cuana chicha ca'yonaje. Iyachicha'yo majje peaa jjeshe'yo, peaa jjeshe'yo acanaje

cuaa. <sup>24</sup> Majoya oja daqui nei esipi bame iña canaje. Esipi aojo, esoco pojjeamajo jama poanaje ba'a: —¡A'a isajeajji! —poanaje.

Jamajjeya sohuinano cuaa quebanei po majje daqui nei majjo ca'yonaje ojaya pojji epo'yojji. E'e, joya ecua Eyacuiñajji esohui huohuijjiya yahuajo nei nei tehue ca poa jayojja jama acanaje sohuinano cuaa. Ma etehue'yo jama poa ba'a:

“Ecuea daqui iña caje. Ojjaña jjeshe caje pea jayojjaa. Ecuea daqui ao iña majje, quebanei po majje daqui majjo caje'yo ojaya epo'yojji”.

Yahuajo nei nei tehue ca poa. Jamaya Jesusaja daqui acanaje, sohuinano cuaa.

<sup>25</sup> Jesosa acui ecueata'apeejo ba'e pejejo nequinaje ojaya enaese Mania oja shehue nijje, Queopaja ehuanase Mania bajjani nijje, pea Mania Madanena cuiñajji ba'e nijje pea'ai. <sup>26</sup> Jamajjeya Jesusaa enaese ba canaje enijje nequi. Eya aje oe Huani bajjani, Jesusaja quea jea nee nee. Jamajjeya Jesosa ojaya enaese nijje jama poanaje ba'a: —Ecue nae, Huani miquea ebacua ejja jayojja poaje'yo, mi jaahuanajji.

<sup>27</sup> Majoya eya acanaje: —Huani, ecue nae miquea enaese poaje. ¡Oya jaahuanacue! —Jesusaa acanaje.

Jamajjeya eyaya Jesusaja enaese Mania ecuea equi yasijje dojo'yonaje enijje eba'e'yojji.

#### *Jesosa mano'yonaje*

(Mateo 27.45-56; Macoso 15.33-42; Noca 23.44-49)

<sup>28</sup> Jesusaja eba poanaje ojaya ojjaña oja Chijja esohui jayojja ajeyo canaje. Apoa poanaje. Jamajjeya Eyacuiñajji esohui yahuajo nei nei jayojja jama poanajo Jesosa taaanaje jama ba'a: —Eya quea naba taja nee nee.

<sup>29</sup> Jomajo oe meshimisijo nequinaje acuijjajja na sese. Jamajjeya shajashaja iyanobia canaje ena ejequi yasijje. Majoya bequiobo sajo quecuahuosho majje Jesusaja enaba huasijje huo canaje ojaya e'ishijji. <sup>30</sup> Jjequibibi majje ishi canaje, Jesusaa. Ishi majje jama poanaje ba'a: —Apoa. Ojjaña Eyacuiñajji ehuohui'yo jayojja jama eyaya ajeyo'yonaje —poanaje. Jama mimime po majje Jesosa mano'yonaje, poquijeyo'yonaje.

#### *Jesosa mape quecua canaje sohuinano cuaa*

<sup>31</sup> Majoya Jodio etii cuana Pinato que poqui o'oyanaje. Ba majje jama poanaje ba'a: —Emeshi mese Pinato, ¡dejja cuana eba'ehuanasohua ba'eja equise sa' cuiasajajea meecue! Jamajjeya mano cuajije. Mano'yajo ijjequioquea meecue meshi yasijje emojeajji! —Jodio etii cuana poanaje.

Jamaya jjashahuabaquime poanaje ba'a: —Mecahuajje epojja ejomishocajji, ojee e'ijjia'ijjiajji quea bihui nee pea'ai. Jamajjeya ¡oya cuana jjeya nei camano mee cahua! ¡A'a mecahuajje ba'e meeji acui ecueata'apeejo! —jjashahuabaquinaje Jodio etii cuana.

<sup>32</sup> Jamajjeya Pinatohua sohuinano cuana huoojea canaje. Poe majje sohuinano cuaa dejja mimishi cuana quise sa' cuiasajajea canaje, ma Jesosa pejejo acui ecueata'apee cuanajo ba'e. <sup>33</sup> Majoya Jesosa ba canaje emano'yo. Jamajjeya oya quise sa' cuiasajajea jjima acanaje. <sup>34</sup> Jamatii oe sohuinanohua Jesosa emapejje quecua canaje emeje aohua. Quecua cajje ena huo'o, ena oshe tejje pea'ai cuayaquinaje. <sup>35</sup> Eyaya, Huani bajjaniya, banaje ecuea ecojjaa. Jamaya poanaje ba'a: Sohuinano cuaa Jesosa ba'ehuanasohuajje majje oya emano'yo ba'e quecua canaje pea'ai. Oya quise sa' cuiasaja jjima acanaje. Jjeya eyaya jamaya tehueña. Jamajjeya ojjaña cuana ba meeje ecuea ehuohui Jesusajo e'e jojo nei. Eya siajpepojji pojjeama. <sup>36</sup> E'e, Eyacuiñajji esohui etehue'yo yahuajo nei Jesusajo jama poanaje ba'a: “Ojaya esa' cuana pea cuanaja ecuiasaja'yojji pojjeama”. Ma ecua Eyacuiñajji esohui tehue mee ca'ya poa jamaya Jesosa acanaje cuaa.

<sup>37</sup> Pea Jodio etiiquianaja etehue'yo yahuajo nei jama poa ba'a: “Oya quecua cajo, ojjaña cuaa oya ba caje'yo ecojjaa”. Jamaya tehue ca'ya poa yahuajo nei nei Jesusajo.

#### *Jesosa mei jjani ai yasijje huananobia canaje*

(Mateo 27.57-61; Macoso 15.42-47; Noca 23.50-56)

<sup>38</sup> Majoya Jesosa mano'yo majje ojaya epeejji Jose bajjani poeyanaje, pea Jose, Amatea meshijo ba'e. Oya Jodio cuanajo quea metejo quehuajje jjapeequi'yonaje Jesosa nijje

yahuajo. Poe majje Jose Pinato huasijje poquinaje. Pinato ba majje huohui'ajja canaje Joseya: —Emeshi mese Pinato, Jesosa mano'yonaje. ¡Eyaya oya jjani yasijje cadojo'yahua ehuananobia'yojji! —poanaje.

—E'e, ¡dojocue! Eyaya sohuinano cuana jamaya huohuime aje —huoojea canaje Pinatohua.

Jamajoya Jesusaja epeeji cuaa oya emano'yo acui ecueata'apeejo ba'e jjequioquea'yo majje dojo canaje jjani yasijje huananobiaa. <sup>39</sup> Nicodemo, ma yahuajo Jesosa nijje miminaje mecajje, Jose nijje poquinaje Jesosa dojhua. Nicodemohua shiyeshiye pohuipohui, acui shiye sajja pohui quea shiye quea nahue pea'ai dojo canaje Jesosa shicuijji. Quea huiso nee nee dojo canaje 50 quinome. <sup>40</sup> Jamajjeya Jesosa dojo majje shiyeshiye pohuipohuiya shicui canaje. Majoya daqui oshe eyacua neijo bebo canaje. E'e, jamaya Jodio cuaa acani emano'yo cuana ehuananobiajji mei jjani yasijje. <sup>41</sup> Jamajjeya Jesosa eyiyo Sapa Jjii bajjanijo acui ecueata'apeejo eba'ehuanasohua ba'e jjequioquea'yo majje shiyeshiyeya shicui canaje. Shicui majje dojo canaje que quea chipi nee yasijje, mei jjani jjeya nei teo huasijje. <sup>42</sup> Ma mei jjani quea chipi nee poanijo, ojaya epeeji cuaa Jesosa jomajo huananobia ca'yonaje sinecua nei. Jodio cuanaja epojja ejomishocajji poanijo Jesosa huananobia cuaji canaje. Mei copo quea quemohua esecue jjani jaja ca'ajeana'yo majje p oqui'y onaje.

## 20

### *Jesosa shequi o'oyanaje*

(Mateo 28.1-10; Macoso 16.1-8; Noca 24.1-12)

<sup>1</sup> Majoya mecajjeahua nei nei jjaja'a'ajjaqui jjimahuajo ebionei jjapojjaquiajo, nomico pojjajo Mania, pea Mania Madanenajo ba'e poquinaje mei jjani yasijje. Ba cañaquinaje mei copo quea quemo jjani capajji'ya ejeacajjajja. <sup>2</sup> Ba majje Mania cuajicuajipoquinaje Simohui Peno huohuiya, e huohuiya pea'ai. E'e, eya Jesusaja epeeji, ojaya quea jea nee nee. Jamajjeya poe majje Maniaa huohui cañaquinaje jama ba'a: —Jesosa dojo canaje cuaa. Jesosa aje oe mei jjanijo chama' nei nei. ¿Achacua shai dojo canaje cuaa? Ecuea ba jjima —poanaje Mania, jjashahuabaqui jjima.

<sup>3</sup> Jamajjeya Peno enijje poquicujinaje mei jjani yasijje. <sup>4</sup> Ecuana ojee cuajicuajinaje. Eyaya cuajicuaji neinei majje ebionei mei jjani bañaquinaje. Peno ca ca quijje pishana poeyanaje. <sup>5</sup> Poe majje, eya jjacueanohuequi majje ye'e'ajjanaje. Daqui oshe banaje e'iyacoca'yo ani. <sup>6</sup> Majoya Simohui Peno e quiquishijji poeyanaje. Oya mei jjani ai yasijje dobiquinaje. Daqui oshe ba canaje meijo e'iyacoca'yo ani. <sup>7</sup> Pea daqui oshe Jesosa sapa bebojji'ya o sapa jaanajejo tii e'iyacoca'yo ani ba canaje pea'ai. <sup>8</sup> E'e, eya ebionei mei jjani yasijje poeyanaje. Jamatii Peno dobiquiyajo, eya dobiquinaje pea'ai. Banaje e'e jojo nei Jesosa chama'. Daqui e'iyacoca'yo ani ba majje eya jjashahuabaquinaje jama ba'a: —¡E'e de! E'e jojo nei Jesosa emano'yo tii jaa shequi'yonaje. Ma ecua yahuajo ohuaya huohui canaje jamaya oya po'yonaje.

<sup>9</sup> Eyacuiñajjija esohui etehue'yo Jesusajo jama poa ba'a: “Quito mano'yo majje shequije'yo”. Jamatii yahuajo ma etehue'yo ecuanaja quea quehua poanaje.

<sup>10</sup> Majoya jjani aijo Jesosa chama' ba majje eya Peno nijje equi yasijje poqui o'oyanaje.

### *Mania Madanena Jesosa ba ca o'oyanaje*

(Mateo 28.9-10; Macoso 16.9-11)

<sup>11</sup> E'e, eya, Huani, Peno nijje equi yasijje poqui o'oyanaje. Jamatii Mania equi yasijje poqui'yo jjima. Mei jjani pejejo pa aninaje. Oya pea'ai jjacueanohuequinaje eye'e'ajjajji. <sup>12</sup> Ba canaje beca esohuidojojji. Ojaya daqui quea oshe nee nee, bo oshe nee nee jayojja poanaje. Shequi o'oya jjimahuajo Jesosa mei jjani dojjojo jaanaje pea mei biajje. Jjeya ca ca beca esohuidojojji cuana anioquenaje Jesosa jaanaje mei biajje. Jesosa sapa jaanajejo oe esohuidojojji aninaje. O jiojji jaanajejo pea aninaje. <sup>13</sup> Esohuidojojji cuaa Mania jama acanaje ba'a: —Epona, ¿yajjaje acuae mi pani so'o?

—Ecuea Emeshi Mese Jesosa dojocuayaqui canaje cuaa. ¿Achacua shai dojo canaje? Ecuea ba jjima —Mania poanaje.

<sup>14</sup> Jamaya mimi majje Maniaa Jesosa baja canaje. Jamatii oya Jesosa eque mese poso acanaje, Jesosa pojjeama poso acanaje.

<sup>15</sup> Jamajjeya Jesosaa oya jama acanaje ba'a: —Epona, ¿apiojji acuae mi pani? ¿A'ya cuae miyaya sa'ajjaña so'o? —Jesosa poanaje.

—¿A'a miya eque mese? ¿A'a miyaya oya dojonaje pojja'a? ¿Che mo oe huohuicue achacua oya dojonaje! Eyaya oya dojaje'yo shiyeshiye shicuiya —Mania poanaje.

<sup>16</sup> —¡Mania! —Jesosa poanaje.

Jesosa mimije shajja'ajja majje Maniaa oya ba canaje Jesosa. Jamajjeya Maniaa oya jama acanaje ba'a: —¡Ecuea esohui huohuijji miya! —poanaje Mania, Jodioja esohuijo—. ¡Raboni! —poanaje.

<sup>17</sup> —Mania, ¡a'a eya iña neineiiji! ¡Eya capoquiahua ecue Chii ani yasijje! ¡Jjeya poquicue; ecuea epeeji cuana huohuicue miyaya! Jama oe acue ba'a: “Jesosa jama poanaje ba'a: —Jjeya eya poquije'yo ecue Chii eyajo ani yasijje, mique Chii eyajo ani yasijje pea'ai. E'e, eya poquije'yo Eyacuiñajji ani yasijje. Oya Eyacuiñajji miquianajaya Chii pea'ai” jamaya aquicue ecuea epeeji cuana —Jesosa poanaje.

<sup>18</sup> Majoya Mania Madanena poquinaje Jesusaja epeeji cuana ani yasijje. Ecuana nijje jama poanaje ba'a: —¡Shajja'ajjacue oe! Eyaya Jesosa ba'yonaje; e'e jojo nei eshe ca coma.

Jamaya huohui majje Mania Madanena ma Jesusaa huohui canajeya ecuana huohui canaje.

*Jesosa ojaya epeeji cuana huasijje poe'yonaje*

(Mateo 28.16-20; Macoso 16.14-18; Noca 24.36-49)

<sup>19</sup> Quijje nomico pojjaajo sinecuajo ecuana Jesusaja epeeji ojee aninaje equijo. Jodio yajjajo esecue eca'a nequinaje. Jamatii Jesosa equijo ecuana nijje jjaja'aqui'yonaje. Ecuana nijje miminaje jama ba'a: —¡Quea bei nee pocue miquianaya! —poanaje.

<sup>20</sup> Majoya Jesusaa ecuana ba mee canaje onaja quecuahuejjajea oja eme jjoto, ojaya emape onaja quecua pea'ai ba mee canaje. Jesosa ba majje ecuana quea bihui nee nee poanaje. <sup>21</sup> Jesusaa ecuana huohui ca o'oyanaje jama ba'a: —¡Quea bei nee nee pocue! Yahuajo ecue Chiiya eya huoojea canaje ojaya echacojji. Jamaya jjeya eyaya miquianaya huoojeaña ecuea esohui huohuiya —Jesosa poanaje.

<sup>22</sup> Majoya Jesusaa ecuana huasijje sipojea majje huohui canaje jama ba'a: —¡Edojjoshahua Pame miquiana huasijje cadobiquiahua! <sup>23</sup> E'e, ¡miquianaya ecuea esohui huohuijji pocue! Jamajjeya ojjaña joya oja mimishi pajea sa poani miquianaaya huohuicue ejo jama ba'a: “E'e, Eyacuiñajjiya miquea mimishi cuijea ca'yonaje”. Mimishi pajea sa po ajjajo ca ca huohuicue jama ba'a: “Eyacuiñajjiya miquea mimishi ecuijea'yoyji pojjeama” —Jesosa poanaje.

*Jesosa Tomasi nijje miminaje*

<sup>24</sup> Jesosa ecuana nijje, o shajja'ajjajji cuana nijje jjaja'aqui'yonajejo, Tomasi, Beca Jaa bajjani chama' poanaje. <sup>25</sup> Jamajjeya ecuaaya Tomasi huohui majamajanaje jama ba'a: —E'e jojo nei ecuaaya Jesosa ba'yonaje. ¡Eshe ca coma! —ecuanaa anaje.

Jamatii Tomasiya saja'a canaje jama ba'a: —E'e pojja'a. Chojja, de. Equecuahuejja ojaya eme jjoto huejja cuana ba majje, napa'ajja majje, ojaya emapejje esi' napa'ajja majje pea'ai ecuea eba poaje Jesosa e'e jojo nei eshe —poanaje Tomasi; Jesosa shequi'yo ajja poso acanaje.

<sup>26</sup> Quijje me oejje pea beca cahuime, 7 po majje ecuana ma equijo ojee ani o'oyanaje Tomasi nijje pea'ai. Esecue eca'a nequinaje pea'ai. Jamatii Jesosa ecuana nijje jjaja'aqui o'oyanaje. Ecuana nijje mimi o'oyanaje jama ba'a: —¡Quea bei nee nee pocue! —poanaje.

<sup>27</sup> Majoya ohuaya Tomasi huohui canaje: —Tomasi, ¡ecuea eme bacue! ¡Eme jjoto equecuahuejja napa'ajjacue eme sisiya! ¡Emapejje esi' pea'ai napa'ajjacue! ¡Bacue eya eshequi'yo e'e jojo nei! ¡A'a eya edojjoshahua poso ajji! —Jesosa poanaje.

<sup>28</sup> —Jesosa, miya ecuea Emeshi Mese nei, Eyacuiñajji —Tomasiya oya bihuia canaje.

<sup>29</sup> —Tomasi, miya e ba majje jjabahuejjaquinaje eya e'e jojo nei eshequi'yo. Pea cuanaja ba jjima ecuea eme jjoto huejja, emape si' pea'ai. Jamatii oya cuana jjabahuejjaquije ejo, eya eshequi'yo. Jamajjeya joya cuana e'e jojo nei quea bihui nee capoahua! —Jesosa poanaje.

*¡Huanija etehue'yojo jjabahuejjaquicue!*

<sup>30</sup> Jesosaa quea huiso pea ma dejjaa ajjima acani acanaje. Maya ecuanaa, o shajja'ajjajji cuaa banaje. Jamatii eyaya, Huani bajjaniya maya tehue jjima jiquio etehue'yojo. <sup>31</sup> Jiquio ecuea etehue'yo eyaya tehuenaje miquiana jjabahuejjaquijji. Jamajjeya jiquio etehue'yo ba majje miquianaya jjabahuejjaquije Jesosa e'e jojo nei Eyacuiñajjija huoojea'yo ojjaña jaahuanajji. Oya Eyacuiñajjija Bacua Ejja nei. E'e, miquianaya majoya e'e jojo nei jjabahuejjaquiajo, Jesosaa miquianaya ba'e tiitii mee caje'yo onijj e eyajo.

## 21

*Jesosa ba ca o'oyanaje ojaya epeeji cuaa me oeje beca huisomeya*

<sup>1</sup> Quijje ecuaana Janinea bae yasijje poqui o'oyanaje. Jomajo Jesosa ecuaana nijje, ojaya epeeji cuana nijje jjaja'aqui o'oyanaje. Jama poanaje ba'a: <sup>2</sup> Simohui Peno, Tomasi Beca Jaa bajjani nijje, Natanaeni ma Canajo, Janinea meshijo ba'e nijje, ecuanaya Semeneoja bacua ejja eya, ecue o'i Jacobo nijje, pea beca dejja nijje pea'ai bae sahuajo aninaje. Mahuisoya ecuaana ojee aninaje. <sup>3</sup> Peno ecuaana nijje jama poanaje ba'a: —Eya ca iña poquije'yo nahuoo cuiashajaa.

—E'e, ecuaana minijje poquije'yo —saja'ame anaje ecuaa.

Jamajjeya ecuaana poqui'yonaje bae sahuajje. Bishe ai yasijje aninaje. Mecajje ecuanaa nahuoo cuiashaja'ajja nequinaje tii tii. Jamatii mecajjeahua jjaja'aqui jjimahuajo nahuoo cuiashaja jjima; chama' poanaje. <sup>4</sup> Mecajjeahua nei Jesosa bae sahuajo nequinaje. Jamatii ecuanaja bishejo nequija oya ba jjima poanaje Jesosa. <sup>5</sup> Jesosa ecuaana huasijje taaanaje jama ba'a: —Epeeji cuana, ¿a'a nahuoo cuiashajanaje miquianaaya? —huohui'ajja acanaje.

—¡Chojja, chama! —saja'ame ecuaa anaje.

<sup>6</sup> —¡Eshajjiji jeacue ena huasijje pea mijijje, bishe ebianeij mijijje! Jomajo ani nahuoo cuana —Jesosa poanaje.

Jamajjeya ecuaaya eshajjiji ebianeij mijijje jea majje quea huiso nahuoo cuiashajanaje. Quea biquie nee neejo nahuoo cuana jjequisohua jjima anaje bishe yasijje. <sup>7</sup> Jamajjeya eya Peno nijje jama poanaje ba'a: —Peno, maya Jesosa nequi, e'e nei —eya poanaje.

E shajja'ajja majje Simohui Penohua oja daqui huosho ca'yonaje. (E'e, chacochoanijo oja daqui ao huijiajea canaje.) Daqui ao huosho'yo majje tohuanaanaje ena huasijje Jesosa que besapoquiya. <sup>8</sup> Eyaya ca ca pea cuana nijje bishe yonaje meshijaji sahua huasijje. Nahuoo dojobesanaje eshajjijijo, enajo ba'e. Meshijaji huesha'ama, iye huesha nei, beshahua nei quea huesha 100 metros huesha nei. <sup>9</sup> Ba'eñaqui majje ecuanaa banaje Jesosaja nahuoo jiñaqui cuaquijo. Pahui yani equemijji pea'ai. <sup>10</sup> Majoya Jesosa ecuaana nijje jama poanaje ba'a: —¡Nahuoo cuana miquianaja cuiashaja'yo jja oe jjequicue edahuajji!

<sup>11</sup> Jamajjeya Simohui Peno bishe yasijje ani o'oya majje nahuoo cuiashajjiji meshijaji yasijje jjequisohua sahua canaje. Majoya pejo majje nahuoo banaje quea huiso nee nee, 153 huisome. Ojjaña quea quemo nee, de. Quea biquie nee. Jamatii eshajjiji quecuasejjajea jjima poanaje.

<sup>12</sup> Majoya Jesosaa ecuaana jama acanaje ba'a: —E'e, ¡poecue! ¡Nahuoo ijjiahuacue! — poanaje.

—¡Ocuae! ¡Ca'ijjiahua! —ecuaana poanaje. Ecuanaja eba oya Jesosa. Jamajjeya oya huohui'ajja jjima jama ba'a: —¿Ae bajjani acuae mi so'o? —ajjima ecuanajaya.

<sup>13</sup> Majoya Jesosaa pahui cuaqui pejejo ani jjeshe majje ecuaana quia ca'yonaje e'ijjiajji, nahuoo pea'ai.

<sup>14</sup> E'e, Jesosa mano'yo majje shequi o'oyanaje. Oya ecuana huasijje poe'yonaje. Jjeya pea beca peejjima jjaja'aqui'yome po'yonaje.

*Jesosa miminaje Peno nijje*

<sup>15</sup> Majoya ecuana ijia'ijia majje Jesosa miminaje Peno nijje. Jama poanaje ba'a: —Peno, Huanija bacua ejja, ¿a'a miyaya eya quea jea nee nee añã? ¿A'a jiquio pea cuanaja eya quea jea pishana, miquea eya quea jea nee nee? —Jesosaa oya huohui'ajja canaje.

—E'e Emeshi Mese, eyaya miya quea jea nee nee añã. Jamaya miquea eba —Peno poanaje.

—Jamajjeya ¡ecuea epeeji enijje jjeya nei jjapeequiani huasijje ecuea esohui huohuicue! Oya cuana ñajjajaja ebacua cuana jayojja jama; jamatii ani poquiquehua chana'.

<sup>16</sup> Majoya Jesosaa oya huohui'ajja ca o'oyanaje jama ba'a: —Simohui, Huanija bacua ejja, ¿a'a miyaya eya quea jea nee nee añã? —poanaje.

—E'e, Emeshi Mese, eyaya miya quea jea nee nee añã. Jamaya miquea eba —Peno po o'oyanaje.

—Jamajjeya ¡ecuea epeeji enijje jjeya nei jjapeequiani jaahuanacue! Oya cuana ñajjajaja ebacua jayojja jama; ca'a'ama —Jesosa poanaje.

<sup>17</sup> Jesosaa pea beca peejjima huohui'ajjame acanaje Peno jama ba'a: —Simohui, Huanija bacua ejja, ¿a'a miyaya eya quea jea nee nee añã? —po majamajanaje.

Peno quea yeno poanaje Jesosaja pea beca peejjima huohui'ajjame acajje. Jamajjeya Penohua Jesosa saja'a canaje jama ba'a: —Emeshi Mese, miquea eba ojjaña. Jamajjeya miquea eba eyaya miya quea jea nee nee añã —Peno poanaje.

—¡Ecuea epeeji jjeya nei enijje jjapeequiani jaahuanacue! —Jesosaa oya aca o'oyanaje —. <sup>18</sup> Peno, e'e jojo nei eyaya miya huohuiaña jama poaje ba'a: Miya esho'yahuajo miquea daqui huosho majje cua mi poqui sa poani yasijje miya poquinaje. Quijje ca ca miya tii'yajo, me jeyo majje dojo caje cuaa. Ojaya ejjashahuabaqui'yojji jayojja jama miya acaje'yo cuaa —jamaya Jesosa poanaje.

<sup>19</sup> Ojaya ehuhuijo Peno ba mee canaje quijje nei oya manoje'yo eme jeyo. Cuanaya quijje nei Peno mano'yajo, ojjaña ba mee caje'yo Eyacuiñajji quea pame nee nee quea ca'a nee nee poani tii tii. Majoya Jesosaa Peno huohui canaje jama ba'a: —Peno, ¡enijje jjapee neineiquicue! —Jesosa poanaje.

<sup>20</sup> Majoya Penohua baja canaje. Eya, Huani ba canaje o quiquishi poeyani. Yahuajo eya Jesosa pejejo ijia'ijianaje, eya ojaya quea jea nee neejo. Ijia'ijianajo eyaya Jesosa huohui'ajjanaje jama ba'a: “Jesosa, ¿a'ya cuae mi iña meesahuajji epojji?” eyaya anaje.

<sup>21</sup> Penohua e ba majje Jesosa huohui'ajja canaje: —¿Jesosa, yajja acuae Huani acaje cuaa so'o? —poanaje Peno.

<sup>22</sup> Jesosaa Peno saja'a canaje jama ba'a: —Peno, ¿apiojji shai miyaya Huanijo huohui'ajjaña so'o? E'e pojja'a eyaya Huani ecuea epoe o'oyajjijo ba'e mee sa añã. Jamatii. ¡Miyajja oe enijje jjapee neineiquicue! —Jesosa poanaje.

<sup>23</sup> Jesosaja esohui shajja'ajja majje ojjaña Jesosaja epeeji cuana huasijje huohuiqui canaje cuaa jama ba'a: —Huani ca pa jjaja ca oe mano'yo ajja poaje, de —poso acanaje cuaa.

Jamatii Jesosaja huohui jjima jama ba'a: “Huani emano'yojji pojjeama”. Chojja. Ohuaya jama huohui canaje ejo ba'a: “Peno, ¿apiojji acuae miyaya Huanijo huohui'ajjaña so'o? E'e pojja'a eyaya Huani ba'e mee sa añã ecuea epoe o'oyajjijo, jamatii. ¡A'a peajo jjashahuaba majaquijji! ¡Enijje oe jjapee neineiquicue, miya!” poanaje Jesosa Peno nijje.

<sup>24</sup> Eya aje oe Huani bajjani Jesosa shajja'ajjaji poani. Ojjaña ecuea etehue'yo Jesosajo e'e jojo nei. Eyaya aje jja oe banaje ojjaña Jesosaa acaninaje cuana. Jamajjeya miquianajaya eba ecuea esohui Jesosajo e'e jojo nei. <sup>25</sup> Jesosaa pea ma dejjaa ajjima acani quea huiso nee nee acaninaje cuana. Ojjaña ohuaya acaninaje cuana etehue poquia jojjemo quea huiso nee nee pome. Chama' pome papeni etehue'yo huanajji ojjaña meshijo, ca ojjaña Jesosaja esohui etehue poquia jojjemo.

Mahuiso ecuea esohui etehue'yo. Eyaya Huani bajjaniya esohui tehuejeyonaje. Apoa.

EDOJJOSHAHUA PAMEYA JESOSAJA EPEEJJI PEA  
JJASHAHUABAQUIME PO MEE CANI  
LOS HECHOS

*¡Ishoacue Edojjoshahua Pameja epoejji! —Jesosa poanaje*

<sup>1</sup> Ecuea epeejji Teopino, eyaya, Noca bajjaniya jiquio esohui tehueaña miquea ebajji. Yahuajo eyaya miya huohuinaje Jesusajo ma ohua acanaje oja Chiija jjequisohua'yo jjimahuaa. Ojaya ehuhui cuanajo pea'ai eyaya tehuenaje. Maya eyaya mi que tehuenaje ecuea ebionei esohui etehue'yojo. <sup>2</sup> E'e, eyahuasijje sohuaqui'yo jjimahuaa Jesusaa Edojjoshahua Pame nijjeya o shajja'ajjajji cuana sohuihuohui canaje. Ma dejja cuana oja babaca'yo, oja huoojea'yo cuana ojaya esohui huohuijji epojji. <sup>3</sup> E'e, Jesosa yahuajo quea nee nee poanaje. Mano'yanaje. Mano'yo majje shequi o'oyanaje. Shequi o'oya majje oya poe o'oyanaje o shajja'ajjajji cuana huasijje. Quea huiso ma dejjaa ajjima acani acanaje Jesusaa quea ja'a nee nee, ojjaña ebajji oya e'e jojo nei eshe o'oya. Jesusaa oya cuana ba mee canaje Eyacuiñajji eyajo ojjaña huoojeajji poani. Shequi o'oya majje Jesosa oya cuana nijje nequi o'oyanaje quea huiso cahuime, 40 cahuime. <sup>4</sup> Ijjia'ijjia aniya ohuaya oya cuana huohui canaje jama ba'a: —¡Jenosanena cuiñajji esecue yasijje a'a cuayaquijji! Eyacuiñajjiya ojaya esohui jayojja jama acaje'yo; ojaya Edojjoshahua Pame huoojea caje miquiana que dobiquiya. ¡Ishoacue Edojjoshahua Pame! Yahuajo eyaya miquianaya jamaya huohuinaje —Jesosa poanaje—. <sup>5</sup> E'e, Huaniya yahuajo pishana quea huiso cuana enajo besa mee canaje Eyacuiñajji. Quijje pishana ca ca Edojjoshahua Pame miquiana que dobiquije'yo —Jesosa poanaje.

*Jesosa Eyacuiñajjiya eyahuasijje jjequisohua ca'yonaje*

<sup>6</sup> E'e, o shajja'ajjajji cuaa onijje nequi o'oya majje Jesosa huohui'ajja canaje jama ba'a: —Emeshi Mese Jesosa, ¿a'a jjeyahua nei miya Isaeni cuanaja Emeshi Mese poaje'yo jiquio meshijo? —acanaje cuaa.

<sup>7</sup> Jesusaa oya cuana saja'a canaje: —Cua'a, Eyacuiñajjiya eba ojaye nei, esejaya Chii eyajo anija ojaya eba. Ache shono, ache ba'ljo shai miquianajaya ba jjima. <sup>8</sup> Jamatii, Edojjoshahua Pame miquiana que dobiqui majje ohuaya miquianaya sohuihuohui meesahua caje quea ja'a nee. Miquianaya ecuea esohui huohuijji poaje'yo. ¡Jenosanenajo, Jodio meshijo, Samania meshijo, ojjaña meshi quea huesha nee yasijje pea'ai ecuea esohui huohuiquicue! —Jesosa poanaje.

<sup>9</sup> Jamaya huohui canijo tii, onaaya ba neinei caqui tii, Eyacuiñajjiya Jesosa jjequisohua ca'yonaje eyahuasijje. Bo dojjo huasijje dobiqui'yojo, oja epeejji cuaa oya ba pajea ca'yonaje. <sup>10</sup> Jesosa ba'esohuaquianijo, ojaya epeejjiya eyahuasijje ba neinei caquijo tii, Eyacuiñajjiya esohuidojojji cuana becanejjijji pea'ai jjanequipanaquinaje ona nijje. Ojaya daqui quea oshe nee nee poanaje. <sup>11</sup> Oya jama poanaje ba'a: —Miquianaaya, Janinea meshijo ba'e cuaa, ¡shajja'ajjacue mo! Miquianaaya Jesosa banaje ba'esohuaquije'yo eyahuasijje. Qui'ajjaya oya poeje o'oya quijje, e'e jojo nei —esohuidojojji poanaje.

*Matia babaca canaje cuaa Jesusaja huoojea'yo esohui huohuijji epojji Jodasa jjoco cuiña'yojji epojji*

<sup>12</sup> Jjeyahua nei Jesusaja epeejji cuana acuijjajja yiyejo, Onimo jjajja yiyejo nequi Jenosanena huasijje poqui o'oyanaje; huesha'ama poanaje, beshahua nei beca mil metros. <sup>13</sup> Oya cuanaja ojaya equi yahuajo aninaje yasijje dobiqui o'oyanaje. Ejamacoo equecuayijji ai yasijje dobiqui o'oyanaje mahuiso ba'a: Peno, Jacobo, Huani, Anesi, Penipe, Tomasi, Batanomee, Mateo, Simoni Senote, Apeoja bacua ejja Satiaco, oja chahua Jode bajjani pea'ai; mahuisoya. <sup>14</sup> Oya cuana epona cuana nijje, Jesusaja enaese Mania pea'ai, Jesusaja echahua mese cuana pea'ai Eyacuiñajji nijje mimi majamajanaje, ojjaña.

<sup>15</sup> Quijje pishana ojjaña jjachichaquinaje quea huiso nee; beshahua nei 120 huisome yaninaje. Majoya Peno nequisohuanaje emimijji. <sup>16</sup> Jama poanaje ba'a: —Ecuea epeeji cuana, Eyacuiñajjija esohui yahuajo nei etehue'yo jayojja jama jjeyahua nei apoa poanaje. Edojjoshahua Pameya yahuajo Dabi huohui meesahua canaje Jodasajo, ma Jesosa iñameeji poanaje onajaya equecua'yojji. <sup>17</sup> Yahuajo Jodasa ecuaa niije nequinaje. Jesosaa oya babaca canaje. Jamatii oya esohui huohuijji nisho poanaje. <sup>18</sup> Jodio etii cuaa aje oe Jodasa ejjesheji quia canaje Jesosa iña meesahua sosejje. Ma Jesosa sosejje quia bejjo meshi jjesheji acanaje cuaa. Quijje Jodasa acui aajo jjanaaninequiaqui majje tohuanaanaje mishi yasijje; oquequinaje janobajjima nei. Jjajjono seijaqui majje jjasapa cuiapojojeaquiñaquinaje. Jjamajjii cuiapojojeaquiñaquinaje. See ai cuayaquinananaje pea'ai. <sup>19</sup> Ojjaña Jenosanenajo ba'aja Jodasa eba poanaje jomajo mano'yonaje. Jamajjeya oya cuaa ma meshi bajjani canaje Asedama meshi ojaya esohuijo. Ese Ejja esohuijo Ena' Cuayaquinaje Meshi bajjani acanaje cuaa. <sup>20</sup> E'e, yahuajo nei Dabiya esohuicuayajjijo Salmojo jama tehueme aca poa ba'a: “Ojaya equi cajiña ca'yahua tii. ¡A'a equi cuiña mee'yojji!” Jama yahuajo nei tehue ca poa ojo pea'ai ba'a: “Eyaya oya cajaa anaje. Jamajjeya peaa ecuea esohui cahuohui cahua” jamaya yahuajo nei tehue ca poa Jodasajo.

<sup>21</sup> —Jamajjeya Jodasa chamajo pea dejja ejjababacaqui ecuaa niije esohui huohuijji. Ejjababacaqui joya Jesusaja esohui shajja'ajjajji epo nei, ma Jesusaa dejjaa ajjima acani ba epo nei, joya ese niije Jesusaja epeeji poanaje. <sup>22</sup> E'e, joya yahuajo Jesosa Huaniya enajo besa mee caqui ba epo ejjababacaqui; joya Jesosa niije tii jjapeequinequinaje, eyahuasijje sohuaquije'yo ba epo. Jamajjeya ma dejjaa ecuaa niijeja Jesosa shequi'yonaje cahuohui cahua —Peno poanaje.

<sup>23</sup> Jamajjeya ojjaña cuaa becanejjijji pea'ai dejja babaca ca'yonaje. Matia, pea Jose Basaba, ojaya pea bajjani Josoto. <sup>24-25</sup> Babaca majje oya cuana Emeshi Mese nei niije eyajo ani niije miminaje jama ba'a: —Emeshi Mese nei, miquea eba ojjañaja ejjashahuabaquijji cuana. ¡Ecuaa ba meesahuacue ache edejja miquea ehabaca miquea ehoojea'yo epojji! E'e, Jodasa miquea esohui pajea'yo majje mano'yonaje; cuaqui yasijje poqui'yonaje. Jamajjeya Jodasa chamajo peaa miquea esohui cahuohui cahua —jamaya Eyacuiñajji niije miminaje cuana.

<sup>26</sup> Majoya oya cuana quebanei jayojja poanaje ache dejja esohui huohuijji nequije ebajji. Babaca canaje Matia esohui huohuijji poaje. Jamajjeya Matia pea 11 huisome niije nequi'yonaje Jesusaja huoojea'yo esohui huohuijji epojji.

## 2

### *Edojjoshahua Pame Jesusaja epeeji cuana huasijje poeyanaje*

<sup>1</sup> Bobi chichajji shejo, Petecote pojjajo bobi chichajeyo majje Jodio cuana quea bihui nee ojee ijja'ijja aninaje. Ma pojjajo Jesosa shajja'ajjajji cuana, oja huoojea'yo esohui huohuijji cuana pea'ai, pea epeeji cuana niije ojee jjachichaquinaje oe equijo. <sup>2</sup> Jjeyahua nei Edojjoshahua Pame beni quea quemo jjaqueyaquiani jayojja eyajo shajja'ajja canaje ojjaña. Edojjoshahua Pame equi yasijje dobiquinaje. <sup>3</sup> Majoya cuaqui jiji sisi jayojja ojjañaja esapa biajje nequinaje. Oe cuaqui jiji sisi oe epeeji esapa biajje jijinequinaje. Jamaya ojjaña poanaje. <sup>4</sup> Edojjoshahua Pame ojjaña cuana huasijje dobiqui'yonaje. Majoya jjeya nei oya cuana pea mimi'yome poanaje. E'e, Edojjoshahua Pameya oya cuana pea mimime po meesahua ca'yonaje.

<sup>5</sup> Quea huiso Jodio cuaa ojjaña meshijo ba'yani cuaa Jenosanenajo ba'ecaa Eyacuiñajjija esohui yahuajo nei jayojja bihuiameya acani. <sup>6</sup> Jamajjeya beni quea quemo eyajo poeyani jayojja shajja'ajja majje ojjaña cuajicuajjibenaje Jesusaja epeeji cuana huasijje. Jesusaja epeeji cuana pea mimi'yome mimiani shajja'ajja majje Jesusaja epeeji pojjeama quea mete nee jama poanaje ba'a: —¿Yajjajje shai Jesusaja epeeji cuana pea mimi'yome poani so'o, de? ¿Yajjajje shai joya esejaya esohuijo mimiani, de?

<sup>7</sup> Jamajjeya quea mete poanaje. Huohui'ajja canaje jama ba'a: —E'e, ojjaña jiquio dejja cuana Janinea meshijo ba'e. <sup>8</sup> ¿Yajjajo shai jiquio pea esohuijo mimi cani so'o?



¿Ma ecua eseyaya esho'yahuaa shajja'ajjanaje jayojjaya seya jjeya shajja'ajjaña cuana?  
<sup>9</sup> E'e, jiquiojo yani dejja cuana quea huiso meshijo ba'e: Dejja cuana Patia meshijo ba'e, Madia meshijo ba'e, Enami meshijo ba'e, Mesopotamia meshijo ba'e, Jodea meshijo ba'e, Capanosia meshijo ba'e, Ponito meshijo ba'e, Asia meshijo ba'e pea'ai yani. <sup>10</sup> Pea cuana Pichia meshijo ba'e, Panipinia meshijo ba'e, Ejito meshijo ba'e, Apica meshijo ba'e, Sinene meshi oje mijijje ba'e pea'ai yani. E'e, Jodio dejja cuana, Jodioja epeeji cuana Shoma meshijo ba'e cuana yani. Maaya Jodio pojjeama cuaa Jodioja ehuhui'yo Eyacuiñajjijo shajja'ajja cani. <sup>11</sup> Beca cuana Queta meshijo ba'e, Anamia meshijo ba'e yani pea'ai. Jamatii ojjaña eseyaya esejaya esohuijo Eyacuiñajjiya ma dejjaja ba jjima acanaje cuana quea pame nee shajja'ajjaña, ma Jesusaja epeeji cuaa huohui canijo — poanaje ojjaña.

<sup>12</sup> Jamajjeya quea mete po majje pea cuana nijje mimimiminaje jama ba'a: —¿Yajja shai poani?

<sup>13</sup> Pea cuana ca ca Jesusaja epeeji cuanajo soa neineinaje. Jama poanaje ba'a: —Chojja, de. Oya cuana jja ca quea huiso ishi'ishinaje. Huoogui —poso acanaje cuaa.

### *Penohua esohui huohui canaje*

<sup>14</sup> Majoya Penohua pea Jesusaja huoojea'yo esohui huohuijji cuana nijje, 11 huisome nijje ojee nequisohua majje janobajjima nei sohuihuohui canaje jama ba'a: —Dejja cuana Jodio meshijo ba'eya, ojjaña Jenosanenajo ba'eya pea'ai, jjeyahua nei mo nequiaa shajja'ajjacue! Eya Jodio pea'ai. Jamajjeya eyaya miya jjabahuejjaqui meeje'yo. <sup>15</sup> ¿A'aya ecuana ehoo poso añã? Jjeya mecajjeahua nei ishi'ishi ajja cuana. <sup>16</sup> Chojja. Jamajjeya ¡shajja'ajjacue! Yahuaajo nei nei Eyacuiñajjija esohui huohuijji Joeni bajjani jama poa ba'a:

<sup>17</sup> “Eyacuiñajji jama poani ba'a: Quijje jiquio meshi beshahua nei apoa poajo, eyaya Edojjoshahua Pame huoojeaje'yo ojjaña huasijje. Edojjoshahua Pameya esho'i, epona sho'i cuana pea'ai huohui meesahua caje ma eyaya quijje nei aje. Ohuaya dejja etii pishana cuana jjacahuibaqui mee caje. Edejja tii cuaa cahuiba majje huohui caje pea'ai. <sup>18</sup> E'e, eyaya Edojjoshahua Pame huoojeaje'yo ecuea echacojji cuana que, epona, dejja cuana que pea'ai. Edojjoshahua Pameya ecuea esohui huohui meesahua caje pea cuana huasijje. <sup>19</sup> Quijje eyaya ma dejjaa ajjima acani añã eyajo ba majje dejja cuana quea mete poaje. Jiquio meshijo ma dejjaa ajjima acani eyaya aje pea'ai ojjañaja ebajji eya quea ca'a nee nee. E'e, quea huo'o nee ena' jayojja poaje eyajo, meshijo pea'ai. Cuaqui quea quemo poaje. Huichacha quea quemo nee, quea moo nee nee poaje. <sup>20</sup> Eshequi quea apo nee poaje. Ba'i quea huo'o nee ena' jayojja poaje. Majoya Emeshi Mese nei poeje o'oya. Ma pojajajo ojjaña ba caje Emeshi Mese nei quea ca'a nee nee, quea pame nee nee poani.

<sup>21</sup> Jamajjeya ojjaña Emeshi Mese nei nijje camimiahua jama ba'a: —Emeshi Mese nei, ¡eya jaahuanacue! ¡Ecuea mimishi cuijea'yocue! —jamaya onijje mimi'yajo, ohuaya oya cuana jaahuana caje'yo; ba'e tiitii mee caje'yo eyajo, cuaqui yasijje huoojea'yo jjima acaje pea'ai”.

Jamaya yahuajo nei nei Joeniya tehue ca poa Eyacuiñajjija esohui —Peno poanaje.

<sup>22</sup> Majoya Peno jama poanaje ba'a: —Dejja cuana Isaeni meshijo ba'e, ¡shajja'ajja neineicue mo! Jesosa ma Nasanenajo ba'ya poa miquiana nijje nequinaje. Eyacuiñajjiya Jesosa ma dejjaa ajjima acani ameesahua canaje quea huiso nee nee. Jamaya miquiana-jaya eba —Penohua acanaje—. <sup>23</sup> Jamatii Jesosa iña majje miquianaaya oya ona huasijje quianaje. E'e, miquianaaya Jesosa quia'yonaje dejja mase yasijje, acui ecueata'apeejo emano mee'yojji. Jamatii yahuajo nei jamaya Eyacuiñajjija ejjashahuabaqui'yojji poa.

<sup>24</sup> Jamajjeya Eyacuiñajjiya Jesosa shequi mee ca o'oyanaje. E'e, Jesosa jjanijo ehuananobia jaa tiitii ajja poa; emano'yo tii po mee'yo jjima acanaje. <sup>25</sup> Yahuajo emeshi mese Dabiya Jesusajo huohui ca poa jama ba'a:

“Ecuea Emeshi Mese nei enijje ani tiitii'ya poa. Ohuaya eya jaahuana tiitii canijo, eya mete'ama poaje'yo. <sup>26</sup> Jamajjeya eyaya quea jaji neeya Eyacuiñajji bihuliaña. Eya jjanijo ehuananobia jaa shequije o'oya, yamiña. Ihui'yo ajja poaje. Jamaya ecuea eba. <sup>27</sup> Miyaya eya jeana'yo ajja pea emano'yo cuana nijje. Jamajjeya eya mete'ama. Eya miquea quea boti nee. Jamajjeya eya meshijo ihui'yo ajja poaje'yo. <sup>28</sup> Miyaya eya ba'e meeje o'oya quea pame nee. Minijje nequi tiitii meeje'yo. Quea bihui nee eya poani”.

Jamaya yahuajo nei Dabiya huohui ca poa Jesusaja esohui —Peno poanaje.

<sup>29</sup> Penohua huohui canaje jama pea'ai ba'a: —Epeeji cuana, e'e jojo nei esejaya etiiquiana Dabi yahuajo nei mano'ya poa. Jjeya oya ehuananobia jaa jjanijo. Jamaya esejaya eba. <sup>30</sup> Dabi ca ca Eyacuiñajji esohui huohuiji poa. Eyacuiñajjiya oya huohui ca poa jama ba'a: “E'e jojo nei miquea osecua quijje nei cuayaje eyaya Emeshi Mese nei po meeje'yo”.

<sup>31</sup> E'e, yahuajo nei Dabiya eba poa quijje nei Jesosa, Eyacuiñajjiya huoojea'yo ojjaña jaahuanajji shequije o'oya. Jamajjeya Dabiya huohui ca poa jama ba'a: “Miyaya oya jeana'yo ajja pea emano'yo cuana nijje. Oya meshijo ihui'yo ajja poaje'yo” jamaya Dabi yahuajo nei poa.

<sup>32</sup> Penohua ojjaña cuana huohui ca o'oyanaje: —E'e jojo nei Eyacuiñajjiya Jesosa shequi mee ca'yonaje; ecuanaaya Jesosa ba o'oyanaje, eshe, de. <sup>33</sup> Eyacuiñajjiya Jesosa nequi tiitii mee ca'yonaje eyajo onijje, o ebiane mijiije ojjaña huoojea'yojji. Eyacuiñajjiya esohui yahuajo jayojja jama Edojjoshahua Pame Jesosa que dobiqui'yonaje. Jesusaa ma Edojjoshahua Pame jjeyahua nei huoojea canaje ecuana que dobiquiya. Jiquia aje jja oya nequiaa banaje. Ojaya epoe'yo miyaya shajja'ajjanaje pea'ai. <sup>34</sup> ¡Bacue, Dabi ca ca oma sohuaqui jjima eyahuasijje yamiña! Ohuaya huohui ca poa jama ba'a:

“Eyacuiñajjiya ecuea Emeshi Mese nei huohui canaje jama ba'a: ¡E pejeje anioquecue, ebiane mijiije, enijje ojjaña huoojea'yojji!

<sup>35</sup> ¡Jjeyahua nei ojjaña joya minijje jjapeequi ajja eyaya miya huoojea meeje'yo!”

Jamaya Dabiya tehue ca poa Jesusajo yahuajo.

<sup>36</sup> Penohua jama acanaje pea'ai ba'a: —Isaeni dejja cuana, ¡shajja'ajja neineicue! Miquianaaya ca ca oe Jesosa acui ecueata'apeejo ba'ehuanasohuajeanaje; mano mee'y-onaje. Eyacuiñajjiya ca ca Jesosa ojjañaja Emeshi Mese nei po mee ca'yonaje. Ohuaya Jesosa Quito ojjaña jaahuanaa huoojea ca'yonaje pea'ai —acanaje Penohua.

<sup>37</sup> Ma shajja'ajja majje ojjaña jomajo nequica quea yeno nee nee poanaje. Jamajjeya Peno nijje, ojjaña Jesusaja huoojea'yo esohui huohuiji cuana nijje jama poanaje ba'a: —Epeeji cuana, ¿yajja acue poaje? Eseja iña mee'yo, eseja quecua mee'yo ca jja ca oe, de.

<sup>38</sup> Penohua saja'a canaje jama ba'a: —¡Miquianajaya mimishi cuana pajea'yocue! ¡Jesosa nijje jjapeequicue! Majoya Eyacuiñajjiya esohui huohuijiya miquianaya besa mee caje Jesosa Quitojo. Jamajjeya ojjaña ba caje miquianaya Jesusaja epeeji poani. E'e, Jesosa Quitohua miquianajaya mimishi cuana cuijea caje'yo. Ohuaya miquiana que Edojjoshahua Pame huoojea caje'yo pea'ai. <sup>39</sup> E'e, Eyacuiñajji Edojjoshahua Pame huoojea sa poani miquiana que, miquea ebacua cuana que pea'ai, ojaya epeeji cuana ojjaña meshijo ba'eca huasijje pea'ai, ojjaña Eyacuiñajjiya eabaca huasijje pea'ai — Penohua acanaje.

<sup>40</sup> Penohua quea huiso pea esohui huohui canaje. Jama acanaje ba'a: —¡Dejja quea mimishi jama a'a pojji! ¡Oya cuana nijje a'a jjapeequijji! Eyacuiñajjiya mimishi cuana quea nee nee po mee caje'yo, quea nee tii tii.

<sup>41</sup> Quea huiso cuana Penoja esohui shajja'ajja majje Jesosa nijje jjapeequinaje. Jama-jjeya Penohua oya cuana besa mee canaje Eyacuiñajji enajo. E'e, ma pojajo tii quea huiso nee nee Jesusaja epeeji po'yonaje, 3.000 huisome. <sup>42</sup> Jamajjeya oya cuana Jesusaja huoojea'yo esohui huohuiji cuanaja esohui shajja'ajja canaje; jamaya acanaje pea'ai. Ojee jjapeequinaje pea'ai. Ojee Jesusaja bobi ijia canaje pea'ai. Eyacuiñajji nijje mimi majamajanaje, ojjaña.

*Jesosaja epeeji cuana jamaya ba'e cooa poa*

<sup>43</sup> Edojjoshahua Pameya Jesosaja huoojea'yo esohui huohuiji cuana ma dejjaa ajjima acani ameesahua canaje quea huiso. Jamajjeya ojjaña cuana jama poanaje ba'a: —E'e de, jiquio esohui huohuiji cuaa ma dejjaa ajjima acani quea huiso nee nee acanaje —poanaje cuana.

<sup>44</sup> Jesosaja epeeji cuana ca ca huapa pojjeama cuana jayojja jama poanaje. Ojjaña dejja tai'ama, nishehui'ama pea'ai poanaje. <sup>45</sup> E'e, ojaya cuanaja aquiana cuana chicha majje quia canaje Jesosaja epeeji jaahuanajji cuana huasijje. Majoya oya cuaa quia canaje ojjaña Jesosaja epeeji cuana huasijje. Joya aema' poani quea huiso quia canaje; joya aquianajji ca ca oe pojji quia canaje. Jamaya ojjaña huasijje quia ca poquinaje. Jamajjeya ojjañaja aquiana peaja huisoajjaya poanaje. <sup>46</sup> Ojjaña pojajajo ojjaña Jesosaja epeeji cuaa Eyacuiñajjija equi epeeyi yasijje jjachichaqui majje esohui huohui canaje. Jesosaja bobi ijia canaje peaja equi cuana huasijje. Pea equi cuanajo anica ojee ijia'ijjia ca ani ojjaña quea bihui nee nee jjapeequinaje. <sup>47</sup> Ojee Eyacuiñajji bihuia majamaja canaje ojjaña pojajajo. Pea cuana Jesosaja epeeji cuana nijje quea bei poanaje. Eyacuiñajjija ojjaña pojajajo pea cuana Jesosa nijje jjapeequi meesahua ca'yonaje. Jamajjeya Jesosaja epeeji cuana quea huiso nee nee poanaje.

### 3

*Jiojjijajja jjajiojji jeapihuiqui'yonaje*

<sup>1</sup> Majoya eshequi jjajeapaaquiajo Peno, Huani nijje poquinaje Eyacuiñajjija equi yasijje Eyacuiñajji nijje mimiya. Jamaya ojjaña pojajajo Jodio dejja cuana Eyacuiñajji nijje mimi aninaje eshequi jjajeapaaquiajo. <sup>2</sup> Oe dejja ejiojji cojjasahuajo aninaje meme aninaje, jiojjijajja. Oya jamatii cuaya jiojjijajja tii. Jamajjeya ojjaña pojajajo pea cuaa oya dojo canaje Eyacuiñajjija equi yasijje, Esecue jjani Bame Bame bajjani yasijje. Jomajo ohuaya eme' huo ca aninaje bobijo, ejjeshejjijo pea'ai. Oya jjashahuabaquinaje jama ba'a: —E'e pojja'a dejja cuaa Esecue Bame yasijje poe majje eya aquiana quia caje sosema'.

<sup>3</sup> Jamajjeya Peno, Huani nijje Eyacuiñajjija equi yasijje dobiquiajo, jiojjijajjaa o que eme' huo canaje. <sup>4</sup> Jamajjeya Penohua Huaniya pea'ai jiojjijajja ba canaje. Jama acanaje ba'a: —¡Ecuana bacue!

<sup>5</sup> Aquiana sosema' sa poanaje. Jamajjeya Peno bajeasohua canaje, jiojjijajjaa. <sup>6</sup> Jamatii Peno jama poa ba'a: —Ecuea epeeji, ecuea aquiana chama'. Ecuea ejjeshejji pea'ai chama'. Eya Jesosaja epeeji; joya ecue ani aje mi quiaje jama ba'a: Jesosa Quitohua ma Nasanenajo ba'ya poaa miya jeo meesahua caje'yo. Jamajjeya ¡nequisohuacue! ¡Jecue oe! —acanaje Penohua.

<sup>7</sup> Penohua jiojjijajja ebianeí mejje iña majje nequisohua mee canaje. Jjeyahua nei ojaya ejiojji quea pame poanaje, quibojjisha quea pame poanaje pea'ai. <sup>8-9</sup> Jamajjeya oya jjeyahua nei nequisohua majje jeonaje. Peno nijje, Huani nijje pea'ai Eyacuiñajjija equi yasijje dobiquinaje, equecuayijji yasijje ma Sanomoja equi bajjani yasijje. Oya quea jaji nee jeonaje. Tohuaatohuaa poanaje. Eyacuiñajji bihuia canaje pea'ai. Ojjaña equijo nequiya oya ba canaje tohuaani, Eyacuiñajji bihuia poequi pea'ai. <sup>10</sup> Jiojjijajja yahuajo ojjañaja eba. Eyacuiñajjija equi pejejo ani tiitiinaje, Esecue Bamejo. Aquianajo meme ania poa. Ojjaña quea bihui poanaje jiojjijajja jeoje'yo ba majje: —E'e de, oya jiojjijajja jeonaje jjeya nei —poanaje.

*Penohua esohui huohui canaje Eyacuiñajjija equijo*

<sup>11</sup> Majoya ma jiojjijajja poanaje Peno nijje, Huani pea'ai nijje po'yonaje, bihuiabihua'yo nequinaje. Eyacuiñajjija equijo equecuayijji bajjani Sanomoja equijo quea huiso cuana jjachichaqui canaje o baa. Ojjaña quea bihui poanaje Penajo, Huanijo pea'ai. Jama poanaje ba'a: —¡Dee! Penohua, Huaniya pea'ai oya jiojjijajja jeo mee canaje. Quea ca'a nee nee oya, de, Eyacuiñajjija ma dejjaa ajjima acani —poanaje ojjaña.

<sup>12</sup> Ojjaña jjachichaquije ba majje, ojjañaja esohui shajja'ajja majje pea'ai Penohua huohui canaje jama ba'a: —Dejja cuana Isaeni meshijo ba'e, ¡shajja'ajjacue mo! ¿Apiojji acuae

ecuanaja esohuijo miqúanaya quea ajjajja poani so'o? ¿Apiojji acuae jjashahuabaquiani jama ba'a: “Peno, Huani pea'ai Eyacuiñajjija epeeji quea ca'a nee nee poani. Jamajjeya jiojjijajja cuaya ohuaya jeo mee canaje” poani nequiana so'o, de? —poanaje Peno —. <sup>13</sup> Chojja, ecuaaya pojjeamaa jiojjijajja jeo meenaje. ¡Bacue! Eyacuiñajjiya Amajama, Isaaca, Jacobo, eseja pea etiiquiana cuana pea'ai jaahuana ca poa. Jjeyahua nei ma Eyacuiñajjiya ojaya Bacua Ejja Jesosa o pejjejo anioque mee ca'yonaje ojjaña huoojea'yojji. Miquianaaya ca mi ca Jesosa quianaje emeshi mese Pinatoja, equecua mee'yojji. Pinatohua Jesosa pichojea sa acajo, miqúanaya quea quene taaanaje jama ba'a: “Jesosa me' cacacue! ¡Acui ecueata'apeejo ba'ehuanasohuajecue!” anaje nequiaa. <sup>14</sup> Eyacuiñajjija Jesosa quea boti nee nee. E'e, Jesosa quea pame nee nee, mimishi'ama nei. Jamatii miqúanaya oya cajaa anaje jama ba'a: “¡A'a Jesosa pichojeajji!” taaajebenaje quianaaya: “¡Mashama' oe pichojea'yocue!” anaje quianaaya. Mashama' aje oe ona quecua'yojji epo, de. <sup>15</sup> Miquianaaya ca ca oe Jesosa mano mee'yonaje, ma ojjaña ba'e tiitii mee'yojji epo. Eyacuiñajjiya ca ca Jesosa shequi mee ca o'oyanaje. Jamaya ecuanajaya eba. E'e, Jesosa shequi o'oyanaje ecuaaya banaje. <sup>16</sup> E'e, Jesosa quea ca'a nee nee nequi. Ohuaya ca ca oe jiojjijajja jeo mee canaje. Ecuana Jesusaja epeeji. Ojo jjashahuabaquiani jama ba'a: “E'e jojo nei Jesusaa jiojjijajja jeo mee caje” jamaya Jesusajo e'e jojo nei jjashahuabaquianijo, ohuaya quea ja'a nee po mee canaje jiquio dejja. Maya miqúanaya jjeya nei baña —Peno poanaje.

<sup>17</sup> —Epeeji cuana, ecuea eba miqúanaya, Jodio etii cuana nijjeya oya ba jjimajojo Jesosa quianaje onaja equecua'yojji. <sup>18</sup> Yahuajo nei nei Eyacuiñajjiya ojaya esohui huohuijji cuana tehue mee ca poa Jesosa Quitojo jama ba'a: “Quijje nei ecue huoojea'yo ojjaña jaahuanajji quea nee nee po mee caje'yo cuaa”.

Ma etehue'yo yahuajo nei jayojja jama jjeya miqúanaya anaje —Penohua acanaje —. <sup>19-20</sup> ¡Jamajjeya Eyacuiñajjija esohui jayojja jama acue! ¡Miquianajaya mimishi pajea'yocue! ¡Jesosa nijje jjapeequicue! E'e, Eyacuiñajjiya ojaya esohui yahuajo nei jayojja jama huoojea ca'yonaje ojjaña jaahuanajji Jesosa Quito ese jaahuanaa. Jamajjeya ohuaya esejaya mimishi cuana cuijea caje'yo; ese nijje quea bei poaje'yo. <sup>21</sup> Jjeya Jesosa eyajo nequi oja Chii nijje. Jomajo oya ani'yo; ojjaña Eyacuiñajjija esohui jayojja jama apoa poajo oya Jesosa poeje o'oya. E'e, Eyacuiñajjiya yahuajo nei nei ojaya esohui huohuijji cuana huohui mee ca poa jama ba'a: “Quijje ojjaña Eyacuiñajjija esohui ma ohua yahuajo nei huohui ca poa apoa poajo, Eyacuiñajjija huoojea'yo ojjaña jaahuanajji poeje o'oya ojjaña aquiana jiquio meshijo eyacua po mee'yohua”.

<sup>22</sup> E'e —Penohua acanaje—, Eyacuiñajjija esohui huohuijji Moisesi yahuajo jama poa ba'a:

“¡Bacue! Eyacuiñajjiya eya huoojea canaje ojaya esohui huohuiya. Quijje ohuaya pea esohui huohuijji e jayojja miqúanaya que huoojea caje, miqúanaya nijje meshijo ba'e. ¡Ojjaña ojaya esohui jayojja jama acue! <sup>23</sup> Ojjaña joya ojaya esohui jayojja jama po ajja aje oe Eyacuiñajjiya cajaa acaje'yo; quea nee nee po mee caje'yo”.

Jamaya yahuajo nei Moisesiya tehue ca poa Eyacuiñajjija esohui —Penohua acanaje.

<sup>24</sup> —E'e, yahuajo nei nei Eyacuiñajjija esohui huohuijjiya Samoeni bajjaniya esohui quea pame nee huohui ca poa Jesusajo, Eyacuiñajjija huoojea'yo ojjaña jaahuanajjijo. Majoya ojjaña Eyacuiñajjija esohui huohuijji cuana Samoeniya esohui jayojja jama huohui ca poquiapoquia poa quea huiso neeya. <sup>25</sup> Eseyá Eyacuiñajjija esohui huohuijji yahuajo nei ba'e cuanaja osecua cuana, etiiquianaja osecua cuana poanijojo Eyacuiñajjija esohui yahuajo esejaya etiiquiana cuana nijje jayojja jama ohuaya eseya acaje jjeya nei pea'ai. E'e, yahuajo nei Eyacuiñajjiya Amajama huohui ca poa esejaya etiiquiana jama ba'a: “Quijje nei miquea osecuajo ojjaña cuana ojjaña meshijo ba'e quea bihui nee nee poaje” <sup>26</sup> Peno poanaje: —E'e Eyacuiñajjiya oja Bacua Ejja oe nei Jesosa ese yasijje, Jodio cuana huasijje huoojea canaje ebionei, esejaya mimishi cuana pajea meesahuua. Jamajjeya eseya quea ja'a nee po mee caje'yo —Penohua acanaje Huani nijjeya.

## 4

*Peno, Huani pea'ai iña canaje Jodio etii cuaa*

<sup>1</sup> Majoya Penohua, Huani nijjeya ojjaña cuana huasijje Jesusaja esohui huohui canijo, Eyacuiñajji nijje emimijji cuana, Eyacuiñajji equi cuiñajji etii pea'ai, Sanoseo cuana nijje poeyanaje. <sup>2</sup> Penoja esohui shajja'ajja majje jiquio Jodio etii cuana quea quene nee nee poanaje Penohua Jesusa shequi o'oyanaje huohuime acajje. <sup>3</sup> Jamajjeya Peno, Huani pea'ai iña majje dojo canaje etecueajji. Siniajo mi tecuea canaje. Jeanobiajea canaje mecahuajje emimijji. <sup>4</sup> Jamatii quea huiso dejja cuana, ponaña pea'ai Penoja esohui Jesusajo shajja'ajja majje Jesusa nijje jjapeequinaje, me oejje mil huisome, 5.000 huisome.

<sup>5</sup> Mecajjeahua emeshi mese cuana, Jodio dejja etii cuana Moisesija tehue'yo huohuijji nijje ojee poanaje Jenosanenajo. <sup>6</sup> Eyacuiñajji nijje emimijji etii Anasi bajjani, oja huapa pojjeama cuana Caipa, Huani, Anejano pea'ai ojee poanaje. <sup>7</sup> Jodio dejja etiiya Peno, Huani, jiojjijajja pea'ai iyaa canaje etecueajji. Poeyajo, Peno tecuea canaje jama ba'a: —¿Anijje acuae nequiaa jiojjijajja jjajiojji jeapiihuiqui meenaje so'o?

<sup>8</sup> Edojjoshahua Pameya oya huohuisahua canijo, Penohua jama acanaje ba'a: —Emeshi mese cuana, dejja etii cuana pea'ai, e'e ecuaaya jiojjijajja jeo meesahuanaje. <sup>9</sup> Jamajjeya miquianaaya ecuana huohui'ajjaña jama ba'a: “¿Anijje acuae jiojjijajja jeo mee'yonaje?” <sup>10</sup> Jamajjeya jiojjaña dejja cuana Isaeni meshijo ba'eya, ¡shajja'ajjacue mo! Miquiaaya ca ca oe Jesusa Quito, ma Nasanenajo ba'ya poa acui ecueata'apeejo ba'ehuanasohuajeanaje; mano mee'yonaje. Jamatii Eyacuiñajjiya Jesusa Quito shequi mee ca o'oyanaje. Ohuaya, Jesusa Quitohua jiojjijajja jeo mee canaje. ¡Bacue quea pame nee oya nequi! —Penohua acanaje—. <sup>11</sup> E'e, yahuajo nei Eyacuiñajjiya esohui huohuijji cuaa Jesusajo tehue ca poa jama ba'a:

“Oe equi yamajjana equi iyajji cajaa aca poa cuaa. Jamatii Eyacuiñajjiya ma eyamajjana equi yamajjana quea ca'a nee aca poa. Jamajjeya ojjaña ojaya epeejji cuaa Eyacuiñajji bihuia cani”.

Jesosa Quito ma eyamajjana equi iyajji jayojja. Miquianaya Jesusa sa po'yo ajja poanaje. Jamatii jjeyahua nei oya Jesusa quea pame nee nee, quea ca'a nee nee nequi. <sup>12</sup> Jesusa Quitohua ohuaye nei mimishi cuana cuijea'yo majje ba'e tiitii mee caj'e'yo se. E'e, Eyacuiñajjiya oya huoojea ca'yonaje ese nahuejji, ese cuaqui yasijje epoqui'yo poaje jjejojo. Pea chama' ese jaahuanajji —acanaje Penohua.

<sup>13</sup> Ma Jodio etii cuaa Penoja esohui, Huanija esohui pea'ai shajja'ajja majje jama acanaje ba'a: —¡De! Oya cuana bicho'ama mimiani ecuana nijje. ¿Yajjaje shai? Yahuajo ebiojo ba'e'ya poa oya cuana. Esohui etehue'yo quea huiso ojaya ba jjima yahuajo poa. Jamatii quea ja'a nee esohui huohui cani. E'e de, Jesusa nijje nequi tiitiinaje. Ohuaya pojja'a quea huiso ba mee canaje —acanaje etii cuaa Penoja, Huanijo pea'ai.

<sup>14</sup> Jamajjeya Jodio etii cuaa Peno Jesusajo mimipajea mee'yo sa acani. Jamatii joya jiojjijajja Peno nijje, Huani pea'ai nijje nequi quea pame nee. Jamajjeya mi tecuea canaje. <sup>15</sup> Jamajjeya Peno, Huani, jiojjijajja pea'ai esecue yasijje, equi quibo huasijje huoojeacuayajea canaje. O huoojeacuayajea majje mimimiminaje. <sup>16</sup> Jama poanaje ba'a: —¿Ae acuae acajji so'o? Jesusaja esohui pajea'yo ajja. Ojjaña Jenosanenajo ba'eya ba canaje Penohua ma dejjaa ajjima acani acanaje; jiojjijajja jeo mee canaje. Jamajjeya ecuaaya yajja sijje ame yajji Peno jama ba'a: “Chojja Penoja, Huanija pea'ai jiojjijajja jeo mee'yo jjima” jama sijje pomeya jjapo meequi ajja, de. <sup>17</sup> Jamajjeya Peno, Huani pea'ai ejjatecuaequi jama ba'a: “¡A'a huohui'yojji Jesusajo!” jamaya ejjahuhuiqui: “¡A'a ojjaña cuana Jesusa shequi'yonaje mimime pojji! ¡A'a Jesusaa jiojjijajja jeo mee canaje mimime pojji pea'ai!” —poanaje Jodio etii cuana.

<sup>18</sup> Majoya oya cuaa Peno, Huani iyaa ca o'oyanaje. Poe majje huohui canaje jama ba'a: —¡Bacue! ¡A'a jja oe Jesusajo mimi o'oyajji! Chojja. ¡A'a Jesusaa eshe o'oyaa jiojjijajja jeo mee canaje a'a huohui majajji! —huohuime acanaje Jodio etii cuaa.

<sup>19</sup> Jamatii Penohua, Huaniya pea'ai mete'ama saja'a canaje jama ba'a: — ¡Jashahuabaquicue so'o! ¿A'a ecuaaya miquianajaya esohui jayojja jama aje? Cho. Eyacuiñajjija esohui jayojja jama pojjeama. Miquianaaya ecuaana Jesusaja esohui huohui mee jjima aña. Eyacuiñajjiya ca ca ecuaana huoojea canaje Jesusajo huohuiya. <sup>20</sup> ¡Bacue! Ecuaaya Jesosa banaje eshe o'oya. Eyacuiñajjija esohui ecuaaya shajja'ajjanaje onijje. ¡Maya ecuaaya cahuohuahua!

<sup>21</sup> Jamatii Jodio etii cuaa Peno, Huani pea'ai cuia sa acanaje. Jamatii cuia jjima poanaje quea meteya jjejojo. Ojjaña cuaa Eyacuiñajji bihuia canaje Jiojjijajja jeo mee canajejo; Peno, Huani pea'ai ojjaña quea nahue ecuaa mee'yojji poanaje. Jamajjeya mi cuia canaje. Tecuea canaje ca ca oe; majoya tecuea majje huoojea canaje Huani, Peno pea'ai.

<sup>22</sup> E'e, Jiojjijajja jeonaje etii nei, peaja ojiojji miji pea'ai huiso shequiajame, 40 shequiajame poanaje. Eyacuiñajjiya Peno, Huani pea'ai oya jeo meesahua ca'yonaje.

*Ojjaña Eyacuiñajji nijje miminaje esohui mete'ama ehuohui meesahuajji*

<sup>23</sup> Jamajjeya Jodio dejja etiiya oya huoojea cajje Peno, Huani nijje poqui'yonaje ojaya epeeji cuana que. Ma Jodio etii cuaa tecuea canaje, Eyacuiñajji nijje emimijji mese cuanajo pea'ai huohui cañaquinaje. <sup>24</sup> Ma shajja'ajja majje ojjaña cuaa ojee Eyacuiñajji bihuia canaje. Onijje miminaje jama ba'a: —Eyacuiñajji, ecuanaja Chii ai, miya quea pame nee nee. Miyaya ojjaña eyajo pana'ya poa, meshi cuana pana'ya poa, bae cuana pana'ya poa pea'ai. Ojjaña aquiana cuana eyajo, meshijo, enajo pea'ai ojjaña mique pana'yo. <sup>25</sup> Yahuajo nei nei miyaya ecuanaja etiiquiana que, miquea epeeji emeshi mese Dabi que huoojea'ya poa Edojjoshahua Pame. Edojjoshahua Pameya Dabi huohui meesahua ca poa jama ba'a:

“Joya, ojjaña cuana quea shajjaquijjo, Eyacuiñajji nijje mimipanajajiani. Oya cuana quea tai jjashahuabaquiani Eyacuiñajji jeabichajeajji nisho. <sup>26</sup> Emeshi mese cuana dejja huoojeajji poani nijje jjachichaquiani; ojee nequianiya Eyacuiñajjija huoojea'yo ojjaña jaahuanajji jeabichajea'yojji nisho”.

<sup>27</sup> —E'e Eyacuiñajji, miyaya miquea Ebacua Ejja quea pame nee Jesosa huoojeanaje ojjaña jaahuanajji epojji. Jiquio cuiñajjiyo ba'eca cuana quea huiso quea mase Jesosa quecua sa poanaje. Jodioja emeshi mese quea mase Enode, Shomano emeshi mese Ponosio Pinato nijje jjachichaquinaje Jodio pojjeama cuana nijje, Isaeni dejja cuana nijje pea'ai. Ojee jjashahuabaquinaje Jesosa quecua'yojji. <sup>28</sup> E'e Eyacuiñajji, miya yahuajo nei nei Jesusajo jjashahuabaquia poa jama ba'a: “Eyaya Jesosa huoojeaje dejja cuana huasijje. Jamatii onaaya oya iña caje equecua'yojji”. Miquea ejjashahuabaqui'yojji yahuajo jayojja jama jjeyahua nei dejja quea mase cuaa acanaje. <sup>29</sup> Eyacuiñajji, miya ecuanaja Emeshi Mese nei eyajo ba'e. Miquea eba jjeyahua nei emeshi mese cuana quea mase ecuaana nijje mimijajiani Jesusaja esohui ecuaaya ehuohui poaje jjejojo. Jamajjeya ecuaana miquea epeeji poanijo, ¡esohui Jesusajo huohui meesahuacue mete'ama! <sup>30</sup> ¡Mique Bacua Ejja Jesosa nijje jjapeequianiya pea cuana huaquia meesahuacue! ¡Ma dejjaa ajjima acani ameesahuacue, Eyacuiñajji! —jamaya miminaje Eyacuiñajji nijje ojjaña.

<sup>31</sup> Eyacuiñajji nijje mimipajea'yajo, Eyacuiñajjiya ma equi jeahuehuahuehua mee canaje. Edojjoshahua Pameya ojjaña huasijje dobiqúi majje Eyacuiñajjija esohui huohui mee canaje mete'ama.

*Jesosaja epeeji cuana huapa pojjeama jayojja ba'ya poa.*

<sup>32</sup> Jomajo ojjaña Jesusaja epeeji cuana ojee jjapeequinaje quea bei. Oya cuana aquiana nahue'ama poanaje. Bobi nahue'ama poanaje. Nishehui'ama, dejja tai'ama ojjaña poanaje. Ojjaña Jesusaja epeeji cuana ba'e meesahua canaje. Ojjaña aquiana cuana ojjaña poanaje. <sup>33</sup> Jamajjeya Eyacuiñajjija huoojea'yo esohui huohuijji cuaa janobajjima nei esohui huohui canequinaje mete'ama. Jama huohuime acanaje ba'a: —Esejaya Emeshi Mese nei Jesosa Quito shequi o'oyanaje e'e jojo nei —acanaje.

Jamajjeya Eyacuiñajjiya oya cuana jaahuana neinei canaje; quea bei nee po mee canaje.

<sup>34-35</sup> E'e, jamajjeya Jesusaja epeeji cuaa meshi, equi cuana, aquiana pojja'a quia majje, ejjesheji jjeshe majje quia canaje Jesusaja epeeji jaahuanajji yasijje. Majoya ohuaya ma ejjesheji quia canaje Jesusaja epeeji aema' cuana huasijje, aema' pishana huasijje pea'ai. Jamajjeya oya huisoajjaya aquiana ojjañaja poanaje.

<sup>36</sup> Majoya oe Nemita Jose bajjani ma yahuajo Chipe meshijo ba'e poenequinaje, Jesusaja epeeji. Oya Benabe bajjani aca'yonaje, Ese Ejjaja esohuijo Ona Quea Bei pomeeji bajjani aca'yonaje Jesusaja huoojea'yo esohui huohuijjiya. <sup>37</sup> Ma Benabeya que jjinipea quia canaje ejjesheji sosejje. Majoya ohuaya ejjesheji ye ca'yonaje Jesusaja huoojea'yo esohui huohuijji Jesusaja epeeji aema' cuana huasijje equiajji. Jamajjeya ojjaña quea bihui nee Benabe nijje poanaje.

## 5

### *Anania oja huanase Sapina pea'ai sijjepoji poanaje*

<sup>1</sup> Majoya Ananiaa ojaya ehuanase Sapina nijjeya que jjinipea quia ca'yonaje ejjesheji sosejje. Bejjo ñatepe majje equijo iyaquehua canaje. Quea bejjo jea poanaje. <sup>2</sup> Jamajjeya Ananiaa oe pojji bejjo quia ca'yonaje Jesusaja huoojea'yo esohui huohuijji yasijje. Oja huanaseja eba poanaje. Jamatii sijje poanaje jama ba'a: —Ma'aje bejjo, Peno, ojjaña tii que sosejje ecue jjeshe —anisho canaje Ananiaa; ona quea bihui pojji nisho sijje poanaje.

<sup>3</sup> Edojjoshahua Pameya Peno huohui meesahua canaje jama ba'a: —Anania, ¿apiojji acuae mi Edosiquiana jama sijje poani? ¿Apiojji acuae Edojjoshahua Pame sijje añña so'o? Miquea ojjaña ejjesheji que jjinipea sosejje quia'yo jjima; miquea equijo huanaquehuanaje. <sup>4</sup> ¡Bacue, Anania! Que jjinipea quia jjimahuajo miquea tii poanaje. Quia'yo majje ejjesheji miquea tii poanaje. Jamajjeya ¿apiojji acuae mi sijje poani ojjaña bejjo miquea que sosejje quia'yaña nisho poani? Miyaya ecuanaya pojjeama dasiaña; miyaya Eyacuiñajji dasia sa añña, de —poanaje Peno.

<sup>5</sup> Penoja esohui shajja'ajja majje Anania bichaquinananaje; poquijeyonananaje. Chama'yo tii poanaje. Anania mano'yonaje ba majje ojjaña quea mete nee nee poanaje.

<sup>6</sup> Majoya dejja etii pishana cuaa Anania daqui oshejo bebo majje dojo canaje mojeaa.

<sup>7</sup> Quijje pishana eshequi jaasohua pishanajo, Ananiaja ehuanase Sapina poeyanaje Peno que. Oja ba jjima ojahue mano'ya poa. <sup>8</sup> Penohua oya huohui'ajja canaje jama ba'a: —Sapina, ¿ache sose huiso que jjinipea quinaje miquiaaya?

Oya epona sijje poanaje pea'ai: —E'e Peno, ma sose huiso tii quianaje ecuaaya —poanaje epona.

<sup>9</sup> Majoya Penohua epona tecuea canaje: —¿Apiojji miya miqueahue jayojja jama sijje poani? ¿Apiojji miyaya Edojjoshahua Pame dasia sa añña pea'ai? ¡Bacue! Miqueahue mojeajji epo poe'yonaje. Ohuaya miya mojea pea'ai caje'yo —acanaje Penohua.

<sup>10</sup> Sijjepoji jjejojo jjeyahua nei epona mano bichajeaquinananaje Peno pejejo tii. Jamajjeya dejja etii pishanaa ma Anania mojea'yojji epohua Peno que poe o'oya majje epona emano'yojaa ba cañaquinaje. Epona dojo canaje mojeaa, ojahue pejejo.

<sup>11</sup> Ma ba majje ojjaña Jesusaja epeeji cuana quea mete nee poanaje Eyacuiñajji dasiajji nisho. Ojjaña pea cuana ma shajja'ajja majje quea mete nee nee poanaje pea'ai.

### *Jesosaja huoojea'yo cuaa acanaje quea huiso ma dejjaa ajjima acani*

<sup>12</sup> Majoya Eyacuiñajjiya Jesusaja huoojea'yo esohui huohuijji cuana ma dejjaa ajjima acani ameesahua canaje quea huiso nee ojjaña cuanajo. Ojjaña Jesusaja epeeji cuana jjachichaqui nequinaje Eyacuiñajji equi yasijje, equi equecuayijji Sanomoja equi bajjani yasijje Eyacuiñajji bihuiaa. <sup>13</sup> Pea cuana Jesusaja epeeji cuana nijje quea bei nee poanaje jama ba'a: —Jesusaja epeeji cuana quea pame nee —poanaje. Onijje mimijaji ajja nei poanaje, quea mete.

Jesosaja epeeji cuana nijje jjachichaqui jjima poanaje Jesusaja epeeji pojjeama.

<sup>14</sup> Ojjaña pojjaño quea huiso nee Jesosa nijje jpapeequinaje dejja cuana, epona pea'ai.

<sup>15</sup> Jesusaja huoojea'yo esohui huohuijji cuaa ma dejjaa ajjima acani acanaje: emanojaaca

cuana huaquia meesahua ca'yonaje, jjajeaqui meesahua ca'yonaje. Jamajjeya ojjaña emanojaa cuana ejiojji cojja sahuajje dojo canaje cuaa, equipajaajjijo jaa. Ejiojji sahuajo huana yiyoyiyo canaje. Jama poanaje ba'a: —Peno ejiojjije poquijeya oja yajjanaa emanojaa cuana biajje yejje cananaje pojja'a, jjaajaquije'yo pojja'a —poanaje cuana.

<sup>16</sup> Quea huiso dejja cuana cuiñajji sisi cuanajo ba'e, Jenosanena chipi neejo ba'e poeyanaje Jenosanena huasijje. Emanojaa cuana ye canaje quea huiso nee nee; niñepoqui cuana eshahujajo niñepoqui cuana ye canaje pea'ai. Ojjaña cuana huaquia'yonaje, jjaajaqui'yonaje, niñepoqui pajea'yonaje pea'ai. Jesosaja epeeji cuaa jjaaja meesahuaqui ca'yonaje.

*Jesosaja epeeji jeanobia canaje cuaa Jesosaja esohui huohuijijjo*

<sup>17</sup> Majoya Eyacuiñajji nijje emimijji etii, Jodio dejja etii cuana, Sanoseo cuana pea'ai quea quene poanaje Jesosaja huoojea'yo esohui huohuijji cuana nijje. Mimimiminaje jama ba'a: —¡Dee! “¡A'a Jesosajo huohui majajji!” aje oma a'ajjanaje yahuajo. Jamatii esohui huohuijje aja. Ecuana shajja'ajja jjima acani. Ojjaña cuana Jesosa nijje jjapeequi mee cani, ecuanaja esohui pajea mee cani —poanaje Jodio etii cuana.

<sup>18</sup> Jamajjeya Jodio etii cuaa Jesosaja huoojea'yo esohui huohuijji cuana iña canaje. Dojo canaje ejjajejanobiaquijji equi yasijje, dejja mimishi cuana nijje pea'aiya. <sup>19</sup> Jamatii mecashono Eyacuiñajji esohuidojojji poeyanaje ejjajejanobiaquijji equi yasijje. Esecue jjani ca'apejo cañanaje. Jesosaja huoojea'yo esohui huohuijji cuana dojocuayaqui ca'yonaje esecue yasijje. Huohui canaje jama ba'a: <sup>20</sup> —¡Poqui o'oyacue Eyacuiñajji equi yasijje! ¡Ojjaña cuana huohuiquicue Jesosaja esohui onijje eba'e quea pame neejo, ma Jesosaa huohui canaje shequi o'oya majje! —poanaje esohuidojojji.

<sup>21</sup> Jamajjeya mecajjeahua oya cuana poqui o'oyanaje Eyacuiñajji equi yasijje. Jesosaja esohui huohui ca o'oyanaje ojjañaja eshajja'ajjajji.

Ohua esohui huohui canijo tii, Eyacuiñajji nijje emimijji etii cuana, ojjaña Jodio etii cuana pea'ai jjachichaquinaje pea equijo. Jjachichaqui majje sohuinano cuana huoojea canaje equi ejjajejanobiaquijji yasijje Jesosaja huoojea'yo esohui huohuijji jjequiya nisho.

<sup>22</sup> Jamatii sohuinano cuana equi ejjajejanobiaquijji yasijje poqui majje ba cañanaje Jesosaja huoojea'yo esohui huohuijji chama'. Ba'ajja cañanaje; sa'ajja cañanaje. Chama' equi ejjajejanobiaquijji. Jamajjeya esohuinano mese cuana poqui o'oyanaje Jodio etii cuana huohui'yohua. <sup>23</sup> Jama poanaje ba'a: —Esecue jaahuanajji poani nequinaje esecue jjani pejejo. Esecue jjani eca'a tii nequinaje. Jamatii esecue jjani ca'apejo'yo majje chama' ba canaje Jesosaja epeeji cuana.

<sup>24</sup> Eyacuiñajji equi jaahuanajji, Eyacuiñajji nijje emimijji mese cuana pea'ai ma esohui shajja'ajja majje quea mete poanaje: —¿Yajja po majje shai cuayaqui'yonaje, de? ¿Achacua shai poqui'yonaje ma dejja cuana? —poanaje.

<sup>25</sup> Majoya pea dejja poeyanaje. Jama huohuime acanaje ba'a: —Dejja cuana ma miquianaja jeanobia'ajja poanaje jjeya nei Eyacuiñajji equijo nequi o'oya, Jesosaja esohui huohui o'oya ca ca poequi ojjaña cuanaja eshajja'ajjajji.

<sup>26</sup> Jamajjeya sohuinano huoojeajji poani echacosahuajji nijje poquinaje Jesosaja esohui huohuijji cuana jjequi o'oyaa. Jamajjeya quea huiso cuanaja Jesosaja esohui huohuijji cuana quea jea nee poanaje, quea nahue nee poanaje etecueajji. Tecuea jjima nei jjequime acanaje. E'e, dejja mase quea mete jama poanaje ba'a: —E sapa jajahuejjajja ca meiya —poanaje.

<sup>27</sup> Jamajjeya jjequi majje nequi mee canaje Jodio etii cuana ani cojja nei. Majoya Jodio etii cuaa jama tecueame acanaje ba'a: <sup>28</sup> —Peno, “¡a'a Jesosajo huohui majajji!” aje mi yahuajo a'ajjanaje. Jamajjeya ¿apiojji acuae Jesosajo huohuijje'yo jjima añña ojjaña dejja cuana huasijje, ojjaña Jenosanenajo ba'e yasijje so'o? Miquianaaya ca ca oe ecuanaya niñebaña jama ba'a: “Jodio etii cuana ca ca oe Jesosa quecua'yojji epo, quea mimishi jjejojo”. ¿Apiojji acuaeya jama sohuihuohuime añña tii so'o? —poanaje Jodio etii cuana.



<sup>29</sup> Jesusaja huoojea'yo esohui huohuijji cuaa, Penohua pea'ai jama saja'ame acanaje ba'a: —Ecuaya Eyacuiñajji esohui jayojja nei nei aje'yo, miquianaja sohui jama pojjeama. <sup>30</sup> E'e, yahuajo esejaya etiiquiana cuana Eyacuiñajji nijje jjapeequi'yonaje. Miquianaaya ca ca oe Jesosa acui ecueata'apeejo ba'ehuanasohuajea meenaje emano'yojji. Jamatii Eyacuiñajjiya oya shequi mee ca o'oyanaje. <sup>31</sup> E'e, Eyacuiñajjiya Jesosa ojjaña jaahuanajji, mimishi cuijea'yojji pea'ai po mee ca'yonaje. Ojaya ebianeijje nequi mee ca'yonaje eyajo ojjaña huoojea'yojji epojji. Jamajjeya Jesosaa Jodio cuanaja mimishi cuana cuijea ca'yani. Mimishi cuana pajea meesahua ca'yani pea'ai onijje jjapeequianijo. <sup>32</sup> Jamaya ecuanajaya eba. Edojjoshahua Pameja eba pea'ai. Eyacuiñajjiya Edojjoshahua Pame huoojea cani ojaya epeeji cuana que dobiquiya, ojaya ehuhui'yo jayojja jama acanijo —Penohua acanaje.

<sup>33</sup> Penoja esohui shajja'ajja majje Jodio etii cuana quea quene nee nee poanaje. Ojjaña Jesusaja huoojea'yo esohui huohuijji quecua sa acanaje. <sup>34</sup> Jamatii oe dejja ona nijje nequi Jjamani bajjani nequisohuanaje emimijji. Oya Paniseo dejja pea'ai, Moisesija etehue'yo huohuijji, dejja etii quea pame. Jamajjeya ojjaña oya shajja'ajja canaje. Jamajjeya Jjamani jama poanaje ba'a: —¡Iquio dejja, Jesusaja esohui huohuijji dojocuayaquicue esecue yasijje! —poanaje. Ojaya esohui shajja'ajja mee sa po ajja.

<sup>35</sup> Majoya cuayaquinaje. Jjamaniya sohuihuohui canaje jama ba'a: —Isaeni de-  
jja etii cuana, ma dejja cuana quecua jjimahuaa, ¡ecue sohui shajja'ajja neineicue!  
<sup>36</sup> ¡Niñeba'yocue! Yahuajo pishana oe dejja Teodasi bajjani emeshi mese jayojja quea  
ca'a po'ajjanaje. Huohui canaje jama ba'a: “Eya quea pame nee, quea ca'a nee nee. Quea  
huiso nee nee ecuea eba. ¡Eya shajja'ajjacue!”

Jamajjeya quea huiso nee nee, beshahua nei 400 huisome dejja cuana onijje jjapeequi'yonaje. Jamatii peaa Todasi quecua ca'yonaje. Todasi quecua ca'yajo, ojaya epeeji cuana ojaya esohui pajea ca'yonaje. <sup>37</sup> Quijje pishana pea shequiajajo, emeshi meseya ojjaña cuana bajjani cuana tehue mee canaje esicojji. Ma shequiajajo pea dejja Jodasa bajjani emeshi mese jayojja po'ajjanaje. Jodasaja esohui shajja'ajja canaje quea huiso dejja cuaa. Jodasa nijjeya emeshi mese jeabichajea'yo sa acanaje. Jamatii Jodasa quecua ca'yajo, ojaya epeeji cuaa oja sohui pajea ca'yonaje. Poqui'yonaje. <sup>38</sup> Jamajjeya ¡a'a Jesusaja epeeji cuana napajji! ¡A'a iña majajji! Eyacuiñajjiya oya cuana huohui meesahua ajjajo, quijje ojjaña Jesusaja esohui pajea caje'yo pea'ai. <sup>39</sup> Eyacuiñajjiya ca ca oya cuana huohui meesahua cani pojja'a. Jamajjeya ohuaya esohui mi huohuipajea cani. E'e, eseyaya Eyacuiñajji niñeba chana' pojja'a. Jama a sa po'yo ajja eseya —acanaje Jjamaniya.

<sup>40</sup> Ojjaña Jodio etii cuaa oja sohui shajja'ajja canaje. Jamaya acanaje. Jamajjeya Jesusaja huoojea'yo esohui huohuijji cuana iyaa canaje. Cuiasejjajea canaje acui sisiya. Tecuea ca o'oyanaje jama ba'a: —¡A'a jja oe Jesusajo huohui majajji! —jamaya amajje oya cuana huoojeacuayajea ca'yonaje.

<sup>41</sup> Jamajjeya Jodio etii cuana jeana'yo majje Jesusaja huoojea'yo esohui huohuijji cuana poquinaje. Eyacuiñajji bihuia canaje jama ba'a: —E'e Eyacuiñajji, ecuaana Jesosa nijje jjapeequianijo, Jodio etii cuaa Jesosa aca poa jayojja ecuaana acani pea'ai. Jamaya capoahua —miminaje ojjaña.

<sup>42</sup> Jamajjeya ojjaña pojjaajo Eyacuiñajji equijo, pea equi cuanajo pea'ai oya cuana huohuihuohui pajea'yo ajja poanaje esohui quea pame nee Jesusajo. Jama huohuime acaninaje ba'a: —Jesosa Quito Eyacuiñajji huoojea'yo ojjaña jaahuanajji e'e jojo nei.

## 6

### *Me oeje beca, 7 dejja babaca ca poa Jesusaja epeeji aema' jaahuanajji*

<sup>1</sup> Jamajjeya Jesusaja epeeji cuana quea huiso nee nee poanaje. Majoya pea cuana nijje quea bei pojjeama poanaje. Jomajo ani Jodio cuana Jieno meshijo ba'yahua mimijajinaje pea Jodio cuana nijje, Emeoja esohuijo mimiani cuana nijje. Jama poanaje ba'a: —Ojjaña pojjaajo bobi quiañajo miquianaaya quiaña quea huiso aquiana miquea e'ahuemano

cuana. Ecuanaja e'ahuemano huasijje ca ca oe pojji quiaña, de —poanaje Jodio cuana ma Jieno meshijo ba'yahua.

<sup>2</sup> Jamajjeya ma shajja'ajja majje Jesusaja huoojea'yo esohui huohuijji cuaa ma ome miji beca, 12 huisomeya ojjaña Jesusaja epeeji cuana iyaa canaje. Quea huiso ojee poeyajo, huohui canaje jama ba'a: —Epeeji cuana, ¡bacue! Ecuaya Eyacuiñajjija esohui cahuohuiyahua. Ojjaña pojajajo bobi equiajji pojjeama ona huasijje. <sup>3</sup> Jamajjeya ¡miquianaaya me oeje beca, 7 dejja quea pame cuana babacacue bobi quiajji! E'e, ¡joya Edojjoshahua Pame shajja'ajja cani, quea ¡jashahuabaqui ja'a nee nee poani babacacue! Majoya ecuaaaya ma dejja cuana huoojeaje bobi quiajji, pea aquiana cuana pea'ai quiajji ojjaña huasijje, e'ahuemano cuana huasijje pea'ai. <sup>4</sup> Jamajjeya ecuanaya Eyacuiñajji nijje mimi majamajaje, ojaya esohui huohui tiitiije pea'ai.

<sup>5</sup> Jiquio ehuohui'yo jayojja jama a sa poanaje ojjaña Jesusaja epeeji cuana. Jamajjeya Estema babaca canaje Jesusaja epeeji e'ahuemano jaahuanajji. Ohuaya, Estemaa Edojjoshahua Pame shajja'ajja neinei canaje. Eyacuiñajjija esohui jayojja jama atiitii canaje pea'ai. Majoya pea dejja cuana babaca canaje pea'ai: Penipe, Pocono, Nicaino, Timono, Pamenase, Niconasi pea'ai. Oya Niconasi Jodio pojjeama; oya yahujajo Atioquia cuiñajjijo ba'ya poa. Jodio cuana ehuohui'yo jayojja Eyacuiñajji bihuia ca poa, ¡jeya ca ca Jesosa nijje ¡japeequiani. <sup>6</sup> Majoya jiquio 7 epeeji cuana babaca majje Jesusaja huoojea'yo esohui huohuijji cuana huasijje ¡jequi canaje cuaa. Poeyajo ma dejja cuana sapa biajje Jesusaja huoojea'yo esohui huohuijji cuaa eme' huana canaje. Eyacuiñajji nijje miminaje onajo, o chaco meesahuajji. Jamajjeya ojjañaja eba poanaje ma dejja cuana e'ahuemano cuana huasijje aquiana quiajji epojji.

<sup>7</sup> Majoya Jenosnenajo quea huiso nee neeya Eyacuiñajjija esohui shajja'ajja canaje. Quea huiso nee nee Jesosa nijje ¡japeequinaje. E'e, Jodio etii cuana, Eyacuiñajji nijje emimijji cuana pea'ai Jesusaja epeeji poanaje, ojaya esohui jayojja jama acanaje.

#### *Estema iña majje tecuea canaje Jodio etii cuaa*

<sup>8</sup> Estema Eyacuiñajjija quea jea nee neejo oya quea ca'a nee po mee canaje; quea huiso ma dejjaa ajjima acani ameesahua canaje ojjaña cuana. Jamaya ojjaña ba mee canaje oya Jesusaja epeeji nei. <sup>9</sup> Jamatii pea Jodio cuana Sinene cuiñajjijo ba'e, Anejanía cuiñajjijo ba'e, Sinisia meshijo ba'e, pea cuana Asia meshijo ba'e pea'aiya Estema emimicuiaje nobiajeajji nisho acanaje. E'e, Jodio cuaa equi bajjani Echacojji epichojea'yoja equi ojee e'aniijjijo ¡jachichaquiani cuaa Estema emimicuiaje nobiajeajji nisho acanaje. <sup>10</sup> Edojjoshahua Pameya ca ca Estema quea ¡jashahuabaqui ja'a nee po mee canaje; oya mimi meesahua canaje pea'ai. Jamajjeya ma Jodio cuana Estema nijje ¡jamimicuiaje nobiajea pajeaquinaje, yajja saja'ame yajji. <sup>11</sup> Oya cuana Estema nijje quea quene nee poanaje. Jamajjeya quecua'yo sa acanaje. Siajjepojji cuana bejjo quia canaje Estema siajje ajji. Jama siajje ame aje acanaje ba'a: —Ecuaya Estema shajja'ajjanaje. Ohuaya ca ¡ja ca oe Eyacuiñajji niñeba cani quea tai. Esejaya etiiquiana Moisesi niñeba cani pea'ai —poanaje ma siajjepojji cuana, bejjo sosejje.

<sup>12</sup> Jamajjeya ma shajja'ajja majje ojjaña Jodio cuana Estema nijje quea quene nee nee poanaje. E'e, Jodio etii cuana, Moisesija etehue'yo huohuijji cuana pea'ai quea quene nee poanaje Estema nijje. Jamajjeya Estema que cuajicuajjibenaje; iña canaje. Dojo canaje Jodio etii cuana ojee ani yasijje. O cojja nei nequi mee canaje. <sup>13</sup> Majoya pea siajjepojji cuana ¡jequi canaje Estemajo siajje ajji. Jama siajje pome poanaje ba'a: —Estemaya ca ca Moisesija etehue'yojo quea tai mimiani, Eyacuiñajjija equijo pea'ai. <sup>14</sup> E'e, ecuaaya oya shajja'ajjanaje; jama poanaje Estema ba'a: “Jesusaa ma Nasanenajo ba'yahuaa jiquio equi, Eyacuiñajjija equi jeabichajea caje'yo. Jesusaa eseya Moisesija etehue'yo pajea mee caje'yo ojaya ehuohui'yo jayojja jama eba'ejji” —jama siajje pomeya poanaje Estemajo.

<sup>15</sup> Majoya ojjaña Jodio etii cuaa jomajo aniya Estema ba neinei canaje. Ba canaje ojaya ecojja esohuidojojji jayojja cojjame, quea cojja bei nee nee, quea cojja ja'a nee nee.

## 7

*Estemaa sohuihuohui canaje Jodio etii cuanaja eshajja'ajjaji nisho*

<sup>1</sup> Majoya Eyacuiñajji nijje emimijji etiiya Estema huohui'ajja canaje jama ba'a: —¿A'a jiquio esohui e'e nei? ¿A'a cuae miyaya jamaya aña?

<sup>2</sup> Estemaa saja'a canaje jama ba'a: —Ecuea epeeji cuana, dejja etii cuana pea'ai, ¡shajja'ajjacue mo! Yahuajo nei nei Eyacuiñajji quea pame nee esejaya etiiquiiana Amajama que jjanequipanaquia poa. Jamaya poa Amajama Mesopotamia meshijo ba'yahua, Janani meshi yasijje poe jjimahuajo. <sup>3</sup> Eyacuiñajjiya Amajama huohui ca poa jama ba'a: “¡Mesopotamia meshijo a'a ba'e majajji! ¡Jiña'yocue oe! ¡Pea meshi yasijje poquicue! ¡Miquea huapa pojjeama cuana jiña'yocue! Eyaya miya pea meshi ba meeje. Jomajo miya ba'e meeje'yo” aca poa Eyacuiñajjiya.

<sup>4</sup> —Jamajjeya Amajamaa Canea meshijo ba'e poquia poa Janani meshi yasijje. Jomajo nequia poa. Oja chii mano'ya poa. Oja chii mano'yajo, Eyacuiñajjiya Amajama huoojea ca'ya poa jiquio meshi yasijje, ma ese jjeyahua nei ba'yani yasijje. <sup>5</sup> Jamatii Eyacuiñajjiya oya jiquio meshi quia jjima poa ojaya epojji. Que biso nei ojaya nahue mee jjima poa. Eyacuiñajjiya oya huohui ca poa jama ba'a: “Amajama, jiquio meshi miquea poaje'yo quijje; mique osecua cuanaja quijje nei poaje'yo pea'ai” oya aca poa Eyacuiñajjiya, jamatii Amajama edejja tii nojinoji poa, bacuama' tii poa.

<sup>6</sup> —E'e, Eyacuiñajjiya Amajama huohui ca poa jama ba'a: “E'e jojo nei miquea osecua cuana jiquio meshijo ba'eje'yo quijje nei. Jamatii jjeya jiquio meshi onajaya. Jamajjeya miquea osecua cuana jiquio meshijo nequi poqui caje quea huesha nee pea meshi yasijje. Joma meshijo ba'e dejja cuaa miquea osecua cuana quea huiso napa caje. Chaco tiitii mee caje'yo sosema' quea huiso nee nee shequajame, 400 shequajame. <sup>7</sup> Quea mase poaje miquea osecua cuana nijje. Majoya eyaya ma dejja quea mase cuana tecueaje'yo, quea nee nee po meeje'yo pea'ai. Jamajjeya miquea osecua cuana ma meshijo ba'e poqui mee caje'yo jiquio meshi yasijje epoe o'oyajji. Jiquio meshijo tii eya bihuia caje o'oya cuaa. Ecue sohui jayojja jama ba'e caje cuana pea'ai”. Jamaya yahuajo nei nei Eyacuiñajjiya Amajama aca poa.

<sup>8</sup> —Majoya Eyacuiñajjiya pea esohui huohui ca poa ojjaña ba meeji oya e'e jojo nei Amajama nijje miminaje. Jama poa ba'a: “Amajama, jehusejjajecue cuiishasha biso nei miquea, mique bacua cuanaja, ojjañaja. Jamajjeya ojjaña cuaa ba caje eya e'e jojo nei minijje miminaje, miya, mique osecua quea huiso nee nee cuana jiquio meshi quiaña miquea epo'yajji tii tii” aca poa.

—Jamajjeya Amajamaa Eyacuiñajji shajja'ajja ca poa. Quijje oja bacua Isaaca cuaya poa. Ebacua jjeya cuaya me oeje pea beca peejjima cahuime poajo, Amajamaa oya cuiishasha biso nei jehusejjajecue ca poa. Majoya tii majje Isaacaja bacua Jacobo cuaya poa. Isaacaa oya cuiishasha biso nei jehusejjajecue ca poa. Quijje tii majje Jacoboja bacua cuana cuaya poa quea huiso nee; 12 huisome dejja poa, epona oe nei poa. Jacobohua oya jayojjaya aca poa, ejeajjiya aca poa jayojjaya. Jacoboja bacua ejja cuana tiinaje ojjaña Isaeni cuanaja etiiquiiana, esejaya, de. <sup>9</sup> Ma edoe mese cuana aje echahua mesejo quea quene nee poa, Josejo. Quia ca'ya poa dejja cuana Ejito meshijo ba'e yasijje ejjesheji soseje. Echacojji sosema' Jose poa. Jamatii Eyacuiñajjiya Jose pajea'yo jjima poa; jaahuana ca poa. <sup>10</sup> E'e, jamatii pea cuaa oya quea mimishi acanaje, Eyacuiñajjiya Jose jaahuana ca poa. Ejito emeshi mese Panaohua Jose quea jea nee aca poa. Jamajjeya Panaohua Jose ojjaña huoojea'yajji po mee ca poa Ejito meshijo. Panaoja equi jaahuanajji po mee ca poa Jose. <sup>11</sup> Majoya bobi chama' poa Ejito meshijo, Canaani meshijo, ojjaña meshijo pea'ai. Bobimajo quea huiso bobi yasijje po'ya poa. Eseyaya etiiquiiana cuana pea'ai bobima' poa. <sup>12</sup> Majoya Jacobohua jiquio meshijo ba'eya shajja'ajja canaje bobi quea huiso Ejito meshijo yani, Ejito emeshi meseja. Jamajjeya ohuaya esejaya etiiquiiana, oja bacua cuana huoojea ca poa Ejito meshi yasijje bobi jjequiya. <sup>13</sup> Quijje poqui o'oyanaje Ejito meshi yasijje bobi jjequi o'oyaa. Poqui o'oyajo Joseya oja doe cuana huohui ca poa: “Eya ca ca iña mique chahua Jose” aca poa.

—Joseya oja o'i cuana dojo ca poa emeshi mese Panao que, ojaya ebajji. <sup>14</sup> Majoya Joseya oja o'i cuana huoojea ca poa oja chii jjequiya, Jacobo jjequiya. Ojjaña oja huapa pojjeama cuana quea huiso nee nee jjequi ca poa Ejito meshi yasijje, 75 huisome. <sup>15</sup> Jamajjeya Jacobo ojjaña oja bacua cuana nijje, oja osecua cuana nijje pea'ai poquia poa Ejito meshi yasijje. Jomajo, Ejito meshijo oya mano'ya poa. Jomajo esejaya etiiquiiana cuana quea huiso nee mano'ya poa. <sup>16</sup> Jacobo, oja bacua beca cuana pea'ai mano'yajo esa' cuana ye ca'ya poa cuaa jiquio meshi yasijje, Siqueme cuiñajji yasijje ohuajea'yohua. Mei jjani yasijje huananobiajea ca'ya poa, ma yahuajo Amajamaa jjeshe ca poa Jamonoja meshi, mei jjani ehuananobiajea'yojji, bejjo sosejje —Estemaa acanaje.

<sup>17</sup> —E'e, ma Eyacuiñajjiya yahuajo nei Amajama huohui ca poa jayojja jama ohuaya aca poa. Isaeni dejja cuana Ejito meshijo ba'e jpapapaqui'ya poa; quea huiso nee nee po'ya poa. <sup>18</sup> Majoya Ejito meshi mese mano poqui'yani poa. Majoya pea cuaya majje oya jayojja poa. Quijje pea dejja Ejito emeshi mese poa, pea Panao. Jose ojaya ba jjima poa yahuajo nei mano'yojojo. <sup>19</sup> Ma emeshi mese eyacua quea mase poa esejaya etiiquiiana nijje. Oya cuana quea mimishi aca poa. Quea yeno nee nee po mee ca poa. E'e, ebacua cuana jeajea mee ca poa emanajeajji —Estemaa acanaje.

<sup>20</sup> —Majoya etiiquiianaja bacua Moisesi bajjani cuaya poa. Oya quea bacua bame nee nee poa, pea ebacua cuana quea bame pishana poa. Oja enaeseya oya quehuajje nei jaahuana ca poa oja equijo. Quehuajje tii mee ca poa pea beca peejjima ba'ime. <sup>21</sup> Majoya emanoyojji nisho enaeseya Moisesi esecue yasijje dojocuaya'ajjaqui ca poa. Jamatii Emeshi mese Panaoja bacuaseya Moisesi ba ca poa. Jjeshe ca poa. Dojo ca poa tii meeya. Ojaya ebacua poa Moisesi, Panaoja bacuaseja. <sup>22</sup> Jamajjeya Moisesi ojjaña Ejito cuanaja esohui ba mee ca poa Ejito esohui huohuijji cuaa. Jamajjeya Moisesiya Ejito etii cuaa jayojja jama aca poa; quea ja'a nee esohui huohui ca poa pea'ai —Estemaa acanaje.

<sup>23</sup> —Majoya Moisesi peaja ejiojji miji pea'ai shequiajame tii majje, 40 shequiajame po majje jama poa ba'a: “Ecuea huapa pojjeama cuana cabaquiahua, Isaeni cuana”. <sup>24</sup> Moisesiya ba cañaquia poa oe Ejito dejjaa Isaeni dejja cuiasejjajea caqui. Ba majje, quenequene majje Moisesiya ma Ejito dejja cuiajea ca poa. Mano'ya poa. <sup>25</sup> E'e, Moisesi jjashahuabaquia poa jama ba'a: “Ecuea huapa pojjeama cuanaja eba Eyacuiñajjiya eya huoojea canaje ona jaahuanaa, eseja meshi yasijje dojohua, echacojji sosema' pojjeama epojji” poanaje Moisesi.

—Jamatii ojaya huapa pojjeama cuanaja Moisesi ba jjima Eyacuiñajjiya huoojea'yo. <sup>26</sup> E'e, mecajjeahua Moisesi poe o'oyanaje ojaya huapa pojjeama cuana baa. Beca cuana jjacuaquiiani ba majje Moisesiya oya cuana quea bei po mee sa aca poa. Jamajjeya huohui ca poa jama ba'a: “Epeeji cuana, miqianaya huapa pojjeama cuana. ¿Apiojji acuae huapa pojjeama nijje jjacuaquiiani so'o? Jamaya quea tai”.

<sup>27</sup> —Jamatii oe Jodiohua ma ojaya huapa pojjeama cuiajji nishohua Moisesi iñajjeanajea ca poa; shajja'ajja sa po'yo ajja poa. Jama aca poa ba'a: “¿Aya shai miya ecuana huoojeajji po mee ca'yonaje so'o? <sup>28</sup> ¿A'a eya cuiaje'yo pea'ai? Ecuea eba miyaya oma mecajje Ejito dejja cuia'yonaje.

<sup>29</sup> —Ma shajja'ajja majje Moisesi quea mete poa: “Ojjañaja eba eyaya Ejito dejja cuia'yonaje. Ejito emeshi meseya eya cuia ca chana”. Jamajjeya quehua poquia poa pea meshi yasijje, Madiani meshi yasijje. Jomajo oya ba'ya poa oja huapa pojjeama cuana nijje. Jomajo ba'e eponajo jjahuanaquia poa. Jomajo oja bacua ejja cuaya poa beca. <sup>30</sup> Jomajo oya ba'ya poa peaja ejiojji miji pea'ai shequiaja huisome, 40 shequiaja. Majoya oya meshi jabojo, Sinai eyiyo pejejo poquianijo, ñajjajja jaahuana poequijo Eyacuiñajji o que poquia poa. Acui tii'ajja jiji mee ca poa. Jamatii ma acui quiyo'yo ajja poa. Eyacuiñajji ma acui jijiqui yiyesamajo jjanequipanaquia poa. <sup>31</sup> Jamajjeya Moisesi acui jijiqui ba majje quea mete poa. Jjanequichipiquia poa acui jijiqui baa. Eyacuiñajji acui jijiqui yiyesamajo nequi onijje mimia poa. <sup>32</sup> Jama aca poa ba'a: “Moisesi, eya Eyacuiñajji. Miquea etiiquiiana enijje jjapeequia poa, Amajama, Isaaca, Jacobo pea'ai”.

—Jamajje Moisesi piopionaje quea mete jjejojo. Acui jiqui ba maja sa po'yo ajja poa. <sup>33</sup> Majoya Eyacuiñajjiya oya jama aca poa ba'a: “Moisesi, jiquio meshijo tii eya enequijo, miquea ejiojji shejee huijiajeacue enijje emimijji! <sup>34</sup> Eyaya ecuea epeeji cuana baña Ejito meshijo ba'e. Jomajo Ejito dejja cuaa ecuea epeeji cuana janobajjima nei napa cani eyaya baña pea'ai. Oya cuana quea yeno nee nee pa neinei eyaya shajja'ajjaña. Jamajjeya eyaya oya cuana nahueje'yo, oya cuana dojoje'yo sosema' echaco majajji pojjeama. ¡Poquicue, Moisesi! Eyaya miya huoojeaje o'oya Ejito meshi yasijje” aca poa Eyacuiñajjiya —Estema poanaje.

<sup>35</sup> —¡Bacue! Yahuaajo nei nei Moisesija huapa pojjeama cuaa oya cajaa aca poa. Shajja'ajja sa po'yo ajja poa: “¿Aya shai miya ecuana huoojea'yojji po mee canaje so'o?” aca poa cuaa.

—Jamatii Ejito dejja cuanajo sosema' echaco majajji pojjeama jojoya, Eyacuiñajjiya Moisesi huoojea ca poa ojaya epeeji cuana jaahuanajji epojji. Eyacuiñajjiya Moisesi oya cuana dojo meesahua ca poa Ejito dejja cuanajo sosema' echaco majajji pojjeama. E'e, Eyacuiñajji jjanequipanaquia poa acui jiqui Moisesija ebajji. <sup>36</sup> Jamajjeya Moisesiya Jodio cuana, Eyacuiñajjiya epeeji cuana Ejito meshijo ba'e dojocuayaqui ca'ya poa pea meshi yasijje epoqui'yojji. Eyacuiñajjiya Moisesi Ejito meshijo quea huiso ma dejjaa ajjima acani amesahua ca poa. Ojaya epeeji cuana Ejito meshijo ba'e dojocuaya meesahuaqui ca poa pea meshi yasijje epoqui'yojji, jiquio meshi yasijje. Bae ena huo'o ojje miji yasijje poqui meesahua ca poa. Bae ena nequiashiña mee ca poa. Majoya ojjaña poquia poa ojje miji yasijje. Meshi quea jabojo, quimajo ba'e meesahua ca poa quea shequiaja huiso nee, peaja ejiojji miji pea'ai shequiajame, 40 shequiajame. <sup>37</sup> Ohuaya, Moisesiya Isaeni dejja cuana jama aca poa ba'a:

“¡Bacue! Eyacuiñajjiya eya huoojea canaje ojaya esohui huohuiya. Quijje ohuaya pea esohui huohuijji e jayojja miquiana que huoojea caje, miquiana nijje meshijo ba'e tii. Ojjaña joya ojaya esohui jayojja jama po ajja aje oe Eyacuiñajjiya cajaa acaje'yo; quea nee nee po mee caje'yo tii”.

Jamaya Moisesiya aca poa yahuaajo nei nei.

<sup>38</sup> —E'e, Moisesi Isaeni cuana nijje poquianijo meshi quea jabo neejo, meshi quimajo oya cuana nijje poquia poa Sinai eyiyo huasijje. Jomajo Sinai eyiyo biajje Eyacuiñajji mimia poa Moisesi nijje. Ma esohui shajja'ajja majje Moisesiya Isaeni cuana huasijje huohui ca poa, esejaya etiiquiana huasijje, esohui eba'e tiitii mee'yojji. Ma esohui Moisesiya tehue ca poa esejaya ebajji pea'ai.

<sup>39</sup> —Jamatii esejaya etiiquiana Moisesija esohui shajja'ajja sa po'yo ajja poa. Oya cuaa ca ca Moisesi niñeba ca poa. Ejito meshi yasijje poqui o'oya sa poa quea mimishi jjejojo. <sup>40</sup> Moisesi eyiyo biajje Eyacuiñajji nijje mimianijo, etiiquiana aje oe Anoni jama aca poa ba'a: “Anoni, Eyacuiñajji nisho acue ecuanaja ebihuiajji, ecuana hui dojojji epojji, ejiojji jaahuanajji. Moisesiya eseya Ejito meshijo ba'e jjequi canaje jiquio meshi tai yasijje; quea jabojo manojje'yo. Jjeya Moisesi chama!. ¿Achacua shai oya poquinaje? Ecuanaja ba jjima” poa esejaya etiiquiana cuana —Estemaa aca poa.

<sup>41</sup> —Jamajjeya etiiquiana cuaa eyacuiñajji nisho pana ca poa ana'ajja bacua nisho, mei huo'o. Aquiana cuana dahua ca poa ma eyacuiñajji nisho bihuiajji. Ojee ijja'ijja poa. Quea bihui nee jayojja poa oja panaa shajja'ajja cani poso. <sup>42</sup> Etiiquiana cuaa Eyacuiñajji pojjeama bihuia ca poa, oja pana, majameta cuana bihuia sa aca poa. Jamajjeya shajjama' jjejojya Eyacuiñajji esejaya etiiquiana nijje jjapepajeaquia poa. E'e, jama poanaje ba'a: “Oya cuana quea jjashahuabaqui tai poani jojya eyaya oya cuana jaahuana maja ajja pojje'yo, ecuea esohui eba nisho jjejojo”. E'e, ma etiiquiana quea mimishijo yahuaajo nei nei Eyacuiñajjiya esohui huohuijji cuaa tehue ca poa jama ba'a:

“Isaeni dejja cuana, e bihuiajji pojjeama miquianaaya huo quea huiso quecuanaje quea huiso shequiajame, 40 shequiajame meshi jabojo, dejjama' meshijo. Aquiana cuana dahuanaje pea'ai e bihuiajji pojjeama. <sup>43</sup> Chojja. Miquianaaya ca ca oe daqui equi sisi yajji dojo tiitii nequinaje eyacuiñajji nisho Monoca bihuiajji. Ma

daqui equijo nequianaje eyacuiñajji nisho Monoca bajjani. Majameta Sepani bajjani aje oe bihuia tiitiinaje pea'ai. E'e, majameta miqianajaya eyacuiñajji nisho poanaje. Miquianaaya aje oe epana'yo cuana bihuia aninaje pea'ai. Eya bihuia jjima miqianajaya. Jamaya quea tai. Jamajjeya eyaya pea dejja cuaa miqianaya iña meesahuaje quea huesha nee nee edojo'yoyji pea meshi yasijje, Babinonia meshi yasijje dojo meeje. Jomajo quea yeno po meeje ejjabahuejjaquijji, enijje e'e jojo nei ejjapeequijji”.

Jamaya yahuajo nei nei tehue ca poa esejaya etiiquiana huasijje —Estemaa acanaje—. <sup>44</sup> E'e, esejaya etiiquiana Eyacuiñajjija daqui equijo Eyacuiñajji nijje mimianinaje. Ma daqui equi huacuaya huacuaya quea huesha nee dojo canequinaje meshi jabojo. E'e, Moisesi Eyacuiñajjiya huohui ca poa: “¡Daqui equi iyacue enijje emimijji! Jama iyame acue ba'a” aca poa. E'e, Moisesi daqui equi cahui ba mee ca poa. Eyacuiñajjija esohui jayojja neiya daqui equi iya ca poa, Moisesiya. <sup>45</sup> Majoya Moisesi mano'yajo, esejaya etiiquiana yahuajo nei nei ba'eya Josoe nijjeya ma daqui equi meshi jabojo dojo majamaja canequia poa jiquio meshijo eba'e'yoyji. Jodio pojjeama cuaa ca ca jiquio Jodioja meshi eba'e'yoyji aca poa. Jamajjeya Eyacuiñajjiya Josoe hoojea meesahua ca poa Jodio pojjeama cuana; mete mee ca poa. Eseyaya etiiquiana cuana jiquio meshi yasijje ba'e mee ca poa. E'e, ma daqui equi nequia poa jiquio meshijo, Jodioja meshijo. Jamaya nequi tiitiia poa esejaya etiiquiana Dabi ba'e jjimahuajo.

<sup>46</sup> —Emeshi mese Dabi quea pame nee nee, Eyacuiñajjija quea boti nee nee poa. Jaahuana ca'ya poa pea'ai. Jamajjeya Dabiya Eyacuiñajjija equi iya sa aca poa daqui equi pojjeama, mei equi quea bame iya sa aca poa Eyacuiñajji bihuiajji. Ojjaña Jacoboja osecua cuana Eyacuiñajji bihuia mee sa aca poa mei equi eyacuajo. Jamatii Dabi mei equi iya mee jjima poa Eyacuiñajjija. <sup>47</sup> Dabija bacua ejjaa Sanomo bajjaniya ca ca mei equi quea bame nee iya ca poa Eyacuiñajji bihuiajji.

<sup>48</sup> —Eyacuiñajji quea pame, quea ca'a nee nee ca ca equi cuanajo ba'e ajja, dejjaja equijo. E'e, yahuajo nei Eyacuiñajjija esohui huohuijji cuaa oja sohui tehue ca'ya poa jama ba'a:

<sup>49</sup> “Eya Eyacuiñajji, eyajo ojjaña hoojea'yoyji poani. Ojjaña meshi cuanajo pea'ai eya Emeshi Mese nei poani. Ojjaña ecuea aquiana. Jamajjeya ¿yajja acuaeya equi iyaje so'o e ba'ejji? ¿A'a cuae eya equijo jomishocaje? Eya hueahuea ajja. <sup>50</sup> E'e, yahuajo eyaya ojjaña aquiana cuana pana poa”.

Jamaya yahuajo nei tehue ca poa Eyacuiñajjija esohui —Estemaa acanaje.

<sup>51</sup> —Miquianaya ca ca oe quea sapa ca'a, jjashahuabaqui ajja. Edojjoshahua Pameja ehuhui'yo a'ajja tii. Miquianajaya etiiquiana cuana quea mimishi nee jayojja jama poani. <sup>52</sup> E'e, etiiquiaa aje oe yahuajo ojjaña Eyacuiñajjija esohui huohuijji cuana quea mimishi aca'ya poa. E'e, yahuajo nei Eyacuiñajjija esohui huohuijji cuaa huohui ca poa Jesosajo jama ba'a: “Quijje Eyacuiñajjija hoojea'yo ojjaña jaahuanajji poeje. Oya quea pame nee nee, mimishi'ama nei nei poaje” aca poa cuaa. Jamatii miqianajaya etiiquiaa ma esohui huohuijji cuana quecua ca'ya poa. Oya jayojja jjeya miqianaaya Jesosa iña meesahuanaje onaja quecua'yoyji. <sup>53</sup> Yahuajo Eyacuiñajjija esohuidojojjiya quea huiso nee neeya ba canaje Eyacuiñajjiya sohuihuohui caqui miqianajaya etiiquiana huasijje. Majoya etiiquiaa ma esohui miqiana huasijje huohui ca poa. Jamatii ma esohui jayojja jama ba'e sa po'yo ajja miqianaya —Estemaa acanaje.

#### *Estema sapa jajahuejjajea ca'yonaje cuaa*

<sup>54</sup> Estemaja esohui shajja'ajja majje quea quene nee poanaje Jodio dejja cuana. Ese' ijjiayai canaje quea maseya jjejojo. <sup>55</sup> Jamatii Edojjoshahua Pameya Estemajo nequiya oya eyahuasijje ba meesahua canaje jjeyahua nei. Eyajo ba mee canaje Eyacuiñajji quea jeajahua nee nee, quea ca'a nee nee. Jesosa ba mee canaje pea'ai, Eyacuiñajji pejejo. <sup>56</sup> Jamajjeya Estema jama poanaje ba'a: —¡Bacue! Eyaya esecue eca'apejo nequi

baña eyajo. Ojjañaja Edoe Mese Jesosa baña Eyacuiñajji ebianei mijijje nequi ojjaña huoojea'yojji —Estema poanaje.

<sup>57</sup> Jodio dejja cuana ma shajja'ajja majje quea quene nee nee poanaje. Estemaja esohui Jesosajo eshajja'ajja poaje jjejojo eme sisiya eshajja huejja noco canaje. Taaa majje ojjaña cuajicuajijebenaje Estema que. <sup>58</sup> Estema iña canaje, cuiñajji esecue yasijje dojocuayaqui canaje. Mei jjeshe majje Estema sapa jajahuejjajea canaje meiya. Dejja cuaa ma Estema jajahuejjajajji epo cuaa ojaya daqui nei cuana huijjijajea canaje; Sanoni quia canaje ejaahuanajji.

<sup>59</sup> Onaaya Estema sapa jajahuejja canijo tii, Estema Jesosa nijje miminaje jama ba'a: —Jesosa, ecuea Emeshi Mese nei, jecuea edojjoshahua jjequisohuacue eyahuasijje!

<sup>60</sup> Ecuio'oshajjajo nequi majje Jesosa nijje mimi neineinaje jama ba'a: —Emeshi Mese nei, jjiquio dejja cuana quea mimishi poanija mimishi cuijea'yocue! —jamaya mimi majje Estema mano'yonaje. Chama'yo tii poanaje.

## 8

### *Pabohua Jesusaja epeeji cuana napa canaje*

<sup>1</sup> Pea cuaa Estema sapa jajahuejjajea cani ba majje Sanoni jjashahuabaquinaje jama ba'a: —E'e jamaya, casapa jajahuejjajea cahua, de —poanaje, Estema Jesosajo siajje poani posojo jamaya poanaje Sanoni.

Majoya ma pojjajo tii Jesusaja epeeji pojjeama cuaa Jesusaja epeeji cuana janobajjima nei napa canaje Jenosanenajo ba'eca cuaa. Jamajjeya beshahua nei ojjaña Jesusaja epeeji cuana poquinaje pea cuiñajji cuana Jodio meshi yasijje; Samania meshi yasijje pea'ai poquinaje. Jesusaja huoojea'yo esohui huohuijji cuana ca ca oe poqui jjima poanaje; Jenosanenajo nequinaje tii.

<sup>2</sup> Jamajjeya dejja quea pame nee cuaa, Jesusaja epeeji cuaa Estema dojo canaje mojea'yohua. Pa neinei'yonaje ojo pea'ai.

<sup>3</sup> Sanoniya ca ca quea tai aca'yonaje Jesusaja epeeji cuana. Napa huicha'a huicha'a ca'yonaje ojjaña equijo ba'e. Dejja cuana, ponaña pea'ai iña majje dojo canaje equi ejjajejanobiaquijji yasijje jeanobiaa. Dejja mimishi cuana nijje ejeanobia jaanaje.

### *Penipeya esohui huohuiqui canaje Samania meshijo*

<sup>4</sup> Jesusaja epeeji cuana ojjaña meshi cuana huasijje poquinaje. Esohui huohui capoquinaje Jesusaja. <sup>5</sup> Penipe ca ca poquinaje Samania meshi yasijje. Jomajo Jesosa Quitojo huohui canaje ojjaña cuana huasijje: —Jesosa Eyacuiñajjija huoojea'yo ojjaña jaahuanajji, de —Penipeya acanaje.

<sup>6</sup> Ojjaña cuaa Penipeja esohui shajja'ajja canaje. Penipeya ma dejjaa ajjima acani ba majje ojjañaa ojaya esohui shajja'ajja neinei canaje. <sup>7</sup> E'e, eshahua cuana dejjajo nequi taaa neinei majje cuayaqui'yonaje ma Penipeya huoojeacuayajea canaje. Jeo'ajja cuana ohuaya jeo mee canaje. Jiojjijajja jjajiojji jeapiihui meequi ca'yonaje pea'ai Eyacuiñajji nijjeya. <sup>8</sup> Jamajjeya ojjaña cuana Samania meshijo ba'eca quea bihui nee nee poanaje.

<sup>9</sup> Samania meshijo ba'enaje eyamiquecua Simoni bajjani. Edosiquiaa oya ma dejjaa ajjima acani ameesahua canaje quea huiso shequiajame. Jamajjeya quea huiso cuana Samania meshijo ba'eca quea mete nee poanaje Simonijo. Simoniya huohui canaje jama ba'a: —Eya ca iña quea ca'a nee nee. Ojjaña ecuea eba, de.

<sup>10</sup> Jamajjeya ojjaña cuaa ojaya esohui shajja'ajja neinei canaje, emeshi mese cuaa, echacojji cuaa, dejja tii cuaa, esho'iquiana cuaa pea'ai. Ojo jama huohuime acanaje cuaa ba'a: —Jiquio dejja, Simoni Eyacuiñajjiya ameesahua cani —poso acanaje cuaa—, ma dejjaa ajjima acani quea huiso nee.

<sup>11</sup> E'e de, quea huiso shequiajame ohuaya ma dejjaa ajjima acani acajo, quea huiso ojo quea mete poanaje. Oja sohui shajja'ajja canaje ojjaña.

<sup>12</sup> Jamatii Penipeya esohui quea pame nee Jesosa Quitojo huohui canaje jama ba'a: —Jesosa Quito Eyacuiñajji nijje eyajo nequi, ojjaña huoojea'yojji poani. Onijje jjapeequi'yajo ohuaya miya ba'e tiitii mee caje'yo onijje eyajo —acanaje Penipeya.

Quea huiso nee nee dejja, ponaña pea'ai Penipeja esohui Jesusajo shajja'ajja majje Jesosa nijje jjapeequinaje. Jamajjeya Penipeya oya cuana Eyacuiñajjijo besa mee canaje enajo.

<sup>13</sup> Majoya Simoniya pea'ai Penipeja esohui shajja'ajja canaje. Jesosa nijje jjapeequinaje. Penipeya oya Eyacuiñajjijo besa mee canaje pea'ai. Majoya oya Simoni Penipe nijje po'ayequi nequinaje. Penipeja esohui shajja'ajja huicha'a huicha'a canaje. Eyacuiñajjiya Penipe ma dejja ajjima acani ameesahua canaje. Jamajjeya ma ba majje Simoni jjaba'one neineiquinaje.

<sup>14</sup> Majoya Jesusaja huoojea'yo esohui huohuijji cuaa Jenosanenajo nequiya onaja esohui shajja'ajja canaje. Jama acanaje cuaa ba'a: —Quea huiso nee Samania meshijo ba'eya Eyacuiñajjiya esohui shajja'ajja canaje. Jesosa nijje jjapeequinaje quea huiso nee nee, de —acanaje cuaa.

Jamajjeya ma shajja'ajja majje Jesusaja epeeji etii cuaa Peno, Huani pea'ai Samania meshi yasijje huoojea canaje Jesusaja epeeji eyacua cuana baa. <sup>15</sup> Samania huasijje poqui majje Peno, Huani pea'aiya Jesusaja epeeji cuana huasijje Eyacuiñajji nijje miminaje jama ba'a: —Eyacuiñajji, ¡Edojjoshahua Pame huoojeacue jiquio miquea epeeji cuana huasijje dobiquiya!

<sup>16</sup> E'e, yahuaajo Edojjoshahua Pameja Samania meshijo ba'e cuana huasijje dobiqui jjima. Oya cuana ca ca oe Emeshi Mese nei Jesosa nijje jjapeequi'yajo pea cuaa oya cuana Eyacuiñajjijo besa mee canaje enajo. <sup>17</sup> Jamajjeya Penohua, Huaniya pea'ai poe majje ma epeeji cuana sapa biajje eme' huana canaje. Peno Eyacuiñajji nijje mimiajo Edojjoshahua Pame ona que dobiqui'yonaje.

<sup>18</sup> Simoniya ba canequinaje Jesusaja huoojea'yo esohui huohuijjiya Jesusaja epeeji cuanaja sapa biajje eme' huana cajo, Edojjoshahua Pame ona huasijje dobiquinaje. Ba majje Simoni jjashahuaba taiquinaje jama ba'a: —Eyaya Edojjoshahua jjesheje bejjo sosejje.

<sup>19</sup> Jamajjeya ohuaya Peno, Huani pea'ai jama acanaje ba'a: —Mi jayojja jama a sa año eyaya. Jamajjeya eyaya dejja cuanaja sapa biajje eme' huana majje Edojjoshahua Pame dobiqui meeje'yo pea'ai. ¡Che mo eya jamaya a'yocue miyaya bejjo sosejje! —acanaje Simoniya.

<sup>20</sup> Ma shajja'ajja majje Penohua oya tecuea canaje jama ba'a: —Simoni, miya jjashahuaba taiquianijo Eyacuiñajjiya miya mano mee ca chana'. Miquea ejjeshejji pea'ai chama'yo tii po mee ca chana'. Miya jjashahuaba taiquiani; Eyacuiñajjiya Edojjoshahua Pame huoojea caje'yo ejjeshejji sosejje poso miyaya año. <sup>21</sup> Chojja, Simoni. Miyaya Edojjoshahua Pame bejjo sosejje ejjeshejji pojjeama. Eyacuiñajjiya eba miya quea tai jjashahuabaquiani, quea mimishi. Jamajjeya ecuana nijje echacojji pojjeama Eyacuiñajjijo. <sup>22</sup> Jamajjeya ¡miquea ejjashahuabaquijji pajea'yocue! ¡Eyacuiñajji nijje e'e jojo nei mimicue! “¡Eyacuiñajji, enijje a'a quea quene pojji!” acue. “¡Ecuea mimishi, ecuea ejjashahuaba taiquijji pajea meesahua'yocue!” acue. <sup>23</sup> E'e Simoni, ecuea eba miquea ejjashahuabaquijji quea tai. Ecuaaya Edosiquiana nijjeya ma dejja ajjima acani anaje poso año miyaya. Jama a sa año pea'ai, de. Miquea mimishi cuana pajea meemee'yo ajja pea'ai. Quea nee nee poaje miya, Simoni —Peno poanaje.

<sup>24</sup> Peno shajja'ajja majje Simoni quea mete nee nee poanaje. Jamajjeya jama acanaje ba'a: —Peno, Huani pea'ai, ¡Eyacuiñajji nijje mimicue ejo! Jamajjeya Eyacuiñajjiya ecuea mimishi cuana cuijea caje'yo. Miquea esohui jayojja jama pojjeama ohuaya eya acaje'yo —poanaje.

<sup>25</sup> Majoya Penohua, Huaniya pea'ai Emeshi Mese nei Jesusaja esohui huohui majamaja canaje quea huiso cuana huasijje. Majoya oya cuana poqui o'oyanaje Jenosanena huasijje. Poquije ojjaña cuiñajji cuana huasijje dobiquipoquinaje. Ojjaña Samania meshijo ba'eca cuana huasijje Jesusaja esohui quea pame nee huohui capoquinaje. Majoya esohui huohui majje Jenosanena huasijje poqui o'oyanaje.

*Penipeya Etiopia dejja huasijje Jesusaja esohui huohuiqui canaje*



<sup>26</sup> Majoya oe esohuidojojjiya miminaje Penipe nijje. Jama poanaje ba'a: —Penipe, ¡poquicue miya eeno poejji miji jaa ejiojjijje, ma Yasa cuiñajji yasijje quea huesha nee nee epoquijji, ma ejiojjijje Jenosanenajo ba'e cuana poquiani Yasa cuiñajji yasijje, meshi jabo yejje majje!

<sup>27</sup> Majoya Penipe poquinaje. Poquijeya dejja Etiopia meshijo ba'e ebiñajja cajja'yo ba canananaje. Oya Etiopia dejja etii, emeshi mese epona Canase bajjanijo chacochoani, aquiana quea nahue, bejjo cuana jaahuanajji. Oya yahuajo poquinaje Jenosana huasijje Eyacuiñajji bihuiaa. <sup>28</sup> Jjeya ca ca oja meshi yasijje poqui o'oyani, ejiojjijje. Mapichiya oya dojo cani aquiana dojojji biajje ani. Poquijeya esohui ba capoquinaje, ma yahuajo nei Eyacuiñajjija esohui huohuijji Isaiaa tehue ca poa ba capoquinaje. <sup>29</sup> Jamajjeya Edojjoshahua Pame Penipe nijje miminaje jama ba'a: —¡Aquiana dojojji yasijje poquicue miya, Etiopia dejja etii yasijje!

<sup>30</sup> Jamajjeya Penipe poquicuajinaje ma dejja que. Shajja'ajja cañaquinaje ohuaya esohui acani. Shajja'ajja majje huohui'ajja canaje jama ba'a: —¿A'a ma esohui miquea eba? ¿A'a miquea quea ja'a nee? —Penipeya acanaje.

<sup>31</sup> Etiopia dejjaa Penipe saja'a canaje jama ba'a: —Chojja. Ecuea ba jjima. Ecuea quea quehua. ¿Yajjajo ebajji ca huohui jjima, de? ¡E'e pojja'a miyaya eya ba meesahuacue jiquio esohui!

Jamajjeya ohuaya Penipe iyaa canaje. Anioque mee canaje o pejjejo, aquiana dojojji biajje. <sup>32</sup> Majoya Eyacuiñajjija esohui ba canaje ma Isaiaa yahuajo tehue ca poa Jesusajo, Eyacuiñajjija huoojea'yo ojjaña jaahuanajjijo jama ba'a:

“Ñajjajja dojo cani quecua'yohua jayojja jama onaaya oya iña caje quecua'yojji. Ñajjajja ña dede canijo, quea nee po majje ñajjajja siasia ajja jama jayojja oya mimipanajja ajja poaje onaa oya napa canijo.

<sup>33</sup> Oya mimishi'ama. Jamatii oya quea mimishi acaje cuaa. Oya sijje acaje cuaa jama ba'a: —Oya quea mimishi —acaje. Ojo sijje poaje. Quea mimishi nee nee de, oya acaje onijje nequi cuaa; oya quecua caje'yo pea'ai. Chama'yo tii acaje'yo”.

Jamaya yahuajo Isaiaa tehue ca poa Jesusajo.

<sup>34</sup> Ba majje Etiopia dejjaa Penipe huohui'ajja canaje jama ba'a: —¿Ache dejjajo acuae huohui canaje Isaiaa? ¡Huohucue mo oe! E'e pojja'a ohuaya pea dejjajo huohui ca poa. E'e pojja'a huohui ca poa ojaya emano'yojjijo —acanaje Etiopia dejjaa.

<sup>35</sup> —E'e —Penipeya acanaje. Majoya ohuaya Eyacuiñajjija esohui etehue'yo huohui capoquinaje quea huiso. Esohui quea pame nee Jesusajo huohui canaje.

<sup>36</sup> Majoya oya cuana poquianijo, ena huasijje poeyanaje. Jamajjeya ma Etiopia dejja jama poanaje ba'a: —¡Bacue, ena ani ba'a! Eya pea'ai Jesosa nijje jjapeequije. Jamajjeya ¡besa meecue mo Eyacuiñajjijo jjeya nei!

<sup>37</sup> Penipeya saja'a canaje jama ba'a: —E'e, miya Jesusaja epeejji e'e jojo nei poanijo, eyaya miya besa meeje Eyacuiñajjijo —acanaje.

—E'e jojo nei Jesosa Quito Eyacuiñajjija Bacua Ejja, Eyacuiñajjija huoojea'yo ojjaña jaahuanajji. E'e de, jamaya eyaya baña —Etiopia dejjaa acanaje.

<sup>38</sup> Jamajjeya ohuaya echacojji acanaje jama ba'a: —¡Mapichi cuana nequiñaqui meecue!

Mapichi nequiñaqui majje Penipe Etiopia dejja nijje ena huasijje poquinaje. Etiopia dejja besa mee canaje Eyacuiñajjijo. <sup>39</sup> Majoya Penipeya Etiopia dejja besa mee'yo majje, jjequicuaya'yo majje Edojjoshahua Pameya Penipe dojo canaje pea meshi yasijje. Etiopia dejjaja Penipe ba o'oya jjima poanaje. Jamatii oja meshi yasijje poqui'yonaje quea bihui nee nee; Jesosa nijje jjapeequi'yonaje.

<sup>40</sup> Jjeyahua nei Edojjoshahua Pameya Penipe dojo canaje quea huesha nee esohui quea pame Jesusajo huohuiya. Asota cuiñajji yasijje anioqueñaquinaje. Majoya Asoto cuiñajjijo ani poqui majje quea huiso cuiñajji yasijje poquijeya Eyacuiñajjija esohui huohui canananaje. Quea huesha esohui huohuiqui canaje Sesanea cuiñajji yasijje, Penipeya.

## 9

*Sanoni Jesosa Quito nije jjapeequi'yonaje*

<sup>1</sup>Penipeya quea huesha sohuihuohui canijo, Sanoniya Emeshi Mese nei Jesosaja epeeji cuana niñeba majamaja canaje. Quecua sa acanaje. Jamajjeya oya poquinaje joya Eyacuiñajji nije mimiani etii yasijje. <sup>2</sup>Poe majje Sanoni onijje jama poanaje ba'a: — ¡Esohui tehuecue ojjaña Jodio cuana Damasico cuiñajjijo ba'e yasijje, ojjaña Jodio cuanaja ebajji, equi ojee ejjachichaquijjijo anija ebajji! ¡Jama acue ba'a: “¡Sanoni ojjaña Jesosaja epeeji poani cuana iña meecue! ¡Jeyo majje dojo meecue Jenosanena huasijje jeanobiaa, dejja, ponaponaña pea'ai!” acue! —poanaje Sanoni Jodio etii nijje.

—E'e —poanaje Jodio dejja—, jamaya ejja'aqui.

<sup>3</sup>Majoya Sanoni poquinaje Damasico huasijje Jesosaja epeeji cuana iña nisho. Ejiojjijje poquije Damasico chipi nee yasijje nequiñaquinaje. Eyajo ejijijjiya quea ja'a neeya jeaja'a canaje Sanoni. Quea jeajahua nee nee poanaje. <sup>4</sup>Jamajjeya Sanoni meshi yasijje oquenaje. Shajja'ajja canaje pea eyajo onijje mimiani jama ba'a: —¡Sanoni, Sanoni! ¿Apiojji acuaeya miyaya eya napaña so'o?

<sup>5</sup>—¿Ae bajjani miya? —Sanoni poanaje.

—Eya Jesosa. Miyaya aje oe eya napaña —acanaje Jesosaa eyajo—. <sup>6</sup>¡Nequisohuacue miya! ¡Poquicue Damasico huasijje! Jomajo peaa miya huohui caje miquea echacoggi ma miyaya ejo quijje aje —Jesosa poanaje.

<sup>7</sup>Pea cuana Sanoni nije poquiani nequiñaquinaje. Pea eyajo mimiani shajja'ajja canaje. Esohui ca ca oe shajja'ajja jjima. Oya cuanaja ba jjima eyajo mimiani. Jamajjeya quea mete nee poanaje. Mimimimi ajja poanaje.

<sup>8</sup>Majoya Sanoni nequisohuanaje. Jjabapojja'ajjaqui'yonaje. Cojjama', de. Pea cuaa oya mepejejea canaje Damasico huasijje. <sup>9</sup>Jomajo oya nequinaje pea beca peejjima cahuime cojjama'. Eyacuiñajji nije mimi tiitiianijo ijja'ijja jjima poanaje Sanoni.

<sup>10</sup>Jesosaja epeeji Anania bajjani Damasicojo ba'enaje. Ma mecajje Eyacuiñajjiya Anania jjacahuiba meequi canaje Emeshi Mese nei Jesosaa oya jama iyaame acanaje ba'a: —¡Anania, shajja'ajjacue mo!

—¿Yajja? Jesosa, miya ecuea Emeshi Mese nei. Eyaya miya shajja'ajjaña —Anania poanaje.

<sup>11</sup>Emeshi Mese neiya oya huohui canaje jama ba'a: —Anania, ¡poquicue ejiojji yasijje bajjani Ejiojji Epii Nei! ¡Jonasaja equi yasijje poquicue! Dobiqui majje Jonasa huohui'ajjacue jama ba'a: “¿Achejo jaa Sanoni, ma yahujajo Tanaso cuiñajjijo ba'ya poa? Eya onijje mimije” acue, Anania. <sup>12</sup>E'e, jjeyahua nei Sanoni enijje mimiani. Eyaya Sanoni jjacahuibaqui meenaje pea'ai jama ba'a: Miya o que poenaje. Oja sapa biajje eme' huananaje. Jamajjeya oya quea cojja ja'a po'yonaje —Jesosaa acanaje. Jamaya Anania jjacahuibaqui mee canaje.

<sup>13</sup>Majoya Anania Jesosa nije jama poanaje ba'a: —Emeshi Mese nei Jesosa, ecuea eba Sanoniya miquea epeeji cuana Jenosanenajo ba'e napa canaje quea huiso nee. Jamaya ojjaña eya huohui canaje. <sup>14</sup>Oya jiquiacua poeyanaje ojjaña miquea epeeji cuana iña Jenosanena huasijje ejeanobiajeaquijji. Jodio etiiya oya huoojea canaje, Jodio Eyacuiñajji nije emimijji etiiya. Eya quea mete Sanonijo, de —Anania poanaje.

<sup>15</sup>Majoya Jesosaa Anania huoojea canaje jama ba'a: —¡Poquicue miya, Sanoni que! Oya eyaya babacanaje ecuea esohui huohuijji epo'yojji. Ecuea esohui ohuaya huohui caje Jodio pojjeama cuana huasijje, emeshi mese cuana huasijje, ojjaña pea Jodio dejja cuana ojjaña meshijo ba'e yasijje pea'ai. <sup>16</sup>Ecuea esohui huohuijjiyo onaaya oya quea huiso napa caje'yo. Quea nee nee poaje oya. Jamaya eyaya oya ba meeje —acanaje Jesosaa. Jamaya Anania jjacahuibaquinaje.

<sup>17</sup>Majoya ecahuijaa shequi'yo majje Anania poquinaje Jonasaja equi yasijje, Sanoni jaa huasijje poquinaje. Sanonija sapa biajje eme' huana canaje Ananiaa. Jama acanaje ba'a: —Epeeji Sanoni, esejaya Emeshi Mese nei Jesosaa eya huoojea canaje mi que. E'e,

miyaya ejiojijje poejeya Jesosa banaje eyajo. Maaya eya huoojea canaje mi quea cojja ja'a po mee'yohua. Jesosaa Edojjoshahua Pame mi yasijje dobiqumi mee caje'yo pea'ai — acanaje Ananiaa.

<sup>18</sup> Anania onijje mimianijo tii, oja sapa biajje eme huana cajo, aquiana esope jayojja Sanonija ecojjajo ani, ma o quea cojja misi po meeji poani oquequinaje. Jamajjeya quea cojja ja'a nee po o'oyanaje Sanoni. Jamajjeya nequisohua'yajo, Ananiaa Sanoni Eyacuiñajji besa mee canaje Eyacuiñajji nijje epo'yojji. <sup>19</sup> Majoya ijia'ijjia majje Sanoni quea ca'a po'yonaje.

### *Sanoniya Jesosaja esohui huohui canaje Damascojo*

Oe pojji cahuime Sanoni Jesosaja epeeji cuana nijje nequinaje Damascojo. <sup>20</sup> Jodio cuanaja equi ojee ejjachichaquijji yasijje poquinaje Jesosaja esohui huohuiya. Jama huohuime acanaje ba'a: —Jesosa Eyacuiñajjija Bacua Ejja e'e jojo nei —Sanoniya acanaje.

<sup>21</sup> Jodio dejja cuana ma equijo ani oja esohui shajja'ajja majje quea mete nee nee poanaje. Jama huohuime acanaje ba'a: —¿Apiojji acuae jiquio Sanoni mimiani Jesosajo? Jenosanenajo ohuaya quea huiso cuana cuia canaje Jesosa nijje mimianijojo. Oya jiquiacua poeyanaje Jesosaja epeeji cuana iña. Eyacuiñajji nijje emimijji etii cuana huasijje dojo sa acanaje, Jenosanena huasijje. Jjeya ca ca Sanoni Jesosajo mimi majamajani. ¿Yajjajo shai ohuaya Jesosaja esohui huohui cani?

<sup>22</sup> Jamatii Sanoniya Jodio cuana Damascojo ba'e sohuihuohui neinei canaje. Jama atiitii canaje ba'a: —Jesosa e'e jojo nei Eyacuiñajjija huoojea'yo ojjaña jaahuanajji, Quito —Sanoniya acanaje.

Sanoniya quea ja'a nee nee huohui canaje Jesosajo. Jamatii Jodio cuana onijje jjamimicuiaje nobiqui nequinaje quea huiso. Quea quene nee poanaje: —¿Yajja acuae seya aje so'o? Jesosaja esohui huohuipajea'yo ajja. ¡Ejjacuiajeaqui'yo Sanoni! —poanaje cuana.

<sup>23</sup> Jamajjeya quijje pishana Jodio etii quea quene nee nee po majje jjachichaquinaje. Ojee mimimiminaje Sanoni cuia'yojji. <sup>24</sup> Pea cuaa ca ca Sanoni huohui canaje jama ba'a: —Jodio dejja cuaa miya quecua sa acani. Ojjaña pojajajo, mecajje pea'ai ohuaya cuiñajji esecue jjani pejejo miya ishoa'ajja ca ani ecui'a'yojji —acanaje.

<sup>25</sup> Jamajjeya oe mecajje oja epeeji cuaa Sanoni quehua poqui mee ca'yonaje. E'e, cuiñajji mei jiyo ao'ao biajje oya cuana jaasohuaquinaje. Jomajo Sanoni jjepai aijo jjabioquinaje. Majoya oja epeeji cuaa oya jjapashineijje jeaoquea ca'yonaje meshi yasijje, cuiñajji secue yasijje. Majoya Sanoni Jenosanena huasijje poqui'yonaje.

<sup>26</sup> Jamajjeya Jenosanena huasijje poqui'yo majje Sanoni Jesosaja epeeji cuana nijje jjapeequi sa poanaje. Jamatii Sanoni Jesosaja epeeji pojjeama poso acanaje cuaa. Ojo quea mete nee nee poanaje: “Eya iña ca chana!” poanaje cuana. <sup>27</sup> Majoya Jesosaja epeejiya Benabeya Sanoni dojo canaje Jesosaja huoojea'yo esohui huohuijji cuana huasijje. Oya cuana huohui canaje jama ba'a: —Epeeji cuana, ja'a quea mete pojji Sanonijo! E'e, jiquio Sanoniya ejiojijje poquijjeya Emeshi Mese nei Jesosa ba canaje. Jesosa onijje miminaje pea'ai. Majoya ohuaya Jesosaja esohui huohui neinei canaje Damascojo nequiya —acanaje Benabeya.

<sup>28</sup> Jamajjeya Sanoni Jesosaja huoojea'yo esohui huohuijji cuana nijje ba'enaje. Ohuaya onijjeya Jenosanenajo mete'ama huohui mee canananaje Jesosaja esohui. <sup>29</sup> Jomajo yaninaje Jodio cuana Jienoja esohuijji mimiani. Sanoni ona nijje mimiquinaje quea huiso. Jesosaja esohui huohui canaje. Maaya mimicuiaje nobiaje sa acanaje Sanoni. Sanoni nijje quea quene nee nee po majje oya cuiaje sa acanaje Jesosaja esohui huohui cajo. <sup>30</sup> Maya ba majje Sanonija epeeji cuaa oya dojo canaje Sesanea cuiñajji yasijje. Majoya oya huoojea canaje quea huesha nee, oja cuiñajji yasijje, Tanaso huasijje bishejo.

<sup>31</sup> Majoya Jodea meshijo, Janinea meshijo, Samania meshijo pea'ai pea cuana Jesosaja epeeji cuana nijje quea bei poanaje. Napa pajea canaje. Jamajjeya quea huiso nee nee Jesosa nijje jjapeequi'yonaje. Edojjoshahua Pameya oya cuana ba'e meesahua canaje. Ojjaña cuana Emeshi Mese Jesosaja esohui jayojja jama ba'enaje quea ja'a nee nee.

*Peno poquinaje Nida cuiñajji yasijje, Jope cuiñajji yasijje pea'ai*

<sup>32</sup> Majoya Peno ojjaña cuiñajji yasijje poquinaje Jesusaja epeeji cuana baa. Nida huasijje poquinaje Jesusaja epeeji cuana nijje jjapeequiya, esohui huohuiya pea'ai. <sup>33</sup> Jomajo Penohua pea dejja ba canaje, Eneasi bajjani. Eneasi aje oe jeo'ajja. Oya ejaa jaanaje me oeje pea beca peejjima shequiajame, 8 shequiajame. <sup>34</sup> Jamajjeya oya ba majje Penohua huohui canaje jama ba'a: —Eneasi, Jesusaa miya jeo mee caje'yo. ¡Nequisohuacue! ¡Miquea ejaajji bebocue!

Jjeyahua nei Eneasi nequisohuanaje. Quea ja'a nee nee poanaje, de. <sup>35</sup> Ojjaña cuaa Nidajo ba'eya, Sanohuijo ba'eya pea'ai Eneasi ba canaje jeojeo'yonaje. Jamajjeya quea huiso nee Jesosa nijje jjapeequi'yonaje.

*Tabita mano'yo majje shequi o'oyanaje*

<sup>36</sup> Jope cuiñajjijo epona tii Tabita bajjani ba'ya poa, Ese Ejja esohuijo ca ca oya Docuei bajjani. Oya Jesusaja epeeji nei. Tabitaa quea pame nee atiitii canaje. Aema' cuana ba'e meesahua canaje pea'ai. <sup>37</sup> Tabita aje quea mano poanaje. Mano'yonaje. Epeeji cuaa oya shacua ca'yonaje. Majoya jaahuana canaje eyajo jaa equecuayijji yasijje. <sup>38</sup> Jope, Nida quea chipi nee, huesha'ama. Jamajjeya Jesusaja epeeji cuana Jopejo ba'eya shajja'ajja canaje Peno Nidajo nequi. Jamajjeya beca dejja huoojea canaje Peno que. Jama huohuime acanaje ba'a: —Peno, ¡poecuajicue ecuaana nijje Jope yasijje!

<sup>39</sup> Jamajjeya shajja'ajja majje Penohua ojaya aquiana bio canaje. Ona nijje poquinaje Jope yasijje. Jope yasijje poe'yajo ojjaña cuana nijje oya sohuaquinaje eya equecuayijji yasijje Tabita baa. Ojjaña e'ahuemano cuaa pa neineiyania Peno ocuee canaje. Tabitaja soco ba mee canaje. Ojo jama huohuime acanaje ba'a: —¡Bacue, Peno! Eshe anijo Tabitaa ecuanaja daqui eyami, daqui nei pea'ai quea huiso soco canaje. ¡Bacue ojaya esipi'yo ecuanajaya pea'ai! —acanaje cuaa.

<sup>40</sup> Majoya Penohua ojjaña cuana huoojeacuayajea canaje esecue yasijje. Ecu'oshajjajo nequi majje Eyacuiñajji nijje miminaje. Eyacuiñajji nijje mimi majje epona emano'yojaa nijje miminaje jama ba'a: —¡Tabita, shequi'yocue! ¡Nequisohua'yocue miya!

Shequi'yo majje Tabita jjabapojjaqui'yonaje. Peno ba majje anisohuanaje. <sup>41</sup> Majoya Penohua Tabita me iña majje nequisohua meesahua ca'yonaje. Tabita nequisohua meesahua'yo majje Penohua Jesusaja epeeji cuana, e'ahuemano cuana pea'ai esecuejo nequi iyaa canaje Tabita bajji. Jama acanaje ba'a: —¡Dobicue! ¡Miquea epeeji Docuei bahuacue! Shequi'yonaje, Jesusaa oya shequi mee ca'yonaje.

<sup>42</sup> Ma shajja'ajja majje quea huiso nee Jopejo ba'e Jesosa nijje jjapeequi'yonaje. <sup>43</sup> Jamajjeya Peno Jopejo nequinaje quea cahui huiso. Dejja Simono bajjani nijje ba'enaje, ijjiacajji jee chacojji nijje.

## 10

*Penohua Jodio pojjeama huasijje esohui huohui canaje, Conenio huasijje*

<sup>1</sup> E'e Teopino, eyaya, Nocaa jiquio pea esohui tehueaña miquea ebaajji. Esohui e'e nei Jesusaja epeeji cuanajo tehueaña jama ba'a: Oe dejja Conenio bajjani Sesanea cuiñajjijo ba'enaje. Oya Jodio pojjeama, Shomano dejja, quea huiso nee sohuinano huoojeajji poani, ma bajjani ba'a: Itaniano sohuinano cuana. <sup>2</sup> Jamatii Conenio quea pame nee. Ojaya huapa pojjeama cuana nijje Eyacuiñajjija esohui jayojja jama ba'e sa poani. E'e, ohuaya aema' cuana ba'e meesahua canaje; quea huiso aquiana quia canaje sosema'. Eyacuiñajji nijje mimi majamajanaje pea'ai. <sup>3</sup> Oe pojajajo eshequi jjanequijeapaaquijajo Eyacuiñajjiya Conenio jjacahuibaqui mee canaje jama ba'a: Cahuiba canaje Eyacuiñajjiya esohuidojojji o que poe majje onijje miminaje jama ba'a: —¡Conenio, shajja'ajjacue mo!

<sup>4</sup> Esohuidojojji ba majje Conenio quea ajjajja nee jama poanaje ba'a: —¿Yajja? ¿Ae sa poani miya? ¡Huohuicue mo!

Esohuidojojjiya oya jama acanaje ba'a: —Eyacuiñajjiya miquea emimi cuana onijje shajja'ajja canaje. Miya aema' cuana huasijje aquiana quiaña sosema' ojaya eba pea'ai.

Jamajjeya minijje quea bihui nee poani. <sup>5</sup> Jamajjeya ijje ya nei beca dejja huoojeacue Jope yasijje! Jomajo oe dejja Simohui Peno bajjani enequi. ¡Peno jjequi meecue! <sup>6</sup> Oya Peno Simonoja equijo ba'yani, ijjiacajji jee chacojji poanija equijo. Ojaya equi bae ai sahuajo ani —acanjaje Eyacuiñajjija esohuidojojjiya. Jamaya Conenio jjacahuibaquinaje.

<sup>7</sup> Majoya esohuidojojji poqui'yonaje. Conenio shequi'yonaje. Shequi'yo majje ojaya echacosahuajji beca iyaa canaje. Oe Sohuinano ojaya epeeji quea pame nee iyaa canaje, ma Eyacuiñajji nijje mimiani pea'ai. <sup>8</sup> Eyacuiñajjija esohuidojojjiya esohui onijje Conenihua huohui canaje. Majoya oya cuana huoojea canaje Jope yasijje.

### *Penohua cahuiba canaje*

<sup>9</sup> Jamajjeya Conenioja epeeji cuana Jope yasijje poquinaje. Pea pojajo eshequi biacojjajja nequijo Jope ba cañaquinaje quea chipi nee.

Peno ca ca Jopejo Simonoja equijo nequi equi jamacoo huasijje jaasohuaquinaje Eyacuiñajji nijje mimiya. <sup>10</sup> Eshequi biacojjajja nequijo Peno quea shoe nee poanaje. Bobi ijja sa poanaje. Onaa Penoja bobi cuacua canijo, Penohua ishoa'ajja ca aninaje bobi. Majoya equi jamacoojo jaa cahuinaje. Eyacuiñajjiya oya jjacahuibaqui mee canaje jama ba'a: <sup>11</sup> Esecue quea quemo jayojja ba canaje eyajo. Esecue eca'apejo nequi. Aquiana equipajaajji quea quemo jayojja ba canaje, jjapashineijje jeaoquea canaje o que, jjono eyichijjo jayojjajo. <sup>12</sup> Ma equipajaajjiyo ojjaña ijjiacajji cuana, peyo cuana, ojjaña cuichojji cuana pea'ai ba canaje, eshe, de. Jamaya jjacahuibaqui mee canaje pea'ai ba'a: <sup>13</sup> Eyajo Jesosa Peno nijje miminaje jama ba'a: —Peno, ¡nequisohuacue! ¡ljjiacajji cuana, peyo cuana, cuichojji cuana pea'ai quecuacue e'ijji! —poanaje.

<sup>14</sup> Penohua ca ca jama acanjaje ba'a: —Emeshi Mese Jesosa, chojja. Eya ijja sa po'yo ajja ma aquiana cuana. Peajja, de. Yahuajo ecuanaja etiiquiana cuanaja esohui jayojja jama poanijo ma aquiana cuana ecuea ijja jjima. Eya coma ijja sa po'yo ajja nei nei —poanaje Peno.

<sup>15</sup> Eyajo Jesosaa Peno huohui ca o'oyanaje jama ba'a: —Eyacuiñajjiya ojjaña bobi quea pame po mee ca'yonaje. Jamajjeya ja'a jama pojji ba'a: “Jiquio bobi peajja, coma ijja ajja ca iña” a'a pojji, Peno! —Jesosaa poanaje.

<sup>16</sup> Jamaya Jesosaa Peno pea beca peejjima huohui'yome acanjaje, oya jayojja huohui'ajja o'oyame acanjaje Peno ecahuiaa. Majoya equipajaajji jjequisohua ca'yonaje eyahuasijje.

Jamaya jjacahuibaquime meeya Peno Jesosaa acanjaje ejjabahuejjaqui meejji jama ba'a: Jodio pojjeama cuana Jodio cuana jayojjaya Eyacuiñajjija quea jea nee. Oya cuana pea'ai Jesosa nijje jjapeequi meesahua caje'yo, mimishi cuijea caje'yo pea'ai.

<sup>17</sup> Jamajjeya shequi'yo majje Peno jjashahuabaqui aninaje jama ba'a: —¿Ajeo shai iña Jesosaa jjacahuibaqui mee canaje? ¿Ae shai ohuaya eya ba mee sa acani?

Peno jamaya jjashahuabaquianijo, Conenioja echacojji cuana poeyanaje Jope yasijje. Simonoja equi sa'ajja canaje. <sup>18</sup> Ba majje esecue yasijje poeyanaje. Secuejo nequi taaanaje jama ba'a: —¿A'a Simohui Peno yani jiquiojo?

<sup>19-20</sup> Peno ma ohua cahuiba canajejo jjashahuabaquianijo, Edojjoshahua Pameya oya huoojea canaje jama ba'a: —Peno, ¡shajja'ajjacue! Pea beca peejjima dejja poeyanaje mi baa. ¡Jamajjeya nequisohuacue; jaoquequicue; oya cuana baquicue esecue jjanijo nequi! ¡Onijje poquicue, Peno! ¡A'a quea mete pojji! Eyaya oya cuana huoojeanaje mi dojhua.

<sup>21</sup> Jamajjeya Peno jaoquequinaje ma dejja cuana baa. Huohui'ajja cañaquinaje jama ba'a: —E'e. ¿A'a miyaya eya sa'ajjaña? Quioya iña. ¿Apiojji acuaeya iña sa'ajjaña? ¿Ajeo acuae mi poeyanaje so'o?

<sup>22</sup> Onaaya Peno huohui canaje jama ba'a: —Conenihua, ma sohuinano cuana huoojeajji poaniya Sesaneajo ba'eya ecuanu huoojea canaje. Ohuaya quea pame nee acani, Eyacuiñajjija esohui jayojja jama acani. Oya ojjaña Jodio cuanaja quea boti nee. Eyacuiñajjija esohuidojojji onijje miminaje jama ba'a: “¡Dejja cuana huoojeacue Jope yasijje Peno jjequia! ¡Peno miquea equi yasijje jjequicue! ¡Penoja esohui shajja'ajja neineicue miqianaaya o poeyajo!” poanaje esohuidojojji —Conenioja epeejiya Peno acanjaje.

<sup>23</sup> Jamajjeya Penohua oya cuana iyaa canaje esecuejo nequi: —E'e, ¡dobicue! ¡Jiquiacua cahuicue ecuana nijje! —poanaje. Jomajo oya cahui oe poanaje.

*Peno Conenioja equi yasijje poquinaje esohui huohuiya*

Mecajjeahua nei shequi majje Peno poquinaje Conenioja epeeji cuana nijje Sesanea huasijje. Pea Jesusaja epeeji Jopejo ba'e poquinaje pea'ai. <sup>24</sup> Sesaneajo ca ca Coneniohua oya cuana ishoa'ajja ca aninaje. Ojjaña ojaya huapa pojjeama cuana, ojaya epeeji cuana pea'ai iyaa canaje ojaya equi yasijje Peno ishoa'ajjajji. Jamajjeya beca cahuime po majje Penohua Sesanea ba cañaquinaje. <sup>25</sup> Conenioja equi yasijje poeyajo, Conenio equijo ani cuayaquinaje o baa. Ecuí'oshajjajo nequi majje Peno bihuia canaje, ohuaya. <sup>26</sup> Penohua ca ca oya jama acanaje ba'a: —¡Dee! ¡Nequisohuacue oe, miya! Eya aje dejja pea'aiya, mi jayojjaya. ¡A'a jja oe eya bihuiajji! —Peno poanaje.

<sup>27</sup> Conenio nijje mimimimiqui tii Peno dobiquinaje equi yiyedojo huasijje. Eyiye dojjojo quea huiso ejjachichacui nequi ba cañaquinaje. <sup>28</sup> Majoya ojjaña ba majje Penohua huohui canaje jama ba'a: —¡Bacue! Yahuajo Jodio cuaa huohui ca poa jama ba'a: “Jodio cuana, ¡a'a dobiqijji Jodio pojjeamaja equi yasijje! ¡A'a ona nijje ijja'ijjajji!” Jamaya yahuajo nei Jodio cuana poa. Maya miquianajaya eba. Jamatii Eyacuiñajjiya eya ba mee canaje jama ba'a: “¡A'a Jodio pojjeama quea tai poso ajji!” jamaya eya acanaje Eyacuiñajjiya —Peno poanaje.

<sup>29</sup> —Jamajjeya miquianaaya eya iyaanajejo eya quea bihui nee poeyanaje miquiana baa. E'e. Jamajjeya ¿ae sa poani miya? ¿Apiojji acuae iña iyaanaje so'o? —Peno poanaje.

<sup>30</sup> Coneniohua Peno jama acanaje ba'a: —Peno, yahuajo Eyacuiñajjiya esohuidojojji enijje miminaje. E'e, ebeca pee pea'ai cahuime yahuajo eshequi oya jayojja nequijo eya Eyacuiñajji nijje mimi nequinaje tii tii equijo. Eshequi jjanequijeapaaquianijo oe dejja jjanequipanaquinaje. Oja daqui quea jeajahua nee nee poanaje. <sup>31</sup> Oya enijje miminaje: “Conenio, Eyacuiñajjiya miquea emimi shajja'ajja canaje. Miya aema' cuana bobiaña ba canaje pea'ai. Miya ojaya quea boti nee. <sup>32</sup> Jamajjeya ¡beca dejja huoojeacue Jope yasijje! ¡Dejja Simohui Peno bajjani iyaa meecue! Oya Peno pea dejja bajjani Simono nijje nequi, ijjiacajji jee chacojji poani nijje nequi, bae ai sahuajo ba'e nijje nequi” jamaya eya acanaje esohuidojojjiya. <sup>33</sup> Jamajjeya ma shajja'ajja majje jjeyahua nei eyaya beca dejja huoojeanaje mi jjequiya. Mi poeyajo eya quea bihui nee poanaje. Eyacuiñajjiya eba ecuana quea huiso jjachichachinaje miquea esohui shajja'ajjaa. E'e, ecuaaya Eyacuiñajjiya esohui shajja'ajja sa aña. Jamajjeya ¡ojjaña Eyacuiñajjiya esohui ecuana huohucue jjeya nei, ma ohua mi huohui canaje ecuana huohuijji! —Conenio poanaje.

*Penohua esohui huohui canaje Conenioja equijo*

<sup>34</sup> Jamajjeya Penohua huohui canaje jama ba'a: —E'e de. Jjeya ecuea eba Eyacuiñajjiya ojjaña cuana quea jea nee acani. Jodio pojjeama Jodio cuana jayojjaya jama acani e'e jojo nei, Eyacuiñajjiya. <sup>35</sup> E'e, ojjaña joya quea pame ba'yani, Eyacuiñajjiya esohui jayojja jama poani pea'ai ohuaya jaahuana cani, ojjaña cuana ojjaña meshijo ba'e, ojjaña pea mimime poani pea'ai —Penohua acanaje.

<sup>36</sup> —Conenio, miquea eba Eyacuiñajjiya Isaeni dejja cuana huasijje ojaya esohui quea pame nee Jesosa Quitoja huohui ca poa jama ba'a: “Emeshi Mese nei Jesosa Quito nijje jjapeequianijo, Eyacuiñajji ojjaña nijje quea bei poaje'yo, mimishi cuijea'yo majje”. Jamaya aca poa cuaa yahuajo nei —Peno poanaje—. <sup>37</sup> E'e Conenio, miquea eba pea'ai Huaniya, ma Eyacuiñajjiyo ebesameejji poaniya huohui canaje jama ba'a: “¡Miquea mimishi pajea'yocue! ¡Eyacuiñajjiyo besacue!” acanaje Huaniya. Ohuaya Jesosa besa mee canaje pea'ai. Majoya Jesusaa Janinea meshijo, ojjaña cuiñajjiyo Jodioja meshijo sohuihuohui canaje; quea pame nee acanaje pea'ai. <sup>38</sup> Jama poanaje ba'a: Eyacuiñajjiya Jesosa Nasanenajo ba'e que Edojjoshahua Pame huoojea canaje, dobiqii mee ca'yonaje. Jesosa quea ca'a nee nee po mee canaje. Ma dejjaa ajjima acani quea huiso nee quea pame nee nee ameesahua canaje. Jesusaa poquijeya quea huiso nee nee emanojaa cuana

huaquia mee ca'yonaje. Eshahua cuana dejjajo nequi huoojeacuayajea mee ca'yonaje Jesosaa Eyacuiñajji nijjeya —Penohua acanaje—. <sup>39</sup> E'e Conenio, Jesosaa quea pame nee acani ecuaaya, ojaya epeeji cuaa banaje. Onijje poquinaje ojjaña Jodio meshi yasijje, Jenosanena huasijje pea'ai. Jamatii pea cuaa Jesosa quea mimishi aca'yonaje. Acui ecueata'apeejo ba'ehuanasohuajea ca'yonaje emano'yoyji. <sup>40</sup> Jamatii Jesosa mano'yajo, pea beca peejjima cahuime epo jaa Eyacuiñajjiya oya shequi mee ca o'oyanaje. Majoya Eyacuiñajjiya oya ecuaa huasijje huoojea ca o'oyanaje. E'e, ecuaaya oya banaje eshe o'oya. <sup>41</sup> Ojjaña dejja cuanaja oya ba o'oya jjima. Ecuanaaya, ma Eyacuiñajjiya yahuajo babaca ca poaa oja esohui huohuiji poaniya ca ca oe ecuaaaya Jesosa ba o'oyanaje. Shequi o'oya majje oya ecuaa nijje ijia'ijjianaje, ena ishi canaje pea'ai. <sup>42</sup> Majoya ohuaya ecuaa huoojea canaje ojaya esohui huohuiya ojjaña cuana huasijje. Jama huohuime aña ba'a: “Quijje Eyacuiñajjiya Jesosa huoojea caje o'oya. Jesosaa poe o'oya majje ojjaña sosequia caje'yo ma eseya mano'yo jjimahua aninaje poa sosejje. E'e, ojjaña eshe nequi cuana, ojjaña yahuajo nei mano'yo pea'ai ohuaya sosequia caje'yo ma eseya mano'yo jjimahua aninaje poa sosejje. Ojjaña joya quea pame ba'ya poa quea bhui nee ba'e tiitii mee caje'yo eyajo onijje. Mimishi cuana ca ca quea nee nee po mee caje'yo tii tii. <sup>43</sup> E'e Conenio, yahuajo nei nei Jesosa poe jjimahuajo Eyacuiñajjiya esohui huohuiji cuaa Jesosajo huohui ca poa jama ba'a:

“Oya quea pame nee nee, quea ca'a nee nee poanijo, ojjaña joya onijje jjapeequiani Eyacuiñajjiya mimishi cuijea caje'yo. Jamajjeya oya cuana cuaqui yasijje poqui'yo ajja mano'yo majje”.

Jamaya yahuajo nei Jesosajo tehue ca poa cuaa —jamaya Penohua esohui huohui canaje. Ojjaña cuaa Conenioja equijo nequiya shajja'ajja canaje.

#### *Edojjoshahua Pame Jodio pojjeama huasijje dobiqiu'yonaje*

<sup>44</sup> Penohua sohuihuohui canijo tii, Edojjoshahua Pame Conenio que, ojaya epeeji cuana que pea'ai dobiqiu'yonaje, ma Penohua sohuihuohui cani yasijje. <sup>45</sup> E'e, Eyacuiñajjiya Edojjoshahua Pame huoojea ca'yonaje Jodio pojjeama cuana huasijje. Ma ba majje Jodio cuana Peno nijje nequi jjajjasoaquinaje: —E'e de, Eyacuiñajjiya Edojjoshahua Pame huoojea ca'yonaje Jodio pojjeama huasijje pea'ai —poanaje Jodio cuana ma Peno nijje poquinaje.

<sup>46</sup> E'e, Jodio cuaa Conenio shajja'ajja canaje Eyacuiñajji bihuia cani, de, pea mimi'yome poanaje pea'ai. <sup>47</sup> Jamajjeya Penohua jama acanaje ba'a: —Yahuajo Eyacuiñajjiya Edojjoshahua Pame ecuaa huasijje huoojea canaje jayojja jama jjeya ohuaya Edojjoshahua Pame jiquio dejja cuana huasijje huoojea canaje pea'ai. Jamajjeya ecuaaaya oya cuana Eyacuiñajjiyo cabesa mee'yahua ena huasijje, ¿a'a e'e? —Penohua acanaje.

<sup>48</sup> Jamajjeya Penohua pea cuana huoojea canaje Jesosa Quitoja epeeji ma jjeya nei onijje jjapeequinaje besa meeya Eyacuiñajjiyo. Majoya Conenio, oja epeeji cuana pea'ai miminaje Peno nijje. Jama poanaje ba'a: —Peno, ¿che ecuaa nijje nequicue, esohui ba meesahuacue! —acanaje.

Jamajjeya Peno onijje nequinaje. Majoya quijje pishana Peno poqui'yonaje Jenosanena huasijje.

## 11

#### *Penohua Jesosaja epeeji cuana Jenosanenajo ba'e huohui canaje Coneniojo, Jodio pojjeamajo*

<sup>1</sup> Jamajjeya Jesosaja huoojea'yo esohui huohuiji cuaa, ojjaña Jesosaja epeeji cuaa Jodea meshijo ba'eya pea'ai shajja'ajja canaje Coneniojo. Ojjaña jama acanaje ba'a: —Jodio pojjeama cuaa pea'ai Eyacuiñajjiya esohui shajja'ajja ca'yonaje; jamaya aca'yonaje quea bhui nee, de —acanaje cuaa.

<sup>2-3</sup> Jamajjeya Peno Jenosanena huasijje poqui o'oyajo, beca Jodio cuana onijje mimijajinaje jama ba'a: —Peno, ¿apiojji miya Jodio pojjeama cuanaja equi yasijje dobiquinaje so'o? E'e, miya ca ca oe Jodio pojjeama cuana nijje ijia'ijjianaje pea'ai. ¿Apiojji? Jamaya

pojjeama esejaya etiiquianaja esohui. Oya cuanaja cuiishasha biso nei ejehuissejjajea'yo pojjeamajo oya peajja, de —poanaje Jodio cuana.

<sup>4</sup>Jamajjeya Penohua oya cuana huohui canaje ojjaña joya Eyacuiñajjiya Jodio pojjeama cuanajo acanaje. <sup>5</sup>Jama acanaje ba'a: —Ecuea epeeji cuana, eya Jopejo nequi Eyacuiñajji nijje mimi aninaje. Eyacuiñajjiya eya jjacahuibaqui mee canaje jama ba'a: Ijjiacajji cuana aquiana cuana quibi jayojjajo iya majje jeaquea canaje e que, jjonajo. <sup>6</sup>Ma quibi dojjojo eyaya banaje ojjaña ijjiacajji cuana, peyo cuana, ojjaña cuichojji cuana pea'ai. <sup>7</sup>Eya jjacahuibaqui mee canaje jama ba'a: Eyajo Jesosa enijje miminaje jama ba'a: “Peno, ¡nequisohuacue! ¡Ijjiacajji cuana, peyo cuana, cuichojji cuana pea'ai quecuacue e'ijjiajji!” acanaje. <sup>8</sup>Jamatii eyaya saja'anaje jama ba'a: “Jesosa, chojja, eya ijjiia sa po ajja ma aquiana cuana. Peajja, de. Yahuajo ecuanaja etiiquiana cuanaja esohui jayojja jama poanajo ma aquiana cuana ecuea ijjiia jjima” eya poanaje. <sup>9</sup>Majoya Jesosa enijje mimi o'oyanaje: “Eyacuiñajjiya ojjaña aquiana cuana quea pame nee po mee ca'yonaje. Jamajjeya ja'a miya jama pojji ba'a: —¡Jiquio aquiana cuana peajja, coma ijjiia ajja ca iña! —a'a pojji, Peno!” acanaje Jesosaa eya ecahuijaa. <sup>10</sup>Jamaya eya huohui huicha'a huicha'a canaje, pea beca peejjima huohuime acanaje. Majoya ojjaña jjequisohua ca'yonaje eyahuasijje.

<sup>11</sup>—Majoya pea beca peejjima dejja ecuea equi yasijje poeyanaje. Oya cuana Sesaneajo ba'e o chacomeejjiya huoojea canaje e dojhua. <sup>12</sup>Edojjoshahua Pame enijje miminaje jama ba'a: “¡Ona nijje poquicue mete'amal!” Jamajjeya eya poquinaje Sesanea huasijje. Jiquio Jesusaja epeeji me oeje oe huisome enijje nequi poquinaje pea'ai enijje. Ecuana Conenioja equi yasijje dobiquinaje. <sup>13</sup>Majoya Coneniohua ecuanahuohui canaje jama ba'a: “Eyacuiñajjiya esohuidojojji ecuea equijo jjanequipanaquinaje. Enijje miminaje. Jama poanaje ba'a: —¡Beca dejja huoojeacue Jope yasijje Simohui Peno jjequiya! <sup>14</sup>Ohuaya miquianaya sohuihuohui caje. ¡Ojaya esohui jama acue! Jamajjeya Eyacuiñajjiya miquianajaya mimishi cuana cuijea caje'yo; onijje ba'e tiitii mee caje'yo eyajo miya, miquea huapa pojjeama cuana pea'ai —eya acanaje esohuidojojjiya” jamaya Coneniohua eya huohui canaje —Peno poanaje—. <sup>15</sup>Eya Conenio sohuihuohui'anijo tii Edojjoshahua Pame ojjaña cuana huasijje dobiqui'yonaje. E'e, ma ecua eseya yahuajo acanaje jayojja jama oya cuana aca'yonaje. <sup>16</sup>Majoya eyaya niñeba'yonaje esejaya Emeshi Mese nei Jesusaja esohui yahuajo jama ba'a: “Ena huasijje ca ca oe Huaniya miquianaya besa mee canaje Eyacuiñajjiyo. Quijje ca ca eyaya miquiana que Edojjoshahua Pame dobiqui meeje'yo Eyacuiñajji nijje epo'yojji tii tii” poanaje Jesosa yahuajo —Penohua acanaje—. <sup>17</sup>E'e, Jesosa Quito nijje jjapeequianijo, Eyacuiñajjiya Edojjoshahua Pame huoojea canaje ese que. Oya jayojjaya jjeya Jesosa Quito nijje jjapeequianijo, Eyacuiñajjiya Jodio pojjeama cuana huasijje Edojjoshahua Pame huoojea ca'yonaje pea'ai. Eyacuiñajjiya quea pame nee nee acani tii tii. Jamajjeya eya ca iña Eyacuiñajji huoojea'yojji pojjeama. Eyaya oya huohui'yo ajja jama ba'a: “¡A'a Jodio pojjeama huasijje Edojjoshahua Pame huoojea'yojji!” Chojja, jamaya eyaya Eyacuiñajji huohui ajja, de. Eya Eyacuiñajjiya echacojji, de, ojaya esohui jayojja jama aña eyaya —Peno poanaje.

<sup>18</sup>Jamajjeya Penoja esohui shajja'ajja majje Jodio cuana Peno nijje mimijaji pajea'yonaje; Eyacuiñajji bihuia ca'yonaje jama ba'a: —E'e, jamajjeya Eyacuiñajjiya Jodio pojjeama cuana mimishi pajea meesahua cani. Jesosa nijje jjapeequi meesahua cani pea'ai. Jodio pojjeama cuanaja mimishi cuana cuijea'yo majje oya cuana ba'e tiitii mee caje'yo eyajo onijje pea'ai —poanaje ojjaña cuana.

#### *Jesosaja epeeji cuana Atioquia cuiñajjiyo ba'e*

<sup>19</sup>E'e, yahuajo Jodio etii cuaa Jesusaja epeeji Estema sapa jajahuejjajea'yo majje ojjaña Jesusaja epeeji cuana napa majamaja canaje pea'ai. Jamajjeya ojjaña Jesusaja epeeji cuana quea huiso meshi yasijje quehua poquinaje quea mete jjejojo. Beca cuana quea huesha nee poquinaje Penisia meshi yasijje, Atioquia cuiñajji yasijje pea'ai. Pea cuana Chipe nasi yasijje besapoquinaje bishejo. Poquijeya Eyacuiñajjiya esohui huohui



capoquinaje Jodio cuana huasijje. Jodio pojjeama cuana huasijje ca ca Jesusaja esohui huohui jjima acapoquinaje. <sup>20</sup> Majoya Jesusaja epeeji Chipe nasijo ba'e, Sinene meshijo ba'e pea'ai poquinaje Atioquia cuiñajji yasijje. Jomajo ohuaya Jodio pojjeama cuana huasijje pea'ai Eyacuiñajjija esohui quea pame nee Jesusajo huohui canaje. <sup>21</sup> Emeshi Mese nei Jesusaa oya cuana esohui huohui meesahua canaje. Jamajjeya quea huiso cuana Jesusaja esohui shajja'ajja majje onijje jjapeequi'yonaje, quea huiso nee nee. <sup>22</sup> Ma shajja'ajja majje Jesusaja epeeji Jenosanenajo ba'eya Jesusaja epeeji etii Benabe bajjani huoojea canaje Atioquia huasijje Jesusaja epeeji cuana baa. <sup>23</sup> Atioquia huasijje poe majje Benabeya ba cañaquinaje Eyacuiñajjiya Jodio pojjeama quea jea nee acanaje e'e jojo nei. Jamajjeya Benabe quea bihui nee poanaje. Jesusaja epeeji eyacua cuana jama huohuime acanaje ba'a: —E'e, jamaya. ¡Eyacuiñajjija esohui jayojja jama atiitiucue! ¡A'a oya pajea'yoyji! ¡Onijje jjapee tiitiucue!

<sup>24</sup> Benabe Jesusaja epeeji quea pame nee. Edojjoshahua Pameja ejjashahuabaquijji jayojja jama acanaje tii. Jesusaja esohui jayojja jama atiiti canaje. Jamajjeya quea huiso cuana Emeshi Mese nei Jesusaja epeeji poanaje Benabeja esohui shajja'ajja majje.

<sup>25</sup> Majoya Benabe poqui'yonaje Tanaso cuiñajji yasijje Sanoni sa'ajja'yohua. <sup>26</sup> Ba majje ohuaya Sanoni jjequi canaje Atioquia huasijje onijje esohui huohuijji. Jomajo Atioquiajo oya cuana nequi'yonaje Jesusaja epeeji cuana nijje oe shequiajame. Quea huiso nee nee Jesusaja esohui huohui majamaja canaje jomajo. Majoya Atioquiajo pea cuaa Jesusaja epeeji cuana bajjani canaje Quitoja epeeji, Quitiano cuana bajjani acanaje.

<sup>27</sup> Majoya pea Jesusaja esohui huohuijji cuana Jenosanenajo ba'e poquinaje Atioquia huasijje. <sup>28</sup> Majoya ojjaña Jesusaja esohui shajja'ajjaa jjachichaquinaje. Oe esohui huohuijji Ajamo bajjani nequisohuanaje. Eyacuiñajjija Edojjoshahua Pameya oya huohui meesahua canaje. Jamajjeya Ajamohua huohui canaje jama ba'a: —Quijje pishana ojjaña meshijo ojjaña cuana quea shoe nee nee poaje'yo. Bobi chama' poaje'yo —jamaya ojjaña acanaje, Ajamohua. (Quijje pishana pea shequiaja po majje e'e jojo nei jamaya poanaje. Bobi chama' poanaje. Quea huiso nee quea shoe nee nee poanaje Shomano dejja Canio bajjani emeshi mese nequijo.)

<sup>29</sup> Jamajjeya Ajamoja esohui shajja'ajja majje Jesusaja epeeji cuaa huohui canaje jama ba'a: —E'e, ecuaaya Jesusaja epeeji cuana huasijje Jodea meshijo ba'e yasijje bejjo huoojeaje o ba'esahuajji —poanaje.

Jamajjeya aquiana cuana, bejjo pea'ai chicha canaje. Beca cuaa oe pojji quia canaje. Pea cuaa joya quea aquiana huiso neeya quea huiso bejjo quia canaje. <sup>30</sup> Jamajjeya quijje quea huiso bejjo chicha majje huoojea canaje Benabe nijje, Sanoni pea'ai nijje. E'e, ohuaya bejjo dojo canaje Eyacuiñajjija epeeji etii yasijje equia'yoyji ojjaña Jesusaja epeeji cuana huasijje.

## 12

### *Jacobo jaja ca'yonaje*

<sup>1</sup> Ecuea epeeji Teopino, eyaya, Nocaa pea esohui tehueña Jesusaja epeeji cuana jama ba'a: Pea Enode emeshi mese nequinaje. Ohuaya Jesusaja epeeji cuana napa ca'yonaje quea huiso. <sup>2</sup> Huanija echahua mese Jacobo sapa jajasejjajea mee ca'yonaje baa aiya, de Enodeya. <sup>3</sup> Jodio etii cuana quea bihui nee poanaje Jacobo quecua ca'yajo. Ma ba majjeya Enodeya huohui cajo Peno iña canaje pea'ai. Dojo canaje jeanobiaa, quijje quecua'yoyji. Jamaya poanaje ojjaña Jodio cuana jjachichaquinaje pahui shejee mee jjima e'ijjiyajji, quea bihui epojji. <sup>4</sup> E'e, ma shejo Enodeya Peno equi ejjajejanobiaquijji yasijje jeanobia canaje. Sohuinano quea huisohua Peno jaahuana mee canaje. Enodeya Peno jaja mee sa acanaje quijje, ojjaña Jodio cuana pahui shejee jjima ijji majje. <sup>5</sup> Jamajjeya Sohuinano cuaa Peno jaahuana neinei canaje ejeyo'yo jaa. Jamatii Jesusaja epeeji cuana Eyacuiñajji nijje mimi tiitiinaje Penajo: —Eyacuiñajji, ¡Peno jaahuanacue! ¡A'a quecua mee'yoyji! —amajamaja canaje epojjajo, mecajje pea'ai.

*Peno ejeanobia jaa esecue yasijje dojocuayaqui ca'yonaje esohuidojojjiya*

<sup>6</sup> Majoya Enodeya Peno ejequicuayaqui'yojji nisho acanaje mecahuajje ejajajea'yojji nisho. Peno ca ca cahuijaanaje beca sohuinano yiyesama neiyo. Baa jjonaja jeyo jaanaje. Pea sohuinano cuaa ejjajejanobiaquiiji esecuejo nequiya oya jaahuana neinei'ajja canaje.

<sup>7</sup> Mecashono Eyacuiñajjiya esohuidojojji poquinaje Peno que. Ma equecuayijji jeaja'cañaquinaje. Ohuaya Peno cuiapashi cañaquinaje eshequiiji. Jama acanaje ba'a: —¡Peno, shequicue! ¡Nequisohua cuajicue, miya!

Jamajjeya baa jono emejo ba'e jjapichoqui mee ca'yonaje, oquequi mee ca'yonaje meshi yasijje. <sup>8</sup> Majoya esohuidojojjiya Peno jama acanaje ba'a: —¡Daqui huoshocue! ¡Ejiojji shejee huoshocue pea'ai! —jamaya Peno acanaje esohuidojojjiya. Jamaya poanaje Peno. Majoya ohuaya Peno huohui ca o'yanaje: —¡Miquea equipajaajji bebocue! ¡E quishishijji poecue! —poanaje.

<sup>9</sup> Jamajjeya Peno Eyacuiñajjiya esohuidojojji quishishi poquinaje. Jamatii jjacahuibaquiani poso Peno poanaje ba'a: —E'e de, eya jjacahuibaquiani. E'e pojja'a esohuidojojji chama', de —Peno poanaje.

<sup>10</sup> Jamatii Penohua esohuidojojji quishishijji cuayaquijeya ebionei sohuinano epi nequi yejje canananaje. Jamatii ojaya Peno, esohuidojojji pea'ai ba jjima poanaje. Mama pishana nequi pea ba canana o'yanaje sohuinano. Yejje canana o'yanaje. Ba jjima poanaje Peno, esohuidojojji pea'ai sohuinanoja. Poquinaje baa cui esecue quea quemu huasijje. O poe'lyajo jamatii jjaca'apejoquinaje. Esecue jjani yasijje cuayaqui'yonaje. Cuama pishana dojo majje esohuidojojjiya Peno jea cana'yonaje, ejiojjijo. <sup>11</sup> Majoya Peno jjashahuabaquinaje: ¿A'a mo eshe, a'a mo jjacahuibaquiani pojjeama, de? Jjeya ecuea eba Emeshi Mese nei Jesosaa huoojja canaje ojaya esohuidojojji e dojocuayaqui'yohua. Mecahuajje Enodeya eya jaja ca'yo queaye poanaje. Jodio dejja cuaa e quecua'yojji nisho ishoa'ajja canaje pea'ai —Peno poanaje.

<sup>12</sup> Majoya ma shahuaba majje Peno poqui'yonaje Maniaja equi yasijje, Huani Macosoja enaeseja equi yasijje. Joma equijo quea huiso Jesosaja epeeji cuana jjachichaqui majje mimi aninaje Eyacuiñajji nijje, Peno jaahuana meejji. <sup>13</sup> Penohua esecue jjani cuiaqueya cañaquinaje, epeeyijji esecue jjani. Oe epona ahuema' ani Shona bajjani poeyanaje aya esecue jjani cuiaqueya cani baa. <sup>14</sup> Ohuaya Penoja esohui shajja'ajja canaje. Jjashahuabaquinaje: —E'e ee, Peno cuayaqui'yonaje.

Bihui majje esecue jjani pajea canananaje. Peno esecuejo tii nequi jea canananaje epona sho'ia, de. Cuajicuajinanaje equijo ani cuana huohuiya. <sup>15</sup> Jamatii equijo ani cuaa Shona jama saja'ame acanaje ba'a: —Chojja, Shona. ¿A'a jja mi niñepoquiani?

—E'e jojo nei ca ca iña poani —poanaje Shona.

Jamajjeya ojjaña jama saja'ame acanaje ba'a: —E'e pojja'a esohuidojojji Peno jaahuanajji ca ca coma poeyanaje.

<sup>16</sup> Penohua ca ca esecue cuiaqueya canequinaje, iyaa'iyaa nequinaje. Equijo nequi cuaa esecue ca'apejo'yo majje ba canaje Peno nequi. Quea bihui nee nee po'yo majje soa neinei'yonaje. <sup>17</sup> Jamajjeya Penohua eme' sisi ecuasajo huana canaje: —¡A'a pa jjaja oe mimijji! —poanaje.

Ojjaña mimima'yo nequi ca'yonaje. Majoya Penohua oya cuana huohui canaje: —Emeshi Mese neiya Jesosaa eya ejeanobia jaa esecue yasijje jjequiquiaya meequi ca'yonaje esohuidojojjiya.

Majoya huohui canaje pea'ai Penohua: —¡Ojjaña Jesosaja epeeji cuana huohuiquicue! ¡Satiaco Apeoja bacua ejja pea'ai huohuiquicue!

Majoya Peno quehua poquicuajinaje pea meshi yasijje. <sup>18</sup> Mecajjeahua sohuinano cuaa chama' Peno ba canaje ejjajejanobiaquiijji. Ejjoco oe jaa ba canaje. Chama'. Ba majje oya cuana quea mete nee nee po'yonaje. Miminaanaa nequi'yonaje. <sup>19</sup> Emeshi Mese Enodeya pea huoojja canaje Peno jjequiya nisho ejajajea'yojji nisho. Peno chama' ba majje Enode quea mase nee nee poanaje. Sohuinano cuana ma Peno jaahuanajji cuana 'ya canaje. Huohui'ajja canaje: —¿A'a mi oe cahuijaanaje? —cahuijaa poso Enodeya acanaje.

Majoya Enodeya huoojea canaje ma sohuinano cuana quecuajea'yohua. Chama'yo tii acanaje.

Majoya Enode Jodea meshijo nequi Sesanea huasijje poquinaje. Jomajo nequi tiiti'y-onaje.

*Enode, Jesusaja epeeji cuia'yoyji epo mano'yonaje*

<sup>20</sup> Majoya emeshi mese Enode quea quene nee nee poanaje Tino cuiñajjijo ba'e cuana nijje, Sinono cuiñajjijo ba'e cuana nijje pea'ai. Jamajjeya oya cuana Enode nijje jjapeequi o'oya sa poanaje. Ojee poquinaje Enode baa. Ebionei Basito ba cañaquinaje, Enodeja echacojji, oja aquiana cuana jaahuanajji. Bejjo quia cajje Basito quea bihui poanaje ona nijje. Majoya pea bejjo sosejje Basito Enode nijje miminaje: —Dejja cuana Tinojo ba'e, Sinonojo ba'e pea'ai minijje jjapeequi o'oya sa poani. ¡Che oe onijje mimicue! —acanaje Basitohua.

Tinojo, Sinono meshijo pea'ai chama' bobi. Jamajjeya Enodeja bobi sa poanaje quea huiso. Jamajoya Enode quea bihui po mee sa acanaje onijje.

<sup>21</sup> Majoya Enodeya ojjaña dejja cuana iyaa canaje oja sohui shajja'ajjajji. Ojjaña nijje mimi jjimahuajo Enodeya daqui quea nahue nee huosho canaje, emeshi meseja ehushojji. Ojaya e'anioquejji quea quemajo anioquenaje. Majoya Enodeya ojjaña cuana quea huiso huohui canaje. <sup>22</sup> Ojjaña jomajo nequi oja sohui shajja'ajja majje oya bihuia canaje jama ba'a: —Emeshi mese Enode, miya Eyacuiñajji. Miya dejja jayojja jama mimime pojjeama poani —jamajoya Enode bihuia canaje ojjaña.

—E'e, jamaya —Enode poanaje, de.

<sup>23</sup> Jamajjeya jjeyahua nei Eyacuiñajjija esohuidojojjiya Enode quea mano nee nee po mee caje'yo pea cuana Eyacuiñajji bihuia mee jjima jojoya, jama ajjima jojoya Enodeja ba'a: —¡Eyacuiñajjiya oe bihuiacue! ¡A'a eya bihuiajji! —po jjima jojoya oya sosohua ijia ca'yajje quea mano nee po'yonaje. Mano'yonaje Enode, de.

<sup>24</sup> Majoya Jesusaja epeeji cuaa esohui quea pame nee Jesusaja huohui canaje quea huiso meshi yasijje. Quea huiso cuaa shajja'ajja canaje. Jesosa nijje jjapeequinaje quea bihui nee.

<sup>25</sup> Majoya Benabe, Sanoni pea'ai Jenosanena huasijje poeyanaje. Jesusaja epeeji cuana Jenosanenajo ba'e cuana bejjo quia canaje, ma Jesusaja epeeji cuana Atioquiajo ba'eya huoojea canaje. Bejjo quia'yo majje Benabe Sanoni nijje huacuaya poqui o'oyanaje Atioquia huasijje. Ohuaya Huani Macoso dojo canaje onijje.

## 13

*Benabe, Sanoni pea'ai huoojea canaje pea meshi cuana huasijje Jesusaja esohui huohuiya*

<sup>1</sup> Jesusaja epeeji cuana quea huiso nee nee poanaje Atioquiajo. Jomajo Eyacuiñajjija esohui huohuijji, Eyacuiñajjija esohui ba meesahuajji pea'ai yaninaje: Benabe, Sanoni, Simoni Ese Ejjaja esohuijo Dejja Tehue bajjani, Nosio ma Sinene cuiñajjijo ba'ya poa, emeshi mese Enodeja edoe mese Manaeni pea'ai. Mahuiso. <sup>2</sup> Oya cuana Eyacuiñajji bihuia po'aninaje. Eyacuiñajji bihuia canijo bobi ijia ajja aninaje. Jama poanijo Edojjoshahua Pameya oya cuana huohui canaje jama ba'a: —Eyaya Benabe, Sanoni pea'ai babacanaje ecuea esohui huohuijji epojji. Jamajjeya jaya cuana huoojeacue ecue esohui huohuiya!

<sup>3</sup> Majoya oya cuanaa ijia'ijia ajja po majje, Eyacuiñajji nijje mimi majje pea'ai eme' huana canaje Sanoni sapa biajje, Benabe sapa biajje pea'ai. Jama acanaje ba'a: —Ecuaya miqianaya huoojeaña pea meshi cuana huasijje Eyacuiñajjija esohui huohuiya —acanaje.

*Chipe nasijo Jesusaja esohui huohui canaje*

<sup>4</sup> Majoya Edojjoshahua Pameya Benabe, Sanoni pea'ai huoojea canaje esohui huohuiya. Senesia huasijje poqui majje bishe ai yasijje nequisohuaquinaje Chipe nasi ai yasijje ebesapoquijji. <sup>5</sup> Majoya oya cuana Sanamina cuiñajji yasijje ba'eñaquinaje Chipe

nasi yasijje. Eyacuiñajjija esohui huohui canananaje Jodio cuana huasijje, Jodioja equi ojee ejjachichaquijji cuanajo nequiya. Huani Macosohua oya cuana chacosahua canaje.

<sup>6</sup> Majoya Chipe nasi ojje miji yasijje poquinaje ejiojjijje Paposá cuiñajji yasijje. Jomajo Jodio dejja ba canaje Banajesosa bajjani. Oya Eyacuiñajjija esohui huohuijji nisho, eyamiquecua poanaje oya. Jamajjeya Enimase bajjani acanaje cuaa. <sup>7</sup> Oya emeshi mese Senio Paono nijje jjapeequinaje. Emeshi mese Senio Paono quea jjashahuabaqui ja'a nee nee, quea huiso nee ojaya eba. Oya Eyacuiñajjija sohui shajja'ajja sa poanaje. Jamajjeya Benabe Sanoni pea'ai iyaa canaje. <sup>8</sup> Jamatii eyamiquecua jjamimicuijje nobiajeaquinaje Sanoni nijje, Benabe nijje pea'ai. Emeshi mese Senio Paono Eyacuiñajjija esohui shajja'ajja mee jjima canaje: —¡A'a shajja'ajjajji Pabojá esohui Jesúsajo! Dasia cani mi coma —eyamiquecuaa acanaje.

<sup>9</sup> Pea esohuijo Sanonija bajjani Pabo. Edojjoshahua Pame onijje nequi tiitiinaje. Jamajjeya Pabohua mete'ama eyamiquecua cojja ba neinei canaje. <sup>10</sup> Jama tecueame acanaje ba'a: —Eyamiquecua, miya ca mi ca oe edosiquianaja bacua. Ojjaña quea pame nee ba'e miquea boti'ama. ¡A'a mimisho'i pojji Jesúsajo miya! Ejjadasiaquijji miya de, quea mimishi. Eyacuiñajjija esohui quea quehua po mee sa ña tii miyaya —Pabohua acanaje—. <sup>11</sup> Jamajjeya jjeyahua nei Eyacuiñajjiya miya cojjama' po mee caje'yo quea huiso cahuime —Pabohua acanaje.

Jjeyahua nei eyamiquecua cojjama' poaje'yo. Quea cojja misi nee nee. Taaanaje jama ba'a: —Cojjama' mo po mee ca'yonaje Jesúsaa. ¡Emejo mo che dojocue quiaa! ¡Me pejjeacue mo oe! —poanaje eyamiquecua.

<sup>12</sup> Ma ba majje emeshi mese Senio Paono quea mete poanaje. Jesúsaja esohui shajja'ajja canaje. Jesúsaja nijje jjapeequi'yonaje, emeshi mese Senio Paono, de.

*Pabohua Benabe nijjeya Atioquia huasijje Pisinia meshi yasijje esohui huohuiqui canaje*

<sup>13</sup> Majoya Pabo ojaya epeeji cuana nijje bishe ai yasijje nequisohuaqui o'oyanaje. Panipinia meshi yasijje besapoquinaje, Pene cuiñajji yasijje. Ba'eñaqui majje Huani Macosohua Pabo, Benabe pea'ai jiña ca'yonaje. Poqui'yonaje Jenosanena huasijje oe nei.

<sup>14</sup> Majoya Pabo Benabe nijje poquinaje Atioquia huasijje, pea Atioquia Pisinia meshijo nequi. Epojja ejomishocajjijo Jodioja equi ojee ejjachichaquijji yasijje poquinaje. Dobiqui majje anioquenaje. <sup>15</sup> Jodioja equi ojee ejjachichaquijji mese cuaa Moisésija esohui etehue'yo huohui canaje. Eyacuiñajjija esohui huohuijji esohui yahuajo nei nei etehue'yo huohui canaje pea'ai. Majoya oya cuaa Pabo, Benabe pea'ai huohui'ajja canaje jama ba'a: —Epeeji cuana, e'e pojja'a miquea esohui yani ojjaña quea pame nee eba'e meesahuajji. ¡Jjeyahua nei huohuicue! —acanaje.

<sup>16</sup> Jamajjeya Pabohua nequisohua majje eme' jeasohua canaje. Jama acanaje ba'a: —Jodio cuana, Jodio pojjeama cuana pea'ai miqúanaya Eyacuiñajjija esohui shajja'ajjajji poani. ¡Jamajjeya shajja'ajjacue mo! <sup>17</sup> Yahuajo nei Eyacuiñajjiya esejaya etiiquiana babaca ca poa ojaya epeeji epojji. Majoya Ejito meshijo ba'e oya cuana jaahuana ca poa. Quea huiso, quea ca'a pea'ai po mee ca'ya poa. Oya cuana Ejito meshijo ba'e dojocuayaqui ca poa pea meshi yasijje epoqui'yoyji. Quea huiso ma dejjaja ba jjima aca poa. <sup>18</sup> Meshi jabojo, dejjamajo Eyacuiñajjiya oya cuana jaahuana ca poa quea huiso shequijame, 40 shequijame. Oya cuana quea mimishi, shajjama' poa. Jamatii ojaya oya cuana cajaa ajjima poa. <sup>19</sup> Majoya ohuaya pea emeshi mese cuana me oeje beca huisome, 7 huisome, pea emimi'yo cuana Canaani meshijo ba'e jeabichajea ca'ya poa. E'e, Eyacuiñajjiya ojjaña ma dejja pea esohuijo mimiani cuana chama'yo tii po mee ca'ya poa quea mimishijojo. Jiquio Canaani meshi Eyacuiñajjiya quia ca poa esejaya etiiquiana cuana ba'ejji. <sup>20</sup> Canaani meshijo esejaya etiiquiana cuana ba'ya poa quea huiso nee nee shequijame, 450 shequijame. Majoya Eyacuiñajjiya Jodio dejja huoojeajji pea nequi mee, pea nequi mee aca poquia poa Jodio cuana quea pame nee ba'e mee'yoyji. Jamaya poanaje Eyacuiñajjija esohui huohuijji Samoeni ba'e jjimahuajo. Majoya Samoeni mano'yajo, chama' pea Jodio dejja huoojeajji poa. <sup>21</sup> Majoya esejaya etiiquiana cuana

emeshi mese sa poa. Eyacuiñajji nijje mimi ca poa jama ba'a: “¡Emeshi mese nequi meecue ecuanajaya!” aca poa.

—Jamajjeya aje Eyacuiñajjiya Sisija bacua ejja Sao nequi mee ca poa Jodioja emeshi mese. Saoja etiiquiana Bejami' bajjani poa. Sao quea huiso shequiajame nequia poa Jodio cuanaja emeshi mese, 40 shequiajame. <sup>22</sup> Majoya emeshi mese Sao quea mimishi po majje mano'ya poa. Majoya Eyacuiñajjiya Dabi emeshi mese po mee ca'ya poa. Dabijo mimia poa jama ba'a:

“Isaija bacua Dabi ecuea eba. Oya quea pame nee nee. Ecuea ehuhui'yo jayojja jama acani. Ecuea ejjashahuabaqui'yojji jayojja jama jjashahuabaqui'ni pea'ai, Dabi”. Jamaya yahuajo nei nei Dabijo mimia poa.

<sup>23</sup> —Dabi Jesusaja etiiquiana poa. Yahuajo Eyacuiñajjiya Jesusajo huohui ca poa jama ba'a:

“Eyaya ojjaña jaahuanajji Quito huoojeaje. Ohuaya Isaeni cuanaja mimishi cuijea'yo majje ba'e tiitii mee caje'yo eyajo onijje”.

Jamaya huohuime aca poa Eyacuiñajjiya Jesusajo.

<sup>24</sup> —Jesusa poe jjimahuajo Huaniya ma ona besameejji poaniya ojjaña cuana huohui canaje jama ba'a: “¡Miquea mimishi cuana pajea'yocue! ¡Eyacuiñajjiyo oe besacue, enajo!” jamaya Huaniya ojjaña Jodio cuana huohui canaje. <sup>25</sup> E'e, Huaniya echaco Eyacuiñajjiyo beshahua nei apoa po majje ohuaya huohui canaje jama ba'a: “¿Achajja miya jjashahuabaqui'ni? ¿Ae acuae jja iña? Eya ca jja ca iña Eyacuiñajjiya huoojea'yo ojjaña jaahuanajji Quito pojjeama. Oya quijje pishana poeje. Oya ca ca oe quea ca'a nee nee, quea pame nee nee. Eya ca iña quea pame pishana. Jamajjeya aje oe eya Jesusa Quito cojja nei nequi sa po ajja, quea bicho, de” acanaje Huaniya.

<sup>26</sup> —Ecuea epeeji cuana, etiiquiana Amajamaja osecua cuana, ¡shajja'ajjacue mo! ¡Eyacuiñajjiya epeeji cuana Jodio pojjeama cuana, shajja'ajjacue mo pea'ai! Eyacuiñajjiya jiquio esohui huohui canaje esejaya eshajja'ajjaji jama ba'a: Eyacuiñajjiya Jesusa huoojea canaje ese jaahuanaa, esaja mimishi cuijea'yohua pea'ai. <sup>27</sup> Jamatii dejja cuana Jenosanenajo ba'eja, Jodio etii cuanaja pea'ai ba jjima Jesusa Eyacuiñajjiya huoojea'yo ojjaña jaahuanajji. Oya cuanaa Eyacuiñajjiya esohui huohuijija esohui shajja'ajja canaje ojjaña ejomishocajji pojja; ma esohui Jodio cuanaja quea quehua. Jamatii Jesusa quecua ca'yonaje; ma esohui yahuajo nei nei etehue'yo jayojja jama acanaje Jodio cuaa. <sup>28</sup> Jesusa mimishi'ama nei nei ba canaje Jodio cuaa. Jamajjeya ¿yajjajo shai quecua mee ca'yonaje oya? Jamatii oya cuaa emeshi mese Pinato jama acanaje ba'a: “¡Jesusa acui ecueata'apeejo ba'ehuanasohuajecue emano'yojji!” taaa neineime ponaje.

<sup>29</sup> —Ojjaña Eyacuiñajjiya esohui yahuajo nei nei etehue'yo jayojja jama aca poa Jesusa, Jodio etii cuaa. Majoya Jesusa acui ecueata'apeejo ba'e jjequioquea'yo majje ojaya epeeji cuaa oya mei jjani ai yasijje huananobiaqui canaje. <sup>30</sup> Jamatii Eyacuiñajjiya oya shequi mee ca o'oyanaje. <sup>31</sup> Mano'yo jjimahua Jesusa Janinea meshijo nequi Jenosanena huasijje poquinaje oja epeeji cuana nijje. Quijje shequi o'oya majje Jesusa oja epeeji cuana nijje jjapeequi o'oyanaje quea huiso cahuime. Ojaya epeeji cuana jjeyahua nei Jesusajo mimiani. Ojjaña Jodio cuana huohui cani jama ba'a: “Jesusa shequi o'oyanaje” acani. <sup>32</sup> Jjeyahua nei ecuanaa Eyacuiñajjiya esohui quea pame nee miquiana huasijje huohuije jama ba'a: <sup>33</sup> Eseyaya etiiquiana nijje Eyacuiñajji yahuajo nei mimia poa. Eseyaya ma etiiquianaja osecuaya. Jamajjeya Eyacuiñajjiya esohui esejaya etiiquiana huasijje jayojja jama jjeyahua nei ohuaya acani esejo. Ojaya esohui jayojja jama ohuaya Jesusa shequi mee ca o'oyanaje. Yahuajo nei nei Dabiya Eyacuiñajjiya esohui Jesusajo tehue ca poa jama ba'a: “Miya ecue Bacua Ejja. Maya eyaya ojjaña ba mee aña” jamaya yahuajo nei nei Dabiya Eyacuiñajjiya esohui Jesusajo tehue ca poa esohuicuayajjiyo, Salmojo —Pabohua acanaje.

<sup>34</sup> —Eyacuiñajjiya Jesusa shequi mee ca o'oyanaje emano'yojji pojjeama, e'ihui'yojji pojjeama. Eyacuiñajjiya yahuajo nei jama aca poa Jesusa ba'a:

“Ecuea esohui quea pame nee Dabi nijje jayojja jama eyaya miya aje'yo. E'e, eyaya miya quea pame nee nee aje'yo”.

<sup>35</sup> Pea esohui cuayajjijo Dabiya tehue ca poa jama ba'a:

“Miyaya eya, miquea Bacua Ejja oe nei quea pame nee jaahuanañajo, eya e'ihui'yoyji pojjeama tii tii poaje'yo”.

Jamaya yahuajo nei Eyacuiñajjiya tehue mee ca poa Jesusajo.

<sup>36</sup> —Yahuajo Eyacuiñajjiya esejaya etiiquiana Dabi emeshi mese po mee ca poa. Jamatii dejja tii majje Dabi mano'ya poa. Oya etiiquiana nijje emano'yo jaa. Oya ihui'ya poa pea'ai. <sup>37</sup> Jesosa Quito ca ca ihui'yo jjima poanaje. Eyacuiñajjiya oya emano'yo jaa shequi mee ca o'oyanaje. <sup>38</sup> Ecuea epeeji cuana, eyaya miquianaya huohuiaña Jesusajo. Oya Jesosa eshe o'oya. Jamajjeya ohuaya mimishi cuana pajea meesahua caje'yo miquianajaya. Mimishi cuijea caje'yo pea'ai. <sup>39</sup> Moisesija etehue'yo jayojja jama añajo pojjeama mimishi cuana cuijea ca'yani Eyacuiñajjiya. Jesosa eshe o'oya, de. Onijje jjapeequianijo ca ca oe ohuaya miquianaya mimishi cuana cuijea ca'yani. Majoya Eyacuiñajjiya miquianaya ba cani emimishi cuijea'yo. <sup>40</sup> ¡Jamajjeya Eyacuiñajjiya esohui ba neineicue! miya ojaya etecuea'yoyji pojjeama. E'e, yahuajo nei Eyacuiñajjiya esohui tehue mee ca poa jama ba'a:

<sup>41</sup> “¡Shajja'ajjacue mo! Eya miquianaaya niñebaña. ¡Quea mete pocue! Eyaya miya chama'yo tii po meeje'yo. Eyaya ma dejjaa ajjima acani aje'yo miquianajaya ebajji. Jamatii ba majje miquianaya jjashahuabaqui ajja. Onaa huohui cajo, miquianajaya shajja'ajja jjima poaje”.

Jamaya yahuajo nei Eyacuiñajji poa —jamaya Pabohua esohui huohui canaje Atioquiajo, Jodioja equi ojee ejjachichaquijjijo.

<sup>42</sup> Majoya esohui huohui majje Pabo, Benabe nijje esecue yasijje cuayaquinaje. Majoya beca cuana onijje miminaje jama ba'a: —Pabo, miquea esohui ecuana shajja'ajja sa o'oya poani. ¡Pea ejomishocajji pojajajo poe o'oyacue miquianaya!

<sup>43</sup> Jodioja equi ojee ejjachichaquijjijo nequi esecue yasijje cuayaqui majje quea huiso Jodio cuana, Jodio pojjeama cuana ma Jodioja esohui jayojja jama Eyacuiñajji bihuia cani pea'ai Pabo nijje jjapeequinaje, Benabe nijje pea'ai. Jamajjeya Pabo, Benabe pea'ai ona nijje jama poanaje ba'a: —¡Jesosa nijje jjapee neineiquicue! ¡Eyacuiñajjiya esohui a'a pajea'yoyji pea'ai! Ohuaya miya jaahuana tiitii cani.

<sup>44</sup> Majoya pea epojja ejomishocajjijo beshahua nei ojjaña cuana ma cuiñajjijo ba'eca jjachichaquinaje Eyacuiñajjiya esohui shajja'ajjaa, Emeshi Mese neija esohui. <sup>45</sup> E'e, quea huiso nee nee poeyanaje Paboya esohui shajja'ajjaa. Ma ba majje Jodio etii cuana quea quene poanaje. Jamajjeya Pabohua esohui huohui canijo mimicuijjeanobiajea canaje cuaa Pabo. Oya cuana Jesusajo mimisho'i poanaje pea'ai. <sup>46</sup> Jamajjeya Pabohua, Benabeya pea'ai mete'ama Jodio etii cuana tecuea canaje jama ba'a: —¡Bacue! Eyacuiñajjiya ecuana huoojea canaje Jodio cuana huasijje ebionei Jesusaja esohui huohui coohua, eba'e tiitii mee'yoyji onijje. Miquianaya ca ca oe jjashajja'ajjaqui sa po ajja. Shajja'ajja sa po'yo ajjajo cuaqui yasijje poquije'yo, eyahuasijje eba'e tiitii'yoyji pojjeama, miquianaya. Jamajjeya ecuana poquije Jodio pojjeama cuana sohuihuohuiya. <sup>47</sup> E'e, Emeshi Mese neiya, Eyacuiñajjiya ecuana huohui canaje jama ba'a:

“Eyaya miya huoojeaje Jodio pojjeama cuana huasijje. ¡Ecuea esohui quea ja'a nee ba meecue! ¡Ojjaña cuana ojjaña meshijo ba'eca cuana enijje jjapeequi meesahuacue! Eyaya ojjañaja mimishi cuana cuijeaje'yo, enijje eyajo eba'e'yoyji”.

Jamaya yahuajo Eyacuiñajji ecuana nijje poanaje —Pabohua acanaje.

<sup>48</sup> Paboya esohui shajja'ajja majje Jodio pojjeama cuana quea bihui nee nee poanaje. Oya cuaa Eyacuiñajji bihuia canaje ojaya esohui quea pame nee Jesusajo ba mee canajejojo. Ojjaña joya Eyacuiñajjiya babaca canaje onijje eba'e tiitii'yoyji Jesosa nijje jjapeequi'yonaje, coya oja babaca'yo huiso tiiya.

<sup>49</sup> Majoya ojjaña Atioquia chipi neijo ba'eya Jesusaja esohui shajja'ajja canaje.

<sup>50</sup> Jamatii Jodio etii cuaa epona cuana quea quene po mee canaje Pabo nijje. Ma epona

cuanaja yahuajo nei Eyacuiñajji quea jea nee poanaje. Oya cuana Jodio etii cuanaja Atioquiajo ba'e cuanaja ehuanase cuana poanaje. Jodio etii cuaa jama acanaje ba'a: — ¡A'a shajja'ajjajji Jesosaja esohui!

Jodio etii cuaa ojjaña quea quene nee nee po mee ca'yonaje Pabo nijje, Benabe nijje pea'ai. Iña majje oya cuaa Pabo Benabe pea'ai huoojea ca'yonaje. <sup>51</sup> Majoya Pabohua Benabeya pea'ai ma shajjama' cuana tecueajea majje jiñajea ca'yonaje. Ojjaña ma cuiñajjijo ba'e ba mee canaje oya cuana shajjama' poanaje, quea mimishi. Majoya Pabo Benabe nijje poquinaje ejiojjijje pea cuiñajji yasijje, Iconio huasijje.

<sup>52</sup> Edojjoshahua Pame o que dobiqiu'yajo, ojjaña Jesosaja epeeji Atioquiajo ba'eca cuana quea bihui nee nee poanaje.

## 14

### *Iconio huasijje esohui huohui canaje Pabohua, Benabeya pea'ai*

<sup>1</sup> Majoya Pabo, Benabe nijje Iconio huasijje ba'eñaquinaje. Atioquiajo acanaje jayojja jama aca o'yanaje Iconiojo pea'ai. E'e, Jodioja equi ojee ejjachichaquiiji yasijje dobiquinaje. Eyacuiñajjija esohui quea pame nee Jesosajo huohui canaje quea ja'a nee. Jamajjeya quea huiso Jodio cuana, Jodio pojjeama pea'ai Jেসosa nijje jjapeequinaje.

<sup>2</sup> Jamatii beca Jodio cuana shajja'ajja sa po'yo ajja poanaje. Maaya Jodio pojjeama cuana jama acanaje ba'a: —¡A'a jjapeequiiji Jesosaja epeeji cuana nijje! ¡A'a Jesosaja esohui shajja'ajjajji! —jama niñebameya acanaje Pabo cuaa.

Jamajjeya quea huiso cuana Jesosaja epeeji cuana nijje jjapeequi'yo ajja poanaje. <sup>3</sup> Jamatii Pabo, Benabe nijje quea cahui huiso Iconiojo nequinaje. Mete'amaa Jেসosajo huohui majamaja canaje, Emeshi Mese neijo jama ba'a: —Emeshi Mese neiya Jেসosaa eseya quea jea nee acani, eseya jaahuana cani pea'ai —poanaje.

Jেসosaa Pabo, Benabe pea'ai ma dejjaa ajjima acani ameesahua canaje. Ma ba majjeya ojjaña ba canaje Pabojja esohui Jেসosajo e'e nei, Benabeja pea'ai. <sup>4</sup> Jamajjeya Iconiojo quea huiso cuana shajja'ajja sa poanaje Jেসosaja huoojea'yo cuanaja esohui. Pea cuana ca ca Jodioja esohui jayojja jama a sa poanaje. Shajja'ajja sa po'yo ajja poanaje Jেসosaja esohui.

<sup>5</sup> Majoya beca Jodio pojjeama Jodio cuana nijje, ojaya emeshi mese cuana nijje jjachichiqui majje mimimiminaje. Jama poanaje ba'a: —¡Cua'a! ¡Pabo, Benabe pea'ai ejjacuiajeaqui, ejjasapa jajahuejjajeaqui o e meiya! —poanaje.

<sup>6-7</sup> Jamatii Pabohua, Benabeya pea'ai maya shajja'ajja canaje. Shajja'ajja majje quehua poquinaje Nicaonia meshi yasijje. Debe cuiñajji yasijje, Nisata cuiñajji yasijje pea'ai esohui quea pame nee Jেসosajo huohui capoquinaje ba'e chejje cuana huasijje, cuiñajji sisi cuana huasijje pea'ai.

### *Nisatajo Pabo iña canaje cuaa*

<sup>8</sup> Nisata cuiñajjijo dejja jiojjijajja ba'e'yonaje, jeo ajja. Oya jamatii cuaya, jiojjijajja tii. <sup>9</sup> Pabohua esohui huohui canijo, jiojjijajjaa shajja'ajja neinei ca'aninaje. Majoya Pabohua jiojjijajja ba neinei canaje. Jjashahuabaquinaje jama ba'a: —Jiojjijajja Jেসosajo quea pame jjashahuabaquiiani jama ba'a: “Jেসosaa eya jeo mee caje'yo”. Jamajjeya eyaya oya jjajiojji jeapihuiqui meeje'yo —Pabo poanaje.

<sup>10</sup> Jamajjeya Pabohua oya jama acanaje ba'a: —Jiojjijajja, ¡nequisohuacue! ¡Jeocue! —acanaje.

Jiojjijajja nequisohua cuajinaje. Jeojeonaje. E'e, jiojjijajja jjajiojji jeapihuiquinaje.

<sup>11</sup> Ma ba majjeya quea huiso cuaa Pabo bihuia canaje. Onajaya emimijo, Nicaoniaja esohuijo jama poanaje ba'a: —E'e de. ¡Bacue Pabo, Benabe pea'ai! Eyacuiñajji cuana ecuana que jaoque'yonaje dejja jayojja, de —acanaje. Pabo, Benabe pea'ai eyacuiñajji poso acanaje cuaa.

<sup>12</sup> Jamajjeya Benabe eyacuiñajji nisho bajjani acanaje Jopite bajjani. Pabo mimi huicha'a huicha'anijo, oya pea eyacuiñajji nisho bajjani acanaje Meconio bajjani.

<sup>13</sup> Epana'yo huohuiji, epana'yo jaahuanajji ma epana'yo Jopite nequiji equijo nequinaje

Nisata pejjejo. Ohuaya ana'ai yahue cuana, eshasha quea huiso cuana pea'ai jjequi canaje cuiñajji esecue yasijje, Pabo que. Ohuaya pea cuana nijjeya ana'ai cuana, eshasha cuana pea'ai dahuafea sa acanaje Pabo bihuiajji, Benabe pea'ai bihuiajji; eyacuiñajji poso bihuia sa acanaje.

<sup>14</sup> Benabe, Pabo pea'ai ma ba majje quea mete poanaje. Poquicuajinaje dejja cuana jjachichaquiani yasijje. <sup>15</sup> Jama taaame poanaje ba'a: —¿Apiojji acuaeya miquianaaya jama aña so'o? Ecuana aje dejja cuana miquiana jayojjaya. ¡A'a ecuana bihuiajji! Ecuanaa esohui quea pame Jesosajo huohuiaña. Jamajjeya ¡a'a eyacuiñajji nisho cuana bihuia majajji! ¡Pajea'yocue! Eyacuiñajji oe nei e'e jojo nei eshe tii nequi. ¡Oya oe nei bihuia! Ohuaya eyatahuatahua pana ca'ya poa. Meshi cuana, bae cuana pea'ai pana ca'ya poa. Ojjaña aquiana meshijo, eyajo, enajo pea'ai pana ca'ya poa ohuaya, Eyacuiñajjiya. <sup>16</sup> Yahuajo nei nei ojjaña cuaa ojjaña meshijo ba'eya quea mimishi nee aca poa. Jamatii Eyacuiñajjiya yahuajo ojjaña cuana quea pame aca poa. Ojjaña ba mee ca poa oya eshe nequi. Jjeya ohuaya miquianaya quea pame nee acani pea'ai. Nayaja po mee ca'yani, eshequiaja po mee ca'yani, bobi tii mee ca'yani pea'ai. Jamaya ohuaya miquianaya quea bihui nee ba'e meesahua cani pea'ai —Pabohua acanaje.

<sup>18</sup> Jamaya Pabohua, Benabeya pea'ai huohui canaje. Jamatii ma dejja cuaa beshahua nei oya bihuia canaje. Ana'ai beshahua nei dahuafea canaje o bihuiajji. Dahuafea jjima; beshahua nei, de.

<sup>19</sup> Majoya Jodio cuana Atioquiajo ba'e, Iconiojo ba'e pea'ai poeyanaje Nisata huasijje. Oya cuaa Nisata dejja cuana sijje acanaje Pabojjo. Sijje acanje quea quene nee nee poanaje Pabo nijje. Majoya oya cuaa Pabo iña canaje; sapa jaja canaje meiya, dojocuayaqui canaje cuiñajji esecue yasijje. Pabo emano'yo poso jeajea canaje cuaa jomajo tii. <sup>20</sup> Jamatii quijje pishana Jesosaja epeeji cuana poeyanaje Pabo baa. Ojjaña o que jjachichaquiajo, Pabo shequi'yonaje. Shequi'yo majje huacuaya Nisata huasijje poe o'oyanaje. Majoya mecajjeahua nei oya Benabe nijje poquinaje pea cuiñajji yasijje, Debe yasijje.

*Pabo, Benabe nijje huacuaya poqui o'oyanaje, Atioquia huasijje*

<sup>21</sup> Debe yasijje poqui majje Pabohua, Benabeya pea'ai Eyacuiñajjiya esohui quea pame nee Jesosajo huohui cañaquinaje. Quea huiso cuaa shajja'ajja canaje. Jesosa nijje jjapeequinaje. Majoya, Pabo Benabe nijje huacuaya poqui o'oyanaje Nisata huasijje. Iconio huasijje pea'ai poqui o'oyanaje. Majoya Pisinia meshi yasijje Atioquia huasijje poqui o'oyanaje ojjaña Jesosaja epeeji eyacua cuana baa. <sup>22</sup> E'e, Pabohua, Benabeya pea'ai Jesosaja epeeji cuana ma cuiñajji cuanajo ba'eca cuana esohui huohui ca o'oyanaje jama ba'a: —¡Jesosa nijje jjapee neineiquicue! ¡A'a oya pajea'yojji! Eyajo Eyacuiñajji ojjaña huoojajji poani. Esey a onijje ba'e tiitii sa poanijo, onaaya, mimishi cuaa eseya napa caje quea huiso. Quea camaja esejo poaje. Quea nee poaje pea'ai —Pabohua acanaje.

<sup>23</sup> Majoya Pabohua, Benabeya pea'ai ma cuiñajji cuanajo Jesosaja epeeji quea pame babaca canaje Jesosaja epeeji cuana jaahuanajji epojji. Majoya ijia'ijia jjima nequi Eyacuiñajji nijje mimi majamajanaje Jesosaja epeeji jaahuanajji cuanajo jama ba'a: —Emeshi Mese nei Jesosa, miya quea pame nee nee. Jiquio dejja cuana miquea epeeji nei cuana ecuaaaya babacanaje miquea epeeji cuana jaahuanajji epojji. Jamajjeya ¡oya cuana miquea epeeji cuana jaahuana meesahuacue quea pame nee! —poanaje.

<sup>24</sup> Jamajjeya Pabohua, Benabeya pea'ai Pisinia meshijo esohui huohuinana o'oya majje Panipinia meshi yasijje poqui o'oyanaje. <sup>25</sup> Majoya Eyacuiñajjiya esohui quea pame nee Jesosajo huohui canana o'oyanaje Pene cuiñajji yasijje. Majoya oya cuana poquinaje Atania cuiñajji yasijje. <sup>26</sup> Jomajo Ataniajo bishe ai yasijje nequisohuaquinaje. Besapoqui o'oyanaje Atioquia huasijje. Jomajo yahuajo pishana Jesosaja epeeji cuana Eyacuiñajji nijje mimi majje oya cuana huoojaja canaje esohui huohuiya. Eyacuiñajji nijje miminaje pea'ai o jaahuanajji, esohui quea pame Jesosajo huohui canijo.



<sup>27</sup> Jamajjeya Atioquia huasijje poe'yo majje Pabohua, Benabeya pea'ai ojjaña Jesusaja epeeji cuana iyaa canaje. Jjachichaqui'yajo Pabohua, Benabeya pea'ai quio o poquinaje huohui canaje. Majoya jama acanaje ba'a: —Ojaya esohui quea pame nee Jesusajo huohuinanañajo, Eyacuiñajjiya ecuana quea pame nee acanaje. Eyacuiñajjiya quea huiso Jodio pojjeama cuana oja sohui ba meesahua canaje pea'ai —jamaya acanaje Pabohua, Benabeya pea'ai.

<sup>28</sup> Oya cuana Atioquiajo nequi'yonaje Jesusaja epeeji cuana nijje quea huiso cahuime.

## 15

### *Jesosaja epeeji cuana ojee miminaje Jenosanenajo*

<sup>1</sup> Majoya beca dejja cuana poeyanaje Atioquia huasijje. Oya cuana Jodio dejja, Jodea meshijo ba'e. Jamajjeya poe majje ohuaya Jesosa Quitoja epeeji cuana jama sohuihuohuime acanaje ba'a: —¡Etiiquiiana Moisesija esohui etehue'yo jayojja jama acue! ¡Cuiishasha biso nei jehuissejjajeacue! Jamaya ajjimajo Eyacuiñajjiya miya emimishi cuijea'yojji pojjeama —acanaje.

<sup>2</sup> Shajja'ajja majje Pabo, Benabe pea'ai jjamimicuijaje nobiajeaquinaje janobajjima nei, ma Jodio dejja cuana nijje quea huiso miminaje pea'ai. Majoya Jesusaja epeeji cuana jama acanaje ba'a: —Benabe, Pabo, pea Jesusaja epeeji cuana nijje capoquiahua Jenosanena huasijje. Jomajo Jesusaja huoojea'yo cuana nijje, Jesusaja epeeji etii cuana nijje pea'ai camimiahua Moisesija etehue'yojo, Jesusaja esohuijo pea'ai —poanaje.

<sup>3</sup> Majoya Jesusaja epeeji cuana Atioquiajo ba'eya oya cuana huoojea canaje. Jenosanena huasijje poquijeya oya cuana Penisia meshijo, Samania meshijo pea'ai cuiñajji cuana yejje ca poquipoquinaje. Jesusaja epeeji cuana sohuihuohui capoquinaje jama ba'a: —Jodio pojjeama quea huiso cuana Jesosa nijje jjapeequiani —poanaje.

Ma esohui shajja'ajja majje ojjaña Jesusaja epeeji cuana quea bihui nee nee poanaje.

<sup>4</sup> Majoya oya cuana Jenosanena huasijje poe'yonaje. Jomajo ojjaña Jesusaja huoojea'yo cuana, Jesusaja epeeji etii cuana pea'ai quea bihui nee miminaje Pabo nijje, Benabe nijje pea'ai. Majoya Pabohua, Benabeya pea'ai huohui canaje ojjaña Eyacuiñajjiya oya cuana ameesahua canaje Jodio pojjeama cuanajo, pea meshi cuana huasijje.

<sup>5</sup> Jamatii beca Paniseo cuana ma Moisesija etehue'yo jaahuanajji poani nequisohua majje jama poanaje ba'a: —Chojja. ¡Jodio pojjeama cuana Jesosa nijje jjapeequi majje cuiishasha biso nei cajehuissejjaje cahua! Ojjaña Moisesija etehue'yo cuana jayojja jama ca'a cahua pea'ai —poanaje Paniseo cuana, Jesusaja epeeji cuana.

<sup>6</sup> Jamajjeya Jesusaja huoojea'yo, Jesusaja epeeji etii cuana pea'ai jjachichaquinaje Paniseoja esohuijo mimiya. <sup>7</sup> Ma esohuijo quea huiso mimimiminaje. Ojjaña cuana mimi'yajo, Penohua nequisohua majje ojjaña jama acanaje ba'a: —Epeeji cuana, yahuajo Eyacuiñajjiya eya huoojea canaje esohui quea pame nee Jesusajo huohuiya Jodio pojjeama cuana huasijje. Shajja'ajja cajo, Eyacuiñajjiya oya cuana Jesosa nijje jjapeequi meesahua canaje. Edojjoshahua Pame huoojea canaje ona huasijje dobiqiiya. Jamaya miquianajaya eba. <sup>8</sup> Eyacuiñajjiya eba ojjañaja ejjashahuabaquijji. Ohuaya Jodio pojjeama cuana quea pame nee acanaje. E'e, yahuajo Eyacuiñajjiya eseya, Jodio cuana, quea pame aca poa jayojja jama jjeya ohuaya oya cuana acanaje pea'ai. E'e, Jodio pojjeama cuana quea pea'ai ohuaya Edojjoshahua Pame huoojea canaje ona huasijje dobiqiiya. <sup>9</sup> E'e, Eyacuiñajji jjashahuabaquinaje jama ba'a: “Jodio pojjeama cuana Jodio cuana jayojjaya” poanaje. Jamajjeya Jesosa nijje jjapeequianijo, ohuaya Jodio pojjeama cuanaja mimishi cuana cuijea ca'yonaje pea'ai. <sup>10</sup> ¿Yajjajo acuae mi Eyacuiñajji jayojja jjashahuabaquime mi poani so'o? Miquianaaya jama aña ba'a: “Jesusaja epeeji cuana Moisesija etehue'yo jayojja jama ca'a cahua”. Chojja, quea camaja ca coma, de. Eseyaya etiiquiiana cuanaja, eseyaya pea'ai Moisesija esohui etehue'yo cuana jayojja jama a'yo jjima poanaje. Quea camaja. <sup>11</sup> ¡Chojja! Eseyaya ca ca Jesusaja esohui jayojja jama aña. Jamajjeya Emeshi Mese neiya Jesusaa eseya quea jea nee acani. Onijje jjapeequianijo, eseyaya mimishi

cuana cuijea'yo majje onijje ba'e tiitii mee caje'yo eyajo. Oya jayojjaya ohuaya acani Jodio pojjeama cuanajo, Jesosa nijje jjapeequianijo pea'ai —Penohua acanaje.

<sup>12</sup> Peno mimi'yajo ojjaña cuana mimi'yo ajja poanaje. Shajja'ajja canaje. Majoya Pabohua, Benabeya pea'ai huohui canaje jama ba'a: —Jodio pojjeama huasijje ojaya esohui huohuiqui'yajo, Eyacuiñajjiya ecuana ma dejjaa ajjima acani ameesahua canaje quea huiso —acanaje. Majoya Pabohua, Benabeya pea'ai huohui canaje quea huiso.

<sup>13</sup> Majoya Pabo, Benabe pea'ai mimi pajea'yajo Satiaco jama poanaje ba'a: —Epeeji cuana, ¡shajja'ajjacue mo! <sup>14</sup> Penohua jjeyahua nei eseya huohui canaje Eyacuiñajjiya Jodio pojjeama cuana quea jea nee acanaje pea'ai. Jamajjeya oya cuana Jesosa nijje jjapeequi meesahua ca'yonaje. Jamaya poanaje Peno. <sup>15</sup> E'e, jamaya Eyacuiñajjiya esohui huohuijjiya yahuajo nei nei huohui ca poa pea'ai. Jama tehueme aca poa ba'a:

<sup>16</sup> “Quijje eyaya Dabija osecua Emeshi Mese nei po meeje'yo. Equi e bihuijji epaje'yo poa. Poe majje eyaya oya cuana bihuia meesahuaje o'oya. <sup>17</sup> Jamajjeya pea cuana, Jodio pojjeama cuana, ojjaña meshijo ba'eca enijje jjapeequi sa poaje. Eya ojjaña Emeshi Mese nei quea pame nee poaje'yo. <sup>18</sup> Jamaya Emeshi Mese nei quea pame neeya huohui ca poa yahuajo nei. Ma esohui yahuajo ohuaya pea cuana ba meesahua ca poa”.

Jamaya yahuajo nei Eyacuiñajjiya esohui poa.

<sup>19</sup> —Jamajjeya eya jjashahuabaquiani jama ba'a: Jodio pojjeama cuana Jesosa nijje jjapeequianijo ¡a'a Moisesija etehue'yo jayojja jama ameeji! Chojja, maya quea camaja nee nee. <sup>20</sup> Jamajjeya Jodio pojjeama cuana huasijje esohui tehucue jama ba'a: “Jesosaja epeeji cuana, ¡noe eyacuiñajji nisho bihuijji onaja dahua a'a ijji! ¡A'a pea cojjoji pojji pea'ai! ¡Noe na' cuaya meeji jjima a'a ijji! ¡Ijiacajji na' a'a ishijji! Jamaya miquiaa ajo Jodio cuana miquiana nijje quea quene nee nee poaje”. ¡Jamaya tehucue Jesosaja epeeji eyacuaja ebajji! —Satiacohua acanaje—. <sup>21</sup> E'e ojjaña cuiñajji Jodio dejja cuanaja esohui huohuijji cuaa Moisesija etehue'yo huohui cani Jodioja equi ejjachichaquijji. Yahuajo nei huohui ca poa. Jjeya nei huohui cani pea'ai ojjaña epojja ejomishocajji. Jamajjeya ¡a'a Moisesija etehue'yo jayojja jama ameeji! —acanaje Satiacohua.

*Jesosaja epeeji etii cuaa esohui tehue canaje Jodio pojjeama cuanaja ebajji, Jesosaja epeeji eyacua cuanaja*

<sup>22</sup> Majoya Jesosaja huoojea'yo cuaa, esohui huohuijji cuaa, Jesosaja epeeji etii cuaa, ojjaña Jesosaja epeeji cuana jomajo nequiya pea'ai Pabo nijje, Benabe nijje huoojea sa acanaje becanajji pea'ai epeeji cuana Atioquia huasijje. Jamajjeya huoojea canaje Basabaja bacua ejja Joda. Onijje huoojea canaje pea dejja Sinasi bajjani. Oya cuana Jesosaja epeeji cuanaja huoojea'yo poanaje, quea pame nee nee. <sup>23</sup> Sinasi nijje, Joda nijje pea'ai esohui etehue'yo huoojea canaje Jesosaja epeeji cuanaja ebajji. Ma esohui etehue'yo jama poanaje ba'a:

“Epeeji cuana Atioquiajo ba'e, Sinia meshijo ba'e, Sinisia meshijo ba'e pea'ai, ecuaaya, Jesosaja huoojea'yo cuaa esohui huohuijjiya, Jesosaja epeeji etii cuaa pea'ai jiquio esohui etehue'yo huoojeaña miquiana huasijje, Jesosaja epeeji cuana Jodio pojjeama cuana huasijje. E'e, ecuaaya quea bihui nee tehuenaje miquiana huasijje. <sup>24</sup> ¿Achajja a quiana ani, ecuanaja epeeji cuana? ¡Bacue! Miquiana huasijje beca dejja jiquiojo nequi tii cuaa Moisesija esohui huohui canaje. Moisesija esohui jayojja jama miquianaya ba'e meeme ajja. Quea camaja, de. Jamajjeya miquianaya quea yeno poanaje. Ecuanaja ma dejja cuana huoojea jjima miquiana que esohui huohuiya. ¡A'a shajja'ajjaji cuana! <sup>25</sup> Miquianaya quea yeno poanaje. Jamajjeya ecuana jiquiojo tii quea huiso nee ojee jjashahuabaqui majje jama poanaje ba'a: Ecuaaya miquiana quea pea dejja cuana huoojeaña Benabe nijje, Pabo nijje pea'ai. E'e, Pabo, Benabe pea'ai ecuanaja epeeji cuana.

<sup>26</sup> Oya cuana Emeshi Mese nei Jesosa Quitojo chacoconaje mete'ama. Onaaya oya cuana beshahua nei jajahuejjajea ca'yonaje, Jesosa nijje jjapeequianijo.

<sup>27</sup> Jamajjeya ecuaaya dejja quea pame becanejjijji pea'ai huoojeaña miqiana que, Joda, Sinasi pea'ai. Oya cuaa ecuanaja etehue'yo huohui caje'yo miqianaja eshajja'ajjajji. <sup>28</sup> E'e, Edojjoshahua Pameya ecuana jjashahuabaqui mee cani jama ba'a: Ecuaaya miqianaya huohui ajja Moisesija esohui etehue'yo jayojja jama yajji. Chojja, jamaya miqianaaya ameemee ajja. Quea camaja. Jiquio jama acue miqianaaya ba'a: <sup>29</sup> ¡Noe ma eyacuiñajji nisho bihuiajji onaja dahua a'a ijji! ¡A'a pea cojjojji pojji! ¡Noe na' cuaya meequi jjima a'a ijji! ¡Ijjiacajji na' a'a ishijji pea'ai! Jamaya miqiaa ajo Jodio cuana miqiana nijje quea quene nee nee poaje. Mahuiso ecuanaja esohui etehue'yo miqiana que. Jamajjeya jamaya añajo miqianaya quea pame nee ba'eje. Apoa.”

Jamaya Jesusaja huoojea'yo esohui huohuijji cuaa, Jesusaja epeeji etii cuaa pea'ai tehue canaje Jesusaja epeeji eyacua cuanaja ebajji.

<sup>30</sup> Jamajjeya Pabo, Benabe nijje, becanejjijji pea'ai dejja nijje poqui o'oyanaje Atioquia huasijje. Jomajo nequiñaqui majje ojjaña Jesusaja epeeji iyaa canaje. Ojee jjachichaquiyajo, etehue'yo ba mee canaje. <sup>31</sup> Ma esohui etehue'yo ba majje ojjaña Jesusaja epeeji eyacua cuana quea bihui nee nee poanaje.

<sup>32</sup> Joda, Sinasi pea'ai Jesusaja esohui huohuijji poanaje. Jamajjeya oya cuaa Jesusaja epeeji cuana sohuihuohui canaje quea huiso nee. Quea huiso Jesosa nijje jjapeequi meesahua canaje quea ja'a nee. <sup>33</sup> Quea cahui huiso Atioquiajo esohui huohui canaje. Majoya Jesusaja epeeji cuaa Atioquiajo ba'eya oya cuana huoojea ca'yonaje Jenosanena huasijje, Jesusaja huoojea'yo esohui huohuijji cuana huasijje. Quea bei nee poqui'yonaje. <sup>34</sup> Sinasi ca ca nequinaje Atioquiajo tii. Poqui sa po'yo ajja poanaje. <sup>35</sup> Pabo, Benabe pea'ai Atioquiajo nequinaje. Quea huiso pea cuana nijjeya Emeshi Mese nei Jesusaja esohui huohui tiitii canaje. Ojjaña Jesusaja epeeji eyacua cuana esohui ba neinei meesahua canaje.

#### *Pabo Benabe nijje poqui pajea'yonaje*

<sup>36</sup> Majoya Pabo Benabe nijje jama poanaje ba'a: —Cua'a, Jesusaja epeeji cuana ojjaña cuiñajji yasijje ejjabaquiqui o'oya, ma yahuajo eseya Jesusaja esohui huohuiquinaje yasijje. E'e pojja'a esejaya esohui pajea ca'yonaje. E'e pojja'a pajea'yo jjima; ba'ajja —poanaje Pabo.

<sup>37</sup> —E'e —poanaje Benabe—. Jamaya quea pame. Huani Macoso ese nijje ejjadojoqui pea'ai, ma yahuajo ese nijje poqui'ajjanaje.

<sup>38</sup> —Chojja —acanaje Pabohua—. Yahuajo Panipinia meshijo Huani Macosohua eseya jiña ca'yonaje. Chacochocho jjima ese nijje. Huacuaya poqui'yonaje Jenosanena huasijje. Eya o dojo sa po'yo ajja.

<sup>39</sup> Jamajjeya Pabo, Benabe nijje jjamimicuijje nobiajeaquinaje. Ojee poqui pajeanaje. Majoya Benabe besapoquinaje Chipe nasi ai yasijje. Huani Macoso dojo canaje onijje echacojji. <sup>40</sup> Pabohua ca ca Sinasi babaca canaje onijje epoquijji Jesusaja esohui huohuisahuajji. Jamajjeya Jesusaja epeeji cuana ojee Eyacuiñajji nijje miminaje Pabojo, Sinasijo pea'ai jama ba'a: —Eyacuiñajji, ¡Pabo, Sinasi pea'ai poqui meesahuacue miquea esohui huohuiya! ¡Oya cuana jaahuanacue! —poanaje.

<sup>41</sup> Majoya Pabo Sinasi nijje poqui o'oyanaje Sinia meshi yasijje, Sinisia meshi yasijje pea'ai. Jesusaja esohui huohui capoqui o'oyanaje. Ojjaña Jesusaja epeeji cuana Jesosa nijje jjapeequi meesahua canaje quea ja'a nee.

## 16

#### *Timoteo poquinaje Pabo nijje, Sinasi pea'a nijje*

<sup>1</sup> Majoya Pabo Sinasi nijje poqui o'oyanaje Debe yasijje, Nisata huasijje pea'ai. Jomajo ohuaya Jesusaja epeeji shacuima' nequi ba canaje Timoteo bajjani. Timoteoja enaese Jodio pona poanaje, Jesusaja epeeji pea'ai. Ojaya ejeajji ca ca Jieno dejja poanaje. <sup>2</sup> Ojjaña Jesusaja epeeji cuaa Nisatajo ba'eya, Iconiojo ba'eya pea'ai Timoteojo quea bihui nee

huohui canaje jama ba'a: —Timoteo quea pame nee, Jesusaja epeeji quea ca'a nee oya, de —poanaje.

<sup>3</sup> Jamajjeya Pabohua Timoteo dojo sa acanaje onijje esohui huohuiya. Quea huiso Jodio cuana ma meshijo ba'enaje; ojjaña eba Timoteoja ejeajji Jodio pojjeama, Jieno dejja. Jamajjeya ebacua ejja Timoteo Jieno cuana jayojja jama tii'yonaje; Moisesija etehue'yo jayojja jama cuiishasha biso nei jehusejjajea jjima poanaje. Jamajjeya Jodio cuana tecue'ama onijje epojji Pabohua Timoteo cuiishasha biso nei jehusejjajea mee canaje.

<sup>4</sup> Majoya oya cuana poquinaje ojjaña cuiñajji cuana huasijje. Ojjaña Jesusaja epeeji cuana huohui capoquinaje esohui etehue'yo ma Jesusaja huoojea'yo esohui huohuijji cuaa, Jesusaja epeeji etii cuaa Jenosanenajo tehue canaje. Ojjaña ma etehue'yo ba mee canaje: —E'e, ¡ma etehue'yo jayojja jama acue miquiianaaya! —acanaje Pabohua, Sinasiya pea'ai. <sup>5</sup> Jamajjeya Jesusaja epeeji cuana Jesusaja esohui jayojja jama ba'e meesahua canaje. Yahuajo oya cuana quea ja'a pishana ba'enaje. Jjeyahua nei ca ca Jesusaja epeeji quea ja'a nee ba'enaje Jesusajo. Quea huiso cuana Jesosa nijje jjapeequi poquipoquinaje pea'ai.

*Pabo jjacahuibaquinaje Eyacuiñajji onijje miminaje*

<sup>6</sup> Jamatii Edojjoshahua Pameya oya cuana Asia meshi yasijje poqui mee jjima acanaje. Jomajo esohui huohui mee jjima acanaje. Jamajjeya oya cuana Pichia meshi yasijje poquinaje, Janata meshi yasijje pea'ai poquinaje. <sup>7</sup> Majoya oya cuana poeyanaje Misia meshi yasijje. Jomajo oya cuana jjashahuabaquinaje Bitinia meshi yasijje epoquijji. Jamatii Edojjoshahua Pameya oya cuana ma meshi yasijje poqui mee jjima acanaje. <sup>8</sup> Jamajjeya oya cuana Misia meshije jjayejjequinaje. Toasa cuiñajji yasijje poquinaje, bae ai sahua huasijje. <sup>9</sup> Jomajo Eyacuiñajjiya Pabo jjacahuibaqui mee canaje jama ba'a: Jjacahuibaquianijo Pabohua oe dejja cahuiba canaje Masenonia meshijo ba'e. Oya Pabo nijje miminaje jama ba'a: —Pabo, ¡poecue Masenonia meshi yasijje, ecuanaja meshi yasijje! ¡Ecuana Jesusaja esohui huohuihuacue! —jamaya acanaje Masenonia dejjaa.

Majoya Pabo shequi'yonaje. <sup>10</sup> Jamajjeya shequi'yo majje Pabo Masenonia meshi yasijje ecuana nijje besapoqui sa poanaje. Jama jjashahuabaquime poanaje ba'a: —Eyacuiñajjiya eseya huoojea cani Masenonia meshi yasijje esohui quea pame nee Jesusajo huohuiya, ojjaña Masenonia meshijo ba'e sohuihuohuiya.

Jamajjeya ecuana aquiana cuana chicha majje besapoquinaje.

*Pabo, Sinasi pea'ai Pinipo cuiñajji yasijje besapoquinaje*

<sup>11</sup> E'e Teopino, eyaya, Nocaa pea esohui Jesusaja epeeji cuanaja, ma eyaya banaje eyaya tehueaña miquea ebajji jama ba'a: Majoya Toasa huasijje poe majje ecuana bishe ai yasijje nequisohuaquinaje. Besapoquinaje Samatasia nasi yasijje. Majoya pea mecahuajje besapoquinaje Neaponi cuiñajji yasijje, bishe aijo. <sup>12</sup> Majoya Neaponijo nequi ecuana poquinaje quea huesha nee, Pinipo cuiñajji yasijje ejiojjijje Masenonia meshi ebio dojjojo. Pinipojo Shomano dejja cuana ba'yani quea quemo cuiñajji. Jamajjeya quea huiso dejja Pinipo huasijje poeyani anicuaa. Jamajjeya ecuana Pinipojo nequinaje quea cahui huiso. <sup>13</sup> Majoya Jodioja epojja ejomishocajji ecuana cuiñajji esecue yasijje poquinaje cuei sahua huasijje. Jama jjashahuabaquime poanaje ba'a: —Jomajo Jodio cuana Eyacuiñajji nijje mimiani ba'ajja.

Jomajo quea huiso epona ejjachichacui ani banaje. Jamajjeya Pabo, ojaya epeeji cuana pea'ai anioquenaje. Esohui huohui canaje epona cuanaja eshajja'ajjaji. <sup>14</sup> Oe eponaa Ninia bajjaniya quea ja'a nee shajja'ajja canaje. Oya Tiatina pona, Tiatina cuiñajji ba'e, daqui huo'o quiajji pea'ai, daqui huo'o quea pame nee nee quiajji. Oya Ninia Eyacuiñajji epeeji yahuajo poanaje. Jamajjeya Emeshi Mese neiya oya shajja'ajja meesahua canaje Paboya esohui quea pame nee Jesusaja. <sup>15</sup> Jamajjeya Ninia, oja huapa pojjeama cuana pea'ai Jesosa nijje jjapeequi'yonaje. Onaaya oya Eyacuiñajji besa mee canaje enajo. Majoya Niniaa Pabo jama acanaje ba'a: —Miquea eba eya Emeshi Mese nei Jesusaja epeeji nei, ojaya esohui jayojja jama añ. Jamajjeya ¡ecuea equijo ba'ecue! —poanaje Ninia.

Jamajjeya ecuana Niniaa ja'a cajjequinaje ojaya equijo eba'ejji.

*Pabo, Sinasi pea'ai jeanobiajea canaje cuaa*

<sup>16</sup> Quijje ecuana poqui o'oyanaje cuei yasijje Eyacuiñajji nijje mimiya. Poquijeya ecuaaya banaje oe epona ahuema' ani. Ohuaya chaco cani sosema' niñepoqui yajjejojo. Jamajjeya eshahuaa esapajo nequiya epona huohui meesahua canaje ohuaye nei ma quijje onaa acaje. Maya huohui capoquinaje quea huiso bejjo sosejje. O chacomeejji poaniya quea huiso bejjo jjeshe canaje epona niñepoquiya huohui cani sosejje. <sup>17</sup> Ma epona niñepoqui Pabo quishishijji poquinaje. Taaa poquinaje jama ba'a: —Jiquio dejja cuana Eyacuiñajji quea ca'a neeja echacojji poani. Onaaya miquianaya huohui cani esohui quea pame nee Jesosajo, ma ohuaya mimishi cuana cuijea'yo majje miquianaya ba'e tiitii mee caje'yo eyajo —jama taaa nishomeya poanaje ecuana quishishijji poquije.

<sup>18</sup> Jama taaa majamaja nishomeya epona popoquinaje quea huiso cahuijo. Quijje Pabo quea quene po majje, jjanojjaquicuaji majje eshahua eponajo nequi huoojeacuayajea ca'yonaje jama ba'a: —¡Eshahua eponajo nequi cuayaqui'yocue! ¡A'a dobiqui o'oyajji! Jesosa Quito nijjeya eyaya miya huoojeacuayajea'yaña —Pabohua acanaje.

Jjeyahua nei eshahua eponaja yamijo nequi cuayaqui'yonaje.

<sup>19</sup> Ma ba majje eponaja echacomeejji poani quea quene nee nee poanaje Pabo nijje, Sinasi nijje pea'ai. Jama poanaje ba'a: —¡De! Jjeya epona shahuama'yo. Jamajjeya ojaya ba'yo jjima poaje ojaye nei ma onaa quijje nei acaje. Onajaya ecuana esosequia'yoyji pojjeama ma eponaa huohui cani sosejje —poanaje epona chacomeejji poani.

Jamajjeya epona chacomeejji poaniya Pabo, Sinasi pea'ai iña canaje. Dojo canaje ojjaña aquiana quiajji equi yasijje. Jomajo Pinipo emeshi mese nijje miminaje, etii cuana nijje. <sup>20</sup> Shomano emeshi mese huohui'ajja cañaquinaje jama ba'a: —¡Bacue! Jiquio Jodio dejja cuaa, Pabohua, Sinasiya pea'ai ojjaña cuana ecuanaja cuiñajji ba'e quea quene nee nee po mee cani. <sup>21</sup> E'e, oya cuaa pea ejjashahuabaqui'yoyji huohui canaje. Pea eba'ejjijo huohui canaje. Jamaya pojjeama ecuanaja emeshi meseja esohui. Jamaya pojjeama Shomano dejja cuanaja esohui pea'ai. Ecuana Shomano dejja cuana, jamajjeya Pabaja esohui jayojja jama yajji, ¿yajja e'ajji?

<sup>22</sup> Majoya ojjaña dejja cuana cuajicuaji jebejenaje Pabo que. Quea quene nee ojjaña poanaje Pabo nijje, Sinasi pea'ai nijje. Emeshi mese cuana pea'ai quea quene po majje Pabaja daqui Sinasija daqui pea'ai oja ehuosho ba'e iña'isajea canaje. Huohui canaje jama ba'a: —¡Pabo, Sinasi pea'ai cuiasejja neineicue acui sisiya! ¡Majoya oe jeanobiajea meequicue ejjajeanoquiaquijji equi yasijje! —acanaje Pinipo emeshi mese cuaa.

<sup>23</sup> Jamajjeya Pabo, Sinasi pea'ai janobajjima nei cuiasejja huicha'a huicha'a canaje cuaa. Majoya oya cuana dojo canaje ejjajeanoquiaquijji equi yasijje jeanobiajeaa. Ejja-jeanoquiaquijji equi cuiñajji jama acanaje ba'a: —¡Jiquio dejja cuana jaahuana neineicue! ¡A'a cuayaqui mee'yoyji! Poquiquehuajo aje mi oe cuiajea caje'yo emeshi mese cuaa —acanaje.

<sup>24</sup> Jamajjeya ejjajeanoquiaquijji equi cuiñajjiya ma esohui shajja'ajja majje quea mete poanaje. Pabo, Sinasi pea'ai ejjajeanoquiaquijji equi dojjo nei yasijje jeanobiajea canaje; quibo jeyochicha canaje acui tejee.

<sup>25</sup> Jamatii mecashono Pabo, Sinasi pea'ai Eyacuiñajji nijje mimi jaanaje. Sohuicuaya jaanaje pea'ai. Ojjaña cuaa ejeanobia jaaa shajja'ajja canaje sohuicuaya jaa. <sup>26</sup> Majoya meshi huehuahuehuanaje janobajjima nei. Mei jiyo cuana huehuahuehua neineinaje pea'ai. Esecue cuana jamatii nequi jjaca'apejojeaquinaje. Ojjaña dejja cuana ejeanobia jaa jjapichojeaqui'yonaje baa jjono cuana, de. <sup>27</sup> Oja ejeanobia cuiña po'ani aje oe shequi'yonaje. Shequi'yo majje ba canaje ojjaña esecue cuana ejjaca'apejoqui'yo nequi. Ojjaña dejja ejeyojaa poqui'yonajejo poso metejeanaje. Baa iña canaje ejaacuaqui'yoyji nisho. <sup>28</sup> Jamatii Pabo jama taaame poanaje ba'a: —¡A'a oe jjaacuaqui'yoyji! Ecuana yani ojjaña tii; poqui'yo jjima —Pabo poanaje.

<sup>29</sup> Paboya esohui shajja'ajja majje equi ejjanobiaquiiji cuiñajji taaanaje jama ba'a: — ¡Cuaquiiji oe yecue! —poanaje.

Cuaquiiji iña majje ejjajejanobiaquiiji dojjo huasijje cuajicuajipoquinaje Pabo baa. Pabo ba majje ecui'oshajjajo nequinaje. Quea mete jjejojo piopionequinaje. Ojaya eba Pabo, Sinasi pea'ai Eyacuiñajjija epeeji cuana. Jamajjeya oya cuanajo quea mete nee poanaje. <sup>30</sup> Majoya ohuaya Pabo, Sinasi pea'ai ejjajejanobiaquiiji dojjojo nequi dojocuayaqui ca'yanaje. Oja equi yasijje dojo canaje. Huohui'ajja cañaquinaje jama ba'a: —Epeeji cuana, ¿aya acuae ecuea mimishi cuana cuijea caje'yo so'o? ¿Yajja po majje acuae mo poquije'yo eyahuasijje? ¿Yajja acuae po cajji cuaqui yasijje poqui'yo jjima epoggi? —acanaje ejjajejanobiaquiiji cuiñajji poaniya.

<sup>31</sup> —E'e —Pabo poanaje—, Emeshi Mese nei quea pame Jesosa Eyacuiñajjija huoojea'yo ojjaña jaahuanajji. ¡Onijje mimicue, onijje jjapee neineiquicue! ¡Ojaya esohui jayojja jama ba'ecue! Jamajjeya ohuaya miquea mimishi cuana cuijea caje'yo. Ojjaña miquea huapa pojjeama cuaa miquea equijo ba'eya jamaya ca'a cahua pea'ai. Jamajjeya mimishi cuijea'yo majje Jesosaa miqianaya ba'e tiitii mee caje'yo eyajo onijje —Pabohua acanaje.

<sup>32</sup> Majoya Pabohua, Sinasi nijjeya esohui quea pame nee Jesusajo, Emeshi Mese neiho huohui canaje ojjaña ma equijo ba'eca cuanaja eshajja'ajjajji. <sup>33</sup> Shajja'ajja majje ejjajejanobiaquiiji cuiñajjiya ecua sii Paboya edaasa, Sinasija edaasa pea'ai shacua canaje. Shacua majje shicui canaje mechashono nei. Majoya oya, ojjaña ojaya huapa pojjeama cuana nijje pea'ai Jesosa nijje jjapeequinaje. Majoya oya, ojaya huapa pojjeama cuana pea'ai Eyacuiñajjijo besa mee canaje enajo. <sup>34</sup> Majoya ohuaya Pabo, Sinasi pea'ai oja equi yasijje dojodobiaqui majje oya cuana bobia canaje. Oya, ojaya huapa pojjeama cuana pea'ai quea bihui nee nee poanaje Jesosa nijje jjapeequi majje, Eyacuiñajji nijje pea'ai.

<sup>35</sup> Majoya mecajjeahua nei Shomano emeshi mese cuaa sohuinano cuana huoojea canaje ejjajejanobiaquiiji equi yasijje jama huohuime yajji ba'a: —¡Pabo, Sinasi pea'ai pichojea'yocue!

<sup>36</sup> Jamajjeya ejjajejanobiaquiiji cuiñajjiya Pabo huohui canaje jama ba'a: —Pabo, Shomano emeshi mese cuaa miqianaya pichojea mee ca'yonaje. ¡Jjeyahua nei esecue yasijje cuayaqui'yocue! ¡Quea bei nee poquicue, Pabo, Sinasi! —acanaje ejjajejanobiaquiiji cuiñajjiya.

<sup>37</sup> —Chojja —Pabo poanaje—. Ecuana mimishi'ama. Jamatii Pinipo emeshi meseya ecuaña iña mee canaje. Jeanobiajea mee canaje pea'ai. Ojjaña ba caquinaje onaa janobajjima nei cuiasejja caqui. Ecuana ca ca Shomano dejja pea'ai. Jamajjeya jjeyahua nei ecuaña quehuajje nei huoojea sa acani. Chojja, de. Oya cuana capoe'yahua, oya tii. Shomano emeshi meseya ecuaña capichojea ca'yahua, ecuaña cadojocuayaqui ca'yahua esecue yasijje ojjañaja ebajji —Pabo poanaje.

<sup>38</sup> Jamajjeya sohuinano cuana poquinaje. Shomano emeshi mese cuana huohui cañaquinaje Paboya esohui. Shajja'ajja majje Shomano emeshi mese cuana quea mete nee nee poanaje: —E'e de, Pabo, Sinasi pea'ai Shomano dejja cuana, de. Jamaya ecuanaja ba jjima. Shomano emeshi mese etiiya ecuaña tecuea ca chana' —poanaje Pinipo emeshi mese cuana.

<sup>39</sup> Jamajjeya Pinipo emeshi mese cuana ma Pabo cuiasejja meejji epo poquinaje Pabo baa, Sinasi baa pea'ai. Quea bei nee nee huohui canaje jama ba'a: —Pabo, Sinasi, ecuaña quea yeno nee nee miqiana cuiasejja mee epojjijojo. ¡A'a che ecuaña nijje quea quene nee pojjii! ¡Jjeya quea bei cuayaqui'yocue! ¡A'a jiquio cuiñajjijo esohui huohui o'oyajji! —acanaje Pinipo emeshi mese cuaa.

Majoya oya cuaa Pabo, Sinasi pea'ai pichojea ca'yonaje. Jama acanaje ba'a: —E'e pojja'a miya pea meshi yasijje poquije esohui huohuiya —jama amajjeya huoojea canaje quea beiya.

<sup>40</sup> Jamajjeya Pabo, Sinasi pea'ai ejjajejanobiaquiiji equijo nequi poqui o'oyanaje Niniaja equi yasijje. Ojjaña Jesusaja epeeji cuana ba o'oya majje ojjaña nijje miminaje; poquinaje.

—E'e, poquia iña. ¡Jesosa nijje quea pame nee jjapeequicue mete'ama! —Pabo poanaje, Sinasi pea'ai.

## 17

### *Pabo Tesanonica cuiñajji yasijje poquinaje*

<sup>1</sup> Jamajjeya Pabo, Sinasi pea'ai Pinipojo ani poquinaje Tesanonica cuiñajji yasijje. Poquijeya Apiponi cuiñajji yejje canananaje, majoya Apononia pea'ai yejje canananaje. Tesanonica huasijje poqui majje aniñaquinaje. Jomajo Jodioja equi ojee ejjachichaquijji yani. <sup>2-3</sup> Ma equi yasijje Pabo poquinaje Sinasi nijje. Ojjaña ejomishocajji pojjaajo Jesosaja esohui huohui huicha'a huicha'a canaje. Jodio cuana nijje jjamimicuiajea nobiajeaquinaje pea'ai. Beshahua nei oe ba'ime Eyacuiñajjija esohui huohuijji yahuajo nei ba'eja esohuijjo ohuaya Tesanonica dejja cuana jjabahuejjaqui mee canaje. Jama acanaje ba'a: —Eyacuiñajjija huoojea'yo ojjaña jaahuanajji esejo quea nee poanaje. Mano'yonaje eseja mimishi cuijea'yoyji. Mano'yo majje shequi o'oyanaje. Eyacuiñajjija huoojea'yo ojjaña jaahuanajjijo, Jesosajo, eyaya huohuiaña miquianajaya eshajja'ajjajji —Pabohua acanaje.

<sup>4</sup> Pabojja esohui shajja'ajja canaje quea huiso Jodio cuaa. Jjapeequi'yonaje Jesosa nijje. Pabo nijje, Sinasi nijje pea'ai jjapeequinaje. Quea huiso Jieno cuana ma yahuajo nei Eyacuiñajjija epeeji epo cuana Pabo nijje jjapeequinaje, Sinasi nijje pea'ai. Etii cuanaja ehuanase cuana Jesosa nijje jjapeequi'yonaje pea'ai. <sup>5</sup> Jamajjeya quea huiso nee Pabo nijje jjapeequiani ba majje Jodio etii cuana quea quene poanaje. Quea huiso dejja mimishi cuana iyaa canaje. Quea huiso jjachichaqui mee canaje. Ojjaña quea quene, quea shajjaquijjo nee nee po mee canaje. Majoya ojjaña cuana Jasonija equi yasijje cuajicuajjibebenaje Pabo, Sinasi pea'ai cuiaa nisho. <sup>6</sup> E'e, oya cuaa Pabo, Sinasi pea'ai sa'ajja canaje. Chama' ba majje equi mese Jasoni bajjani iña canaje. Jesosaja epeeji cuana iña canaje pea'ai. Dojo canaje dejja etii cuana huasijje tecueaa. Janobajjima nei taaa majamajanaje jama ba'a: —Pabohua, Sinasiya pea'ai quea huiso cuana pea esohui huohui canaje. Oya cuana jiquiacua poeyanaje pea'ai esohui huohuiya. <sup>7</sup> Jasoniya ca ca oma oya cuana oja equijo ba'e mee canaje. Oya cuana ecuanaja emeshi mese etiija, Sesa bajjanija esohui shajja'ajja sa po'yo ajja. Oya cuaa ca ca huohui canaje pea emeshi mese nei yani, Jesosa bajjani —jama siajje ameya acanaje Jodio cuaa Tesanonicajo ba'e cuaa.

<sup>8</sup> Ojjaña Tesanonicajo ba'e, cuiñajji mese cuana pea'ai quea mete nee nee poanaje ma esohui shajja'ajja majje. <sup>9</sup> Jamajjeya Tesanonica mese cuaa Jasoni, oja epeeji cuana pea'ai tecuea canaje jama ba'a: —¡Pabo, Jesosaja epeeji cuana pea'ai a'a miquea equi yasijje dobi mee o'oyajji! ¡Huoojeacue oe!

Majoya Jasoni, ojaya epeeji cuana pea'ai bejjo sose quia mee canaje ejeacuaya'yoyji. Ma sosequia majje Jasoni ojaya epeeji cuana nijje poqui'yonaje.

### *Pabo, Sinasi pea'ai Benea meshi yasijje poquinaje*

<sup>10</sup> Jamajjeya ma mecajje tii Tesanonicajo ba'ecaa, Jesosaja epeeji cuaa Pabo, Sinasi pea'ai huoojea canaje Benea meshi yasijje. Benea cuiñajji yasijje poqui majje Pabo, oja epeeji cuana nijje poquinaje Jodioja equi ejjachichaquijji yasijje. Esohui huohui ca o'oyanaje. <sup>11</sup> Jodio cuana Beneajo ba'e quea pame nee, Jodio cuana Tesanonicajo ba'e jayojja jama pojjeama. Oya cuaa ca ca oe Pabojja esohui quea bihui nee nee shajja'ajja canaje, Sinasija esohui pea'ai. Majoya Eyacuiñajjija esohui yahuajo nei tehue ba neinei canaje. Jama poanaje ba'a: —E'e, Pabojja esohui e'e nei. Jamaya Eyacuiñajjija esohui yahuajo nei tehue poani e'e jojo nei —poanaje cuana.

<sup>12</sup> Jamajjeya quea huiso nei Beneajo ba'eca Jesosa nijje jjapeequi'yonaje. Quea huiso Jieno cuana jomajo ba'e pea'ai Jesosaja epeeji cuana poanaje. Jieno epona cuana quea huiso pea'ai Jesosa nijje jjapeequi'yonaje, epona quea pame nee cuana, etii cuanaja ehuanase cuana.

<sup>13</sup> Jamatii Jodio dejja cuana Tesanonicajo ba'e onaaya huohui canaje jama ba'a: —Pabohua Jesusaja esohui huohui cani Beneajo pea'ai.

Ma shajja'ajja majje oya cuana poeyanaje Benea huasijje; Pabo ocuena canaje ecuijji nisho. <sup>14</sup> Ma ba majje ca ca Jesusaja epeeji cuaa Beneajo ba'eya Pabo quehuadojo canaje bae ai yasijje. Sinasi ca ca Beneajo tii nequi'yonaje Timoteo nijje. <sup>15</sup> Jamajjeya Jesusaja epeeji cuaa Pabo dojo canaje, Atena cuiñajji yasijje besapoquinaje. Majoya Pabohua oya cuana huohui canaje jama ba'a: —¡Ecuea epeeji Sinasi, Timoteo pea'ai huoojeacue jiquiacua jjeyahua nei! Oya poeyajo eyaya ishoaje jiquiojo —Pabo poanaje.

—E'e, huohuiñaquije'yo aje ecuaaya. Poqui'ya ña —amajje oya cuana poqui o'oyanaje Benea huasijje.

#### *Atenajo Pabohua esohui huohuiqui canaje*

<sup>16</sup> Jamajjeya Pabohua Atenajo aniya ojaya epeeji ishoa'ajja canaje, Sinasi, Timoteo pea'ai. Atenajo aniya Pabohua ba canaje quea huiso nee nee eyacuiñajji nisho, epana'yo cuana bihuia cani. E'e, ojjaña ma cuiñajji ba'eca cuaa pea epana'yo bihuia caqui ba majje Pabo quea quene nee nee poanaje. <sup>17</sup> Jamajjeya Jodioja equi ejjachichaquijji yasijje Pabohua esohui huohui huicha'a huicha'a canaje. Quea huiso miminaje Jodio cuana nijje, Jodio pojjeama nijje pea'ai joya Eyacuiñajji esohui bajji cuana nijje. Ojjaña pojjaajo aqui ana quiajji equi yasijje poqui majje Pabohua esohui huohui canaje ojjaña cuana huasijje. <sup>18</sup> Majoya pea cuana Epiconeoja esohui shajja'ajjajji, Esitoicoja esohui huohuijji pea'ai onijje miminaje quea huiso. Jjamimicuijje nobiajeaquinaje. Pabo nijje mimi majje beca cuana jama poanaje ba'a: —Jiquio dejjaa Pabo bajjaniya pea esohui huohui cani, de. ¿Ajeo shai oya mimiani so'o? Ecuanaajaya Pabojaja esohui shajja'ajja jjima. Quea quehua, de.

Pea cuaa ca ca jama acanaje ba'a: —Ohuaya pea eyacuiñajji cuanajo huohui cani pojja'a, ma eyacuiñajji ecuanaja ba jjimajo —acanaje cuaa.

Pabohua Jesusajo huohui canaje jama ba'a: —Eyacuiñajjiya Jesosa emano'yoojaa shequi mee ca o'oyanaje. Jamajjeya ohuaya dejja cuana shequi mee caje'yo —Pabohua acanaje.

Ma esohui Atena cuanaja quea quehua, yahuajo shajja'ajja jjimajojo. <sup>19</sup> Jamajjeya ohuaya Pabo dojo canaje Aneopaco eyiyo huasijje esohui huohui meeya. E'e, ma eyiyo huasijje ojjaña cuana jjachichaquinaje ojjaña huohui caje esohui shajja'ajjaa. Jamajjeya Pabo poeyajo, jama acanaje cuaa ba'a: —E'e, ecua miquea esohui shajja'ajja sa poani. <sup>20</sup> Ma ehuhui'yo eyacua pojja'a. ¡Ojjaña huasijje huohui neineicue! —acanaje cuaa—. E'e, qui'ajjaya ecuanaja esohui ba jjima yahuajo. ¡Ba meecue mo oe! —poanaje.

<sup>21</sup> (E'e, ojjaña Atenajo ba'eca cuana, ojjaña joya Atena huasijje poeyani anicuaa pea'aiya ehuhui'yo eyacua shajja'ajja sa acanaje ojjaña pojjaajo. Esohui eyacua huohui canequinaje quea huiso neeya. Jamatii mimiminequinaje ojjaña cuana, chacochocho jjima poanaje.)

<sup>22</sup> Jamajjeya Pabohua Aneopaco eyiyojo nequiya ojjaña huohui canaje jama ba'a: —Dejja cuana Atenajo ba'e cuaa, ¡shajja'ajjacue jiquio eya huohuije, miquianaaya! Miquianaya quea huiso nee jjashahuabaquiani eyacuiñajji cuanajo. Jamaya ecuea eba. <sup>23</sup> E'e, eya po'ayequiequinaje. Eyaya banaje quea huiso epana'yo cuana, ma miquianaa bihuiaña. Majoya eyaya banaje pea'ai mei e'iyasohua ao ani pea'ai eyacuiñajji bihuiajji; ma miquianaaya “Bajjani ba jjima” tehuenaje. Miquianaaya maya Eyacuiñajji bihuiaña, jamatii miquianajaya oya ba jjima. Ma Eyacuiñajji neijo eyaya esohui huohuiña miquianajaya ebajji. <sup>24</sup> E'e, yahuajo nei nei Eyacuiñajjiya jiquio meshi pana ca poa. Ojjaña aqui ana cuana oja pana pea'ai, de, ojjaña tii. Oya ca ca oe Emeshi Mese nei, ojjaña huoojea'yoojji, ojjaña eyajo ani, ojjaña meshi cuanajo nequi huoojea'yoojji pea'ai. Jamajjeya Eyacuiñajji equijo ba'e ajja, eseja iya equijo ba'e ajja oya. <sup>25</sup> Eseyaya oya jaahuana ajja, de; oya esejaya eba'esahuajji pojjeama pea'ai. Chojja, ohuaya ca ca oe eseya ojjaña cuana eshe po mee ca'yani; ba'e meesahua cani. Ojjaña aqui ana cuana, bobi pea'ai ohuaya quia cani eseya. <sup>26</sup> Yahuajo nei nei Eyacuiñajjiya oe dejja pana ca



poa. Ma dejja ojjaña jeajji poa; ojjaña cuana ojjaña meshi cuanajo ba'eca cuanaja baba. Tehuetehue cuanaja baba, pea dejja cuanaja baba, ojjaña ese ejja cuanaja baba pea'ai poanaje Adana. Eyacuiñajjiya ojjaña cuana jjaba'echejjequi mee ca poa ojjaña meshi cuana huasijje. E'e, yahuajo nei Eyacuiñajjiya huohui ca poa jama ba'a: “Ma dejja cuana ba'e caje ma meshijo, pea jomajo. Ma shequiaja huisome tii pea meshi cuanajo ba'e caje cuana” aca poa Eyacuiñajjiya. <sup>27</sup> Jamaya Eyacuiñajjiya amee canaje ojjaña cuana ojo ejjashahuabaquijji, onijje ejjapeequijji. Jamaya Eyacuiñajjiya eseya sa cani ojaya epeeji pojji. Jamatii oya huesha'ama, quea chipi nee ani tii tii, ojjaña ese chipi nei ani. <sup>28</sup> E'e, yahuajo miquianajaya esohui tehuejjiya tehue ca poa jama ba'a:

“Eyacuiñajji yanijo eseya eshe nequi. Ohuaya eseya ba'e meesahua cani, chaco meesahua cani pea'ai. Oja pana jjima jjemo eseya chama' pome. Ojjaña eseya Eyacuiñajjiya bacua cuana, oja pana pea'ai”.

Jamaya yahuajo nei tehue ca poa —Pabo poanaje.

<sup>29</sup> —Jamajjeya eseya oja bacua cuana poaniya, oja pana poaniya ¿apiojji acuae oya miquianaaya ba jjima aña so'o? ¿Apiojji acuaeya Eyacuiñajji mei huo'o epana'yo, mei oshe epana'yo, mei ca'a epana'yo jayojja jama poso aña so'o miquianaaya? Chojja, Eyacuiñajji miquianajaya epana'yo jayojja jama pojjeama. ¡Meshi epana'yo nequi jayojja jama poso a'a ajji, de! <sup>30</sup> Yahuajo nei dejja cuanaja Eyacuiñajji ba jjima poa. Jamatii Eyacuiñajjiya oya cuana napa jeyojeyo jjima poa oja mimishi cuanajo. Jjeya ca ca ohuaya ojjaña cuana huohui canaje jama ba'a: “¡Miquea mimishi cuana pajea'yocue! ¡Enijje jjapeequicue! <sup>31</sup> E'e, quijje eyaya ecue huoojea'yo ojjaña jaahuanajji Jesosa huoojeaje. Ojjaña ojaya eba quea ja'a nee. Jamajjeya ohuaya ojjaña sosequia caje ma oya cuaa acanaje sosejje. Joya quea pame nee ba'enaje ohuaya quea bihui nee ba'e tiitii mee caje'yo. Mimishi cuana ca ca oe quea nee nee tii tii poaje'yo” aca poa Eyacuiñajjiya —Pabo poanaje.

—Jamajjeya Jesosa mano'yajo Eyacuiñajjiya oya shequi mee ca o'oyanaje. Jamaya ohuaya ojjaña cuana ba mee canaje jiquio esohui Jesusajo e'e nei —Pabo poanaje.

<sup>32</sup> Eyacuiñajjiya dejja cuana shequi mee ca o'oyanaje Pabo poajo shajja'ajja majje quea huio dejja cuana soa neineinaje shajja'ajja sa po ajja jjejojo. Pea cuaa ca ca Pabo huohui canaje jama ba'a: —Quijje ecuaaya miquea esohui shajja'ajjaje o'oya —acanaje cuaa.

<sup>33</sup> Majoya Pabo esohui huohuina'yo majje poqui'yonaje. <sup>34</sup> Beca cuana Pabo nijje poquinaje. Ojaya esohui shajja'ajja majje Jesosa nijje jjapeequi'yonaje. E'e, Aneopaco meshi cuiñajji Dionisio bajjani, oe epona Damanisi bajjani, pea cuana pea'ai Jesosa nijje jjapeequi'yonaje.

## 18

### *Pabo Conitio huasijje poquinaje*

<sup>1</sup> Majoya Pabo Atenajo nequi poquinaje Conitio cuiñajji yasijje ejiojjijje. <sup>2</sup> Conitiojo ohuaya Jodio dejja Aquina bajjani ba canaje. Aquina aje Jodio dejja, Ponito meshijo cuaya. Yahuajo Ponito meshijo ba'e oya poquinaje Itania meshi yasijje. Shoma cuiñajji ba'enaje. Majoya Itania meshi meseya Canio bajjaniya ojjaña Jodio cuana Shomajo ba'e huoojea canaje pea cuiñajji cuana huasijje: —Jodio cuana, Shomajo ja'a ba'ejji! ¡Poquicue miquianaya ojjaña! —acanaje Shoma meshi mese Caniohua.

Jamajjeya Aquina oja huanase Pisina nijje poeyanaje Conitio huasijje ba'eya. Jamajjeya Pabo Conitio huasijje poe majje poquinaje Aquina baa. <sup>3</sup> Pabo daqui moo equi socojji poanaje; Aquina pea'ai daqui moo equi socojji. Jamajjeya Pabohua Aquina nijjeya daqui equi cuana soco canaje ojaya equijo, Aquinaja equijo. <sup>4</sup> Ojjaña epojja ejomishocajji Pabo Jodioja equi ejjachichaquijji yasijje poquinaje esohui huohuiya. Eyacuiñajjiya esohui Jesusajo huohui canaje Jodio cuana huasijje, Jodio pojjeama cuana huasijje pea'ai. Jama acanaje ba'a: —Jesosa Eyacuiñajjiya huoojea'yo ojjaña jaahuanajji e'e jojo nei —Pabohua acanaje.

<sup>5</sup> Majoya Paboya epeeji Sinasi, Timoteo nije Masenonia meshijo nequi Benea cuiñajjijo esohui huohui ponequinaje, poeyanaje Conitio huasijje Pabo baa. Timoteo, Sinasi pea'ai poeyajo, Pabohua Eyacuiñajjija esohui Jesusajo huohui majamaja canaje Jodio oo pana huasijje: —Jodio cuana, ¡bacue! Jesosa e'e jojo nei Eyacuiñajjija huoojea'yo ojjaña jaahuanajji —Pabohua huohui tiitii canaje.

<sup>6</sup> Jamatii Jodio dejja cuana Pabo nije jjamimicuiajea nobiajeaquinaje ma esohuijo. Pabo nije mimijajinaje pea'ai. Jamajjeya quea tecue po majje Pabohua oja daqui ao jjequi'iyaja canaje. Jamaya ohuaya ojjaña ba mee canaje ma Jodio dejja cuana quea mimishi nee nee, shajjama' nei nei. Majoya Pabohua jama acanaje ba'a: —Shajjama' nei nei ca mi coma. ¡Shajjama' poanijo Eyacuiñajjija miqianaya canapa cahua! Eyaya miqianaya ojjaña Eyacuiñajjija esohui e'e nei Jesusajo huohuinaje. Jamajjeya mi jjashajja'ajjaquiajo eyaya miqianaya jeajeana'yo. Jjeyahua nei eya poquije'yo Jodio pojjeama cuana sohuihuohuiya —Pabohua acanaje.

<sup>7</sup> Jamajjeya Jodioja equijo nequi cuayaqui'yo majje Pabo poquinaje Tito Jositoja equi yasijje. Tito Eyacuiñajjija epeeji Jodio pojjeama. Ojaya equi Jodioja equi ojee ejjachichaquijji pejejo nequi che chipi nei. <sup>8</sup> Jodioja equi ejjachichaquijji cuiñajji Quisipo ca ca Emeshi Mese nei Jesosa nije jjapeequi'yonaje. Oja huapa pojjeama cuana oja equijo ba'e cuana pea'ai Jesosa nije jjapeequi'yonaje. Quea huiso cuana Conitiojo ba'e pea'ai Paboya esohui shajja'ajja majje Jesosa nije jjapeequi'yonaje. Jamajjeya pea cuaa oya cuana besa mee canaje Eyacuiñajjijo enajo.

<sup>9</sup> Majoya oe mecajje Pabo cahuijaajo, Emeshi Mese neiya Jesusaa oya jjacahuibaqui mee canaje jama ba'a: —Pabo, ¡a'a quea mete pojji! ¡Ecuea esohui a'a huohui pajea'yojji! ¡Huohui tiitiicue! <sup>10</sup> Eya minijje nequianijo, pea cuaa miya enapajji pojjeama. Esapa jajahuejjajjeaji pojjeama. E'e, jiquio cuiñajjijo ecuea epeeji quea huiso yani —jamaya Jesusaa Pabo jjacahuibaqui mee canaje.

<sup>11</sup> Jamajjeya Pabo Conitiojo nequinaje; beshahua nei becanejijji pea'ai daqui sheme epo nequinaje. Eyacuiñajjija esohui Jesusajo huohui canaje quea huiso cuana jomajo ba'ejja eshajja'ajjaji.

<sup>12</sup> Majoya dejja Canio bajjani Acaya meshi mese poanaje, Shomano emeshi meseja echacojji. Ma pojjaajo Jodio cuana quea huiso mimijaji sa poanaje Pabo nije. Jjachichaqui majje Pabo iña canaje; dojo canaje emeshi mese Canioja equi yasijje Canioja enapa meejji nisho. Esohui huohuijijjojo Pabo niñeba canaje cuaa jama ba'a: <sup>13</sup> —Jiquio dejjaja Pabo bajjanija esohui eyacua. Ecuanaja etiiquiana Moisesija esohui jayojja jama pojjeama ohuaya ojjaña cuana Eyacuiñajji bihuia mee sa acani. Moisesija esohui pajea mee sa acani pea'ai —acanaje Jodio etii cuaa.

<sup>14</sup> Pabohua beshahua nei saja'a canijo emeshi mese Caniohua Jodio cuana tecuea canaje jama ba'a: —Jodio cuana, ¡shajja'ajjacue mo! Jiquio dejja Pabo quea mimishi poani jojjemo eyaya miqianaya shajja'ajja'yome. <sup>15</sup> Jamatii oya mimishi ajjima'; eya onijje quea quene pojjeama. Miquianaya ca ca oe quea quene poani oja esohuijo. Miquea etiiquianaja esohui cuanajo ca ca oe miqianaya mimipanajjiani onijje. Jamajjeya ¡poquicue! Eyaya ehuhuijji pojjeama Paboyo. Miquea esohui o tecueajji shajja'ajja sa po'yo ajja. ¡Miquianajaya ejjashahuabaqui'yojji jayojja jama acue Paboyo! —acanaje emeshi mese Caniohua.

<sup>16</sup> Caniohua quea tecue nee po majje Jodio cuana huoojeacuayajea ca'yonaje esecue yasijje. <sup>17</sup> Esecue yasijje cuayaqui'yajo Jodio pojjeama Jodioja equi ejjachichaquijji cuiñajji Sosekene iña canaje. Cuiasejja neinei canaje Canio cojja nei. Jamatii emeshi mese Canio mimijajiqui baja sa po ajja poanaje: —Jamatii —poanaje oya.

*Pabo Antioquia huasijje poqui o'oyanaje*

<sup>18</sup> Jamajjeya Pabo oja epeeji cuana nije Conitiojo esohui huohui ponequinaje quea cahui huiso nee. Majoya ohuaya Aquina nijjeya, Pisina pea'ai nijjeya ojjaña Jesusaja epeeji cuana Conitiojo ba'e jiña ca'yonaje: —Poquia iña —amajje oya cuana poquinaje

bae sahua huasijje. Ebishe mese sosequia canaje Sinia meshi yasijje ebesapoqui'yojji, quea huesha nee. Bishe ai yasijje ani jjimahuaa Pabohua ehoojja dedejea mee canaje. E'e, ohuaya yahuajo huohui canaje jama ba'a: —Eyaya esapa dedepojjijeaje ojjañaja ebajji eyaya ma ecua eya yahuajo Eyacuiñajji nijje miminaje jayojja jama ajeyo'yonaje —Pabohua acanaje. Jamaya yahuajo nei Jodio cuaa acaninaje.

<sup>19</sup> Majoya Pabo, Aquina nijje, Pisina pea'ai nijje Epeso cuiñajji yasijje besapoquinaje bishejje. Paboya epeeji cuana Aquina, Pisina pea'ai nequinaje Epesojo. Pabo Jodioja equi ejjachichaquijji yasijje poqui majje dobiquinaje Jodio dejja cuana esohui quea pame nee Jesusajo huohuiya. <sup>20</sup> Shajja'ajja majje Jodio cuana onijje jama poanaje ba'a: —Pabo, jiquiojo ecuaa nijje nequicue! ¡Ecuana sohuihuohuicue quea cahui huiso nee! —poanaje ma Jodio cuana.

Jamatii Pabo nequi jjima poanaje. <sup>21</sup> Poqui jjimahuaa oya cuana huohui canaje jama ba'a: —Eyacuiñajjiya huoojea cajje eya poeje o'oya miquiana baa. Quijje poeje o'oya — acanaje Pabohua.

Majoya bishe ai yasijje ani o'oya majje Pabo Epesojo esohui huohui poequi besapoquinaje Jodea meshi yasijje.

<sup>22</sup> Sesanea huasijje ba'eñaqui majje Pabo etaja huasijje nequisohuaquinaje. Majoya poquinaje Jenosanena huasijje. Jenosanena bañaqui majje Jesusaja epeeji cuana ba canaje. Pabohua oya cuana huohui canaje quea bei neeya: —E'e, ¿achajja a nequiana ani so'o? —poanaje Pabo.

Majoya ma ba majje oya Jenosanenajje jjayejjequinananaje. Poqui'yonaje Atioquia huasijje ejiojjijje. <sup>23</sup> Quea cahui huiso nequinaje Atioquiajo. Majoya oya poqui o'oyanaje Janata meshi yasijje, Pichia meshi yasijje pea'ai. Ma meshi cuanajo Jesusaja epeeji cuana esohui huohui o'oya majje ojjaña quea ja'a nee jjapeequi meesahua canaje Jesosa nijje.

#### *Aponohua esohui huohui canaje Epesojo*

<sup>24</sup> Pea Jodio dejja Apono bajjani poeyanaje Epeso cuiñajji yasijje. Yahuajo Apono Anejania cuiñajji ba'e. Oya esohui huohuijji quea pame nee; Eyacuiñajji esohui etehue'yo ojaya eba nei nei. <sup>25</sup> Yahuajo onaaya oya huohui canaje esohui quea pame nee Emeshi Mese neijo, Jesusajo. Majoya ohuaya bicho'ama esohui huohui canaje e'e jojo nei Jesusajo. Jamatii Huanija, ma ona besameejji poanija esohui ca ca oe ojaya eba, Aponoja. <sup>26</sup> Ohuaya esohui huohui canaje Jodioja equi ejjachichaquijji quea huiso nee. Oja esohui shajja'ajja majje Paboya epeeji Aquinaa, oja huanaseya pea'ai Apono dojo canaje equi yasijje. Majoya ohuaya Apono ojjaña Eyacuiñajji esohui Jesusaja epoe'yojjijo huohui canaje. Yahuajo Aponoja ba jjima poanaje ojjaña Jesusaja esohui. <sup>27</sup> Quijje pishana Apono Acaya meshi yasijje poqui sa poanaje. Jesusaja epeeji cuaa Atioquiajo ba'eya oya poqui meesahua canaje. Esohui quea pame nee ojo tehue canaje Jesusaja epeeji cuana Acaya meshijo ba'ejja ebajji. Majoya Acaya meshi yasijje poqui majje Aponohua Jesusaja epeeji cuana Jesusaja esohuijo jjashahuabaqui mee canaje. Ojjaña joya Eyacuiñajjiya Jesosa nijje jjapeequi meesahua canajeya, ojaya quea jea nee neeya shajja'ajja canaje. <sup>28</sup> Jamajjeya pea cuaa ba canijo, Aponohua quea ja'a nee Jodio dejja cuana huohui canaje Jesusajo. Apono quea mimi ja'a nee poanaje. Jamajjeya ohuaya Jodio cuana mimiciuajeanobiajea ca'yonaje. Aponohua Eyacuiñajji etehue'yo huohui neinei majje ojjaña ba mee canaje Jesosa e'e jojo nei Eyacuiñajji huoojea'yo ojjaña jaahuanajji poani.

## 19

#### *Pabo Epeso huasijje poqui o'oyanaje*

<sup>1</sup> Apono Conitiojo nequijo Pabo eyiyo huasijje poquinaje, pea cuiñajji cuana huasijje. Esohui huohui capoquinaje. Majoya oya Epeso huasijje poqui o'oyanaje. Epesojo Pabohua Jesusaja epeeji cuana ma jjeya nei onijje jjapeequinaje ba cañaquinaje. <sup>2</sup> Ba majje

Pabohua oya cuana huohui'ajja canaje jama ba'a: —Epeeji cuana, ¿a'a Edojjoshahua Pame miqiana que dobiqiu'yonaje Jesosa nije jjapeequianijo?

—Chojja —saja'ame acanaje cuaa —, onajaya ecuana huohui jjima Edojjoshahua Pamejo.

<sup>3</sup> Jamajjeya Pabohua huohui'ajja ca o'oyanaje: —E'e. ¿Ajea ehuhui jayojja jama po majje onaaya miqianaya Eyacuiñajjijo besa mee canaje enajo?

Onaaya jama acanaje ba'a: —Huaniya esohuijo onaaya ecuana Eyacuiñajjijo besa mee canaje —acanaje cuaa.

<sup>4</sup> Majoya Pabohua jama acanaje ba'a: —Yahuajo mimishi cuana pajea ca'yajo, Huaniya pea cuana Eyacuiñajjijo besa mee canaje enajo. Jamaya ohuaya acanaje ojjaña ebajji enajo ebesa cuaa mimishi pajea ca'yonaje. Huaniya ojjaña cuana huohui canaje jama ba'a: “Quijje eya esohui huohuijeyo'yajo, pea dejja poeje. Oya Eyacuiñajjija huoojea'yo ojjaña jaahuanajji, Jesosa. ¡Onijje jjapeequicue!” jamaya Huaniya huohui canaje Jesusajo —Pabohua acanaje.

<sup>5</sup> Paboya esohui shajja'ajja canaje dejja cuaa. Shajja'ajja majje peaa oya cuana Eyacuiñajjijo besa mee canaje enajo Jesosa nije jjapeequianijojo. <sup>6</sup> Majoya Pabohua onaja esapa biajje eme huana majje Eyacuiñajji nije miminaje Edojjoshahua Pame ojjaña que edobiquijji. Dobiqiu majje Edojjoshahua Pameya oya cuana pea esohui mimi mee canaje. Eyacuiñajjija esohui huohui mee canaje pea'ai. <sup>7</sup> Ma dejja cuana, Jesusaja epeeji cuana, ma jjeya nei onijje jjapeequinaje ome miji becanejjijji pea'ai huisome poanaje, 12 huisome.

<sup>8</sup> Majoya Pabo poquinaje Jodio cuanaja equi ejjachichaquijji yasijje. Dobiqiu majje ohuaya Eyacuiñajjija esohui quea pame nee Jesusajo huohui canaje quea ja'a nee, mete'ama. Pea beca peejjima ba'ime ohuaya huohui huicha'a huicha'a canaje jama ba'a: —Eyacuiñajjija huoojea'yo ojjaña jaahuanajji poeyanaje. Oya, Jesosa ojjaña huoojea'yoyji quijje poaje Eyacuiñajji nije.

<sup>9</sup> Quea huiso Jodio cuana quea sapa ca'a poanaje; shajja'ajja sa po'yo ajja. Oya cuana quea mimishi poanaje. Jesosa niñeba canaje ojjaña dejja cuana ma equijo nequija eshajja'ajjajji. Jamajjeya Pabohua ma dejja cuana jeajeana'yo majje Jesusaja epeeji cuana dojo canaje pea equi yasijje, esohui huohuijji Tinano bajjanija equi yasijje. Jomajo oya cuana sohuihuohui neinei canaje ojjaña pojajajo, Pabohua. <sup>10</sup> Jamaya Pabo poanaje becanejjijji pea'ai shequijame. Jamajjeya quea huiso cuaa Asia meshijo ba'eya Emeshi Mese nei Jesusaja esohui shajja'ajja canaje. Quea huiso Jodio cuaa, quea huiso Jodio pojjeama cuaa pea'ai shajja'ajja canaje.

*Esemaja ebacua ejja cuana eshahua huoojeacuayajajji nisho poanaje*

<sup>11</sup> Eyacuiñajjija ohuaye nei ma dejja cuanaja ba jjima Pabo ameesahua canaje quea huiso. <sup>12</sup> E'e, Pabo emanojaa cuana huaquia meesahua ca'yonaje, jjaajaqui meesahua ca'yonaje. Eshahua dejjajo nequi huoojeacuayajea mee ca'yonaje pea'ai. E'e, pea cuaa Paboya eja sisi cuana, pañoeno dojo canaje emanojaa cuana huasijje. Maya emanojaa cuana biajje huana canaje cuaa ehuaquia mee'yoyji. Quea aja nee po'yonaje ojjaña cuana. Eshahua cuana, o niñepoqui meeji poani pea'ai Jesusaa Pabo huoojeacuayajea mee canaje Paboya eja sisi niñepoqui biajje iya cajo. <sup>13</sup> Jamajjeya Jodio cuaa pea'ai poquinananiya eshahua cuana dejja niñepoqui meeji poani ecuaya meequi'yoyji nisho acanaje. Oya cuana ca ca Jesosa nije jjapeequi jjima. Jamajjeya eshahua cuana ohuaya jama huohuime acanaje ba'a: —Eshahua cuana, ecuanaaya Pabo jayojja jamaa miya huohuiaña. Emeshi Mese neiya Jesusaa miqianaya huoojeacuayajea mee cani. ¡Jjeyahua nei cuayaqui'yocue! —acanaje Jodio cuaa.

<sup>14</sup> E'e, Jodio Eyacuiñajji nije emimijji etii Esemaja bajjanija bacua ejja cuaa, me oeje beca cuaa eshahua cuana jamaya ehoojeacuayajea meeji nisho acanaje. <sup>15</sup> Eshahuaa ca ca Esemaja bacua ejja cuana jama acanaje ba'a: —Jesusa ecuea eba quea ca'a nee nee, Jesusaja epeeji Pabo ecuea eba pea'ai. Ecuea miya eba ca'a'ama, jamatii —acanaje eshahuaa.

<sup>16</sup> Majoya jiquio eshahuaa dejja niñepoqui Esemaja bacua ejja cuana iña mee canaje, cuiajeabichajea mee ca'yonaje, onajaya daqui isajea ca'yonaje pea'ai. Jamajjeya Esemaja bacua ejja cuana esecue yasijje cuayaquinananaje daquima', quea nee pea'ai.

<sup>17</sup> Ma shajja'ajja majje ojjaña Jodio cuana, Jodio pojjeama cuana pea'ai Epesojo ba'e quea ajjajja nee nee poanaje jama ba'a: —E'e, ee. Jesusaa ohuaye nei eshahua cuana huoojeacuayajea cani. Oya quea ca'a nee nee poani. Ohuaya ojaya epeeji nei Pabo eshahua cuana huoojeacuayajea meesahua cani —jamaya Emeshi Mese nei Jesosa bihuia canaje quea huiso cuaa.

<sup>18</sup> Majoya Jesusaja epeeji cuana quea bicho nee poanaje oja mimishi cuanajo, eshahua cuana nijje jjapeequianijo pea'ai. Jesusaja epeeji cuana jjachichaqui'yo majje mimishi cuana huohui canaje; quea bicho poanaje ojjaña: —¡Ecuana mimishi cuana pajea meesahua'yocue! —acanaje cuaa.

<sup>19</sup> Joya yahujajo edasijji poanajeya, eyamiquecua cuaa pea'aiya ojaya esohui etehue'yo ejjadasiaquijji cuana, eshahua nijje acanijo pea'ai chicha'yo majje dahujajea ca'yonaje. Ojjaña pea cuaa ba canaje. Ma papeni etehue'yo cuana quea nahue nee nee, quea sose huiso nee nee poanaje. (E'e, quea sose huiso nee, quea huiso nee nee huaca sosejje jayojja poanaje, 100 huaca yahue sosejje jayojja poanaje.) <sup>20</sup> E'e, quea huiso cuaa, quea huiso meshijo ba'eca cuaa Eyacuiñajji esohui Jesusajo shajja'ajja canaje. Quea huiso nee Emeshi Mese nei Jesusaja epeeji poanaje.

*Epesojo ba'e cuana Pabo nijje quea quene poanaje*

<sup>21</sup> Majoya Pabohua jjashahuabaqui majje jama poanaje ba'a: —E'e, Masenonia meshi yasijje eya poquije o'oya, Acaya meshi yasijje pea'ai ojjaña Jesusaja epeeji cuana baa. Majoya eya Jenosanena huasijje poqui o'oya sa poani pea'ai. Jenosanena huasijje poqui majje eya poqui sa poani Shoma cuiñajji yasijje pea'ai, e'e jojo nei —Pabo poanaje.

<sup>22</sup> Jamajjeya Pabohua ojaya echacosahuajji cuana Timoteo, Enasato pea'ai huoojea canaje Masenonia meshi yasijje. Pabo ca ca nequinaje Epesojo, Asia meshijo. <sup>23</sup> Pabo oe nei nequijo oja huohui'yo Jesusajo quea huiso cuana Epesojo ba'e quea quene nee nee poanaje onijje. <sup>24</sup> E'e, jama poanaje ba'a: oe dejja Demetio bajjani mei oshe pana nejji Epesojo ba'enaje. Ohuaya o chacosahuajji cuana nijjeya quea huiso epana'yo sisi cuana Diana nisho bajjani ne canaje. Maya Epesojo ba'e cuaa bihuia canaje, eyacuiñajji poso acanaje cuaa. Demetiohua, o chacosahuajji cuaa pea'ai Diana nisho quea huiso ne canaje. Ne majje quea huiso ejjeshejji jjeshe canaje Diana nisho sosejje. <sup>25</sup> Jamajjeya Demetiohua o chacosahuajji cuana iyaa canaje o que. Pea cuana o jayojja jama epana'yo nejji epo iyaa canaje pea ai. Jjachichaquiyajo Demetiohua oya cuana huohui canaje jama ba'a: —Epeeji cuana, ¡shajja'ajjacue mo! Ecuanaaya epana'yo sisi ne majje quea huiso bejjo jjesheaña epana'yo cuana sosejje. Jamaya miqúanajaya eba. <sup>26</sup> Miquea eba Paboya esohui pea'ai. Ohuaya jama acani ba'a: “Epana'yo cuana dejjaja pana, Eyacuiñajji pojjeama. ¡A'a epana'yo cuana bihuiajji! ¡Eyacuiñajji oe nei bihuiajji!” Pabohua acani. Paboya esohui shajja'ajja majje quea huiso cuana Epesojo ba'e, Asia meshijo ba'e pea'ai epana'yo cuana jjeshe maja sa po'yo ajja poanaje. <sup>27</sup> E'e pojja'a ojjaña eseja nejo mimijaji caje. Epana'yo cuana bihuia pajea caje'yo pojja'a. Epana'yo quea quemo nee Diana bajjani bihuia pajea caje'yo, oja equi yasijje poqui pajeeje. Jjeya ojjaña cuaa Asia meshijo ba'eya, ojjaña meshijo ba'eca cuaa pea'ai epana'yo Diana bihuia cani, eyacuiñajji poso acani Diana —jamaya huohui canaje Demetiohua. Jamatii ojaya esohui sijje, de.

<sup>28</sup> Demetioja esohui shajja'ajja majje ojjaña cuana quea quene nee nee poanaje. Jama taaame poanaje ba'a: —Diana eyacuiñajji jayojja quea pame nee. Epesojo enequi oya —jamaya taaa neinei nequinaje ojjaña.

<sup>29</sup> Jamajjeya ojjaña cuana Epesojo ba'e cuajicuajije benaje taaquii baa. Ojjaña quea shajjaquijjo nee nee, quea mase nee nee poanaje. Paboya epeeji iña majje dojocuajijea ca'yonaje equi esohui huohui cani yasijje. Ma epeeji cuana Jayo bajjani, pea Anitaco. Oya cuana Masenonia meshijo ba'e. <sup>30</sup> Shajja'ajja majje Pabo poqui sa poanaje dejja quea

quene yasijje mimiya. Jesusaja epeeji cuaa ca ca oya nahue canaje. Jama poanaje ba'a: —Chojja, Pabo, ¡a'a poquijji jocuama! Miya shajja'ajja jjima acaje cuaa. Cuia ca chana' cuaa mi —acanjaje.

<sup>31</sup> Pea cuana emeshi meseja meshi cuiñasahuajji cuana Asia meshijo ba'e Pabojja epeeji cuana poanaje. Ohuaya esohui tehue majje huoojea canaje Pabo que jama ba'a: —¡A'a poquijji miya esohui huohui cani yasijje! —jamaya tehue canaje Pabojja epeejiya, emeshi meseja echacojji cuaa.

<sup>32</sup> Dejja cuana ma equijo ejjachichaqui nequi quea shajjaquijjo nee nee taaa canaje. Quea huiso cuana oe esohui taaa canaje. Pea cuana ca ca pea esohui taaa canaje. Quea huiso cuana jamatii jjachichaquinaje. Jama poanaje ba'a: —¿Ajeo acuae ojjaña taaani? ¿Ajeo jjachichaquinaje eseya so'o? —acanjaje.

<sup>33</sup> Majoya Jodio cuaa Anejano huoojea canaje; ojjaña ejjatanacuaquijji ehui dojojji nequinaje. Onaa Anejano taaa canaje; huohui canaje ojjaña ehuhuijji. Jamajjeya Anejanohua tanacua canaje; eme' jeasohua majje jama acanjaje ba'a: —¡Quea bei pocue! ¡Jayo, Anitaco pea'ai jja oe pichojea'yocue jja oe, de! ¡A'a jja cuiajji! —acanjaje Anejanohua.

<sup>34</sup> Jamatii oya Jodio pea'ai ba majje ojjaña cuana taaa o'oyanaje. Taaa tiitii nequinaje jama ba'a: —¡Diana eyacuiñajji jayojja quea pame nee Epesojo nequi. ¡Oya bihuicue! —Jodio cuana epana'yo bihuia ajja neinei jjejojo jamaya taaa canaje Epeso dejja cuana.

<sup>35</sup> Quijje nei Epeso cuiñajji meseya ojjaña tanacua canaje. Majoya jama acanjaje ba'a: —Dejja cuana Epesojo ba'e, ¡shajja'ajjacue mo! Ojjaña cuanaja eba eseyaya Epesojo ba'eya epana'yo Dianaja equi quea quemo jaahuanaña. Ojjañaja eba yahuajo nei oe mei eyajo nequi oquea poa jiquio meshi yasijje. Ma mei ecuanajaya eyacuiñajji Diana pojji aca poa, ma mei eyajje oque. <sup>36</sup> Jamajjeya ¡a'a quea quene pojji, quea shajjaquijjo a'a pojji! ¡A'a quea mimishi pojji! <sup>37</sup> E'e, miquianaaya jiquio dejja cuana iñanaje; jiquiacua jjequinaje. ¿Apiojji acuaeya jiquiacua yenaje so'o? ¿A'a cuae jja oe siipojji so'o? Chojja, oya cuanaja aquiana Dianaja equijo sii jjima. Epana'yo Dianajo jjaniñebaqui jjima pea'ai. <sup>38</sup> Jamajjeya Demetiohua, o chacosahuajji cuaa pea'ai jiquio dejja cuana niñeba sa acanijo, emeshi mese yasijje cadojo cahua. Emeshi mese chaco canijo cahuohuiqui cahua. Majo tii cajjaniñebaquiahua cuana. <sup>39</sup> Jamajjeya miquianaya jiquio dejja cuana nijje mimi o'oya sa poanijo ¡emeshi meseja equi yasijje mimiqui o'oyacue quijje! ¡Emeshi meseja esohui jayojja jama pocue! ¡A'a quea shajjaquijjo pojji! ¡A'a quea quene nee pojji! <sup>40</sup> E'e, onaaya Shomano emeshi mese etii huohui ca chana'. Onaa oya huohui cajo, emeshi mese etii ecuaña nijje quea quene po chana': “¿Apiojji quea shajjaquijjo poani so'o? ¿Apiojji ecuea esohui jayojja jama ajjima', e que poe jjimaa?” ohuaya eseya aca chana'. Jamaya Shomano emeshi meseya acajo, ¿yajja sohui saja'ame aje so'o? —acanjaje Epeso cuiñajji meseya.

<sup>41</sup> Jamajjeya jama huohui majje ohuaya ojjaña huoojea canaje equi cuana huasijje. Majoya dejja e'iña nequi pichojea ca'yonaje.

## 20

### *Pabo poqui o'oyanaje Masenonia meshi yasijje, Acaya meshi pea'ai yasijje*

<sup>1</sup> Majoya ojjaña cuana equi yasijje poqui'yo majje, quea shajjaquijjo popajea'yo majje Pabohua Jesusaja epeeji cuana iyaa canaje. Poeyanaje. Pabohua oya cuana quea bei huohui canaje jama ba'a: —E'e, eya poquije o'oya Masenonia meshi yasijje esohui huohui o'oyaa. Jamatii Jesosa miquiana nijje nequi, miquiana jaahuanajji. ¡A'a quea mete pojji! Poquia iña —amajje Pabo poqui o'oyanaje Masenonia meshi yasijje.

<sup>2</sup> Masenonia meshijo poquijjeya quea huiso esohui Jesusajo huohui canananaje ojjaña Jesusaja epeeji cuana huasijje. Ojjaña quea bihui nee po meesahua canaje. Jomajo esohui huohui'yo majje Pabo Acaya meshi yasijje poqui o'oyanaje. <sup>3</sup> Acaya meshijo oya nequinaje pea beca peejjima ba'ime. Majoya oya jjashahuabaquinaje Sinia meshi yasijje ebesapoquijji bishe aijo. Sinia meshi yasijje ebesapoquijji nisho poaniya Pabohua

shajja'ajja canaje Jodio dejja cuaa oya ishoa'ajja cani equecua'yojji. Jamajjeya huacuaya poqui o'oyanaje Masenonia meshi yasijje, ejiojjijje. <sup>4</sup> Jesusaja epeeji quea huiso cuana Pabo nijje poquinaje. Oya cuana ma bajjani ba'a: Pinisija bacua ejja Sopatene, ma Beneajo ba'e, Anitaco, Seconino pea'ai, ma Tesanonicajo ba'e; pea Jayo ma Debejo ba'e; pea Timoteo; pea Tiquico, Topimo pea'ai ma Asia meshijo ba'e. Mahuiso poquinaje Pabo nijje Masenonia meshi yasijje. <sup>5</sup> Majoya beca cuana besapoquinaje Toasa huasijje. Toasajo onaaya Pabo, ecuanaya pea'ai ishoa canaje. <sup>6</sup> Ecuana Pabo nijje ejiojjijje poqui o'oyanaje Pinipo cuiñajji yasijje. Pinipojo nequinaje. Majoya Jodio cuana jjachichaqui majje ojee ijia'ijjianaje quea bihui nee epojji. Pahui shejee mee jjima ijianaje ecuaaya. Ojee pahui ca'a ijia majje ecuaana Pinipojo ani bishe ai yasijje ani'yo majje besapoquinaje. Me oejje cahuime po majje ecuaana ba'eñaquinaje Toasajo. Toasajo nequinaje me oejje becanejijji pea'ai cahuime, <sup>7</sup> cahuime.

*Toasajo nequiya Pabohua esho'i shequi mee ca'yonaje*

<sup>7</sup> Ebonei epojja ejomishocajjijo, nomicojo, sinecua Pabo Jesusaja epeeji cuana nijje jjachichaquinaje Jesusaja bobi ijiajji. Mecajjeahua nei poqui sa poanaje. Pabo quea huiso sohuihuohui poequi tii jjamecashonoquinaje. <sup>8</sup> Ecuana jjachichaquinaje equi ejama coo eya equecuayijjijo. Quea misi nee poanajo, cuaquijji quea huiso cuana dedonaje ecuaaya. <sup>9</sup> Jomajo oe esho'i Eotico bajjani equi jiyo huejjajo anioquenaje. Pabohua esohui huohui majamaja caquijo, esho'i quea cojja cahui nee nee poanaje. Jiyo huejjajo cahui'yo majje quea ao oquequi'yonaje meshi yasijje. Oya baqui majje: —E'e, ee, mano'yonaje chahua, chama'yo tii —taananaje.

Onaaya oya dojo canaje equi yiye dojjo huasijje emano'yojaa. <sup>10</sup> Jamajjeya Pabo jaoquequinaje esho'i baa. Esho'i huojje canaje Pabohua. Jama acanaje ba'a: —¡A'a quea yeno pojji! ¡Oya eshe, emano'yo pojjeama! —Pabohua acanaje.

<sup>11</sup> Majoya Pabo jaasohuaqui o'oyanaje equecuayijji yasijje. Ojjaña ecuaaya Emeshi Mese nei Jesusaja bobi ojee ijianaje. Majoya Pabo pea cuana nijje mimi o'oyanaje. Jamatii esohui huohui poequi tii jjapojjaquinaje. Mecajjeahua nei eshequi jaasohua pishanajo Pabo poquinaje.

<sup>12</sup> Majoya esho'ija epeeji cuaa oya dojo canaje equi yasijje. Oya eshe o'oyajo, quea aja nee neejo ojjaña quea bihui nee poanaje.

*Pabo besapoquinaje Mineto huasijje*

<sup>13</sup> Majoya Pabohua ecuaana huoojea canaje Asoni cuiñajji yasijje: —E'e, ¡miquianaya bishe oe dojo huiocue Asoni yasijje! ¡Jomajo ishoañaquicue ña! Eya jjeya nei poquije ejiojjijje Asoni yasijje. Majoya mo bishe yasijje aniquije —poanaje.

<sup>14</sup> Jamajjeya Pabo Jesusaja epeeji cuana nijje ejiojjijje poquinaje Asoni yasijje. Nequiñaqui majje oya bishe ai yasijje aninaje ecuaana nijje. Majoya ecuaana poquinaje Mitinene cuiñajji yasijje cahuiya. <sup>15</sup> Mitinenejo cahui majje mecajjeahua nei ecuaana bisheje besapoqui o'oyanaje. Oe cahuime po majje ecuaana ba'eñaquinaje Quio nasi chipi nei yasijje. Jomajo cahuiñaquinaje Samosi nasijo. Pea cahuijo ba'eñaquinaje Mineto huasijje. <sup>16</sup> Majoya Pabohua Epeso yeje canaje, Asia meshijo quea cahui huiso nequi sa po ajja poanaje. Oya poquicuaajicuaaji sa poanaje Jenosanena huasijje. Ba'eñaqui sa poanaje Jodioja bobi chichajji shejo, Petecote shejo. Ojjaña Jodio cuana ma pojja cuanajo quea bihui nee ojee ijia'ijjiani ojjaña bobi chicha'yo majje. Ma pojajoya Pabohua Jenosanenajo Eyacuiñajji bihui sa acanaje.

*Pabohua pea esohui esohui huohuijji Epesojo ba'e huohui canequinaje.*

<sup>17</sup> Jamajjeya Minetojo ba'eñaqui majje Pabohua Jesusaja esohui huohuijji cuana Epesojo ba'e iyaa canaje. <sup>18</sup> Poeyajo Pabohua oya cuana jama huohuime acanaje ba'a: —Epeeji cuana, eya Asia meshi yasijje poeyajo, miquianaaya eya banaje quea pame nee chacoconaje; ecuea esohui miquianaaya shajja'ajjanaje pea'ai. <sup>19</sup> Miquea eba eya Emeshi Mese nei Jesosa Quitoja echacojji poani. Jesusajo eya miminaje quea pame

nee. Eya quea miminaa pojjeama. Miquea eba eya pa neineinaje Jesusaja epeeji quea mimishi ba'yanijo. Miquea eba pea'ai Jodio etii cuaa eya quecua sa acanijo ejo quea camaja poanaje. <sup>20</sup>E'e, eyaya ojjaña Jesusaja esohui mete'ama huohui majamajanaje equi cuana huasijje, ojjaña jjachichaquiajo pea'ai. Ojjaña ba meesahuanaje. Maya miquea eba. <sup>21</sup>E'e, eyaya ojjaña huasijje esohui huohui neineinaje Jodio cuana, Jodio pojjeama cuana huasijje pea'ai. Ojjaña jama anaje ba'a: “¡Miquea mimishi cuana pajea'yocue! ¡Eyacuiñajji esohui shajja'ajjacue! ¡Jesusa nijje jjapeequicue e'e jojo nei! Oya Emeshi Mese nei” eyaya anaje. <sup>22</sup>Jjeyahua eya Edojjoshahua Pameya huoojea caje Jenosanena huasijje. ¿Yajja shai Jodio cuaa eya acaje so'o? Ecuea ba jjima. <sup>23</sup>Jamatii Edojjoshahua Pameya eya ba mee cani jama ba'a: “Pea cuaa miya iña caje o'oya. Ejjajejanobiaquijji yasijje miya jeanobia caje'yo. Mijo quea camaja poaje. Miya quea nee nee poaje” jamaya ojjaña cuiñajji yasijje poqui majanijo Edojjoshahua Pameya eya ba mee cani —Pabohua acanaje—. <sup>24</sup>E'e, onaaya eya sapa jajahuejjajea ca chana'. Jamatii eya mete'ama. Emeshi Mese nei, Jesusa e huoojea'yojji poani. Ojjaña ojaya ehuohui jayojja jama eya a sa poani. Ohuaya eya huoojea canaje esohui quea pame nee Jesusaja huohuiya jama ba'a: “Eyacuiñajjiya ojjaña cuana quea jea nee acani. Ojjaña Jesusaja epeeji cuanaja mimishi cuana cuijea ca'yani. Oya cuana ba'e tiitii mee caje'yo eyajo. Pabo, ¡jamaya huohuime acue!” eya acanaje Jesusaa. <sup>25</sup>Jamajjeya eyaya ojjaña miquianaya huohuinananaaje Jesusajo: “Jesusa Eyacuiñajji nijje ojjaña huoojeajji oe nei poaje'yo” eyaya anaje. Jjeyahua nei ca ca eya poquije'yo. Ecuea eba miquianajaya eya eba o'oyajji pojjeama. <sup>26</sup>Jamajjeya jjeyahua nei eyaya miquianaya e'e jojo nei huohuiaña jama ba'a: E'e pojja'a beca cuana miquiana nijje nequi shajja'ajja sa po'yo ajjajo cuaqui yasijje poquije'yo; cuaquijo nequi tiitije'yo mano'yo majje. Jamatii eyaya esohui huohuinaje ojjaña cuana huasijje. Onaya mimimimi mee ajja jama ba'a: “Ecuea Jesusaja esohui shajja'ajja jjima poanaje. Pabojja eya huohui jjima”. Chojja, ehuohui poanaje.

<sup>27</sup>—E'e, eyaya ojjaña Eyacuiñajji esohui huohui neineinaje miquianajaya eshajja'aj-jajji. <sup>28</sup>Jamajjeya ¡miquianaya oe jjajaahuanaquicue! ¡Jesusaja epeeji cuana jaahuanacue quea pame nee pea'ai! E'e, Edojjoshahua Pameya mi huoojeajji poaniya miquianaya Jesusaja epeeji jaahuanajji po mee canaje. Jamajjeya ¡oya cuana jaahuana neineicue! Eyacuiñajjiya oja Bacua Ejja oe nei huoojea canaje oja epeeji epojjiyo mano'yohua. Eyacuiñajjiya ojaya epeeji cuanaja mimishi cuijea ca'yonaje. Jesusaja epeeji cuanaja mimishi cuana cuijea ca'yajje oja bacua cuana po mee canaje, Eyacuiñajjiya. <sup>29</sup>Jamatii ecuea eba eya poqui'yajo beca cuana, eshahuaja epeeji cuana quea mimishi poaje. Jesusaja epeeji cuana poquiquehua mee sa acaje. Jesusaja esohui pajea mee sa acaje pea'ai. E'e, jiquio ecua ibia quea maseya ñajajja poquiquehuajejanana mee cani, chama'yo tii po mee cani jayojja jama eshahuaja epeeji cuaa Jesusaja epeeji cuana aca chana'. <sup>30</sup>Jjeya beca cuana miquiana nijje nequi minijje jjapee nishoquije. Quijje ohuaya Jesusaja epeeji cuana siajje acaje; Eyacuiñajji esohui e'e nei huohui ajja. Jesusaja epeeji cuana oe pojji poquiquehuaje ma siajjepojji cuana nijje. <sup>31</sup>Jamajjeya ¡jjashahuabaquicue oe! ¡Ecuea esohui a'a pajea'yojji miquianaaya! E'e, pea beca peejjima shequiajame eyaya miquianaya esohui huohui neineinaje epojjajo, mecajje pea'ai huohui majamajanaje eyaya. Huohuipoquia majje eyaya niñeshe'apoquianaje. Miquianajo eya quea yeno popoquinaje —Pabo poanaje.

<sup>32</sup>—Jjeya eya poquije'yo. Eyacuiñajji nijje miquianajo mimije jama ba'a: “Eyacuiñajji, ¡Jesusaja epeeji cuana jaahuanacue! ¡Miquea esohui a'a pajea mee'yojji! Miquea esohuijo oya cuana miquea epeeji quea ja'a nee poaje'yo. Jamajjeya miquea epeeji quea ca'a nee poaje. ¡Oya cuana quea pame nee acue! Jamaya miyaya aña ojjaña Jesusaja epeeji cuanajo. Eyajo minijje ba'e tiitii meeje'yo pea'ai. Jamaya ecuea eba”. E'e, jamaya eya Eyacuiñajji nijje mimiani miquianajo.

<sup>33</sup>—E'e, miquianajaya eba pea'ai onajaya daqui cuana, onajaya bejjo pea'ai ecuea jea ba jjima. <sup>34</sup>Chojja, ecuea bobijo, ojjaña ecuea eba'ejjiyo pea'ai eya chacochocho nequinaje. Ecuea epeeji cuana enijje poquiani eyaya bobianaje pea'ai. Maya miquianajaya eba.



<sup>35</sup> ¡Jamaya eyaya miqúanaya ba meenaje ojjaña quea pame nee chacocue! ¡Aema' ba'e meesahuacue pea'ai! Jamajjeya ¡jamaya acue miqúanaya! ¡Emeshi Mese nei Jesosaja esohui pea'ai a'a pajea'yojji! Jama ba'a: “Pea cuana aquiana quia majje miya quea bihui poaje. Joya miya aquiana quiaña quea bihui pishana poaje” jamaya Jesosa poanaje — Pabohua acanaje.

<sup>36</sup> Majoya Pabo, ojaya epeeji cuana pea'ai Eyacuiñajji nijje ojee miminaje ecui'oshajjajo nequi majje. <sup>37</sup> Paboya epoqui'yojji ojaña ojaya epeeji cuana pa canaje. Pabo cuiapashi ca'yonaje, poquije'yo ba canaje. <sup>38</sup> Quea yeno poanaje Paboya esohuijo: —E'e de, ecuanaja Pabo eba o'oyajji pojjeama pa jiquio meshijo —oya cuana poanaje.

Jamajjeya ojaya epeeji cuana quea yeno poanaje. Ojaña cuana onijje bishe yasijje poquinaje. Besapoquije'yo ba canequinaje.

## 21

### *Pabo Jenosanena huasijje poqui o'oyanaje*

<sup>1</sup> Jamajjeya bishe ai yasijje ani majje ecuanaja epeeji cuana jeana'yonaje. Epi nei besapoquinaje Cosi nasi yasijje cahuiya. Mecajjeahua nei besapoqui'yonaje Shona nasi yasijje. Majoya besapoquinaje Patana cuiñajji yasijje. <sup>2</sup> Patanajo ecuaaya pea bishe ai sa'ajjanaje Penisia meshi yasijje ebesapoquijji. Bishe ai jaa ba majje ecuan nequisohuaquinaje bishejo aninaje. Majoya besapoqui o'oyanaje. <sup>3</sup> Besapoquijjeya, Chipe nasi chipi nei besapoquijjeya meshi banaje. Chipe nasi ai ebiane mijiye yejjenaje Sinia meshi yasijje besapoquijjeya. Tino cuiñajji bañaqui majje ba'eñaquinananaje. Ebishe ai meseya aquiana quea huiso nee bishejo ani jeasohuaqui canaje etaja huasijje. Pabo ecuanaja nijje etaja huasijje nequisohuaquinaje. <sup>4</sup> Tino huasijje poquinaje Jesosaja epeeji cuana baa. Ba majje ona nijje nequinaje me oeje becanejjijji pea'ai cahuime, 7 cahuime. Edojjoshahua Pameya oya cuana Pabo huohui meesahua canaje jama ba'a: —¡Jenosanena huasijje poquijajo Jodio cuaa miya iña ca chana! Jamajjeya ¡a'a jocuama poquijji, Pabo! —acanaje cuaa.

<sup>5</sup> Jamatii bishe ai apoa poajo Pabo ecuanaja nijje poquinaje bishe yasijje. Jesosaja epeeji cuana, yahue cuana, ehuanase cuana, esho'iquiana pea'aiya bishe ai yasijje poquinaje ecuanaja nijje Pabo poquije'yo baa. Meshijajji, bae sahuajo Eyacuiñajji nijje ojee miminaje ecui'oshajjajo nequi majje. <sup>6</sup> Majoya ecuanaja: —E'e, besapoquia iña —amajje bishe aijo ani o'oyanaje ebesapoquijji Ojaña Jesosaja epeeji cuaa Pabo poquije'yo ba canequinaje. Majoya oya cuana equi cuana huasijje poqui o'oyanaje.

<sup>7</sup> Jamajjeya Tino cuiñajji jeana'yo majje ecuanaja besapoquinaje Tonemaina cuiñajji yasijje. Ba'eñaqui majje Jesosaja epeeji cuana jomajo ba'e baquinaje. Ojaña nijje miminaje quea bihui nee. Ona nijje nequinaje oe cahuime. <sup>8</sup> Majoya mecajjeahua nei ecuanaja poqui o'oyanaje bishe yasijje. Besapoqui o'oyanaje Sesanea huasijje. Ba'eñaqui majje esohui huohuijji Penipe bajjanija equi yasijje jaasohuaquinaje; onijje ba'enaje. Oya Penipe yahuajo nei Jesosaja epeeji cuaa Jenosanenajo ba'eya babaca canaje me oeje becanejjijji pea'ai, 7 pea cuana nijje Eyacuiñajjija echacojji epojji, e'ahuemano bobi quiajji. <sup>9</sup> Penipeja ebeca pee pea'ai eacuase ahuema'ani, bii ani oja equijo ba'e. Oya cuana Eyacuiñajjija esohui huohuijji pea'ai poanaje. <sup>10</sup> Pabo, Penipeja equijo oe pojji cahuime nequiyajo, Eyacuiñajjija esohui huohuijji poeyanaje Acabo bajjani, ma Jodea meshijo ba'e. <sup>11</sup> Pabo que poe majje Acabohua Paboya ejjacomayijji quijji jjeshe majje jjajiojji jeyoqui'yonaje, eme' cuana pea'ai. Majoya Pabo huohui canaje jama ba'a: —Edojjoshahua Pame enijje jama poanaje ba'a: “Jiquio ejjacomayijji quijji mese Jenosanena huasijje poqui'yajo jamaya Jodio cuaa oya jeyo caje'yo. Jeyo majje oya quia caje Jodio pojjeama huasijje; quea nee nee poaje” poanaje —Acabohua acanaje.

<sup>12</sup> Acaboya esohui shajja'ajja majje ecuaaya, pea epeeji cuaa jomajo ba'eya pea'ai Pabo pa'aniya tii huohuinaje jama ba'a: —Pabo ¡a'a oe poqui'yojji Jenosanena huasijje! Jodio cuaa miya iña ca chana! —poanaje.

<sup>13</sup> Jamatii Pabohua ecuana jama acanaje ba'a: —¿Apiojji acuae quiana pani so'o? ¡A'a eya quea yeno po meeji! Jodio cuaa Jenosanenajo ba'eya jeyo cajje mo mete'ama poaje. Emeshi Mese nei Jesosa nijje jjapeequianijojo onaa quecua ca'yajje, jamatii eya mete'ama —Pabohua acanaje.

<sup>14</sup> E'e, ecuaaya Pabo nahue'ajjanaje: —¡A'a poqui o'oyajji! —amajamaja'ajjanaje.

Jamatii Pabo jama poanaje ba'a: —Chojja, eya jocuama capoquiahua. Jamaya yahuajo Edojjoshahua Pameya eya acanaje.

Jamajjeya ecuana jama poanaje ba'a: —E'e Pabo, ¡Eyacuiñajji ejjashahuabaquijji jayojja jama acue! —ecuana poanaje.

<sup>15</sup> Jamajjeya quea cahui huiso pishana Penipeja equijo ani majje ecuanaja aquiana cuana bio majje: —Epeejji cuana, poqui'ya iña —po majje ecuana Jenosanena huasijje poqui'yonaje ejiojjijje. <sup>16</sup> Jesosaja epeejji cuana Sesaneajo ba'e ecuana nijje poquinaje. Jenosanenajo nequiñaqu'i'yajo ohuaya ecuana dojo canaje Masonija equi yasijje ba'eya. Yahuajo Masoni Chipe nasijo ba'enaje. Oya Jesosaja epeejji poanaje yahuajo nei.

#### *Pabo poquinaje Satiaco baa o'oya*

<sup>17</sup> Ecuana Jenosanena huasijje poe'yajo, Jesosaja epeejji cuana ecuana ba majje quea bihui nee poanaje. <sup>18</sup> Mecahuajje Pabo ecuana nijje poquinaje Satiaco baa. Jomajo ojjaña Jesosaja epeejji etii cuana, esohui huohuijji cuana pea'ai jjachichaquinaje. <sup>19</sup> Pabo ojjaña nijje esohui quea bei nee miminaje. Ohua chaco canajejo huohui canaje jama ba'a: —Eyacuiñajjiya eya esohui quea pame nee Jesosajo Jodio pojjeama cuana huasijje huohui meesahua canaje. Eyacuiñajjiya ohuaye nei ma dejjaa ajjima acani eya ameesahua canaje Jesosaja esohui huohuiañajo —Pabohua acanaje.

<sup>20</sup> Jesosaja epeejji etii cuaa Paboya esohui shajja'ajja majje Eyacuiñajji bihuia canaje. Pabo jama acanaje ba'a: —Jamaya quea pame nee, epeejji. ¡Bacue! Jjeyahua nei quea huiso nee nee, quea huiso mil Jodio cuana Jesosa nijje jjapeequiani. Jamatii Jodio cuaa ojjaña Jesosaja epeejji cuana huohui cani jama ba'a: “Moisesija etehue'yo jayojja jama acue!” acani. <sup>21</sup> Pea cuaa oya cuana quea huiso siajje acani mijo. Jama acani ba'a: “Pabohua Jodio cuana Jodio pojjeamaja meshijo ba'e huohui cani jama ba'a: —¡Moisesija etehue'yo jayojja jama a'a ajji! ¡Jodio cuanaja etiiquianaja ehuohui'yo jayojja jama a'a pojji! ¡Miquianajaya bacua a'a cuiishasha jehusejjajea meeji pea'ai! —acani Pabohua”. Jamaya onaaya mijo siajje acani, Pabo. Jamajjeya Jodio cuana jiquiojo ba'e minijje quea quene. <sup>22</sup> E'e jojo nei onaaya oya cuana huohui caje jama ba'a: “Pabo pa jjaja poe'yonaje Jenosanena huasijje”. Jamaya acajoya ojjaña cuana jjachichaquije. Majoya ¿yajja shai miya acaje, de? <sup>23</sup> Jamajjeya ¡ecuanaja esohui jayojja jama acue, Pabo! —poanaje Satiaco—. Jiquiojo yani ebeca pee pea'ai Jodio dejja Eyacuiñajji nijje miminaje. Ma ecua oya yahuajo Eyacuiñajji nijje miminaje jama amajje huojjaña dedejea mee caje. <sup>24</sup> Jamajjeya ¡onijje poquicue Eyacuiñajji equi quea quemo huasijje! ¡Esejaya etiiquiana Moisesija etehue'yo jayojja jama acue quea boejea'yo jayojja epojji, ona nijje! ¡Ojjañaja huojja dedejea jjimahuajo sosequiacue! ¡Miyaya onajaya huo cuana jjeshecue! ¡Jjeshe majje dahua meecue Eyacuiñajji bihuiajji! Jamajjeya ojjaña Jodio dejja cuaa ba caje miya pea Jodio cuana jayojja jama poani. Moisesija etehue'yo jayojja jama poani pea'ai. ¡Jamaya ojjaña ba meecue pea cuaa mijo siajje acanaje! —poanaje—. <sup>25</sup> ¡Jodio pojjeama Jesosaja epeejji poani ca ca Moisesija etehue'yo jayojja jama a'a ameeji! Chojja. Yahuajo eseyaya Jodio pojjeama huasijje esohui tehuenaje jama ba'a: “¡Noe ma onaa dahua canaje eyacuiñajji nisho bihuiajji'ya a'a ijjiyajji! ¡Noe na' cuaya meequi jjima a'a ijjiyajji! ¡Ijjiacajji na' a'a ishijji pea'ai! ¡A'a pea cojjojji pojji!” jamaya yahuajo eseyaya Jodio pojjeama cuana huasijje tehuenaje, mahuiso —jamaya acanaje Satiacohua.

<sup>26</sup> Jamajjeya mecajjeahua nei Pabohua ma Jodio dejja cuana nijje poquinaje Eyacuiñajji equi quea quemo huasijje. Ejiojji cuana, eme cuana pea'ai topo neinei canaje. Majoya oya cuana Eyacuiñajji equi quea quemo huasijje dobiquinaje. Eyacuiñajji nijje emimijji huohui canaje jama ba'a: —Oe pojji cahui po majje, ecuana quea boejea nee nee po

majje eyaya huo jjesheje ecuea, ecue epeeji cuanaja pea'ai. Jiquiacua yeje, dahua meeje Eyacuiñajji bihuiajji —Pabo poanaje.

*Pabo iña canaje cuaa Eyacuiñajji equijo nequi*

<sup>27</sup> Me oejje becanejijiji pea'ai, 7 cahui po majje Pabo oja epeeji cuana nijje poqui o'oyanaje Eyacuiñajji equi quea quemo huasijje. Moisesija etehue'yo jayojja jama ponequinaje. Pabo Eyacuiñajji equijo nequi Jodio dejja cuaa Asia meshijo ba'eya oya ba canaje. Oya cuana Pabo nijje quea quene nee poanaje. Ojjaña cuana Pabo nijje quea quene nee po mee canaje. Pabo iña mee canaje cuaa. <sup>28</sup> Oya cuana taaanaje. Jama siajje pome poanaje Paboj ba'a: —Isaeni dejja cuana, ¡poecue! ¡Jiquio dejja mo iñasahua meecue! Ohuaya ojjaña meshi yasijje poquijeya huohui canananaje jama ba'a: “¡A'a Moisesija etehue'yo jama pojji!” Ohuaya Eyacuiñajji equi niñeba cani. Isaeni cuana niñeba cani pea'ai. Jjeyahua nei ohuaya Jodio dejja pojjeama dojobiaqui canaje Eyacuiñajji equi yasijje. Jamaya ohuaya jiquio equi quea jehue jayojja po mee cani — jamaya Paboj siajje poanaje Jodio cuana. Jama mimime po majjeya Pabo iña canaje.

<sup>29</sup> E'e, yahuajo onaaya Topimo ba canaje Pabo nijje Jenosanenajo nequi. Topimo aje oe Jodio pojjeama, Epesojo ba'e. Oya Eyacuiñajji equi quea quemo huasijje dobiqii jjima. Jamatii Jodio cuaa Pabohua Jodio pojjeama Topimo bajjani Eyacuiñajji equi quea quemo huasijje dojobiaqui canaje poso acanaje. Jamajjeya quea quene nee nee poanaje. <sup>30</sup> Jamajjeya quea huiso Jodio cuana Jenosanenajo ba'e cuajicuajjebenaje Pabo que. Miminaanaa majje Pabo iña canaje. Dojocuayaqui canaje Eyacuiñajji equi secue jjani yasijje. Pabo dojocuayaqui cajo, esecue ca'a canaje. <sup>31</sup> Oya cuana quea quene nee nee, quea mase nee nee poanaje. Pabo sapa jahuejjajea sa acanaje meiya. Onaaya ca ca Shomano emeshi meseja sohuinano huooejaji poani que cuajicuajipoquinaje; huohuiqui canaje jama ba'a: —¡Bacue oe! Ojjaña Jenosanenajo ba'eca quea shajjaquijjo nee nee poani, cuajicuaji canaje jjachichaquiequi baa —poanaje.

<sup>32</sup> Jamajjeya sohuinano huooejajiya pea sohuinano huooejaji cuana, sohuinano cuana pea'ai iyaa majje dojocuajicuaji canaje Jodio cuana quea quene jjachichaquiequi yasijje baa. Sohuinano cuana, sohuinano huooejaji nijje poeje ba majje Jodio cuaa Pabo cuia pajea canaje. <sup>33</sup> Sohuinano huooejajiya Pabo que poe majje oya iña mee canaje. Jeyo mee canaje baa jjono becaa. Majoya Jodio cuana huohui'ajja canaje: —¿Ae bajjani oya? ¿Yajja acuae jja so'o? ¿Yajjajo acuae jjaya cuiaña?

<sup>34</sup> Beca Jodio cuaa oe esohui huohui canaje. Pea cuaa pea esohui huohui canaje. Ojjaña quea shajjaquijjo poanajo, sohuinano huooejajiya shajja'ajja meeme ajja ae shai Pabohua acanaje. Jamajjeya ohuaya sohuinano cuana huoojaja canaje Pabo dojobiaqui sohuinano cuanaja equi quea quemo huasijje. <sup>35</sup> Sohuinano equi ejiojji ejaasohuaquijji yasijje poeyajo, Jodio cuaa Pabo iña sa acanaje. Jamajjeya sohuinano cuaa oya jjequisohua majje dojobiaqui equi yasijje. <sup>36</sup> Jodio cuana sohuinano huooejaji quiquishijji poeje taaajebenaje jama ba'a: —¡Quecuajeacue oe! ¡Quecuajeacue oe! ¡Camano'yahua oya! — taaame poajebenaje.

*Pabohua Jodio equenequene cuana saja'a canaje*

<sup>37</sup> Sohuinano cuaa oya equi quea quemo huasijje beshahua nei ohua dojobiaqui caniya Pabohua sohuinano huooejaji jama acanaje ba'a: —Eya minijje mimi sa poani.

Ohuaya Pabo saja'a canaje jama ba'a: —¿A'a miquea Jieno cuanaja esohui eba? <sup>38</sup> Jamajjeya miya Ejito dejja quea mimishi pojjeama, ma yahuajo emeshi mese quecuapanajji epo pojjeama. Ohuaya quea huiso nee nee, ebeca pee pea'ai mil dejja emeje dojobiaqui cuana quehua dojobiaqui meshi quima huasijje. Ojo onaya ojjaña quea mete poanaje. ¿A'a miya oya pojjeama? —acanaje sohuinano huooejajiya.

<sup>39</sup> Pabohua jama acanaje ba'a: —Chojja. Eya Jodio, Sinisia meshijo ba'e. Eya Tanasojo cuaya. Jomajo tiinaje. Ma cuiñajji quea quemo, ojjañaja eba. ¡Che mo jjeya eya mimi meecue Jodio cuana nijje! —Pabohua acanaje.

<sup>40</sup> Jamajjeya sohuinano huoojeajjiya Pabo saja'a canaje jama ba'a: —¡E'e, mimicue! — acanaje.

Majoya Pabo nequinaje ejiojji ejaasohuaquijji. Eme jeasohua canaje. Ojjaña cuana tanacua canaje. Tanacua'yo majje Pabo miminaje Jodio cuana nijje ojaya esohuijo, Emeoja esohuijo.

## 22

<sup>1</sup> Pabohua jama acanaje ba'a: —Ecuea epeeji cuana, etii cuana pea'ai, ¡shajja'ajjacue mo! Eyaya miquianaya huohuije — acanaje.

<sup>2</sup> Pabo onajaya esohuijo, Emeoja esohuijo mimiani shajja'ajja majje ojjaña Jodio cuaa jecaje canaje. Jamajjeya Pabo miminaje jama ba'a: <sup>3</sup> —Eya Jodio miquiana jayojjaya. Tanasojo eya cuayanaje, Sinisia meshijo. Majoya Jenosanena huasijje poeyanaje esohui huohuijji Jamanie bajjanija esohui baa. Ohuaya eya sohuihuohui canaje. Jiquiojo eya tiinaje. Jamanieya Eyacuiñajji esohui esejaya etiiquianaja eya sohuihuohui canaje. Eya Eyacuiñajji epeeji poanaje. Joya ecua miquianaaya jjeya bihuiaña jayojja jama eyaya Eyacuiñajji bihuianaje. <sup>4</sup> E'e, yahuajo eyaya Jesusaja epeeji cuana iñanaje Jesusaja esohui ehuohui ca poani jjejojo. Ejjaje nobiaquijji yasijje jeanobiajeanaje dejja cuana, epona cuana pea'ai. Oya cuana mano mee'yo sa anaje eyaya. <sup>5</sup> Jodio etii cuanaja, joya Eyacuiñajji nijje miminequianija eba ecuea esohui e'e nei. E'e, ohuaya eya esohui etehue'yo quia canaje Jodio dejja Damascojo ba'e yasijje equiajji jama ba'a: “¡Pabo Jesusaja epeeji cuana iña meesahuacue! ¡Jeyo meesahuacue cadenaaa Jenosanena huasijje edojjji, ejeanobiajeajji Jesusaja esohui huohuijjiyo!” jamaya Jodio etiiya tehue canaje —Pabo poanaje.

<sup>6</sup> —Majoya Damasco chipi nei nequiñaqui majje eshequi biacojjajja nequijo eyajo ejijijji quea ja'a neeya eya jeaja'a canaje. <sup>7</sup> Eya quea ajjajja jjejojo oquequinaje meshi yasijje. Majoya eyaya shajja'ajjanaje eyajo enijje mimije jama ba'a: “Sanoni, Sanoni, ¿apiojji acuae miyaya eya napaña so'o?” eyajo aniya eya acanaje. <sup>8</sup> “¿Ae bajjani miya?” eyaya anaje. “Eya Jesusa, ma Nasanenajo ba'enaje. Miyaya aje oe eya napaña” acanaje Jesusaa eyajo aniya.

<sup>9</sup> —Dejja cuaa enijje poquianiya ejeajijijji quea ja'a nee ba canaje. Onajaya ca ca Jesusaja esohui enijje shajja'ajja jjima, ojaya quea quehua. <sup>10</sup> Majoya eyaya huohui'ajjanaje: “Emeshi Mese nei, ¿ae sa poani miya?” Ohuaya eya saja'a canaje jama ba'a: “¡Nequisohuacue! ¡Damasco huasijje poquicue! Jomajo peaa miya huohui caje miquea echacojji ma miyaya ejo quijje aje. ¡Ma esohui jayojja jama acue ejo!” eya acanaje.

<sup>11</sup> —Majoya eya nequisohua'yonaje; cojjama'. Jesusaa jeaja'a cajje cojja quijjo'yonaje. Jamajjeya ecuea epeeji cuaa eya mepejejea canaje Damasco huasijje.

<sup>12</sup> —Jomajo oe dejja Anania ba'enaje. Ohuaya Moisesija etehue'yo jayojja jama atiitii canaje. Oya ojjaña Jodio cuanaja quea boti nee poanaje, Damascojo ba'eja. <sup>13</sup> Ohuaya e jaa huasijje poe majje eya huohui canaje jama ba'a: “Ecuea epeeji Sanoni, ¡quea cojja ja'a po o'oyacue!” Ohua huohui cajje jjeyahua nei eya quea cojja ja'a po o'oyanaje. Anania banaje eyaya. <sup>14</sup> Majoya ohuaya eya jama acanaje ba'a: “E'e, Eyacuiñajji esejaya etiiquianaa bihuia ca poa. Ohuaya miya babaca ca poa oja huoojea'yo ojjaña jaahuanajji quea pame nee nee baa. Jjeyahua nei miyaya oya, Jesusa shajja'ajjanaje; minijje miminaje. Eyacuiñajjiya miya ba mee caje ojaya ejjashahuabaqui'yojji pea'ai. <sup>15</sup> Ma miya jjeya banaje, ma miya shajja'ajjanaje pea'ai miya huohui meesahua caje Eyacuiñajjiya ojjaña cuana ojjaña meshijo ba'e yasijje. <sup>16</sup> Jamajjeya ja'a ishoa majajji! ¡Jjeya nei Eyacuiñajji nijje mimicue miquea mimishijo! ¡Jesusa nijje jjapeequi'yocue! Ohuaya miquea mimishi cuana cuijea caje'yo. Majoya eyaya miya besa meeje Eyacuiñajjiyo” eya acanaje Anania.

<sup>17</sup> —Majoya eya poe o'oyanaje Jenosanena huasijje. Poe majje eya poquinaje Eyacuiñajji equi quea quemo huasijje onijje mimiya. Eyacuiñajji nijje mimianijo, Jesusaa eya jjacahuibaqui mee canaje. <sup>18</sup> Ohuaya eya jama huohuime acanaje ba'a: “¡Jenosanena

esecue yasijje poquicue jjeyahua nei! Jiquiojo ba'e cuaa miquea esohui ejo shajja'ajja jjima acaje” eya acanaje. <sup>19</sup> “Jesosa” eyaya oya saja'anaje, “miquea eba yahuajo eyaya Jodio cuanaja equi ejjachichaquijji yasijje dobiqúi majje, miquea epeeji ña majje jeyonaje baa jjonohua. Cuiasejjajejanaje. <sup>20</sup> Yahuajo pea cuaa miquea esohui huohuijji Estema sapa jajahuejjajea canajejo, eyaya chipi nei nequiya banequinaje. E'e, oya cuana Estema nijje quea mase poanijo eya quea bihui nee poanaje pea'ai. Dejjja cuaa oya sapa jajahuejjajea canijo, eyaya onajaya daqui ao jaahuananaje, Estema sapa jajahuejjajeajji epo cuanaja daqui” jama saja'ameya eyaya Jesosa anaje. <sup>21</sup> Majoya Jesosaa eya huoojea canaje jama ba'a: “¡Poquicue, Pabo! Eyaya miya huoojeaje quea huesha nee Jodio pojjeama cuana huasijje esohui huohuiya ejo” eya acanaje Jesosaa —Pabo poanaje.

*Sohuinano huoojeajjiya Pabo nahue canaje*

<sup>22</sup> Jodio cuaa Paboya esohui shajja'ajja canaje. Ojaya esohui Jodio pojjeamajo oya cuana shajja'ajja sa po ajja. Quea quene nee poanaje. Janobajjima nei taaa o'oyanaje jama ba'a: —¡Oya dojo'yocue! ¡Oya quecuajeacue oe! ¡Oya quea taijo quecuajeacue! —taaame poanaje Jodio cuana.

<sup>23</sup> Jodio cuaa quea queneya jjejojo daqui jeasohuajea canaje eyahuasijje. Meshi pohui jeasohuajea canaje pea'ai. Taaa neineinaje. <sup>24</sup> Jamajjeya sohuinano huoojeajjiya sohuinano cuana huoojea canaje jama ba'a: —¡Pabo eyiye dojo huasijje dojocue! ¡Oya janobajjima nei cuiacue! ¡Achajja oya ba'e ba'ajja socue! ¡Yajjajo Jodio cuaa oya niñeba cani ba'ajja socue! ¿Ajeo quea quene nee nee taaani? ¡Ba'ajja socue! —acanaje sohuinano huoojeajjiya.

E'e, oya jjashahuabaquinaje jama ba'a: —Pabo siajje poani. Eya cuiajje oya siajje popajeaje —poso acanaje sohuinano huoojeajjiya.

<sup>25</sup> Jamajjeya sohuinano cuaa Pabo jeyo canaje ecuiasejjajeajji. Jeyo cajo Pabohua sohuinano huoojeajji quea chipi nee nequi jama acanaje ba'a: —Eya miquea ba jjima. Eya Shomano dejjja pea'ai. Jamajjeya emeshi meseya miqúianaya eya cuia mee ajja quea mimishi po jjimajojo, achajja eya ba'e ba jjimajojo. Jamaya emeshi meseja esohui —Pabohua acanaje.

<sup>26</sup> Ma shajja'ajja majje ma sohuinano huoojeajji quea mete poanaje. Poquicujinaje sohuinano huoojeajji etii huohuiya. Jama huohuiñaquime acanaje ba'a: —¡Bacue! ¿Apiojji acuae miyaya jiquio dejjja Pabo napa meeña so'o? Oya ca jja ca oma Shomano dejjja, de —acanaje.

<sup>27</sup> Jamajjeya sohuinano huoojeajji etiiya ma shajja'ajja majje metenaje, Pabo que poquicujinaje. Oya huohui'ajja canaje jama ba'a: —¿A'a miya Shomano dejjja e'e jojo nei? ¡Huohuicue mo oe!

—E'e —Pabohua oya saja'a canaje—, eya Shomano dejjja, de.

<sup>28</sup> Majoya sohuinano huoojeajji etiiya jama acanaje ba'a: —E'e pojja'a, de. ¡Bacue! Eyaya quea huiso bejjo quia majje Shomano dejjja po'yonaje. Sosequianaje quea huiso nee nee, de —acanaje ohuaya; oja chii Shomano dejjja pojjeamajojo oya pea.

Jamajjeya Pabohua jama acanaje ba'a: —Ecuea ca ca ecue chii Shomano dejjja poanaje. Jamajjeya eya ca ca Shomano dejjja cuayanaje —acanaje Pabohua.

<sup>29</sup> E'e de, sohuinano cuaa beshahua nei Pabo cuiasejja canaje. Ma shajja'ajja majje ca ca ohuaya Pabo pichojea ca'yonaje. Oya Pabo Shomano dejjja ba majje sohuinano huoojeajji quea mete nee poanaje ecuiajji. Jamajjeya ojaya esohuijo pea cuaa Pabo jeyo canaje baa jjonohua. Jamaya Shomano dejjja ameeme ajja achajja oya ba'e ba jjimahuajo.

*Pabo Jodio etii cuana nijje mimi o'oyanaje*

<sup>30</sup> Majoya mecajjeahua sohuinano huoojeajji ba sa poanaje jama ba'a: —¿Ajeo shai Pabo nijje Jodio cuana quea quene nee nee poanaje?

Jamajjeya mecajjeahua ohuaya Pabo pichojea mee canaje ma ejeanobiajaa ejeyo nequi. Majoya ohuaya Jodio cuana Moisesija esohui etehue'yo huohuijji poani, Eyacuiñajji nijje emimijji cuana pea'ai iyaa canaje. Jjachichaqui'yajo, sohuinano huoojeajji etiiya Pabo

dojo canaje esecue yasijje Jodio cuana nijje mimiya. Pabo mete'ama nequinaje. Dezza cuana cojja ba canaje mete'amaa jjejojo.

## 23

<sup>1</sup> Pabohua Jodio etii quea huiso cuana cojja ba majje jama acanaje ba'a: —Epeeji cuana, ¡shajja'ajjacue mo! Eyacuiñajjija eba eya mimishi'ama ba'enaje yahuaajo, jjeya pea'ai. Jamajjeya eya bicho'ama.

<sup>2</sup> Ma shajja'ajja majje Eyacuiñajji nijje mimiani etiiya Ananiaa pea Pabo chipi nei nequi jama acanaje ba'a: —¡Joya Pabo naba cuiasejjajeacue miyaya!

<sup>3</sup> Jamajjeya Pabo onijje jama poanaje ba'a: —Eyacuiñajjiya miya cuia caje pea'ai. Miya ejjadasiaquijji. ¿Apiojji acuae miya Moisesija etehue'yo jayojsa jama po ajja? Miyaya eya pea cuia meeña. Jamaya pojjeama Moisesija etehue'yo —Pabo poanaje.

<sup>4</sup> Pea Pabo chipi nei nequiya oya jama acanaje ba'a: —¡A'a jja oe Eyacuiñajji nijje mimiani etii nijje mimijajjiji, de!

<sup>5</sup> Pabohua majoya ojjaña saja'a canaje jama ba'a: —Epeeji cuana, ecuea ba jjima oya Eyacuiñajji nijje mimiani etii. E'e, Eyacuiñajjija esohui etehue'yo jama poani ba'a: “¡Miquea emeshi mese nijje a'a mimijajjiji!” —Pabohua acanaje.

<sup>6</sup> Pabojja eba quea huiso Jodio cuana jomajo nequi Sanoseo cuana poanaje. Pea cuana ca ca Paniseo cuana. Jamajjeya Pabohua etii cuana jama acanaje ba'a: —Epeeji cuana, eya Paniseo. Ecue chii Paniseo poa. Paniseoja esohui jayojsa jama eyaya huohuíaña jama ba'a: “Quijje Eyacuiñajjiya emano'yo cuana shequi mee caje o'oya. Ojjaña cuana eshe o'oya poaje”. Jama ehuhui poaje jjejojo eya pea cuaa ña canaje —Pabohua acanaje.

<sup>7</sup> Pabojja esohui shajja'ajja majje Paniseo cuana jjamimicuiaje nobiajea neineiquinaje Sanoseo cuana nijje. <sup>8</sup> Paniseo jayojsa jama pojjeama Sanoseo cuana aje oe jama poani ba'a: “Dezza cuana mano'yo majje eshequi o'oyajji pojjeama tii. Chama' Eyacuiñajjija esohuidojojji cuana”. Oya cuana poani: “Eshahua cuana chama' pea'ai” jamaya Sanoseo cuaa huohui cani. Paniseo cuaa ca ca jama acani ba'a: “E'e jojo nei ojjaña eseya shequi mee caje o'oya. Eyacuiñajjija esohuidojojji cuana enequi, de. Eshahua cuana enequi pea'ai” jamaya e'e jojo nei huohui cani Paniseo cuaa. <sup>9</sup> Jamajjeya Jodio etii cuaa quea shajjaquijjo nee nee mimicuiaje nobiajea canaje. Majoya Moisesija etehue'yo huohuijji cuaa, Paniseo cuaa nequisohua majje jama taaame acanaje ba'a: —Jiquio dezza Pabo mimishi'ama. E'e pojja'a Eyacuiñajjija esohuidojojji onijje miminaje e'e jojo nei. ¡A'a oya napajji! —taaame poanaje.

<sup>10</sup> Majoya ojjaña Jodio etii cuana janobajjima nei jjamimicuiajea nobiajeaquianijo, esohuinano mese quea mete poanaje. Pabo nahue canaje; sohuinano cuana huoojea canaje Pabo dojhua sohuinano cuanaja equi quea quemu huasijje: —E'e de, Jodio cuaa Pabo jahuejjajea ca chana', de, meiya —sohuinano cuana poanaje.

<sup>11</sup> Mecajje Emeshi Mese nei Jesosa eyajo nequi nequioquenaje Pabo que. Oya miminaje Pabo nijje jama ba'a: —Pabo, ¡a'a quea mete pojji! Jenosanenajo miya ecuea esohui huohuijji poanaje. Quijje miyaya ecuea esohui huohuiquije quea huesha nee, Shoma cuiñajji yasijje —acanaje Jesusaa.

### *Jodio cuana ojee jashahuabaquinaje Pabo quecuajji*

<sup>12</sup> Majoya mecajjeahua nei Jodio dezza cuana jjachichaquinaje. Ojee jashahuabaquinaje Pabo quecuajji. Quea huiso cuaa jama acanaje ba'a: —E'e jojo nei Pabo cuiajea jjimahuajo ecuaaya ena e'ishijji pojjeama, bobi cuana e'ijjijji pojjeama, Pabo cuiajea'yo majje ecuaana ijja'ijjiaje'yo. Sjajje poani jjemoya aje ca ña oe Eyacuiñajjiya ecuaana mano mee ca'yome —acanaje cuaa jashahuaba taiqui majje.

<sup>13</sup> E'e, quea huiso nee nee dezza cuaa jamaya acanaje, 40 huisomeya. E'e pojja'a pea cuaa jamaya acanaje pea'ai, ecuea ba jjima. <sup>14</sup> Majoya Eyacuiñajji nijje mimiani etii que, Jodio etii cuana que pea'ai poqui majje huohui cañaquinaje jama ba'a: —E'e, ecuaaya ena ishi jjimahuajo, ijja'ijjia jjimahuajo pea'ai Pabo cuiajea neineije'yo. Pabo cuiajea jjima yajji jojjemo aje ca ña oe Eyacuiñajjiya mano mee ca'yomeya. <sup>15</sup> Jamajjeya ¡miquianaaya,

etii cuaa pea'ai esohuinano mese dasiacue! Jama nisho acue ba'a: "¡Pabo jjequi o'oyacue! Ecuaya oya ba o'oya sa aña, oja sohui eshajja'ajjajji" nisho acue. Majoya oya jjequi cajo, ecuaaya Pabo cuiajeaje, sapa jajahuejjajeaje meiya jiquiacua poe jjimahua —acana je deja mimishi cuaa.

<sup>16</sup> Paboya jjo'yaseja ebacua ejjaa, oja boeya ca ca shajja'ajja canaje Jodio cuaa Pabo sapa jajahuejjajeaje caje'yo. Jamajjeya Paboya boeya sohuinano cuanaja equi quea quemo huasijje dobi qui majje Pabo huohui qui canaje Jodio cuanaja esohui. <sup>17</sup> Majoya Pabohua sohuinano huoojeajji iyaa majje huohui canaje jama ba'a: —¡Jiquio esho'i ecue boe dojocue sohuinano etii que! Oya esho'i onijje mimi sa poani.

<sup>18</sup> Majoya sohuinano huoojeajjiya esho'i dojo canaje esohuinano mese que. Poe majje jama acana je ba'a: —Pabohua eya iyaa canaje. Ohuaya jiquio esho'i huoojea canaje mi que. Oya minijje mimi sa poani.

<sup>19</sup> Esohuinano meseya esho'i mepejjejea canaje deja chama huasijje. Majoya oya jjapashineijje huohui'ajja canaje jama ba'a: —E'e, ¿ae shai miyaya eya huohui sa aña? —acana je.

<sup>20</sup> Esho'iy a jama acana je ba'a: —Jodio deja cuana ojee miminequinaje. Mecahuajje pa miya dasia caje pa. Miya pa jama anisho caje ba'a: "¡Pabo jjequi o'oyacue Jodio etii cuana huasijje! Ecuanaaya oya ba o'oya sa aña" jamaya miya siajje aca je pa. <sup>21</sup> Jamajjeya ja'a oya cuana shajja'ajjajji! Quea huiso nee nee, 40 huisome ejja'aniquehuaqui ani ejiojji sahuajo Pabo cuiajea'yojji. E'e, oya jama poanaje ba'a: "Ena ishi jjima amajje ijja'ijja jjima po majje pea'ai ecuaaya Pabo cuiajeaje'yo. ¡Pabo cuiajea jjima yajji jojjemo Eyacuiñajjiya ecuaana napa ca'yome!" jama mimimeya poanaje. Jjeya nei miya isho'ajja cani cuaa. Jama poani ba'a: "E'e, jjeyahua nei esohuinano meseya Pabo jjequi caje ba'ajja" poani oya cuana —jamaya esho'i poanaje.

<sup>22</sup> Majoya esohuinano mese jama poanaje ba'a: —E'e, jamajjeya ecuea eba pea cuaa eya edasiajji nisho aca je ma e miya huohuinaje. ¡A'a oe huohuijji cuana!

Jamaya huohui majje ohuaya esho'i quehuajje huoojea canaje equi yasijje.

*Pabo huoojea canaje Shomano emeshi meseja huoojea Peni ani yasijje*

<sup>23</sup> Majoya esohuinano meseya iyaa canaje beca sohuinano huoojeajji. Poeyajo jama huohuime acana je ba'a: —¡Miquea aquiana cuana, sohuinano cuanaja aquiana pea'ai chichacue epoquijji! ¡Mecajje quea misi nee poajo, poquicue Sesanea cuiñajji yasijje! ¡Quea huiso nee nee, 200 huisome sohuinano cuana ejiojjijje dojocue! ¡Pea sohuinano quea huiso nee mejejji dojocue pea'ai! ¡Pea sohuinano cuana mapichi aija edaasa biajje ani dojocue minijje pea'ai, 70 huisome! <sup>24</sup> ¡Pabo dojocue pea'ai pea mapichi aija edaasa biajje ani! ¡Oya Pabo dojocue emeshi meseja huoojea que, Peni que! ¡Pabo jaahuana neineicue! ¡A'a Jodio cuana oya napa meejji! —acana je esohuinano meseya, Canio Nisia bajjaniya.

<sup>25</sup> Majoya esohuinano meseya esohui tehue canaje Penija ebajji jama ba'a:

<sup>26</sup> "Emeshi meseja meshi cuiñajji Peni: Ecuea epeejji Peni, mijo eya quea bihui nee. Eyaya, Canio Nisiaa jiquio esohui tehuenaje miquea ebajji jiquio dejjajo, Paboya. Jama poa ba'a: <sup>27</sup> Jodio cuaa jiquio deja Pabo bajjani iña canaje. Beshahua nei oya cuiajea ca'yonaje cuaa. Oya Shomano deja ba majje eyaya oya nahuenaje; sohuinano cuana huoojeanaje o nahuejji. <sup>28</sup> Eya ba sa poanaje apiojji Jodio cuana onijje quea quene nee nee poanaje. Jamajjeya eyaya oya dojonaje Jodio etii cuana que. <sup>29</sup> Jodio etii cuanaja esohui shajja'ajja majje eyaya banaje Pabo mimishi'ama, de. Mimishi po jjimajo Jodio cuana oya sapa jajahuejjajeaje mee jjima anaje meiya; jeyo mee jjima anaje ejeanobiajeajji. Oya Shomano deja. Paboya ehuohuijo ca ca oe Jodio cuana onijje quea quene nee nee poanaje. Onijje mimijajinaje Jodio cuanaja etiiquianaja ehuohui'yojo, ma ohua huohui canijo. <sup>30</sup> Majoya Jodio cuaa eya dasia majje Pabo quehuajje sapa jajahuejjajeaje sa acana je. Ma ba majje eyaya oya huoojeanaje mi que. Jodio deja cuana, Pabo huohuijji epo, eyaya huoojeaje

mi que pea'ai. ¡Miyaya oe huohui neineicue ache acue oe quea mimishi poani! Mahuiso ecuea esohui, epeeji Peni. Eyaya, Canio Nisiaa ecue sohui tehuenaje miquea ebajji. Apoa”.

Jamaya tehue canaje. <sup>31</sup> Tehue majje esohuinano meseya Caniohua oja tehue huoojea canaje emeshi mese Peni que.

Jamajjeya sohuinano cuaa Canioja ehuohui'yo jayojja jama acanaje; Pabo dojo canaje mecajje Atipati cuiñajji yasijje cahuiya. <sup>32</sup> Majoya mecajjeahua nei sohuinano mapichima' huacuaya poe o'oyanaje Jenosanena huasijje, sohuinano cuanaja equi quea quemo huasijje. Joya mapichijjiya ca ca oe Pabo dojo canaje Sesanea huasijje. <sup>33</sup> Sesanea huasijje poe majje Shomano emeshi meseja huoojeaja equi yasijje, Penija equi yasijje nequiñaquinaje. Majoya sohuinano cuaa Pabo quia canaje Peni que. Esohuinano mese Canioja esohui etehue'yo pea'ai quia canaje. Majoya oya cuana poqui'yonaje. <sup>34</sup> Canioja esohui etehue'yo ba neinei majje Peniya Pabo huohui'ajja canaje jama ba'a: —Pabo, ¿ache meshijo ami ba'e, ache mijijje?

—Eya ca iña Sinisia meshijo ba'e —saja'ame acanaje Pabohua.

<sup>35</sup> —E'e. Jamajjeya Jodio cuana ma mi huohuiji epo poeyajo, eyaya miquea esohui shajja'ajjaje —poanaje Peni.

Majoya Peniya pea sohuinano cuana iyaa canaje. Poeyajo jama huohuime acanaje ba'a: —¡Bacue! Jiquio dejja Pabo bajjani. ¡Oya emeshi mese Enodeja equi quea quemo neejo jaahuana neineicue! ¡Nahuecue oe! —acanaje.

## 24

### *Jodio cuaa emeshi mese Peni siajje acanaje Pabobo*

<sup>1</sup> Majoya me oeje cahuime po majje Jodio Eyacuiñajji nijje mimiani etii Anania poquinaje Sesanea huasijje Pabo niñebaa, Pabo huohuiya. Jodio etii quea huiso pishana Anania nijje poquinaje. Pea dejja, emeshi meseja etehue bajji poani Tetono bajjani onijje poquinaje pea'ai. Sesaneajo nequiñaqui majje oya cuana emeshi meseja huoojea Peni ba cañaquinaje. Majoya oya cuana Pabobo mimimiminaje. <sup>2</sup> Majoya Peniya Pabo iyaa canaje. Poeyajo Tetonohua huohui canaje jama ba'a: —Emeshi mese Peni, miya quea ca'a, quea pame nee, ecuea epeeji pea'ai. Miya ecuana huoojeajji quea pame nee. Quea huiso shequiaja miquea esohuijo ojjaña quea bei po meenaje jiquio meshijo. Quea huiso dejja mimishi miyaya jjabahuejjaqui meenaje. Jamajjeya ecuana jiquio meshijo quea pame nee ba'yani. <sup>3</sup> E'e, miyaya quea pame añajo, ecuana quea bihui nee poani, ojjaña cuiñajji ba'eca cuana pea'ai. Miya ecuanaja quea boti nee. <sup>4</sup> Miquea pea echacojji quea huiso yanijo eyaya oe pojji esohui huohuije. Jamajjeya ¡ecuea esohui che shajja'ajja socue! —poanaje Tetono—. <sup>5</sup> Jiquio dejja Pabo quea mimishi nee po tiitiiani. Jodio cuana ojjaña meshijo ba'e quea quene nee nee po mee cani. Ohuaya Jesusaja ma Nasanenajo ba'ya poaja esohui huohui majamaja cani. E'e, oya Jesusaja epeeji cuana huoojeajji poani. <sup>6</sup> Ohuaya ca ca Eyacuiñajji equi quea quemo quea jehue jayojja acanijo, ecuanaaya oya iñanaje. Jodio cuanaja etiquianaja tehue jayojja jama oya amee sa anaje; ohua huohui tai canijo oya sapa jajahuejjaje sa anaje. <sup>7</sup> Jamatii esohuinano mese Canio Nisia cuajicuajjebenaje Pabo nahueya; Pabo dojo canananaje. Oya quea quene nee nee poanaje ecuana nijje, de. <sup>8</sup> Majoya Canio Nisiaa ecuana mi que huoojea canaje Pabo huohuiya. E'e, Pabo nijje mimi majje miyaya baje ecuanaja esohui e'e nei —acanaje Tetonohua.

<sup>9</sup> Majoya pea Jodio dejja cuaa Peni siajje aca o'oyanaje Pabobo jama ba'a: —E'e jojo nei Tetonoja esohui Pabobo e'e nei. Pabo quea mimishi nee nee poanaje —Peni acanaje cuaa.

### *Pabohua emeshi mese Peni huohui ca'yonaje ojaya eba'ejji*

<sup>10</sup> Majoya Peniya Pabo jama acanaje ba'a: —E'e pojja'a. ¿Pabo, yajjajje acuae minijje quea quene poani cuana so'o? ¡Huohuicue mo oe!



Jamajjeya Pabohua jama acanaje ba'a: —Emeshi mese Peni, ecuea eba miya jiquio meshijo ona huoojeajji poani quea shequiaja huiso. Jamajjeya ojjaña miquea eba. Jamajjeya ecuea eba'ejjijo eyaya mete'ama huohuije. <sup>11</sup> Miquea eba ecuea esohui e'e nei. Jjeya nei eya Jenosanena huasijje nequiñaqui o'oyanaje Eyacuiñajji bihuiaa ome miji pea'ai beca cahuime poanaje. <sup>12</sup> Jodio dejja cuaa eya ba canaje Eyacuiñajjija equijo nequi. Eya ca ca iña dejja nijje jjamimicuiajea nobiajeaqui ajja. Ecuea Jodio cuana quea quene po mee jjima Jodioja equi ejjachichaquijjijo ani, ejiojji cuanajo nequi pea'ai, equi cuanajo ani pea'ai. Jama ajjima Jenosanenajo ecuea cuana. <sup>13</sup> Ojjaña eba Jodio cuana ejo siajje poani. Eya mimishi'ama. <sup>14</sup> Jodio cuanaja etiiquiaa cuaa Eyacuiñajji bihuia ca poa. Eyaya Eyacuiñajji bihuiaña pea'ai. Jamatii eyaya Jesusaja esohui jayojja jama aña pea'ai. Jiquio Jodio cuana ca ca siajje poani jama ba'a: “Jesusaja esohui etiiquianaja esohui jama pojjeama” jama poso acani. Chojja, ecuanaja etiiquiana Moisesija etehue'yo jayojja jama aña; Eyacuiñajjija esohui huohuijji yahuajo nei ba'e cuanaja esohui etehue'yo jayojja jama aña pea'ai eyaya. Ohuaya jayojjaya eyaya jama huohuime aña ba'a: <sup>15</sup> Ojjaña eseya mano'yajo quijje Eyacuiñajjiya shequi mee caje o'oya; mimishi cuana, dejja quea pame poani cuana pea'ai eshe poaje o'oya. Ecuea eba, jiquio Jodio cuanaja eba pea'ai Eyacuiñajjiya jamaya acaje'yo. <sup>16</sup> Jamajjeya eya quea pame nee ba'e sa tii poani. Eyacuiñajjija eba eya mimishi'ama. Jiquio Jodio cuanaja eba pea'ai eya bicho'ama, mimishi'ama —Pabo poanaje.

<sup>17</sup> —Eya pea meshi cuana huasijje poquinaje esohui huohuiya. Quea huiso shequiaja po majje jjeya eya quea huesha nequi Jenosanena huasijje poe o'oyanaje. E'e, Jesusaja epeejji cuana pea meshijo ba'eca cuaa ejjeshejji huoojea canaje Jodio aema' cuana bobiaa. E'e, eyaya maya ejjeshejji ye majje Jodio cuana quianaje. Eyaya huo dahua meenaje pea'ai Eyacuiñajji bihuiajji. <sup>18</sup> Jamajjeya eya Eyacuiñajjija equi quea quemo huasijje poquinaje. Jomajo nequiya eyaya eme shacua neineinaje quea boejea jayojja epojji. Jamaya poanijo, Jodio cuaa Asia meshijo ba'e cuaa eya ba canaje Eyacuiñajjija equijo oe nei nequi. Quea huiso dejja cuana enijje nequi jjima poanaje. Quea shajjaquijjo pojjeama eya poanaje. <sup>19</sup> Ma Jodio cuana Asia meshijo ba'e poe jjima jiquiacua. E huohui sa poanijo oya cuana capoe'yahua minijje mimiya. <sup>20</sup> Esohuinano meseya Canio Nisiaa eya nequi mee canaje Jodio etii cuana cojja nei. Jiquio Jodio cuaa ecuea esohui Jodio etii nijje shajja'ajja canaje pea'ai. Jodio etiiya eya quea mimishi eba jojjemo jjeyahua nei huohui ca'yome ecue mimishi. <sup>21</sup> E'e, jomajo eyaya etii cuana huohuinaje jama ba'a: “Quijje Eyacuiñajjiya emano'yo cuana shequi mee caje o'oya. Ojjaña eseya shequi mee caje o'oya. Eya jamaya ehuhui poaje jjejojo pea cuaa eya iña canaje” jamaya eyaya etii anaje. E'e, ma esohuijo jiquio Jodio cuaa eya niñeba cani, huohui cani pea'ai. Mahuiso ecuea esohui, emeshi mese Peni. Apoa —Pabohua acanaje.

<sup>22</sup> Emeshi mese Penija eba Jesusaja epeejji cuanaja ehuhui'yo. Jamajjeya ohuaya jama acanaje ba'a: —E'e, quijje esohuinano mese Canio Nisia poe'yajo eyaya huohuije ecuea ejjashahuabaquijji Pabojjo. Mahuiso. Apoa —poanaje Peni.

Majoya Jodio cuana esecue yasijje huoojeacuayajea majje Peniya sohuinano huoojeajji huohui canaje jama ba'a: <sup>23</sup> —¡Sohuinano cuana huoojeacue Pabo nijje! ¡Oya jaahuana neineicue! ¡Ojaya epeejji cuaa aquiana, bobi pea'ai o que caye cahua! ¡O que ca'anicuahua pea'ai! —acanaje emeshi meseya Peniya.

*Pabohua Peni, oya huanase Nosiya pea'ai sohuihuohuime acanaje*

<sup>24</sup> Majoya quijje pishana Peni oja huanase nijje, Nosiya nijje poe o'oyanaje Pabo baa. Nosiya aje oe Jodio epona poanaje. Jamajjeya ohuaya Pabo iyaa mee majje jama acanaje ba'a: —Pabo, ¡Jesusa Quitoja esohui mo huohucue Jesusa Quito nijje jjapeequianijo! Eyaya shajja'ajja sa aña.

<sup>25</sup> Jamajjeya Pabohua Jesusaja esohui huohui canaje jama ba'a: —¡Eyacuiñajjija esohui jayojja jama ba'ecue quea pame nee! ¡jjashahuabaquicue! ¡A'a quea mimishi tii pojji! Quijje poe o'oya majje Jesusaa ojjaña cuana sosequia caje'yo, ma eseya eshe nequiahuaa

anequinaje sosejje. Mimishi cuana quea nee nee po tiitii mee caje'yo, quea mimishi ba'enaje sosejje. Ojaya epeejji quea pame cuana ca ca ohuaya quea bihui nee ba'e tiitii mee caje'yo onijje eyajo Eyacuiñajjiya —jama huohuimeya Pabohua acanaje cuana.

Paboya esohui shajja'ajja majje Peni quea mete nee nee poanaje. Jama acanaje ba'a: —E'e, mahuisoya jjeya. Quijje eyaya miya iyaaje o'oya, ecuea pea echacojji chama' poajo.

<sup>26</sup> Peni jjashahuaba taiquinaje jama ba'a: —Eyaya Pabo iyaaje o'oya enijje emimijji. E'e pojja'a ohuaya eya sosequia caje o pichojea mee'yo sosejje.

<sup>27</sup> Jamatii Pabo emeshi mese Enodeja ejjaje nobiaquijji equijo nequinaje beca shequiajame. Majoya Shomano emeshi meseya pea dejja Posio Pesito bajjani huoojea canaje meshi cuiñasahuajji epojji. Oya Pesito emeshi mese Enodeja equijo ba'enaje. Jamajjeya Peni oja huanase Nosiya nijje poquinaje. Jamatii Penija Jodio etii cuana onijje quea bihui nee epojji Pabo pichojea mee'yo jjima poanaje. Jamatii ejjaje nobiaquijji nequi tii Pabo jiña ca'yonaje.

## 25

### *Pabohua emeshi mese eyacua Pesito sohuihuohui canaje*

<sup>1</sup> Jamajjeya Shomano emeshi cuiñasahuajji eyacua Pesito Sesanea cuiñajji nequinaje. Pea beca peejjima cahuime po majje oya poquinaje Jenosanena huasijje. <sup>2</sup> Jomajo Eyacuiñajji nijje mimiani etii cuaa, Jodio etii cuaa pea'ai Pabo niñeba canaje emeshi cuiñasahuajji Pesitoja eshajja'ajjajji. <sup>3</sup> Pesito nijje mimi huicha'a huicha'anaje jama ba'a: —Emeshi mese Pesito, ¡che oe Pabo huoojeacue Jenosanena huasijje ecuaa nijje mimiya! —nisho acanaje Jodio cuaa. Oya cuana aje oe jjashahuaba taiquinaje Pabo cuiajea'yojji ejiojjijje poquianijo.

<sup>4</sup> Pesitohua Jodio cuana saja'a canaje jama ba'a: —Chojja. Pabo jiquiacua epoejji pojjeama. Eyaya oya cuiñaña Sesaneajo mei equi ejjaje nobiaquijji. Quijje pishana eya poquije o'oya Sesanea huasijje. <sup>5</sup> ¡Pabojo mimi sa poanijo miqianajaya etii cuana huoojeacue enijje Sesanea huasijje! Jocuama ohuaya Paboya mimishi cahuohui cahua. E'e pojja'a oya mimishi'ama, caba'ajja —poanaje Pesito.

<sup>6</sup> Majoya Pesito nequinaje Jodio cuana nijje Jenosanenajo me oejje pea beca peejjima, 8 cahuime. Majoya oya poqui o'oyanaje Sesanea huasijje. Oe cahuime po majje oya anioquenaje pea equijo, etii ojee chacochoani equijo. Majoya ohuaya pea dejja huoojea canaje Pabo jjequiya. <sup>7</sup> Pabo poe'yajo Jodio etii cuana ma Jenosanenajo ba'e cuana o que jjanequichipiquinaje; oya panajajinaje. Pabojo quea huiso sijje poanaje, de.

<sup>8</sup> Majoya Pabohua huohui canaje jama ba'a: —Eya quea mimishi pojjeama poani. Jodio etii quiana cuanaja esohui etehue'yo paje'yo jjima ecuea. Eyacuiñajji equi quea jehue jayojja po mee jjima. Shomano emeshi mese ecuea niñeba jjima pea'ai —poanaje.

<sup>9</sup> Majoya Pesitohua Jodio cuana quea bihui nee po mee sa acanijo huohui'ajja canaje jama ba'a: —Pabo, ¿a'a miya Jenosanena huasijje poqui sa poani? Jomajo Jodio etii cuanaja esohui mijo eyaya shajja'ajjaje, miquea esohui shajja'ajjaje pea'ai. Ojjaña shajja'ajja majje eyaya mijo jjashahuabaqui majje huohuije ecuea ejjashahuabaquijji —poanaje Pesito.

<sup>10</sup> —Chojja —saja'ame acanaje Pabohua—, eya jiquiojo tii yani, Shomano etii equijo. ¡Jiquio Shomano etiiya, miyaya pea'ai onaja esohui ejo shajja'ajja majje huohuicue miquea ejjashahuabaquijji! Eya Shomano dejja. Jamajjeya Jodio cuanaja eya ecuiajea'yojji pojjeama. Ecuea Jodio cuana quea mimishi ajjima, de. Jamaya miquea eba.

<sup>11</sup> Ecuea emeshi meseja etehue'yo jama ajjima jojjemo, mimishi ya pea'ai jojjemo eya mano mee'yomeya. Ecuea mimishi ajjima jjojya ca ca miyaya e equia meejji pojjeama mimishi cuanaja ecuiajea'yojji. Jamaya emeshi mese etii esohui poani. Eya ca ca iña Shomano emeshi mese etii nijje mimi sa poani, Sesa nijje. Ecue sohui shajja'ajja majje ohuaya cahuohui cahua ojaya ejjashahuabaquijji ejo —Pabohua acanaje.

<sup>12</sup> Majoya Pesito o chacosahuajji nijje ojee mimi majje Pabo huohui canaje jama ba'a: —E'e, eyaya miquea esohui jayojja jama aje: Miya huoojeaje Shomano emeshi mese etii

yasijje, Sesa que. Miya shajja'ajja majje ohuaya huohui caje ojaya ejjashahuabaquijji mijo —jamaya po majje Pesitohua ojjaña huoojeacuaya ca'yonaje.

*Pabo miminaje Jodio meshi mese Anipa nijje Anipaja jjo'yase Menise nijje pea'ai*

<sup>13</sup> Quijje pishana Jodioja emeshi mese etii Enodeja osecua Anipa bajjani oja jjo'yase Menise nijje poeyanaje Sesanea huasijje Pesito baa, emeshi cuiñasahuajji eyacua baa. Pesito nijje quea bihui nee mimimiminaje jama ba'a: —E'e Pesito, miya emeshi cuiñasahuajji eyacua Sesaneajo. Jamaya quea pame nee. ¡Quea bihui nee pocue! — ohuaya Pesito acanaje.

<sup>14</sup> Majoya Anipa Pesito nijje nequinaje oe pojji cahuime. Pesitohua Anipa huohui canaje Pabobo jama ba'a: —Emeshi mese Anipa, yahuajo e poe jjimahuajo pea emeshi cuiñasahuajjiya Peniya Jodio dejja Pabo bajjani jiña canaje ejjajejanobiaquijji joo, jiquio ejjajejanobiaquijji joo. <sup>15</sup> Eya Jenosanena huasijje poquiyajo, Jodio Eyacuiñajji nijje mimiani etii cuaa, Jodio etii cuaa pea'ai Pabo niñeba neinei canaje. Jama amajamaja canaje ba'a: “¡Pabo quea mimishi nee nee po tiitiiani! ¡Oya oe cuiajea'yocue!” acanaje cuaa. <sup>16</sup> Eyaya Jodio cuana jama anaje ba'a: “Ecuana ca ca pea, Shomano dejja cuana. Miquianajaya ehuohui ca ca oe shajja'ajja majje eyaya oya equiajji pojjeama miquea ecua'yoyji. Chojja. Pabohua miquiana cojja nei nequi majje cahuohui cahua pea'ai. E'e, Shomano emeshi meseja etehue'yo jama ba'a: “Dejjaa peaja ehuohui ojo shajja'ajja majje ohuaya cahuohui pea'ai cahua, ona cojja nei nequiya”. E'e pojja'a miquianaya Pabobo siajje poani” jamaya eya poanaje. <sup>17</sup> Jamajjeya Jodio etii cuana jiquiacua poe majje, oe cahuime po majje eya anioquenaje etii cuana nijje. Majoya eyaya Pabo iyaa meenaje huohui pohua. <sup>18</sup> Majoya Pabo poeyajo Jodio etii cuana nequinaje huohui epojji. Jamatii oya cuanaja Pabo quea mimishi nei poanaje huohui jjima. Ecuea ejjashahuabaquijji jama huohui jjima, Jodio etii cuanaja. <sup>19</sup> Jodio etiiquianaja etehue'yojo ca ca janobajjima nei Pabo mimicuiajejanobiajea canaje. Jesusajo, ma yahuajo mano'ya poajo pea'ai mimicuiajejanobiajea canaje. Pabohua pa huohui canaje Jesosa shequi o'oya poa. <sup>20</sup> Ma esohui Jesusajo ecuea ba jjima. Jiquiojo ba meemee ajja. Jamajjeya eyaya Pabo huohui'ajjanaje jama ba'a: “Pabo, ¿a'a miya Jenosanena huasijje poqui sa poani? Jomajo eyaya huohuije ecuea ejjashahuabaquijji mijo, Jodio etii cuana shajja'ajja majje” eyaya a'ajjanaje. <sup>21</sup> Jamatii Pabo Jenosanena huasijje poqui sa po ajja. Ohuaya eya huohui canaje jama ba'a: “Eya ca iña emeshi mese etii nijje mimi sa poani, Sesa nijje. Ohuaya ecuea esohui shajja'ajja majje cahuohui cahua ojaya ejjashahuabaquijji ejo” jamaya eya acanaje. Jamajjeya eya jama poanaje ba'a: “E'e, quijje eyaya miya huoojeaje emeshi mese etii que, Sesa huasijje” eyaya oya anaje —jamaya Pesitohua Jodio emeshi mese Anipa acanaje.

<sup>22</sup> Majoya Anipaa jama acanaje ba'a: —E'e Pesito, eya Pabo shajja'ajja sa poani.

—E'e, emeshi mese —poanaje Pesito—, ¡mecahuajje miyaya Pabo shajja'ajjacue!

<sup>23</sup> Jamajjeya mecajjeahua Anipa oja jjo'yase Menise nijje poeyanaje daqui quea nahue nee nee, emeshi meseja daqui huoshoo majje. Ojjaña cuaa oya cuana bihuia canaje, quea shajjaquijjo sajeame acanaje. Equi quea quemo huasijje, ma etii cuana chacochoani yasijje dobiquinaje Pabo shajja'ajjaa. Sohuinano huoojeajji, etii cuana, Sesanea cuiñajji mese nijje ma equi yasijje dobiquinaje pea'ai. Ojjaña anioque majje Pesitohua pea dejja huoojea canaje Pabo iyaa. <sup>24</sup> Pabo poe'yajo Pesito jama poanaje ba'a: —Emeshi mese Anipa, ojjaña etii jiquiojo nequi pea'ai, ¡shajja'ajjacue mo! Ojjaña Jodio cuaa jiquio cuiñajji ba'eya, Jenosanenajo ba'eya pea'ai jiquio dejja Pabo niñeba cani. Oya cuana taaa majamajani jama ba'a: “¡Pabo cuiajea'yocue! Oya quea mimishi nee nee po tiitiiani”. <sup>25</sup> Jamatii Pabo shajja'ajja majje eyaya banaje oya mimishi'ama. Jamajjeya eyaya pea cuana oya cuia mee jjima anaje. ¿Yajjajo jja ecua'yoyji? Oya mimishi'ama. Majoya Pabohua eya jama acanaje ba'a: “Eya Shomano emeshi mese etii nijje, Sesa nijje mimi sa poani. Ecuea esohui shajja'ajja majje ohuaya cahuohui cahua ojaya ejjashahuabaquijji ejo” jamaya Pabohua eya acanaje.

—Jamajjeya eyaya oya huoojeaje Shomano emeshi mese etii yasijje huohuiya.  
<sup>26</sup> Jamatii oya mimishi po jjimajo, ¿yajja tehueme shai eyaya Shomano emeshi meseja ebajji aje? Jamajjeya eyaya oya ye meenaje miquiana que. ¡Oya shajja'ajja majje eya huohuicue miquea ejjashahuabaquijji ojo! Emeshi mese Anipa, Jodio cuanaja ehuohui'yo miquea eba nei nei. Jamajjeya miquea ehuohui Pabojo eyaya tehueje Shomano emeshi mese etii yasijje, ojaya ebajji. <sup>27</sup> Eya ca iña jjashahuabaquiani jama ba'a: Ecuea Pabo ehuoojeajji pojjeama ojaya mimishi cuana tehue'yo jjimajo. Chojja, jama po ajja ca iña —poanaje Pesíto.

## 26

### *Pabo emeshi mese Anipa nijje miminaje*

<sup>1</sup> Majoya Anipa Pabo nijje miminaje jama ba'a: —E'e Pabo, ¡mimicue! ¡Miquea mimishi chamajo ecuanaya huohuicue ecuanaja ebajji! —acanjaje Anipaa.

Jamajjeya Pabohua eme jeasohua majje ojaya eba'ejji huohui canaje jama ba'a:  
<sup>2</sup> —Emeshi mese Anipa, ojjaña miquea eba. Jodio etii cuanaja esohui ejo miyaya shajja'ajjanaje. Jamajjeya ecue sohui shajja'ajjañajo, eya quea bihui nee. <sup>3</sup> E'e, Jodio etiiquianaja etehue'yo, ehuohui'yo cuana pea'ai miquea eba, ojjaña. Miquea eba pea'ai jjeyahua nei Jodio cuana jjamimicuijaje nobiajeaquiani esohui quea pame nee Jeasajo. Jamajjeya ¡ecuea esohui quea bei shajja'ajja socue! <sup>4</sup> Ecuea eba'ejji eya esho'yahua ojjaña Jodio cuanaja eba. E'e, ecuea cuiñajji ba'yahua, Jenosanenajo ba'e pea'ai eya ojjaña Jodio cuanaja eba. <sup>5</sup> Yahujajo eya Paniseo jayojja ba'enaje e'e jojo nei. Jamaya ojjañaja eba. Jamaya cahuohui cahua, ca ohuaya huohui'yo sa amajje —Pabo poanaje.

<sup>6</sup> —Yahujajo nei nei Eyacuiñajjiya esejaya etiiquiana huohui ca poa jama ba'a: “Ojjaña emano'yojaa cuana eyaya shequi meeje o'oya quijje” poa. Jamaya eseya sa poani. Ma esohui huohuañajo, Jodio etii cuaa eya iña canaje. Jiquiacua eya jjequi canaje cuaa minijje emimijji.

<sup>7</sup> —Ecuana, Jodio cuanaja 12 etiiquiaa maya ehuohui'yo shajja'ajja ca poa yahujajo nei nei. “E'e jojo nei ojjaña eseya mano'yo majje shequije o'oya. Jamaya amee caje o'oya Eyacuiñajjiya” Jodio etiiquiaa aca poa. Jamajjeya ecuaaya, Jodio cuaa Eyacuiñajji bihuia tiitiña ojjaña pojajajo, mecajje pea'ai. Jamatii eyaya maya huohuiñajo Jodio cuaa aje oe eya niñeba cani jjeya, tecuea cani pea'ai. <sup>8</sup> Emeshi mese Anipa, miya Jodio dejja pea'ai. ¿Apiojji acuae miquianaaya, Jodio cuaa jjabahuejjaqui ajja Eyacuiñajjiya emano'yo cuana shequi mee caje o'oya? —Pabohua acanjaje.

<sup>9</sup> —E'e Anipa, yahujajo nei eyaya pea'ai Jesusaja epeeji cuana napa majamajanaje quea huiso, ma Nasanenajo ba'ya poaja epeeji cuana. Eya jjashahuaba taiquinaje jama ba'a: “Jesusaja epeeji napajji cuana quea pame poani”. <sup>10</sup> Jamajjeya eyaya Jesusaja epeeji Jenosanenajo ba'e napanaje quea huiso. E'e, Eycuiñajji nijje mimiani etii cuaa eya esohui etehue'yo quia canaje Jesusaja epeeji cuana jeanobiajea meeji. Majoya eyaya Jesusaja epeeji cuana iñanaje, jeanobiajeanaje ejjajeantobiacuajji yasijje pea'ai. Onaaya Jesusaja epeeji cuiajea canajejo, eyaya jama anaje ba'a: “E'e, ¡cuiajea'yocue!” anaje eyaya. <sup>11</sup> E'e, yahujajo eya poqui majamajanaje ojjaña Jodioja equi ejjachichacuajji cuana huasijje Jesusaja epeeji cuana cuiajeaa, Jesusa nijje ejjapeequi pajea'yojji nisho. Eya quea quene nee nee ona nijje po majje poquinaje pea cuiñajji cuana huasijje, pea meshi yasijje Jesusaja epeeji cuana napaa.

<sup>12</sup> —Majoya Eyacuiñajji nijje mimiani etii cuaa eya huoojea canaje Damasico huasijje Jesusaja epeeji napaa. Eya quia canaje esohui etehue'yo jama ba'a: “Pabo Jesusaja epeeji cuana iña meesahuacue”. Majoya eya poquinaje Damasico huasijje. <sup>13</sup> Emeshi mese Anipa, Damasico huasijje ejiojijje poquijeya, eshequi biacojjajja nequijo eyaya eyajo banaje ejeajijijji quea jiji nee nee, eshequi jayojja jama pojjeama, quea jiji ja'a nee nee. Dejja cuana enijje poquiani jeaja'a neinei canaje pea'ai. <sup>14</sup> Jamajjeya ecuaa meshi yasijje oquequinaje quea mete nee nee jjejojo. Majoya eyaya pea eyajo enijje mimiani shajja'ajjanaje. Enijje miminaje Emeo esohuijo jama ba'a: “Sanoni, Sanoni, ¿apiojji acuae

miyaya eya napaña? Quea bicho nee nee poaje ecuea epeeji cuana napa majje. ¡A'a quea sapa ca'a pojji!” poanaje. <sup>15</sup> Majoya eyaya jama anaje ba'a: “Emeshi Mese, ¿ae bajjani acuae miya?” Jesusaa eyajo aniya eya jama saja'ame acanaje ba'a: “Eya Jesusa. Miyaya eya napaña, ecuea epeeji cuana pea'ai. <sup>16</sup> ¡Jamajjeya nequisohuacue jjeyahua nei! Eya mi que jjanequipanaquinaje mi jjabahuejjaqui meeji. Miya enijje chacochochoje, ecue sohui huohuiji poaje. Ecuea esohui jjeyahua nei miyaya shajja'ajjanaje, eya banaje pea'ai. Quijje pishana eyaya miya quea huiso ba meeje ejo. Maya miyaya huohuije ojjaña huasijje. <sup>17</sup> Jodio cuaa napa cajo eyaya miya jaahuanaje. Eyaya miya huoojeaje Jodio pojjeama cuana huasijje. Onaa mi napa cajo, eya mi jaahuanajji poaje. <sup>18</sup> E'e, eyaya miya Jodio pojjeama cuana huasijje huoojeaje. ¡Miyaya oya cuana ecuea ejiojji ba meecue eyahuasijje epoqui'yojji! ¡Miyaya oya cuana enijje jjapeequi meesahuacue quea ja'a nee nee eba'ejji, Edosiquiana nijje, Satanasa nijje epoqui majajji pojjeama! ¡Maya oya cuana pajea mee'yocue Eyacuiñajji esohui jayojja jama eba'ejji! ¡Enijje jjapeequi meesahuacue! Jamajjeya eyaya ojaya mimishi cuana cuijeaje'yo. Oya cuana ba'e tiitii meeje'yo eyajo ojjaña ecuea epeeji cuana nijje pea'ai” jamaya Jesusaa eya huohui canaje —Pabo poanaje.

<sup>19</sup> —Emeshi mese Anipa, eyaya Jesusaja esohui shajja'ajjanaje. Ohua huohui canaje jayojjaya eyaya anaje. <sup>20</sup> Ebionei eyaya Jesusaja esohui quea pame nee huohuinaje Damasiojo ba'eca cuanaja eshajja'ajjajji. Majoya Jenosanena huasije poe o'oya majje eyaya ojjaña cuana sohuihuohuinaje. Majoya eya poquinaje ojjaña cuiñajji yasijje Jodea meshijo. Esohui quea pame nee Jesusajo huohui poquianaje. Jodio pojjeama cuana pea'ai eyaya sohuihuohui poquianaje jama ba'a: “¡Miquea mimishi cuana pajea'yocue! ¡Jesusa nijje jjapeequicue! ¡Quea pame nee ba'ecue! Jamaya onaaya ba caje miya e'e jojo nei Jesusaja epeeji poani, eshahuaaja pojjeama” jamaya eyaya ojjaña cuana huohui poquianaje —Pabo poanaje—. <sup>21</sup> Eya jamaya ehuhui poaje jjejojo Jodio etii cuaa eya iña canaje Eyacuiñajji equi quea quemojo nequi. Eya cuijeaje'yo sa acanaje cuaa. <sup>22</sup> Jamatii Eyacuiñajjiya eya jaahuana canaje. Jamajjeya ojjaña pojjaajo yahuajo, jjeya pea'ai eyaya ojjaña huasijje esohui quea pame nee Jesusajo huohui tiitiaña. E'e, ojjaña emeshi mese cuana huasijje, ojjaña etii cuana huasijje, ojjaña pea cuana huasijje pea'ai eyaya esohui huohuiaña pea'ai. Emeshi mese Anipa, yahuajo nei Moisesiya, Eyacuiñajjiya pea esohui huohuijjiya yahuajo nei ba'e cuaa pea'ai esohui huohui ca poa jayojja jama eyaya esohui huohuiaña jama ba'a: <sup>23</sup> “Eyacuiñajjiya huoojea'yo ojjaña jaahuanajji Quito quea mimishi acaje'yo cuaa. Oya quea nee nee po mee caje'yo, ba'ehuanasohuajea caje'yo emano'yojji. Jamatii oya emano'yojaa Eyacuiñajjiya oya shequi mee caje'yo, oja Chiya. Ojaya ebionei eyami eyacua poaje'yo. Ohuaya Jodio cuana huasijje, Jodio pojjeama cuana huasijje pea'ai esohui huohui caje: Mimishi cuana cuijea mee'yo majje ba'e tiitii mee caje'yo onijje eyajo” jamaya pea'ai eyaya huohuiaña, de —jamaya Pabohua emeshi mese Anipa, ojjaña cuana onijje ani pea'ai huohui canaje.

<sup>24</sup> Pabohua jamaya huohui cajo, Pesitohua oya jama acanaje ba'a: —Pabo, quea huiso esohui etehue'yo ba majamaja majje eniñepoqui'yo jayojja jama poani miya —acanaje Pesitohua.

<sup>25</sup> —Chojja emeshi mese Pesito, eya quea jjashahuabaqui quehua poani pojjeama, eniñepoqui jayojja pojjeama poani. Ecuea esohui e'e jojo nei, quea ja'a nee pea'ai. <sup>26</sup> Jamaya emeshi meseja Anipaja eba. E'e emeshi mese Anipa, ojjaña Jodio cuanaja esohui etehue'yo miquea eba. Jamajjeya eya minijje mimiani bicho'ama. Ecuea esohui, Jodio etii cuanaja esohui pea'ai quehuajje huohui jjima. Jamajjeya ojjaña ma esohui cuanajo miya quea ja'a nee jjashahuabaquinaje —Pabo poanaje—. <sup>27</sup> Ecuea emeshi mese Anipa, ¿a'a miyaya Eyacuiñajjiya esohui huohuijjiya esohui cuana shajja'ajjaña? Ecuea eba miya; jiquio esohui miyaya quea ja'a nee shajja'ajjaña —Pabohua Anipa acanaje.

<sup>28</sup> Majoya emeshi mese Anipaa Pabo jama acanaje ba'a: —Pabo, miquea emimi oe pojji poanaje. Jamatii miyaya eya Jesusaja epeeji po mee sa aña jjeya nei —poanaje Anipa.

<sup>29</sup> —E'e emeshi mese Anipa, eya miqúanajo mimiani Eyacuiñajji nijje, miqúanana Jesusaja epeejji epojji jjeyahua nei, quiije pishana pojja'a. E'e, ojjaña miqúanaya jiquiojo nequi Jesusaja epeejji eyaya po mee sa aña e jayojja epojji, jamatii jiquio ecua eya baa jjonojji jama epojji pojjeama miqúanaya —Pabohua acanaje.

<sup>30</sup> Majoya emeshi mese Anipa nequisohua majje ojaya emeshi cuiñasahuajji Pesito nijje, Pesitoja jjo'yase Menise nijje, ojjaña etii onijje ani pea'ai poquinaje pea equecuayijji yasijje Pabojo mimiya. <sup>31</sup> Pea equecuayijji yasijje anioque majje ojee mimimiminaje; jama poanaje ba'a: —Jiquio dejja Pabo quea mimishi pojjeama. Jamajjeya oya ecuiajea'yojji pojjeama, ejeanobiajea'yojji pojjeama tii. <sup>32</sup> Anipaa Pesito huohui canaje jama ba'a: —Pabo emeshi mese Sesa nijje mimi sa po'yo ajja jojjemo ecuaaya oya pichojea'yome. Jamatii ohuaya yahuajo huohui canaje jama ba'a: “Eya Shomano emeshi mese etii nijje, Sesa nijje mimi sa poani. Ecuea esohui shajja'ajja majje ohuaya cahuhui cahua ojaya ejjashahuabaquijjijo ejo”. Jamaya poanajejo ecuanajaya oya epichojea'yojji pojjeama —poanaje Anipa.

## 27

### *Pabo besapoquinaje Shoma huasijje, Itania meshi yasijje*

<sup>1</sup> Ecuea epeejji Teopino, eyaya Nocaa jiquio banaje ecuea ecojjaa. E'e, eya Pabo nijje poquinaje. Jamajjeya jecuea tehue ba neineicue! Jama poanaje ba'a: Emeshi mese Anipa pea cuana nijje mimi majje jama huohui canaje ba'a: —E'e, jjeyahua nei ecuaaya Pabo huoojeaje Itania meshi yasijje Shomano emeshi mese etii baa, Sesa baa —acanaje.

Jamajjeya jama amajje ohuaya Pabo, pea cuana eme jeyo'yo pea'ai quia canaje sohuinano huoojeajji Joño bajjani yasijje, Itania meshi yasijje edojjji. Joño Shomano dejja cuanaja meshijo ba'e, Itania meshijo. Oya emeshi mese etiija sohuinano cuana huoojeajji poanaje, Sesaja. <sup>2</sup> Majoya Joñohua Pabo, pea cuana pea'ai ani mee canaje bishe ai yasijje ecuaa nijje. Ma bishe ai mese Anamitio cuiñajjijo ba'e poqui sa poanaje pea cuiñajji cuana huasijje, Asia meshi yasijje. Ojjaña apoa poajo, ebishe mese besapoquinaje. Ecuaa Anitaco nijje besapoquinaje Pabo nijje. Anitaco yahuajo Tesanonica cuiñajjijo ba'enaje, Masenonia meshijo. Oya Pabo chacosahuajji poanaje. <sup>3</sup> Majoya quea huesha nee besapoqui majje ecuaa Sinono cuiñajji yasijje ba'eñaquinaje. Ba'eñaqui majje Joñohua Pabo quea pame nee acanaje; oya poqui mee canaje ecuaa nijje Jesusaja epeejji cuana baa, bobi ijji'aa, aquiana chichaa pea'ai ebesapoquijji. <sup>4</sup> Majoya bishe aijo ani o'oya majje ecuaa Sinonojo ba'e besapoqui o'oyanaje. Beni quea quemohua bishe hui cuiasehuijea cajje enashajohua nane canaje. Jamajjeya ebishe mese besapoquinaje Chipe nasi yasijje. Chipe nasi shanijje, beni chama huasijje besapoquinaje, enashajo ai chama huasijje. <sup>5</sup> Majoya Chipe nasi yejje majje ecuaa bae oje miji yasijje, ena poejji miji yasijje besapoquinaje, Sinisia meshi chipi nei, Panipinia meshi pea'ai yejjenaje quea chipi nee. Majoya besapoquinaje Nisia meshi yasijje. Miña cuiñajji yasijje ba'eñaquinaje.

<sup>6</sup> Miña cuiñajjijo ba'eñaqui majje ecuanaja aquiana cuana jeasohuaquinaje etaja huasijje. Majoya Joñohua pea bishe ai sa'ajja canaje Itania meshi yasijje ebesapoquijji. Bishe ai Anejania cuiñajjijo ba'e Itania meshi yasijje besapoquiani ba majje Joñohua ojjaña dejja cuana eme jeyo'yo ma bishe aijo ani mee canaje. Majoya ecuaa besapoquinaje. <sup>7</sup> Jamatii quea cahui huiso ecuaa jipashineijje besapoquinaje. Beni pajijjiya enashajo quea 'aa nee nee aniya bishe ai nane canaje, hui cuiajjoti canaje pea'ai. Ebesapoquijji quea camaja poanajejo, quiije pishana ecuaa poeyanaje Nido cuiñajji yasijje. Beni quea quemojjo bishe beni poejji miji yasijje besapoqui meeme ajja poanaje. Jamajjeya beniya ecuaa dojojea canaje eeno poejji miji yasijje. Nasi quea quemo Queta nasi bajjani yasijje dojojea canaje. Queta nasi shanijje, benima huasijje besapoquinaje. Nasi huijje jJayejjequinaje Sanomo meshi bajjani huijje. Majoya beniya ecuaa dojojea canaje Queta nasi pea miji yasijje. <sup>8</sup> Nasi sahuajje quea besapoqui camaja poanaje. Jamajjeya ecuaa Enashajoma' cuiñajji yasijje ba'eñaquinaje, Nasea cuiñajji chipi nei.

<sup>9</sup> Ebesapoqui'yo quea cahui huiso nee nee poanaje. Jamajjeya jjohuee she poanaje. Jjohuee shejo quea beni quemajo, enashajo quea quemo nee nee poanajo bishe hui'i'yo chana'. Jamajjeya Pabohua ojjaña cuana bishejo nequi jama acanaje ba'a: <sup>10</sup> —Epeeji cuana, ¡shajja'ajjacue mo! Ecuea eba ecuana jjeyahua nei besapoquiajo quea camaja nee nee poaje. Bishe hui'ije'yo, aqui ana cuana bishejo ani hui'ije'yo pea'ai. Esey a pea'ai hui'i'yo chana' —Pabohua acanaje.

<sup>11</sup> Jamatii sohuinano huoojeajji Joñoja Pabo shajja'ajja jjima. Ebishe meseja esohui, bishe huijeajjija esohui pea'ai ca ca shajja'ajja canaje. Onaaya huohui canaje jama ba'a: —Ecuana jjeyahua nei bishe aijo besapoquije. Ehui'i'yojji pojjeama, de. <sup>12</sup> Enashajoma' cuiñajji quea tai poaje eeno shejo. Jiquiojo ba'e mee ajja; quea huoe nee nee poaje — acanaje cuaa.

Jamajjeya beshahua nei ojjaña dejja cuana jomajo nequi sa po'yo ajja poanaje. Besapoqui sa poanaje quea huesha Penise cuiñajji yasijje. Jama poanaje ba'a: —E'e pojja'a eseya dojo caje Penise yasijje, beni chama pishana huasijje. Jomajo nequije eeno shejo —poanaje cuana.

Enashajoma' cuiñajji beni poeji mijijje nequi; Penise ca ca pea oje mijijje nequi.

*Benipajji quea quemohua bishe nane canaje*

<sup>13</sup> Jamajjeya beni biso nei eeno po'yajo, dejja cuana ma bishejo nequi quea bihui nee jama poanaje ba'a: —E'e, jjeya quea pame nee ebesapoquiji beni sisijo. Cua'a, ebesapoqui —poanaje ojjaña.

Jamajjeya bishe picho canaje, besapoquinaje Queta nasi sahuajje quea chipi nee. <sup>14</sup> Jamatii quijje pishana beni quea quemo nee ena poeji mijijje poeyanaje. <sup>15</sup> Benipajjiya janobajjima nei bishe nane canaje. Beniya bishe huijea canaje. Ebishe meseya beni poejeje bishe poqui meeme ajja poanaje. Quea camaja nee neejojjo ojjaña hueahueanaje. Jamajjeya beniya bishe jamatii dojo canaje. <sup>16</sup> Caona nasi sisi chipi nei yasijje bishe dojo canaje beniya. Caona nasi shaniije jjayejequianajo beni nequioque pishanaquinaje. Jamajjeya bishe sisi quea pame jeyojaca'ajja canaje bishe ai pejejo. Quea camaja poanaje bishe ejeyojacajji beni yeje. <sup>17</sup> Jamajjeya bishe sisi bishe ai biaje jjequisohua majje jeyo canaje. Bishe ai jeyo ca'a canaje pea'ai jjono quea quemohua. Ebishe ai meseya jama acanaje ba'a: —Beniya bishe ai dojo ca chana' meshijaji yasijje, Sinite meshijaji quea chipi nee yasijje. Daqui quea quemo equecuquinini eyajo ba'eya beniya bishe dojocuajji ca chana' —acanaje.

Jamajjeya ma daqui cuana bebo ca'yonaje cuaa beni quea quemajo. Majoya bishe jamatii dojo canaje beniya. <sup>18</sup> Beni quea quemo po tiitianajo mecajjeahua ecuaaya aqui ana cuana bishejo ani jeoqueajejanaje ena huasijje, bishe quea peja epojji nisho. <sup>19</sup> Pea pojjaajo aqui ana cuana quea biquie, bishe chacojji cuana jeoqueajejanaje ena huasijje pea'ai. Jjono cuana quea quemo quea huiso pea'ai jeoqueajejanaje ena huasijje bishe quea peja epojji nisho. <sup>20</sup> Quea huiso cahuime benipajji po tiiti nequinaje. Quea misi nee poanaje. Eshequi chama' poanaje, majameta cuana pea'ai. Ojjaña cuana quea mete nee jjashahuabaquinaje jama ba'a: —E'e de, hui'ije'yo se, de.

<sup>21</sup> Quea mete jjejojya ojjaña cuana ijia'ijia jjima nequinaje quea huiso cahuime. Majoya Pabo ojjaña cojja nei nequinaje. Huohui canaje jama ba'a: —Epeeji cuana, yahuajo eseya Queta nasijo nequi eyaya miquianaya huohui'ajjanaje eseya poqui majje hui'i'yo chana'. Jamatii miquianaya jjashajja'ajjaqui sa po ajja poanaje. Yahuajo ecuea esohui miquiaaya eshajja'ajjanaje jjojemo aqui ana quea huiso ena huasijje jeoqueaje'yo jjima poquiaye. Jiquio bishe pea'ai hui'i'yo jjima pome. <sup>22</sup> Jamatii ja'a quea mete pojji! Ecuea eba jama ba'a: Jiquio bishe hui'ije'yo. Jamatii eseya hui'i'yo ajja poaje. <sup>23</sup> E'e, eya Eyacuiñajjiya epeeji, ojaya esohui huohuiji. Eyacuiñajjiya eya jaahuana cani. Mecajje ojaya esohuidojojji huoojea canaje enijje mimiya. <sup>24</sup> Jama poanaje ba'a: “Pabo, ja'a quea mete pojji! Eyacuiñajjiya miya huoojea caje Shomano emeshi mese yasijje esohui huohuiya. Jamajjeya Eyacuiñajjiya miya jaahuana caje, miya quea pame nee acaje. Jamajjeya ojjaña cuana minijje besapoquiani pea'ai ohuaya jaahuana caje'yo, ehui'i'yojji

pojjeama” eya acanaje esohuidojojjiya. <sup>25</sup> ¡Jamajjeya quea bihui nee pocue! Eyacuiñajjiya esohui jayojja jama ohuaya acaje e'e jojo nei. Jamaya ecuea eba. <sup>26</sup> Jamatii beniya bishe dojo caje nasi yasijje; cuiayijejea caje. Jaañaqui majje cuiapojjea caje meshijajijo enashajo quea quemohua —Pabohua acanaje.

<sup>27</sup> Majoya quea cahui huiso nee nee, 14 cahuime bishe jamatii dojo canaje beniya. Bishe dojo canaje bae sahua huasijje, Adia ena huasijje. Mecashono bishe chacojji cuaa jama acanaje ba'a: —E'e pojja'a eseya meshi chipi nei dojo cani beniya.

<sup>28</sup> Majoya ohuaya aquiana quea biquie jeyo canaje quea jjono aojo. Jeaoquea canaje ena huasijje. Ipia'ajja canaje ache doe ebajji. Jjono quea aojo ba canaje ena quea doe nee nee, 36 metro doeme. Majoya quijje pishana ipia'ajja ca o'oyanaje. Ba canaje ena quea doe pishana, 26 metro doemeya. <sup>29</sup> Jamajjeya quea ajjajja nee nee poanaje jama ba'a: —Beniya bishe dojo caje, cuiayijejea capoquije bajjoo ani yasijje. Bishe jjacuiapojjeaquiñaquije nei nei, de, bajjoojo pojja'a, de —taaame poanaje.

Jamajjeya bishe chacojji cuaa ebeca pee pea'ai ejjashehuaquijji iyanobia canaje ena huasijje beniya edojo capoani jjejojo. Jeyo ca'a majje epojja ishoa'ajja po ba'enaje quea mete nee nee. <sup>30</sup> Bishe chacojji poani aje oe jjashahuaba taiquinaje ebesapoquijji etaja huasijje, enequisohuaquijji nisho epoquiquehuajji. Mecashono bishe sisi ecapashineijje jeaoqueajea canaje ena huasijje. Sijje poanaje jama ba'a: —Ecuana poquije bishe hui jeyohua. E'e, bishe hui ejjashehuaquijji ena huasijje jeaoqueajea poquije ecuana —jama sijje pomeya poanaje.

<sup>31</sup> Pabohua ca ca sohuinano cuana, sohuinano huoojeajji Joño pea'ai huohui canaje jama ba'a: —Chojja. Bishe chacojji cuana bishe aijo mi nequijajo Eyacuiñajjiya eseya ejaahunajji pojjeama —acanaje.

<sup>32</sup> Jamajjeya Paboya sohui shajja'ajja canaje sohuinano cuaa. Jjono cuana bishe sisi ejeyojji'ya jajasejjajea canaje. Jajasejjajea cajje bishe sisi jamatii dojojea canaje se'ejjama'.

<sup>33</sup> Beshahua nei jjapojjaquianijo, Pabohua ojjaña ecuana bobi ijjiia mee canaje. Huohui canaje jama ba'a: —Miquianaya quea huiso nee nee cahuime, 14 cahuime ijjiia'ijjiia jjima nequi, cahui jjima nei nequi beni yajjajo, enashajo yajjajo, ehui'ije'yo poso jjejojo. <sup>34</sup> Jamajjeya ¡ijjiia'ijjiia socue! ¡Bobi ijjiacue! O'o mi oe shocuishocuije so'o e'ijjiia'ijjiia jjejojo, mano'ama poaje eshocuishocui besapoquijji. Hui'i'yo ajja se poaje bishe hui'i'yajo. Ojjaña eseya jamatii quea pame poaje —Pabohua acanaje.

<sup>35</sup> Jamaya huohui majje Pabohua pahui iñanequia majje bihuia canaje Eyacuiñajji ojjañaja ecuanaja ebajji. Pahui mijisisi majje ijjiia canequinaje. <sup>36</sup> Pabo ba majje ecuana quea bihui nee poanaje. Jamajjeya bobi ijjiia pea'ainaje ecuaaya. <sup>37</sup> E'e, eseya jiquio bishejo ani dejja mahuiso ba'a: quea huiso nee nee, 276 huisome se poanaje. <sup>38</sup> Jamajjeya aje oe ojjaña cuana jeje canaje. Jeje majje quea huiso anoso ai, pahui pohui pea'ai jeaoqueajea canaje ena huasijje bishe quea peja epojji, eba'ecuaya'yojji pea'ai.

### *Bishe ai hui'i'yonaje*

<sup>39</sup> Jjapojjaquijajo mecajjeahua nei bishe chacojji cuaa meshi quea chipi nee ani ba canaje. Onaja ma meshi ba jjima, ache meshi shai. Huesha'ama meshijaji enashajoma' pishana, quea coe pishana ba canaje. Jamajjeya echacojji cuana poqui sa poanaje bae sahua huasijje, ena coe yasijje bishe ba'ehuanañaquiya nisho. Jomajo enashajo quea quemo pishana yani. <sup>40</sup> Majoya ejjashehuaquijji cuana jajasejjajea canaje, dojojea canaje, ejehuibaje bishe quii ca'ajji ejeyo ba'e jjono jajasejja acanaje bishe epii nei edojo cajji. Majoya daqui quea quemo quecuacuini majje nequiasohua canaje, beniya bishe huijje dojobesa canaje meshijaji yasijje. <sup>41</sup> E'e, beniya bishe ai hui dojobesa canaje. Meshijaji biajje huanasohuajjea capoquinaje. Bishe jaañaquinaje. Bishe chacojji cuaa bishe meshijajijo hui jaañaquijajo quecuayijejea'ajja ca'yo nequinaje. Enashajo quea quemohua, quea cuejipashi neeya bishe quijje nane amajje bishe cuiapojjea canaje.

<sup>42</sup> Sohuinano cuana jama poanaje ba'a: —Bishe hui'i'yajo, dejja cuana ejeyo nequi meshi



yasijje shocuishocui majje poquiquehua chana'. Jamajjeya eseyaya ojjaña joya eme ejeyo ani quecuajea jeyojeyoje'yo —poanaje sohuinano.

<sup>43</sup> Jamatii sohuinano huoojeajjiya Joñohua Pabo nahue sa acanijo huohui canaje jama ba'a: —Dejja cuana eme jeyo ani ¡a'a quecua'yojji! ¡Pichojea'yocue oe! ¡Joya shocuishocuiani tohuua meecue ena huasijje! ¡Meshi yasijje cashocuishocui besapoquiahua! <sup>44</sup> ¡Pea cuana joya shocuishocui ajja ca ca huepee biajje, bishe ecuiapojojea biajje cuanaya cabesapoquiahua meshi yasijje! —acanje Joñohua.

Jamajjeya ojjaña cuana meshi yasijje besapoquinaje. Hui'i'yo jjima nei nei cuana. Nequisohuaquinaje etaja huasijje, ojjaña ecuanaya.

## 28

### *Pabo Manita nasijo nequinaje*

<sup>1</sup> Jamajjeya ojjaña ecuanaya meshi yasijje besapoqui'yonaje. Etaja huasijje nequisohuaqui majje dejja cuana jomajo ba'e ecuaaya banaje. Ohuaya ecuan huohui canaje: —Jiquio meshi Manita nasi bajjani. Quea quemmo nasi —acanje.

<sup>2</sup> Ese ejja cuana jomajo ba'e mase'ama, quea pame nee nee. Miminaje ojjaña cuana nijje. Enapajji quea huoejo cuaqui quea huiso chicha majje dahuahuojje canaje. Jama acanje ba'a: —¡Poecue cuaqui yasijje; ojjaña nequiana jjayoquihuacue! ¡Quea pame nee ecuan nijje ba'ecue! —acanje.

<sup>3</sup> Majoya Pabohua acui sisi cuana chicha canaje cuaqui. Ma acui sisi cuana cuaqui quea jiji nee, quea quiyo nee yasijje jeajea canijo, peyo se najjiya Pabo me ijia neinei ca'yonaje.

<sup>4</sup> Nasi aijo ba'e dejja cuaa peyohua me ijia caje Pabo ba canaje. Jamajjeya oya cuana ojee mimimiminaje jama ba'a: —E'e jojo nei jiquio dejja pea quecuajji. Jamajjeya oja mimishijo peyohua oya ijia canaje. Oya hui'i'yo jjima bae aijo. Jamatii jjeyahua nei oya manojeyo oja mimishijo —jama posoya acanje cuaa.

<sup>5</sup> Jamatii Pabohua peyo jeajea canaje cuaqui yasijje. Nee'ama, mano jjima oya poanaje, shejje jjima pea'ai. <sup>6</sup> Ojjaña cuaa Pabo ba neinei ca aninaje. Jjashahuabaquinaje jama ba'a: —Jjeyahua nei oya shejjeje ba'ajja. Jjeya nei pojja'a oya manojeyo —poanaje.

Chojja, Pabo mano'ama nei nei poanaje. Quijje pishana Pabo quea ja'a nee nee, quea mano pojjeama ba majje ma dejja cuaa oya jama acanje ba'a: —Oya emano'yoyji pojjeama —cuana poanaje.

Jamajjeya onaaya huohui canaje jama ba'a: —Oya dejja pojjeama. Oya pea eyacuiñajji dejja jayojja poeyanaje, de —poso acanje cuaa ojjaña.

<sup>7</sup> Manito nasi emeshi mese Pomino bajjani poanaje. Ojaya que cuana huesha'ama nequi. Ohuaya ecuan iyaa canaje ojaya equi cuana huasijje. Ecuana nijje miminaje quea pame nee nee. Ojaya equi cuanajo ecuan ba'e mee canaje pea beca peejjima cahuime, Pominohua. <sup>8</sup> Emeshi mese Pominoja chii ca ca quea mano nee jaa, seeseje; quea quiyo nee nee pea'ai. Jamajjeya Pabo oja equi quecuayijji yasijje dobiquinaje o baa, emanojaa baa. Ba majje Pabohua ma emanojaa eyami biajje ojaya eme huana canaje Eyacuiñajji nijje emimijji o jjaajaqui mee'yojji. Quea pame nee, quea aja nee Pominoja ejeajji po'yonaje. <sup>9</sup> Jamajjeya Pominoja chii huaquia'yonaje ba majje ojjaña emanojaa cuana nasi aijo ba'e poeyanaje Pabo que. Jesusaa Pabo ojjaña huaquia meesahua ca'yonaje. <sup>10</sup> Majoya ma dejja cuana quea bihui nee nee poanaje. Aquiana quea huiso ecuan quia canaje sosema'. Quijje ecuan pea bishe ai yasijje anisohuaqui'yonaje. Majoya nasi aijo ba'e cuaa quea huiso pea aquiana cuana eba'ejji ecuan quia canaje sosema'.

### *Pabo Shoma cuiñajji yasijje besapoquinaje*

<sup>11</sup> Jamajjeya ecuan Manita nasijo ba'enaje pea beca peejjima ba'ime, 3 ba'ime. Majoya ecuaaya pea bishe ai banaje eyacuiñajji beca jaa bajjani, Casito Pono bajjani. Ma bishe ai Anejanía cuiñajjijo jaa poe majje eeno shejo Manita nasijo aniñaquinaje; majoya besapoquinaje Shoma meshi yasijje eba'eñaquijji. Jamajjeya sohuinano huoojeajji Joñohua ecuan ma bishe aijo ani mee canaje. <sup>12</sup> Majoya besapoqui'yo majje ecuan pea

nasi yasijje poeyanaje, Sinacosa cuiñajji yasijje ba'eñaquinaje. Jomajo ecuana nequinaje pea beca peejjima cahuime. <sup>13</sup> Majoya Sinacosajo ani ecuana besapoqui o'oyanaje. Itania meshi yasijje poeyanaje. Shejio cuiñajji yasijje ba'eñaquinaje. Majoya mecajjeahua eeno beni sisi poanaje. Jamajjeya beniya bishe dojo canaje quea pame nee. Beca cahuime po majje ecuana Poteoni cuiñajji yasijje ba'eñaquinaje, Itania meshi yasijje. <sup>14</sup> Poteoni cuiñajjijo Jesusaja epeeji quea huiso cuana ba'enaje. Ohuaya ecuana iyaa canaje oja equi yasijje e'aniiji. Jamajjeya ecuana ma cuiñajjijo nequinaje me oeje beca cahuime, 7 cahuime Jesusaja epeeji cuana nijje. Majoya ecuana poquinaje Shoma cuiñajji quea quemu huasijje ejiojjijje. <sup>15</sup> Jesusaja epeeji cuaa Shomajo ba'eya shajja'ajja canaje Pabo poeyani. Jamajjeya oya cuana Pabo ishoa sa po ajja Shomajo. Poeyanaje Apio cuiñajji yasijje, pea cuiñajji yasijje yohua bajjani yasijje ba'a: Pea Beca Peejjima Equi cuana huasijje pea'ai Pabo baa. Jamajjeya Jesusaja epeeji cuana jomajo tii ba majje Pabo quea bihui nee nee poanaje. Eyacuiñajji bihuia canaje, Pabohua.

### *Pabo Shomajo ba'enaje*

<sup>16</sup> Majoya ecuana Shoma huasijje poquinaje. Shomajo nequiñaqui majje sohuinano huoojeajji Joñohua Pabo huohui canaje jama ba'a: —Pabo, ¡miya mee nei ba'ecue jiquio equiojo! —acanjje.

Jamajjeya oe sohuinano Pabo jaahuanajji nequinaje ma equijo pea'aiya.

<sup>17</sup> Majoya pea beca peejjima cahuime po majje Pabohua Jodio etii cuana iyaa canaje. Ojee jjachichaquijajo Pabohua oya cuana huohui canaje jama ba'a: —Epeeji cuana, ¡shajja'ajjacue mo oe! Ecuea Jodio cuana quea mimishi ajjima poanaje. Eseyaya etiiquiana cuanaja esohui pajea'yo jjima ecuea pea'ai. Jamatii eya Jenosanenajo nequi Jodio etii cuaa eya iña canaje. Eya quia canaje Shomano dejja cuana huasijje. <sup>18</sup> Shomano etii cuaa eya huohui'ajja canaje. Jamatii ecuea esohui shajja'ajja majje onaaya eya ba canaje quea mimishi pojjeamajajo ecuiajea'yoyji pojjeama onajaya, ejeanobiajea'yoyji tii pojjeama pea'ai. Onaaya eya pichojea sa acanjje. <sup>19</sup> Jamatii Shomano cuaa eya pichojea sa acanajo, Jodio etii cuana quea mase nee, quea quene nee nee poanaje. Jamajjeya eyaya jama anaje ba'a: “Shomano emeshi mese etii nijje, Sesa nijje eya mimi sa poani. Ecuea esohui shajja'ajja majje ohuaya cahuohui cahua ojaya ejjashahuabaquijji ejo” eyaya anaje. Jamatii ecuea Jodio cuana niñeba jjima poanaje, o niñeba sa po ajja eya. Chojja, Jodio cuana ecuea huapa pojjeama cuana. <sup>20</sup> Jamajjeya eya miquiana nijje mimi sa poani. E'e, ojjaña Isaeni cuaa ishoa'ajja canaje Eyacuiñajjija huoojea'yo ojjaña jaahuanajji Quito. Quitohua ojjaña cuana ba'e mee caje o'oya eyajo onijje. Eyaya ojo huohuiañajo, Jodio etii cuaa eya jeyo mee canaje baa jjonohua. ¡Bacue jiquio baa jjonon ba'a! —Pabohua acanjje.

<sup>21</sup> Jodio cuaa Pabo saja'a canaje jama ba'a: —Pabo, Jodio cuana Jodea meshijo ba'eja ecuana huasijje esohui etehue'yo mijo huoojea jjima. Ecuana epeeji Jodea meshijo ba'eja poe jjima mi huohuijji pea'ai. Oya cuana poe jjima mi niñebajji epo pea'ai. <sup>22</sup> E'e, ecuanaya miquea esohui shajja'ajja sa poani. Ecuana eba ojjaña meshijo pea cuaa Jesusaja epeeji cuana niñeba cani. Jamajjeya shajja'ajja neinei sa poani ecuanaya —acanjje Jodio cuaa. <sup>23</sup> Majoya Pabo huohui canaje jama ba'a: —E'e, ecuanajaya epeeji cuana huohui majje ojjaña poeje miquea esohui shajja'ajjaa.

Jamajjeya quijje pishana pea pojajajo quea huiso Jodio cuana mecajjeahua poeyanaje Pabo shajja'ajjaa. Pabohua esohui huohui canaje quea huiso nee nee. Meca cuanaje oya mimi tiitii nequinaje Eyacuiñajjija ojjaña huoojeajji poajejojo. Jodio cuana ba mee sa acanjje Jesosa Eyacuiñajjija huoojea'yo ojjaña jaahuanajji, Quito. Pabohua Moisesija etehue'yo cuanajo, Eyacuiñajjija esohui huohuijji yahuaajo nei ba'eja esohui etehue'yo pea'aio Jodio cuana ba mee sa acanjje Jesosa e'e jojo nei Eyacuiñajjija huoojea'yo ojjaña jaahuanajji, Quito. <sup>24</sup> Quea huiso Jodio cuaa ojaya esohui shajja'ajja majje huohui canaje jama ba'a: —E'e de, ojaya esohui e'e nei —acanjje.

Pea cuana ca ca ojaya esohui shajja'ajja sa po maja ajja. Jesosa Eyacuiñajjija huoojea'yo ojjaña jaahuanajji pojjeamajo poso quea quene nee poanaje cuana Pabohua jama

huohuime acajje. <sup>25</sup> Jamajjeya ojee cuana anica jjamimicuiajea nobiajeaqui poquinaje. Ojjaña cuayaquianijo Pabohua jama acanaje ba'a: —Edojjoshahua Pameya Eyacuiñajjiya esohui huohuiiji Isaia yahuajo nei nei esohui huohui meesahua canaje miquianajaya etiiquiana cuana huasijje. E'e, miquianaya quea sapa ca'a poanijo shajja'ajjacue ojaya esohui etehue'yo! Jama aca poa Isaiaa yahuajo nei ba'a:

<sup>26</sup> “Jodio cuana huasijje poqui'yo majje huohuicue jama ba'a: —Shajja'ajja majamaja majje jamatii ecuea esohui quea quehua poaje miquianajaya. Ba majamaja majje jamatii jjabahuejjaqui ajja poaje. <sup>27</sup> Jiquio Jodio cuana quea jjashahuabaqui quehua poani tii tii. Quea sapa ca'a. Jjashajja'ajjaqui sa po'yo ajja. Ba sa po'yo ajja pea'ai. Ba sa pojji joggemo ohuaya ba ca'yome. Jjashajja'ajjaqui sa pojjiya joggemo jjashajja'ajjaqui'yome. Quea jjashahuabaqui ja'a po sa pojji jjemo quea jjashahuabaqui ja'a po'yome. Jamajjeya oya cuana ecuea epeeji cuana po'yome. Eyaya ojaya mimishi cuana cuijea'yome pea'ai”.

Jamaya Eyacuiñajjiya Isaia huohui mee ca poa.

<sup>28</sup> Majoya Pabohua jama acanaje ba'a: —Jamajjeya ¡bacue! Eyacuiñajjiya ojjaña jaahuanajji Jesosa huoojea canaje mano'yohua, mimishi cuana cuijea'yoggi, mimishi sosequia'yoggi pea'ai. Ohuaya ojjaña ojaya epeeji cuana ba'e tiitii mee caje'yo onijje eyajo. Jodio cuana shajjama' poanijo, Eyacuiñajjiya eya huoojea canaje Jodio pojjeama cuana huasijje ojaya esohui huohuiya. Jodio pojjeama cuaa ca ca shajja'ajja caje, de — Pabohua acanaje.

<sup>29</sup> Majoya Pabohua esohui huohuijeyo cajo, Jodio cuaa oya jiñajea ca'yonaje. Majoya oya cuana janobajjima nei ojee jjamimicuiajea nobiajeaquinaje.

<sup>30</sup> Jamajjeya beca shequijame Pabo oe nei ba'enaje oe equijo, ejjeshejji sosejje. Ojjaña cuana o que poeyajo, ojjaña cuana nijje quea bihui nee miminaje, quea bei nee poanaje.

<sup>31</sup> Ohuaya huohui canaje Jesosa ojjaña huoojeajji poaje. Emeshi Mese nei Jesosa Quitojo huohui majamaja canaje mete'ama. Pea cuanaja oya huohui pajea mee jjima poanaje, jamatii oya sohuinano cuanaja nahue poanaje. Jamaya poanaje.

Oeya ecuea esohui. Eya Noca bajjani esohui tehuejji. Apoa.

## PABOJA ETEHUE'YO SHOMAJO BA'E CUANA HUASIJJE ROMANOS

*Pabohua esohui tehue canaje Jesusaja epeeji cuana Shoma cuiñajjiyo ba'e yasijje*

<sup>1</sup> Eya Pabo bajjani. Jesusaja epeeji cuana, eyaya jiquio esohui tehueña miqiana huasijje Shoma cuiñajjiyo ba'eca huasijje. Eya ca ca iña Jesosa Quitoja huoojea'yo ojaya esohui huohuiji. Eyacuiñajjiya eya babaca canaje ojaya esohui huohuiji epoji. Ohuaya eya huoojea canaje quea huiso meshi yasijje ojaya esohui quea pame nee Jesusajo huohuiya.

<sup>2</sup> Yahuajo nei nei Eyacuiñajjiya ma esohui quea pame Jesusajo ojaya etehue'yojo tehue mee ca poa ojñaña ebajji. Ojaya esohui huohuiji yahuajo nei ba'e ma esohui huohui neinei mee ca poa pea'ai. <sup>3</sup> Jamaya Eyacuiñajjiya eseya ba mee cani oja Bacua Ejja oe nei Jesosa ese jayojjaya yamiji poeyanaje. Cuayanaje Maniaja bacua. Jodio cuanaja emeshi mese quea pame nee Dabi bajjani ojaya etiquiana, huapa pojjeama yahuajo ba'ya poa. <sup>4</sup> Oya Jesosa Quito ese jayojjaya yamiji poanaje. Oya Eyacuiñajji nei pea'ai, oja Chii jayojja nei nei, mimishi'ama nei nei. Oya mano'ya poa. Jamatii Eyacuiñajjiya quea ca'a nee neeya oya emano'yojaa shequi mee ca o'oyanaje. Jamaya ohuaya ojñaña ba mee canaje Jesosa e'e jojo nei oja Bacua Ejja, esejaya Emeshi Mese nei. <sup>5</sup> Eya Jesusaja epeeji poanijo Eyacuiñajjiya eya ojñaña meshi yasijje huoojea canaje jama ba'a: —¡Poquicue miya ojñaña Jodio pojjeama cuana huasijje! ¡Ecuea esohui ba meequicue Jesusajo! ¡Onijje jjapeequi meesahuacue! Jamajjeya onaaya Jesosa bihuia tiitii caje'yo —jamaya Eyacuiñajjiya eya huoojea canaje quea pame nee.

<sup>6</sup> E'e ecuea epeeji cuana Shomajo ba'e, Eyacuiñajjiya miqianaya babaca canaje pea cuana nijje Jesosa Quitoja epeeji epoji. <sup>7</sup> Jamajjeya eyaya miqiana que jiquio esohui tehueña. Miqianaya Eyacuiñajjiya quea jea nee nee. Ohuaya miqianaya babaca canaje ojaya epeeji nei epoji. ¡Eyacuiñajjiya esejaya Chii aiya, Jesosa Quitohua esejaya Emeshi Mese neiya miqianaya cajaanahua cahua; quea bei nee caba'e meesahua cahua pea'ai!

*Pabo ojaya epeeji cuana Shomajo ba'ejo Eyacuiñajji nijje mimiani*

<sup>8</sup> Ecuea epeeji cuana Shomajo ba'e, ojñaña meshijo ba'e cuana miqianajo mimiani quea bei Jesusaja esohui jayojja jama ba'yanijo. Ma shajja'ajja majje eyaya Jesosa esejaya Chii ai pea'ai bihuiaña jama ba'a: —Eyacuiñajji, miya quea pame nee. Ojñaña eba miyaya miquea epeeji cuana Shomajo ba'e jaahuanaña —eya poani.

<sup>9</sup> Eyaya e'e jojo nei Eyacuiñajjiya esohui quea pame nee oja Bacua Jesusajo huohui tiitiaña quea bihui nee. Ojaya eba eya onijje mimi majamajani miqianajo. <sup>10</sup> Eya jama poani ba'a: —Eyacuiñajji, yahuajo eya poqui sa poanaje Shoma huasijje Jesusaja epeeji cuana baa. Jamatii poqui mee jjima eya miquea. Eyacuiñajji, ¿a'a jjeya eya Shoma huasijje huoojea sa aña miyaya? —eya jamaya Eyacuiñajji nijje mimi majamajani.

<sup>11</sup> E'e, eya miqiana ba neinei sa poani Jesusaja epeeji quea ca'a nee epo meesahua'y-ojji. Edojjoshahua Pameya eya ba mee canaje Eyacuiñajjiya esohui eyacua quea pame. Ma esohui eyacua shajja'ajja majje miqianaya Jesusaja epeeji quea ca'a nee poaje.

<sup>12</sup> Miqianaaya eya baje Jesusaja epeeji quea ja'a nee poani. Cuanaya miqianaya Shomajo ba'e Jesusaja epeeji quea ja'a nee baje eyaya. Jamajjeya Eyacuiñajjiya eseya ojaya epeeji cuana quea ja'a nee po meesahua caje'yo.

<sup>13</sup> Ecuea epeeji cuana, ¡bacue jiquio esohui! Yahuajo eya poqui sa neinei poanaje miqiana baa. Jamatii eya poqui mee jjima, de. E'e, eyaya Jodio pojjeama cuana pea meshi cuanajo ba'e jjapeequi meesahuanaje Jesosa nijje. Jamaya eyaya miqianaya Jesosa nijje jjapeequi meesahua sa aña pea'ai. <sup>14</sup> Eyacuiñajjiya eya huoojea canaje ojaya esohui huohuiya ojñaña cuana huasijje jama ba'a: Ojñaña joya esejaya esohuijo mimiani yasijje, ojñaña pea esohuijo mimiani yasijje pea'ai, ojñaña joya papeni ba po jjima huasijje,

joya papeni ba epo cuana huasijje pea'ai, ojjaña huasijje. <sup>15</sup> Jamajjeya eyaya miqiana Shomajo ba'e yasijje Eyacuiñajjija esohui huohui sa aña.

*Jesosa nijje jjapee neinei quiani mimishi cuijea ca'yani Eyacuiñajjiya*

<sup>16</sup> ¡Bacue! E'e jojo nei ojjaña juya Jesosa nijje jjapee neinei quiani Eyacuiñajjiya mimishi cuana cuijea neinei caje'yo, juya ojaya esohui shajja'ajja majje e'e jojo nei acani. Jamaya ecuea eba. Jamajjeya eyaya bicho'ama ma esohui huohui majamajaña ojjaña cuana huasijje. E'e, Jodio cuaa ma esohui shajja'ajja majje, Jodio pojjeama cuaa shajja'ajja canaje pea'ai. <sup>17</sup> Eyacuiñajjija esohui quea pame Jesusajo shajja'ajja majje eseyaya Eyacuiñajjija ejjashahuabaquijji baña jama ba'a: —Ojjaña Jesusaja epeeji nei nei eyaya mimishi cuana cuijeaje'yo e'e jojo nei epoji. Jesusaja epeeji pojjeamaja mimishi ecuijea'yojji pojjeama —Eyacuiñajji poani.

*Ojjaña Jodio cuana, Jodio pojjeama pea'ai quea mimishi poani*

<sup>18</sup> ¡Bacue ecuea esohui ojjañaja mimishi cuana! Eyacuiñajji eyajo ba'e quea quene nee nee poaje ojjaña coya mimishi po majamajani nijje. Quea nee nee acaje'yo. Oya cuana aje oe jama poani ba'a: Quea mimishi poani tii, Eyacuiñajji bihuia ajja, mimishi pajea sa po'yo ajja. Eyacuiñajjija esohui shajja'ajja sa po ajja, pea cuana esohui shajja'ajja mee ajja pea'ai shajjama' cuana nijje ejjapeequijji jjejojo. <sup>19</sup> E'e, Eyacuiñajjiya ojjaña ba mee ca poa oya quea pame nee, quea ca'a nee enequi tii tii. Jamajjeya ¡Eyacuiñajji ojjaña caba cahua, de! <sup>20</sup> E'e, oya ca ca oe Eyacuiñajji nei quea ca'a nee nee enequi tii tii. Ohuaya ca ca oe ojjaña pana ca'ya poa. Jamajjeya ojaya epana'yo ba majje ¡juya e'e jojo nei Eyacuiñajji bacue, ojjaña! Jamatii beca cuana siajje poani jama ba'a: —Eseyaya Eyacuiñajji ebajji pojjeama, jaba meequi ajja, de. ¿Yajja bame yajji eyami ebajji jojo? —poani. ¡A'a jama siajje pomeya pojji!

<sup>21</sup> E'e de, yahuajo nei ojjañaja eba Eyacuiñajji yani. Jamatii onajaya Eyacuiñajji bihuia jjima jama ba'a: —Eyacuiñajji, miya oe nei quea ca'a nee nee enequi tii tii —jamaya ajjima—. Jamaya Eyacuiñajji, miya quea pame nee nee —ajjima. Oya cuana jamaya jjashahuabaqui jjima, de.

Jamajjeya oya cuana quea quehua jjashahuabaquiani, quea mimishi. Jiquio ecua mecaje quea misi poquiani jayojja jama oya cuana quea mimishi ba'yani, Eyacuiñajji ba pojji. <sup>22</sup> Ojjaña ba epo poso jjabaquiani. Chojja, ba jjima nei nei quianaja. Quea mimishi nee nee jjashahuabaquiani, ojjaña de. <sup>23</sup> Onaaya aje oe Eyacuiñajji nisho bihuia cani; dejja nisho, cuichoiji nisho, aquiana nisho, peyo nisho pea'ai ne cani ebihuijji. Eyacuiñajji nei ca ca bihuia jjima, de. Eyacuiñajji ca ca oe enequi tii tii quea pame nee nee.

<sup>24</sup> Jamajjeya oya cuana quea mimishi ca'a nee nee; jjashajja'ajjaqui ajja juyaya Eyacuiñajjiya oya cuana cajaa acani jama ba'a: —Oya cuana shajjama' nei nei. Jamajjeya quea mimishi caba'yahua jamatii. Eyaya oya cuana mimishi pajea meesahua maja ajja —Eyacuiñajji poani.

Jamajjeya cajaa a'yo majje ojjaña ojaya ejjashahuabaquijji tai jayojja jama ca'atiitii cahua cuaa. Pea cuana nijje aje oe quea mimishi nee capoahua. <sup>25</sup> ¡Bacue! Eyacuiñajji e'e jojo nei oe nei yani. Ohuaya ojjaña pana ca'ya poa. ¡Ojjaña oya cabihuia tiitii cahua! Jamatii juya quea mimishi neeya Eyacuiñajji bihuia pajea cani eyacuiñajji nisho bihuijji. E'e, oya cuana quea jjashahuabaqui quehua poani, de. <sup>26</sup> Jamajjeya Eyacuiñajjiya oya cuana cajaa acani jama ba'a: —Oya cuana shajjama' nei nei. Jamajjeya jamatii quea mimishi canequiahua bicho'ama. Ecuea oya emimishi pajea meesahua'yojji pojjeama —Eyacuiñajji poani.

E'e, quea mimishi nee nee ba'yani bicho'ama. Eyacuiñajjija esohui jama ba'e ajja. Epona cuana aje oe pea epona nijje quea mimishi nee poani, ojahue nisho acani, jjaso cojjoquiani. Pea cojjojji pea'ai poani. <sup>27</sup> Dejja cuana pea'ai aje jjaja oe jamaya quea mimishi epona jayojjaya po pea'ai yani. Ehuase jea majje epona nijje pojjeama jaani, pea dejja nijje quea mimishi ba'yani. Onijje dejja nijje jjasehuejja cojjoquiani. Jamajjeya

jjashajja'ajjaqui ajja jojaya Eyacuiñajjiya oya cuana cajaa acani. Ca'a'ama poani, quea jjashahuabaqui tai poani pea'ai.

<sup>28</sup> Eyacuiñajjiya epana'yo ojaya eba. Jamatii oya cuana jama poani ba'a: —E'e pojja'a Eyacuiñajji e'e jojo nei yani. Jamatii ¿apiojji acuae oya shajja'ajja cajji so'o? Cajaa —oya cuana poani.

Jamajjeya Eyacuiñajjiya oya cuana jama acani ba'a: —Oya cuana ca ca oe quea jjashahuabaqui tai po tiitiiani; quea mimishi ba'yani tii bicho'ama jjejojo. Jamatii quea tai caba'yahua —Eyacuiñajji poani.

<sup>29</sup> Jamajjeya ojjaña cuana quea mimishi nee nee poani tii tii. E'e, quea mimishi ba'yani, quea dejja tai, quea nishehui, onaja aquiana jea ba cani, pea cuana boti'ama nei nei poani, ona mimishi po meeji pea'ai poani. <sup>30</sup> Pea quecuajji poani, jjamimicuijjea nobiajeaquijji poani, jjadasiaquijji poani, ojaya epeeji ñameeji poani equecua mee'yojji, mimijajijji poani, pea cuanao maimajji, Eyacuiñajji cajaa acani, pea cuana jeabichajeajji poani, pea nijje mimi ajja pea'ai. Oya mimiani ojaya ejjashahuabaquijji pea cuana quea bihui po meeji nisho, jjashahuaba tiitiquiani mimishi ya'yojji. Oja chii, oja nae shajja'ajja sa po ajja pea'ai. <sup>31</sup> Jjashahuabaqui ajja, mimishi cuana quea pame poso acani, ojaya ehuohui jama a'ajja pea'ai. Huapa pojjeama cuana boti'ama acani, pea cuana quea nee po mee sa acani; pea quea nee, quea yeno po mee majje yeno'ama poani. <sup>32</sup> Dejja quea mimishija eba Eyacuiñajjiya esohui etehue'yo e'e nei jama poani ba'a: “Ojjaña joya quea mimishi poani quea nee nee poaje'yo. Mano'yo majje cuaqui yasijje poquije'yo. Enijje eyajo enequi'yojji pojjeama tii tii” Eyacuiñajji poani.

Maya ojjaña mimishi cuanaja eba. Jamatii shajjama' poani tii tii. Pea cuana aje oe quea mimishi po mee cani jama ba'a: —E'e, ocuee. ¡Jamaya a'ajja! —bihuia nisho cani.

## 2

### *Eyacuiñajjiya ca ca oeyaya huohui caje joya mimishi'amajo, joya quea mimishijo pea'ai*

<sup>1</sup> Ecuea epeeji cuana, ¿a'a miquianaya jjashahuabaquiani miya ca ca oe quea pame, ma dejja mimishi cuana jama pojjeama? ¡A'a pea cuana jama ajji ba'a: —Oya cuana quea mimishi nee poani. ¡Quea nee nee capo mee cahua Eyacuiñajjiya! —a'a jamaya mimijji!

¡Dee! Miquianaaya beca cuaa ona jayojja jama quea mimishi ña pea'ai. Jamajjeya Eyacuiñajjiya miquianaya quea nee nee po mee caje'yo ona jayojjaya. <sup>2</sup> Ecuana eba Eyacuiñajjiya ejjashahuabaquijji e'e nei, ojjaña ojaya eba. Jamajjeya ojjaña joya quea mimishi ba'yani ohuaya quea nee nee po mee caje'yo, Jodio cuana, Jodio pojjeama cuana pea'ai, ojjaña nei nei. <sup>3</sup> Miya quea mimishi poanijo ¡a'a jjashahuabaquijji jama ba'a: —Eyacuiñajjiya pea cuana quea nee nee po mee caje'yo shajjama' poani jojaya. Eya ca ña cho, quea nee epo meeji pojjeama —a'a jamaya pojji!

¡Dee! Miya quea mimishi poani ona jayojja. Jamajjeya Eyacuiñajjiya miya quea nee nee po mee caje'yo ona nijje. Miya ojaya eba, de, ejjanequiquehuaquijji pojjeama miya. <sup>4</sup> E'e pojja'a miya quea quehua jjashahuabaquiani jama ba'a: —Eyacuiñajji ojjaña nijje quea pame nee poani. Quenequene cuaji ajja. Joya ojaya esohui jama ba'e ajja jamatii quea nee nee epo meeji pojjeama. Jamajjeya eya quea mimishi po tiitiani, jamatii ojaya eya etecueajji pojjeama —poso jjabaquiani miya.

Chojja. Miya aje oe jjashahuabaquiani quea quehua nee. ¿A'a miquea ba jjima? Eyacuiñajji ojjaña nijje quea pame poani, ishoa cani emimishi pajea meesahua'yojji. <sup>5</sup> Jamajjeya miya quea mimishi nee nee jjejojo, shajjama' poani tiitijo, Eyacuiñajjiya miya quea nee nee po mee caje'yo. E'e, quijje ohuaya ojjaña shajjama' poani tecuea neinei caje'yo. <sup>6</sup> E'e jojo nei Eyacuiñajjiya ojjaña eseya sosequia caje'yo ma eseya aninaje sosejje. Ojaya epeeji quea pame quea bihui nee po mee caje'yo. Shajjama' cuana ca ca quea nee nee po mee caje'yo ma o quea mimishi ponequinaje sosejje. <sup>7</sup> Jamajjeya beca cuana Eyacuiñajjiya esohui jama quea pame nee poani Jesusaja ejjashahuabaquijji jayojja epojji, o jayojja jama epojji, onijje eba'e tiitii'yojji. Eyacuiñajji quea bihui nee po mee sa acani.

Jamajjeya Eyacuiñajjiya oya cuana bihuia caje jama ba'a: —E'e, miquianaya ecuea epeeji quea pame nee. Jamajjeya miquianaya enijje ba'e tiitiije'yo eyajo.

<sup>8</sup> Pea cuana ca ca Eyacuiñajjiya esohui e'e nei jama ba'e sa po'yo ajja. Cajaa acani. Shajjama' poani. Jamajjeya Eyacuiñajji onijje quea quene tii tii poaje'yo. Quea nee nee po mee caje'yo. <sup>9</sup> E'e, Jodio cuana, Jodio pojjeama cuana pea'ai Eyacuiñajjiya ojjaña quea yeno nee, quea nee nee po mee caje'yo shajjamajojo. <sup>10</sup> Joya ojaya esohui jayojja jama quea pame poani ca ca Eyacuiñajjiya huohui caje jama ba'a: —E'e jamaya, miya quea pame poani. ¡Jamajjeya quea pame, quea bei ba'ecue! ¡Enijje ba'e tiitiicue eyajo! ¡Enijje ojjaña huoojeajji pocue! —oya cuana acaje.

E'e, Jodio cuana jamaya acaje Eyacuiñajjiya, Jodio pojjeama cuana pea'ai. <sup>11</sup> Ojjañaajo Eyacuiñajji e'e jojo nei jjashahuabaquiani. Eseyaya eba'ejjiyo jjashahuabaquiani esosequia'yoyji.

*Eyacuiñajjiya ehuohui shajjama' cuanajo e'e nei*

<sup>12</sup> Jodio pojjeama cuanaja ba jjima poa Eyacuiñajjiya esohui ma Moisesiya tehue ca poa. Jamatii oya cuana quea nee nee po mee caje'yo Eyacuiñajjiya quea mimishi ba'yanijo.

Jodio cuana ca ca Moisesija etehue'yo ba canaje. Jamajjeya shajjama' poanijo, Eyacuiñajjiya oya cuana tecuea caje jama ba'a: —Miquianaya ca mi ca shajjama'. Moisesija etehue'yo bajji poani, jamatii jamaya a'ajja. Jamajjeya ma etehue'yojo tehue ca poa jayojja jama miquianaya quea nee nee poaje'yo —Eyacuiñajji poani.

<sup>13</sup> Moisesija etehue'yo Eyacuiñajjiya esohui ba majje jamatii Jodio cuana shajjama' poani. Jamajjeya ojaya mimishi cuana ecuijea'yoyji pojjeama. Ojaya esohui jama acani ca ca oe Eyacuiñajjiya mimishi cuana cuijea caje'yo Jodio cuanaja. <sup>14</sup> Jodio pojjeama cuanaja ba jjima Eyacuiñajjiya esohui Moisesija etehue'yo. Jamatii oya cuana ma esohui jayojja jama ba'yani beca cuana. E'e, quea ja'a nee jjashahuabaquiani. Jamaya ojaya eba quea pame eba'ejji. Ojaya eba eba'ejji quea tai pea'ai. E'e, Moisesija etehue'yo Jodio pojjeama cuanaja ba jjima nei. <sup>15</sup> Jamatii, Eyacuiñajjiya oya cuana ba meesahua cani ojaya ejjashahuabaqui'yoyji. Jamajjeya oya cuana oja mimishijo jama poani ba'a: —Chojja, jamaya Eyacuiñajjiya boti'ama. Eya shajjama' jayojja poani.

Joya quea pame ba'yani jama poani ba'a: —E'e, jamaya quea pame eba'ejji. Jamaya Eyacuiñajjiya quea boti nee —oya cuana poani.

<sup>16</sup> E'e, Eyacuiñajjiya eba ojjañaja ejjashahuabaquiiji cuana. Jamajjeya quiije ohuaya e'e jojo nei huohui caje'yo ojjañaja eba'ejjiyo. Ohuaya Jesosa huoojea caje jama ba'a: —Jesosa, ¡jaya cuana sosequiacue ma ohua meshijo ba'yahuaa acanaje sosejje! —Eyacuiñajjiya acaje'yo.

Jamaya eyaya, Pabohua huohuiaña ojjaña esohui quea pame nee Jesosajo.

*Jodio cuana Moisesija etehue'yo ba majje jamatii shajjama' poani*

<sup>17</sup> Jodio cuana, miquianaya mimi huicha'a huicha'ani jama ba'a: —Ecuana ca ca oe Jodio cuana, Eyacuiñajjiya babaca ojaya nei epojji. Ohuaya ecuana ojaya esohui ba mee ca poa Moisesija etehue'yo. Jamajjeya ohuaya ecuana ba cani mimishi'ama —miquianaya poani—. <sup>18</sup> E'e, ecuaaya baña Eyacuiñajjiya esohui Moisesija etehue'yo. Jamajjeya ecuanajaya eba Eyacuiñajjiya ejjashahuabaqui'yoyji. Jamajjeya ecuana ba'yani quea pame nee, mimishi'ama —miquianaya poani.

<sup>19</sup> Jamajjeya miquianaya jama poani pea'ai ba'a: —Jodio pojjeama cuana, Eyacuiñajjiya esohui ecuanajaya eba nei nei Jodioja jjejojo. ¡Ecuana jayojjaya oe pocue! —miquianaaya aña—. Ecuaaya Eyacuiñajjiya esohui baña Jodiohua jjejojo. Jamajjeya ecuanaya cuaquijiji jayojja jama poani. Jiquio ecua mecajje quea misijo cuaquijijiya ejiojji ba mee cani jayojja jama ecuaaya joya Eyacuiñajji ba pojji'ama cuana quea ja'a nee ba'e meesahuaña. <sup>20</sup> E'e, joya Eyacuiñajji ba pojji'ama cuana, Eyacuiñajji oe pojji ba epo pea'ai ecuaaya esohui ba meesahuaña. Eyacuiñajjiya ecuana ojaya esohui etehue'yo ba mee ca poa. Ma esohui e'e jojo nei —jamaya miquianaaya aña.

<sup>21</sup> Miquianaaya pea cuana esohui huohui huicha'a huicha'aña. Jamatii miquea ehuhui jayojja jama ba'e ajja miquianaya. E'e, jama huohuime aña ba'a: —¡A'a jja oe sii pojji!

Jamajjeya ¿apiojji acuae jja oe miya sii poani?

<sup>22</sup> —¡A'a pea cojjojji! —huohui aña miyaya.

Jamajjeya ¿apiojji acuae jja oe miya pea cojjojji poani so'o?

—¡A'a eyacuiñajji nisho bihuiajji oe! —huohuime aña.

¿Apiojji acuae jja nequiaa oe Eyacuiñajji bihuia nishoaña quea aquiana jeaa jjejojo?

<sup>23</sup> Miquianaya mimi huicha'a huicha'ani Moisesija etehue'yojo: —Ecuana ca jja ca oe Eyacuiñajjiya ojaya esohui etehue'yo ba mee ca poa —ca jja nequiana ca oe poani.

Jamajjeya apiojji shai miquianaya onijje jjapee nishoquiani, ojaya esohui jayojja jama ba'e tiitii ajja. <sup>24</sup> E'e, yahuajo nei Eyacuiñajjiya etehue'yo jama poa ba'a:

“Jodio cuana, miquianaya ca jja ca oe shajjama' ba'yani. Mi ba majje Jodio pojjeama cuaa Eyacuiñajji cajaa acani”.

Jamaya Eyacuiñajjiya esohui yahuajo nei etehue'yo poa.

*Cuiishasha biso nei jehusejjajea majje pojjeama eseya Eyacuiñajjiya epeeji nei poani*

<sup>25</sup> Jodio cuana, yahuajo nei esejaya etiiquianaa Moisesiya Eyacuiñajjiya esohui tehue ca poa jama ba'a: —¡Mique bacuaja cuiishasha biso nei jehusejjajecue!

Jamaya eseyaya aña, Eyacuiñajjiya esohui yahuajo nei jayojjaya aña. Jamajjeya Eyacuiñajjiya etehue'yo jayojja jama quea pame nee ba'yanijo cuiishasha ejehusejjajea'yo quea pame. Jamaya ojjaña ba meeaña eseya, Jodio cuana Eyacuiñajjiya babaca'yo o peeji epojji. Jamatii Eyacuiñajjiya esohui etehue'yo jayojja jama ba'e ajja ca ca ¿apiojji acuae cuiishasha biso nei jehusejjajeaña so'o? Jamatii Eyacuiñajjiya miquianaya ba cani Jodio pojjeama jayojjaya quea mimishi pea'aiya. <sup>26</sup> Jodio pojjeamaa ca ca cuiishasha jehusejjajea ajja. Jamaya po ajja oya cuana. Jamatii beca cuana Eyacuiñajjiya esohui etehue'yo quea ja'a nee jayojja jama ba'yani. Jamajjeya Eyacuiñajjiya oya cuana ba cani Jodio jayojjaya, ojaya eabaca'yo, jamatii cuiishasha jehusejjajea jjima. <sup>27</sup> Jodio cuana, miquianajaya eba Eyacuiñajjiya esohui. Cuiishasha jehusejjajeaña pea'ai. Jamatii aje oe Eyacuiñajjiya esohui etehue'yo jayojja jama ba'e ajja. Jamajjeya Eyacuiñajjiya miquianaya ba cani shajjama'. Jodio pojjeamaa ca ca cuiishasha jehusejjajea ajja. Jamatii Eyacuiñajjiya esohui jayojja jama ba'yanijo, ohuaya oya cuana ba cani mimishi'ama, quea pame. <sup>28</sup> E'e, eseya Eyacuiñajjiya esohui jayojja jama ba'yanijo ojaya epeeji nei poani, cuiishasha jehusejjajea majje pojjeama. ¿A'a miquianaaya cuiishasha jehusejjajeaña? ¿A'a mimishi pajea'yonaje pea'ai? <sup>29</sup> Eyacuiñajjiya esohui jayojja jama añajo ca ca miquianaya ojaya epeeji nei poani. Beca cuanaja cuiishasha jehusejjajea jjima; jamatii Edojjashahua Pameya pea jjashahuabaquime po mee ca'yani Jesusaja epeeji nei epojji. Jamajjeya miquianaya Jesusaja epeeji e'e jojo nei poani. Pea cuaa pojja'a miquianaya Jesusaja epeeji pojjeama poso acani, miquea cuiishasha jehusejjajea jjimajojo. Jamatii Eyacuiñajjiya eba miquianaya ojaya epeeji nei poani.

Jamajjeya ojjaña joya Eyacuiñajjiya esohui jayojja jama ba'yani ojaya epeeji nei poani, Jodio cuana, Jodio pojjeama cuana pea'ai, ecuiishasha jehusejjajea'yo cuana, ecuiishasha jehusejjajea'yo pojjeama cuana pea'ai.

### 3

*Eyacuiñajji e'e jojo nei, quea ja'a nee nee poani*

<sup>1</sup> Jodio cuana, ¿a'a miquianaya jjashahuabaquiani? Jama ba'a: —Eyacuiñajjiya Jodio pojjeama cuana ojaya epeeji nei po mee cani ecuana jayojjaya. Jamajjeya ¿apiojji acuae etiiquianaja ehuhui'yo jayojja jama cuiishasha jehusejjajeaña? ¿A'a Jodio pojjeama epojji quea pame nee nee, Jodio epojji quea pame pishana? —miquianaya pojja'a jamaya poani.



<sup>2</sup> Quea pame nee Jodio epojji. ¡Bacue! Eyacuiñajjiya eseya Jodio cuana yahuajo nei nei ojaya esohui etehue'yo ba mee ca poa, ba majje pea cuana huasijje ehuhui'yojji pea'ai. <sup>3</sup> E'e, Eyacuiñajjiya esejaya etiiquiana Amajama bajjani huohui ca poa jama ba'a: —Eyaya mique osecua cuana quijje nei nei ba'eje quea pame nee nee aje'yo; ecuea esohui quea pame jayojja jama aje'yo —Eyacuiñajji poa.

—Eseyaya etiiquiana Eyacuiñajjiya esohuijo shajjama' poajo, ¿a'a Eyacuiñajjiya ojaya esohui pajea caje'yo pojja'a? ¿A'a jamaya yajji pojjeama pojja'a? —miquianaya poani pojja'a.

<sup>4</sup> ¡Chojja de! Dejja cuana siajje poani, ojjaña. Eyacuiñajji ca ca siajje po ajja nei nei. Ma ecua ohua huohui canaje jayojjaya ohuaya acaje'yo. Ojaya esohui yahuajo nei etehue'yo jama poa ba'a:

“Eyacuiñajji, miyaya ca ca oe esohui e'e nei huohuiaña tii tii. Miquea ejjashahuabaqui'yojji ba majje ojjaña ba caje miya e'e jojo nei poani, siajje po ajja nei nei”. Jamaya Eyacuiñajjiya esohui yahuajo nei tehue ca poa.

<sup>5</sup> Jodio cuana, miquianaya jjashahuabaquiiani quea quehua, de; jamaya poso nequiana jjabaquiiani ba'a: —Ecuana quea mimishi poanijo, ojjaña Eyacuiñajji bihuia caje jama ba'a: “Eyacuiñajji oe nei quea ja'a nee poani, oe nei quea pame”. Jamajjeya ¿apiojji shai Eyacuiñajjiya ecua quea nee nee po mee caje'yo quea mimishi poanijo? —jamaya miquianaya Eyacuiñajji ba po jjima jayojja jama jjashahuabaquiiani, quea quehua.

<sup>6</sup> Chojja Jodio cuana, jamaya pojjeama. Jamaya e'e nei poa jojjemo Eyacuiñajjiya mimishi cuana tecuea jjima aca'yome. Eyacuiñajjiya e'e nei nei acani tii tii. E'e jojo nei ojjaña shajjama' cuana ohuaya quea nee nee po mee caje'yo mimishi poani sosejje.

<sup>7</sup> Jamatii miquianaya quea quehua jjashahuabaquiiani jama pea'ai ba'a: —E siajje poanijo pea cuaa Eyacuiñajji bihuia cani jama ba'a: “Eyacuiñajji oe nei siajje po ajja nei nei” acaje cuaa. Jamajjeya ¿apiojji shai Eyacuiñajjiya eya quea nee nee po mee caje'yo siajje poanijo? —miquianaya aje jja oe jamaya poani.

<sup>8</sup> Cho, jamaya pojjeama. Jamaya e'e nei poa jojjemo, ca ca e siajje poanijo pea cuaa Eyacuiñajji bihuia cani ecua siajjepojji pome. E'e, beca cuaa aje oe eya niñeba cani jama ba'a: —Pabohua aje jja oe jamaya huohui cani ba'a: “¡Quea mimishi oe pocue pea cuana quea pame nee eba'e meesahuajji!” —onaaya jama eya niñebameya acani. Cho, eya jamaya po ajja. ¡Jamaya niñeba canijo, Eyacuiñajjiya oya cuana quea nee nee capo mee cahua, de!

*Eyacuiñajjiya ojjaña cuana ba cani shajjama' jayojja*

<sup>9</sup> Jodio pojjeama cuana shajjama' nei nei poani. ¿A'a Jodio cuana shajjama' pishana? Chojja, Jodio cuana Jodio pojjeama cuana jayojjaya jama poani. Ojjaña shajjama' nei nei pea'ai poani. <sup>10</sup> Eyacuiñajjiya esohui yahuajo nei nei Dabiya tehue ca poa jama ba'a:

“Ecuea esohui jayojja jama a'ajja ojjaña cuaa. Chama' joya quea pame poani. <sup>11</sup> Ecuea esohui e'e nei ba sa po ajjajo ojaya ba jjima ecuea ejjashahuabaqui'yojji. Oya cuana e ba sa po'yo ajja pea'ai. <sup>12</sup> Chojja, oya cuana eshahua nijje poani, enijje jjapeequi ajja quea mimishi jjejojo. Shajjama' jjejojo quea pame po ajja ojjaña cuana. <sup>13</sup> Ojjaña esohui quea tai nee nee acani. Quea tai nee nee ojjaña esohui, aquiana quea ihui jayojja. Ojjaña siajjepojji pea'ai, siajje popajea'yo ajja pea'ai. Ojjaña mimijajiji poani pea'ai. Quea tai nee nee ojjaña poani. Jiquio ecua peyo se naa quea nee nee po mee cani jayojja jama ojjaña cuaa onaya quea yeno po mee cani. <sup>14</sup> Ojjaña quea tecue nee nee poani, panajajiani pea'ai. <sup>15</sup> Oya cuana quenequene cuaji majje jjaquecuaquiiani. <sup>16</sup> Oya cuana aje oe ona quea mimishi pomeejji poani; ojjaña quea yeno nee nee po mee cani. <sup>17</sup> Ojjaña quea bei ba'e ajja tii tii. <sup>18</sup> Ejo jjashahuabaqui ajja tii tii, jjashajja'ajjaqui ajja pea'ai”.

Jamaya Eyacuiñajjiya yahuajo nei tehue mee ca poa.

<sup>19</sup> Jamatii esejaya eba Jodio cuana jama siajje poani ba'a: —Eyacuiñajjiya esohui Moisesija etehue'yo jayojja jama ecuaaaya aña.

Jamatii Eyacuiñajjiya Jodio cuana jama acani ba'a: —Miquianaya aje oe ecuea esohui ba majje jama a'ajja. Shajja huejjama' jayojja miquianaya poani.

Jamajjeya Eyacuiñajjiya ojjaña cuana quea nee nee po mee caje'yo; Jodio cuana, Jodio pojjeama cuana pea'ai quea jeca poaje'yo, quea mete poaje'yo shajjama' poani jjejojo.

<sup>20</sup> E'e, Eyacuiñajjiya esohui Moisesija etehue'yo ba majje ojjaña cuana jama poaje ba'a: —E'e, eya shajjama' jayojja jama poani —ojjaña poaje.

Jamajjeya Eyacuiñajjiya ojjaña nijje mimi ajja jama ba'a: —Miquianaaya ecuea esohui etehue'yo jayojja jama e'e jojo nei añña. Jamajjeya miya quea pame nee nee —jamaya mimi ajja Eyacuiñajji. Chojja, ojjaña shajjama' poani, ojjaña tii.

*Jesosa nijje e'e jojo nei jjapeequianijo Eyacuiñajjiya esejaya mimishi cuijea caje'yo*

<sup>21</sup> Yahuajo nei nei Eyacuiñajjiya esohui huohuijjiya, Moisesiya pea'ai jama sohuihuo-huime aca poa ba'a: “Ojjaña joya e'e jojo nei onijje jjapeequiani Eyacuiñajjiya quea boejea po mee caje'yo” yahuajo jama huohuimeya aca poa. Jamatii ojjaña jjashahuabaquinaje Eyacuiñajjiya ojjañaja mimishi cuijea caje'yo Moisesija esohui etehue'yo jayojja jama añajo poso. <sup>22</sup> E'e, Eyacuiñajjiya esejaya mimishi cuana cuijea cani jama huohuime amajje ba'a: —Ecuea eba Jesosa Quitohua ecuea mimishi cuijea caje'yo. Eya onijje jjapeequije'yo.

E'e, Jodio cuana Jodio pojjeama jayojjaya jama acaje'yo Eyacuiñajjiya. <sup>23</sup> Ojjaña cuana ojjaña meshijo ba'e quea mimishi nee poani. Jamajjeya Eyacuiñajjiya ojjaña cuana nijje quea bihui pojjeama, o jayojja jama po ajjajojo. <sup>24</sup> Jamatii Eyacuiñajjiya quea pame nee nee. Ojjaña quea jea nee acanijo ojjaña shajjama' cuanaja mimishi cuijea'yo majje ojjaña ba cani mimishi'ama. Jamaya Eyacuiñajjiya acani Jesosa Quito ojjaña cuanaja mimishi cuijea'yoyji sosejje mano'yonajejo. <sup>25</sup> E'e, Jesosa Quito esejaya mimishijo mano'yonaje; ojaya ena' cuayaquinaje. Jamajjeya ojjaña eseya jama mimianijo ba'a: —Jesosa Quito mano'yonaje ecuea mimishijo —jamaya poanijo, Eyacuiñajjiya esejaya mimishi cuijea'yo majje eseya ba cani mimishi'ama.

E'e, Eyacuiñajjiya Jesosa ba ca poa ñajjajja equecua'yo jayojja, ma ona mimishi cuana nijje quea bei nee epojji. Eyacuiñajjiya oya Jesosa Quito mano mee ca'ya poajo, ojjaña ba mee cani oya e'e jojo nei quea pame poani. Eyacuiñajjiya jama poani ba'a: —Mimishi cuana sosequia'yoyji oe dejja camanoqui'yahua.

Yahuajo nei nei Jesosa mano'yo jjimahuajo ojjaña cuana shajjama' poa. Jamatii Eyacuiñajjiya ishoa canaje; mimishi cuijea'yo jjima acanaje Jesosa mano'yo jjimahuajo. Jamajjeya Jesosa mano'yo jjimahuajo, dejja mimishi cuana jjashahuaba quehuaqui canaje jama ba'a: —Eyacuiñajjiya pajea ca'yonaje ecuanajaya mimishi cuana jamatii pojja'a —poanaje.

Jjeya ca ca Jesosa Quito mano'yonaje mimishi cuijea'yoyji sosejje. Jamajjeya Jesosa mano'yajo, Eyacuiñajjiya ojjaña ba mee cani ohuaya jamatii pojjeama etiiquianaja mimishi pajea ca'yonaje. <sup>26</sup> Jjeya pea'ai Eyacuiñajjiya esejaya mimishi cuana cuijea ca'yani Jesosa nijje jjapeequianijo. Jamajjeya ohuaya ojjaña ba mee cani oya quea pame nee nee poanijo Jesusaja epeejji cuanaja mimishi cuana cuijea ca'yani. Eyacuiñajjiya jama poani ba'a: —Jesosa miquea mimishijo mano'yonajejo, eyaya miquianaya baña mimishi'ama —Eyacuiñajji poani.

*Jesosa nijje jjapeequianijo ca ca oe Eyacuiñajjiya eseya ba cani emimishi cuijea'yo*

<sup>27</sup> Eseya jama po ajja ba'a: —Eyaya ca eya Moisesija etehueya jayojja jama añajo, Eyacuiñajjiya eya mimishi cuijea ca'yonaje —eseya jamaya po ca ajja nei nei. <sup>28</sup> Jamajjeya esejaya eba jama ba'a: Jesusaja epeejji nei poanijo ca ca oe Eyacuiñajjiya eseya ba cani emimishi cuijea'yo, quea pame. Jamajjeya Moisesija etehue'yo jayojja jama ba'yanijo pojjeama mimishi cuijea ca'yani Eyacuiñajjiya. Chojja, shajjama' ojjaña poani; chama' joya Moisesija etehue'yo jayojja jama ba'yani tii.

<sup>29</sup> Jodio cuana, eyaya miquianaya huohui'ajjaña jama ba'a: —¿A'a Eyacuiñajjiya Jodio cuanaja mimishi cuijea cani, Jodio pojjeama cuanaja mimishi cuijea sa po ajja pojja'a?

Chojja. Jamaya pojjeama. Eyacuiñajjiya ojjañaja mimishi cuijea cani Jesosa nijje jjapeequianijo. <sup>30</sup> Ohuaya ojjaña acani oya jayojjaya Jodio cuana, Jodio pojjeama cuana pea'ai. Jamajjeya Jesosa nijje jjapeequianijo, Eyacuiñajjiya eseya ba cani emimishi cuijea'yo, Jodio pojjeama cuana pea'ai, de. <sup>31</sup> Jamajjeya eseya, Jodio cuana Jesosa nijje jjapeequianijo, ¿a'a Eyacuiñajjiya esohui etehue'yo jayojja jama ca'apajea'yahua? Chojja de. Jesosaja epeeji poanijo ca ca eseyaya ojaya esohui jayojja jama ejja'aqui o quea bihui nee epo meejji.

## 4

*Onijje jjapeequianijojo Eyacuiñajjiya Amajamaja mimishi cuijea ca'yonaje*

<sup>1</sup> ¡Jashahuabaquicue Amajamajo, esejaya etiiquianajo, ma ojjaña Jodio cuanaja etiiquianajo! ¿Yajjajo shai Eyacuiñajjiya oya huohui ca poa so'o? Jama ba'a: —Amajama, eyaya miya baña emimishi cuijea'yo, ecuea epeeji nei.

¿A'a Eyacuiñajjiya jamaya aca poa Amajama ojaya esohui etehue'yo jayojja jama ba'ya poajo? <sup>2</sup> Chojja. Eyacuiñajjiya Amajamaja mimishi cuijea ca'ya poa ojaya esohui etehue'yo jayojja jama ba'ya poajo poso miquiaaya aña. Chojja. Eyacuiñajjiya Amajama jama aca poa ojaya esohui etehue'yo joyajja jama ba'ya poa jojjemo Amajama jama mimime poquiaye ba'a: —Eya ca ca iña quea pame nee, de. Ojjaña Eyacuiñajjiya esohui etehue'yo jayojja añajo, ohuaya ecue mimishi cuijea ca'yonaje —Amajama jama mimimeya poquiaye.

¡Dee! Beca cuana jamaya jjashahuaba quehuaquiani. Eyacuiñajji ca ca jamaya jjashahuabaqui ajja. <sup>3</sup> Ojaya esohui yahuajo etehue'yo jama poa ba'a: —Amajama Eyacuiñajji nijje jjapeequia poa. Jamajjeya Eyacuiñajjiya oya jama aca poa ba'a: “Amajama, eyaya miya baña emimishi cuijea'yo” aca poa —jamaya esohui yahuajo nei etehue'yo poa, Eyacuiñajjiya.

<sup>4</sup> ¡Bacue! Dejja chacochoajo, casosequia cahua echacomeejjiya. Echacomeejjiya sosequia cani jamatii pojjeama, chaco sosejje, de. <sup>5</sup> Eyacuiñajjiya ca ca esejaya mimishi cuana cuijea cani etehue'yo jayojja jama ba'yanijo sosejje pojjeama. Chojja. Jesosa nijje jjapeequianijo, ohuaya eseya ba cani emimishi cuijea'yo jamatii. E'e, oya shajjama' nei nei cuana ba cani mimishi'ama pea'ai Jesosa nijje mimi jeahuajo, onijje jjapeequi jeahuajo pea'ai. <sup>6</sup> Maya esejaya etiiquiana Dabi bajjanija eba poa. Jamajjeya jama jjashahuabaquimeya poa ba'a: “Eyacuiñajjiya eseya ba cani emimishi cuijea'yo. Ojaya esohui etehue'yo jayojja jama ba'yani sosejje pojjeama Eyacuiñajjiya eseya ba cani emimishi cuijea'yo. Quea bihui nee capoahua mimishi cuijea ca'yajje”. <sup>7</sup> Jamaya Dabiya yahuajo nei tehue ca poa ba'a:

“Eyacuiñajjiya oja mimishi cuijea cajo, quea bihui nee capoahua ojjaña shajjama' cuana. Quea boejea'yo po mee canijo, quea bihui nee nee capoahua. <sup>8</sup> Shajjama' cuana quea bihui nee capo'yahua Eyacuiñajjiya oya shajjama' pojjeama ba canijo, de”. Jamaya esejaya etiiquiaa Dabiya tehue ca poa yahuajo nei.

<sup>9</sup> ¿A'a ohuaya maya tehue ca poa Jodio ca ca oe mimishi jamatii cuijea cajo quea bihui poaje? Chojja. Jodio pojjeama pea'ai quea bihui poaje mimishi jamatii cuijea ca'yajje. E'e, Eyacuiñajjiya esohui etehue'yo jama poa pea'ai ba'a: “Onijje jjapeequianijo, Eyacuiñajjiya Amajama ba ca poa emimishi cuijea'yo” anaje. (Amajama ba'eya poa Moisesi cuaya jjimahuajo.) <sup>10</sup> ¿Ache shono acuae Eyacuiñajjiya Amajama ba ca poa emimishi cuijea'yo? ¿A'a cuiishasha biso nei jehusejjajea cajo pojja'a? ¿A'a jehusejjajea jjimahuajo pojja'a oya emimishi cuijea'yo ba ca poa, Eyacuiñajjiya? <sup>11</sup> Cuiishasha jehusejjajea jjimahuajo ca jja ca oe Eyacuiñajjiya Amajama ba ca poa emimishi cuijea'yo. Jamajjeya ¿yajjajo shai jehusejjajea mee ca poa? Jama ba'a: Quijje Amajamaa jamaya aca poa onajaya ebajji oya Eyacuiñajji nijje jjapeequianijo ca ca oe ohuaya oya emimishi cuijea'yo ba ca'ya poa, cuiishasha jehusejjajea jjimahuajo. Jamajjeya oya jayojjaya Jodio cuana, Jodio pojjeama cuana pea'ai Jesosa nijje jjapeequianijojo Eyacuiñajjiya eseya ba cani quea boejea'yo, cuiishasha ejehusejjajea'yo pojjeamajo, de. Jamajjeya Amajama Jodio

pojjeama cuanaja etiiquiiana jayojja jama esejaya pea'ai, ca Jesusaja epeeji poanija. <sup>12</sup>Oya Amajama esejaya, Jodio cuanaja etiiquiiana poa. Jamajjeya Amajamaa jayojja jama cuiishasha jehuissejjajeaña eseyaya, Jodio cuaaya. Amajama Eyacuiñajji niije jjapeequia poa cuiishasha jehuissejjajea jjimahuajo. Jamajjeya Jodio cuana jjeya Amajamaja osecua nei poani Jesosa niije jjapeequiani jojoya, cuiishasha jehuissejjajea majje pojjeama.

*Eyacuiñajjiya ojaya esohui jayojja jama acaje'yo esejo, onijje jjapeequiajo*

<sup>13</sup>E'e, yahuajo nei onijje jjapeequianijo Eyacuiñajjiya Amajama ba ca poa mimishi'ama. Ojaya ehuhui'yo jayojja jama po jjimahuajo ca ca Eyacuiñajjiya Amajamaja mimishi cuijea ca'ya poa. Jamajjeya Eyacuiñajjiya Amajama huohui ca poa jama ba'a: “Amajama, eyaya miya, mique osecua cuana pea'ai emeshi mese po meeña ojjaña meshi yasijje” Eyacuiñajjiya jamaya aca poa Amajama onijje jjapeequianijojo. <sup>14</sup>Jamajjeya ojjaña Moisesija etehue'yo ajji poani oe nei eyajo eba'e tiitii mee'yojji jojjemo eseya Jesusaja epeeji cuana eyajo ba'e tiitii'yo jjima pome, Eyacuiñajjiya ma Amajama niije ohua huohui ca poa jama e'ajji pojjeama pome pea'ai. <sup>15</sup>E'e, Moisesija etehue'yo jama a'ajjajo, Eyacuiñajjiya quea nee nee po mee caje'yo shajjama' cuana. Jamatii Eyacuiñajjiya esohui ba mee jjima jojjemo shajjama' cuana chama' pome. Chama' joya esohui etehue'yo jayojja jama ba'yani.

<sup>16</sup>Jamajjeya Eyacuiñajjiya quea pame huohui ca poa ojjaña onijje jjapeequianijo. Eseyo ojaya quea jea nee nee. Oya siajje po ajja nei nei pea'ai. Jamajjeya ma ohua Amajama niije huohui ca poa jayojja jama ohuaya acaje'yo e'e jojo nei Amajamaja osecua cuana niije. E'e, ohuaya jamaya acaje ojjaña ese niije, Jesosa niije jjapeequianijo; Jodio cuana niije, Jodio pojjeama cuana niije pea'ai. E'e, Jesosa niije jjapeequianijo eseya Amajama jayojja, Eyacuiñajjiya epeeji nei nei ma ecua Amajama poa jamaya eseya. Jamaya Eyacuiñajjiya ojjaña eseya ba cani Amajamaja osecua cuana. <sup>17</sup>Eyacuiñajjiya esohui ma ohua Amajama huohui ca poa ohuaya yahuajo nei tehue mee ca poa jama ba'a: “Amajama, eyaya miya ojjaña dejja cuanaja, pea jaajjiya esohui mimianija etiiquiiana po meeje'yo, ojjañaja etiiquiiana”. Jamaya Eyacuiñajjiya yahuajo nei tehue mee ca poa ojjaña ojaya epeeji cuanaja. Jamajjeya onijje jjapeequianijo, Eyacuiñajjiya eseya Amajamaja osecua cuana po mee cani. E'e, ohuaya quea ca'a nee nee, ojjaña acani. Emano'yo cuana shequi mee ca'yani; ojjaña aquiiana ma yahuajo chama' poa ohuaya pana cani, Eyacuiñajjiya.

<sup>18</sup>Jamajjeya Amajama tii nojinoji'ya poa bacuama' tii. Jamatii Eyacuiñajjiya oya huohui ca poa jama ba'a: “Amajama, miquea osecua cuana quea huiso nee nee poaje. Emeshi mese cuana poaje'yo ojjaña meshi cuana huasijje” jamaya Eyacuiñajji poa. Jamajjeya Amajama jjashahuabaquinaje jama ba'a: —E'e de, eya etii nei nei. Jamatii Eyacuiñajjiya eya e'e nei huohui cani. Jamaya ca'a cahua ohuaya. Eya quea osecua huiso nee nee poaje.

E'e jojo nei jamaya acanaje Eyacuiñajjiya, ma ecua ohuaya huohui canaje jamaya acanaje. Amajama quea osecua huiso nee nee po mee canaje, majameta huisoajja sico meemee ajja, quea huiso nee nee. <sup>19</sup>Eyacuiñajjiya esohui shajja'ajja majje Amajama jjashahuabaquia poa jama ba'a: —Eya etii nei nei, 100 shequiajame etii. Ecuea ehuanase pea'ai etii nei, bacuama' pea'ai. Jamatii esho'yahua jjamejoqui jjima poanaje. Jamatii Eyacuiñajjiya ma ecua eya huohui canaje jamaya ohuaya ca'a cahua. Ecuea ebacua e'e jojo nei cuayaje, dejja —Amajama poanaje. <sup>20</sup>Jama po majamajanequinaje tii tii ba'a: —Eyacuiñajjiya eya e'e nei huohui canaje. Ohuaya eya jamaya amee caje. Oya ca ca oe siajje po ajja nei nei —jamaya mimi majamajanajejo Amajama Eyacuiñajjiya epeeji quea ca'a nee nee poanaje. Bihua ca poa jama ba'a: —E'e Eyacuiñajji, jamaya. Miyaya eya quea pame nee ña tii. <sup>21</sup>E'e, miyaya quea ca'a nee nee poanijo, miquea ehuhui'yo jayojja jama aje'yo e'e jojo nei.

<sup>22</sup>Amajama jamaya jjashahuabaquianijo, Eyacuiñajjiya oya huohui ca'ya poa: “Amajama, miya enijje jjapeequianijo, eyaya miya baña mimishi'ama. Miquea mimishi ecuijea'yo” Eyacuiñajjiya oya aca poa.

<sup>23</sup> E'e, Eyacuiñajjiya huohui ca poa Amajamaja ebajji jama ba'a: “Enijje jjapeequianijo eyaya miya baña mimishi'ama” Eyacuiñajji poanaje. <sup>24</sup> Eyacuiñajjiya jama tehueme aca poa esejaya ebajji ohuaya Amajama mimishi cuijea ca'ya poa onijje jjapeequianijo. Jamajjeya esejaya eba Amajama jayojjaya onijje jjapeequiajo, Eyacuiñajjiya eseya jama acaje pea'ai ba'a: “Eyaya miya baña mimishi'ama pea'ai” Eyacuiñajjiya eseya acaje, de. Oya ca ca oe quea ca'a nee nee, ojjaña ohuaya acani; Jesosa esejaya Emeshi Mese nei emano'yoojaa shequi mee ca o'oyanaje. <sup>25</sup> E'e, ojjaña quea mimishi poanijo, Eyacuiñajjiya Jesosa huoojea canaje emano'yojji esejaya mimishi sosequia'yojji. Majoya Eyacuiñajjiya oya shequi mee ca o'oyanaje. Shequi o'oya majje Jesosa jama poanaje ba'a: —Ecue Chii, ¡bacue! Ecuea epeeji cuanaja mimishi cuijea'yojji sosejje eya mano'yonaje. Oya cuana jjeya mimishi'ama enijje jjapeequianijo —oya Jesusaa acanaje.

## 5

*Eyacuiñajjiya eseya mimishi'ama ba cani*

<sup>1</sup> E'e, Jesosa nijje jjapeequianijo, Eyacuiñajjiya eseya ba cani emimishi cuijea'yo. Jamajjeya Jesosa nijje, Emeshi Mese nei nijje jjapeequianijo, ohuaya Eyacuiñajji quea bei po mee cani ese nijje. Yahuajo ca ca quea mimishi poanijo, ese nijje quea quene nee poanaje. <sup>2</sup> Jesosa nijje jjapeequi majje eseya Eyacuiñajji nijje mete'ama mimiani. Eseya jama poani ba'a: —Jesosa ecuanajo mano'yonajejo, ecuaña Eyacuiñajjiyo mete'ama; oya ecuaña nijje quea bei nee po mee canaje Jesusaa. Cuanaya ecuaña quea bihui nee jjashahuabaquiani quea ja'a nee jama ba'a: “Eyacuiñajjiya e'e jojo nei ecuaña ba'e tiitii mee caje'yo onijje eyajo” —jamaya eseya poani.

<sup>3</sup> Jesosa nijje jjapeequianijo, pea cuaa eseya napa cani. Quea camaja poani. Jamatii eseya quea bihui nee poani, yeno'ama. Dejja mimishiya napa cajje eseya Jesusaja epeeji quea ca'a nee poaje'yo. <sup>4</sup> Eseya quea bihui nee Jesosa nijje jjapeequi pajea'yo ajja jamatii onaa napa cajo, Eyacuiñajjiya eseya huohui cani jama ba'a: —E'e, jamaya miya quea pame nee poani.

Eyacuiñajjiya eseya quea pame ba canijo, eseya jama poani pea'ai ba'a: —E'e jojo nei Eyacuiñajjiya eseya onijje ba'e tiitii mee caje'yo eyajo.

<sup>5</sup> E'e, esejaya eba Eyacuiñajjiya ojaya ehuohui jayojjaya acaje'yo. Ohuaya Edojjoshahua Pame huoojea canaje ese ba meeji jama ba'a: —E'e jojo nei Eyacuiñajjiya oja sohui jayojjaya acaje'yo; miqianaya onijje ba'e tiitii mee caje'yo. Miqianaya ojaya quea jea nee nee —jamaya eseya Edojjoshahua Pameya jjashahuabaqui mee cani.

<sup>6</sup> E'e, Jesosa mano'yo jjimahuajo eseyaya Eyacuiñajji quene'ama epo meeji po-jjeama ese nijje, ¿achajja shai quene'ama epo mee'yojji? Yahuajo Eyacuiñajji jjashahuabaquinaje jama ba'a: —Eyaya ma eshequiajajo, ma pojjajo Jesosa huoojeaje'yo shajjama' cuanajo mano'yohua. Ecuea eba epojja Jesosa manoj'e'yo —jamaya Eyacuiñajji poanaje.

Jamajjeya ma pojjajo tii Jesosa mano'yonaje eseja mimishi cuijea'yojji sosejje. <sup>7</sup> ¡Bacue! Beshahua nei eseya mano'yo sa po ajja pea mano'yo jjima epojji. E'e pojjaja oya quea pame nee nee ba'yanijo, ojo beca cuana mano'yome. <sup>8</sup> Jamatii eseya Eyacuiñajjiya quea jea nee nee poanijo ohuaya jama acanaje ba'a: Ecuaña quea mimishi poanijo tii oya, Jesosa mano'yonaje eseja mimishi cuijea'yojji sosejje. <sup>9</sup> E'e, Jesosa esejo mano'yonaje eseya quea mimishi poanijo tii. Ojaya ena' cuayaquinaje eseja mimishi cuijea'yojji. Jamajjeya eseya mimishi cuijea'yo majje Eyacuiñajjiya eseya ba cani mimishi'ama. E'e jojo nei. Jjeya ca ca oya ese nijje quene'ama; cuaqui yasijje ehoojeajji pojjeama, de. <sup>10</sup> E'e, yahuajo ese nijje Eyacuiñajji quea quene nee poa. Ese shajjama' poanijo tii Jesosa eseja mimishi cuijea'yojji sosejje mano'yajo, Eyacuiñajji ese nijje quea quene popajeana. Jamajjeya Eyacuiñajji ese nijje quea bei poanijo, eseyaya baña jama ba'a: Jesosa shequi mee ca o'oyanajejo, e'e jojo nei Eyacuiñajjiya eseya ba'e tiitii mee caje'yo onijje pea'ai. <sup>11</sup> E'e, Jesusaa, Emeshi Mese neiya esejaya mimishi cuijea ca'yonajejo,

Eyacuiñajji quea bei nee ese nijje, epeeji nei po mee cani. Jamajjeya eseya quea bihui nee jama poani ba'a: —Eyacuiñajji, miya quea pame nee; ecuana quea jea nee nee poani.

*Yahuajo eseya Adana jayojja ba'ya poa; jjeya ca ca eseya Jesosa jayojja ba'yani*

<sup>12</sup> ¡Bacue! Yahuajo nei nei Adana ba'ya poa. Oya ojjañaja ejeajji poa. Oya Adana ebionei shajjama' poa. Jamajjeya esejaya ejeajji Adana shajjama' poajo, Eyacuiñajjiya ojjaña ba cani shajjama' nei nei, Adana jayojjaya: “Miya shajjama' poanijo, manoje'yo ojjaña” Eyacuiñajjiya Adana huohui ca poa. Jamajjeya Adana mano'yonaje. O jayojjaya ojjaña mano'yani. Ojjaña shajjama' poani cuana, de. <sup>13</sup> E'e, Adana ebionei shajjama' poa. Moisesiya Eyacuiñajjiya esohui tehue jjimahuajo, jamaya ojjaña po poquia poa, quea mimishi. Yahuajo Moisesiya esohui tehue jjimahuajo, Eyacuiñajji etiquiana nijje jama mimi jjima ba'a: —Ecue sohui jama ba'e ajjajo miqianaya shajjama' —jamaya Eyacuiñajji etiquiana nijje mimi jjima yahuajo, maya tehue jjima poa Eyacuiñajjiya esohui.

<sup>14</sup> E'e, Adana shajjama' po majje, Moisesiya esohui tehue jjimahuajo aje oe ojjaña mano poquipoqui'ya poa quea tai ba'yanijo. Onajaya Eyacuiñajjiya esohui shajja'ajja jjimajo Adana jayojja jama pojjeama. Adana ca ca Eyacuiñajjiya esohui shajja'ajja majje shajjamaa jjejojo acuijjajja ijia ca poa, de. Eyacuiñajjiya Adana ebionei pana ca poa. Quijje ohuaya oja Bacua Jesosa huoojea canaje. <sup>15</sup> ¿Ae poanaje Adana? ¿A'a Adanaa jayojja jama acanaje Jesusaa? Chojja, quea pame nee nee eseya acanaje, Jesusaa. Shajjamaa jjejojo Adanaa ca pa jjaja ca oe ojjaña cuana shajjama' po mee ca poa. Jamajjeya ojjaña mano jeyojeyo mee ca'ya poa. Mano'yo majje cuaqui yasijje poqui ca'ya poa. Jjeya Jesosa Quitojo eseya ba'e tiitii mee caje'yo Eyacuiñajjiya. E'e, eseya Eyacuiñajjiya quea jea nee poanijo Jesosa Quito huoojea canaje ese que. Oya Jesosa ese jayojjaya yamijji poeyanaje eseya mimishijo mano'yohua mimishi cuijea'yojji.

<sup>16</sup> E'e, Eyacuiñajjiya eseya quea jea acanijo Jesosa huoojea canaje mano'yohua eseya mimishi cuijea'yojji sosejje. Jamajjeya eseya quea mimishi po huicha'a huicha'a majje, jamatii Eyacuiñajjiya eseya huohui cani jama ba'a: —Eyaya miya baña emimishi cuijea'yo.

Adana ca ca shajjama' po coa poajo, Eyacuiñajjiya oya huohui ca'ya poa jama ba'a: “Adana, miya ca mi ca oe shajjama'. Jamajjeya miya manoje'yo; quea nee nee poaje'yo. Mique osecua cuana pea'ai mi jayojjaya mano'yomaya poaje; jama mano'yomaya popoquije'yo mique osecua cuana” poanaje. <sup>17</sup> E'e, oe dejja quea mimishi po coa poajo, Eyacuiñajjiya ojjaña mano mee ca'yani; quea nee nee po mee ca poqui'yani. Jesosa Quitohua ca ca eseya quea pame nee acanaje. Eyacuiñajjiya ojjaña quea jea nee nee poanijo oja Bacua Jesosa huoojea canaje ese jayojjaya yamijji. Jesosa ojjaña cuanajo mano'yonaje mimishi cuijea'yojji sosejje. Ohuaya eseya ba'e tiitii mee caje'yo onijje. Jesosa nijje ona huoojea'yojji po mee caje'yo, Eyacuiñajjiya.

<sup>18</sup> E'e, Adana shajjama' poa. Oya shajjama' poajo, Eyacuiñajjiya ojjaña ba cani shajjama'. Ojjaña quea nee nee po mee caje'yo. Jesosa Quitohua ca ca quea pame acanaje esejo; ese mimishi cuijea'yojji mano'yonaje. Jamajjeya Jesosa nijje jjapee neineiquianijo, Eyacuiñajjiya esejaya mimishi cuijea majje mimishi'ama ba cani. Mimishi cuijea'yo majje eseya ba'e tiitii mee cani onijje eyajo. <sup>19</sup> Jama ba'a: Oe dejja, Adana shajjama' poa. Jamajjeya ojjaña o jayojja jama shajjama' poani. Pea dejja, Jesusaa ca ca oja Chiija, Eyacuiñajjiya esohui jayojja jama aca poa. Jamajjeya eseyaya, ojaya epeeji cuaa Jesusaa jayojjaya aña; Eyacuiñajjiya esohui shajja'ajjaña. Jamajjeya Eyacuiñajjiya eseya ba cani mimishi'ama.

<sup>20</sup> Adana shajjama' poajojo quijje nei nei Eyacuiñajjiya Moisesi tehue mee ca poa ojaya esohui. Ojaya esohui tehue mee ca'ya poa ojjañaja ebajji oya cuana Eyacuiñajjiya esohui jayojja jama a'ajja tii. Jamatii esohui ba majje ojjaña quea mimishi tii tii poani. Eyacuiñajji ca ca quea pame po tiitiani ojjaña nijje. Quea mimishi tii poanijo aje oe jamatii ohuaya eseya quea jea nee nee acani tii. <sup>21</sup> Yahuajo esohui etehue'yo ba majje jamatii etiquiana cuana mimishi pajea sa po'yo ajja poa. Jamajjeya oya cuana mano'yo majje cuaqui yasijje poqui'yonaje. Eyacuiñajjiya ca ca eseya shajjama' poani tii quea

jea nee acanaje. Eseyaya Emeshi Mese nei Jesosa Quito huoojea canaje ese mimishi cuijea'yohua ese ba'e tiitii mee'yoyji.

## 6

*¡Mimishi pajea'yocue; Jesosa nijje jjapeequicue!*

<sup>1</sup> Eyacuiñajjiya eseya quea jea nee acani; jamatii quea mimishi poanijo beca cuana jamaya poani pojja'a ba'a: —¡Dee! Jamajjeya eya quea mimishi capohua tii. Jamaya Eyacuiñajjiya eseya caba mee cahua eseya ohua quea jea nee acani jamatii —jamaya pojja'a beca cuana poani.

<sup>2</sup> ¡Chojja! ¡A'a oe jamaya pojji! Jiquio ecua ese ejja mano'yo majje shajoshajo'yo ajja jama jayojjaya eseya Jesosa nijje jjapeequi majje mimishi sa po maja'yo ajja. Cajaa seya año. <sup>3</sup> E'e, eseya Jesusajo besa majje, ohuaya eseya ba cani ojaya epeeji mimishi po maja sa po'yo ajja. ¿A'a miquea maya ba jjima?

—E'e, eya Jesosa nijje jjapeequiani —eseyaya jamaya huohui majje, onaaya eseya Eyacuiñajjiyo besa mee cani. Jamajjeya jiquio ecua emano'yo cuana shajoshajo'yo ajja jayojja jama eseya mimishi po maja sa po'yo ajja Jesosa nijje jjapeequianijo. ¿A'a miquea maya ba jjima? <sup>4</sup> Jesosa mano'yonaje. Mano'yo majje mei jjani ai yasijje huananobia ca'yonaje. Eyacuiñajji quea ca'a nee nee. Jesosa shequi mee ca'yonaje jama jayojjaya ohuaya eseya pea jjashahuabaquime po mee ca'yani Jesosa nijje jjapeequianijo. Jesosa nijje jjapeequiajo pea'ai onaaya eseya enajo besa mee cani Eyacuiñajjiyo. Jamajjeya Jesusaa eseya ba cani o jayojja e'e jojo nei, yahuajo jama pojjeama. Pea jjashahuabaquime poani, de; mimishi po maja sa po'yo ajja.

<sup>5</sup> Jamajjeya eseya jama poani ba'a: —Jesosa Quito acui ecueata'apeejo mano'yonaje eseja mimishi cuijea'yoyji. Jamajjeya eseya onijje jjapeequi majje mimishi pajea neinei sa poani. Eyacuiñajjiya Jesosa shequi mee ca o'oyanaje; ba'e mee ca o'oyanaje. O jayojja jjashahuabaqui meeme po mee ca'yani. <sup>6</sup> Jamaya esejaya eba ba'a: Jesosa Quito acui ecueata'apeejo mano'yonaje eseya ojaya epeeji quea ca'a nee epo meeji, mimishi pajea neinei meesahua'yoyji. Eseyaya eba'e yahuajo, ejjashahuabaquiji yahuajo jayojja jama pajea mee ca'yonaje, eyacua po mee canaje. Yahuajo jama poanaje ba'a: Jiquio ecua sosema' chacochoani echacomeejjiya yajjiyo chacochocho pajea mee jjima acani jayojja jama yahuajo eseya mimishi pajea'yo jjima poanaje. <sup>7</sup> Jama ba'a: Ese ejjaa mano'yo majje mimishi amaja ajja. Oya jayojjaya eshahuaaja epeeji emano'yo jayojja jama Jesusaa eseya po mee cani ojaya epeeji nei epoyji.

<sup>8</sup> Jamajjeya onijje jjapeequi majje Jesosa Quito mano'yonaje jayojja jama ecuana eshahuaaja epeeji poanijo emano'yo jayojja poanaje; Jesosa shequi'yonaje jayojjaya eseya o jayojja ba'yani, yahuajo jama pojjeama. E'e jojo nei eseya onijje ba'e tiitii'e'yo eyajo; o jayojjaya pea'ai poaje'yo. <sup>9</sup> E'e, Jesosa emano'yojaa Eyacuiñajjiya oya shequi mee ca o'oyanaje. Eshe nequi'yo, emano beca'yoyji pojjeama. Pea cuaa oya mano mee'yo jjima acaje'yo. <sup>10</sup> Oya mano'yonaje; oe nei mano'yome poanaje esejaya mimishi cuijea'yoyji. Oya Jesosa mano beca'yo ajja. Jjeya oya eshe'yo; Eyacuiñajjiya ejjashahuabaquiji jayojja jama atiitii cani. <sup>11</sup> Jamajjeya ojjaña Jesusaja epeeji cuana, jjashahuabaquicue jama ba'a: —Eya mimishi pajea neinei'yo sa poani —pocue!

E'e, jiquio ecua emano'yo cuana shajoshajo'yo ajja jayojja jama Jesusaja epeeji cuana mimishi po maja sa po'yo ajja. Pea jjashahuabaquime po'yani, de. Jjeya Jesosa nijje jjapee neineiquianijo eseyaya o jayojjaa Eyacuiñajjiya ejjashahuabaquiji jayojja jama atiitiiaña.

<sup>12</sup> Jamajjeya eshahuaa miqianaya shajjama' po mee sa acanijo, ¡a'a shajjama' pojji! Chojja. ¡Ejjashahuabaquiji yahuajo quea tai, quea mimishi jayojja jama a'a pojji!

<sup>13</sup> Eshahuaa miqianaya quea mimishi o jayojja jama po mee sa acani. ¡A'a jjashajja'a-jjaquiji! Eyacuiñajjiya ca ca miya quea pame, o jayojja jama po mee sa acani. ¡Oya shajja'ajjacue! Ohuaya miya pea jjashahuabaquime po mee ca'yani. Jamajjeya ¡ba'ecue ojaya ejjashahuabaquiji quea pame nee jayojja jama! <sup>14</sup> E'e, Eyacuiñajjiya huohui canaje jama ba'a: —¡Mimishi pajea neinei'yocue!

Jamatii ojaya esohui etehue'yo shajja'ajja majje mimishi pajea meemee'yo ajja. Eyacuiñajjiya ca ca oe eseya quea jea nee acani; mimishi pajea meesahua ca'yani. Jamajjeya jeshahuaa miya shajjama' po mee sa acanijo a'a jjashajja'ajjaquijji! Jjeya oya, eshahua ese huoojea'yoyji pojjeama, de. Eyacuiñajji ca ca esejaya Emeshi Mese nei, ese huoojea'yoyji poani.

*Eyacuiñajjiya echacojji quea pame*

<sup>15</sup> Jamajjeya jjeya Eyacuiñajjiya eseya napa ajja esohui etehue'yo jayojja jama ajjimajo. Chojja, Eyacuiñajjiya eseya quea jea nee acanijo esejaya mimishi cuijea ca'yani. Huohui jjima jama ba'a: —Esohui etehue'yo jayojja jama ba'yanijo, eyaya miquianajaya mimishi cuijeaje'yo —jamaya jjeya huohui jjima Eyacuiñajjiya.

Jamajjeya ¿ae jjashahuabaquiani eseya? ¿A'a quea mimishi capoahua? <sup>16</sup> Chojja de. ¡Bacue! Jiquio ecua echacomeejji nijje poquiajo, ohua mee'ajja cajje miya chacochocho majje miya ojaya echacojji poani, oya mi huoojeajji poani jama jayojjaya eshahuaja esohui jayojja jama añajo miya ojaya epeeji poani, oya mi huoojeajji poani. Miya jamaya po majje quea nee nee poaje'yo quijje cuaquijo. ¡Eyacuiñajji mi huoojeajji poanijo ojaya esohui shajja'ajjacue! Ohuaya miya quea bojea ba'e mee caje. Majoya miya ba'e tiitii mee caje'yo eyajo, Eyacuiñajjiya. <sup>17</sup> Jamajjeya eyaya Eyacuiñajji bihuiaña ohuaya miquianaya eshahuajo nahue canijo. E'e, yahuajo eshahua mi huoojeajji poanijo shajjama' poanaje. Jjeya ca ca ecuea esohui shajja'ajja majje Eyacuiñajjiya esohui e'e nei jayojja jama añaja quea bihui nee. <sup>18</sup> Jamajjeya Eyacuiñajjiya miquea eshahua poqui mee ca'yonaje, mi huoojeajji pojjeama po mee ca'yonaje. Jjeya Eyacuiñajji mi huoojeajji poani. O jayojja ba'e mee ca'yani. Jamajjeya miyaya ojaya esohui jayojjaya jama añaja quea bihui nee. <sup>19</sup> Miquea eba neineijji eyaya quea ja'a esohui huohuiaña jama ba'a: Yahuajo eshahua mi huoojeajji poanaje, miyaya o jayojjaa ojjaña mimishi a sa anaje, quea ja'a jjashahuabaqui sa po ajja poanaje. ¡Jjeya ca ca Eyacuiñajji mi huoojeajji nei nei a'yocue! ¡Ojaya ejjashahuabaqui'yoyji jayojja jama atiitiecue quea pame nee eba'e'yoyji!

<sup>20</sup> Yahuajo aje oe eshahua mi huoojeajji poanijo, miquianaya quea pame po sa po'yo ajja nei nei poanaje. <sup>21</sup> Eshahua jayojja jama quea mimishi ba'enajejo ¿a'a quea bei po tiitii mee canaje? Cho. Jjeya ma ecua ese ba'enaje jamajo eseya quea bicho nee nee poani. Jamaya eba'e tiitii jojjemo Eyacuiñajjiya eseya cuaqui yasijje huoojea ca'yoquiaye. <sup>22</sup> E'e, yahuajo eshahua mi huoojeajji poanaje. Eyacuiñajjiya miquea eshahua poqui mee ca'yonaje. Jjeya ca ca Eyacuiñajji mi huoojeajji poani. Oya shajja'ajjañajo, ohuaya miya quea bojea'yo po mee cani; ba'e tiitii mee caje'yo eyajo. <sup>23</sup> Eyacuiñajjiya shajjama' cuana huoojea caje'yo cuaqui yasijje eshahua nijje quea mimishi poanaje sosejje. Pea ca ca jama ba'a: Eseyá jamatii quea pame ba'e meemee ajja. Emeshi Mese nei Jesosa Quito nijje jjapeequianijo, Eyacuiñajjiya eseya o jayojja jjashahuaba meequi ca'yani; eseya ba'e tiitii mee caje'yo eyajo onijje. E'e de, eseya jamatii quea pame nee ba'e neinei ajja.

7

*Esohui eba meesahuajji epona ahuejjijo*

<sup>1</sup> Ecuea epeeji cuana, Eyacuiñajjiya esohui etehue'yo miquianajaya eba. Jamajjeya jama baña ba'a: Eseyá eshe nequijo ca ca oe esohui etehue'yo jayojja jama caba'yahua tii, mano'yo majje pojjeama. <sup>2</sup> Miquiana ba meesahuajji eyaya jama huohuiaña ba'a: Eyacuiñajjiya jama huohui canaje ba'a: —Ehuanase ojaya yahue nijje caba'yahua tii tii. ¡Yahue mano'yo jjimajo, pea nijje a'a jjahueaqui mee'yoyji! ¡O mano'yajo ca ca peajo cajjahueaqui'yahua! <sup>3</sup> Ojaya yahue mano'yo jjima eshe nequi tiijo, peajo jjahueaqui nisho'yanijo, oya ehuanase pea cojjojji poani. Ojaya yahue mano'yo majje ca ca oya e'ahuemano. Oya ahuemano' jayojja peajo cajjahueaqui'yahua. Jjahueaqui o'oya majje pea cojjojji jayojja jama pojjeama —jamaya huohui canaje yahuajo nei Eyacuiñajjiya.

<sup>4</sup> Jamajje ecuea epeeji cuana, miquianajaya eba neineijji eyaya jamaya huohuiaña. Jesosa nijje jjapeequianijo epona e'ahuemano jjahueaquiani jayojja jama poani. E'e,



yahuajo Jesosa ba jjimahuajo eseya quea quehua jjashahuabaquinaje jama ba'a: — Eyacuiñajjiya esohui etehue'yo jayojjaya jama atiitiañajo, ohuaya eseya ba'e tiitii mee caje'yo onijje eyajo —jamaya eseya po'ajjanaje.

Jjeya ca ca Jesosa esejaya mimishi cuijea'yojji sosejje mano'yonajejo yahuajo jama jjashahuabaqui ajja, de. Jjeya ca ca pea jjashahuabaquime poani. Jiquio ecua oja yahue mano'yo majje ehuanase peajo jjahueaqui'yani jayojja jama jjeya eseya Jesosa nijje jjapeequi'yani. Eyacuiñajjiya Jesosa emano'yojaa shequi mee ca o'oyanaje jayojja jama eseya pea jjashahuabaquime po mee ca'yani. Jamajjeya eseya jjashahuabaquiani quea pame nee eba'ejji, Eyacuiñajji quea bihui nee epo meejji. <sup>5</sup> Yahuajo Jesusaja epeejji po jjimahuajo eseya ba'enaje esejaya ejjashahuabaquijji quea tai jayojjaya. Eyacuiñajjiya esohui etehue'yo ba majje shajjama' po sa neinei poanaje jama ba'a: “¡A'a pea siijji!” ba majjeya eseya pea sii sa neinei poanaje. Jamaya eseyaya Eyacuiñajji quea quene po meenaje. Jamajjeya Eyacuiñajji nijje eba'e'yojji tii tii pojjeama. <sup>6</sup> Yahuajo aje oe eseya mimishi pajea meemee ajja. Jiquio ecua Eyacuiñajjiya esohui shajja'ajja majje jamatii ameemee ajja. Jjeya ca ca Jesosa esejaya mimishi sosejje mano'yonajejo, eseya pea jjashahuabaquime poani. Eseyaya baña esohui etehue jayojja jama añajo pojjeama Eyacuiñajjiya eseya quea pame ba'e tiitii mee caje'yo. Jesosa nijje jjapeequianijo ca ca eseya pea jjashahuabaquime poani. Edojjoshahua Pameya eseya quea pame nee ba'e meesahua canijo, Eyacuiñajji quea bihui nee po mee sa año.

*Eyacuiñajjiya esohui ba neinei majje esejaya eba poa eseya shajjama' nei poani*

<sup>7</sup> Eyacuiñajjiya esohui etehue'yo ba majje ca ca esejaya eba poa eseya shajjama' poani. Jamatii beca cuana jama poani pojja'a ba'a: —¿A'a esohui etehue'yo jayojja jama e'a'yojji pojjeama?

Chojja, quea pame nee. Etehue'yo ba jjima jojjemo esejaya Eyacuiñajji quea quene poani ba jjima pome. E'e, Eyacuiñajjiya esohui etehue'yo jama poani ba'a: “¡A'a oe onajaya aquiana jea bajji!” poani. Jamatii Eyacuiñajjiya esohui ba jjima jojjemo onajaya aquiana jea bañajo Eyacuiñajji enijje quea quene poani ecuea ba jjima pome. <sup>8</sup> Ma ba majje ca ca eshahuaa eya onajaya aquiana jea ba neinei mee canaje quea huiso nee. Yahuajo esohui ba jjimajo ca ca ecuea ba jjima poanaje eya shajjama' poani onajaya aquiana jea ba majje. <sup>9</sup> Yahuajo esohui etehue'yo ba jjimajo eya shajjama' pojjeama poso jjabaquinaje. Quijje Eyacuiñajjiya esohui etehue'yo ba majje ca ca eyaya banaje jama ba'a: —E'e, eya ca iña shajjama' nei nei poani, de. Eyacuiñajjiya eya quea nee nee po mee caje'yo, de —eya poanaje.

<sup>10</sup> Jamajjeya Eyacuiñajjiya esohui jama eba'e tiitii jojjemo eseya Eyacuiñajji nijje ba'e tiitii mee'yome. Eyaya ojaya esohui jama ajjima tiitiijo ca ca eya Eyacuiñajjiya quea nee nee po mee caje'yo. <sup>11</sup> Eyaya Eyacuiñajjiya esohui etehue'yo jayojja jama a'ajja'yonaje. Chojja, ameemee ajja, de, quea mimishi nee nee. Jamajjeya esohui jayojja jama atiitii jjimajo aje oe Eyacuiñajji enijje quea quene nee nee poaje, eya quea nee nee po mee caje'yo tii tii. <sup>12</sup> Jamatii Eyacuiñajjiya esohui etehue'yo quea pame nee e'e jojo nei, Eyacuiñajjiya ejjashahuabaquijji ese quea bihui ba'e meesahuajji. <sup>13</sup> Jamajjeya Eyacuiñajjiya esohui quea pame ba neinei'yo majje, ¿a'a Eyacuiñajjiya eya quea nee nee po mee caje'yo? Chojja, jamaya pojjeama. Eyacuiñajjiya ojaya esohui tehue mee ca poa ojjañaja ebajji shajjama' nei nei quea tai nee nee poani cuana jjabahuejjaquijji Eyacuiñajjiya quea nee nee po mee caje'yo. Jamajjeya esohui ba jjimajo eya shajjama' pojjeama poso jjabaquinaje; ba majje ca ca jamatii eya mimishi po majamaja sa neinei poanaje. Eyacuiñajji quea quene po meenaje enijje. Quea pame po sa poani, jamatii quea pame po ajja. Mimishi boti'ama; jamatii jamaya eyaya año. <sup>14</sup> Eseyaya eba Eyacuiñajjiya esohui quea pame nee nee. Eya ca ca pame'ama, shajjama' pea'ai, de. Jamajjeya eya jamatii quea pame ba'e meemee ajja ojaya esohui jayojja. Jiquio ecua echacojji ojaya echacomeejjiya esohui jayojja chaco sa po ajja, jamatii jamaya chaco caje jama jayojjaya eya quea mimishi po sa po'yo ajja, jamatii quea mimishi poani. <sup>15</sup> Eyacuiñajjiya esohui

jayojja jama a'ajja majje eya jjashahuabaquiani jama ba'a: —¡Dee! ¿Apiojji shai eya quea pame nee po ajja? E'e de, eya quea pame po nishoani.

Eya quea mimishi po majje jjashahuabaquiani jama ba'a: —¡Dee! ¿Apiojji shai eya quea mimishi poanaje? Jamaya eya po sa po'yo ajja —jamaya eya jjashahuabaquiani.

<sup>16</sup> E'e de, ecuea eba Eyacuiñajji esohui quea ja'a nee. Jamajjeya eya quea yeno poani ma esohui jayojja jama mi amajje. <sup>17</sup> Jjeya ca ca ecuea pea jjashahuabaquime quea ja'a poanijo ma ecua eya yahuajo ba'yaninaje jama po sa po'yo ajja. Jamatii ecuea ejjashahuabaqui'yojji quea mimishi; e poaninaje yahuajo pajeapajea'yo ajja. E'e de, ecuea ejjashahuabaqui'ji quea mimishi yani, de. Cajaa.

<sup>18</sup> Ecuea eba jama ba'a: Quea mimishi jjejojo eya jamatii quea ja'a nee jjashahuabaqui ajja tii tii. Eya quea ja'a nee po sa po'yo majje jamaya eyaya ameemee ajja, de. Quea mimishi nee nee ña, de. <sup>19</sup> E'e de, eya quea pame nee po sa poani. Jamatii quea pame, quea ja'a po'ajjani. Mimishi po sa po'yo ajja, de. Jamatii quea mimishi poani. <sup>20</sup> Mimishi amajje eya quea yeno poani. Mimishi a sa po'yo ajja. Jamajjeya mimishi a'yo majje ecuea eba ecuea eba'e'ji ma ecua eya yahuajo ba'yaninaje jama eyaya atiitiaña.

<sup>21</sup> E'e, eya quea pame nee Jesosa jayojja ba'e sa poani nei. Jamatii eya ca'a'amajo quea pame atiitii ajja. Ecuea ejjashahuabaqui'ji quea mimishi yani, ma e yahuajo ba'yaninaje quea tai poaninaje. Maya eya pajeapajea'yo ajja. <sup>22</sup> E'e de, Eyacuiñajji esohui ecuea quea jea nee nee. Maya eyaya a sa ña. <sup>23</sup> Jamatii ecuea ejjashahuabaqui'ji jjeya jiquio jama ba'a: —Quea pame nee a sa ña Eyacuiñajji esohui jayojjaya —eya poani. Jamatii jamaya eyaya ameemee ajja. Ecuea ejjashahuabaqui'ji yahuajo jayojja jama ña, quea mimishi. E'e de, eya quea mimishi nee nee; mimishi cuana pajea'yo ajja. Eya jama poani ba'a: Onajaya esohui quea mimishi jayojja jama eyaya ña tii tii. <sup>24</sup> E'e, eya quea yeno poani mimishi amajje. ¿Aya acuae eya mimishi pajea neinei meesahua caje'yo so'o? <sup>25</sup> Eseyaya Emeshi Mese nei Jesosa Quito quea ca'a nee nee poani. Jamajjeya ohuaya eya mimishi pajea meesahua caje'yo, e'e jojo nei. Jamajjeya eyaya Eyacuiñajji bihuiaña jama ba'a: —Ecue Chii, miyaya eya jaahuanaña quea pame nee nee.

E'e, Eyacuiñajji esohui jayojja jama a sa ña. Jamatii eyaya jamaya pojjeama atiitiaña. Jesosa Quito ca ca quea ca'a nee nee poani. Ohuaya eya mimishi pajea meesahua ca'yani. Jamajjeya Eyacuiñajji esohui jayojja jama eyaya ña.

## 8

### *Edojjoshahua Pameya eseya ba'e mee cani Jesosa jayojja, yahuajo jama pojjeama*

<sup>1</sup> Jjeya Jesosa Quito nije jjapeequianijo, Eyacuiñajjiya eseya huohui cani jama ba'a: —Eyaya jja miquianaya emimishi cuijea'yo baña. Jesosa Quito mique mimishi cuijea'yojji poanaje. Quea boejea poanijo, miquianaya ecuea etecueajji pojjeama —Eyacuiñajji poani.

<sup>2</sup> Yahuajo Jesosa Quitoja epeeji pojjeama poanaje. Yahuajo eseya quea mimishi po tiitiiianijo cuaqui yasijje edobiqui'ji nisho poanaje. Jjeya ca ca Jesosa Quitoja epeeji poanijo, Edojjoshahua Pameya eseya ba'e mee cani o jayojja, mimishi'ama. <sup>3</sup> E'e, eseya quea mimishi poaniya jjejojo Eyacuiñajji esohui jayojja jama ameemee ajja. Jamajjeya Eyacuiñajjiya eseya quea boejea pojjeama ba cani. Chojja. Eseyaya quea mimishi nee nee poanaje. Jamajjeya Eyacuiñajjiya Jesosa, oja Bacua Ejja oe nei huoojea canaje jiquio meshi yasijje. Oya, Jesosa yamijji dejja jayojja poanaje. E'e, Jesosa ese jayojjaya yamijji poa, jamatii oya mimishi'ama tii. E'e, Jesosa mano'yonaje esejaya mimishi cuijea'yojji, esejaya mimishi sosequia'yojji pea'ai. Jesosaa esejaya mimishi pajea meesahua ca'yanijo, Eyacuiñajji ese nije quea bei poani. <sup>4</sup> Jamaya acanaje Eyacuiñajjiya eseya ojaya esohui etehue'yo quea ja'a nee jayojja jama ameeya, ojaya ejjashahuabaqui'ji quea ja'a nee jayojja jama epo meeji pea'ai. Jjeya Edojjoshahua Pameya eseya ba'e mee cani Eyacuiñajji esohui jayojjaya. Jjeya eseya Jesosa jayojja ba'yani, pea jjashahuabaquime poani, yahuajo jayojja jama pojjeama. Yahuajo quea mimishi poanaje, jjeya ca chojja. <sup>5</sup> Beca cuana quea mimishi ba'e sa poani, yahuajo ba'enaje jama. Ojaya ejjashahuabaqui'ji quea mimishi jama atiitii cani. Mimishi pajea sa po'yo ajja tii. Pea cuaa ca ca Edojjoshahua Pame

shajja'ajja cani. Ojaya ejjashahuabaquijji quea pame jayojja jama jjashahuabaquime poani pea'ai. E'e, Edojjoshahua Pameya Jesusaja epeeji cuana jjashahuabaqui meesahua cani o jayojjaya. <sup>6</sup> Ojjaña quea mimishi ba'yaniya ejjashahuabaquijji quea mimishi jama atiitii cani. Mimishi cuana pajea sa po'yo ajja nei nei. Jamajjeya cuaqui yasijje poquije'yo. Quea nee nee poaje'yo. Edojjoshahua Pameya eseya Eyacuiñajjija ejjashahuabaquijji jayojja jama po meesahua cani. Jamajjeya eseya ba'e tiitii mee caje'yo eyajo Jesosa nijje quea bei nee nee. <sup>7</sup> Ojjaña quea mimishi, quea mimijjequijjea jjashahuabaquiani Eyacuiñajjija epeeji pojjeama. Shajjama' cuana, de. Oya cuana Eyacuiñajjija esohui jayojja jama a'ajja tii. Mimishi pajea'yo ajja tii tii. <sup>8</sup> E'e, quea mimishi, quea mimijjequijjea poanijo, Eyacuiñajji onijje quea bei pojjeama poani.

<sup>9</sup> Jesosa Quitoja epeeji Shoma cuiñajjijo ba'e, miquianaya yahuajo quea mimishi poa. Jjeya ca chojja. Edojjoshahua Pameya miquianaya ba'e meesahua cani quea pame nee nee, yahuajo jama pojjeama. E'e, Edojjoshahua Pame Jesusaja epeeji cuana huasijje edobiquinequi. O miquiana que dobiqúi jjima jojjemo miquianaya Jesusaja epeeji pojjeama pome, miquianajaya mimishi cuijea'yo jjima pome. <sup>10</sup> E'e jojo nei Jesosa Quito miquiana nijje nequi tiitiani. Ohuaya miquianajaya edojjoshahua ba'e tiitii mee caje'yo miquea mimishi ecuijea'yojojo. E'e, miquianaya mano'yo majje eyami ihuije'yo quea mimishi poa jjejojo. <sup>11</sup> Jamatii Eyacuiñajji quea ca'a nee nee poani; ohuaya Jesosa emano'yojaa shequi mee ca o'oyanaje. Jamajjeya Jesusaja epeeji poanijo, ohuaya miquianaya ba'e mee caje o'oya eyami eyacua nei. Emano beca'yojji pojjeama. Jamaya poaje Edojjoshahua Pame miquiana huasijje dobiqúi majje.

<sup>12</sup> Jamajjeya ecuea epeeji cuana, miquianaya Jesusaja epeeji poanijo, pea jjashahuabaquime poanijo Eyacuiñajjija esohui jayojja jama acue! ¡Yahuajo jayojja jama a'a po o'oyajji! <sup>13</sup> E'e, quea mimishi po tiitianijo, Eyacuiñajjiya eseya quea nee nee po mee caje'yo. Edojjoshahua Pameya ca ca ojjaña eseya mimishi pajea meesahua caje'yo. Jamajjeya mimishi pajea'yo epo Eyacuiñajjiya eseya ba'e tiitii mee caje'yo onijje eyajo. <sup>14</sup> Ojjaña joya Edojjoshahua Pame jayojja jama jjashahuabaquime poani Eyacuiñajjija bacua cuana poani. <sup>15</sup> Yahuajo, Jesusaja epeeji po jjimahuajo eseya quea mete ba'enaje. Eshahua jayojja jama jjashahuabaquime eseya poanaje. Jjeya ca ca Edojjoshahua Pameya eseya Eyacuiñajjija bacua po mee cani. Ohuaya eseya mimi meesahua cani Eyacuiñajji nijje jama ba'a: —Eyacuiñajji, miya ecue Chii e'e jojo nei.

<sup>16</sup> E'e, jjeya Eyacuiñajjiya ba cani eseya oja bacua poani. Edojjoshahua Pameya eseya ba mee cani jama ba'a: —Miquianaya Eyacuiñajjija bacua cuana poani.

<sup>17</sup> Jamajjeya Eyacuiñajjija bacua cuana poanijojo ojjaña ojaya aquiana esejaya poaje; eseya ohuaya quia caje'yo. E'e, ojaya esohui yahuajo jayojja jama acaje'yo ese nijje jama ba'a: Ojjaña aquiana Eyacuiñajjiya quia ca'yonaje Jesosa Quito que. Maya aquiana esejaya poaje'yo pea'ai Jesosa Quito nijje jjapeequianijo. Onijje jjapeequianijo, pea cuaa eseya napa caje, quea nee nee po mee caje'yo. Jamatii. Ecuana quea nee poani Jesosa jayojja. Jamajjeya Eyacuiñajjiya eseya ba'e tiitii mee caje'yo Jesosa nijje quea ja'a nee eyajo. Onijje ona huoojeajji po mee caje'yo.

#### *Quijje eseya quea pame nee anije'yo eyajo Jesosa nijje*

<sup>18</sup> Jjeya eseya jiquiojo tii quea yeno poani, quea nee poani Jesosa nijje jjapeequianijo. Jamatii ja'a quea yeno pojji! Quea pame nee nee eseya ba'e tiitije'yo Jesosa nijje eyajo.

<sup>19</sup> Adana, esejaya ejeajji quea mimishi poa. Adana quea mimishi poanijo, Eyacuiñajjiya ojjaña ojaya epana'yo cajaa acanaje beshahua nei. Eseyá Eyacuiñajjija bacua cuana quea ja'a nee, quea ca'a nee Jesosa nijje poanijo, ojjaña aquiana cajaa ya'yojji pojjeama po mee caje'yo Eyacuiñajjiya. <sup>20</sup> E'e, yahuajo nei Eyacuiñajjiya ojjaña quea pame nee pana ca'ya poa. Adana quea mimishi poajo ca ca Eyacuiñajjiya ojjaña cajaa aca poa. Quijje ojjaña aquiana cajaa ya'yojji pojjeama poaje'yo. Ma Eyacuiñajjiya ebionei pana ca poa jayojja ishoa ca ani, ojjaña. <sup>21</sup> E'e, jjeya ojjaña aquiana mano'yani, ihui'yani pea'ai. Quijje, Jesosa poe o'oyajo ca ca ojjaña aquiana cuana quea pame nee nee poaje o'oya. Adana

quea mimishi po jjimahuajo jama jayojjaya poaje o'oya. Eyacuiñajjija bacua cuana, ma Jesosa nijje jjapeequiani quea pame nee nee poaje'yo Jesosa poe o'oyajo. Ma shejo ojjaña aquiána ojjaña Eyacuiñajjija pana'yo quea pame nee nee poaje o'oya. <sup>22</sup> Adana quea mimishi poa jojaya ojjaña aquiána quea nee, quea tai, quea camaja nee poa. Jjeya nei pea'ai jamaya poani, jiquio jama ba'a: Jesosa poe o'oya jjimahuajo ojjaña Eyacuiñajjija pana quea yeno, quea nee nee poani, jiquio ecua epona bacua cuayani jama jayojja quea nee nee poani bacua cuaya jjimahuajo. <sup>23</sup> Edojjoshahua Pame dobiqul'onaje ese que, Jesusaja epeeji cuana huasijje. Jamatii eseya pea'ai quea nee, quea mano, quea shoe pea'ai poani. Edojjoshahua Pameya eseya ba meesahua cani jama ba'a: Jesusaa poe o'oya majje eseya quea pame nee po mee caje'yo eyacua. Eyacua po'yo majje mano'yo ajja, nee'ama ba'e tiitiije'yo eyajo pea'ai. Eyacuiñajjija esohui ma ecua ohua yahuajo huohui canaje jayojja jama ohuaya eseya, ojaya bacua cuana acaje'yo Jesosa poe o'oyajo. Jamajjeya eseyaya ishoaña Jesusaja epoe o'oyajji. Eba'eji eyacua quea pame nee nee esejaya poaje, de. <sup>24</sup> Jama poaje ba'a: Eyacuiñajjiya eseya mimishi cuijea'yo majje ba'e tiitii mee cani. Eseyaya eyami eyacua amee caje'yo pea'ai, Jesosa poe o'oyajo. Jamajjeya eseyaya ishoaña ojaya epoe o'oyajji. Jjashahuabaquiani quijje eyacua epojji. <sup>25</sup> Jamajjeya ishoaña tii tii Jesosa ache shono poeje o'oya ebajji. Eyami eyacua yajji eseyaya ishoaña quea bihui nee nee.

<sup>26</sup> Cuanaya eseya ca ca ca'a'ama poanijo, Edojjoshahua Pameya quea ja'a nee ba'e meesahua cani. Eba'eji quea camajajo Eyacuiñajji nijje emimijji esejaya ba jjima. ¿Yajja mimime epojji? Jamajjeya Edojjoshahua Pame esejo mimi neineiáni Eyacuiñajji nijje; eseya mimi meesahua cani Eyacuiñajji nijje pea'ai. <sup>27</sup> E'e, ojjaña esejaya ejjashahuabaqui'y-ojji mimi meeme ajja quea ja'a nee Eyacuiñajji nijje. Jamatii Edojjoshahua Pameya eseya jjashahuabaqui meesahua canijo, ojjaña esejaya ejjashahuabaquijji Eyacuiñajjija eba nei nei poani. E'e, Edojjoshahua Pame jama poani ba'a: —Eyacuiñajji, Jesusaja epeeji cuana huohui'ajja cani ma oya cuana sa poanijo. Jamajjeya ¡jamaya acue! ¡Miquea ejjashahuabaquijji quea pame nee jayojja jama acue Jesusaja epeeji cuanajo! —jamaya esejo mimiani Eyacuiñajji nijje Edojjoshahua Pame.

#### *Eyacuiñajjiya eseya Jesosa jayojja jama ba'e meesahua cani*

<sup>28</sup> E'e, jjeya quea camaja Jesosa nijje ejjapeequijji. Jamatii Eyacuiñajjiya eseya babaca canaje ojaya epeeji epojji. Jamajjeya ohuaya eseya jaahuana cani tii tii. Jamaya acani esejaya oya quea jea nee poanijo. <sup>29</sup> E'e, yahuajo nei ese pana jjimahuajo Eyacuiñajji esejo jjashahuabaquinaje jama ba'a: —Ecuea eba a'ya cuae ecuea epeeji poaje quijje nei nei. Eyaya oya cuana ecuea Ebacua Ejja Jesosa jayojja jama ba'e meesahuaje quea pame nee —jamaya poanaje Eyacuiñajji.

Jamajjeya eseya Jesosa jayojja jama poanijo, oya esejaya Edoe Mese poaje, eseya Noo. <sup>30</sup> E'e, yahuajo nei nei ese cuaya jjimahuajo Eyacuiñajjiya babaca ca poa ojaya epeeji epojji. Babaca majje eseya mimishi cuijea ca'yonaje. Mimishi cuijea'yo majje eseya ba cani mimishi'ama. Ba'e tiitii mee cani quea ja'a nee, quea ca'a nee Jesosa nijje eyajo, Eyacuiñajjiya.

#### *Quea pame nee nee Eyacuiñajjiya eseya acani*

<sup>31</sup> E'e, eseya Jesosa nijje ba'e tiitiije'yo quea ja'a nee o jayojjaya. Quea pame nee nee poaje'yo esejaya eba'eji. Eyacuiñajjiya eseya jaahuana tiitii cani. Oya oe nei quea ca'a nee nee poani tii. Jamajjeya eseya onaa napa canijo, jamatii Jesusaja eseya epaje'yojji pojjeama. <sup>32</sup> Eyacuiñajjiya eseya quea jea nee nee acanijo ohuaya hoojea canaje ojaya Ebacua Ejja Jesosa esejo mano'yohua ese mimishi cuijea'yojji. Jamajjeya eseyaya jama baña ba'a: Eyacuiñajjiya eseya quea jea nee nee atiitii caje'yo; eseya jaahuana tiitii caje'yo pea'ai. Ohuaya eseya jjapeequi meesahua caje'yo quea ja'a nee Jesosa nijje. <sup>33</sup> Eyacuiñajjiya eseya babaca canaje ojaya epeeji epojji. Jamajjeya pea cuana esejo emimijajijji pojjeama Eyacuiñajji nijje jama ba'a: —Miquea epeeji quea tai. ¡Cajaa acue!

Chojja. Jamaya emimijajijji pojjeama esejo. Eyacuiñajjiya eseya emimishi cuijea'yo ba cani. <sup>34</sup> Jesosa Quito mano'yonaje eseja mimishi cuijea'yoyji. Emano'yojaa Eyacuiñajjiya oya shequi mee ca o'oyanaje, nequi mee ca'yonaje o pejeje eyajo ojjaña huoojeajji. Jomajo oya Jesosa Quito esejo mimiani jama ba'a: —Ecuea epeeji cuana quea boejea poani, emimishi cuijea'yo —Jesosa poani.

Jamajjeya pea ese nijje emimijajijji pojjeama jama ba'a: —Miquianaya shajjama' nei nei poanijo quea nee nee poaje —jama mimijajimeya epoiji pojjeama ese nijje, Jesosaja epeeji cuana nijje.

<sup>35</sup> Eseyá Jesosa Quitoja quea jea nee nee poani e'e jojo nei. Jamajjeya pea cuaa eseya napa caje Jesosa nijje jjapeequianijo; jiquio jama poaje ba'a: Eba'ejji quea camaja poaje. Quea nee, quea mete poaje. Eshahuaja epeeji cuaa quea mimishiya eseya napa caje Jesosaja esohui huohuijji poanijojo. Quea shoe nee poaje pojja'a. Quima', aema' poaje pojja'a. Pea cuaa esejaya aquiana sii caje ojjaña pojja'a. Jesosa nijje chachacoanijo, pea cuaa eseya quecua caje'yo pojja'a. Jamatii esejaya eba e'e jojo nei Jesosa Quitoja eseya quea jea nee nee, epajea'yoyji pojjeama. Ohuaya eseya jaahuana cani. <sup>36</sup> Beca cuana yahuajo nei quea mase poa. Jamajjeya ohuaya Jesosaja epeeji cuana quecua ca'ya poa. Jjeya beca cuaa quea mase poaniya eseya quecua sa acani Jesosaja epeeji poanijojo. Yahuajo nei nei Eyacuiñajjiya epeejiya esohui tehue ca poa. Eyacuiñajjiya esohui etehue'yo jama poani ba'a:

“Eyacuiñajji, ecuana minijje jjapeequianijo pea cuana jjashahuaba majamajaquiani jama ba'a: —Cacuiajea'yahua —poani. Jiquio ecua ñajjajja ña majje quecua cani jayojja jama onaaya ecuana acani”.

Jamaya yahuajo nei nei Eyacuiñajjiya epeejiya tehue ca poa.

<sup>37</sup> Dejja mimishi cuana quea huiso nequijo quea camaja nee Jesosa nijje ejjapeequijji. Jamatii pea cuaa eseya ejjapeequi pajea mee'yoyji pojjeama Jesosa nijje. Chojja. Eseyá Jesosaja quea jea nee poanijo eseya ojaya epeeji poani. Ohuaya eseya jaahuana cani.

<sup>38</sup> Cuanaya esejaya eba e'e jojo nei Jesosa Quitoja, Emeshi Mese neija epeeji poanijo, Eyacuiñajjiya quea jea nee nee poani eseya. E'e, jiquiojo ba'e, mano'yo majje pea'ai eseya Eyacuiñajjiya quea jea nee. Epajea'yoyji pojjeama tii tii. Esohuidojojji cuaa, eshahua cuaa pea'ai Eyacuiñajji ese pajea mee'yoyji pojjeama. Ojjaña jjeja nei aniya, ojjaña quijje nei poajeya pea'ai Eyacuiñajji ese pajea mee'yoyji pojjeama tii. Ojjaña quea taiya quea mimishiya pea'ai Eyacuiñajji ese pajea mee'yoyji pojjeama tii. Eseyá ojaya quea jea nee nee poaje'yo tii tii. <sup>39</sup> Jesosa Quitoja epeeji poanijo, ojjaña quea ca'a eyajo nequiya, ojjaña quea ca'a meshijo nequiya, ojjaña Eyacuiñajjiya panaa pea'ai Eyacuiñajji eseya epajea mee'yoyji pojjeama. Eseyá ojaya quea jea tii tii poaje'yo.

## 9

### *Yahuajo nei Eyacuiñajjiya Isaeni cuana babaca ca poa ojaya epeeji nei epoiji*

<sup>1</sup> Eyaya, Pabohua miquiana que, Jodio cuana huasijje tehueña, ma Shoma cuiñajjiyo ba'e yasijje. Eya Jesosa Quitoja epeeji poanijo ecuea esohui e'e nei poani. E'e, Edojjoshahua Pameya eya jjashahuabaqui meesahua cani quea ja'a nee. <sup>2</sup> Eya Jodio dejja pea'ai. Jamajjeya eya quea yeno po tiitiani Jodio cuanajo, Jesosa nijje jjapeequi sa po ajjajo. <sup>3</sup> Jodio cuana Jesosaja epeeji epoiji eyaya sa neineiaña. Jjashahuabaquiani Jodio cuanajo, ecue huapa pojjeama cuanajo jama ba'a: —Eyacuiñajjiya eya cajaa ca'a cahua Jodio cuana cuaqui yasijje poqui'yo jjima epoiji. Jamaya Eyacuiñajjiya ya'yo jojjemo eya quea bihui nee pome —eya poani.

<sup>4</sup> Yahuajo Eyacuiñajjiya Jodio cuana babaca ca poa ojaya epeeji cuana epoiji. Oja bacua cuana po mee ca'ya poa. Eyacuiñajji Jodio cuana nijje nequinajejo, onajaya eba poa Eyacuiñajji ojjaña huoojea'yoyji quea ca'a nee poani tii tii. Jodio cuana nijje mimi majamajanaje jama ba'a: “Enijje jjapeequianijo miquianajaya ebacua cuana quea huiso nee poaje. Jiquio meshi eyaya quiaje miquianajaya enequijji, miquianajaya osecua cuana nequijji” Eyacuiñajji poanaje. Quijje Eyacuiñajjiya Moisesi tehue mee ca poa ojaya

esohui Jodio cuana quea ja'a nee ba'e meesahuajji. Etiiquiana nijje miminaje jama ba'a: "Miquianaya e'e jojo nei e bihuiajji poajo, eya miquiana nijje mimije" Eyacuiñajji poanaje. Cuanaya Eyacuiñajjiya huohui canaje jama ba'a: "Mique osecua nei quijje poeje; ohuaya miquianaya ba'e tiitii mee caje'yo onijje" Eyacuiñajjiya jamaya Jodio etiiquiana aca poa.

<sup>5</sup> E'e, Jodio cuanaja etiiquiana ma bajjani poa ba'a: Amajama, Amajamaja bacua ejja Isaaca, Isaacaja bacua ejja Jacobo, ma quijje Isaeni bajjani aca poa, Isaenija bacua ejja cuana 12 huisome poa, Jodio cuanaja etiiquiana poa. Jesosa Quito cuaya poa dejja jayojja, yamijji, Jodio ponaja mejo poa. Etiiquianaja osecua poa Jesosa, esejaya etiiquianaja osecua. Jjeya oya ojjaña huoojeajji poani. Jamajjeya jaya ejjabihuaqui tii tii!

<sup>6</sup> Jodio cuana oe pojji cuana Jesusaja epeeji poanaje. Jamajjeya oe pojji cuanaja mimishi ecuijea'yo poanaje, Jodio cuanaja. Jamatii esejaya eba Eyacuiñajjiya ojaya ehuhui'yo ma etiiquiana cuana nijje ohua huohui ca poa jayojjaya acani Jesusaja epeeji cuana nijje. Jesusaja epeeji cuana ca ca oe Isaeni dejja e'e jojo nei poani, Eyacuiñajjiya babaca. <sup>7</sup> Pea cuana ca ca, mimishi cuana ca ca Eyacuiñajjiya Isaenija osecua nisho ba cani. Amajamaja osecua cuana Eyacuiñajjiya babaca'yo beca cuana poanaje. Yahuajo nei nei Eyacuiñajji Amajama nijje mimia poa jama ba'a: "Amajama, Sanaja mejo miquea ebacua Isaaca bajjani poaje. Ojaya osecua cuana quea huiso nee nee poaje. Oya cuana ca ca mique osecua cuana e'e jojo nei poaje". Jamaya Eyacuiñajjiya aca poa. <sup>8</sup> Ma esohui ba majje esejaya eba poa ojjaña Amajamaja osecua cuana Eyacuiñajjiya babaca jeyo jjima poa ojaya epeeji epojji. Amajamaja pea ebacua cuana cuaya poa. Jamatii Eyacuiñajji onajaya osecua cuanajo mimi jjima jama ba'a: "Miquianajaya osecua cuana ecuea ehabaca ecuea epeeji epojji" jamaya ajjima onaya. Chojja. Oe ebacuajo huohui ca poa Eyacuiñajjiya. Amajamaja ebacua Isaaca bajjanijo ca ca oe jamaya huohui ca poa. Isaaca cuaya jjimahuajo jamaya huohui ca poa Eyacuiñajjiya. <sup>9</sup> Jama aca poa ba'a: "Amajama, miquea ehuanase etii, bacuama". Jamatii quijje oya o'ejji poaje. Ecuea eba ache shono miquea ebacua cuayaje, dejja shoi. Apoa poajo eyaya miquea ebacua cuaya meje". Jamaya Eyacuiñajjiya aca poa.

<sup>10</sup> Eyaya, Pabohua miquianaya pea esohui huohuije Isaacaja bacua cuanajo. Jamajjeya miquianaya ba meeje ojjaña Amajamaja osecua cuana Eyacuiñajjiya babacajeyo jjima ojaya epeeji nei epojji. Oe nei babaca ca poa; etiiquiana Isaaca ojaya ebabaca poa. Isaacaja ehuanase Shemeca bajjani poa, oja mejo ebacua becajaa poa, dejja pea'ai. <sup>11</sup> E'e, Shemecaja ebacua becajaa cuaya poa. Ma ebacua cuana cuaya jjimahuajo, mimishi ajjimahuajo pea'ai, Eyacuiñajjiya huohui ca poa oe ebacua ojaya ebabaca'yo ojaya epeeji nei epojji, pea cho. Jamajjeya ojjaña ba mee ca poa ohuaya babaca cani coya ohua quea jea ba caje. <sup>12</sup> Ba majje pojjeama Eyacuiñajjiya ojaya epeeji epojji babaca cani. Jyaya ohuaya sa caniya babaca cani. Jamajjeya huohui ca poa enaese Shemeca bajjani ojaya ebacua becajaajo jama ba'a: "Mique bacuaa Esao bajjanija cashajja'ajja cahua oja chahuaja esohui, Jacoboja" Eyacuiñajjiya aca poa Shemeca. <sup>13</sup> Eyacuiñajjiya esohui huohuijji yahuajo ojaya esohui tehue mee ca'ya poa jama ba'a: "Ecuea Jacobo quea jea nee nee. Esao ca ca cajaa anaje" Eyacuiñajjiya aca poa.

<sup>14</sup> —¿Apiojji shai Eyacuiñajjiya ebionei cuaya cajaa aca'yonaje, ebacua quijje cuaya babaca ca poa? ¿Apiojji shai? Jamaya eseyaya ajjima aña. Jamaya quea pame pojjeama —beca cuana poani.

Chojja. Eyacuiñajjiya quea pame nee nee tii acani. <sup>15</sup> Ohuaya Moisesi huohui ca poa jama ba'a: "Eya beca cuana nijje quea bei poani. Beca cuana eyaya jaahuanaña. Cua eya quea jea aña eyaya babacaña" Eyacuiñajjiya aca poa. <sup>16</sup> Eseyaya eba'ejjijo pojjeamajo, esejaya ejjashahuabaquijjijo pojjeamajo pea'ai ese nijje quea bei poani Eyacuiñajji. Chojja, ojaya quea jea nee nee poanijo ohuaya eseya jaahuana cani, ese nijje quea bei poani pea'ai. <sup>17</sup> Cuanaya yahuajo nei Ejito emeshi mese Panao bajjanijo Eyacuiñajjiya esohui etehue'yo jama poa ba'a:

“Panao, eyaya miya nequi meeaña Ejito emeshi mese epojji. Eyaya ma dejja cuanaja ba jjima aña mi quea mete po meeji ejo. Jamaya ojjaña cuana ojjaña meshijo ba'e ba meeje eya e'e nei quea ca'a nee nee poani tii”.

Jamaya Panao Eyacuiñajjiya aca poa. <sup>18</sup> E'e, Eyacuiñajji beca cuana nijje quea bei poani. Ojaya mimishi cuana cuijea cani. Pea cuana nijje ca ca chojja, quea bei pojjeama po tiitiani shajjamajojo. Mimishi pajea mee'yo jjima tii tii acani Eyacuiñajjiya.

<sup>19</sup> Jamajjeya beca cuaa huohui'ajja cani jama ba'a: —Eyacuiñajjiya ecuana mimishi pajea meesahua ajja. Jamajjeya ¿apiojji ohuaya tecuea cani ecuana quea mimishi poanijo? Ojaya ejjashahuabaquijji jayojja jama acani ohuaya, de —beca cuana poani.

<sup>20</sup> Eyaya miqianaya saja'aña jama ba'a: ¡A'a Eyacuiñajji niñebajji! Miquianajaya Eyacuiñajji emimicuijjeanobiajeajji pojjeama. Jama ba'a: Meshimisi iñacajjiya meshimisi pana majje iñaca cani shajjaji acani. ¿A'a meshimisiya tecuea caje meshimisi iñacajji jama ba'a: —¿Apiojji acuaya miyaya eya jamaya anaje so'o? —a'a jamaya meshimisiya acani?

Cho, jamaya po ajja meshimisi. <sup>21</sup> Meshimisi iñacajjiya meshi iña majje ojaya ejjashahuabaquijji jayojja jama acani. E'e pojja'a meshimisi quea bame nee nee asa acani, yiye bame nee nee a sa acani pojja'a. Ojaya ejjashahuabaquijji jayojja jama pana'yome acani. <sup>22</sup> Jamaya Eyacuiñajjiya acani pea'ai, ojaya ejjashahuabaquijji jayojja jama acani. Beca cuana quea mimishi po tiitiani, Eyacuiñajjiya oya cuana quea nee nee po mee sa acani. Jamajjeya ojjaña ba mee caje Eyacuiñajji quea ca'a nee nee poani. Jamatii oya jjeya nei quea tecue nee pocuaji ajja shajjama' nijje. Chojja, quijje nei quea nee nee po mee caje'yo. Ishoa cani. E'e pojja'a shajjama' cuana Jesosaja epeeji poaje ba'ajja'. Jamajjeya Eyacuiñajjiya oya cuana quea nee nee epo meeji pojjeama. <sup>23</sup> Ese beca cuana nijje ca ca Eyacuiñajji quea bei poani. Jamaya acani eseya ojaya quea jea nee nee poanijo. E'e, Eyacuiñajji quea ca'a nee nee poani; eseya jjapeequi meesahua cani Jesosa nijje. Jamajjeya ohuaya eseya quea ja'a, quea pame nee nee ba'e mee sa acani eyajo Jesosa nijje. <sup>24</sup> E'e, Eyacuiñajjiya eseya beca cuana, Jodio cuana, Jodio pojjeama cuana pea'ai babaca canaje ojaya epeeji epojji. Ojaya ejjashahuabaquijji jayojja jama acani, Eyacuiñajjiya. <sup>25</sup> Jamajjeya yahuajo nei ojaya esohui huohuijji Osea bajjani tehue mee ca poa jama ba'a: “Yahuajo nei Jodio pojjeama ecuea ehabaca pojjeama ecuea epeeji epojji. Jjeya ca ca oya cuana ecuea ehabaca ecuea epeeji epojji. Yahuajo oya cuana ecuea quea jea nee pojjeama. Jjeya ca ca oya cuana ecuea quea jea nee nee poani. <sup>26</sup> Jodio pojjeama quea mimishi poanajejo, pea cuaa huohui ca poa jama ba'a: —Miquianaya Eyacuiñajjiya epeeji pojjeama —poanaje. Jjeya ca ca onaaya huohui caje jama ba'a: —Miquianaya Eyacuiñajjiya ebacua cuana poanaje”.

Jamaya yahuajo Eyacuiñajjiya tehue mee ca poa.

<sup>27</sup> Cuanaya yahuajo nei Eyacuiñajjiya esohui huohuijji Isaiaa esohui tehue ca poa Jodio cuanajo jama ba'a:

“Etiqiana Isaeni bajjanija osecua cuana quea huiso nee nee poaje. Meshijaji sope huisoajja poaje, sicosico meeme ajja quea huiso nee nee. Jamatii oe pojji cuanaja mimishi ecuijea'yo poaje. Eyacuiñajjiya oe pojji ba'e tiitii mee caje'yo onijje quea ja'a nee.

<sup>28</sup> Ohuaya ojaya esohui jayojja jama acaje'yo. Ojjaña shajjama' cuana quea nee nee po mee jeyojeyo caje'yo onijje jjapeequi sa po'yo ajjajojo. E'e jojo nei jamaya Eyacuiñajjiya acuaji caje”.

Jamaya aca poa Isaiaa. <sup>29</sup> Ohuaya pea esohui tehue ca poa jama ba'a:

“Yahuajo Eyacuiñajjiya quiyo jeyojeyo mee ca'ya poa ojjaña quea mimijjequijje, ojjaña quea mimishi Sonoma cuiñajji ba'e, ojjaña Comosha cuiñajji ba'e pea'ai. Oya jayojja beshahua nei Isaeni cuana chama'yo tii popoquia poa shajjama' poanijojo. Eyacuiñajjiya oe pojji Isaenija osecua cuana jaahuana ca poa”.

Jamaya aca poa Isaiaa.

*Jodio cuana Jesosa nijje jjapeequi jjima; Eyacuiñajjiya oya cuana ba jjima emimishi cuijea'yo*

<sup>30</sup> ¡Jamajjeya bacue jiquio! Eyacuiñajjiya quea huiso Jodio pojjeama ba caje mimishi'ama. Jodio cuana ca ca oe pojji ba caje mimishi'ama. Yahuajo Jodio pojjeama cuana jjashahuabaqui jjima poanaje jama ba'a: —¿Achajja shai ecuana ba'eje Eyacuiña-jjiya esohui jayojja jama so'o? Jamajjeya ohuaya ecuana ba caje mimishi'ama —jamaya jjashahuabaqui jjima Jodio pojjeama poanaje.

Jamatii Jesosa nijje jjapeequianijo, Eyacuiñajjiya oya cuana ba cani mimishi'ama. <sup>31</sup> Jodio cuana ca ca Eyacuiñajjiya babaca ca poa onijje ejjapeequijji. Jamatii oya cuana jjashahuaba quehuaquinaje jama ba'a: —Ecuana ojjaña Eyacuiñajjiya esohui cuana jayojja jama atiitiaña, ohuaya ecuana ba caje mimishi'ama —Jodio cuana poanaje.

Cho. Eyacuiñajjiya Jodio cuana ba ca poa quea mimishi ojaya esohui cuana jayojja jama mi atiitii cajo. <sup>32</sup> ¿Yajjaje? ¡Bacue! Eyacuiñajjiya Jodio cuana ba cani mimishi'ama ca ca Jesosaja epeeji poanijo. Jamatii onaaya aje oe Jesosa cajaa acanaje. Jama poa cuana ba'a: —Ecuaya esohui etehue'yo jayojja jama atiitiaña. Jamajjeya Eyacuiñajjiya ecuana mimishi'ama ba caje —oya cuana poa. Chojja de, ajjima ojaya, de.

<sup>33</sup> E'e, yahuajo Isaiaa Eyacuiñajjiya esohui tehue ca'ya poa jama ba'a: “Eyaya huoojeaje mimishi cuijeajji Isaeni cuana huasijje. Jamatii Isaeni cuana jjashahuaba quehuaquije; mimishi cuijeajji cajaa acaje'yo. Beca cuana onijje jjapeequiajo ca ca quea bihui nee nee poaje'yo”.

Jamaya aca poa Isaiaa Isaeni cuanajo, Jodio cuanajo.

## 10

<sup>1</sup> Miquianaya Jodio cuana Shomajo ba'e Jesosaja epeeji poanijo ecuea epeeji poani pea'ai. Eya, Pabo Jodio pea'ai. Eya ojjaña Jodio cuanajo mimi tiitiani Eyacuiñajji nijje jama ba'a: —Eyacuiñajji, ¡Jodio cuana jjapeequi meesahuacue Jesosa nijje! Jamajjeya oya cuana cuaqui yasijje epoqui'yojji pojjeama —jamaya eyaya atiitiaña.

<sup>2</sup> Ecuea eba ojjaña Jodio cuana Eyacuiñajjiya epeeji po sa poani. Jamatii onajaya ejjashahuabaquijji quea quehua poanijo Eyacuiñajji nijje jjapeequi meemee ajja. <sup>3</sup> Jesosa nijje jjapeequiajo, Eyacuiñajjiya Jodio cuana mimishi'ama ba caje, ma yahuajo shajjama' poa. Jamaya beshahua nei ojjaña Jodio cuanaja eba pojjeama. Jesosa cajaa acanaje. Ojaya ejjashahuabaquijji quea quehua jama ba'a: —Quea pame poanijo, Eyacuiñajjiya ecuana ba caje mimishi'ama —jamaya poso jjabaquinaje.

Cho, Eyacuiñajjiya ojjaña ba cani mimishi'ama Jesosa nijje jjapeequianijo, quea pame ba'yanijo pojjeama. <sup>4</sup> E'e, Jesosa Quito mano'yonaje esejo. Jamajjeya ojjaña onijje jjapeequiani Eyacuiñajjiya ba cani mimishi'ama. Jamatii beshahua nei ojjaña Jodio cuana jjashahuaba quehuaquiani jama ba'a: —Moisesija etehue'yo jayojja jama atiitiaña, Eyacuiñajjiya ecuana ba caje mimishi'ama —jama posoya acani Jodio cuaa.

### *Eyacuiñajjiya ojjañaja mimishi cuijea'yo sa acani*

<sup>5</sup> Yahuajo nei Moisesiya Eyacuiñajjiya esohui tehue ca poa jama ba'a: “Eyacuiñajjiya eseya ba caje mimishi'ama ojaya esohui atiitiaña. Jamajjeya pojaya esohui jayojjaya oe atiiticue!”

Jamaya esohui tehue ca'ya poa Jodio cuanaja yajji.

<sup>6</sup> ¡A'a jjashahuaba quehuaquijji jama ba'a: —Eyacuiñajjiya ecuana ba cani mimishi'ama oja esohui etehue'yo jayojja jama añña tiitijjo —a'a jamaya jjabaquijji! Chojja, Jesosa nijje e'e jojo nei jjapeequianijo, Eyacuiñajjiya eseya ba cani mimishi'ama.

Eyacuiñajjiya Moisesi esohui jama tehue meeme aca poa ba'a: “A'a jjashahuabaquijji jama ba'a: —E'e pojja'a beca cuana eyahuasijje poqui majje, poe o'oya majje huohui caje achajja shai amajje Eyacuiñajjiya ecuana ba caje mimishi'ama”.

Jama tehuemeya aca poa Moisesiya.

Jjamajjeya jjamaya a'a jjashahuaba quehuaquijji! Jesosa poeyanaje ese que; mano'yonaje Eyacuiñajjiya ese mimishi'ama ebajji. <sup>7</sup> Moisesiya pea esohui tehue ca poa jama ba'a:



“¡A'a jjashahuaba quehuaquijji jama ba'a: —Beca cuana emano'yo huasijje poqui majje, poe o'oya majje huohui caje achajja shai amajje Eyacuiñajjiya ecuana ba caje mimishi'ama —jamaya a'a jjashahuabaquijji!”

Jamaya Moisesiya tehue ca poa.

E'e, jamaya quea jjashahuabaqui quehua. Jesosa shequi o'oyanaje ese mimishi cuijea'yoyji epojji. <sup>8</sup> Jamajjeya Eyacuiñajjiya Moisesi esohui jama tehue meeme aca poa ba'a:

“Eyacuiñajjiya miquianaya ba caje mimishi'ama eba'e tiitii'yoyji. Quea camaja nee nee pojjeama. Eyacuiñajji miquianaya mimishi'ama ebajji mimi huicha'a huicha'anaje. Miquianaaya shajja'ajja majamajanaje. Majoya jjashahuabaqui majamajanaje miquianaya”.

Jamaya aca poa Moisesiya. Maya ecuaaya huohuiaña miquianajaya eshajja'ajjajji, Jesosa nijje ejjapeequijji. <sup>9</sup> E'e jojo nei ejjahuhuiqui jiquio jama ba'a: —Jesosa ecuea Emeshi Mese nei poani —ejja'aqui. E'e jojo nei ejjashahuabaqui jama ba'a: —Ecuea eba Eyacuiñajjiya Jesosa shequi mee ca o'oyanaje —jamaya poanijo Jesusaa eseya ba'e tiitii mee caje'yo eyajo onijje.

<sup>10</sup> Jesusajo e'e jojo nei jjashahuabaquianijo, Eyacuiñajjiya eseya ba cani mimishi'ama. Eseyaya e'e jojo nei huohuiaña: —Eya Jesusaja epeeji.

Jamajjeya Jesusaa eseya onijje ba'e tiitii mee caje'yo. <sup>11</sup> Yahuajo nei nei Isaiaa esohui tehue ca poa jama ba'a:

“Ojjaña joya jjeya nei Eyacuiñajjiya huoojea'yo ojjaña jaahuanajji nijje jjapeequiani Eyacuiñajjiya ba cani mimishi'ama e'e jojo nei”.

Jamaya Isaiaa aca poa.

<sup>12</sup> E'e, Jesosa esejaya Emeshi Mese nei oe nei, ojjañaja; Jodio cuanaja, Jodio pojjeama cuanaja pea'ai. E'e, Jodio cuana Jodio pojjeama jayojja nei pea'ai. Onijje mimianijo, Jesusaa eseya jaahuana cani quea pame nee. <sup>13</sup> E'e, eseya beca cuana mimije Jesosa nijje jama ba'a: —Jesosa, ecuea Emeshi Mese nei, ¡ecuea mimishi cuana cuijea'yocue! —jamaya mimianijo, Jesusaa eseya mimishi cuijea'yo majje ba'e tiitii mee caje'yo eyajo.

<sup>14</sup> Pea cuanaja Jesosa ba jjima, onijje mimi jjima; emimishi cuijea'yoyji pojjeama. Shajja'ajja jjima Jesosa mano'yonaje ojjañaja mimishi cuijea'yoyji. Jesusaja esohui huohuijji poqui jjima ona huasijje esohui quea pame Jesusajo huohuiya. ¿Achajja shai oya cuana Jesusaja epeeji poaje so'o? <sup>15</sup> Eyacuiñajjiya ojaya esohui huohuijji pea cuana huasijje huoojea jjimajo, oya cuana Jesusajo eshajja'ajjajji pojjeama. Yahuajo nei Eyacuiñajjiya esohui huohuijji Isaiaa esohui tehue ca poa jama ba'a:

“Eyacuiñajjiya esohui huohuijji poeyajo esohui quea pame huohuiya, ecuana quea bihui nee nee poaje. E'e jojo nei jamaya poaje”.

Jamaya esohui tehue ca poa.

<sup>16</sup> E'e, Eyacuiñajjiya esohui huohuijji poquinaje Isaeni cuana huasijje. Huohui ca'ya poa ojaya esohui quea pame nee. Jamatii Isaeni cuana aje oe shajja'ajja sa po'yo ajja poa. Isaiaa yahuajo nei esohui tehue ca poa Isaeni cuanajo jama ba'a: “Emeshi mese, oe pojji Isaeni cuaa ecuanajaya esohui shajja'ajja canaje” jamaya Isaiaa aca poa.

<sup>17</sup> Eyacuiñajjiya ojaya esohui huohuijji huoojea cani esohui quea pame nee Jesusajo huohuiya. Jamajjeya ma esohui quea pame nee shajja'ajja majje Jesosa nijje ejjapeequije'yo. <sup>18</sup> Jamatii beca cuana jjashahuabaquiani jama ba'a: —E'e pojja'a Isaeni cuanaja shajja'ajja jjima esohui quea pame Jesusajo. Jamajjeya Jesosa nijje ejjapeequi jjima poanaje.

Chojja. Shajja'ajja canaje. Jamatii shajjama' jayojja poanaje. Yahuajo Eyacuiñajjiya esohui quea pame Jesusajo tehue mee ca poa jama ba'a:

“Ojjaña meshijo ba'e yasijje Eyacuiñajjiya esohui huohuijji cuana esohui quea pame huohui mee canaje”.

Jamaya yahuajo nei aca poa Dabiya.

<sup>19</sup> Beca cuana jjashahuaba quehuaquiani jama ba'a: —E'e pojja'a Isaeni cuanaja Eyacuiñajji esohui quea pame shajja'ajja jjima. Jamajjeya mi jjapeequinaje Eyacuiñajji nijje —jamaya beca cuana poani.

Cho. Onaaya shajja'ajja canaje. Yahuajo nei Moisesiya Eyacuiñajji esohui tehue ca poa jama ba'a:

“Isaeni cuana, miqianaya ebionei ecuea ehabaca coo, eyaya babaca coonaje ecuea epeeji epojji. Miquiaaya ca mo ca oe cajaa anaje. Jamatii eyaya pea cuana babacaje'yo ecuea epeeji nei epojji. Jamajjeya miqianaya quea quene poaje ona nijje, Isaeni pojjeama cuana nijje. Jjashahuabaquije jama ba'a: —Isaeni pojjeama cuana quea pame pojjeama. Ecuana ca ca quea pame nee. Eyacuiñajji e'e jojo nei onajaya ba jjima. Ecuana jaya ca ca oya eba. ¿Apiojji shai Eyacuiñajjiya babaca cani Isaeni pojjeama cuana? Oya cuana cajaa —jamaya miqianaya poaje”.

Jamaya Moisesiya aca poa Isaeni cuana. <sup>20</sup> Majoya Isaiaa Eyacuiñajji esohui quea ja'a nee tehue ca poa jama ba'a:

“Pea cuanaja eya ba jjima. Eyaya oya cuana jjapeequi meesahuaje'yo enijje. Oya cuana mimi jjima enijje ojaya mimishi cuijea'yojji. Jamatii oya cuana ecuea esohui ba meesahuaje'yo”.

Jamaya Isaia tehue mee ca poa yahuajo nei nei. <sup>21</sup> Eyacuiñajjiya Isaia pea esohui tehue mee ca poa Isaeni cuanaja jama ba'a:

“Eyaya Isaeni cuana iyaa majamajanaje enijje ejjapeequijji. Jamatii ecuea esohui etehue'yo jayojja jama a sa po'yo ajja tii tii. Shajjama' ojjaña cuana, quea mimishi nee nee”.

Jama tecueameya Isaiaa Isaeni cuana aca poa.

## 11

### *Eyacuiñajjiya Jodio cuana cajaa ajjima*

<sup>1</sup> Beca Jodio cuana jjashahuabaquiani jama ba'a: —Ecuana Isaeni cuana. Eyacuiñajjiya babaca. Jamatii jjea Eyacuiñajjiya ecuana cajaa acanaje —beca cuana jamaya poani.

Chojja de. ¡Bacue! Eya Isaeni dejja, Jodio dejja. Eya Eyacuiñajjiya cajaa ajjima. Amajama ecuea etiiquiana poa. Bejami Amajamaja osecua. Eya Bejamija osecua.

<sup>2</sup> E'e, Eyacuiñajjiya Jodio cuana babaca coo ca poa ojaya epeeji epojji. Yahuajo nei Eyacuiñajjiya esohui huohuijji Enia bajjanija esohui etehue'yo miqianajaya eba. Enia Jodio cuanajo quea quene mimia poa Eyacuiñajji nijje jama ba'a:

<sup>3</sup> “Eyacuiñajji, Emeshi Mese nei, ¡bacue pea Isaeni cuana! Ohuaya aje oe cuiajea ca'yonaje miquea esohui huohuijji cuana. Mei e'lya ani iñajeaqueajea ca'yonaje, ma aquiana dahuajji acani cuaa mi quea bei ecuana nijje epojji iñajeaqueajea ca'yonaje. Eya ee nei yani miquea epeeji. Eya cuiajea sa acani pea'ai Isaeni cuaa”.

Jamaya aca poa Eniaa.

<sup>4</sup> Eyacuiñajjiya Enia saja'a ca poa jama ba'a:

“Chojja. Quea huiso nee nee Isaeni cuana ecuea epeeji yani. E'e, 7.000 huisome Isaeni cuana eyacuiñajji nisho Baani bajjani bihuijji pojjeama. Quea huiso Isaeni cuana ecuea esohui jayojja jama ba'yani”.

Jama saja'ameya Eyacuiñajjiya aca poa Enia.

<sup>5</sup> Jjea nei cuanaya beca Jodio cuaa Eyacuiñajjiya esohui jayojja jama acani. Eyacuiñajjiya oya cuana babaca canaje ojaya epeeji epojji. Oja mimishijo jjashahuabaqui tiitii ajja. Eyacuiñajjiya oya cuana quea jea nee acani. Jamajjeya oya quea bei nee poani ona nijje, Eyacuiñajji. <sup>6</sup> E'e, Eyacuiñajjiya Jodio cuana quea jea nee acanijo oya cuana babaca canaje ojaya epeeji epojji. Quea bei Jodio cuana nijje poanaje. Onaja mimishi cuanajo jjashahuaba tiitiiquijji ajja. Jodio cuana ojaya quea jea nee poanajejo babaca ca'ya poa. Babaca'yo jjima ojaya esohui jayojja jama atiitii canajejojo.

<sup>7</sup> E'e, beca Jodio cuana Eyacuiñajjiya epeeji pojjeama poanaje. Quea huiso Eyacuiñajjiya esohui jayojja jama anisho canaje. Jamajjeya Eyacuiñajjiya oya cuana ba canaje quea

mimishi. E'e, Eyacuiñajjiya Jodio cuana babaca canaje ojaya epeeji epojji. Beca cuana e'e nei poanaje. Jamatii pea cuana quea mimishi nee nee poanaje. <sup>8</sup> Yahuajo nei nei Moisesiya Eyacuiñajjiya esohui tehue ca poa jama ba'a:

“Jamajjeya Eyacuiñajjiya shajjama' cuana quea jjashahuabaqui ja'a epo meeji pojjeama. Eyacuiñajjiya etehue'yo e'e nei ba majje jamatii ojaya quea quehua poa. Esohui e'e nei shajja'ajja majje jamatii quea quehua poa pea'ai. E'e, jamaya Isaeni cuana jjeya pea'ai shajjama' po tiitiiani”.

Jamaya Moisesiya tehue ca poa.

<sup>9</sup> Yahuajo nei nei emeshi meseya Dabiya Jodio shajjama' cuana tecuea ca poa jama ba'a: “Esejaya etiiquianaja esohui jayojja jama atiitiaña miquianaaya. Poquiquehuaje'yo, de, edasia'yo poaje'yo, de, quea mimishi nee nee. Jamajjeya Eyacuiñajjiya miquianaya quea nee nee capo mee cahua. <sup>10</sup> Cojjamaja ejiojji ba jjima jayojja jama miquianajaya ba jjima capohua tii tii Eyacuiñajjiya ejjashahuabaqui'yojji. Cuanaya aquiana quea biquie abo tiiti cani jayojja jama capohua miquianajaya mimishi; epajea'yojji pojjeama tii tii capohua”.

Jamaya Dabiya tehue ca poa yahuajo nei nei Jodio cuanajo.

*Eyacuiñajjiya Jodio cuana iyaa cani tii ojaya epeeji epojji*

<sup>11</sup> E'e pojja'a beca cuana jama jjashahuabaquime poani ba'a: —¿A'a Jesosa cajaa acanajejo, Eyacuiñajjiya Jodio cuana cajaa acaje'yo tii?

Chojja, jamaya pojjeama. Ecuana, Jodio cuana quea mimishi nee nee poanijo, Eyacuiñajjiya esohui a'ajjajo, ohuaya Jodio pojjeama cuana jjapeequi meesahua cani Jesosa nijje. Onajaya mimishi cuana cuijea ca'yani. Eyacuiñajji jjashahuabaquiani jama ba'a: —E'e, Jodio pojjeama cuana Jesosa nijje jjapeequi meesahuaña ba majje e'e pojja'a Jodio cuana Jesosa nijje jjapeequi'yo pea'ai enijje eba'e tiiti'yojji —jamaya Eyacuiñajji jjashahuabaquiani.

<sup>12</sup> Jodio cuana aje oe jjashajja'ajjaqui ajja. Jamajjeya Eyacuiñajjiya Jodio pojjeama cuana Jesosa nijje jjapeequi meesahua ca'yonaje. Eyacuiñajjiya Jodio pojjeama cuana quea pame acanaje Jodio cuana Jesosa nijje jjapeequi jjima jojoya. Jodio cuana Jesosa nijje jjapee neineiuijajo ca ca Eyacuiñajjiya quea pame nee nee acaje'yo ojjaña.

<sup>13</sup> Jodio pojjeama cuana Shomajo ba'e, Eyacuiñajjiya eya huoojea canaje miquiana que ojaya esohui huohuiya. Eyaya esohui huohuiaña tii tii miquianaya Jesusaja epeeji epo meesahuajji. <sup>14</sup> Jamajjeya ma ba majjeya Jodio cuana pojja'a Jesusaja epeeji po sa poaje'yo pea'ai. <sup>15</sup> E'e, Jodio cuana Jesosa cajaa aca poajo, Eyacuiñajjiya Jodio pojjeama onijje jjapeequi meesahua canaje. Jamaya quea pame nee. Jamatii quijje Jodio cuana Jesosa nijje jjapeequi meesahua caje'yo pea'ai. E'e, jjeya Jodio emano'yo jayojjaya poani shajjama' jjejojo. Jesosa nijje jjapeequi'yo majje ca ca eshequi'yo jayojja poaje'yo, de, quea pame nee nee. <sup>16</sup> E'e, jjeya oe pojji Jodio cuana Jesusaja epeeji nei poani. Jamajjeya quijje Eyacuiñajjiya quea huiso Jodio cuana ojaya epeeji nei po mee caje'yo. Jama ba'a: Acui esajja quea pame nee nee poajo, quijje tii majje ejjajja quea pame nee poaje pea'ai. Oya jayojjaya Amajama Eyacuiñajjiya ehabaca poa. Jamajjeya oja osecua cuana Eyacuiñajjiya ehabaca poaje pea'ai.

<sup>17</sup> Jjashahuabaquicue jama ba'a: E'acui meseya acui aa enojinoji cobojea majje ejee cojjajji iyanobia cani etii'yojji. Acui sajja quea pamejo pea acui jee cojjajji e'iyantobia pohuaje'yo. Oya jayojjaya beca Jodio cuana Jesosa cajaa acanajejo quea tai poa, acui aa enojinoji jayojja. Pea ejee cojjajji iyanobia majje pohua'yani jama Jodio pojjeama Jesusaja epeeji cuana poaje. Jiquio ecua ecuicojjone sajjajji jayojja eseya quea pame ba'e mee cani. <sup>18</sup> Jamajjeya Jodio pojjeama cuana, ja'a jjashahuabaquijji miquianaya quea pame nee, Jodio cuana quea pame pishana! Chojja. Eyacuiñajji miquianajaya eba poanaje Jodioja ehuohuijo. Miquianajaya ehuohuijo pojjeama ca ca Eyacuiñajji Jodio cuanaja eba poa.

<sup>19</sup> E'e pojja'a miqúanaya jashahuabaquíani jama ba'a: —Jesosa cajaa aca poajo Jodio cuana acui aa ecobojea'yo jayojja jama poanaje. Eseyá, Jodio pojjeama ca ca Jesosaja epeeji poanijo ecuciojonejo pea ecojja posho e'ianobia'yo quea pame pohua'yani jayojja jama —miqúanaya poani.

<sup>20</sup> E'e, jamaya poanaje. Jesosa cajaa amajje Jodio cuana acui aa ecobojea'yo jayojja jama poanaje. Eyacuíñajjiya oya cuana cajaa aca poa. Miqúanaya ca ca oe Jesosa nijje japeequi'yajo, Eyacuíñajjiya ba cani mimishi'ama. E'e, jjeya Eyacuíñajjiya miqúanaya babaca canaje. Jamatii ja'a jashahuabaquíjji miqúanaya quea pame nee Jodio cuana quea pame pishana! Chojja. ¡Miqúanaya quea ja'a nee Jesosa nijje japee tiitiquicue!  
<sup>21</sup> ¡Bacue oe! Eyacuíñajjiya Jodio cuana babaca coo ca poa ojaya epeeji epojji. Majoya Jodio cuana jashajja'ajjaqui sa po ajjajo, ohuaya miqúanaya babaca canaje, Jodio pojjeama cuana. Jiquio ecua acui aa nojinoji ehusejjajea'yo majje eyacua iyanobia ca'yani jama jayojja Eyacuíñajjiya Jodio shajjama' cuana cajaa ajea'yo majje miqúanaya babaca canaje. Jamajjeya ja'a shajjama' pojji! Eyacuíñajjiya miqúanaya cajaa aca chana'.  
<sup>22</sup> E'e, Eyacuíñajjiya ojjaña quea jea nee nee acani. Shajjama' cuana ca ca tecuea neinei caje'yo, de. E'e, ojjaña joya shajjama' poani ohuaya quea nee nee po mee caje'yo. Miqúanaya ca ca ohuaya quea pame nee nee acani ojaya quea jea nee neejoj. Ohuaya miqúanaya quea jea nee acaje'yo tii tii, ca jashajja'ajja tiitiquiajo. Shajjama' poajo ca ca ohuaya miqúanaya quea nee nee po mee caje'yo pea'ai, de.  
<sup>23</sup> E'e, Jodio cuana pea'ai Jesosa nijje japeequiajo Eyacuíñajjiya ojaya epeeji nei po mee caje o'oya, yahuajo nei nei jayojjaya. E'e nei, jiquio ecua acui aa ehusejjajea'yo iyanobia ca o'oyani jama jayojja Eyacuíñajjiya oya cuana acaje'yo; ojaya epeeji nei po mee caje o'oya.  
<sup>24</sup> Miqúanaya ca ca Jodio pojjeama cuana yahuajo nei Eyacuíñajjiya ehabaca pojjeama poa. Jamajjeya miqúanaya pea acui aa jayojja, ebiojo nequi acui aa jayojja. Jamatii jiquio ecua ebiojo nequi acui aa acui bame bame yasijje iyanobia cani jayojja jama Eyacuíñajjiya miqúanaya babaca canaje ojaya epeeji nei epojji. Jamajjeya Eyacuíñajjiya miqúanaya acanaje jayojja jama ohuaya Jodio cuana acaje'yo. E'e, ecuea etiiquiana Eyacuíñajjiya babaca coo ca poa. Jamajjeya jiquio ecua acui ebana'yo acui aa ehusejjajea'yo oya tii acuijo iyanobia caje o'oya jayojja jama Eyacuíñajjiya Jodio cuana acaje'yo. Jesosa nijje japeequiajo Eyacuíñajjiya huohui caje jama ba'a: —E'e Jodio cuana, jjeya miqúanaya ecuea epeeji nei po o'oyanaje, ojjaña —acaje Eyacuíñajjiya.

*Jodio cuana Jesosaja epeeji quiije poaje'yo*

<sup>25</sup> Ecuea epeeji cuana, eyaya miya huohuije ma Eyacuíñajjiya quiije acaje Jodio cuanajo, ma yahuajo ojjañaja ba jjima poa. Jamajjeya ecuea esohui ba majje miqúanaya ejashahuabaquíjji pojjeama jama ba'a: —Ecuana nei ca ca oe Eyacuíñajjiya ehabaca ojaya epeeji nei epojji —a'a oe miqúanaya pojji.

Chojja. Jjeya Jodio cuana Emeshi Mese nei Jesosa cajaa acani beshahua nei ojjaña. Jamaya epo'yojji tii pojjeama. ¿Ache Jodio pojjeama cuana Jesosaja epeeji poaje? Eyacuíñajjiya eba. Mahuiso japeequiajo, Jodio cuana japeequije o'oya Jesosa nijje.  
<sup>26</sup> Jamajjeya quea huiso nee nee Jodio cuana eyajo ba'e tiitii mee caje'yo Jesosa nijje japeequiajo. E'e, yahuajo nei Eyacuíñajjiya Isaia tehue mee ca poa Isaeni cuanajo, ma Jacoboja osecua cuanajo jama ba'a:

“Eyacuíñajjiya huoojea'yo ojjaña jaahuanajji poeje. Oya Jodio dejja poaje. Oya Jacoboja osecua cuana mimishi pajea meesahua'yojji poaje'yo. <sup>27</sup> Ma ecua eyaya Jodio etiiquiana huohuinaje jamaya eyaya aje'yo; ojjañaja mimishi cuijea neineiye'yo”.  
 Jamaya yahuajo nei nei Eyacuíñajjiya aca poa.

<sup>28</sup> Jamatii jjeya Eyacuíñajjiya Jodio cuana ba cani ojaya epeeji pojjeama Jesosa cajaa ajji poajo. Jamajjeya Jodio cuana ma esohui cajaa acajo, Eyacuíñajjiya esohui quea pame nee Jesosajo miqúanaya shajja'ajja mee canaje, Jodio pojjeama cuana. Jamatii Eyacuíñajjiya Jodio cuana cajaa tiitii ajjima, de. Yahuajo nei ecua ojaya ehabaca poa. Ohuaya ecuanaja etiiquiana huohui ca poa jama ba'a: “Miya, miquea osecua cuana pea'ai ecuea epeeji nei cuana poaje'yo tii tii” jamaya ohuaya Amajama, Jacobo, Isaaca pea'ai

huohui ca poa. <sup>29</sup> E'e jojo nei Eyacuiñajjiya ojaya esohui jayojja jama acaje'yo, epajea'yojji pojjeama tii tii. Babaca'yo majje cajaa ya'yojji pojjeama tii. <sup>30</sup> Jamajjeya jjeya Jodio cuana Jesosa nijje jjapeequi sa po'yo ajja joya Eyacuiñajjiya miquianaya, Jodio pojjeama cuana quea bei nee acani. Miquianaja mimishijo jjashahuaba tiitiqui ajja, jamatii yahuajo shajjama' nei poa. <sup>31</sup> Eyacuiñajjiya quijje Jodio cuana jama acaje'yo ba'a: Jjeya ohuaya miquianaya quea bei acani; miquea mimishijo jjashahuabaqui ajja. Oya jayojjaya quijje ohuaya Jodio cuana acaje'yo, jamatii jjeya shajjama' nei poani. <sup>32</sup> Jamajjeya Eyacuiñajjiya ojjaña cuana ba cani shajjama' nei nei. Jesosa nijje jjapeequiajo ca ca ojjañaja mimishijo jjashahuaba tiitiqui ajja poaje. Quea bei ojjaña cuana nijje poaje'yo Eyacuiñajji.

*Eyacuiñajji bihuia cani Pabohua*

<sup>33</sup> Quea pame nee nee Eyacuiñajjiya eseya acani. Ojjaña eseya ojaya eba nei nei; oya esejaya mimishi cuijea'yojji. E'e jojo nei ojjaña ojaya eba nei nei. Quea ja'a nee nee ojaya ejjashahuabaquijji. Quea pame nee nee ohuaya acani ojjaña. <sup>34</sup> Yahuajo nei Eyacuiñajjiya Isaia tehue mee ca poa jama ba'a:

“¿Ajea eba nei nei Eyacuiñajjiya ejjashahuabaquijji? ¿A'ya shai o ba meesahuajji? Chama' nei nei. Oya oe nei quea jjashahuabaqui ja'a nee nee. <sup>35</sup> ¿Aya acuae jja mi oe che quia cani aquiana Eyacuiñajjiya? Ojjaña aquiana cuana ojaya, de”.

Jamaya Eyacuiñajjiya esohui Isaiaa yahuajo nei tehue ca poa.

<sup>36</sup> E'e, Eyacuiñajjiya ojjaña aquiana pana ca'ya poa. Ojjaña ojaya aquiana. Quea sohui poja nee neeya jjejojo ohuaya ojjaña quea pame amee cani. Jamajjeya ojjaña ba cani oya quea ja'a nee, quea pame nee nee pea'ai: —Eyacuiñajji, miya quea pame nee. Pea chama' mi jayojjaya —jamaya jaya ejjabihuia tiitiqui! ¡Jamaya ejja'aqui!

## 12

*¡Jesosaja epeeji poanijo ojaya esohui jayojja acue!*

<sup>1</sup> Jamajjeya ecuea epeeji cuana, ¡shajja'ajjacue mo! Eyacuiñajji ese nijje quea bei poani, mimishijo jjashahuaba tiitiqui ajja. Jamajjeya jayojja epeeji nei nei ba'ecue! ¡Eyacuiñajji bihuia acue jama ba'a: —Eyacuiñajji, eya miquea nei nei. Miquea ejjashahuabaqui'yojji jayojja jama eyaya aje'yo —jamaya pocue! E'e, ¡Jesosa jayojja jama ba'e tiitiecue quea pame nee! Eyacuiñajji bihuia acue jama ba'a: —Eyacuiñajji, miya quea pame nee nee.

<sup>2</sup> ¡A'a Eyacuiñajjiya epeeji pojjeama jayojja pojji! ¡Eyacuiñajjiya eseya ojaya esohui jayojja jama capo mee cahua! Cajjashahuabaqui mee cahua o jayojja. Majoya ojaya ejjashahuabaquijji eseya ba mee caje'yo. Ma ese ohua amee caje'yo ojo ohuaya eseya ba mee caje'yo. Ojaya ejjashahuabaquijji quea pame nee nee, quea ja'a nee nee enequi tiitijji pea'ai.

<sup>3</sup> Eyacuiñajjiya eya huoojea canaje ojaya esohui huohuiya. Jamajjeya eyaya miquianaya ba meesahuaña quea pame nee eba'ejji. E'e, Eyacuiñajjiya eseya ba'e meesahua cani ojaya epeeji epojji. Jamajjeya ja'a jjashahuabaquijji jama ba'a: —Eya quea pame nee nee —a'a jamaya pojji! Chojja, ¡quea bei nee jjashahuabaquicue! ¡Jama acue ba'a: —Eyacuiñajjiya eya chaco meesahua cani jayojja jama eyaya onijje chacoje —jamaya pocue!

<sup>4</sup> ¡Bacue! Eseyaya eyami oe. Jamatii esejaya eyamijo yani eme', ejiojji, ecojja, equise pea'ai. Eme' ca ca ecojja jama pojjeama; pea. Jamatii ojee chaco cani oe eyamiya. <sup>5</sup> Oya jayojjaya eseya Jesosaja epeeji cuana quea huiso nee. Oe epeeji pea jayojja chaco chaco ajja. Jamatii eseyaya ojee chacoña Jesosa nijje. <sup>6</sup> Jesosa nijje jjapeequianajo, Eyacuiñajjiya eseya chaco meesahua cani quea pame ojaya echacojjijo. E'e, ohuaya beca cuana chaco meesahua cani oe echacojjijo. Pea epeeji chaco meesahua cani pea echacojjijo, de. Jamajjeya ¡ohuaya chaco mee cani jayojja jama ejja'aqui! Jamajjeya ¡quea ja'a nee ejjasohuihuohuiqui, ohua huohui mee cani jayojja jama ejja'aqui! <sup>7</sup> Beca cuana ca ca ona ba'e meesahuajji po mee cani ohuaya. Jamajjeya ¡quea bihui nee ojjaña caba'e meesahua cahua! Jesosaja epeeji sohui bameejji ohuaya po mee canijo, ¡ojjaña esohui

caba meesahua cahua, huea'ama capoahua! <sup>8</sup> Ona jjabahuejjaquijji po mee canijo, pea epeeji cajjabahuejjaqui mee cahua quea ja'a nee: —Eyacuiñajjiya miya quea bihui po mee caje mimishi'ama ba'yanijo —cahuohui cahua cuana.

Eyacuiñajjiya Jesusaja epeeji beca cuana quea aquiana huiso po meesahua cani pea'ai. Jamajjeya quea bihui nee capoahua, nishehui'ama, dejja tai'ama. Beca cuana pea epeeji jaahuanajji po mee cani. Jamajjeya e'e jojo nei quea ja'a nee nee cajjashahuabaquiahua. Pea epeeji ca ca aema' cuana, emanoojaa cuana jaahuanajji po mee cani. Jamajjeya quea jea nee cajaanahua cahua Jesusaja epeeji cuana.

*¡Jesusaja epeejiya pea epeeji cuana quea jea nee acue!*

<sup>9</sup> ¡E'e jojo nei ojjaña cuana quea jea nee nee acue! Jamajjeya ¡a'a pea cuana quea tai ajji! Chojja, ¡ojjaña cuana quea pame nee nee acue! <sup>10</sup> E'e, ¡ojjaña Jesusaja epeeji quea jea nee acue! ¡Miquea huapa pojjeama jayojja jama quea jea nee neeya acue! <sup>11</sup> Jamajjeya ¡quea ja'a chacocue huea'ama! ¡Jesusajo, Emeshi Mese neijo quea bihui nee acue ojaya yajji! <sup>12</sup> Eyacuiñajji esohui ese nijje jayojja jama ohuaya acaje'yo e'e jojo nei. ¡Jamajjeya quea bei pocue! Quea yeno dejja mimishiya mimia cajje ¡a'a oe Jesosa pajea'yojji quea yeno po majje! ¡Eyacuiñajji nijje mimi tiitiicue jama ba'a: —Eyacuiñajji, ¡eya jaahuanacue! ¡Eya ba'e meesahuacue quea ja'a nee! —jamaya pocue Eyacuiñajji nijje!

<sup>13</sup> ¡Jesusaja epeeji aema' poanijo eba'e meesahuajji quiacue! Pea cuana miquea cuiñajji nequiñajji'yo, ¡iyaacue bobi ijji, ecahuiji pea'ai! <sup>14</sup> Jesusaja epeeji, dejja mimishiya miya mimia cajje ¡a'a panajajji! ¡Eyacuiñajji nijje mimicue jama ba'a: —Ecue Chii, ¡e cuijji epo mique Bacua Ejja Jesosa nijje jjapeequi meesahuacue! —acue!

<sup>15</sup> ¡Joya quea bihui nee poani onijje quea bihui pocue! Quea yeno poanijo, pa'anijo ca ca ¡onijje mimicue; yeno'ama tii tii po meecue! <sup>16</sup> ¡Mi jayojjaya Jesusaja epeeji cuana quea pame nee ba'e meesahuacue! ¡A'a jama jjashahuabaquijji ba'a: —Onajaya aquiana quea pame nee nee. Eya o jayojjaya poaje —a'a jama jjashahuabaquimeya pojji!

¡Aema' cuana a'a cajaa ajji! Chojja. ¡jjapeequicue onijje! ¡A'a jjashahuabaquijji miya quea pame nee nee, pea cuana quea pame pishana! <sup>17</sup> Onaa miya quea mimishi acajje ¡a'a onijje quea mimishi pojji! ¡Quea pame nee po tiitiicue ojjañaja ebajji miya e'e jojo nei Jesusaja epeeji poani! <sup>18</sup> Quea camaja eba'e'ji pojja'a. Jamatii ¡ojjaña nijje quea bei nee ba'ecue! <sup>19</sup> Onaa napa cajje ¡a'a jjashahuabaquijji jama ba'a: —Ohua e acanaje jayojjaya eyaya oya aje, de —a'a jamaya pojji!

Chojja. Eyacuiñajjiya casosequia ca'yahua. Jamaya Eyacuiñajji esohui etehue'yo poa ba'a:

“Ecuea epeeji napajji poani eyaya eyaye nei sosequiaje'yo; quea nee nee po meeje'yo. Eyaya, Emeshi Mese neiya jamaya huohuiana”.

Yahuajo nei jamaya Eyacuiñajjiya tehue mee ca poa. <sup>20</sup> Pea tehue mee ca poa jama ba'a: “Mi napajji poani cuana quea shoe poajo, ¡bobiacue oe! ¡Quea naba taja poajo, ena quiacue! Miya jamaya ajje oya quea bicho nee nee poaje. Miya napa pajea caje'yo pojja'a, miquea epeeji poaje”.

Jamaya yahuajo tehue ca poa Eyacuiñajji esohui.

<sup>21</sup> ¡A'a jjashahuabaquijji jama ba'a: —Ojjaña joya ecuaña nijje quea mimishi poani eya o jayojjaya poaje pea'ai, de —a'a jamaya pojji!

Chojja. Miya napa cajje ¡jamatii oya cuana quea pame nee acue!

## 13

*¡Jesusaja epeeji cuana emeshi mese cuana cashajja'ajja cahua*

<sup>1</sup> Emeshi meseya huoojea canijo, ¡jjashajja'ajjaquicue! Emeshi mese cuana Eyacuiñajji huoojea canaje ojjaña cuana quea ja'a ba'e meesahuaa. Jamajjeya emeshi mese cuana Eyacuiñajjiya quea ca'a po mee cani ese huoojeajji. <sup>2</sup> Jamajjeya jjashajja'ajjaqui ajjajo ca mi ca oe Eyacuiñajjiya miqianaya ba cani shajjama' ojaya ehoojea'yoja esohui shajja'ajja sa po ajjajo. Shajjama' cuana aje oe quea nee po mee caje'yo. <sup>3</sup> Eyacuiñajjiya

emeshi mese cuana huoojea jjima quea pame ba'yani cuana quea mete po meeya. Quea mimishi ba'yani cuana ca ca quea mete capo mee cahua. ¿A'a miya emeshi mese cuana quea mete'ama ba'e sa poani? ¿Quea pame acue, ojaya esohui jayojja! Jamajjeya oya minijje quea bihui nee poaje pojja'a: —E'e, ¡jamaya quea pame nee acue! —oya poaje.

<sup>4</sup> E'e, Eyacuiñajjiya emeshi mese cuana huoojea canaje ese quea ja'a ba'e meesahuaa. Jamajjeya ¡quea mimishi po majje quea mete pocue ojo! Ohuaya miya jjabahuejjaqui mee caje. Jamaya Eyacuiñajjiya oya cuana huoojea cani shajjama' cuana jjabahuejjaqui meeji. <sup>5</sup> Jamajjeya ¡emeshi mese cuana shajja'ajjacue mete'ama eba'ejji, Jesosaja epeeji quea pame nee epojji pea'ai! <sup>6</sup> ¡Jamaya pea'ai oya cuana sosequiacue! Ojjaña quea pame ba'e mee cani soseje emeshi mese sosequia cani cuaa, Eyacuiñajjiya huoojea. <sup>7</sup> Jamajjeya: — ¡Sosequiacue mo! —ohua acajje ¡jamaya quiacue emeshi meseja eba'e meeji ohua chaco cani soseje, mahuiso tiya! ¡Miya jaahuana canijo, miquea meshi cuiña canijo pea'ai, sosequiacue! ¡E'e, emeshi mese cuana shajja'ajjacue! ¡Oya cuana sosequiacue pea'ai! ¡Jama acue pea'ai ba'a: —Emeshi mese, miya quea pame nee ecuana ba'e meesahuaña —acue! Jamaya quea pame nee.

*¡Jesosaja epeeji cuana quea jea acue; pea cuana nijje quea bei pocue!*

<sup>8</sup> Jamajjeya ¡aquiana jjeshe majje sosequiacue! E'e, ¡miyaya yahuajo huohui'yonaje jayojjaya sosequiacue! Eyacuiñajjiya eseya quea jea nee nee acani. Jamajjeya ¡pea cuana quea jea nee acue, ojjaña! Pea cuana quea jea nee añajo Eyacuiñajjiya esohui jayojja añ. <sup>9</sup> E'e, Eyacuiñajjiya esohui Moisesiya tehue ca poa jama ba'a:

“¡A'a onajaya ehuanase jea bajji! ¡A'a pea quecuajji! ¡A'a sii pojji! ¡A'a onajaya aquiana jea bajji!”

Quijje Eyacuiñajjiya huohui canaje jama ba'a:

“¡Minijje ba'e quea jea nee acue! ¡Miya quea pame ba'yani jayojja jama ba'e meesahuacue!”

Jamajjeya ¡pea cuana quea jea nee añajo ba'e meesahuacue! ¡Ojjaña Eyacuiñajjiya esohui jayojjaya jama acue! <sup>10</sup> E'e, onaya miquea quea jea nee poanijo oya cuana quea yeno, quea nee po mee sa po'yo ajja. Jamajjeya onaya quea jea nee poanijo ojjaña Eyacuiñajjiya esohui jayojjaya añ.

<sup>11</sup> E'e, ¡jamaya Eyacuiñajjiya esohui jayojja jama acue! ¡Bacue jiquio! Jesosa esejaya Emeshi Mese nei jjeya nei pojja'a poeje o'oya. Jamajjeya ¡quea ja'a nee ba'ecue Eyacuiñajjiya esohui jayojja! ¡A'a quea huea pojji! ¡Ojaya esohui bacue! Yahuajo pishana eseya Jesosaja epeeji poanaje. Ohuaya esejaya mimishi cuijea ca'yonaje. Poe o'oya majje eseya ba'e tiitii mee caje'yo eyajo onijje, Jesosaa. <sup>12</sup> Jjeya eseya jiquiojo ba'yani quea camaja poani, mecajje quea misi quea poqui camaja jayojja. Jesosa poe o'oyajo ca ca quea pame nee nee poaje'yo. Epojja jayojja jama poaje'yo. Ojaya epoe o'oyajji beshahua nei apoa. Jjapojjaqui majje ja'a'aja'a'a poani jayojja poaje. Jamajjeya ¡a'a quea mimishi pojji! ¡Pea jashahuabaquime po'yocue! ¡Jesosaa eseya ba'e meesahua canijo, ojjaña mimishi pajea neinei'yocue! <sup>13</sup> E'e, ¡quea ja'a nee nee ba'ecue bicho'ama epojji onaa ba canijo! Jamajjeya ¡a'a huoojji! ¡A'a ona ishi'ishiqui yasijje poquijji! ¡A'a pea epona cuana jea bajji! Epona, ¡a'a onaja yahue, shacuima' nequi cuana pea'ai siijji! ¡A'a quea mimishi ba'ejji! ¡A'a quea quene pojji! ¡A'a jjamimicuijea nobiajeaquijji pea'ai! <sup>14</sup> Chojja. ¡Jesosaja nijje mimicue ojaya ejjashahuabaquijji jayojja jama eba'e meesahuajji! Jamajjeya miquea ejjashahuabaquijji yahuajo nei jayojja jama esahuaja miya eba'e mee'yojji pojjeama.

## 14

*¡A'a Jesosaja epeeji cuana nijje mimijajji!*

<sup>1</sup> Jesosaja epeeji cuana, miquianaaya pojja'a Eyacuiñajjiya esohui quea ja'a nee baña. Jesosaja epeeji beca cuana ca ca quea jashahuabaqui ja'a pishana. ¡Jamatii onijje japeequicue quea bei! ¡A'a mimicuijeanobiajeajji ojaya esohui quea quehuajo! <sup>2</sup> E'e, miquianaya beca cuana jashahuabaquiani jama ba'a: —Ojjaña noe cuana ca'ijjiahua,

jamatii onaaya ba'ehuana canaje ecuiquiaja e'ijjiaggi nisho. Ecuaya ijia'yajo Eyacuiñajji ecuana nijje quea quene pojjeama poaje —jamaya beca cuana poani. Jamajjeya noe ijiaña, ojjaña.

Beca cuana ca ca jama poani ba'a: —Chojja, ¡noe ma onaaya ecuiquiaja e'ijji'yojji nisho ba'ehuana canaje a'a ijjiaggi! Ma eseya ijiajo Eyacuiñajji quea quene poaje ese nijje —jama posoya acani. Jamajjeya acuijjajja cuana, bobi ebana'yo pea'ai ijia cani; noe ijia'yo jjima acani quea meteya jjejojo.

<sup>3</sup> Noe ijjiaggi cuana, ¡a'a jama pojji pea cuana nijje ba'a: —¿Apiojji acuae miquianaaya acuijjajja, ebana'yo oopana ijiaña, noe ijia ajja so'o? Chojja. ¡A'a quea mete pojji! —a'a jamaya ajji!

Oya jayojja noe ijia ajja cuana, ¡a'a pea cuana nijje jama pojji ba'a: —Miquianaaya aje oe noe ijiaña. ¿Apiojji? Eyacuiñajji quea quene po chana', de —a'a jamaya ajji!

¡Bacue! Eyacuiñajjiya noe ijjiaggi cuana pea'ai ojaya bacua cuana po mee canaje. Jamajjeya ¡a'a jamaya pea cuana nijje mimijji! <sup>4</sup> E'e, miquianaya noe ijia ajja jjejojo mimimimiani. Eyaya miquianaya huohuaña jama ba'a: Eyacuiñajji ona huoojeajji poani, miquianaya pojjeama. Jamajjeya ¡a'a mimijajji! Eyacuiñajji ona huoojeajji poanijo ohuaya ohuaye nei jama acaje ba'a: —E'e, miquianaya quea pame nee ba'yani —Eyacuiñajjiya acaje.

Quea ja'a ba'e ajjajo ca ca: —Chojja, ¡a'a jamaya ajji! Quea tai —Eyacuiñajjiya acaje. Eyacuiñajji ese huoojeajji quea ca'a poanijo, ohuaya eseya quea ca'a po mee cani ojaya ejjashahuabaquijji jayojja jama eba'ejji.

<sup>5</sup> Cuanaya beca cuana jama poani ba'a: —Beca epojja cuana Eyacuiñajji bihuiajji. ¡Ma epojja cuanajo a'a chacojji!

Pea cuana ca ca jama poani ba'a: —Ojjaña epojja oya jayojjaya, pea epojja jayojjaya. ¡Eyacuiñajji bihuiajji ojjaña pojjajo! —oya cuana poani.

Jamajjeya ¡a'a pea nijje mimijji ache epojjajo chaco cajji! ¡Miquea ejjashahuabaqui'yojji epojja cuanajo jayojja jama acue! Pea cuana ojaya ejjashahuabaquijji jayojja jama ca'a cahua pea'ai epojja cuanajo. <sup>6</sup> E'e, Emeshi Mese neija esohui jayojja jama ba'e sa poani miquianaya, ojjaña. Beca cuana quea huiso epojja cuanajo chacochocho ajja Eyacuiñajji bihuia poani jjejojo. Pea cuana ca ca oe pea epojjajo jayojjaya jama acani, oya jayojjaya. Noe ijjiaggi cuaa esejaya Emeshi Mese nei bihuia cani. Ijia'ijia jjimahua Eyacuiñajji nijje mimiani jama ba'a: —Eyacuiñajji, ecue Chii ai, eyaya miya bihuiaña noejo.

Noe ijia pojjima' cuaa esejaya Emeshi Mese nei bihuia cani pea'ai jama ba'a: —Eyacuiñajji, ecue Chii ai, eyaya miya bihuiaña jiquio bobijo, acuijjajjajo, eso' cuanajo, ebano'yojo cuanaya. E'e, miyaya ojjaña tii meesahua'yonaje —jamaya acani ohuaya.

<sup>7</sup> Jamajjeya ¡a'a esejaya eba'ejjijo, eseya sañajo jjashahuaba tiitiiquijji! Esey eshe nequijo ca ca Jesusaja esohui jayojja jama caba'yahua. Mano'yajo pea'ai eseya Jesusaa jaahuana caje'yo. Esey ojaya tii poaje'yo. <sup>8</sup> E'e, eshe nequiya eseyaya Emeshi Mese nei Jesusaja esohui jayojja aña. Mano'yo majje onijje ba'e tiitije'yo. Jamajjeya eshe nequi, mano'yajo pea'ai ohuaya eseya jaahuana cani; ese huoojeajji poani tii tii oya. <sup>9</sup> Jesosa mano'yo majje shequi o'oyanaje ese jaahuanajji epojji. Jamajjeya eshe nequi, mano'yajo pea'ai oya, Jesosa esejaya Emeshi Mese nei poani tii tii. <sup>10</sup> Jesusaja epeeji poani ojjaña eseya. Jamajjeya ¿apiojji acuaeya Jesusaja epeeji quea ja'a nee nijje jjamicuiajea nobiajeaquiani so'o? Cuanaya epeeji quea ja'a nee poaniya, ¿apiojji miquianaaya Jesusaja epeeji cuana niñebaña so'o? Oya Jesusaja epeeji pea'ai. ¡A'a paje'yojji quijje eseya ojjaña nequije Eyacuiñajji nequi cojja nei! Ohuaya huohui caje jama ba'a: —E'e jamaya, miyaya quea pame anaje —acaje'yo. Quea pame pojjeama añajo ca ca pea nijje jama poaje ba'a: —Chojja, miya quea mimishi poanaje —acaje'yo Eyacuiñajjiya.

<sup>11</sup> Eyacuiñajjiya esohui etehue'yo jama poani ba'a:



“Eya Eyacuiñajji eshe tii tii nequi. Jamajjeya e'e jojo nei ojjaña e cojja nei nequi majje, ecui'oshajjajo nequioque majje eya bihuia caje jama ba'a: —Miya ca ca oe Eyacuiñajji quea ca'a nee, quea pame nee enequi tii tii —ojjaña poaje”.

Jamaya esohui etehue'yo poani. <sup>12</sup> Jamajjeya e'e jojo nei o cojja nei nequijajo, Eyacuiña-jjiya eseya ojjaña huohui'ajja caje esejaya eba'e'yojjijo. Quea ja'a ba'enajeya eseyaya oya saja'aje'yo quea bihui. Quea ja'a pojjeama ba'enajeya ca ca quea mete saja'aje'yo.

*¡Ona quea mimishi po meeji a'a pojji!*

<sup>13</sup> E'e, Eyacuiñajjijo quea pame nee chacoañajo ¡ojaya pea epeeji cuana a'a niñebajji! Chojja, ¡jama acue ba'a: —Jesosaja epeeji quea jjashahuabaqui ja'a po jjima ecuea eba'e'ji ba majje quea mimishi po chana'. Jamajjeya eyaya maya e'amajajji pojjeama oya quea mimishi, quea mete nee epo meeji pojjeama —jamaya pocue!

<sup>14</sup> Eseyaya Emeshi Mese neiya eya ba meesahua canaje jama ba'a: Noe ma onaja ba'ehuanacui ecuiquiaja e'ijjiajji nisho eseya ijjiajo, Eyacuiñajji ese nijje quea quene pojjeama poani. Pea bobi eseya ijjiajo, jamaya pea'ai poani. Jamatii Jesosaja epeeji beca cuana quea jjashahuabaqui ja'a pishana jama poani ba'a: —Ma noe, bobi pea'ai eseya ijjiajo, Eyacuiñajji quea quene poaje ese nijje —jama posoya acanijo, ohuaya maya ijjiia jjima ca'a cahua. E'e, jamaya jjashahuabaquianijo ijjiia majje oya quea mimishi poani.

<sup>15</sup> Miquianaya, noe ijjiajji cuana, ¡jjashahuabaquicue Jesosaja pea epeeji cuanajo, ma acuijjajja oopana ijjiajjijo! Jamajjeya miya noe ijjiajji ba majje ohuaya ijjiia pea'ai ca chana', mi jayojjaya poaje. Jamatii oya cuana quea mete jjashahuabaquije jama ba'a: —¡Dee! Eyaya eshahuaja bobi ijjianaje. Eyacuiñajji enijje quea quene poaje —jamaya jjashahuabaqui majje Jesosaja epeeji quea mimishi po chana'.

Jamajjeya jama acue ba'a: ¡Jesosaja pea epeeji cuana quea jea acue! Oya ca'a'ama; quea mimishi po o'oya mee chana'. Jesosa onajo mano'yonaje pea'ai. Jamajjeya ¡oya cuana jaahuanacue! <sup>16</sup> Miquianaya jjashahuabaquiani pojja'a jama ba'a: —Eyaya jamaya aña, quea ja'a nee aña.

Jesosaja epeeji quea ja'a pojjeama jjashahuabaquiani mi ba majje jama poani ba'a: —Chojja, jamaya quea mimishi, quea tai —poso acani.

Jamajjeya ohua jamaya huohui canijo, ¡a'a oe jamaya amajajji, jamatii miquianaya quea ja'a jjashahuabaquiani! <sup>17</sup> Bobijo, e'ishijji pea'aijo jjashahuabaquianijo pojjeama eseya Eyacuiñajji yasijje, ojjaña huoojea'yojji poani yasijje poquije'yo. Chojja. Quea ja'a nee, quea bihui nee, quea bei nee pea'ai caba'yahua Edojjoshahua Pameya eseya ba'e meesahua canijo. <sup>18</sup> E'e, jamaya Jesosa Quito nijje ba'yanijo Eyacuiñajjiya eseya huohui caje jama ba'a: —E'e, jamaya quea pame.

Cuanaya ojjaña mijo huohui caje jama ba'a: —Oya Jesosa Quitoja epeeji quea ja'a nee nee poani —acaje.

<sup>19</sup> Jamajjeya ¡jjashahuaba tiitiiquicue ojjaña Jesosaja epeeji cuana nijje quea bei nee eba'e'ji! ¡Pea Jesosaja epeeji cuana quea ja'a po meesahuacue pea'ai! <sup>20</sup> ¡A'a noe ijjiajji ecuiquiaja e'ijjiajji nisho onaja ba'ehuana ba'e! Quea mete oya cuana poaje. Eyacuiñajji onijje quea quene poani posojo ma bobijo onaya quea mete poanijo, ¡a'a ijjiia majajji! Jamatii Eyacuiñajji pana ojjaña bobi quea pame. Jamatii ma bobi miya ijjiajo onaya quea mete po mee chana', quea mimishi po o'oya mee chana'. <sup>21</sup> E'e, e'e pojja'a Jesosaja pea epeeji quea mimishi poaje miyaya ma bobi ijjiña, acuijjajja na biso nei pojja'a ishiana ba majje. E'e pojja'a mi ba majjeya ohuaya quea mimishi acaje o'oya. Jamajjeya ¡a'a jamaya amajajji! Oya quea mimishi po o'oya chana'. <sup>22</sup> Jamajjeya ¡a'a Jesosaja pea epeeji cuana nijje jjamimicuijaje nobiajeaquiji bobi cuanajo, eba'e meeji cuanajo pea'ai! ¡Jashahuaba neinei qui majje quea pame nee nee acue! ¡Jesosaja epeeji cuana quea pame ameesahuacue pea'ai! Jamaya poanijo ojjaña Jesosaja epeeji quea bihui nee capoahua. Jesosaja epeeji quea mimishi po mee cani o ba majje ca ca cajjashahuabaquiahua jama ba'a: —Chojja, eya ona mimishi pomeeji poani. Jamaya eya quea tai poani.

<sup>23</sup> E'e pojja'a Jesusaja epeeji jjashahuabaquiani jama ba'a: —E'e pojja'a jiquio bobi eya ijjañaajo, Eyacuiñajji enijje quea quene poaje —poani. Jamajjeya jamatii ijja cajo, Eyacuiñajji onijje quea quene poaje.

E'e, ¡jjashahuaba neinei quicue Eyacuiñajji esohui jayojja jama yajji! Eba'e quea mimishi miquea eba. Jamajjeya ¡a'a jamaya ajji! ¡E'e jojo nei quea pame nee pocue!

## 15

*¡Jesusaja epeeji cuana quea jjashahuabaqui ja'a ejjapo meequi!*

<sup>1</sup> E'e, ecuana quea jjashahuabaqui ja'a, Eyacuiñajji esohui ba neineiaña. Beca cuana cho, quea jjashahuabaqui ja'a pishana. Ona nijje ¡a'a quea quene pojji! ¡A'a jjashahuabaquiji jama ba'a: —Eyaya ca eya ojjaña bobi ijjaaje, jamatii onaaya eya quea mimishi poani poso acani —a'a jamaya pojji!

<sup>2</sup> Chojja, ¡Jesusaja epeeji ca'a'ama nijje a'a jjamimicuijaja nobiajeaquiji bobijo! ¡Oya cuana quea bei po meesahuacue miquea ojjaña bobi ijja jjimahuajo! E'e, ¡Jesusaja nijje jjapee neinei sahuameequicue! <sup>3</sup> Jamajjeya ¡Jesusaja jama ba'ecue, miquea ejjashahuabaquiji jayojja jama pojjeama! Ohuaya oja chii jama acanaje ba'a: —Ecuea ejjashahuabaquiji jayojja jama a sa po ajja. Chojja ecue chii, eyaya miquea ejjashahuabaquiji ejo jama a sa aña.

Yahuajo nei onaaya Jesusaja esohui tehue ca poa jama ba'a: “Ecue Chii, eya miquea ejjashahuabaquiji jayojja jama poanijo, dejja cuaa miya niñeba cani, eya pea'ai niñeba cani quea tai nee”.

Jamaya esohui yahuajo nei etehue'yo poa.

<sup>4</sup> Eyacuiñajjiya ojjaña ojaya esohui yahuajo tehue mee ca poa eseya ojaya epeeji quea ja'a epo meesahuajji. Ma esohui etehue'yojo eseyaya baña onaa napa cajje ona nijje mimijaji ajja, eseya. Ma esohuijo pea'ai eseyaya baña Jesusaja nijje jjapee neinei quianijo quijje ba'e tiitijje'yo onijje eyajo. <sup>5</sup> E'e, Eyacuiñajjiya eseya ba'e meesahua cani ojaya epeeji nei. Onaa napa cajje jjapeequi pajea'yo ajja. Jamajjeya eya onijje mimiani miquianajo jama ba'a: —Ecue Chii, ¡miqua epeeji cuana Shomajo ba'e ojee jjapeequi meesahuacue; Jesusaja esohui jama ameesahuacue! —eya poani.

<sup>6</sup> Jesusaja nijje ojee jjapeequianijo miquianaaya ojee Eyacuiñajji bihuiaña sohuicuayanajo, esejaya Emeshi Mese nei Jesusaja Quitoja Chii miquianaaya bihuiaña jama ba'a: —Eyacuiñajji, miya ca ca oe quea pame nee, quea ca'a nee. Pea chama' mi jayojja —jamaya miquianaya poaje'yo tii tii.

*¡Pea cuana nijje quea ja'a jjapeequicue!*

<sup>7</sup> Jamajjeya ¡Jesusaja Quitohua miquianaya quea jea acani jayojja jama ojaya epeeji cuana quea jea nee acue! Jamajjeya pea cuaa jama acaje ba'a: —E'e, Eyacuiñajji quea pame nee nee. Ojaya epeeji cuaa onaya quea jea nee acani.

<sup>8</sup> Yahuajo nei Eyacuiñajjiya ecuanaja etiquiana huohui ca poa jama ba'a: “Eyaya miquiana huasijje huoojeaje ojjaña jaahuanajji” poa. Jamajjeya Jesusaja Quito huoojea nei canaje ojaya yahuajo ehoojeapano poa joya. Jamajjeya eseya ba mee canaje Eyacuiñajjiya ohua aca poa esohui jayojjaya e'e jojo nei acani. <sup>9</sup> Oya Jesusaja poeyanaje Jodio pojjeama cuana Eyacuiñajji bihuia meeya pea'ai, jama po meeya pea'ai ba'a:

“Eyacuiñajji, miya quea pame nee nee, quea ca'a nee nee. Ecuana mimishi cuanajo jjashahuaba tiitiqui ajja. Cuijea'yo majje quea bei ecuana nijje poani”.

Yahuajo nei Eyacuiñajjiya Dabi tehue mee ca poa oja sohui jama ba'a:

“Jamajjeya eyaya Jodio pojjeama cuana nijjeya miya bihuiaje. Sohuicuaya majje miya bihuiaje”.

Jamaya yahuajo nei nei poa. <sup>10</sup> Yahuajo nei tehue mee ca poa jama pea'ai ba'a:

“Jodio pojjeama cuana, ¡Jodio cuana nijjeya Eyacuiñajji bihuiaje! ¡Quea bihui nee nee pocue!”

<sup>11</sup> Jamaya tehue mee ca poa pea'ai ba'a:

“Jodio pojjeama cuana, ¡Eyacuiñajji bihuiacue! E'e, ¡ojjaña cuaa Eyacuiñajji bihuiacue, sohuicuayacue jama ba'a: —Eyacuiñajji, miya quea pame nee —jamaya acue!”

Jamaya aca poa. <sup>12</sup> Eyacuiñajjiya Isaia tehue mee ca poa jama ba'a:

“Quijje nei nei Isaija osecua cuayaje. Oya ona huoojea'yojji poaje'yo. Ohuaya Jodio pojjeama pea'ai mimishi cuijea'yo majje ba mee caje'yo, onijje ba'e tiitii mee caje'yo”.

E'e, jamaya yahuajo nei Isaia tehue mee ca poa Jesosajo. <sup>13</sup> Jamajjeya Eyacuiñajjiya eseya ba meesahua cani jama ba'a: Quijje ohuaya eseya ba'e tiitii mee caje'yo eyajo onijje. Eya Eyacuiñajji nijje mimi majamajani miquianajo jama ba'a: —Eyacuiñajji, ¡miquea epeeji cuana Shomajo ba'e quea bihui nee po meecue! ¡Minijje jjapeequianijo quea ja'a nee jjashahuabaqui meesahuacue! —eyaya aña.

Edojjoshahua Pame miquiana nijje nequi. Oya quea ca'a nee nee. Miya ba meesahua cani miquiana quijje Eyacuiñajji nijje ba'e tiitiije'yo eyajo.

*Pabohua Shomano cuana Jodio pojjeama cuana baqui sa acani*

<sup>14</sup> E'e ecuea epeeji cuana, eya ca ca iña miquianajo jjashahuabaqui jama ba'a: Miquianaya Jesosaja epeeji quea pame nee. Miquianajaya eba nei nei Eyacuiñajji esohui e'e nei Jesosajo. Ma esohui huohui huicha'a huicha'aña. Pea cuana quea ja'a nee jjapeequi meesahuaña Jেসosa nijje, miquianaaya. <sup>15</sup> Jamatii Eyacuiñajjiya eya huohui canaje jayojja jama eyaya miquiana huasijje oja sohui tehuenaje. Beca ejjashahuabaqui quea ja'a nee nee tehuenaje mi jjabahuejjaqui meejji, miquianajaya epajea'yojji pojjeama. <sup>16</sup> E'e, Eyacuiñajjiya eya huoojea canaje Jodio pojjeama huasijje ojaya esohui huohuiya, Jesosajo ehuohuiji. Jiquio ecua yahuajo nei Eyacuiñajji nijje emimijji Jodio huasijje Eyacuiñajji esohui aca poa jayojja jama eyaya ojaya esohui Jesosajo cahuohuahua miquiana que, Jodio pojjeama huasijje Jেসosa nijje ejjapeequi meesahuajji. Jেসosa nijje jjapeequianijo, Eyacuiñajji miquiana nijje quea bihui nee poani, Edojjoshahua Pameya pea jjashahuabaquime po mee ca'yanijo.

<sup>17</sup> Jamajjeya eya quea bihui nee poani. Jেসosa Quitohua eya Jodio pojjeama cuana huasijje Eyacuiñajji esohui huohui meesahua cajje ojaya epeeji cuana poanaje. <sup>18</sup> Jiquio ca ca oe eyaya miquianaya quea bihui huohuiaña jama ba'a: Jেসosa Quitohua Jodio pojjeama quea pame ba'e meesahua cani Eyacuiñajji esohui jama ojaya epeeji nei epojji. Ohuaya jamaya acanaje eya ojaya esohui huohuiji poanijojo. E'e, Jেসosaa eya ameesahua canaje, huohui meesahua canaje pea'ai jama ba'a: <sup>19</sup> Eya Edojjoshahua Pameya ma dejjaa ajjima acani ameesahua canaje. Jamaya eya esohui huohui meesahua canaje quea ja'a nee Jenosanena huasijje, quea huesha nee pea'ai, johuaam Ininico huasijje pea'ai eyaya ojjaña Eyacuiñajji esohui quea pame nee Jেসosajo huohui neinei poquia poa. <sup>20</sup> Jamaya eyaya esohui huohui sa aña pea cuana huasijje, onaja sohuihuohuiqui jjima huasijje. E'e, jiquio esohui quea pame Jেসosajo shajja'ajja jjima cuana huasijje eyaya ma esohui huohui sa aña. <sup>21</sup> E'e, yahuajo nei Eyacuiñajji esohui etehue'yo jama aca poa ba'a:

“Ojjañaja yahuajo shajja'ajja jjimaa Eyacuiñajji huoojea'yo ojjaña jaahuanajji shajja'ajja caje. Ojjaña joya o ba pojjimaa oya ba caje”.

E'e, jamaya eyaya a sa aña, Eyacuiñajji esohui etehue'yo yahuajo jama.

*Pabo Shoma huasijje poqui sa poani Jেসosaja epeeji cuana baa*

<sup>22</sup> Yahuajo eya quea huiso poqui sa poa Shoma huasijje miquiana baa. Jjeya pea'ai eya poqui sa poani. Quea huiso pea cuana huasijje esohui huohui poequi jjejojo mi poquinaje.

<sup>23</sup> Jjeya ca ca eya apoa. Ojjaña cuiñajji yasijje jiquiojo esohui huohuijeyonaje. Jamajjeya ma ecua eya yahuajo jjashahuabaquinaje jamaya eyaya jjeyahua nei aje. <sup>24</sup> Eya poqui sa poani España meshi yasijje esohui huohuiya. Jamajjeya España meshi yasijje poquijeya eyaya miquianaya bananaje. Shomajo anije beca cahuime pojja'a. Quea bihui nee nee eya poaje miquiana nijje nequinana majje. Miquiana nijje mimi majje eya poquije España meshi yasijje. E'e pojja'a miquianaaya eya aquiana quiaje epoqui meesahuajji pojja'a.

<sup>25</sup> Miquiana huasijje poqui jjimahua eya poquije so'o Jenosanena huasijje Jেসosaja epeeji

aema huasijje ejjeshejji quiaa, Jodio cuana huasijje. <sup>26</sup> Ma ejjeshejji Jiosaja epeeji cuana Masenonia meshijo ba'eya, Asia meshijo ba'eya pea'aiya chicha canaje Jiosaja epeeji aema' ba'e meesahuajji. Jamaya oya cuana a sa poanaje. Oya Jodio pojjeama poani. <sup>27</sup> Jamatii quea bihui nee quia canaje. E'e, ohuaya ejjeshejji caquia cahua Jiosaja epeeji Jodio cuana ba'e meesahuajji. E'e, Eyacuiñajjiya Jodio cuana iyaa coo ca poa ojaya epeeji epojji. Majoya Jodio cuaa Eyacuiñajjiya esohui quea pame nee Jiosajo Jodio pojjeama cuana huohui cajje Jiosaja nijje jjapeequinaje. Jamajjeya Jodio pojjeama cuaa Jodio cuana huasijje eba'e meeji cahuoojea cahua, Jiosaja epeeji cuaa. <sup>28</sup> Jamajjeya Jenosanena huasijje poqui majje, ma ejjeshejji quia majje eya poquije España meshi yasijje. Poquijeya eyaya miqianaya bananaje. <sup>29</sup> Miqianaya banana majje quea bihui nee nee poaje. Ojee jjapeequianijo, Jiosaja esohuijio eseya quea bihui nee poaje'yo.

<sup>30</sup> Epeeji cuana, esejaya Emeshi Mese nei Jiosaja nijje jjapeequianijo, Edojjoshahua Pameya eya miqianajaya quea jea ameesahua canijo, ¡Eyacuiñajji nijje mimicie ejo! ¡Jama acue ba'a: —Eyacuiñajji, Pabo miquea esohui huohui canijo quea camaja nee nee. ¡Oya jaahuana neineicue! <sup>31</sup> Jamajjeya ¡Jiosaja epeeji pojjeama cuaa Jenosanenajo ba'eya oya enapajji pojjeama! ¡Miquea epeeji jomajo ba'e quea bihui nee ejjeshejji jjeshe meesahuacue ma Pabohua ye cani! —jama oe miqianaya acue Eyacuiñajji nijje mimi majje!

<sup>32</sup> E'e pojja'a Eyacuiñajjiya eya miqiana que huoojea caje. Ohuaya eseya quea bihui nee jjapeequi meesahua caje quea pame nee.

<sup>33</sup> Eyacuiñajjiya eseya quea bei ba'e meesahua cani. ¡Ohuaya miqianaya cajaanahua cahua! ¡Jamaya capoahua!

## 16

### *Pabohua Jiosaja epeeji cuana huasijje tehue canaje quea bihui o pojji*

<sup>1</sup> Ecuana epeeji epona Peme bajjani Jiosaja nijje chacochoani Senesea cuiñajjiyo. Oya Jiosaja epeeji quea pame nee. Jiosaja pea epeeji cuana jaahuana cani. <sup>2</sup> Miqiana que poquiyajo, ¡oya huohuicue jama ba'a: —Mi poeyajo ecua quea bihui nee —acue!

Ohuaya eya ba'e meesahua cani, pea Jiosaja epeeji cuana pea'ai ba'e meesahua cani quea huiso nee. Jamajjeya miqianaya Jiosaja epeeji poani pea'aijo ¡oya ja'ajjequicue! ¡Oya aquiana quiacue eba'eji! <sup>3</sup> Pisina pea'ai, oja yahue Aquiana pea'ai miqiana nijje ba'e. Oya huohui'ajjacue jama ba'a: —¿Achajja acuae quiana so'o? —ecuea ebajji.

Oya cuana enijje chacochoconaje. Jiosaja esohui huohui sahua canaje. <sup>4</sup> E'e, eyaya Jiosaja esohui huohuiañajo, pea cuaa cuia'ajja canaje. Pisina, Aquina pea'ai ca ca e nahuejo beshahua nei cuia canaje cuaa. Jamajjeya eyaya, Pabohua Jiosaja epeeji Jodio pojjeama cuana nijjeya oya huohuiaña jama ba'a: —E'e, jamaya miqianaya quea pame nee nee poanaje —ecuaaya anaje.

<sup>5</sup> Ojjaña Jiosaja epeeji cuana ma Pisinaja equijo jjachichaquiani eyaya huohui'ajjaña jama ba'a: —¿Achajja acuae quiana ani so'o? —ecuanaja ebajji.

Jamaya acue pea'ai ecuea epeeji Epeneto bajjani. Asia meshijo ba'ya poa oya. Ecuea esohui Jiosajo shajja'ajja majje oya ebionei Jiosaja epeeji poanaje jomajo Asia meshijo ba'yahua. <sup>6</sup> Mania pea'ai quea huiso chacochoconaje miqiana nijje. ¡Oya ecuea esohui huohuicue quea bihui nee o pojji! <sup>7</sup> ¡Oya jayojjaya mimicie Anidónico nijje, Jonia pea'ai nijje! Oya Jodio cuana, ecuea huapa pojjeama cuana. Oya enijje ejeanobia jaanaje. Jiosaja epeeji quea pame nee oya poa, Jiosaja huoojea'yo esohui huohuijji. E Jiosaja nijje jjapeequi jjimahuajo oya cuana jjapeequia poa. <sup>8</sup> ¡Oya jayojjaya mimicie Amepia nijje pea'ai! Oya Emeshi Mese nei Jiosaja epeeji nei. Jamajjeya: —¿Achajja ami ani so'o, ecuea epeeji? —acue oya, ecuea ebajji.

<sup>9</sup> ¡Oya jayojja mimicie Omano nijje, ma ecuaa nijje Jiosaja Quito nijje chacochoconaje! ¡Etaqui pea'ai, <sup>10</sup> Apene pea'ai jama acue! Oya Emeshi Mese nei nijje chacochoconijo quea nee poanaje quea huiso. Ecuana eba oya Jiosaja epeeji quea ca'a nee. ¡Ojjaña

Anisitomoja huapa pojjeama cuana ecuea esohui huohuicue pea'ai quea bihui nee o pojji!  
<sup>11</sup> ¡Jodio dejja Jenonio bajjani jama acue! Oya huapa pojjeama pea'ai poani. ¡Oya Nasiso, Nasisoja huapa pojjeama ecuea esohui huohuicue pea'ai, Jesosa nijje jjapeequianijo!  
<sup>12</sup> ¡Tipena, Tiposa oya jayojjaya huohuicue! Ma epona cuana Emeshi Mese neiyo, Jesusajo quea huiso chacochoconaje. Epona Pesina bajjani pea'ai Emeshi Mese neiyo janobajjima nei chacochoconaje. ¡Oya pea'ai ecuea esohui huohuicue, ecuea epeeji nei oya!  
<sup>13</sup> ¡Jamaya mimicue Shopo nijje, ojaya enaese nijje pea'ai! Ojjaña eba Jesusaa, Emeshi Mese neiya Shopo babaca canaje ojaya esohui huohuiji. Ojaya enaeseya eya jaahuana canaje ecuea enaeseya jayojjaya. <sup>14</sup> Jamajjeya oya jayojjaya huohuicue ojo Jesusaja pea epeeji cuana nijje pea'ai, ma bajjani cuana nijje ba'a: Asinisito, Peconete, Jemesi, Patomasi, Jemase pea'ai. ¡Ojjaña Jesusaja epeeji onijje nequica pea'ai jamaya acue!  
<sup>15</sup> ¡Ecuea esohui quea bihui nee o pojji huohuicue Pinonoco, Joña, Neneo, oja jjo'i pea'ai, Onipa pea'ai ojjaña Jesusaja epeeji cuana onijje nequica pea'ai huohuicue!

<sup>16</sup> E'e, miqianaya jjachichaqui majje ¡pea cuana nijje quea bihui nee mimicue jama ba'a: —¿Achajja ami ani so'o, epeeji? —acue!

E'e, ojjaña Jesusaja epeeji cuaa jiquiojo enijje nequiya miqianaya Shomajo ba'e quea bihui nee acani jama ba'a: —¿Achajja acuae quiana ani so'o? —acani ojaya ebajji.

Mahuiso.

*Pabohua pea esohui quea ja'a nee eba'e meeji huohui cani*

<sup>17</sup> Ecuea epeeji cuana, eyaya miqiana cuana pea esohui tehueña jama ba'a: Beca cuaa miqiana nijje nequiya Jesusaja epeeji cuana pea epeeji cuana nijje jjamimicuijaja nobiajea meeji cani. Pea esohui e'e nei pojjeama Jesosa Quitojo huohui cani pea'ai, ecuanaja esohui jayojja jama pojjeama. Ecuaaya ca ca e'e nei esohui huohuiaña. ¡A'a oya cuana shajja'ajjaji! ¡A'a jja oe onijje jjapeequijji! <sup>18</sup> Ma sijjepojji cuana esejaya Emeshi Mese neiyo Jesusajo chacochoconaje. Chojja. Oya cuana esohui huohuiji nisho. Ojaya ejjashahuabaquijji quea quehua jayojja jama acani. Mimiani esohui quea pame jayojja. Jamatii quea tai. Sijje poani. Jama poani ba'a: —E'e, eya miqianajaya epeeji; miqianaya quea pame nee nee ecuea epeeji —anisho cani. Jamaya Jesusaja epeeji quea jjashahuabaqui ja'a pishana dasia cani.

<sup>19</sup> Ojjaña Jesusaja epeeji cuaa shajja'ajja canaje miqianaya Shomajo ba'e Eyacuiñajjija esohui jayojjaya ba'yani. Jamajjeya eya miqianajo quea bihui nee. ¡Quea ja'a nee jjashahuabaquicue quea pame nee eba'eji! ¡Ma esohui huohuiji nishoja esohui e'e nei pojjeama a'a shajja'ajjaji! ¡A'a jamaya pojji! <sup>20</sup> E'e, Eyacuiñajjiya eseya quea bei ba'e meesahua cani, quea ja'a jjashahuabaqui meesahua cani jjeya nei. Ohuaya miqianaya Edosiquianaja epeeji mimicuijajanobiajea meesahua caje'yo. Miqianaya ojaya edasia'yojji pojjeama. E'e, ¡Jesosa Quitohua esejaya Emeshi Mese neiya miqianaya cajaanahua cahua!

<sup>21</sup> Timoteo enijje chacochoconaje Jesusa Quito nijje. Ohuaya pea'ai miqianaya jama huohui'ajjame acani ba'a: —¿Achajja acuae quiana so'o? —acani.

Ecuea huapa pojjeama Jodio dejja cuana Nosio, Jasoni, Sosipate pea'aiya jama huohui'ajjame acani ba'a: —¿Achajja acuae quiana ani so'o? —acani pea'ai.

<sup>22-24</sup> Cayo pea'ai oya jayojjaya miqiana nijje mimiani. Eya oja equijo ba'e. Ojaya equijo Jesusaja epeeji cuana ojee jjachichaquiani Eyacuiñajjija esohui baa. Enasitohua, pea epeeji Cuanito bajjanaya pea'aiya huohui'ajja mee cani jama ba'a: —Epeeji cuana, ¿achajja acuae quiana ani so'o? —acani. Oya Enasito ejjesheji cuiñajji poani, ma Conitio dejja etiiya chicha mee cani ejjesheji.

Eya ca iña Jesusaja epeeji Tesio bajjani. Eyaya Paboya esohui miqiana quea tehueña ojo. Eyaya miqianaya huohuiaña jama ba'a: —Miqianaya Jesusa Quitoja epeeji, esejaya Emeshi Mese neiya epeeji poanijo, ohuaya miqianaya quea pame nee cajaanahua cahua. E'e, jamaya capohua —jamaya Pabohua eya tehue mee cani.

*Eyacuiñajji bihuia cani Pabohua*

<sup>25</sup> Eyacuiñajji ejjabihuaqui jama ba'a: —Eyacuiñajji, miya quea pame nee, quea ca'a nee nee. Miquea esohui jayojja jama ba'e meeña ecuanaya. Eyacuiñajji, miyaya eya huohui meesahuaña esohui quea pame nee Jesosa Quitojo. Ba meesahuaña Jesosa Quito ca ca oe mimishi cuijea'yojji poani ojjañaja. Maya yahuajo ecuanaja etiiquianaja ba jjima poa. <sup>26</sup> Jodio esohui huohuijji yahuajo nei ba'ya poaa Jesusajo huohui ca poa quea ja'a pishana, ojaya ba jjima pishanajo. Jjeya ca ca ma esohui e'e nei miyaya ba meesahuaña quea ja'a nee.

—E'e Eyacuiñajji, miya ba'e tiitiiani. Miya ca ca oeya ojjaña cuana ojjaña meshijo ba'e ba meesahuaña esohui e'e nei Jesusaja. Ma esohui quea pame jayojja jama ameesahuaña pea'ai. Jamaya ojjañaja eba poaje.

<sup>27</sup> —E'e Eyacuiñajji, miya oe nei Eyacuiñajji, pea chama'. Ojjaña ca ca oe miquea eba, miquea nei. Ecuana Jesusaja epeeji poanijo ecuanajaya eba miya quea pame nee nee, quea ca'a nee poani tii tii. Jamaya capoahua —jamaya ejjabihuaqui Eyacuiñajji.

Eya Pabo bajjani. Mahuiso ecuea esohui miquiana Shoma cuiñajjijo ba'e yasijje tehue meeña. Apoa.

## PABOJA ETEHUE'YO CONITOJO BA'E CUANA HUASIJJE EBIONEI 1 CORINTIOS

### *Pabohua tehue canaje Jesosaja epeeji cuana Conitojo ba'e yasijje*

<sup>1</sup> Jesosaja epeeji cuana, eya Pabo, Jesosa Quitoja huoojea'yo ojaya esohui huohuijji. Jamaya Eyacuiñajjiya a sa acani. Jesosaja epeeji Sotene enijje nequi. <sup>2</sup> Eyaya tehueña miquiana huasijje, Jesosaja epeeji cuana Conito cuiñajjiyo ba'eca huasijje, ojjaña meshijo ba'eca huasijje pea'ai tehueña. E'e, yahuajo Eyacuiñajjiya miquianaya ojjaña babaca canaje Jesosaja epeeji e'e jojo nei epo'yoyji, quea pame nee. Jamajjeya miquianaya ojjaña cuana jama poani ba'a: —Jesosa, ¿e jaahuanajji pocue! —jamaya poani esejaya Emeshi Mese nei Jesosa Quito nijje, ojjaña esejaya Emeshi Mese nei nijje. <sup>3</sup> ¿Esejaya Emeshi Mese nei Jesosa Quitohua, Eyacuiñajjiya esejaya Chiya pea'ai miquianaya cajaanahua cahua, quea bei caba'e mee cahua pea'ai!

### *Pabohua Eyacuiñajji bihuia canaje*

<sup>4</sup> Eya Eyacuiñajji nijje mimiani miquianajo quea huiso nee jama ba'a: —Eyacuiñajji, miya quea pame nee. Jesosa Quitoja epeeji ojjaña cuana jaahuanahua quea pame nee —eya poani.

<sup>5</sup> E'e epeeji cuana, miquianaya Jesosa Quitoja epeeji poanijo, ohuaya miquianaya quea pame nee ameesahua cani tii, quea huiso nee. Jamajjeya miquianaya ojaya ejjashahuabaquijji ba meesahua canaje quea ja'a nee. Ojaya esohui ba meesahua canaje, huohui meesahua canaje pea'ai. <sup>6</sup> Esohui quea pame nee Jesosa Quitoja eyaya miquianaya huohui huicha'a huicha'anaje yahuajo. Jamajjeya ojaya esohui jayojja jama miquianaaya atiitiaña. <sup>7</sup> Jamajjeya esejaya Emeshi Mese nei Jesosa Quitoja epoe o'oyajjiyo ishohaño, o jayojjaya jama Edojjoshahua Pameya miquianaya ameesahua cani quea huiso. <sup>8</sup> E'e, Edojjoshahua Pameya miquianaya Jesosa jayojja jama amee canijo, Jesosa nijje jjapeequi pajea'yo ajja. Jamajjeya esejaya Emeshi Mese nei poe o'oyajo, Eyacuiñajjiya miquianaya ba caje mimishi'ama. <sup>9</sup> E'e, Eyacuiñajjiya miquianaya babaca canaje ojaya Ebacua Ejja nijje, Jesosa Quito nijje ejjapeequijji tii, esejaya Emeshi Mese nei nijje. Eyacuiñajjiya ojaya esohui jayojja jama acaje'yo nei nei, e'e jojo nei; miquianaya Jesosaja epeeji quea ca'a nee po mee caje'yo tii tii.

### *Ojaya epeeji cuana ojee cjjapeequi'yahua Jesosa nijje*

<sup>10-11</sup> Ecuea epeeji cuana, Jesosa Quitoja epeeji Coeja huapa pojjeama poeyanaje e que. Enijje miminaje miquianajo jama ba'a: —Pabo, Jesosa Quitoja epeeji cuana Conitojo ba'e jjamimicuiajea nobiajeaquiani quea huiso nee —poanaje.

Epeeji cuana, ¿apiojji acuae nequiana jjamimicuiajea nobiajeaquiani so'o? Jamaya miquianaya quea tai poani.

Jamajjeya ¡shajja'ajjacue mo! Eseyaya Emeshi Mese neiya Jesosa Quitohua eya huoojea canaje ojaya esohui huohuiya. Jamajjeya eyaya miquianaya huohuiaña jama ba'a: Ojjaña miquianaya Jesosa Quitoja epeeji poanijo ¡ojjaña ojaya ejjashahuabaquijji jayojja jama jjashahuabaquicue! ¡A'a jjamimicuiajea nobiajeaquijji! ¡A'a peapea ejjashahuabaquijji ajji! E'e, ¡ojee jjapeequicue quea bei nee Jesosa nijje! <sup>12</sup> Miquianaya aje oe beca cuana jama poani ba'a: —Eya ca iña Pabo shajja'ajjajji poani.

Pea ca jama poani ba'a: —Eya ca iña Apono shajja'ajjajji.

Pea ca jama poani ba'a: —Eya ca iña Peno shajja'ajjajji.

Pea ca jama poani ba'a: —Eya ca iña Jesosa Quito shajja'ajjajji poani —nequiana poani, de.

<sup>13</sup> ¿Apiojji acuae nequiana jamaya jjamimicuiajea nobiajeaquime poani so'o? ¿A'a Jesosa ojjañaja mimishi cuijea'yoyji pojjeama? ¿A'a ojjaña jaahuanajji pojjeama? E'e, oya ojjaña ojaya epeeji cuanaja mimishi cuijea'yoyji, ese jaahuanajji oe nei poani tii

tii. Eya pojjeama miqúanaja mimishijo manojeyo. Jesosa Quito ca ca oe miqúanaja manoyonaje acui ecueata'apeejo miqúanajaya mimishi cuijea'yojji. Onaaya miqúanaya besa mee canaje Jesosa nijje jjapeequianijo, enijje jjapeequianijo pojjeama. <sup>14</sup> Jamajjeya eya, Pabo quea bihui poani ecuea miqúanaya besa mee jjimajo. Jesosaja epeeji cuana oe pojji eyaya besa meenaje Quipo, Mayo pea'ai. <sup>15</sup> E'e, eyaya oe pojji besa meenajejo, ejjamimicuiajea nobiajeaquijji pojjeama pea cuana nijje jama ba'a: —Pabohua ecuana besa mee canaje o shajja'ajjajji epojji —e'ajji pojjeama.

E'e, eyaya miqúanaya besa meenaje ecuea epeeji epojji pojjeama.

<sup>16</sup> E'e pojja'a eyaya Etepana, ojaya huapa pojjeama cuana pea'ai besa meenaje. Oe pojji pea cuana besa meenaje pea'ai pojja'a. Cua'a de, pajeayonaje eyaya. <sup>17</sup> Jesosa Quitoja eya huoojea jjima ojaya epeeji cuana besa meeya. Chojja, ohuaya eya huoojea canaje ojaya esohui quea pame nee huohuiya jama ba'a: —Ecuea esohui quea pame nee huohuiañajo, jeya acui ecueata'apeejo manoyonajejo oe huohucue! ¡A'a dejjaja ejjashahuabaquijji jayojja jama huohuijji, ma ojaya ejjashahuabaquijji quea ja'a poso acanija! Jamaya ehuohui'yo jojjemo, miya quea sohui ja'a jojjemo ojjaña mi bihuiajji pome. Jamajjeya jamaya ehuohui jojjemo Eyacuiñajji bihuia jjima acame. “Jesosa Quito acui ecueata'apeejo manoyonaje ecuanaja mimishi cuijea'yojji” ajjima acame onaaya —jamaya Jesosaa eya huohui cani.

*Eyacuiñajjiya ejjashahuabaquijji esejaya ejjashahuabaquijji jayojja jama pojjeama*

<sup>18</sup> Eyacuiñajjiya esohui quea pame nee Jesosajo, oya manoyonaje esejaya mimishijo shajja'ajja majje shajjama' cuana jama poanaje ba'a: —Cajaa Jesosaja esohui, ma oya ojjaña mimishi cuijea'yojji poani; acui ecueata'apeejo manoyonaje cajaa pea'ai —poanaje. Maya Eyacuiñajjiya quijje quea nee nee po mee caje'yo.

Eseya, Jesosaja epeeji cuana ca ca Eyacuiñajjiya ba'e tiitii mee caje'yo. E'e, oja sohui shajja'ajja majje eseya jama poani ba'a: —Eyacuiñajji quea ca'a nee neeya eseya ba'e tiitii mee caje'yo onijje; oja Bacua Ejja Jesosa acui ecueata'apeejo manoyonaje esejaya mimishi cuijea'yojji —poani.

<sup>19</sup> E'e, yahuajo nei Eyacuiñajjiya Isaia tehue mee ca poa jama ba'a:

“Beca cuana jama poani ba'a: —Ecuea eba ojjaña —poani. O shajja'ajjajji poaniya pea'ai jama acani ba'a: —E'e de, ojjaña ojaya eba! —poso acani. Ojjaña ojaya eba poso acani. Eyaya ca ca ojjaña cuana ba meeje ojaya eba oe pojji nei”.

Jamaya Eyacuiñajjiya yahuajo nei Isaia tehue mee ca poa.

<sup>20</sup> E'e, Eyacuiñajji ese jayojja jama jjashahuabaqui ajja. Ojjaña ba epo poso ohuaya ba cani quea sapa ca'a. E'e, dejja quea huiso esohui bajji, esohui huohuijji cuana, joya dejja cuanaja ejjashahuabaquijji mimicuiaje nobiajea cani pea'ai quea huiso ba epo poso Eyacuiñajjiya esohuijo Jesosajo jjabahuejjaqui mee ajja jama ba'a: Eyacuiñajjiya eseya ba cani emimishi cuijea'yo Jesosa nijje jjapeequianijo ma dejja cuanajaya ba jjima. Yajja jjabahuejjaqui meeme yajji, quea huiso ba epo poso oya jjabaquiani.

<sup>21</sup> Eyacuiñajjiya ejjashahuabaquijji quea ja'a poanijo ohuaya eseya ba'e tiitii mee caje onijje, Jesosa nijje jjapeequianijo, ojaya esohui shajja'ajja poquiañajo pea'ai. Ohuaya eya esohui quea pame nee Jesosajo huohui mee canaje. Jamatii ojjaña quea jjashahuabaqui quehua jama poani ba'a: —¿Yajja yajji joya miqúanaya huohuiaña Jesosa manoyonaje esejo, esejaya mimishi cuijea'yojji? Quea jjashahuabaqui quehua miya poani, de —jamaya Jesosaja epeeji pojjeama poani.

<sup>22</sup> E'e de, ecuana Jodio cuaa jama acani ba'a: —¡Eyacuiñajjiya jayojja acue, ma dejjaa ajjima acani! Majoya ecuaaya miya baje e'e jojo nei Eyacuiñajjiya huoojea'yo ojaya esohui huohuijji —jamaya quea tai poani Jodio cuana.

—¡Esohui huohuijji quea huiso ba epo jayojja jama mimicue! Jamajjeya ecuaaya miya baje Eyacuiñajjiya huoojea'yo esohui huohuijji —jamaya quea tai poani Jodio pojjeama cuana.

<sup>23</sup> Ecuana ca ca jama poani ba'a: —Jesosa Quito Eyacuiñajjiya huoojea'yo ojjaña jaahuanajji acui ecueata'apeejo manoyonaje eseja mimishi cuijea'yojji.



Jesosa Quitoja esohui shajja'ajja sa po ajja jjejojo Jodio cuana quea quene poani, poquiquehuani tii onijje jjapeequi ajja jjejojo. Jodio pojjeama cuaa pea'ai esohui cajaa acani: —Chojja Pabo, miyaya esohui quea ja'a pojjeama huohuiaña —jama siajje pomeya onaya poani.

<sup>24</sup> Jamatii Eyacuiñajjiya Jodio cuana, Jodio pojjeama cuana pea'ai babaca canaje Jesosa Quitoja epeeji nei epo'yoyji. Eseyaya, Jesosa Quitoja epeeji cuanaja eba Jesosa Quitoja esohui quea pame nee. E'e, Eyacuiñajjiya Jesosa huoojea canaje mimishi cuijea'yoyji. Jamajjeya esejaya eba Eyacuiñajji quea ca'a nee nee, ojjaña ojaya eba. <sup>25</sup> E'e, Eyacuiñajji quea jjashahuabaqui ja'a nee nee. Ojjaña nei nei ojaya eba. Oya quea ca'a nee nee; pea chama' o jayojja. Jamajjeya ohuaya eseya ba'e tiitii mee caje'yo Jesosa Quito acui ecueata'apeejo esejaya mimishijo mano'yonajejo. Jamatii Jesusaja epeeji pojjeama aje oe jama poani ba'a: —¿Yajja poajo acuae Eyacuiñajjiya ecuanaja mimishi cuijea ca'yome Jesosa mano'ya poajo? Chojja —acani quea quehua jjashahuabaquiani jjejojo.

*Eyacuiñajjiya eseya babaca canaje ojaya epeeji epojji jamatii onajaya eseya boti'ama*

<sup>26</sup> Epeeji cuana, ¡jjashahuabaquicue! Eyacuiñajjiya miquianaya Jesosa nijje jjapeequi meesahua jjimajo, ¿achajja miquianaya poanaje? Beshahua nei esohui ba po jjima. Beshahua nei ona huoojea po jjima, emeshi mese cuanaja bacua po jjima pea'ai miquianaya poanaje. <sup>27</sup> Jamatii Jesusaja epeeji pojjeamaa jama acani ba'a: —Jesusaja epeeji quea pame pojjeama. Oya cuana quea jjashahuabaqui ja'a pojjeama —jama posoya acani Jesusaja epeeji pojjeama cuaa.

Eyacuiñajjiya ca ca eseya babaca canaje ojaya epeeji epojji, quea huiso esohui ba epo ona quea bicho po meeji. Eyacuiñajji jama poani ba'a: —Jesusaja epeeji pojjeama quea pame pojjeama jjashahuabaquiani —jamaya Eyacuiñajji poani.

<sup>28</sup> E'e, Jesusaja epeeji pojjeamaa eseya niñe ba cani jama ba'a: —Jesusaja epeeji cuana ona huoojeajji jayojja pojjeama, esohui ba po jjima jayojja pea'ai, aema' pea'ai. ¿Ajeo oya cuana eshajja'ajjaji? —poani.

Jamatii Eyacuiñajjiya eseya iyaa ca poa ojaya ebabaca. Jamajjeya ohuaya onaya ba mee caje jama ba'a: —Miya ojjaña ba epo poso poanijo, miquianajaya ejjashahuabaquijji quea tai. Miquianaya quea pame pojjeama. ¡Quea bicho pocue! —Eyacuiñajjiya acani.

<sup>29</sup> Jamajjeya ae pishana Eyacuiñajji nijje mimije jama ba'a: —Eyacuiñajji, ¡bacue! Eya ca ca iña jamatii quea pame nee —jamaya emimijji pojjeama miya Eyacuiñajji nijje.

Quijje pea'ai ojjaña Eyacuiñajji cojja nei nequi majje quea bicho, quea mete poaje. <sup>30</sup> Jamatii Eyacuiñajjiya eseya Jesosa Quito nijje jjapeequi meesahua ca'yonaje. Ojaya epeeji poanijo, ojaya ejjashahuabaquijji ba meesahua cani. Ojaya esohui jayojja jama ba'e meesahua cani. Mimishi cuijea'yo majje quea boejea po mee cani. Eseyaya ba'e tii tii mee caje'yo onijje, Eyacuiñajjiya. <sup>31</sup> Yahujajo nei Eyacuiñajjiya esohui etehue'yo jama poa ba'a:

“Jamajjeya jesejaya Emeshi Mese nei bihuiacue! Oya oe nei quea pame nee. A'a jama pojji ba'a: —Eya ca ca iña jamatii quea pame nee”.

Jamaya Eyacuiñajjiya esohui etehue'yo poa.

## 2

*Jesosa Quito acui ecueata'apeejo mano'yonaje*

<sup>1</sup> Ecuea epeeji cuana, yahujajo miquiana que poe jeahuaa eyaya esohui quea pame Jesusajo huohuinaje. Eya jama po jjima ba'a: —Eya ohueya dejja ojjaña esohui ba epo nei nei. Ecuea emimi quea ja'a. ¡Jamajjeya shajja'ajjacue mo! —jamaya ajjima ecuea.

Chojja, miquiana que poe majje eyaya Eyacuiñajjiya esohui e'e nei Jesosa Quitoja huohuinaje, ma onajaya yahujajo ba jjima poa. <sup>2</sup> Miquiana que poe jjimahua eya jjashahuabaquinaje jama ba'a: —Eyaya Conitojo ba'e cuana huohuije esohui quea pame nee Jesosa Quitojo, ma acui ecueata'a peejo mano'yonaje esejaya mimishi cuijea'yoyji. Pea esohui huohui jjima aje.

<sup>3</sup> Miquiana que poe majje eya jjashahuaba neineiquinaje jama ba'a: —¿A'a eyaya Eyacuiñajjiya esohui huohuije quea ja'a nee pojja'a? —eya quea mete poanaje.

<sup>4</sup> Jamajjeya Edojjoshahua Pame quea ca'a neeya eya huohui meesahua canaje esohui e'e nei miquianajaya eshajja'ajjaji. Esohui huohuijji ojjaña ba epohua jayojja jama ecuea huohui jjima. <sup>5</sup> Jamajjeya Eyacuiñajjiya miquianaya Jesosa Quito nijje jjapeequi meesahua canajejo, ojaya epeejji nei poanaje. Dejja ojjaña esohui ba epohua jama ecuea huohui jjima.

*Eyacuiñajjiya ejjashahuabaquijji e'e jojo nei quea ja'a nee*

<sup>6</sup> Jamatii Jesusaja epeejji eyacua pojjeama eyaya huohuiaña; etii jayojja eyaya huohuiaña esohui quea ja'a nee, Eyacuiñajjiya ejjashahuabaquijji. Jesusaja epeejji pojjeamaja esohui jayojja jama pojjeama, emeshi mese cuanaja esohui jayojja jama pojjeama eyaya esohui huohuiaña, eshahua esohui jayojja jama pojjeama pea'ai. Maya quijje ojjaña ca'a'ama poaje. Eyacuiñajjiya oya cuana ona huoojeajji popajea mee caje'yo.

<sup>7</sup> E'e, ojjaña nei nei Eyacuiñajjiya eba. Eyaya Eyacuiñajjiya ejjashahuabaquijji quea ja'a nee Jesosa Quitojo huohuiaña. Yahuajo maya ejjashahuabaquijji ba mee jjima ojjaña, Eyacuiñajjiya. Jjeya ca ca ohuaya eseya, ojaya ehoojea'yo cuana ba mee canaje jama ba'a: Meshi pana jjimahuajo tii Eyacuiñajjiya eseya babaca ca poa Jesusaja epeejji cuana epo'yojji, onijje eba'e tiitii'yojji. Jesosa Quitohua mano'yo majje oja epeejji cuana ba'e tiitii mee caje'yo quea pame nee onijje. Jamaya Eyacuiñajji jjashahuabaquia poa. <sup>8</sup> Maya Jodio pojjeamaja emeshi meseja ba jjima poa; Jodio etii cuanaja ba jjima pea'ai poa. Maya onajaya eba jojjemo Emeshi Mese nei quea ca'a Jesosa Quito bajjani acui ecueata'a peejo mano mee'yo jjima aca quiaye. <sup>9</sup> Jamatii Eyacuiñajjiya yahuajo nei esohui tehue mee ca poa jama ba'a:

“Oya esejaya quea jea neejo, Eyacuiñajjiya eseya quea pame nee acaje'yo, ojjaña ojaya epeejji cuana. Maya esejaya ba jjima ecojjaja, maya esejaya shajja'ajja jjima eshajjaja, huohui jjima pea'ai. Maya eseya jjashahuabaqui jjima pea'ai. Eseyá ohuaya quea pame nee nee acaje'yo”.

Yahuajo nei jamaya tehue mee ca poa. <sup>10</sup> Maya Edojjoshahua Pameya eseya ba mee cani: Eyacuiñajjiya quea pame nee acani esejo, ma Jesosa Quitohua ojaya epeejji cuana ba'e tiitii mee caje'yo onijje eyajo.

Ojjaña Edojjoshahua Pameja eba. Jamajjeya ese que dobiqúi majje ohuaya eseya ba mee cani Eyacuiñajjiya ejjashahuabaquijji. <sup>11</sup> ¿Ajea eba oe dejjaja ejjashahuabaquijji? Ojaya eba ojaye nei ojaya ejjashahuabaquijji, onajaya ba jjima. Oya jayojjaya Edojjoshahua Pameja eba Eyacuiñajjiya ejjashahuabaquijji, ojaye nejja. Eyacuiñajjiya eseya ba'e tiitii mee caje'yo Jesosa nijje jjapeequianijo ojaya eba nei. <sup>12</sup> E'e, eseya Jesusaja epeejji poanijo shajjama' jayojja jama jjashahuabaqui ajja. Jamajjeya Eyacuiñajjiya Edojjoshahua Pame ese que dobiqúi mee canaje. Ohuaya eseya ba mee canaje jama ba'a: Jesusaja epeejji poanijo ca ca oe Eyacuiñajjiya eseya ba'e tiitii mee caje'yo onijje, eseya ojaya quea jea neejo. Quea pame nee nee eseya acaje'yo pea'ai ohuaya. <sup>13</sup> Jamajjeya Jesusaja epeejji pojjeamaja esohui jayojja jama esejaya huohuijji pojjeama. Chojja, Edojjoshahua Pameya eseya huohui meesahua cani ojaya ejjashahuabaquijji quea ja'a Jesusaja epeejji nei cuana huasijje.

<sup>14</sup> Jamatii Jesusaja epeejji pojjeamaja ba jjima Edojjoshahua Pame. Ba meeme ajja Edojjoshahua Pameja ejjashahuabaquijji, quea quehua nee ojaya. Jamajjeya jama poani ba'a: —¿Apiojji Jesosa nijje ejjapeequijji? Maya ecuanajaya esohui quea quehua —jamaya poani.

E'e, ojaya jamatii ebajji pojjeama Jesusa Quitoja esohui. Maya Edojjoshahua Pameya eseya ba mee cani. <sup>15</sup> Eseyá ca ca Jesusaja epeejji poani. Edojjoshahua Pameya ese que dobiqúi majje ba mee cani ojjaña eba'ejji quea pame; eba'ejji quea mimishi pea'ai ba mee cani jama ba'a: —E'e, jamaya. ¡Quea pame nee acue! —amee cani—. Pea'ai

quea tai jjashahuabaquianijo, ohuaya jama amee cani ba'a: —Chojja, jamaya quea tai, Eyacuiñajjija boti'ama —ameesahua cani pea'ai ojjaña quea ja'a eba'ejji.

Maya onajaya quea quehua nee nee. Jamajjeya Jesusaja epeeji pojjeamaja ojaya epeeji eniñebajji pojjeama jama ba'a: —¿Apiojji miquianaya jama ba'yani? ¿Apiojji ma esohui shajja'ajjaña, huohuiaña pea'ai? —jamaya e'ajji pojjeama onajaya.

<sup>16</sup> E'e, yahuajo Eyacuiñajjija esohui etehue'yo jama poa ba'a: “Ojjaña Eyacuiñajjija ejjashahuabaquijji ¿ajea eba? Chama'. ¿A'a eseyaya Eyacuiñajji ba meesahuaje? Chojja”.

Jamaya yahuajo nei poa.

Jamatii Jesosa nijje jjapeequianijo, Edojjoshahua Pameya eseya Eyacuiñajjija ej-jashahuabaquijji ba meesahua cani.

### 3

#### *Pabohua Jesusaja epeeji jjabahuejjaqui mee cani*

<sup>1</sup> Ecuea epeeji cuana, miquianaya ebacua esho'i jayojja jama poani, quea jjashahuabaqui ja'a pojjeama poani tii tii. E'e, yahuajo miquiana nijje nequiya eyaya Jesosa Quitoja huohuinaje. Jamatii beshahua nei miquianaya jjashajja'ajjaqui ajja. Jesosa nijje jjapee neinei qui jjima jayojja jama poani; ojaya epeeji pojjeama jama poani. <sup>2</sup> Jiquio ecua ebacua esho'i tojjo ba'e noe quia jjima acani jayojja jama ecuea miquianaya huohui jjima esohui quea ja'a nee quea camaja ebajji. Jjeya pea'ai miquianaya Jesusaja epeeji etii jayojja jama pojjeamajo ma esohuijjo jjashajja'ajjaqui ajja. <sup>3</sup> Miquianaaya aje oe Jesusaja epeeji pojjeamaa jayojja tiiya aña. E'e, Jesusaja pea epeeji cuanaja esohui shajja'ajja sa po'yo ajja. Jjamimicuiajea nobiajeaquiani. Jamaya poanijo miquianaya Jesusaja epeeji quea ja'a pojjeama. Ojaya epeeji pojjeama jama poani, de. <sup>4</sup> E'e, miquianaya aje oe jama poani ba'a: —Eya ca iña Pabo shajja'ajjajji poani.

Beca ca jama poani ba'a: —Eya ca ca Apono shajja'ajjajji.

Jamaya poanijo Jesusaja epeeji quea ja'a nee jama jjashahuabaqui ajja miquianaya, de.

#### *Ecuana Apono nijje Jesosaa huoojea ca'yonaje ojaya esohui huohuijji epojji*

<sup>5</sup> Eya, Pabo Apono jayojja Jesusaja esohui huohuijji. Ohuaya ecua huoojea ca'yonaje ojaya esohui huohuiya. Jamajjeya miquianaya Jesosa nijje jjapeequi'yonaje ecuanaja esohui shajja'ajja majje. E'e, Eyacuiñajjiya ojjaña ecua chaco mee cani. Ojaya esohui jama poani eya. Ojaya esohui jayojja jama acani Aponohua pea'ai. <sup>6</sup> Eyaya Eyacuiñajjija esohui huohui coonaje miquiana huasijje. Aponohua ma esohui huohui ca o'oyanaje. Eyacuiñajjiya ca ca oe miquianaya ojaya esohui ba meesahua ca'yonaje. E'e, jiquio ecua acui sisi banajjiya bana cani jayojja jama eyaya, Pabohua Eyacuiñajjija esohui huohui coonaje miquiana huasijje. Echacojjiya acui sisi ebana'yo enaa sha cani jayojja jama Aponohua esohui huohui ca o'oyanaje miquianajaya eshajja'ajjajji. <sup>7</sup> Esohui huohui coojjiya, esohui huohui o'oyajjiya pea'aiya ishoa'ajja cani esohui huohui majje. Eyacuiñajjiya ohuaye nei ojaya esohui ba meesahua cani. E'e, jiquio ecua acui sisi banajjiya, acui sisi shajjiya pea'ai chaco majje ishoa'ajja cani a'a acui tiije'yo ebajji jayojja jama Eyacuiñajjiya ohuaye nei acui sisi jayojja tii mee cani. <sup>8</sup> Ebanajji epo acui sisi shajji jayojja jama jjashahuabaquiani jama ba'a: —Eya quea pame nee chaco majje, e'acui yiye meseya eya sosequia caje —jjashahuabaquiani cuana.

E'e jojo nei e'acui yiye meseya jamaya acaje'yo. <sup>9</sup> Miquianaya Eyacuiñajjija acui yiye jayojja. E'acui yiye mese jamaa Eyacuiñajjiya miquianaya quea pame nee jaahuana cani. Jiquio ecua acui yiye chacojji jamaya ecuanaya Apono nijje Eyacuiñajjija echacojji poani; miquiana que ojaya esohui huohuiaña.

#### *Jesosaja epeeji cuana Eyacuiñajjija equi jayojja*

Jiquio ecua e'equi meseya oja equi jaahuana cani jayojja jama Eyacuiñajjiya miquianaya jaahuana cani, ojjaña. <sup>10</sup> Eyacuiñajjiya Jesosa Quito equi yamajjana quea ca'a nee jayojja jama nequi mee cani. Ecuana Apono nijje Eyacuiñajjija equi iyajji

jayojja jama poani. Jiquio ecua echacojjiya equi iya cani eyamajjana nequia majje equi e'oquejji pojjeama jayojja jama ecuanaaya Jesosaja esohui huohuiaña, miqúanaya nahueaña pea'ai Jesosa nijje ejjapeequi meesahuajji, quea nee nee epojji pojjeama cuaquijo. Eyacuiñajjiya eya huoojea majje quea ca'a po mee canaje ojaya esohui pea cuana huasijje ehuohui coojji. Jamajjeya eya equi yamajjana nequijji jayojja poanaje. Jjeya pea cuaa miqúanaya esohui huohui cani e chamajo. Oya equi iyajeyojji jayojja jama poani. ¡Miquiana quea ja'a nee nee casohuihuohui cahua!

<sup>11</sup> Yahuaje Eyacuiñajjiya Jesosa Quito jiquio meshi cuana huasijje huoojea majje eseya huohui canaje jama ba'a: —¡A'a pea nijje jjapeequijji! ¡Ecuea Ebacua Ejja oe neija esohui shajja'ajjacue! —acanaje.

Equi iyajjiya eyamajjana quea ca'a nequia cani jayojja jama equi nequi tiitii mee'yojji jayojja jama Eyacuiñajjiya oja Bacua oe nei huoojea canaje ese ba'e tiitii meeya. ¡Oya oe shajja'ajjacue! <sup>12</sup> E'e, esohui huohuijji cuana equi iyajji jayojja. Beca equi iyajjiya equi quea ca'a nee iya cani. Iya cani mei hu'o, mei oshe quea siyo, mei copo quea siyo nee nee pojja'a. Pea cuaa equi iya cani ca'a'ama; acui equi, bequiobo ña, huenihueni equi pojja'a. Jamaya esohui huohuijji quea hueaa acani. <sup>13</sup> Quijje cuaqui poeyajo, equi quiyo'yajo, ojjaña ba caje ache equi iyajji quea pameya equi quea ca'a nee iya canaje, ache equi iyajji quea hueaa equi ca'a'ama iya canaje pea'ai. Oya jayojjaya Jesosa Quitohua poe o'oya majje huohui caje jama ba'a: —Ma esohui huohuijji quea pameya esohui e'e nei huohui canaje. Jamajjeya o shajja'ajjajji cuana enijje jjapeequi pajea jjima acaje. Maya esohui huohuijji quea huea poanaje; quea tai esohui huohui canajejo, o shajja'ajjajji cuana enijje jjapeequi pajea'yonaje.

<sup>14</sup> Jiquio ecua cuaqui poeyajo, equi iyajji quea ja'aja equi nequije quea ca'a jayojja jama Jesosa poe o'oyajo, esohui huohuijji quea ja'a nee Eyacuiñajjiya sosequia caje quea pame nee, oja chaco quea pame sosejje. <sup>15</sup> Equi iyajji quea hueaja ca ca oja equi quiyo jeyojeyo'yo cuaqui poe'yajo jayojja jama poaje esohui huohuijji quea huea, Jesosa poe o'oyajo. Eyacuiñajjiya oya cuana esosequijji pojjeama. Jamatii equi jiji'yajo dejja cuayajeaquinanani equiyo'yo poajejje jayojja jama oya cuana cuaquijo quiyo'yo ajja poaje'yo, beshahua nei.

*Miquianaaya Eyacuiñajjiya equi ja'a quea mimishi ajji!*

<sup>16</sup> Ecuea epeejji cuana Conitojo ba'e, ja'a pajea'yojji eseya Eyacuiñajjiya equi jayojja! Edojjoshahua Pame nei ese que dobiquinaje Jesosaja epeejji poanajo. Oya miquiana nijje anijo, miqúanaya Eyacuiñajjiya equi jayojja poanaje. <sup>17</sup> Eyacuiñajjiya ojaya equi quea nahue nee: —Ecuea equi quea pame nee, jehue'ama. Miquianaya ecuea equi jayojja poanaje. Jamajjeya ecuea equi, miquea eyami, nahue ajjajo, quea mimishi poanajo eyaya miqúanaya tecueaje —ohuaya acanaje.

*¡Eyacuiñajjiya ejjashahuabaquijji quea ja'a bacue, dejjaja pojjeama!*

<sup>18</sup> Ecuea epeejji cuana, ja'a quea jjashahuabaqui quehua pojji! Miquianaya beca cuana jama poani ba'a: —Ecuana quea jjashahuabaqui ja'a poani, dejja ojjaña ba epo jayojja jama poani.

Chojja. ¡Jjashahuabaquicue jama ba'a: —Eyacuiñajji, ecuea eba oe pojji nei. ¡Eya ba meesahuacue miquea ejjashahuabaquijji quea ja'a nee! —jamaya oya acue!

<sup>19</sup> Jesosaja epeejji pojjeama quea huiso jamaya jjashahuabaquiani ba'a: —Ojjaña ecuanaja eba quea ja'a nee nee.

Eyacuiñajjiya ca ca onajaya ejjashahuabaquijji jama poani ba'a: —Oya cuana quea quehua jjashahuabaquiani, quea ja'a pojjeama, cajaa —oya poani.

E'e, Eyacuiñajjiya esohui etehue'yo yahuaje nei jama poa ba'a: “Quea huiso jiquio meshi cuanajo ba'e jjashahuaba taiquiani jama ba'a: —Ecuana ejjashahuabaquijji quea ja'a nee poani —poso oya poani. Chojja, oya cuana jjadasiaquijji poanajo, eyaya oya jjadasiaqui pajea meeje'yo”. Jamaya aca poa Eyacuiñajjiya oja sohui etehue'yojo.

<sup>20</sup> Eyacuiñajjija pea esohui yahuajo nei etehue'yo jama poa ba'a: “Eya oe nei quea jjashahuabaqui ja'a; jjadasia meequi ajja pea'ai. Dejja cuana chojja, ojjaña ejjashahuabaquijji quea ja'a pojjeama”.  
Jamaya yahuajo nei nei tehue mee ca poa.

<sup>21</sup> Jamajjeya ja'a jama pojji ba'a: —Ma esohui huohuijji ejjashahuabaquijji quea ja'a nee. Oya cajjashahuabaquiahua —a'a pojji!

¡Bacue! Jesosa Quito miquea Emeshe Mese nei. Ohuaya ojjaña esohui huohuijji huoojea canaje miquiana onijje jjapeequi meesahuaa. ¡Jamajjeya shajja'ajjacue! <sup>22</sup> E'e, Eyacuiñajjiya ojaya esohui huohuijji huoojea canaje miquiana huasijje. Ohuaya eya, Pabo ebionei huoojea canaje. Apono, Peno pea'ai huoojea canaje. Ohuaya ojjaña aquiana pana ca poa miquianajaya quea pame nee ejaahuanajji. Miya eshe ani ohuaya jaahuana cani; mano'yajo pea'ai jaahuana caje'yo quea pame nee. Ohuaya jjeyahua nei miquianaya jaahuana cani. Quijje nei miquianaya jaahuana caje'yo tii tii pea'ai, Eyacuiñajjiya. E'e, Jesosaja epeeji poanijo miquianaya e'aquiana mese jayojja jama poani. <sup>23</sup> Eyacuiñajji Jesosa Quitoja Chii. Miquianaya Jesosa Quitoja epeeji cuana. Jamajjeya ojjaña Eyacuiñajjiya aquiana quea pame nee miquianajaya poani.

## 4

*¡A'a Jesosaja huoojea'yo esohui huohuijji niñebajji!*

<sup>1</sup> ¡Epeeji cuana, ecua shajja'ajjacue! Eyacuiñajjiya ecua huoojea ca'yonaje esohui e'e nei Jesosa Quitoja huohuiya, ma yahuajo nei onajaya ba mee jjima poa. <sup>2</sup> ¡Bacue! jiquio ecua echacojjiya o huoojeajji shajja'ajja cani jayojja jama ecuaaya añ. Jamajjeya ohua huoojea cajje ecuaaya Eyacuiñajjiya esohui huohuiaña, onajaya esohui pojjeama. Esohui quea pame nee Jesosa Quitoja ehuohui paje'yojji pojjeama. <sup>3</sup> Jamajjeya ecua miquianaya eshajja'ajjajji pojjeama ejo jama poani ba'a: —Pabohua quea ja'a nee huohui cani —poani—. Pabohua quea ja'a pojjeama huohui cani —miquiaa ajje, eyaya eshajja'ajjajji pojjeama pea'ai. Onaa jama ejo huohui cajje pea'ai eyaya eshajja'ajja'yojji pojjeama.

Eya pea'ai ecue huohuijji jjashahuabaqui ajja jama ba'a: —E'e pojja'a ecua ehuohui quea ja'a nee; e'e pojja'a quea ja'a pishana —jamaya eya jjashahuabaqui ajja pea'ai.

<sup>4</sup> E'e, eya jjashahuabaquiani jama ba'a: —Eyaya Jesosa Quitoja chacoaña quea pame nee.

E'e pojja'a. Eyacuiñajjiya ojaya ejjashahuabaquijji ejo, eya chacoaña cahuohui cahua quijje. <sup>5</sup> Jamajjeya ecuanaja ejjashahuabaquijji, ojjaña ecuaaya anaje pea'ai miquianajaya ba jjimajo, ja'a ecuanaya niñebajji! ¡Ishoa socue oe Jesosa Quitoja epoe o'oyajji! Majoya ohuaya, esejaya Emeshi Mese neiya ojjaña cuanaja ejjashahuabaquijji, ojjaña quehuajje acanaje pea'ai ba mee caje. Ojjaña shajja'ajja caje. Majoya eseya quea pame nee anajejo, Eyacuiñajji quea bhui nee poaje: —E'e, jamaya. Miya Jesosaja epeeji quea ja'a nee; quea pame nee ojo chaconaje —eseya acaje ohuaya.

*¡Esohui huohuijji cuana pea jayojjaya quea jea ameya acue!*

<sup>6</sup> E'e epeeji cuana, miquiana jjabahuejjaqui meeji eyaya tehueña Aponojo, ejo pea'ai. Eyacuiñajjiya esohui jama poa ba'a: “¡Oe epeeji quea boti, pea epeeji boti'ama a'a ajji!” Jamaya esohui etehue'yo poa.

Jamajjeya ja'a jama ajji ba'a: —Aponohua quea pame nee acani; Pabohua ca ca quea pame pishana acani —a'a pojji!

¡Ojjaña Jesosaja esohui huohuijji pea jayojjaya oe acue! Jamajjeya miquianaaya ma esohui etehue'yo jayojja jama e'e jojo nei aje. <sup>7</sup> E'e, Eyacuiñajjiya ojjaña Jesosaja epeeji pea jayojjaya ba cani. Ohuaya oe epeeji pea epeeji jayojjaya acani. Jamajjeya ja'a jjashahuabaquijji jama ba'a: —Eya ca iña quea pame nee. Pea cuana quea pame pishana —a'a jamaya jjashahuabaquijji!

Miquianaya ca mi ca oe Eyacuiñajjiya esohui jamatii ba epo poso poani. Chojja, ojaya esohui miquianajaya ebajji pojjeama jamatii. Eyacuiñajjiya esohui huohuijji miquiana

huasijje esohui huohui mee majamaja canaje. <sup>8</sup> Miquianaya ca mi ca oe jama poso jjabaquiani ba'a: —Ecuana ca ca oe Jesusaja esohui jayojja jama ba'yani quea pame nee — poso jjabaquiani quiana—. Quea huiso ecuanajaya eba —nequiana poani pea'ai—. Ecuana ca ca ona huoojea'yoyji poani Eyacuiñajji nijje. Pabo chojja, ona huoojeajji pojjeama — jamaya poso poani miquianaya.

Miquianaya Eyacuiñajji nijje ona huoojea'yoyji e'e jojo nei jojjemo miquianajo eya quea bihui nee pome. Jamaya e'e jojo nei jojjemo ecuana miquiana nijje ona huoojea'yoyji pome pea'ai.

*¡Jjashahuabaquicue ecuana quea nee poanaje miquiana sohui huohuijji!*

<sup>9</sup> Eyacuiñajjiya ecuana huoojea canaje ojaya esohui huohuiya. Jamatii ojaya eba ecuana shajja'ajja majje ojjaña soadojo cani jama ba'a: —¿Apiojji shai oya cuana shajja'ajjaje so'o, de? ¡Cua'a, oya cuana quecuajeacue! Ojjaña oya cuana quea tai — jamaya onaya sijje poani.

Ecuana ca ca jjashahuabaquiani jama ba'a: —E'e de, ojjaña meshijo ba'eca cuaa ecuana soadojo cani, ojjaña eyajo aniya pea'ai.

<sup>10</sup> E'e, Jesosa nijje jjapeequianijo, Jesusaja epeeji pojjeama cuaa ecuana niñepoqui poso acani. Miquianaya ca ca ojjaña ba epo poso acani cuaa. Jesusaja epeeji pojjeama cuaa ecuana ona huoojea'yoyji jayojja jama pojjeama poso acani. Miquianaya ca ca ona huoojea'yoyji jayojja jama acani. Onaaya ecuana shajja'ajja jjima acani. Jamatii miquianaya shajja'ajja cani. <sup>11</sup> E'e, jjeyahua nei ecuana Jesosa Quitojo mimianijo quea nee poani; ojjaña pojjaajo quea shoe poani. Quea naba taja poani. Daqui chiichiiani ecuanaja. Pea cuaa ecuana cuia cani Jesosa nijje jjapeequianijo. Ecuana poqui majamajani ojjaña cuiñajji yasijje quima' jayojja ecuana. <sup>12</sup> E'e, ecuaaya bobijo janobajjima nei chacoaña. Pea cuana mimijajiyajo, ecuaaya mimisaja'a jjima año. Jama poani ba'a: —Eyacuiñajjiya miquianaya cajaanhuana cahua —ecuaaya dejja quea tecue año.

Jesosa nijje jjapeequianijo, pea cuaa ecuana napa cani. Jamatii quea quene po ajja. Jesosa nijje jjapeequi pajea'yo ajja pea'ai. <sup>13</sup> Pea cuaa niñeba cajje ecuaaya esohui quea beiya saja'año. Jjeya pea'ai pea cuana ecuanajo quea tai mimiani jama ba'a: —Oya cuana Jesusaja epeeji cuana, cajaa. Shabo jama, caquishijehua —poani.

*¡E jayojja jama pocue Jesosa nijje jjapeequianijo! —Pabohua aca poa*

<sup>14</sup> Ecuea epeeji cuana, eyaya jiquio esohui tehueaña miquiana quea yeno po meejji pojjeama. Miquianaya ecuea ebacua jayojja jama poanijo, jjabahuejjaqui mee sa año.

<sup>15</sup> Esohui quea pame nee Jesosa Quitoja eyaya huohuinaje miquiana huasijje. Ecuea esohuijo miquianaya ojaya epeeji poanaje. Jamajjeya eya oe nei mique chii jayojja jama poanaje. E'e pojja'a Jesosa Quitoja sohuihuohuijji quea huiso nee poeje miquiana sohuihuohuiya. Sico meeme ajja pojja'a, quea huiso nee nee. Jamatii eyaya ebonei miquiana huasijje esohui huohuinajejo miquianajaya chii jayojja poanaje. <sup>16</sup> ¡Jamajjeya ecuea esohui shajja'ajja socue! ¡E jayojja jama pocue!

<sup>17</sup> Jamajjeya eyaya Jesusaja epeeji Timoteo huoojeaje miquiana quea pame ba'e meesahuaa. Timoteo ecuea quea jea nee, Jesusaja epeeji quea ja'a nee poani. Ecuea eba'ejjijo, ecuea esohui Jesosa Quitojo pea'ai ohuaya huohui caje o'oya miquianajaya epajea'yoyji pojjeama, ma eyaya ojjaña Jesusaja epeeji cuana ojjaña cuiñajjijo ba'e yasijje huohuíaño. <sup>18</sup> Miquianaya beca cuana shajjama' poani ojjaña miquea eba poso poanijo. Ecuea esohui shajja'ajja sa po'yo ajja. Jjashahuabaquiani jama ba'a: —Pabo poe ajja ecuana baa —poani.

<sup>19</sup> E'e pojja'a Eyacuiñajjiya eya huoojea caje'yo Conito huasijje, miquiana huasijje quijje pishana. Shajjama' cuanaja esohui shajja'ajja maja sa po ajja eya. ¿A'a oya cuana Jesosa nijje jjapeequiani e'e jojo nei? ¿A'a Eyacuiñajjiya oya cuana ojaya esohui huohui meesahua cani quea ja'a nee? Maya eyaya ba sa año. <sup>20</sup> E'e, quea huiso esohui mimi majamaja majje e'e pojja'a jamatii Jesusaja epeeji pojjeama pojja'a nequiana. Jesosa nijje quea pame nee jjapeequianijo ca ca Eyacuiñajjiya eseya ba'e tiitii mee caje'yo onijje eyajo.

<sup>21</sup> E'e, eya poeje'yo miqiana baa. Shajjama' poani tii, tecueajeaje'yo. Ecuea etehue'yo jayojja jama poanijo, eya quea bihui nee, quea bei nee poaje. Jamajjeya ꞑecuea esohui shajja'ajjacue, eya miqiana nijje quea bei epojji!

## 5

*¡Jesosaja epeeji quea mimishi poani beibeiya tecueacue!*

<sup>1</sup> Jesosaja epeeji Conitojo ba'eya eya huohui cañanaje jama ba'a: —Pabo, oe dejjaa Conitojo ba'eya oja shanase cojjo cani, Jesosaja epeejiya, de —acanaje.

Jamaya quea tai nee nee. Eyacuiñajjiya boti'ama nei nei. Jesosaja epeeji pojjeama jama po ajja, quea mete oya cuana. <sup>2</sup> Jamatii miqianaya aje oe bicho'ama jjejojo jama poani ba'a: —Ecuana quea pame nee ba'e —nisho poani.

¡Oe epeeji quea mimishi nee poanijo, quea yeno pocue! Ma dejja oja mimishijo yeno'ama po jjimajo, ¡a'a onijje jjapeequijji! ¡Jesosaja epeeji cuana nijje a'a dobiqumi meeji!

—¡A'a ecua na nijje Eyacuiñajjiya equi yasijje dobiqumi! Eyacuiñajjiya miya eshajja'aj-jajji pojjeama —oya acue.

<sup>3</sup> Eya quea huesha nee yani; miqiana nijje nequi meeme ajja. Jamatii miqianajo jjashahuaba majamajaquiani tii. ¡Eya Jesosaja epeeji etii ojaya ehoojea'yo poanijo, shajja'ajjacue mo! Ecuea ejjashahuabaquijji ma dejja quea mimishijo jama ba'a: —Oya quea mimishi poanijo, ¡quea bicho nee po meecue! —eyaya miqiana nijje nequiya jjemo jamaya huohuime.

<sup>4</sup> Jamajjeya miqianaya Eyacuiñajjiya equi yasijje ojee poe majje, Jesosa Quito esejaya Emeshi Mese nei miqiana nijje anije, miqiana quea jjashahuabaqui ja'a po meeji ojaya esohui jayojja jama ameesahua caje. Eya pea'ai miqiana nijje jjashahuabaquianijo miqiana nijje nequi jayojja poaje. <sup>5</sup> Jamajjeya ojee poe majje ¡ma dejja mimishi tecueacue jama ba'a: —¡Edosiquiana mi huoojeaji poaniya miya canapa cahua! —jamaya acue oja mimishijo quea yeno epojji!

Quea yeno po majje oja mimishi pajea caje'yo. Manoje'yo pojja'a. Jamatii esejaya Emeshi Mese neiya Jesosaa poe o'oya majje ma dejja huoojea ajja cuaqui yasijje, ca ohua mimishi pajea ca'yajo.

<sup>6</sup> Dejja quea mimishi miqiana nijje jjapeequianijo, jamatii miqianaya bicho'ama poanaje. Jamaya quea tai. Miqianajaya eba jiquio esohui jama ba'a: “Oe pojji neiya pahui shejjeemeejiya ñahuahua caje pahui shejee mee cani” jamaya onaaya huohui cani. <sup>7</sup> E'e, mimishi eshejjeemeeji jayojja jama poani. Oe dejja quea mimishi minijje ojee jjapeequianiya ojjaña quea mimishi po mee caje o jayojjaya. ¡Mimishi cajaa acue, ojjaña! Jamajjeya miqianaya quea mimishi po ajja, pahui eshejjeemeejjima' jayojja poaje. E'e, yahuaajo nei Jodio cuaa Ejito meshijo nequiya ñajjajja cuia ca'ya poa ebacua cuana emano'yojji pojjeamajo jama jayojjaya Eyacuiñajjiya Jesosa Quito esejo mano mee ca'yonaje eseya onijje eba'e tiitii'yojji. <sup>8</sup> E'e, Jodio cuana pahui eshejjeemeejjima' ojee ijia cani Eyacuiñajjiya etiiquianaja ebacua cuana mano mee'yo jjima aca poa shahuaba'y-ojji. Jamaya jayojja Jesosa esejo mano'yonajejo, eseya caba'yahua mimishi'ama e'e jojo nei. E'e, jamaya ba'yanijo Jesosa eseja mimishijo mano'yonaje esejaya epajea'yojji pojjeama. Jamajjeya jiquio ecua Jodio cuaa ñajjajja cuia'yo majje ojee ijia cani jayojja, etiiquianaja bacua cuana mano mee'yo jjima aca poa shahuaba'yojji jayojja jama eseyaya aña Jesosajo.

<sup>9</sup> Yahuaajo pishana eyaya miqiana huasijje pea esohui etehue'yo huoojeanaje. Ma etehue'yojo eyaya jama huohuinaje ba'a: —¡Jesosaja epeeji quea mimishi nee poani nijje a'a jjapeequijji! ¡Joya pea cojjoji nijje a'a jjapeequijji! ¡Ona napajji nijje, quea mimishi jjashahuabaquiani nijje pea'ai a'a jjapeequijji! —eyaya miqiana huasijje tehuenaje.

<sup>10</sup> Eyaya jamaya tehuenaje Jesosaja epeeji quea mimishijo. Jesosaja epeeji pojjeamajo jamaya tehue jjima. E'e, mimishi cuana quea huiso nee yani: Quea nahue poani, sii poani, eshahua nijje mimiani pea'ai. Jamajjeya dejja mimishi pejejo ba'e sa po'yo ajjajo

jiquio meshijo ba'e meemee ajja. ¿Achejo dejja mimishi chama' huasijje eba'ejji? <sup>11</sup> Beca cuana ca ca jama po nishoani ba'a: —Epeejji cuana, eya Jesusaja epeejji pea'ai —poani. Jamatii oya cuana aje oe quea mimishi poani: Pea cojjojji poani, quea dejja tai, quea nishohui poani, quea mimijjequijea poani, meshi epana bihuia cani, ishi'ishiani, sii poani, shajjama' poani pea'ai. ¡Jesusaja epeejji jama poajo, onijje a'a jjapeequijji, a'a anioquejji e'ijjia'ijjiajji!

<sup>12</sup> Eyacuiñajjiya eya huoojea jjima Jesusaja epeejji pojjeama tecueaa jama ba'a: — ¡Miquianaya quea ja'a pojjeama ba'yanijo quea nee nee poaje!

¡Eyacuiñajjiya ca ca oya cuana catecueajea cahua! Ohuaya ecua huoojea canaje Jesusaja epeejji quea mimishi cuana jjabahuejjaqui meeya. <sup>13</sup> Jamajjeya Jesusaja epeejji miquiana nijje nequi quea mimishi poajo, ¡niñeshe'acue: —Miya quea ja'a pojjeama poani —oya acue!

Jamajjeya ¡Eyacuiñajjiya esohui yahuajo tehue'yo jayojja jama acue! Yahuajo nei nei jama poa ba'a:

“Ecuea epeejji quea mimishi poanijo, ¡a'a miquiana nijje nequi meejji, ecuea epeejji cuana nijje! ¡Huoojeacuayajea'yocue esecue yasijje!”

Jamaya yahuajo nei Eyacuiñajjiya esohui etehue'yo poa.

## 6

### *¡A'a epeejji cuana dojojji dejja etii yasijje ca Jesusaja epeejji pojjeama huasijje!*

<sup>1</sup> Miquianaya Jesusaja epeejji poanijo ecuea huapa pojjeama cuana poani. Jamajjeya Jesusaja epeejji nijje quea quene po majje Jesusaja epeejji pojjeama huasijje dejja etii yasijje ¡a'a oya dojojji ojaya ejjashahuabaquijji baa! Chojja. ¡Jesusaja epeejji etii yasijje poquicue! Eyacuiñajjiya ojaya epeejji etii huohui meesahua caje quea ja'a nee ojjaña quea bei epo meejji. <sup>2</sup> E'e, eseya Jesusaja epeejji cuana quijje onijje ona huoojeajji poaje. Jamajjeya ¡jeyahua nei ojjaña ojaya epeejji cuana quea bei po meesahuacue pea epeejji cuana nijje! ¡O huoojea'yojji nei jayojja jama oya cuana quea pame nee ameesahuacue! <sup>3</sup> E'e, Jesosa poe o'oyajo, eseya esohuidojojji eyajo nequi huoojea'yojji poaje'yo onijje pea'ai. Jamajjeya jiquio meshijo nequiya ¡Jesusaja epeejji pea cuana nijje jjamimicuiajea nobiajeaquiani quea bei po meecue! ¡Oya cuana shajja'ajja majje quea ja'a nee huohucue! <sup>4</sup> Jamajjeya Jesusaja epeejji nijje jjamimicuiajea nobiajeaqui majje ¡a'a poquijji dejja etii yasijje, Jesusaja epeejji pojjeama huasijje miquiana quea bei epo meejji! <sup>5</sup> Jamaya poanijo miquianajaya ejjashahuabaquijji quea tai poani. Jamajjeya miquianaya jjamimicuiajea nobiajeaqui majje ¡Jesusaja epeejji etii iyaacue! Ohuaya miquianaya quea bei po mee caje pea epeejji nijje. <sup>6</sup> Jamajjeya Jesusaja epeejji nijje mimijaji majje ¡a'a jja oe oya dojojji Jesusaja epeejji pojjeama huasijje ojaya ejjashahuabaquijji huohui meeya! Jamatii miquianaaya ca ca quea tai aña.

<sup>7</sup> E'e, miquianaya ca mi ca oe Jesusaja epeejji pojjeama jayojja jama poani. Jesusaja epeejji nijje jjamimicuiajea nobiajeaqui majje oya dojoaña Jesusaja epeejji pojjeama huasijje. ¡A'a jja oe jamaya pojji! Chojja, miquianajaya epeejji minijje quea tai poajo, jamatii ¡a'a jjamimicuiajea nobiajeaquiijji! ¿Yajjajo acuae jjaya jamatii mi sii mee'ajjaña?

<sup>8</sup> Miquianaaya ca ca oe Jesusaja epeejji cuana minijje nequi quea tai aña, oya cuana dasiaña, onajaya aquiana siyaña pea'ai, de. Jamaya quea tai. <sup>9</sup> ¡Jjashahuabaquicue oe! Miquianajaya eba mimishi cuana Eyacuiñajji nijje eba'ejji pojjeama eyajo ojaya cuiñajji eyacuajo. Eyacuiñajjiya esohui a'a pajea'yojji jama ba'a: “E'e jojo nei ojjaña quea mimishi poani pea nijje, ojjaña eshahua nijje mimiani, peaja ehuanase sii cani pea'ai, onaja yahue sii cani pea'ai, dejja cuana pea dejja nijje jjacojjoquiani, epona pea epona nijje yahue nisho poani pea'ai, <sup>10</sup> siipojji cuana pea'ai, quea dejja tai poani pea'ai, ehoo nei po huicha'a huicha'ani pea'ai, pea siajje ajji poani pea'ai, shajjama' cuana pea'ai Eyacuiñajji nijje eba'ejji pojjeama eyajo ojaya cuiñajji eyacuajo”. <sup>11</sup> Jamaya yahuajo miquianaya poanaje Jesosa nijje jjapeequi jjimahua. Jjeya ca ca esejaya Emeshi



Mese neiya, Jesosa Quitohua miquianajaya mimishi cuijea ca'yajje quea boejea po mee ca'yonaje. Jamajjeya miquianaya jjeya ba'yani Eyacuiñajji. E'e, Jesosa Quito esejaya Emeshi Mese nei miquianajaya mimishi cuanajo mano'yonaje. Miquianaya quea boejea po mee ca'yonaje. Jamajjeya Eyacuiñajjiya miquianaya ba cani mimishi'ama. Edojjoshahua Pameya miquianaya Eyacuiñajjiya esohui jayojja jama ba'e meesahua cani pea'ai. Jamajjeya ¡ojjaña Jesosaja epeeji cuana nijje quea bei, quea pame nee ba'ecue! ¡Mimishi'ama pocue!

*¡Eyacuiñajji chacocue quea pame nee!*

<sup>12</sup> Epeeji cuana, miquianaaya eya huohui'ajjanaje esohui etehue'yojo jama ba'a: —Eya ca ca Jesosaja epeeji. Jamajjeya eyaya ojjaña añña mete'amaa jjejojo, ma Jesosaja epeeji pojjeama cuaa acani —jamaya miquianaya poani quea quehua jjashahuabaquianijo.

Eya ca ca jama poani ba'a: —Pea cuana jayojja jama ba'e majje miquianaya quea pame pojjeama poaje —eya poani. E'e pojja'a eya mimije jama ba'a: —Ojjaña pea cuana jayojja jama eyaya aje —poaje.

Jamatii eya jamaya emimiji pojjeama. Chojja, jama po majje quijje eyaya jamaya apajea'yo jjima aje. E'e, jiquio ecua echacoyiya o chacomeejjija esohui apajea meemee ajja jayojja jama quijje eyaya maya apajea'yo jjima aje.

<sup>13</sup> Bobi ijja majje see ai yasijje dobiqiani. Bobi chamajo see ai quea nee poaje. Jamatii quijje eyajo ba'e'yo majje eseya bobi ijja pajeaje'yo. Quea shoe pojjeama poaje'yo. Jamaya Eyacuiñajjiya acaje'yo. Jamajjeya ¡a'a jjashahuaba tiitiquijji bobijo quea jeje nee epojji! Jama jjashahuabaquime pocue ba'a: —Eya Eyacuiñajjiya equi jayojja. Oya ecuea eyamijo ba'yani. Eya quea jeje jayojja po mee cani.

E'e, Emeshi Mese neiya, Eyacuiñajjiya ecuea eyami quea pame nee pana ca poa. Jaahuana cani quea pame nee pea'ai oja equi jayojja epojji. Ohuaya ecua pana ca poa quea mimishi nee pea nijje epojji pojjeama; onajaya ehuanase, yahue pojja'a esijji pojjeama pea'ai. <sup>14</sup> Jamajjeya esejaya Emeshi Mese nei Jesosa Quito mano'yajo, Eyacuiñajjiya oya shequi mee ca o'oyanaje. Jamaya ohuaya eseya ba'e mee caje o'oya pea'ai. Quea ca'a nee nee poaniya jjejojo ojjaña acaje'yo ohuaya.

<sup>15</sup> Jesosa Quitoja epeeji poanijo ojjaña eseya ojaya eyami jayojja jama poani. Jamaya miquianajaya eba. Jamajjeya ¡pea cojjoji nijje a'a jaajji! Chojja. Jamaya poajo Eyacuiñajji miquiana nijje quea tecue nee nee poaje. <sup>16</sup> E'e, dejja epona quea mimishi nijje jaa majje oya cuana oe yamime jayojja poani. Jamaya Eyacuiñajjiya oya cuana ba cani. Miquea eba Eyacuiñajjiya esohui etehue'yo jama ba'a: “Dejja epona nijje jaa majje oya cuana oe yamime jayojja poani”. <sup>17</sup> Emeshi Mese nei Jesosa nijje jjapeequi majje ca ca eseya o jayojjaya jama jjashahuabaquime poani pea'ai.

<sup>18</sup> Jamajjeya eyaya miquianaya huohuiaña jama ba'a: Dejja cuana, ¡epona miquea ehuanase pojjeama nijje a'a jaajji! Epona cuana, ¡a'a pea dejja nijje jaajji! ¡Jiñayii acue! Quea mimishi po majje miquea eyami nei quea tai poaje. ¡Ojjaña mimishi cuana a'a ajji pea'ai! <sup>19</sup> ¡Bacue! Miquea eyami Edojjoshahua Pameja equi jayojja jama poani. Oya mique yami dojjo huasijje nequidobiqui'yonaje. E'e, Eyacuiñajji mi huoojeajji poani. Ohuaya huoojea ca'yonaje Edojjoshahua Pame miquiana que dobiquiya. <sup>20</sup> Oya mi mesenajji epo. E'e, Jesosa Quito mano'yonaje miquianaja mimishi cuijea'yojji sosejje. Jamajjeya ¡ojaya esohui jayojja jama ba'ecue! Miquianaya jama ba'yajo, pea cuaa mi ba majje Eyacuiñajji bihuia caje jama ba'a: —Eyacuiñajji quea ca'a nee nee. Ojaya epeeji quea pame nee ba'e meesahua cani —poaje.

## 7

*¿A'a shacuima' nequi cuana cajjahuanaquiahua?*

<sup>1</sup> Yahujajo pishana miquianaaya esohui tehuenaje ecuea ebajji. Ma esohui etehue'yojo eya miquiaaya huohui'ajjanaje jama ba'a: —¿A'a shacuima' nequi cajjahuanaquiahua? ¿A'a jamatii canequiahua pojja'a? —huohui'ajjame miquianaaya eya anaje.

Jamajjeya jjeya eyaya miquianaya saja'aña. E'e, shacuima' nequi eshacui sa po'yo ajjajje ca jamatii canequiahua. Jamaya quea pame. <sup>2</sup> Jamatii quea huiso shacuima' nequiya epona cuana jea ba cani, onaja huanase sii cani. Epona ahuema'ani jamaya quea mimishi poani pea'ai. Jamajjeya cajjahuanahuahua, cajjahueahuahua pea'ai, ojjaña. Jamaya quea pame nee.

<sup>3</sup> Yahue cuaa, ¡miquea ehuanase quea bihui nee po meecue! ¡Jaahuanacue quea pame nee pea'ai! Ehuanase cuaa, ¡miquea yahue quea bihui nee po meecue! ¡Onijje tii jaacue! <sup>4</sup> ¡Mique yahueya huohui cani jayojja jama pocue onijje jaanijo! Yahue, ¡miquea ehuanase nijje jaanijo ohua sa cani jayojja jama acue! <sup>5</sup> E'e pojja'a yahue, ehuanase pea'ai mimi sa poani Eyacuiñajji nijje beca cahuime. Eyacuiñajji nijje mimianijo yahue ojaya ehuanase nijje jaa sa po ajja pojja'a. Jamaya quea pame, ca ehuanase yeno'ama poanijo. Beca cahui cuana Eyacuiñajji nijje mimi majje ¡yahue oja ehuanase nijje cajjacojjoqui o'oyahua! Jamajjeya ehuanase yeno'ama, yahue pea'ai yeno'ama poaje. Quea yeno poajo, eshahuaa oya cuana quea mimishi jjashahuabaqui mee ca chana' pea cojjojji epojji. E'e, yahue, epona pea'ai ca'a'ama.

<sup>6-7</sup> Ecuea epeeji cuana, jiquio esohui etehue'yo ecuea ejjashahuabaquiji jama ba'a: Eya ca ca shacuima' nequi. Ojjaña Jesusaja epeeji e jayojja jama shacuima' nequi, ahuema'ani pea'ai quea pame nee chaco majamajaje Jesosa Quitojo. Jamatii eyaya miquianaya jamaya epojji pojjeama huohuiaña. Eyacuiñajjiya beca cuana quea pame nee ba'e meesahua cani jamatii shacuima' nequi, ahuema'ani pea'ai. Pea cuana ca ca jamatii ani quea mimishi po chana'. Jamajjeya oya cuana cajjahuanahuahua, cajjahueahuahua pea'ai. ¡Eyacuiñajjiya ejjashahuabaquiji mijo ohua acani jayojja jama acue!

<sup>8</sup> Jamatii eya jjashahuabaquiani shacuima' nequijo, eshacuimanojo, ahuema'anijo, e'ahuemanojo pea'ai jama ba'a: Eya ee nei, shacuima' nequi. Miquianaya e jayojja jama mee nei nequi majje jama quea pame nee nee poaje. <sup>9</sup> Jamatii e'e pojja'a miquianaya beca cuana ehuanase chamajo mimishi'ama eba'ejji pojjeama. Jamajjeya ¡jjahuanahuahua! E'ahuemano cuana, miquiana ahuema'ani jayojja mimishi'ama eba'ejji pojjeama. Jamajjeya ¡jjahueahuahua! Jamaya quea pame. Miquianaya quea yeno mee nei ba'yanijo quea mimishi po chana'. Jamaya quea tai.

### *¡A'a Jesusaja epeeji cuana huei cajji?*

<sup>10</sup> Jjeyahua nei eyaya Eyacuiñajjiya esohui tehueje yahue cuana huasijje, ehuanase cuana huasijje pea'ai miquianajaya ebajji jama ba'a: Ehuanase cuana, ¡miquea yahue oe nei nijje ba'ecue! ¡A'a oya hueijji! <sup>11</sup> ¡Huei majje ca oe ahuema' ba'e tiitii'yocue! ¡E'e pojja'a miqueahue jjeshe o'oyacue! Jamaya quea pame nee. Yahue cuana, ¡oya jayojja a'a miquea ehuanase hueijji! ¡Jaahuana tiitii'cue! ¡Eyacuiñajjiya esohui jayojja jama acue!

<sup>12</sup> Jjeya ca ca eyaya pea esohui tehueje, ma Jesusaa tehue mee jjima, ecuea ejjashahuabaquiji tehueje pea cuana huasijje, Jesusaja epeeji cuana huasijje. Yahue cuana, e'e pojja'a miya Jesusaja epeeji poani, miquea ehuanase Jesusaja epeeji pojjeama. Jamatii miquea ehuanase minijje ba'e sa poanijo, ¡a'a oya hueijji! <sup>13</sup> Ehuanase cuana, e'e pojja'a miya Jesusaja epeeji poani, jamatii mique yahue Jesosa nijje jjepeequi jjima. Miqueahue minijje ba'e sa poanijo, ¡a'a oya hueijji! <sup>14</sup> Miya Jesusaja epeeji poanijo, miqueahue minijje ba'e sa poanijo, Eyacuiñajjiya oya quea pame acaje Jesusaja epeeji nijje ba'e sa poanijo. Yahue cuana, oya jayojja miquea ehuanase miquea huei jjima minijje ba'e sa poanijo, Eyacuiñajjiya oya quea pame acaje pea'ai miya Jesusaja epeeji poanijo. Oe yamime jayojja ohuaya micuana ba cani. Jamajjeya ohuaya miquianajaya ebacua cuana jaahuana caje pea'ai. Jesusaja epeeji pojjeamaja bacua cuana jama pojjeama oya cuana.

<sup>15</sup> ¡Jiquio esohui bacue pea'ai, epeeji cuana! Eyacuiñajjiya ojaya epeeji cuana quea bei ba'e mee sa acani. Jamajjeya miquea ehuanase Jesusaja epeeji pojjeama jjejojya minijje ba'e sa po'yo ajja po majje capoquiahua. E'e, Jesusaja epeeji pojjeama Jesusaja epeeji nijje ba'e sa po'yo ajja capoquiahua, epona, yahue pea'ai. Jamajjeya Jesusaja epeeji

e'ahuemano jayojja anije, eshacuimano jayojja jama nequije. <sup>16</sup> Jamajjeya ehuanase cuana, ¡miquea yahue nijje anicue, jamatii oya Jesusaja epeeji pojjeama! Oya Jesosa nijje jjapeequije pojja'a mi quea pame ba'yani ba majje. Yahue cuana, ¡miquea ehuanase Jesusaja epeeji pojjeama nijje ba'ecue! Jamajjeya oya Jesosa nijje jjapeequije pojja'a.

*¡Eyacuiñajjiya ejjashahuabaquijji jayojja jama ba'ecue!*

<sup>17</sup> Eyacuiñajjiya ojjaña miquianaya ojaya echacoji po mee cani. Oe epeeji pea epeeji jayojja jama chaco ajja. E'e, Eyacuiñajjiya miquianaya huoojea cani ojo chacohua. Peapea chaco meeme asahua cani. ¡Jamaya atiitiicue! Jamaya eyaya huohuaña ojjaña Jesusaja epeeji cuana ojjaña cuiñajji cuanajo ba'e yasijje. <sup>18</sup> Jamajjeya oe epeeji Jesosa nijje jjapeequianijo cuiishasha jehuissejjajea ca'ya poa, Jodio cuaa jjejojo. ¡Jamatii nequicue! Pea dejja cuiishasha ejhuissejjajea'yo pojjeama Jodio dejja pojjeama jjejojo. ¡Jamatii nequicue, cuiishasha jehuissejjajea jjima tii! <sup>19</sup> Jjeya nei Jesosa nijje jjapeequianijo, Eyacuiñajjiya eseya jama ajjima ba'a: —¡Cuiishasha jehuissejjajea meecue! —po ajja eseya jjeya.

—¡A'a cuiishasha jehuissejjajea meeji! —po ajja pea'ai jjeya.

Chojja. Jjeya Jesosa nijje jjapeequianijo, Eyacuiñajjiya eseya jama acani ba'a: —¡Ecuea esohui jayojja jama ba'ecue! —ohuaya eseya acani.

<sup>20</sup> Jamajjeya ¡miquianaya Jesosa nijje jjapeequi jeahuajo jayojja jama anicue quea pame nee! Jama ba'a: <sup>21</sup> Eyacuiñajjiya miquianaya iyaa canajejo, beca cuana echacoji sosema' poanaje. ¡Jamaya anicue yeno'ama! Jamatii miya miquea echaco meseja nahue'amajo, poqui sa po majje ¡poquicue, miquea yajjiyo chacoquicue! <sup>22</sup> Jamajjeya beca cuanaja echaco mese yanijo, ¡ojaya esohui jayojja jama cachaco cahua! Eseyaya Emeshi Mese nei Jesusaa oya cuana iyaa cajje ca ca oya echaco mesema' jayojja jama jjashahuabaquime poani. ¡Jesusaja ejjashahuabaquijji jayojja jama ca'a cahua! Oya jayojjaya pea cuaa echaco mesema' nequiya chaco cani ojaya yajjiyo. Jamatii Jesosa Quito oya cuana iyaa cajje ojaya ejjashahuabaquijji jayojja jama ca'a cahua pea'ai. Jama ba'a: Jesosa nijje jjapeequi jjimahuajo eseya eshahuaja echacoji sosema' poa ojjaña. Jesusaa iyaa majje eseya poqui mee canaje eshahuajo echaco majajji pojjeama. Jamajjeya Jesusaja ejjashahuabaquijji jayojja jama ejja'a qui, eseyaya Emeshi Mese neija. <sup>23</sup> E'e, Eyacuiñajjiya eseya jjeshe ca'yonaje quea nahue nee nee, Jesosa Quito esejo mano'yonaje sosejje. Jamajjeya ¡ojaya esohui jayojja jama atiitiicue, onajaya pojjeama! ¡Ojo oe chacocue! <sup>24</sup> ¿Ae shai po aninaje miquianaya Eyacuiñajjiya iyaa jjimahuajo? ¡Jamaya atiitiicue quea bei! Eyacuiñajjiya miquianaya jaahuana caje'yo quea pame nee.

*Pea etehue'yo shacuima' nequi yasijje, ahuema'ani yasijje pea'ai*

<sup>25</sup> Miquianajaya etehue'yojo yahuajo eya huohui'ajjanaje nequiaa jama ba'a: —¿Yajja acuae poaje shacuima' nequi, ahuema'ani pea'ai? —tehuenaje nequiaa.

Maya eseyaya Emeshi Mese neiya Jesusaa eya huohui jjima shacuima' nequijo, ahue-ma'anijo pea'ai. Eyaya ecuea ejjashahuabaquijji tehueña miquianajaya ebajji. Jamatii Eyacuiñajjiya eya babaca canaje esohui quea pame nee Jesusaja ehuhuijji. Ohuaya eya esohui e'e nei huohui meesahua cani tii pea'ai. Jamajjeya ¡ecuea esohui shajja'ajjacue!

<sup>26</sup> Jjeya Jesusaja epeeji pojjeamaa eseya napa cani quea huiso nee. Jamajjeya quea camaja eba'ejji. Jamajjeya epona cuana, jjeya nei miya ahuema'ani, ¡jamaya ba'ecue! Shacuima' nequi cuana pea'ai, ¡jamatii ba'ecue! Jamaya eya jjashahuabaquiani. <sup>27</sup> Jamatii miquea ehuanase yanijo ¡a'a oya hueijji! Miya shacuima' nequiya, ¡a'a ehuanase sajji! <sup>28</sup> Eponajo jjahuanaqui sa poanijo miya quea mimishi pojjeama; jamaya quea pame. Epona, miya jjahueaqui sa poanijo quea pame, quea mimishi pojjeama pea'ai. Jamatii jjahuanaqui majje quea camaja poaje miquianajaya eba'ejji, bobijo, aqui ana eba'ejjiyo. Ehuanasejo quea huiso jjashahuabaqui majamajaje. Ebacua quea huiso po majje quea camaja poaje. Eya ca ca shacuima' nequi. Eba'ejjiyo jjashahuabaqui tiitii ajja. Jamajjeya miquianaya e jayojja nequianijo miquea eba'ejji camaja'ama pishana poaje.

<sup>29</sup> Ecuea epeeji cuana, eya jjashahuabaquiani jama ba'a: Epojja Jesosa Quitoja epoe o'oyajji beshahua nei apoa. Jamajjeya ja'a jjashahuaba tiitiiquijji miquea ehuanase neijo! ¡Jesosa Quitojo oe jjashahuaba neineiquicue! <sup>30</sup> E'e, Jesosa Quito poe o'oyani. ¡Ojaya epoejjijo jjashahuaba tiitiiquicue! Jamajjeya ja'a quea yeno po tiitiiiji eba'eji quea camajajo, emano'yojo pea'ai! ¡Quea bihui nee nee poani, a'a jjashahuaba tiitiiquijji pea'ai! ¡A'a jjashahuaba tiitiiquijji aquiana jjeshejjijo, meshi cuana jjeshejjijo pea'ai! <sup>31</sup> Echaco quea huisojo jjashahuabaquianijo ja'a Jesosa Quitojo jjashahuabaqui pajea'yojji! Oya Jesosa poe o'oyajo jiquio meshi cuana, ojjaña aquiana cuana pea'ai chama'yo tii poaje'yo. <sup>32</sup> Jamajjeya ja'a miquianajaya aquiana quea huisojo jjashahuabaqui majamajaji! Jesusaja epeeji shacuima' nequi jjashahuabaquiani Jesosa Quitojo, ojaya ejjashahuabaquijji jayojja jama a sa neinei poani tii. <sup>33</sup> Yahue ca ca jjashahuabaquiani ojaya ehuanase quea bihui nee epo meeji. Jamajjeya oya quea huiso aquianajo jjashahuabaquiani. <sup>34</sup> E'e, shacuijji Jesosa Quito oe neijo jjashahuabaqui tiitii ajja. Oya ojaya ehuanasejo quea huiso jjashahuabaquiani pea'ai. Epona Jesosa Quitoja epeeji ahuema'ani Jesusajo jjashahuabaquiani. Jesusaja ejjashahuabaquijji jayojja jama a sa poani. Ojo chaco sa neinei poani pea'ai. Oja yahue enequijo, ehuanase jjashahuabaquiani quea huiso jahue quea bihui po meeji. Jesosa Quito oe neijo jjashahuabaqui tiitii ajja. Jamajjeya oya quea huiso aquianajo jjashahuabaquiani. <sup>35</sup> Jamajjeya epeeji cuana, eyaya jiquio esohui tehueña miquiana quea pame ba'e meesahuajji, mijo quea camaja epo meeji pojjeama. E'e, eyaya miquianaya jama ajjima ba'a: —¡A'a jjahueaquijji! ¡Miquianaya quea pona jea nee po majje jamatii a'a jjahuanacuijji! —jamaya ecuea miquianaya huohui jjima. Chojja, eyaya miquianaya huohuaña jama ba'a: —¡Jesusa nijje quea ja'a nee jjapeequicue! ¡Ojaya esohui jayojja jama ba'ecue! ¡Quea huiso nee jjashahuabaquicue Jesusajo, aquiana cuanajo pojjeama! ¡Onijje chacocue! —jamaya eyaya ña miquianaya.

<sup>36</sup> Shacuima' nequija ebajji eyaya jama tehueña ba'a: E'e pojja'a miquianaya yahuajo jama poa ba'a: —Ecuana ejjahuanacuijji pojjeama Jesusaja epeeji pojjeamaa ecuana quea huiso napa canijo. Quea camaja nee poaje —poa yahuajo.

Jamajjeya shacuima' nequi cuana, miquea eshiye mese ahuema'ani jaajaa epo, miya huana sa neinei poanijo jojo jjahuanacuijji! Jamaya quea pame nee, mimishi'ama. <sup>37</sup> Jamatii shacuima' nequi oja shiye nijje ojaya ejjashahuabaqui'yojjijo jama poaje pojja'a ba'a: —Eya ca ca ña jjahuanacui sa po'yo ajja pea'ai. Eya quea pona jea nee pojjeama, quehuajje jjacojjoqui ajja nei nei —jamaya e'e jojo nei jjashahuabaqui majje jamatii canequiahua oya cuana, jjahuanacui jjima tii. Jamaya quea pame nee nee. E'e, onaaya Jesusaja epeeji napa canijo, quea camaja poaje jjahuanacui majje. <sup>38</sup> Jamajjeya shacuima' nequi cuana, miquea eshiye mesejo jjahuanacui majje miyaya quea pame ña. Eshiye mese mi huana majje ca ca miyaya quea pame nee nee ña. E'e, miya Jesusajo nei jjashahuabaqui sa poani.

#### *Pabaja esohui e'ahuemanojo*

<sup>39</sup> Epeeji cuana, jiquio esohui eyaya tehueña Jesusaja epeeji e'ahuemanoja ebajji jama ba'a: Epona, ¡miqueahue eshe nequijo, onijje tii anicue! ¡A'a oya hueijji! ¡Miqueahue mano'yajo oe pea dejjajo jjahueaquiyocue ca jjahueaquiyoy sa po majje! ¡Jesusaja epoejjijo oe jjahueaquiyocue, epona cuana! <sup>40</sup> Jamatii ecuea ejjashahuabaquijji e'ahuemanojo jama ba'a: Miqueahue mano'yajo, ¡mee nei anicue, ahuema'ani jama! Jamaya miya quea bihui nee nee poaje'yo. Edojjoshahua Pameya eya jjashahuabaqui meesahua canijo, ecuea esohui e'e nei.

## 8

### *¿A'a bobi eshahuaja e'ijji ajji nisho ba'ehuanasohua majje ijji cajji?*

<sup>1</sup> Yahuajo miquianaaya ecue bajji tehuenaje. Jama huohui'ajjame nequiaa ña anaje ba'a: —¿A'a noe eyacuiñajji nisho e'ijji ajji nisho, eshahuaja e'ijji ajji nisho pea'ai ba'e

huanasohua majje ijia cajji? ¿A'a e'ijjiajji pojjeama pojja'a? —eya huohui'ajjanaje nequiaa.

Jamajjeya jjeya eyaya miqúanaya saja'aje jama ba'a: Pea cuaa bobi edahua'yo quia cani eyacuiñajji nisho huasijje, eshahua cuana huasijje pojja'a onijje ejjapeequijji, mase'ama epo meeji. Beca cuana jama poani ba'a: —Ecuana eba epana'yo acui ejehui'yo, meshi epana'yo pea'ai, Eyacuiñajji pojjeama. Jamajjeya maya bobi ijia ca'yojji.

E'e jojo nei. Jamatii jamaya poanijo miquea ejjashahuabaquijji quea pame pishana. Oj-jaña miya ojjaña ba epo poso poanijo quea pame pojjeama poaje. Pea ejjashahuabaquijji quea pame nee nee jama ba'a: —¡Pea epeeji cuana ejja'asahuaqui quea pame nee! ¡Quea jaji nee ejjapo meeji!

<sup>2</sup> E'e jamaya quea pame. Pea cuana jama jjashahuabaquiani ba'a: —Jamatii ecuea eba nei nei quea huiso.

Jamaya jjashahuabaquianijo oya quea ja'a jjashahuabaqui jjima. <sup>3</sup> Quea Eyacuiñajji jea nee poanijo ca ca, ojaya eba eseya ojaya epeeji nei poani.

<sup>4</sup> Jamajjeya jjeya eyaya miqúanaya huohuije bobijo, ma eshahua huasijje, eyacuiñajji nisho huasijje quia canijo. Quia majje pea cuaa bobi ijia cani. Eseyaya eba eyacuiñajji nisho acui ejehui'yo, meshi epana'yo pojja'a, Eyacuiñajji e'e nei pojjeama. Eyacuiñajji e'e jojo nei oe nei yani. Jamajjeya bobi eyacuiñajji nisho huasijje quia majje eshahua e'ijjiajji nisho ba'ehuanasohua ijia ca'yojji eseyaya. Jamaya quea mimishi poani pojjeama. <sup>5</sup> Pea cuana ca ca jjashahuaba quehuaquiani jama ba'a: —Eyajo, meshijo cuana pea'ai quea huiso eyacuiñajji yani.

Jamaya jjashahuaba quehuaquianijo quea huiso cuaa eyacuiñajji nishojo chaco cani, eshahua pea'ai. E'e, acui ejehui'yo, meshi epana'yo pojja'a, eshahua pojja'a, emeshi mese pea'ai Eyacuiñajji poso acani pea cuaa. <sup>6</sup> Eseyaya ca ca eba Eyacuiñajji oe nei yani. Oya eseyaya Chii ai. Ohuaya ohuaye nei ojjaña aquiana cuana pana ca'ya poa. Eseyaya onijje jjapeequiani, ojaya esohui shajja'ajjaña pea'ai. Jesosa Quito eseyaya Emeshi Mese oe nei poani pea'ai. Yahuajo nei Eyacuiñajjiya Jesosa Quito nijjeya ojjaña pana ca'ya poa. Nequi mee cani pea'ai. Jesosa Quitohua eseya ba'e mee cani pea'ai, ojaya epeeji nei cuana.

<sup>7</sup> E'e jojo nei Eyacuiñajji oe nei yani eseyaya Chii ai. Jamatii jamaya Jesusaja epeeji ba jjima beca cuana. Yahuajo Jesosa Quito ba jjimahuajo onaaya bobi edahua'yo eshahua quea bihui po mee'yojji ijia canaje quea huiso. Jjeya ma bobi ijia majje oya cuana quea mete nee jjashahuabaquiani jama ba'a: —¡Dee! Eya eshahua epeeji jayojja jama poani o'oya. Quea mimishi poani —jamaya eshahua jjashahuabaquianijo, e'e, oya cuana quea mimishi poani.

<sup>8</sup> Miqúanaya quea quehua jjashahuabaquiani jama ba'a: —Eyacuiñajji ecuanajo quea bihui nee pojjeama poaje, ca ojjaña bobi ijiañajo. Eyacuiñajji ecuanajo quea bihui nee pojjeama poaje, ca ecuaa pea bobi ijia ajjajo —poani beca cuana.

Chojja. Eyacuiñajji ese nijje quea bei poani Jesosa nijje jjapeequianijo, bobi ijiañajo pojjeama.

<sup>9</sup> Epeeji cuana, ¡shajja'ajjacue mo! Miqúanaya quea jjashahuabaqui ja'a. Jamajjeya bobi eshahua e'ijjiajji nisho eba'ehuanasohua ijia majje miqúanajaya eba jamaya poani quea mimishi pojjeama. Jesusaja epeeji ca'a'ama cuana ca ca quea jjashahuabaqui ja'a pojjeama quea mimishi po o'oya mee chana'. <sup>10</sup> Jama po chana' ba'a: Miya eyacuiñajji nishoja equijo bobi ijia ani ba majje ohuaya ijia caje pea'ai pojja'a. Ijia'ijia ani, oya jjashahuabaquije eyacuiñajji nishojo, eyacuiñajji nisho bihuia cani poso oya quea ja'a pojjeama poaje. <sup>11</sup> E'e, mi ba majje mi jayojja jama ma bobi ijia majje oya quea mete poaje: —E'e, eya eshahua bobi ijia majje quea mimishi po o'oyanaje —poso jjabaquije.

Jamajjeya Eyacuiñajji onijje quea quene poaje poso oya quea yeno poaje. Oja mimishijo Jesosa Quito mano'yonaje pea'ai. Oya mique chahua jama. Jamajjeya joya quea yeno po chanajo a'a maya noe ijji! <sup>12</sup> Miqúanaya Jesusaja epeeji cuana quea ja'a poani. Jamatii pea epeeji ja'a'ama quea bicho, quea mete poani mi jayojja jama po majje. Jamajjeya miyaya oya quea mimishi po meenaje. Jamajjeya Jesosa Quitohua miya ba cani ona

mimishi po meeji jayojja, quea mimishi pea'ai. <sup>13</sup> ¡Bacue, oe! Pea epeeji quea mete, quea mimishi pea'ai poani eya maya noe ijiaña ba majje, eyaya maya noe e'ijjia o'oyajji pojjeama nei nei. Jamajjeya Jesusaja epeeji ja'a'ama quea mimishi epo meeji pojjeama nei nei. ¡E jayojja jama pocue; Jesusaja epeeji ja'a'ama a'a quea mimishi po meeji!

## 9

*¿Achajja ba'e cajji Jesusaja huoojea'yo esohui huohuijji?*

<sup>1</sup> Ecuea epeeji cuana Conitojo ba'e, eya ca iña e'e jojo nei Jesusaja huoojea'yo oja esohui huohuijji. Dejjaja huoojea'yo pojjeama iña iquio. Jesusaja epeeji quea ja'a nee ba'e meesahua sa aña nei nei. Yahuajo eyaya Jesosa banaje, esejaya Emeshi Mese nei. Esohui quea pame nee ojo eyaya huohuinaje miquiana huasijje. Shajja'ajja majje miquianaya ojaya epeeji poanaje. Maya miquianajaya eba. <sup>2</sup> Jamajjeya e'e pojja'a pea cuana jama poani ba'a: —Pabo Jesusaja huoojea'yo pojjeama —poani.

Jamatii miquianajaya eya eba Jesusaa huoojea cani. E'e, miquianaya ojaya epeeji poanaje eya huohuijje. Jamajjeya quea huiso jama poani ba'a: —Conitojo ba'e cuana Jesusaja epeeji poanaje Pabaja esohui shajja'ajja majje. Jamajjeya esejaya eba Eyacuiñajjiya Pabo huoojea canaje; ohuaya Pabo esohui huohui meesahua cani tii —poani cuana.

<sup>3</sup> E'e, beca cuaa eya niñeba cani jama ba'a: —Pabo ca jja ca oma Eyacuiñajjiya huoojea'yo pojjeama.

Jamaya poajo, eyaya saja'aña jama ba'a: —Jesusaa ecuana huoojea ca'yonaje ojaya esohui huohuiya —saja'ame aña.

<sup>4</sup> E'e, eya Jesusaja huoojea'yo ojaya esohui huohuijji. Jamajjeya eyaya miquea bobi ijijaje sosema', eya sohuihuohuiaña sosejje. Jamatii eya jamaya po ajja nei nei. <sup>5</sup> Jesusaja esohui huohuijji cuana, oja chahua mese pea'ai ca ca ehuanase cuana nijje poquiani esohui huohuiya. Jamaya poani Peno pea'ai. Jamaya quea pame nee. Eya jamaya po sa po majje quea pame poaje, ca ehuanase Jesusaja epeeji poanijo. <sup>6</sup> Ojjaña Jesusaja huoojea'yo esohui huohuijji cuana esohuijo nei chacochoani tii, bobi yajjiijo chacochocho ajja.

¿A'a ecuaaya oeyaya Benabe nijjeya cachacoahua bobi sosejje? ¿A'a ecuaaya oeyaya casohuihuohuiahua sosema'? ¿A'a jamaya quea pame? Eya ca ca jamaya poani ba'a: —Chojja; ecuanaya pea'ai casosequia cahua esohui huohuiaña sosejje —poani eya.

<sup>7</sup> ¡Bacue! Emeshi meseja huoojea'yo, ona oja esohui shajja'ajja meeji poani ohuaya sosequia cani ojo chaco canaje sosejje. Oya jayojjaya e'acui yiye meseya acuijjajja ijia cani acui yiye chaco canaje sosejje. Ana'ai jaahuanajjiya tojjo na ishi cani jaahuana sosejje. <sup>8</sup> Jiquio ecuea esohui etehue'yo jayojja jama ojjaña poani. Jamaya ojjañaja eba. Jamajjeya ecuana pea'ai cabobia cahua cuaa Eyacuiñajjiya esohui huohui sosejje. <sup>9</sup> Eyacuiñajjiya Moisesi yahuajo nei nei jama tehue meeme aca poa ba'a:

“¡Ana'ai chacochochoanijo bobiacue! Eso' quishihuojo poequiya tii ca'ijjia cahua; ja'a naba huoshoji!”

Jamaya yahuajo nei Eyacuiñajjiya tehue mee ca poa. Ohuaya Moisesi jamaya tehue meeme aca poa ana'aijo nei pojjeama jjashahuabaquianijo. <sup>10</sup> Ohuaya esejo jjashahuabaquianijo pea'ai jamaya tehue mee ca poa. Oya jayojjaya que chacojji cuana, anoso sejjajji pea'ai chaco majje jama jjashahuabaquiani ba'a: —Eyaya anoso sejjajji sosejje quijje yeje'yo ecuea equijo e'ijjijaji.

<sup>11</sup> Jiquio ecua chacochochojjiya jayojjaa ecuaaya miquianaya sohuihuohuinaje. Shajja'ajja majje Jesusaja epeeji poanaje. Jamajjeya jjeya ecuana bobi quiaje esohui huohuinaje sosejje miquianaya quea pame nee poaje. <sup>12</sup> E'e, pea esohui huohuijji sohuihuohui majje jama poani ba'a: —¡Ecuaa miquiana sohuihuohuinaje sosejje bobi, aquiana pea'ai che ecuana quiacue! —poani pea esohui huohuijji.

Jamaya quea pame. Ecuaaya ca ca quea huiso nee esohui quea pame nee Jesusaja huohuinaje miquianajaya eshajja'ajjaji. Sosema'. Jamatii ecuanajaya miquianaya

jama ajjima ba'a: —¡Aquiana mo che quiacue eya esohui huohuinaje sosejje! —ajjima ecuanajaya.

Chojja. Jamaya e'a jojjemo Jesusaja epeeji pojjeama siajje pome jama ba'a: —Pabohua ca jja ca esohui huohui cani quea huiso aquiana sosejje. Jamajjeya ecua shajja'ajja sa po ajja —sijje pome.

Jamajjeya eya aema' jayojja jama ba'yani; esohui huohuiaña sosema' ojjaña eshajja'ajjaji.

<sup>13</sup> Yahuajo nei nei Eyacuiñajjiya jama aca poa ba'a: —Jodio dejja cuaa Eyacuiñajjiya equijo chaco majje bobi Eyacuiñajji yasiije onaja quia ijja ca poa sosema'. Jodio etii cuaa Eyacuiñajjiya equijo huo dahua ca poa Eyacuiñajji quea bei epo meeji. Ma huo dahua tehuejea jjimahua ijja ca poa Eyacuiñajjiya equijo chaco cani sosejje.

Maya miquea eba. <sup>14</sup> Oya jayojjaya esejaya Emeshi Mese neiya Jesusaa huohui canaje ojaya esohui huohuiji cuanajo jama ba'a: —Sohuihuohui canijo, ¡sose quiacue ecuea esohui huohuiji! —poa.

<sup>15</sup> Jamatii eya jamaya epojji pojjeama nei nei. Esohui huohuinaje sosejje bobi edojji pojjeama. Jjeya esohui tehueña miquiana huasijje miquea bobi equia meeji pojjeama. Bobijo pojjeama eyaya esohui huohuiaña. Eyaya Jesosa Quitoja esohui huohui tiitiije sosema' miquianaya. <sup>16</sup> Eyaya ehuhuiji pojjeama jama ba'a: —Eyaya ca eya Jesusaja esohui quea pame huohuiaña; jamajjeya eya quea pame nee.

Chojja. Eyacuiñajjiya eya huoojea ca'yonaje Jesosa Quitoja esohui huohuiya. Esohui huohui ajja jjemo eya quea yeno nee nee pome, Eyacuiñajjiya eya quea nee nee po mee came pea'ai. <sup>17</sup> Eyaya jamatii ecuea ejjashahuabaquiji jayojja jama esohui huohuiaña jojjemo jama huohuime ba'a: —¡Sosequiacue mo esohui huohuiaña sosejje! —ame.

Yahuajo eya jjashahuabaqui jjima Jesusaja esohui huohuiji. Chojja. Eyacuiñajjiya eya huoojea ca'yonaje ojaya esohui huohuiya. Eyaya ojo sosema' jayojja quea bihui nee chacoaña. <sup>18</sup> ¿Ae sa poani eya esohui huohuiaña sosejje? Eya bejjo, bobi pea'ai sa po ajja esohui huohuiaña sosejje. E shajja'ajjaji huohui jjima jama pea'ai ba'a: —¡Che mo bejjo quiacue eya esohui huohuiaña sosejje! —jamaya ecuea ajjima.

Chojja, eya quea bihui nee Jesusaja esohui quea pame nee huohuiaña sosema'. <sup>19</sup> Chama' dejja e huoojea'yojji esohui huohuiji. Chojja. Jesosa nijje chaco sa poanijo eya chacochoani. Ojjaña yajjijo chacoaña. E'e, eyaya esohui huohuiaña ojjaña Jesosa nijje ejjapeequi meesahuajji. <sup>20</sup> Jamajjeya Jodio cuana nijje ba'yanijo, o jayojja jama ba'yanijo eya Moisesija etehue'yo jayojja jama aña pea'ai. Jamajjeya ohuaya ecuea esohui Jesosa Quitojo shajja'ajja caje'yo pojja'a. Moisesija etehue'yojo jjamimicuijajea nobiajeaqui ajja onijje. <sup>21</sup> Oya jayojjaya Jodio pojjeama cuanaja Moisesija etehue'yo ba jjimajo, eyaya onijje nequiya ohuaya jayojjaya jama aña. Moisesija etehue'yo huohui ajja. Chojja. Eyaya esohui quea pame nee Jesusaja huohuiaña ona Jesosa nijje jjapeequi meesahuajji. Jamajjeya Jesusaja esohui jama po majje Eyacuiñajjiya ejjashahuabaquiji jama aje pea'ai. Eya ca ca Eyacuiñajjiya esohui jayojja jama ba'yani tii, shajja'ajjaña tii tii, Jesosa Quitoja. Jamajjeya Eyacuiñajji quea bihui nee poani enijje. <sup>22</sup> Jesusaja epeeji quea jjashahuabaqui ja'a pishana nijje ba'yanijo eya o jayojja jama poani, Jesosa nijje ejjapee neineiqui meesahuajji. E'e, Jesosa nijje ejjapeequi meesahuajji eyaya ojjaña joya e pejejo ba'e nijje jjapeequiani. Eyaya aje oe ojjaña pea cuana Jesusaja epeeji quea ja'a po meesahuaña.

<sup>23</sup> Jamaya eyaya aña ojjaña cuana esohui quea pame nee Jesosa Quitojo eshajja'ajja meeji. Jamajjeya eya quea bihui nee jjapeequiani Jesusaja epeeji eyacua cuana nijje.

<sup>24</sup> ¡Jashahuabaquicue esho'iquiana quebani poanijo! Ojjaña cuajicuajiani aquiana iñajji sosema'. Oe esho'i quea cuejipashi nee nee ebionei poeje. Oya oe nei iña mee caje aquiana sosema'. Jiquio ecua esho'iquiana quea cuejipashi nee cuajicuajiani aquiana iñajji jayojja jama ¡miquianaya Jesosa Quito nijje jjapeequicue quea pame nee nee! ¡Ojaya esohui jama acue! Jamajjeya quijje ohuaya miquianaya quea pame nee ba'e tiitii mee caje'yo. <sup>25</sup> Ojjaña esho'i cuana janobajjima nei cuajicuaji huicha'a huicha'ani,

jjashahuabaquiiani quea cuejipashi nee epojji, aquiiana e'iñajji. Jamatii ma aquiiana quijje pishana chama'yo tii poaje'yo. Jesosa nijje jjapee neineiQUIAJIO ca ca quijje ohuaya eseya quea pame nee nee sosequia caje'yo, eba'ejji quea pame nee nee epo tii tiijji. <sup>26</sup> Jamajjeya eya Jesosa nijje jjapee neineiQUIAJIANI. Jjashahuaba tiitiiQUIAJIANI. Eya poqui ajja cojjama' jama; dejja ehoo jama poqui ajja, eya. Ecuea eba Jesusaja esohui quea pame nee nee. <sup>27</sup> Jesusaja epeeji quea pame nee, quea ja'a nee epojji eya jjashahuabaquiiani quea huiso. E'e, ojaya esohui huohui huicha'a huicha'a majje eya quea bicho nee nee pome Jesusaja epeeji pame'ama po majje. Jama poajo Jesosa Quitohua quijje eya esosequia'yojji pojjeama. Eya ba caje ohuaya epeeji quea mimishi.

## 10

### *¡EtiQUIAIA jayojja a'a eyacuiñajji nisho ajji!*

<sup>1</sup> Ecuea epeeji cuana, jiquio esohui shajja'ajjacue! Yahuajo nei nei ecuanaja etiiQUIAJIANI Moisesi nijje meshi jabojo poQUIAJIANIJO, Eyacuiñajjiya jaahuana ca'ya poa. Eyajo ona biajje bo ai nequi mee ca'ya poa esheQUIAJIANI edahua ca poani jjejojo. PoQUIAJIANIJO bae huo'o huasijje poe'yanaje; bae yiyesamajje ejiojji quea jabo nee po mee majje, ojjaña tii ojee ojje miji yasijje poqui meesahua ca'ya poa quea pame nee ejiojji. <sup>2</sup> Yahuajo nei bo quimejjeje poQUIAJIANIJO, bae huo'o ojje miji yasijje poQUIAJIANIJO pea'ai ecuanaja etiiQUIAJIANI Moisesija esohui shajja'ajja ca poa. Jamajjeya onajaya emeshi mese po'ya poa Moisesi. Oya jayojjaya jjeya eseya enajo besa mee cajje Jesusaja esohui jayojja jama eba'ejji. <sup>3</sup> Yahuajo nei meshi jabojo Eyacuiñajjiya bobi pahui jayojja oque mee ca'ya poa meshi yasijje ojjaña etiiQUIAJIANIJO e'ijji. <sup>4</sup> Ena chama' poajo, Quitohua ena jamatii cuaya meequi ca'ya poa bajjoojje etiiQUIAJIANIJO e'ishijji.

Jamajjeya Quitohua ojaya epeeji cuana jaahuana cani. EtiiQUIAJIANI Quitohua jama poa ba'a: —Oya ecuanaja nijje poQUIAJIANI, de; ohuaya ecuanaja jaahuana cani. Jamajjeya ohuaya bajjoojje ena cuaya meequi canaje —poa.

<sup>5</sup> Jamatii aje oe beshahua nei ojjaña ecuanaja etiiQUIAJIANI quea mimishi po tiitii poa. Eyacuiñajji bihuia jjima aca poa. Eyacuiñajji quea quene ona nijje poa. Jamajjeya beshahua nei ojjaña mano ca'ya poa meshi jabojo tii.

<sup>6</sup> Eyacuiñajjiya etiiQUIAJIANI quea mimishi nee nee mano mee ca'ya poa ese jjabahuej-jaquijji, mimishijo quea mete epojji. Jamajjeya mimishi cuana a sa po ajja poaje'yo eseya. <sup>7</sup> E'e, ecuanaja etiiQUIAJIANI eyacuiñajji nisho nijje, acui ejuhui'yo nijje, eshahua nijje pea'ai mimi ca'ya poa. Eyacuiñajji esohui yahuajo nei etehue'yo jama poa ba'a: “Yahuajo oya cuana ijji'ijji majje, ishi'ishi majje pea'ai majamaja ca poa eshahua nijje jjapeequianijo”.

Jamaya yahuajo poa.

¡A'a ona jayojja jama quea mimishi pojji eshahua nijje! Jamaya quea tai. <sup>8</sup> EtiiQUIAJIANI cuana aje oe onaja ehuanasejo jaanaje, onaja yahuejo jaanaje. Quea mimishi nee nee poanijo, Eyacuiñajjiya oya cuana quea huiso nee nee, 23.000 mano mee ca'ya poa oya pojja tii. Jamajjeya ja'a jja oe ona jayojja jama pojji! ¡A'a onajaya ehuanasejo, yahuejo pea'ai ba'ejji! <sup>9</sup> Ecuanaja etiiQUIAJIANI cuana jjashahuabaquia poa jama ba'a: —Ecuanaja quea mimishi poajo, e'e pojja'a Eyacuiñajji quene'ama poaje ecuanaja mimishi cuana —jamaya poa, de.

Chojja. Quea mimishi poajo, Eyacuiñajjiya peyo cuana huoojje ca poa ona ijji. Jamajjeya etiiQUIAJIANI jayojja jama a'a pojji! <sup>10</sup> Ecuanaja etiiQUIAJIANI cuana Eyacuiñajji niñeba ca poa. Jama poa ba'a: —Eyacuiñajjiya ecuanaja quea pame nee ejaahuanajji pojjeama —aca poa.

Eyacuiñajji niñeba canijo, ohuaya ojaya esohuidojojji quea ca'a cuana huoojje ca'ya poa o niñebajji cuana mano mee'yohua. Jamajjeya etiiQUIAJIANI aca poa jayojja jama niñebame a'a ajji Eyacuiñajji!

<sup>11</sup> ¡A'a pajea'yojji! Ecuanaja etiiQUIAJIANI quea mimishi poaninajejo mano ca'ya poa yahuajo nei. Jamaya Eyacuiñajjiya amajje esohui tehue mee ca poa esejaya ebajji.



Jamajjeya jjeya ba mee cani e'e jojo nei oya quea quene poaje esejaya mimishijo. Jesosa Quito pojja'a jjeya poeje o'oya. ¡Jamajjeya etiiquiana quea mimishi nee nee poa jayojja a'a pojji!

<sup>12</sup> E'e pojja'a beca cuana quea quehua jjashahuabaquiani jama ba'a: —Eya quea pame nee poanijo eshahuaa eya quea mimishi epo meeji pojjeama.

Chojja. ¡Jamaya jjashahuabaquicue ba'a: —Eyacuiñajji, ¡eya quea pame po meesahuacue! ¡Nahue neineicue mo; quea mimishi a'a po mee o'oyajji! —jamaya Eyacuiñajji nijje mimicue!

<sup>13</sup> Eshahuaa ojjaña quea mimishi po mee sa acani. Ohuaya miquianaya quea mimishi po mee sa acani. Jamatii Eyacuiñajjiya miquianaya epajea'yojji pojjeama. Ohuaya miquianaya ojaya epeeji quea pame nee po mee canijo, eshahuaa miya quea mimishi epo mee'yojji pojjeama. Beshahua nei quea mimishi po mee canijo, ¡Eyacuiñajji nijje mimicue: —Jesosa, ¡eshahua quea huesha nee huoojeacue! ¡Eya quea pame po meecue mimishi'ama epojji! —jamaya pocue!

*Jesosaja bobi ijiaña jo ja'a eshahuaaja epeeji jama pojji!*

<sup>14</sup> Jamajjeya ecuea epeeji cuana, ¡eshahuaaja epeeji cuana nijje a'a jjapeequijji! ¡Onaya eshahuaa nijje mimiani yasijje a'a poquijji! ¡Epana'yo cuanajo a'a jjashahuabaquijji pea'ai!

<sup>15</sup> Ecuea eba miquianaya quea jjashahuabaqui ja'a nee poani. Jamajjeya ¡ecuea esohuijo jjashahuaba neineiquicue, quea ja'a nee! <sup>16</sup> Eseyaya Jesosaja bobi ijiaña oya esejaya mimishijo mano'yonaje pajea'yo jjima yajji. Jesosaja bobi ijia jjimahuajo, oja ena ishi jjimahuajo pea'ai eseya Eyacuiñajji nijje emimi jama ba'a: —Eyacuiñajji, miya quea pame nee nee.

Ma ena ishi jjimahuajo Jesosa Quitoja ena' ecuaya'yojo eseya ejjashahuabaqui jama ba'a: —Jesosa mano'yonaje ecuea mimishi cuijea'yojji sosejje —jamaya jjashahuabaquime epo.

Pahui ijia jjimahuajo eseya ejjashahuabaqui Jesosa Quitoja yamijo jama ba'a: —Jesosa Quito eseya ojaya epeeji quea pame nee epo meeji sosejje mano'yonaje.

<sup>17</sup> Pahui mijisisi jjimahuajo oe pahui yani. Eseyaya Jesosaja epeeji cuana quea huiso. Jamatii pahui oe jayojja jama eseya poani. E'e, eseya ojee nequianijo eseye nei jayojja nequiani Jesosa Quito nijje nei jjapeequianijo.

<sup>18</sup> ¡jjashahuabaquicue ecuanajaya etiiquianajo, Jodio cuanajo! Oya cuana yahuajo nei jama poa ba'a: Eyacuiñajji nijje emimijji cuaa noe Eyacuiñajji yasijje equia'yo dahua ca poa. Noe dahua tehuejea jjimahua ijia caninaje Eyacuiñajji nijje jjapeequianiya jjejojo.

<sup>19</sup> ¿Ajeo acuae eyaya miquiana jama huohuiaña, ae ba meesahuajji? Jama ba'a: Bobi eyacuiñajji nisho huasijje quia majje dejja cuaa jamatii ijia cani. Eyacuiñajji nisho eshe pojjeama, Eyacuiñajji e'e jojo nei pojjeama, de. <sup>20</sup> Jamatii eshahuaaja epeeji cuaa bobi quia cani eyacuiñajji nisho epana'yo huasijje pojjeama. Maya eshahua cuana huasijje quia cani. Jamajjeya oya cuana Eyacuiñajji e'e jojo nei nijje jjapeequi ajja. Miquianaya Jesosaja epeeji cuana, ¡a'a eshahuaaja epeeji jayojjaa jama ajji! ¡A'a eshahua cuana nijje pojji!

<sup>21</sup> Jesosa Quito nijje jjapeequianiya ¡eshahua cuana nijje a'a jjapeequijji! Pea oya, de. Jamajjeya Jesosaja ena ishiañaajo, oja bobi ijiañaajo pea'ai ¡bobi eshahua huasijje equia'yo a'a ijia pea'aijji! <sup>22</sup> Eshahua cuana Eyacuiñajji boti'ama nei nei. ¡A'a esejaya Emeshi Mese nei Eyacuiñajji quea quene po meeji eshahua nijje jjapeequianijo! ¿A'a miya quea ca'a nee poso jjabaquiani? ¿A'a ya Eyacuiñajji ca'a'ama poso aña? Jamajjeya Jesosa nijje jjapeequiani ¡a'a eshahuaaja epeeji po pea'aijji!

<sup>23</sup> Jesosa Quitoja epeeji beca cuana jama mimiani ba'a: —Eya Jesosaja epeeji poanijo ojjaña bobi, epana'yo huasijje quia'yo pea'ai ijia majje quea mimishi pojjeama poani —jamaya poani.

E'e jojo nei. Jamatii eyaya miquianaya saja'aña jama ba'a: —Chojja. Ma bobi ijia majje quea pame pojjeama poani. Maaya ojjaña Jesosa nijje jjapeequi meesahua ajja. Miquianaya jama jjashahuaba quehuaquiani pea'ai ba'a: —Ecuaya ojjaña aje mimishi'ama poanijo.

Eyaya ca ca miqúanaya huohuíaña jama ba'a: —Ojjaña quea pame pojjeama e'ajji. ¡Jesosaja epeeji quea ja'a pojjeama cuana quea mimishi po mee o'oya chana! <sup>24</sup> Jamajjeya a'a quea quehua jjashahuabaquiji jama ba'a: —Eyaya ojjaña bobi jjesheje ecuea e'ijji <sup>25</sup> —jamaya poanijo miqúanaya Jesosaja pea epeeji cuanajo jjashahuabaqui ajja.

Chojja. ¡Jashahuabaquicue pea cuana Jesosa nijje ejjapeequi meesahuajji quea ja'a nee! <sup>25</sup> Jamajjeya noe edahua'yo jjesheañajo ja'a huohui'ajjajji jama ba'a: —¿A'a jiquio noe edahua'yo eshahua huasijje quia? —a'a jamaya huohui'ajjajji!

Jamajjeya ¡miyaya maya ijjiacue quea bihui nee, mete'ama! <sup>26</sup> E'e, Eyacuiñajji esohui etehue'yo jama poa ba'a:

“Eyacuiñajjiya ojjaña meshi cuana pana ca'ya poa. Ojjaña aquiana pea'ai pana ca'ya poa.

Jamajjeya ojaye nei meshi, aquiana pea'ai, ojjaña”.

Jamaya poa yahuajo nei.

<sup>27</sup> E'e pojja'a Jesosaja epeeji pojjeamaa miya iyaa caje ojaya equi yasijje bobi ijji. Jamajjeya ojaya equi yasijje poqui majje ¡bobi ijjiacue mete'ama! Ijji'ijjianiyo ja'a huohui'ajjajji jama ba'a: —¿A'a jiquio noe edahua'yo eshahua huasijje quia? —a'a huohui'ajjajji! ¡Jamatii ijjiacue mete'ama!

<sup>28</sup> Jamatii ojee ijji'ijjianiya, pea eseja epeejiya miya jama huohui caje pojja'a ba'a: —Jiquio bobi eshahua huasijje quia —jamaya acajje ja'a maya bobi ijji! Ma bobi quea pame nee e'ijji. Jamatii miya Jesosaja epeeji neiya ma bobi ijjiña ba majje esejaya epeeji quea yeno poaje pojja'a. ¡A'a oya quea yeno, quea bicho po meeji! <sup>29</sup> E'e, miya Jesosaja epeeji quea pame poaniya ijjiaje mete'ama. Jamatii mi ba majje Jesosaja epeeji quea ja'a pishana quea mete po chana' miyaya ma bobi ijji. Jamajjeya ja'a ijji! ¡Oya quea bei po meecue; miya pea'ai quea bei pocue!

E'e pojja'a beca cuaa huohui caje jama ba'a: —Eyaya Jesosaja epeeji poaniya ojjaña bobi ijjiña mete'ama —acajje.

Eya ca ca jama po ajja. Pea cuana quea jjashahuabaqui ja'a pojjeamajo quea mete poanijo, eyaya ojjaña bobi ijji ajja.

E'e pojja'a onaaya jama acaje pea'ai ba'a: <sup>30</sup> —E'e, eyaya Eyacuiñajji bihuíaña ojjaña bobi ijji jjimahuajo. Jamajjeya eyaya ojjaña bobi ijjiña mete'ama. Bobijo eyaya Eyacuiñajji bihuíaña; jamajjeya ja'a enijje mimijajji eya ojjaña bobi ijjiña! —jamaya acaje pojja'a onaaya.

<sup>31</sup> Jamajjeya ¡jiquio esohui bacue! Miyaya bobi ijjiña, e'ishijji ishianajo pea'ai ojjaña miquea eba'ejjiyo pea'ai jjashahuabaquicue jama ba'a: —Eyaya ojjaña cuana Eyacuiñajji bihuia mee sa año.

<sup>32</sup> Jamajjeya ¡quea ja'a nee ba'e tiiticue! ¡A'a esejaya epeeji cuana quea mimishi po mee o'oyajji! ¡Jodio cuana, Jodio pojjeama, Jesosaja epeeji cuana pea'ai a'a quea mimishi po mee o'oyajji! ¡E'e, quea ja'a nee ba'ecue ojjaña cuana Jesosa nijje quea ja'a nee ejjapeequi meesahuajji! <sup>33</sup> ¡E jayojja jama pocue! Eya jjashahuabaquiani ona quea bei po meesahuajji. Eya jjashahuabaqui ajja jama ba'a: —¿Ae shai ejo quea pame?

Eyaya ca ca ojjaña quea bei po mee sa año. Jamaya eyaya año ojjaña Jesosaja epeeji epoji.

## 11

<sup>1</sup> Eyaya Jesosa Quitoja esohui jayojja jama año. ¡Jamajjeya e jayojja jama pocue miqúanaya!

*Esohui Eyacuiñajji equi yasijje dobiqúanijo*

<sup>2</sup> Ojjaña pojjaajo miqúanaya ejo jjashahuabaquiani. Ecuea esohui jayojja jama po tiitiani, miqúanaya. Jamaya quea pame. <sup>3</sup> Jamatii ¡ecuea esohui etehue'yo ba neineicue yahue cuana, ehuanase cuana pea'ai! Yahue cuana ojaya ehuanase huooejaji poani. Jesosa Quito ojjaña huooejaji poani tii, dejja cuana huooejaji poani, ojaya epeeji cuana huooejaji poani. Ojaya Chii Eyacuiñajji eyajo ani Jesosa Quito huooejaji poani pea'ai.

<sup>4</sup> Jamajjeya dejja cuana, Eyacuiñajji equijo nequi onijje mimianijo, oja sohui huohui

canijo pea'ai jejaahuojja cajnajea'yocue! Jaahuojjajjiya Eyacuiñajjiya esohui huohui canijo Jesosa Quito cajaa ajji jayojja jama poani. <sup>5</sup> Epona cuana ca ca Eyacuiñajjiya equijo ani onijje mimianijo, ojaya esohui huohui caqui pea'ai jjasapataquicue! E'e, epona jjasapataqui ajjajo oja yahue cajaa ajji jayojja jama poani. Jamajjeya jjasapataqui ajjajo esao cobojea majje jayojja jama poani, quea bicho poani. <sup>6</sup> E'e, eponaa jjasapataqui ajjaa jjejojo cacobojea cahua. Jamatii epona esao cobojea majje quea bicho nee nee poaje. Jamajjeya bicho'ama epoggi epona cajnahuojja taquiahua Eyacuiñajjiya equijo mimianijo.

<sup>7</sup> Dejja cuaa, Eyacuiñajjiya epeejiya ejaahuojja iya ajja Eyacuiñajjiya equijo esohui huohui canijo. E'e, Eyacuiñajji dejja cuanajo jama poa ba'a: —Dejja cuana ojjaña e'aquiana mese poaje ojjaña aquiana meshijo ani. Jamaya Eyacuiñajjiya ojjaña ba mee caje ohuaya dejja pana ca'ya poa quea pame nee oya jayojja jama epoggi. Jamajjeya ja'a epona jama pojji! ¡A'a jjahuojjataquijji nequiana dejja! Oya jayojjaya epona oja yahueja esohui jayojja jama acani oja yahueja yajji. <sup>8</sup> Eyacuiñajjiya dejja ebionei pana coo ca'ya poa. Dejja pana majje quijje epona pana ca'ya poa dejjaja edojjojjanijji sa'. <sup>9</sup> Eyacuiñajjiya dejja pana jjima eponaja yajji. Chojja. Epona pana ca'ya poa dejjaja yajji. Dejja epona huoojeajji poa. Jamaya Eyacuiñajjiya a sa aca'ya poa. <sup>10</sup> Jamajjeya Eyacuiñajjiya esohuidojojji cuaa eseya ba canijo, epona cuana cajnahuojjataquiahua Eyacuiñajji nijje ojee mimianijo. Jamajjeya ojjaña ba cani yahue epona huoojeajji poani.

<sup>11</sup> Jamatii jjeya Emeshi Mese nei Jesosa nijje jjapeequi majje ehuanase cuaa yahue cuana ba'e meesahua cani Jesosa Quitojo. Yahue cuaa ehuanase jaahuana cani pea'ai. <sup>12</sup> E'e, yahuajo nei nei dejja pana majje quijje Eyacuiñajjiya epona pana ca'ya poa dejjaja edojjojjanijji sa', ebionei epona. Jjeya ca ca dejja sho'i cuana eponaja mejo cuayani. Jamatii Eyacuiñajjiya ojjaña pana ca'ya poa, ojjaña nei nei.

<sup>13</sup> Jamajjeya jashahuabaquicue epona cuanajo! ¿A'a ojjaña ojee Eyacuiñajji nijje mimianijo epona camimiahua jjahuojjataqui jjima? ¿A'a jamaya quea pame nee? Chojja, quea pame pojjeama. <sup>14</sup> Ecuana eba dejja cuana saojji quea pame pojjeama. Epona jayojja poani, saojji. <sup>15</sup> Epona saojji ca ca quea pame nee nee. Eponaja esao ao ojaya ejjahuojja taquijji jayojja. Jamaya Eyacuiñajjiya quea boti nee nee. <sup>16</sup> E'e pojja'a eponaja esao aojo, ejjahuojjataquijjiyo pea'ai pea cuana jjamimicuiajea nobiajeaqui sa poani enijje. Jamatii ecuea esohui jiquio jama ba'a: Epona cuana Eyacuiñajjiya equijo cajnahuojjataquiahua. Jesosaja epeeji cuaa ojjaña cuiñajjiyo ba'eya jamaya huohui cani pea'ai.

*¡Pea Jesosaja epeeji cuana nijje a'a quea mimishi pojji!*

<sup>17</sup> Ecuea epeeji cuana, jjeya pea esohui eyaya tehueje miquianaya ebajji. Miquianaya Eyacuiñajjiya equijo ojee anijo quea pame pojjeama poani. Ojjaña cuana Jesosa nijje quea ja'a nee jjapeequi meesahua jjima. Pea epeeji cuana ca ca quea yeno po mee aña. Jamajjeya eyaya miquianaya huohuije Eyacuiñajjiya equijo quea ja'a nee epoggi. <sup>18</sup> Pea cuaa eya huohui canaje jama ba'a: —Jesosa Quitoja epeeji cuana Conitojo ba'e Eyacuiñajjiya equijo ojee jjachichacui majje jjamimicuiajea nobiajeaquiani. Oe pojji epeeji cuaa pea epeeji cuana nijje jjapeequi sa po ajja acani cuaa —jamaya acani cuaa.

E'e pojja'a miquianaya jamaya quea tai poani. <sup>19</sup> Jesosaja epeeji quea bei pojjeama mimicuiajea nobiajea sa poani, pea nijje jjapeequi ajja. Jamaya quea tai. Jamatii jamaya poanijo, ojjaña ba caje ache dejja cuana Jesosaja epeeji e'e jojo nei pojjeama, ache oja epeeji e'e jojo nei ba caje pea'ai. <sup>20</sup> E'e, miquianaya ca mi ca oe Eyacuiñajjiya equi yasijje dobiquiani esejaya Emeshi Mese nei Jesosaja bobi ojee ijjiiaa poso. Chojja, Jesosajo miquianaya jashahuabaqui ajja, oya esejo mano'yonajejo jashahuabaqui ajja. <sup>21</sup> Ojee ijjiia'ijjiia ajja pea'ai miquianaya. Chojja, pea cuana ishoa ajja. Jamajjeya beca cuaa quea huiso ijjiia cani. Quea huiso ishi cani pea'ai, quea jeje nee nee poani. Pea cuana ca ca quea shoe nee poani. <sup>22</sup> Jamajjeya bobi quea huiso ijjiia sa poanijo ¡miquianajaya equijo ijjiia'ijjiia socue! ¡A'a Eyacuiñajjiya equijo quea dejja tai pojji! ¡Jesosaja epeeji aema' a'a quea bicho po meejji ojaya bobi quea huiso chamajo! Eyacuiñajjiya equijo quea tai añajo,

eyaya ojjaña miquianaya tecueña jama ba'a: —¡Eyacuiñajji equijo ani a'a Jesosaja epeeji quea mimishi ajji bobijo!

*¡Jesosaja bobi e'e jojo nei ijjiacue o pajea'yo jjima yajji!*  
(Mateo 26.26-29; Macoso 14.22-25; Noca 22.14-20)

<sup>23</sup> Eseyaya Emeshi Mese neiya Jesosaa eya ba mee canaje jiquio esohui oja bobi ojee e'ijjiyajji, oya eseyaya mimishijo mano'yonaje pajea'yo jjima yajji. Maya yahuajo eyaya huohuinaje jama ba'a: —Oe mecayje eseyaya Emeshi Mese nei Jesosaja epeeji nishohua oya quia canaje dejja maseja equecua'yojji. Iña majje dojo canaje cuaa. Iña jjimahuajo Jesosaa oe pahui jjeshe canaje. <sup>24</sup> Eyacuiñajji bihuia majje pahui mijisisi canaje. Ojaya epeeji cuana jama huohuime acanaje ba'a: —Jiquio pahui emijisisi ecuea eyami. Eya miquianajaya mimishi cuanajo mano'yo. Jamajjeya jiquio pahui ijjiñaño miquianaaya eya miquianaja mimishijo mano'yonaje pajea'yo jjima yajji —Jesosa poanaje.

<sup>25</sup> Pahui ijji majje Jesosa Quitohua caneco jjeshe canaje. Eyacuiñajji bihuia ca o'oyanaje. Huohui canaje jama ba'a: —Jiquio ena canecojo nequi ecuea ena'. E'e, ecuea ena' cuayaquije'yo. Eya ojjañaja mimishijo mano'yo. Jamajjeya Eyacuiñajji miquianaya huohui caje, ma ohua miquianajaya mimishi cuana cuijea caje'yo e mano'yajo, ma oja yahuajo huohui jjima. Jamajjeya jiquio ena canecojo nequi ishianajo jjashahuaba tiitiuicue jama ba'a: “Jesosa mano'yajo oja ena' cuayaquinaje ecuea mimishi cuijea'yojji” jamaya acue —Jesosaa acanaje.

<sup>26</sup> Jiquio pahui, ena canecojo nequi pea'ai Jesosa Quitoja bobi poani. Jamajjeya ojee ojaya bobi ijjiñaña o shahuaba poquijji, ma oya eseya mimishijo mano'yonaje. ¡Jamaya acue eseyaya Emeshi Mese nei Jesosa Quito poe o'oya jjimahuajo! <sup>27</sup> Jamajjeya eseyaya Emeshi Mese nei Jesosaja bobi, pahui ijjiñaño ojaya ena canecojo nequi pea'ai ojee ishianajo ¡a'a quea dejja tai pojji! ¡Quea nishehui a'a pojji! ¡A'a quea mimishi jjashahuabaquijji pea'ai! Jamaya poanijo Jesosa quecua'yojji jama poani miya. Eyacuiñajji quea nee nee po mee caje'yo. Jamajjeya quea ja'a jjashahuabaqui ajjaa ¡a'a Jesosaja bobi ijjiyajji, ojaya ena canecojo nequi pea'ai a'a ishijji! Quea ja'a ba'yaniya ¡quea bihui nee Jesosaja bobi ijjiacue, ojaya ena ishicue pea'ai!

<sup>28</sup> Jamajjeya Jesosaja bobi ijji jjimahuajo, ¡ojaya ena ishi jjimahuajo pea'ai jjashahuaba neineiucue jama ba'a: —¿A'a eya e'e jojo nei Jesosa Quito nijje jjapeequiani quea ja'a nee? —jjashahuabaquicue!

¡Majoya pahui ijjiacue, e'ishijji ishicue quea bihui nee pea'ai! <sup>29</sup> Jesosa Quitoja esohui ojaya bobijo miquea quea quehuajo ¡a'a ijjiyajji! Jesosa mijo mano'yonajeo jjashahuabaqui jjimaa ¡a'a oja bobi ijjiyajji! Miya ijjiajo Eyacuiñajji quea quene nee nee po chana'. Miya quea nee po mee caje. <sup>30</sup> Quea huiso miquiana nijje nequiya Jesosajo jjashahuabaqui jjima oja bobi ijji cani. Jamajjeya quea mano poani, beca cuana ca'a'ama poani. Jamajjeya beca cuana mano'yonaje pea'ai. <sup>31</sup> Miquea eba'ejjijo jjashahuabaqui majje ¡mimicue Eyacuiñajji nijje jama ba'a: —¡Ecuea mimishi cuana cuijea'yocue! — jamaya acue!

Jamajjeya Eyacuiñajjiya miquea mimishi cuijea'yo majje miya etecueajji pojjeama Jesosaja bobi ijjiñaño. <sup>32</sup> Jamatii Eyacuiñajjiya jjeya Jesosaja epeeji quea ja'a pishana quea mano, quea nee po mee cani ejjabahuejjaqui meeji, mimishi cuana epajea mee'yojji. Jamajjeya quijje Jesosaja epeeji pojjeama cuana nijje equiyo'yojji pojjeama cuaquijo eshuaja epeeji cuana nijje.

<sup>33</sup> Jamajjeya epeeji cuana, ¡shajja'ajjacue mo! ¡Miquianaaya Jesosaja bobi ijjiñaño ojee oe ijjiacue o shahuaba'yojji! ¡A'a mee nei ijji'ijjiyajji; ishoa socue cuana! <sup>34</sup> Ojjaña joya quea naba taja, quea shoe pea'ai poani equijo ca ijji'ijjihua Jesosaja bobi ijji jjimahuajo. Jamajjeya Eyacuiñajji quea tecue po ajja miquiana nijje, quea pame nee ojee Jesosaja bobi ijjiñaño.

Miquea esohui etehue'yojo, quea huiso eya miquiaaya huohui'ajjanaje. Maya eyaya huohuije miquiana huasijje poe o'oya majje.

## 12

*Edojjoshahua Pameya eseya Eyacuiñajjijo chaco meesahua cani*

<sup>1</sup> Ecuea epeeji, miqianajaya esohui etehue'yojo eya huohui'ajjanaje miqiaaya Edojjoshahua Pamejo. Jjeya nei eyaya maya huohuije miqianajaya ebajji. Edojjoshahua Pameya eseya Eyacuiñajjijo chaco meesahua cani. Ojjaña Eyacuiñajjija ejjashahuabaquijji jayojja jama ameesahua cani. <sup>2</sup> Yahuajo Jesosa Quito nijje jjapeequi jjimahua miqianajaya jjapeequinaje eshahua cuana nijje. Eyacuiñajji nisho nijje miminaje, acui ejehui'yo nijje pea'ai. Maya shajjama', nabama' pea'ai. Jamaya miqianajaya eba. <sup>3</sup> Beca cuana jama siajje pome poani ba'a: —Jesosa siajjepojji. Oya Eyacuiñajjija Bacua Ejja pojjeama —jama siajje pomeya poani.

Jamajjeya miqianajaya eba oya cuana Edojjoshahua Pame nijje jjapeequi ajja. Onijje jjapeequianijo ca ca Edojjoshahua Pameya oeyaya eseya huohui meesahua cani jama ba'a: —Esejaya Emeshi Mese nei oe nei nequi, Jesosa Quito —e'e, jamaya Edojjoshahua Pameya oeyaya eseya huohui meesahua cani.

<sup>4</sup> Edojjoshahua Pame oe neiya eseya amee cani Eyacuiñajjijo quea pame nee. Oe epeeji oe aqui ana quea pame nee Eyacuiñajjijo ameesahua cani. Beca cuana pea aqui ana quea pame nee ameesahua cani. Quea huiso aqui ana cuana Eyacuiñajjija ameesahua cani Edojjoshahua Pameya. <sup>5</sup> Esejaya Emeshi Mese oe nei yani. Ojaya nei yajjijo eseyaya chacoaña. Ohuaya ojaya epeeji cuana huoojea cani quea huiso ojaya yajjijo quea pame a'yohua. Ojaya yajjijo ohuaya chaco meesahua cani ojjaña echaco. <sup>6</sup> Eyacuiñajji oe nei yani. Ohuaya Jesusaja epeeji cuana huoojea cani ojaya echacoji cuana a'yohua. Oe epeeji oe echacoji ameesahua cani, Eyacuiñajjija. Pea epeeji pea echacoji ameesahua cani. <sup>7</sup> Edojjoshahua Pameya Jesusaja epeeji cuana quea pame ameesahua cani pea'ai. Jamajjeya ojjaña ba mee caje oya ese nijje nequi. E'e, ohuaya Jesusaja epeeji cuana quea ja'a ameesahua cani ojjaña Jesosa nijje ejjapeequi meesahuajji. <sup>8</sup> E'e, Edojjoshahua Pameya Jesusaja epeeji beca cuana quea jjashahuabaqui ja'a po mee cani Eyacuiñajjija ejjashahuabaquijji e'e jojo nei ehuohuiji. Pea epeejiya Eyacuiñajjija esohui jayojja jama onaya ba meesahua cani quea ja'a nee. <sup>9</sup> Pea epeeji cuana Jesusaja epeeji cuana quea ja'a, mete'ama pea'ai po mee cani. Beca epeeji cuana emanojaa cuana huaquia meesahua cani Edojjoshahua Pameya. <sup>10</sup> Ohuaya pea epeeji cuana ma dejjaa ajjima acani ameesahua cani. Pea epeeji Eyacuiñajjija esohui huohui meesahua cani quea ja'a nee, pea ba'e meeji. Beca cuana ba meesahua cani ache cuana e'e jojo nei ojaya, Edojjoshahua Pameja huoojea'yo poani ebajji. Ache dejja eshahua nijje quehuajje jjapeequiani ba meesahua cani pea'ai. Edojjoshahua Pameya beca cuana Eyacuiñajjija emimi mimi meesahua cani. Pea cuana ma emimi huohui meesahua cani ojjaña cuanaja ebajji. <sup>11</sup> E'e, Edojjoshahua Pameya ojjaña Jesusaja epeeji jamaya ameesahua cani quea huiso. Ojaya ejjashahuabaquijjijo ojaya epeeji cuana huoojea cani, Edojjoshahua Pameya.

*Esejaya Emeshi Mese oe nei yani; ojaya epeeji cuana oja yami jayojja jama poani*

<sup>12</sup> Ecuea eyami oe nei yani. Yaa cuana yani, equise cuana pea'ai yani. Quea huiso pea aqui ana cuana yani ecue eyamijo. Jamatii ecuea eyami oe nei. Oya jayojjaya Jesusaja epeeji cuana poani, quea huiso ojee onijje jjapeequianijo. Jamatii ojjaña oe eyami jayojja jama poani; Jesosa Quitoja eyami jayojja jama eseya poani. <sup>13</sup> Jamaya poanaje ojjaña eseya ojaya epeeji cuana poanijo. E'e, Jodio cuana, Jodio pojjeama cuana ojaya epeeji poani. Sosema' chacochoani cuana, echaco mesema' pea'ai ojaya epeeji poani. Jamajjeya Edojjoshahua Pameya eseya Jesosa Quitoja eyami jayojja jama po mee canaje ojjaña, onijje jjapeequianijo. Edojjoshahua Pameya esejo nequiya Jesusaja epeeji quea ja'a po mee cani.

<sup>14</sup> E'e, esejaya eyami oe nei yani. Jamatii yaa yani, equise yani, ecojja yani, quea huiso pea aqui ana yani esejaya yamijo pea'ai. <sup>15</sup> Ejiojji eme' jayojja jama pojjeama. Jamatii ejiojji quea pame nee. A'a ejiojji jama poaje pojja'a ba'a: —Eya eme' jayojja pojjeamajo

eyamijo enequijji pojjeama —¿a'a jamaya mimi majje enequijji pojjeama? Chojja, jamaya po majje oya jamatii eyamijo nequi, de.

<sup>16</sup> E'e, eshajja ecojja jayojja jama pojjeama. Jamatii eshajja pea'ai quea pame nee, esapajo nequi pea'ai. Eshajja jama mimijajime epojji pojjeama ba'a: —Eya ecojja jjemo eyamijo nequime —jamaya mimijaji ajja, jamatii jamaya po majje eyamijo nequime, de.

<sup>17</sup> E'e, ecuea eyami ecojja oopana pojjeama. Chojja. Eshajja yani pea'ai ejjashajja'a-jjaquijji. Ecuea eyami eshajja oopana pojjeama. Yani ehui pea'ai ejjashiye'ajjaquijji.

<sup>18</sup> E'e, Eyacuiñajjiya ecuea eyami pana ca poa. Ohuaya sa cani jayojja jama aca poa. Jamajjeya ecojja cuana, eshajja cuana, ehui cuana, quea huiso pea aquiana pea'ai pana ca poa, ohuaya. <sup>19</sup> Jamaya epana jojjemo eya ese ejja pojjeama pome. E'e, Eyacuiñajjiya ecuea eyami ecojja oopana ajjima poa. Eya ecojja oopana e'a jojjemo eya ese ejja jayojja jama pojjeama pome. Jamajjeya ohuaya ecue eyamijo quea huiso aquiana pana canaje, jjashajja'ajjaquijji po mee canaje, jjashiye'ajjaquijji po mee canaje pea'ai. <sup>20</sup> E'e jojo nei ecuea eyamijo yani quea huiso aquiana. Jamatii ecuea eyami oe nei jayojja jama poani. Oya jayojjaya Jesusaja epeeji quea huiso nee yani. Jamatii ojee onijje jjapeequianijo eseya oe jayojja jama poani, Jesusaja eyami jayojja jama poani.

<sup>21</sup> Ecuea ecojjaa eme' cajaa a'ajja poani. Esapaa ejiojji cajaa ajjima acani pea'ai. Chojja ojjaña ojee quea pame nee nee poani. <sup>22</sup> Eyami dojjojo ca'a'ama. Jamatii eyami dojjojo cuana chama' jojjemo eyami eshe pojjeama pome. <sup>23</sup> Beca eyami dojjojo e'e pojja'a hua'ama. Jamatii eseyaya eyami dojjojo ani nahue neineiaña. Pea aquiana eyamijo anijo eseyaya daqui huoshoaña bicho'ama epojji. <sup>24</sup> Jamatii pea eyamijo esapajo, emejo bicho'amajo daqui mi huoshoaña. Eyacuiñajji ca ca bicho'ama eseya eyamijo. Ojjaña aquiana eyamijo oja pana. Ojjaña eyami ojee nequia canaje oe eyamijo. Jiquio ecua eseyaya esejaya eyami nahueña ojjaña eyami, jamatii beca cuanajo se quea bicho poani jama jayojja ¡Jesusaja epeejiya pea epeeji jjapeequi meesahuacue onijje quea pame nee! <sup>25</sup> Ojjaña aquiana eyamijo ani oe eyami poani, ojee acani quea pame nee. Oe eyami pea eyamiya nahue cani. Jamajjeya eyami quea pame nee poani. ¡Ma jayojja jama eseyaya Jesusaja epeeji ojee ejjachacoqui onijje! <sup>26</sup> E'e, oe mijijje eyami quea nee poanijo, pea mijijje quea mano poaje pea'ai. Ojjaña mijijje eyami cuana quea aja poanijo, quea pame nee poaje ojjaña. Oya jayojjaya eseya Jesusaja epeeji oe eyami jayojjaya poani. Jamajjeya oe epeeji quea nee poanijo, ojjaña quea yeno poani ojo. Oe epeejiya quea pame nee nee acanijo, ojjaña onijje quea bhui nee poani.

<sup>27</sup> Jamajjeya ojaya ejjashahuabaquijji jama Eyacuiñajjiya esejaya eyami cuana pana ca poa quea huiso peapea cuana eyami. Oya jayojjaya Jesusaja epeeji cuana ojaya eyami quea huiso cuana jayojja jama poani. <sup>28</sup> Jamajjeya Eyacuiñajjiya eseya Jesusaja epeeji cuana quea huiso peapea jjashahuabaqui'yome asahua cani ojaya epeeji cuana quea ja'a epojji. E'e, ohuaya beca epeeji huohui canaje jama ba'a: —Miya ecuea ehoojeacoo Jesusa Quitojo huohuiya.

Ohuaya pea cuana huohui canaje jama ba'a: —¡Ojjaña cuiñajji yasijje esohui quea pame nee Jesusa Quitojo huohuiquicue quea ja'a nee ojjañaja eshajja'ajjajji!

Pea cuana huohui canaje jama ba'a: —¡Jesusa Quitoja epeeji cuana esohui huohuijji pocue!

Pea cuana ma dejjaa ajjima acani ameesahua canaje. Pea cuana emanojaa cuana huaquia meesahua canaje pea'ai. Pea epeeji cuana ona quea pame ba'e meesahuajji po mee canaje. Pea epeeji emeshi mese jayojja jama ojjaña jaahuanajji po mee cani. Pea cuana Eyacuiñajjiya pea emimi mimi meesahua cani. <sup>29</sup> ¿A'a ojjaña Jesusaja epeeji cuana Eyacuiñajjiya huoojea cani esohui quea pame Jesusajo huohui coohua? ¿A'a ojjaña epeeji cuana Eyacuiñajjiya esohui quea huesha huohui cani? ¿A'a ojjaña ojaya epeeji cuana esohui huohuijji poani? ¿A'a ojjaña epeeji ma dejjaa ajjima acani ameesahua cani? Chojja. <sup>30</sup> ¿A'a ojjaña epeeji cuana emanojaa cuana huaquia mee cani? Chojja. ¿A'a ojjaña ojaya epeeji cuana Eyacuiñajjiya emimi mimi meesahua cani? Chojja. ¿A'a ojjaña epeejiya ma emimi eseya esohuijo huohui cani ojjañaja ebajji? Chojja. <sup>31</sup> E'e,

Edojjoshahua Pameya eseya, Jesusaja epeeji cuana Eyacuiñajji chaco meesahua cani. ¡Miquianaaya Eyacuiñajji quea pame nee chaco neinei sa añajo quea pame nee oe acue, pea epeeji cuana quea ja'a nee eba'e meesahuajji! Jamatii eyaya miya huohuije e'e jojo nei joya ojjaña quea jea nee acani Eyacuiñajjiya ba cani quea pame nee nee. Jamajjeya ¡ojjaña quea jea acue!

## 13

### *Eyacuiñajjiya eseya ojjaña quea jea nee ameesahua cani*

<sup>1</sup> E'e, ojjaña e'e jojo nei quea jea acue jama ba'a: E'e pojja'a ojjaña dejjaja emimi, esohuidojojji emimi quea pame nee pea'ai mimi majje jamatii pea epeeji ecuea quea jea nee pojjeama. Jamajjeya ecuea pea cuana Jesosa nijje ejjapeequi meesahuajji pojjeama. Eya mimiani emimijeajji, esho'iquiaa cuiaqueyajea cani jama quea shajjaquijjo epoji. <sup>2</sup> Eyacuiñajjiya eya ojaya esohui quea huesha nee huohui meesahua cajje ojaya ejjashahuabaquijji ba meesahua cajje pea'ai, ojjaña ojaya esohui etehue'yo ba meesahua cajje pea'ai, ma dejjaa ajjima acani ameesahua cajje pea'ai jamatii pea epeeji ecuea quea jea nee pojjeama. Jamajjeya eyaya pea cuana Jesosa nijje ejjapeequi meesahuajji pojjeama. Eyacuiñajjiya eya ba cani mimishi cuijea'yo jjima pea'ai. <sup>3</sup> Ojjaña ecuea aquiana cuana aema' cuana huasijje quiaje'yo pojja'a; Jesosa nijje jjapee nishoquianijo, e'e pojja'a pea cuaa eya iña caje ejeanobiajeajji. Jamatii pea cuana quea jea nee a'ajjajo eyaya oya cuana eba'e meesahua'yojji pojjeama Jesosa nijje. Eyacuiñajjiya eya ba cani mimishi cuijea'yo jjima pea'ai.

<sup>4</sup> Pea cuana e'e jojo nei ecuea quea jea nee nee amajje oya cuana ecuea tecuea cuajjiji pojjeama. Quea bei poaje. Pea cuanaja aquiana quea jea yajji pojjeama. Ecuea ehuohuijji pojjeama jama ba'a: —Eya ca iña quea pame nee nee poani.

Pea jayojja po sa po ajja nei nei pea'ai ca iña. <sup>5</sup> Pea cuana e'e jojo nei ecuea quea jea nee neejo ecuea eniñebajji pojjeama. Pea nijje emimijajjiji pojjeama. Quea nahue pojjeama poani, equenequene cuajjiji pojjeama pea'ai. Pea cuana e'e jojo nei ecuea quea jea neejo, eya onaa quea tai acajje, aquiana napa cajje pea'ai eya quea yeno po tiitii ajja: —Onaaya eya quea mimishi acajje eyaya oya quea mimishi a pea'aije'yo —jamaya a'a jjashahuabaquijji.

<sup>6</sup> Eyacuiñajji ecuea quea jea nee poanijo ecuea onajaya mimishi cuana boti'ama poaje. Ona quea pame nee poanijo ca ca eya quea bihui nee poaje pea'ai. <sup>7</sup> Pea cuana e'e jojo nei ecuea quea jea nee poanijo e napajji cuana nijje quea quene po ajja. Oe epeeji pea epeeji sija poanijo, ecuea eshajja'ajjaji pojjeama. Jesosa nijje jjapee tiitiiquije'yo jamatii quea camaja poanijo. Jjashahuaba tiitiiquije'yo jama ba'a: —E'e jojo nei Jesusaja epeeji poanijo, ohuaya eya ba'e tiitii mee caje'yo onijje eyajo.

<sup>8</sup> Eyaya pea cuana quea jea nee atiitije'yo. Jamaya sa poani Eyacuiñajji. Jjeya ca ca Eyacuiñajjiya ojaya epeeji cuana esohui quea pame huohui meesahua cani. Jamatii eyajo huohui pajeaje'yo. Jjeya beca cuana Eyacuiñajji emimi mimi cani. Jamatii eyajo ma emimi mimi pajea caje'yo. Jjeya Eyacuiñajjiya ejjashahuabaquijji ba meesahua cani oe pojji. Quijje eyajo ojjaña ba mee caje'yo quea huiso. <sup>9</sup> Jjeya eseya Eyacuiñajjiya ejjashahuabaquijji oe pojji nei ba mee cani. Jjeya Edojjoshahua Pameya eseya Eyacuiñajjiya ejjashahuabaquijji oe pojji nei huohui meesahua cani. <sup>10</sup> Jesosa Quito poe o'oyajo ca ca eseya ojjaña Eyacuiñajjiya ejjashahuabaquijji cuana quea pame nee nee ba mee caje'yo.

<sup>11</sup> Jama poaje ba'a: Eya esho'yahuajo oe pojji jjashahuabaquinaje quea pame pishana. Ecuea esohui cuana quea pame pishana poanaje pea'ai. Tii majje ca ca etii jama jjashahuabaquime poanaje, quea ja'a nee. Quea ja'a nee huohuinaje pea'ai. <sup>12</sup> Oya jayojjaya jjeya eseyaya Quito ba jjima aña ecojjaa. Jamajjeya ojjaña ojaya ejjashahuabaquijji ba mee jjima acani. Quijje poe o'oya majje ese cojja nei nequi oya mimije'yo. Jjeya ohuaya ojjaña esejaya ejjashahuabaquijji ba neinei cani. O poe o'oyajo eseyaya ojaya ejjashahuabaquijji ba neineije'yo pea'ai quea ja'a nee. Oya eseyaya ba neineije'yo pea'ai.

<sup>13</sup> E'e, Jesosa Quito poe o'oyajo, eseya onijje jjapee tiitiquije'yo. Ojaya epoe'yojjijo eseya jja'ishoa'ajjaquiani. Jjeya esejaya ojaya epeeji cuana quea jea nee poani. E'e, Jesosa Quitoja epoe'yojjijo jja'ishoa'ajjaquiani, onijje jjapeequiani pea'ai. Ojaya epeeji cuana quea jea nee atiitiaña pea'ai. Jamaya Eyacuiñajji sa poani.

## 14

### *Edojjoshahua Pameya eseya chaco meesahua cani Jesosa nijje*

<sup>1</sup> Jamajjeya jashahuaba tiitiquicue pea cuana quea jea nee e'ajji! Jamaya mimicue ba'a: —Eyacuiñajji, ¡Edojjoshahua Pame huoojeacue e que mi jayojja ameesahuaa, Jesusaja epeeji cuana quea ja'a nee onijje ejjapeequi meesahuajji! E'e, ¡miquae ejjashahuabaquijji huohui meesahuacue ojjaña meshi yasijje!

<sup>2</sup> Ojjaña joya Eyacuiñajjija emimijo mimiani onajaya ba jjima esohuijo Eyacuiñajji nijje mimiani, pea cuana nijje pojjeama. Edojjoshahua Pameya maya mimi meesahua cani. Jamatii pea cuanaja maya emimi quea quehua. Eyacuiñajjiya ohuaye nei shajja'ajja cani.

<sup>3</sup> Eyacuiñajjija esohui cuana quea ja'a nee huohui canijo ca ca Jesusaja epeeji cuana quea ja'a shajja'ajja cani. Onijje jjapee neinei qui meesahua cani. Quea bihui nee po meesahua cani pea'ai. <sup>4</sup> Ojjaña joya Eyacuiñajjija emimijo mimiani onijje nei mimiani. Oya oe nei quea bihui nee poaje. Joya Eyacuiñajjija esohui quea ja'a nee huohuiji poaniya ca ca quea huiso Jesusaja epeeji cuana quea bihui nee po mee caje.

<sup>5</sup> Eya miquianajo jashahuabaquiani jama ba'a: Ojjaña miquianaya Eyacuiñajjija emimijo mimianajo jamaya quea pame pishana poaje. Eya quea bihui pishana poaje. Miquianaaya Eyacuiñajjija esohui joya ojjañaja eba esohuijo huohuiañajo ca ca jamaya quea pame nee nee, eya quea bihui nee nee poaje. E'e, Eyacuiñajjija esohui quea ja'a nee huohui majje pea cuana Jesosa nijje jjapeequi meesahuaña. Eyacuiñajjija pea emimijo mimi majje aje oe pea cuana Jesosa nijje ejjapeequi meesahuajji pojjeama. Pea epeejiya Eyacuiñajjija pea emimi, ma ojjañaja quea quehua shajja'ajja majje cahuhui cahua esejaya esohuijo. Jamaya ohuaya huohui majje ojjaña Jesusaja epeeji cuana quea pame nee jjapeequi meesahua caje Jesosa nijje.

<sup>6</sup> Jamajjeya epeeji cuana, eya miquiana que poe majje mimi ajja pea emimijo joya miquianajaya bajjima esohuijo. Chojja, maya emimi shajja'ajja majje miquianaya Jesosa nijje ejjapeequijji pojjeama. Quea ja'a nee ca ca eyaya Eyacuiñajjija ejjashahuabaquijji miquianaya ba meesahuaje. Ojaya esohui eyacua Jesusaja ba meesahuaje pea'ai.

<sup>7</sup> ¡Jiquio esohuijo jashahuabaquicue pea'ai! Dejja cuanaja ba jjima pishanajo dehue quea ja'a nee miamia ajja. E'ñaqueyajji baja jjimajo quea ja'a ñaqueyaqueya ajja pea'ai. Jamatii quea shajjaquijjo poaje, quea quehua. Jamajjeya ojjañaja eshajja'ajjajji pojjeama. <sup>8</sup> Echacomeejjiya eshe'ana mia jjimajo, echacojji cuana poqui ajja chachhua.

<sup>9</sup> Oya jayojjaya miquianaya pea emimijo joya onajaya quea quehuajo mimianajo, miquae esohui onajaya eshajja'ajjajji pojjeama. Jamajjeya ¡esohui joya onaja quea ja'a nee huohucue ojjañaja ebajji! <sup>10</sup> E'e, dejja cuana quea huiso meshi cuanajo ba'yani. Quea huiso emimijo mimiani pea'ai. Jamatii ojjaña emimi ojjaña meshijo quea ja'a nee poani, ma meshijo ba'eja quea ja'a. Jamajjeya ojjañaja emimi onijje ba'e cuanaja quea ja'a nee. <sup>11</sup> Jamatii oe dejja pea emimijo joya ecuea quea quehuajo mimianajo oya pea dejja, eya ojaya pea poani pea'ai. <sup>12</sup> Jamajjeya miquianaya Edojjoshahua Pame nijje quea pame nee a sa poanajo Edojjoshahua Pame nijje mimicue jama ba'a: —¡Eya ameesahuacue quea pame nee, quea ja'a nee! Jamajjeya eya quea huiso Jesusaja epeeji cuana onijje jjapeequi meesahuaje. E'e, ¡quea ja'a nee nee Eyacuiñajjija esohui huohui meesahuacue mo!

<sup>13</sup> Jamajjeya Jesusaja epeeji Eyacuiñajjija emimijo joya pea cuanaja quea quehuajo mimi majje oya Eyacuiñajji nijje camimiahua jama ba'a: —Ecue Chii, ¡joya o miminaje mo huohui meesahua'yocue pea epeeji cuanaja quea ja'a nee epojji! ¡Maya esohui mo huohui meesahuacue quea ja'a nee onajaya ebajji! —jamaya mimicue Eyacuiñajji nijje.

<sup>14</sup> E'e, Eyacuiñajjija pea emimijo ma ecuea ba jjimajo onijje mimi mee cajje jamatii ma e miminaje ecuea quea quehua poani pea'ai. Edojjoshahua Pameya eya mimi meesahua



cani ecuea ejjashahuabaquijji pojjeama. <sup>15</sup> Jamajjeya eya jama poaje ba'a: Ecuea ejjashahuabaquijji quea ja'a nee jayojja eya mimije Eyacuiñajji nijje ecuea esohuijo; pea emimijo joya ecuea ba jjima esohuijo pea'ai eya onijje mimije pea'ai. Edojjoshahua Pameya eya sohuicuaya meesahua cani pea emimijo joya ecuea ba jjima esohuijo, ecuea edojjoshahua Jesusajo sohuicuayani; ecuea ejjashahuabaquijji quea ja'a nee jayojja jama eya sohuicuayani ecuea esohuijo pea'ai. <sup>16</sup> Miquiaaya pea emimijo Eyacuiñajji bihuiañaajo, pea epeejjija minijje Eyacuiñajji ebihuiajji pojjeama. Ojaya ba jjima miquea esohui. <sup>17</sup> E'e, miyaya Eyacuiñajji bihuiaña quea pame nee. Jamatii miquea emimi onajaya quea quehua. Jamajjeya miyaya Jesusaja epeeji cuana onijje jjapeequi sahua jjima aje.

<sup>18</sup> Miquianaya oe pojji mimiani Eyacuiñajjija pea emimijo. Eyacuiñajjiya eya ojaya pea emimijo mimi meesahua canaje quea huiso. Jamajjeya eya onijje mimiani jama ba'a: — Jamaya Eyacuiñajji, miyaya eya quea pame nee anaje.

<sup>19</sup> Jamatii Jesusaja epeeji cuana ojee nequiani Eyacuiñajjija esohui shajja'ajjaji, eyaya quea ja'a nee huohui sa aña joya onaja ojjaña eba esohuijo. Esohui quea ja'a nee, quehua'ama mimianijo, ojjaña shajja'ajja caje quea ja'a nee. Jamaya quea pame nee nee. Huohui sa po ajja quea huiso esohui pea emimijo, joya onajaya ba jjima esohuijo. Jamaya quea pame pishana.

<sup>20</sup> Ecuea epeeji cuana, ¡quea sho'i tai jayojja jama a'a jjashahuabaquijji! ¡Quea ja'a nee jjashahuabaquicue! ¡Jesusa Quitoja esohui ba neineicue! ¡A'a quea mimishi ba'ejji pea'ai!

<sup>21</sup> Eyacuiñajjiya esohui yahuajo nei tehue mee ca poa jama ba'a:

“Pea cuana pea meshijo ba'e, ma pea esohuijo mimiani pea'ai eyaya huoojeaje Jodio cuana jjabahuejjaqui meeya. Jamatii oya cuana aje oe o shajja'ajja sa po ajja poaje”.

Jamaya Eyacuiñajjija esohui poa.

<sup>22</sup> Jamajjeya Jesosa Quitoja epeeji etiiya Eyacuiñajjija pea emimi shajja'ajja majje ba caje Eyacuiñajji e'e jojo nei ona nijje nequi. ¡Jesusaja epeeji pojjeama cuana ca oe Eyacuiñajjija esohui huohuicue; joya o mimiani esohuijoya oe huohuicue! Esohui shajja'ajja majje oya cuana jjapeequije'yo Jesosa nijje. <sup>23</sup> Jamajjeya Jesusaja epeeji cuana ojee nequianijo, e'e pojja'a ojjaña miquianaya Eyacuiñajjija pea emimijo mimije. Jesusaja epeeji pojjeama cuaa, ojaya epeeji eyacua pea'aiya ma emimi shajja'ajja majje ¿ae shai oya cuana jjashahuabaquije? Miquianaya onajaya ba jjima esohuijo mimiani shajja'ajja majje jama acaje ba'a: —¡Dee! Jesusaja epeeji cuana niñe poqui'yonaje. Jamajjeya quea quehua mimiani —acaje.

<sup>24</sup> Jesusaja epeeji cuaa ojee nequi majje Eyacuiñajjija esohui quea ja'a nee huohui canijo ca ca, pea cuana shajja'ajja majje ojaya mimishi cuanajo quea yeno poaje. E'e, Jesusaja epeeji pojjeama cuana, ojaya epeeji eyacua cuana pojja'a Eyacuiñajjija esohui shajja'ajja majje quea mete poaje jama ba'a: —Eyacuiñajjiya eya quea nee nee po mee caje'yo, de, ecuea mimishijo.

<sup>25</sup> Eyacuiñajjija esohui huohuijjiya ma dejja cuanaja ejjashahuabaquijji tai huohui cajo, shajja'ajja majje oya cuaa Eyacuiñajji bihuia caje ecui'oshajjajo nequiya. Jama poaje ba'a: —E'e jojo nei Eyacuiñajji miquiana nijje nequi —acaje cuaa. Jesosa nijje jjapeequije'yo pea'ai.

*¡Jesusaja epeeji ojee nequianijo Eyacuiñajjija esohui huohuicue quea ja'a nee!*

<sup>26</sup> Jamajjeya ecuea epeeji cuana, ¡bacue jiquio esohui! Miquianaya ojee nequi majje Eyacuiñajjija esohui huohuiya, jama acue ba'a: Oe epeejiya Jesosa cabihuia cahua esohuicuayajjijo. Pea epeejiya Eyacuiñajjija esohui cahuohui cahua. Peaa Eyacuiñajjija ejjashahuabaquijji pea cuana que cahuohui cahua. Majoya pea epeeji Eyacuiñajjija pea emimijo mimi sa poanijo, peaa cahuohui cahua esejaya esohuijo. Jamajjeya ¡Jesusaja epeeji ojee nequianijo quea ja'a nee acue! ¡Ojjaña Eyacuiñajji nijje jjapeequi meesahuacue! <sup>27</sup> E'e pojja'a beca cuana Eyacuiñajjija pea emimijo mimi sa poani. ¡Beca cuana, pea beca peejjima pojja'a mimi meecue, quea huiso pojjeama! Ma pea emimi

mimianijo, ja'a ojee mimi meejji! ¡Oe epeeji mimi pajea'yajo, pea mimi meecue! ¡Oya mimi pajea'yajo, pea mimi meecue! Ma epeeji cuana Eyacuiñajjija pea emimijo mimi majje, peaa cahuohui cahua esejaya esohuijo ojjañaja ebajji. <sup>28</sup> Pea epeeji ma emimi ba jjimajo, ja'a mimi meejji Jesusaja epeeji cuana ojee nequi yasijje! Oya oe nei nequi majje Eyacuiñajjija emimijo camimiahua Eyacuiñajji nijje.

<sup>29</sup> Miquiana ojee nequijo beca esohui huohuijjiya, pea beca peejjima pojja'aa Eyacuiñajjija esohui quea ja'a nee cahuohui cahua, quea huiso pojjeama. Pea cuaa cashajja'ajja cahua. Shajja'ajja majje cajjashahuabaquiahua jama ba'a: —¿A'a e'e jojo nei Eyacuiñajjija esohui huohui canaje? —cajjashahuabaquiahua.

<sup>30</sup> Jamatii Edojjoshahua Pameya pea epeeji jjashahuabaqui meesahua caje, oya pea'ai camimiahua ojjañaja eshajja'ajjaji. E'e, esohui huohuijjiya huohui pajea cajo, ma epeejiya Eyacuiñajjija ejjashahuabaquiji cahuohui cahua. <sup>31</sup> Jamaya miquianaaya Eyacuiñajjija ejjashahuabaquiji ba majje huohuije ojjaña. ¡Pea acaje jja a'a huohuijji! ¡Oe epeejiya huohui pajea cajo, pea epeejiya cahuohui cahua! Jamajjeya Jesusaja epeeji cuana ba mee caje quea huiso Eyacuiñajjija esohui. Quea bihui nee poaje pea'ai. <sup>32</sup> Jesusaja esohui huohui sa poanijo ¡ca'ishoa cahua! ¡Pea mimi pajea'yajo cahuohui cahua! <sup>33</sup> E'e, Eyacuiñajjija equijo ojaya epeeji cuaa ja'a becaje huohuijji! Quea shajjaquijjo poaje. Eyacuiñajjija ojaya epeeji cuana ojee shajja'ajja mee cani quea bei. ¡Bacue! Ojjaña Eyacuiñajjija equi cuanajo Jesusaja epeeji ojee nequi majje quea ja'a nee esohui huohui cani; becaje pojjeama huohui cani.

<sup>34</sup> Epona cuana, ojjaña Eyacuiñajjija equijo ojee nequianijo, ja'a mimijji Eyacuiñajjija esohui huohuijji mimianijo! ¡Jjashajja'ajjaquicue oe! Jodio cuanaja esohui etehue'yo yahuajo jama poa pea'ai ba'a:

“¡Eyacuiñajjija equijo epona cuana cajjashajja'ajjaquiahua! Eyacuiñajjija epeeji cuana huoojeajji pojjeama oya cuana”.

Jamaya poa yahuajo. <sup>35</sup> Esohui shajja'ajja majje e'e pojja'a epona cuana huohui'ajja sa poani ma esohuijo. Jamatii ¡Eyacuiñajjija equijo a'a huohui'ajjaji! Jamaya quea pame pojjeama. Ojaya equi yasijje poqui majje ojaya yahue cahuohui'ajja cahua, eponaa.

<sup>36</sup> Ecuea epeeji cuana Conitojo ba'e, miquianajaya eba Eyacuiñajjija esohui miquiana que poe coo jjima. Chojja. Pea cuaa ojaya esohui shajja'ajja canaje miquianaja shajja'ajja jjimahuajo. Jamajjeya ¡shajja'ajjacue mo! <sup>37</sup> Miquianaya beca cuana jama poani ba'a: —Eya Eyacuiñajjija esohui huohuijji e'e jojo nei poani. Eya Edojjoshahua Pameya quea pame nee ameesahua caje'yo Eyacuiñajjijo. Jamajjeya ¡miquianaya jjabahuejjaquicue ecuea esohui Eyacuiñajjija esohui e'e nei poani! <sup>38</sup> Ojjaña joya miquiana nijje nequi ecuea esohui shajja'ajja sa po ajja, ja'a oya cuana shajja'ajjaji!

<sup>39</sup> Ecuea epeeji cuana, jamajjeya ¡Eyacuiñajjija esohui huohui neineicue! Pea epeeji Eyacuiñajjija pea emimijo mimi sa poanijo ¡oya camimiahua! <sup>40</sup> Jamajjeya ¡Eyacuiñajjija equijo ojee nequi majje ojjaña quea ja'a nee acue! ¡Ojjaña Jesusaja epeeji cuana shajja'ajjacue quea ja'a nee pea'ai!

## 15

### *Jesosa Quito mano'yo majje shequi o'oyanaje*

<sup>1</sup> Jjeyahua nei eya miquiana huasijje huohui sa o'oya poani esohui quea pame nee Jesosa Quitojo. Yahuajo pishana ma esohui shajja'ajja majje miquianaya onijje jjapeequi'yonaje quea ja'a nee. <sup>2</sup> Ma esohui Jesosa Quitoja eyaya huohuinaje. Shajja'ajja majje miquianaya onijje jjapeequi'yonaje quea ja'a nee, cuaqui yasijje epoqui'yojji pojjeama. Jamatii Jesosa Quito nijje e'e jojo nei jjapeequi jjima ca mi ca oe cuaqui yasijje poquije'yo.

<sup>3</sup> E'e, ma esohui quea pame nee Jesosa Quitojo shajja'ajja majje eyaya huohuinaje miquianajaya eshajja'ajjaji jama ba'a: Eyacuiñajjija esohui yahuajo etehue'yo jayojja jama e'e jojo nei Jesosa Quito esaja mimishi cuanajo mano'yonaje. <sup>4</sup> Jesosa Quito

mano'yajo, ojaya epeeji cuaa oya jjani ai yasijje huananobia ca'ya poa. Pea beca peejjima cahui po majje, Eyacuiñajjiya oya, Jesosa Quito shequi mee ca o'oya poa. E'e, Eyacuiñajjiya esohui yahuajo nei etehue'yo jayojja jama aca poa Jesosaa. <sup>5</sup> Eshe o'oya poajo, Penohua oya ba canaje. Majoya ome miji pea'ai pea becaa, 12 huisomeya ojaya pea epeeji cuaa Jesosa Quito ba ca'yonaje, oja huoojea'yo cuaa. <sup>6</sup> Majoya quijje pishana quea huiso ojaya epeeji cuaa, 500 huisomeya ojee jjachichaqui majje Jesosa Quito ba canaje eshe o'oya. Quea huiso ma epeeji jjeya eshe enequi'yo. Beca cuana mano'yonaje. <sup>7</sup> Majoya pea pojajajo Satiacohua Jesosa Quito ba canaje eshe o'oya. Majoya ojjaña oja huoojea'yo cuaa oya ba canaje eshe o'oya. <sup>8</sup> Majoya eyaya quijjeyejje neiya Jesosa Quito banaje pea'ai. E'e, yahuajo eya ojaya epeeji pojjeama poa. Jjeya ca ca eya ojaya epeeji po mee ca'yonaje pea'ai. <sup>9</sup> Jamajjeya eya quea pame pishana. Pea oja huoojea'yo cuana quea pame nee poani. E'e, o ba jjimahuajo eyaya ojaya epeeji cuana janobajjima nei napanaje. Jamatii Eyacuiñajjiya eya babaca canaje Jesosaja huoojea'yo epojji pea'ai. <sup>10</sup> Eya Eyacuiñajjiya quea jea nee nee poani. Jamajjeya ojaya esohui huohuiji po mee canaje, Jesosaja huoojea'yo po mee canaje pea'ai. Ohua huoojea cajje eyaya ojaya esohui huohui neinei'yonaje. Jesosaja pea ehoojea'yo cuaa quea huiso pishana chaco canaje ojo. Eyaya ca ca ojo janobajjima nei chaco tiitiaña ohuaya eya chaco meesahua canajejo. E'e, ohuaya eya chaco meesahua ajja jojjemo eyaya ojo chaco jjima ame. <sup>11</sup> E'e pojja'a pea ehoojea'yoja esohui Jesosa Quitojo miquianaaya shajja'ajjanaje. E'e pojja'a ecuea esohui ojo shajja'ajjanaje. Jamatii, ojjaña ecuaaya ma esohui quea pame Jesosa Quitojo huohuiaña. ¡Shajja'ajja majje miquianaaya ojaya esohui jayojja jama e'e jojo nei ba'ecue!

*Jesosa Quitoja epeeji cuana quijje eshe o'oya poaje*

<sup>12</sup> E'e, miquiana huasijje ecuaaya huohuinaje jama ba'a: —Jesosa Quito mano'yajo, Eyacuiñajjiya oya shequi mee ca o'oyanaje.

Jamajjeya ¿apiojji acuae jja oe miquianaya beca cuana jjeya sijje poani? Jama ba'a: —Eseya mano'yajo quijje eshequi mee'yojji pojjeama —¿apiojji jamaya sijje poani?

Chojja. Shequi mee caje o'oya eseya. <sup>13</sup> ¡Bacue, oe! Mano'yo majje eshe o'oya po meemea ajja jojjemo Jesosa Quito mano'yo majje shequi mee o'oya jjima acaquiaye pea'ai. Chojja. Oya shequi mee ca'ya poa, Eyacuiñajjiya. <sup>14</sup> Oya eshe o'oya pojjeama poa jojjemo ecuanaja esohui quea pame nee ojo e'e nei pojjeama pome. Oya mi shequi o'oya poa jojjemo miquianaya onijje jjapeequi jjima pome pea'ai. <sup>15</sup> Ecuaaya huohuiaña jama ba'a: —Eyacuiñajjiya Jesosa Quito shequi mee ca'yonaje —jamaya e'e nei pojjeama jojjemo ecuaa sijje ponequime. Chojja, de. ¡Shajja'ajjacue mo! Ma sijjepojji cuanaja esohui e'e nei poani jojjemo ca emano'yo cuana shequi'yo jjima pome, Jesosa Quito shequi'yo jjima poquiaye pea'ai. Chojja, ecuea eba oya shequi'yonaje. <sup>16</sup> E'e, emano'yo cuana shequi'yo ajja jojjemo Jesosa Quito pea'ai shequi'yo jjima poquiaye. <sup>17</sup> Oya shequi o'oya jjima jojjemo miquianaaya sijjepojji esohui shajja'ajja'yome, Jesosa nijje jjapeequi jjima pome. E'e, Jesosa Quito shequi o'oya jjima poa jojjemo Eyacuiñajji quea quene nee tii pome, miquianajaya mimishi cuijea'yo jjima pea'ai pome. Chojja, ecuea eba Jesosa Quito shequi o'oyanaje. <sup>18</sup> Oya shequi o'oya jjima jojjemo ojaya epeeji yahuajo mano'yo cuana cuaqui yasijje poquiyoquiaye. Chojja, ecuea eba Jesosa Quito shequi o'oya poa. <sup>19</sup> E'e, eseya quea bihui nee onijje jjapeequi mee canaje jiquio meshijo ba'yanijo. Jamatii eseya eshe o'oya po mee ajja jojjemo eyajo onijje ba'e tiitii mee'yo jjima acame. Jamaya poani jojjemo ojjaña cuana esejo mimi'yome jama ba'a: —Pabohua ecuaa sijje acanaje, de. “¡Jesosa Quito nijje jjapeequi'yocue!” sijje a'yome acanaje.

Chojja, ecuea eba eseya eshe o'oya po mee caje'yo. <sup>20</sup> E'e jojo nei jamaya poanaje ba'a: Eyacuiñajjiya Jesosa Quito shequi mee ca o'oyanaje, eyami eyacua acoo ca'yonaje emano o'oyajji pojjeama. Jamajjeya esejaya eba ohuaya e'e jojo nei Jesosaja epeeji cuana ojjaña tii shequi mee caje o'oya emano o'oyajji pojjeama. <sup>21</sup> E'e, Adana quea mimishi poa sosejje mano mee ca'ya poa. Jamajjeya ojjaña manoj'e'yo, ba'e tiitii ajja meshi cuanajo ba'eca. Jesosa Quitohua ca ca quea pame nee nee acanajejo, ojjaña eshe o'oya po mee caje'yo.

<sup>22</sup> Ojjaña cuana Adanaja osecua cuana poanijo o jayojja quea mimishi poani. Jamajjeya Eyacuiñajji nijje ba'e meemee ajja eyajo. Jesosa Quito nijje jjapeequi majje ca ca ohuaya eseya ba'e tiitii mee caje'yo onijje eyajo eshe o'oya po mee'yo majje. <sup>23</sup> ¿Ache ebionei shequi mee ca o'oyanaje? Eyacuiñajjiya Jesosa Quito ebionei shequi mee ca o'oyanaje. Quijje poe o'oya majje ohuaya ojaya epeeji cuana shequi mee caje o'oya.

<sup>24</sup> E'e, quijje poe o'oya majje Jesosa Quito ojjañaja Emeshi Mese nei poaje'yo, ojjaña huoojea'yojji. Jamajjeya ohuaya ojjaña quea mimishi poani jeabichajea'yo majje iña caje'yo. Iña majje shajja'ajja mee caje'yo. E'e, ohuaya Edosiquiana nei shajja'ajja mee caje'yo pea'ai. Ojjaña eshahua cuana pea'ai, ojjaña emeshi mese quea tai cuana pea'ai shajja'ajja mee caje'yo, Jesosa Quitohua. Jamaya amajje ohuaya ojjaña cuana ojjaña meshi cuanajo ba'e oja Chii bihuia mee caje'yo jama ba'a: —Eyacuiñajji, miya quea ca'a nee nee ojjaña huoojea'yojji. ¡Ojjaña miya cashajja'ajja cahua! —jamaya ojjaña amee caje Jesosaa.

<sup>25</sup> E'e, Eyacuiñajjiya Jesosa Quito ojjaña mimishi cuana, eshahua cuana pea'ai jeabichajea meesahua cani. Jeabichajea jeyojeyo majje oya, Quito Emeshi Mese oe nei nei poaje'yo; ojjaña huoojea'yojji nei poaje'yo. <sup>26</sup> Yahuaajo mimishi aca poa sosejje mano poquipoqui'yani. Quijjejeyje nei ese mano mee'yoyji chama'yo tii a'yo majje ojjaña cuana eshe o'oya po mee caje'yo, Jesosa Quitohua. Mano'yo ajja tii tii po mee caje'yo. <sup>27</sup> Yahuaajo nei Eyacuiñajjiya esohui etehue'yojo jama poa ba'a: “Eyacuiñajjiya ojjaña jeabichajea'yo majje ojjaña huoojea'yoyji po mee caje'yo oya”. Jamaya yahuaajo Eyacuiñajjiya Jesosa Quitojo aca poa.

Jamatii Jesosa Quito Eyacuiñajji huoojea'yoyji pojjeama. Ojjaña pea cuana huoojea'yoyji ca ca Quito po mee caje'yo, Eyacuiñajjiya. <sup>28</sup> E'e, Jesosa Quito ojjaña quea mimishi cuana jeabichajea sahuamee caje Eyacuiñajjiya, oya ojjaña huoojea'yoyji po mee caje'yo. Majoya oja Chii nijje Jesosa Quito mimije jama ba'a: —Ecue Chii, miya e huoojea'yoyji poani tii tii —jamaya poaje oja Bacua Ejja Jesosa Quito.

E'e, Eyacuiñajji e'e nei ojjaña huoojea'yoyji poaje'yo tii tii; eyajo nequi cuana, meshijo ani cuana pea'ai huoojea'yoyji poaje'yo tii tii.

<sup>29</sup> E'e jojo nei Eyacuiñajjiya eseya shequi mee caje o'oya. Jamatii beca cuana jama poani ba'a: —Emano'yo cuana eshequi mee o'oyajji pojjeama.

Beca epeeji cuana quea quehua jjashahuabaquiani jama ba'a: —Yahuaajo Jesusaja epeeji mano'ya poa Eyacuiñajjiyo besa mee jjima. Jamajjeya emano'yoja yajjiyo ojaya epeeji eshe nequi Eyacuiñajjiyo besa mee cani cuaa emano'yoja bajjanijo, emano'yo cuana cuaquijo equiyo'yoyji pojjeamajo —jamaya beca cuaa acani. Oya cuana jjashahuabaquiani ojjaña cuana shequi mee caje o'oya. Jamajjeya jamaya acani.

<sup>30</sup> Eyacuiñajjiya eseya eshe o'oya epo mee'yoyji pojjeama jojjemo ¿ajeo acuae ecuaaya ojjaña pojajajo Jesosa Quitoja sohui huohuime? Ojaya esohui huohuiañajo pea cuaa ecuaana quecua nei nei sa acani. <sup>31</sup> Epeeji cuana, e'e jojo nei Eyacuiñajjiya eseya shequi mee caje o'oya. Miquiana esejaya Emeshi Mese nei Jesosa Quitoja esohui shajja'ajjanajejo, eya quea bihui nee. Jamatii pea cuaa quecuapana caniya tii eya Jesosa Quitojo chacochoani quea bihui nee. <sup>32</sup> E'e, eshahua epeeji cuaa ibia jama quea mase neeya Epesojo ba'eya eya beshahua nei mano mee ca'yonaje eya esohui ehuhui poajejje. Jesosa Quito eshe o'oya po ajja poa jojjemo ¿apiojji shai eyaya esohui huohui tiitiime so'o? Quea camaja nee poanaje. Dejjja mimishi cuaa huohui cani jama ba'a: —Mecahuajje ecuaana manojeyo eshequi'yoyji pojjeama. ¡Jamajjeya jjeyahua nei e'ijja'ijja, e'ishi'ishi pea'ai! —poani.

Jamatii eshe epo o'oyajji pojjeama jojjemo eseya jamaya po pea'aime. <sup>33</sup> ¡A'a quea quehua jjashahuabaquijji! ¡A'a onaaya miya jjadasia meequijji! Pea cuana sijje poani jama ba'a: —Ecuana eshequi mee o'oyajji pojjeama.

¡Onijje a'a jjapeequijji! O jayojjaya mi po chana', quea mimishi. <sup>34</sup> Jamajjeya ¡pajea'yocue ejjashahuabaquijji quea quehua! ¡Jesusaja esohui jayojja jama po o'oyacue!

¡Esohui quea quehuajo a'a jjashajja'ajjaquijji! Beca cuanaja Eyacuiñajjiya esohui e'e nei ba jjima. Eyaya miquianaya huohuiaña quea bicho epojji.

*¿Achajja shequi o'oyame acuae se poaje?*

<sup>35</sup> E'e pojja'a miquianaaya eya huohui'ajjanaje jama ba'a: —¿Achajja shai Eyacuiñajjiya emano'yo cuana shequi mee caje o'oya? ¿Ache eyami shai esejaya poaje'yo? ¿A'a eyami eyacua?

<sup>36</sup> Miquianaya quea quehua jjashahuabaquianijo ¡bacue! Anoso quecua jjima tii ajja. Quejo quecua cajje meshijo pohua'yani. Siobijje pohua majje ejjii chama'yo poani, meshi pojji po'yani. <sup>37</sup> Quejo quecua cani cuaa anoso, pea eso' pojja'a. Anoso sa' bana ca ajja. Chojja, eso' pohua majje esa' tiije'yo. <sup>38</sup> Eyacuiñajjiya eso' pohua mee'yo majje esa' tii mee cani. Jamajjeya anoso pohua majje anoso sa' tiiani. Pea same anoso, huenehuene sa' jayojja pojjeama. Jamaya Eyacuiñajjiya pana ca'ya poa.

<sup>39</sup> Oya jayojja eyami cuana: Oe eyami pea eyami jayojja pojjeama. Quea huiso peapea yamime yani. Ijjiacajji pea yamime, dejja jayojja jama pojjeama. Cuichojjiya eyami pea. Jai cuana pea yamime, cuichojjiya jama pojjeama. <sup>40</sup> Oya jayojjaya eyajo Eyacuiñajjiya esohuidojojji cuana yani quea huiso nee. Oya cuana yamima', dejja cuana jama pojjeama. Esohuidojojji cuaa quea pame acani Eyacuiñajjiya yajjiyo. Jamatii dejjaa acani jayojja jama pojjeama acani. Dejja cuanaja eyami quea bame pea'ai. Eseyaya quea pame ña Eyacuiñajjiya yajjiyo pea'ai. <sup>41</sup> Oya jayojjaya eshequi epojjajo quea pame nee. Ba'i eshequi jayojja jama pojjeama. Jamatii ba'i quea pame nee pea'ai. Majameta ba'i jayojja jama pojjeama. Jamatii majameta quea pame nee pea'ai. Oe majameta pea majameta jayojja jama pojjeama. Oe quea jiji nee, pea quea jiji pishana. Jamatii ojjaña quea pame nee.

<sup>42</sup> Jiquio ecua anoso quecua cajje Eyacuiñajjiya esa' pohua mee cani jayojja jama eseya mano'yajo, Eyacuiñajjiya eshe o'oya po mee caje'yo. E'e, mojea ca'yajje esejaya eyami ihuije'yo. Chama'yo tii poaje'yo. Eshe o'oya po mee ca'yajje ca ca emano'yoyji pojjeama. Eyami eyacua poaje'yo, quea pame nee nee esejaya. <sup>43</sup> E'e, esejaya eyami mojea ca'yajje ihuije'yo. Ca'a'ama. Eshe o'oya po mee majje ca ca quea pame nee po mee caje'yo, Eyacuiñajjiya. Pea eyami eyacua quea ca'a nee poaje'yo emano beca'yoyji pojjeama tii. <sup>44</sup> Jjeya meshijo ba'yanijo esejaya eyami ca'a'ama. Manoje'yo. Ojjaña cuana eseya jamatii ihuije'yo. Eshe o'oya po majje ca ca pea eyami poaje esejaya. Eyajo anicaja jayojja jama poaje'yo. E'e, jjeya esejaya eyami meshijo eba'ejji ca'a'ama. Jamajjeya e'e jojo nei quijje Eyacuiñajjiya esejaya pea eyami pana caje'yo eyacua, quea ca'a nee eyajo eba'e tiitii'yoyji.

<sup>45</sup> Eyacuiñajjiya esohui etehue'yo jama poa ba'a: “Eyacuiñajjiya ebionei dejja Adana bajjani pana ca'ya poa. Eshe po mee ca'ya poa”. Jamaya yahuajo nei nei poa.

Adanaja eyami ca'a'ama poa. Quijje Jesosa Quitohua eseya eshe o'oya po mee cajje esejaya eyami eyacua poaje'yo, pea eyami. Eyajo anicaja jayojja jama poaje'yo quea ca'a nee, ihui'yo ajja. <sup>46</sup> Eyacuiñajjiya esejaya eyami ca'a'ama ebionei pana ca'ya poa meshijo eba'ejji. Quijje Jesosa Quitohua esejaya eyami eyacua pana caje'yo quea ca'a, quea pame nee pea'ai eyajo eba'e tiitii'yoyji. <sup>47</sup> Eyacuiñajjiya ebionei dejja Adana bajjanija eyami pana ca'ya poa meshi, meshijo eba'ejji. Shequi o'oya majje Jesosa Quitoja eyami eyacua poa, meshi pojjeama. Pea eyami ojaya, de, quea ca'a nee eyajo e'ani tiitii'yoyji. <sup>48</sup> Ojjaña cuana meshijo ba'e Adana jayojja. Eyami ca'a'ama. Meshi oopana. Jesusaja epeeji cuana ca ca o jayojja jama poaje'yo quea pame nee, quea ca'a nee onijje eyajo eba'e tiitii'yoyji. Eyami meshi pojjeama poaje. <sup>49</sup> Jjeya meshijo ba'yanijo esejaya eyami ebionei dejjaja eyami jayojja poani, meshi oopana. Quijje eyajo ba'e majje eseya Jesosa Quitoja eyami eyacua jayojjaya poaje'yo, meshi pojjeama.

<sup>50</sup> Epeeji cuana, ¡shajja'ajjacue ecuea esohui! Ojjaña meshijo ba'eja eyami ca'a'ama, e'ihui'yoyji, meshi pojji epo'yoyji, Jesosa Quitoja eyami eyacua jayojja pojjeama. Ba'e meemee ajja eyajo Eyacuiñajjiya cuiñajjiyo. E'e, jjeya esejaya eyami meshi, de, eshe epojji tiitii pojjeama eyajo. Quijje ca ca eseya eyami eyacuajji ba'e tiitii mee caje'yo eyajo, Eyacuiñajji ojjaña huoojea'yoyji poanijo.

<sup>51</sup> ¡Jjeya shajja'ajjacue pea esohui! Yahuajo eseya jiquio esohui ba mee jjima, eyacua, jama ba'a: Beca cuana mano'yo ajja nei nei Jesosa poe o'oya jjimahuajo. Ojjaña joya eshe nequi Jesosa Quito poe o'oyajo, emano'yoyji pojjeama; onajaya eyami e'ihui'yoyji pojjeama. Jesosa Quitohua ojaya epeeji cuanaja pea eyami panacuaji caje'yo eyacua. <sup>52</sup> E'e, quijjeyejje nei eshe'ana ai mia cajo, Jesosa Quitohua ojaya epeeji eshe nequi cuanaja pea eyami eyacua pana caje'yo. Jiquio ecua cojja capicapiani jayojja jama panacuaji'yomeya acaje. Eshe'ana mia cajo, ojjaña emano'yo cuana shequi mee caje'yo. Eyami eyacua panacuaji caje'yo eba'e tiitii'yoyji. Mano o'oya ajja poaje'yo. E'e, ojjaña esejaya eyami eyacua poaje'yo. <sup>53</sup> Jjeya esejaya eyami eba'e tiitii'ji pojjeama. Ca'a'ama. Manojeyo. Chama'yo tii poaje'yo. Jamajjeya poe'yo majje Jesosa Quitohua esejaya eyami eyacua pana caje'yo ese nequi tiitii mee'yoyji, emano'yoyji pojjeama tii tii. <sup>54</sup> Jjeya jiquio meshijo eseya Jesosa Quitoja epeeji cuana enequi tiitii'ji pojjeama. Quijje ca ca ohuaya eseya nequi tiitii mee caje'yo eyajo. Jjeya meshijo ba'e eseya manojeyo. Quijje ca ca esejaya eyami eyacua mano'yo ajja poaje'yo. Ba'e tiitii'je'yo. E'e, Eyacuiñajji esohui yahuajo nei nei etehue'yo jayojja jama poaje. Yahuajo jama poa ba'a: “Dejja cuana mano'yo ajja tii tii. Eshe o'oya po tiitii mee caje'yo Eyacuiñajjiya”. <sup>55</sup> Jamaya tehue mee ca poa yahuajo nei nei pea'ai ba'a: “Emano'yo cuana emojeyo jaa tiitii ajja; eshe o'oya po mee caje'yo tii tii. Quijje mano'yo ajja nei nei poaje'yo”.

Jamaya yahuajo nei nei tehue mee ca poa Eyacuiñajjiya.

<sup>56</sup> Mimishi cuana po nequi jjejojo ojjaña cuana mano ca'yani. Jamajjeya ojjaña quea mete nee poani emano'yoyji. Moisesija esohui etehue'yojo eseyaya baña ojjaña shajjama' poani. Jamajjeya manojeyo. <sup>57</sup> Jjeya Eyacuiñajji ejjabihuaqui jama ba'a: —Eyacuiñajji, miya quea pame nee nee. Miyaya ecuanaja Emeshi Mese nei Jesosa Quito huoojeanaje ecuanaja mimishi cuijea'yohua. Jamajjeya ecuanaja shequi meeje o'oya. Ba'e tiitii meeje'yo eyajo.

<sup>58</sup> Jamajjeya ecuea epeeji cuana, ¡Jesosa Quitoja esohui etehue'yo jayojja jama atiitiicue! ¡Ojaya epeeji quea pame nee po tiitiicue! ¡A'a Jesosa nije jjapeequi pajeyoyji! ¡Emeshi Mese neijo Jesosajo chaco tiitiicue! Jjeya ojo chacochoanijo, quijje ohuaya eseya quea huiso sosequia caje'yo eyajo.

## 16

### *¡Ejjeshejji chichacue Jesosaja epeeji aema' ba'e meesahuajji!*

<sup>1</sup> Yahuajo pishana miquianajaya etehuejo eya huohui'ajjanaje bejjo Jesosaja epeeji huasijje, ma Jodea meshijo ba'e yasijje ehoojeajji. Jjeya eyaya miquianaya saja'aje jama ba'a: Eyaya esohui tehuenaje Jesosaja epeeji cuana huasijje, Janata meshijo ba'e yasijje. ¡Ma esohui etehue'yo jayojja jama acue pea'ai miquianaaya! <sup>2</sup> E'e, ¡bejjo chichacue! E'e, chacochoajo miquianaya sosequia cani cuaa ejjeshejji. Jamajjeya ojjaña epojja Eyacuiñajji ojee bihuiajji, nomico pojjajo, ¡ejjeshejji chichacue Jesosaja epeeji aema' huasijje ehoojeajji, Jodea meshijo ba'e yasijje! E'e pojjaja o'e epeejiya o'e pojjii chaco majje o'e pojjii quia caje. Pea epeejiya quea huiso quia caje pojjaja. ¡Jamaya quea pame quiacue! Jamajjeya eya miquiana que poe jjimahuajo miquea ejjeshejji echicha'yo poaje. <sup>3</sup> ¿Ache dejja cuana pojjaja ejjeshejji echicha'yo dojo meeje'yo aema huasijje, Jenosanenajo ba'e yasijje? ¡Jjashahuabaquicue ache dejja cuana quea pame nee ehoojeajji! Jamajjeya miquiana huasijje poe majje eyaya ma dejja cuana huoojeaje ejjeshejji dojhua. Eyaya ecuea esohui etehue'yo huoojeaje onijje ojjaña esejaya epeeji cuana Jenosanenajo ba'eca ba meeji ma dejja cuana ecue huoojea'yo ejjeshejji quiaa. <sup>4</sup> E'e pojjaja quijje jjashahuabaqui majje eya jama poaje ba'a: —E'e, eya pea'ai Jenosana huasijje capoquiahua. Jamaya quea pame nee —eya poaje. Jamajjeya ojee poquije.

<sup>5</sup> Quijje eya Masenonia meshi yejjenana sa poani. Yejjenana majje miquiana que poqui sa poani. <sup>6</sup> E'e pojjaja eya miquiana nije nequije quea huiso cahui cuanajo; quea huoe poani ba'i pojjaja cuanajo eya miquiana nije anije. Majoya eya ojjaña huapa cuana huasijje

poquije o'oya. Miquianaaya eya poqui meesahuaje. Aquiana epoqui meeji quiaje pojja'a.  
<sup>7</sup> Jjeya ca ca eya miquiana que poe sa po ajja. E'e, jjeya miquiana nijje nequi meeme  
 ajja quea huiso cahuijo. Jamajjeya quijje eya poeje miquiana baa. Poe majje miquiana  
 nijje nequije quea cahui huiso. Jamaya eya poaje esejaya Emeshi Mese neiya Jesusaa  
 eya miquiana nijje nequi mee sa acanijo. <sup>8</sup> Jjeya ca ca eya jjashahuabaquiani jiquiojo  
 Epesojo enequijji. E'e, eya jiquiojo tii nequije. Jodio cuana ojjaña bobi que cuanajo nequi  
 chicha majje, bobi apoa po majje pea'ai ojjaña quea bihui nee ojee ijia'ijjiaje. Maya  
 eyaya ishoaña. <sup>9</sup> E'e, jiquiojo eyaya quea huiso cuana Eyacuiñajjija esohui huohuíaña.  
 Quea huiso nee neeya shajja'ajja cani. Jamatii quea huiso eshahuaja epeejiya eya Jesosa  
 Quitojo mimi pajea mee'yo sa acani cuaa.

<sup>10</sup> E'e pojja'a Timoteo miquiana que poeje'yo. ¡Poe'yajo oya jaahuanacue, quea bihui  
 nee po meecue! Oya e jayojja jama poani; esejaya Emeshi Mese nei Jesusajo chaco cani.  
<sup>11</sup> Oya etii pishana. ¡Jamatii ojjaña miquianaaya oya shajja'ajjacue! ¡A'a ojo miamiajji!  
 ¡Pea huasijje poqui meesahuacue quea bihui nee! Jamajjeya oya poeje o'oya e que. Eyaya  
 oya ishoa'ajja anije Jesusaja pea epeeji cuana nijje.

<sup>12</sup> Yahuajo eya Jesusaja epeeji Apono bajjani nijje miminaje jama ba'a: —Apono, ¿ache  
 shono acuae miya poquije Conito huasijje esejaya epeeji cuana baa? ¡Jesusaja pea epeeji  
 cuana nijje oe poquicue jocuama! —eya poanaje.

Jjeya oya, Apono poqui sa po ajja quea huiso chaco chacoanijo. Quijje apoa po majje  
 oya poquije miquiana baa.

#### *Pea esohui quepe nei Etepanajo*

<sup>13</sup> Ecuea epeeji cuana, ¡quea ja'a nee jjashahuabaqui tiitiicue! Pea miya dasia ca  
 chana'. ¡Jesusa nijje jjapeequianijo Eyacuiñajjija esohui jayojja jama po tiitiicue quea  
 pame nee! ¡A'a Jesusaja epeeji quea mete pojji! ¡Ojaya epeeji quea ca'a nee, quea pame  
 nee pocue! <sup>14</sup> ¡Ojjaña quea jea nee acue! ¡Quea bei nee nee ba'ecue ona nijje!

<sup>15</sup> ¡Epeeji cuana, shajja'ajjacue mo! Miquianajaya eba Jesusaja epeeji quea pame  
 nee Etepana bajjani. Ojaya huapa pojjeama cuana miquianajaya eba pea'ai, Jesusaja  
 ebionei epeeji cuana Acaya meshijo poanaje. Jesusaja pea epeeji cuana jaahuana tiitii  
 cani quea pame nee, Etepanaa. <sup>16</sup> Jamajjeya ¡onijje jjapeequicue! ¡Quea pame poanijo,  
 oya shajja'ajjacue! ¡Pea cuaa Etepana jayojja jama quea pame nee Jesusajo chaco cani  
 shajja'ajjacue pea'ai!

<sup>17</sup> Ojjaña miquianaya poe ajja e baa, enijje jjapeequi'yohua. Jamatii miquianajaya  
 epeeji cuana Etepana bajjani, Potonato pea'ai, Acaico pea'ai poeyanaje e chaco sahuua.  
 Jamaya quea pame nee. <sup>18</sup> Miquiana quea bihui nee po mee canaje jayojjaya jama ohuaya  
 eya quea bihui nee po mee cani. Quea pame nee poanijo, ¡oya cuana cashajja'ajja cahua  
 ojjaña!

#### *Esohui quijjeyje nei tehue'yo*

<sup>19</sup> Jesusaja epeeji cuana Asia mishijo ba'e miquianajo jjashahuabaquiani. Jamajjeya  
 eya huohui'ajja mee cani jama ba'a: —¿Achajja acuae nequiana ani so'o? —onajaya ebajji.

Jesusaja epeeji Aquinaa ojaya ehuanase Pisina nijjeya, ojjaña Jesusaja epeeji cuana  
 Aquinaja equijo ojee dobiquiani Jesusaja esohui baa pea'aiya miquiana huohui'ajja cani  
 jama ba'a: —¿Achajja acuae nequiana ani so'o?

<sup>20</sup> Ojjaña Jesusaja epeeji cuana jiquiojo ba'eya miquianaya huohui'ajja cani jamaya  
 pea'ai.

Ojjaña Jesusaja epeeji cuana esejaya quea jea neejo, ¡quea bihui nee mimicue ojjaña  
 cuana nijje!

<sup>21</sup> Eya bajjani Pabo. Miquiana quea bihui nee epojji eyaya eyaye neiya jiquio esohui  
 tehueña miquiana huasijje jama ba'a: <sup>22</sup> —¡Ojjaña joya Emeshi Mese nei Jesusa Quito  
 nijje e'e jojo nei jjapeequi ajja Eyacuiñajjija quea nee nee capo mee cahua! ¡Esejaya  
 Emeshi Mese nei Jesusa Quito capoe o'oyahua jjeya nei!

<sup>23</sup> ¡Esejaya Emeshi Mese nei Jesosa Quitohua miquianaya cajaahuana cahua quea pame nee!

<sup>24</sup> Eseyá Jesúsaja epeeji cuana poanijo miquianaya ecuea quea jea nee nee poani, ojjaña. Mahuiso. Eyaya, Pabohua jiquio esohui tehuejeyonaje. Apoa.



PABOJA ETEHUE CONITO CUIÑAJJIJO BA'E YASIJJE BECANEJJIIJI  
PEA'AI  
2 CORINTIOS

*Pabohua tecue ca o'oyanaje Jesusaja epeeji cuana Conitojo ba'e yasijje*

<sup>1</sup> Eya Pabo, Jesosa Quitoja huoojea'yo oja sohui huohuiji. Jamaya Eyacuiñajjiya a sa acani. Timoteo esejaya epeeji enijje nequi. Eyaya tehueña miqiana huasijje. E'e, miqiana Jesusaja epeeji cuana Conito cuiñajjijo ba'e yasijje, ma Acaya meshijo ba'e yasijje cuanaya tehueña eyaya.

<sup>2</sup> ¡Eseyaya Emeshi Mese neiya Jesosa Quitohua, Eyacuiñajjiya, esejaya Chii neiya pea'ai miqianaya cajaanaya neinei cahua; quea bei caba'e mee cahua pea'ai!

*Pabo Eyacuiñajji nijje mimiani quea bihui*

<sup>3</sup> ¡Eyacuiñajji ejjabihuaqui! E'e, oya esejaya Emeshi Mese nei Jesosa Quitoja Chii, esejaya Chii nei pea'ai poani. Oya esejo jjashahuabaquiani quea bei. Ohuaya eseya quea bihui nee po mee cani pea'ai. <sup>4</sup> Esey quea nee, quea yeno poanijo, ohuaya quea bihui nee po mee cani. Quea bihui nee po majje eseyaya pea cuana quea bihui nee po meeje'yo, yeno'ama pea'ai. Jamaya ejja'aqui ba'a: —Eyacuiñajjiya ecuanaja jaahuana cani. Oya miqiana jaahuanajji poani pea'ai. Jamajjeya ja'a quea yeno pojji!

<sup>5</sup> Jesosa Quito quea nee poanaje dejja mimishi cuaa napa cajje. Esey onijje jjapeequianijo, pea cuaa eseya napa caje pea'ai. Jamatii, eseya quea bihui nee po mee caje Jesusaa. Majoya eseyaya pea cuana quea bihui nee po meesahuaje Jesosa nijje. <sup>6</sup> E'e eyaya, Timoteohua pea'ai esohui huohuaña Jesusajo. Jamajjeya pea cuaa ecuanaja napa cani. Jamatii, ecuanaja esohui shajja'ajja majje miqianaya Jesosa nijje jjapeequi'yani. Ohuaya miqianaja mimishi cuana cuijea ca'yonaje. Jamajjeya miqianaya quea bei nee poani. E'e, Jesusaa ojaya epeeji quea ca'a nee po mee canijo, miqianaya quea ca'a nee poaje pea'ai. Jamajjeya pea cuaa miqiana napa cajje Jesusaja epeeji quea ca'a nee poaje tii. Onijje jjapee tiitiquije'yo pea'ai. E'e, Jesusaa miqianaya ojaya epeeji quea ja'a po mee caje'yo ecuanaja jayojjaya, quea bei. <sup>7</sup> Jiquio ecuanajaya eba ba'a: Miqianaya Jesusaja epeeji quea ja'a po tiitije'yo. E'e, miqianaya ecuanaja jayojja poaje. Jesosa nijje jjapeequianijo, pea cuaa napa caje. Jamatii Jesusaa miqianaya quea bei nee po mee caje ecuanaja jayojjaya. Jamaya Jesusaa acaje'yo miqianajo, ecuanajo pea'ai.

<sup>8</sup> Epeeji cuana, jjeya ecuaaya huohuije quea nee ecuanaja poanaje Asia meshijo nequi miqianajaya ebajji. Jomajo ecuanaja ba'enaje quea camaja nee nee, quea mano poanaje. E'e, ecuanaja jjashahuabaquinaje jama ba'a: —E'e, ecuanaja quea camaja nee nee Jesusa nijje ejjapeequijji, jiquio meshijo pojja'a mo manoj'e'yo. <sup>9</sup> E'e, mimishi cuana jjashahuabaquiani ecuanaja quecuajji.

Eyacuiñajjiya ecuanaja ba mee canaje jama ba'a: Dejja cuanaja ecuanaja ejaahuanajji pojjeama. Oya oe nei ecuanaja jaahuanajji poani. Ohuaya ohuaye nei emano'yojaa cuana shequi mee ca o'oyani. Jamaya eseya ba mee canaje Eyacuiñajjiya.

<sup>10</sup> E'e, mimishi cuaa napa huicha'a huicha'a cajje, ecuanaja quea nee nee poanaje. Beshahua nei mano'yonaje quea nee nee poanijo. Jamatii, Eyacuiñajjiya ecuanaja jaahuana ca'yonaje; mano'yo jjima Asia meshijo nequi. Ecuanaja jjashahuaba tiitiquiani jama ba'a: —Eyacuiñajjiya ohuaye neiya ecuanaja jaahuana tiitii canijo, mano'yo jjima jjeya.

<sup>11</sup> E'e, miqianaya Eyacuiñajji nijje miminaje ecuanaja ojaya ejaahuana tiitijji. Jamajjeya ohuaya miqianaya shajja'ajja canaje onijje mimiani. Ecuanaja jaahuana canaje. Jamajjeya quea huiso Jesusaja epeeji cuaa Eyacuiñajji bihuia caje jama ba'a: —Eyacuiñajji, miya quea pame nee nee. Miquea epeeji jaahuanaña quea ja'a nee.

*Pabo Conito huasijje poqui jjima poaje*

<sup>12</sup> Ecuanaja eba'ejjijo, echacojjijo, ehuhuijijio pea'ai ecuanaaya quea bihui nee huohuiaña. E'e, miquiana nijje, ojjaña pea cuana nijje nequinajejo pea'ai e'e jojo nei ecuanaja echaco quea pame nee poanaje. Eyacuiñajjiya ecuana chaco meesahua canaje ojo quea pame nee. Ecuanaja ejjashahuabaquijji quea ja'a nee pea'ai. Dejjaja cuanaja ejjashahuabaqui'yojji jayojja jama ba'e ajja. Chojja, de. Eyacuiñajjiya ecuana ba'e meesahua cani ojaya esohui jayojja. <sup>13</sup> Ecuanaja esohui etehue'yo miquiana huasijje quea ja'a nee. Esohui quea quehua tehue jjima. Eya jjashahuabaquiani jama ba'a: <sup>14</sup> Yahuajo miquianaaya ecuana ba pishana majje ejjaba'e bamequi'yojji banaje. Quijje quea ja'a nee baje'yo ecuana ba neinei majje. Jamajjeya Jesosa, Emeshi Mese nei poe o'oyajo, ecuaaya oya huohuije'yo miquiana ojaya epeeji quea pame poanaje. Cuanaya ojaya esohui jayojja ba'yanijo, miquianaaya quea bihui nee ecuanajo huohuije'yo Jesosa poe o'oyajo.

<sup>15</sup> E'e, ecuea eba miquianaya jjabahuejjaquije eya esohui jayojja quea ja'a ba'yani. Jamajjeya jjejjahua nei eya miquiana que poqui o'oya sa poanaje miquiana Jesusajo quea ja'a nee ba'e meesahua o'oyaa. <sup>16</sup> Yahuajo eya jjashahuabaquinaje jama ba'a: —Jesusaja epeeji cuana Masenonia meshijo ba'e yasijje poquije eya dobiquinanaje Conito cuiñajji yasijje Jesusaja epeeji cuana sohuihuohuiya. Ma ba majjeya eya poquije Jodea meshi yasijje. Jamajjeya Conitojo ba'eca cuaa eya poqui meesahua caje pojja'a Jodea meshi yasijje —eya jjashahuabaquinaje.

<sup>17</sup> Jamatii eya poqui jjima miquiana baa. Miquiana baquijji eya jjashahuabaquinaje quea ja'a nee. Ecuea epoquijjijo eya jjashahuabaqui ajja pea cuana jayojja jama. Jesusaja epeeji pojjeama cuaa huohui cani jama ba'a: —Eya poquije. Chojja, eya poqui ajja —jamaya eya jjashahuabaqui ajja. Eyaya ecuea ejjashahuabaquijji jayojja jama aje'yo. <sup>18</sup> Eyacuiñajji siajje po ajja, ojaya esohui jayojja jama ohuaya acani. Ojaya eba eya o jayojja e'e nei poani, siajje po ajja jama ba'a: —E'e pojja'a, de —jamaya eya siajje po ajja.

<sup>19</sup> Eyaya Sinasi nijjeya, Timoteo nijjeya pea'ai Jesosa Quitojo huohuinaje miquiana huasijje. Oya Eyacuiñajjiya Bacua Ejja. Ojaya esohui jayojja jama acaje'yo e'e jojo nei, ohuaya. <sup>20</sup> Eyacuiñajjiya esohui yahuajo quea huiso, quea pame nee nee. Jesosa Quito ese jaahuanaa poeyanaje. Ohuaya ojjaña Eyacuiñajjiya esohui yahuajo jayojjaya jama jjeja acaje'yo esejo. Jamajjeya Jesosa Quitohua Eyacuiñajjiya esohui jayojja jama acanijo, eseyaya Eyacuiñajji bihuiaña jama ba'a: —Jamaya Eyacuiñajji, miquea esohui quea pame nee nee, quea huiso ecuana nijje. Ojjaña e'e jojo nei poani. Miya siajje po ajja nei nei —jama bihuiañeya seya añña.

<sup>21</sup> Eyacuiñajjiya ecuana, miquianaya pea'ai ojaya epeeji po mee canaje. Ohuaya eseya babaca ca'yonaje onijje ejjapeequijji. <sup>22</sup> Jama esejo acanaje ba'a: —Miquianaya ecuea epeeji cuana poani. Ecuea ejjeshe jayojja jama miquianaya —Eyacuiñajji poanaje.

Eyacuiñajjiya ese que huoojea canaje Edojjoshahua Pame ese jaahuanajji. Edojjoshahua Pameya eseya ba mee cani jama ba'a: Quijje eseya quea ja'a nee Jesosa jayojja ba'e tiitiije'yo Eyacuiñajji nijje eyajo.

<sup>23</sup> Eyacuiñajjiya ba cani ecuea ejjashahuabaquijji miquianajo quea pame nee poani. Jama poani eya ba'a: —Conito huasijje jjeja epoquiya jjemo eyaya onaya tecueajea'yome pojja'a, quea mimishi ba'yanijo. <sup>24</sup> Eya miquianajaya emeshi mese pojjeama, miquiana huoojea neinei'yojji pojjeama. Eyaya ca ca esohui huohuiaña, Jesusaja esohui, miquiana quea bihui nee po meeji. E'e, Jesusaja esohui jayojja jama añajo, ojaya epeeji quea ja'a nee poaje'yo miquianaya.

## 2

<sup>1</sup> Jjeja eya jama jjashahuabaquiani ba'a: —Jjeja Jesusaja epeeji Conitojo ba'e beca cuana quea mimishi poanijo, eya poqui ajja jocuama o tecueaa. Jjabahuejjaqui o'oyajo, quea yeno poaje o'oya oya cuana —eya poani.

<sup>2</sup> E'e, miquianaya eyaya quea yeno po mee majje, ¿ajeo acuae che eya quea bihui po'yome? <sup>3</sup> Jamajjeya yahuajo eyaya miquianaya tehuenaje quea tecue mimishi pajea mee'yojji. E'e, miquiana quea mimishi poanijo, eya quea yeno poanaje. Pea chama' e

quea bihui nee po meejji. Eya jjashahuabaquinaje miqúanajo jama ba'a: —E'e jojo nei ohuaya Eyacuiñajji esohui jayojja jama acaje'yo. Majoya eya quea bihui nee poaje. Oya cuana quea bihui nee poaje pea'ai e'e jojo nei ba'e majje.

<sup>4</sup> E'e, eyaya quea yeno nee esohui quea tecue tehuenaje miqúanana jjabahuejjaqui mee'yojji. Quea camaja esohui quea tecue etehuejji. Miqúanana quea yeno po mee sa po'yo ajja. Chojja. Eya jjashahuaquinaje jama ba'a: —Ecuea esohui etehue'yo quea tecue mimishi cuanajo ba majje onajaya eba poaje ecuea quea jea nee nee poani —eya poani. E'e, jamaya ecuea ejjashahuabaquijji miqúanajo.

*Jesosaja epeeji quea mimishi tecuea majje ja'a quea tecue po tiitiijji onijje ohua mimishi pajea cajo!*

<sup>5</sup> Jesosaja epeeji miqúanana nijje nequi ca ca oe quea mimishi poanaje. Eya quea yeno nee poanaje ojo. Miqúanana quea yeno poanaje pea'ai ojo. Jamajjeya eyaya o jjabahuejja meequijji tehuenaje oja mimishi cuana pajea mee'yojji. <sup>6</sup> Beshahua nei miqúananaaya, ojjaña oya jjabahuejjaqui meenaje ojaya mimishi epajea'yojji. Apoa. <sup>7</sup> Jamajjeya ja'a oya quea yeno po tiitii meejji! ¡A'a oya tecuea tiitiijji! Chojja. Quea yeno nee nee po tiitii majje oya Jesosa nijje jjapeequi pajea'yo chana'. Jjabahuejjaqui'yajo, jonijje jjapeequi'yocue quea pame nee! <sup>8</sup> E'e, oya jama huohucue ba'a: —Miya ecuanaja quea boti nee, epeeji —jamaya oya acue.

<sup>9</sup> Yahujajo eyaya ma esohui tehuenaje miqúanana ba'ajjaji so'o. Eya ba sa poanaje jama ba'a: —¿A'a shajjama' poaje? ¿A'a ecuea esohui jayojja jama poaje? —poanaje.

Jamajjeya eyaya esohui tehuenaje miqúanana huasijje ma dejja quea mimishi jjabahuejjaqui mee'yojji. Miqúanana ecuea esohui etehue'yo jayojja jama po'yonaje. Quea pame. Apoa poanaje. <sup>10</sup> Jamajjeya miqúanana ma dejja quea mimishi poani nijje quene'ama poajo, eya onijje quene'ama poaje'yo pea'ai. E'e, ecuea aje ojaya mimishi epajea'yo pea'ai. Eya Jesosa Quitoja esohui huohuijji poanijo ma dejja mimishi nijje quea tecue poanaje. Jjeya ma dejja nijje tecue'ama poanaje. Jamajjeya ¡miqúanana pea'ai quea bei, quea ja'a pocue! <sup>11</sup> Eseyaya quea bei, quea ja'a poanijo, Edosiquiaa eseya edasiajji pojjeama. E'e, esejaya eba Edosiquianaja ejjashahuabaquijji. Oya aje oe edasiajji poani, de, Jesosaja epeeji cuana quea mimishi po mee o'oya sa acani.

*Jesosaja ehuhui eyacua*

<sup>12</sup> Yahujajo pishana eya poquinaje Toasa cuiñajji yasijje esohui quea pame Jesosa Quitojo huohuiya. Jomajo esejaya Emeshi Mese neiya Jesosaa eya huohui meesahua canaje. Beca cuaa shajja'ajja canaje quea bihui nee. <sup>13</sup> Jamatii ecuea epeeji Tito poe jjima Toasa huasijje. Eya quea mete ojo poanaje: —E'e pojja'a oya quea huesha nee quea mano jaa pojja'a, quea nee poani pojja'a —jjashahuabaquinaje. Jamajjeya eya Toasajo ba'e nijje miminaje jama ba'a: —Poquia iña Tito sa'ajjaa.

Majoya eya poquinaje Masenonia meshi yasijje.

<sup>14</sup> Eseyaya Eyacuiñajji bihuiña. Ohuaya eseya quea ja'a nee nequi mee cani. E'e, ohuaya eseya dejja mimishi cuana mimicuijeanobiajea meesahua cani; eseya Jesosa Quito nijje jjapeequi mee cani quea ja'a nee. Ohuaya ecua huohui meesahua cani ojjaña meshijo Jesosa Quitoja esohui. Ma esohui quea pame nee nee. Jiquio ecua shiyeshiye esejaya quea boti nee aña jama jayojjaya Jesosaja esohui ecuanajaya quea boti nee. <sup>15</sup> E'e, Eyacuiñajjiya ecua huoojea ca'yonaje Jesosa Quitojo huohuiya. Ma esohui quea pame nee nee, ecuanaja quea boti nee nee. Jamajjeya ojjaña Jesosaja epeeji cuaa, ma Eyacuiñajjiya onijje ba'e tiitii mee caje'yohua, ojjaña quea mimishi poaniya pea'ai ma quijje quea nee nee po tiitiije'yohua pea'ai ba caje'yo Eyacuiñajji quea pame nee: —E'e Eyacuiñajji, miya quea pame nee nee. Pea chama' mi jayojja —oya bihuiaje eseyaya.

<sup>16</sup> E'e, Jesosa Quitoja esohui shajja'ajja majje ojjaña mimishi cuana jjabahuejjaqui oya cuana cajaa'ya'yo, quea nee nee poaje'yo cuaquijo. Ma esohui shajja'ajja majje Jesosaja epeeji cuana ca ca jjabahuejjaqui oya cuana ba'e tiitiije'yo quea ja'a nee eyajo Eyacuiñajji nijje. <sup>17</sup> ¿Aya acuae maya esohui eyacua Jesosajo huohui caje pea cuana huasijje, de? Ma esohui

quea pame Jesosa Quitojo ecuana huoojea majje sohuihuohui meesahua caje quea ja'a nee, ohuaya. Pea cuaa Eyacuiñajjiya esohui huohui cani bejjo sosejje. Ecuana, chojja. Ecuaya, Jesusaja epeeji poaniya quea bhui nee huohuiaña e'e jojo nei. Ecuana eba jama ba'a: E'e jojo nei Eyacuiñajjiya ecuana huoojea ca'yonaje ojaya esohui huohuiya.

### 3

#### *Jesosa nije chaco cani esohui eyacuajo*

<sup>1</sup> E'e, Eyacuiñajjiya ecuana huoojea ca'yonaje miqiana huasijje ojaya esohui huohuiya. Pea cuaa miqiana que quia ca'yonaje esohui peaja tehue'yo jama ba'a: “¡Iquio dejja Jesusaja epeeji e'e jojo nei! ¡Jamajjeya oya cuana shajja'ajjacue!” Ecuana ca ca peaja tehue'yo equiajji pojjeama miqiana que jama ba'a: “¡Pabo quea pame nee; oya shajja'ajjacue!” Chojja. Ecuana miqianajaya eba Eyacuiñajjiya huoojea'yo. <sup>2</sup> Ecuana jama jjashahuabaquiani ba'a: —Ojjaña ba cani ecuanajaya esohui shajja'ajja majje Jesusaja epeeji quea pame nee poanaje miqianaya, Conitojo ba'e cuana.

Jamajjeya ecuana e'e jojo nei Eyacuiñajjiya huoojea'yo ojaya esohui huohuiji ojjaña eba, de. Jamajjeya esohui mi tehue mee cani jama ba'a: “Pabo quea pame nee, Eyacuiñajjiya huoojea'yo”.

<sup>3</sup> E'e, ojjaña ba cani miqianaya Jesusaja epeeji cuana poanaje ecuanaja esohui shajja'ajja majje. Edojjoshahua Pameya miqianaya Jesosa nije jjapeequi meesahua ca'yonaje. Yahuajo nei Eyacuiñajjiya esohui mei beje biajje tehue majje ojjaña ba mee ca poa etiiquiana Moisesi oja huoojea'yo. Jjeya ca ca Eyacuiñajjiya Edojjoshahua Pameya miqianaya Jesosa Quito nije jjapeequi meesahua ca'yonaje ecuea esohui miqiana shajja'ajjajo. Jamaya ohuaya ojjaña ba mee canaje eya oja huoojea'yo, ojaya esohui huohuiji.

<sup>4</sup> Ecuana eba Eyacuiñajjiya ecuana Jesusaja epeeji quea ja'a nee po mee majje huoojea canaje miqiana huasijje esohui huohuiya. <sup>5</sup> Jamajjeya jama jjashahuabaquiani ecuana ba'a: —¿A'a ecuana quea pame nee poanajo, quea sapa ja'a poanajo esohui huohuije quea ja'a nee? Chojja. Eyacuiñajjiya ecuana esohui huohui meesahua canajo ca ca quea ja'a nee poani ecuanaja esohui —jamaya ecuana jjashahuabaquiani.

<sup>6</sup> E'e, Eyacuiñajjiya ecuana huohui meesahua cani ojaya esohui eyacua Jesusajo. Etiiquianaja esohui jayojja jama pojjeama ecuanajaya esohui; eyacua. Ecuana eba etiiquiana Moisesija esohui yahuajo nei etehue'yojo ojjaña ba ca poa jama ba'a: —E'e jojo nei mimishi poajo, Eyacuiñajjiya ojjaña quea nee nee po mee caje'yo tii tii; Eyacuiñajji nije eba'e'yojji pojjeama.

Jjeya ca ca ecuaaya huohuiaña jama ba'a: —Mano'yajo, Edojjoshahua Pameya Jesusaja epeeji cuana ba'e tiitii mee caje'yo —ecuana poani.

<sup>7</sup> E'e, yahuajo nei Moisesiya ojjaña jama tehue me aca poa ba'a: “Eseya quea mimishi poajo, Eyacuiñajjiya quea nee nee po mee caje'yo tii tii cuaquijo”. Jamatii Moisesiya Eyacuiñajjiya esohui quea tecue mei biajje tehue majje ojaya ecojja quea jiji nee nee cuaquijji jayojja poa esohui quea pamejojo. Jamajjeya Isaeni cuaa Moisesija ecojja ba jjima aca poa quea siyo nee neejojo. Jamatii ojaya ecojja quea jiji nee po tiitii jjima poa. Quijje pishana quea jiji pojjeama po'ya poa. <sup>8</sup> ¿Ajea esohui quea pame nee nee po tiitii? ¿A'a Moisesija pojja'a? ¿A'a Edojjoshahua Pameja? Edojjoshahua Pameya eseya ba'e tiitii mee canajo quea pame nee; e'e, Moisesija iye bame bame. <sup>9</sup> ¡Bacue! Moisesija esohui etehue'yo quea pame pishana ojjaña cuaa ba canaje jama ba'a: Eseya quea mimishi poajo, Eyacuiñajjiya quea nee nee po mee caje'yo tii tii.

Edojjoshahua Pameya ca ca eseya Eyacuiñajjiya epeeji mimishi'ama po mee cani. Quea pame nee nee Edojjoshahua Pameya eseya acani. <sup>10</sup> Yahuajo nei Moisesija etehue'yojo ojjaña jjashahuabaquinaje ojaya esohui etehue'yo quea pameya poa. Jjeya pea ejjashahuabaquijji yani. Jjeya ca ca esohui quea pame nee eba'e tiitii ecuanajaya eba. Quea pame nee nee esohui eyacua poani. <sup>11</sup> E'e, yahuajo nei ojaya esohui etehue'yo quea pame neejo Moisesi ma esohui tehue majje quea cojja jiji poa, quea cojja jiji nee epo

tiitijji pojjeama. Jjeya ca ca esohui eyacua quea ja'a capo tiitii'yahua. E'e, ecuana ba'e tiitii mee caje'yo quea pame nee nee epo tiitijji.

<sup>12</sup> E'e, ecuanajaya eba Edojjoshahua Pameya ecuana ba'e tiitii mee caje'yo. Jamajoya ma esohui eyacua huohui tiitiiña bicho'ama. <sup>13</sup> Moisesi esohui tehue majje quea cojja jiji nee poa. Jamajjeya ojjaña cuana ojo quea mete poanijo, Moisesi jjacojja dodoqui'ya poa Isaeni cuana mete'ama epojji. Ecuana ya ca ca Moisesi jama pojjeama. Esohui eyacua eba'e tiitijji nahue ajja; huohui majamajña ojjañaja ebajji. <sup>14</sup> E'e, yahuajo Isaeni cuana Moisesija esohui etehue'yo shajja'ajja majje jamatii eba'e tiitii'yoyji ba meeme ajja poa. Esohui eyacua onajaya quea quehua poa. Ejjacojja dodoqui jayojja oya poa. Jesosa Quitoja epeejji nei poanijo ca ca ohuaya esohui eyacua eba'e tiitii'yoyji ba mee cani. <sup>15</sup> Jjeya nei pea'ai Isaeni cuana Moisesija esohui etehue'yo shajja'ajja canijo esohui eyacua eba'e tiitii'yoyji onajaya quea quehua. <sup>16</sup> Jamatii ojjaña joya Jesosa Quito nijje jjapeequiani ohuaya esohui eyacua ba mee caje'yo quea ja'a nee. <sup>17</sup> E'e, jamaya poaje Edojjoshahua Pameya, Jesosa Quitohua pea'ai eseya ba mee caje quea ja'a nee Eyacuiñajji ejjashahuabaquijji. Ma ba majje esohui eyacua esejaya quea ja'a nee poaje. Jamajjeya Jesosa nijje jjapeequi'yajo, ohuaya eseya ba'e tiitii mee caje'yo onijje, Moisesija esohui amajje pojjeama. <sup>18</sup> Jesosaja epeejji cuana poanijo eseya jjacojja paaqui jjima jayojja jama. E'e, ojjaña ba meeje Eyacuiñajjiya eseya Jesosa jayojja jama atiitii meesahua cani. Jamajjeya Edojjoshahua Pameya eseya eyamijo aniya quea ja'a nee jjashahuabaqui mee cani. Jesosa jayojjaya popoqui mee cani eseya.

#### 4

##### *Pabohua esohui huohui cani quea ja'a nee eba'e meesahuajji*

<sup>1</sup> Eyacuiñajji ecuana nijje quea quene nee nee po tiitii ajja ecuanaja mimishi yahuajo poanaje cuanajo. Ecuana quea jea nee poanijo huoojja ca'yonaje ojaya esohui eyacua Jesosajo huohuiya. Jamajjeya ecuaaya quea ja'a nee huohuiaña yeno'ama, mete'ama. <sup>2</sup> E'e, ma esohui Jesosajo huohuiañajo quea mimishi ba'e'yo ajja. Quea mimishi jjashahuabaqui ajja pea'ai. Edasiajji cuana pojjeama. Ecuana ya esohui Jesosajo e'e jojo nei poani. Jamaya Eyacuiñajji eba. Jamajjeya ecuanaja esohui e'e jojo nei poanijo, ojjaña jjashahuabaquije jama ba'a: —E'e, jiquio esohui huohuijji cuanaja esohui e'e jojo nei poanijo, eyaya shajja'ajjaje. Oya cuana edasiajji cuana pojjeama.

<sup>3</sup> Ecuaaya Eyacuiñajjiya esohui e'e nei huohui tiitiiña. Jamatii beca cuanaja, Edosiquiana nijje jjapeequianija Jesosaja esohui quea quehua. Oya cuana aje oe quea nee nee poaje'yo tii tii. <sup>4</sup> Quea pame nee nee Jesosa Quito. Oya Eyacuiñajji Echii ai jama poani tii. Jamaya esejaya eba. Jamatii dejja mimishi cuana onijje jjapeequi sa po ajja. Oya cuana aje oe cojjama' jayojja, de. Jamajjeya Edosiquiana neiya, ma ojjaña dasiajji poaniya oya cuana dasia cani esohui quea pame nee nee Jesosajo ojaya ebajji pojjeama. <sup>5</sup> Joya ecuaaya sohuihuohuiaña miquianajaya e bihuijji pojjeama. Chojja. Ecuaaya huohuiaña jama ba'a: —Ecuana miquiana ba meesahuajji poani. Jesosa Quito ca ca Emeshi Mese nei poani. Jamajjeya ¡Jesosa bihuiaque miquianaaya! —ecuanaya miquiana niñeshe'ajji poani.

<sup>6</sup> ¡Bacue! Yahuajo nei meshi pana jjimahuajo Eyacuiñajjiya jama huohuime aca poa ba'a: “Quea misi, ¡quea ja'a nee oe po'yocue!” aca poa; jjaja'aqui mee ca'ya poa. Jjeya ohuaya tiiya eseya Jesosajo jjashahuabaqui meesahua cani quea ja'a nee. Jamajjeya oya esejaya eba quea pame nee nee Jesosa, quea ja'a nee nee poani tii. E'e, Jesosa Quito Eyacuiñajji jayojjaya nei nei. Oya esejaya eba poanijo Eyacuiñajji quea pame, quea ja'a nee nee poani tii tii esejaya eba pea'ai.

##### *Ona Jesosa nijje jjapee meesahuquiañajo ba'e tiitije'yo*

<sup>7</sup> Eyacuiñajjiya ecuana babaca canaje esohui quea pame nee huohuijji. Jamaya quea pame nee, de. Jamatii jiquio ecua meshimisi ca'a'ama jayojja jama eseya ca'a'ama. Jamatii Eyacuiñajjiya eseya ojaya epeejji quea ca'a nee acanijo, ojjaña ba cani jama ba'a:

—E'e de, Eyacuiñajjiya quea ca'a neeya Jesusaja epeeji cuana quea ca'a nee o jayojja jama po mee cani. Ojjaña huasijje esohui quea pame nee huohui meesahua cani.

<sup>8</sup> Mimishi cuaa ecuana napa cani. Jamatii ecuana ejeabichajea'yoyji pojjeama. Pea cuana quea mimishi poanijo, quea camaja tii ecuanaja eba'eji. Jamatii quea yeno nee nee pojjeama ecuana poani. <sup>9</sup> Mimishi cuaa napa cani Jesusaja esohui ehuohui poaje jjejojo. Jamatii Eyacuiñajjiya ecuana ejeana'yoyji pojjeama. Pea cuaa cuiajea cajo, jamatii ecuana mano'yo ajja. <sup>10</sup> Jesusa quea nee nee poanaje mimishi cuaa napa majamaja ca'yajje. Oya mano mee ca'yonaje, de. Jamaya ecuana acaje'yo pea'ai pojja'a Jesusa nijje jjapeequianijo. Jamajjeya ojjaña jama acaje ba'a: —E'e jojo nei Jesusaa jiquio dejja cuana ojaya epeeji nei po tiitii mee cani. Mimishi cuaa napa cajje jamatii esohui huohui pajea jjima acani.

<sup>11</sup> E'e, pea cuaa ecuana napa majamaja cani Jesusa nijje jjapeequianijo. Ecuana quecua sa acani pea'ai. Jamatii ecuana quea ja'a nee po tiitiiianijo, ojjaña ba caje Jesusa ecuana jaahuanajji quea ja'a nee. Oya eshe, de. <sup>12</sup> E'e, mimishi cuaa ecuana quea nee nee po mee cani esohui Jesusaja huohuiañajo. Jamatii ecuanaja esohui shajja'ajja majje miqianaya Jesusaja epeeji poanaje. Jamajjeya ohuaya miqianajaya mimishi cuana cuijaja'yo majje ba'e tiitii mee caje'yo.

<sup>13</sup> Yahuajo Eyacuiñajjiya esohui huohuijjiya Dabiya huohui ca poa jama ba'a: “Ecua eba e'e jojo nei Eyacuiñajji e jaahuanajji poani. Jamajjeya jamaya eyaya huohuiaña” Dabiya aca poa. Jjeya ecuana Dabi jayojja Eyacuiñajji nijje jjapeequiani. Ecuanaja eba e'e jojo nei Eyacuiñajjiya ecuana jaahuana cani. Jamajjeya ecuaaya esohui huohui tiitiiña jamatii mimishi cuaa napa cani tiiya. Jama poani ba'a: <sup>14</sup> —Emeshi Mese nei Jesusa mano'yajo, Eyacuiñajjiya oya shequi mee ca'yonaje. Jamaya ecuana mano'yajo, e'e jojo nei Eyacuiñajjiya ecuana shequi mee caje'yo. Ohuaya ecuanaya, miqianaya pea'ai nequi tiitii mee caje'yo Jesusa nijje eyajo —ecuaaya aña.

<sup>15</sup> E'e, quea camaja poani ecuana Jesusaja esohui huohuiañajo. Jamatii ecuanaja esohui ba majje miqianaya Jesusa nijje jjapeequinaje. Jamajjeya Eyacuiñajjiya miqianaya ba'e tiitii mee cani. Pea cuana quea huiso Jesusa nijje jjapeequi'yajo, Eyacuiñajjiya oya cuana ba'e tiitii mee caje'yo. Jamajjeya oya bihuia caje jama ba'a: —Eyacuiñajji quea pame nee nee poani. Quea ca'a nee nee poani pea'ai —acaje ojjaña.

<sup>16</sup> Jamajjeya ecuaaya maya esohui Jesusajo huohui pajea'yo ajja. Chojja. Onaa napa cajje ecuana quea nee nee poani. Edejja tii cuana jayojja jama ca'a'ama poaje. Jamatii Eyacuiñajjiya ecuanaja edojjoshahua cuana quea ja'a po tiitii mee cani. <sup>17</sup> Jjeya onaa napa cajje ecuana quea nee poani Jesusa nijje jjapeequianijo. Quea nee po tiitii'yo ajja. E'e, jjeya quea nee poani. Jamatii Jesusa nijje jjapeequianijo, quijje ohuaya ecuana ba'e tiitii mee caje'yo quea pame nee nee eyajo onijje. Quea nee popajeaje'yo. Jamaya quea pame nee nee. <sup>18</sup> Jjeya nei ecuaaya Jesusa ba jjima aña ecojjaa. Jamatii ecuana jjashahuabaquiani Jesusa nijje eyajo eba'e'yoyji. Jiquio meshijo eba'eji ecuana jjashahuabaqui ajja. Jiquiojo ba'e tiitii ajja. Eyajo Jesusa nijje ca ca oe ba'e tiitii'yo.

## 5

### *Eba'eji quea pame nee eyajo*

<sup>1</sup> Ecuaaya jama baña ba'a: Eseyaya mano'yajo Eyacuiñajjiya eyacua pana caje'yo esejaya eyami. Eyami eyacua ani tiitii'yo eyajo. E'e, eseyaya jiquio meshijo ba'yanijo ca'a'ama. Eyajo ba'e'yo majje quea ca'a nee eseyaya poaje'yo tii tii. <sup>2</sup> Eseyaya jjeya nei ishoaña eyami eyacua. Cuanaya eseyaya jiquio meshijo ba'yanijo quea nee nee poani. Jamajjeya jjashahuabaquiani jama ba'a: —Eya poqui sa poani eyahuasijje. Jomajo ecua eyami eyacua poaje'yo.

<sup>3</sup> Jesusa poe o'oyajo, jiquio eyami eyacua poaje. Jiquio ecua jjapipi eyacua poani jama jayojja esejaya eyami eyacua poaje'yo. E'e, eseyaya jjashahuabaquiani eyami eyacuajo. Quea pame nee poaje. <sup>4</sup> Jiquio meshijo ba'yanijo eseyaya quea nee nee poani. Quea camaja nee jiquiojo eba'eji. Eseyaya eyami ca'a'ama, jjapipi jjacocoqui jjima jama. Jjacocoqui

sa poani. E'e, eseya poqui sa poani eyahuasijje. Jomajo eyami eyacua sa poani. Jiquiojo manojeyo. Eyacua po majje ca ca eseya ani tiitiije'yo eyajo.

<sup>5</sup> Eyacuiñajjiya eseya ba'e tiitii mee cani; esejaya eyami eyacua aca'yani pea'ai. Ohuaya Edojjoshahua Pame huoojea canaje ese que ese jaahuanajji. Edojjoshahua Pameya eseya ba mee cani jama ba'a: E'e jojo nei Jesusaja epeeji poanijo ohuaya ecuana eyami eyacua quia caje'yo; ani tiitii mee caje'yo onijje eyajo.

<sup>6-7</sup> Jamajjeya jjashahuabaquiani jama ba'a: —E'e, Eyacuiñajjiya eseya ba'e tiitii mee caje'yo onijje. Eseyajiquio meshijo ba'yanijo Jesosa cojja neijo ani ajja. Eseyajeyami eyacua po majje Jesosa nijje ani tiitiije'yo. Jjeya Jesosa esejaya ecojjaja ba jjima; jjabameequi ajja. Jamatii eseya jjashahuabaqui mee cani onijje enequi tiitii'yoyji. Jiquio meshijo aquiana cuana quea huiso baña ecojjaa. Jamatii ma aquiana cuanajo jjashahuaba neinei equi ajja. <sup>8</sup> E'e jojo nei baña Eyacuiñajjiya eseya ba'e tiitii mee caje'yo. Jamajjeya mete'ama, quea bei nee poani. Poqui sa poani Jesosa nijje eba'e tiitii'yoyji, Emeshi Mese nei nijje. Ishoaña esejaya eyami eyacua. <sup>9</sup> Jamajjeya jjeya nei eseya Jesusaja esohui jayojja jama atitii sa poani jiquio meshijo ba'yanijo. Quijje pea'ai eyajo onijje ani tiitiije'yo. Jamaya sa poani. <sup>10</sup> E'e, eseya eba jama ba'a: Jesosa Quitohua eyajo ojjaña huoojeajji poanijo ojjaña meshijo ba'ya poa nequi mee caje o cojja neijo. Ojjaña quea mimishi poanaje ohuaya quea nee nee po tiitii mee caje'yo. Ojjaña quea pame poanaje ca ca quea bihui nee nee po tiitii mee caje'yo. Jamaya eseyaya baña.

*Jesosaa ecuana sohuihuohui mee cani ona onijje ejjapeequijji*

<sup>11</sup> E'e, Jesosaa, Emeshi Mese neiya ojjaña quea mimishi poani quea nee nee po mee caje'yo tii tii. Quea tecue nee nee poaje ojjaña quea mimishi poani nijje. Jamajjeya ecuaaya ojjaña dejja cuana huohuiaña jama ba'a: —¡Jesusaja epeeji pocue! ¡Miquea mimishi cuana pajea'yocue!

Eyacuiñajjiya eba ecuana ojaya epeeji poani. Ecuana esohui e'e jojo nei poani, sijje pojjama. Jamaya ojaya eba pea'ai.

Ecuana jjashahuabaquiani jama ba'a: —Ojjaña Conitojo ba'eja eba esohui e'e nei ecuaaya huohuiaña.

<sup>12</sup> Jamajjeya ecuana miquiana nijje jama po ajja ba'a: —¡Ecuana bihuiaque quea pame poanijo! —chojja, jamaya ecuana po ajja. Jiquio jama ecuana a sa poani ba'a: Ecuaaya huohui tiitiiña eyacua eba'e'yoyji Jesosa nijje eyajo.

Jamajjeya miquianaaya esohui huohuijji nisho huohuicue quea ja'a nee jama ba'a: —Miquianaaya ca ca oe niñebaña Pabo, esohui huohuijji nei. Miya janobajjima nei mimianijo quea pame esohui huohuijji poso jjabaquiani. Jamatii quea ja'a ba'e ajja. ¡Jesusa Quitojo oe quea ja'a nee jjashahuabaquicue! ¡Quea pame a'yocue! —jamaya esohui huohuijji nisho acue.

<sup>13</sup> Ecuana esohui quea pame Jesusajo, eba'e'yoyji eyacuajo pea'ai shajja'ajja majje beca cuana sijje poani jama ba'a: —Pabo niñepoqui, de, ojaya epeeji cuana pea'ai niñepoqui —sijje poani.

Eyacuiñajji nijje chaco tiitiiñaajo, onaaya ecuana niñepoqui poso acani. Jamatii ecuaaya chaco tiitiiña Jesusaja esohui quea ja'a nee miquianajaya ebajji. <sup>14</sup> Jesosa Quito ecuanajaya quea jea nee poanijo esohui e'e nei huohuiaña. E'e jojo nei ojjaña mimishi acanijo mano tiitiije'yo. Jesosa mano'yonaje ojjaña mimishi cuijea'yoyji, ojjaña cuaqui yasijje epoquijji pojjeamajo. Jamaya ecuanaja eba nei nei. <sup>15</sup> E'e, Jesosa mano'yonaje ojaya epeeji mimishi cuijea'yoyji. Mano'yajo, Eyacuiñajjiya oya shequi mee ca o'oyanaje. Jamajjeya ojaya esohui jayojjaya ca'a cahua! ¡Yahuajo ejjashahuabaquijji capajea ca'yahua! <sup>16</sup> Jesusaja epeeji cuana po jjimahua ecuana pea cuanajo jjashahuabaquinaje quea tai dejja mimishi jama. Jjeya, cho. Jjeya ecuanaja ejjashahuabaquijji pea cuanajo Jesusaja ejjashahuabaquijji jayojja jama quea ja'a nee poani. Ojaya epeeji cuana po jjimahua ecuana Jesusa Quitojo jjashahuabaquinaje quea tai dejja mimishi jama. Jjeya, cho. <sup>17</sup> Jamajjeya Jesusa Quito nijje ejjapeequianijo, ohuaya

eseya pea jjashahuabaquime po mee cani. Eseyaya ejjashahuabaquijji eyacua quea ja'a nee po mee cani. Jesosa Quito ba jjimahuajo ba'ya poa jayojja po'yo ajja. Jjeya eseja pea jjashahuabaqui'yome poani Jesosa jayojja.

<sup>18</sup> Eyacuiñajjiya Jesosa Quito huoojea canaje esejo mano'yohua. Jesosa mano'yajo, Eyacuiñajji ese nijje quea quene po tiitii ajja. Ese nijje quea bei po'yo majje ohuaya eseja huoojea canaje ojjaña huasijje ojaya esohui huohuiya jama ba'a: —Eyacuiñajjiya Jesosa huoojea canaje eseja mimishijo mano'yohua. Jamajjeya Eyacuiñajji ese nijje quea quene po tiitii ajja. ¡Jesosa nijje jjapeequicue! <sup>19</sup> E'e, ohuaya Jesosa Quito huoojea canaje ojjañaja mimishijo mano'yohua. Jamajjeya Eyacuiñajji ojjaña ese nijje quea bei poani. Quea quene jjashahuaba tiitiiqui ajja eseja mimishi cuanajo —jamaya Eyacuiñajjiya eseja huohui meesahua cani.

E'e, jjeya Eyacuiñajjiya ecuana huoojea canaje jama huohuime aa ba'a: —Jesosa eseja mimishi cuijea'yojji mano'yonaje Eyacuiñajji ese nijje quene'ama epo'yojji. ¡Ojaya epeeji cuana pocue!

<sup>20</sup> E'e, ecuana Jesosa Quito esohui huohuijji poani. Ohuaya ecuana huoojea canaje onijje chachohua. E'e, Eyacuiñajjiya ecuana huoojea canaje ojaya esohui huohuiya miquiana huasijje. Jamajjeya ecuaaya esohui huohuiaña miquianaya Jesusaja epeeji epo meejji. Jama aña ba'a: —¡Jesosa eseja mimishi cuijea'yojji mano'yonaje Eyacuiñajji ese nijje quene'ama epo'yojji. ¡Jesusaja epeeji pocue, Eyacuiñajjiya pea'ai! —ecuana poani.

<sup>21</sup> Jesosa Quito quea pame po tiitiinaje mimishi'ama nei. Jamatii Eyacuiñajjiya jama acanaje ba'a: —Ojjañaja mimishi cuana Jesosa Quito poaje. Jiquio ecua miquianaaya aquiana aboña jama ohuaya mimishi abo caje. Jamajjeya eyaya oya quea nee nee po mee'yo majje ojjaña mimishi cuana enapa tiitii'yojji pojjeama ca onijje jjapeequi'yajo —Eyacuiñajji poanaje. Jamajjeya Eyacuiñajjiya huohui canaje jama pea'ai ba'a: —Ojjaña Jesosa nijje jjapeequiani eyaya baña ecua epeeji, shajjama' pojjeama —Eyacuiñajji poanaje.

## 6

<sup>1</sup> E'e, ecuaaya Eyacuiñajji nijjeya ojjaña huasijje esohui quea pame nee Jesusajo huohuiaña. Jamajjeya ecuaaya miquiana huohui neineiaña jama ba'a: —¡Eyacuiñajjiya esohui shajja'ajja majje jamaya pocue! ¡A'a shajjama' pojji! Shajjama' cuana eba'e meejji pojjeama eyajo Jesosa nijje.

<sup>2</sup> ¡Eyacuiñajjiya esohui shajja'ajjacue! Yahuajo nei nei ohuaya tehue mee ca poa jama ba'a:

“Jjeya nei miquianaya enijje mimiani miquiana mimishi cuijea'yojji. Eyaya miquianaya shajja'ajjanaje. Enijje mimianijo, eyaya miquianaya ba'e tiitii meeje'yo pea'ai”.

Jamaya Eyacuiñajjiya esohui yahuajo nei etehue'yo poa.

¡Bacue oe! Jjeyahua nei Eyacuiñajji miquiana shajja'ajja sa poani. Jjeya nei ohuaya miquianaya ba'e tiitii mee sa acani ojaya epeeji nei nei epojji.

### *Pabo quea nee nee poanaje*

<sup>3</sup> Ecuaaya Jesusaja esohui jayojja jama atitiiña quea ja'a nee. Jamajjeya ojjaña ecuana ba majje Jesusaja esohui shajja'ajja caje'yo. Jamaya ameeme ajja ba'a: —E'e de, Jesusaja epeeji cuana quea mimishi nee poani. Jamajjeya ecuana ojaya epeeji po sa po ajja —jama sijje pomeya epojji pojjeama.

<sup>4</sup> Chojja. Ecuana ba majje ojjaña caba cahua ecuana Eyacuiñajjiyo quea pame nee chachachacoani jamatii onaa napa caniya tii. Quea pame nee po tiitiani. E'e, onaaya ecuana quea nee po mee cani, ecuana niñeba cani, Jesosa nijje jjapeequianijo eba'eji quea camaja poani pea cuana quea mimishi poanijo. <sup>5</sup> Maaya ecuana cuia majamaja canaje, jeanobiajea majamaja canaje, ecuana nijje quea quene nee po majje quea huiso jjachichachinaje. Ecuana cojja neijo nequi majje janobajjima mimipanajjinaje. Ecuana quea camaja chachachaco majje cahui jjima tii aninaje. Quea shoe po majamajanaje pea'ai. Jamatii ecuaaya esohui quea pame Jesusajo huohui majamajaña, huea'ama



nei nei ecuana poani. <sup>6</sup> Mimishi'ama nei nei ba'yani pea'ai. E'e, ecuana chacochoacoani Jesusajo quea pame nee. Quea huiso esohui Jesusaja ecuanaja eba quea ja'a nee. Ecuana quenequene cuaji ajja pea cuana nijje. Quea bei poani. Dejja tai'ama poani. Edojjoshahua Pameya quea pame nee ameesahua cani pea'ai. Pea cuana ecuanaja quea jea nee poani e'e jojo nei pea'ai. Jamajjeya ojjaña ba cani ecuana Jesosa Quitoja echacojji quea ja'a nee. <sup>7</sup> Ecuanaja esohui e'e jojo nei poani. Eyacuiñajjiya huohui meesahua canijo ecuanaja esohui quea ja'a nee poani. Eyacuiñajjiya emimishi cuijea'yo jjejojo ecuana ba'yani quea ja'a. Jamajjeya ecuaaya eshahua epeeji cuana mimicuijeanobiajeaña esohui e'e nei mimi majje. Eyacuiñajjiya ameesahua canijo esohui e'e nei mimiani tii. <sup>8</sup> Cuanaya eya quea pame nee poanijo jamaya cuana poani ba'a: —Pabo quea pame nee poani.

Beca cuana jama poani ba'a: —Pabo ecuea boti'ama, Jesusaja esohui huohuijjiyojo.

Pea cuana ca ca jama poani ba'a: —Paboya esohui quea ja'a nee.

Beca cuana ca jama poani ba'a: —Chojja, Paboya esohui shajja'ajja sa po ajja ca iña.

Pea cuaa ca jama saja'ame acani ba'a: —Pabo Eyacuiñajjiya esohui huohuijji quea ja'a nee.

—Chojja, Pabo esohui huohuijji nisho. Oya siajje pojji —jama eya niñebameya acani cuaa.

<sup>9</sup> —Pabo ecuea eba. Ohuaya quea pame nee huohui cani —beca cuana poani.

Pea cuana ca jama poani ba'a: —¿Ae shai poani Pabo? Oya ecuea ba jjima —poani.

Pea cuaa eya cuiajea sa acani. Jamatii eya eshe nequi, mano'yo jjima. Niñeba majje eya cuia canaje cuaa. Jamatii Eyacuiñajjiya jaahuana canaje jjejojo eya mano'yo jjima.

<sup>10</sup> Quea huiso epeeji nisho poanajejo, eya quea yeno poani. Jamatii Eyacuiñajjiya eya quea bihui nee po mee cani. Eya aema' poanaje pea'ai. Jamatii ecuea esohui shajja'ajja majje quea huiso Jesusaja epeeji poani, quea pame ba'yani. E'e, Jesusaja epeeji poanijo eseya quea aquiana huiso nee nee jayojja. Jiquio meshijo ba'yanijo ca ca eya e'aquiana mese pojjeama. Jamatii Jesusaja epeeji poanijo ecuea quea huiso aquiana yani eyajo.

<sup>11</sup> Ecuea epeeji cuana Conitojo ba'e, eyaya ojjaña ecuea ejjashahuabaquijji huohuiaña quea ja'a nee miquiana huasijje miquianaya ecuea quea jea nee nee poanijo. <sup>12</sup> E'e, miquiana nijje jjapee neineiquiani, miquiana quea jea nee nee poanijo. Miquianaya ca ca enijje jjapee neineiqui sa po'yo ajja. <sup>13</sup> Jamajjeya epeeji cuana, ecuea esohui miquiana huasijje jama ba'a: —¡Jiquio ecua miya ecuea quea jea nee nee jamaya oe eya acue miquiaaya! ¡Enijje jjapee neineiquicue! —eya poani.

*¡Dejja mimishi nijje a'a jjapee neineiquijji!*

<sup>14</sup> Miquianaya Jesusaja epeeji cuana poanijo ja'a nequijji Jesusaja epeeji pojjeama cuana nijje! ¡Ojaya epeeji cuana jayojja a'a pojji! Jesusaja ejjashahuabaquijji Edosiquiana neija ejjashahuabaquijji jama pojjeama. Pea oya, de. Jesusaja esohui quea ja'a nee cuaquijji jayojja. Edosiquiana neiya ca ca quea mimishi nee nee, quea tai nee nee acani. Ojee nequi ajja Jesusaja epeeji Edosiquianaja epeeji nijje. Pea oya, de. <sup>15</sup> Jesosa Quitoja ejjashahuabaquijji quea pame nee nee. Edosiquianaja ca ca quea tai. Pea ojaya, de. Jesosa Quitoja epeeji cuanaja ejjashahuabaquijji quea pame. Ojaya epeeji pojjeama cuanaja ejjashahuabaquijji ca ca quea tai. Pea ojaya, de. <sup>16</sup> Eyacuiñajjiya equi yasijje Jesusaja epeeji cuana dobiquiani ojee Eyacuiñajji bihuiaa, eyacuiñajji nisho bihuiaa pojjeama. Maya quea tai. Cuanaya Jesusaja epeeji cuana huasijje Eyacuiñajji dobiquinaje. Jamajjeya eshahua epeeji cuana nijje jjapeequi meeme ajja. Yahujajo nei Eyacuiñajjiya esohui huohui mee ca poa ojaya epeeji cuana huasijje jama ba'a:

“Miquianaya ecuea huapa pojjeama cuana poanijo, eya miquiana huasijje dobiquiani, miquiana nijje jjapee tiitiquiani pea'ai. E'e, eya oe nei miquea Eyacuiñajji. Miquianaya jaahuana tiitiaña pea'ai. Miquiana ecuea epeeji cuana poani”.

Jamaya pea esohui etehue'yo poa pea'ai ba'a:

<sup>17</sup> “Jamajjeya ¡ecuea epeeji pojjeama cuana nijje a'a jjapee tiitiquijji! ¡Enijje nei oe jjapee tiitiquicue! ¡A'a quea mimishi pojji! Jamajjeya eyaya miquianaya ba'e meej'e'yo enijje. <sup>18</sup> Cuanaya eya miquianajaya Chii nei poaje. Miquianaya ecuea ebacua

piona cuana, ecuea ebacua ejja cuana poaje'yo pea'ai. Eyaya mi jaahuanajji quea ca'a neeya jamaya aña”.

Jamaya Eyacuiñajjiya yahuaajo nei huohui ca poa.

## 7

<sup>1</sup> Ecuea epeeji cuana, ¡shajja'ajjacue mo! Eyacuiñajjiya jiquio esohui huohui canaje esejaya ebajji, ese jaahuanajji poaniya. Jamajjeya ¡a'a quea mimishi ba'ejji; a'a quea mimishi jjashahuabaquijji pea'ai! Miquianajaya eba Eyacuiñajjiya ojjaña mimishi cuana quea nee nee po mee caje'yo tii tii. Jamajjeya ¡quea pame nee nee oe acue! ¡Eyacuiñajjiya ejjashahuabaquijji jama oe pocue! ¡Oya oe shajja'ajjacue!

### *Pabo quea bihui nee poanaje*

<sup>2</sup> ¡Eya quea jea nee acue! Eyaya miquianaya quea pame nee a'yonaje. Ecuea esohui quea pame poanijoyaya miquianaya quea pame nee nee po meeje'yo. E'e, miquianaya ecuea edasajji pojjeama. <sup>3</sup> Eyaya jiquio esohui huohuiaña miquiana tecueajji pojjeama. Chojja. Yahuaajo eyaya huohuinaje jama ba'a: —Miquianaya ecuea quea jea nee nee. Jamajjeya eya miquiana nijje ba'e majje quea bihui nee poaje. Cuanaya miquiana nijje nequi majje eya manaje'yo pojja'a. Jamatii, jamaya quea pame nee miquianaya ecuea quea jea nee poanijo.

<sup>4</sup> Ecuea eba miquiaaya ecuea esohui etehue'yo jayojja jama aje'yo. Jamajjeya eyaya miquianajo jama huohuiaña ba'a: —Jesosaja epeeji cuana Conitojo ba'eya ecuea esohui etehue'yo jayojja jama acani —eya poani.

E'e, miquianajo eya quea bihui nee poani. Pea cuaa eya quea nee nee po mee cani Jesosa nijje jjapeequianijo. Jamatii eya quea bihui nee nee poani miquiana quea pame nee nee poanijoyo.

<sup>5</sup> Ecuea epeeji Conitojo ba'e, eyaya miquianaya huohuije ecuea eba'ejjiyo pea meshijo. Eya Masenonia meshijo nequi pea cuaa napa majamaja canaje, niñeba majamaja canaje pea'ai. Jamajjeya eya quea ajjaja poanaje. <sup>6</sup> Jamatii Eyacuiñajjiya ojaya epeeji quea yeno nee nee poajo jaahuana cani. Jamajjeya ohuaya Tito huoojea ca'yonaje e quea bihui po mee'yojji. <sup>7</sup> E'e, Tito ba majje eya quea bihui nee poanaje. Ohuaya miquianajo huohui canaje quea pame jama ba'a: —Pabo, Jesosaja epeeji cuana Conitojo ba'eya eya, Tito, jaahuana ca'yonaje quea pame nee. Miya ojjañaja quea jea nee poani, Pabo. Yahuaajo onaaya esohui huohuijji nisho shajja'ajja canaje. Jamajjeya miya quea yeno poanajejo, miquea epeeji cuana pea'ai quea yeno poanaje. Miya ona nijje quea bei po mee o'oya sa acani cuaa —jamaya Tito poanaje.

Jamajjeya miquianaya ejo jjashahuabaquianijo, eya quea bihui nee poani.

<sup>8</sup> Yahuaajo eyaya pea tehue'ya poa quea tecue. Ma esohuijyaya miquianaya quea yeno poanaje. Quea camaja nee ma esohui etehuejji poanaje, miquiana tecueajji. Jamatii, ma etehue'yojo miquianaya quea yeno po tiitii ajja. <sup>9</sup> E'e, ma esohui etehue'yo ba majje miquianaya quea yeno poanaje. Quea yeno po majje miquianajaya mimishi pajea'yonaje. Esohui huohuijji nisho esohui sijje shajja'ajja pajea'yonaje pea'ai, miquianaaya. Jamajjeya miquianajo eya quea bihui nee poani. E'e, quea yeno poanajejo, Eyacuiñajjiya miquianaya ba'e meesahua ca'yonaje quea pame nee. Jamaya quea pame nee miquianajo. <sup>10</sup> Dejja cuana quea mimishi poani Eyacuiñajjiya quea yeno po mee cani oja mimishi pajea'yojji. Mimishi pajea'yo ca'yajo, Eyacuiñajjiya ojaya mimishi cuana cuijea ca'yani. Eshahuaja epeeji cuana quea yeno poani mimishi amajje. Jamatii Eyacuiñajjiya oya cuana quea nee nee po tiitii mee caje'yo mimishi pajea sa po'yo ajjajojo. <sup>11</sup> E'e, Eyacuiñajjiya miquianaya quea yeno po mee ca'yonaje. Quea yeno po majje miquianaya quea pame nee poani. Shajjama' cuana, mimishi cuana miquiana nijje nequi. Ojaya mimishi cuana cajaa aña miquianaaya. Oya miquianajaya epee'yojji pojjeama; miquianaya onaya jayojja jama po ajja. Quea quene poanaje pea'ai esohui huohuijji nisho cuana nijje e sijje ajjijojo. Miquianajaya eba Eyacuiñajjiya quea nee nee po mee caje'yo ojjaña mimishi cuana. Jamajjeya quea mete nee po majje mimishi

cuana a sa po'yo ajja. Cuanaya enijje jjapee neinei qui sa poani, quea bei. Miquianajaya Eyacuiñajji quea boti nee poanijo esohui shajja'ajja o'oya sa poani. E'e, miquianaya quea ja'a jjashahuabaquianijo, ecuea eba miquianaya mimishi poani nijje jjapeequi'yo ajja. Jjabahuejjaqui meesahuaje'yo Jesosa nijje ejjapeequijji. Jamaya quea pame nee.

<sup>12</sup> Jamajoya eyaya yahuajo esohui tehue majje miquiana huasijje huoojeanaje. Eyaya maya esohui tehuenaje miquiana jjashahuabaqui meeji jama ba'a: —E'e de, Pabo Eyacuiñajji huoojea'yo esohui huohuijji. Oya ecuanaja quea jea nee. ¡Oja tehue jayojja jama ejja'aqui o quea bihui pojji! —jamaya miquianaya jjashahuabaquinaje.

Maya esohui eyaya tehuenaje dejja quea mimishi cuana tecueajji. Ma dejja cuanaja mimishijo pea cuana quea yeno poanaje. Eyaya ma esohui tehuenaje dejja quea yeno ani cuana yeno'ama po mee'yojji pea'ai.

<sup>13</sup> Jamajjeya ecuea etehue'yo ba majje miquianaya quea ja'a jjashahuabaqui o'oyani. Jamajjeya eya quea bihui nee poani.

Yahuajo miquiana nijje mimi jjimahuajo Tito quea yeno jjashahuabaquinaje jama ba'a: —Jesosaja epeeji cuana Conitojo ba'e quea mimishi jea nee nee.

Jamatii miquiana nijje mimi majje Tito quea bihui nee poanaje. Jamajjeya eya quea bihui nee poanaje Titoja esohui shajja'ajja majje miquianajo ohua huohui cajje.

<sup>14</sup> Yahuajo eyaya oya huohuinaje jama ba'a: —Tito, Jesosaja epeeji cuana Conitojo ba'e minijje jjapeequije'yo. Miquea esohui shajja'ajja caje pea'ai —eyaya anaje.

E'e, ecuea esohui Tito nijje jayojja jama a'yonaje miquianaaya. Jamajjeya miquianaaya quea pame anaje; eya bicho'ama miquianajo. <sup>15</sup> Miquiana huasijje poqui jjimahuaja miquianaya Titoja quea boti nee pishana. Miquiana que poqui majje miquianaya ojaya quea boti nee nee. Oya quea bihui nee nee pea'ai. E'e, miquianajo jama poani ba'a: —E'e, Jesosaja epeeji cuana Conitojo ba'eya ecuea esohui shajja'ajja canaje quea jaji nee. Ohuaya ojjaña ecuea esohui shajja'ajja neinei canaje eya etecuea poajjeya jjejojo. Ecuea esohui jayojja jama a sa poanaje —Tito poanaje.

<sup>16</sup> E'e, ecuea eba miquianaya ecuea esohui jayojja jama poaje. Jamajjeya eya, Pabo, miquianajo quea bihui nee poani, de.

## 8

### *¡Jesosaja epeeji cuana ba'e meesahuacue!*

<sup>1</sup> Ecuea epeeji cuana Conitojo ba'e, jjeya eyaya miquianaya huohuije Jesosaja epeeji cuana Masenonia meshijo ba'ejo. Eyacuiñajjiya oya cuana ejjesheji quia meesahua canaje Jesosaja epeeji cuana Jodea meshijo ba'e yasijje equiajji. <sup>2</sup> E'e jojo nei quea camaja nee nee onajaya eba'ejji, Masenonia meshijo ba'eja. Aema' cuana poanaje. Jamatii onaaya ejjesheji quia canaje quea bihui nee Jesosaja pea epeeji aema' nei cuana ba'e meesahuajji. Quea bihui nee nee poanijo quea huiso quia sa poanaje. <sup>3</sup> Ecuea eba oya cuana aema' poanaje. Jamatii ejjesheji quia canaje. Quia majje quea camaja, aema' nei poanaje. Ecuea oya cuana huohui jjima ejjesheji quiajji, pea cuana ba'e meesahuajji. Chojja. Jamatii quia canaje. <sup>4</sup> Oya cuana enijje mimi majamajanaje jama ba'a: —¡Ecuana ejjesheji dojocue! ¡Quiacue Jesosaja epeeji cuana Jodea meshijo ba'e yasijje ona ba'e meesahuajji! Jamaya ecuanaja a sa neinei poani —poanaje Jesosaja epeeji cuana Masenonia meshijo ba'e.

<sup>5</sup> Eya jjashahuabaquinaje jama ba'a: —Onaaya ejjesheji quia caje oe pojji pojja'a, quea huiso pojja'a.

Chojja de. Oya cuana jama poanaje ba'a: —Ojjaña ecuanaya Eyacuiñajji esohui jayojja jama poaje'yo. Cuanaya ojjaña ecuanajaya aquiana ojaya poani —jamaya oya cuana poanaje—. ¡Ecuana huohuicue Eyacuiñajji ejjashahuabaquijji! Miquea esohui jayojja jama ecuanaja poaje'yo —jamaya Jesosaja epeeji cuana Masenonia meshijo ba'eya huohui canaje.

<sup>6</sup> E'e, quea ja'a nee acanaje. Jamajjeya eya Tito nijje miminaje jama ba'a: —Tito, ¡Jesosaja epeeji cuana Conitojo ba'e yasijje poqui o'oyacue! Yahuajo miya ona nijje

miminaje ejjeshejji Jesusaja pea epeeji cuana huasijje equiajji, ona ba'e meesahuajji. Jamatii ejjeshejji huoojea jjima. Jamajjeya ijjeja ona nijje mimi o'oyacue ejjeshejji equiajjijo! ¡Jama acue ba'a: “Jesusaja epeeji ba'e meesahuañajo miqianaya quea pame nee poani Jesusajo” jamaya acue, Tito! —eyaya Tito huoojeaña ma esohui huohuiya.

<sup>7</sup> E'e epeeji cuana, miqianaya quea pame nee poani jama ba'a: Jesusaja esohui jayojja jama poani. Miqianajaya esohui Jesusajo quea pame pea'ai. Miqianajaya eba quea huiso esohui Jesusaja. E'e jojo nei quea ja'a nee jjashahuabaquiani pea'ai. Eya miqianajaya quea jea nee poani pea'ai. Jamatii ijjeja Eyacuiñajjiya miqianaya ejjeshejji quia meesahua cani Jesusaja epeeji Jenosanenajo ba'e yasijje ona ba'e meesahuajji. Jamaya quea pame pea'ai. Onaa napa cajje oya cuana aema' nei. Napa huicha'a huicha'a canaje cuaa Jesusaja epeeji poanijojo. <sup>8</sup> Ecuea Tito miqiana que huoojea jjima ejjeshejji quia meeya. Chojja. Jesusaja pea epeeji cuaa jamatii ejjeshejji quia canaje quea bihui nee. ¿A'a miqianaya onaya jayojja po sa poani pea'ai? ¿A'a miqianaaya quea pame nee aje pea'ai? <sup>9</sup> ¡Jashahuabaquicue Jesusaa miqianaya quea pame nee nee acanaje! Jama ba'a: Jesosa ba jjimahuajo miqianaya aema' jayojja poanaje. Jamatii ohuaya, Jesosa Quitohua, esejaya Emeshi Mese neiya miqianaya ba'e tiitii mee caje'yo onijje eyajo quea ja'a nee nee. Dejja cuana huasijje poe jjimahua Jesosa ba'e'yonaje eyajo quea ja'a nee nee. Meshi yasijje poe majje ca ca dejja cuana jayojjaya poanaje, aema' pea'ai. Jamaya oya poanaje miqiana ba'e tiitii mee'yojji eyajo.

<sup>10</sup> Jamajjeya miqianaya ejjeshejji quiajjijo eya jama poani ba'a: Oe shequiaja yahuajo miqianaya ebionei jjashahuabaquinaje ejjeshejji aema huasijje equiajji. Pea cuana jjashahuabaqui jjimahuajo miqianaya quia sa poanaje. <sup>11</sup> E'e, miqianaya ejjeshejji quia sa poanaje. Jamajjeya ijjeja miqianajaya ejjashahuabaquijji yahuajo jayojja jama acue! ¡Miqianajaya aquiana quea huiso yanijo quea huiso quiacue pea'ai! ¡A'a quea bejjo nahue pojji! <sup>12</sup> Aquiana quia sa poanijo, Eyacuiñajji quea bihui nee poani e'aquiana mese nijje. Ojaya Eyacuiñajji quea jea nee poanijo e'aquiana meseja aquiana quea huiso poanijo quea huiso quia caje pojja'a. Aquiana oe pojji poanijo ca ca oe pojji aquiana quia caje. Jamatii Eyacuiñajji eba esejaya aquiana quea huiso pojja'a, oe pojji pojja'a. ¿A'a aquiana cuana miqianajaya quea nahue? <sup>13</sup> Onaa napa cajje aema' nei nei ani quea camaja. Oya cuana miqiana aquiana quiajje aema' nei epo'yojji pojjeama. Ma aema huasijje quea huiso aquiana quia majje miqianaya aema' nei poaje pojja'a. ¡A'a jamaya pojji! Chojja, jamaya eya huohui jjima. Eya jjashahuabaquiani jama ba'a: —Oe Jesusaja epejjija aquiana cuana quea huiso poajo epeeji aema huasijje iye huiso quia majje chama' aema' poaje.

Jamaya eyaya amee sa año. <sup>14</sup> Jjeja nei miqianajaya aquiana quea huiso. ¡Jesaja epeeji aema huasijje quiacue! Quia majje oya cuana aema' pojjeama poaje. Quea ja'a ba'eje'yo. Quijje miqianaya aema' poajo, onajaya aquiana yanijo quia caje'yo miqiana huasijje pojja'a. E'e, ojjañaja aquiana cuana pea cuanaja aquiana cuana oya huisoajja poaje. <sup>15</sup> E'e, esohui etehue'yo yahuajo nei jayojjaya jama poani ba'a: “Beca equé mese cuaa oe pojji bobi chicha canaje. Pea equé mese cuaa bobi quea huiso nee nee chicha majje nahue'ama poanaje bobijo. Jamajjeya ojjaña cuana bobijji poanaje, pea cuanaja bobi oya huisoajjaya poanaje”.

#### *Pabohua Tito huoojea caje Conito cuiñajji yasijje*

<sup>16</sup> Eyaya Eyacuiñajji bihuiaña jama ba'a: —Eyacuiñajji, miyaya Tito jjashahuabaqui meenaje quea ja'a nee miquea epeeji cuanajo, Conitojo ba'ejo. Jamajjeya oya e jayojjaya onajo jjashahuabaquiani. Conitojo ba'e cuana quea ja'a nee ba'e mee sa acani Jesusajo. E'e Eyacuiñajji, jamaya miyaya Tito ameesahuanaje —jamaya eyaya Eyacuiñajji bihuiaña.

<sup>17</sup> E'e epeeji cuana, ecuea esohui etehue'yo miqiana huasijje ejjeshejji aema huasijje equiajji ba majje Tito quea bihui nee poanaje. Miqiana huasijje poqui sa poani ecuea esohui etehue'yo huohuiya. Eyaya oya huoojea jjima. Chojja, oya jamatii poqui sa poani miqiana que. <sup>18</sup> Tito nijje eyaya pea dejja huoojeaña, Jesusaja epeeji pea'ai. Maya

poquinaje ojjaña Jesusaja epeeji cuana huasijje esohui Jesusajo huohuiya. Shajja'ajja majje ojjaña Jesusaja epeeji cuaa huohui canaje jama ba'a: —Maaya Jesusajo quea pame nee esohui huohui cani —acanjaje cuaa.

<sup>19</sup> Jesusaja epeeji cuaa pea cuiñajji cuanajo ba'eya jiquio epeeji babaca canaje enijje epoquijji Jenosanena huasijje ejjeshejji aema huasijje dojosahuaa. Jamaya eya ejjeshejji dojo sa neinei poani Jesusaja epeeji aema' poani yasijje ona ba'e meesahuajji. Jamajoya pea cuana Jesusajo jjashahuabaquije jama ba'a: —E'e de, Jesusaa ojaya epeeji cuana quea ja'a nee ameesahua cani. Jesosa ca ca oe quea pame nee nee poani —poaje cuana.

<sup>20</sup> Ma epeeji enijje poquianiya ohuaya ba caje eyaya e'e jojo nei ma ejjeshejji aema huasijje quiaña. Jamajjeya pea cuana ejo sijje epojji pojjeama jama ba'a: —Pabo ejjeshejji siijji pojja'a —pea cuana jamaya epojji pojjeama.

<sup>21</sup> E'e, eya jjashahuabaquiani jama ba'a: —Eyaya quea pame nee ejjeshejji dojoje. Jamajjeya ojjaña ba caje eya siipojji pojjeama. Jesusaja eba eyaya quea ja'a nee aña.

<sup>22</sup> Tito nijje eyaya beca dejja huoojeaña miquiana baa. Maya ecuea eba. Oya pea'ai quea ja'a nee po tiitiiani. Jesusajo chaco cani. Jjeya maya miquiana nijje quea ja'a nee nequije. Miquianajo jjashahuabaquiani jama ba'a: —Jesusaja epeeji cuana Conitojo ba'e quea pame nee poani. Quea bejjo nahue pojjeama, shajjama' pojjeama pea'ai poani.

<sup>23</sup> E'e pojja'a pea cuaa huohui'ajja caje: —¿A'ya cuae Tito?

Jamajjeya ¡oya cuana huohuicue jama ba'a: —Titohua Pabo nijjeya esohui quea pame nee Jesusaja huohui cani. Ohuaya Pabo miquiana nijje chaco meesahua cani —huohuicue!

Pea dejjaa ma beca epeeji cuanajo huohui'ajja cajo, jama acajo ba'a: —¿Aya acuae oya cuana huoojea canaje? —acajo, ¡oya cuana huohuicue jama ba'a: —Jesusaja epeeji cuaa beca epeeji huoojea canaje miquiana huasijje, miquiana Jesusajo ba meesahuaa. Ohuaya Jesusajo huohui cani quea pame nee nee pea'ai —acue!

<sup>24</sup> Jamajjeya ¡jiquio Jesusaja epeeji cuana quea jea nee acue! ¡Oya cuana jaahuanacue quea pame nee! ¡Oya cuana shajja'ajjacue pea'ai! Ma ba majje ojjaña Jesusaja epeeji cuaa ba caje miquianaya Jesusaja epeeji quea ja'a nee poani pea'ai. Jamajjeya ojjaña ba caje ecuanaja esohui quea pame miquianajo e'e nei poani pea'ai.

## 9

### *Ejjeshejji Jesusaja epeeji cuana huasijje equiajji*

<sup>1</sup> Eyaya miquiana huasijje esohui etehue majamajjji pojjeama Jesusaja pea epeeji aema' ba'e meesahuajji. <sup>2</sup> Chojja. Ecuea eba miquianaya pea cuana ba'e meesahua sa neinei poani. Jamajjeya eyaya Jesusaja epeeji cuana Masenonia meshijo ba'e huohuinaje jama ba'a: —Jesusaja epeeji cuaa Acaya meshijo ba'eya ejjeshejji chicha sa acani aema huasijje equiajji. Jamaya ohuaya acanjaje oe shequiaja yahuajo —jamaya eyaya pea cuana huohuinaje.

Ma esohui miquianajaya shajja'ajja majje pea epeeji cuana ejjeshejji chicha sa poanaje pea'ai Jesusaja epeeji aema huasijje equiajji. <sup>3</sup> Jjeya eyaya beca cuana, Jesusaja epeeji cuana huoojeaña miquiana huasijje. Jamajjeya ¡ecuea esohui ma ecua eyaya yahuajo huohuinaje jayojjaya oe acue! E'e, ma beca epeeji cuaa miquianaya ojee iyaa caje ejjeshejji echichajji, aema' nei Jodea meshijo ba'e yasijje equiajji. Jamajjeya miquianajaya ejjeshejji equiajji apoa poaje pea cuana poe jjimahuajo. <sup>4</sup> E'e, Jesusaja epeeji cuana Masenonia meshijo ba'e miquiana huasijje poe'yajo, miquianajaya ejjeshejji aema huasijje equiajji apoa ajjimajo quea bicho nee nee poaje miquianaya. Eya pea'ai quea bicho poaje miquianaaya ecuea esohui jama ajjimajo. Quea bicho nee eya poaje. <sup>5</sup> Jamajjeya eyaya Jesusaja epeeji beca cuana huoojeaña pea epeeji cuana miquiana que poe jjimahuajo. Ohuaya miquea ejjeshejji aema huasijje equiajji chicha meesahua caje. ¡Miquianajaya esohui yahuajo jayojjaya jama acue! Jamajjeya miquianajaya ejjeshejji equiajji quea huiso poaje, miquianajaya ejjashahuabaquijji yahuajo jayojjaya. Jamajjeya miquianaaya quea bihui nee quiaje'yo.

*¡A'a quea dejja tai pojji; a'a quea nishehui pojji!*

<sup>6</sup> ¡Jiquio esohui shajja'ajjacue pea'ai! Oe pojji bana majje quijje oe pojji chichaje'yo. Jiquio ecua eso' jayojjaya jama miquianajaya ejjeshejji poaje. Jjeya quea dejja tai poanijo, quea nishehui poanijo pea'ai oe pojji aema huasijje quiajo, quijje Eyacuiñajjiya oe pojji quia caje'yo miquiana huasijje. Jjeya quea huiso quiañajo ca ca, dejja tai'ama poanijo ca ca quijje Eyacuiñajjiya quea huiso quia caje'yo miquiana huasijje. <sup>7</sup> Jamajjeya ¡jjashahuaba neinei quicue ache huiso miquianaya quia sa poani! ¡Quea bihui nee quiacue! E'e, ¡jamatii miquianajaya ejjashahuabaquijji jayojja jama quiacue! Eyacuiñajjiya quea jea nee ojaya epeeji cuana. Ejjeshejji quea bihui nee quia canijo, dejja tai'ama poanijo pea'ai Eyacuiñajji quea bihui nee poani. <sup>8</sup> E'e, Eyacuiñajjiya aquiana cuana quea huiso nee nee yani. Jamajjeya miquianajaya quea huiso ejjeshejji aema huasijje quia majje, jamatii ohuaya miquianajaya aquiana quea huiso po tiitii mee caje'yo. Miquianaya aema' nei epojji pojjeama. Chojja. Eyacuiñajjiya miquianaya jaahuana cani. <sup>9</sup> Yahuajo nei nei esohui etehue'yo jama poa ba'a:

“Ojjaña joya ejjeshejji quea huiso quia tiitii canaje aema' ba'e meesahuajji quea pame nee poanaje. Jamajjeya ¡jeyahua nei Eyacuiñajjiya oya quea ja'a ba'e meesahua caje. Quijje pea'ai ba'e tiitii mee caje'yo”.

Jamaya yahuajo nei nei esohui etehue'yo poa.

<sup>10</sup> Eyacuiñajjiya eso' quia cani ojjaña huasijje quejo equecuajji. Ohuaya bobi quia cani ojjaña bobiajji pea'ai. Jamajjeya ohuaya miquiana huasijje eso', bobi pea'ai quia majje, ¡miquianaaya aquiana cuana quiacue pea cuana huasijje! Jamaya quea pame nee. <sup>11</sup> E'e, Eyacuiñajjiya miquiana huasijje aquiana mi ba'e meejji quia caje'yo. Jamajjeya miquianaaya pea huasijje aquiana o ba'e meejji quia poquia tiitiije. Jamajjeya miquianajaya aquiana quea huiso equia'yo aema huasijje eya quiajje onaaya huohui caje jama ba'a: —Eyacuiñajji ecuana jaahuanajji quea pame nee nee poani. Ohuaya Conitojo ba'e cuana ecuana que quia meeshahua canaje quea huiso, ma ecua Pabohua huohui canaje jama acanaje —poaje quea bihui nee.

<sup>12</sup> Ma aquiana cuana miquianaaya Jesusaja epeeji aema' cuana huasijje quiañajo, quea ja'a nee ba'e meeaña. Cuanaya ma aquiana quea huiso quiañajo, onaaya Eyacuiñajji bihuia neinei cani: —E'e, Eyacuiñajji, jamaya. Miya quea pame nee poani ecuana nijje —poaje.

<sup>13</sup> E'e, miquianaya dejja tai'ama poanijo, aquiana quiañajo quea huiso ba meeaña miquiana Jesusaja epeeji quea ja'a nee poani. Jamajjeya oya cuana mimije jama ba'a: —Eyacuiñajji, miyaya miquea epeeji cuana quea ja'a nee po meeaña. Miyaya oya cuana quea huiso aquiana quianaje. Jamajjeya miquea pea epeeji cuana huasijje aquiana quea huiso huoojea canaje ona ba'e meesahuajji. E'e, miquea epeeji cuana Conitojo ba'eya huohui cani oya cuana Jesusa Quitoja epeeji cuana poani. Ecuana eba onajaya esohui e'e jojo nei poani miquea esohui jayojja jama oya cuana poanijo —jamaya pea cuana huohui caje miquianajo.

<sup>14</sup> Jamajjeya miquianaya ojaya quea jea poanijo, Eyacuiñajji nijje mimi majje jama poaje miquianajo ba'a: —Eyacuiñajji, miyaya quea huiso aquiana quianaje ona que. Majoya Jesusaja epeeji cuana Conitojo ba'e quea huiso aquiana quia meesahuanaje ecuana que. Ecuana quea jea ameesahuanaje. ¡Quea pame nee poanijo, oya cuana jaahuanacue! —jamaya onaya mimije Eyacuiñajji nijje.

<sup>15</sup> Eyacuiñajji esejo ¡jjashahuabaquiani. Jamajjeya eyaya oya bihuiaña jama ba'a: —Eyacuiñajji, miyaya mique Bacua Ejja huoojeanaje ecuana jaahuanaa. Quea pame nee nee poanaje miya —jamaya Eyacuiñajji bihuiaña eyaya.

Mahuiso ecuea esohui ejjeshejji equiajjijo.

<sup>1-2</sup> Jjeya eyaya, Pabohua pea esohui tehueña. Eyacuiñajjiya eya huoojea canaje miquiana sohuihuohuiya. Jamajjeya ¡shajja'ajjacue mo! Jesosa Quito ese nijje quea bei poani. Jamajjeya eseya ojaya epeeji poanijo, eya miquiana nijje mimi neineiiani jama ba'a: —Beca siajjepojji cuana miquiana nijje mimiani ejo jama ba'a: “Pabo aje oe ecuana nijje nequiahua oya ca'a'ama, quea mete poanaje. Quea huesha nei nequija jjejojo ca ca quea sohui bishaa, quea tecue pea'ai poani; poe majje, cho” oya siajje poani.

¡A'a maya siajjepojji cuana shajja'ajjajji! ¡A'a o jayojja jama mimijji! E niñebajji, eyaya miquiana tecueaje poe majje. Eya quea tecue poaje beca cuana nijje ejo quea tai jjashahuabaquianijo. Oya cuana aje oe jjashahuabaquiani jama ba'a: —Pabo Eyacuiñajjiya huoojea'yo jayojja jama po ajja. Ohuaya ojaya ejjashahuabaquijji jayojja jama poani, Jesusaja ejjashahuabaquijji jayojja jama pojjeama —ejo siajje poani beca cuana.

<sup>3</sup> Chojja de. Eseyaya Jesusaja epeeji cuana jiquio meshijo ba'yanijo ojjaña quea mimishi mimicuiajejanobiajea sa seya ña. Jamatii eshahuaja epeeji cuana jayojja jama jjashahuabaqui ajja eseya. <sup>4</sup> Eshahuaja epeeji cuana onajaya ejjashahuabaquijji quea tai jayojja jama acani. Eya, chojja. Ecuea ejjashahuabaquijji pojjeama eyaya eshahuaja epeeji cuana mimicuiajejanobiajeaña. Eyacuiñajjiya ca ca eya ojaya ejjashahuabaquijji ameesahua cani. Jamajjeya ohuaya eya ojjaña joya quea mimishi nee poani mimicuiajejanobiajea meesahua cani. <sup>5</sup> Ecuea eba Eyacuiñajjiya esohui quea ja'a nee. Jamajjeya beca cuana Eyacuiñajjiya esohui niñeba canijo, eyaya oya cuana mete mee majje mimicuiajejanobiajeaje; jjaniñebapajeaqui meeje'yo. Cuanaya beca cuana Eyacuiñajjiyo quea tai jjashahuabaquiani mimicuiajejanobiajeaje'yo pea'ai. E'e, Eyacuiñajjiya eya ameesahua canijo, beca cuana quea tai jjashahuabaquiani eyaya Jesosa Quitoja esohui jayojja jama ameeje'yo. <sup>6</sup> ¡Miquianaaya Jesusaja esohui jayojja jama acue! ¡Ojaya epeeji nei pocue! Majoya eyaya shajjama' cuana miquiana nijje nequi, ojjaña quea mimishi poani pea'ai tecueaje.

<sup>7</sup> Beca cuana miquiana nijje nequiya e cojja ba majje huohui cani jama ba'a: —Pabo ca'a'ama pojja'a. Sohui sajea'ama. Eyacuiñajjiya huoojea'yo pojjeama, sohuihuohui sahua jjima pojja'a —jamaya poani e ba pishana majje.

Jamatii ecuea ejjashahuabaquijji Jesusajo onajaya eba pojjeama. Oya nei Jesosa Quitoja epeeji poso jjabaquiani. Cajjashahuabaquiahua jama ba'a: —Pabo pea'ai Jesosa Quitoja epeeji poani e'e jojo nei. E'e, Pabo ecuana jayojjaya jama poani —cajjashahuabaquiahua.

<sup>8</sup> E'e, eya bicho'ama miquiana nijje emimijji. Jama mimi majamajame eya poani ba'a: —Eya iña iquio Eyacuiñajjiya esohui huohuijji. Ohuaya eya huoojea canaje miquiana huasijje oja sohui huohuiya, miquiana ojaya epeeji quea ja'a nee po meeya. Eya miquiana jjabahuejjaquianijo quea yeno po mee sa po'yo ajja. Cajaa sa po'yo ajja pea'ai —jamaya eya miquiana nijje mimiani.

<sup>9</sup> Eyaya miquianaya jjabahuejjaquianijo, quea ajjajja po mee sa po'yo ajja. <sup>10</sup> Beca siajjepojji cuana miquiana nijje nequi ejo siajje poani jama ba'a: —Paboya esohui etehue'yo quea sohui ja'a poani. Emeshi meseja esohui etehue'yo quea ja'a jayojja jama poani pea'ai. Jamatii oya ecuana nijje nequianijo ca'a'ama poani. Ojaya esohui quea ja'a pojjeama pea'ai —jamaya siajje poani beca cuana.

<sup>11</sup> Ma siajjepojji cuana cajjabahuejjaquiahua jiquio jama ba'a: Miquiana huasijje poqui majje jiquio ecuea esohui etehue'yo jayojja jama eyaya aje'yo miquiana huasijje, e'e jojo nei.

<sup>12</sup> E'e, beca siajjepojji, esohui huohuijji nisho cuana miquiana nijje nequi mimiani jama ba'a: —Ecuana ca ca quea pame nee nee poani. ¡Ecuana oe shajja'ajjacue! —jama siajje pomeya poani.

Eya ca ca jjashahuabaqui sa po ajja jama ba'a: —Pea cuana aje oe quea tai acani. E jayojja pojjeama onaya. Eyaya ca ca oe quea pame nee ña —chojja, jamaya eya, Pabo po sa po'yo ajja.

Ma siajjepojji, esohui huohuijji nisho cuana aje oe jama poani tii ba'a: —Ecuanaaja ejjashahuabaquijji quea ja'a nee nee, onajaya, chojja. Ecuana jayojjaya jama capo'yahua ojjaña —jamaya poani.

Chojja. Quea ja'a pojjeama jjashahuabaquiani, de. <sup>13</sup> Eyacuiñajjiya ca ca eya huoojea canaje miqiana huasijje ojaya esohui huohuiya. Jamajjeya ojaya esohui eyaya huohuiaña bicho'ama miqiana huasijje. Ojjaña huasijje ca ca huohui jjima. <sup>14</sup> E'e, miqiana huasijje esohui Jesosa Quitojo eyaya huohuinaje. ¡Bacue! Eyacuiñajjiya eya huoojea canaje miqiana huasijje esohui huohuiya. Ojaya esohui huohuijji e'e jojo nei eya. Eyaya quea ja'a nee huohuiaña. Jiquio ecue tehue'yojo eya bicho'ama. <sup>15</sup> Cuanaya miqianaya sohuihuohuiañajo eya siajje po ajja jama ba'a: —Eya ee nei ojjaña huasijje esohui huohuijji nei quea ja'a nee. Onaya miqiana nije chaco jjima; siajje poani —eya jama siajje pomeya po ajja.

Esohui huohuijji nisho ca ca oe jama siajje pomeya poani, oe nei esohui huohuijji poso jjabaquiani. Eya ca ca quea pame nee jjashahuabaquiani jama ba'a: —Miquianaaya Conitojo ba'eya Jesosa Quitoja esohui jayojjaya jama quea ja'a añajo eya pea cuiñajji cuana huasijje esohui huohui meesahuaje Jesusaja.

<sup>16</sup> Jamajjeya miqianaya jamaya poajo eya poqui meeje pea meshi cuana huasijje esohui quea pame nee huohuiya Jesusajo, onaja esohui huohui jjima huasijje. Esohui huohuijji pea meshi cuanajo enequijo eya ona nije enequi tiitiijji pojjeama. Iña ca jja ca poquije, de, pea cuana huasijje Jesusaja esohui huohuiya. <sup>17</sup> E'e, yahuajo nei esohui etehue'yo jama poa ba'a:

“¡A'a jama huohuijji ba'a: —Eyaya jamatii quea pame aña. Chojja, jamaya pojjeama.

Jamaya huohuicue ba'a: —Eyacuiñajjiya eya quea pame nee ameesahua cani.

Jamajjeya eyaya quea pame aña —jamaya acue!”

Yahuajo nei esohui etehue'yo jamaya poa. <sup>18</sup> Eyacuiñajji ojaya epeejji quea pame neejo mimiani jama ba'a: —Jiquio epeejjiya quea pame nee acani. Jamaya ecuea quea boti nee.

Beca cuaa ca ca huohui cani jama ba'a: —Eya quea pame nee poani jamatii. Jamajjeya ¡ecuea esohui shajja'ajjacue! —jamaya esohui huohuijji nisho poani onajaya quea jea e'ajji. Jamaya ca ca Eyacuiñajji boti'ama.

## 11

### *Esohui huohuijji nishojo Pabo quea yeno mimiani*

<sup>1</sup> Dejjá ma ohua acanajejo jjashahuaba tiitiiquianijo esho'i jama mimijajiani, de. Jamatii ma eya anajejo mimianijo, ¡a'a jja oe enijje quea quene pojji! ¡Shajja'ajja socue mo! <sup>2</sup> E'e, miqianaya Eyacuiñajjiya quea jea nee nee poanijo, ecuea quea jea nee nee poani pea'ai. E'e, eyaya miqianaya Jesosa nije jjapee coo meesahuaquinaje. Jiquio ecua ejeajjiya ojaya ebacuase mimishi'ama nei huana mee sa acani jayojja jama eyaya miqianaya Jesosa nije jjapeequi mee sa aña quea boejea nee, eshahua nije pojjeama. <sup>3</sup> Ecuea eba miqianaya Jesusaja epeejji e'e jojo nei po sa neinei poani. Jjeya ca ca eya quea mete jjashahuabaquiani miqianajo, esohui huohuijji nishohua miqianaya quea tai jjashahuabaqui mee ca chana'. Jiquio ecua Edosiquiana neiya ma ecua peyo jayojjaa Ema dasia ca poa jayojja jama esohui huohuijji nishohua miqianaya dasia ca chana'; Jesosa nije jjapee pajea meequi ca chana'. <sup>4</sup> E'e de, miqianaaya aje oe ojjaña esohui huohuijji nisho shajja'ajjaña. Oya cuana Jesusajo siajje poani, Edojjoshahua Pamejo siajje poani pea'ai. Esohui quea pame Jesusajo ecuanaja esohui jayojja jama pojjeama huohui cani. ¿Apiojji acuaeya oya cuana shajja'ajjaña so'o? <sup>5</sup> Oya cuana ca jja ca oe Eyacuiñajjiya huoojea'yo esohui huohuijji e'e jojo nei poso nequiaa aña; eya ca jja nequiaa ca oe cajaa aña. Chojja, eya ca ca iña iquio e'e jojo nei Eyacuiñajjiya huoojea'yo. <sup>6</sup> E'e pojja'a oya cuana mimiani quea bishaa nee. Jamatii esohui quea pame Jesusaja ecuea eba nei nei. Jamaya miqianajaya eba. E'e, eyaya ma esohui huohui neineinaje ojjaña cuiñajji cuana huasijje.

<sup>7</sup> Eyaya Eyacuiñajjiya esohui quea pame Jesusaja huohuinaje miqiana huasijje sosema'. Eyaya ecuea eba'ejji jjeshenaje pea'ai ecue chaco sosejje. Miquea echacojji jayojja jama poanaje eya. Jamaya miqianaya Eyacuiñajjiya esohui ba meesahuanaje. ¿A'a



jamaya quea tai, quea pame pojjeama? Chojja. Jamatii beca cuana jama poani ba'a: —Pabo pojja'a Eyacuiñajjija huoojea'yo pojjeama. Jamajjeya mi sosequia mee cani esohui huohui cani sosejje —jama siajje pomeya beca cuana poani.

<sup>8</sup> ¡Bacue! Miquiana huasijje esohui huohuiañaajo, Jesusaja epeeji cuaa pea cuiñajjijo ba'eya eya sosequia canaje. Eya sohuihuohui meesahua canaje. Miquianaya ca ca oe Eyacuiñajjija esohui shajja'ajja majje jamatii sosequia jjima. <sup>9</sup> E'e, Jesusaja epeeji cuaa Masenoniajo ba'eya poe majje ecuea eba'ejji ye canaje. Yahuajo miquiana nijje ba'eya eyaya miquianajaya bobi ijja jjima: —¡Che mo oe esohui huohui sosejje! —ajjima ecuea miquianaya. Jamaya eyaya sosema' esohui huohui poquia tiitiije quijje pea'ai.

Jamajjeya miquianajaya jama yajji pojjeama ba'a: —Pabo ecuaaya bobianaje, quea huiso ba'e meesahuanaje —jamaya e'ajji pojjeama miquianajaya.

<sup>10</sup> Chojja. Jamajjeya ojjaña cuaa Acaya meshijo ba'eya ba caje eyaya esohui huohuinaje miquiana huasijje sosema'. Jesosa Quitohua ba cani eya e'e jojo nei mimiani. <sup>11</sup> Jamaya eyaya huohuiaña miquiana ecuea quea jea nee nee poanijo. Jamaya Eyacuiñajjija eba. <sup>12</sup> E'e, eyaya Jesusajo huohui tiitiije miquiana huasijje sosema'. Jamajjeya esohui huohuijji nishohua jama huohuime yajji pojjeama ba'a: —Ecuana Pabo jayojja chacochoani —jamaya e'ajji pojjeama onajaya.

Esohui huohuijji nisho nequiaa sosequianaje esohui huohui cani sosejje. <sup>13</sup> Oya cuana ca ca oma Eyacuiñajjija huoojea'yo nisho poani, Eyacuiñajjija huoojea'yo pojjeama. Miquianaya dasia cani; Jesusaja huoojea'yo esohui huohuijji poso nequiaa aña. <sup>14</sup> E'e de, Edosiquiana nei Satanasa jama oya cuana poani. Ohuaya, Satanasa ojaña dasia cani; Jesusaja esohuidojojji quea pame nee poso acani cuaa. <sup>15</sup> Jamajjeya ojaya echacojji cuaa miquianaya dasia cani pea'ai jama ba'a: Oya cuana Eyacuiñajjija echacojji quea pame nee poso nequiaa aña, de. ¡Poe o'oya majje Jesusaa oya cuana quea nee nee po mee caje'yo tii tii!

*Pabo Jesusaja huoojea'yo poanijo quea nee poa*

<sup>16</sup> Jamajjeya eyaya miquianaya huohui o'oyaje quea bicho pishana. ¡A'a eya esho'i jama mimiani poso ajji ma eya anajejo mimianijo! ¡Miquiaaya ejo jamaya poso aña, jamatii eya che shajja'ajja socue! Ma eya Jesusajo anajejo mimije so'o esho'i jama, onajaya quea jea e'ajji nisho. <sup>17</sup> Jiquio ca ca ecuea esohui; eya jjeya Jesosa jayojja jama pojjeama mimiani. Eya esho'i jama ma eya anajejo mimiani quea huiso. <sup>18</sup> Jamatii quea huiso esohui huohuijji nisho esho'i jama ojaya huapa pojjeamajo, ma ohua acanajejo pea'ai mimimimiani. Jamajjeya ona jayojja jama eya pea'ai mimije. Eya ca ca iña quea bicho mimije. <sup>19</sup> Miquianaya aje oe jjashahuabaquiani jama ba'a: —Ojaña ecuea eba. Eya ca ca iña jjadasia meequi ajja esohui huohuijji nisho cuana —jjashahuabaquiani.

Jamajjeya shajja'ajjaña joya esho'i jama joya ohua acanajejo mimiani pea'ai. <sup>20</sup> E'e, ma esohui huohuijji nishohua miya chaco mee cani sosema', minijje ba'yani sosema', miquea aquiana mesena'yo sa acani, miya tanacua cani, cojja cuiapojjea cani pea'ai quea bicho epo meeji. Jamatii miquianaaya aje oe oya cuana shajja'ajjaña, de. <sup>21</sup> ¿Apiojji acuae jja oe shajja'ajjaña? Ecuea ca ca jamaya ajjima. Jamajjojya ¿a'a eya ca'a'ama poso nequiaa aña, de? ¿A'a ma esohui huohuijji nisho cuana esho'i jayojja jama mimiani onaja quea jea e'ajji? E'e. Jamajjeya eya jamaya mimije pea'ai. <sup>22</sup> Esohui huohuijji nisho jama poani ba'a: —Ecuanaaya jja iquio Emeo dejja cuana, Emeo esohui mimiani.

¡Dee! Eya pea'ai Emeo dejja, Emeo esohui mimiani.

—Ecuana Isaeni dejja cuana —poani pea'ai ma esohui huohuijji nisho.

Eya pea'ai Isaeni dejja, onaya jayojjaya.

—Ecuanaaya etiiquiana Amajama bajjani —ma esohui huohuijji nisho poani.

Amajama ecuea etiiquiana pea'ai, de.

<sup>23</sup> —Ecuana jja oe Jesosa Quitohua huoojea canaje esohui huohuijji —oya cuana siajje poani.

Eya ca ca e'e jojo nei Jesosa Quitoja huoojea'yo, de. Jjeya eya esho'i jama mimiani. Jamatii eyaya janobajjima nei chaconaje Jesosa nijje. Eshohui huohuijji nishohua aje oe oe pojji chaco cani. Dejja mimishi cuaa eya jeanobiajea huicha'a huicha'a canaje esohui eya ehuhui poaje jjejojo. Oya cuana, cho. Jodio etii cuaa eya cuia majamaja canaje Jesosaja esohui eya ehuhui poaje jjejojo. Ma esohui huohuijji nisho pea cuanaja cuia neinei jjima. Eya beshahua nei mano'yonaje; quea huiso mano huicha'a huicha'a'ajja'yonaje. <sup>24</sup> E'e, ojjaña ba canijo, Jodio etii cuaa eya quea huiso cuiasejja neinei'ajja canaje, 39 cuiasejjame acanaje, de, huaca jee ejeapashajjajjaa. Cuiasejja majamaja canaje, me oeije huisome cuiasejjame acanaje; pea meshijo cuia, pea meshi cuanajo cuia ca iña acanaje cuaa, de. Beshahua nei ca iña mano'yonaje mo, de. <sup>25</sup> Jodio cuaa eya cuiasejja canaje acui sisiya, pea beca peejjima cuiasejjame acanaje pea'ai. Jaja canaje pea'ai meiya eya esohui ehuhui poaje jjejojo. Beshahua nei eya hui'l'yonaje, pea beca peejjima hui'ime poanaje. E'e de, bishe ai cuana jaanobiquinaje bae ai yasijje. Jamajjeya oe mecajje, oe pojajjo pea'ai eya bae aijo huepee biajje jjeejje ba'e'yonaje. <sup>26</sup> Cuanaya eya poqui huicha'a huicha'anaje pea cuiñajji cuana huasijje esohui huohuiya. Poquije beshahua nei eya mano'yonaje yohuajo ba'a: cuei quea cuejipashi neijo, siipojji cuanajo, Jodio cuanajo, Jodio pojjeama cuanajo pea'ai. Cuiñajji quea quemojo, ebiojo pea'ai dejja mimishi cuaa napa cajje eya beshahua nei mano'yonaje. Bae aijo beshahua nei hui'l'yonaje pea'ai. Jesosaja epeeji nishohua cuia cajje beshahua nei eya poquijeyo'yonaje pea'ai. <sup>27</sup> Eyaya chaco neineinaje; cahui jjima poanaje pea'ai. Quea camajajo hueahuea'yonaje. Quea mano poanaje. Quea shoe poanaje. Quea naba taja nee nee poanaje. Bobimajo mano'ajja'yonaje. Eya quea huoe nei nei poanaje, daqui mooma' poanaje pea'ai. <sup>28</sup> E'e, quea camaja ecuea eba'ejji. Cuanaya ojjaña pojajjo eya jjashahuaba majamajaquiani ojjaña Jesosaja epeeji cuana jaahuanajji. <sup>29</sup> Jamajjeya Jesosaja epeeji nei cuana quea mete, ca'a'ama poanajo, eya quea yeno nee nee jjashahuabaquiani. Oya cuana quea mimishi poajo, mimishi pajea mee sa neineiaña eyaya. Jamaya eya poanaje.

<sup>30</sup> Eshohui huohuijji nishohua miquianaya dasia canijo, eya camimi majamajaquiahua ecuea eba'ejji. Jjeya ca ca eyaya miquianaya huohuije pea esohui. Ma ba majje miquianaaya baje eya quea mete, dejja ca'a'ama jayojja jama poani. <sup>31</sup> Eyacuiñajji esejaya Emeshi Mese nei Jesosaja Chii. ¡Oya cabihuia tiitii cahua! Ojaya eba eya e'e jojo nei mimiani jama ba'a: Yahuajo Aneta emeshi mese poa Damasico cuiñajji. Ohuaya ojaya echacosahuajji cuana huoojea canaje e sa'ajja'yohua ojjaña ejiojjijje, ba'yo majje e jeanobiajeajji. <sup>32</sup> Jamatii eya ojaya iña jjima, de. Eya Damasicojo nequi quehua poquinaje mecajje. <sup>33</sup> E'e, Jesosaja epeeji cuaa mei jiyajo nequiya equi huejjajje eya jjepai aijo jjabioquajo, jaoquea ca'yonaje cuaa jjonajo.

## 12

### *Jesosaa Pabo jjacahuibaqui mee canaje ojaya eba'ejji eyajo*

<sup>1</sup> Eya esho'i jama ma eya añajo mimi majamajani miquiana sohui huohuijji nisho eshajja'ajja poaje jjejojo. Jjeya ca ca eyaya miquianaya huohuije pea esohui, ma Jesosaa eya jjacahuibaqui mee canaje huohuije. <sup>2</sup> Yahuajo nei quea shequiaja huiso, 14 shequiajame yahuajo Jesosaa eya ojaya e'anijji eyajo jjacahuibaqui mee ca poa. Eya jjacahuibaquinaje pojja'a. E'e pojja'a eya eshe dojosohuaqui ca poa pojja'a. Ecuea ba jjima. Eyacuiñajji ca ca oe eba. <sup>3</sup> E'e, eya pojja'a eshe ba mee ca poa. Jjacahuibaqui mee ca pojja'a mo poa. Eyacuiñajji ca ca oe eba. Ecuea ca ca ba jjima. <sup>4</sup> Jamatii ecuea eba maya: Jesosaa eya ba mee ca poa; ohuaya eya dojosohuaqui ca poa ojaya eba'ejji Quea Pame Nee bajjani yasijje, Panaiso bajjani yasijje. Jomajo eyaya shajja'ajjanaje esohui quea bame nee nee. Maya eyaya miquianaya huohui meemee ajja, yajja huohuime yajji jojaya. E'e, Jesosa eyajo ba'e enijje miminaje. <sup>5</sup> Jamatii eya ma esohuijo mimi huicha'a huicha'a ajja esho'i jama. Chojja. Eyaya miya ba meeje eya quea ca'a nee nee pojjeama. E'e jojo nei Jesosa enijje miminaje eyajo. <sup>6</sup> Jamajjeya ma eya anajejo mimi huicha'a huicha'ajo jamatii eya esohui huohuijji nisho jama pojjeama mimiani. Ecuea esohui ca ca e'e jojo

nei. Miquiana nijje ba'eya eyaya chaco neineinaje miquianaaya banaje. Shajja'ajjanaje ecuea esohui Jesusaja esohui huohuiañajo. Jamajjeya ejo jjashahuabaquiani e'e jojo nei miquianaya. Jamajjeya ma eya anajejo ehuohui majajji pojjeama esho'i jama, de, miquiana ejo jama ehuohui poaje jjejojo ba'a: —Pabo ca ca quea pame nee nee Jesusaja epeeji quea ca'a tii tii —miquianaaya ehuohui poaje jjejojo.

Chojja, eya jamaya pojjeama.

<sup>7</sup> Jamajjeya Jesusaa eya ojaya eba'eji quea pame nee nee eyajo ba mee majje Eyacuiñajjiya eya quea nee po mee canaje emanomeejji pojj'a. Jamajjeya eya quea ca'a tii tii ejjashahuabaquiji pojjeama. Jiquio ecua Edosiquiana neija Satanasaja huoojea e cuiaji jayojja jama jiquio emanomeejji pojj'aa eya quea nee nee po tiitii mee cani. <sup>8</sup> Eya Jesusa nijje miminaje pea beca peejjima mimime. Jama poanaje ba'a: —Jesusa Quito, eya quea nee nee nequi. ¡Che mo oe nee'ama po meecue! —eya mimime poanaje.

<sup>9</sup> Jamatii Jesusaa eya saja'a canaje jama ba'a: —Pabo, e'e jojo nei eyaya miya jaahuanaje. Eyaya miya chaco meesahuaje. Miya ca'a'ama poanijo, chaco neinei meesahuaje, jamatii quea nee —acanaje.

Jamajjeya eya ca'a'ama poanijo quea bihui nee poani. E'e, ecuea eba Jesusaa quea ca'a nee nee poaniya eya quea ja'a nee ojo chaco meesahua cani. <sup>10</sup> Jamajjeya eya quea nee nee poanijo, ecuea eba'eji quea camaja poanijo pea'ai jamatii eya quea bihui nee poani. Pea cuaa eya napa canijo, mimijajianijo pea'ai, jamatii quea bihui poani. Jesusaja esohui huohuijijjojo, jamaya dejja mimishiya eya acani. Jamatii eya quea bihui nee poani tii. E'e, eya ca'a'ama poanijo, Jesusaa eya quea ca'a nee po mee cani.

*Pabo Jesusaja epeeji cuana Conitojo ba'ejo quea yeno poanaje*

<sup>11</sup> Eya esho'i jama ma eya anajejo mimi majamajaje miquiana esohui huohuijji nisho eshajja'ajja poaje jjejojo. Oya cuana aje oe Eyacuiñajjiya huoojea'yo esohui huohuijji poso jjabaquiani. Eya ca ca iña e'e jojo nei Eyacuiñajjiya huoojea'yo. Miquianaaya ca jja ca oe eya banaje Jesusajo chaco chaco aninaje. Jamatii ejo huohui jjima jama ba'a: —Pabo e'e jojo nei Jesusaja huoojea'yo esohui huohuijji —miquiaa mo che ehuohuinaje ese.

Miquianaaya mo oe che quea pame nee mi huohuinaje, jamajjeya eya ecuea eba'eji camimiquiahua esho'i jama, de. <sup>12</sup> E'e, eya miquiana nijje nequi Jesusaa eya atitii mee canaje quea huiso ma dejja ajjima acani amee canaje miquianajaya ebajji. Jamajjeya miquea eba eya Jesusaja huoojea'yo esohui huohuijji. <sup>13</sup> ¿A'a eyaya miquianaya quea pame pishana anaje, Jesusaja epeeji cuana pea cuiñajji ba'e quea pame anaje pojj'a? Chojja. Ohuaya e ba'e meejji quia canaje. Maya eyaya jjeshenaje. Miquianajaya quia jjima. Jamatii ecuea bobijo huohui'ajja jjima. E'e pojj'a eyaya miquianaya ehuohui'ajjanaje ese jama ba'a: —Jesusaja pea epeeji jama sosequiameya mo che acue esohui huohuiaña soseje! —e'anaje ese. Jamatii jamaya mimi jjima eya.

<sup>14</sup> Yahuajo eya miquiana baa poquinaje beca poquime. Jjeya eya apoa. Poquije o'oya miquiana baa. Poqui majje eyaya eba'e meejji mimimimi ajja poaje. Chojja. Eya miquianajaya ejjesheji sa po ajja. Miquianaya ca ca eya sa poani ecuea epeeji pojji. Jiquio ecua esho'i cuaa oja chii, ojaya enaese pea'ai bobia ajja jayojja jama eyaya miquea bobi sa ajja. Jamajjeya eya mique chii jayojja jama poanijo eya mi jaahuanajji poani. Miquianaya ca ca e jaahuanajji pojjeama. <sup>15</sup> Jamajjeya eyaya miquianaya Jesusajo ba meesahuaje sosema'. Jamajjeya e'e pojj'a eya aema' poaje. Cuanaya eyaya quea huiso chacoje miquiana esohui ba meesahuajji. Eya pojj'a hueahueaje miquianaya jaahuanajo. Jamatii. Ecuea miquianaya quea jea nee nee. ¿Apiojji acuae eya miquianajaya quea jea pishana, miquianaya ecuea quea jea nee nee poanijo?

<sup>16</sup> Miquianajaya eba eya miquiana nijje nequi camaja'ama miquianajo poa. Chojja. Miquianajaya bobi ijja jjima ecuea. Jamatii beca cuana aje ejo sijje poani jama ba'a: —Pabo sijjepojji. Ecuana dasia ca'yonaje —sijje oya cuana poani.

<sup>17</sup> Chojja de, ecuea miquianaya dasia jjima. Esohui huohuijjiya ma eya huoojeanajeja miquianaya dasia jjima pea'ai. <sup>18</sup> Eyaya Tito huoojeanaje jama ba'a: —¡Poquicue miya

Conito huasijje esohui huohuiya Jesusajo! ¡Jesusaja epeeji oe dojocue minijje! —poanaje eya.

¿A'a Titohua miqianaya dasia canaje? Chojja. Ohuaya eyaya jayojjaya acanaje. Miqianaya ojaya quea jea nee pea'ai ecuea jayojjaya.

<sup>19</sup> ¿A'a cuae miqianaya ecuea etehuejo jama jjashahuabaquiiani pojja'a ba'a: — Pabohua aje pojja'a jja oe huohui cani oya e'e jojo nei Jesusaja huoojea'yo esohui huohuijji. Ecuana Jesusaja huoojea'yo nisho poani —a'a jamaya miqianaya jjashahuaba taiquiiani?

¡Bacue oe! Eyacuiñajjija eba eya Jesusaja esohui jayojja jama e'e jojo nei huohuiaña. Epeeji cuana, miqianaya ecuea quea jea nee. Jamajjeya eyaya ojjaña ña miqiana Jesosa nijje quea ja'a nee ejjapeequi meesahuajji. <sup>20</sup> Jjeya eya poquije miqiana baa. Miqianajo quea yeno jjashahuabaquiiani jama ba'a: —¡Dee! E'e pojja'a quea mimishi poani o'oya: Jjamimicuiajea nobiajeaquiiani, onaja aquiiana jea ba cani, quea quene nee nee poani, quea aquiiana nahue poani, quea nishehui poani, mimijajiani, pea cuanajo maimaiani, oya jjeshe sa pojji pea'ai jjejojo mimiani, quea shajjaquijjo, shajjama' poani pea'ai pojja'a —jamaya eya jjashahuabaquiiani miqianajo, Conitojo ba'e cuanajo.

Miqianaya jamaya poajo eya quea yeno nee nee poaje. ¿A'a miqianaya quea yeno poaje miqianajaya mimishijo eya tecueajje? <sup>21</sup> E'e, miqiana quea mimishi poani ba majje eya quea tecue nee nee po chana'. Eya quea yeno nee, quea bicho poaje miqianajo. E'e pojja'a eya paje miqiana ba majje, ca beca cuanaja mimishi pajea'yo jjimajo, de, quea mimishi ba'yanijo, quea apo, quea tai, de. Jamaya miqianaya poanijo, eya quea yeno nee nee poaje ba majje.

## 13

<sup>1</sup> Yahuajo eya miqiana huasijje poquinaje becanejjijji pea'ai poquime poanaje. Jjeya eya poquije o'oya miqiana baa. Jamajjeya ¡bacue! Eyacuiñajjija esohui yahuajo etehue'yo jama poa ba'a:

“Oe dejja peajo maimaiani ¡a'a shajja'ajjajji! ¡Becaa, pea beca peejjimaa oya jayojja huohui cajo, shajja'ajjacue!”

Jamaya tehue ca poa yahuajo nei.

<sup>2</sup> Jamajjeya jjeya eya miqiana huasijje poquije o'oya pea beca peejjima poquime epojji. Yahuajo miqiana nijje nequiya eyaya huohuinaje jama ba'a: —Ojjaña joya quea mimishi po tiitiiani, joya jjeya nei quea mimishi poani pea'ai eyaya tecueajea neineije poe o'oya majje —jamaya eyaya jjeya miqianaya huohui o'oyaña.

<sup>3</sup> E'e, Jesosa Quitohua eya huoojea canaje miqiana huasijje ojaya esohui huohuiya. Ohuaya eya huoojea cani miqiana jjabahuejjaqui meeji pea'ai. Joya miqiana nijje ba'e quea mimishi poani tii tii quea nee nee po mee caje'yo, ohuaya. <sup>4</sup> ¡Bacue! Dejja maseya Jesosa yahuajo nei acui ecueata'apeejo me cacajea cajje oya mano'yonaje. Jesusaja ca ca oya cuana jeabichajea jjima. Jamatii Eyacuiñajjiya quea ca'a nee nee poaniya Jesosa shequi mee ca o'oyanaje; quea ca'a nee nee ba'e tiitii mee cani. Yahuajo Jesosa ca'a'ama jayojja poa. Jamaya pea'ai eya ca'a'ama. Jamatii Jesusaa eya quea ja'a nee ojaya esohui huohui meesahua cani miqiana jjabahuejjaqui meeji.

<sup>5</sup> ¡Jjashahuabaquicue! ¿A'a Jesusaja esohui jayojja jama ña miqianaaya? Jesosa Quito miqiana nijje yani. ¿A'a miqianajaya ba jjima? Jesosa miqiana nijje pojjeama ca miqianaya ojaya epeeji nishojo, de. <sup>6</sup> Eya ca ca ña Jesusaja esohui huohuijji e'e jojo nei. <sup>7</sup> Jamajjeya eya Eyacuiñajji nijje mimiani miqiana mimishi pajea meesahuajji jama ba'a: —Eyacuiñajji, ¡miquea epeeji cuana Conitojo ba'e mimishi'ama nei ba'e meesahuacue! —eya poani.

Eya jama jjashahuabaqui ajja ba'a: —Jesusaja epeeji Conitojo ba'eca mimishi'ama ba'e ba majje pea cuaa eya bihuia caje, esohui huohuijji nei —jamaya eya po ajja.

Chojja, miqianaaya eya Eyacuiñajjija huoojea pojjeama poso ña; esohui huohuijji nisho poso ña; jamatii eya Eyacuiñajji nijje mimiani miqianaya ojaya epeeji quea ja'a

nee eba'e meesahuajji. <sup>8</sup> E'e, dejjaja Eyacuiñajjija esohui e'e nei ehoojea pajea mee'yojji pojjeama ojjaña huasijje. Jamajjeya ecuea esohui e'e jojo nei, sijje pojjeama. <sup>9</sup> Jamajjeya miqianaya quea pame, mimishi'ama ba'e ba majje eya quea bihui nee poaje. Jamajjeya miqianaya etecueajji pojjeama, jamatii tecuea jjimajo eya Eyacuiñajjija hoojea'yo quea ja'a nee pojjeama poso aña. Jamajjeya eya Eyacuiñajji nijje mimiani miqianajo jama ba'a: —Eyacuiñajji, ¡miquea epeeji cuana quea ja'a nee nee ba'e meesahuacue oe! —eya poani.

<sup>10</sup> Jamajjeya miqianaya huasijje poqui jjimahuaa eyaya esohui tehueaña miqianajaya mimishi epajea'yojji. E'e, eya Eyacuiñajjija hoojea'yo esohui huohuijji, miqianaya jjabahuejjaqui meeji. Eyacuiñajjija eya hoojea jjima miqianaya janobajjima nei tecueajea quea yeno nee nee epo meeji. Chojja, ohuaya eya hoojea canaje miqianaya quea ja'a nee ba'e meesahuua. Jamajjeya mi ba majje eyaya miqianaya etecueajjiji pojjeama mimishi'ama ba majje.

<sup>11</sup> Mahuiso ecuea esohui.

*Esohui oe yejje nei etehue'yo*

Ecuea epeeji cuana, ¡quea bihui nee pocue! ¡Shajja'ajjacue ecuea esohui! ¡Jama acue! ¡Jashahuaba neineiquicue quea ja'a nee nee eba'ejji! ¡Ojee Jesosa nijje jjapeequicue! ¡Quea bei nee pocue! Jamaya poajo, Eyacuiñajjiya minijje ani tiitije'yo. Miqianaya ojaya quea jea nee nee. Oya ca ca oe quea bei nee nee.

<sup>12</sup> ¡Ojjaña Jesosaja epeeji nijje mimicue quea bei!

<sup>13</sup> Ojjaña enijje nequiya miqianaya huohui'ajja cani jama ba'a: —¿Achajja acuae nequiana so'o? —onajaya ebajji.

<sup>14</sup> ¡Esejaya Emeshi Mese nei Jesosa Quitohua miqianaya cahaahuana cahua! Eyacuiñajjija miqianaya quea jea nee. ¡Onijje caba'e tiitii mee cahua! ¡Edojjoshahua Pame miqianaya nijje cajjapeequiahua tii tii!

Mahuiso. Eyaya, Pabohua jiquio esohui tehue'yonaje. Apoa.

## PABOJA ETEHUE'YO JANATA MESHIGO BA'E YASIJJE GÁLATAS

*Pabohua tehue canaje Jesusaja epeeji cuana Janata meshigo ba'e yasijje*

<sup>1-2</sup> Eya Pabo bajjani. Ecuea epeeji cuana Janata meshigo ba'e, eyaya miquiana que jiquio esohui tehuenaje, Jesusaja epeeji cuana huasijje. Ojjaña Jesusaja epeeji cuana enijje nequiya pea'ai miquianajo jjashahuabaquiani. Eya huohui'ajja mee cani jama ba'a: —¿Achajja a nequiana ani so'o? ¿A'a quea pame? —poani ecuanaja ebajji.

Eyacuiñajjiya, esejaya Chii aiya Jesosa Quito emano'yojaa shequi mee ca o'oya poa. Ohuaya Jesosa Quito nijjeya eya huoojea canaje esohui huohuiya. Dejja cuana ca ca e huoojea'yojji pojjeama.

<sup>3</sup> Ecuea epeeji cuana, eya Eyacuiñajji nijje mimiani miquianajo jama ba'a: —Ecue Chii, ¡miqua epeeji cuana Janata meshigo ba'e quea pame nee jaahuanacue! ¡Quea bei po meecue pea'ai! —jamaya eya mimiani esejaya Chii ai nijje, Jesosa esejaya Emeshi Mese nei nijje pea'ai.

<sup>4</sup> Eyacuiñajjiya Jesosa Quito huoojea ca poa mano'yohua, esejaya mimishi cuijea'yojji epojji. Jamajjeya Eyacuiñajjiya ejjashahuabaquijji jayojja jama Jesosa mano'yonaje esejo, shajjama' cuana jayojja jama pojjeama eba'e mee'yojji. <sup>5</sup> Jamajjeya Eyacuiñajji ejjabihuaqui jama ba'a: —Eyacuiñajji, ecuanaja Chii, miya quea ca'a nee nee, quea pame nee nee yani tii tii. Pea chama' mi jayojja —oya ejjabihua tiitiqui. Jamaya capoahua.

*Jesosa Quito oe nei ese mimishi cuijea'yojji poani*

<sup>6</sup> Ecuea epeeji cuana Janata meshigo ba'e, eya quea mete miquianajo. Yahuajo miquiana nijje nequiya eyaya miquianaya huohuia poa. Jesosa Quito miquianaja mimishigo mano'yonajejo, Eyacuiñajjiya miquianaya iyaa canaje onijje ejjapeequijji. Shajja'ajja majje Jesosa nijje jjapeequi'yonaje. Jamatii onijje jjapeequi pajea'yani. ¿Apiojji acuae oe onijje jjapeequi pajea'yani so'o? Jjeya aje oe miquianaaya onajaya esohui e'e nei pojjeama shajja'ajjaña, esohui quea pame poso aña. <sup>7</sup> Pea chama' esohui quea pame nee ese ba'e tiitii mee'yojji. Esohui Jesosa Quitoja ecuanajaya yani oe nei e'e jojo nei. Esohui huohuijji nisho cuaa ca ca miquianaya quea quehua jjashahuabaqui mee sa acani Jesosa Quitojo. Jama siajje poani ba'a: —Ecuana etiiquiana Moisesija esohui jayojja jama ba'ejo ca ca oe Eyacuiñajjiya miquianaya emimishi cuijea'yo ba caje'yo, Jesosa Quito nijje jjapeequiajo pojjeama —siajje poani esohui huohuijji nisho cuana.

<sup>8</sup> Yahuajo ecuaaya miquianaya esohui huohuia poa esohui quea pame nee Jesusaja jama ba'a: —Jesosa nijje jjapeequianajo, Eyacuiñajjiya miquianaya ba cani emimishi cuijea'yo —ecuaaya huohuinaje.

Onaaya miquianaya pea esohui ma ecuanaja esohui jayojja jama pojjeama huohui cajo, Eyacuiñajjiya oya cahuoojea cahua cuaqui yasijje quea nee nee epo'yojji tii tii. E'e, ecuanaya pojja'a, esohuidojojji pojja'a Jesusajo siajje pojji jjemo Eyacuiñajjiya huoojea came cuaqui yasijje. <sup>9</sup> E'e, yahuajo ecuaaya miquianaya huohuinaje. Jjeya eyaya huohui o'oyaña jama ba'a: —Yahuajo ecuea esohui shajja'ajja majje miquianaya jjapeequi'yonaje Jesosa nijje. Oya oe nei miqua mimishi cuijea'yojji. Jamajjeya ojjaña esohui huohuijji nishohua pea esohui, ma ecuea esohui jayojja jama pojjeama Jesusajo huohui cajo, Eyacuiñajjiya cahuoojea cahua cuaqui yasijje quea nee nee epo'yojji tii tii.

<sup>10</sup> Eyaya Eyacuiñajjiya esohui jayojja jama huohuiaña. Eyacuiñajji ca ca oe eyaya quea bihui po mee sa aña. Eyaya esohui huohuiaña dejja cuana quea bihui epojji pojjeama ejo. Jama epo meeji pojjeama ba'a: —Pabo ca ca oe quea pame nee —e'ameeji pojjeama. Chojja, eya onaaya bihuia cani jojjemo Jesosa Quitoja esohui huohuijji pojjeama pome.

*Jamaya Pabo Jesosa Quitoja esohui huohuijji poa*

<sup>11</sup> Epeeji cuana, ¡bacue! Eyaya esohui quea pame nee Jesosa Quitoja huohuinaje, dejaja ejjashahuabaqui'yojji pojjeama. <sup>12</sup> Jiquio esohui quea pame nee onajaya eya huohui jjima, ba meesahua jjima pea'ai. Jesosa Quitohua ca ca oeyaya eya ba meesahua canaje.

<sup>13</sup> Yahuajo nei Jodio etiiquianaja esohui jayojja jama ba'yaniya eyaya Jesusaja epeeji cuana napanaje quea huiso onijje ejjapeequi poani jjejojo. Jamaya miqianajaya eba. E'e, eyaya aje oe ojjaña Jesusaja epeeji cuana quecua'yo sa anaje. <sup>14</sup> E'e, yahuajo eyaya Jodio etiiquianaja esohui jayojjaya ba'e sa neinei poa. Ba neineinaje. Pea Jodiohua e tii nei'ajjaa esohui ba pishana canaje. Jamajjeya: —¡Etiiquianaja esohui jayojja jama caba'yahua ojjaña Jodio cuana! ¡A'a pajea'yojji! —eya jamaya po huicha'a huicha'anaje yahuajo.

<sup>15</sup> Jamatii Eyacuiñajjiya eya quea jea nee poa. E'e, ohuaya eya babaca ca poa eteejo ba'yahua ojaya esohui huohuijji epojji: <sup>16</sup>—Pabo ecuea poaje. Eyaya oya babacanaje ecue Bacua Eija Jesosa peeji epojji —poanaje Eyacuiñajji.

Majoya eya babaca majje Eyacuiñajjiya eya huoojea canaje ojaya esohui huohuiya Jodio pojjeama cuana huasijje. Jamajjeya ohua huoojea cajje eya pea cuana nijje mimi jjima jama ba'a: —¡Che mo eya huohucue esohui quea pame Jesusaja! ¿Achajja acuae Jesusajo ehuhuijji? —ecuea ajjima cuana.

<sup>17</sup> Jesusaja huoojea'yo ojaya esohui huohuijji Jenosanenajo ba'e yasijje eya poqui jjima pea'ai onijje mimiya. Yahuajo Jesusaa oya huoojea ca poa ojaya esohui huohuiya e huoojea jjimahuajo. Jamatii eya ona nijje mimi jjima esohui huohui sahuajji. Chojja. Eyacuiñajjiya iyaa cajje jjeya nei Anamia meshi yasijje ca ca eya poquicuajinaje meshi jabo huasijje, quima huasijje. Jomajo ani quijje nei eya poe o'oyanaje Damasico cuiñajji yasijje. <sup>18</sup> E'e, pea beca peejjima shequiajame po majje eya poquinaje Jenosanena huasijje Peno baa. Onijje aninaje oe pojji cahuime, ejjojji oeje cahuime, 15 cahuime. <sup>19</sup> Jomajo nequi eyaya Satiaco banaje pea'ai, esejaya Emeshi Mese neija echahua mese. Mahuiso banaje Jesusaja huoojea'yo esohui huohuijji. Pea cuana nijje ca ca iña mimi jjima. <sup>20</sup> Jamaya eyaya e'e jojo nei huohuiaña; Eyacuiñajjiya eba eya siajje poani pojjeama.

<sup>21</sup> Majoya Peno nijje mimi majje eya poquinaje Sinia meshi yasijje, Sinisia meshi yasijje pea'ai. <sup>22</sup> Jamajjeya Jesusaja epeeji cuana Jodea meshijo ba'eja eya ba jjima ecojjaja. Cho, eya pea meshi yasijje poquia poa. <sup>23</sup> Jamatii onaaya ejo huohui canaje jama ba'a: —Pabohua ca pa jjaja ca oe jjeya Eyacuiñajjiya esohui huohui cani, Jesusaja. Yahuajo aje ohuaya ecua quea huiso napa canaje, Jesusaja epeeji cuana. Ecua quecua jeyojeyo sa acanaje. Jesosa nijje jjapeequi pajea mee sa acanaje. Jjeya ca ca ohuaya esohui e'e nei huohui cani. E'e de, ohuaya esohui jama huohui cani pea'ai ba'a: “¡Jesusa nijje jjapeequicue eba'e tiitii'yojji!” poani oya Pabo, de —jamaya onaya poani.

<sup>24</sup> Jamajjeya ma esohui ejo shajja'ajja majje Jesusaja epeeji Jodea meshijo ba'e cuana quea bhui nee poanaje. Eyacuiñajji bihuia canaje jama ba'a: —Ecue Chii, miya quea pame nee nee, quea ca'a nee nee. Miyaya miyaye nei Pabo miquea epeeji po meenaje, ecua napa pajea meenaje —acanaje cuaa.

## 2

### *Jesosaja huoojea'yo esohui huohuijji Jenosanenajo ba'e cuana Pabo nijje jjapeequinaje*

<sup>1</sup> Majoya quijje nei nei, 14 shequiajame po majje eya Benabe nijje poe o'oyanaje Jenasanena huasijje. Tito yenaje pea'ai enijje. <sup>2</sup> Eyacuiñajjiya huoojea cajje eya Jenosanena huasijje poe o'oyanaje. E'e, eya jjacahuiba meequi canaje jama ba'a: —Pabo, ¡Jenosanena huasijje poqui'yocue! —acanaje Eyacuiñajjiya eya cahuijo.

Jamajjeya Jenosanena huasijje poe'yo majje eya Jesusaja huoojea'yo ojaya epeeji jaahuanajji cuana nijje miminaje, pea cuana nijje pojjeama. Jjachichaquiajo, eyaya huohuinaje jama ba'a: —Esohui quea pame nee Jesusaja eyaya huohuinaje Jodio pojjeama cuana huasijje —eyaya anaje.

Jamaya ecuea huohui jjima ona que. Jodio pojjeama cuana huasijje esohui huohui pajea mee ca chana', jama huoojeame eya aca chana' cuaa ba'a: —¡A'a jja oe Jodio pojjeama huasijje esohui huohui majajji Jesusaja esohui! —jamaya quea pame pojjeama poso aca chana' cuaa.

<sup>3</sup> Jamajjeya e shajja'ajja majje Jesusaja epeeji jaahuanajji cuana quea bihui nee poanaje: —E'e, ¡jamaya acue! —poanaje.

E'e, ohuaya Tito enijje poe' ba canaje Jodio pojjeama; Jieno dejja ca ca oya, Tito. Jamajjeya Jodio etiiquianaja esohui jayojja jama ajjima, cuiishasha jehuissejjajea jjima. Jamatii Tito ecuanaja etiiquianaja esohui jayojja jama amee jjima, cuiishasha jehuissejjajea mee jjima Jesusaja epeeji jaahuanajji cuanaja. Jamajjeya jjeja Jesusaja epeeji cuanaja cuiishasha jehuissejjajea jjima.

<sup>4</sup> Beca cuana ca ca jamatii iyaa jjima dobiquinaje ecuanaja esohui shajja'ajjaa, ecuana mimicuiajejanobiajeaa. Oya cuana aje oe sijje poanaje: —Ecuana pea'ai Jesosa Quitoja epeeji —oya poanaje. Sijje po majje ecuana tecueajea canaje jama ba'a: —Tito aje oe Jieno, esejaya etiiquianaja esohui jayojja jama ajjima; cuiishasha jehuissejjajea jjima. ¡Oya oe jamaya amee! ¿Apiojji acuae etiiquianaja esohui jama apajea meeaña? Jesosa nijje jjapeequi majje jamatii Moisesija esohui jayojja jama caba'yahua —jamaya oya cuana mimijajinaje ecuana nijje.

Chojja. Jesosa nijje jjapeequi majje eseya etiiquianaja esohui jayojja jama epo'yojji pojjeama. Jamatii ma dejja cuaa ecuanaya yahuajo jama ba'e mee sa acani.

<sup>5</sup> Chojja de, ma dejja cuanaja esohui shajja'ajja jjima ecuanajaya. Ojaya esohui jama huohui ajja nei nei. Jamaya huohuime ya jojjemo miquiana ma Jodio pojjeama cuana dasia'yome. Ecuaya ca ca yahuajo jama huohui tiitiaña esohui quea pame nee Jesusajo miquianaya onijje ejjapeequi meesahua'yojji tii tii.

<sup>6</sup> Jamajjeya Jesusaja huoojea'yo ojaya esohui huohuijji etii Jenosanenajo ba'e enijje jama mimime poanaje ba'a: —E'e, ¡yahuajo jama esohui quea pame nee Jesusajo huohuiquicue Jodio pojjeama cuana huasijje! ¡A'a huohui pajea'yojji! —poanaje.

E'e, pea esohui ecuea ba jjima onajaya huohui jjima. Ma esohui ecuea eba poanaje, ecuea eyacua pojjeama. Ojjaña Jesusaja epeeji cuaa shajja'ajja neinei cani. Jamatii eya Eyacuiñajjija huoojea'yo, onajaya pojjeama. Jamajjeya Eyacuiñajjija eba ecuea ejjashahuabaquijji. Eyaya quea ja'a nee nee esohui huohuiaña ojaya eba. O quea bihui po mee sa iña poani, dejja cuana pojjeama. <sup>7</sup> Jamajjeya ma dejja etii cuaa eya pea esohui huohui mee jjima. Chojja, huohui canaje jama ba'a: —E'e, jamajjeya Eyacuiñajjija Pabo huoojea canaje Jodio pojjeama huasijje esohui quea pame Jesusajo huohuiya. Peno ca ca ohuaya huoojea canaje Jodio cuana huasijje esohui huohuiya —acanaje Jesusaja epeeji etii cuaa.

<sup>8</sup> E'e, jamaya poanaje. Ma dejja etii cuaa ba canaje Eyacuiñajjija Peno sohuihuohui sahua canaje Jodio cuana huasijje. Oya jayojjaya ohuaya eya sohuihuohui sahua canaje Jodio pojjeama huasijje. E'e, Peno, eya pea'ai Jesusaja huoojea'yo esohui huohuijji.

<sup>9</sup> Jamajjeya ma dejja etii cuaa, Jesusaja epeeji jaahuanajjiya, Penohua, Satiacohua, Huaniya pea'ai eya jama acanaje ba'a: —Pabo, ecuanaja eba e'e jojo nei miya Eyacuiñajjija huoojea'yo Jodio pojjeama huasijje ojaya esohui huohuiya —acanaje.

Jamajjeya ojee quea bihui nee jama poanaje ba'a: —Pabo, ¡miyaya Benabe nijjeya esohui quea pame nee, Jesusaja esohui huohuiquicue Jodio pojjeama cuana huasijje! Ecuaya ca ca Jodio cuana huasijje esohui huohuije —poanaje.

<sup>10</sup> Ecuana huohui canaje jama pea'ai ba'a: —E'e, ¡jamajjeya Jesusaja epeeji aema' a'a pajea'yojji! ¡Bejjo oe pojji huoojeacue aema' nei neija o ba'e meesahuajji! —acanaje.

Ma esohui shajja'ajja majje eya quea bihui nee poanaje. Eya pea'ai aema huasijje bejjo huoojea sa poani nei nei.

*Peno Atioquia cuiñajji yasijje poquiyajo Pabohua oya tecuea canaje*

<sup>11</sup> Majoya Jesusaja epeeji jaahuanajji nijje mimi majje eya: —Poquia iña —poanaje. Majoya ecuana poqui'yonaje Atioquia cuiñajji quea quemo huasijje, quea huesha nee.



Jomajo quea huiso Jodio pojjeama cuana ba'yani. Quijje Peno ecuana que poeyanaje Atioquia huasijje. Jomajo ani pishana majje Peno quea ja'a pojjeama poanaje. Jamajjeya eyaya oya tecueanaje ojjaña ebañji. <sup>12</sup>Jama poanaje ba'a: Poe coo majje Peno quea pame nee ijia'ijianaje ojjaña Jesusaja epeeji cuana nijje, Jodio pojjeama cuana nijje, jamatii Jodio etiiquianaja esohui jama ajjima cuanaja; cuiishasha jehuissejjajea jjima. Majoya quijje pishana beca Jodio dejja cuana poeyanaje, Satiacoja huoojea'yo. Ma Jodio cuana poeyajo, Peno aje oe quea pame po'yo ajja. Ani sa po'yo ajja Jodio pojjeama cuana nijje. Jodio pojjeama cuana nijje ijia'ijia'yo ajja poanaje Jodio cuanajo quea mete jjejojo. Jodio cuana quea quene po mee sa po'yo ajja poa, ma jama poani ba'a: —Jodio pojjeama aje oe Jodio etiiquianaja esohui jayojja jama ca'a cahua, cuiishasha cajehuissejjajea cahua de, jamatii Jesusaja epeeji cuana pea'ai —beca Jodio cuaa acani.

<sup>13</sup>Jamajjeya Peno Jodio pojjeama cuana nijje ijia'ijia'yo ajja ba majje pea Jodio cuana pea'ai aje oe Jodio pojjeama cuana nijje ijia'ijia'yo ajja poanaje. E'e, yahuaajo oya cuana jama poanaje ba'a: —Eyacuiñajjiya ecuana ba'e tiitii mee caje'yo eyajo Jesosa nijje jjapeequianijo, etiiquianaja esohui jama añajo pojjeama —acanjaje cuaa yahuaajo.

Jamatii aje oe Jesusaja epeeji Jodio cuana Jesusaja epeeji Jodio pojjeama cuana nijje ijia'ijia'yo ajja poanaje. Ma ba majje Benabe pea'ai jamaya quea ja'a pojjeama poanaje, jamatii yahuaajo Eyacuiñajjiya oya huoojea canaje Jodio pojjeama cuana huasijje.

<sup>14</sup>Jamajjeya ma ba majje eya jjashahuabaquinaje jama ba'a: —Quea ja'a pojjeama ohuaya acani, esohui quea pame nee Jesusaja jayojja jama ajjima acani.

Jamajjeya eyaya Peno tecueanaje ojjaña eshajja'ajjajji. Jama anaje ba'a: —Peno, miya Jodio dejja. Mique chii, miquea enaese pea'ai Jodio. Jamatii Jodio cuana jama ba'e paje'yonaje. E'e, Jodio pojjeama cuana nijje aninaje, ona nijje ijia'ijia aninaje. Jamajjeya ¿apiojji acuae jjeya miyaya Jodio pojjeama ba'e mee sa añajo Jodio etiiquianaja esohui jama? Jamaya miyaya quea ja'a pojjeama añajo, Peno —eyaya Peno jamaya anaje.

Jesosa nijje jjapeequianijo, Eyacuiñajjiya Jodio cuana, Jodio pojjeama cuana pea'ai ba'e tiitii mee caje'yo.

<sup>15</sup>Majoya eya Peno nijje, pea Jodio cuana nijje pea'ai jama poanaje ba'a: —Ecue chii aje jja Jodio pea'ai, miquianajaya aje jja Jodio pea'aiya. Jamajjeya jama poani Jodio pojjeama cuanajo ba'a: “Ecuana Jodio dejja; joya ecua Jodio pojjeama cuana jama po ajja. Oya cuana aje oe quea mimishi nee nee poani tii, ecuanajaya etiiquianaja esohui jayojja jama ba'e ajja” jamaya poani Jodio cuana quea quehua jjashahuabaquianijo —eyaya anaje—. <sup>16</sup>Jjeya ecuanaya Jesosa nijje jjapeequiani. Jamajjeya ecuanaja eba e'e jojo nei Jesosa Quito nijje jjapeequianijo ca ca oe Eyacuiñajjiya eseya ba cani mimishi'ama'yo, etiiquiana Moisesija esohui jama ba'e nishoanijo pojjeama. Jamajjeya eseya Jesosa Quito nijje jjapeequiani mimishi ecuijea mee'yojji. Jamaya eseya jjashahuabaquiani ba'a: —E'e jojo nei Eyacuiñajjiya ecuana ba cani emimishi cuijea'yo Jesosa nijje jjapeequianijo, etiiquiana Moisesija esohui jama ba'yani pojjeama. Jamajjeya Moisesija esohui jama añajo pojjeama Eyacuiñajjiya eseya ba caje mimishi'ama'yo.

<sup>17</sup>Eya Peno nijje, pea Jodio cuana nijje jama poanaje pea'ai ba'a: —E'e, esejaya eba e'e jojo nei Jesosa nijje jjapeequianijo ca ca oe Eyacuiñajjiya eseya ba cani emimishi cuijea'yo, jamatii Moisesija esohui jayojja jama ba'e ajja. Jamajjeya eseya Jodio pojjeama jayojja poani. ¿A'a jamajjeya Jesosa Quitoja quea jea nee mimishi poanijo? Chojja, jamaya pojjeama. Mimishi Jesosa Quitoja boti'ama. Mimishi po mee'yo ajja nei nei oya.

<sup>18</sup>E'e, eyaya huohui huicha'a huicha'anaje Moisesija esohui jama caba'e paje'yahua. Ojaya esohui jama ba'e nishoanijo ca ca Eyacuiñajjiya eseya mimishi'ama'yo ebañji pojjeama. Jamajjeya eyaya jjeya jama ehuhui'yo jojjemo ba'a: —¡Moisesija esohui jayojja jama acue! Jamajjeya Eyacuiñajjiya miquianaya ba caje emimishi cuijea'yo —e'a jojjemo eyaya Eyacuiñajji quea quene po mee'yome, miquiana dasiajji po mee'yome pea'ai.

E'e, jiquio ecua equi catta'yo majje oya tii iya o'oyaña jayojja jama eyaya a'yome, ca Moisesija esohui ehuhui o'oya jojjemo. <sup>19</sup>Moisesija esohui ba neinei majje eya

jjabahuejjaquinaje ma esohui jayojja jama quea camaja nee nee eba'ejji. Ameemee ajja, de. Jamajjeya ecuea eba e'e jojo nei Jesosa nijje jjapeequianijo ca ca oe Eyacuiñajjiya eya ba caje emimishi cuijea'yo.

Jiquio ecua emano'yo cuana esohui jama eba'e majajji pojjeama jayojja eya Jesosa nijje jjapeequi majje Moisesija esohui jama eba'e majajji pojjeama. Eyacuiñajjiya ejjashahuabaquijji quea ja'a nee jayojja jama ca ca iña ba'eje. <sup>20</sup> E'e, eya Jesosa Quitoja quea jea nee neejo oya acui ecueata'apeejo mano'yonaje ejo, ecue mimishi cuijea'yojji, eya onijje eba'e tiitii mee'yojji. Jamajjeya onijje jjapeequi majje eya yahuajo jama quea mimishi eba'e majajji pojjeama. Pea jjashahuabaqui'yome ecuea poani. Jjeya ca ca Eyacuiñajjiya Bacua Ejja Jesosa Quitohua enijje nequiya eya ojaya ejjashahuabaquijji jayojja jama ba'e meesahua cani. E'e, eseya ojaya quea jea nee neejo Eyacuiñajjiya oja Bacua Ejja huoojea canaje eseya mimishi cuijea'yohua. <sup>21</sup> Jamajjeya eya onijje jjapee tiitiiquije'yo. ¿A'a Moisesija esohui jayojja jama poanijo, Eyacuiñajjiya eseya ba caje mimishi'ama'yo? Chojja. Ohuaya eseya ba caje'yo mimishi'ama'yo Moisesija esohui jayojja jama ba'yani jojjemo Jesosa Quito mano'yonaje emanojea'yojji, manojea'yo quiaye.

### 3

#### *¿Achajja acuae mi Eyacuiñajjiya emimishi cuijea'yo ba cani?*

<sup>1</sup> Ecuea epeeji Janata meshijo ba'e, ¿apiojji acuae miquianaya quea jjashahuabaqui quehua poani? ¿A'a cuae onaaya miquianaya dasia majje esohui e'e nei pajea mee ca'yonaje? Yahuajo miquiana nijje nequiya ecuaaya Eyacuiñajjiya esohui Jesosaja huohuinaje quea ja'a nee: —Jesosa Quito acui ecueata'apeejo mano'yonaje esejaya mimishi cuijea'yojji sosejje —huohuinaje.

Shajja'ajja majje miquianaya Jesosa Quitoja epeeji nei po'yonaje. <sup>2</sup> ¿Jjashahuabaquicue oe! Jesosa nijje jjapeequiajo ca ca oe Eyacuiñajjiya ojaya Edojjoshahua Pame huoojea canaje miquiana huasijje dobiquiya. Moisesija esohui jayojja jama ba'e nishoanijo pojjeama miquiana huasijje dobiquinaje Edojjoshahua Pame. <sup>3</sup> Edojjoshahua Pame quea ca'a neeya miquianaya Jesosa Quitoja epeeji po mee cajje Eyacuiñajjiya bacua poanaje. ¿A'a cuae jjeya nequiiana jama poani so'o ba'a: —Eyaya ca ca eya eyaye nei Eyacuiñajjiya esohui jayojja jama ajeyojeyoje'yo —a'a jamaya poso nequiaa aña?

Chojja. ¿A'a quea jjashahuabaqui quehua pojji! <sup>4</sup> Yahuajo Jesosa nijje jjapeequianijo, pea cuaa miquianaya quea nee nee po mee canaje. Jamatii Jesosa nijje jjapeequi pajea jjima poanaje. ¿A'a jjeya jamatii onijje jjapeequi pajea sa poani? Jamajjeya ¿ajeo acuae nequiiana yahuajo quea nee poa Jesosa nijje jjapeequi majje? Chojja. ¿A'a jamaya pojji! <sup>5</sup> Yahuajo Jesosa nijje jjapeequianijo ca ca oe Eyacuiñajjiya quea ca'a neeya ojaya Edojjoshahua Pame miquiana huasijje huoojea canaje. Miquianaya o jayojja jama ameesahua canaje ma dejjaa ajjima acani pea'ai. Ohuaya jamaya ameesahua canaje miquiaaya esohui quea pame nee Jesusajo shajja'ajjañajo, onijje jjapeequianijo pea'ai; Moisesija etehue'yo jayojja jama anishoñajo pojjeama.

#### *Onijje jjapeequianijo Eyacuiñajjiya Amajama ba ca poa emimishi cuijea'yo (Genesis 12.3)*

<sup>6</sup> ¿Jjashahuabaquicue Amajamajo! Yahuajo nei Eyacuiñajjiya Amajamajo tehue mee ca poa jama ba'a:

“Amajama Eyacuiñajji nijje jjapeequi'ya poa e'e jojo nei. Jamajjeya Eyacuiñajjiya oya ba ca poa mimishi'ama”.

Yahuajo jamaya tehueme aca poa.

Jamajjeya Amajama Eyacuiñajji nijje jjapeequi'ya poa; o jayojjaya eseya Jesosa nijje cajjapeequi'yahua. <sup>7</sup> E'e, ojjaña joya Amajama jayojja Jesosa nijje jjapeequiani Amajamaja osecua nei cuana poani, Jodio cuana, Jodio pojjeama cuana pea'ai. Jamaya miquianajaya

eba. <sup>8</sup> E'e, yahuajo nei nei Eyacuiñajji jjashahuabaquinaje jama ba'a: “Enijje e'e jojo nei jjapeequi'yajo, eyaya Jodio pojjeama pea'ai baje mimishi'ama”. Jamaya yahuajo poa. Jamajjeya yahuajo nei Eyacuiñajjiya Amajama huohui ca poa jama pea'ai ba'a:

“Amajama, miya ecuea epeeji nei poanijo, eyaya miya baña mimishi'ama. Quea huiso nee ojjaña meshijo ba'e, ojjaña esohuijo mimiani cuana pea'ai eyaya mimishi'ama baje'yo enijje jjapeequi'yajo”.

Jamaya Eyacuiñajjiya Amajama huohui ca poa yahuajo nei nei.

<sup>9</sup> E'e, Amajama Eyacuiñajji nijje jjapee neinei'ya poa. Jamajjeya ojjaña o jayojja jama Eyacuiñajji nijje jjapee neinei'yanian Eyacuiñajjiya ba caje mimishi'ama'yo. <sup>10</sup> Yahuajo nei nei Eyacuiñajjiya tehue mee ca poa jama ba'a:

“Moisesija esohui etehue'yo jayojja jama ba'e tiitii ajjajo, Eyacuiñajjiya miquianaya quea nee nee po mee caje'yo, quea nee tii tii”.

Jamaya yahuajo nei nei tehue ca poa. Jamajjeya Moisesija esohui jayojja jama ba'e nishoanijo quea nee nee poaje'yo. Chama' joya ojjaña Moisesija esohui etehue'yo atiitijji poani. Quea camaja nee nee. Ameemee ajja.

<sup>11</sup> E'e jojo nei Eyacuiñajjiya esohui huohuijjiya tehue ca poa jama ba'a:

“Ojjaña joya onijje jjapeequi'yani Eyacuiñajjiya ba caje mimishi'ama. Onijje ba'e tiitii mee caje'yo eyajo”.

Jama tehuemeya aca poa. Jamajjeya ecuanaja eba e'e jojo nei onijje jjapeequi'yanijo ca ca oe Eyacuiñajjiya eseya ba caje mimishi'ama, Moisesija esohui jayojja jama ba'e nishoanijo pojjeama. <sup>12</sup> Jamajjeya a'a quea quehua jjashahuabaquijji jama ba'a: —Eyacuiñajjiya eya ba'e tiitii mee caje'yo Moisesija esohui etehue'yo jayojja jama eya atiiiañajo.

Jamaya jjashahuabaquianijo Jesosa oe nei nijje jjapeequi ajja tii tii. Maya ba'e tiitii sa poanijo Moisesija esohui jayojja jama atiitii nisho cani. Jamatii ba'e tiitii ajja. ¡Bacue! Eyacuiñajjiya esohui yahuajo nei tehue mee ca poa jama ba'a:

“Ojjaña cuaa Moisesija esohui etehue'yo jayojjaya jama ca'a tiitii cahua eyajo eba'e'yojji tii tii”.

Jamaya yahuajo tehue mee ca poa. Jamatii chama' nei nei joya Moisesija esohui etehue'yo jayojjaya jama atiitii cani.

<sup>13</sup> Eyacuiñajjiya mimishi cuana jama acani ba'a: —Eyaya miquianaya baña quea mimishi nee, e que ejjanequichipiquijji pojjeama poaje —poani Eyacuiñajji.

Jesosa Quito ca ca mimishi'ama mano'yonaje esejaya mimishi cuijea'yojji sosejje. Yahuajo nei Eyacuiñajjiya esohui tehue ca poa jama ba'a:

“Ojjaña joya acuijo ba'ehuanasohua ba'e, e'aa jeyo ba'e aje oe Eyacuiñajjiya ba cani quea mimishi, o que ejjanequichipiquijji pojjeama”.

Jamajjeya Jesosa Quito acui ecueata'apeejo ba'ehuanasohuajea cajo, Eyacuiñajjiya oya huohui ca poa jama ba'a:

“Miquea epeeji cuanaja mimishi miquea po'yonaje. Jamajjeya eyaya oya cuana baña mimishi'ama, mimishi cuijea'yonaje”.

<sup>14</sup> Yahuajo nei Eyacuiñajjiya Amajama jama aca poa ba'a:

“Amajama, miya enijje jjapee neinei'yanianijo, quijje eyaya quea huiso cuana, ojjaña meshijo ba'e cuana baje mimishi'ama”.

Jamaya yahuajo nei aca poa. Jamajjeya Jodio pojjeama cuana pea'ai Jesosa Quito nijje jjapeequi'yanijo, Eyacuiñajjiya oya cuana ba caje mimishi'ama. E'e, Jesosa Quito mano'yonaje acui ecueata'apeejo esejaya mimishi cuijea'yojji. Jamajjeya Eyacuiñajjiya ojaya esohui jayojja jama acaje: Eseyo ba'e tiitii mee caje'yo onijje. Edojjoshahua Pame huoojja canaje ese yasijje pea'ai, Jesosa nijje jjapeequi'yanijo.

*Eyacuiñajjiya esohui Amajama nijje Moisesija esohui jayojja jama pojjeama*

<sup>15</sup> Ecuea epeeji cuana Janatajo ba'e, jjeya eyaya pea esohui tehueña miquiana ba meesahuajji, Eyacuiñajjiya esohui ba meesahuajji. ¡Bacue! Jama aña ba'a: Eseyaya papeni tehueña esejaya aquiana quijje equijjoejajji. Tehue majje bajjani tehueña. Epeejiya bajjani tehue meeña pea'ai ojjañaja ebajji. Bajjani tehue majje esejaya esohui etehue'yo

epajea'yojji pojjeama. Jamaya e'e jojo nei acaje'yo cuaa. <sup>16</sup> Oya jayojja yahuajo nei Eyacuiñajjiya Amajama huohui ca poa jama ba'a: “Amajama, eyaya miya quea pame nee aje'yo, mique osecua pea'ai”. Jamaya Eyacuiñajjiya yahuajo nei aca poa.

E'e, Eyacuiñajjiya Amajama jama aca poa ba'a: “Eyaya quea pame nee aje'yo miquea osecua oe” aca poa. “Miquea osecua quea huiso cuana nijje” ca ca ajjima aje'yo Eyacuiñajjiya aca poa. E'e, Eyacuiñajjiya jjashahuabaquinaje ojaya huoojea'yo ojjaña jaahuanajjiyo, Jesosa Quitojo, Amajamaja osecuajo. <sup>17</sup> Jamaya poanaje ba'a: Yahuajo nei nei Eyacuiñajjiya Amajama huohui ca poa jama ba'a: “Enijje e'e jojo nei jjapeequianijo, eyaya miya quea pame nee aje'yo, ojjaña meshi yasijje ba'e cuana quea pame nee aje pea'ai. E'e jojo nei eyaya ecuea esohui jayojja jama aje'yo tii tii” huohuime aca poa.

Jamaya Eyacuiñajjiya Amajama huohui ca poa yahuajo nei nei. Majoya quijje nei nei, 430 shequijame po majje ohuaya Moisesi huohui ca poa ojaya esohui cuana ojjaña Jodio cuana huasijje ehuohuijji. Jamajjeya Moisesi ojaya esohui tehue mee majje Eyacuiñajjiya ojaya esohui Amajama nijje epajea'yojji pojjeama pea'ai. Chojja. Jama po ajja ba'a: “Jjeya ecuea esohui Amajama nijje eya anaje e'abecajji pojjeama” po ajja Eyacuiñajji. Ohuaya jamatii ojaya esohui Amajama nijje aca poa jayojja jama acaje'yo tii tii: Esey a mimishi'ama ba caje onijje jjapeequianijo; Moisesija esohui etehue'yo jayojja jama anishoñaño pojjeama. <sup>18</sup> Jamajjeya e'e jojo nei onijje jjapeequianijo ca ca oe Eyacuiñajjiya eseya ba caje mimishi'ama, Moisesija esohui etehue'yo jama ba'e nishoanijo pojjeama. E'e, Eyacuiñajjiya eseya ba'e tiitii mee caje'yo Moisesija esohui jama ba'yani jojjemo ojaya esohui Amajama nijje ohua huohui ca poa jayojja jama ajjima aca'yome. Chojja, ohuaya ca ca oe ojaya esohui jayojja jama acaje'yo tii tii.

<sup>19</sup> Jamajjeya miqianaya pojja'a jama poani ba'a: —¡Dee! Jamajjeya ¿apiojji acuae Moisesija esohui ba mee ca poa, ajeo shai tehue mee ca poa?

Eyaya miqianaya ba meeje. Jama ba'a: Eyacuiñajjiya maya tehue mee ca poa ese ba meeji ojjaña tii shajjama' poanijo. Yahuajo ca ca Eyacuiñajjiya Amajama huohui ca poa oja osecua poeje, ma ojjaña meshijo ba'e cuana quea pame acaje, Jesosa Quito bajjani. Jesosaa poe majje ecua ba mee ca poa Eyacuiñajjiya eseya mimishi'ama ba caje onijje jjapeequianijo, Moisesija esohui jayojja jama ba'e nishoanijo pojjeama. Jamatii Jesosa cuaya jjimahuajo, Moisesija esohui ojjaña ba ca poa jama ba'a: Ojjaña meshijo ba'e cuana shajjama' poani. Jamajjeya Eyacuiñajjiya shajjama' cuana quea nee nee po mee caje'yo.

Yahuajo nei nei Eyacuiñajji Amajama nijje miminaje jama ba'a: “E'e jojo nei eyaya miya quea pame nee aje”. Moisesija esohui tehue mee ca poajo ca ca Eyacuiñajji onijje mimi jjima. Ohuaya ojaya esohuidojojji huoojea ca poa Moisesi sohuihuohuiya. Majoya Moisesiya Eyacuiñajjiya esohui huohui ca poa pea cuana huasijje.

<sup>20</sup> E'e, oya Eyacuiñajji Amajama nijje miminaje: —E'e jojo nei eyaya miya quea pame nee aje —aca poa ohuaya. E'e, Eyacuiñajji Amajama nijje miminaje, pea Eyacuiñajjiya huoojea jjima Amajama nijje mimiya. Jamajjeya e'e jojo nei ma esohui jayojja jama acaje'yo tii tii, Eyacuiñajjiya.

<sup>21</sup> E'e pojja'a miqianaya jjashahuaba quehuaquiani jama ba'a: —Jamajjeya Moisesi ojaya esohui tehue mee majje ojaya esohui ma Amajama nijje ohua huohui ca poa paje ca'yonaje pojja'a Eyacuiñajjiya —jamaya jjashahuaba quehuaquiani pojja'a beca cuana.

Chojja, jamaya pojjeama. Yahuajo nei nei Eyacuiñajjiya huohui ca poa ojjaña onijje jjapeequiani ohuaya ba caje mimishi'ama. Majoya Moisesiya Eyacuiñajjiya sohui tehue ca poa ojaya ejjashahuabaquijji ba meesahuajji. Ma esohui cuana tehue mee ca poa jamatii ojaya eba jamaya ba'e tiitii ajja ojjaña. Chama' nei nei joya ojaya esohui jayojja jama ba'yani tii. Ma esohui jayojja jama eba'e mee jojjemo Eyacuiñajjiya eseya ba'e tiitii mee ca'yome jamaya ba'yani jojjemo: —Eyaya miya baña mimishi'ama ecuea esohui jayojja jama ba'yanijo —jama huohui'yomeya jojjemo.

<sup>22</sup> Jamajjeya Eyacuiñajjiya etehue'yo jayojja jama ba'e tiitii ajjajo eseya shajjama' cuana poani, quea mimishi. Jamaya ohuaya huohui ca poa. Jamajjeya Jesosa nijje jjapeequianijo ca ca oe Eyacuiñajjiya eseya ba cani mimishi'ama, eba'e tiitii mee'yojji.

*Jesosa nijje jjapeequianijo eseya ba'e tiitii mee caje'yo, Moisesija esohui jama amajje pojjeama*

<sup>23</sup> Yahuajo nei onajaya huohui jjima Jesosa nijje ejjapeequi'yojji. Moisesija esohui jayojja jama ba'yanijo, Eyacuiñajjiya ojjaña mimishi'ama ba cani poso aca poa cuaa. Jamajjeya ma esohui jayojja jama ba'e meemee ajjajo, ejeanobiajea jayojjaya ojjaña poa. Jamaya ojjaña poa esohui quea pame nee Jesusaja shajja'ajja jjimahuajo. <sup>24</sup> Cuanaya Jesosa Quito poe jjimahuajo, ojjaña cuana esho'i jama poanaje. Moisesija esohui esho'i jjabahuejjaqui meeji jayojja jama poa. Jiquio ecua o jaahunajjiya esho'iquiana niñeshe'a cani jayojja jama Moisesija esohui ba majje ojjaña ba ca poa quea ja'a eba'ejji, quea ja'a eba'ejji pojjeama pea'ai. Jamajjeya ma esohui ojjaña ba ca poa Eyacuiñajji ona nijje quea quene poani Moisesija etehue'yo jayojja jama ajjimajo. Jesosa poeyajo ca ca onijje jjapeequi'yajo, Eyacuiñajjiya eseya ba cani mimishi'ama. <sup>25</sup> Jjeya eseya Jesusaja epeeji poani. Jamajjeya esejaya eba Eyacuiñajjiya ojjaña ba caje mimishi'ama Moisesija etehue'yo jayojja jama ba'e nishoanijo pojjeama. Jamajjeya jjeya eseya esho'iquiana jayojja jama pojjeama; etii jayojja jama poani.

*Jjeya eseya Eyacuiñajjiya bacua cuana po'yonaje*

<sup>26</sup> E'e, Jesosa Quito nijje jjapeequi'yo majje eseya Eyacuiñajjiya bacua cuana poani, Jodio cuana, Jodio pojjeama cuana pea'ai, ojjaña. <sup>27</sup> Jesosa nijje jjapeequi'yajo eseya onaaya besa mee canaje Eyacuiñajjiyo. Jamaya ojjaña ba meenaje eseya Jesusaja epeeji e'e jojo nei poani, Eyacuiñajjiya bacua cuana. Jjeya eseya Jesosa Quito jayojja jama ba'yani, yahuajo jama pojjeama. <sup>28</sup> E'e, Jesusaa ojjaña ojaya epeeji ba cani oya jayojjaya, pea epeeji jayojjaya. Jama poani ba'a: —Jodio cuana Jodio pojjeama cuana jayojjaya; echacojji sosema' cuana ona huoojajji poani jayojja; dejja cuana epona cuana jayojjaya pea'ai. Ojjaña pea jayojjaya eyaya ecuea epeeji baña —Jesosa poani.

<sup>29</sup> Jesosa Amajamaja osecua nei poa. Jamajjeya ojaya epeeji nei Amajamaja osecua cuana poani. Onijje jjapeequianijo, Eyacuiñajjiya Amajama ba ca poa mimishi'ama. Jamajjeya Eyacuiñajjiya Jesusaja epeeji cuana mimishi'ama ba cani pea'ai, Amajama jayojjaya.

#### 4

*Jiquio ecua eba'cuaja ejjaa aquiana mesena ca'yani jama jayojjaya Eyacuiñajjiya eseya ba'e tiitii mee caje'yo Jesosa esejo mano'yonajejo*

<sup>1-2</sup> Ecuea epeeji cuana, eseya Eyacuiñajjiya bacua po'yonaje. Jamajjeya ojjaña ojaya aquiana esejaya poaje'yo. Eyaya miqianaya maya esohui ba mee sa aña. Jamajjeya jiquio jama acue ba'a: Oe esho'i oja chiija quijjojea. Mano'yo jjimahuaa ejeajjiya o tiimeejji epojji huohui ca poa jama ba'a: —Ojjaña aquiana ecue quijjojea ecue bacuaja poaje'yo. ¡O esho'yahua miyaya jaahunacue! ¡Ecuea aquiana pea'ai jaahunacue! ¡Oya tiyajo quia'yocue! —aca poa ejeajjiya.

Jamajjeya jjeya nei ojjaña aquiana oja chiija quijjojea esho'ija. Jamatii esho'i neiya o tiimeejji cashajja'ajja cahua, echacojjiya jama cashajja'ajja cahua. Tii majje ca ca onaja huoojea'yo shajja'ajja pajea caje'yo, esho'iya.

<sup>3</sup> Esho'i nei oja chiija aquiana quia jjima jayojja jama yahuajo Eyacuiñajjiya eseya quea jjashahuabaqui ja'a po mee jjima poa. Epeeji pojjeamaja esohui jayojja jama eseya poa. Shajjama' jayojja ba'e sa po'yo ajja poa; jamatii jamaya poa. <sup>4</sup> Jamajjeya Eyacuiñajji yahuajo nei jama poanaje ba'a: —Ecuea eba ache shejo, ache pojajajo eyaya ecue Bacua huoojeaje —poa.

Jamajjeya ma shejo, ma pojajajo tii ojaya ejjashahuabaquiji yahuajo jayojja jama ohuaya Jesosa huoojea canaje. Jesosa ese jayojjaya yamiji poa, Jodio eponaja mejo. Jamajjeya ohuaya Moisesija esohui etehue'yo jayojja nei nei aca'ya poa e'e jojo nei.

<sup>5</sup> Ojjaña ma esohui jayojja jama ba'e nishoanijo, Eyacuiñajjiya eseya ba cani mimishi cuijea'yo jjima. Jamajjeya oya, Jesosa poeyanaje ese mimishi cuijea'yojji sosequia'yohua. E'e, oya mano'yonaje eseya Eyacuiñajjiya bacua cuana epo mee'yojji.

<sup>6</sup> Jamajjeya oja bacua poanijo, Eyacuiñajjiya Edojjoshahua Pame huoojea canaje ese que dobiquiya. Edojjoshahua Pameya eseya mimi meesahua cani jama ba'a: —Eyacuiñajji, Echii ai, jjeya miya ecue Chii e'e jojo nei —ameesahua cani eseya.

<sup>7</sup> Jamajjeya Eyacuiñajji eseja Chii poanijo jjeya eseya esho'i nei jayojja pojjeama, echacojji jayojja jama pojjeama pea'ai. Jjeya ca ca eseya oja bacua etii pishana poani. Jamajjeya jiquio ecua ejeajjiya oja bacua etii acani jayojja jama Eyacuiñajjiya eseya acani, ma ecua ohuaya huohui ca poa jamaya acani.

*Pabo quea mete Jesusaja epeeji cuanajo poa*

<sup>8</sup> Ecuea epeeji cuana, yahuaajo miquianajaya ba jjima poa Eyacuiñajji. Jamajjeya eshahua nijje miminaje, eyacuiñajji nisho nijje pea'ai. Maya mi huoojeajji poanaje; o jayojja jama popajea meeme ajja poa. <sup>9</sup> ¡A'a jja oe jamaya po o'oyajji! Maya miquiana ba'e meesahua ajja, jaahuana ajja, mimishi cuijea'yo ajja pea'ai. Jjeya ca ca miquiaaya Eyacuiñajji babacanaje mique Chii epojji, ama e'e jojo nei ohuaya miya babaca ca poa oja bacua cuana epo'yojji. Jamajjeya ¿apiojji acuaeya jja oe jjeya esohui quea quehua shajja'ajja o'oya sa aña so'o? Jamaya quiana quea jjashahuabaqui quehua poani, de. <sup>10</sup> E'e, jjeya miquianaya Jodio etiiquiana jama ba'e sa poanijo quea quehua jjashahuabaquiani jama ba'a: —Jodio etiiquiana ojee ijia'ijia aninaje Eyacuiñajji bihuiajji, ojaya esohui epajea'yojji pojjeamajo. Oe epojjajo jamaya acaninaje, oe ba'ijo cuanaya jamaya acaninaje, pea ba'ijo jamaya acaninaje pea'ai, pea shequiaja cuanajo jamaya acaninaje pea'ai. Ecuanaya Jodio etiiquiana jama atitiije, Eyacuiñajjiya ecua ba caje mimishi'ama —jamaya quea quehua jjashahuabaquiani miquianaya.

<sup>11</sup> Jamajjeya eya quea mete miquianajo. E'e pojja'a eyaya quea huiso cahui miquiana huasijje esohui huohui majamajanaje ehuhuijeajji.

<sup>12</sup> Ecuea epeeji cuana, miquianaya ecuea quea jea nee, Jesusaja epeeji cuana. Yahuaajo eya miquianajaya quea jea nee poa. Miquiana nijje nequiya eyaya ecuea etiiquianaja esohui apajea'yonaje. Jamajjeya eya Jodio pojjeama jama ba'enaje, miquiana jama. ¡Che, oe e jayojja jama ba'ecue! ¡Yahuaajo jama Jesusaja epeeji nei po o'oyacue! <sup>13</sup> Miquianajaya eba yahuaajo eya quea mano poanaje miquiana nijje ani. Miquiana nijje aniya esohui quea pame nee Jesusaja huohui coonaje, jamatii quea manohua poaniya tii. <sup>14</sup> Eya jjashahuabaquinaje jama pea'ai ba'a: —Eya quea mano poani ba majje Janata dejja cuaa eya cajaa acaje, eya huoojeacuayajea caje pojja'a cuiñajji esecue yasijje —poanaje.

Chojja, miquianaaya eya jaahuanaje, huoojeacuayajea jjima poanaje. Eyacuiñajjiya esohuidojojji poeyajo miquianaaya oya quea pame aje jayojja jama eya quea pame nee anaje; Jesosa Quito poeyajo, oya quea pame nee aje pea'ai jayojja jama eya anaje, de miquiaaya. <sup>15</sup> Eya miquianajaya quea jea neejo ecuea esohui shajja'ajjanaje quea jaji nee nee. Jjashajja'ajjaquinaje pea'ai. Ecuea eba miquianaya jama poanaje ba'a: —Pabo ecuanaja quea jea nee neejo oya quea pame nee ca'a'yahua. E'e, ecuea ecojja cajja cajji jjemo eyaya oya quia'yome, de —poanaje.

Jjeya ca ca miquianaaya eya shajja'ajja pajea'yonaje. ¿Apiojji acuae ecue esohui shajja'ajja sa po'yo ajja quiana jjeya, de? <sup>16</sup> Eyaya esohui e'e nei huohuiaña tii. ¿A'a majoya eya miquianajaya boti'ama?

<sup>17</sup> Beca cuaa, esohui huohuijji nishohua miquianaya quea jea nee nisho acani. Ohuaya miquianaya enijje jjapeequi pajea mee sa acani ecuea esohui Jesusajo epajea mee'yojji. Ojaya esohui oe nei shajja'ajja mee sa acani. <sup>18</sup> Onaaya miquianaya e'e jojo nei quea jea acani ca ca jamaya quea pame nee. E'e, pea cuana quea jea nee ejja'aqui tii. Esohui huohuijji nishohua miquianaya esohui e'e nei pajea mee cani quea pame pojjeama. Jamajjeya miquianaaya esohui e'e nei aña tii quea pame nee eya miquiana nijje nequi jjimahuaajo, miquiana nijje nequianijo pea'ai. <sup>19</sup> Epeeji cuana, ecuea ca mi ca miquianaya

quea jea nee e'e jojo nei. Jiquio ecua epona cuana quea bacua nee nee poani jayojja jama eya quea yeno nee jjashahuabaquime poani miquianajo, ecuea esohui paje'yañajo. Eya quea yeno nee poaje tii tii; miquiana Jesosa Quito jayojja jama ba'e'yajo ca ca iña oe yeno'ama poaje'yo; ojaya ejjashahuabaquiji jayojja jama miquiana po'yajo, eya yeno'ama poaje'yo. <sup>20</sup> Jamajjeya jjeya nei miquiana que poqui sa poani. Miquiana nijje mimi sa poani. Miquiana nijje enequi jojjemo ecuea eba pome mi jjabahuejjaqui meejji.

*¡Esohui Jesusajo shajja'ajjacue Sanaja bacua jama epojji!*

<sup>21</sup> Miquiana beca cuana Eyacuiñajjiya esohui ma Moisesi tehue mee ca poa jayojja jama ba'e sa poani. Jamatii miquianajaya ma esohui shajja'ajja jjima, ba jjima pea'ai.

<sup>22</sup> Jamajjeya eyaya miquianaya huohuije jama ba'a: ¡jjashahuabaquicue Eyacuiñajjiya esohuijo Amajamajo! Amajamaja bacua ejja cuayanaje becanejjiji pea'ai. Oe ebacua ejjaja enaeseya chaco ca poa Amajamaja equijo, oja huanaseja yajjiyo. Oya Janita bajjani poa. Pea ebacua ejja Isaaca bajjanija enaese Amajamaja ehuanase poa. Oya Sana bajjani poa. <sup>23</sup> Janita epona sho'yahua jjamejoquinaje. Oja bacua cuaya poa Amajamaja bacua, ojjaña esejaya ebacua cuayani jayojja jama poa. Chama' Eyacuiñajjiya ehuohui ma ebacujajo poa. Sana ca ca epona tii, bacuama' poa, esho'yahua jjamejoqui jjima poa. Eyacuiñajjiya Sana huohui ca poa jama ba'a: “Sana, ecuea eba miya epona tii, esho'yahua miya jjamejoqui jjima poa. Jamatii miya jjamejoquije; miquea ebacua cuayaje, dejja” aca poa. Jamajjeya Eyacuiñajjiya huohui canaje jayojja Sanaja bacua Isaaca cuaya poa, Amajamaja jea. <sup>24</sup> Jiquio beca eponajo jjashahuabaquicue eba meesahuajji beca ejjashahuabaquiji jama ba'a: Beca enaese yania poa, Sana, pea ca Janita. Eyacuiñajji beca dejja nijje miminaje pea'ai, Amajama nijje, Moisesi nijje pea'ai. Ebionei Eyacuiñajji Amajama nijje miminaje. Huohui ca poa jama ba'a: “Enijje jjapee neineiquianijo, eyaya miya baña mimishi'ama” aca poa. Ma esohui quea pame nee epona Sana bajjani jayojja.

Majoya quijje Eyacuiñajji Moisesi nijje miminaje eyiyo Sinai bajjani biájje. Ojaya esohui huohui mee ca poa: “Moisesi, ¡jiquio ecuea esohui Jodio cuana shajja'ajja meecue!” aca poa. Jiquio esohui quea camaja nee e'ajji, epona Janitaja eba'ejji jayojja jama. Oya onaja huoojea'yo Amajamaja equijo echacojji. Jamajjeya ojjaña joya Moisesija esohui jayojja jama ba'e sa poani Janitaja bacua cuana jama, echacojji sosema' jayojja. Moisesija etehue'yo shajja'ajjaji cuana Eyacuiñajjiya ba cani mimishi cuijea'yo jjima. <sup>25</sup> E'e, Sinai meshijo yani eyiyo Janita bajjani Anamia meshijo ba'eja esohuijo. Cuanaya Jodio cuanaja cuiñajji quea quemo Jenosanena bajjani Janita jayojja jama. Janita epona echacojji onajaya yajjiyo jayojja jama ojjaña Jenosanenajo ba'e cuana quea jjashahuabaqui quehuajo jama poani ba'a: —Eyacuiñajjiya ecua ba caje mimishi'ama ojjaña Moisesija etehue'yo jayojja jama ba'yajo —poani.

Jamajjeya Jodio cuaa Moisesija esohui etehue'yo anisho cani tii tii. <sup>26</sup> Jenosanena eyacua eyajo nequi. Ojjaña Jenosanena eyacujajo eba'ejji cuana echacojji soesema' jayojja yajji pojjeama. Ma ecua Eyacuiñajjiya huohui ca poa jayojja jama eseya acaje'yo; Jesosa nijje jjapeequi'yajo, ohuaya eseya mimishi cuijea ca'yani. Jamajjeya eseya Sanaja bacua jayojja jama poani. <sup>27</sup> E'e, yahuajo Eyacuiñajjiya esohui etehue'yo Sanajo jama poa ba'a: “Epona, ¡quea bihui nee pocue, jamatii miya bacuama'! ¡Jamatii jjamejoqui jjima quea bihui pocue! Eyaya miya quea osecua huiso po meeje. Quijje miquea ebacua poaje, miqueahueja jea. Quea huiso nee nee poaje mique osecua cuana. E'e, miya ehuei'yo pojjeama. Quijje miquea osecua quea huiso poaje”.

Jamaya yahuajo nei Eyacuiñajjiya tehue mee ca poa.

E'e, Eyacuiñajjiya Sana quea pame aca poa jama ohuaya jjeya eseya quea pame acani, Jesusaja epeejji cuana.

<sup>28</sup> Ecuea epeejji cuana, jjeya eseya Jesusaja epeejji poani cuana. Ma ecua ohuaya yahuajo huohui ca poa jamaya Eyacuiñajjiya Amajamaja bacua Isaaca cuaya mee ca poa. Oya jayojjaya jjeya ohuaya eseya oja bacua cuana po mee ca'yani, Jesosa nijje jjapeequi jeahuajo. Jamaya ohuaya huohui ca poa yahuajo. <sup>29</sup> Yahuajo Eyacuiñajjiya

Edojjoshahua Pameya Sanaja bacua Isaaca cuaya meesahua ca poa, Amajamaja jea. Oya jayojjaya Edojjoshahua Pameya eseya pea jjashahuabaquime po mee cani. Jiquio ecua yahuajo nei Janitaja bacua mimijajinaje Sanaja bacua nijje jayojja jama jjeya Jesusaja epeeji pojjeama ese nijje mimijajiani, quea mimishi acani ojaya epeeji epo poani jjejojo.

<sup>30</sup> Jamatii miquea eba Eyacuiñajjiya esohui etehue'yo jama poa ba'a:

“Epona Janita bajjani equijo chacochocho ani ¡huojeacuayajea'yocue! ¡Quea huesha huoojeajea'yocue oja bacua nijje! E'e, miquea aquiana equijjojea oja bacuaja pojjeama poaje. Miquea ehuanase neija, Sanaja bacuaa ojjaña mesena caje”.

Jamaya yahuajo Eyacuiñajjiya Amajama huohui ca poa.

<sup>31</sup> Janitaja osecua cuana Moisesija esohui etehue'yo jayojja jama aca poa. Eyacuiñajjiya maya ba cani mimishi cuijea'yo jjima. Eseyca ca ca, Jesusaja epeeji cuana ca ca Sanaja bacua Isaaca jama Eyacuiñajjiya ba cani emimishi cuijea'yo, Jesosa nijje jjapeequianijo.

## 5

### *Etiiquianaja esohui jayojja jama ja'a ba'e o'oyajji!*

<sup>1</sup> Ecuea epeeji cuana, Jesosa nijje jjapeequi meesahua majje Eyacuiñajjiya eseya ba canaje emimishi cuijea'yo. Jamajjeya ja'a jama pojji ba'a: —Etiiquiana jayojja tiya oe eba'e'yo Eyacuiñajjiya eseya mimishi'ama ebajji, Moisesija esohui etehue'yo jayojja jama oe eba'e'yo —a'a jamaya pojji!

Chojja. Jjeya Jesusaja epeeji poanijo, ja'a miquianaya Moisesija esohui etehue'yo jayojja jama ba'e o'oyajji! ¡A'a echacojji sosema' jayojja jama po'yojji! <sup>2</sup> ¡Shajja'ajjacue! Eyaya, Pabohua miquianaya jama huohuiaña ba'a: E'e jojo nei miquianaaya etiiquianaja ehuhui'yo jayojja jama amajje, cuiishasha jehuissejjajea mee majje ojjaña miya ba cani Jesosa nijje jjapeequi pajea'yani. Jamajjeya etiiquianaja ehuhui'yo jayojja jama amajje, cuiishasha jehuissejjajea mee majje ca mi ca oe Jesosa nijje jjapee nishoquiani. <sup>3</sup> Jamajjeya eyaya miquianaya e'e jojo nei huohui o'oyaña ma Eyacuiñajjiya yahuajo nei huohui ca poa jama ba'a: “Isaenija bacua cuana cuiishasha cajehuissejjajea cahua. Jamaya ojjaña ba caje oya cuana Moisesija etehue'yo jayojja jama ba'yani” jamaya yahuajo aca poa e'e jojo nei. Jamajjeya miquianaaya etiiquianaja, Moisesija esohui etehue'yo jayojja jama a sa po'yo majje ¡ojjaña tii aneinei'yocue oe! <sup>4</sup> E'e, jama aña ba'a: —Eyacuiñajjiya eya ba caje mimishi'ama Moisesija esohui etehue'yo jama añajo.

Jamajjeya aje oe ma miquianayame tii ca jja mi ca oe Jesosa oe nei nijje jjapee neineiqui ajja. Jiquio jama mimi pajea'yome aje mi poani ba'a: —Eyacuiñajji, jeya miquea quea jea nee neejo jaahunacue mo! ¡Miquea esohui jayojja jama ecue mimishi cuijea'yocue! —jamaya mimi pajea'yome mi poanaje, de.

<sup>5</sup> Ecuana ca ca jama poani ba'a: —Ecuana eba Jesosa nijje e'e jojo nei jjapeequianijo, Eyacuiñajjiya ecua ba caje emimishi cuijea'yo.

Edojjoshahua Pameya ecua ba meesahua cani e'e jojo nei Eyacuiñajjiya jamaya eseya acaje'yo o que poqui'yajo. <sup>6</sup> Jamajjeya Jesusaja epeeji cuana, Jodio cuana, Jodio pojjeama cuana pea'ai Eyacuiñajjiya ba cani oya jayojjaya, pea jayojjaya. Ohuaya jamaya acani ba'a: —Ojjaña joya e'e jojo nei Jesosa nijje jjapeequi'yani, Jesosa quea jea nee acani pea'ai eyaya baña emimishi cuijea'yo —Eyacuiñajjiya acani.

<sup>7</sup> Ecuea epeeji cuana, yahuajo miquianaya esohui quea pame nee Jesusaja shajja'ajjanaje quea ja'a nee. Beshahua nei jjapee neineiquinaje. Jjeya ca ca onaaya miquianaya esohui e'e nei pajea mee cani pea esohui eshajja'ajjajji. <sup>8</sup> Eyacuiñajji pojjeama miquianaya jama huohuime acani. Chojja.

—¡Esohui e'e nei ba neinei poquiacue! —jamaya ca ca Eyacuiñajjiya eseya acani.

<sup>9</sup> ¡Bacue! E'e jojo nei pa ponaja oe pojji pahui shejee meejiya quea huiso pohuipohui shejee mee cani. Jiquio ecua eshejee meejiya pahui shejee mee cani jayojja jama oe esohui huohuiji nishohua quea huiso cuana esohui e'e nei pajea mee ca'yani. <sup>10</sup> Jamatii ecuea eba esejaya Emeshi Mese nei Jesusaa ojaya esohui jayojja jama acaje. Jamajjeya miquianajaya esohui e'e nei epajea'yojji pojjeama, etiiquiana Moisesija esohui jayojja



jama eba'e nisho'yoyji pojjeama. Jamajjeya ecuea eba Eyacuiñajjiya e'e jojo nei ma esohui huohuijji nisho quea nee nee po mee caje'yo pea'ai, jamatii edejja tiiya jamaya huohuime acani pojja'a.

<sup>11</sup> Epeeji cuana, ¡jjashahuabaquicue! Beca cuana ejo siajje poani jama ba'a: —Pabohua pea'ai ca pa jjaja ca oe huohui cani etiiquianaja Moisesija esohui jayojja cuiishasha jehuissejjajea mee cani pea'ai —siajje poani ejo.

Chojja. Yahuajo ca ca oe Jesosa nijje jjapeequi jjimahuaa eyaya jamaya pea Jodio cuana huohuia poa. Jamajjeya oya cuana enijje quea bei poa, quea quene pojjeama. Jjeya ca ca eyaya esohui eyacua huohuiaña jama ba'a: —Jesosa acui ecueata'apeejo mano'yonaje esejo, eseja mimishi cuijea'yoyji sosejje. Onijje jjapeequi'yajo ca ca oe Eyacuiñajjiya miquianaya ba caje emimishi cuijea'yo —huohuime jjeya aña.

Jamajjeya ma shajja'ajja majje Jodio cuana enijje quea quene poani. Eyaya yahuajo jama Moisesija esohui ehuohui jojjemo Jodio enijje quene'ama pome. Oya cuana enijje quea quene poanijo, miquianajaya eba eyaya jamaya huohui maja ajja.

<sup>12</sup> ¡Esohui huohuijji nisho, ma miquiana dasiajji poani ca'a'ama capohua! Maya jama poani ba'a: —¡Moisesija esohui jama ca'a cahua! ¡Cuiishasha cajehuissejjajea cahua! —acani.

¡Oya cuanaya cabiña jjajeajeaquiahua pea'ai, de! Jamajjeya jiquio ecua ejjajja chamajo jjabacuajeaqui ajja jayojja jama esohui huohuijji nishoja mi dasiajji epo cuanaja quea huiso edasia maja'yoyji pojjeama.

*¡Edojjoshahua Pameja esohui jayojja jama ba'ecue!*

<sup>13</sup> Jesosaja epeeji cuana Janata meshijo ba'e, miquianaya ecuea quea jea nee. ¡Jamajjeya mo shajja'ajjacue! Eyacuiñajjiya miquianaya babaca canaje Jesosaja epeeji epo'yoyji, Moisesija esohui e'ajji pojjeama. Jamatii miquianaaya, Jesosaja epeejiya ja'a jamaya ajji ba'a: —Eyacuiñajjiya eya ba cani mimishi'ama Jesosa nijje jjapeequianijo. Eya Moisesija esohui etehue'yo jayojja jama apajea mee canaje. Jamajjeya eya jamatii ba'eje o'oya yahuajo jama, quea mimishi —a'a jamaya pojji!

Chojja, jamaya pojjeama. ¡Pea cuana asahuacue; quea jea nee nee acue! Jesosa Quito nijje jjapeequi'yanijo, Eyacuiñajjiya miquianaya quea ja'a po mee cani ojaya esohui jama eba'ejji. <sup>14</sup> Jamaya Moisesiya tehue ca poa yahuajo ba'a:

“¡Pea cuana quea jea nee nee acue! Miya quea ja'a ba'e sa poani. Jamajjeya ¡pea cuana quea ja'a ba'e mee sahuacue, mi jayojjaya! ¡Pea cuana mi pejeje ba'e pea'ai mique huapa pojjeama jayojja quea jeaya oe acue!”

Jamaya yahuajo Moisesiya tehue ca poa.

E'e jojo nei pea cuana quea jea nee nee añajo ojjaña Moisesija esohui jama aña. <sup>15</sup> Pea cuana nijje mimijajiani ca ca oya cuana miquea quea jea pojjeama. ¡Jiquio ecua ijjiacajji cuaa jja'ijjiaqui majje jja'ijjia jeyojeyoquiani jayojja jama a'a pojji! ¡A'a pea cuana nijje quea quene nee nee pojji! ¡A'a quea yeno nee nee po meeji! ¡A'a mimijajijji! ¡Pea epeeji cuana nijje quea bei pojjeamajo ojee jjapeepajeaqui mee ca chana!”

*Edojjoshahua Pameja ejjashahuabaquijji pea ojjaña yahuajo ba'ejja jayojja jama pojjeama*

<sup>16</sup> Ecuea epeeji, ¡shajja'ajjacue! ¡Edojjoshahua Pameja ejjashahuabaquijji jayojja jama ba'ecue, yahuajo jama pojjeama! ¡Yahuajo jayojja a'a sa'yoyji! Quea mimishi ja'a ba'e sa po o'oyajji! <sup>17</sup> E'e, yahuajo quea mimishi ba'ya poa. ¡Jamaya a'a po sa po o'oyajji! Edojjoshahua Pameya ca ca eseya ba'e meesahua cani; pea ejjashahuabaqui'yoyji po mee cani, de. ¿Apiojji acuae mi yahuajo ba'ya poa jayojja jama ba'yani, ejjashahuabaquijji eyacua jama pojjeama ba'yani? <sup>18</sup> Jjeya Edojjoshahua Pameja ejjashahuabaquijji jama ba'yanijo ca ca Eyacuiñajjiya eseya ba cani emimishi cuijea'yo; etiiquiana Moisesija esohui jayojja jama ba'yanijo pojjeama.

<sup>19</sup> Ojjaña jaya Edojjoshahua Pameja ejjashahuabaquijji jayojja jama a'ajja ca ca quea mimishi poaje'yo. E'e, jamaya pojjeama ba'yanijo onajaya ehuanase sii caje, onajaya yahue jea ba majje sii caje pea'ai, quea mimishi jjashahuabaquianijo edejja oya dejja nijje,

epona oya epona nijje pea'ai quea mimishi acaje bicho'ama. Quea tai jjashahuabaqui majje jamaya acaje'yo. <sup>20</sup> Eshahua nijje, eyacuiñajji nisho nijje mimije; eyamiquecua poaje, quea quene nee nee poaje; jjamimicuijaje nobiajeaqui; pea jayojja jama nequi sa poaje; quea tecue nee nee poaje; quea dejja tai, quea nishhui poaje; mimijajije pea'ai. Ojjaña joya Edojjoshahua Pame jayojja jjashahuabaqui ajjaa quea tai acani. <sup>21</sup> Onajaya aquiana jea ba cani, ehoo nei po tiitiiani, ojee ishi'ishi majje quea tai poani pea cuana nijje. E'e, ojjaña mimishi acani; yahuajo jayojja ba'yanijo tii quea mimishi po tiitiiani.

Yahuajo eyaya miquianaya huohuinaje; jjeaya eyaya huohui o'oyaña jama ba'a: E'e jojo nei ojjaña joya jamaya ba'yani aje oe Eyacuiñajji nijje eba'e'yojji pojjeama, Eyacuiñajji cuñajji eyacua huasijje edobiquijji pojjeama Jesosa poe o'oyajo.

<sup>22</sup> Edojjoshahua Pameya eseya ba'e meesahua canijo ca ca jama poani ba'a: Pea cuana esejaya quea jea poani, quea bihui nee poani, quea bei poani, ojjaña nijje quea pame nee poani, quenequenecuaaji ajja pea'ai, mase'ama poani pea'ai, ojjaña cuana quea jea nee aña tii tii; esejaya esohui jayojja jama aña pea'ai. <sup>23</sup> Esey jjabihuaqui mee sa po'yo ajja pea'ai. Quea mimishi po sa po majje quea ja'a jjashahuabaquiani mimishi epojji pojjeamajo. Jamaya poani Edojjoshahua Pameja ejjashahuabaquijji jayojja jama ba'yanijo. E'e, jamaya ba'yanijo Eyacuiñajji quea bihui po mee aña seya. <sup>24</sup> Esey Jesosa Quitoja epeeji poanaje. Jamajjeya mimishi a sa po'yo ajja. E'e, Jesosa Quito mano'yonaje acui ecueata'apeejo ecuanaja mimishi cuijea'yojji. Jiquio ecua emano'yo shajoshajo'yo ajja jayojja jama eseya Jesusaja epeeji poanijo mimishi a sa po'yo ajja. Pea jjashahuabaqui'yome eseya Jesusaja epeeji cuana poani. <sup>25</sup> E'e, Edojjoshahua Pameya ecuaana Jesosa nijje jjapeequi meesahua canajejo, eseya ojaya ejjashahuabaquijji jayojja jama ejja'aqui. <sup>26</sup> ¡Jiquio jama a'a jjashahuabaquijji ba'a: —Eya ee nei Jesusaja epeeji quea pame nee poani. Pea cuana quea pame pojjeama —jamaya a'a pojji!

¡A'a pea cuana quea quene po meejji! ¡Pea cuanaja aquiana a'a jea bajji pea'ai!

## 6

*¡Quea pame nee pocue pea cuana nijje!*

<sup>1</sup> Ecuea epeeji cuana, ¡bacue jiquio esohui! Jesosa Quitoja epeeji quea mimishi po o'oyajo, ¡onijje mimiquicue! E'e, miquianaya Jesusaja epeeji quea ja'a poanijo ¡oya mimishi pajea meesahua'yocue! ¡Quea bei oya jjabahuejjaqui meecue! ¡Quea jjashahuabaqui ja'a nee pocue! Miya quea mimishi po o'oya chana' pea'ai. <sup>2</sup> ¡Jesusa Quitoja epeeji ojaya esohui jayojja jama ba'e meesahuacue! ¡Jamajjeya ojjaña miquianaaya ojaya esohui jayojja jama acue! Jiquio ecua e'abojji quea biquiejo ishajja cani jayojja jama eba'e'jji quea camaja poanijo, ¡epeeji cuana ba'e meesahuacue! <sup>3</sup> Beca cuana jjashahuaba taiquiani jama ba'a: —Eya ee nei quea pame nee; pea cuana quea pame pojjeama —poso jjabaquiani.

Chojja, ojaya ejjashahuabaquijji quea quehua, quea tai. <sup>4</sup> Ojjaña Jesusaja epeeji cajjashahuaba neineiquiahua ojaya eba'e'jji. ¡Quea pame amajje quea bihui nee capoahua! ¡A'a jjashahuabaquijji jama ba'a: —¿A'a pea cuana e jayojja jama quea pame aña? —a'a jamaya pojji!

<sup>5</sup> Jamajjeya ojjaña eseyaya quea mimishi po majje ¡Eyacuiñajji huohucue! A'a jama ajji ba'a: —Onaaya eya quea mimishi po mee canaje.

Chojja. Ma miyame tii ca mi ca quea mimishi.

<sup>6</sup> Epeeji cuana, ¡Jesusaja esohui huohuijji aquiana ojaya eba'e meejji quiacue! E'e, esohui huohui cani sosejje casosequia cahua.

<sup>7</sup> ¡A'a jjadasiaquijji pojji! ¡A'a quea jjashahuabaqui tai pojji! Eyacuiñajji ca ca jjadasia meequi ajja. Ohuaya quijje ojjaña sosequia caje'yo ma eseyaya meshijo ba'yahuaa anaje sosejje. Ojjaña ojaya eba. Jamajjeya jiquio ecua anoso quecua majje quijje anoso chicha caje'yo quea huiso nee jayojja jama quijje Eyacuiñajji acaje'yo. <sup>8</sup> E'e. Jamajjeya yahuajo jayojja jama jjashahuaba tiitiquiani quea mimishi epojji, e'e jojo quea mimishi poaje.

Jamajjeya quijje Eyacuiñajjiya quea nee nee po mee caje'yo tii tii quea mimishi poanaje sosejje. Edojjoshahua Pameja esohui shajja'ajjañajo ca ca e'e jojo nei quea pame po mee caje'yo; eseya ba'e tiitii mee caje'yo onijje.

<sup>9</sup> ¡Jamajjeya quea pame nee ejja'atiitiiqui! Quea pame nee apajea'yo ajjajo, e'e jojo nei Eyacuiñajjiya eseya quea bihui nee po mee caje'yo Jesosa Quito poe o'oyajo. E'e, jiquio ecua eque meseya oja quejo chaco pajea'yo jjima acani jama, quijje tii'yajo ejjajja quea pame chicha ca'yani jayojjaya eseyaya Edojjoshahua Pameja esohui jayojja jama apajea'yo ajjajo, quijje Eyacuiñajjiya eseya quea pame nee acaje'yo. <sup>10</sup> ¡Jamajjeya ojjaña cuana quea pame ejja'atiitiiqui! ¡Jesosaja epeeji cuana ca ca quea pame nee nee ejja'atiitiiqui eseja huapa pojjeama jayojja!

*Pabohua pea esohui huohui canaje*

<sup>11</sup> Epeeji cuana, eyaya eyaye nei jiquio esohui tehueña. Miquea eba eya tehueña jayojja; tehue ai'ai yaña. <sup>12</sup> ¡Bacue! Beca cuana jjashahuaba taiquiiani; onaya jjabihuaiqui mee sa poani. Oya cuana esohui huohuijji nei poso acani. Miquianaya huohui cani esohui siajje jama ba'a: —¡Moisesija esohui jayojja jama acue! ¡Onaya cuiishasha jehuissejjajea meecue Eyacuiñajjiya miquianaya ebajji emimishi cuijea'yo! —jama siajje ameya mi acani.

Jamajjeya esohui e'e nei mi huohui cani jama ba'a: —Jesosa acui ecueata'apeejo mano'yonaje esejo. Onijje jjapeequi'yajo Eyacuiñajjiya eseya ba caje emimishi cuijea'yo —jamaya miquianaya huohui jjima acani. Chojja, oya cuana quea mete jjashahuabaquiiani jama ba'a: —Ecuaa jama ehuohui'yo jojjemo ba'a: “¡Jesosa nijje oe jjapeequi'yocue!” jamaya e'a jojjemo onaya ecuaana nijje quea quene nee pome —jamaya esohui huohuijji nisho poani.

<sup>13</sup> E'e de, maya etiiquiiana Moisesija esohui etehue'yo jayojja jama ecuiishasha jehuissejjajea'yo. Jamatii aje oe ojjaña pea esohui etehue'yo jayojja jama ba'e'yo ajja. Miquianaya cuiishasha jehuissejjajea mee sa acani jama ehuohui mee'yojji ba'a: —Ecuanajaya esohui ca ca oe shajja'ajja cani ojjaña.

<sup>14</sup> Eyaya ca ca oe quea bihui huohui tiitiiña jama ba'a: —Jesosa Quito acui ecueata'apeejo mano'yonajejo, onijje tii tii jjapeequiani. Jamajjeya Eyacuiñajjiya eya ba cani emimishi cuijea'yo.

Jamajjeya eya yahuaajo jama ba'e maja sa po'yo ajja. Mimishi cajaa a'yonaje. Jjeya ecuea eba'ejji pea'yo poanaje. Jesosaja epeeji pojjeama cuana ca ca oe e jayojja jama ba'e sa po'yo ajja cuana. Eya ojaya boti'ama nei. <sup>15</sup> Jesosa Quitohua eseya pea jjashahuabaquime po mee cani. Eyacuiñajjiya eseya ba cani emimishi cuijea'yo Jesosa nijje jjapeequianijo, Moisesija esohui jayojja jama añajo pojjeama; cuiishasha jehuissejjajeañajo pojjeama, cuiishasha jehuissejjajea jjimajo pojjeama pea'ai. Chojja, pea jjashahuabaquime eseya po mee cani Eyacuiñajjiya.

<sup>16</sup> Jamajjeya ojjaña quea pame nee ba'yanijo, Jesosaja epeeji e'e jojo nei cuanajo eya Eyacuiñajji nijje mimiani jama ba'a: —Ecue Chii, ¡Jesosaja epeeji cuana quea bei ba'e meesahuacue! ¡Tecue'ama ona nijje pocue!

<sup>17</sup> ¡A'a jja oe enijje jjamimicuijaja nobiajajaquijji esohui huohuijji nishoja esohuijo! Eya e'e jojo nei Jesosaja huoojea'yo esohui huohuijji. Jamajjeya ja'a huohui o'oyajji jama ba'a: —Pabohua cahuohui cahua jama ba'a: “¡Etiiquiianaja Moisesija esohui etehue'yo jama acue Eyacuiñajjiya miquianaya emimishi cuijea'yo ebajji!” —a'a jamaya pojji!

Mimishi cuaa eya cuia canaje quea huiso esohui eya ehuohui poaje jjejojo. Ecuea esi' quea huiso yanijo, ojjaña ba caje eya e'e jojo nei Jesosaja huoojea'yo.

<sup>18</sup> Ecuea epeeji cuana, jesejaya Emeshi Mese nei Jesosa Quitohua miquianaya caba'e meesahua cahua quea pame nee! Jamaya capoahua tii.

Mahuiso ecuea esohui. Eyaya, Pabohua jiquio esohui tehue'yonaje. Apoa.

## PABOJA ETEHUE'YO EPESO CUIÑAJJI YASIJJE EFESIOS

*Pabohua tehue canaje Jesusaja epeeji cuana Epeso cuiñajji ba'e yasijje*

<sup>1</sup> Eya bajjani Pabo. Jesosa Quitohua eya huoojea canaje oja sohui huohuiya. Jamaya Eyacuiñajji sa poanaje. Eyaya miqianaya Epeso cuiñajji ba'e yasijje esohui tehueña. E'e, miqianaya Jesosa Quito nijje jjapeequiani. <sup>2</sup> Eyacuiñajji esejaya Chii ai poani. Jesosa Quito esejaya Emeshi Mese nei oe nei. ¡Ohuaya miqianaya quea bei nee caba'e meesahua cahua! ¡Quea bojea capo mee cahua pea'ai!

*Jesosa eyajo ba'e jayojja jama eseya ba'e mee caje'yo Eyacuiñajjiya*

<sup>3</sup> Eyacuiñajji ca ca oe Jesosa Quitoja Chii poani. Jesosa esejaya Emeshi Mese nei poani. Eyacuiñajji ejjabihuaqui jama ba'a: —Eyacuiñajji, miya quea pame nee nee poani.

E'e, ohuaya Jesosa huoojea canaje esejaya mimishi cuijea'yohua. Cuanaya ohuaya eseya ba'e tiitii mee caje'yo onijje eyajo. E'e, eseya o jayojjaya jama ba'e mee caje'yo quea pame nee eyajo. <sup>4</sup> Jiquio meshi pana jjimahuajo Eyacuiñajji jjashahuabaquinaje jama ba'a: —Ojjaña cuana Jesosa nijje jjapeequiani ecue bacua cuana po meeje'yo. Quea pame nee poaje. Mimishi'ama pea'ai poaje.

<sup>5</sup> E'e, yahuajo nei nei eseya Eyacuiñajjiya quea jea nee poanijo oya jjashahuabaquianaje jama ba'a: —Oya cuana ecue bacua cuana po meeje'yo, eba'ehuana jayojja ecue Bacua Jesosa Quito nijje jjapeequianijo.

E'e, jamaya Eyacuiñajji sa poanaje yahuajo nei nei. <sup>6</sup> Jamajjeya eseyaya oya bihuiaña jama ba'a: —Eyacuiñajji, miyaya ecuaña jaahuana neineiaña.

E'e, Eyacuiñajjiya oja Bacua Jesosa quea jea nee nee acani. Eseyaya quea jea nee nee acanijo pea'ai Jesosa huoojea canaje mano'yohua, eseya mimishi cuijea'yoyji. Jamatii, sosema' huoojea canaje. <sup>7</sup> Jamajjeya eseya cuaqui yasijje epoquijji pojjeama. E'e, jamaya poanaje Jesosa mano'yajo; ena' ojaya cuayaquinaje eseya mimishi cuana cuijea'yoyji. E'e, eseyaya quea jea nee nee poanijo jamaya amee canaje Eyacuiñajjiya. Quea pame nee nee oya. Pea chama' o jayojja. <sup>8</sup> Quea pame nee nee ojaya ejjashahuabaqui'yoyji. Ojaya eba ojjaña nei nei. Jamajjeya ohuaya eseya ba'e tiitii mee caje'yo onijje eyajo. <sup>9</sup> E'e, yahuajo nei nei esejaya ba jjima ojaya ejjashahuabaquijji. Jjeya ca ca ohuaya eseya ba meesahua cani ojaya ejjashahuabaquijji cuana Jesosa Quitojo. Jamaya ohuaya acaje'yo ba'a: Jesosa Quitohua esejaya mimishi cuana cuijea ca'yonajejo, Eyacuiñajjiya eseya ba'e tiitii mee caje'yo onijje eyajo Jesosa Quito poe o'oyajo. <sup>10</sup> E'e, quijje Eyacuiñajjiya Jesosa Quito Emeshi Mese nei oe nei po mee caje'yo. Ojjaña meshijo, ojjaña eyajo pea'ai huoojeajji poaje'yo tii tii. Oya ojjaña quea bei po meeji poaje. Jama jjashahuabaquimeya poa Eyacuiñajji.

<sup>11</sup> E'e, yahuajo nei nei Eyacuiñajjiya eseya Jesusaja epeeji cuana babaca ca'ya poa Jesusaja epeeji epo'yoyji. Cuanaya Eyacuiñajji yahuajo nei nei meshi pana jjimahuajo jjashahuabaquinaje eseyo jama ba'a: —Jesusaja epeeji cuana quijje nei ecuea ejjashahuabaqui'yoyji jayojja jama poaje'yo.

Jamajjeya Eyacuiñajjiya ojaya epeeji cuana quijje ojaya ejjashahuabaquijji jayojja jama amee caje'yo. <sup>12</sup> Jamajjeya ecuaa, Jesosa Quitoja ebionei epeeji cuana Eyacuiñajji bihuiaje jama ba'a: —Eyacuiñajji, miya quea pame nee nee poani, ecuaña Jesusaja epeeji po mee'yonaje.

<sup>13</sup> Yahuajo Eyacuiñajji ecuanajo jjashahuabaquinaje, Jodio cuanajo. Jjeya oya miqianajo, Jodio pojjeama cuanajo jjashahuabaquiani pea'ai. E'e, eyaya miqiana huasijje Jesosa Quitoja esohui e'e nei huohuinaje Jodio pojjeama huasijje. Shajja'ajja majje miqianaya Jesosa Quitoja epeeji poanaje. Jamajjeya Eyacuiñajjiya miqianaya ojaya ebacua cuana po mee ca'yonaje. E'e, miqianaaya shajja'ajjanaje Eyacuiñajjiya

ejjashahuabaqui'yojji quea pame nee miquianajo jama ba'a: —Eyaya Jodio pojjeama cuana ba'e tiitii mee sa aña Jesosa nijje eyajo Jesosaja epeeji poanijo.

Cuanaya Eyacuiñajjiya yahuajo nei huohui ca poa jama ba'a: —Eyaya Edojjoshahua Pame huoojeaje'yo Jesosaja epeeji yasijje ona jaahuanaa. Oya cuana Jesosa nijje jjapee tiitiiqui meesahua caje'yo —oya poa.

Jamajjeya esejaya eba jama ba'a: —E'e, Eyacuiñajjiya eseya jaahuana canijo ohuaya ojaya ejjashahuabaqui'yojji esejo jayojja jama acaje'yo e'e jojo nei —eseyaya baña.

<sup>14</sup> E'e, Eyacuiñajjiya yahuajo huohui ca poa jama ba'a: —Jodio pojjeama cuana ecuea epeeji poaje'yo beca cuana.

Eyacuiñajjiya jamaya huohui ca poa. Jamajjeya Jodio pojjeama cuana oja bacua cuana po mee caje'yo. Onijje ba'e tiitii mee caje'yo. Ojaya ebacua cuana po'yo majje ohuaya bihuia caje jama ba'a: —E'e Eyacuiñajji, miya quea pame nee poani e'e jojo nei.

*Pabo miminaje Eyacuiñajji nijje Epesojo ba'e cuana quea pame nee epo mee'yojji*

<sup>15</sup> E'e, miquianaya Eyacuiñajjiya epeeji poanaje. Peaa eya miquianajo huohui canaje jama ba'a: —Beca cuana Epeso cuiñajjiyo ba'e Jesosaja, esejaya Emeshi Mese neija epeeji poanaje. Onaaya ojjaña Jesosaja epeeji cuana quea jea nee acani —eya acanaje cuaa.

<sup>16</sup> Jamajjeya ohuaya miquianaya oja bacua cuana po mee ca'yonaje shajja'ajja majje eya mimiani Eyacuiñajji nijje miquianajo: —Eyacuiñajji, ¡miqua epeeji cuana Epesojo ba'e minijje jjapeequi meesahuacue quea pame nee!

<sup>17</sup> E'e, eya mimiani Eyacuiñajji nijje miquianajo jama ba'a: —Eyacuiñajji, miya Emeshi Mese nei Jesosa Quitoja Chii quea pame nee. Jamajjeya ¡miqua epeeji cuana Epesojo ba'e quea ja'a nee jjashahuabaqui meecue! ¡Oya cuana miqua ejjashahuabaqui'yojji, miqua esohui cuana pea'ai ba meesahuacue! Jamajjeya onajaya eba nei nei miya poaje. <sup>18</sup> E'e Eyacuiñajji, ¡oya cuana ba meecue quea ja'a nee miqua ejjashahuabaqui'yojji! E'e Eyacuiñajji, miyaya oya cuana babaca'yonaje; oya cuana ba'e tiitii meeje'yo Jesosa nijje eyajo. ¡Quea pame nee nee Jesosa nijje eba'eji, de! ¡Maya oya cuana ba meesahuacue quea ja'a nee! E'e, jamaya miqua ejjashahuabaqui'yojji miqua epeeji cuanajo. <sup>19</sup> Eyacuiñajji, miya quea ca'a nee nee poani; pea chama' mi jayojja quea ca'a nee nee. ¡E'e Eyacuiñajji, miya quea ca'a nee nee poanaje Jesosa Quito jaahuanajji! ¡Miqua epeeji cuana ba meesahuacue miya quea ca'a nee nee poani ecuana jaahuanajji pea'ai! —eya jamaya mimiani Eyacuiñajji nijje miquianajo.

<sup>20</sup> E'e jojo nei Eyacuiñajji quea ca'a nee nee. Jamajjeya Jesosa Quito dejja mase cuaa quecua ca'yaje mano'yajo, Eyacuiñajjiya shequi mee ca o'oya poa. Shequi mee'yo majje eyahuasijje dojosohuaqui ca'ya poa. Jomajo Eyacuiñajjiya Jesosa Quito onijje ojjaña huoojea'yojji po mee cani. <sup>21</sup> E'e, Jesosa oe nei quea ca'a nee nee po mee ca'yonaje. Oya ojjaña huoojea'yojji po mee ca'yonaje. Emeshi Mese oe nei po mee ca'yonaje pea'ai. E'e, Jesosa quea ca'a nee nee, quea pame nee nee yani jjeya; quijje aje oe oya ma ani tiitii'yome poaje. Oya quea bajjani huiso nee, quea pame nee nee poani Jesosa. <sup>22</sup> E'e, Eyacuiñajjiya Jesosa Quito Emeshi Mese quea ca'a nee nequi mee canaje. Ojjaña aqui ana cuana Jesosaja poanaje. Ojjañaja oja epeeji cuanaja Emeshi Mese nei poanaje Jesosa. Eyacuiñajjiya huohui canaje jama ba'a: —¡Jesosa Quito shajja'ajjacue, ojjaña!

<sup>23</sup> E'e, Jesosaa ojaya epeeji cuana ojaya esohui jayojja jama ameesahua cani. Ojjaña ojaya epeeji cuana nijje nequi majje oya cuana ameesahua cani quea pame nee. E'e, ojaya epeeji cuana Jesosaja eyami jayojja jama poani.

## 2

*Eyacuiñajjiya eseya eyajo ba'e tiitii mee caje'yo*

<sup>1</sup> Yahuajo miquianaya quea mimishi nee nee poa jjejojo Eyacuiñajji nijje jjapeequi jjima poa. <sup>2</sup> E'e, yahuajo miquianaya pea cuana quea mimishi jayojja jama Edosiquiana nijje jjapeequinaje, eshahua cuanaja mese nijje. Ohuaya shajjama' cuana quea mimishi po meesahua cani. <sup>3</sup> E'e ecuana, Jodio cuana miquiana jayojjaya poa. Eyacuiñajjiyo jjashajja'ajjaqui ajja pea'ai poa. Shajjama' jayojja jama po sa poanaje eshahua epeeji

jayojjaya. E'e de, ecuanajaya ejjashahuabaquijji quea mimishi jayojja jama po sa poanaje. Jamajjeya yahuajo pishana ecuana, Jodio cuana, miqianaya Jodio pojjeama cuana pea'ai eshahuaja epeeji quea mimishi poanijo Eyacuiñajjiya huohui canaje jama ba'a: —Miqianaya aje oe quea nee nee po meeje'yo eyaya, eshahuaja epeeji quea mimishi nee neejojo —Eyacuiñajji poa.

<sup>4</sup> Jamatii Eyacuiñajji eseja mimishijo jjashahuabaqui tiitii sa po ajja eseya ojaya quea jea nee nee poanijo.

<sup>5</sup> E'e, yahuajo pishana eseya Eyacuiñajji nijje jjapeequi jjima poa quea mimishi po sa neinei poanijo. Jamatii Eyacuiñajjiya eseya oja bacua quea pame cuana po mee canaje Jesusaja epeeji poanijo. E'e de, jamaya Eyacuiñajjiya eseya quea jea nee acanijo esejaya mimishi cuana cuijea ca'yonaje. <sup>6</sup> Jamajjeya Jesosa Quitohua eseja mimishi cuana cuijea ca'yonajejo, Eyacuiñajjiya ecuana, miqianaya pea'ai ojaya bacua cuana po mee ca'yonaje ojee eyajo eba'e tiitii mee'yojji. Jamajjeya Eyacuiñajjiya ecuanaya, miqianaya pea'ai ba'e tiitii mee cani Jesosa Quito nijje eyajo. Jamaya ohuaya huohui ca poa ba'a: —Jesusaja epeeji poanijo eyaya miqianaya o jayojjaya nequi tiitii meeña quea ca'a nee, quea pame nee pea'ai.

<sup>7</sup> E'e, Eyacuiñajjiya esejaya mimishi cuijea'yo majje ese nijje quea bei poani. Jamajjeya ojña cuana esohuicuayajji ba mee cani; quijje pea'ai ba mee caje jama ba'a: —E'e nei eseya Jesosa Quitoja epeeji poanijo, Eyacuiñajji ese nijje quea bei poani. E'e, Eyacuiñajji ese nijje quea pame nee nee poani tii.

<sup>8</sup> E'e de, eseya Eyacuiñajjiya quea jea nee nee. Jamajjeya miqianaya huohuiana jama ba'a: —Ecuea eba Eyacuiñajjiya ecuea mimishi cuana cuijea ca'yonaje eya onijje jjapeequi jeahuajo —jamaya poanijo Eyacuiñajjiya miqianaya quea pame nee acani. E'e, ohuaya miqianajaya mimishi cuijea ca'yonaje onijje mimiyajo.

¿A'a miqianaya quea pame nee nee poani sosejje mimishi cuijea ca'yonaje? Chojja de, ohuaya mimishi cuana cuijea ca'yonaje sosema'. <sup>9</sup> E'e, ohuaya esejaya mimishi cuijea ca'yonaje sosema'. Jamajjeya pea cuana sijje epojji pojjeama jama ba'a: —Eya quea pame nee poani sosejje Eyacuiñajjiya ecuea mimishi cuijea ca'yonaje —chojja, jamaya poani sijjepojji cuana.

<sup>10</sup> E'e, esejaya eba Eyacuiñajjiya eseya pea jjashahuabaquime po mee ca'yonaje. Jamaya ohuaya aca'yonaje Jesusaja epeeji cuana poanijo. E'e, ohuaya jamaya aca'yonaje. Eseya ojaya ejjashahuabaquijji jayojja jama atiitii mee ca'yani pea'ai. Ojaya ejjashahuabaquijji esejo jama ba'a: —¡Eya miqianajaya quea jea neejo pea cuana quea pame nee atiiticue!

#### *Eyacuiñajjiya Jodio pojjeama sa cani ojaya epeeji epojji*

<sup>11</sup> Miqianaya Epesojo ba'e Jodio cuana pojjeama. ¡Jamajjeya jjashahuabaquicue! Miqianajaya chii cuana Jodio pojjeama poa. Jamajjeya Jodio cuana miqianajo maimai aninaje jama ba'a: —Oya cuana ca ca oma Jodio pojjeama; Eyacuiñajjiya epeeji pojjeama.

E'e, Jodio cuana quea quehua jjashahuabaquinaje jama ba'a: Cuiishasha biso nei jehusejjajeñaajo ecuana Eyacuiñajjiya epeeji quea pame nee poani poso ecuaa anaje, Jodio cuaa. <sup>12</sup> Jamajjeya yahuajo Jesosa Eyacuiñajjiya huoojea'yo ojña jaahuanajji miqianajaya ba jjima poa Jodio pojjeamaja jjejojo. Miqianaya Eyacuiñajji ba po jjima jjejojo Eyacuiñajji ba epo cuana nijje jjapeequi ajja poa. E'e, miqianajaya Eyacuiñajji bihuia jjima Jodio cuana nijje. Yahuajo Eyacuiñajjiya huohui ca poa Jodio cuana jama ba'a: —Eyaya huoojeaje ojña jaahuanajji miqiana huasijje —poanaje.

Maya miqianajaya ba jjima poa Jodio pojjeamaja jjejojo. Jamajjeya miqianaya jjashahuabaquinaje jama ba'a: —E'e de, ecuana jaahuanajji quea pame nee chama'. ¿Aya acuae ecuana jaahuana caje'yo? —poanaje.

E'e de, miqianajaya Eyacuiñajji ba jjima poanaje. Jamajjeya ¿aya miqianaya jaahuana canaje? Quea camaja eba'eji mee nei jiquio meshijo. <sup>13</sup> Jjeya ca ca miqianaya Eyacuiñajjiya epeeji cuana poani Jesosa Quito nijje jjapeequianijo. E'e, yahuajo miqianaya Eyacuiñajji bihuia po jjima poanaje. Jjeya ca ca Eyacuiñajjiya miqiana Jodio

cuana jayojja jama amee canaje. E'e, jjeya miquianaya Eyacuiñajji bihuiajji. Jesosa Quito miquianajaya mimishi cuijea'yojji mano'yonaje, ojaya ena' cuayaqui'yonaje. Jamajjeya Eyacuiñajjiya miquianaya oja bacua cuana po mee ca'yonaje.

*Jodio cuana nijje Jodio pojjeama cuana ojee jjapeequije Eyacuiñajji nijje*

<sup>14</sup> E'e, Jesosa Quitohua ecuana ojaya epeeji po mee canajejo, beca Jodio cuaa Jodio pojjeamajo huohui cani jama ba'a: —E'e de, Jodio pojjeama cuaa Eyacuiñajji bihuia cani ecuaa jayojjaya Jesosaja epeeji poaniya jjejojo —poani.

E'e, Jodio cuana Jodio pojjeama cuana nijje Jesosaja epeeji poani jjejojo huapa pojjeama poani. Jjeya Jesosaja epeeji poani jjejojo Jodio cuanaja ejjashahuabaquijji jayojja jama Jodio pojjeama cuana jjashahuabaquiani. Epeeji nei nei poanaje. E'e de, jamaya poanaje Jesosa Quito ojjañaja mimishi cuijea'yojji acui ecueata'apeejo mano'yonajejo. <sup>15</sup> Ojjañaja mimishi cuijea'yojji poani jjejojo Jesosa ojaya epeeji cuana nijje miminaje jama ba'a: —Jodio etiiquianaja esohui jayojja jama a'a ajji ca ecuea epeeji epojji! Chojja, enijje jjapeequianijo Jodio cuana, Jodio pojjeama cuana pea'ai ecuea epeeji cuana poanaje. Ojjaña cuana huapa pojjeama cuana poanaje. Jamajjeya Jodio cuana Jodio pojjeama cuana nijje ojee jjapeequi meeje'yo quea bei —acanaje Jesosa Quitohua.

<sup>16</sup> Jesosaa Jodio cuana, Jodio pojjeama cuana pea'ai ojaya epeeji cuana po mee ca'yonaje; oya cuana Eyacuiñajjiya epeeji cuana poanaje. E'e, oya cuana Eyacuiñajjiya bacua cuana poanijo, ojee nequi mee caje huapa pojjeama jayojja jama, quea bei. Jamaya amee canaje Jesosaa acui ecueata'apeejo mano'yo majje. <sup>17</sup> Cuanaya Jesosa Quito poeyanaje miquiana que, ma Jodio pojjeama huasijje jama huohuiya ba'a: —E'e de, jjeya miquianaya Eyacuiñajjiya epeeji po meeña. Yahuajo miquianajaya Eyacuiñajji ba jjima Jodio pojjeamaja jjejojo. Jjeya ca ca ojaya epeeji quea bei poani miquianaya —Jesosa poanaje.

Jesosa ecuana huasijje, ma Jodio cuana huasijje poeyanajeya Eyacuiñajjiya esohui bajji yasijje. Ma ecua miquiaaaya huohui canaje jayojjaya jama ecuaaya huohui canaje pea'ai. <sup>18</sup> Jamajjeya ecuana, Jodio bajjani cuana Eyacuiñajji nijje mimiani; miquianaya Jodio pojjeama cuana pea'ai Eyacuiñajji nijje mimije'yo, esejaya Chii ai nijje. E'e, Edojjoshahua Pame oe nei yani ojjaña Jesosaja epeeji cuana nijje. Ohuaya Jesosaja epeeji cuana Eyacuiñajji nijje mimi meesahua cani mete'ama.

<sup>19</sup> Jamajjeya jjeya Eyacuiñajjiya Jodio pojjeama cuana jama acani ba'a: —Yahuajo miquianaya ecuea epeeji pojjeamajo eyaya miquianaya jaahuana jjima poa. Jjeya ca ca miquianaya ecuea epeeji poani. Ecuea huapa pojjeama poani ecuea pea epeeji cuana nijjeya —acanaje Eyacuiñajjiya. <sup>20</sup> E'e, Jesosaja huoojea'yo cuanaja esohui shajja'ajjanaje miquianaaya. Cuanaya yahuajo nei Jodio esohui huohuijji cuaa esohui e'e nei huohui canaje. Maya jjeya miquianaaya shajja'ajjanaje. Jamajjeya miquianaya Jesosaja epeeji poanaje pea'ai. Jamaya po mee canaje Jesosaa ba'a: Ojaya epeeji cuana equi jayojja jama nequi. Jesosa Quito ca ca quea ca'a nee, quea pame nee nee poani, equi yamajjana quea ca'a jayojja oya. E'e, jiquio ecua eyamajjanajo acui ejeasehuijaajji huana majje acui equecuajajji huisajo bequiobo ba'ehuana cani jayojja jama Jesosaa ojaya esohui huohuijji cuana quea pame nequi mee cani. Majoya esohui huohuijjiya ojjaña Jesosaja epeeji cuana quea pame ba'e meesahua cani. Jesosaja huoojea'yo esohui huohuijji cuana, Jodioja esohui huohuijji cuana pea'ai ma acui eba'ehuanasohuajji jayojja jama poani. <sup>21</sup> Jjeya miquianaya Jesosaja epeeji po majje acui ejeasehuijji jaajji biajje nequi jayojja jama poani. Jamajjeya jiquio ecua equi yamajjana quea ca'a nequijo equi quea ca'a nequia mee cani jayojja jama Jesosaa quea ca'a poaniya ojaya epeeji cuana ojee quea ca'a onijje jjapeequi mee cani. Equi quea ca'a jayojja po mee cani. <sup>22</sup> E'e, jjeya miquianaya, Jodio pojjeama Jesosa Quitoja epeeji poanijo Edojjoshahua Pame ojjañajo nequi. Jamajjeya ojaya epeeji Jodio bajjani cuana nijje ojee nequi, equi quea ca'a jayojja poani.

## 3

*Pabohua esohui huohui majamaja canaje Jodio pojjeama cuanaja ebajji*

<sup>1</sup> Eya Pabo, Jesosa Quitoja esohui huohuijji. Eyaya ojaya esohui huohuinaje miqiuana huasijje, Jodio pojjeama bajjani yasijje ojaya epeeji nei epo meejji. Jesusaja esohui huohuiañajo pea cuaa eya iña majje jeanobiajea ca'yonaje eya esohui huohui poaje jjejojo. <sup>2</sup> Jamatii. Pea cuaa miqiuana huasijje huohuiqui canaje ejo jama ba'a: —Eyacuiñajjiya Pabo huoojea canaje ojaya esohui Jesusajo huohuiya Jodio pojjeama cuana huasijje —acanjje.

<sup>3</sup> Yahuajo miqiuana jaya ba jjima Eyacuiñajjiya ejjashahuabaquijji jama ba'a: —Jesosa Quitohua ojjaña ojaya epeeji cuana, Jodio cuana, Jodio pojjeama cuana pea'ai ba'e tiitii mee caje'yo onijje eyajo.

Maya Eyacuiñajjiya eya ojaya epeeji jojo ba mee canaje. Jamaya ecuea esohui etehue'yo miqiuana huasijje yahuajo huohuia poa. <sup>4</sup> E'e, maya miqiuanaaya banaje. Jamajjeya jama ejjashahuabaquime poanjje ba'a: —E'e jojo nei Eyacuiñajjiya Pabo ba mee canaje ojaya ejjashahuabaquijji jama ba'a: Jesosa Quitohua ojjaña ojaya epeeji cuana, Jodio cuana, Jodio pojjeama cuana pea'ai ba'e tiitii mee caje'yo onijje eyajo —jamaya miqiuana jaya eba poanjje.

<sup>5</sup> Yahuajo nei ca ca Eyacuiñajjiya pea cuana huasijje huohui jjima ojaya ejjashahuabaquijji Jesosa Quitojo, ma Jodio pojjeama cuana ojaya epeeji po mee majje o jaahuanajji poaje'yo pea'ai. Jjeya ca ca Eyacuiñajjiya Edojjoshahua Pame huoojea canaje ojaya epeeji cuana huasijje. Ojaya epeeji beca cuana huoojea canaje ojaya ejjashahuabaquijji jayojja jama huohuiya. Edojjoshahua Pameya ma esohui huohuijji cuana ba mee canaje Eyacuiñajjiya ejjashahuabaquijji Jodio pojjeamajo pea'ai.

<sup>6</sup> Eyacuiñajji ejjashahuabaquinaje Jodio pojjeama cuanajo jama ba'a: —Jodio pojjeama cuana ecuea epeeji po majje ecuea huapa pojjeama cuana poaje. Oya cuana ba'e tiitii meeje'yo eyajo Jesosa nijje. E'e nei, eyaya huohuinaje ecuea epeeji cuana Jodio bajjani cuana huasijje jayojja jamaya eyaya aje'yo ecuea epeeji Jodio pojjeama cuana huasijje pea'ai. Jamaya eyaya aje, oya cuana Jesusaja epeeji poanijo. E'e, Jodio pojjeama cuaa shajja'ajja canaje ecuea esohui Jesosa Quitojo —Eyacuiñajji poanjje.

<sup>7</sup> E'e jojo nei Eyacuiñajjiya eya huoojea canaje ojaya esohui quea pame nee Jesusajo huohuiya. Eya ojaya quea jea poanjjejo, ohuaya eya ojaya epeeji po mee ca'yonaje, eya ojaya esohui huohuijji po mee canaje pea'ai. <sup>8</sup> Jamajjeya Jesusaja pea epeeji cuana quea pame nee nee; eya ca ca quea pame pishana yahuajo Jesusaja epeeji cuana cuia mee'yojji poa jjejojo. Jamatii Jesosa nijje jjapeequiyajo, Eyacuiñajjiya eya huoojea canaje ojaya esohui huohuiya. E'e de, eya ojaya esohui huohuijji poanjje, esohui quea pame nee Jesosa Quitojo huohuijji Jodio pojjeama cuana huasijje. Jamajjeya oya cuana ba meeje ache pame nee nee Eyacuiñajjiya ejjashahuabaquijji onajo. E'e, jjeya oya cuana ba'e tiitii mee caje'yo eyajo Jesusaja epeeji poani jojoya. <sup>9</sup> Eyacuiñajjiya eya huoojea canaje ojjaña ojaya ejjashahuabaquijji ba meesahuaa, ma yahuajo ojjaña ba jjima poa. Ecuea esohui shajja'ajja majje ojjaña ba caje jama ba'a: Ojjaña Jesusaja epeeji ojee ba'e tiitii mee caje'yo eyajo onijje e'e jojo nei jjapeequianijo, Jodio cuana, Jodio pojjeama cuana pea'ai. E'e, Eyacuiñajji quea ca'a nee nee. Oja pana'yo ojjaña, de. Yahuajo nei oya ejjashahuabaquia poa ojjaña jaahuanajji. Jamatii ecuanajaya etiiquiana maya ejjashahuabaquijji ba mee jjima poa Eyacuiñajjiya. <sup>10</sup> E'e, Eyacuiñajjiya eya huoojea canaje ojaya ejjashahuabaquijji huohuiya. Jamajjeya ojjaña esohuidojojji mese cuaa, ojjaña pea cuana eyajo nequiya cahuohui cahua jama ba'a: —¡Bacue oe! Eyacuiñajji ejjashahuabaquiani quea pame nee, quea ja'a nee nee. E'e, ohuaya ojjaña ojaya epeeji cuana onijje nequi tiitii mee cani eyajo —ojjanaa ca'a cahua.

<sup>11</sup> Jamaya Eyacuiñajji ejjashahuabaquia poa yahuajo nei nei, jiquio meshi pana jjimahuajo. Ojaya ejjashahuabaquijji quea ja'a nee jayojja jama poanjje Jesosa Quito, esejaya Emeshi Mese nei. <sup>12</sup> Jamajjeya jjeya eseya mimije'yo Eyacuiñajji nijje mete'ama



Jesosa Quitoja epeeji po majje. <sup>13</sup> Jamajjeya eyaya miqianaya huohuiaña jama ba'a: —Miquiana huasijje Jesosaja esohui huohuiañaajo, pea cuaa eya jeanobiajea canaje eya miqianaya huasijje esohui ehuohui poaje jjejojo. Jamatii ja'a quea yeno pojji! Quea camaja ejeanobia ejaajji, de. Jamatii ecuea esohuijo miqianaya Jesosaja epeeji poanaje.

*Jesosa Quitohua eseya quea jea nee nee acani*

<sup>14</sup> Jamajjeya miqianaya, Jodio pojjeama Jesosaja huapa pojjeama poanijo, eya Eyacuiñajji nijje mimiani miqianajo. E'e, Eyacuiñajji esejaya Chii ai quea pame nee nijje eya mimiani jama ba'a: —Eyacuiñajji, miya quea pame nee nee —eya poani.

<sup>15</sup> E'e, Eyacuiñajjiya pana ca poa ojjaña. Jesosaja epeeji jjeja eyajo nequi, ojjaña ojaya epeeji jiquiojo nequi pea'ai Eyacuiñajjiya bacua cuana poani. Etiqiana ojaya epeeji cuana pea'ai Eyacuiñajjiya bacua cuana poa. <sup>16</sup> Jamajjeya eya onijje jama mimiani miqianajo ba'a: —Eyacuiñajji, miya quea pame nee yani tii tii quea ca'a nee nee. Miyaya Edojjoshahua Pame huoojeanaje miquea epeeji cuana Epesojo ba'e yasijje quea ca'a po meeya. ¡Edojjoshahua Pameya miquea epeeji cuana caba'e meesahua cahua quea ja'a nee miquea esohui jayojja jama! <sup>17</sup> E'e Eyacuiñajji, miquea epeeji cuaa huohui cani jama ba'a: “Jesosa nijje ecuaña jjapee tiitiquiani”. Jamajjeya joya cuana Jesosa Quitoja ejjashahuabaqui'yojji jayojja jama jjashahuabaqui meesahuacue quea ja'a nee! ¡Jamaya acue Eyacuiñajji, miya quea ca'a nee poanijo! E'e, miquea ejjashahuabaqui'jji jama ba'a: “Ecuea epeeji cuana quea jea nee poani. Eyaya oya cuana quea ja'a nee ba'e meesahuaje ecuea ejjashahuabaqui'jji quea ja'a nee jayojja jama”. E'e Eyacuiñajji, quea jea nee nee miquea epeeji cuana. ¡Maya miyaya oya cuana ba meesahuacue! Jamajjeya oya cuana mijo jama poani ba'a: “Eyacuiñajjiya ecuaña quea jea nee nee poani. Ecuaña jaahuana cani quea pame nee nee” oya cuana poani. <sup>18</sup> E'e Eyacuiñajji, jamajjeya miquea epeeji cuana Epesojo ba'e, ojjaña miquea pea epeeji cuana pea'ai ba meesahuacue miquea ejjashahuabaqui'jji quea pame nee nee onajo poani! Jamaya miyaya ojjaña quea jea nee nee añ. <sup>19</sup> E'e, oya cuana Jesosa Quitoja quea jea nee nee poanaje. Ojaya epeeji cuana po meesahua ca'yonaje. ¡Jamaya oya cuana ba meesahuacue, Eyacuiñajji! Quea jea nee nee miquea ojjaña. Ecuana ya ba meeme ajja. Jamatii jjashahuabaqui meeme ajja. E'e Eyacuiñajji, ¡miquea epeeji cuana ba meesahuacue miquea ejjashahuabaqui'jji quea ja'a nee onajo pea'ai! Quea huiso nee, de. Jamajjeya joya ecua miyaya huohuiaña jamaya acaje'yo cuaa quea pame nee. Onajaya ejjashahuabaqui'jji miquea jayojja jama poaje'yo.

<sup>20</sup> —E'e Eyacuiñajji, ecuaña miya bihuiaña. Miya quea ca'a nee nee oe nei poani quea pame nee nee. Jamajjeya miquea ejjashahuabaqui'jji quea ja'a nee nee ecuaña añ, miyaya. E'e, quea pame nee nee ecuaña jaahuanaña, miyaya. Quea pame nee nee miyaya añ, Eyacuiñajji. E'e, ecuaña jjapeequi meesahuaña minijje miya quea ca'a nee nee poanijo. Jamaya apoa —jamaya eya mimiani Eyacuiñajji nijje miqianajo.

<sup>21</sup> Jamajjeya jesejaya ojjaña Jesosaja epeeji cuaa Eyacuiñajji ejjabihuia tiitiqui'yo! Oya quea pame nee nee.

4

*¡Ojee ejjachacoqui ojjaña quea bihui ba'yaniya!*

<sup>1</sup> E'e, eyaya, Pabohua Emeshi Mese neija esohui huohuiañaajo, pea cuaa eya jeanobiajea canaje eya esohui ehuohui poaje jjejojo. Jamajjeya jecuea esohui shajja'ajjacue! Jjeja miqianajaya eba Eyacuiñajjiya ejjashahuabaqui'jji miqianajo; ohuaya miqianaya babaca canaje onijje quea ja'a nee nee ejjapeequijji. Jamajjeya ¡jamaya ba'ecue ojaya epeeji nei! <sup>2</sup> ¡Jesosaja epeeji cuana quea bei pocue! ¡A'a quea mase pojji pea cuana nijje! ¡A'a tecueacuajijji! Minijje quea mimishi poajo, ¡jamatii oya cuana quea jea nee acue! <sup>3</sup> E'e, Edojjoshahua Pameya Jesosaja epeeji cuana ojee jjapeequi meesahua cani quea bei. Jamajjeya ¡miqianaya ojjaña jamaya atiiticue pea'ai! <sup>4</sup> ¡Bacue! Ojjaña eseya Jesosaja epeeji cuana Jesosaja eyami jayojja jama poani, oe eyami jayojja poani. ¡Bacue! Edojjoshahua Pame oe nei esejo yani, ojjaña Jesosaja epeeji cuanaajo. Eyacuiñajjiya eseya

babaca cajje ojaya oe nei ejjashahuabaquijji ojjañajo jjashahuabaqui mee canaje jama ba'a: —Ecuea epeeji cuana ba'e tiitii meeje'yo Jesosa nijje eyajo —poanaje.

<sup>5</sup> Eseyaya Emeshi Mese nei oe nei yani. Jesosaja esohui e'e nei nei oe nei yani, pea chama'. Onaaya eseya besa mee canaje enajo ojjañaja ebajji eseya Jesosa Quito oe nei nijje jjapeequiani. <sup>6</sup> Oe Eyacuiñajji yani tii tii; pea chama'. Oya oe nei ojjañaja Chii ai. Oya ca ca oe ojjaña huoojajji. Ojjaña ameesahua cani de, ojjaña nijje nequi pea'ai. Jamajjeya ¡Jesosaja epeeji cuana nijjeya oe quea bei nee jjapeequicue miquianaya!

<sup>7</sup> E'e. Jamajjeya Eyacuiñajjiya ojjaña Jesosaja epeeji cuana chaco meesahua cani onijje. Oe epeeji chaco meesahua cani iye huiso; pea chaco meesahua cani quea huiso, esohui huohuijji pojja'a, pea echacojjijo pojja'a. <sup>8</sup> Jamajjeya Eyacuiñajjiya yahuajo nei jama tehueme aca poa Jesosajo ba'a:

“Eyahuasijje sohuaqui'yo majje ohuaya quea huiso dejja cuana onijje jjapeequi meesahua caje'yo. Ohuaya ojaya epeeji cuana onijje chaco meesahua caje pea'ai”.

Jamaya tehue mee ca poa yahuajo nei nei Jesosa Quitojo.

<sup>9</sup> ¿Yajjajje acuae yahuajo nei tehue ca poa? Jama ba'a: “Eyahuasijje sohuaqui'yonaje”. Jama poanijo ba'a: Ebionei Jesosa eyajo ani meshi yasijje poeyanaje. <sup>10</sup> Meshi yasijje poe majje eyahuasijje poqui o'oyanaje. Jomajo oya quea ca'a nee nee nequi tiitiije'yo, ojjaña huoojea'yojji epojji tii tii, Emeshi Mese nei epo'yojji. <sup>11</sup> Jesosaa ojaya epeeji cuana onijje chaco meesahua cani jama ba'a: Beca cuana ohuaya huoojea canaje ojaya esohui huohuiya. Beca cuana huohui meesahua cani ma ohua quijje acaje'yo. Pea cuana huohui meesahua cani ojaya esohui quea ja'a nee nee. Pea cuana ca ojaya epeeji jaahuanajji po mee cani. Pea ca esohui huohuijji po meesahua cani ojaya epeeji cuana quea huiso ojaya esohui eba meesahuajji. <sup>12</sup> Jamaya Jesosaa ameesahua cani ojjaña ojaya echacojji quea pame nee epojji. Jamajjeya ojjaña ojaya epeeji cuana quea ja'a nee nee eba'e poquijji.

<sup>13</sup> Jamajjeya eseya Eyacuiñajjiya Bacua Jesosaja epeeji cuana ojee jjapeequije ojaya esohui jayojja jama. Ojjaña eseyaya oya ba neineije'yo pea'ai. Jamaya eseya ojaya epeeji cuana quea ja'a nee poaje. O jayojja jjashahuabaquime poaje, epeeji etii jayojja poaje. <sup>14</sup> Jjeya nei jjapeequiani jayojja jama pojjeama eseya poaje. E'e, jiquio ecua beniya enashajo dojo cani pea mijijje jayojja jama esohui huohuijji nisho cuaa joya jjeya nei Jesosa nijje jjapeequiani dasia majje poquiquehua mee cani. Oya cuana jjashahuaba majamajaquiani ese dasiajji. <sup>15</sup> Eseyaya ca ca pea cuana quea jea poanijo esohui e'e jojo nei huohuiaña Jesosa, eseyaya Emeshi Mese nei jayojja jjashahuabaquime epojji. <sup>16</sup> ¡Bacue! Dejjaja eyami: eme', equise, ojjaña ojaya ejjashahuabaquijji jayojja jama ojee quea pame poanijo quea ja'a nee nequi dejja. Jiquio ecua dejjaja eyami jayojja jama Jesosaja epeeji cuaa ojee chaco cani quea pame nee, Jesosaja ejjashahuabaquijji jama. E'e, ohuaya ojjaña ojaya epeeji huoojajji poaniya ojee chaco mee cani onijje. ¡Jamajjeya ojjaña quea jea nee acue cuana! ¡Onaya jjapeequi meesahuacue!

#### *Pea ba'e'yome epojji Jesosa Quito nijje*

<sup>17</sup> Eya, Pabo Jesosaa huoojea ca'yonaje miquiana huasijje esohui huohuiya. Jamajjeya ¡ecuea esohui shajja'ajjacue! ¡Jesosaja epeeji pojjeama cuana quea mimishi jama a'a pojji! Ojaya ejjashahuabaquijji cuana cajaa. <sup>18</sup> E'e, oya cuana quea mimishi jjashahuabaquiani. Pea eba'ejjijo jjabahuejjaqui ajja. Jjapeequi ajja Jesosa nijje. Shaj-jama' de, mimishi quea boti nee ojaya. <sup>19</sup> Mimishi cuanajo bicho'ama. Quea tai nee nee atiitii cani. Quea mimishi tii tii po sa neinei poani, de. <sup>20</sup> Miquianaaya ca ca Jesosaja esohui shajja'ajjanaje. Jamajjeya ¡ba'ecue quea pame nee! <sup>21</sup> ¿A'a miquianaaya Jesosaja esohui shajja'ajjanaje? E'e. ¿A'a jjabahuejjaquinaje? E'e. Ojaya esohui ca ca oe e'e jojo nei poani. <sup>22</sup> Jama poanaje ba'a:

—¡Ma mi ba'ya poa quea tai Jesosa Quito ba jjimahuajo pajea neinei'yocue! ¡Cajaa acue! Quea mimishi jjashahuaba tiitiqui aninajejo beshahua nei miya poquinaje cuaqui yasijje. <sup>23</sup> ¡Eyacuiñajjiya miquianaya quea pame nee cajjashahuabaqui mee cahua Jesosaja ejjashahuabaquijjijo! <sup>24</sup> Eyacuiñajjiya miquianaya ba'e mee caje o jayojja. Jamaya e'e jojo

nei quea pame nee eba'ejji. Jamajjeya ¡ba'ecue Eyacuiñajji ejjashahuabaquijji jayojja jama!

<sup>25</sup> Eseyaya Jesosa nijje jjapeequi majje huapa pojjeama cuana poani. Jamajjeya ¡a' onaya siajje ajji! ¡Ojjaña Jesosaja epeeji cuana nijje e'e nei mimicue! <sup>26</sup> ¡Miquianaya onaja mimishijo a'a quea quene po tiitiijji! ¡Jjeyahua nei oe quea bei nee po o'oyacue! <sup>27</sup> Quea quene po tiitianijo, Edosiquiaa miquianaya dasia ca chana'. Quea mimishi, quea mimijjequijea po mee ca o'oya chana', de. <sup>28</sup> Jamajjeya miya siipojji ¡sii popajea'yocue! ¡Quea pame oe chaco neineicue! Jamaya eba'ejji quea pame poaje miquea quea huiso, aema' ba'e meesahuajji pea'ai.

<sup>29</sup> ¡A'a quea mimishi mimijji pea'ai! ¡Esohui quea pame nee mimi tiitiicue pea cuana jjapeequi meesahuajji! Jamajjeya pea cuana miquea esohui shajja'ajja majje quea pame poaje. <sup>30</sup> Cuanaya Jesosaja epeeji quea mimishi po o'oyajo, Edojjoshahua Pame quea yeno poani. ¡A'a oya quea yeno po meeji! E'e, Eyacuiñajjiya ese quea boejea po mee'yo majje Edojjoshahua Pame huoojea canaje ese nijje nequiya. Jamajjeya Jesosa Quito poe o'oyajo Edojjoshahua Pameya huohui caje esejo jama ba'a: —Oya cuana Jesosaja epeeji nei —poaje.

<sup>31</sup> Jamajjeya ¡a'a mimijajji! ¡A'a quea quene pojji! ¡A'a quea tecue pojji! ¡A'a jjaniñebaquijji! ¡A'a jjamimicuijjea nobiajeaquijji pea'ai! Chojja, ¡ojjaña mimishi cuana pajea neinei'yocue! <sup>32</sup> ¡Pea cuana oe ba'e sahuacue quea pame nee! ¡Quea jea nee acue! Pea cuaa miya ñiñeba canijo, napa canijo pea'ai ¡onijje quea bei pocue! E'e, Jesosa Quito miquea mimishijo mano'yajo, Eyacuiñajjiya miquea mimishi cuana cuijea ca'yonaje, quea quene po tiiti ajja mimishijo. ¡Jamaya acue miquianaaya, ojjaña!

## 5

### *Jesosaja epeeji, ¡ojaya esohui jayojja jama acue!*

<sup>1</sup> Eyacuiñajjiya miquianaya quea jea nee acani, oja bacua cuana. Jamajjeya ¡o jayojja jama pocue miquiana ojaya epeeji cuana poanijo! <sup>2</sup> Jesosa Quito ese cuanaño mano'yonaje oya quea ese jea nee poanijo. Eyacuiñajji quea bihui nee poanaje oja Bacua Ejja esejo mano'yajo. E'e, yahuajo nei Jodio cuaa huichacha quea shiye nee nee ba'esohuaqui mee ca poa Eyacuiñajji bihuiajji. Ma jayojjaya Jesosa mano'yonaje esejaya mimishijo. Jamajjeya ¡pea cuana quea jea nee acue miquianaaya, Jesosa Quitohua jayojja jama acue! <sup>3</sup> Jamajjeya miquianaya ojaya epeeji poanijo ¡Jesosaja jama pocue! ¡A'a quea mimishi jjashahuabaquijji! ¡Mimishijo oe a'a mimijji pea'ai! ¡Quea mimishi a'a pojji! E'e, ¡a'a shacuima' nequi, ahuema'ani pea'ai, onajaya yahue, ehuanase pea'ai a'a siijji! ¡A'a quea dejja tai pojji! ¡A'a quea nishehui pojji pea'ai! <sup>4</sup> ¡Esohui quea tai a'a mimijji pea'ai! ¡Shajjama' jayojja a'a mimijji! ¡Quea mimishi, quea mimijjequijea a'a mimijji! Jamaya quea tai. ¡Quea bihui nee ca ca Eyacuiñajji nijje mimicue! <sup>5</sup> ¡Bacue oe! Pea cojjoji, dejja quea tai pea'ai, quea aquiana nahuejo epana'yo bihuiajji jayojja poani pea'ai eyahuasijje edobiquijji pojjeama. Jesosa Quito nijje, Eyacuiñajji nijje pea'ai eba'ejji pojjeama eyajo, Jesosa ojjaña huoojeajji poanijo. Chama' dejja mimishija eba'ejji yajji eyajo. <sup>6</sup> Siajjejojji cuaa miya ba'e mee ca chana' quea mimishi. ¡Oya cuana a'a shajja'ajajji! Mimishi acanijo, shajjama' poanijo pea'ai Eyacuiñajjiya quea nee tii tii po mee caje'yo e'e jojo nei. <sup>7</sup> Jamajjeya ¡a'a mimishi cuana nijje jjapeequijji!

<sup>8</sup> Yahuajo miquianaya quea mimishi ba'ya poa pea'ai. Jjeya ca ca miya Jesosaja epeeji cuana poanijo ejiojji quea ja'ajje onijje poquiani. Jamajjeya ¡Jesosaja esohui jayojja jama quea ja'a nee acue! <sup>9</sup> E'e, Jesosa nijje jjapeequianijo ojjaña quea pame nee eseyaya aña. Jjashahuabaquiani quea ja'a nee pea'ai. Esohui e'e nei jayojja jama ba'yani pea'ai. <sup>10</sup> Quea pame nee eseya añaño, Eyacuiñajji quea bihui nee poani. Jamajjeya ¡jjashahuabaquicue Eyacuiñajji quea bihui nee epo meeji! <sup>11</sup> Jamajjeya shajjama' cuana quea mimishi poanijo, ¡onijje a'a quea mimishi pojji! ¡Oya cuana tecueacue jama ba'a: —Jamaya quea tai. ¡A'a quea mimishi pojji! —acue!

<sup>12</sup> Ohuaya quehuajje mimishi quea tai nee nee acani. ¡A'a mimishi cuanajo mimimim-ijji! ¡Cajaa acue! <sup>13</sup> Jesosaa shajjama' cuana jjabahuejjaqui meesahua cani; jama poani ba'a: —Coma ca quea tai; ¡a'a jamaya pojji! ¡Quea pame nee acue!

<sup>14</sup> Jiquio ecua cuaquijjiya mecajje ojjaña jeaja'a cani jayojja jama Jesosa Quitohua shajjama' cuana mimishi pajea mee'yo majje quea ja'a ba'e meesahua cani. Jamajjeya yahuajo nei nei jama sohuicuayame poa cuana ba'a:

“Shajjama' cuana, ¡jjashajja'ajjaquicue! ¡Eshahua nijje popajea'yocue! Quitohua miya quea ja'a nee ba'e meesahua caje'yo”.

Jamaya aca poa yahuajo nei nei.

<sup>15</sup> Jamajjeya ¡jjashahuaba neinei quicue quea ja'a nee eba'ejji! ¡Shajjama' cuana jayojja jama a'a ba'ejji! ¡Jesosaja esohui jayojja jama ba'ecue! <sup>16</sup> E'e, ¡jjea janobajjima nei chacochocho tiitiicue quea ja'a nee Jesosa Quitojo! ¡Jjea aje oe quea camaja, quea huiso cuana quea mimishi poani. <sup>17</sup> Jamajjeya ¡a'a shajjama' pojji! Eyacuiñajjiya miya sa cani ojaya echacojji epojji. Jamajjeya oya huohui'ajjacue jama ba'a: —Eyacuiñajji, ¿a'ya cuae eya miyaya chaco meeje so'o?

<sup>18</sup> ¡A'a jja oe huoojji! Chojja, ishi'ishianijo miquianaya quea tai nee poaje'yo. ¡Edojjoshahua Pameja esohui miquiana nijje jama acue! <sup>19</sup> ¡Jamaya esohui quea pame nee Eyacuiñajji mimicue! Jama acue ba'a: —Cua'a. ¡Eyacuiñajji nijje esohuicuaya!

E'e, Edojjoshahua Pameya sohuicuaya mee caniya ¡quea bihui nee Eyacuiñajji bihuiacue sohuicuayanijo! <sup>20</sup> Cuanaya Jesosa Quito esejaya Emeshi Mese nei poanijo, ¡Eyacuiñajji, esejaya Chii ai bihuiacue jama ba'a: —E'e Eyacuiñajji, jamaya. Miyaya quea pame nee atiitiaña —acue!

*Ehuohuijji yahue cuana huasijje, ehuanase cuana huasijje pea'ai*

<sup>21</sup> ¡Jiquio pea esohui bacue! Jama ba'a: Jesosa Quitoja esohui shajja'ajjajji poanijo ¡ba'ecue quea bei nee miquea huapa pojjeama cuana nijje!

<sup>22</sup> Ehuanase cuana, ¡shajja'ajjacue mo! Miquiana Jesosaja epeeji poanijo ¡miquea yahue shajja'ajjacue oe! <sup>23</sup> E'e, Jesosa Quito Emeshi Mese nei oe nei poanijo, ojaya esohui shajja'ajja cani ojaya epeeji cuaa. Jamaya miquea yahue mi huoojeajji poani pea'ai. ¡Oya shajja'ajjacue! Cuanaya Jesosaa ojaya epeeji cuana jaahuana cani quea pame nee. Jesosaa jayojjaya yahue cuaa ehuanase cajaanahuana cahua pea'ai. <sup>24</sup> Jesosa Quitoja epeeji e'e jojo nei cuaa ojaya esohui jayojja jama atiitii cani. Jamaya ehuanase cuaa, ¡miquea yahue shajja'ajja tiitiicue!

<sup>25</sup> Yahue cuana, ¡shajja'ajjacue mo pea'ai! Jesosa Quito ojaya epeeji cuana quea jea nee poanijo mano'yonaje onaja mimishi cuijea'yoyji. Jamaya yahue cuaa, ¡miquea ehuanase quea jea nee acue! ¡Quea ja'a nee jaahuanacue! <sup>26</sup> E'e, Jesosa Quito ojaya epeeji cuana mimishi cuijea'yo majje Eyacuiñajji nijje miminaje jama ba'a: —Jiquio cuaa ecuea esohui shajja'ajja canaje. Peaa oya cuana besa mee canaje mijo pea'ai —poanaje.

<sup>27</sup> Jamaya poanaje Jesosa, ojaya epeeji e'e jojo nei cuana quea pame nee nee epo meeji ba'a: mimishi'ama, quea tai pojjeama, quea ja'a nee nee epo meeji. <sup>28</sup> Jamajjeya yahue cuaa, ¡miquea ehuanase ba'e meesahuacue! E'e, miya quea pame ba'e sa poanijo ¡miquea ehuanase ba'e meesahuacue quea pame! Ehuanase ba'e meesahuajjajo miya quea pame ba'eje pea'ai. <sup>29</sup> E'e, dejja cuana quea nee nee nequi sa po ajja. Chojja. Bobi, daqui pea'ai sa'ajja cani quea pame eba'ejji. Quiajjaya Jesosaa jaahuana cani ojaya epeeji cuana. <sup>30</sup> Jamaya oya poani eseya ojaya eyami jayojja nei nei poanijo. <sup>31</sup> Jamajjeya Eyacuiñajjiya esohui yahuajo nei etehue'yo jama poa ba'a:

“Joya. Yahue ojaya ehuanase nijje ba'yanijo oya cuana oe nei poani, beca pojjeama. Jamaya oya cuana ba cani Eyacuiñajjiya. Jamajjeya yahueya ojaya ehuanase oe nei cajaanahuana cahua quea pame nee. Quea jea nee nee ca'a cahua; oja chii, oja enaese quea jea pishana ca'a cahua”.

Jamaya yahuajo nei Eyacuiñajjiya tehue mee ca poa.

<sup>32</sup> Eyacuiñajjiya esohui quea pame nee nee yani Quitojo, ojaya epeeji cuanajo pea'ai jama ba'a: Jesosa Quito ojaya epeeji cuana nijje oe nei jayojja poani, quea huiso pojjeama, oya jayojja jjashahuabaquime poani pea'ai. Jamaya Eyacuiñajjiya oya cuana ba cani oe nei jayojja. <sup>33</sup> Oya jayojjaya yahueya, miya quea pame nee ba'e sa poanijo ¡miquea ehuanase quea jea nee nee acue! ¡Ba'e meesahuacue quea pame nee! Ehuanaseya, ¡miquea yahue shajja'ajjacue oe!

## 6

*Ehuohuijji esho'i cuana huasijje echii mese cuana huasijje pea'ai*

<sup>1</sup> Esho'i cuana, miya Emeshi Mese neiya, Jesusaja epeeji poanijo ¡shajja'ajjacue miquea chii, miquea enaese pea'ai! Jamaya quea pame. E'e, Eyacuiñajjiya jama aca poa ba'a:

<sup>2</sup> “¡Miquea chiiya, miquea enaeseya pea'ai huohui cani jayojja jama acue! <sup>3</sup> Jamajjeya eyaya miqianaya ba'e meeje quea bihui nee, quea pame nee. Quea huiso shequiaja ba'e meeje”.

Jamaya Eyacuiñajjiya huohui ca poa.

<sup>4</sup> Echii meseya, enaeseya pea'ai, ¡miquea ebacua cuana jaahuanacue quea pame nee! ¡A'a onijje quea tecue nee pojji! ¡A'a quea quene nee po meeji! ¡Oya cuana huohuicue Emeshi Mese neiya, Jesusaja esohui! ¡Miquea esohui shajja'ajja meecue!

*Ehuohuijji echacojji cuana huasijje echaco meeji cuana huasijje pea'ai*

<sup>5</sup> Echacojji cuana, ¡miquea echacomeejjiya esohui jayojja jama pocue! ¡Chacocue quea pame nee ojaya! Jamajjeya Jesosa miqianajo quea bihui nee poaje. <sup>6</sup> Miya chacochoani quea pame nee miquea echaco meejiya ba canijo o quea bihui po meeji. ¡Ojaya ba jjimajo a'a quea huea pojji! ¡Chacocue quea pame nee Jesosa Quitohua miya ba canijo! Jesosa miquea echacomeejji poani. <sup>7</sup> E'e, ¡miquea echacomeejjiyo chacocue quea bihui nee! Pea cuanaja yajjiyo quea pame chacochoanijo Jesosa quea bihui nee po mee añña miyaya. <sup>8</sup> E'e, ¡jiquio esohui shajja'ajjacue! Beca cuaa chaco cani ojaya echacomeejjiyo. Pea cuanaja echacomeejji chama'. Quea pame nee chacochoanijo Emeshi Mese neiya, Jesusaa ojjaña sosequia caje'yo quijje eyajo.

<sup>9</sup> Echacomeejji cuaa, ¡sosequiacue miquea echacojji cuana ma ona chacochoconaje sosejje! ¡A'a quea mete po meeji! ¡A'a tecuea neineijji! Echaco meejiya Emeshi Mese nei yani eyajo. Echacojjiya Emeshi Mese nei yani eyajo pea'ai, Jesosa bajjani. Eyacuiñajji mijo jjashahuabaquiani jayojja jama ojjaña cuanajo jjashahuabaquiani pea'ai. Quea pame nee chacoñaño, ojjaña sosequia caje'yo quijje eyajo, echacojji, echacomeejji pea'ai.

*Eyacuiñajjiya eseya quea ca'a nee po mee cani*

<sup>10</sup> ¡Pea esohui shajja'ajjacue! ¡Jjapee neineiquicue Jesosa nijje! Jamajjeya ohuaya miqianaya ojaya epeeji quea ca'a po mee caje'yo. Oya quea ca'a nee nee poanijo miqianaya quea ca'a po mee caje'yo pea'ai. <sup>11</sup> Eyacuiñajji nijje mimicue pea'ai jama ba'a: —Eyacuiñajji, ¡eya miquea ejjashahuabaquijji jayojja jama ameesahuacue quea ja'a nee!

Jamajjeya ohuaya miqianaya Edosiquiana nei, Satanasa bajjani jeabichajea mee caje'yo, ohua dasia sa acanijo. <sup>12</sup> Pea cuaa quea mase cuaa ecuana Jesosa nijje jjapeequi pajea mee'yo sa acani. Oya cuana dejja pojjeama, Edosiquiana, eshahua cuana pea'ai. Jjeya quea camaja eshahua epeeji cuana quea tai acanijo. E'e, eshahua cuaa huoojea cani ojaya epeeji cuana, ojjaña quea mimishi poani pea'ai ecuana dasiaa nisho, ecuana jeabichajeaa nisho pea'ai. <sup>13</sup> Jamajjeya ¡Eyacuiñajji nijje mimicue jama ba'a: —Eyacuiñajji, ¡eya miquea ejjashahuabaquijji cuana jayojja jama ameesahuacue! —jamaya acue!

Jamajjeya eshahuaa jeabichajea sa acanijo, miqianaya quea ca'a poaje; eshahua jeabichajeaje'yo Eyacuiñajjiya miya asahua canijo. E'e, Eyacuiñajjiya miqianaya ojaya epeeji quea ca'a po mee caje'yo. <sup>14</sup> ¡Quea ja'a nee jjashahuabaquicue! ¡Esohui e'e nei ba neineicue! Jiquio ecua Shomano sohuinanohua ejjacomayijji quijji yii cani

ejjaquecuaquijji jama jayojja ¡esohui e'e nei ba neineicue quea ja'a nee epojji! Cuanaya sohuinanohua baa daqui quea moo ese'ojje huosho cani onaa equecua'yo poani jjejojo jama jayojja ¡quea ja'a nee, mimishi'ama ba'ecue eshahuaa napa cajje miya ejjadasia meequijji pojjeama! <sup>15</sup> Jiquio ecua ejiojji shejee, sapato, sohuinanohua huosho cani acuishajo mete'ama epojji jayojja jama ¡Eyacuiñajji esohui ba neineicue mete'ama esohui huohuijji! <sup>16</sup> ¡Eyacuiñajji esohui jayojja jama atiitiicue pea'ai! Jiquio ecua sohuinanohua copocopo baa emejo huosho cani ejjaqueyaquijji, iña cani ejjaquecuaquijji, emeje edahua huo'ohuo'o icui nequiñajji jayojja jama ¡Eyacuiñajji esohui jayojja jama atiitiicue Edosiquianaja miya edasiajji pojjeama! <sup>17</sup> Cuanaya jiquio ecua sohuinanohua ejaahuoja ca'a, baajee sapa iya cani jama onaja sapa jaja jjima yajji jayojja jama ¡esohui esapajo huanacue miquianaya quea tai ejjashahuabaqui meeji pojjeama eshahua, Jesusaja epeeji nei poanijo! Jamaya pea'ai jiquio ecua sohuinanohua baa se beca iña cani pea jajajeabichajeajji jama jayojjaya ¡Eyacuiñajji esohui mimicue eshahua mimicuiajejanobiajeajji, Edojjoshahua Pameya amesahua canijo! <sup>18</sup> Jamajjeya ¡Eyacuiñajji nijje mimicue jama ba'a: —Eyacuiñajji, ¡eya miquea epeeji quea ca'a nee mo po meecue eshahua cuana, eshahua epeeji cuana pea'ai mimicuiajejanobiajeajji! ¡Edojjoshahua Pame huoojeacue minijje emimi tiitii meesahuajji! —jamaya oe acue!

Jamajjeya ¡jjashahuaba neineiquicue quea ja'a nee! ¡A'a Jesusa nijje jjapeequi pajea'y-ojji! ¡Ojjaña Jesusaja epeeji cuanajo mimi huicha'ahuicha'acue jama ba'a: —Eyacuiñajji, ¡ojjaña Jesusaja epeeji cuana jaahuanacue! ¡Quea ja'a nee po meecue! —jamaya acue!

<sup>19</sup> Jamajjeya Eyacuiñajji nijje mimicue ejo jama ba'a: —Eyacuiñajji, Pabo miquea esohui huohui canijo ¡huohui meesahuacue mete'ama! Oya huohui meesahuacue, Eyacuiñajji, jama ba'a: “Jesusaa Jodio pojjeama cuana ojaya epeeji po mee cani onijje eba'e tiitii'yojji eyajo. Maya yahuajo onajaya ba jjima” —jamaya mimicue Eyacuiñajji nijje ejo.

<sup>20</sup> E'e, Eyacuiñajjiya eya huoojea canaje Jesusaja esohui huohuiya. Ma esohui quea pame nee huohuiñaajo, dejja quea mase cuaa eya iña majje jeanobiajea canaje. Jamajjeya ¡Eyacuiñajji nijje mimicue ejo esohui quea pame nee Jesusajo mete'ama ehuhui meesahuajji!

*Pabo mimiani Eyacuiñajji nijje ojjaña Epesojo ba'e jaahuanajji*

<sup>21</sup> ¡Pea esohui bacue! Dejja bajjani Tiquico yani ecuanaja nijje. Oya ecuanaja quea jea nee nee, ecuea epeeji nei nei. Ohuaya ecuanaja Jesusaja esohui huohui sahua cani. Miquiana huasijje poqui majje ohuaya huohui caje ejo, ma eya aña jayojjaya huohui caje'yo pea'ai.

<sup>22</sup> E'e, eyaya oya huoojeaña miquiana huasijje ecuanajo huohuiya. Oya shajja'ajja majje miquianaya yeno'ama poaje ecuanajo.

<sup>23</sup> Eya quea huiso mimiani Eyacuiñajji nijje miquianajo jama ba'a: —Eyacuiñajji, miya ecuanaja Chii ai. Jesusa Quito, miya ecuanaja Emeshi Mese nei. ¡Ojjaña miquea epeeji cuana Epesojo ba'e quea bei nee po meecue! ¡Oya cuana ojjaña miquea epeeji cuana quea jea nee po meesahuacue! ¡Oya cuana miquea esohui jayojja jama ba'e meesahuacue quea ja'a nee pea'ai! —jamaya eya poani.

<sup>24</sup> Jamajjeya esejaya Emeshi Mese nei Jesusa Quito quea jea tii tii poanijo, ¡Eyacuiñajjiya miquianaya caba'e meesahua cahua!

Mahuiso ecuea esohui. Eyaya Pabo bajjaniya esohui tehuejeyonaje. Apoa.

## PABOJA ETEHUE'YO PINIPO CUIÑAJJI YASIJJE FILIPENSES

*Pabohua Shomajo ejeanobia aniya esohui tehue cani Jesusaja epeeji cuana Pinipo cuiñajjijo ba'e yasijje*

<sup>1</sup> Ecuanaaya bajjani Pabo, Timoteo pea'ai. Ecuanaaya Jesosa Quitoja echacoji cuana ojaya yajjijo. Ecuanaaya esohui tehueña ojjaña miquiana huasijje, Eyacuiñajjija epeeji cuana Pinipo cuiñajjijo ba'e yasijje, Eyacuiñajjija esohui huohuiji cuana huasijje, o pejeje ca'ajji yasijje pea'ai tehueña ecuaaya. <sup>2</sup> Eyacuiñajji ecuanaja Chii ai. Jesosa Quito ecuanaja Emeshi Mese nei. Ohuaya miquianaya cajaanuana cahua quea pame nee. Mimishi cuana cuijea'yo majje quea bei capo mee ca'yahua pea'ai.

*Pabo Eyacuiñajji nijje mimiani Jesosa Quitoja epeeji*

<sup>3</sup> Miquianajo jjashahuabaqui'yo majje ecuanaja Eyacuiñajji bihuia tiitiaña. <sup>4-5</sup> Yahuajo Jesosa Quitoja esohui shajja'ajja jeahuajo miquianaaya eya esohui huohui meesahua'y-onaje, jjeja nei pea'ai. Jamajjeya eya Eyacuiñajji nijje miquianajo mimi tiitiani quea bihui nee poani. <sup>6</sup> Ecuea eba e'e jojo nei Eyacuiñajjiya miquianaya ojaya esohui jama ba'e meesahua coo ca'ya poa yahuajo. Jesosa Quitoja epeeji quea ca'a pishana po mee ca'yonaje. Jjeja quea ca'a nee pishana po mee ca'yani. Quijje ca ca Jesosa Quito poe o'oyajo ohuaya miquianaya quea ca'a nee nee ba'e tiitii mee caje'yo eyajo onijje. <sup>7</sup> Eya miquianajo jjashahuaba tiitiquiani miquiana quea jea nee neejojo. Jamaya quea pame. E'e de, eyaya Jesosa Quitoja esohui janobajjima nei huohuiañajo, miquiaaya eya huohui meesahuanaje. E'e, dejja cuanaja eya iña jjimahuajo, jeanobiajea cajo pea'ai, miquianaaya aquiana eba'e meesahuajji huoojeanje e que. <sup>8</sup> Jesosa Quitohua miquianaya quea jea nee acani, jamaya eyaya miquianaya aña. Jamajjeya miquianaya eyaya baqui sa aña, de. Eyacuiñajjija eba eya e'e jojo nei mimiani.

<sup>9</sup> Eya mimiani Eyacuiñajji nijje miquianajo jama ba'a: —Eyacuiñajji, Jesosa Quitoja epeeji cuana pea epeeji cuana quea jea pishana acani. ¡Oya cuana pea cuana quea jea nee nee amecue, miyaya! ¡Quea huiso mijo ba meesahuacue pea'ai! ¡Quea jjashahuabaqui ja'a nee po meecue pea'ai quea pame nee eba'eji, mimishi'ama! <sup>10</sup> Jamajjeya Quitohua poe o'oya majje oya cuana etecueajji pojjeama. <sup>11</sup> E'e Eyacuiñajji, Jesosa Quito onijje ba'yanijo, ohuaya ojaya epeeji cuana quea pame nee ba'e meesahua cani mijo. Jesusaja epeeji cuana quea pame nee acanijo, dejja cuana miya bihuia caje'yo. Ojjaña ba caje miya, Eyacuiñajji ca ca oe quea ca'a nee nee, quea pame nee nee pea'ai poani —jamaya eya, Pabo mimiani Eyacuiñajji nijje miquianajo, Pinipo meshijo ba'ejo.

*Jesosa Quito ecue yami dojjojo nequi*

<sup>12</sup> Ecuea epeeji cuana, ¡bacue jiquio esohui! Dejja cuana eya iña majje quea huesha dojo canaje jeanobiaa. Quea camaja ejo poanaje. Jamatii, pea meshi cuana huasijje pea dejja quea huiso cuana huasijje Jesosa Quitoja esohui huohui'yonaje eyaya. Jamaya quea pame nee. <sup>13</sup> E'e, eya jiquiacua ye canaje cuana emeshi meseja ejaquecuajjiji quea huiso huasijje, pea cuana emeshi meseja equi quea quemojo ba'e yasijje. Onaaya ba canaje eya eme' jeyo'yo nequi Jesosa Quitoja esohui huohuijijijo onaja jeyo'yo. <sup>14</sup> Eya jiquiojo nequianijo, beshahua nei ojjaña Jesosa Quitoja epeeji cuana onijje jjapee neineiquiani e'e jojo nei. Jjeja ca ca onaaya janobajjima nei Eyacuiñajjija esohui huohui cani mete'ama.

<sup>15</sup> Jesosa Quitoja epeeji cuana, oe pojji cuana Jesusaja esohui huohui cani ejo quea quene poaniya jjejojo. Jjamimicuiajea nobiajeaqui sa poani pea'ai. Beca cuana ca, cho. Jesosa Quitoja mimiani quea bihui nee, quea bei pea'ai. <sup>16-17</sup> Ohuaya Jesosa Quito, eya pea'ai quea jea nee acanijo huohui cani. Onajaya eba Eyacuiñajjiya eya huoojea ca'yonaje Jesosa Quitoja esohui huohuiya. Janobajjima nei huohuiañajo, pea cuana ba caje Jesosa

Quitoja esohui e'e nei. Pea cuaa enijje quea bei pojjeamaa, Jesosa Quitoja esohui huohui cani quea tecue, emaimaijji jayojja. Ma dejja cuaaya aje oe pea cuana eya pajea mee'yo sa acani, onijje jjapeequi mee'yo sa acani. Eya ejeyo'yo nequijo quea camaja pishana. Ohuaya eya quea camaja nee nee po mee sa acani. <sup>18</sup> E'e de, beca dejja cuaa quea tecue nee huohui cani. Pea cuaa quea bei huohui cani. ¿Apiojji shai Jesosa Quitojo huohui cani? Jamatii, Jesosa Quitojo huohui canijo, eya quea bihui nee nee.

<sup>19</sup> E'e, miquianaya ejo mimiani Eyacuiñajji nijje; Jesosa Quitohua, Edojjoshahua Pameya pea'ai eya quea ca'a po mee cani quea pame nee. Jamajoya quijje eya quea pame nee ba'eje'yo. Jamaya ecuea eba. Jamajjeya eya quea bihui nee po tiitiije'yo.

<sup>20</sup> Eya jjashahuaba tiitiquiani Jesosa Quitojo echacojji. Jesosa Quitojo chaco sa neinei poani quea pame nee nee. Jamajjeya eya bicho'ama ecuea eba'ejjijo. E'e, jjeyahua nei, quijje pea'ai eya eshe nequi ba'e sa poani Quito nijje mete'ama nei. Eshe nequije pojja'a; quecua caje'yo cuaa pojja'a. Jamatii. Eya quea pame, mete'ama ba'yanijo, pea cuaa Quito bihuia caje'yo. <sup>21</sup> Eya jjashahuabaquiani jama ba'a: —Eya eshe nequianijo, Jesosa Quito ecue eyamijo nequi. Quijje, mano'yo majje eya onijje ba'eje'yo eyajo quea pame nee nee. Jiquiojo ca ca quea pame pishana eya ba'yani. <sup>22</sup> E'e de, jiquio meshijo ba'yanijo eyaya Jesosa Quitoja esohui huohuije'yo pea cuana huasijje. ¿Achejo shai ba'e sa poani eya jjeya? Jiquiojo pojja'a. Eyajo Jesosa Quito nijje pojja'a. Cua'a de. <sup>23</sup> Jjeyahua nei jiquio meshijo ba'e sa neinei poani eya. ¿Achejo shai? Eyajo Jesosa Quito nijje eba'ejji ca ca oe e'e jojo nei ecuea quea pame nee nee. <sup>24</sup> Jamatii, eya jiquio meshijo ba'e tiitiani, quea pame nee poaje miquianaya. <sup>25</sup> E'e nei jamaya ecuea ejjashahuabaqui'yojji. E'e, eya ba'eje'yo jiquio meshijo. Jamaya ecuea eba. Eya miquiana nijje nequije Jesosa Quitoja epeeji quea ca'a nee epo meesahuajji, quea bihui nee Jesosa Quito ba meesahuajji pea'ai. Jamaya e'e jojo nei. <sup>26</sup> Jamajjeya miquianaaya Jesosa Quito bihuiaje'yo e'e jojo nei enijje quijje e miquiana que poquiyajo.

<sup>27</sup> E'e, eya epoquijji pojjeama pojja'a miquiana baa; baquije pojja'a mi ba'ajjaa. ¡Jamatii! Esohui quea pame nee Jesosa Quitojo miquianajaya eba. Jamajjeya ¡jamaya ba'ecue quea ja'a nee! Jamajjeya eyaya shajja'ajjaje miquianaya Jesosa Quitoja epeeji cuana ojee quea ca'a nee ba'yani. Ojee janobajjima nei huohuiaña Eyacuiñajjija esohui Jesosa Quitojo pea'ai. <sup>28</sup> Dejja mimishi cuaa miquianaya napa cajo, ja'a oe quea mete pojji! Chojja, miya ca ca mete'ama tiitii anianijo, ma dejja mimishi cuaa ba caje jama ba'a: Quijje Eyacuiñajjiya oya cuana napa tiitii caje'yo cuaquijo. Oya cuana ba mee caje pea'ai miquianaya ca ca ba'e tiitii mee caje'yo eyajo, ohuaya. <sup>29</sup> E'e, Eyacuiñajjiya miquianaya jjapeequi meesahua cani Jesosa Quito nijje. Pea cuana, cho. Jamaya pea'ai ba'a: Jesosa Quito nijje ba'yanijo, pea cuaa miquianaya napa caje. Jamaya Eyacuiñajjija eba. E'e, ohuaya miquianaya nahue caje peaa napa cajo. ¡Jamatii quea bihui pocue! <sup>30</sup> ¡Jjeya miquianaya, e jayojjaya janobajjima nei eshahuaja epeeji cuana jeabichajecue! E'e, jjeyahua nei eyaya jamaya Jesosa Quitojo huohuiaña tii. Jamaya miquea eba.

## 2

### *Jesosa Quito quea bei, quea ca'a nee nee pea'ai*

<sup>1</sup> ¿A'a Jesosa Quitohua miquianaya quea bihui nee po mee cani? Ohuaya quea jea nee nee acanijo, ¿a'a miquianaaya pea cuana quea jea nee añña pea'ai? ¿A'a Edojjoshahua Pame nijje jjapeequiani miquianaya? ¿A'a pea dejja cuana nijje miquianaya quea bei? ¿A'a pea dejja ba'e meesahuaña pea'ai? ¡E'e jojo nei jamaya oe pocue! <sup>2</sup> Jamajjeya ¡miquianaaya iña oe che quea bihui nee nee po meecue, de! Ojjaña oe ojee jjashahuabaquicue Jesosa Quitoja ejjashahuabaquijji jayojjaya jama ba'a: ¡Ojee jjapeequicue quea bei nee! ¡Pea cuana quea jea nee acue miquianaaya! E'e, ¡ojee Jesosa Quitojo jjashahuabaquicue! <sup>3</sup> ¡A'a mimijajijji pea quea bicho po meeji! ¡A'a jamaya pojji miquianaya! Chojja. ¡Pea cuana nijje quea bei nee nee pocue! Jjashahuabaquicue jama ba'a: —Eya quea pame pishana; pea cuana quea pame nee.



<sup>4</sup> Miquianaya quea pame nee ba'e sa poani. Jamaya quea pame. ¡Pea cuana a'a paje'yojji! ¡Ba'e meesahuacue quea pame nee pea'ai! <sup>5</sup> ¡Jesosa Quitoja ejjashahuabaquijji jayojja jama jjashahuaba tiitiquicue! <sup>6</sup> Jama ba'a: Oya, Jesosa Quito Eyacuiñajji jayojjaya tii tii poa. Jamatii Eyacuiñajji jayojja pojjeama po'yo majje meshijo nequi yeno'ama Jesosa Quito poa. <sup>7</sup> E'e, Jesosa Quito nequi tiitii ajja poa eyajo, Eyacuiñajji jayojjaya jama pojjeama poa. Oya Eyacuiñajji yajji ojava echacojji meshi yasijje poe sa poa. Jamajjeya eseya esho'i cuaya poa jama Jesosa Quito cuaya pohua, yamijji. <sup>8</sup> Oya ba'e'yonaje dejja cuana jayojja. Eyacuiñajjiya oya huoojea canaje dejja cuana jayojja mano'yome epojji. Jamajjeya oya dejja cuana jayojja jama quecua mee'yome acanaje cuaa. E'e nei acui ecueata'apeejo Jesosa Quito mano'yonaje dejja mimishi jayojja. <sup>9</sup> Jamajjeya Eyacuiñajjiya oya shequi mee ca o'oyanaje. Eyahuasijje dojosohuaqui ca'yonaje. Jesosa Quito oe nei ojjaña Emeshi Mese nei po mee ca'yonaje. <sup>10</sup> Jamajjeya quijje ojjaña eyajo ba'eya, dejja eshe cuana pea'aiya, ojjaña yahuajo emano'yo pea'aiya, ojjaña eshahua cuana pea'aiya Jesosa Quito bihuia caje'yo ecui'oshajjajo nequiya. <sup>11</sup> Ojjaña cojja ba majje ojjaña huohui caje'yo Jesosa Quito e'e jojo nei Emeshi Mese oe nei quea ca'a nee nee po tiitiani. Jamajjoya Eyacuiñajji, Jesosa Quitoja Chii bihuia caje'yo, ojjaña nei neiya. Jamaya poaje'yo.

#### *Jesosa Quitoja epeeji ejjijji jayojja*

<sup>12</sup> Jamajjeya ecuea epeeji e'e jojo nei cuana, ¡shajja'ajjacue ecuea esohui! Yahuajo miquiana nijje nequihua eya miquiaaya ecuea esohui shajja'ajjanaje. Jjeya eya quea huesha nee nequi. Miquiana nijje enequijji pojjeama. ¡Jamatii jiquio ecua eyaya huohuiaña jama atiitucue! ¡A'a paje'yojji! Eyacuiñajjiya miquianajaya mimishi cuijea ca'yonaje, jamajjeya ¡shajja'ajja tiitucue oe ojava esohui! ¡Miquianaya oe jjashajja'ajjaquicue quea bei! <sup>13</sup> E'e de, Eyacuiñajjiya miquianaya ba'e meesahua cani ojava ejjashahuabaquijji jayojja. Jamajjeya miquianaya ojava esohui jama ba'e sa poani. Ohuaya miquianaya jjashahuabaqui meesahua cani quea bihui nee ojava ejjashahuabaquijji jayojja.

<sup>14</sup> Eyacuiñajji chacochoani ¡a'a panajajijji! ¡A'a jja oe jjamimicuijjea nobiajjeaquijji! <sup>15</sup> Jamajjeya miquianaya pea cuanaja etecueajji pojjeama. Eyacuiñajji ebaqua cuana quea pame nee miquianaya poaje. Eshahuaja epeeji cuana ca ca quea tai nee nee, sijjepojji nee nee quea chipi nee nequi. E'e nei miquiana quea bojea ba'yanijo, majameta beca jjinequi jama poaje. Jamajjeya ojjaña dejja quea mimishi cuaa ba caje miquianaya Jesosa Quitoja epeeji e'e jojo nei. <sup>16</sup> E'e, miquiaaya ona huasijje Eyacuiñajji esohui huohuiaña Jesosa jayojja eba'ejji, yahuajo jama pojjeama eba'ejji huohuiaña. Miquianaya jamaya poanijo, eya quea bihui nee poaje'yo Jesosa Quito poe o'yajo. Ma pojja eyaya baje ecuea echaco, ecuea esohui pea'ai miquianajaya paje'yo jjima pojja'a. <sup>17</sup> Jamaya poaje pea'ai pojja'a ba'a: Yahuajo nei nei Eyacuiñajji epeeji cuaa aquiana dahuajea caninaje Eyacuiñajji bihuiajji. Aquiana Eyacuiñajji quea bihui nee epo meejji jayojja jama jjeya e'e pojja'a eya manoj'e'yo miquianaya Jesosa Quito nijje ejjapeequi meesahuajji. Jamajjeya Eyacuiñajji quea bihui nee poaje miquianajo. E'e de, eya pea'ai miquianajo quea bihui nee poani. <sup>18</sup> ¡Jamajjeya quea bihui nee pocue enijje!

#### *Pabohua Timoteojo, Epamonitojo pea'ai huohui cani*

<sup>19</sup> Eyaya Timoteo huoojea sa aña miquiana que. E'e pojja'a Jesusaa, esejaya Emeshi Mese neiya eya Timoteo huoojea mee caje jjeyahua nei. Timoteohua miquiana ba majje eya huohui cahuaje e quea bihui pojji. <sup>20</sup> E'e, ecuea ejjashahuabaquijji quea pame nee jayojja jama Timoteo oe nei jjashahuabaquiani miquianajo. Ohuaya miquianaya quea pame nee Jesosa Quito nijje ba'e meesahua sa neinei acani. <sup>21</sup> Pea dejja cuana ca ca oja aquianajo jjashahuaba tiitiquiani. Jesosa Quitoja echacojjijo jjashahuabaqui sa po ajja. <sup>22</sup> Timoteohua Eyacuiñajji esohui quea pame nee huohui canaje. Jamajjeya miquianajaya eba oya quea pame nee. Esho'yahua oja chii nijje chaco ca poa jayojja jama acanaje Timoteohua enijje; esohui Jesosa Quitoja huohui canaje, Timoteohua.

<sup>23</sup> Jamajjeya jjeyahua nei eyaya oya huoojea sa aña miqiana que. ¿Yajja shai dejja cuaa eya acaje'yo jiquiojo ba'ecaa? Maya shajja'ajja majje eyaya Timoteo huoojeacuajje miqiana que. <sup>24</sup> Eya jjashahuabaquiani jama ba'a: Eseyaya Emeshi Mese neiya eya poqui meesahua caje miqiana que, Pinipojo ba'e yasijje quijje pishana pojja'a.

<sup>25</sup> Eya jjeya miqianajo jjashahuabaquiani. Jamajjeya eyaya Epamonito huoojeaje miqiana que. Oya ecue chahua jayojja Jesosa Quito nijje jjapeequianijojo. Ohuaya Jesosa Quitoja esohui eya huohui meesahua canaje. Yahuajo miqianaya oya huoojeanaje e que aquiana quiaa, e jaahuanaa pea'ai. <sup>26</sup> Oya miqianaya ba'o'oya sa poani, de. Miqianaaya shajja'ajjanaje oya quea mano nee nee poanaje. Miqianaya ojo quea yeno poso, oya quea yeno poanaje. <sup>27</sup> E'e, oya quea mano poanaje. Beshahua nei mano'yonaje. Eyacuiñajjiya oya huaquia meesahua ca'yonaje, de. O emano'yo jojjemo eya quea yeno nee nee pome. Eyacuiñajji e quea yeno nee nee nequi mee sa po ajja. <sup>28</sup> Jamajjeya jjeya eya o huoojea sa neinei poani miqiana que. O ba'o'oya majje quea bihui nee miqianaya poaje. Miqianaya ojo quea bihui nee poanajo, eya pea'ai quea bihui nee poaje. <sup>29</sup> Jamajjeya Jesosa Quito nijje jjapeequianijo Epamonito miqiana que poe o'oyajo, ¡onijje jama mimicue ba'a: —¡Mi poe'yajo eya quea bihui nee! —acue!

Quea pame nee poani Epamonito. Pea oya jayojja poanajo pea'ai ¡shajja'ajjacue! <sup>30</sup> Oya Jesosa Quitoja chacochoanijo beshahua nei mano'yonaje. E'e, quea camaja nee nee, de. Jamatii ohuaya chaco tiitii canaje mete'ama nei. Miqianaaya e que poe ajjaa jjejojo Epamonito huoojeanaje e chacosahuaa.

### 3

#### *Esohui e'e jojo nei quea pame nee*

<sup>1</sup> Ecuea epeeji nei cuana, jjeya eyaya pea esohui tehueje miqiana que. ¡Emeshi Mese neijo quea bihui nee pocue, miqianaya! Yahuajo eyaya esohui miqiana que huohuinaje. Jjeya oyaya tehue o'oyaña quea bihui nee miqiana Jesosa Quitoja epeeji quea ca'a nee nee epo meejji. Jamajjeya pea cuaa miqianaya edasajji pojjeama. <sup>2</sup> Jodio esohui huohuijji nisho cuana ¡a'a shajja'ajjajji! Oya edasajji cuana, iñahua quea mase jja'ijjiacquiani jama. Jesosa Quito nijje jjapeequi ajja. Miquea cuiishasha jee biso nei jehusejjajea mee sa acani huohuime acani ca ohua. <sup>3</sup> Cuiishasha biso nei jehusejjajea mee majje maya dejja cuana jjapee nishoquiani Eyacuiñajji nijje. Eseyaya ca ca Eyacuiñajji epeeji e'e jojo nei. E'e, Edojjoshahua Pameya eseya Eyacuiñajji bihuia meesahua cani. Jamajjeya eseya quea bihui nee nee jjapeequiani Jesosa Quito nijje. Ohuaya, Jesosa Quitohua ca ca oe eseya mimishi'ama po mee caje'yo. <sup>4</sup> Pea dejjaa aje oe Jodio etiiquianaja esohui jama amajje jjashahuaba quehuaquiani jama ba'a: —Eya Eyacuiñajji epeeji quea pame nee.

Chojja de. Yahuajo Jodio etiiquianaja esohui jama quea huiso eyaya a'yonaje. Ma esohui quea huiso nee nee yahuajo jama amajje ¿a'a eya quea pame nee? Chojja. <sup>5</sup> Yahuajo aje eyaya jama anaje ba'a: Jodio etiiquianaja esohui etehue'yo jama acanijo, eya me oeje pea beca peejjima cahuime, 8 cahuime etiijo, ecuea cuiishasha biso nei jehusejjajea ca'ya poa cuaa. Eya Isaeni dejja. Jamaya ecue chii poa. Ecuea etiiquiana Bejami bajjani. Jamajjeya eya Jodio nei Bejami cuana nijje. Jamajjeya eya Emeo esohui mimiani. Eya Jodio etiiquianaja esohui jayojja jama poanaje pea Jodio esohui huohuijji Paniseo bajjani cuana nijje. <sup>6</sup> Jodio etiiquianaja esohui cuana quea jea nee nee poa ecuea. Jamajjeya eyaya Jesosa Quitoja epeeji cuana janobajjima nei napanaje; etiiquianaja esohui a sa po ajjajojo napanaje. E'e, eyaya ma esohui cuana jayojja jama aneinei'yonaje yahuajo. Jamajjeya Jodio dejja cuana enijje mimijaji jjima poa. <sup>7</sup> Jodioja esohui quea huiso shajja'ajja majje eya jjashahuaba taiquinaje jama ba'a: —Eya quea pame nee nee ba'e —poso jjabaquinaje.

Jjeya ca ca Jesosa Quitoja esohui ya'yojji eyaya Jodioja esohui cajaa a'yonaje. <sup>8</sup> E'e, eya jjashahuabaquiani jama pea'ai ba'a: Ojjaña aquiana quea pame cuana oe pojji sosejje, sosema', shabo jama cajaa aña. Jesosa Quito ca ca aquiana quea sose huiso nee nee jayojja

eyaya baña. Jamajjeya aje iña oe jama jjashahuabaquime poani ba'a: Jesosa Quito, ecuea Emeshi Mese nei nije jjapeequianijo eya quea pame nee nee poani. Quea sose huiso nee nee eyaya Jesosa Quito baña. <sup>9</sup> E'e, Jesosa Quitoja epeeji poanijo, eya ohuaya onijje nequi tiitii mee caje'yo; quea boejea'yo nee nequi mee caje'yo. Jodioja esohui cuana jama amajje eya quea boejea'yo pojjeama. Eya Jesosa Quito nije e'e jojo nei jjapeequianijo, ohuaya eya quea boejea po mee ca'yani. E'e, Eyacuiñajjiya huohui cani: —Ojjaña Jesosa Quitoja epeeji cuana eyaya quea boejea'yo po mee yaña.

<sup>10</sup> E'e, yahuajo Jesosa Quito ecuea eba pishana poanaje. Jjeya eya o ba neinei'yo sa poani. Eyacuiñajji quea ca'a nee poanijo ohuaya Jesosa Quito shequi mee ca o'oyanaje. Jamajjeya eya o jayojjaya caba'e mee ca'yahua. Ma ecua oya napa ca poa jama jayojjaya eya acaje'yo pea cuaa, Jesosa nije jjapeequianijo mo cuia caje'yo cuaa pojja'a o jayojjaya. ¡Jamatii mo ca'a ca'yahua! <sup>11</sup> Jamajjeya jjeya eya jjashahuabaquiani jama ba'a: —Eyacuiñajjiya eya shequi mee caje o'oya. Jesosa Quito nije ba'e tiitii mee caje'yo Jesosa Quito jayojjaya, quea boejea ba'eje'yo onijje tii.

#### *Pabohua Jesosa Quitoja chaco tiitii cani*

<sup>12</sup> Eya Jesosa Quito jayojja jama pojjeama. Oya quea pame nee nee, quea ca'a nee nee pea'ai. Eya quea ca'a pishana. Jjeya eyaya janobajjima nei chacoaña Jesosa Quitoja. Jamajjeya ohuaya eya ojaya epeeji quea ca'a po mee cani. E'e, Jesosa Quitohua eya jjeshe'yo majje onijje jjapee tiitii meequi ca'yani. <sup>13</sup> Ecuea epeeji cuana, ¡shajja'ajjacue! Ecuea ejjashahuabaquiji jama ba'a: Eya Jesosa Quitoja epeeji quea ca'a nee, quea pame nee nee pojjeama. Eya ca ca jamaya poani ba'a: Eya jjashahuabaqui tiitii ajja ecuea esohuijo ma eya yahuajo anajejo. Jjeya eya jjashahuabaquiani jama ba'a: Jesosa Quitohua eya chaco meesahua caje janobajjima nei ojo. Jamaya eyaya a sa neineiaña. <sup>14</sup> Eyaya janobajjima nei chaco tiitiiaña Jesosa Quitoja. Jamajjeya quijje Eyacuiñajjiya ecuea echaco sosejje sosequia caje'yo. Jamaya acaje Jesosa Quitohua eya eyahuasijje iyaa'yo majje onijje eba'e tiitii'yojji.

<sup>15</sup> Jamajjeya eseya, Jesosa Quitoja epeeji quea ca'a cuana Jesosa Quitoja ej-jashahuabaquiji jayojja jama jjashahuabaquiani tii tii. E'e pojja'a miquianaya jamaya po ajja. Eyacuiñajjiya miquianaya jjashahuabaqui mee caje'yo quea ja'a nee o jayojjaya. <sup>16</sup> E'e nei, eseyaya Eyacuiñajjiya esohui quea huiso ba huicha'a huicha'aña. Jamajjeya ¡ojaya esohui jayojja jama ejja'a tiitiiqui!

<sup>17</sup> Ojjaña ecuea epeeji cuana, ¡e jayojja ba'ecue! ¡Pea dejja cuana babacacue; ma ecua eyaya miquiana nije nequiya anaje jamaya ca'a cahua cuaa! ¡Onaya oe jamaya atiitiicue, miquianaaya! <sup>18</sup> Yahuajo eyaya miquianaya huohui majamajanaje pea dejja cuana quea mimishi nee nee poanijo. Jjeya quea yeno nee eyaya huohuije o'oya ma dejja cuanajo. Jesosa Quito acui ecueata'apeejo mano'yonaje. Oya cuana ca ca Jesosa Quitoja esohui jayojja jama po ajjajo o quecua'yojji epo jayojja poani. <sup>19</sup> Jamajjeya ma dejja cuana cuaqui yasijje poquije'yo. Ojaya aquiana huisojo jjashahuaba tiitiiquiani. Eyacuiñajjiyo jjashahuabaqui sa po'yo ajja. Oya cuana oja mimishijo bicho'ama, quea bihui nee poani. E'e, jjashahuaba tiitiiquiani quea tai. <sup>20</sup> Eseyca ca ca jamaya ba'e ajja; Jesosa Quito nije eyajo ba'e tiitiije'yo. Jesosa Quitohua eshahua eseya mesena pajea mee ca'yonaje. E'e de, esejaya Emeshi Mese nei Jesosa Quito poeje o'oya. O poe o'oyajji eseyaya ishoa'ajjaña quea bihui neeya. <sup>21</sup> Eseyaya eyami ca'a'ama. Jesosa Quitohua poe o'oya majje esejaya eyami quea ca'a nee nee panacuaji caje'yo ojaya eyami jayojja jama quea ca'a nee nee epo'yojji tii tii. Jamaya po mee caje'yo ohuaya quea ca'a nee nee poanijo. E'e, quea ca'a nee poanijo ohuaya ojjaña huoojea tiitii cani. Ojjaña aquiana cuiña cani, Jesosa Quitohua.

## 4

#### *Pea esohui cuana eba'ejji quea pamejo*

<sup>1</sup> Jamajjeya ecuea epeeji cuana, ¡jjapee tiitiiquicue quea ca'a nee! Miquianaya ecuea quea jea nee. Baqui o'oya sa neinei poani. Miquianajo eya quea bihui nee. Miquianaaya

quea pame nee Jesosa Quitojo añajo maya ecuea esosequia'yojji jayojja. Jamajjeya ecuea etehue'yo jayojja jama poanijo, miquianaya esejaya Emeshi Mese neijo quea ca'a ba'eje. Eyaya miquianaya quea jea nee nee añã.

<sup>2</sup> Epona cuana Emonia bajjani, Sinitique pea'ai, ¡shajja'ajjacue mo, che! Emeshi Mese nei Jesosa nijje jjapeequianijo ¡a'a jjamimicuiajea nobiajeaquijji! <sup>3</sup> Ecuea pea epeeji nei, ¡miyaya ma epona beca quea bei ba'e meesahuacue! Ohuaya yahuajo eya Eyacuiñajjija esohui huohui meesahua neinei ca'yonaje. Dejja Cuemete bajjaniya esohui huohui meesahua neinei ca'yonaje pea'ai. Quea huiso ecuea pea epeeji cuana esohui huohui meesahua ca'yonaje pea'ai. E'e, Eyacuiñajjiya ojaya esohui etehue'yojo eyajo oja bajjani cuana tehue ca'yonaje ona ba'e mee tiitii'yojji.

<sup>4</sup> Miquianaya Jesosa nijje jjapeequianijo ¡quea bihui nee po tiitiicue! ¡E'e jojo nei quea bihui nee po tiitiicue! <sup>5</sup> ¡Quea bei nee pocue ojjaña cuana nijje! Jamajjeya ojjaña cuaa ba caje esejaya Emeshi Mese nei poeje jjeyahua nei pojja'a. <sup>6</sup> ¡A'a quea mete pojji! Chojja. ¡Mimicue Eyacuiñajji nijje! ¡Aquiana sa poanijo oya oe huohuicue! ¡Eyacuiñajji bihuiacue pea'ai! <sup>7</sup> Jamajjeya Eyacuiñajjiya miquianaya quea bei nee nee po mee caje. Quea bei nee nee miquianaya poaje Jesosa Quitojo. Ojjaña dejja cuana jamaya jjashahuabaqui ajja. E'e, Jesosa Quito nijje jjapeequianijo, ohuaya miquianaya quea quijijji jaji nee po mee caje. Mete'ama jjashahuabaqui meeme acani pea'ai.

<sup>8</sup> Epeeji cuana, jjeya pea esohui oe pojji eyaya miquianaya huohuije. ¡Esohui e'e jojo neijo jjashahuaba tiitiiquicue ojjaña Eyacuiñajjija esohui quea pame neejo pea'ai! ¡Jashahuabaquicue pea dejja cuanaja eba'ejji quea pame neejo pea'ai! Ejjashahuabaquijji quea bei epo'yojji, quea bihui nee epo'yojji pea'aijo ¡jjashahuabaquicue! Echacojji quea pame nee neejo, Eyacuiñajjiya dejja cuana quea bihui nee po mee canijo pea'ai ¡jjashahuaba tiitiiquicue! E'e, jamaya ojjañaja quea jea nee. <sup>9</sup> Ecuea esohui shajja'ajjanaje miquianaaya. Ecuea esohui etehue'yo banaje pea'ai. ¡Jamaya miquianaya po tiitiicue! Ecuea echaco quea pame banaje. ¡Jamaya miquianaaya atiitiicue pea'ai! Jamajjeya Eyacuiñajji minijje nequi tiitiije; quea bei po mee caje.

*Pabo ojaya epeeji Pinipojo ba'e cuana nijje quea bihui poani*

<sup>10</sup> Yahuajo nei miquianaaya aquiana eba'e meejji huoojeanaje e que, sosema'. Yahuajo pishana quiojaya miquianaaya pajea'yo jjima añã. Jamatii aquiana huoojea jjima poa. Jjeya eya ba'e sahua o'oyaña. Jamajjeya eya quea bihui nee nee esejaya Emeshi Mese nei nijje, Jesosa Quito nijje jjapeequiani. <sup>11</sup> ¡A'a jjashahuabaquijji eya mimiani eya aema' poanijo! Eya jjashahuabaqui tiitii ajja aquiana eba'e meejji. Oe pojji aquiana ecuea poanijo, jamatii. <sup>12</sup> E'e, aema' poanijo, jamatii. Eya quea bei. Ecuea aquiana quea huiso yanijo, jamatii eya quea bihui. E'e pojja'a ecuea eba'ejji quea camaja poaje o'oya. E'e pojja'a camaja'ama poaje. Jamatii. Eya mimije Eyacuiñajji nijje jama ba'a: —E'e Eyacuiñajji, ecuea eba'ejji quea pame.

E'e, quea jjejejo, quea shoe pea'aijo, aema' poanijo, aquianajji pojja'a poanijo jamatii eya quea bihui. <sup>13</sup> Jamajjeya quea camaja poanijo jamatii eya quea bihui nee Jesosa Quito-hua eya ba'e meesahua canijo. <sup>14</sup> E'e, ecuea eba'ejji quea camaja poanijo, miquianaaya eya ba'e meesahuanaje quea jea nee. Jamaya quea pame.

<sup>15</sup> Yahuajo Eyacuiñajjija esohui quea pame miquiana huasijje, Pinipojo ba'e yasijje huohui coo majje eya Masenonia meshijo nequi poquinaje. Ma pojja, quijje pea'ai miquiaaya nei eya aquiana quianaje. Jesusaja epeeji cuana pea cuiñajji ba'ea aquiana quia'yo jjima. Maya miquianajaya eba. <sup>16</sup> E'e, eya Tesanonicajo chacochoanijo eba'ejji quea camaja ecuea poanaje. Jamajjeya miquiaaya aquiana huoojea huicha'a huicha'anaje e que. <sup>17</sup> Miquianajaya aquiana ehoojeajji eya jjashahuabaqui ajja poanaje. Ecuea ejjashahuabaqui'yojji ca ca jiquio jama ba'a: Miquiaaya aquiana e que quia'yonaje sosema'. Jamajjeya Eyacuiñajjiya miquianaya quea ja'a nee po mee caje. E'e, quijje pea'ai quea huiso sosequia caje'yo ohuaya ma miquiaaya anaje sosejje. <sup>18</sup> Miquiaaya Epamonito huoojeanaje e que aquiana quiaa. Jamajjeya jjeya quea huiso nee ecuea aquiana eba'ejji

yani. Ba'eje eya quea pame nee. E'e, ma aquiana equia'yojji aquiana Eyacuiñajji yasijje ebihua'yojji jayojja, quea shiye nee nee jayojja, Eyacuiñajji quea bihui nee nee epo meeji. <sup>19</sup> Eseyaya Eyacuiñajjija aquiana quea pame nee, quea huiso yani, de. Jamajjeya e'e jojo nei ohuaya miqianaya ba'e meesahua caje. Jamaya poaje ohuaya miqianaya Jesosa Quito nijje jjapeequianijo.

<sup>20</sup> Ojjaña Jesusaja epeeji cuaa Eyacuiñajji, esejaya Chii ai eyajo cabihua tiitii cahua jjeya nei, quiije pea'ai. Jamaya capoahua.

*Esohui quea bihui epo meeji*

<sup>21</sup> Ojjaña Jesusaja epeeji cuana quea bihui nee huohui'ajjacue jama ba'a: —¿Achajja acuae quiana so'o, de? —ecuanajaya ebajji.

Jesosaja epeeji cuaa enijje nequiya miqianaya huohui'ajja cani jama ba'a: —¿Achajja acuae quiana so'o de? —onajaya ebajji.

<sup>22</sup> Jesusaja epeeji cuana emeshi mesejo chaco canijo, ojjaña cuana jiquio tiijo pea'aiya miqianaya huohui'ajja cani jama ba'a: —¿Achajja acuae quiana so'o, de? —onajaya ebajji.

<sup>23</sup> Eseyaya Emeshi Mese nei Jesosa Quito miqianajaya eyami dojjojo nequi. ¡Ohuaya miqianaya quea pame nee cajaanahua cahua! Mahuiso ecuea esohui.

Eyaya Pabohua tehuejeyonaje. Apoa.

## PABOJA ETEHUE'YO CONOSA CUIÑAJJI YASIJJE COLOSENSES

*Pabohua Shomajo ejeanobia aniya esohui tehue canaje Jesusaja epeeji cuana Conosa cuiñajji ba'e yasijje*

<sup>1</sup> Eya Pabo, Jesosa Quitoja huoojea'yo ojaya esohui huohuiya. Jamaya Eyacuiñajji sa poanaje. <sup>2</sup> Timoteohua esejaya epeeji enijje esohui tehue cani miquiana huasijje jama ba'a: Ma Eyacuiñajji epeeji cuana huasijjeme Conosa cuiñajji ba'e, ecuanaja epeeji e'e jojo nei Jesosa Quito nijje jjapee neinei quiani yasijje.

¡Esejaya Chii aiya, Eyacuiñajjiya miquianaya cahaahuana cahua quea pame nee, quea bei capo mee cahua pea'ai!

*Pabohua Eyacuiñajji bihuia cani*

<sup>3</sup> Eyacuiñajji, esejaya Emeshi Mese nei Jesosa Quitoja Chii eyaya bihuia tiitiaña onijje miquianajo mimianijo. <sup>4</sup> E'e, pea cuaa eya huohui cani jama ba'a: —Jesusaja epeeji cuaa Conosajo ba'ecaa Jesosa Quito shajja'ajja cani tii. Ojjaña Eyacuiñajji epeeji cuana quea jea nee acani pea'ai.

<sup>5</sup> E'e, miquianaya esohui e'e jojo nei Jesosa Quitoja yahuajo pishana shajja'ajja coo majje onijje jjapeequinaje. Jjashahuabaquiani eba'e tiiti'yojji quea pame nee eyajo onijje pea'ai. E'e jojo nei Eyacuiñajjiya jamaya acaje'yo miquianajo. <sup>6</sup> Jiquio esohui e'e jojo nei Jesosa Quitoja ojjaña meshi yasijje huohui cani. Jamajjeya quea huiso dejja ba'e mee cani quea pame nee, miquiana jayojjaya. Jamaya miquianaaya esohui shajja'ajja coo majje jjabahuejjaqui'yonaje. Jamajjeya jjabahuejja neinei'yonaje ba'a: Eyacuiñajjiya dejja cuana jaahuana cani e'e jojo nei. <sup>7</sup> Dejja Epapasi bajjani ecuanajaya quea jea nee. Ohuaya Jesosa Quitoja esohui huohui ca'yonaje miquiana que. Oya ecuaana jayojjaya Jesosa Quitoja yajji chacochoani. Ecuaana sohuihuohui sahuajji quea pame nee pea'ai. <sup>8</sup> Ohuaya ecuaana huohui canaje jama ba'a: —Edojjoshahua Pameya Jesusaja epeeji cuana Conosajo ba'e pea epeeji cuana quea jea nee po mee cani —Epapasi poanaje.

*Pabo miminaje Eyacuiñajji nijje*

<sup>9</sup> Epapasija esohui quea pame nee miquianajo shajja'ajja'yo majje ecuaana Eyacuiñajji nijje mimi huicha'a huicha'ani jama ba'a: —Eyacuiñajji, ¡ecuanajaya epeeji cuana ba neinei meesahuacue ache echacojji shai mijo onajaya poaje! Edojjoshahua Pameya oya cuana miquea esohui caba meesahua cahua quea pame nee, cajjashahuabaqui meesahua cahua quea ja'a nee epojji pea'ai. <sup>10</sup> Jamajjeya ¡oya cuana Jesosa Quitoja esohui jayojja jama ba'e tiitii mee'yocue! Jamaya poanijo Jesosa Quito quea bihui nee nee poaje onajo. ¡Quea pame nee nee chaco tiitii meecue Jesosa Quitoja pea'ai! E'e Eyacuiñajji, ¡miquea epeeji mijo jjabahuejja tiitii meequicue pea'ai! <sup>11</sup> Miya ca ca oe quea ca'a nee nee, Eyacuiñajji. Jamajjeya ¡miquea epeeji cuana Conosajo ba'e jjapeequi meesahuacue quea ca'a nee nee! Jamajjeya oya cuana miquea esohui pajea'yo ajja tii tii dejja quea mase cuaa napa cajje, yeno'ama poaje. <sup>12</sup> Eyacuiñajji, ecue Chii ai, oya cuana quea boeja'yo po mee'yonaje miyaya. Jamajjeya quijje oya cuana miquea pea epeeji cuana nijje ba'e tiitii meeje'yo quea ja'a nee minijje eyajo. E'e Eyacuiñajji, jamajjeya apoa.

<sup>13</sup> Yahuajo eseya Edosiquiaa napa ca'yonaje. Quea mase nee, quea mimishi nee nee. Jjeya ca ca esejaya Chii aiya eseya jjeshe ca'yonaje. Jamajjeya oja Bacua oe nei esejaya Emeshi Mese nei quea ca'a poaje'yo tii. Oja Bacua Jesosa Quito Eyacuiñajji quea jea nee nee poani tii tii. <sup>14</sup> Jama ba'a: Jesosa Quitohua esejaya mimishi cuana cuijea'yo majje Edosiquiana quea ca'a nee eseya mesena pajea mee ca'yonaje.

*Jesosa Quito esejo mano'yonaje*

<sup>15</sup> Dejjá cuanaja Eyacuiñajji ecojja bajji pojjeama, jjacobjaba meequi ajja. Jamatii oja Bacua Jesosa Quito Eyacuiñajji jayojja nei neiya, o jayojjaya jama poani pea'ai. Jamajjeya Jesosa Quito ba majje Eyacuiñajji esejaya eba. Oya, Jesosa Quito ojjaña e'aquiana mese. Ojjaña aquiana cuana oja pana poa. <sup>16</sup> E'e, Eyacuiñajjiya Jesosa Quito nijjeya ojjaña aquiana cuana pana ca'ya poa, jiquio aquiana ba'a: Ojjaña aquiana ojjaña meshi cuanajo pana ca'ya poa; ojjaña aquiana eyajo pana ca'ya poa pea'ai. Aquiana cuana ecojjaja ebajji, pea aquiana ecojjaja ebajji pojjeama pea'ai pana ca'ya poa jiquio ba'a: Eyacuiñajjiya esohuidojojji quea ca'a nee pana ca'ya poa, eshahua cuana quea huiso, quea mimishi po jjimahuajo, pana ca'ya poa pea'ai. E'e, Eyacuiñajjiya Jesosa Quito nijjeya ojjaña aquiana, ojjaña tii pana ca'ya poa Jesosa Quitoja ya'yojji. <sup>17</sup> E'e, oya Jesosa Quito ba'e tiitiya poa ojjaña aquiana pana jjimahuajo. Ojjaña aquiana nequi tiitii mee cani quea pame nee, Jesosa Quitohua. <sup>18</sup> Ojjaña ojaya epeeji cuanaja mese poani tii tii pea'ai. Ohuaya ma epeeji ojaya huapa pojjeama jayojja jama ojee jjapeequi meesahua cani, ojjaña. O jayojja ba'e meesahua cani. Mano'yo majje Jesosa Quito ebonei shequi o'oyanaje. Jamajjeya oya oe nei quea ca'a nee nee poani tii tii. <sup>19</sup> E'e, oja Bacua Jesosa Quito o jayojja poani tii tii, Eyacuiñajji quea bihui nee nee poani. <sup>20</sup> Yahuajo dejjá cuana quea mimishijo Eyacuiñajjiya ojjaña aquiana cajaa aca'ya poa. Jesosa Quito acui ecueata'apeejo ba'e na cuayaqui'yonaje. Mano'yonaje. Jamajjeya Eyacuiñajjiya mimishi cuana cuijea caje'yo. Jamajjeya quea bei po o'oyanaje ojjaña oja pana cuana nijje eyajo, meshi cuanajo anica cuana nijje pea'ai.

<sup>21</sup> E'e, miqianaya yahuajo quea mimishi poanijo, quea jjashahuabaqui tai poanijo pea'ai Eyacuiñajji nijje jjapeequi ajja. Quea huesha nee poquiquehuani jayojja poanaje. <sup>22</sup> Jesosa dejjá jayojja yamijji nequinaje. Jamajjeya Jesosa Quito esejaya mimishi cuanajo mano'yonajejo, Eyacuiñajjiya eseya ojaya epeeji cuana po mee ca'yonaje. Jamajjeya Jesosa Quitohua eseya Eyacuiñajji yasijje poqui mee caje'yo mimishi'ama, quea bojea epo'yo pea'ai. Jamajjeya Eyacuiñajji ese nijje quea bei poaje eyajo, ca ojaya esohui jama ba'e tiitiinajejo, Jesosa Quitoja esohuijo jjashahuaba tiitiinajejo pea'ai. <sup>23</sup> Jiquio esohui shajja'ajja majje ja'a pajea'yojji pea'ai! Quea huiso dejjaa quea huiso meshijo ba'eya jiquio esohui shajja'ajja cani eseyaya jayojjaya.

### *Jesosa Quitohua ca oe Pabo huoojea canaje esohui huohuiya*

Jesosa Quitoja esohui ojjaña dejjaa shajja'ajja canaje ojjaña meshijo. Eya ca ca iña e'e jojo nei Eyacuiñajjiya esohui huohuiji; Jesosa Quitoja esohui huohuiaña. <sup>24</sup> Jesosa Quitoja esohui eya huohuiyajo, pea cuaa eya jeyo majje jeanobiajea canaje quea huiso cahuijo; quea nee. Jamatii eya quea bihui nee poani. Yahuajo Jesosa Quito quea nee nee poa. Jjeya eya quea nee pishana poani miqiana Jesusaja esohui jayojja ba'e meesahuajji. E'e pojja'a quijje Jesosa jayojja eya quea nee nee poaje. Dejjá cuaa eya napa cajje eya quea ca'a poajo, Jesusaja epeeji cuana quea ca'a poaje pea'ai. <sup>25</sup> E'e jojo nei Eyacuiñajjiya eya huoojea ca'yonaje ojaya esohui huohuiya ojaya epeeji cuana huasijje. Jamaya miqianaya jjapeequi meesahuaña Jesosa Quito nijje. Ojjaña Jesusaja esohui huohuiaña pea'ai. Jiquio esohui eseya Eyacuiñajjiya ba meesahua cani. <sup>26</sup> Jiquio esohui dejjá cuanaja quea quehua yahuajo nei poa. Ba mee jjima poa. Jjeya ca ca Eyacuiñajjiya ojaya epeeji nei cuana Jesosa Quitoja esohui ba meesahua cani quea ja'a nee. <sup>27</sup> Jamajjeya jjeya Eyacuiñajjiya ojjaña ojaya epeeji cuana, Jodio pojjeama cuana pea'ai ba mee sa acani ojaya esohui Jesosa Quitojo. Ma esohui quea pame nee nee jama ba'a: Jesosa Quito esejaya eyami dojjojo nequi tiitiyani. Jamajjeya eseya jjashahuabaquiani onijje eyajo enequi tiiti'yojji. <sup>28</sup> Ojjaña Jesosa Quitoja esohui ecuaaya huohuiaña quea ja'a nee ojjaña huasijje. Ojjaña nei nei jjabahuejjaqui meeaña ojjaña Jesosa Quitoja epeeji quea ca'a nee epojji. E'e, jamaya poaje Jesosa Quito poe o'oyajo. <sup>29</sup> Miquianaya Quitoja epeeji quea ca'a nee epojji eyaya janobajjima nei esohui huohuiaña Jesosa Quitoja. Jesosa Quito ecuea eyami dojjojo quea ca'a nee nequi. Ohuaya eya esohui ba neinei meesahua cani miqiana huasijje ehuhuiji.

## 2

<sup>1</sup> ¡Bacue jiquio! Eya janobajjima nei jjashahuabaqui majje Eyacuiñajji nijje mimi neineiiani miquianajo Conosajo ba'e yasijje. Mimi neineiiani Jesosa Quitoja epeeji cuana Naonisea cuiñajjijo ba'e yasijje pea'ai, Jesosa Quitoja epeeji cuana ecuea ba jjima cuana huasijje pea'ai. Jamatii eya jjashahuabaquiani onajo pea'ai. <sup>2</sup> Jamajjeya eyaya ojjaña miquianaya Jesosa Quitoja epeeji cuana quea ca'a nee po meesahuaje'yo. Miquianaya pea cuana nijje jjapeequi meesahuaje'yo e'e jojo nei pea'ai, esohui quea pame nee Jesosa Quitojo jjabahuejjaqui meesahuaje. Quea bei nee jjashajja'ajjaquije. E'e, jjeya ojjaña cuana esohui Jesosa Quitoja Eyacuiñajjiya ba meesahua caje'yo quea ja'a nee. Yahuajo ca maya ba mee jjima poa. <sup>3</sup> Jesosa Quitoja eba ojaye nei Eyacuiñajjija ejjashahuabaquijji, ojjaña tii. Onijje jjapeequianijo, Eyacuiñajjija ejjashahuabaqui'yojji quea ja'a nee ba meesahua cani Jesosa Quitohua. <sup>4</sup> ¡Ecuea esohui etehue'yo ba neineicue miquiaaya! Pea dejja cuana siajje poani Eyacuiñajjijo ¡a'a shajja'ajjajji! Dasia ca chana' mi. <sup>5</sup> E'e, eya ejeanobia ani. Jamajjeya miquiana nijje eya enequijji pojjeama. Jamatii eya jjashahuaba tiitiquiani miquianajo, miquiana nijje nequi jayojjaya. Ecuea eba miquianaya Jesosa Quito nijje jjapee neineiquiani quea pame nee, ojaya esohui jayojja jama poani pea'ai. Jamajjeya eya quea bihui nee nee poani miquianajo.

*Jesosa eseya o jayojja ba'e meesahua caje'yo*

<sup>6</sup> Jamajjeya miquianaya Jesosa Quito nijje ebionei jjapeequi'yonajejo oya miquea Emeshi Mese nei quea pame nee poanaje. Jamajjeya ¡ba'ecue ojaya epeeji nei! <sup>7</sup> Jamajjeya ¡Jesosa Quitoja epeeji quea ca'a nee oe pocue! ¡Ojaya esohui ba tiitiicue! ¡Ojaya esohui e'e jojo neijo jjashahuaba tiitiicue pea'ai! E'e, jamaya pea dejjaa miquianaya huohui canaje. Eyacuiñajji nijje jamaya mimi tiitiicue: —E'e Eyacuiñajji, jamaya miquea esohui quea pame nee nee.

<sup>8</sup> Dejja cuaa esohui e'e nei pojjeama huohui cani miquianaya. Quea quehua nee, etiiquiana cuanaja esohui. Jesosa Quitoja esohui jayojja jama pojjeama, quea ja'a nee pojjeama. ¡A'a shajja'ajjajji! Dasia caje'yo cuaa mi.

<sup>9</sup> Jamajjeya ¡bacue jiquio! Oya Jesosa Quito eseya jayojja yamijji poa. Jamatii oya Eyacuiñajji nei poa. <sup>10</sup> Jesosa Quito nijje jjapeequianijo, Eyacuiñajjiya eseya ba'e tiitii mee caje'yo Jesosa Quito jayojja epo'yojji. E'e, Jesosa Quito Emeshi Mese nei oe nei quea ca'a nee nee. Ojjaña eshahua cuanaja mese, Eyacuiñajjija esohuidojojji cuanaja mese pea'ai quea ca'a pishana, de.

<sup>11</sup> Ojaya etiiquianaja esohui jama Jodio dejja cuaa cuiishasha jehuissejjajea cani. Jamaya huohui jjima acani Jesosa Quitohua. Onijje jjapeequianijo, ohuaya miquianajaya mimishi pajea mee ca'yani, miquianajaya ejjashahuabaqui'yojji quea mimishi chama'yo po mee ca'yani. <sup>12</sup> Jesosa Quito mano'yajo dejja cuaa ohuajea ca poa. Eyacuiñajjiya oya shequi mee ca o'yanaje. Jesosa Quito ohuajea ca poa jayojja jamaya peaa miquianaya enajo besa mee canaje Eyacuiñajjijo. Jamajjeya Eyacuiñajjiya Jesosa Quito shequi mee ca o'yanaje jayojja jamaya ohuaya miquianaya ba'e meesahua caje'yo Jesosa Quito jama epo'yojji, ojaya esohuijjashajja'ajjaquianijo. <sup>13</sup> Yahuajo Jodio pojjeamaja Eyacuiñajjija esohui miquianajaya ba jjima. Quea mimishi nee nee poanijo miquea edojjoshahua cuaqui yasijje dobiqiu'yo quiaye poanaje. Jjeya ca ca Eyacuiñajjiya miquianaya ba'e tiitii mee caje'yo Jesosa Quito nijje mimishi cuana ojjaña tii cuijea ca'yonajejo. <sup>14</sup> Eseyajje oe Moisesija esohui etehuejo jjashajja'ajjaqui ajjajo, Eyacuiñajjiya tehue mee canaje jama ba'a: “Ojjaña quea mimishi nee nee” poanaje. Jamatii jojaya Jesosa Quito esejaya mimishijo mano'yonaje acui ecueata'apeejo. Jamajjeya Eyacuiñajjiya e'e jojo nei esejaya mimishi cuana cuijea neinei ca'yonaje. <sup>15</sup> E'e, Jesosa Quito acui ecueata'apeejo mano'yonaje. Jamajjeya eshahua cuana ca'a'ama po mee ca'ya poa, Eyacuiñajjiya. Jamaya ojjaña eshahua mese cuana jeabichajea ca'ya poa. Eyacuiñajjiya ojjaña ba mee canaje eyajo anica.

*¡A'a esohui e'e nei pojjeama shajja'ajjajji!*



<sup>16</sup> Jamajjeya ¡bacue oe! Pea cuaa miqúanaya tecuea cani ojjaña bobi miqúiaa ijjiñaño, pea e'ishijji ishianajo pea'ai. ¡A'a oya cuana shajja'ajjajji! Jodio cuanaja esohui jama ba'a: Ojee e'ijjiájji pojajajo, epojja chacocho mée ajja pea'ajjo huohui cani; ¡a'a oya cuana shajja'ajjajji! <sup>17</sup> Yahuajo ma esohui cuanajo dejja cuana jjashahuaba meequí ca'yonaje ma Jesosa Quitohua quiije poe majje acañaje. ¡Jjeya nei Jesosa Quitojo jjashahuabaquicue! Oya ca ca oe nei quea pame nee. <sup>18</sup> Pea dejja cuaa jjacahuibaquí majje miqúanaya Eyacuíñajji esohuidojojji bihuia mee sa acani bobima' ani tii. Ma dejja cuana ojaya ejjashahuabaquíjji quea taijo mimi huicha'a huicha'ani. Jama sijje pome poani ba'a: — Ecuea ejjashahuabaquíjji quea ja'a nee; onajaya quea ja'a pojjeama —poani.

Tecuea canijo ca oe ¡a'a jjashajja'ajjaquíjji! Eyacuíñajji nijje mi poqui pajea mee ca chana'. <sup>19</sup> Ma dejja cuana aje oe Jesosa Quito nijje, esejaya Emeshi Mese nei nijje jjapeequi pajea'yonaje. Eseyaya Emeshi Mese neiya Jesosa Quitohua ojjaña ojaya epeejji cuana jjabahuejjaquí mee cani ojee. Jama ba'a: Jesosa Quito ojjaña ojaya epeejji cuana nijje ese ejja jayojja poani. Ojjaña ojaya epeejji cuana Jesosa Quitoja eyami jayojja poani. Esapa jayojja esejaya Emeshi Mese nei Jesosa Quito poani. Jiquio ecua esapaa eyami poqui mee cani jayojja jama Jesosa Quitohua ojjaña ojaya epeejji cuana huoojea cani, jjabahuejja meequí cani ojee ejjapeequíjji. Jamaya Eyacuíñajji quea boti nee. Jamaya Eyacuíñajjiya ojjaña ojaya epeejji quea ca'a nee po mee sa acani. Eseyaya Emeshi Mese neiya Jesosa Quitohua ojjaña ojaya epeejji cuana ojee onijje jjabahuejja meequí cani; jamaya Eyacuíñajjiya ojjaña ojaya epeejji cuana quea ca'a nee po mee cani. Jamajjeya ojjaña ojee jjapeequi mee cani Jesosa nijje.

<sup>20</sup> Miquíanaya Jesosa Quito jayojja jama poanijo Jesosa Quitoja epeejji pojjeama cuanaja esohui quea quehua ¡a'a shajja'ajjajji! ¿Apiojji acuae jjeya maya esohui quea quehua shajja'ajja sa poani? Jesosa Quito nijje jjapeequianijo eshahuaaja epeejji pojjeama poani. <sup>21</sup> Esohui quea quehua jiquio jama ba'a: —Jiquio aquiana ¡a'a napajji! ¡A'a pea bobi cuana ijjiájji! ¡Pea e'ishijji a'a ishijji! —jamaya dejja cuaa huohui nisho cani.

<sup>22</sup> Jama pojjeama ca ca Eyacuíñajjiya esohui. Bobi cuana ijjiájeyo majje chama'yo tii poani. Joya miqúiaa napaña aquiana chama'yo tii poaje pea'ai. <sup>23</sup> E'e, jiquio dejja cuaa pea cuana dasia cani; ojaya esohui quea quehua quea ja'a poso acani cuaa. Jamajjeya pea cuana jjashahuaba quehuaquí majje oe pojji bobi ijjiájji jima acani. Pea'ai Jesosaja esohui jama ba'e sa po'yo ajja. Cho, quea ja'a pojjeama ba'yani. Jamaya poanijo dejja cuana quea mimishi jjashahuabaquí pajea ajja.

### 3

#### *Yahuajo quea tai ba'ya poa eba'ejji Jesosa Quito nijje quea pame*

<sup>1</sup> Eyacuíñajjiya Jesosa Quito ba'e mee ca o'oyanaje. Jamajjeya ohuaya miqúanaya ba'e mee caje'yo Jesosa Quito jayojja. Jamajjeya jjashahuaba tiitiquicue Jesosa Quitojo eyajo eba'ejji! Jama ba'a: Eyacuíñajjiya Jesosa Quito ojjaña huoojea'yojji quea ca'a nee nee po mee ca'yonaje. Oya Eyacuíñajjiya ebianeí mijijje ani. <sup>2</sup> E'e, jjashahuaba tiitiquicue oe Jesosa Quitojo! ¡Aquiana taijo oe a'a jjashahuabaquíjji! <sup>3</sup> Jama ba'a: Dejja emano'yojaa mimishi po'yo ajja. Jamaya miqúanaya jjeya emano'yo jayojjaya mimishi po sa po'yo ajja. Jesosa Quito Eyacuíñajji nijje nequí tiitiiani. Ohuaya miqúanaya jaahuana cani quea pame nee. <sup>4</sup> Jesosa Quito poe o'oyajo, eseya onijje nequí tiitiije'yo quea ja'a nee nee; o jayojjaya poaje'yo onijje jjapee tiitiquianijo. Jamajjeya oe jjashahuaba tiitiquicue Jesosa Quitojo!

<sup>5</sup> E'e, Jesosa Quito nijje jjapeequi majje jamaya ebioneí acue ba'a: ¡Ojjaña mimishi cuana oe pajea neinei'yocue! ¡A'a pea cojjojji pojji! ¡A'a jama jjashahuabaquímeja pojji! ¡A'a quea tai jjashahuabaquíjji! ¡A'a quea mimishi ba'e sa pojji! Onajaya aquiana ¡a'a quea jea bajji pea'ai! Quea dejja tai poanijo aje oe miqúanaya eyacuíñajji nisho bihuiajji jayojja poani, de. <sup>6</sup> Jiquio mimishi cuana jama atiitii canijo, Eyacuíñajjiya shajjama' cuana quea nee nee po mee caje'yo. <sup>7</sup> Jamaya aje oe miqúiaaya yahuajo mimishi ahuicha'a huicha'a'yonaje pea'ai onaaya acani jayojjaya. <sup>8</sup> ¡Jjeya ca ca pajea neinei'yocue ojjaña

mimishi cuana! Jamajjeya ja'a quea tecue nee nee pojji! ¡A'a quea quene nee nee pojji! ¡A'a quea mase nee nee pojji! ¡A'a pea nijje mimijajijji! ¡A'a quea tai mimijji!  
<sup>9</sup> E'e, miqianajaya eba'ejji quea mimishi yahuajo jama apajea'yonaajejo ja'a siajje pojji!  
<sup>10</sup> Jjeya miqianajaya eba'ejji quea pame nee po'yonaaje. Eyacuiñajjiya miqianaya ba'e meesahua cani quea boejea, o jayojja epojji, o ba neinejji epojji. Jamajjeya ja'a quea mimishi po'yojji!

<sup>11</sup> Jamajjeya Jesosa Quito nijje jjapeequianijo ojjaña ojaya epeeji cuana cajjapeequiahua pea nijje; pea jayojja oe capoahua. Jodio cuana ca ca Jodio pojjeama jayojjaya ca'a'ama; dejja ecuiishasha jehusejja'yo ca ca cuiishasha jehusejja jjima jayojja pea'ai, Jieno dejja pojjeama cuana, Sitinia dejja cuana pea'ai; echacojji sosema' ca ca dejja echacomeejjima' jayojja, ca'a'ama ojjaña. Jesosa Quito ca ca oe nei quea ca'a nee nee nequi tii tii. <sup>12</sup> E'e, Eyacuiñajjiya miqianaya babaca ca'ya poa ma ojaya epeejjime epojji. Ohuaya miqianaya quea jea nee nee acanaje pea'ai, Eyacuiñajjiya. Jamajjeya quea pame ba'ecue jiquio jama ba'a: ¡Aema' cuana ba'e meesahuacue! ¡Pea cuana nijje jjapeequicue! ¡Mase'ama oe pocue! ¡Quea bei oe pocue! ¡Tecue'ama pea'ai oe pocue! <sup>13</sup> ¡Ona nijje tecue'ama pocue! E'e pojja'a pea cuaa miqianaya quea mimishi acaje. ¡Jamatii ojaya mimishi pajea'yocue; ohuaya miquea mimishi capajea ca'yahua pea'ai! E'e, Jesosa Quitohua miqianajaya mimishi cuana cuijea ca'yonaaje; jamajjeya ¡miqianaaya oe pea cuanaja mimishi pajea'yocue! <sup>14</sup> E'e jojo nei ¡pea cuana quea jea nee acue! Jamaya poanijo miqianaya ojee quea ja'a nee nee ba'eje. <sup>15</sup> ¡Miqianaya oe quea bei nee nee ba'ecue Jesosa Quitohua miqianaya quea bei nee ba'e meesahua canijo! Miqianaya ca ca oe Jesosa Quitoja epeeji poani. Jamajjeya eseya jjapeequi mee caje'yo quea cojja bei epojji. Majoya miqianaya iyaa ca'yonaaje Eyacuiñajjiya. ¡Eyacuiñajji bihuicue pea'ai!

<sup>16</sup> ¡Ojjaña Jesosa Quitoja esohui cuana shajja'ajja tiitiicue! ¡Quea ja'a nee esohui esejaya epeeji cuana huasijje huohucue; shajja'ajjacue pea'ai! ¡Ojee jjabahuejjaqui meecue quea ja'a nee pea'ai! Eyacuiñajji bihuiañajo jama pocue ba'a: ¡Sohuicuayacue quea bihui nee Jesosa Quitojo! ¡Miqianaaya Eyacuiñajji bihuicue sohuicuayaniya pea'ai! ¡Quea quijijji bei nee pea'ai pocue Eyacuiñajji! E'e, ¡o jayojjaya jama ba'ecue! <sup>17</sup> Eseyaya Emeshi Mese nei Jesosa. Ojaya epeeji poanijo ¡ojjaña miquea esohui ojaya yajji acue! ¡Ojjaña miquea echaco ojaya epojji chacocue pea'ai! Jesosa Quitohua miqianaya jamaya ameasahua canijo, ¡Eyacuiñajji, esejaya Chii ai oe bihuicue!

*Eyacuiñajji esejaya eyamijo quea pame nequi*

<sup>18</sup> Jamajjeya ehuanase cuaaya, Jesosaja epeejiya, ¡yahue shajja'ajjacue! Jamaya miqianaya quea pame nee poaje. <sup>19</sup> Yahueya, ¡miquea ehuanase quea jea nee acue! ¡A'a oe onijje quea tecue nee pojji!

<sup>20</sup> Esho'i cuaa, Jesosaja epeeji poaniya, ¡shajja'ajja tiitiicue mique chii, miquea enaese pea'ai! Jamaya miqianaya poanijo, Jesosa Quito quea bihui nee poaje. <sup>21</sup> Echii cuaa, enaeseya pea'ai, ja'a jamatii tecuea huicha'ajji mique bacua cuana! Oya cuana quea yeno nee poaje miquiaa tecuea tiitii'yajje.

*¡Echacojji cuana, echacomeejji cuana pea'ai quea pame oe pocue!*

<sup>22</sup> Miqianaaya echacomeejji chacochoani ojaya yajji ¡miqianaja echacomeejji esohui jama chacomeya oe acue, ojjaña tii! ¡O ba majje a'a chaco nishojji! Cho. ¡E'e jojo nei quea bihui nee oe chacocue ojaya! ¡Jamaya oe acue miqianaaya! ¡Jesosa Quito oe quea jea nee eja'aqui! <sup>23</sup> Miqianaaya echacomeejji chacoñaajo Eyacuiñajji chacoña pea'ai. Jamajjeya ¡chaco neineicue Eyacuiñajji quea bihui nee epojji! <sup>24</sup> E'e, miqianajaya eba jama ba'a: Quijje eyajo esejaya Emeshi Mese neiya miquea echaco quea pame nee cuana sosequia caje'yo, ma ecua ohuaya huohui ca poa jayojjaya acaje'yo. E'e, miqianaya chacochoani Jesosa Quitojo, esejaya Emeshi Mese neijo. <sup>25</sup> ¡Bacue oe! Eyacuiñajji ojjaña shajjama' cuana napa caje'yo quea mimishi poani soseje. Ohuaya

ojjaña mimishi ba cani. Jamajjeya joya quea mimishi nee nee poani janobajjima nei napa caje'yo; joya quea mimishi pishana poani oe pojji napa caje'yo.

## 4

<sup>1</sup> Ojjaña echacomeeji cuaa, ¡shajja'ajjacue mo oe! Miquea echacoji cuana miquea yajjijo chacochoacoani ¡sosequiacue oya huiso tii! ¡Oya cuana oe jaahuanacue quea pame nee epojji! ¡A'a pajea'yoji miquea Emeshi Mese neiya eyajo aniya miya ba tiitii cani!

*Pea cuana Pabohua niñeshe'a cani*

<sup>2</sup> Epeeji cuana, ¡mimi majamajacue Eyacuiñajji nijje ojjaña pojja! ¡Huea'ama mimicue! ¡Oya oe bihuiacue onijje mimianijo! <sup>3</sup> ¡Eyacuiñajji nijje oe ojee mimicue ecuanajoya pea'ai! Jamajjeya ohuaya ecuanahuohui meesahua tiitii caje'yo esohui pame nee Jesosa Quitoja, ma onajaya yahuajo ba jjima. Ma esohui eya huohuiajoya, dejja mimishi cuaa eya iña majje jeanobiajea ca'yonaje. <sup>4</sup> Jamatii miquianaya ejo Eyacuiñajji nijje mimianijo, ohuaya eya Jesosa Quitoja esohui huohui meesahua caje'yo quea ja'a nee.

<sup>5</sup> Jesosa Quitoja epeeji pojjeama cuana nijje mimianijo ¡jjashahuaba neineiquicue quea ja'a nee! ¡Quea pame nee oe ona nijje po tiitiicue pea'ai! <sup>6</sup> ¡Quea bei, quea ja'a nee pea'ai mimicue Jesosa Quitoja epeeji pojjeama cuana nijje! ¡Jashahuaba neineiquicue onijje mimi jjimahuajo! Jamajjeya onaya Jesosa Quito ba meesahuaje'yo.

*Pabohua quea bihui nee esohui tehue canaje pea cuana huasijje*

<sup>7</sup> Dejja Tiquico bajjani Jesusaja epeeji, e jayojjaya Jesusajo chacochoacoani, ecuanajaya quea jea nee nee. Ohuaya eya chacosahua ca'yonaje Jesosa Quitojo quea pame nee pea'ai. Ohuaya miquianaya huohui cañaquije jiquiojo e ba'yanijo. <sup>8</sup> Eyaya oya huoojeaje miquiana huasijje e huohuiya. Ojaya esohui ecuanajo shajja'ajja majje ¡quea bihui nee pocue! <sup>9</sup> Tiquico nijje Onesimo poquije. Oya ecuanaja jayojjaya Jesusaja epeeji quea pame nee pea'ai. Yahuajo oya miquianajaya cuiñajjijo ba'ya poa. Ojjaña jiquiojo onaa acani huohui caje miquiana huasijje, Onesimohua. <sup>10</sup> Anitaco enijje ejeyo'yo nequi ejjajeantobiaquiji equijo. Ohuaya miquianaya huohui'ajja cani jama ba'a: —¿Achajja acuae quiana so'o? —ojaya ebajji.

Macosohua pea'ai huohui'ajja cani: —¿Achajja acuae quiana so'o, de, ecuanajaya ebajji?

Oya Macoso Benabeja jjo'yaseja bacua ejja. Miquiana que poquiyajo, joya jaahuanacue quea pame nee! Jamaya eyaya miquianaya huohuinaje yahuajo. <sup>11</sup> Jesosa Josoto yani pea'ai. Ohuaya huohui'ajja cani pea'aiya: —¿Achajja acuae nequiana so'o, ecuanajaya ebajji?

Jiquiojo pea beca peejjima Jodio cuana Jesusaja epeeji yani. Ohuaya eya chaco meesahua cani quea pame nee Eyacuiñajjija yajjijo, esejaya Emeshi Mese neija yajjijo. Pea Jodio cuanaja enijje chaco jjima, de. <sup>12</sup> Epapasi cuanaya yani enijje. Ohuaya pea'ai esohui quea bihui nee huohui cani miquiana que. Yahuajo oya miquiana nijje ba'ya poa pea'ai. Jesosa Quitoja yajjijo chaco cani ohuaya. Janobajjima nei mimi tiitiani Eyacuiñajji nijje miquianajo jama ba'a: —Eyacuiñajji, ¡miyaya ojjaña Conosajo ba'e cuana Jesosa Quito nijje jjapeequi meesahuacue quea ja'a nee! ¡Miquea esohuijo e'e jojo nei oya cuana jjabahuejjaqui meesahuacue! ¡Miquea esohui jama ba'e tiitii meesahuacue, Eyacuiñajji! —jamaya Epapasi mimiani Eyacuiñajji nijje miquianajo.

<sup>13</sup> E'e, Epapasi mimi tiitiani Eyacuiñajji nijje miquiana jaahuanajji. Quea huesha cuiñajji yasijje Jesusaja epeeji cuana Naonisea cuiñajjijo ba'e yasijje, Jienaponi cuiñajjijo ba'e pea'ai yasijje Eyacuiñajji nijje mimi tiitiani, Epapasi. Jamaya eyaya oya baña. <sup>14</sup> Ecuanajaya epeeji quea pame nee Noca bajjani yani jiquiojo. Oya eshicuijji quiajji, de. Dejja Demasi bajjani yani pea'ai. Ohuaya esohui quea bihui nee huoojea cani miquiana huasijje.

<sup>15</sup> ¡Ecuanaajaya esohui quea bihui nee huohuiquicue Jesusaja epeeji nei cuana huasijje Naoniseajo ba'e yasijje! ¡Epona Nema bajjani oe huohuicue! ¡Ojaya epeeji cuanaya pea'ai huohuicue, joya oja equi yasijje jjachachaquiani Eyacuiñajjiya esohui baa! <sup>16</sup> E'e, jiquio ecuea esohui etehue'yo ba neinei majje ¡huohuiquicue Jesusaja epeeji cuana huasijje Naoniseajo ba'e yasijje! Majoya ohuaya miqianaya quia caje o'oya pea esohui etehue'yo, ma eyaya ebionei tehuenaje o que. ¡Ma esohui shajja'ajjacue, ojjaña miqiaaya! <sup>17</sup> Pea dejja Aquipo bajjani huohuicue ecuea esohui jama ba'a: —Eyacuiñajjiya miya huoojea ca'yonaje ojo chachhua. Jamajjeya ¡chacocue quea pame nee ojo! ¡Ojjaña joya ecua ohuaya huohui cani jamaya oe acue!

<sup>18</sup> Eyaya ca eya jiquio esohui quea bihui nee tehue'yonaje. Dejja cuanaja eya pichojea'yo jjima; eya ejeyo'yo tii nequi. ¡A'a eya pajea'yojji! ¡Eyacuiñajjiya miqianaya cajaanuana tiitii cahua quea pame nee!

Mahuiso. Eya Pabo bajjani esohui tehuejji. Apoa.

## PABOJA ETEHUE'YO TESANONICA CUIÑAJIJO BA'E YASIJJE EBIONEI 1 TESALONICENSES

*Pabohua esohui tehue canaje Jesosaja epeeji cuana Tesanonica cuiñajji ba'e yasijje*

<sup>1</sup> Eya Pabo. Sinasi, Timoteo pea'ai enijje nequi. Jiquio esohui ecuaaya tehueña miqiana huasijje, ma Jesosaja epeeji nei cuana Tesanonica cuiñajji ba'e yasijje. Miquianaya Eyacuiñajji eseja Chii ai nijje jjapeequiani, Jesosa Quito esejaya Emeshi Mese nei nijje jjapeequiani pea'ai. ¡Eyacuiñajjiya, Jesosa Quitohua pea'ai miqianaya quea pame nee cajaahuana cahua! ¡Quea bei capo mee cahua pea'ai!

*Jesosaja epeeji cuana quea pame nee ba'yani*

<sup>2</sup> Eyacuiñajji nijje mimianijo ecuaaya oya bihuiaña miqianajo. E'e, ecuaa Eyacuiñajji nijje mimi huicha'a huicha'ani miqianajo jama ba'a: <sup>3</sup>—Eyacuiñajji, ecuanaja Chii ai, Jesosaja epeeji Tesanonica ba'eca minijje jjapeequiani cuana quea pame nee nee. Miya ojaya quea boti nee nee; minijje quea pame nee chaco cani tii. Oya cuana Jesosa Quito nijje, ecuanaja Emeshi Mese nei nijje jjapee tiitiqiani quea pame nee. E'e, jjashahuabaquiani jama ba'a: “Jesosaa ecuaa ba'e tiitii mee caje'yo onijje eyajo” —jamaya ecuaa mimiani Eyacuiñajji nijje miqianajo.

<sup>4</sup> Epeeji cuana, miqianaya Eyacuiñajji quea jea nee nee. Ohuaya miqianaya babaca majje iyaa canaje ojaya epeeji epo tiitii'yojji. Jamaya ecuanajaya eba. <sup>5</sup> E'e, ecuaaya Eyacuiñajji esohui quea pame nee Jesosaja huohuinaje miqianajaya eshajja'ajjajji. Edojjoshahua Pameya ecuanaya sohuihuohui meesahua canaje quea ja'a nee nee; miqianaya ba mee canaje Eyacuiñajji esohui e'e nei, dejjaja esohui pojjeama. Ecuaa quea pame nee ba'enaje miqiana nijje. Jamajjeya ecuanaya miqiaaya banaje quea pame nee ba'e. Jamajjeya miqianaya ba'enaje quea pame nee ecuaa jayojjaya. <sup>6</sup> E'e, miqianaya ecuaa jayojjaya ba'enaje quea pame nee nee; esejaya Emeshi Mese nei jayojja jama pea'ai ba'enaje. Jamajjeya pea cuaa miqianaya cuia canaje Jesosa nijje jjapee neineiquianijojo. Jamatii miqianaaya quea bihui neeya Jesosaja esohui shajja'ajjanaje; Edojjoshahua Pameya miqianaya quea bihui nee po mee canaje. <sup>7</sup> E'e, miqianaya quea ja'a nee jjapeequinaje Jesosa nijje. Jamajjeya ojjaña Jesosaja epeeji cuana Masenonia meshijo ba'eca cuana, Acaya meshijo ba'eca pea'ai miqiana ba majje quea ja'a nee jjapeequi sa poani Jesosa nijje miqiana jayojjaya. <sup>8</sup> Miqianajaya esohui Emeshi Mese nei, Jesosajo ojjaña Jesosaja epeeji cuaa shajja'ajja canaje. E'e, Masenonia meshijo ba'eca cuaa, Acaya meshijo ba'eca cuaa pea'ai shajja'ajja canaje. Ojjaña ba canaje miqianaya Jesosaja epeeji quea ja'a nee poani. Ojjaña cuaa quea huiso meshijo ba'eya pea'ai ba canaje miqianaya Eyacuiñajji esohui jayojja jama po tiitiani quea pame nee. E'e, ojjaña cuaa ojjaña meshi cuanajo ba'eya miqianajo shajja'ajja canaje. Jamajjeya ecuaaya oya cuana huohui o'oya jjima añ. <sup>9</sup> Onaaya ca ca ecuaa huohui cani miqianajo jama ba'a: —Jesosaja epeeji cuana Tesanonica ba'e Paboya esohui Jesosajo ebionei shajja'ajja jeahua jjashajja'ajjaquinaje quea bihui nee. Jesosaja epeeji cuana poanaje. Eyacuiñajji nisho, meshi epana'yo cuana bihuia pajea ca'yonaje. Jjeya nei ca ca oya cuana Eyacuiñajji e'e nei nijje jjapeequiani. E'e, Eyacuiñajji ca ca oe nei yani tii tii, eshe. <sup>10</sup> Ohuaya Eyacuiñajji Bacua Ejja oe nei Jesosaja epoe o'oyajji ishoa'ajja cani —jamaya ojjaña miqianajo poani.

E'e, Eyacuiñajji Bacua Ejja Jesosa mano'yajo, Eyacuiñajjiya oya ba'e mee ca o'oyanaje. Jjeya ohuaya, Jesosaa esejaya mimishi cuana cuijea ca poquipoqui'yani. Jamajjeya quijje Eyacuiñajjiya eseya sosequia caje'yo jiquio meshijo ba'ya poa sosejjeya; ohuaya eseya quea nee nee epo mee'yojji pojjeama shajjama' cuana nijje.

## 2

*Pabo chacochoa poa Tesanonica meshijo*

<sup>1</sup> Yahuajo ecuaaya Jesusaja esohui huohuinaje; miqianaya shajjama' pojjeama poa. Chojja, shajja'ajja neinei nequiaa poa. Miqianajaya jama eba pea'ai ba'a: <sup>2</sup> Miqiana baa Tesanonica huasijje poqui jjimahua ecuana cuia canaje Jodio cuaa Pinipo cuiñajji ba'eca cuaa. Ecuana nijje mimijajinaje pea'ai. Pea cuaa ecuana cuia canaje Jesusaja esohui huohui mee ajjaa jjejojo; jamatii Eyacuiñajjiya ecuana ojaya esohui quea pame nee Jesosa Quitojo huohui meesahua canaje miqiana huasijje mete'ama, miqianajaya eshajja'ajjaji.

<sup>3</sup> E'e, miqiana huasijje sohuihuohuiañajo ecuanajaya ejjashahuabaquijji quea ja'a nee poanaje. Ecuanaajaya esohui siajje pojjeama. Miqiana dasia sa po'yo ajja pea'ai. <sup>4</sup> Chojja. Eyacuiñajji eba ecuanaya siajjepojji pojjeama. Jamajjeya ohuaya ecuana huoojea canaje Jesusaja esohui quea pame nee huohuiya. Eyacuiñajji ejjashahuabaquijji jayojja jama huohuiaña ecuaaya. Eyacuiñajji eba nei nei ecuanajaya ejjashahuabaquijji ojaya ejjashahuabaquijji jayojja jama poani tii. Ecuaya oya quea bihui nee po mee sa aña ecuana nijje. E'e pojja'a pea cuana quea bihui pojjeama ecuanaja huohui'yojo. Jamatii ecuana jjashahuabaquiani jama ba'a: —Ecuaya esohui huohuiaña pea cuanaja ejjashahuabaquijji jayojja jama pojjeama, pea cuana enijje quea bihui epojji pojjeama —chojja, Eyacuiñajji quea bihui nee po mee sa aña ecuana nijje. <sup>5</sup> Miqianajaya ecuana eba. Esohui quea bihui nisho mimi jjima miqiana nijje miqiana dasiajji, aquiana sosema' edojji pea'ai. Chojja, Eyacuiñajji eba ecuanajaya ejjashahuabaquijji quea pame nee. <sup>6</sup> Jjashahuabaqui ajja jama ba'a: —Ecuana esohui quea pame nee shajja'ajja majje ecuana cabihua cahua cuaa; aquiana caquia cahua pea'ai —chojja, ecuana jjashahuabaqui ajja pea cuanaja ebihuijji.

<sup>7</sup> Ecuana Jesosa Quitoja huoojea'yo ojaya esohui huohuijji. Jamajjeya miqianajaya aquiana sosema' jjesheme esohui huohuinaje sosejje. Jamatii aquiana cuana ecuanajaya jjeshe jjima poanaje. Chojja, miqiana nijje quea bei ba'enaje. Jiquio ecua enaeseya oja bacua cuana jaahuana cani, quea jea nee acani jayojjaya jama ecuaaya miqianaya anaje. <sup>8</sup> Miqianaya ecuanajaya quea boti nee nee poanijo Eyacuiñajji esohui quea pame nee nee Jesusaja huohuinaje miqiana huasijje. Pea cuaa ecuana cuia ca chana' Jesusaja esohui ehuhui poaje jjejojo. Jamatii miqianaya ecuanajaya quea jea nee nee poanijo esohui huohui tiitiinaje. <sup>9</sup> E'e, miqianajaya eba miqiana nijje nequianijo ecuaaya janobajjima nei chaco tiitiinaje eba'ejji sosejje. Eyacuiñajji esohui quea pame nee Jesusaja huohuiañajo chaco tiitiinaje epojjajo, mecajje pea'ai. Jamaya anaje ecuaaya. Jamajjeya miqianajaya ecuana eba'ejji quia jjima poanaje. Eyacuiñajji esohui huohuinaje sosema' miqianajaya eshajja'ajjaji.

<sup>10</sup> Ecuana miqiana nijje ba'enaje quea bei nee, mimishi'ama, quea pame nee, dejja tai'ama. Jamaya miqianajaya eba. Jamaya Eyacuiñajji eba pea'ai. Jamajjeya ¿yajjajo pea cuaa ecuana niñeba cani so'o quea dejja tai poanaje miame? <sup>11</sup> E'e, echii meseya oja bacua cuana cuiña cani quea pame nee jayojjaya jama ecuaaya miqianaya anaje. Jamaya miqianajaya eba pea'ai.

<sup>12</sup> Ecuaya miqianaya huohui majamajanaje jama ba'a: —¡Quea bihui nee Jesosa Quito nijje japeequicue! ¡A'a quea yeno pojji onaa miya quea mimishi acajje! Eyacuiñajji oe nei quea ja'a nee nee, quea ca'a nee nee poani tii tii. Oya oe nei ojjaña huoojea'yojji poani. Ohuaya miqianaya babaca canaje onijje eba'e tiitii'yojji eyajo. Jamajjeya ¡ojaya esohui jayojja jama ba'e tiitiicue Eyacuiñajji miqiana nijje quea bihui nee epojji!

<sup>13</sup> Ecuaya Eyacuiñajji bihuliaña miqianajo jama ba'a: —Eyacuiñajji, eyaya miya bihuliaña Jesusaja epeejji cuana Tesanonica ba'e quea pame nee poani yasijje. E'e, miyaya miquea esohui huohui meesahuañajo, onaaya shajja'ajja canaje. Quea bihui nee poanaje. Quea ja'a jjashahuabaquinaje jama ba'a: “E'e jojo nei Pabohua ojaya esohui

pojjeama huohui cani; Eyacuiñajji esohui quea pame ca ca huohui cani” poanaje cuana —jamaya ecuaaya Eyacuiñajji bihuia huicha'a huicha'aña miquianajo.

E'e epeeji cuana, Jesosa nijje jjapeequianijo, Eyacuiñajjiya miquianaya ba'e meesahua cani quea pame nee ojaya esohui e'e nei jayojjaya.

<sup>14</sup> Yahuajo Jesosaja peeji cuana Jodio meshijo ba'e onijje, Jesosa Quito nijje jjapeequianijo, pea Jodio cuaa, oja huapa pojjeama cuaa oya cuana cuia ca poa quea huiso nee. Oya jayojjaya jjeya miquianaya Jesosa nijje jjapeequianijo, miquianajaya huapa pojjeama cuaa miquianaya cuia cani pea'ai. <sup>15</sup> E'e, yahuajo nei nei Jodio cuaa Eyacuiñajji esohui huohuiji cuana cuiajea ca'ya poa. Majoya esejaya Emeshi Mese nei Jesosa quecua mee ca'ya poa pea'ai. Jjeya eseya cuia cani pea'ai, Jodio cuaa. Shajjamaa po tiitiya jjejojo Jodio cuaa Eyacuiñajji quea quene po tiitii mee capoquiani. Jodio cuaa aje oe ojjaña deija cuana quea tai acani. <sup>16</sup> E'e, ecuaaya Jodio pojjeama cuana huasijje Eyacuiñajji esohui quea pame nee Jesosajo huohuiaña. Jodio pojjeama cuana Jesosa nijje jjapeequi mee sa aña onijje eyajo eba'e tiitii mee'yojji quea pame nee. Jamatii Jodio cuaa aje oe ecuaana Jesosaja esohui huohui pajea mee'yo sa acani tii. Jamaya oya cuana, Jodio cuana quea mimishi nee nee po tiitiiani. Jamajojoya aje jja oe Eyacuiñajji quea quene nee poani Jodio cuana nijje. Quea yeno nee nee po tiitii mee cani Jodio cuana.

#### *Pabo poqui o'oya sa poanaje Tesanonica huasijje*

<sup>17</sup> Epeeji cuana, yahuajo ecuaana miquiana nijje nequijo, Jodio cuana ecuaana nijje quea quene nee nee poanaje. Jamajjeya miquiana nijje nequi tiitii jjima poanaje. Jamatii miquianaya ecuanajaya pajea'yo jjima. Chojja, miquianajo jjashahuabaquiani tii. Poqui o'oya sa neinei poanaje miquiana baa. Mi poqui mee ca o'oyajje ecuaana quea yeno nee poanaje. <sup>18</sup> E'e jojo nei ecuaana poqui o'oya sa poanaje miquiana huasijje. E'e eya, Pabo poqui huicha'a huicha'a'ajjanaje. Jamatii Edosiquiana neiya eya poqui mee jjima acanaje. <sup>19</sup> E'e jojo nei miquianaya Jesosaja epeeji poanijo, ecuaana quea bihui nee nee poani. Jamajjeya esejaya Emeshi Mese nei Jesosa Quito poe o'oyajo, miquiana onijje nequi'yajo, ecuaana quea bihui nee poaje'yo. E'e, jiquio ecua se chacochoajo sosequia cajje eseya quea bihui nee poani jayojja jama ecuaana quea bihui nee nee poaje miquiana Jesosa nijje nequi ba majje. <sup>20</sup> E'e, miquianaya quea pame nee Jesosa nijje jjapeequianijo, ecuaaya Eyacuiñajji bihuiaña. Quea jaji nee poani pea'ai miquianajo.

### 3

#### *Pabohua Timoteo huoojea canaje Tesanonica ba'eca cuana ba'ajja'yohua*

<sup>1</sup> Jamajjeya miquianajo quea yeno jjashahuaba tiitiiqui majje eya jama poanaje ba'a: — E'e, eya ee nei Atena cuiñajji nequije. Timoteo, ¡miya poquicue Jesosaja epeeji cuana Tesanonica ba'e baa! —eya poanaje.

<sup>2</sup> Majoya eyaya esejaya epeeji nei Timoteo huoojeanaje miquiana baa. Timoteohua ecuaana nijjeya Eyacuiñajji esohui quea pame nee Jesosaja huohui tiitii cani. Eyaya oya huohuinaje jama ba'a: —Timoteo, ¡Jesosaja epeeji cuana quea ja'a nee, quea pame nee jjapeequi meesahuacue Jesosa nijje! ¡Oya cuana Jesosaja esohui jayojja jama atiitii meesahuacue quea bihui nee! <sup>3</sup> Jamajjeya onaaya oya cuana cuia canijo, Jesosa nijje jjapeepajeaqui'yo ajja —jamaya eyaya Timoteo huohuinaje miquiana que huoojea jjimahuaa.

Jamatii miquianajaya eba pea cuaa Jesosaja epeeji cuana cuia caje'yo. Eyacuiñajji eba eseya ojaya epeeji cuana quea ja'a poaje onaa cuia cajje. Jamajjeya cuia pajea mee jjima acani. <sup>4</sup> E'e, yahuajo miquiana nijje nequiya ecuaaya huohuinaje jama ba'a: — Jesosaja epeeji poanijo pea cuaa eseya cuia caje.

E'e jojo nei. Jjeya pea cuaa miquianaya cuia cani. Jamaya miquianajaya eba. <sup>5</sup> Jamajjeya eya quea mete miquianajo poanaje. Timoteo huoojeanaje miquiana baa: — ¡A'a Jesosa nijje jjapeequiani tii ba'ajjaqui'yo socue, Timoteo! —eya poanaje.

E'e, eya quea mete miquianajo poanaje. E'e pojja'a Edosiquiana neiya miquianaya Jesosa nijje jjapeequi pajea mee ca'yonaje. Jamaya epo'yo joggemo, miquianajaya

Eyacuiñajjija esohui epajea'yo jojjemo ecuana quea yeno pome; esohui huohuijajji pojja'a eyaya sohuihuohuijea nequinaje.

<sup>6</sup> E'e de, miqiana ba majje jjeya nei Timoteo poe o'oyanaje e que. Ohuaya huohui caña'yonaje jama ba'a: —Jesosaja epeeji cuana Tesanonicajo ba'e Jesosa nijje jjapeequiani tii; pajea'yo jjima. Eyacuiñajjija esohui jayojja jama po tiitiiani; pea cuana quea jea nee acani. Eya pea'ai ohuaya quea jea nee acajjequinaje. Oya cuana ecuanajo jjashahuaba tiitiqiani quea pame nee. Jiquio ecua ecuanaya jjashahuabaquinaje o baquijji jamaya oya cuana jjashahuabaquiani ecuana bahuajji —jamaya eya Timoteohua huohui caña'yonaje miqianajo.

<sup>7</sup> Jamajjeya ma shajja'ajja majje ecuana quea bihui nee poanaje. E'e de, ecuana aema' poani Jesosa nijje jjapeequianijo. Pea cuaa ecuana cuia cani pea'ai. Jamatii miqianaya ecuana quea bihui nee po meeaña. E'e, miqianaya Jesosa Quitoja esohui jayojja jama poanijo tii miqianaaya ecuana quea bihui nee nee po meeaña. <sup>8</sup> E'e de, miqianaaya esejaya Emeshi Mese neija esohui jayojja jama atiitiañajo, ecuana quea bihui nee, quea bei nee pea'ai poani. <sup>9</sup> E'e jojo nei jjeya miqianajo ecuaaya Eyacuiñajji bihuia neineiaña. Eyacuiñajjiya ecuana quea bihui nee po mee cani miqianaya quea pame nee onijje jjapeequianijo.

<sup>10</sup> Jamajjeya ecuana onijje mimi tiitiiani jama ba'a: —Eyacuiñajji, ¡ecuana poqui meesahua o'oyacue ecuanaja epeeji cuana baa! ¡Ojjaña miquea esohui huohui meesahua o'oyacue onajaya eshajja'ajjajji, quea pame nee minijje ejjapeequi'yojji! —jamaya ecuana Eyacuiñajji nijje mimiani ojjaña pojjaajo, ojjaña mecajje pea'ai.

<sup>11</sup> Ecuana onijje mimi neineiani jama pea'ai ba'a: —Eyacuiñajji, ecuanaja Chii ai, Emeshi Mese nei Jesosa pea'ai, ¡che ecuana poqui meesahuacue Tesanonica huasijje miquea epeeji cuana baa! <sup>12</sup> E'e Emeshi Mese nei, ¡miquea epeeji cuaa Tesanonicajo ba'e cuaa pea miquea epeeji cuana quea jea nee nee ameesahuacue! ¡Ojjaña cuana pea'ai quea jea nee ameesahuacue! ¡Ecuaa oya cuana quea jea nee nee añña jayojjaya jama oya cuana pea cuana quea jea nee ameesahuacue pea'ai! <sup>13</sup> E'e Eyacuiñajji, ecuanaja Chii ai, ¡oya cuana Jesosaja epeeji cuana quea ja'a nee po meesahuacue quea bojea, mimishi'ama eba'e'yojji! Jamajjeya ecuanaja Emeshi Mese nei Jesosaa ojjaña ojaya esohuidojojji cuana nijje poe o'oya majje oya cuana mi cojja nei nequi mee caje'yo quea bojea, bicho'ama. E'e, ¡jamaya acue Eyacuiñajji! —jamajjeya eya Eyacuiñajji nijje mimi tiitiiani miqiana huasijje.

#### 4

*¡Quea pame nee ba'ecue Eyacuiñajji minijje quea bihui epojji!*

<sup>1</sup> Jamajjeya epeeji cuana, eyaya pea esohui tehueje miqianajaya ebajji. Yahuajo ecuaaya miqianaya huohuinaje quea pame nee eba'e'jji. Ma ecuanajaya esohui jayojja jama ba'yanijo, Eyacuiñajji quea bihui nee poani miqiana nijje. Jamaya miqianaya ba'enaje. Jjeya esejaya Emeshi Mese neiya, Jesosa Quitohua ecuana ma esohui tehue mee ca o'oyani miqiana huasijje quea pame tii eba'e' poquijji. <sup>2</sup> Yahuajo esejaya Emeshi Mese neiya, Jesosaa ecuana huoojea canaje miqiana sohuihuohuiya. Ma esohui miqianajaya eba. <sup>3</sup> Eyacuiñajjija ejjashahuabaquijji miqianajaya eba'e'yojji jama ba'a: —¡Quea pame nee ba'ecue, mimishi'ama nei nei! ¡A'a onajaya ehuanase siijji! ¡A'a peaja yahue siijji! ¡A'a pea cojjojji pojji! <sup>4</sup> Dejja cuana, ¡miqianaya eponajo jjahuanaqui sa poanijo quea ja'a nee jjashahuabaquicue! ¡Eyacuiñajjija esohui jayojja jama epona huanacue quea pame nee! <sup>5</sup> ¡A'a quea mimishi jjashahuabaquijji Eyacuiñajjija epeeji pojjeama cuana jayojja! Oya cuana aje oe pea epona cuana nijje jaani; ojaya ehuanase jaahuana jjima acani. <sup>6</sup> Onajaya ehuanase sii canijo, e'e jojo nei Eyacuiñajjiya dejja cuana quea nee nee po mee caje'yo. Jamajjeya miqianaaya ca ca ja'a onajaya ehuanase siijji! ¡A'a jea bajji pea'ai! —jamaya Eyacuiñajji jjashahuabaquiani ojaya epeeji cuanajo. Jamaya yahuajo ecuaaya miqianaya huohuinaje.



<sup>7</sup> E'e, Eyacuiñajjiya eseya iyaa majje huohui canaje jama ba'a: —¡Ecuea epeeji cuana po majje ecuea esohui jayojja jama ba'ecue quea pame nee nee! ¡A'a oe quea mimishi pojji! ¡A'a oe quea mimishi ba'ejji!

<sup>8</sup> Jiquio esohui cuana Eyacuiñajjiya esohui, de; dejjaja esohui pojjeama. Jamajjeya ojjaña joya jiquio esohui cuana jayojja jama ba'e sa po'yo ajja Eyacuiñajji nijje jjapeequi sa po'yo ajja; Eyacuiñajji cajaa a'yojji poani. Eyacuiñajjiya ca ca oe ese yasijje ojaya Edojjoshahua Pame huoojea ca'yonaje quea pame nee eba'e meesahua'yojji.

<sup>9</sup> Miquianaaya Jesusaja pea epeeji cuana quea jea nee añajo, eyaya miquiana que esohui etehue o'oyajji pojjeama ca comajo. E'e, Eyacuiñajjiya miquianaaya jjabahuejja meequi canaje ojjaña ojaya epeeji cuana quea jea nee e'ajji. <sup>10</sup> E'e jojo nei miquianaaya jamaya añã; Jesusaja epeeji cuana ojjaña Masenonia meshijo ba'e cuana quea jea nee añã. E'e, Eyacuiñajjiya esohui jayojja jama añã miquiaaya. Epeeji cuana, ¡Jesusaja epeeji oe quea jea nee nee atiitiicue! Jamaya ecuaaya miquianaaya huohui neineaña.

<sup>11</sup> Yahuajo ecuaaya miquianaaya sohuihuohuinaje jama ba'a: —¡Quea bei ba'e tiitiicue! ¡A'a jjachichaquijji pea cuana miminaanaa ani yasijje! ¡Miquea bobijo, daquijo, eba'ejjijo pea'ai chacocue! ¡Quea ja'a nee jjashahuaba tiitiicue! <sup>12</sup> Jamajjeya miquianaaya aquianajji poaje; miquianaaya bobi yasijje epo'yojji pojjeama bobijji po'yo majje. Pea huasijje bobijo cua ajja poaje. Jamajjeya miquianaaya quea pame ba'yani ba majje Jesusaja epeeji pojjeama cuaa miquianaaya shajja'ajja caje Jesusaja esohui miquianaaya huohuiañajo. Jamajjeya miquianaaya quea pame ba'eje.

*Emeshi Mese nei Jesosa poe o'oyajo ojaya epeeji emano'yo cuana shequije o'oya*

<sup>13</sup> Epeeji cuana, eyaya jiquio pea esohui tehueña miquiana ba meeji e'e jojo nei Jesusaja epeeji cuanajo, ma yahuajo mano ca'ya poajo. Jamajjeya miquianaaya yeno'ama poaje emano'yo cuanajo. Pea cuana ca ca, Jesusaja epeeji pojjeama cuana quea yeno nee nee poani emano'yo cuana shequi'yo jjima poanijo poso. <sup>14</sup> Eseyaya eba e'e jojo nei Jesosa mano'yajo Eyacuiñajjiya oya shequi mee ca o'oya poa. Oya jayojjaya Jesusaja epeeji cuana mano'yajo, Eyacuiñajjiya oya cuana shequi mee caje o'oya. Jamajjeya Jesosa poe o'oyajo Eyacuiñajjiya onijje huoojea caje ojaya epeeji ma yahuajo mano'ya poa cuana. Jamaya e'e jojo nei; jamaya jjashahuabaquime eseya poani.

<sup>15</sup> E'e, Emeshi Mese neiya Jesusaa ecuana huohui ca poa jamaya eyaya miquianaaya huohuiaña jama ba'a: Poe o'oya majje Emeshi Mese neiya, Jesusaa ojaya epeeji eshe nequi cuana, ojaya epeeji yahuajo emano'yo cuana nijje ojee jjequisohua caje'yo onijje eyahuasijje. <sup>16</sup> E'e, Emeshi Mese nei Jesosa eyajo ani meshi yasijje poe jeahuajo janobajjima nei taaaje; esohuidojojji jaahuanajjiya quea ca'a nee neeya emiajji mia cani jayojja taaame poaje, janobajjima nei nei. Eyacuiñajjiya emiajji mia caje cuaa pea'ai. Majoya Emeshi Mese nei eyajo ani jjapashineijje nequioqueje bo biajje nequi. Jamajjeya ojaya epeeji cuanaja, ma yahuajo mano'ya poaja eyami eshe po mee caje o'oya, eyacua. <sup>17</sup> Majoya poe o'oya majje, emano'yo cuanaja eyami eshe o'oya po mee majje Jesosa Quitohua ojaya epeeji eshe nequi cuana bo biajje jjequisohua caje'yo emano'yo cuana nijje, ojee. Bo biajje nequije Jesosa nijje. Majoya ojjaña ojaya epeeji cuana onijje ba'e tiitiije'yo Emeshi Mese nei nijje, Jesosa nijje. <sup>18</sup> Jamajjeya jiquio esohuijo quea bihui nee nee pocue! ¡Jesusaja pea epeeji cuana quea bihui nee po meesahuacue! ¡Jiquio esohui cuana huohui huicha'a huicha'acue! Jama ba'a: —Jesusaa ojjaña ojaya epeeji cuanaja eyami eyacua po mee majje jjequisohua caje'yo eyahuasijje onijje eba'e tiitii'yojji, ojaya epeeji yahuajo mano'ya poa cuana nijje pea'ai.

5

*¡Jesusaja epoe o'oyajjijo jjashahuaba tiitiicue!*

<sup>1</sup> Epeeji cuana, ¡shajja'ajjacue mo oe! Jesusaja epoe o'oyajji miquianajaya eba. Jamajjeya eyaya miquiana huasijje etehuejji pojjeama ache pojajajo oya poeje o'oya ebajo ese. <sup>2</sup> Chojja, ¿ache pojajajo shai poeje o'oya Jesosa? Emeshi Mese neija epoe o'oyajji

esejaya ba jjima epojja. Jiquio ecua siipojji quehuajje poecuajiani jayojja jama Jesosa quehua poecuajije o'oya. <sup>3</sup> O poe jjimahuajo pishana mimishi cuana jama poaje ba'a: "Ojjaña quea bei poani. Ecuana quea pame nee ba'e tiitiije'yo" onaa jama po'ajjaquijo tiiya Jesosa Quito poeje o'oya. Mimishi cuana quea nee po mee caje'yo. E'e, Jesosa poe o'oyajo chama' ejja'aniquehuaquijji poaje. Jiquio ecua epona cuana bacua nee cuajiani jama poecuajime poaje Jesosa.

<sup>4</sup> Ecua epeeji cuana, miquianaya Jesosa nijje jjapeequiani. Jamajjeya ¡quea ja'a nee jjashahuabaquicue! ¡Jesosaja epoe o'oyajji ishoo'ajja anicue! Jamajjeya ¡jiquio ecua siipojji chamajo poso equi jaahuana ajja jayojja jama a'a pojji! ¡Jesosaja epoe o'oyajji ishoo anicue! <sup>5</sup> Ojjaña miquianaya onijje jjapeequiani; quea ja'a nee nee ba'yani, epojjajo quea ja'a poquiani jayojja jama poani. E'e, eseya eshahua nijje poquiquehua ajja. ¡Joya ecua eshahua quea mimishi poani jama a'a pojji! <sup>6</sup> Pea cuanaa ca ca Jesosaja epoe o'oyajji ishoo ajja. Jamaya pojjeama eseya. Chojja. ¡Jesosaja epoe o'oyajji ejja'ishoo'ajjaqui! ¡Quea ja'a nee ejjashahuabaqui pea'ai!

<sup>7</sup> Shajjama' cuana quea jjashahuabaqui quehua poani Jesosaja epoe o'oyajji ishoo ajja. Quea jjashahuabaqui quehua poanijo shajjama' cuana quea mimishi ba'yani. E'e, jiquio ecua mecajje huoo majje shajjama' cuana jjashahuabaqui ajja jayojja jama onaya Jesosaja epoe o'oyajjijo jjashahuabaqui ajja. <sup>8</sup> Eseyca ca ca, Jesosaja epeeji cuana quea ja'a nee ba'yani Eyacuiñajjiya esohui jama. Quea ja'a nee jjashahuabaquiani. Jamajjeya Jesosaja epoe'yojji ishoo'ajjaña. E'e, jiquio ecua sohuinanohua baa daqui quea moo ese'ojje huosho cani onaja quecua jjima yajji jayojja jama eseya Jesosa nijje jjapeequiani. ¡Pea cuana quea jea nee nee ejja'aqui pea'ai! Jamajjeya Eyacuiñajjiya eseya Edosiquiana nei jeabichajjea meesahua caje. Jiquio ecua sohuinanohua ejaahuojja ca'a, baajee sapajo iya cani onaja sapa jaja jjima yajji jayojja eseya Jesosa nijje jjapeequiani; esejaya eba Eyacuiñajjiya eseya mimishi cuana cuijea'yo majje ba'e tiitii mee caje'yo onijje eyajo. <sup>9</sup> ¿A'a Eyacuiñajjiya eseya babaca canaje cuaqui yasijje quea nee nee epo'yojji? Chojja. Eseyaya Emeshi Mese nei nijje, Jesosa Quito nijje jjapeequianijo, mimishi cuana cuijea majje Eyacuiñajjiya eseya ba'e tiitii mee caje'yo onijje. <sup>10</sup> E'e, Jesosa Quito eseya mimishijo mano'ya poa. Jamajjeya eseya onijje ba'e tiitii mee caje'yo eyajo. E'e pojja'a o poe o'oya jjimahuajo eseya manoj'e'yo. E'e pojja'a oya poeje o'oya ese eshe nequijo. Jamatii ojjaña eseya onijje ojee ba'e tiitiije'yo eyajo.

<sup>11</sup> Jamajjeya ¡jiquio esohuijjo quea bihui nee nee pocue! ¡Jiquio esohui huohui huicha'a huicha'acue Jesosaja epeeji cuana quea bihui nee epojji! ¡Oya cuana Jesosa Quito nijje quea jaji nee jjapeequi meesahuacue pea'ai! Jamaya miquiaaya aña; ¡jamaya oe atiitiicue!

### *Pabohua eba'ejji quea pamejo tehue canaje*

<sup>12</sup> Epeeji cuana, jjeya eyaya pea esohui tehueaña miquianaja ebajji jama ba'a: ¡Jesosaja epeeji etii cuana miquiana nijje nequi shajja'ajjacue oe! Ohuaya miquianaya jaahuana cani, Eyacuiñajjiya esohui huohui cani pea'ai. <sup>13</sup> Oya cuana Eyacuiñajjijo quea pame nee chacochoanijo ¡quea boti nee acue! ¡Quea pame nee jjashahuabaquicue onajo pea'ai! ¡Ojjaña Jesosaja epeeji cuana nijje quea bei pocue!

<sup>14</sup> E'e epeeji cuana, jama acue pea'ai ba'a: Jesosaja epeeji quea huea poanijo, ¡janobajjima nei onijje mimicue! ¡Epeeji quea mete cuana quea bei po meesahuacue! Epeeji eshahua nijje poquiquehua sa poanijo, ¡quea ja'a ba'e meesahuacue! ¡Tecue'ama po tiitiicue ojjaña cuana nijje! <sup>15</sup> Onaa miya napa cajje ¡a'a jjasoseaquijji! ¡A'a onaya napa pea'aijji! ¡Ojjaña pojajjo jjashahuaba neineiucue ojjaña Jesosaja epeeji cuana nijje, pea cuana nijje pea'ai quea pame nee epojji! <sup>16</sup> Jesosaja epeeji poanijo ¡quea bihui nee po tiitiicue! <sup>17</sup> ¡Eyacuiñajji nijje mimi huicha'a huicha'acue ojjaña pojajjo! <sup>18</sup> Miquianaya quea pame ba'yanijo, quea camaja miquianajo poanijo pea'ai ¡jamatii Eyacuiñajji bihuiacue oe! Jamaya Eyacuiñajjiya ejjashahuabaqui'yojji miquianajo, Jesosa Quito nijje jjapeequianijo.

<sup>19</sup> Edojjoshahua Pame minijje mimianijo, ja'a shajjama' pojji! <sup>20</sup> Eyacuiñajji esohui huohuijjiya esohui huohui canijo, ¡shajja'ajja neineicue oe! <sup>21</sup> ¡Jamatii ojjaña esohui shajja'ajja neinei majje quea ja'a jjashahuabaquicue! ¡Esohui e'e nei jama acue! <sup>22</sup> ¡Ojjaña mimishi cuana pajea neinei'yocue! E'e, ¡quea pame nee nee ba'e tiitiicue!

<sup>23</sup> Jamajjeya eya Eyacuiñajji nijje miquiana huasijje mimiani jama ba'a: —Eyacuiñajji, miyaya ojjaña quea bei po tiitii meeaña. ¡Miquea epeeji cuana minijje jjapee neinei qui meesahuacue quea bojea nee epo'yojji! ¡Oya cuana ba'e meesahuacue quea pame nee nee, mimishi'ama: ojaya ejjashahuabaquijji, ojaya eyami pea'ai, ojaya edojjoshahua pea'ai! Jamajjeya ecuanaja Emeshi Mese nei Jesosa Quito poe o'oyajo oya cuana bicho'ama, mimishi'ama poaje'yo —jamaya eya mimiani Eyacuiñajji nijje miquiana huasijje.

<sup>24</sup> Eyacuiñajjiya ojaya esohui miquiana nijje epajea'yojji pojjeama tii tii. Ohuaya miquianaya iyaa canaje onijje ejjapee tiitiqui poquijji. Jamajjeya ohuaya miquianaya jjapeequi tiitii mee caje'yo quea pame nee nee.

<sup>25</sup> Ecuea epeeji cuana, ¡Eyacuiñajji nijje mimicue ecuanajo, ejo pea'ai!

<sup>26</sup> Ojjaña Jesosaja epeeji cuana nijje quea bihui nee mimicue jama ba'a: —Pabo miquianajo jjashahuaba tiitiquiani; quea jea nee nee pa mi Pabaja.

<sup>27</sup> Eyaya Emeshi Mese nei Jesosaja esohui huohuijji poaniya miquianaya huohuiaña jama ba'a: ¡Jiquio ecuea esohui etehue'yo ojjaña Jesosaja epeeji cuana huasijje huohuicue, ojjaña tii! Jamaya.

<sup>28</sup> ¡Esejaya Emeshi Mese neiya Jesosa Quitohua miquianaya quea pame nee cajaanahua cahua!

Mahuiso. Eyaya Pabohua jiquio esohui tehue'yonaje. Apoa.

PABOJA ETEHUE'YO TESANONICA CUIÑAJJI YASIJJE BECANEJJIIJI  
PEA'AI  
2 TESALONICENSES

*Pabohua esohui tehue ca o'oyanaje Jesusaja epeeji cuana Tesanonicajo ba'e yasijje*

<sup>1</sup> Eya Pabo. Sinasi, Timoteo pea'ai enijje nequi. Ecuaya jiquio esohui tehue o'oyaña miquiana huasijje, ma Jesusaja epeeji cuana Tesanonica cuiñajji ba'e yasijje. Miquianaya Eyacuiñajji esejaya Chii ai nijje jjapeequiani; Jesosa Quito esejaya Emeshi Mese nei nijje jjapeequiani pea'ai.

<sup>2</sup> ¡Eseyaya Chii ai Eyacuiñajjiya, esejaya Emeshi Mese nei Jesosa Quitohua pea'ai miquianaya cajaahuana cahua quea pame nee! ¡Quea bei capo mee cahua pea'ai! Jesosa Quito poe o'oya majje ojjaña huoojea'yojji poaje'yo.

<sup>3</sup> Epeeji cuana, ecuanaya Eyacuiñajji nijje mimianijo oya bihuiaña miquianajo jama ba'a: —Eyacuiñajji, Jesusaja epeeji cuana Tesanonicajo ba'eca minijje jjapeequi poquipoquiani cuana quea pame nee nee. Ohuaya Jesusaja pea epeeji cuana quea jea nee nee acani; yahuajo ca ca pea cuana quea jea pishana aca poa —jamaya ecuanaya Eyacuiñajji nijje mimi huicha'a huicha'ani miquianajo. Jamaya quea pame nee miquianaya Eyacuiñajji esohui jayojjaya jama po tiitiani.

<sup>4</sup> Jamajjeya Eyacuiñajjiya epeeji cuana pea meshijo ba'e cuana nijje ecuanaya mimiani quea bihui nee miquianajo jama ba'a: —Jesusaja epeeji cuana Tesanonicajo ba'eca onijje jjapee tiitiquiani quea pame nee. Eyacuiñajjiya esohui jayojja jama poani. Oya cuana janobajjima nei napa cani cuaa Jesosa nijje jjapeequianijjo. Jamatii Jesosa nijje jjapeequi pajea'yo ajja.

<sup>5</sup> E'e, jjeya pea cuaa miquianaya napa cani Jesosa nijje jjapeequianijjo. Miquianaya onijje jjapeequi pajea ajjajojo Eyacuiñajjiya miquianaya Jesusaja epeeji quea ca'a po mee cani. Jesosa que, ma ese huoojea'yojji poani yasijje eseya ba'e tiitii mee caje'yo onijje. Jamajjeya ojjaña cuaa ba caje Eyacuiñajjiya ejjashahuabaquijji miquianajo quea pame nee.

<sup>6</sup> Eyacuiñajjiya quea pame nee nee atitii cani. Jamajjeya mimishi cuaa miquiana napa canijo, quijje Eyacuiñajjiya oya cuana sosequia caje'yo; quea nee nee po mee caje'yo tii tii. <sup>7</sup> Eyacuiñajjiya mimishi cuana eseya, Jesusaja epeeji cuana napa pajea mee caje'yo.

Jamaya Eyacuiñajjiya eseya acaje'yo Emeshi Mese nei Jesosa poe o'oyajo. E'e, Jesosa eyajo ani quea jeajahua nee nee cuaqui jama oya jjapashineijje nequioqueje. Eyacuiñajjiya esohuidojojji quea ca'a cuana onijje nequioqueje. <sup>8</sup> Nequioque majje ohuaya, Jesosaa ojjaña ojaya epeeji pojjeama cuana quea nee nee po mee caje'yo Eyacuiñajjiya esohui shajja'ajja sa po'yo ajja poajojo, esohui quea pame nee nee Emeshi Mese nei Jesusaja jayojja jama a sa po ajja poa jojya. <sup>9</sup> Jamajjeya oya cuana quea yeno poaje'yo tii tii. Eyacuiñajjiya oya cuana huoojea caje'yo cuaqui yasijje quea nee nee epo tiitii nequi'yojji. Eseyaya Emeshi Mese nei quea pame nee nee, quea ca'a nee nee nijje eyajo eba'e'yojji pojjeama oya cuana. <sup>10</sup> Ojjaña ojaya epeeji cuana ca ca, ma ohua mimishi cuijea ca'yajje quea pame nee po mee ca'yonaje ca ca Jesusaa ba'e mee caje'yo quea pame nee nee poe o'oya majje. Eseyaya Jesosa bihuia neineije'yo ba majje. Epeeji cuana, miquianaaya ecuanaja esohui Jesusajo quea bihui nee shajja'ajjanaje. Jamajjeya miquianaaya ojaya pea epeeji cuana nijjeya Jesosa bihuia neineije'yo.

<sup>11</sup> Jamajjeya ecuanaya Eyacuiñajji nijje mimi huicha'a huicha'ani miquiana huasijje jama ba'a: —Eyacuiñajji, miyaya miquea epeeji cuana iyaanaje quea pame nee minijje ejjapeequi'yojji. Jamajjeya jaya cuana quea pame nee ba'e meesahuacue mi jayojjaya! E'e Eyacuiñajji, miquea epeeji cuana quea pame nee po sa poani. Miya quea ca'a nee nee poani tii. Jamajjeya jaya cuana quea pame nee po meesahuacue! ¡Miquea esohui jayojja jama ameesahua tiitii quea pame nee, Jesosa nijje jjapeequianijjo! —jamaya eya mimiani Eyacuiñajji nijje.

<sup>12</sup> Jamajjeya Eyacuiñajjiya miqúanaya ba'e meesahua canijo, miqúiaaya Jesosa bi-huíaje jama ba'a: —Emeshi Mese nei Jesosa, ¡miya quea pame nee nee poani tii tii!

Jesosaa miqúanaya pea'ai bihuia caje jama ba'a: —Miqúanaya ecuea epeeji quea pame nee.

E'e, jamaya poaje Eyacuiñajjiya, esejaya Emeshi Mese nei Jesosa Quitohua pea'ai miqúanaya jaahuana cani quea pame nee neejo.

## 2

### *Jesosa poe jjimahuajo Edosiquiana neija epeeji quea mimishi nee nee poeje'yo*

<sup>1</sup> Ecuea epeeji cuana, e'e jojo nei esejaya Emeshi Mese nei poeje o'oya. Eseyá, ojjaña ojaya epeeji cuana ojee jjequisohua caje'yo onijje epo'yojji tii tii. <sup>2</sup> Jamajjeya ¡quea jjashahuabaquí ja'a nee pocue! ¡A'a quea mete pojji Jesosa Quito poe o'oyanajejo poso! Onaya siajje poani jama ba'a: —Emeshi Mese nei Jesosa poe o'oyanaje yahuajo. Jamaya Pabo poanaje —jama siajje pomeya poani cuana.

¡A'a quea mete pojji pea cuanaja esohui e'e nei pojjeamajo! Chojja, Jesosa poe o'oya jjima. E'e pojja'a pea cuana siajje poanaje jama ba'a: —Eyacuiñajjiya ecuana ma ohua quiije acaje'yo huohui meesahua cani. Ohuaya ecuana ba mee canaje Jesosa Quito poe o'oyanaje —jamaya poani beca cuana.

Onaya siajje poani jama ba'a: —Pabohua, ojaya epeeji cuaa pea'ai tehue canaje Jesosa poe o'oyanaje yahuajo pishana —jamaya poani cuana.

Chojja, oya poe o'oya jjima. <sup>3</sup> ¡Ma siajjepojji cuana a'a shajja'ajjajji! Onaaya miqúanaya jjashahuabaquí quehua mee ca chana'. Jamajjeya eyaya miqúanaya huohuije Jesosa Quitoja epoe o'oyajji: Ebionei, Jesosa Quito poe jjimahuajo, quea huiso cuana onijje jjapeequi pajea caje'yo, Eyacuiñajjiya esohui shajja'ajja sa po'yo ajja poaje pea'ai. Majoya Edosiquiana neija epeeji quea mimishi nee nee poeje. Oya Eyacuiñajjiya quea nee nee po mee caje'yo cuaquijo. <sup>4</sup> Ma dejja quea mimishiya jama acaje ba'a: Ohuaya Eyacuiñajji e'e nei, ojjaña eyacuiñajji nisho cuana pea'ai jeabichajea mee sa acaje. Ojjaña cuana jjashahuabaquí quehua mee sa acaje jama ba'a: —Oya oe nee quea pame nee nee poani. ¡Ojjaña oya cabihuia cahua! —poaje cuana.

Oya Jenosanena huasijje poqui majje Eyacuiñajjiya equi quea quemo huasijje dobiquire. Anioque majje siajje poaje jama ba'a: —Eya ca ña Eyacuiñajji e'e jojo nei —jama siajje pomeya poaje.

<sup>5</sup> Epeeji cuana, yahuajo eyaya miqúanaya nijje nequiya jamaya huohuinaje. ¿A'a ecuea esohui pajea'yonaje? <sup>6</sup> ¿Apiojji ma dejja quea mimishi nee nee poe jjima? Miquianajaya eba. Eyacuiñajjiya poe mee jjima jjejojo mi poeyani. Jamajjeya quiije ojaya epoeji apoa poajo ma dejja, Edosiquiana neija epeeji quea mimishi nee nee poani poeje. <sup>7</sup> Jjeya Edosiquia huoojeajji poaniya dejja cuana quea mimishi quehuajje po mee cani. Jamatii jjeya Eyacuiñajjiya Edosiquiana neija epeeji quea mimishi nee nee poe mee jjima acani. Quiije ca ca oya poeje ojjaña Jesosa nijje jjapeequi mee pajea'yohua nisho. <sup>8</sup> Majoya ojjaña oya ba caje ecojaa. Jamatii esejaya Emeshi Mese neiya, Jesosaa oya tecueajea caje'yo, mano mee caje'yo. Ma ohua acaninaje chama'yo tii po mee caje'yo. Jamaya Jesosaa quea ca'a nee nee, quea jeajahua nee nee poe'yo majje acaje'yo, ojjaña huoojea'yojjiya. <sup>9</sup> Edosiquiana huoojeajji poaniya, Satanasa bajjaniya ma dejja quea mimishi huoojea caje. Jamajjeya ohuaya oya ma pea dejjaa ajjima acani ameesahua caje ojjaña dasiajji nisho. Ba majje ojjaña quea ajjajja nee nee poaje, quea mete nee nee poaje cuana. <sup>10</sup> Ma dejjaa quea mimishi nee neeya quea huiso cuana dasia caje'yo. Jesosaja epeeji pojjeama cuana dasia neinei caje'yo, ojjaña joya cuaqui yasijje poquije'yo. Onaya aje oe Jesosaja esohui e'e nei shajja'ajja sa po ajjajojo Jesosaa ojaya mimishi ecuijea'yojji pojjeama. Jamajjeya cuaqui yasijje poquije'yo. <sup>11</sup> Shajjama' poani jojoya Eyacuiñajjiya oya cuana jjashahuabaquí meesahua ajja. Jamajjeya onaaya Edosiquiana neija epeejiya siajje acani e'e jojo nei poso acaje cuaa. <sup>12</sup> Jamajjeya oya cuana, ojjaña joya Jesosaja esohui

shajja'ajja sa po'yo ajja, ojjaña joya mimishi quea boti nee nee ajji poani Eyacuiñajjiya huoojea caje'yo cuaqui yasijje.

*Eyacuiñajjiya ojaya epeeji cuana ba'e tiitii mee caje'yo*

<sup>13</sup> Jesusaja epeeji cuana, ecuana Eyacuiñajji nijje mimi majamajani miquianajo jama ba'a: —Eyacuiñajji, ecuaaya miya bihuiaña. Miyaya miquea epeeji cuana Tesanonicajo ba'e Jesosa nijje jjapeequi meesahua'yonaje quea pame nee —jamaya ecuana mimiani Eyacuiñajji nijje miquianajo.

E'e epeeji cuana, miquianaya esejaya Emeshi Mese neija quea boti nee nee. Yahuajo nei nei, meshi pana jjimahuajo Eyacuiñajjiya miquianaya babaca ca'ya poa Jesusaja epeeji epojji, onijje eba'e tiitii'yojji. Ohuaya Edojjoshahua Pame huoojea ca'yonaje miquiana Jesosa nijje jjapeequi meesahua'yojji. Jamaya miquianaya Eyacuiñajjiya acani ojaya esohui jayojja jama añajo. <sup>14</sup> Eyacuiñajjiya ecuana huoojea canaje miquiana huasijje ojaya esohui huohuiya. Jjashajja'ajjaquijajo Eyacuiñajjiya miquianaya Jesosa nijje jjapeequi meesahua ca'yonaje. Jamajjeya miquianaya esejaya Emeshi Mese nei nijje, Jesosa Quito nijje quea ja'a nee ba'e tiitii mee caje'yo eyajo pea'ai.

<sup>15</sup> Jamajjeya epeeji cuana, ¡esohui e'e nei pojjeama a'a shajja'ajjajji! ¡Ecuana ehuohui'yo, esohui etehue'yo cuana pea'ai a'a pajea'yojji! <sup>16</sup> Jamajjeya ecuana Eyacuiñajji nijje, Jesosa Quito nijje pea'ai mimi neineiani jama ba'a: —Jesosa Quito, miya ecuanaja Emeshi Mese nei. Eyacuiñajji, miya ecuanaja Chii ai eyajo ani. Miya quea pame nee nee. Miyaya ecuana quea jea nee añajo. Jamajjeya Edojjoshahua Pame huoojeanaje ecuana quea bihui nee po tiitii meeya. Miyaya ecuana ba'e tiitii meeje'yo eyajo pea'ai. <sup>17</sup> Jamajjeya ¡miquea epeeji cuana Tesanonicajo ba'e quea bihui nee, mete'ama po meecue! ¡Oya cuana ba'e meesahuacue tii quea pame nee! ¡Miquea esohui quea pame nee jayojja jama atiitii meesahuacue pea'ai! —jamaya ecuana mimiani Eyacuiñajji nijje miquianajo.

### 3

*¡Eyacuiñajji nijje mimicue ecuanajo!*

<sup>1</sup> Epeeji cuana, jjeyahua nei ecuaaya pea esohui tehueje miquianajaya ebajji. ¡Eyacuiñajji nijje mimicue ecuanajo! Jama acue ba'a: —Eyacuiñajji, ecuanaja Chii, ¡miyaya Pabo, ojaya epeeji cuana pea'ai jaahuanacue! ¡Jesusaja esohui huohuicuaaji meesahuacue ojjaña cuana huasijje! Esohui shajja'ajja cajo ¡quea huiso minijje jjapeequi meesahua'yocue! Jamajjeya ¡ecuana jayojjaya pea cuana jjeyahua nei Jesusaja epeeji po meesahuacue! ¡Ojaya esohuijo jjashajja'ajja meesahua'yocue pea'ai! <sup>2</sup> E'e Eyacuiñajji, ¡Pabo, ojaya epeeji cuana pea'ai jaahuanacue dejja mase cuanajo, mimishi cuanajo pea'ai! ¡A'a Pabo napa meeji cuana esohui huohui canijo! —jamaya mimicue Eyacuiñajji nijje ecuanajo. E'e, quea huiso cuana Jesosa nijje jjapeequi sa po'yo ajja.

<sup>3</sup> Eseyahua Emeshi Mese nei Jesusaa pajea'yo jjima acaje. Ma ohua yahuajo huohui ca poa jayojja jama ohuaya e'e jojo nei acaje'yo. Jamajjeya miquianaya onijje jjapeequi meesahua caje'yo tii tii quea ja'a nee, ohuaya. Edosiquiaa miya napa cajo, quea mimishi po mee sa acajo, ohuaya miquianaya jaahuana tiitii caje'yo; quea pame nee ba'e meesahua caje'yo. <sup>4</sup> Ecuana eba esejaya Emeshi Mese neija, Jesusaa miquianaya jaahuana cani. Jamajjeya miquianaaya ecuanaja esohui pajea'yo jjima aje; atiitiije'yo pea'ai. E'e, jamaya ecuanajaya eba. <sup>5</sup> Ecuana Eyacuiñajji nijje mimiani miquianajo jama ba'a: —Eyacuiñajji, ecuanaja Chii, miyaya Jesusaja epeeji cuana Tesanonicajo ba'e quea jea nee añajo. ¡Maya oya cuana ba meesahuacue! Ecuana Emeshi Mese nei Jesosa meshijo ba'yahua quea nee nee poanaje mimishi cuana napa caje. Jamatii ohuaya miya pajea'yo ajja tii tii poanaje, quea quene nee nee po jjima pea'ai. ¡Jesosa Quito jayojja jama ojaya epeeji cuana po meecue! Jamajjeya mimishi cuana napa cajo Jesosa nijje jjapee tiitiiquije'yo. ¡Jamaya oe meesahuacue cuana, Eyacuiñajji! —jamaya ecuana Eyacuiñajji nijje mimiani.

*Ojjaña cachaco cahua*

<sup>6</sup> Epeeji cuana, jjeaya ecuanaja pea esohui shajja'ajjacue! Eseyaya Emeshi Mese nei Jesosa Quitohua ecuana huohui meesahua cani jama ba'a: —¡Jesosaja epeeji quea huea cuana nijje a'a jjapeequijji! Ma epeeji quea huea cuana chacochocho ajja, ecuanaja esohui jayojja jama ba'e sa po'yo ajja, jjashajja'ajjaqui ajja pea'ai. <sup>7</sup> Miquianaaya ecuana banaje miquiana nijje nequiya chaco tiitiinaje, huea'ama poanaje. ¡Ecuana jayojjaya jama pocue; huea'ama chaco tiitiicue! <sup>8</sup> E'e, ecuaaya miquianajaya aquiana eba'ejji jjeshe majje sosequianaje; sosema' pojjeama jjeshenaje. Mecajje, epojjajo pea'ai chaco tiitiinaje ejjeshejji sosejje, bobi jjeshejji. Jamajjeya miquianajaya bobi cuana jjeshe jjima sosema'. <sup>9</sup> Jesosaa ecuana huoojea canaje ojaya esohui huohuiya. Jamajjeya esohui huohuiaña sosejje ecuaaya miquianaya cahuohuiahua jama ba'a: “¡Ecuana eba'ejji quiacue sosema', esohui huohuiaña sosejje!”

Jamatii ecuaaya miquianaya jamaya ajjima nei nei. Chojja, ecuaaya chaconaje aquiana jjeshejji. Jamaya quea pame nee. ¡Ecuana jayojjaya jama pocue! ¡Miquianaaya chacocue! <sup>10</sup> Miquiana nijje ba'yahuaa ecuaaya huohuinaje jama ba'a: —Ojjaña joya quea huea poani, chacochocho sa po'yo ajja aje oe ¡a'a bobiajji!

<sup>11</sup> Epeeji cuana, onaaya ecuana huohui canaje jama ba'a: —Jesosaja epeeji cuana Tesanonicajo ba'e quea huea poani beca cuana. Pea cuanajo maimaiani, quea miminaa poani, chacochocho sa po'yo ajja tii pea'ai. Jamaya quea pame pojjeama poani.

<sup>12</sup> Jamajjeya esejaya Emeshi Mese neiya, Jesosa Quitohua ecuana huohui meesahua cani ojjaña quea huea poani yasijje jama ba'a: —¡Eyacuiñajji esohui jayojja jama ba'ecue! ¡Quea bei pocue! ¡Chacocue oe! ¡Bobi miquea tii ijjiacue! —jama huohuimeya ecuaaya ña joya quea huea poanijo.

<sup>13</sup> Ecuea epeeji cuana, miquianaaya pea cuana quea pame nee ña. ¡Jamaya quea pame nee atiitiicue! ¡A'a quea huea pojji!

<sup>14</sup> Beca cuana jiquio esohui etehue'yo jayojja jama a sa po'yo ajja pojja'a. ¡Shajjama' cuana ba neineicue! ¡Ona nijje a'a jjapeequijji! Jamajjeya shajjama' cuana quea bicho poaje ojaya mimishi cuanajo. Quea bicho po majje jjashajja'ajjaquije pojja'a. <sup>15</sup> Jesosaja epeeji cuana quea mimishi poanijo, shajjama' poanijo ¡jamatii a'a quea quene nee nee pojji onijje! Chojja. Oya cuana miquea epeeji. ¡Huapa pojjeama jayojja jama oya cuana niñeshe'acue!

*Pabohua esohui quea bihui nee huohui canaje*

<sup>16</sup> Ecuea epeeji cuana, ¡bacue ecuea pea esohui! Eya Eyacuiñajji nijje mimiani miquianajo jama ba'a: —Eyacuiñajji, ecuanaja Emeshi Mese nei, miyaya ecuana quea bei po mee tiitiiaña. Jamajjeya ¡miquea epeeji cuana Tesanonicajo ba'e quea bei nee nee po meecue, quea bei tii tii! ¡Oya cuana jaahuanacue, quea pame nee ba'e meesahuacue! —jamaya eya poani.

<sup>17</sup> Eya Pabo. Eyaya ca eya jiquio esohui quea bihui nee tehue'yonaje miquiana huasijje. Jamaya eyaya ecuea bajjani tehueña ojjaña ecuea esohui etehue'yojo. Jamajjeya ¡miquianaaya bacue jiquio esohui ecue tehue'yo!

<sup>18</sup> ¡Eseyaya Emeshi Mese neiya Jesosa Quitohua miquianaya quea pame nee cajaanuana cahua!

Mahuiso ecuea esohui. Apoa.

## PABOJA ETEHUE'YO TIMOTEO HUASIJJE EBIONEI 1 TIMOTEO

### *Pabohua esohui tehue canaje Timoteo que*

<sup>1</sup> Timoteo, eyaya esohui tehueña mi que miquea ebajji. Eya Pabo, Jesosa Quitoja esohui huohuijji. Jamaya Eyacuiñajjiya, Jesosa Quitohua pea'ai eya huoojea canaje. Eyacuiñajjiya esejaya mimishi cuana cuijea jeyojeyo ca'yonaje. Jesosa Quitohua eseya ba'e tiitii mee caje'yo onijje, esejaya ejjashahuabaqui'yojji quea pame jayojja. <sup>2</sup> Timoteo, miya ecuea ebacua ejja jayojja poani Jesosa nijje jjapeequianijo. Jamajjeya eyaya esohui tehueña mi que.

Eyacuiñajji esejaya Chii ai eyajo ani; Jesosa Quito esejaya Emeshi Mese nei poani pea'ai. ¡Ohuaya miya cajuahuana cahua quea pame nee! ¡Mijo cajjashahuabaqui'yahua quea pame nee pea'ai! ¡Miya quea bei nee capo mee cahua pea'ai!

### *¡Esohui e'e nei pojjeama a'a shajja'ajjajji!*

<sup>3</sup> Timoteo, ecuea esohui minijje Masenonia meshi yasijje poquianijo jama eyaya huohuije o'oya ba'a: ¡Epeso cuiñajjijo nequicue! Jamajjeya miyaya pea esohui huohuijji cuana huoojeacue jama ba'a: —Esohui e'e nei pojjeama Jesosajo ¡a'a huohui o'oyajji! Esohui e'e nei pojjeama cuana, esohui quea huiso etiiquianaja pea'ai ¡a'a shajja'ajjajji!

<sup>4</sup> Ma esohui cuanao jjashahuabaqui majje dejja cuana mimicuijjeanobiajea cani cuaa. Jamajjeya ¡oya cuana e'e jojo nei Jesosaja epeeji cuana ca ca jjabahuejja neinei qui meecue! ¡A'a oe esohui quea quehua shajja'ajjajji! <sup>5</sup> E'e, Eyacuiñajjiya esohui esohui huohuijji cuana jjashahuabaqui majje mimishi a sa po'yo ajja poani. Quea jjashahuabaqui pame poani pea'ai. Jamajjeya Jesosaja esohui e'e jojo nei jama acanijo pea'ai pea cuana e'e jojo nei quea jea nee acaje'yo. <sup>6</sup> Jamaya po ajja esohui huohuijji shaja. Jamajjeya oya cuana esohui quea ja'a pojjeamajo mimimimiani. <sup>7</sup> Moisesija esohui etehue'yojo huohui sa poani. Ma esohui ojaya ba jjima; quea quehua ojaya. Jamatii mimi neinei ani esohui huohuijji shaja cuana.

<sup>8</sup> Jamaya esejaya eba ba'a: Moisesija esohui etehue'yo cuana quea pame nee. ¿Apiojji acuae Moisesiya esohui tehue ca poa? Quea jjashahuabaqui ja'a po majje ca oe ¡Moiseija esohui etehue'yo jayojjaya jama acue! <sup>9</sup> ¡Bacue oe! Eyacuiñajjiya Moisesi esohui tehue mee ca poa dejja quea pame tecueajji pojjeama. Cho, tehue mee canaje shajjama' cuana tecueajji. Dejja shajjama' jama poani ba'a: Esohui etehue'yo jayojja jama a'ajja; emeshi meseja esohui jama a sa po ajja pea'ai; Eyacuiñajji shajja'ajja sa po ajja; quea tai ba'yani; quea jjashahuabaqui tai poani; Eyacuiñajjiyo jjashahuabaqui ajja; oja chii quecuajji poani; oja nae quecuajji poani; pea cuana quecuajji poani pea'ai. <sup>10</sup> E'e, shajjama' cuana pea cojjojji poani; pea dejja see huejja cojjojji poani; pea epona so cojjojji poani; peaja ebacua sii majje quiajji poani; pea jeameejji poani; sjajjepojji poani; oya esohui pajea'yojji poani; peaja esohuijo sjajje poani pea'ai; Eyacuiñajjiya esohui etehue'yo jama po ajja pea'ai. <sup>11</sup> E'e, jiquio Moisesija etehue'yo Eyacuiñajjiya esohui quea pame nee nee. Maya eya Eyacuiñajjiya huohui meesahua cani. Oya quea ca'a nee nee; oe nei quea pame nee nee eya jaahuana cani, Eyacuiñajjiya.

### *Eyaya Jesosa Quito bihuiaña ohua sohuihuohui meesahua caniya jjejojo*

<sup>12</sup> Eseyaya Emeshi Mese nejja, Jesosa Quitoja eba ojaya esohui pajea'yo ajja tii tii, eya. Jamajjeya ohuaya eya huoojea ca'yonaje ojaya esohui huohuiya. Jamajjeya eyaya Jesosa Quito bihuiaña ohua sohuihuohui meesahua caniya jjejojo. <sup>13</sup> Yahuajo aje eya Jesosa nijje mimijaji'yonaje, ojo quea tai miminaje, ojaya epeeji cuana iña mee'yonaje ejeanobiajeajji. Jamatii, eya jjashahuabaqui jjimahua, oya ecuea ba jjimahuajo, Jesosa Quito ejo quea tecue jjashahuaba tiitiiqui'yo ajja poanaje, de; <sup>14</sup> ejo quea pame nee



jjashahuabaquinaje de, esejaya Emeshi Mese nei, Jesosa Quito. Jamajoya jjeya eya ojaya epeeji nei poani; ohuaya eya quea jea nee nee acani, de.

<sup>15</sup> ¡Bacue jiquio esohui e'e nei nei, quea pame nee poani! Ojjaña cuaa caba neinei cahua jama ba'a: Jesosa Quito jiquio meshi yasijje poeyanaje ojjaña cuanaja mimishi cuana cuijea'yohua. Eya jamaya jjashahuabaquiani ba'a: Ojjaña dejja cuana quea mimishi pishana; eya ca ca quea mimishi nee nee poanaje. <sup>16</sup> Jamatii Jesosa Quito ejo quea pame nee jjashahuabaquinaje, de. Jamajjeya oya enijje tecue'ama poanijo, pea cuaa ba cani oya tecue'ama enijje, oya tecue'ama dejja mimishi cuana nijje, ca onijje japeequi'yajo. Ba'e tiitii mee caje'yo Eyacuiñajji nijje.

<sup>17</sup> ¡Emeshi Mese nei ejjashajja'ajjaqui! ¡Ejjabihuia tiitiiqui pea'ai! Eyacuiñajji ese huoojeajji poani nequi tiitiiye'yo. E'e, oe nei nei Eyacuiñajji yani; pea chama'. Jamajjeya oya dejja cuanaja ecojja bajji pojjeama. Jamaya capoahua.

### *Jamaya pea cuana cahuohui cahua Timoteohua*

<sup>18</sup> E'e Timoteo, miya ecue bacua ejja jayojja jama poani. Jamajje eyaya miya huoojeaña ecuea esohui huohuiya pea esohui huohuijji cuana huasijje. Yahuaajo pishana pea cuaa miya huohui canaje jama ba'a: —Timoteo, quijje miya esohui huohuijji quea pame nee nee poaje'yo —acanaje cuaa miya.

Jamajjeya jesohui e'e jojo nei janobajjima nei huohuicue quea bihui nee, dejja quea ca'a jayojjaa! <sup>19</sup> ¡Eyacuiñajjija esohui e'e nei shahuaba neineicue! ¡Quea ja'a nee ba'ecue e'e jojo nei ojaya esohui jayojja jama! Beca cuana jama a sa po'yo ajja jjejojo poquiquehua'yonaje. Jamajjeya aema' nei nei jayojja jama poanaje. Esohui e'e jojo nei pajea ca'yonaje, Jesosa Quitoja. <sup>20</sup> Jamaya poanaje dejja bajjani Imeneo, Anejano cuanaya. Jamajje eyaya oya cuana cajaa a'yonaje. ¡Edosiquiaa canapa cahua! Jamajjeya j'oya cuana cajjabahuejjaquiahua Eyacuiñajji nijje emimijaji pajea'yojji!

## 2

### *Jesosaja epeeji cuana ojjaña cuanajo camimiquiahua Eyacuiñajji nijje*

<sup>1</sup> Ebonei eyaya huohuiaña jama ba'a: ¡Eyacuiñajji nijje mimicue! Eseyaya cuana Eyacuiñajji nijje camimiquiahua ojjaña cuanajo. Jamajjeya Eyacuiñajjija epeeji cuana jama amecue ba'a: —Ecue Chii ai, Eyacuiñajji, jeya ba'e meesahuacue! ¡Ojjaña cuana ba'e meesahuacue pea'ai! Ecuaya miya bihuiaña. <sup>2</sup> Jamajjeya ¡ojjaña cuana jaahuanacue! ¡Emeshi mese cuana, emeshi meseja echacojji cuana pea'ai huohui meesahuacue quea bei nee! Jamajjeya ecuanaya miquea esohui jayojja jama quea ja'a nee ba'yanijo quea bei nee nequije'yo —jamaya acue cuana.

<sup>3</sup> E'e, jamaya onijje mimianijo Eyacuiñajji quea bihui nee po meeña, eseyaya. Ohuaya esejaya mimishi cuana cuijea ca'yonaje, de. <sup>4</sup> Ojjañaja mimishi cuana cuijea neinei'yo sa poani pea'ai. Ojaya esohui e'e nei ba meesahua sa poani pea'ai. <sup>5</sup> Oya ojjaña nahue sa poani. E'e, Eyacuiñajji e'e jojo nei oe nei yani dejja cuiñajji. Cuanaya oe nei yani Jesosa Quito. E'e, Eyacuiñajji dejja quea mimishijo quea tecue poani. Jamajjeya Jesosa Quito Eyacuiñajji nijje mimiani ojjaña dejja mimishi cuanajo. Eyacuiñajji quea bei ona nijje poaje'yo. Jesosa Quito Eyacuiñajji; oya dejja pea'aiya poanaje. <sup>6</sup> Oya mano'yonaje ojjañaja mimishi cuijea mee'yojji sosejje. Jamaya oya sa poanaje. Jamajjeya ojjaña cuana ba'e tiitii mee sa poani Eyacuiñajji nijje eyajo. <sup>7</sup> Jamajjeya Jesosaa huoojea canaje ojaya esohui huohuiya. E'e jojo nei, sijje pojjeama, ohuaya eya huoojea ca'yonaje Jodio pojjeama cuana huasijje ojaya esohui e'e nei huohuiya. Jamajjeya ojjaña cuana eyaya Jesosajo jjabahuejjaqui meeje'yo.

### *Jamaya ca'a cahua Eyacuiñajjija equijo*

<sup>8</sup> Majoya eyaya miya huohuiaña jama ba'a: Eseyaya, ojjaña meshi cuanajo ba'e cuana pea'ai camimiquiahua Eyacuiñajji nijje ojaya equijo. Onijje mimianijo ja'a quea mimishi pojji! ¡A'a quea quene pojji pea cuana nijje! ¡A'a jjamimicuijjea nobiajeaquijji pea'ai!

<sup>9</sup> Majoya eyaya miya huohui meeaña epona cuana jama ba'a: —Epona cuana, ¡daqui quea pame nee huoshocue! ¡A'a daqui huoshojji quea bicho epo mee'yojji! ¡Aquiana quea nahue neeya ehoojja a'a ijia ca'a meejji! ¡Mei siyosiyoy quea nahue nee nee, eijji quea nahue nee nee pea'ai a'a yijji! ¡Daqui quea nahue nee nee a'a huoshojji pea'ai, eponaa! —jamaya acue, Timoteo, jamajjeya peaja eja bajji pojjeama.

<sup>10</sup> Timoteo, ¡epona cuana jama acue pea'ai ba'a: —Epona cuana, ¡miya Eyacuiñajji bihuiajji poanijo quea ja'a nee nee ba'ecue! <sup>11</sup> ¡Jjabahuejjaquicue, Jesusaja epeeji nei pocue! ¡Esohui huohuijjiya esohui huohui canijo jjashajja'ajjaquicue! ¡A'a mimi neineijji! —jamaya epona cuana acue!

<sup>12</sup> Eyaya epona cuana huoojea ajja dejja cuana huasijje esohui huohuiya. Cuanaya ¡ja'a dejja cuana huoojeajji eponaa! Cho, jamaya quea pame pojjeama. Epona ca oe cajjashajja'ajjaquiahua. <sup>13</sup> E'e, Eyacuiñajjiya ebionei dejja Adana bajjani pana coo ca'ya poa. Majoya Adana pana'yo majje epona Ema bajjani pana ca'ya poa. <sup>14</sup> Edosiquianaja Adana dasia'yo jjima poa; epona ca ca oe dasia ca'ya poa. Dasia cajje shajjama' poanaje. Quea mimishi aca'yonaje Emaa. <sup>15</sup> Jamajjeya bacua cuayanijo epona quea nee nee poani. Jamatii, Eyacuiñajjiya eponaja mimishi cuana cuijea caje'yo pea'ai ca ojaya esohui jayojja jama jjashahuabaquianijo, ojaya epeeji poanijo. (Eyacuiñajjiya epona cuana cuaqui yasijje huoojea ajja ojaya epeeji cuana poanijo.)

### 3

#### *Jesosaja epeeji jaahuanajji cuana jamaya capoahua*

<sup>1</sup> Timoteo, ¡pea esohui shajja'ajjacue! Jiquio esohui e'e nei, ba'a: Dejja cuana Jesusaja epeeji cuana jaahuana sa poanijo, jamaya quea pame nee. <sup>2</sup> E'e Timoteo, jamajjeya miyaya Jesusaja epeeji jaahuanajji epojji jama huohuicue ba'a: —¡Quea pame nee ba'ecue! Jamajjeya peaa miya etecueajji pojjeama. ¡Ehuanase oe nei huanacue! ¡Quea ja'a nee jjashahuabaquicue, yajjajja'ama! Jamajjeya quea mimishi ba'e ajja. ¡Quea pame nee pea'ai ba'ecue pea cuana nijje! ¡Jjapeequicue pea cuana nijje! ¡Quea ja'a nee Eyacuiñajjiya esohui huohuicue! <sup>3</sup> ¡Ecahuishi, ejjisese quea sese nee nee a'a ishijji! ¡A'a jjacuaquijji! Cho. ¡Quea bei pocue ojjaña nijje! ¡A'a quea tecue pojji! ¡A'a quea bejjo huiso sa pojji! <sup>4</sup> Ojjaña cuana miquea equijo ba'e jaahuanacue jama ba'a: ¡Miquea ebaqua cuana miquea esohui jayojja jama po meecue! ¡Jjashajja'ajjaqui meecue pea'ai! —jamaya Jesusaja epeeji jaahuanajji epojji acue, Timoteo.

<sup>5</sup> E'e, Jesusaja epeeji jaahuanajjiya ojjaña cuana ojaya equijo ba'e jaahuanahuana ajjajo Jesusaja epeeji cuana jaahuana ajja pea'ai poaje. <sup>6</sup> Timoteo, ¡Jesusaja epeeji jjeya nei jjapeequi a'a huoojeajji Jesusaja epeeji jaahuanaa! Oya shajjama' po chana'; quea ja'a huohui ajja. Jamajjeya Eyacuiñajjiya oya tecuea ca chana'. Jamaya Eyacuiñajjiya Edosiquiana shajjama' poanijo tecueajea ca'yonaje yahuajo nei nei. <sup>7</sup> E'e, Jesusaja epeeji jaahuanajji quea huiso shequiajajo jjapeequiani caba'eyahua quea pame nee. Jamajjeya Jesusaja epeeji pojjeama cuaa ojo huohui caje jama ba'a: —E'e, oya dejja quea pame nee poani tii.

Oya quea tai poajo ca ca pea cuaa oya tecueajea caje'yo. Edosiquianaa pea cuana onijje mimijaji mee ca chana', dasia ca chana'. Jamajjeya onaa tecuea cajje quea yeno po majje quea mimishi po chana'.

#### *Jesosaja epeejji eba'esahuajji cuana jamaya capoahua*

<sup>8</sup> Timoteo, ¡Jesusaja epeejji eba'esahuajji cuana babacaquicue! Jama acue cuana ba'a: —¡Quea ja'a nee ba'ecue! ¡E'e jojo nei nei mimicue! ¡A'a quea huiso ishijji, a'a huoojji! ¡A'a quea dejja tai pojji! ¡A'a edasiaajji pojji pea'ai! <sup>9</sup> ¡Ojjaña Eyacuiñajjiya esohui e'e nei jama atiiticue quea ja'a nee! Yahuajo ma esohui Eyacuiñajjiya dejja cuana ba meesahua jjima; jjeya ba mee cani quea huiso —jamaya oya cuana acue, Timoteo.

<sup>10</sup> Cuanaya ¡Jesosaja epeejjija eba'esahuajji cuana babaca jjimahua oya ba neineicue! ¡Oya jjabahuejjaqui meecue pea'ai! ¡Quea pame nee poanijo, oya huoojeacue Jesosaja epeeji ba'esahuaa!

<sup>11</sup> Jesosaja epeejjija eba'esahuajji cuanaja ehuanase cuanaya jama acue ba'a, Timoteo: —¡Quea ja'a nee ba'ecue, epona! ¡A'a quea mimijjequijea pojji! ¡A'a ishi'ishijji! ¡Jesosaja epeeji cuana ba'e meesahuacue; nishehui'ama pocue! —jamaya miyaya oya cuana acue, Timoteo.

<sup>12</sup> E'e Timoteo, Jesosaja epeejjija eba'esahuajji babaca majje oya cuana jiquio jama acue ba'a: —¡Oe ehuanase huanacue! ¡Miquea ebacua cuana, ojjaña miquea equijo ba'e pea'ai jaahuanacue quea ja'a nee! <sup>13</sup> E'e, miyaya quea ja'a nee Jesosaja epeeji ba'esahuaña, onaaya miya ojjaña shajja'ajja caje quea bihui nee. Jesosa Quitoja esohui bicho'ama nei huohuime aje, ¡quea ja'a nee acue!

E'e Timoteo, ¡Jesosaja epeeji quea pame nee babacacue Jesosaja epeeji ba'esahuajji! Jamaya apoa.

*Eyacuiñajjija equijo ojaya epeeji jamaya capoahua*

<sup>14</sup> Timoteo, jiquio pea esohui cuana eyaya tehueaña mi que. Eya mi baa poqui sa poani quijje pishana. <sup>15</sup> E'e pojja'a jjeya eya epoquijji pojjeama mi que. Jamajjeya eyaya mi que esohui tehueaña mi huohuijji achajja Jesosaja epeeji cuana poaje so'lo quea pame nee epojji. Ecuea esohui etehue'yojo miyaya ba meeje cuana. E'e, Eyacuiñajji ca ca enequi eshe tii tii. Ojaya epeeji cuana ojjaña meshijo ba'yani. Oya cuana Eyacuiñajjija huapa pojjeama jayojja jama poani. Ojaya esohui e'e nei ojjaña cuana ba meesahua cani, Eyacuiñajjiya. <sup>16</sup> Jamaya e'e jojo nei ba'a: Eyacuiñajjija esohui e'e nei, quea pame nee nee. Ma esohui yahuajo ojaya ba mee jjima poa. Jjeya ojaya esohuijjo eseya quea ja'a nee ba'eje'yo. Jamaya ojaya esohui Jesosa Quitoja ba'a:

“Eyacuiñajji jiquio meshi yasijje poeyanaje; dejja jayojjaya yamijji ba'ya poa. Edo-jjoshahua Pameya huohui canaje quea pame nee oya. Eyacuiñajjija esohuidojojji cuaa oya ba canaje. Ojaya epeeji cuaa ojo huohui canaje Jodio pojjeama cuana huasijje. Quea huiso dejja cuaa ojjaña meshi cuanajo oja sohui shajja'ajja majje jjabahuejjaqui ca'yonaje. Quijje Eyacuiñajjiya oya jjequisohua ca'yonaje eya huasijje”.

Jamaya yahuajo nei Isaiaa tehue ca poa.

4

*Beca cuana Eyacuiñajji nijje poquipajeanaje*

<sup>1</sup> Timoteo, pea esohui eyaya huohuije esohui huohuijji nishojo. Yahuajo nei Edo-jjoshahua Pameya huohui ca poa jama ba'a: —Quijje Jesosa Quito poe o'oya jjimahuaajo, Eyacuiñajjija esohuijjo jjabahuejjaqui majje beca cuaa ojaya esohui jayojja jama apajea caje'yo. Eshahua cuana shajja'ajja caje. Eshahua esohui tai cuana jayojja jama acaje. Eshahua cuana aje oe jjadasiaquijji, de. <sup>2</sup> Ojaya esohui e'e nei pojjeama. Eshahua cuaa beca dejja cuana siajje po mee cani. Jamajjeya ma dejja cuana siajje po majje bicho'ama poani. <sup>3</sup> Jama siajje pome poani ba'a: —¡Eponajo a'a jjahuanajji! ¡A'a beca bobi cuana ijji! quea ajja coma! ¡Eshahuaa cuia caje! —poani.

<sup>4</sup> Chojja. Eyacuiñajjiya ojjaña bobi cuana pana ca'ya poa e'ijji! quea pame nee. Jamajjeya Jesosaja epeeji cuaa esohui e'e nei ba majje, Eyacuiñajji bobijo bihuia majje pea'ai ojjaña bobi quea pame cuana ca'ijji cahua. <sup>5</sup> Jamajjeya Eyacuiñajji nijje mimi majje, ojaya esohui mimi majje pea'ai quea jaji nee ca'ijji cahua bobi cuana.

*¡Jesosaja echacojji quea pame nee pocue!*

<sup>6</sup> Timoteo, pea esohui eyaya tehueaña mi que Jesosa Quitoja jama ba'a: ¡Esohui cuana ojo Jesosaja epeeji cuana huasijje huohui majamajacue miyaya! Jamajjeya oya cuana ba'e meesahuaje quea pame nee. ¡Eyacuiñajjija esohui e'e nei cuana ba huicha'a huicha'acue! Miya ojaya esohui huohuijji quea ja'a nee poaje pea'ai. Ma esohui e'e

nei Jesosa Quitojo yahuaajo shajja'ajja majje jamaya ahuicha'a'yonaje miyaya, Timoteo. <sup>7</sup> ¡Etiiquianaja esohui quea quehua a'a shajja'ajjajji, Eyacuiñajjija esohui cuana jayojja jama pojjeama! Onaajaya esohuiya quea pame ba'e mee nisho cani. ¡A'a jamaya pojji! Timoteo, ¡miyaya oe Eyacuiñajjija esohui jayojja jama amajamajacue! <sup>8</sup> Jamaya acue ba'a: Chaco tiitii majje miquea eyami quea ca'a poaje. Jamaya quea pame pishana. Eyacuiñajjija esohui jayojja jama atiitii majje ojaya epeeji quea ja'a poaje. Jamaya quea pame nee nee. Jamaya poanijo Eyacuiñajjiya miya jjeyahua nei quea pame nee ba'e mee caje; mano'yajo, ba'e tiitii mee caje'yo eyajo pea'ai.

<sup>9</sup> E'e, jiquio esohui e'e nei nei. Jamajjeya ¡ojjaña cashajja'ajja tiitii cahua! <sup>10</sup> Jamajoya Eyacuiñajjija esohui e'e nei poanijo ecuana janobajjima nei Jesusaja epeeji cuanajo chacochoani. Pea ecuana nijje janobajjima mimijajiani. Jamatii Eyacuiñajji eshe yani; o epoe o'oyajjijo ecuaaya ishoa'ajjaña. Ohuaya ojjaña onijje jjapeequi mee'yo sa acani. Ojjaña joya e'e jojo nei poani ohuaya mimishi cuijea caje'yo. <sup>11</sup> Jamajjeya ¡jiquio esohui cuana huohui neineicue! ¡Ojjaña cuana jjabahuejjaqui meecue miyaya, Timoteo!

*¡Quea pame nee ba'ecue, Timoteo!*

<sup>12</sup> Timoteo, miya edejja sho'i pishana poani. Jamatii pea cuaa miquea esohui cashajja'ajja cahua. Jamajjeya ¡quea ja'a nee Jesosa Quitojo mimicue, miya! ¡Quea jaji nee oe pocue! ¡Pea cuana quea jea nee acue! ¡Eyacuiñajji nijje jjapee tiitiquicue e'e jojo nei! ¡Ojaya epeeji nei nei pocue! ¡Quea jjashahuabaqui ja'a nee oe pocue pea'ai! Jamajjeya ojjaña Jesusaja epeeji cuana mi jayojjaya poaje. Quea pame nee nee acaje'yo cuaa.

<sup>13</sup> Eya, Pabo poeje quijje pishana mi baa. E poe jjimahuajo, ¡Eyacuiñajjija esohui huohuicue ojjaña joya Jesusaja epeeji ejjachichacui ani yasijje! ¡Ojjaña cuana jjabahuejjaqui meesahuacue; Jesusaja esohui ba meesahuacue pea'ai! <sup>14</sup> Yahuaajo Jesusaja epeeji etii cuaa miya huoojea sa poanijo mijo huohui canaje jama ba'a: —Timoteo quijje esohui huohuijji quea pame nee poaje'yo.

Jamajjeya onaa huoojea caje miya Eyacuiñajjiya esohui huohui meesahua canaje. ¡Maya a'a paje'yojji! ¡Jamaya po tiitiquicue Eyacuiñajjijo! <sup>15</sup> Jamajjeya ¡Eyacuiñajjija esohui ba neineicue! ¡Ojaya esohuijjo jjashahuaba tiitiquicue pea'ai! Jamajjeya ojjaña miya ba caje jjeya esohui ba neinei'yonaje; yahuaajo miquea bajea jjima poanaje.

<sup>16</sup> E'e, ¡miquea esohui jayojja jama ba'e tiitiquicue quea pame nee! ¡Esohui e'e nei huohui huicha'a huicha'acue! Jamajjeya miya poquiquehua ajja eshahuaaja ejiojji tai yasijje. Pea cuana miquea esohui shajja'ajja majje cuaqui yasijje epoqui'yojji pojjeama pea'ai.

## 5

*¡Jamaya ba'ecue Jesusaja epeeji cuana nijje!*

<sup>1</sup> Pea esohui eyaya, Pabohua tehueña mi que, Timoteo: ¡Edejja tii a'a tecueajji! ¡Quea jea acue! Quea mimishi poajo, ¡onijje mimicue, mique chii nijje jama mimimeya pocue! ¡Oya ba meesahuacue pea'ai! ¡Mique chahua jayojja jama jaahuanameya acue esho'i cuana! <sup>2</sup> ¡Epona tii nijje mimicue quea pame nee! Quea mimishi poajo, ¡miquea enaese nijje mimiani jayojjaya jama mimimeya pocue! Epona sho'i cuana quea mimishi poajo, ¡mique jjo'i nijje jayojja jama mimimeya oe pocue! E'e, ¡epona cuana nijje oe quea pame nee nee pocue!

*E'ahuemano cuanajo huohui canaje Pabohua*

<sup>3</sup> Timoteo, miyaya Jesusaja epeeji cuana e'ahuemanojo jama huohuicue ba'a: — ¡E'ahuemano cuana ba'e meesahuacue quea pame nee, ca ebacua etii chamajo! <sup>4</sup> E'ahuemanoja ebacua cuana yanijo, oja osecua cuana yanijo ohuaya cajaanahua cahua oja nae; oja yano mese cuanaya cajaanahua cahua oja equijo. Nishehui'ama capoahua. ¡Oja chii etii, oja nae epona tii po'yajo pea'ai cabobia cahua! Esho'yahua eseya eseya naeya bobia ca poa. Jamaya eseyaya eseya nae aje'yo ohua jaahuana ca poa sosejje. Jamaya Eyacuiñajjija quea boti nee nee. <sup>5</sup> Beca e'ahuemano quea yeno nee nee poani; oja bacua

cuana chama', oja osecua cuana pea'ai chama'. Jamajjeya e'ahuemano aema' Eyacuiñajji nijje jjapeequiani. Ebacua etii chamajo Eyacuiñajji nijje mimi huicha'a huicha'ani ojjaña pojjaajo, mecajje pea'ai. Onijje mimiani pea cuanajo pea'ai. Jamajjeya Eyacuiñajjiya pea cuana ba'e meesahua cani quea pame nee.

<sup>6</sup> Beca cuana e'ahuemano quea mimishi poani. Yajjajja'ama. Poquiquehuani cuaqui yasijje, Eyacuiñajji nijje jjapeequi jjima jayojja jama poani. <sup>7</sup> Jamajjeya jiquio esohui cuana huohuicue e'ahuemanoja bacua cuana huasijje, Jesusaja epeeji cuana huasijje! Jamajjeya pea cuanaja oya cuana etecueajji pojjeama. <sup>8</sup> E'e, esejaya huapa pojjeama cuana, ojjaña eseja equijo ba'e mi jaahuana majje eseyaya Eyacuiñajji cajaa año. Jamaya quea tai nee nee. Pea cuana Eyacuiñajjiya esohui ba po jjima cuana ca ca quea tai pishana poani.

<sup>9</sup> Jamajjeya ¡Jesusaja epeeji e'ahuemano quea pame nee miqianaaya ba'e meesahuacue! Ca joya jama ba'yani ba'a: E'ahuemano epona tii, pea beca peejjima dejjaja pea ejiojji cuana huiso shequiajame, 60 shequiajame etii; pea yahuejo jjahueaqui'yo jjima; <sup>10</sup> ojjaña cuana ojo quea pame mimianijo pea'ai, ohuaya ebacua quea pame nee tii mee ca'yonajejo, pea cuana ojaya eba pojjeama bobia canajejo pea'ai, pea cuanaja equi shabojeajji epo pea'ai; emanojaa cuana jaahuana canajejo pea'ai, quea pame nee ahuicha'a huicha'a ca'yonajejo pea'ai, ¡ma e'ahuemano ba'e meesahuacue quea pame nee! E'e, oja bajjani catehuequiahua pea e'ahuemano etii quea pame cuana nijje Jesusaja epeeji cuanaja eba'e meesahuajji.

<sup>11</sup> Ecuena ehuohuijji e'ahuemano etii pishanajo jama ba'a: E'ahuemano cuana etii pishana ca ca e'ahuemano etii nei jayojja jama pojjeama; chacochocho ajja Jesosa Quitojo. ¡A'a ojaya bajjani tehuejji pea e'ahuemano etii quea pame nijje! Quea dejja jea po o'oya majje jjahueaquiye o'oya. Jesosa Quito nijje jjapeequi pajea'yo chana'. <sup>12</sup> Jamajjeya beca cuana ojaya esohui ma ecua oya Jesosa Quito nijje poanaje jama e'ajji pojjeama. E'e, yahuaajo ohuaya huohui canaje jama ba'a: —Ecuana ejjahueaqui o'oyajji pojjeama; Jesosa Quitojo nei chacochochoje'yo tii tii —poanaje.

Ma o Jesosa Quito nijje jama miminaje pajea ca'yonaje. Jamajjeya Jesusaja epeeji cuaa oya cuana tecuea caje'yo. <sup>13</sup> E'ahuemano esho'i pishana chacochocho ajjajo quea huea poaje. Poqui majamajaje ojjaña equi cuana huasijje anicuaa. Pea cuana niñeba caje pojja'a. Ojjaña cuanajo quea miminaa nee nee poanijo mimijaji chana'. <sup>14</sup> Timoteo, jamajjeya eya e'ahuemanojo jjashahuabaquiani jama ba'a: E'ahuemano cuana etii pojjeama cajjahueaqui o'oyahua. Ojaya ebacua cuana catii mee cahua; oja equijo cachacochochoquiahua pea'ai. Jamaya poanijo mimishi'ama nei. Jamajjeya Jesusaja epeeji pojjeama cuana ojaya epeeji cuana nijje tecuetecue ajja poaje. <sup>15</sup> Eya jamaya mimiani oe pojji e'ahuemano cuana nijje, ma Jesosa nijje jjapeequi pajea'yani nijje, Edosiquiana nijje jjapeequi sa poani nijje pea'ai.

<sup>16</sup> Jamajjeya Jesusaja epeeji cuaa e'ahuemano oja huapa pojjeamaa cahaahuana cahua ojaya equijo; ¡a'a oya Jesusaja pea epeeji cuana jaahuana meejji! Jamajjeya Jesusaja epeejiya e'ahuemano jaahuana caje, ca joya ebacua etii chamajo.

#### *Jesosaja epeeji jaahuanajji etii*

<sup>17</sup> Jesusaja epeeji jaahuanajji cuaa Jesusaja epeeji quea pame jaahuana canajejo, caba'e meesahua cahua Jesusaja epeeji cuaa. E'e, ohuaya Eyacuiñajjiya esohui etehue'yo huohui canaje; onaya jjabahuejjaqui mee canaje pea'ai. Jamajjeya ¡caba'e meesahua cahua cuaa! <sup>18</sup> E'e, yahuaajo nei jamaya Moisesija esohui etehue'yo poa ba'a:

“Ana'aiya anoso ai dojo cani edaasa biajje. ¡Jamajjeya anoso ai oe pojji quiacue e'ijjajji!” Yahuaajo nei jama poanaje pea'ai ba'a: “¡Echacojjiya chaco cajo sosequiacue!” Jamajjeya ¡Jesusaja epeeji jaahuanajji sosequiacue ohua chaco canaje sosejje!

<sup>19</sup> Oe dejjaa Jesusaja epeeji jaahuanajji tecuea cajo, ¡a'a shajja'ajjajji! ¡Beca, pea beca peejjima pojja'a pea jayojja pea'ai mimime poajo, shajja'ajjacue! <sup>20</sup> Jesusaja epeeji jaahuanajji quea mimishi po huicha'a huicha'anijo, ¡tecueaquicue ejjabahuejjaquijji,

ojjaña ba caqui, ojjaña jjabahuejjaquijji! Jamajjeya pea cuana mimishijo quea mete poaje.

<sup>21</sup> Timoteo, Eyacuiñajjiya, Jesosa Quitohua, esohuidojojji quea pame cuaa cojja ba canijo pea'ai, eyaya miya huohuiaña jama ba'a: ¡Miyaya ecuea esohui jama acue! ¡Jjashahuabaquicue quea ja'a nee Jesusaja epeeji jaahuanajji cuana tecuea jjimahuajo! ¡Oya jayojjaya ojjaña apea'aicue!

<sup>22</sup> ¡Jesusaja epeeji jjeya nei jjapeequi a'a huoojea cuajijji Jesusaja epeeji jaahuanaa! ¡Oya ba neineicue huoojea jjimahuaa! Oya quea mimishi poajo, pea cuaa miya tecuea ca chana'. ¡Quea ja'a nee jjashahuaba tiitiuicue! Peaa mimishi acanijo, ¡ona nijje a'a quea mimishi pojji!

<sup>23</sup> Timoteo, miquea see ai quea nee po huicha'a huicha'anijo ¡oe pojji acuijjajja na, uva na quea sese pishana ishicue, ena oopana pojjeama!

<sup>24</sup> Jamajje jjeyahua nei beca cuaa mimishi quehuajje pojjeama acani; ojjaña ba cani. Eyacuiñajjiya oja mimishi cuanajo quea nee nee po mee caje'yo quijje pishana. Pea cuaa mimishi cuana quehuajje acani. Quijje oja mimishi ba majje ojjaña oya cuana tecuea caje'yo. <sup>25</sup> Jamaya pea'ai beca cuaa quea pame nee acani. Jjeya nei ojjaña oya ba cani. Oe pojji cuaa quea pame nee quehuajje acani. Quijje ojjaña ba caje oya quea pame nee nee poani.

## 6

### *Echacojji cuaa sosemajo chacochoaniya o chacomeejji cashajja'ajja cahua*

<sup>1</sup> Timoteo, echacojji cuana Jesusaja epeeji cuana huohuicue jama ba'a: —Epeeji cuana, ¡miquianaaya chacoña sosemajo, mi chacomeejjija esohui shajja'ajjacue! Miquiana mi jjashajja'ajjaquijjo, pea cuaa Eyacuiñajji niñeba ca chana'; esejaya esohuijo pea'ai jjaniñebaqui chana'. <sup>2</sup> Miquea echacomeejji Jesosa nijje jjapeequianijo, edoe mese jayojja tecue'ama poanijo, ¡a'a shajjama' pojji! Chojja, ¡shajja'ajja tiitiicue oya! Mi chacomeejji poani Jesusaja epeeji poanijo Jesosa ojaya quea boti nee pea'ai. Miya miquea echacomeejjija yajjijo chacochoanijo quea huiso sosejje poaje ojaya —jamaya acue echacojji cuana, Timoteo.

E'e Timoteo, ¡jiquio esohui cuana huohui neineicue! ¡Jamaya ojjaña cuana jjabahuejjaqui meesahuacue!

### *¡Quea bei ba'ecue esohui e'e nei jayojja!*

<sup>3</sup> Timoteo, pea dejja cuaa ecuanaja esohui jayojja jama huohui ajjajo, esohui e'e nei Jesusajo huohui sa po ajjajo oya cuana shajjama', de. Eba'e quea ja'a neejo huohui sa po ajjajo pea'ai oya cuana shajjama' poani. <sup>4</sup> Esohui e'e nei onajaya ba jjima. Esohui quea quehuajo mimiciuajeanobiajea sa poani, de. Mimiciuajeanobiajea canijo dejja cuana quea quene po mee cani pea cuana nijje. Quea bei pojjeama po mee cani; pea cuana mimijaji mee cani; quea tai nee jjashahuabaqui mee cani pea cuanajo pea'ai. <sup>5</sup> E'e, esohui e'e jojo neiyo jjabahuejjaqui mee jjimajo, quea jjashahuabaqui tai neejo pea'ai quea huiso cuaa mimiciuajeanobiajea huicha'a cani. Jamajjeya oya cuana jjashahuaba quehuaquiani jama ba'a: —Ecuaya Eyacuiñajjija esohui huohuiañajo quea huiso ejjeshejji chichaje.

¡Jiquio dejja cuana nijje a'a jjapeequijji! Quea tai nee nee.

<sup>6</sup> E'e jojo nei Eyacuiñajjija esohui jayojja jama ba'yanijo, quea jaji nee poanijo pea'ai, quea bihui nee nee poaje'yo. <sup>7</sup> E'e, eseya cuayanaje aema' nei nei. Quijje mano'yo majje aema' nei nei poquije'yo. <sup>8</sup> Bobi, daqui, equi yani. Jamajjeya se quea bihui nee nee poaje'yo. <sup>9</sup> Joya quea huiso aquiana nahue sa poani ca ca eshahuaja ejiojji yasijje poqui quehua'yo chana'. Ejjashahuabaqui'yojji cuana quea taijo quea tai ba'eje'yo, quea yeno. Cuaqui yasijje quijje poquije'yo pea'ai, de. <sup>10</sup> E'e, quea huiso ejjeshejji cuana, quea huiso aquiana cuana sa neinei poanijo ojjaña mimishi cuana acani cuaa. Ejjeshejji cuana, aquiana cuana sa neinei poanijo Eyacuiñajjija esohui jayojja jama apajea cani. Jamajjeya quea yeno nee nee poani; quea bei nee ba'e ajja.

*Pabohua Timoteo huoojea cani quea pame eba'ejji*

<sup>11</sup> Timoteo, miya ca ca oe Eyacuiñajjija epeeji nei, ojo chachacoani pea'ai. ¡Ma acajji tai jama a'a ajji! Jjashahuabaquicue quea pame nee eba'ejji jama ba'a: ¡Pea cuana quea jea nee acue! ¡Eyacuiñajji jayojja ba'ecue, quea ja'a nee! ¡Ojaya esohui jayojja jama atiitiicue! ¡Pea cuana miya napa cajje quea ca'a nee nee pocue! ¡Quea bei nee nequicue pea'ai! <sup>12</sup> Jama jjashahuabaquime pocue ba'a: ¡Dejja quebanei poanijo janobajjima nei nei cuajicuajiani jayojjaya miya Eyacuiñajji nijje quea ja'a nee nee jjapeequicue! Huea'ama poajo ohuaya miya ba'e tiitii mee caje'yo onijje, mano'yajo. Yahuajo ojjaña cojja ba canijo miyaya huohuinaje jama ba'a: —Jesosa Quito ecuea Emeshi Mese nei jjeya poani.

Jamajjeya miya Jesusaja epeeji poanaje e'e jojo nei; Eyacuiñajjiya miya babaca ca'yonaje onijje eba'e tiitii'yojji. <sup>13</sup> Jamajjeya Eyacuiñajjiya ojjaña aquiana eshe po mee ca'yani; Jesosa quea pame nee miminaje emeshi mese Ponisio Pinato bajjani nijje jama ba'a: “Eya ca ña Emeshi Mese oe nei; ecuea esohui e'e nei nei” poanaje Jesosa. Jamajjeya Eyacuiñajjiya, Jesosa Quitohua pea'aiya ba canijo, eyaya miya huohuiaña jama ba'a: <sup>14</sup> ¡Eyacuiñajjija esohui jayojja jama atiitiicue! Jamajjeya pea cuanaja miya etecueajji pojjeama. ¡Jamaya acue Jesosa Quito esejaya Emeshi Mese nei poe o'oya jjimahuajo!

<sup>15</sup> ¿Ache shono poeje o'oya Jesosa Quito? Eyacuiñajjija eba. Ohuaya Jesosa Quito poe meesahua caje'yo. Eyacuiñajji quea pame nee nee, quea ca'a nee pea'ai, ojjaña huoojea'yojji oe nei. E'e, Eyacuiñajji ojjañaja emeshi mese huoojeajji poani. Ojjaña dejja jaahuanajji poani cuana huoojeajji poani oya. <sup>16</sup> Oya ca ca oe mano'yo ajja tii tii. Oya quea jeajahua nee nee enequi tii tii. Jamajjeya dejja cuana jamatii o que poqui ajja. Dejja cuanaja oya cojja ba jjima poani. Jjeya jjacojjaba meequi ajja pea'ai. Jamajjeya ojjaña oya cabihua cahua. ¡Oya oe nei quea ca'a nee nee po tiitii'yani! Jamatii oya, de.

*Dejja cuana quea aquiana huiso nee neejo*

<sup>17</sup> Timoteo, dejja cuana quea aquiana huiso nee nee yasijje huohuicue jama ba'a: —¡Pea cuana a'a cajaa ajji! ¡Miquea aquiana quea huisojo a'a jjashahuabaqui tiitiiiji! Quea huiso aquiana cuana nequi tiitii ajjajo ¡a'a aquiana quea huiso jea bajji! Miyaya ¡Eyacuiñajji eshe tii tii nequi quea jea nee acue! Ohuaya ojjaña aquiana quia cani ese quea jaji pojji. <sup>18</sup> ¡Pea quea pame nee acue miyaya! E'e, ¡pea cuana nijje quea pame nee atiitiicue! ¡A'a quea aquiana nahue pojji aema' cuana nijje; nishehui'ama pocue! —jamaya oya cuana acue, Timoteo.

<sup>19</sup> Jamaya poani tiitiijo, quijje Eyacuiñajjiya oya cuana sosequia caje'yo quea huiso eyajo. Jamajjeya Eyacuiñajjiya oya cuana nequi tiitii mee caje'yo eyajo onijje. Eba'ejji quea ja'a nee nee, quea pame nee nee ojaya poaje'yo.

<sup>20</sup> Timoteo, ¡miyaya Eyacuiñajjija esohui quea pame nee jama atiitiicue! ¡Esohui e'e nei pojjeama Eyacuiñajjija esohui jayojja jama pojjeama a'a shajja'ajjajji! Quea quehua, de. <sup>21</sup> Jamajjeya beca cuana esohui quea quehua nee, e'e nei pojjeama shajja'ajja majje poquiquehua'yonaje. Jamajjeya Eyacuiñajjija esohui e'e nei pajea ca'yonaje, onaaya.

Timoteo, ¡Eyacuiñajjiya miquianaya cajaanahua cahua! Jamaya capohua. Apoa. Eya, Pabo esohui tehuejji.

## PABOJA ETEHUE'YO TIMOTEO QUE BECANEJJIIJI PEA'AI 2 TIMOTEO

*Pabohua Eyacuiñajjija esohui tehue ca o'oyanaje Timoteo que*

<sup>1</sup> Timoteo, eyaya esohui mi que tehueje o'oya. Eya Pabo, Jesosa Quitoja esohui huohuijji. E'e, Eyacuiñajjiya eya huoojea canaje ojaya esohui huohui'yohua jama ba'a: Jesosa Quito nijje e'e jojo nei jjapeequianijo, onijje eyajo eseya ba'e tiitii mee caje'yo Eyacuiñajjiya. <sup>2</sup> Timoteo, miya ecuea quea jea nee nee, ecuea ebacua ejja jayojja jama Jesosa Quito nijje jjapeequianijo. ¡Eyacuiñajjiya esejaya Chii ai eyajo aniya, Jesosa Quitohua esejaya Emeshi Mese neiya pea'aiya miya cajaahuana cahua quea pame nee! ¡Mijo cajjashahuabaquiahua quea pame nee! ¡Miya quea bei nee capo mee cahua pea'ai!

<sup>3</sup> Eyacuiñajjiyo eya quea bihui nee chacochoani bicho'ama nei nei. Jamaya ecuea etiiquiiana cuana pea'ai poa. Timoteo, miya quea ja'a nee ba'yanijo, eyaya Eyacuiñajji janobajjima nei bihuiaña mijo. E'e, mijo pea'ai eya onijje mimi huicha'a huicha'ani ojjaña mecaje, ojjaña pojajjo pea'ai. <sup>4</sup> Miya pa neineinaje e poqui'yajo. Maya ecuea pajea'yo jjima. Eya mi ba sa neinei poani quea bihui nee epojji. <sup>5</sup> Eya jjashahuabaquiani jama ba'a: Miya Eyacuiñajjija esohui jayojja jama aña quea bihui nee. Ecuea eba yahuajo miquea yano mese Moina bajjaniya, miquea enaese Enise pea'aiya Eyacuiñajjija esohui jayojja jama aca poa quea bihui nee. E'e, jamajjeya o jayojja jama jjeya miya Eyacuiñajji nijje e'e jojo nei jjapeequiani.

<sup>6</sup> Jamajjeya eyaya miya huohui o'oyaña jama ba'a: Yahuajo mijo Eyacuiñajji nijje mimi majje eyaya miya huoojeanaje ojaya echacojji epojji. E'e, sapa napa'ajjanaje emeya Jesosaja echacojji quea pame epojji. Jamajjeya Eyacuiñajjiya miya Jesosaja epeeji jaahuana sahua cani. ¡Jamaya ojo chaco tiiticue! <sup>7</sup> E'e, Edojjoshahua Pameya, Eyacuiñajjija huoojea'yohua eseya mete'ama po mee cani. Quea ja'a nee Eyacuiñajjiyo chaco mee ca'yani. Esey Eyacuiñajji, pea cuana pea'ai quea jea nee po meesahua ca'yani pea'ai. Quea ja'a nee jjashahuabaqui mee cani pea'ai, Edojjoshahua Pameya.

<sup>8</sup> Jamajjeya esejaya Emeshi Mese neijo huohuiañajo ja'a quea bicho pojji, miya! Eya onijje jjapeequianijo, dejja quea mase cuaa eya iña majje jeanobia canaje. Eyacuiñajjija esohui quea pame nee huohuiañajo eya napa cani cuaa. Jamatii ja'a quea bicho pojji ejo! Chojja. E jayojja jama napa cajo, ja'a oe quea mete pojji! Eyacuiñajjiya miya quea ca'a po meesahua canijo, ja'a ojaya esohui huohui pajea'yojji! <sup>9</sup> Ohuaya esejaya mimishi cuijea ca'yonaje. Jamajjeya cuaqui yasijje epoqui'yojji pojjeama. Iyaa ca'yonaje ojo quea pame nee eba'e'yojji, ma ojaya epeejjime epo'yojji. ¿A'a eseya quea pame poanijo, ohuaya eseya iyaa ca'yonaje onijje ejjapeequijji? Chojja. Yahuajo nei nei meshi pana jjimahuajo Eyacuiñajji jjashahuabaquia poa Jesosa Quito huoojeajji esejaya mimishi cuana cuijea'yojji. <sup>10</sup> E'e, yahuajo esejaya ba jjima poa ojjaña cuana Eyacuiñajjiya quea jea nee nee acani. Jjeya ca ca esejaya eba. Ese jaahuanajji Jesosa Quito poeyanaje. Mano'yonaje. Mano'yo majje shequi o'oyanaje. Yahuasijje jjequisohua ca'yonaje. Esey ohuaya jama acanaje ba'a: —Mano'yo majje miqianaya cuana ba'e tiitije'yo Eyacuiñajji nijje —Jesosaa acanaje.

Jamajjeya ohuaya mete'ama po mee caje'yo eseya mano'yanijo. Ba'e tiitii mee caje'yo ojaya esohui quea pame nee ba mee canijo. <sup>11</sup> Ma esohui quea pame nee Jesosa Quitoja eyaya huohuiaña. Eyacuiñajjiya eya huoojea ca'yonaje ojaya esohui huohuiya, ojjaña cuana jjabahuejjaqui meeya pea'ai. <sup>12</sup> Ma esohui huohuiañajo, pea cuaa eya napa cani. Quea nee poani eya. Jamatii eya bicho'ama Jesosa Quitojo. Eyacuiñajji ecuea eba nei nei. E'e jojo nei oya ese jaahuanajji, de. Jamajje ecuea eba ojaya esohui jayojja jama eya ameesahua tiitii caje'yo ohuaya, Jesosa poe o'oyajo.

<sup>13</sup> Ma esohui e'e nei Jesosa Quitoja eyaya miya ba meenaje. ¡Ecuea esohui jayojja tii huohucue! Jamaya poanijo ¡Jesosa Quito shajja'ajjacue! ¡Eyacuiñajji quea jea nee acue



pea'ai, jamaya Jesosa Quitohua miya po meesahua canijo! <sup>14</sup> Ohuaya miya jiquio esohui quea pame neejo jjabahuejjaqui meesahua canaje. ¡Ma esohui jayojja jama po tiitiicue! Edojjoshahua Pameya esejo nequi tiitiianiya miya jamaya asahua caje'yo.

<sup>15</sup> Quea huiso dejja Asia meshijo ba'e enijje jjapeequi pajea'yonaje. Pijeno, Emojene pea'ai jamaya poanaje. Maya miquea eba. <sup>16</sup> Ecuea Emeshi Mese neiya dejja Onesipono bajjani, ojaya huapa pojjeama pea'ai caba'e meesahua cahua quea pame nee. Ohuaya eya quea jaji nee po mee canaje. Pea dejja cuaa eya jeanobia canaje. Jamatii oya, Onesipono ejo bicho'ama poanaje. <sup>17</sup> E'e, Shoma cuiñajji yasijje poe majje, eya sa'ajja neinei'yo majje eya ba ca'yonaje, Onesiponohua. <sup>18</sup> Jamajjeya esejaya Emeshi Mese neiya poe o'oya majje Onesipono sosequia caje'yo. Jamajjeya ohuaya Onesipono jaahuana tiitii caje'yo quea pame nee. Dejja mimishi ca ca quea nee po mee caje'yo tii tii. E'e, miquea eba eya Epeso cuiñajjijo nequijo, Onesiponohua eya quea pame nee ba'e meesahua ca poa.

## 2

### *¡Echacojji quea pame jayojja jama pocue Jesusajo!*

<sup>1</sup> E'e Timoteo, miya ecuea ebacua ejja jayojja. Miya quea ca'a po mee cani Jesosa Quitohua, ese jaahuanajjiya. Jamajjeya ¡quea pame tiitii jjapeequicue onijje! <sup>2</sup> Miyaya ecuea esohui shajja'ajjanaje. Quea huiso dejjaa shajja'ajja canaje pea'ai. ¡Jiquio esohui huohuicue miyaya Jesusaja epeejji e'e jojo nei yasijje! Ona jjabahuejjaqui majje ¡ma esohui quea pame che jja oma oe huohui meesahuacue quea pame nee pea cuana huasijje! <sup>3</sup> Pea cuaa miya napa caje'yo Jesosa Quito nijje jjapeequianijo; jamatii ¡a'a quea mete pojji! ¡Jjapee tiitiiquicue e'e jojo nei! ¡Emeshi Mese neija echacojji quea ca'a pocue! <sup>4</sup> Jama ba'a: Dejja echacomeejjijo chaco canijo pea nijje chaco chaco sa po ajja. Chajo. Ohuaya ojaya echacomeejjija esohui jama chaco cani. ¡Jamaya oe pocue; Jesosa Quito nijje chaco chaco anijo a'a esahua nijje pojji! <sup>5</sup> Jamajjeya jama poani pea'ai ba'a: Dejja janobajjima nei cuajicuaji neineiiani pea cuana nijje. Joya ebionei cuajicuaji cooani oe aquiana quea pame quia cani sosema'. Jiquio ecua ohua huohui caje jama mi cuajicuajiajo, shajjama' poajo, aquiana equiajji pojjeama. ¡Jamaya jjashahuabaquicue Jesosa Quitojo chacoñaajo; janobajjima chacoque! ¡A'a shajjama' jayojja jama pojji! <sup>6</sup> Dejja quejo janobajjima nei chaco'yo majje, que bana majje pea'ai ohuaya ebionei bobi cachicha cahua ojaya e'ijjiajji. Jamajjeya ¡a'a quea huea pojji Jesosa Quitojo chaco chaco ani! <sup>7</sup> ¡Jiquio ecuea esohuijo jjashahuaba neineiquicue, miya! Eseyaya Emeshi Mese neiya miya jiquio esohui ba meesahua caje'yo.

<sup>8</sup> Jamajje ¡jjashahuaba tiitiiquicue Jesosa Quitojo! Eyacuiñajjiya Jesosa Quito shequi mee ca o'oya poa. Ojaya Jesusaja etiiquiana yahuajo nei nei ba'ya poa Dabi bajjani etiiquianaja emeshi mese poa. <sup>9</sup> Jiquio esohui quea pame nee Jesosa Quitojo eyaya huohuiana. Jamajjeya dejja tai cuaa eya napa canaje, dejja quea mimishi poso eya jeanobia canaje. Jamatii. Dejja tai cuanaja eya Eyacuiñajjija esohui ehuohui pajea mee'yojji pojjeama. <sup>10</sup> Jamajjeya dejja cuaa eya napa cajje jamatii eya quea ca'a tii tii Jesusajo poani. Jamajjeya eyaya ojjaña Eyacuiñajjija ehabaca cuana quea ca'a po meesahuaje'yo. Jamajjeya Jesosa Quitohua onajaya mimishi cuana cuijea neinei caje'yo. Oya cuana nequi tiitii mee caje'yo eyajo quea ja'a nee nee ese jayojja. Eyacuiñajji nijje nequi tiitije'yo.

<sup>11</sup> Jiquio esohui e'e nei jama ba'a:

“Eseyaya Jesusaja epeejji jjejojo pea cuaa mano mee ca'yajje Jesosa nijje eshe tiitii ba'eje'yo eseya eyajo. <sup>12</sup> Jjeya onijje jjapee tiitiiquianijo quijje Jesosa nijje ona huoojea'yojji poaje'yo. Jjeya eseyaya cajaa ajje ohuaya eseya quijje cajaa acaje'yo pea'ai.

<sup>13</sup> Eseyaya ojaya esohui atiitii ajjajo, jamatii ohuaya eseya pajea'yo ajja. Ojjaña ojaya esohui jayojjaya jama acaje'yo tii, ohuaya. Oya esohui siajje a'ajja nei nei”.

*Echacojji quea pame nee*

<sup>14</sup> ¡Jamaya miyaya ecuea ehuohui'yo cuana esohui huohuijji cuana huasijje huohui huicha'a huicha'acue! Janobajjima nei huohuicue jama ba'a: —Emeshi Mese neiya miya ba neinei canijo, ¡a'a mimicuiajea nobiajeajji!

Jjamimicuiajea nobiajeajji ca ca quea tai. Jamaya poanijo mi shajja'ajjaji poani cuana poquiquehua chana'. <sup>15</sup> ¡Quea ja'a nee nee oe jjashahuabaquicue quea pame nee Eyacuiñajji echacojji! Jamajjeya oya mijo quea jaji nee poaje. E'e, ¡miyaya ojaya esohui e'e nei huohuicue quea ja'a nee! Jamajjeya miya ojaya echacojji quea pame nee poaje, bicho'ama. <sup>16</sup> Beca cuanaja Eyacuiñajji boti'ama, de. Jamajjeya ¡a'a shajja'ajjaji onajaya mimi quea tai Eyacuiñajji! Ma esohui tai shajja'ajja canijo pea cuaa Eyacuiñajji ba jjima acaje. E'e, esohui tai shajja'ajja majje jjashahuabaqui ajja poaje. <sup>17</sup> Tajjaja ijia biso nei anicuayani, quijje ijia huesha cani. Tajjaja ijia jayojja jama poani esohui quea tai. Esohui huohuijji taija esohui quea tai shajja'ajja majje quijje quea tai nee poaje'yo quea huiso cuana. Jjapeequi pajea caje'yo pojja'a. Jamaya esohui huohuijji nisho cuana Pineto bajjani, Imeneo pea'ai poani. <sup>18</sup> Ohuaya esohui e'e nei pajea ca'yonaje. Sijje poani jama ba'a: —Ojaya epeejji mano'yajo, Eyacuiñajjiya eyami eyacua aje oe e'a'yojji pojjeama — acani.

Jamajjeya beca cuana ma esohui taijaya poquiquehua mee cani. Eyacuiñajji esohui e'e nei pajea mee cani pea'ai, ma esohui huohuijji nishohua. <sup>19</sup> ¡A'a oya cuana shajja'ajjaji! Esey a ca ca Eyacuiñajji nijje jjapeequi pajea'yo ajja. Eyacuiñajji esohui quea ja'a neejo jjashahuabaquiani. Equi yamajjana quea ca'a nee nee nequi jayojja jama Eyacuiñajji esohui nequi tiitiije'yo. E'e, yahuajo nei nei esohui tehue mee ca poa jama ba'a: “Eseyaya Emeshi Mese neiya ebacua cuana ojaya eba ache ese ejja e'e jojo nei poaje”. Pea tehue mee ca poa jama ba'a: “¡Eyacuiñajjiya epeejji neiya mimishi cuana capajea neinei cayahua!” Jama yahuajo nei tehue meemeya aca poa, Eyacuiñajjiya.

<sup>20</sup> Cuanaya equi tii tiijo quea huiso aqui ana cuana yani: ena ishijji cuana, ena nequijji cuana, ena shoiji natajee oshe quea nahue siyosiyoyani. Ena nequijji mei huo'yo quea ca'a yani aqui ana quea nahue iyajji. Acui epejja cuana yani, meshimisi pea'ai yani, ca'a'ama, aqui ana nahue'ama iyajji. <sup>21</sup> Jiquio ecua ena nequijji ca'a'ama jayojja jama eseya poaje mimishijo. Esey mimishi cuana pajea'yo majje ena nequijji quea nahue jayojja jama poaje'yo. Jamajjeya mimishi pajea'yoyji chacoje'yo Eyacuiñajji. E'e, quea pame nee poanijo Eyacuiñajjiya eseya huoojea caje'yo ojo chacojja. Jamaya eseya Eyacuiñajji tii poaje'yo.

<sup>22</sup> Jamajjeya ¡shacuima' nequija ejjashahuaba taiquijji jama a'a pojji miya! Jiquio jama quea bihui nee po huicha'acue ba'a: ¡Quea ja'a ba'ecue! ¡Eyacuiñajji esohui jjabahuejja neineiquicue! ¡Pea cuana quea jea nee acue! ¡Ojjaña nijje quea bei pocue! Beca cuana quea bihui nee Eyacuiñajji nijje mimiani. Quea ja'a nee jjashahuabaquiani pea'ai. ¡O jayojjaya oe pocue! <sup>23</sup> ¡Esohui quea tai, quea quehua pea'ai a'a shajja'ajjaji! Ma esohui shajja'ajja majje dejja cuana jjamimicuiajea nobiajeajji. Jamaya miquea eba. <sup>24</sup> Miya Eyacuiñajji echacojji poanijo ca ¡a'a jjamimicuiajea nobiajeajji! Chojo. ¡Ojjaña nijje mase'ama pocue! ¡Jesosa Quitoja esohui cuana oe huohuicue quea pame nee! ¡A'a tecuea cuajji pea'ai! <sup>25</sup> Pea cuana esohui e'e neiyo maimaiano, ¡quea bei esohui huohui o'oyacue! Jamajjeya e'e pojja'a Eyacuiñajjiya ojaya esohui e'e neiyo jjabahuejjaqui meesahua caje'yo oya cuana; jjashahuaba taiqui pajea mee caje'yo. <sup>26</sup> Jamajjeya oya cuana quea ja'a nee jjashahuabaquije o'oya pojja'a, Eyacuiñajji nijje jjapeequije'yo. Joya esohui mimijajiani aje oe poquiquehua'yonaje de, Edosiquiana nijje. Ohuaya oya cuana dasia ca'yonaje o jayojja epo'yoyji. ¡Oya cuana Eyacuiñajji nijje cajjapeequiahua! E'e, dejja ibia me' ijia mee cani. Ibia eme' ijia meeani, eme' jjequihuijjaajea majje poquiani. Eme' ijia mee'ajja jjabahuejjaquiani. Jiquio ecua ibia eme' ijia mee'ajja poe beca'yo ajja jayojja jama eshahuaja epeejjiya dasia cajje eshajja'ajja becaqui'yoyji pojjeama; jjabahuejjaquiani oya pojja'a.

## 3

*Epojja apoa epojjijo*

<sup>1</sup> Timoteo, jiquio ba neineicue pea'ai ba'a: Epojja cuana beshahua nei oe poajo, Jesosa Quito poe o'oya jjimahuaajo, eba'ejji quea camaja nee nee poaje ojjaña cuanaja dejja quea mimishi nee nee poanijo. <sup>2</sup> E'e, dejja cuana ojaya aqui ana cuanajo, ojaya eba'ejjijo, ejjeshejjijo pea'ai quea nahue poaje'yo. Quea dejja tai poaje'yo, quea nishehui poaje'yo epona cuana pea'ai. Bicho'ama jjejojo quea miminaa ojaya ejjashahuabaquijjijo poaje'yo tii tii. Eyacuiñajjija esohui huohuijji shajja'ajja sa po ajja poaje'yo. Mimijajijji cuana pea'ai poaje'yo. Oja chiija, enaese pea'aia esohuijji shajjama' poaje'yo oya cuana. Ejeajji etii cuana, enaese etii pea'ai boti'ama acaje'yo: —Ecuea miya ebobajji pojjeama — acaje'yo.

Eyacuiñajjija esohui jama a sa po'yo ajja poaje'yo. <sup>3</sup> Ojaya huapa pojjeama cuana boti'ama acaje'yo pea'ai. Quea sapa ca'a jjejojo jjashahuabaqui ajja pea'ai. Pea cuanajo siajje poaje'yo. Mimishi cuana epajea mee'yojji pojjeama. Quea mase ibia jama poaje'yo. Mimipanajea panajeaje'yo pea nijje. Dejja quea pame nee boti'ama acaje'yo, cajaa acaje'yo pea'ai. <sup>4</sup> Pea nijje jjapee nishoquije'yo. Jjabahuejjaqui jjima tii tii poaje'yo. Jama siajje pome poaje ba'a: —Eya ca ca oe che oeya quea pame nee —nisho poaje.

Quea mimijjequiya jjejojo Eyacuiñajji boti'ama poaje'yo. <sup>5</sup> Eyacuiñajji nijje jjapee nishoquije'yo. Jamatii ojaya esohui jayojja jama oya po ajja poaje. Timoteo, ja'a onijje jjapeequijji! <sup>6</sup> Jjeya nei esohui huohuijji tai cuana equi cuana huasijje poqui majamaja majje siajje poani. Epona jjabahuejjaqui ja'a jjima cuana dasia cani. Jiquio epona cuana aje oe quea mimijjequijjea nee nee; quea ja'a jjashahuabaqui'yo ajja, de. Ma dejja tai cuanaja esohui tai shajja'ajja sa poani. <sup>7</sup> Oya cuana ojjaña esohui quea quehua shajja'ajjaji jjejojo Jesosa Quitoja esohui e'e neiyo jjabahuejjaqui'yo ajja. <sup>8</sup> Jamaya yahuajo nei nei ejiojjicuijji cuana Janese, pea Jamese cuanaya nequia poa. Moisesija esohui shajja'ajja sa po ajja poa. Jjeyahua nei esohui huohuijji quea mimishi Janese, Jamese pea'ai jayojja jamaya yani. Oya cuana esohui e'e nei Jesosa Quitoja shajja'ajja sa po ajja pea'ai. Quea jjashahuabaqui tai nee nee poani pea'ai. Jamajjeya Eyacuiñajjiya oya cuana cajaa acaje'yo, Jesosa Quito nijje jjapeequi sa po ajjajo. <sup>9</sup> Quijje pishana quea huiso dejjaa jama acaje'yo ba'a: —E'e, joya esohui huohuijji tai cuana jjadasiaqui'yojji, ejiojjicuijji Janese, Jamese pea'ai jayojja poani —acaje cuaa. Jamajjeya jjadasia mee majamajaqui ajja poaje.

*Pabaja esohui apoa epojji nei Timoteo huasijje*

<sup>10</sup> Timoteo, miya enijje nequinajejo eya ca ca miquea eba nei nei poanaje. Ojjaña ecuea ehuohui'yo miquea eba pea'ai. Ojjaña ecuea eba'e'yojji miquea eba pea'ai. Ecuea ejjashahuabaqui'yojji quea pame nee. Miquea eba eya Eyacuiñajjija epeeji nei poani. Pea cuaa eya napa cajje ona nijje quenequene ajja poa. Ecuea pea cuana quea jea nee. Eyaya mete'ama Eyacuiñajjijo chaco tiitii'yonaje. Jamaya miquea eba pea'ai. <sup>11</sup> E'e, miquea eba ecuea ehuohuijji pea cuaa janobajjima nei eya napa ca'yonaje Atioquiajo ba'e cuaa, Iconiojo ba'e cuaa, Nisatajo ba'e cuaa pea'ai. Napa majamaja cajje eya quea nee nee poanaje. Jamatii ecuea Jesosa Quitoja esohui pajea'yo jjima. Emeshi Mese neiya eya jaahuana tiitii ca'yonaje. Jamaya miquea eba, Timoteo. <sup>12</sup> E'e de, ojjaña joya Jesosa Quito nijje jjapee neineiquiani pea cuaa napa cajje. <sup>13</sup> Edasiajji cuana jjeyahua nei quea tai. Quijje ca ca quea tai nee nee poaje. Eshahua ma dejja tai cuana nijje siajje poanaje. Jamajjeya ma edasia'yojji cuaa pea cuana dasia caje'yo pea'ai. <sup>14</sup> Timoteo, miquea eba miquea esohui huohuijji cuanaja ehuohui'yo e'e nei. Ma ehuohui'yo cuanajo miya jjabahuejjaqui'yonaje. Jamajjeya jmayaya esohui shahuaba tiitiicue; a'a pajea'yojji! jJamaya oe acue! <sup>15</sup> Miyaya esho'yahuua Eyacuiñajjija esohui quea pame nee ba neinei'yonaje. Ojaya esohui etehue'yo miquea eba. E'e, ma etehue'yojo miyaya baje'yo jama ba'a: Eyacuiñajjiya miya jaahuana caje'yo miya Jesosa Quito nijje jjapeequianijo.

<sup>16</sup> Eyacuiñajjiya dejja pame cuana ojjaña ojaya esohui tehue mee ca'ya poa. Eseyaya jiquio esohui huohuiajje pea cuana Jesosa Quitojo jjabahuejjaquije'yo, ojaya mimishijo quea yeno poaje'yo pea'ai, ojjaña ba caje'yo ache esohui e'e nei pojjeama pea'ai. E'e, ma esohui huohui majje ojjaña quea boejea nee ba'e meesahuaje'yo. Eba'ejji quea pame ba meesahuaje'yo pea'ai. <sup>17</sup> E'e, ma esohui etehue'yo quea ja'a nee ba majje Eyacuiñajjiya echacojji quea ja'a nee poaje'yo. Ojjaña quea pame nee poaje'yo pea'ai Eyacuiñajji nijje, esohui ba neinei majje.

## 4

*Pabo Eyacuiñajjiya sosequia caje'yo*

<sup>1</sup> Eyacuiñajjiya, Jesosa Quitoja pea'ai ecuea esohui eba. Jesosa Quito poe o'oya majje ojjaña huoojea'yojji poaje'yo. Yahuajo mano'yo cuana, jjeya eshe nequi cuana pea'ai sosequia caje'yo. Ojjaña ojaya epeeji cuana quea pame poani ba'e tiitii mee caje'yo onijje eyajo, Eyacuiñajjiya. Mimishi cuana ca ca quea nee nee po mee caje'yo cuaquijo. <sup>2</sup> Jamajjeya eyaya miya huoojeaña jama ba'a: ¡Eyacuiñajjiya esohui oe huohui tiitiicue jjeya, miyaya! Dejja cuana jjashajja'ajjaqui sa po ajjajo jmatiiya huohucue! Mimishi cuana acanijo ¡tecueajeaña jayojja acue! Jama acue ba'a: “¡A'a quea tai pojji! ¡A'a quea mimijjequijea pojji!” Pea cuana quea pame poanijo jama acue ba'a: “E'e, jmayaya Eyacuiñajjiyo ba'ecue!” ¡Quea pame, quea mimi bei nee huohui tiitiicue ojjaña Eyacuiñajjiya esohui! <sup>3</sup> Quijje ca ca dejja cuana esohui e'e nei shajja'ajja sa po ajja poaje. Quea mimishi ba'e sa poanijo oya cuana quea huiso esohui huohuijji tai iyaa caje ojaya ejjashahuabaqui'yojji huohuiya. <sup>4</sup> Eyacuiñajjiya esohui e'e nei shajja'ajja sa po'yo ajja poaje. Etiiquianaja ehuhui'yo quea quehua cuana shajja'ajja caje'yo. <sup>5</sup> Timoteo, ¡miya ca oe quea ja'a nee nee jjashahuabaquicue ojjaña pojajajo! Peaa miya napa cajje jmatii quea ca'a, mete'ama pea'ai pocue! ¡Eyacuiñajjiya esohui Jesosa Quitoja huohui tiitiicue! ¡E'e jojo nei ojjaña ma ecua eyaya miya huohuinaje jamaya acue!

<sup>6</sup> E'e, ecuea echacojji Eyacuiñajjiya esohui jjeya beshahua nei apoa poanijo, dejja mimishi cuaa eya mano mee caje'yo. Ijjiacajji jayojjaya mano mee'yome acaje'yo cuaa. Quijje pishana, jjeyahua nei pojja'a eya poquije'yo eyahuasijje Jesosa Quito que ba'e'yohua. <sup>7</sup> Eya janobajjima nei chacocho'yonaje Eyacuiñajji nijje. Ecuea echacojji Jesosa Quitoja apoa. Eyacuiñajjiya esohui jayojja jama a'yonaje e'e jojo nei eyaya. Jamajjeya eya onijje quea ja'a nee ba'yanijo, eya sosequia caje'yo eyajo. <sup>8</sup> Eseyaya Emeshi mese nei nijje quea pame nee chacocho'yonaje, eya quea huiso sosequia caje'yo poe o'oya majje. Ohuaya eya huohui caje'yo jama ba'a: —Miya ecuea echacojji quea ja'a nee poanaje.

E'e, ojjaña ojaya epeeji cuaa ma ojaya epoe o'oyajjiyo quea bihui neeya ishoa'ajja ca'ani Jesosa Quitohua sosequia caje'yo quea huiso pea'ai.

*Pea esohui Timoteo que*

<sup>9</sup> Eya ee nei ani. Jamajjeya jjeyahua nei poecujicue ee nei anijo! <sup>10</sup> Ecuea epeeji Quesete poquinaje Janata meshi yasijje. Tito pea'ai poquinaje Damasia meshi yasijje. Dejja Nema bajjani aje oe ojaya aquiana cuana quea boti neejo Eyacuiñajjiyo jjashahuabaqui ajja. E pajea'yo majje e que nequi'yo ajja. Oya poqui'yonaje Tesanonica huasijje. <sup>11-12</sup> Tiquico eyaya huoojea'yonaje Epeso huasijje. Noca ca ca oe enijje nequi. Jamajjeya miya e que poe o'oya majje ¡ecuea epeeji Macoso jjequicue pea'ai! Ohuaya eya chacosahua caje'yo. <sup>13</sup> Ecuea daqui moo quea ao eyaya jeana'yonaje Toasajo, Capoja equijo. ¡Maya jjequi'yocue! ¡Esohui etehue'yo cuana pea'ai ye'yocue! ¡Esohui ejeejo tehue'yo cuana pea'aiya oe ye'yocue jjo!

<sup>14</sup> Timoteo, Anejano ma baa huo'o chacojji poani janobajjima nei mimijajinaje enijje quea mimishi, de. Ojaya mimishijo Jesosa Quitohua oya napa caje'yo quijje. <sup>15</sup> Eseyaya Jesosa Quitoja esohui huohuiañajo oya janobajjima nei mimijajinaje pea'ai. ¡Jamajjeya oya ba neineicue! Oya quea tai, de.

<sup>16</sup> Dejjá etii cuaa eya jeanobia'yo majje iyaa ca o'oyanaje ehuohui'ajjajji ecuea esohuijo. Eya huohui'ajja coo canajejo, ecuea epeeji cuana enijje nequi ajja. E ejeanobiajojo oya cuana quea mete nee nee poanaje. Poquinaje. Eya jea cana'yonaje: —Paboja esohui Jesosa Quitojo e'e nei nei —jamaya huohuime ajjima ecuea epeejjija quea meteja jjejojo. Eya nahue jjima onajaya. Eya Eyacuiñajji nijje miminaje ona cuanajo. Jamajjeya e'e pojja'a Eyacuiñajjija oya cuana etecueajeajji pojjeama quea mete poanijo. <sup>17</sup> Jamatii Jesosa Quito ecuea Emeshi Mese nei ca ca enijje nequi'yonaje. Ohuaya eya quea ca'a po mee ca'yonaje. Ojjaña ojaya esohui janobajjima nei huohuiañajo quea huiso cuana Jodio pojjeama shajja'ajja mee'yonaje. Pea cuana ibia jama quea mase e quecua sa poanijo, Eyacuiñajjija eya jaahuana ca'yonaje pea'ai. <sup>18</sup> E'e, ojjaña ma dejjá mase cuanajo ecuea Emeshi Mese neiya, Jesosa Quitohua eya jaahuana caje'yo. Ohuaya eya eyahuasijje dojosohuaqui caje'yo onijje ba'e'yohua. Jomajo oya ojjaña huoojea'yojji ca ca oe quea ca'a nee nee. ¡Oya ojjaña dejjá cuaa cabihuia tiitii cahua! ¡Jamaya capo'yahua!

*¡Ojjaña nijje mimicue quea bihui nee ejo!*

<sup>19</sup> Aquina, ojaya ehuanase Pisina pea'ai, Onesipono, ojaya huapa pojjeama cuana pea'ai jama huohuicue miyaya ba'a: —¿Achajja acuae nequiiana so'o?

<sup>20</sup> Dejjá Enasito bajjani nequinaje Conitojo. Topimo eyaya jeana'yonaje Mineto cuiñajjijo emano jaa.

<sup>21</sup> ¡Poecuajicue e que, eeno po jjimahuajo!

Dejjá Eomono bajjani, Ponete pea'ai, Nino pea'ai, Caonia pea'ai, ojjaña Eyacuiñajjija epeeji cuana pea'aiya miya huohui'ajja cani jama ba'a: —¿Achajja acuae mi ani so'o, de? —ojaya ebajji nequiiana.

<sup>22</sup> ¡Emeshi Mese neiya Jesosa Quitohua miya quea ja'a capo mee cahua! ¡Ohuaya ojjaña miqiuianaya cajaahuana cahua quea pame nee! ¡Jamaya capo'yahua!

Mahuiso. Eyaya Pabohua esohui tehue'yonaje. Apoa.

## PABOJA ETEHUE'YO TITO QUE TITO

### *Pabohua esohui tehue canaje Tito que*

<sup>1</sup> Tito, eyaya jiquio esohui tehueaña mi que miquea ebajji. Eya, Pabo Eyacuiñajji chacochoacoani oja yajji. Jesosa Quitohua eya huoojea canaje ojaya epeeji cuana huasijje ojaya esohui huohuiya. Jamajjeya eyaya Eyacuiñajji babaca'yo cuana onijje jjapeequi meesahuaña e'e jojo nei. Oya cuana Eyacuiñajji esohui e'e jojo nei ba meesahuaña pea'ai. Jamajjeya oya cuana ma esohui jayojja jama ba'e meeje quea ja'a nee. <sup>2</sup> E'e, Jesosa nijje e'e jojo nei jjapeequianijo, Eyacuiñajji ojaña eseya ba'e tiitii mee caje'yo onijje eyajo. Jamaya Eyacuiñajji huohui ca'ya poa meshi pana jjimahuaajo. Oya ca ca oe siajje po ajja nei nei. <sup>3</sup> Jjeya nei ca ca Eyacuiñajji eseya ojaya esohui quea pame nee Jesusajo ba mee ca'yonaje. E'e, ohuaya, esejaya ejaahuanajjiya eya huoojea ca'yonaje jama ba'a: —¡Poquicue miya; ecuea esohui quea pame nee huohuicue ojjaña dejja cuana huasijje! —jamaya ohuaya eya acanaje.

<sup>4</sup> Tito, eyaya jiquio esohui tehueaña mi que, miya e jayojjaya Jesosa nijje jjapeequianijo. ¡Eyacuiñajji esejaya Chii ai eyajo aniya, Jesosa Quito ese jaahuanajjiya pea'ai miya cajaanahua cahua quea pame nee! ¡Miya quea bei nee capo mee cahua pea'ai!

### *Jesosaja epeeji jaahuanajji cuana quea pame nee caba'yahua*

<sup>5</sup> Tito, yahuajo eseya Queta nasijo Eyacuiñajji esohui huohui nequinaje. Jamatii Eyacuiñajji esohui huohui jeyojeyo jjima poanaje. Jamajjeya eyaya miya nequi mee'yonaje Queta nasijo Jesusaja epeeji jjabahuejja meequiji ojjaña ojaya esohuijo. <sup>6</sup> Jamajjeya ojjaña cuiñajji yasijje Jesusaja epeeji etii babacacue Jesusaja epeeji jaahuanajji epojji! Ecuea esohui Jesusaja epeeji jaahuanajji huohuicue jama ba'a: —Jesusaja epeeji jaahuanajji caba'yahua jama ba'a: ¡Quea ja'a nee caba'e tiitii'yahua, mimishi'ama! Jamajjeya o ba majje onaaya jama acaje ba'a: “Oya e'e jojo nei Eyacuiñajji esohui jayojja jama ba'yani”. ¡Shacuiji poaniya ehuanase oe nei cahua cahua quea ja'a nee! ¡Oja bacua cuana Jesusaja epeeji cuana capo'yahua, shajjama' pojjeama capo'yahua! Jamajjeya oya cuana ba majjeya onaya mimimimi ajja jama ba'a: “Oja bacua cuana quea mimishi nee nee, shajjama' pea'ai poani”. <sup>7</sup> Jesusaja epeeji jaahuanajjiya ojjaña ojaya epeeji cajaanahua cahua, caba'e meesahua cahua pea'ai! Jamajjeya ¡quea pame nee caba'yahua, mimishi'ama! Jamajjeya onaaya oya eniñebajji pojjeama. ¡A'a jjashahuaba taiquiji! Jama ba'a: “Eya ca iña quea pame nee; pea cuana quea pame pojjeama”. ¡A'a quenequene cuajiji! ¡A'a ishi'ishiji! ¡A'a pea nijje jjacuiquiji! ¡A'a quea dejja tai pojji pea'ai! <sup>8</sup> E'e, Jesusaja epeeji jaahuanajjiya ¡pea cuana nijje cajjapeequiahua; ojaya equijo caba'e mee cahua joya oja cuiñajji yasijje poeyajo! ¡Ohuaya pea cuana quea jea nee ca'a cahua! ¡Oya quea ja'a nee cajjashahuabaquiahua quea pame nee eba'ejji! ¡Ohuaya emeshi meseja esohui jayojja jama ca'a cahua! ¡Eyacuiñajji esohui jayojja jama caba'yahua tii! ¡Cajjashahuaba tiitiquiahua mimishi'ama eba'ejji! <sup>9</sup> E'e, ¡Jesusaja epeeji jaahuanajji cuana esejaya esohui jayojja jama caba'yahua tii! Jamajjeya ojaya epeeji cuana Jesusajo e'e jojo nei huohui majje Jesosa nijje jjapee neineiqui mee caje'yo. Onaya esohui e'e nei Jesusajo siajje poani. Oya cuana jjabahuejjaqu'yo majje siajje poani pajea caje'yo pea'ai. Jamaya eyaya, Pabohua huohuaña Jesusaja epeeji jaahuanajji cuanaajo. ¡Jamaya caba'yahua oya cuana!

### *¡Shajjama' cuana siajje poani pajea mee'yocue!*

<sup>10</sup> E'e Tito, ¡Jesusaja epeeji jaahuanajji huoojeacue esohui e'e nei huohuiya! Quea huiiso Jodio cuana Jesosa nijje jjapeequinaje. Jamatii oya cuana esohui huohuiji nisho poani. Oya cuana shajjama' poani, pea cuana dasia cani, siajje poani jama ba'a: —¡Ojaña

Jesosaja epeeji cuana Moisesija esohui etehue'yo jayojja jama caba'yahua! ¡Cuiishasha biso nei cajehuissejjajea cahua! Majoya aje oe Eyacuiñajjiya oya cuana ba caje emimishi cuijea'yo —jamaya onaaya pea cuana dasia ca'yani.

<sup>11</sup> Tito, miyaya Jesosaja epeeji jaahuanajji huoojea majje ¡oya cuana ma esohui huohuijji nisho cuana huohui pajea mee'yocue! E'e, esohui huohuijji nisho cuaa beca Jesosaja epeeji cuana siajje po majje jjashahuabaqui quehua mee cani Jesosajo. Oya cuana siajje poani Jesosaja epeeji cuana nijje bejjo jjesheji.

<sup>12</sup> E'e Tito, ojjaña Queta nasijo ba'eca cuana quea mimishi nee nee. Jamajjeya oe esohui huohuijjiya Queta nasijo ba'eya huohui canaje jama ba'a: —Ojjaña deja cuana Queta meshijo ba'e siajjepojji nei nei poani. Quea mase ijjiacajji jayojja jama poani. Quea huea nee poani, jeje ajja nei nei poani pea'ai —jamaya acanaje Queta dejjaa.

<sup>13</sup> Jamaya e'e jojo nei. Jamajjeya ¡Jesosaja epeeji cuana niñeshe'a neineicue! ¡Jjabahuejja meequicue esohui e'e neijo Jesosa Quitojo! <sup>14</sup> Jamajjeya onaaya Jesosaja esohui e'e jojo nei jayojja jama acaje'yo. Jodio etiiquiana cuanaja esohui e'e nei pojjeamajo jjashajja'ajjaqui ajja, esohui huohuijji nishoja esohui pajea caje'yo pea'ai. <sup>15</sup> Jesosaja epeeji cuana jjabahuejjaqui'yo majje, quea ja'a jjashahuabaqui majje quea ja'a nee ba'yani. Beca cuana ca ca quea mimishi jjashahuabaquianijo Eyacuiñajjiya esohui jayojja jama a'ajja. Jamajjeya oya cuana quea mimishi ba'yani tii. Jjashahuaba tiitiiquiani mimishi epojji. Mimishi po majje quea yeno pojjeama, quea bicho pojjeama poani. <sup>16</sup> Oya cuana, esohui huohuijji nisho cuana siajje poani jama ba'a: —Ecuana Eyacuiñajjiya epeeji poani.

Chojja de. Siajje poani. Oya cuana Eyacuiñajjiya esohui jayojja jama a'ajja. Eyacuiñajji ojaya ba jjima. Eyacuiñajjiya mimishi boti'ama. Jamatii oya cuana quea mimishi ba'yani. Shajjama' poani. Mimishi cuana pajea'yo ajja.

## 2

### *¡Esohui e'e nei huohuicue ojjaña quea pame nee ba'e meeji!*

<sup>1</sup> Tito, ¡miyaya oe ojjaña quea pame nee eba'e mee'yojji huohuicue Eyacuiñajjiya esohui e'e nei ojjaña cuana huasijje, quea pame nee nee ona ba'ejji! <sup>2</sup> ¡Edejja tii cuana huohuicue jama ba'a: —¡A'a jja oe huoojji! ¡Quea ja'a nee jjashahuabaquicue quea pame nee eba'ejji! ¡Eyacuiñajjiya esohui jayojja jama ba'ecue! ¡Pea cuana quea jea nee acue! Jesosa nijje jjapeequianijo, pea cuaa miya napa caje. Jamatii ¡a'a Jesosa nijje jjapeequi pajea'yojji! —acue!

<sup>3</sup> Epona tii cuana huohuicue jama ba'a: —¡Jesosaja epeeji quea pame nee jayojjaya ba'ecue! ¡A'a pea cuana niñebajji! ¡A'a ishi'ishijji! ¡Eyacuiñajjiya esohui quea pame nee jo pea cuana jjabahuejja meequicue pea'ai quea pame nee eba'ejji!

<sup>4</sup> E'e, epona cuana niñeshe'acue jama ba'a: —¡Quea bei pocue! ¡Miqueahue, mique bacua cuana pea'ai quea jea nee acue! <sup>5</sup> ¡Quea ja'a nee jjashahuabaquicue! ¡A'a quea mimijjequijea jjashahuabaquijji! ¡Miquea equijo chacocue quea pame nee, huea'ama! ¡Pea cuana quea jea nee acue! ¡Miqueahueja esohui shajja'ajjacue pea'ai! Jamajjeya mi ba majje pea cuaa huohui caje jama ba'a: “¡Bacue! Jesosaja epeeji cuana quea pame nee poani. Jamajjeya Jesosaja esohui e'e nei, quea pame nee”.

<sup>6</sup> Tito, ¡oya jayojjaya shacuima' nequi cuana huohuicue pea'ai! ¡Jama acue ba'a: —Shacuima' nequi cuana, ¡quea ja'a nee jjashahuabaquicue Jesosa nijje ejjapee neineiquijji mimishi'ama! —jamaya shacuima' nequi cuana niñeshe'a neineicue!

<sup>7</sup> Tito, ¡miya pea'ai ba'ecue quea ja'a nee nee! Jamajjeya miya onaaya ba majje jama acaje ba'a: —E'e, Tito ba'yani quea ja'a nee. Jamajjeya ¡o jayojjaya eba'e!

E'e Tito, jjabahuejjaqui majje jama acue ba'a: ¡Esohui e'e nei huohuicue! ¡Quea ja'a nee oe huohuicue! <sup>8</sup> Jamajjeya pea cuaa miquea esohui shajja'ajja caje'yo. Miquea esohui e'e jojo nei poanijo, onajaya miya eniñebajji pojjeama. Jamajjeya pea cuana minijje mimijaji

majje quea bicho poaje. E'e, miya onaaya ba caje quea pame nee poani; miquea eba'ejji, miquea esohui quea ja'a nee pea'ai.

<sup>9</sup> Tito, ¡echacojji cuana joya ojaya echaco meejjija yajjijo sosema' chachacoani huohuicue jama ba'a: —¡Mi huoojeajji poani shajja'ajjacue! ¡Ojaya esohui jayojja jama chacocue! ¡A'a mimijajjiji onijje! Jamajjeya oya minijje quea bei poaje. <sup>10</sup> ¡Ojaya aquiana a'a sii poquiajji! Chojja, ¡quea pame oe ba'ecue! Jamajjeya mi huoojeajji poani jjashahuabaquije miyaya ojaya aquiana jaahuanaje'yo quea pame nee. E'e echacojji cuana, miquianaya jamaya quea pame nee ba'yanijo pea cuaa Eyacuiñajjija esohui shajja'ajja caje, esejaya Emeshi Mese neija. Jama acaje cuaa ba'a: “¡Jiquio echacojji Jesusaja epeeji poani. Oya quea pame nee, mimishi'ama ba'yani. Jamajjeya Eyacuiñajjija esohui quea pame nee. Jamaya caba'yahua” acaje cuaa —jamaya echacojji cuana acue, Tito!

*Eyacuiñajjiya eseya ba mee canaje ojaya ejjashahuabaquijji quea bei ojjañajo poani*

<sup>11</sup> E'e Tito, ojjaña Eyacuiñajjija quea jea nee neejo ohuaya ojjaña ba mee cani jama ba'a: Ohuaya ojjaña cuana ba'e meesahua cani. Jesusaja epeeji cuana mimishi cuijea'yo majje ba'e tiitii mee caje'yo eyajo onijje. <sup>12</sup> Jamajojoya ohuaya eseya jama acani ba'a: —¡Ecuea esohui jayojja jama acue! Jamajjeya eya quea bei poaje miquiana nijje. ¡Ejjashahuabaquijji quea mimishi pajea'yocue! E'e, ¡jiquio meshijo ba'yanijo jjashahuabaquicue quea pame nee! ¡E jayojja poaniya pea cuana quea jea nee acue! ¡Ecuea esohui jayojja jama atiitiecue quea pame nee pea'ai! —jamaya Eyacuiñajji poani.

<sup>13</sup> ¡Jamaya ejja'aqui Jesusaja epoe o'oyajjijo ishooñajo! Eseyaya eba oya e'e jojo nei poeje o'oya. Quea ca'a nee nee, quea jeajahua nee nee poeje'yo. Oya, Jesosa Quito ese jaahuanajji, oe nei quea ja'a nee nee. Eyacuiñajji nei oya. <sup>14</sup> Yahuajo Jesosa esejo mano'yonaje. Onaaya oya iña canaje equecua'yojji. Jamatii Jesosa mimi jjima jama ba'a: —¡A'a eya quecua'yojji! —chojja, jamaya Jesosa mimi jjima.

Ohuaya esejaya mimishijo mano'yonajejo, Eyacuiñajjiya eseya ba cani emimishi cuijea'yo. Jamaya ohuaya eseya ma ojaya epeejjime po mee ca'yonaje. Jamajojoya ohuaya eseya ba'e mee cani ojaya ejjashahuabaquijji jayojjaya quea boejea'yo, mimishi'ama. Jamajjeya ¡quea pame nee nee eba'e tii tii!

<sup>15</sup> E'e Tito, ¡jiquio esohui huohuicue! ¡Jesusaja epeeji cuana ba'e meesahuacue quea ja'a nee! ¡Shajjama' cuana jjabahuejja meequicue! Jama acue ba'a: —Eyacuiñajjiya eya huoojea canaje oja esohui huohuiya. ¡Jamajjeya shajja'ajjacue mo!

### 3

*Jesosaja epeeji cuana quea pame nee caba'yahua jama ba'a:*

<sup>1</sup> Tito, Jesusaja epeeji cuana huohui o'oyacue jama ba'a: —¡Miquea emeshi meseja esohui jayojja jama acue! ¡Mi huoojeajji poanija esohui jayojja jama acue pea'ai! E'e, ¡miquianaaya Jesusaja epeeji cuana poaniya quea pame nee atiitiecue huea'ama! <sup>2</sup> ¡A'a pea cuana niñebajji! ¡A'a jjamimicuijajea nobiajeaquijji pea cuana nijje! ¡Ojjaña nijje quea bihui pocue; ba'e meesahuacue quea bihui nee! <sup>3</sup> ¡Ojjaña nijje quea bei nee pocue! ¡A'a quenequene cuajjiji! E'e, yahuajo Jesosa nijje jjapeequi jjimahuajo eseya quea mimishi poanaje pea'ai ona jayojjaya. Jjeya ca chojja. Yahuajo eseya jjashahuaba taiquinaje. Shajjama' pea'ai poanaje. Esohui huohuijji nisho cuaa eseya dasia ca'yonaje. Yahuajo eseya mimishi pajea'yo sa poanaje. Jamatii pajea'yo jjima poanaje. Jamaya Jesusaja epeeji pojjeama jayojja jama poanaje, quea mimishi boti nee. E'e, yahuajo Jesosa nijje jjapeequi jjimahuajo eseya jjashahuaba tiitiquinaje quea mimishi epojji. Quea dejja tai poanaje; onajaya aquiana jea banaje. Pea cuana boti'ama nei nei poanaje. Eseyaya onajaya boti'ama nei nei poanaje pea'ai. Jjasoseaquijji ponequinaje. Jamaya aje oe eseya yahuajo ba'ya poa. <sup>4</sup> E'e, yahuajo eseya quea mimishi ponequinaje. Jamatii ese jaahuanajjiya, Eyacuiñajjiya eseya ba mee canaje ojjaña ojaya quea boti nee nee. Jamajjeya ohuaya ojjaña quea jea nee nee acani. <sup>5</sup> E'e, Eyacuiñajjiya esejaya mimishi cuijea ca'yajje eseya



ba'e tiitiije'yo eyajo. Eseyá quea pame poanijo pojjeama ohuaya esejaya mimishi cuijea ca'yonaje. Chojja, chama' joya quea pame nee mimishi'ama ba'yani. Jamatii Jesosa esejá mimishijo mano'yonajejo, Eyacuiñajjiya esejaya mimishi cuijea ca'yonaje. E'e, Eyacuiñajji quea quene tii tii pojjeama ese nijje poanaje; eseyá ojaya quea jea nee nee poanaje. Jamajjeya ohuaya esejaya mimishi cuijea'yo majje Edojjoshahua Pame ese que dobiqúi mee ca'yonaje eseyá quea bihui nee epojji. Ohuaya eseyá ba'e meesahua caní Eyacuiñajjiya esohuí jayojja, yahuajo jama pojjeama. <sup>6</sup> E'e, Jesosa Quito esejaya mimishijo mano'yonaje ese ba'e tiitii mee'yojji. Majoya Eyacuiñajjiya Edojjoshahua Pame huoojea ca'yonaje ese que dobiqúiya, ese quea pame nee ba'e meesahuaa. <sup>7</sup> Jamajjeya eseyá ojaya bacua cuana poanijojo ohuaya eseyá ba'e tiitii mee caje'yo onijje eyajo. E'e, eseyá Eyacuiñajjiya quea jea nee acanaje; ohuaya huohuí canaje jama ba'a: —Jesosaja epeejji cuana eyaya baña mimishi'ama, emimishi cuijea'yo.

<sup>8</sup> Tito, jiquio esohuí ecue etehue'yo e'e nei. Jamajjeya jiquio esohuí huohuí neineicue ojjaña Jesosaja epeejji cuana huasijje! Shajja'ajja majje onaaya quea pame nee atiitii caje'yo. E'e, jiquio esohuí quea pame nee. Shajja'ajja neinei majje ojjaña cuana quea pame nee ba'eje'yo. <sup>9</sup> Jamatii beca cuana ecue sohú jayojja jama ba'e ajja, quea pame ba'e ajja. Oya cuana aje oe jjamimicuiajea nobiajeaquiani onajaya esohuí quea quehuajo, Jodio etiiquiana cuanajo, Moisesija esohuí etehue'yojo pea'ai. E'e, jamaya quea tai. ¡A'a ona jayojja jama pojji, Tito! Jamaya po majje miquea pea cuana quea pame nee ejjapeequi meesahuajji pojjeama Jesosa nijje. <sup>10</sup> Esohuí huohuíjji nisho Jesosaja epeejji cuana ojaya esohuíjji jjashahuabaquí pajea mee sa poani. Peaja esohuí shajja'ajja mee sa poani. ¡Esohuí huohuíjji nisho huohuicue jama ba'a: —¡Miquea esohuí quea tai huohuí pajea'yocue! —acue!

Oya cuana shajjama' poanijo, joya huohuí o'oyacue ojaya esohuí quea tai ehuhuí pajea'yojji; beca huohuí'yome acue! ¡Majoya oya cuana shajjama' po tiitiiajo, oya cuana cajaa a'yocue! ¡A'a onijje jjapeequi o'oyajji! <sup>11</sup> Mi shajja'ajja sa po'yo ajjajo miquea eba ma esohuí huohuíjji nisho cuana shajjama' nei nei. Oya cuana quea pame po sa po'yo ajja nei nei. Eyacuiñajjiya esohuí jayojja jama a sa po'yo ajja. Jamajjeya quea mimishi poanijo, Eyacuiñajjiya oya cuana tecuea caje'yo. Quea nee nee po mee caje'yo pea'ai.

*¡Poecue e que Nicoponi yasijje!*

<sup>12</sup> Tito, quijje eyaya Jesosaja epeejji mi que, Queta nasi yasijje huoojeaje; Atema, Tiquico pojja'a huoojeaje. Mi que ba'eñaquijajo ¡poecue e que Nicoponi yasijje! Jomajo eyaya miya ishoaje. Majoya eseyá eeno shejo Nicoponijo ba'eje.

<sup>13</sup> Emeshi meseja esohuí bajji Sena bajjani, Jesosaja esohuí huohuíjji Apono bajjani pea'ai Queta meshijo nequí ajja. Jjeya nei pea meshi yasijje poquije. Jamajjeya joya cuana poquí meesahuacue! ¡Bobi cuana, eba'ejji cuana pea'ai quiacue!

<sup>14</sup> Tito, jamajjeya ¡Jesosaja epeejji cuana huohuicue jama ba'a: —¡Quea pame nee eba'e, huea'ama! ¡Jesosaja esohuí huohuíjji cuana, aema' cuana pea'ai ejjaquiaquí aquiana cuana; onaya ejjaba'e meesahuacuí! —jamaya acue Jesosaja epeejji cuana ona jaahuanajji epojji!

<sup>15</sup> Ojjaña Jesosaja epeejji cuana enijje nequíya eya huohuí'ajja mee caní jama ba'a: —Tito, ¿achajja ami ani so'ó ecuanajaya ebajji?

Ojjaña Jesosaja epeejji cuana Quetajo ba'e huohuicue jama ba'a: —Pabohua, ojjaña onijje nequíya pea'ai jama acaní ba'a: “¿Achajja acuae quiana ani so'ó?” ecuanajaya ebajji. Ecuanaya ojjañaja quea boti nee.

Miquianaya Eyacuiñajjiya quea jea nee nee. ¡Ohuaya miquianaya cajaanahua cahua! Mahuiso eyaya, Pabohua mi que tehuenaje, Tito. Apoa.

## PABOJA ETEHUE'YO PINEMO QUE FILEMÓN

### *Pabohua esohui tehue canaje Pinemo que*

<sup>1</sup> Ecuea epeeji Pinemo, eyaya Pabohua jiquio esohui mi que tehueaña. Eyaya Jesosa Quitoja esohui huohuañaajo, dejja mase cuaa eya iña'yo majje jeanobia ca'yonaje. Esejaya epeeji Timoteo enijje nequi. Pinemo, ecuaaya miya quea jea nee año. Miyaya eya chaco meesahuaña. <sup>2</sup> Jamajjeya jiquio pea ecuaaya esohui etehue'yo huojeaje Jesosaja epeeji cuana huasijje, ma miquea equi yasijje ojee dobiquiani Jesosa Quito bihuiaa. Esejaya epeeji epona Apia bajjani que tehueaña pea'ai. Oya esejaya jjo'i jayojjaya. Dejja Aquipo bajjani que tehueaña pea'ai, ma ese nijje chacoconaje Jesosa Quitojo.

<sup>3</sup> Eyacuiñajji esejaya Chii ai poani. Jesosa Quito esejaya Emeshi Mese nei poani. ¡Ohuaya miqianaya cajaanahua cahua! Miqianaya ojaya epeeji cuana poanijo, ¡quea bei nee capo mee cahua pea'ai!

### *Pabo Pinemojo quea bihui nee poani*

<sup>4</sup> Pinemo, eya Eyacuiñajji nijje mimianijo oya bihuiaña miya quea pame poanijojo. <sup>5</sup> E'e, pea dejja cuaa huohui cani jama ba'a: —Pinemohua ojjaña Jesosaja epeeji cuana quea jea nee acani, Jesosa Quitoja esohui jayojja jama po tiitiiani pea'ai.

<sup>6</sup> Jamajjeya eya Eyacuiñajji nijje mimiani mijo jama ba'a: —Eyacuiñajji, ¡Pinemo Jesosaja epeeji cuana nijje jjapeequi meesahuacue quea ja'a nee! Jamajjeya Jesosaja epeeji ojaya esohui jayojja jama poaje'yo Pinemo nijje. E'e Eyacuiñajji, ecuanaja echaco quea pame nee Jesosa Quitojo. Jamajjeya ¡miyaya Pinemo ojjaña onijje jjachichaquiani pea'ai jjabahuejja meequisahuacue joya miya o asahuanajejo quea pame nee! —jamaya eya mimiani Eyacuiñajji nijje mijo, Pinemo.

<sup>7</sup> E'e Pinemo, miyaya ojjaña Jesosaja epeeji cuana quea jea nee año. Miquea echacojji quea pame neejo pea epeeji cuana quea bihui nee poanaje. Jamajjeya eya quea bihui nee poani mijo.

### *Pabohua Onesimojo tehue canaje*

<sup>8</sup> Jamajjeya Pinemo, eya Jesosaja epeeji jaahuanijji etiiya jjejojo beshahua nei miya tehuenaje jama ba'a: “Onesimo miquea equi yasijje poqui'yajo ¡a'a oe cuiajjequi'yojji; ja'ajjequi o'oyacue!”

<sup>9</sup> Chojja, ecuea jama tehueme'yajji pojjeama mi que; eya miquea quea jea neejo ecuea etehue'yo jayojja jamaya miyaya aje'yo. E'e eya, Pabo etii. Eya Jesosa Quitoja huojea'yo ojaya esohui huohuiya. Jjeya eya ejeanobia ani; dejja mase cuaa eya iña'yo majje jeanobiajea ca'yonaje Jesosaja esohui huohui mee ajjaa jjejojo.

<sup>10</sup> Pinemo, eyaya mi que tehueaña Onesimojo. Ecuea esohui shajja'ajja majje Onesimo Jesosa Quito nijje jjapeequi'yonaje. Jamajjeya oya ecuea ebacua ejja jayojja jama poanaje. Jamaya oya poanaje eya jiquiojo Shoma cuiñajjijo eme' jeyo'yo anijo. <sup>11</sup> Yahuaajo minijje nequiya Onesimohua quea tai aca poa. Jjeya ca quea tai pojjeama'yo. Quea pame nee ejo chaco ca'yani. Mijo chaco caje o'oya pea'ai; jjeya ca ca quea pame nee chaco caje'yo, Onesimohua.

<sup>12</sup> Ecuea Onesimo quea jea nee nee poani; jamatii eyaya oya huojeaje o'oya mi que minijje eba'e o'oyajji. <sup>13</sup> E'e pojja'a miyaya oya huojeaje o'oya e que enijje eba'e'yojji. Jamajjeya eya quea bihui nee poaje'yo. Jamajjeya aje mo oe jama jjashahuabaquimeya poani. Eya jiquiojo nequi eme' jeyo'yo, Jesosa Quitoja esohui huohuijji poani joya. Miya e ba'e meesahua sa poanijo ¡Onesimo, miquea echacojji yacua huojea'yocue e ba'e meesahua! <sup>14</sup> Miquea echacojji ecuea enahuejji pojjeama. Chojja, miquea ej-jashahuabaqui'yojji jayojja jama a sa ca ca iña poani. Eya ca ca iña mi huojeajji pojjeama ca Onesimo enijje e'ani meejji, e ba'e meesahuajji. ¡Miquea ejjashahuabaqui'yojji jayojja

jama miyaya quea bihui nee a'yocue ejo! <sup>15</sup> Yahuajo oya minijje chacochocho maja sa po ajja jjejojo quehua poquia poa. Jjeya ca ca oya miyaya jaahuana tiitiije'yo. <sup>16</sup> Oya ca ca minijje chacochocho nequinaje sosema'. Jjeya ca ca oya Jesusaja epeeji poanijo miquea miquea chahua jayojja jama po'yonaje pea'ai. E'e, oya eseja chahua jayojja jama poani Jesosa Quito nijje jjapeequianijo. Esejaya oya quea jea nee nee poani. E'e de, ecuea oya quea jea nee nee. Jjeya oya Jesosa Quitoja epeeji; miquea echacoji pea'ai. Jamajjeya ¡miyaya oya quea jea nee nee acue!

<sup>17</sup> Jamajjeya ¡ecuea etehue'yojo jjashahuabaquicue! Pinemo, ¡eya miquea epeeji poanijo, Onesimo ba'e mee o'oyacue minijje! ¡Bacue! Eya mi que poquiajo, miya quea bihui nee poaje'yo. ¡Jamaya oe pocue Onesimo mi que poqui'yajo! <sup>18</sup> ¿A'a yahuajo ohuaya miquea aquiana sii ca poa? ¿A'a ma aquiana quea sose huiso nee nee? ¡A'a Onesimo sosequia meeji! ¡Eyaya oe casosequia'yahua! <sup>19</sup> Jamajjeya eyaya esohui tehueña ecuea emeya jama ba'a: Pinemo, eyaya Pabohua miya sosequiaje'yo ma Onesimohua sii ca poa.

Jamatii ¡jjashahuabaquicue! Miya Jesosa Quitoja epeeji poanaje eya huohuije shajja'ajja majje. ¿Ache sose huiso acuae ecuea esohui miyaya shajja'ajjanaje Jesosa Quitojo? ¿A'a quea huiso nee nee? <sup>20</sup> E'e Pinemo, miya ecue chahua jayojja jama poani. Jamajjeya eseya Jesosa Quito nijje jjapeequianijo, ¡che iña quea quijiji jaji nee po mee'yocue! ¡Onesimo mi que poqui'yajo, ja'ajjequi'yo majje jjequidobia'yocue!

<sup>21</sup> Jiquio eyaya esohui tehueña mi que; ecuea eba miya; ecuea esohui jayojja miyaya aje'yo e'e nei, quea pame nee nee aje'yo tii pea'ai.

<sup>22</sup> ¡Pea ecuea esohui jayojja jama a'yocue! ¡Equi equecuayijji cuiashabacue e aniñajjiya! Poejya pojja'a mo mi que. Miquianaya Eyacuiñajji nijje mimi huicha'ahuicha'a ani jama ba'a: —¡Eyacuiñajji, miyaya dejja mase cuana Pabo pichojea mee'yocue oe, equi ejjajejanobiaquijijijo ani! —miquianaya poanaje.

Jamajjeya eya jjashahuabaquiani jiquio jama ba'a: —E'e, Eyacuiñajjiya eya poqui meesahua caje mi que. Joya ecua miya mimiani jamaya Eyacuiñajjiya acaje'yo —jamaya eya jjashahuabaquiani.

*Pea esohui quea bihui nee epo meeji*

<sup>23</sup> Dejja Epapasi bajjani Jesosa Quitoja esohui huohuiji poani joya, dejja maseya oya iña majje jeanobiajea ca'yonaje pea'ai. Ohuaya eya huohui'ajja mee cani jama ba'a: —Pinemo, ¿achajja acuae mi ani so'o, de?

<sup>24</sup> Pea ecuea epeeji cuana enijjeya Jesosa Quitojo chacochochoani. Ohuaya eya huohui'ajja mee cani jama ba'a: —Pinemo, ¿achajja acuae mi ani so'o? —yohua cuana ba'a: Macoso, Anitaco, Demasi, Noca pea'ai. Mahuisohuaya mi huohui'ajja mee cani.

<sup>25</sup> Esejaya Emeshi Mese oe nei, Jesosa Quitohua ¡miquianaya cajuahuana cahua quea pame nee! Mahuisoya Pinemo, apoa. Eyaya Pabohua esohui tehuejyonaje.

ETEHUE'YO JESOSAJA EPEEJJI CUANA EMEOJA ESOHUIJO  
MIMIANI YASIJJE  
HEBREOS

*Eyacuiñajjiya oja Bacua Ejja huoojea canaje ona oja esohui ba meeya*

<sup>1</sup> Ecuea epeeji cuana quea huiso meshijo ba'e, yahuajo nei nei Eyacuiñajjiya ojaya epeeji nei cuana huoojea ca poa esejaya etiiquiana que, Jodio etiiquiana que. Jama poa ba'a: "¡Huohuiquicue Jodio cuana huasijje ecuea ejjashahuabaquijji ojjaña ebajji! ¡Huohui majamajacue oe!" Ma huoojea nequime aca poa; pea mano'yajo huoojea'yo esohui huohuijji aca nequia poa. Oe esohui huohuijji quea huiso huohui meesahua ca poa Eyacuiñajjiya ojaya ejjashahuabaquijji. Pea esohui huohuijji pea esohui huohui meesahua ca poa ojaya ejjashahuabaquijji pea'ai. Jamatii huohui jjima poa ojjaña Eyacuiñajjiya ejjashahuabaquijji. <sup>2</sup> Jjeya ca ca Eyacuiñajjiya oja Bacua Ejja Jesosa Quito bajjani huoojea canaje eseya ojjaña ojaya ejjashahuabaquijji ba meeya. Ohuaya Jesosaa oja Chii nijjeya ojjaña pana ca'ya poa, ojjaña aquiana meshijo e'anijji, eyatahuatahuajo enequijji pea'ai pana ca'ya poa. Jamajjeya ojaya nei aquiana. Jesosa ojjaña huoojea'yojji poani tii tii eyajo, meshi cuanajo pea'ai. <sup>3</sup> Jesosa oja Chii jayojjaya poa. Quea pame nee nee, quea ca'a nee nee. Jesosa oja Chii jayojjaya poani tii tii. Oya quea sohui poja nee neeya jjejojo ojjaña nequi mee ca poa. Ma ecua ohuaya yahuajo huohui ca poa jamaya acani ohuaya jjeya ojjaña eyajo nequi, ojjaña meshijo nequi pea'ai nequi ca'a tiitii mee cani Jesosaa. Oya ojjaña mimishi cuijea'yo majje, ma ojjaña ojaya epeeji epojji mimishi cuijea'yo majje anioquenaje oja Chii pejeje ebianeijje. Jomajo oya, Jesosa ojjaña huoojea'yojji poani tii tii. E'e, Eyacuiñajji, Jesosa pea'ai quea ca'a nee nee po tiitiiani. Pea ca'a'ama.

*Jesosa Eyacuiñajjiya Bacua Ejja quea ja'a nee nee esohuidojojji cuana quea ja'a pishana*

<sup>4</sup> Eyacuiñajjiya Jesosa nequi mee cani quea ja'a nee nee. Ojaya esohuidojojji cuana ca ca nequi mee cani quea ja'a pishana. Esohuidojojji cuana bajjani canaje quea bajjani pame pishana, Eyacuiñajjiya echacojji bajjani. Jesosa ca ca Eyacuiñajjiya Ebacua Ejja quea pame nee nee. <sup>5</sup> "Eyaya miya ojjaña ba meeaña cuana, miya ca ca oe ecue Bacua Ejja. Eya ca ca iña mique Chii". Jamaya Eyacuiñajjiya Jesosa acanaje. Eyacuiñajjiya ca ca esohuidojojji cuana jama huohuime ajjimaya. Eyacuiñajjiya Jesosa jama huohuime aca o'oyanaje ba'a: "¡Eya e'e jojo nee mique Chii caba cahua cuaa! E'e, miya ecue Bacua Ejja oe nei". Jama Jesosa huohuimeya acanaje. Jama huohuimeya esohuidojojji ajjima Eyacuiñajjiya.

<sup>6</sup> Eyacuiñajjiya oja Bacua Ejja oe nei meshi yasijje huoojea jeahua esohuidojojji jama huohuime aca poa ba'a: "¡Esohuidojojji cuana, ecue Bacua Ejja oe bihuiaque, ojjaña!" Jamaya Eyacuiñajjiya aca poa Jesosajo.

<sup>7</sup> Esohuidojojji jama aca poa ba'a: "Eyaya ecuea esohuidojojji huoojeaña quea cuejipashi nee nee pojjeje jama, quea quemonee nee beni jama". Jamaya Eyacuiñajji poa.

<sup>8</sup> Oja bacua ca ca Eyacuiñajjiya huohui ca poa jama ba'a: "Miya ca ca oe ecue Bacua Ejja e'e jojo nei, e jayojjaya tii tiiya Eyacuiñajjiya ca mi coma. Miya ojjaña huoojeajji poani tii tii ojjaña meshi yasijje. Quea ja'a nee nee ojjaña huoojeaña tii tii. <sup>9</sup> Ojjaña quea ja'a nee nee poani; ecuea ejjashahuabaquijji jayojja jama poani miquea quea boti nee nee poani. Mimishi cuana ca ca cajaa aña. Jamajjeya eyaya miya babaca'ya poa ojjaña Emeshi Mese nei epojji. Ojjaña miya shajja'ajja caje ojjaña meshijo ba'eca cuaa. Pea emeshi mese shajja'ajja jjima acaje cuaa. Jamajjeya miya quea jaji nee nee poani tii".

Jamaya yahuajo nei Eyacuiñajjiya tehue mee ca poa Jesosa nijje.

<sup>10</sup> Eyacuiñajjiya pea esohui tehue mee ca poa oja Bacua Ejja nijje, Jesosa nijje jama ba'a:

“Emeshi Mese nei, miyaya ebionei meshi pana cooa poa ojjaña. Eyatahuatahua pana cooa poa quea huesha nee nee, ojjaña eyajo enequijji pea'ai. <sup>11</sup> Ojjaña miquea epana'yo oe poaje, meshi cuana, eyatahuatahua pea'ai. Miya ca ca nequi tiitiije'yo. E'e, miya ca ca oe nequi tiitiije'yo. Meshi etii poaje, eyatahuatahua pea'ai. Jiquio ecua daqui eyacua daqui chii poani, daqui chii chii'yajo ñajjajja'yo majje jeajeaña jayojja jama eyaya meshi aje, eyatahuatahua pea'ai. <sup>12</sup> E'e, daqui chii jeajeaña eyacua ehushojji jayojja jama meshi, eyatahuatahua pea'ai tii'yajo eyaya cajaa aje eyacua epana'yojji. Miya ca ca jamatii nequi tiitiije'yo quea ja'a nee nee”.

Jamaya poanaje Eyacuiñajji oja Bacua Ejja nijje, Jesosa nijje.

<sup>13</sup> E'e, jamaya Eyacuiñajjiya oja Bacua huohui ca poa esejaya ebajji jama ba'a:

“¡Anioquecue ecuea ebiane mijiije enijje ojjaña huoojea'yojji! ¡Epejjejo ishoa'ajjacue! Mi quecuajji nisho yani. Eyaya oya cuana ca'a'ama po mee majje mi shajja'ajjajji po meeje'yo”.

Jamaya Eyacuiñajjiya oja Bacua Ejja ca ca oe huohui ca poa. Esohuidojojji nijje ca ca jama mimimeya po jjima.

<sup>14</sup> E'e, esohuidojojji cuana Eyacuiñajjiya huoojea'yo ca ca oe. Oya cuana huoojea cani Jesosaja epejji cuana jaahuanaa, ma onijje eyajo eba'e tiitii'yojji cuana jaahuanajji.

## 2

### *¡Jesosa shajja'ajjacue ojaya epejji nei epojji!*

<sup>1</sup> Ecuea epejji cuana, jamajjeya ¡shajja'ajja neineicue Jesosaja esohui ojaya epejji nei nei epojji! Yahuajo pishana maya shajja'ajjanaje eseyaya. Esohui pajea'yo majje ca se ca oe bishe jeyo jjima jayojja beniya dojojea cani jayojja jama poaje; poquiquehua chana se esohui pajea'yo majje. <sup>2</sup> Yahuajo nei nei Eyacuiñajjiya esohuidojojji esejaya etiiquiana huasijje huoojea ca poa. Oja sohui e'e nei huohui huicha'a huicha'a mee ca poa: “¡Shajja'ajjacue ecuea esohuidojojji esohui e'e nei!” jamaya Eyacuiñajjiya etiiquiana aca'ya poa.

Jamajjeya shajjama' cuana Eyacuiñajjiya quea nee po mee ca poa oja esohui ajjimajojo. Jjashajja'ajjaqui ajjajojo quea nee nee po mee ca'ya poa. <sup>3</sup> Jjeya ca ca Eyacuiñajjiya eseya quea pame nee nee acani. Jesosa nijje jjapeequianijo, ohuaya eseya ba'e tiitii mee caje'yo eyajo. Jesosa nijje jjapeequi sa po'yo ajjajo cho, eba'e tiitii mee'yojji pojjeama. E'e, Jesosaa esejaya Emeshi Mese neiya huohui coo ca poa jama ba'a: —Enijje jjapeequiajo, eyaya miquianaya ba'e tiitii meeje'yo enijje —Jesosaa poanaje.

Majoya o shajja'ajjajji cuaa eseya huohui canaje jama ba'a: —E'e jojo nei Jesosaa eseya ba'e tiitii mee caje'yo eyajo onijje jjapeequianijo.

<sup>4</sup> Eyacuiñajjiya pea'ai ba mee canaje ma esohui e'e jojo nei. E'e, Eyacuiñajjiya Jesosaja epejji cuana ma dejjaa ajjima acani ameesahua canaje. Ma dejjaja yahuajo ba jjima poa ba meesahua canaje pea'ai. Edojjoshahua Pame huoojea canaje pea'ai ojaya ejjashahuabaquijji jayojja jama ameesahuaa, Eyacuiñajjiya. Jamajjeya eseya ba mee canaje e'e jojo nei Jesosaa eseya ba'e tiitii mee caje'yo eyajo onijje jjapeequianijo.

### *Meshi eyacuajo ojjaña huoojea'yojji poaje Jesosa*

<sup>5</sup> E'e, quijje Eyacuiñajjiya meshi pana caje'yo eyacua. Ma meshi eyacuajo ecuaaya miquianaya huohuiaña jama poaje ba'a: Eyacuiñajji Jesosaja epejji cuana nijje jama poanaje ba'a: —E'e jojo nei meshi eyacuajo miquianaya ona huoojeajji poaje —Eyacuiñajji jamaya poanaje Jesosaja epejji cuana nijje. Jamaya mimi jjima esohuidojojji nijje, de. <sup>6</sup> Chojja. Yahuajo nei nei Dabi tehue meesahua ca poa Eyacuiñajjiya jama ba'a:

“Eyacuiñajji, miya jjashahuaba tiitiiquiani meshijo eba'ejji cuanajo. Dejja cuana ca'a'ama. Quea pame pishana. Jamatii oya cuana miyaya jaahuanaña. <sup>7</sup> E'e Eyacuiñajji, yahuajo miyaya ojjaña dejja cuana quea pame anaje; esohuidojojji quea pame nee jayojja beshahua nei anaje. Jamaya miyaya oya cuana nequi meenaje iye huiso daqui sheme. Miyaya oya cuana quea ja'a nee nee po meenaje.

<sup>8</sup> Quea ca'a nee nee po meenaje miyaya ojjaña huoojea'yojji epojji”.

Jamaya Eyacuiñajjiya yahuajo nei Dabi tehue mee ca poa. E'e, ma etehue'yojo jama poa ba'a: “Dejja ojjaña huoojea'yojji po mee canaje Eyacuiñajjiya”. E'e, ojjaña huoojea'yojji po mee ca poa, ojjaña aquiána cuana huoojeajji. Jamatii eseyaya baña jjeya dejja cuana ojjaña huoojeajji po jjima poani.

<sup>9</sup> Jesosa ca ca esejaya eba. Eyacuiñajjiya oya nequi mee ca poa beshahua nei esohuidojojji quea pame jayojja. Jamaya nequi mee ca poa oe pojji daqui sheme. Eseyá Eyacuiñajjiya quea jea nee poanijo, Jesosa ese jayojja yamijji poa; emano'yojjiya poa. Jamajjeya Jesosa ojjaña nahuejji mano'yonaje. Eyacuiñajjiya oya shequi mee ca o'oyanaje quea bame nee nee enequi tiitii'yojji. Pea chama' o jayojja, de.

<sup>10</sup> Eyacuiñajjiya oja Bacua Ejja nijjeya, Jesosa nijjeya ojjaña pana majje nequi mee cani, ojjaña eyajo nequi, ojjaña meshijo ba'e pea'ai. Ojjaña yani de, Eyacuiñajji quea bihui po meeji. Oya ojjañaja Emeshi Mese tii poani; ojjaña Jesusaja epeeji nequi tiitii mee sa poani onijje: —E'e, ecuea Ebacua Ejja quea nee nee po majje oya ojjaña jaahuanajji poaje —jamaya Eyacuiñajji jjashahuabaquinaje—. Jamajjeya jamaya poaje. Ecuea Ebacua Ejja quea nee nee po meeje. Jamaya quea pame. Jamajjeya ohuaya, Jesusaa quea huiso ba'e tiitii mee caje'yo onijje eyajo —jamaya Eyacuiñajji poanaje.

<sup>11</sup> Jamajjeya Jesusaa ojjaña eseya quea boejea po mee ca'yani mimishi cuijea'yo majje. Jamaya ojjaña eseya Eyacuiñajjiya bacua po mee cani o jayojja pea'aiya. Jamajjeya oya, Jesosa ese nijje quea bihui nee jama poani ba'a: —Ecue Chii miquianajaya Chii pea'ai poani. Miquianaya ecuea ecue chahua mese cuana, ecue jjo'i cuana —Jesosa poani.

<sup>12</sup> E'e, Eyacuiñajjiya esohui yahuajo nei etehue'yojo Jesosa oja Chii nijje jama poa ba'a: “Eyacuiñajji, eya ecuea huapa pojjeama cuana nijje mimije mijo. Eyaya miya bihuiaje ojjaña ecuea epeeji cuanaja eshajja'ajjajji jama ba'a: —Eyacuiñajji, miya ca ca oe quea ca'a nee nee nequi —jamajjeya eya sohuicuayaje”.

<sup>13</sup> Jamaya pea esohui yahuajo nei etehue'yojo Jesusaa aca poa ba'a:

“Eyacuiñajji, eya ca ca iña miyaya baña Eyacuiñajji nei nei. Miyaya eya jaahuanaña e'e jojo nei”.

Jama pea'ai poa ba'a:

“Eyacuiñajji, jeya bacue ecuea huapa pojjeama cuana nijje, ojjaña joya miyaya enijje jjapeequi meesahuanaje nijje!”

Jamaya yahuajo nei Eyacuiñajjiya Isaia tehue mee ca poa Jesusaja esohui.

<sup>14</sup> Jesusaja epeeji cuana dejja cuana aje oe yamijji. Jamajjeya oya, Jesosa poeyanaje yamijji, ese jayojjaya mano'yome epojji. Mano'yonajeya jjejojo ohuaya Edosiquiana nei Satanasa bajjani jeabichajeya ca'yonaje, ma ojjaña manomee'yojji poani jeabichajeya ca'yonaje. E'e, eba'e tiitii'yojji jjejojo mete'ama eseya poaje emano'yojji. <sup>15</sup> Yahuajo ojjaña eseya quea mete jjashahuabaqui aninaje jama ba'a: —E'e de, eya manojeyo. Jamaya quea tai. Quea mete ca iña emano'yojji —eseya poanaje.

Jesosaja epeeji nei ca ca jjashahuabaquiáni jama ba'a: —E'e, eya manojeyo. Jamatii Eyacuiñajjiya eya ba'e tiitii mee caje'yo onijje eyajo.

<sup>16</sup> Jamajjeya Jesosa dejja jayojja yamijji poeyanaje. Poeyanaje esohuidojojji jayojja pojjeama, esohuidojojji jaahuanaa pojjeama. Chojja. Jesosa poeyanaje dejja jayojja yamijji ese jaahuanaa, Amajamaja osecua cuana jaahuanaa. <sup>17</sup> Jamajjeya oya, Jesosa ese jayojjaya poanaje ojjaña ojaya epeeji nei jaahuanajji jama ba'a: Eyacuiñajji nijje emimijji etii yahuajo ba'eya Eyacuiñajjiya esohui jayojja jama aca poa Eyacuiñajji Jodio cuana nijje quea bei epo meeji nisho. Jjeya ca ca Jesusaa Eyacuiñajjiya ejjashahuabaquijji jama e'e jojo nei acani quea ja'a nee. Eseja mimishi cuijea'yojji mano'yonaje. Jamaya Eyacuiñajji ese nijje e'e jojo nei quea bei po mee canaje tii tii. <sup>18</sup> Jiquio meshijo ba'e Jesosa quea nee nee poa. Cuanaya Edosiquiana neiya, Satanasa Jesosa quea mimishi epo meeji nisho aca poa. Jamajjeya Satanasa eseya quea mimishi po mee sa acanijo, Jesusaa eseya quea pame ba'e mee cani. Jamaya Jesusaa ameesahua cani ba'a: —Chojja, eya Jesusaja epeeji poani. Ohuaya eya jaahuana canijo, quea mimishi po maja sa po ajja ca iña —jamaya Jesusaa eseya po meesahua cani.

## 3

*Jesosa quea pame nee; Moisesi quea pame pishana poa*

<sup>1</sup> Jamajjeya ecuea epeeji cuana, ¡Jesosajo oe jjashahuabaquicue! Eyacuiñajjiya eseya babaca canaje Jesusaja epeeji epojji, onijje eyajo eba'e tiitii'yojji. E'e, ¡Jesosajo oe jjashahuaba tiitiiquicue! Eyacuiñajjiya oya huoojea canaje ese jaahuanaa: —Miya enijje ma mimi poquime poaje miquea epeeji cuanajo. Quea pame nee nee jamaya poaje'yo tii —jamaya Eyacuiñajji poanaje Jesosa nijje.

<sup>2</sup> E'e, Eyacuiñajjiya yahuajo Jesosa babaca ca poa ojaya epeeji cuana jaahunajji epojji. Ojaya epeeji cuanajo onijje emimijji quea pame nee nee po mee ca poa. Ma ecua Eyacuiñajjiya huohui canaje jamaya e'e jojo nei acanaje Jesusaa. Jesusaa jayojjaya etiiquiana Moisesiya Eyacuiñajjiya epeeji cuana jaahuname aca poa yahuajo nei nei.

<sup>3</sup> Moisesi ca ca quea ja'a pishana poa. Jesosa ca ca quea ja'a nee nee poanaje. E'e, jiquio ecua se equi iya jjimajo jjashahuabaquiani, jamaya Jesosa jjashahuabaquinaje eseya Eyacuiñajjiya epeeji quea ja'a nee epo meejji. ¡Quea pame nee nee Jesosa! Moisesi ca ca echacosahuajji jayojja jama poa; Jodio cuana beshahua nei Eyacuiñajji nijje jjapeequi meesahua ca poa. <sup>4</sup> E'e, ojjaña equi cuana equi iyajji poaniya iya cani. Jiquio ecua equi iyajji poaniya equi iya cani jama panameya Eyacuiñajjiya aca poa. Ojjaña pana'yo majje quea ja'a nee jjeya nequi mee cani. Jama jayojjaya Jesusaa ojaya epeeji cuana yahuajo nei nei ba'ya poa quea ja'a nee onijje jjapeequi meesahua ca poa; ojaya epeeji jjeya nei ba'yani pea'ai jjapeequi meesahua cani onijje. <sup>5</sup> Jamajjeya Moisesi Eyacuiñajjiya echacojji poa. Jiquio ecua echacojjiya equijo chaco neinei cani jama jayojja Moisesiya Eyacuiñajjiya esohui pea cuana ba mee ca poa; ma Eyacuiñajjiya quijje huohui caje Moisesiya huohui ca poa pea'ai. <sup>6</sup> Jesosa Quito ca ca Eyacuiñajjiya Ebacua Ejja. Oya e'equi mese jayojjaya, equi chacojji jayojja pojjeama. Eseya ojaya equi jayojja poani. E'e, eseya Eyacuiñajjiya equi jayojja poani ca jama jjashahuabaquianijo tii ba'a: —Eya Eyacuiñajjiya epeeji. Ohuaya eya ba'e tiitii mee caje'yo onijje eyajo.

Jamajjeya ¡jamaya huohui tiitiicue! ¡Jesosa nijje quea bihui nee jjapee tiitiiquicue! Ohuaya eseya jaahuana cani quea ja'a nee nee.

*Ojaya epeeji cuana jomishoca mee caje'yo Jesusaa*

<sup>7</sup> Yahuajo nei nei Edojjoshahua Pameya esejaya etiiquiana esohui tehue mee ca poa jama ba'a:

“Jjeya nei Eyacuiñajji minijje mimianijo, ¡ojaya esohui shajja'ajja neineicue! <sup>8</sup> ¡A'a shajjama' pojji! ¡Miquianajaya etiiquiana jayojja jja oe a'a pojji! Yahuajo nei Eyacuiñajjiya esohui shajja'ajja jjima poa meshi jabojo nequija. Meshi quimajo nequi etiiquiana cuana quea mimishi nee nee poa. Jamatii Eyacuiñajji quenequene cuaji ajja poa etiiquiana nijje. <sup>9</sup> E'e, miquianajaya etiiquiaa yahuajo nei ba'ya poaa Eyacuiñajji ba'ajja ca poa. Jama poa ba'a: —Eya quea mimishi poanijo jamatii Eyacuiñajjiya eya etecueajji pojjeama —jama posoya jjabaquia poa cuana. Jamajjeya Eyacuiñajjiya jama aca poa ba'a: —Miquianaya ca jja ca oe quea mimishi nee nee. Quea huiso shequiajame, 40 shequiajame eya miquianajo ishoa'ajjaña poa miquianajaya mimishi cuana epajea'yojji nisho. <sup>10</sup> Jamajjeya mimishi pajea'yo ajjajo eya quea tecue miquiana nijje poa: Miquianajaya ejjashahuabaquijji quea quehua, quea tai. Ecuea esohui jayojja jama a sa po'yo ajja. Jjabahuejjaqui'yo ajja —jamaya Eyacuiñajji poa—. <sup>11</sup> Jamajjeya quea quene po majje eyaya miquianaya tecueajejanaje jama ba'a: Shajjama' poanijo e'e jojo nei miquianaya ca mi ca oe edobiquijji pojjeama ecue meshi quea pame yasijje ejomishocajji, quea bei eba'e'yojji pea'ai”.

Jamaya Eyacuiñajjiya etiiquiana cuana Moisesi nijje nequi tecueajea ca poa. Jamaya yahuajo nei esohui etehue'yo poa.

<sup>12</sup> Ecuea epeeji cuana, jamajjeya oe ¡quea ja'a nee jjashahuabaquicue! ¡Eyacuiñajjiya sohui jama acue! ¡A'a quea quehua jjashahuabaquijji! Shajjama' po majje Eyacuiñajji

nijje miya jjapee pajeaqui chana'. Tecuea ca chana' mi. Oya ca ca oe ba'e tiitiiani, de.  
<sup>13</sup> Jesosaja pea epeeji cuana nijje ca ca mimi huicha'a huicha'acue jama ba'a: —¡Jjeya nei Jesosa nijje ejjapee neinei qui!

Jamaya poanijo miquianaya mimishi cuanaja edasiajji pojjeama; quea mimishi nee nee epojsi pojjeama.

<sup>14</sup> E'e, Jesosa nijje jjapeequi jeahuajo eseya jjashahuaba neinei quinaje onijje eyajo eba'e tiitii'yojsi. ¡Jamaya ejjashahuabaqui poqui! Jamajjeya quijje eseya onijje ona huoojea'yojsi poaje'yo tii tii eyajo.

<sup>15</sup> E'e, jamaya yahuajo nei esohui etehue'yo poa ba'a:

“Jjeya nei Eyacuiñajji minijje mimianijo ¡ojaya esohui shajja'ajja neineicue! ¡A'a shajjama' pojji! ¡Miquianajaya etiiquiana jayojja jama a'a pojji!”

Jamaya yahuajo Dabiya tehue ca poa.

<sup>16</sup> ¡Bacue! Moisesiya esejaya etiiquiana Ejito meshijo ba'e poqui meesahua ca'ya poa. Eyacuiñajji ona nijje mimi huicha'a huicha'a poa. Jamatii beshahua nei ojjaña shajjama' poa. <sup>17</sup> Ona nijje Eyacuiñajji quea quene nee poa quea shequiaja huiso nee neejo, 40 shequiajame. Oya cuana ca ca quea mimishi nee nee poa. Jamajjeya mano ca'ya poa, oe mano popoqui'ya poa meshi jabojo, quimajo. <sup>18</sup> Shajjama' tiitii poajojo Eyacuiñajjiya oya cuana tecuea ca poa jama ba'a: “E'e jojo nei miquianaya ecue meshi yasijje edobiquijji pojjeama quea bei nee ejomishocajji. ¡Quea mimishi nee nee mi coma!” Jamaya Eyacuiñajjiya etiiquiana yahuajo nei nei ba'ya poa tecuea ca poa.

<sup>19</sup> Jamajjeya e'e jojo nei oya cuana meshi quea pame nee yasijje dobiqui jjima poa ejomishocajji Eyacuiñajjiya esohui shajja'ajja sa po ajja jjejojo, ojaya epeeji nei pojjeama jjejojya.

## 4

### *Etiiquiana jayojja jama eseya ejomishocajji yasijje dobiqui ajja po chana'*

<sup>1</sup> Jamajjeya Eyacuiñajjiya yahuajo nei etiiquiana huohui ca poa jayojja jama ohuaya jjeya eseya huohui cani jama ba'a: —¡E que poe'yoque ejomishocajji, quea jjashahuabaqui bei nee nee epo'yojsi! —oya poani.

Jamajjeya ¡quea ja'a jjashahuabaquicue! ¡Pea cuana quea ja'a jjashahuabaqui meesahuacue! ¡Ojee Jesosaja epeeji nei pocue! Jamajjeya Eyacuiñajjiya eseya o jayojjaya jomishoca mee caje'yo, ojjaña. <sup>2</sup> E'e, yahuajo nei Eyacuiñajjiya esejaya etiiquiana cuana huohui ca poa esohui quea pame nee nee. Jjeya eseyaya jiquio esohui quea pame nee shajja'ajjaña pea'ai, etiiquiaa jayojjaya. Etiiquiaa cuaa jiquio esohui shajja'ajja nisho ca poa. Shajjama' poaa jjejojo eshajja'ajjajajji shajja'ajjajea ca'ya poa. Jamajjeya Eyacuiñajjiya oya cuana jomishoca mee jjima aca poa, etiiquiana cuana. <sup>3</sup> Eseyaya jjeya Eyacuiñajjiya esohui quea pame nee e'e jojo nei shajja'ajjaña. Ojaya esohui jayojja jama añajo, onijje jomishoca mee caje'yo, eseya. E'e, etiiquiana aje jja oe shajjama' poajojo Eyacuiñajjiya tecuea ca poa jama ba'a:

“Jamajjeya quea quene po majje eyaya oya cuana tecueajejanaje jama ba'a: —Shajjama' poanijo e'e jojo nei miquianaya edobiquijji pojjeama ecue meshi quea pame yasijje quea jaji nee ejomishocajji”.

Jamaya Eyacuiñajjiya aca poa. Yahuajo ojjaña cuana panajeyo majje Eyacuiñajji jomishoca poa. Apoa ojjaña amajje Eyacuiñajji jomishoca poa. Jamatii etiiquiana shajjama' cuana tecuea ca poa jama ba'a:

“Oya cuana aje oe edobiquijji pojjeama ecuea meshi quea pame yasijje quea jaji nee ejomishocajji”.

Jamaya Eyacuiñajji poa.

<sup>4</sup> E'e jojo nei pea esohui yahuajo nei etehue'yo jama poa ba'a:

“Eyacuiñajjiya ojjaña panajeyo ca poa quea cahui huisojo, me oejje oe, 6 cahuime. Majoya ojjaña apoa amajje oya jomisho ca poa cahui oe”. <sup>5</sup> E'e, etiiquianajo aje oe



jama tehueme ya pea'ai poa ba'a: "Oya cuana aje oe dobiqúi jjíma poaje enijje jomishocaa".

<sup>6</sup> Jamajjeya etiiquiana cuana yahuaño nei ba'e yasijje ebionei Eyacuiñajjiya oja esohui quea pame nee huohui ca poa. Shajjama' poa jjejoño dobiqúi jjíma poa Eyacuiñajjiya meshi quea pame yasijje onijje jomishocaa. Pea cuana ca ca Eyacuiñajji que dobiqúi jomishocaa. <sup>7</sup> Jamajjeya etiiquiana cuana Moisesi nijje nequi jashajja'ajjaqui ajjaño jomishoca mee jjíma aca poa. Jamajjeya Eyacuiñajjiya quijje nei Dabi tehue mee ca poa jama ba'a etiiquianaja osecua cuana huasijje: "¡Jjeya nei jashajja'ajjaquicue!" Jamaya Eyacuiñajji poanaje esejaya etiiquiana nijje, ma Dabi nijje nequi nijje. Jamajjeya eyaya Dabija etehue'yo huohuije o'oya jama ba'a:

"Jjeya nei Eyacuiñajji minijje mimianijo ¡ojaya esohui shajja'ajja neineicue! ¡A'a shajjama' pojji!"

Jamaya yahuaño nei Dabiya tehue ca poa etiiquianaja onijje ba'aja ebajji.

<sup>8</sup> E'e, Eyacuiñajjiya Josoe etiiquiana cuana ojaya meshi quea pame yasijje poqui meesahua ca poa. Jamatii jomishoca jjíma poa; quea jashahuabaqui ja'a po jjíma. Jamajjeya esejaya eba Eyacuiñajji jashahuabaqui jama ba'a: —Quijje eyaya ojjaña ecuea epeejji nei cuana jomishoca meeje'yo —Eyacuiñajji poani.

<sup>9</sup> E'e, quijje Eyacuiñajjiya ojjaña ojaya epeejji cuana jomishoca tiitii mee caje'yo onijje. Yahuaño nei ohuaya me oeje oe, 6 cahuime ojjaña panajeyo ca poa. Panajeyo majje jomisho ca poa oe cahuime. O jayojjaya Eyacuiñajjiya ojaya epeejji nei cuana jomishoca mee caje'yo. <sup>10</sup> Jamajjeya Eyacuiñajjiya me oeje oe cahuime chaco majje chaco pajea ca poa; o jomishoca poa jayojjaya eseya Jesosa nijje jjapeequi majje quea bei jashahuabaqui. Quijje chaco chaco pajaje'yo, jomishoca tiitii'yo onijje eyajo. <sup>11</sup> Jamajjeya ¡jashajja'ajjaquicue oe! ¡Quea ja'a nei jashahuabaquicue Jesosaja epeejji nei epojji, e'e joño nei onijje ejomishoca tiitii'yojji! ¡A'a oe esejaya etiiquiana jama pojji! Shajjama' poani Eyacuiñajji nijje ejomishocajji pojjeama. Cajaa mi acaje'yo.

<sup>12</sup> E'e, Jesosa nijje jjapeequianijo oya ese nijje mimiani, o jayojja ameesahua cani. Ojaya esohui jayojja jama ohuaya eseya e'e joño nei ameesahua caje'yo. E'e, ojaya esohui baa se beca jama. Jiquio ecua baaa shejjishejjiiya jehuija'ajja majje esa' ba cani jama jayojjaya Eyacuiñajjiya esejaya ejjashahuabaqui'yojji cuana ba cani. E'e, Eyacuiñajjiya esohui ba neinei majje eseya jashahuabaquije esejaya eba'ejjijo quea ja'a pojja'a, quea mimishi pojja'a poani. <sup>13</sup> E'e joño nei ojjaña Eyacuiñajjiya eba oja pana'yo. Chama' Eyacuiñajjiyo ejjanequi quehuaquijji, de. Jamajjeya quijje nei o cojja nei nequi majje eseyaya huohuije'yo quio eseya eshe nequiya anequinaje cuana.

*Jesosa esejajo Eyacuiñajji nijje mimianijo ¡quea ja'a nee jjapeequicue!*

<sup>14</sup> Jamajjeya ¡Jesosa nijje jjapeequicue! Jesosa ca ca oe nei Eyacuiñajji nijje mimi neinei; oya Eyacuiñajji nijje emimijji etii quea pame nee nee. Oya Eyacuiñajjiya Eba Eba Eja oe nei. Yahuasijje poqui'yonaje. Oja Chii pejeño nequi, Eyacuiñajji pejeño. Onijje mimiani esejajo. Jamajjeya ¡Jesosa nijje e'e nei jjapeequicue! <sup>15</sup> E'e, Jesosa Eyacuiñajji nijje mimi neinei esejajo. Oya ese jayojjaya quea nee poanaje. Jamajjeya: —Jesosa, eya quea nee, quea yeno nee ani —eseya poani.

Eseya Jesosa nijje jamaya mimiaño, ohuaya eseya saja'a cani jama ba'a: —E'e, ecuea eba. Eya quea nee nee, quea yeno nee nee pea'ai poanaje. Jamajjeya eyaya miya jaahuanaje —jamaya Jesosaa eseya acani.

Satanasaa Jesosa quea mimishi po mee sa aca poa. Jamatii jjadasia meequi ajja poa. Jesosa ca ca oe quea mimishi po ajja nei nei poa. Jamajjeya eseya quea mimishi poajo, ohuaya, Jesosaa eseya jaahuana cani tecue'amaa jjejoño. <sup>16</sup> Jamajjeya ¡Jesosa nijje bicho'ama emimi! Ohuaya esejaya mimishi cuana cuijea caje'yo. Eseya ojaya quea jea nee poanijo quea pame nee jaahuana caje'yo tii tii. Ca'a'ama poajo quea ca'a po mee caje'yo pea'ai.

## 5

<sup>1</sup> ¡Bacue! Eyacuiñajjija esohui jama jayojja esejaya etiiquiánaa beca dejja onijje nequi babaca ca poa Eyacuiñajji nijje emimijji etii epojji. Babaca majje huoojea ca poa jama ba'a: —¡Eyacuiñajji nijje mimicue esejo! ¡Aquiána cuana, ijjiacajji cuana ehuone' nequi pea'ai dahuacue ecuanaja yajji, Eyacuiñajji ecuanaja mimishijo quea bei epo meeji! — jamaya aca poa etiiquiánaa.

<sup>2</sup> Ojjaña esejaya etiiquiána ca'a'ama, Eyacuiñajjija esohui ba neinei po jjima cuana, quea mimishi poa. Ma Eyacuiñajji nijje emimijji etii ca'a'ama pea'aijo oya pea cuana nijje tecue'ama poa. Quea bei mimianinaje Eyacuiñajji nijje pea cuanajo. <sup>3</sup> Jamatii oya ca'a'ama jjejojo quea mimishi poani pea'ai. Jamajjeya ijjiacajji ehuone' jaja majje onaja mimishijo dahuajea jeahuajo Eyacuiñajji nijje mimia poa jama ba'a: —Eyacuiñajji, ¡ecuea mimishi cuijea'yocue! —acaninaje ohuaya. Majoya jama poa ba'a: —Eyacuiñajji, ¡jiquio e'aquiána meseja mimishi cuijea'yocue pea'ai! —huohuime acaninaje Eyacuiñajji nijje mimianijo.

<sup>4</sup> Quea pame nee Eyacuiñajji nijje emimijji etii epojji. Dejja cuana mimi ajja Eyacuiñajji nijje jama ba'a: —Eya ca ña jamatii minijje emimijji etii poaje —jamaya mimime epojji pojjeama. Chojja. Eyacuiñajjiya oeyaya iyaa majje onijje emimijji etii po mee ca poa. Jamaya yahuajo nei ohuaya ebionei onijje emimijji etii Anoni bajjani aca poa.

<sup>5</sup> Jamajjeya jamaya pea'ai Jesosa Quito Eyacuiñajji nijje emimijji etii jamatii po jjima poa. Oya Eyacuiñajjija ebabaca poa. Eyacuiñajjiya ca ca oe Jesosa onijje emimijji nei po mee ca poa yahuajo nei nei. Jama poa ba'a: “Eyaya miya ojjaña ba mee ña cuana miya ca ca oe ecue Bacua Ejja. Eya ca ca ña mique Chii” jamaya Eyacuiñajjiya Jesosa acanaje.

<sup>6</sup> Majoya huohui ca poa jama pea'ai ba'a: “Miya enijje emimijji poaje'yo tii tii Menequisine jama. Oya yahuajo nei nei enijje emimijji nei po tiitiia poa”.

Jamaya yahuajo nei nei Eyacuiñajjiya tehue mee ca poa esohui Jesosajo.

<sup>7</sup> E'e, yahuajo nei Jesosa ese nijje nequiahua oya Eyacuiñajji nijje mimi huicha'a huicha'anaje jama ba'a: —Ecue Chii, ¡nahuecue mo! Onaaya eya quecuajea ca chana' —jamaya Jesosa mimi neineinaje Eyacuiñajji nijje. Quea yeno nee nee jjejojo panaje. Oya Jesosa quea ca'a pojjeama jjabaquinaje. Oja Chii quea bihui po mee sa acanaje. Jamajjeya onijje mimiajo Eyacuiñajjiya shajja'ajja canaje. Eyacuiñajjiya Jesosa mano'yo jjima po mee sa ajjima jojjemo Jesosa mano'yo jjima poquiaye.

<sup>8</sup> Jesosa Eyacuiñajjija Bacua Ejja oe nei. Jamatii oya quea nee nee poa mimishi cuaa quecua ca'yajje. Eyacuiñajjija ejjashahuabaqui'yojji jayojja jama ba'yanijo, quea nee nee po'ya poa onaa napa neinei cajje. E'e, ojaya eba ojjaña joya Eyacuiñajjija esohui jayojja jama ba'e sa poani jjeya meshijo ba'e quea nee nee poaje onaa napa cajje. <sup>9</sup> Jamajjeya Eyacuiñajjiya Jesosa yahuajo nei jama aca poa ba'a: —Miya ca ca oe nei quea pame nee nee mimishi cuijea'yojji epojji. Pea chama' mimishi cuijea'yojji —aca poa Eyacuiñajjiya.

Jamajjeya Jesosaa esejaya mimishi cuijea'yo majje ba'e tiitii mee caje'yo, joya o shajja'ajjajji poani nei.

<sup>10</sup> E'e, yahuajo nei Eyacuiñajjiya oya huohui ca poa jama ba'a: “E'e jojo nei miya ojjaña jaahuanajji poaje. Miya enijje emimijji etii poaje'yo tii tii; Menequisine jama, ma yahuajo nei enijje emimijji nei poa jayojja jama miya poaje'yo”.

*¡Quea ja'a nee Jesosa nijje jjapeequicue!*

<sup>11</sup> Ecuea esohui ma Eyacuiñajji nijje emimijji neijo, Menequisine bajjanijo apoa pojjeama. Maya jamatii quea camaja eba meeji. Miquianaya ca ca oe jjashahuabaqui ajjaa jjejojo Eyacuiñajjija esohui oe pojji baña. Jamajjeya jiquio esohui miquianajaya quea quehua poaje. <sup>12</sup> E'e, miquianaya yahuajo nei Jesosaja epeeji poa. Jamajjeya miquianaaya aje oe epeeji eyacua esohui ehuohuinaje ese. Jamatii onaaya miquianaya casohuihuohui huicha'a huicha'a cahua epeeji eyacua jayojja jama, de. Jiquio ecua ebacua jjeya cuaya tojjojo ba'e, bobi ijja po jjima jayojja jamaya miquianaaya Eyacuiñajjija esohui camaja'ama nei nei baña de, esohui ebionei camaja'ama ebajji jama. <sup>13</sup> E'e,

ebacua jjeya cuaya tojjojo ba'e jayojja jama miqúanaya Jesusaja epeeji eyacua jama; ojaya epeeji quea ja'a po jjima. Jamajjeya eba'eji quea tai ma Eyacuiñajjiya boti'ama miqúanajaya ba jjima, eba'eji quea pame ma Eyacuiñajjiya quea boti nee miqúanajaya ba jjima pea'ai. <sup>14</sup> Jiquio ecua etiiya bobi ijia cani jayojja jama Jesusaja epeeji quea ja'a neeya ojjaña ojaya esohui ba cani. Eba'eji quea mimishi amaja ajja, ma Eyacuiñajjiya boti'ama. Quea pame nee acani ohuaya. Jamaya Jesusaja epeeji quea ja'aa esohui huohui cani onajaya ebajji.

## 6

<sup>1</sup> Yahuajo Jesosa nijje jjapeequi jeahuua eseyaya shajja'ajjanaje Eyacuiñajjiya esohui quehua'ama. ¡Jjeya ca ca ojjaña ojaya esohui Jesusaja bacue! ¡Quea ja'a nee pocue Jesusaja epeeji etii! E'e, yahuajo jjeya nei jjapeequi jeahuua Jesusaja esohui quehua'ama shajja'ajjanaje jama ba'a: —¡Miquea mimishi pajea'yocue! ¡Jesusaja epeeji nei pocue! <sup>2</sup> ¡Onaaya miya cabeza mee cahua Jesosa nijje epojji! Onaaya miqúanajaya esapajo eme' huana caje Edojjoshahua Pame miqúanaa que edobiquijji. Eyacuiñajjiya emano'yo cuana shequi mee caje o'oya. Shajjama' cuana Eyacuiñajjiya quea nee nee po mee caje'yo —jamaya yahuajo Jesosa nijje jjapeequi jeahuua eseyaya shajja'ajjanaje esohui quehua'ama.

<sup>3</sup> ¡Jjeya ca oe Eyacuiñajjiya esohuijo ojjaña ejjashajja'ajjaqui Jesusaja epeeji quea ja'a nee epojji! E'e, jamaya poaje Eyacuiñajji nijje mimianijo jama ba'a: —Eyacuiñajji, ¡ecua ba meesahuacue ojjaña miquea esohui!

<sup>4</sup> E'e, beca cuana aje oe Eyacuiñajjiya esohui shajja'ajja majje jama poani ba'a: —Eya ecue mimishijo quea yeno. Mimishi pajea neineje'yo Jesosa nijje ejjapeequijji —poani.

Jamatii quijje shajjama' nei poaje o'oya pojja'a. Jamaya po majje oya cuana mimishi pajea sa po'yo ajja, de. Jesosa, eseja mimishi cuijea'yojji pajea neinei ca'yani, de. Pea chama' mimishi cuijea'yojji. Jamajjeya chama' o mimishi cuijea'yojji. E'e, oya cuana aje oe yahuajo jama poa ba'a: Yahuajo Eyacuiñajjiya esohui quea pame e'e nei shajja'ajja canaje. Eyacuiñajjiya oya cuana quea pame nee acanaje. Ba mee canaje Jesusaa ba'e tiitii mee cani ojaya epeeji nei onijje eyajo. Ba mee canaje Edojjoshahua Pameya oya cuana jaahuana caje'yo pea'ai. <sup>5</sup> Ba canaje pea'ai Eyacuiñajjiya esohui quea pame nee nee jayojja jama ba'yanijo quea bei nee poaje'yo. Eyacuiñajjiya acanaje jayojja ma dejjaa ajjima acani ba canaje pea'ai. E'e, jamaya ojaya eba poanaje. <sup>6</sup> Jamatii aje oe shajjama' po o'oyani, de. Jesosa cajaa amajje pea chama' mimishi cuijea'yojji. E'e, yahuajo dejja mimishiya Eyacuiñajjiya Bacua acui ecueata'apeejo caca ca poa jayojja jama oya cuana Jesosa quecua'yojji jayojja poani. Jesosa cajaa ajji poani. Jesosa niñeba ca o'oyani ojjaña eshajja'ajjajji. Quea tai nee nee ca ca oma.

<sup>7</sup> Que quea pamejo ena po majamajajo bobi tii cuajiani quea pame nee. Apoa poajo eque meseya bobi chicha cani. Jamaya Eyacuiñajjiya quea pame nee nee po mee cani.

<sup>8</sup> Que quea taijo ca ca bobi tii ajja. Jjono, acuisha, acui pojja'a pohuani. Jamajjeya eque meseya que cajaa acani jama ba'a: —Jiquio que jehua'yonaje, cajaa —acani.

Jiquio ecua eque meseya que cajaa acani jayojjaya jama acaje'yo Eyacuiñajjiya. Quea nee nee po mee caje'yo cuaquijo jiquio Jesosa cajaa ajji nei nei poani cuana.

### *Jesosa cajaa a'ajja eseya ohuaya e'e jojo nei ba'e tiitii mee caje'yo onijje*

<sup>9</sup> E'e Jesusaja epeeji cuana, jiquio eyaya esohui quea tecue tehueña miqúanaa jjashajja'ajjaqui ajjajo. Jamatii miqúanaya ecuea quea jea nee nee. Miqúanajo jjashahuabaquiani jama ba'a: —Ecuea epeeji cuana, miqúanaaaya Jesosa cajaa yajji pojjeama. Chojja. Ojaya epeeji poanijo, Jesusaa miqúanaya ojaya esohui jama atiitii meesahua caje'yo —jamaya eya poani.

<sup>10</sup> E'e, yahuajo, jjeya pea'ai miqúanaaaya Jesusaja epeeji cuana quea jea nee añajo pea cuana ba'e meesahuña tii quea ja'a nee. Jamajjeya Jesusaja epeeji cuana quea jea añajo Jesosa quea jea nee añajo pea'ai. Jamaya Eyacuiñajjiya eba. Jamajjeya ohuaya quea pame nee nee sosequia caje'yo quea pame nee miqúanaaaya añajo. E'e, ohuaya quea ja'a nee

acani tii tii. <sup>11</sup> Cuanaya eyaya miqúanaya huohuaña jama ba'a: ¡Jesosaja epoe o'oyajjijo ishoacue! ¡Jamaya atiitiicue! ¡Quea jaji nee ba'e tiitii poquicue ojjaña Jesosaja epeeji cuana nijje! Jamajjeya ecuea eba poaje e'e jojo nei miqúanaya Jesosaja epeeji nei onijje ba'e tiitijje'yo. <sup>12</sup> E'e, yahuajo Eyacuiñajjiya eseya jama acanaje ba'a: —Eyaya miqúanaya ba'e tiitii meeje'yo enijje —oya poanaje.

Jamajjeya ¡a'a quea huea pojji! Eyacuiñajjiya epeeji nei jama jjashahuabaquime pocue ba'a: Eyacuiñajjiya e'e jojo nei ojjaña ma ecua ohuaya huohui canaje jamaya ajeyojeyo caje'yo. ¡A'a jjashahuabaquijji ohuaya jama ajjima e'acaje poso!

*Eyacuiñajjiya jiquio ecua ohuaya huohui canaje jamaya acani e'e jojo nei*

<sup>13-14</sup> E'e, yahuajo nei nei Eyacuiñajji miminaje esejaya etiiquiiana nijje, Amajama nijje jama ba'a:

“Eyaya miya quea pame nee aje. E'e jojo nei miquea ebacua cuayaje dejja sho'i. Miquea osecua quea huiso nee nee poaje'yo. Eya ca ca oe nei quea ca'a nee nee poanijo jamaya ameeje'yo. Chama' pea e huoojea'yojji poani”.

Jamaya Eyacuiñajjiya aca poa.

<sup>15</sup> Amajama shajja'ajja majje jjashahuabaquia poa jama ba'a: —E'e jojo nei ma ohuaya huohui canajeya jamaya acaje Eyacuiñajjiya. Jamajjeya ecuea ebacua cuayaje. Ecuea osecua cuana quea huiso nee nee poaje —jamaya Amajama jjashahuabaqui pajea ajja nei nei poa. Jamajjeya Eyacuiñajjiya jamaya acanaje. Quijje nei Amajamaja bacua cuaya poa dejja sho'i.

<sup>16</sup> Esey aca ca jama poani ba'a: —E'e jojo nei jiquio ecua eyaya huohuaña jama neiya eyaya aje.

Jamaya po majje pea huasijje poquiani dejja etii yasijje jama huohuiya ba'a: —¡Ecuea esohui etehue'yojo miquea bajjani tehuecue ojjañaja ebajji e'e jojo nei eyaya ecuea esohui ajel! E'e, Eyacuiñajjiya ba canijo eyaya ecuea esohui jayojja jama aje'yo —jamaya eseyaya aña.

Jamajjeya dejja etiija bajjani etehue'yo ba majje onajaya eniñeba'yojji pojjeama jama ba'a: —Chojja, ojaya esohui jayojja jama e'a'yojji pojjeama ohuaya.

<sup>17</sup> Oya jayojja Eyacuiñajjiya ojaya epeeji cuana jama acani ba'a: —E'e jojo nei ma ecua eyaya miqúanaya huohuinaje jamaya eyaya miqúanaya e'e jojo nei ba'e tiitii meeje'yo enijje.

Jamaya amajje oya jamaya poanaje pea'ai ba'a: —Eya eshe tii tii nequi. Jamajjeya ecuea esohui epajea'yojji pojjeama; jamaya eyaya e'e jojo nei aje'yo —jamaya ohuaya aca poa ojjañaja ebajji.

<sup>18</sup> E'e, Eyacuiñajjiya ma ecua ohua huohui ca poa jayojjaya jama acaje'yo. Oya siajje po ajja nei nei. Oya eshe tii tii nequi quea ca'a nee nee. Jamajjeya ojaya esohui epajea'yojji pojjeama. Jamaya e'e jojo nei acaje'yo. Jamajjeya ¡Jesosa nijje ejjapeequi quea bihui nee nee! Jiquio ecua bishe jaadobiquiajo, onaa jjono jea cajo seya iñacuajiaña ehui'i'yo poaniya jjejojo jayojja jama eseya Eyacuiñajji nijje mimiani ese jaahuanajji, ese ba'e tiitii mee'yojji onijje eyajo. <sup>19</sup> E'e, acui ca'aca'ajo bishe ai jeyo cani cuaa edojojea ca poajeje, ehui'i'yo poajeje jayojja jama eseya Jesosa nijje jjapeequiani ese jaahuanajji, ese nahuejji, eshahua nijje epoquiquehua poaje jjejojo. Quea ca'a nee Jesosa, de. E'e, jama poani ba'a: Jodioja Eyacuiñajji nijje emimijji etii cuana Eyacuiñajjiya equi yasijje dobiqui majje equi dojjojo pea equecuayijji sisi yasijje dobiqui majamajanaje daquija secue pene yasijje. Ma equecuayijji sisi yasijje Jodio cuana oe nei dobiquinaje Eyacuiñajji nijje mimiya ojjañaja mimishi cuijea'yojji. Jesosa ca ca eyahuasijje dobiqui'yonaje. Jjeya oya Eyacuiñajji pejejo yani. Onijje mimiani esejo. <sup>20</sup> E'e, ese eyahuasijje poqui jjimahuajo, Jesosa eyahuasijje poqui'yonaje. Huohui canaje jama ba'a: —Ecuea epeeji cuana quijje eyahuasijje poeje'yo enijje eba'e tiitii'yojji —jamaya Jesosa poanaje ese jjabahuejja neineiuijji.

Jamajjeya Jesosa Eyacuiñajji nijje emimijji oe nei quea ca'a nee nee poani. Jamaya oya po tiitii'yani. Yahuajo nei nequi Eyacuiñajji nijje emimijji Menequisine bajjani jayojja jama poanaje Jesosa.

## 7

*Menequisine Eyacuiñajji nijje emimijji nei poa*  
(Genesis 14)

<sup>1</sup> E'e, jiquio Menequisine yahuajo nei nei nequia poa. Oya Sanemi cuiñajji meshi mese poa. Eyacuiñajji nijje emimijji nei pea'ai poa. Eyacuiñajjiya quea ca'a nee neeya oya jamaya po mee ca poa. Jamajjeya yahuajo nei etiiquiana Amajama pea emeshi mese quea mimishi cuana quecua jeyojeyo'yo majje poe'ya poa. Ma ba majje Menequisine jama poa ba'a: —Amajama, miya quea pame nee. ¡Eyacuiñajjiya miya quea ca'a nee capo mee cahua! —aca poa.

<sup>2</sup> Amajamaa aquiana cuana quea huiso nee nee ye ca'ya poa, ma emeshi mese mimishi cuanaja sii ye ca'ya poa. Ma aquiana iye huiso quia ca poa Menequisineja epojji; jama aca poa ba'a: Amajamaja aquiana ome miji pea'ai huisome, 10 huisome yanijo ohuaya oe quia ca poa Menequisineja epojji. Peapea aquiana cuana ojjaña aquiana jamaya aca poa. Menequisineja bajjani Ese Ejjaja esohuijo jama ba'a: Emeshi mese quea ja'a nee ba'yani bajjani. Emeshi mese quea bei ba'yani bajjani pea'ai oya Sanemi cuiñajji meshi mese poanijo. <sup>3</sup> Oya cuamejje pojja'a poa; ecuanaja ba jjima Menequisineja chii bajjani, ojaya enaese bajjani ba jjima pea'ai, ojaya ebacua ecuanajaya bajjani ba jjima pea'ai. Oya ache shono cuaya poa ba jjima, ache shono mano'ya poa ba jjima pea'ai. Chama' etehue'yo poa. Eyacuiñajjiya ca pa ca oe Menequisine huohui ca poa jama ba'a: —Menequisine, ¡miya enijje emimijji nei pocue! ¡Jamaya po tiitiicue! —aca poa. Oya jayojja Eyacuiñajjiya oja Bacua Ejja huohui ca poa pea'ai.

<sup>4</sup> Jamejjeya ¡jjashahuabaquicue Menequisinejo! Dejja etii quea pame nee nee oya poa. Amajama ca ca dejja etii quea pame nee pea'ai poa. E'e, esejaya etiiquiana Amajamaa oya aquiana quia ca poa ma aquiana emeshi mese mimishi cuanaja sii jjequi'yo majje iye huiso quia ca'ya poa Menequisineja epojji. <sup>5</sup> Amajama mano'yajo, quijje nei Moisesiya Amajamaja osecua Nemi bajjani Eyacuiñajjiya esohui huohui ca poa, Anonija bacua ejja. Jama aca poa ba'a: “Nemi miya, miquea ebacua cuana pea'ai Eyacuiñajji nijje emimijji poaje'yo Jodio cuanajo. Jamajjeya Jodio cuaa miya caquia cahua aquiana eba'ejji, jama caquia cahua ba'a: Ojaya ome miji pea'ai, 10 huisome aquiana yanijo oe caquia cahua. Ojjaña ojaya aquiana cuana jamaya ca'a cahua” jamaya Eyacuiñajjiya esohui etehue'yo poani.

Nemi, ojjaña Jodio cuana pea'ai Amajamaja osecua cuana. Jamatii Jodio cuanaja mahuisoya aquiana cuana jjeshe ca poquia poa Nemija bacua cuaa, oja huapa pojjeama cuanaja aquiana. <sup>6</sup> Menequisine ca ca yahuajo nei nei ba'ya poa Nemi cuaya jjimahuajo, Nemi Jodio cuanaja Eyacuiñajji nijje emimijji po jjimahuajo. Jamajjeya Nemija bacua pojjeama Menequisine poa. Jamatii Amajamaa oya aquiana quia ca poa. E'e, yahuajo nei Eyacuiñajjiya Amajama huohui ca poa jama ba'a: “Amajama, jiquio meshi miquea poaje'yo. Miquea osecua cuanaja poaje'yo tii tii” aca poa Eyacuiñajjiya. “Miquea osecua cuana quea huiso nei nei poaje'yo” aca poa pea'ai.

Jamatii Amajamaa aquiana quia cajje Menequisineya huohui ca poa: —Amajama, miya quea pame. ¡Miya quea ca'a capo mee cahua Eyacuiñajjiya! —aca poa.

<sup>7</sup> E'e, Eyacuiñajji nijje emimijji Menequisine bajjani Amajama nijje miminaje Eyacuiñajjiya oya quea ca'a epo meeji. Jamaya esejaya eba Amajama beshahua nei quea pame nee, Menequisine ca ca quea pame nee nee. Jamajjeya quea pame nee nee Amajama oya iye huiso aquiana cuana quia ca poa. <sup>8</sup> Quijje Jodio cuaa aquiana cuana iye huiso quia ca poquia poa Amajamaja osecua Eyacuiñajji nijje emimijji cuana huasijje, Nemi, oja bacua ejja cuana huasijje. Jamatii ma Eyacuiñajji nijje mimiani cuana mano ca poqui'ya poa. Menequisinejo ca ca Eyacuiñajjiya esohui jama poani ba'a: —Menequisine, ¡miya enijje emimijji nei po tiitiicue! —poani.

<sup>9-10</sup> Menequisine yahuajo ba'ya poa Amajamaja osecua jea jjimahuajo. Amajamaa iye huiso aquiana Menequisine quia canaje. Jamajjeya Jodio cuaa huohui cani jama ba'a: —Amajamaa aquiana quia ca poa; Nemiya pea'aiya aquiana quia canaje, oya Amajamaja

osecuaja cuiisa' DOJJOJO nequiahuaa —jamaya Jodio poani Nemijo, oja osecua cuanajo pea'ai. Jamatii quiije nei Nemiya, oja osecua cuaa pea'ai Eyacuiñajji nijje emimijji poanijo Jodioja aquiana iye huiso jjeshe ca poquia poa ojaya epojji, ojaya osecua cuanaja epojji pea'ai.

<sup>11</sup> Eyacuiñajjiya Nemi, oja bacua cuana pea'ai huoojea ca poa onijje emimijji epojji, ojaya esohui Jodio cuana ba meesahuajji, quea ja'a eba'e meesahuajji pea'ai. Jamatii oya cuana aje oe dejja cuana poa, Eyacuiñajjiya epeejji pishana poa. Jamajjeya Eyacuiñajjiya esohui jayojja jama ba'e tiitii jjima poa. Jamajjeya Eyacuiñajjiya pea onijje emimijji nei huoojea canaje, Nemija osecua pojjeama, pea. E'e, ohuaya Jesosa Quito huoojea canaje. Jesosa Eyacuiñajji nijje emimijji nei poanaje, Anoni jama pojjeama. Oya Jesosa Eyacuiñajji nijje emimijji nei Menequisine jayojja jama poanaje. E'e, Jesosaa ca ca oeyaya eseya Eyacuiñajjiya esohui jayojja jama ameesahua cani. <sup>12</sup> E'e, Moisesija esohui jayojja jama Anonija osecua cuana Eyacuiñajji nijje emimijji cuana poa. Jjeya ca ca Eyacuiñajjiya pea onijje emimijji po mee canaje, oja Bacua Eja Jesosa, Anonija osecua pojjeama. Jamajjeya jjeya eseya yahuajo jama ba'e ajja. Moisesija esohui jayojja jama amaja ajja. Jjeya ca ca eseya ba'yani Emeshi Mese nei Jesusaja esohui jayojja jama, yahuajo jama pojjeama. Jamajjeya Eyacuiñajjiya eseya ba ca'yani mimishi'ama'yo. <sup>13-14</sup> E'e, yahuajo Eyacuiñajjiya Jesosa jama aca poa ba'a: —Jamajjeya miya enijje emimijji nei poaje'yo ecuea epeejji cuanajo —Eyacuiñajjiya aca poa.

Jamatii Jesosa Nemija osecua pojjeama poa. Pea oya de, etiquiana Jodaja jeaja osecua. Joda ca ca Eyacuiñajji nijje emimijji nei pojjeama poa. Jamajjeya Jodaja jeaja osecua cuanaja aquiana cuana dahua jjima poa mei e'ya sohuajo Eyacuiñajji quea bei mimishi cuana nijje epo meeji. Chojja, jamaya pojjeama Moisesija esohui Jodaja osecua cuanajo. Jamatii Eyacuiñajjiya Jesosa jama aca poa ba'a: —Miya enijje emimijji nei nei poaje'yo ecuea epeejji cuanajo.

<sup>15</sup> Jamajjeya ecuea esohui Eyacuiñajji nijje emimijjiyo jjeya miquianajaya quea ja'a poani jama ba'a: Eyacuiñajji nijje emimijji Jesosa Quito poanaje. Jamatii oya Eyacuiñajji nijje emimijji nei Menequisine jayojjaya, Nemija osecua pojjeama. <sup>16</sup> Jamajjeya Jesosa ca ca oe Eyacuiñajji nijje emimijji nei poanaje, Eyacuiñajjiya huoojea'yo, dejjaja, Moisesija pea'ai huoojea pojjeama. Oya Jesosa quea ca'a nee nee, enequi tiitii'yo pea'ai. Jamajjeya oya Eyacuiñajji nijje emimijji nei poanaje ojaya epeejji cuanajo. <sup>17</sup> Yahuajo nei Dabiya Eyacuiñajjiya esohui tehue ca poa jama ba'a: “Miya enijje emimijji nei poaje'yo ecuea epeejji cuanajo. Jamaya poaje'yo tii tii, enijje emimijji nei Menequisine jayojja jama” jamaya Eyacuiñajji poanaje Jesosa Quito nijje.

<sup>18-19</sup> Etiquiana Moisesija esohui ajji poani yahuajo quea pame pojjeama ba'ya poa. Mimishi'ama po mee jjima poa. Jamajjeya etiquiana Moisesija esohui jayojja jama jjeya apajea ca'yonaje. Jjeya ca ca eseya Jesusaja epeejji poanijo ojaya esohui jayojja jama ba'yani, yahuajo jayojja jama pojjeama. E'e, Jesosa Eyacuiñajji nijje mimiani esejo. Eyacuiñajjiya bacua cuana eseya po mee cani. Jamajjeya ba'e tiitii mee caje'yo onijje eyajo.

<sup>20-21</sup> E'e, Eyacuiñajjiya Jesosa huohui ca poa jama ba'a:

“Eya Eyacuiñajji quea ca'a nee enequi tii tii quea ja'a nee. Ecuea esohui jayojja jama eyaya e'e jojo nei aje'yo. Eyaya jama huohuaña ba'a: —Miya ecuea cuana epeejjiyo mimi tiitije'yo enijje”.

Jamaya Eyacuiñajjiya aca poa. E'e, Eyacuiñajjiya Jesosa huohui neinei ca poa onijje emimijji, ese ba'e tiitii mee'yojji. Yahuajo nei Nemija osecua cuana onijje emimijji poanijo Eyacuiñajji ojjaña nijje mimi jjima. Jjeya Jesosa Eyacuiñajji nijje mimianijo ca ca Eyacuiñajji ojjaña ese nijje mimiani.

<sup>22</sup> Jamajjeya esejaya eba e'e jojo nei Eyacuiñajjiya esohui ma ecua ohuaya Jesosa huohui ca poa jamaya ohuaya e'e jojo nei acaje quea pame nee nee. Jamajjeya ohuaya ojjaña ojaya epeejji cuana onijje ba'e tiitii mee caje'yo. Ma ohua Moisesi huohui ca poa ca ca quea pame pishana: Ojaya esohui jayojja jama ba'e neineiyo ojaya eabaca poaje'yo, Eyacuiñajjiya.

<sup>23</sup> Nemi nequi tiitii ajja poa Eyacuiñajji nijje pea cuanajo emimijji tii. Dejja tii majje mano'ya poa. Jamajjeya jamaya ojaya osecua quea huiso nee nee popoquia poa, Eyacuiñajji nijje emimijji etii cuana. E'e, oe mano'yo majje oja bacua Eyacuiñajji nijje emimijji etii poa. Jamaya popoquia poa quea huiso nee nee. <sup>24</sup> Jesosa ca ca eshe, mano'yo ajja tii tii. Jamajjeya oya Eyacuiñajji nijje e'e jojo nei mimi tiitiiani esejo, oja epeeji cuanajo. <sup>25</sup> E'e, Jesosa mano'yo ajja, eshe tii tii nequi'yo Eyacuiñajji nijje esejo emimijji. Jamajjeya Jesusaja epeeji nei poanijo Eyacuiñajji bacua cuana poani. Ohuaya eseya ba'e tiitii mee caje'yo onijje eyajo.

<sup>26</sup> Esey aje oe quea mimishi jjejojo Eyacuiñajji esohui jayojjaya jama ba'e jjima poaje. Jesusaa ca ca esejaya mimishi cuijea'yo majje ba'e tiitii mee caje'yo onijje. E'e, Jesosa oe nei quea pame nee nee, mimishi'ama nei nei, quea bojea nee nee, dejja mimishi jayojja jama pojjeama tii tii. Oya eyajo oja Chii pejejo nequi, ojjaña huojea'yojji poani tii tii. <sup>27</sup> Nemija osecua Eyacuiñajji nijje emimijji cuana aje oe Jesosa jayojja jama pojjeama poa. Ohuaya ca ca oe quea mimishiya jjejojo ojjaña pojja aquiana cuana dahuaajea caninaje Eyacuiñajji quea bei po meeji. Aquiana dahuaajea jjimahuajo Eyacuiñajji nijje miminaje jama ba'a: —Eyacuiñajji, jecuea mimishi cuijea'yocue! —jamaya Eyacuiñajji nijje emimijji etii Nemija osecuaa aca poquia poa.

Majoya oya cuana mimishijo aquiana dahuaajea majje Eyacuiñajji nijje miminaje pea cuanajo jama ba'a: —Eyacuiñajji, ¡miqua epeeji cuanaja mimishi cuana cuijea'yocue! —aca poquia poa Eyacuiñajji nijje emimijji etiiya.

Jesosa ca ca jama pojjeama. Oya mano'yonaje ojjaña mimishi cuijea'yojji soseje. Oya apoa po'yonaje, emano beca'yojji pojjeama tii. <sup>28</sup> Jamajjeya etiiquiana Moisesija esohui dejja cuana Eyacuiñajji nijje emimijji po mee ca cuaa poa, Nemija osecua cuana. Oya cuana aje oe Eyacuiñajji esohui jayojja jama ba'e'yo jjima poa. Jamajjeya Moisesi nijje mimi majje quijje nei Eyacuiñajjiya oja Bacua Ejja Jesosa jama aca poa ba'a: “Miya oe nei mimishi'ama nei nei. Jamajjeya miya oe nei enijje emimijji nei poaje'yo ecuea epeeji cuanajo” jamaya Eyacuiñajji poanaje.

## 8

### *Eyajo Jesosa Quito nequi tiitiiani esejo Eyacuiñajji nijje mimiani tii tii*

<sup>1</sup> Jamajjeya ¡jjashahuabaquicue Jesosa Quitojo! Oya Eyacuiñajji nei nei. Eyajo nequi tiitiiani esejo Eyacuiñajji nijje mimiani tii tii. Eyacuiñajji quea ca'a nee nee pejejo nequi, ebiane mijijje; onijje ojjaña huojeajji poani tii tii. <sup>2</sup> Jama ba'a: Yahuajo nei Jodio Eyacuiñajji nijje emimijji etii daqui equi dojjo huasijje, equecuayijji biso nei yasijje dobiqui'ya poa Eyacuiñajji nijje mimiya, Jodio cuana nijje Eyacuiñajji quea bei epojji. Ma daqui equi Jodio cuanaja soco poa Eyacuiñajji esohui shajja'ajjajji. Jesosa ca ca dobiqui'yonaje Eyacuiñajji e'anioque ani yasijje tii, daqui equi dejjaja soco huasijje pojjeama. Jomajo oya Eyacuiñajji nijje mimiani esejo. <sup>3</sup> Jiquio Jodio cuana Eyacuiñajji nijje emimijji etii cuana babaca majje jama poa ba'a: —¡Miyaya aquiana dahuaeue ijjiacajji ehuone' pea'ai; Eyacuiñajji ecuaa nijje quea bei po meecue! —aca poa Jodio cuaa.

Jamaya ona jayojjaya esejaya Eyacuiñajji nijje emimijji neiya, Jesusaa Eyacuiñajji quea bei po mee canaje ese nijje. Eseyaya mimishi cuana cuijea mee'yojji soseje oya mano'yonaje. <sup>4</sup> Jesosa meshijo enequi jojjemo oya Eyacuiñajji nijje emimijji etii pojjeama pome. E'e, Jodioja Eyacuiñajji nijje emimijji etii cuana meshijo yania poa, Nemija osecua cuana. Moisesija etehue'yo jayojja jama aquiana dahua ca poquianinaje Eyacuiñajji quea bei po meeji. <sup>5-6</sup> Jamaya yahuajo poa ba'a: Moisesi eyiyo huasijje jaasohuaquajjo, Eyacuiñajjiya oya huohui ca poa daqui equijo. Jama aca poa ba'a: “¡Ecuea esohui jayojjaya nei nei daqui equi acue! ¡Quea bame nee nee oe acue!” ca poa Eyacuiñajjiya.

Jamatii daqui equi iya mee ca poa ona ba meeji ma ohua quijje Jesusaa acaje'yo eyajo. Jamajjeya Jodio cuanaja emimijji Eyacuiñajji nijje quea pame pishana poa. Jesosa ca ca quea pame nee nee. Jamaya pea'ai Eyacuiñajjiya yahuajo nei ojaya esohui huohui ca poa

Moisesija etehue'yoyji. Ma esohui etehue'yo quea pame poa. Quijje ca ca Eyacuiñajjiya esohui eyacua Jesosa huohui mee ca poa. Maya esohui quea pame nee nee. E'e, esohui ma ohua jjeya huohui ca poa jayojja jama eseya añajo, Jesosaa eseya ba'e tiitii mee caje'yo onijje eyajo. Jamaya esejaya eba. Jamajjeya eseya quea jaji nee poani. Yahuajo Jodio cuana quea jaji pishana poa: Onajaya ba jjima poa Jesosaja esohui eba'e tiitii'yoyji onijje eyajo.

<sup>7</sup> E'e, yahuajo nei Eyacuiñajjiya Jodio cuana Moisesi nijje nequi ba mee ca poa ojaya esohui. Jamatii ma esohui jayojja ohuaya acani mimishi pajea'yo jjima poa cuanaja. Ma esohui jayojja jama ba'yanijo mimishi cuijea'yoyji jojjemo Eyacuiñajjiya Jesosa huoojea jjima poquiaye esohui eyacua huohuiya. <sup>8</sup> Jamajjeya Eyacuiñajjiya ojaya epeeji cuana tecuea ca poa. Jama tecueame aca poa ba'a:

“Quijje eyaya esohui eyacua huohuije ojjaña Jodio cuanaja eshajja'ajjaji, ma Isaenija osecua cuanaja, Jodaja osecua cuanaja pea'ai eshajja'ajjaji. <sup>9</sup> Yahuajo nei eyaya miquianajaya etiiquiana Ejito meshijo ba'e pea meshi yasijje dojo meesahuanaje. Ecuea esohui quea pame nee huohui huicha'a huicha'a meenaje pea'ai. Jamatii etiiquiana cuana shajjama' poa. Ecuea esohui jayojja jama a sa po'yo ajja poa. Jamajjeya eyaya oya cuana jaahuana jjima a poa. Jamajoya eyaya pea esohui quea pame nee aje'yo miquiana nijje. Jiquio esohui eyacua poaje, yahuajo jama pojjeama poaje. Eyaya jamaya huohuiaña”.

Jamaya Eyacuiñajji poanaje.

<sup>10</sup> “Quijje eyaya Isaenija osecua cuana esohui eyacua huohuije jama ba'a: Jamajjeya miquianaya jjashahuabaqui meesahuaje ecuea ejjashahuabaquijji jayojja. Ecuea esohui jayojja jama eyaya miquianaya ameesahuaje: —Eyacuiñajjiya ecuana jaahuana cani —miquianaaya aje. Eyaya miquianaya saja'aje'yo: —Miquianaya cuana ecuea epeeji nei e'e jojo nei —eyaya aje'yo. <sup>11</sup> Miquianaya enijje jjapeequije'yo ojjaña, edejja tii cuana, esho'iquiana pea'ai. Jamajjeya pea nijje jama epo majajji pojjeama ba'a: —¡Eyacuiñajji nijje oe jjapeequicue! —e'a majajji pojjeama cuana. Chojja, oya jja iña ojjañaja eba poaje'yo aña.

<sup>12</sup> Jamajjeya eyaya ojjaña cuanaja mimishi cuijea neineije'yo. Majoya eya jjashahuaba majaqui ajja miquianaja mimishijo. Quea bei poaje. Jamaya eyaya Isaenija osecua cuana huohuije”.

Jamaya Eyacuiñajji yahuajo nei nei poa Isaeni nijje.

<sup>13</sup> E'e, jiquio ecua daqui chii chii'yajo eyacua jjeshe majje daqui echii seya jeajeaña jayojja jama esohui eyacua amajje Eyacuiñajjiya esohui yahuajo nei Moisesi oja tehue meejo jjashahuaba neinei meequi'yo jjima aca poa: —¡Ecuea esohui eyacua jayojja jama acue; esohui yahuajo jayojja jama pojjeama! —jamaya Eyacuiñajjiya eseya huohui cani jjeya.

## 9

### *Jodio etiiquianaja daqui equi Eyacuiñajjiya esohui bajji*

<sup>1</sup> Yahuajo nei Eyacuiñajjiya Moisesi huohui ca poa jama ba'a: —¡Jamaya oe enijje mimicue! ¡Jamaya eya bihuiaque pea'ai! —aca poa—. ¡Equi iyacue enijje emimijji! —aca poa pea'ai.

<sup>2</sup> Jamajjeya Jodio cuaa daqui equi soco majje iya ca poa Eyacuiñajjiya esohui shajja'-ajjaji, ma Moisesi tehue mee ca poa jayojja jama e'ajji. Jamajjeya yahuajo nei iya ca poa jama ba'a: Ebionei equi equecuayijji ai'ai nequia ca poa. Ma equecuayijji ai'ajjaya cuaquijji nequijji nequia ca poa, baa huo'o. Majoya acui equecuashiyo, mesa, quecua ca poa. Mesa quecuajeyo majje cuia'asha ca poa baa huo'ohua. Majoya mesa biajje pahui ojjaña pojajjo iya majamaja ca poa piatojo Eyacuiñajjiya ebajji. Ma equecuayijji ai'ai bajjani ca poa Eyacuiñajji Nijje Ejapeequijji bajjani. <sup>3</sup> Majoya biso nei quecuayijjime aca poa daqui equi yiyedojojjo. Majoya daqui moohua secue pene ca poa. Daqui moo quea bame nee ba'ehuana ca poa esecue jjani queyajji. Ma equecuayijji biso nei bajjani ca



poa Eyacuiñajji Ese Nijje Emimijji Quea Bame bajjani. <sup>4</sup> Ma equecuayijji biso neijo nequia ca poa cuaqui cojjasha anijji baa huo'o, shiyeshiye dahuajji. Shiyeshiye dahuajea cajje huichacha quea shiye nee nee ba'esohuaquia poa. Majoya cajohui huana ca poa pea'ai; baa huo'ohua cuia'asha ca poa. Maya bajjani ca poa Eyacuiñajjija Esohui Etehue'yo Huanajji bajjani. Ma cajohuijo baa huo'o tahuoo e'iyandobian ania poa. Baa huo'o tahuoojo ebio ania poa pahui sisi, ma yahuajo nei nei Eyacuiñajjiya etiiquiana cuana Moisesi nijje ijji mee ca poa. Anonija tojje acui ejaquecua ca'aquijji ma cajohui dojjojo ehuanandobian jaa poa, ma tojjejo yahuajo pohua poa acui iña. Beca mei beje pea'ai cajohui dojjojo ania poa, ma mei bejejo yahuajo nei Moisesija tehue'yo Eyacuiñajjija esohui mei beje biajje oja tehue'yo, 10 esohui etehue'yo jaa poa. <sup>5</sup> Cajohui biajje ania poa cuichojji nisho esohuidojojji jayojja. Quea bame nee nee, baa huo'o pea'ai. Oja ecuchohua queya ca poa cajohui. Ma esohuidojojji nisho cajohui yasijje cojja nequia poa. Ma ba majje Jodio cuana jjashahuabaqui'ya poa Eyacuiñajji onijje yani, oja mimishi cuijea'yoyji. Jamatii jjeya miya ecuea ehuhuijji pojjeama ojjaña joya daqui equijo nequi aquiana.

<sup>6</sup> Ojjaña equi apoa poajo, Jodioja Eyacuiñajji nijje emimijji etii dobiquia poa equecuayijji ai'ai yasijje. Ojjaña pojja dobiqum nequia poa Eyacuiñajjija yajji chachohua. <sup>7</sup> Jamatii equecuayijji biso nei yasijje oe nei dobiquianinaje Eyacuiñajji nijje emimijji etii. Pea eshequiaja cuanajo oe dobiquime poaninaje. Ohuaya ijjiacajji ehune na' dojodobiaqui caninaje. Majoya Eyacuiñajji nijje mimianinaje jama ba'a: —¡Eyacuiñajji, ecuea mimishi cuijea'yocue! E'e, jiquio ijjiacajji eyaya ehune' cuia'yonaje ecue mimishi cuijea'yoyji sosejje —poaninaje oya.

Majoya jama poaninaje pea'ai ba'a: —¡Ojjaña miquea epeejjija mimishi cuijea'yocue pea'ai! E'e, jiquio ijjiacajji ehune' eyaya cuia'yonaje ojjaña mimishi cuijea'yoyji sosejje —poaninaje. Jamaya oya po majamaja anijo, ojjaña oja mimishi cuana pajea'yo jjima acaninaje cuaa.

<sup>8</sup> Jamajjeya jjashahuabaquicue daqui equijo, Jodio cuanaja iyajo! Jamaya ma daqui equi enequiojoya jjeya Edojjoshahua Pameya eseya ba meesahua cani jama ba'a: Ma daqui equi e'anjio tii ma equecuayijji biso nei yasijje oe nei Eyacuiñajji nijje emimijji etii dobiquianinaje Eyacuiñajji nijje mimiya, ojjaña cuana dobiqum jjima poanaje. <sup>9</sup> E'e, Eyacuiñajji nijje mimiani etii oe nei nei dobiquianinaje Eyacuiñajji nijje mimiya. Ma shahuaba majjeya esejaya eba ojjaña cuana Eyacuiñajji nijje mimi meeme ajja poa. Jjeya ca ca eseya Eyacuiñajji nijje mimije, ojjaña. Yahuajo nei quea huiso ijjiacajji ehune' dahuajea caninaje Eyacuiñajji ona nijje quea bei epojji. Dahuajea majamaja caninaje. Jamatii oya cuana jjashahuabaquianinaje jama ba'a: —E'e pojja'a eya quea bojea pojjeama. E'e pojja'a ecuea mimishi cuijea'yo jjima —poaninaje cuana.

<sup>10</sup> Yahuajo nei bobijo tehue ca poa pea'ai Moisesija etehue'yojo jama ba'a: —¡Beca bobi a'a ijjiajji! ¡Beca e'ishijji pea'ai a'a jja oe ishijji! —jamaya Moisesiya tehue ca poa Jodio cuanaja e'ajji.

Moisesija etehue'yo jayojja jama Jodio etiiquianaa piato, shajjajji cuana pea'ai shacua caninaje pea'ai. Ma etehue'yo jayojja jama besa majamajaninaje pea'ai. Jamajjeya etehue'yo jayojja jama besa majje quea yami bojea poa, jamatii quea mimishi tii poa, quea jjashahuabaqui tai. Eyacuiñajjiya oya cuana Moisesija etehue jayojja jama amee caninaje Jesosa poe jjimahuajo. Jesosa ca ca oeya ojjaña mimishi cuijea'yoyji poani.

*Jesosaja ena' cuayaquia poa esejaja mimishi cuijea'yoyji*

<sup>11</sup> Jamajjeya jjeya Eyacuiñajjija huoojea'yo ese jaahuanajji Jesosa Quito bajjani poeyanaje ese que. Oya Eyacuiñajji nijje emimijji nei eyacua. Ohuaya eseya quea pame nee nee acanaje. Quijje ohuaya eseya ba'e tiitii mee caje'yo onijje, mimishi cuijea'yo majje.

Daqui equi eyiye equecuayijji biso nei yasijje deaja cuanaja iya huasijje dobiqum jjima Jesosa Eyacuiñajji nijje esejaja mimiya. Cho. Oya eyahuasijje dobiquinaje Eyacuiñajji e'anioque ani yasijje, eyiye biso nei quea pame nee nee jayojja huasijje. Oya Jesosa Eyacuiñajji nijje mimiani esejaja. <sup>12</sup> Jesosaa chivo na', ana'ai na' dojodobiaqui jjima

eyahuasijje, de. Cho. Oya acui ecueata'apeejo mano'yonaje esejaya mimishi cuijea'yoyji sosejje. Jamajjeya ohuaya eseya ba'e tiitii mee caje'yo onijje.

<sup>13</sup> E'e, yahuajo nei Moisesija etehue'yo jayojja jama acaninaje cuaa. Jamajjeya Eyacuiñajji nijje emimijji cuaa ana'ai na', chivo na' pea'ai tepe jayojja huasijje sho majje ojjaña Jodio cuana jeasijjea majamaja caninaje. Majoya ana'aia bacua dahuajea'yo majje oja yami equiojeyojea pohui ena tejjee nane majje ojjaña Jodio cuana jeasijjea majamaja caninaje. Jeasijjea cajo, pea Jodio cuaa ona ba caninaje quea boejea jayojja. Jamatii eyami nei quea boejea jayojja poaninaje. Mimishi ca ca ecuijea'yo pojjeama. <sup>14</sup> E'e, ana'ai na', chivo na' pea'ai jeasijjea cajo, eyami ca ca oe quea boejea jayojja poaninaje. Jesosa Quito ca ca quea pame nee nee ese mimishi cuijea'yoyji, de. Edojjoshahua Pame enequi tii tii. Ohuaya Jesosa ameesahua canaje Eyacuiñajji ejjashahuabaqui'yoyji jayojjaya. Oya Jesosa mimishi'ama nei nei, mimishi'ama tii tii poanaje. E'e, oya acui ecueata'apeejo mano'yo majje ojaya ena' cuayaquinaje. Jamajjeya ohuaya esejaya mimishi cuijea caje'yo onijje jjapeequiyajo: —Ecue Chii, ecue na' cuayaquinajejo eyaya ecuea epeejji mimishi cuana cuijea neinei'e'yo —Jesosaa aca poa.

Jamajjeya Jesusaja epeejji nei poajo, Eyacuiñajjiya eseya quea boejea nee nee po mee cani ojaya ejjashahuabaqui'ji jayojja jama eba'e'yoyji, etiiquianaja esohui jayojja jama pojjeama. E'e, jamaya Eyacuiñajjiya acani ohuaya enequi tiitiiya jjejojo.

<sup>15</sup> Ojjaña joya etiiquianaja Moisesija esohui jayojja jama ajji nisho poaninaje quea mimishi nee nee poa. Jamatii Jesosa Quito mano'yonaje onajaya mimishi cuijea'yoyji sosejje. Jamajjeya eseya Jesusaa huohui cani jama ba'a: —Eyacuiñajjiya miquianaya ojaya esohui huohui ca o'yani esohui eyacua jama ba'a: “Eyaya miquianaya quea pame nee nee aje'yo. Ojjaña ecue babaca'yo enijje ba'e tiitii meeje'yo eyajo” jamaya Eyacuiñajji poani —Jesosaa aca poa.

<sup>16-17</sup> Jama poani ba'a: Mano'yo jjimahuajo dejja jiquiojo ba'eya ojaya huapa pojjeama acani jama ba'a: —E mano'yajo ecuea aquiana cuana miquea poaje'yo, cha —acani cuaa.

Jamajjeya ma dejja mano'yo majje ojaya aquiana cuana oja huapa pojjeamaja poaje'yo. Eshe nequija ca mi ca equia'yoyji pojjeama. O mano'yajo ca ca oe jjeshe ca'yoyji. <sup>18</sup> Oya jayojja yahuajo nei Eyacuiñajjiya oja sohui tehue mee majje Moisesi aquiana quecua mee ca poa. Moisesi jama aca poa ba'a: —¡Aquiana ehuone' quecuajea'yocue! Oja na' cuayaquijajo eyaya baje miquianaaya e'e jojo nei ecuea esohui jayojja jama aña ecuea epeejji nei epojji —Eyacuiñajjiya aca poa.

<sup>19</sup> Jamajjeya Moisesiya ojjaña Eyacuiñajjiya esohui etehue'yo huohui caninaje ojjañaja eshajja'ajjaji. Majoya ijjiacajji ehuone', ana'ai, chivo pea'ai cuia caninaje. Aquiana na' tepejo sho caninaje ena tejjee. Majoya ñajjaja ña huo'o acui aa quea shiyejo cuiabebo caninaje. Majoya ena tejjee nane majje esohui etehue'yo jeasiji caninaje, ojjaña Jodio cuana jeasijjea caninaje pea'ai aquiana naa. <sup>20</sup> Majoya Moisesiya oya cuana jama aca poa ba'a: —Eyacuiñajjiya eseya ba mee ca poa ojaya esohui e'e jojo nei. Ojaya esohui jayojja jama ohuaya acaje'yo tii. Jamajjeya eyaya miquianaya jeasijjeaña ijjiacajji naa. ¡Eya ena' jeasijjeajje jama pocue ba'a: “E'e, eseyaya ojjaña Eyacuiñajjiya esohui jayojja jama aje'yo tii” acue! —Moisesiya aca poa.

<sup>21</sup> Jamaya pea'ai Moisesiya daqui equi acaninaje, ojjaña daqui equijo nequi aquiana pea'ai jeasijjea caninaje ijjiacajji naa, ojjaña. <sup>22</sup> Jamaya acaninaje ojjaña Jodio etiiquiaa beshahua nei ojjaña aquiana cuana, Eyacuiñajjiya quea boejea'yo jayojja ebajji. Aquiana na' shojea caninaje Eyacuiñajji oya cuana quea boejea'yo jayojja epo meeji pea'ai. Jamaya Moisesija sohui etehue'yo poa. E'e, Eyacuiñajjiya jama aca poa ba'a: —Ijjiacajji ehuone' quecua cajo oja na' cuayaquiyajo, eyaya miquianajaya mimishi cuijeaje'yo —aca poa.

Jamajjeya ena' cuayaqui ajjajo aje oe mimishi ecuijea'yoyji pojjeama.

*Jesosa Quito mano'yonaje mimishi cuijea neinei ca'yonaje*

<sup>23</sup> Jamajjeya ijjiacajji na' jeasijjea cajje ojjaña daqui equijo nequi aquiana quea boejea'yo jayojja po mee ca poa Jodio etiiquiaa. Jamaya acajo Eyacuiñajjiya ma aquiana

ba ca poa quea boejea'yo jayojja. Jamaya Eyacuiñajjiya eseya ba mee cani. Jesosa Quito mano'yajo oja na' cuayaquinaje; mimishi cuijea neinei ca'yonaje esejaya. Quea boejea'yo po mee canaje. Jamajjeya eseya Eyacuiñajji cojja neijo nequi mee caje'yo eyajo. E'e, aquiana naa jeasijjea cajje pojjeama eseya, Jesusaja epeeji cuana quea boejea nee poaje'yo. <sup>24</sup> Oya jayojjaya Jodioja Eyacuiñajji nijje emimijji etii equecuayijji sisi yasijje dobiquia poa Jodio cuanajo Eyacuiñajji nijje mimiya oya Jodio cuana nijje quea bei epojji. Jamaya Eyacuiñajjiya eseya ba mee cani Jesosa Quito eyahuasijje dobiqiu'yonaje Eyacuiñajji nijje esejo mimiya. Jesosa ca ca daqui equi yasijje pojjeama dobiqiu'yonaje. Cho. Eyahuasijje dobiqiu'yonaje. Jjeya nei oya, Jesosa Quito Eyacuiñajji cojja neijo nequi, onijje esejo mimiani de, Eyacuiñajji ese nijje quea bei epojji. <sup>25</sup> Yahuaajo nei jamaya poa pea'ai ba'a: Jodio Eyacuiñajji nijje mimiani etii equecuayijji biso nei yasijje dobi majamaja quiainaje. Pea shequiajajo dobiaqui poaninaje, pea shequiajajo dobiqiu poaninaje. Oe dobiquime poaninaje oe shequiajajo. Pea ena' dojodobiaqui caninaje, aquiana ehuone na'. Aquiana na' jeasijjea majje jama acaninaje ba'a: —Eyacuiñajji, ¡ecuanaja mimishi cuana cuijea'yocue! —poaninaje.

Jesosa Quito ca ca ojjaña shequiajajo pojjeama mano'ya poa. Mano'yonaje oe nei mano'yome poa. Ojaya ena' cuayaquinaje esejaya mimishi cuijea'yojji sosejje. <sup>26</sup> Jesusaja ena' aquiana na' jayojja jama poa jojjemo oya mano majamaja quiaye. E'e, deja pana'yo majje mano majamaja quiaye quea huiso nee nee, de. Jamatii Jesosa mano'yonaje oe mano'yome poanaje, quea huiso pojjeama. Jamajjeya jjeya nei ojjaña Eyacuiñajjiya esohui beshahua nei apoa poanajo, Jesosa mano'yonaje. Ojaya ena' cuayaquinaje mimishi cuijea'yojji. <sup>27</sup> Eseyaja aje oe manoj'e'yo pea'ai; oe nei mano'yome poaje'yo. Mano'yo majje Eyacuiñajji cojja neijo nequije'yo. Ohuaya huohui caje quio ese ba'ya poa sosejje. Eseyaya quea pame ba'yaninajejo ba'e tiitii mee caje'yo onijje eyajo. Quea mimishi ba'yaninajejo ca ca quea nee nee po tiitii mee caje'yo. <sup>28</sup> Jamajjeya Jesosa Quito mano'yonaje, oe mano'yome poanaje pea'ai. Oya mano'yonaje mimishi cuijea'yojji ojjañaja. E'e, yahuaajo Jesosa Quito mano'ya poa. Quijje oya poeje o'oya mimishi cuijea'yohua pojjeama. Poeje'yo ojaya epeeji ba'e tiitii mee'yohua, ojjaña joya ojo jja'ishoa'ajjaquiiani jjehua'yohua.

## 10

### *Ijjiacajji ehuone naa jeasijjea cajo mimishi ecuijea'yo pojjeama*

<sup>1</sup> Jodio Eyacuiñajji nijje mimiani cuaa Moisesija etehue'yo jayojja jama amajamaja caninaje. Onajaya ba jjima pishana ma Eyacuiñajjiya quijje eseya quea pame nee nee acaje'yo. Onajaya quea ja'a pojjeama. Eyacuiñajji nijje mimiani cuaa quea huiso aquiana biajje ena' jeasijjea cajje Eyacuiñajjiya ma aquiana cuana ba ca poa quea boejea jayojja. Ojjaña shequiajajo ijjiacajji ehuone' quecua majamaja majje jama poaninaje ba'a: —Eyacuiñajji, ¡miqua epeeji cuanaja mimishi cuijea'yocue ojjaña! —acaninaje Jodio cuaa.

Jamatii Eyacuiñajjiya etiiquianaja mimishi cuijea neinei'yo jjima aquiana ehuone' cuia ca'yajo. <sup>2</sup> Jamajjeya aquiana ehuone' cuia ca'yajo etiiquiana quea boejea nee nee epo mee jojjemo aquiana cuia majamaja jjima aca quiaye. E'e, oya cuana quea boejea nee nee epo mee jojjemo mimishijo yeno'ama poquiaye. <sup>3</sup> Jamatii ijjiacajji ehuone' ojjaña shequiajajo cuia majamaja caninaje. Jama poaninaje ba'a: —Eyacuiñajji, ¡miqua epeeji cuanaja mimishi cuijea'yocue! —acaninaje.

Cuia majje jama po ajja poaninaje ba'a: —Jjeya ca ca ecuanajaya mimishi chama'yo poaje —ajjima acaninaje. Cho. Jama poaninaje ba'a: —Ecuana quea mimishi, de —Jodio etiiquiana cuana poaninaje.

<sup>4</sup> Chojja, ana'ai na', chivo na' pea'ai jeasijjea majje mimishi cuana ecuijea'yojji pojjeama. <sup>5</sup> Jamajjeya Jesosa Quitohua poe jeahuaa oja Chii jama aca poa ba'a:

“Ecue Chii, miqua epeeji cuana aquiana ehuone' nequi cuia mee sa po'yo ajja, miya.

Aquiana ehuone' dahuaajea mee sa po'yo ajja pea'ai miya. Cho. Miyaya eya deja cuana huasijje huoojeaña yamijji. <sup>6</sup> E'e, miqua epeeji cuaa aquiana

ehuone' cuia cani mimishi cuijea'yoyji nisho mi quea bihui nee po meeji nisho. Ma ohua dahuajea cajoya miya quea bihui nee pojjeama poani. <sup>7</sup> Jamajjeya eyaya miya jama anaje ba'a: —Ecue Chii, eya meshi yasijje poeyanaje. Miquea ejjashahuabaqui'yoyji jayojjaya jama eyaya aje'yo. Jamaya yaya aje'yo mi quea bihui nee po meeji”.

Jamaya yahuajo oja Chii Eyacuiñajji Jesosa Quitohua acanaje. <sup>8</sup> E'e, Jesusaa oja Chii jama acanaje ba'a:

“Ecue Chii, miquea epeeji cuaa ijjiacajji ehuone' nequi cuia mee sa po'yo ajja, dahuajea mee sa po'yo ajja pea'ai miya. Ijjiacajji ehuone' cuia cani cuaa mimishi cuijea'yoyji nishojo aje oe miya quea bihui nee pojjeama poani. Maya dahuajea canijo pea'ai miya quea bihui nee pojjeama”.

Jamaya acanaje Jesusaa, jamatii yahuajo Moisesija esohui etehui'yo jayojja jama Jodio cuanaa aca poquianinaje, ehuone' cuia majamaja ca poquianinaje. <sup>9</sup> Jamajjeya majoya Jesusaa jama acanaje ba'a: “Ecue Chii, eyaya miquea ejjashahuabaqui'yoyji jayojja jama aje'yo mi quea bihui nee po meeji”. Jamaya acanaje.

Jamajjeya Jesosa Quito poeyanajejo ca ca oe Eyacuiñajjiya eseya jama acani ba'a: —Jesosa Quito jayojja jama pocue, oe! ¡Ecuea ejjashahuabaqui'yoyji jayojja jama oe atiitiicue! Jjeya ohuaya eseya huohui maja ajja jama ba'a: —Jodio etiiquiana yahuajo nei nei ba'ya poa jayojja jama acue! ¡Ehuone' cuia'yo majje dahuajea'yocue miquea mimishi ecuijea mee'yoyji! —Cho. Jamaya Eyacuiñajjiya eseya amaja ajja. <sup>10</sup> Jamajjeya Jesosa Quitohua Eyacuiñajjiya ejjashahuabaqui'yoyji jayojja jama acanaje. Mano'yonaje; oe mano'yome poanaje eseja mimishi cuijea'yoyji. Jamajjeya Eyacuiñajjiya eseya mimishi cuijea'yo majje quea boejea po mee ca'yani Jesusaja epeeji nei cuana.

<sup>11</sup> Yahuajo nei Jodio Eyacuiñajji nijje mimiani etii ojjaña pojajajo daqui equijo chachochaconaje. Ehuone' cuia majamaja caninaje mimishi cuijea mee'yoyji nisho. Ecuiajea'yoyji cuiajea ca'yaninaje de, mimishi cuijea'yo jjima poa. <sup>12</sup> Jesosa Quito ca ca Eyacuiñajji nijje emimiji nei. Oya ca ca oe mano'yonaje; oe mano'yome poanaje. Aquiana ehuone' mano'yani jayojja jama pojjeama poanaje oya. Mano'yonaje mimishi cuijea'yoyji. Apoa. Mano beca'yo ajja. Eyahuasijje sohuaqui'yonaje. Eyacuiñajji pejejo anioque'yonaje, ebianeij mijiije. Eyacuiñajji nijjeya ojjaña huoojea'yoyji poani oya, Jesosa. <sup>13</sup> Majoya jjeya ohuaya ishoa ca ani Eyacuiñajjiya eshahua cuana, ojjaña ojaya epeeji pojjeama, shajjama' cuana pea'ai jeabichajea'yo majje quea nee nee po mee caje'yo tii tii. <sup>14</sup> E'e, Jesosa acui ecueata'apeejo mano'yonaje; ojaya epeeji mimishi'ama po mee ca poa. Jamajjeya eseya Eyacuiñajjiya esohui jayojja jama ameesahua cani.

<sup>15</sup> Edojjoshahua Pameya pea'ai eseya ba meesahua cani Eyacuiñajjiya esohui ma ohua yahuajo tehue mee ca poa ojaya epeeji ebaaji. Ebionei jama poa ba'a:

<sup>16</sup> “Quijje eyaya miquianaya esohui eyacua huohuije. Jamajjeya miquianaya jjashahuabaqui meesahuaje ecuea ejjashahuabaquiiji jayojja. Ecuea esohui jayojja jama eyaya miquianaya ameesahuaje”.

<sup>17</sup> Majoya ohuaya jiquio esohui tehue mee ca poa:

“Jamajjeya eyaya ojjaña cuanaja mimishi cuijea neineije'yo. Majoya eya jjashahuaba majamajaqui ajja miquianaja mimishijo. Quea bei poaje”.

Eyacuiñajjiya jama tehue meemeya aca poa. <sup>18</sup> Jamajjeya Jesosa Quito esejaya mimishijo mano'yo majje mimishi cuijea ca'yonaje. Apoa poanaje. Jamajjeya oya mano beca'yo ajja. E'e, aquiana ehuone' quecua maja ajja pea'ai, ¿ajeo equecua'yoyji? Jesosa mimishi cuijea'yoyji quea pame nee poanaje.

### *Jesosa chipi nei ejjapeequil*

<sup>19</sup> Yahuajo Jodio Eyacuiñajji nijje mimiani cuana quea mete dobiquia poa daqui equecuayijji biso nei yasijje. Dobiquia poa Eyacuiñajji nijje mimiya. E'e, Jesosa Quitohua mano'yonaje; ojaya ena' cuayaquinaje ese quea boejea po mee'yoyji. Jamajjeya Jesusaja epeeji cuana, jjeya Eyacuiñajji nijje emimi mete'ama nei. <sup>20</sup> Yahuajo nei Eyacuiñajji

nijje emimijji etii oe nei daqui esecuejje equecuayijji biso nei yasijje dobiqianinaje Eyacuiñajji nijje mimiya. Jjeya eseya Eyacuiñajji nijje mimiani, ojjaña. Jesosa esejo mano'yonaje. Jjeya oya eshe, enequi tii tii. Jamajjeya eseya mimi majamajani Eyacuiñajji nijje. <sup>21</sup> Oya, Jesosa Eyacuiñajji nijje emimijji nei esejo pea'ai. Eseyja jaahuana tiitii cani, ojaya epeeji nei. <sup>22</sup> Jamajjeya eseya ojaya epeeji e'e jojo nei poanijo Eyacuiñajji nijje emimi. E'e jojo nei emimi tii tii onijje. ¡A'a jama pojji ba'a: —¡Dee! Eya quea mimishi Eyacuiñajji nijje emimijji —a'a jamaya pojji! Cho, esejaya mimishi cuana cuijea ca'yonajejo eseya quea boejea nee'yo.

<sup>23</sup> Eyacuiñajjiya ojaya esohui jayojja jama acaje'yo. Siajje po ajja oya. E'e jojo nei eseya ba'e tiitii mee caje'yo onijje eyajo. Jamaya esejaya eba. Jamajjeya ¡ejjapeequi onijje nei! <sup>24</sup> ¡Jesosaja epeeji cuana quea jea nee eja'aqui! E'e, ¡ejjashahuabaqui pea epeeji cuanajo, o ba'e meesahuajji, Jesosajo echaco sahuajji pea'ai! <sup>25</sup> Beca epeeji cuana aje oe jjachicha pajequinaje; ojee Eyacuiñajji bihuia ajja po'yonaje. ¡A'a oya cuana jayojja jama pojji! ¡Ojee ejjachichaqui! Jesosaja epeeji cuana nijje emimi jama ba'a: —¡Quea bihui pocue! ¡Jesosa nijje jjapeequicue ecuana nijje! —eja'aqui.

E'e, Jesosa Quito esejaya Emeshi Mese nei poje'yo. Jamajjeya oe jamaya epo tiitii.

*¡Jesosa Quito a'a cajaa ajji!*

<sup>26</sup> Beca cuana aje oe Eyacuiñajjiya esohui e'e nei ba majje jamatii quea mimishi po tiitii sa poani. Jamajjeya ojaya mimishi ecuijea'yoyji pojjeama. E'e, Jesosa ca ca oe mimishi cuijea'yoyji. Pea chama'. <sup>27</sup> Jamajjeya Eyacuiñajjiya ojjaña shajjama' cuana jeajea caje'yo cuaqui yasijje onijje mi jjapeequi'yajo. Quea nee nee po tiitii mee caje'yo. <sup>28</sup> Yahuajo nei Jodio etiiquiaa Moisesija etehue'yo jayojja jama mi atiitii cajo, cuiajea ca'yaninaje, dejja etii cuaa. Beca dejja cuaa oya jayojja huohuime acajoya jama ba'a: “Oya ca ca oma shajjama', Moisesija esohui jayojja jama a sa po ajja. ¡Cacuiajea ca'yahua cuaa ca omal!” jama huohuime acajoya cuiajea ca'yaninaje dejja etiiya. Chama'yo tii aca'yaninaje cuana. <sup>29</sup> Oya jayojjaya jjeya beca cuana Eyacuiñajjiya Bacua Ejjajo, Jesosajo mimipanajeapanajeani. Cajaa acani quea mimishi nee neeya jjejojo. Eyacuiñajjiya esohui quea pame nee ojjaña ba mee canaje jama ba'a: —Jesosa mano'yonaje miquianajaya mimishi cuijea'yoyji —jamaya ba mee canaje.

Jamatii beca cuana siajje poani jama ba'a: —Jesosa dejja mimishi jayojja jama mano'yonaje, jamatii.

Edojjoshahua Pameya ojjaña quea pame jaahuana sa acani. Jamatii beca cuana Edojjoshahua Pame shajja'ajja sa po'yo ajja. Cajaa acani. Oya cuana quea tai nee nee poani. Jamajjeya oya cuana quea nee nee po mee caje'yo tii tii Eyacuiñajjiya. Yahuajo nei Moisesija etehue'yojo shajjama' poanijo ca ca quea tai pishana. Jamatii quecuajea ca'yaninaje cuaa. <sup>30</sup> E'e, esejaya eba Eyacuiñajjiya yahuajo tehue mee ca poa jama ba'a: “Eyaya eyaye nei dejja mimishi quea nee nee po meeje'yo. Ojjaña joya pea cuana quea nee poani eyaya quea nee nee po meeje'yo”.

Jamaya Eyacuiñajji poa pea'ai ba'a: “Ecuea epeeji quea mimishi poajo, eyaya oya cuana ejjabahuejjaquijji quea nee po meeje”. Jamaya Eyacuiñajji poa pea'ai.

<sup>31</sup> Jamajjeya ¡quea mete nee nee capoahua ojjaña joya Jesosa Quito cajaa ajji poani, de! Eyacuiñajjiya oya cuana quea nee nee po mee caje'yo. Oya ca ca oe nei eshe nequi tii tii, quea ca'a nee nee.

*Jesosa nijje jjapeequi majje ¡quea ja'a nee po tiitii!*

<sup>32</sup> Ecuea epeeji cuana, ¡jjashahuabaquicue! Yahuajo Jesosa nijje jjapeequi jeahuajo miquianaya ojaya epeeji quea ja'a nee poanaje. E'e, Eyacuiñajjiya esohui shajja'ajja majje miquianaya onijje jjapeequinaje. Edojjoshahua Pame miquiana que dobiquinaje pea'ai. Jamajjeya Jesosaja epeeji pojjeama cuaa miquianaya napa canaje quea huiso. Miquianaya quea nee poanaje. Jamatii Jesosa nijje jjapeequi pajea ajja poanaje, jjapee neineiquinaje. <sup>33</sup> E'e, Jesosaja epeeji pojjeama miquiana nijje mimijajinaje quea huiso ojjaña eshajja'ajjajji. Miquianaya napa canaje pea'ai. Quea nee po mee canaje. Jamatii

miquianaya mete'ama poanaje. Onaa Jesusaja epeeji napa canijo, miquianaya onijje jjapeequinaje, Jesusaja epeeji cuana nijje. <sup>34</sup> Ejeanobia jaa huasijje pea'ai miquianaya poquinaje mete'ama Jesusaja epeeji cuana baa, ona bobiaa. Miquianaya ejeanobia jaajo aquiana siijea ca'yonaje cuaa. Jamatii miquianaya yeno'ama poanaje. Quea bihui miminaje jama ba'a: —Ecuanaaya Jesusaja epeeji poanijo ohuaya ecua quea pame nee nee acaje'yo quijje. Ecuanaaya ba'e tiitii mee caje'yo onijje eyajo —poanaje miquianaya.

<sup>35</sup> Jamajjeya ja'a jja oe Jesosa nijje jjapeepajeaqui'yojji! Onijje jjapee neineiquianijo, ohuaya miya quea pame nee acaje'yo. Eyajo miya quea huiso sosequia caje'yo pea'ai.

<sup>36</sup> E'e, ¡quea bihui nee atitiicue Eyacuiñajjija esohui jama! ¡A'a hueahueajji! Jamaya miquiaaya atitiijajo, ohuaya miquianaya quea pame nee nee acaje'yo. Ojaya esohui yahuajo ohua huohui ca poa jamaya ohuaya acaje'yo. Miquianaya ba'e tiitii mee caje'yo onijje eyajo. <sup>37</sup> E'e, Eyacuiñajjija esohui yahuajo nei etehui'yo jama poa ba'a:

“¡Ishoa socue ojaya epoejji! Jjeya nei pojja'a oya poeje'yo, quijje nei pojjeama.

<sup>38</sup> Ojjaña joya enijje jjapee tiitiquiani eyaya baña mimishi'ama, quea boejea'yo. Enijje jjapeepajeaqui'yo ca ca ecuea boti'ama; quea nee po meeje'yo”.

Jamaya esohui etehui'yo poa.

<sup>39</sup> Ecuanaaya ca ca jamaya pojjeama. Jesosa nijje jjapeepajeaqui'yo ajja tii. Jamajjeya Eyacuiñajjija ecua quea nee nee epo mee'yojji pojjeama. Cho. Ecuana Jesosa nijje jjapee tiitiquianijo ohuaya ba'e tiitii mee caje'yo onijje eyajo.

## 11

### *Beca etiquiana Eyacuiñajjija epeeji nei poa*

<sup>1</sup> Ecuea epeeji cuana, esejaya eba nei nei jama ba'a: Jesusaja epeeji poanijo e'e jojo nei Eyacuiñajjija ojaya esohui jayojja jama eseya acaje'yo. Jamajjeya eseya jama poani ba'a: —E'e jojo nei Jesosa quea huiso esohui huohui canaje; jjeya beca cuana esejaya quea quehua. Jamatii quijje eseyaya baje'yo.

<sup>2-3</sup> Jamajjeya Jesusaja epeeji poanijo eseyaya baña Eyacuiñajjija ojjaña tii pana ca poa. E'e, oya jama poa ba'a: —Meshi cuana, ¡jjapanaquicue! —jamaya acajje meshi jjapanaquia poa. E'e, yahuajo nei ojjaña chama' nei nei poa. Jamatii Eyacuiñajjija ojjaña pana ca'ya poa.

E'e, etiquiana pea'ai Eyacuiñajji nijje jjapeequianijo, ojaya esohui jayojja jama acanijo pea'ai, Eyacuiñajji ona nijje jama poa ba'a: —Miquianaya ecuea epeeji poanijo eyaya miya baña quea pame nee poani —aca poa.

### *Etiqiana Abeni bajjani Eyacuiñajjija epeeji nei poa*

<sup>4</sup> Abeni Eyacuiñajjija epeeji poanajejo ojaya esohui jayojja jama aca poa quea pame nee. Jamajjeya ijjiacajji ehune' dahuajea cajo Eyacuiñajji bihuiajji, Eyacuiñajji onijje miminaje jama ba'a: —Abeni, miya quea ja'a nee anaje. Jamaya ecuea quea boti nee. Jamajjeya eyaya miya baña mimishi'ama —Eyacuiñajji poa.

Abenija o'iya Cainiya Eyacuiñajjija esohui jayojja jama pojjeama aca poa. Quea pame pojjeama aquiana quia ca poa Eyacuiñajji bihuiajji. Jamajjeya Cainija quia'yo Eyacuiñajjija boti'ama poa. Jamajjeya Caini jjashahuabaquinaje jama ba'a: —Eyacuiñajjija Abeni quea jea nee poani. Ojaya eya boti'ama. Jamajjeya eyaya Abeni cujeaje'yo —aca poa Cainiya. Jamatii ecuanaja eba Abeniya Eyacuiñajjija esohui jayojja jama aca poajo ojaya epeeji nei poa. Abeniya quea pame aca poajo eseya jjashahuabaqui majje Eyacuiñajji nijje jjapeequije quea pame nee.

### *Etiqiana Enoca bajjani Eyacuiñajjija epeeji nei poa*

<sup>5</sup> Enoca Eyacuiñajjija epeeji nei nei poa pea'ai. Jamajjeya oya mano'yo jjima. Eyacuiñajjija oya jjequisohua ca'ya poa eyahuasijje eshe tii. Onijje nequi dejja cuaa oya sa'ajja ca'ya poa. Chama' ba ca'ya cuaa poa. Eyacuiñajjija esohui yahuajo nei nei tehue ca poa Enocajo jama ba'a: “Eyacuiñajjija esohui jayojja jama aca poajo Eyacuiñajji quea bihui nee poa Enocajo” jamaya tehue ca poa.

<sup>6</sup> E'e, Eyacuiñajji nijje jjapeequi ajjajo, ojaya esohui jayojja jama a'ajjajo, Eyacuiñajji ojjaña ese nijje quea bihui nee pojjeama poaje. Ojjaña joya Eyacuiñajji nijje jjapeequi sa poani cahuohui cahua jama ba'a: —Ecuea eba Eyacuiñajji enequi tii tii, eshe. Ojjaña joya oya sa poani ohuaya e'e jojo nei quea pame nee acani —cahuohui cahua.

*Etiiquiana Noe bajjani Eyacuiñajjija epeeji nei poa*

<sup>7</sup> Noe Eyacuiñajjija epeeji nei pea'ai poa. Jamajjeya Eyacuiñajjiya oya huohui ca poa jama ba'a: —Ojjaña meshijo ba'e cuana hui'ijeaje'yo ena jjayehuequiajo. Ohuajea caje ojjaña tii —Eyacuiñajjiya aca poa.

Noeja ba jjima poa ena quea quemo nee poaje. Jamatii ohuaya Eyacuiñajjija esohui shajja'ajja ca poa. Bishe, nacha quea quemo nee nee iya ca poa ojaya, oja bacua cuanaja edobiquijji, hui'i'yo jjima epojji. Jamajjeya Eyacuiñajji onijje mimia poa jama ba'a: —Noe, miya ecuea epeeji poani. Ecuea esohui jayojja jama aña. Jamajjeya eyaya miya baña mimishi'ama —aca poa.

Noeya Eyacuiñajji shajja'ajja ca poajo, eseyaya baña pea cuana aje oe shajjama' nei nei poa.

*Etiiquiana Amajama bajjani Eyacuiñajjija epeeji nei poa*

<sup>8</sup> Amajama Eyacuiñajjija epeeji nei poa. Jamajjeya Amajamaa shajja'ajja ca poa Eyacuiñajji onijje mimiajo. Jama poa ba'a: —Amajama, ¡miquea meshijo nequi cuayaqui'yocue! ¡Poquicue pea meshi yasijje, ma miquea ba jjima huasijje! Eyaya ma meshiya miya quiaje. Miquea eba'eji poaje'yo, miquea osecua cuanaja pea'ai poaje'yo —Eyacuiñajjiya aca poa.

Jamajjeya Amajamaa Eyacuiñajji shajja'ajja ca poa. Poquia poa jamatii oja ba jjima meshi yasijje. <sup>9</sup> Jamajjeya Eyacuiñajjija esohui jayojja jama poanijo oya ba'equi'ya poa pea meshi yasijje, ma Eyacuiñajjiya o huohui ca poa huasijje. Ma meshijo ba'e dejja pea poa. Jamajjeya Amajamaja equi iya jjima poa; daqui equijo ba'ya poa. Jamaya pea'ai poa oja bacua Isaaca, ojaya osecua Jacobo pea'ai.

—Jiquio meshi eyaya miya quiaje miquea eba'eji —jamaya Eyacuiñajjiya huohui ca poa Amajama, oja bacua Isaaca, ojaya osecua Jacobo pea'ai.

<sup>10</sup> E'e, Amajama jjashahuabaquinaje pea cuiñajjijo, cuiñajji eyacuajo, ma Eyacuiñajjiya eyajo iya canijo. Amajama jama poa ba'a: —Quijje eya Eyacuiñajjija cuiñajji eyacuajo ba'eje.

*Etiiquiana epona Sana bajjani Eyacuiñajjija epeeji poa*

<sup>11</sup> Sana Eyacuiñajjija epeeji nei poa pea'ai. Jamajjeya Sana pona tii nojinoji majje jjamejoquia poa, jamatii esho'yahua jjamejoqui jjima poa. Eyacuiñajjiya oya jjamejoqui meesahua ca poa ojaya epeeji nei poanijo. Sana jjashahuabaquia poa jama ba'a: —Eyacuiñajjiya huohui canaje Amajama ecuanaja ebacuajo e'e nei. Jamajjeya ma ecua ecuanaya ohuaya huohui canaje jamaya acaje'yo e'e jojo nei —Sana poanaje.

<sup>12</sup> Amajama Eyacuiñajji nijje jjapeequinaje pea'ai, oja sohuijo e'e nei jjabahuej-jaquinaje. Jamajjeya dejja tii nojinoji majje, 100 shequiajame tii majje ebacua jea ca poa. Ehuanase etii nojinoji jjamejoquia poa, jamatii yahuaajo nei bacuama' nei nei poa. Jamajjeya ojaya osecua quea huiso nee nee quijje jjapapaqui'ya poa. Majameta huisoajja poa, sico meeme ajja quea huiso nee nee. Meshijajjijo ani mei sisi huisoajja poa.

*Etiiquiana cuiñajji eyacuajo eyajo jjashahuabaquianinaje*

<sup>13</sup> Jiquio etiiquiana Eyacuiñajji nijje jjapee tiitiiquianinaje. Dejja tii majje mano'ya poa Eyacuiñajjija epeeji tiya. E'e, Eyacuiñajjiya oya cuana huohui ca poa jama ba'a: —Eyaya miya jiquio meshi quiaje'yo miquea epojji, miquea osecua cuanaja epojji pea'ai.

Jamatii maya meshi ojaya pojjeama, mesena jjima poa: —Eyacuiñajjija esohui e'e nei, ohuaya meshi quea pame nee quijje quia caje'yo ecuanaja osecua cuanaja epojji —etiiquiana jjashahuabaquianinaje. Jamajjeya oya cuana quea bei nee po'ayequianinaje: —Ecuana jiquio meshijo anije so'lo —poaninaje etiiquiana—. Meshijo ca jja ca oe ecuana

eba'e tiitijji pojjeama. Eyajo ca ca oe ecuana ba'e tiitije'yo Eyacuiñajjija cuiñajji eyacuajo —jamaya poaninaje Amajama, Isaaca, Jacobo cuana.

<sup>14</sup> E'e, oya jamaya poaninaje pea eba'ejjijo jjashahuabaquianijo. Eba'ejji e'e jojo neijo jjashahuabaquianinaje ojaya epoiji tii tiijo. <sup>15</sup> Oya cuana jjashahuaba majaqui ajja poa meshijo, ma yahuajo oja jiña'yojo. Jjashahuabaquianinaje jama ba'a: —Ma e ba'ya poa meshi yasijje ca iña poqui sa po'yo ajja. ¿Ajeo epoqui o'oyajji, de? —poanaje oya cuana.

<sup>16</sup> Chojja. Oya cuana pea eba'ejjijo jjashahuabaquianinaje, eba'ejji eyacua quea pame nee neejo eyajo Eyacuiñajji nijje. Jamajjeya Amajama jama poa ba'a: —Eyacuiñajji, eya miquea epeejji.

Amajama jama poajo Eyacuiñajji etiiquiana nijje miminaje jama ba'a: “Miquianaya ecuea epeejji nei; eya quea bei nee miquianajo” aca poa. Jamajjeya Eyacuiñajjiya oya cuana ojaya cuiñajji eyacua quea pame nee yasijje ba'e mee caje'yo, ma ohua yahuajo eyajo pana ca'ya poa huasijje.

<sup>17-18</sup> E'e, Amajama Eyacuiñajjija epeejji nei poa. Yahuajo Eyacuiñajjiya oya huohui ca poa: “Amajama, miquea ebacua cuayaje” aca poa. Majoya Amajamaa ebacua cuayajo Isaaca bajjani aca poa. Majoya Eyacuiñajjiya Amajama jama aca poa ba'a: “Isaacaja bacua ca ca oe eyaya baña miquea osecua e'e nei, pea cuana ca chojja” aca poa. Jamatii quijje Eyacuiñajjiya Amajama jama aca poa ba'a: “Amajama, ¡miquea ebacua ejja oe nei Isaaca bajjani mei biajje huana majje yacua'yocue, dahuajea'yocue!” Jamaya Eyacuiñajjiya Amajama huohuime aca poa a'a e'e jojo nei ohuaya shajja'ajja caje ebajji: “Eya e'e jojo nei Amajamaja quea jea neejo, ohuaya ecuea esohui shajja'ajja caje” poanaje.

<sup>19</sup> Majoya Eyacuiñajjija esohui shajja'ajja majje Amajamaa oja bacua ejja dojo ca poa eyacua'yojji nisho: —E'e, eyaya Eyacuiñajjija esohui jayojja jama aje'yo; ecue bacua oe nei yacuaeaje'yo —Amajama poanaje—. E'e, eya Isaaca yacua'yajo, Eyacuiñajjiya oya emano'yojaa shequi mee caje o'oya —Amajama poanaje.

Jamajjeya Isaaca yacua jjimahuajo Eyacuiñajjiya Amajama huohui canaje jama ba'a: “Amajama, ¡a'a miquea ebacua Isaaca yacua'yojji!” aca poa.

Jamajjeya Amajamaa Isaaca equi yasijje dojo ca o'oya poa, eshe. Beshahua nei Isaaca yacua ca'yonaje. Jamajjeya eyacua'yojaa shequi o'oya jayojja Isaaca poa.

*Etiiquiana Isaaca, Jacobo, Jose pea'ai Eyacuiñajjija epeejji poa*

<sup>20</sup> Isaaca Eyacuiñajjija epeejji nei pea'ai poa. Jamajjeya ojaya ebacua ejja Jacobo, Esao pea'ai huohui ca poa jama ba'a: —Jacobo, Esao pea'ai, ¡shajja'ajjacue mo! Ma ecua eya ohua huohui ca poa jayojja jama Eyacuiñajjiya acaje'yo miquiana nijje. Ohuaya miquiana nijje quea pame nee acaje'yo. E'e, jiquio meshi miquea osecua cuanaja poaje'yo —aca poa Isaaca.

<sup>21</sup> Jacobo pea'ai Eyacuiñajjija epeejji nei poa. Jacobohua dejja tii majje oja bacua ejja Jose bajjanija bacua cuana huohui ca poa jama ba'a: —Ecuea osecua, Eyacuiñajjiya miquianaya quea pame nee ca'a cahua e'e jojo nei —Jacobohua aca poa ojaya osecua cuana, Joseja bacua ejja cuana.

Majoya Jacobohua Eyacuiñajji bihuia ca poa. Oya dejja tii nojinoji majje ojaya acui ejaquecua ca'aquijjijo nequisohuanaje Eyacuiñajji bihuiajji. Jama aca poa ba'a: —Eyacuiñajji, miya oe nei quea pame nee nee. Eyaya miya bihuiaña —aca poa Jacobohua.

<sup>22</sup> Jose pea'ai Eyacuiñajjija epeejji nei poa. Jamajjeya tii nojinoji'yo majje mano'yo jjimahuaa Joseya oja bacua ejja huohui ca poa jama ba'a: —E'e jojo nei Eyacuiñajjiya eseya ojjaña Amajamaja pea osecua cuana nijje Ejito meshijo nequi cuayaqui meesahua caje'yo pea meshi yasijje epoqui'yojji, eseja meshi yasijje. Jamajjeya ¡e mano'yajo ecuea esa' cuana dojo'yocue ecue meshi yasijje! ¡jani ai yasijje huanadobiañaqui'yocue! —huohuime aca poa Joseya.

*Etiiquiana Moisesi bajjani Eyacuiñajjija epeejji nei poa*

<sup>23</sup> Moisesija chii, ojaya enaese pea'ai Eyacuiñajjija epeejji nei nei poa. Jamajjeya Ejito meshi meseya Panao bajjanija ojjaña Ejito meshijo ba'e cuana Jodio cuana jama aca poa



ba'a: —¡Jodio cuana, miquea ebacua cuaya jeahuajo cuei yasijje jeoqueajeacue! —aca poa.

Jamatii Moisesija chiiya, oja naeya pea'ai Panao shajja'ajja jjima aca poa. Mete'ama poa. Panaoja esohui jayojja jama ajjima aca poa; Moisesi jeoqueajea jjima aca poa. Ba majje jama aca poa ba'a: —¡iquio ebacua quea pame nee, quea ja'a nee nee —aca poa ejeajjiya.

Jamajjeya equijo huanaquehua ca poa pea beca peejjima ba'ime onaa ejaja ca'yo poajeje. <sup>24</sup> Panaoja bacua pionaa Moisesi ba majje tii mee ca poa. Jamatii tii majje Moisesi Eyacuiñajjiya epeeji nei poa. Jodio cuana nijje ba'e'yo sa poa, oja huapa pojjeama nijje. Moisesiya Ejito dejja jama aca poa ba'a: —¡A'a eya nequiaa jama ajji ba'a: “Miya Panaoja bacuaseja bacua” a'a eya ajji! —Moisesiya aca poa.

<sup>25</sup> Ejito dejjaa aje oe Jodio cuana sosema' chaco mee ca poa, cuiasejjajea ca poa quea huiso nee, Eyacuiñajjiya epeeji cuana. Quea nee poa. Jamatii Moisesi Jodio cuana nijje ba'e sa poa. Oya Ejito cuana nijje ba'e sa po ajja neinei poa oya cuana quea mimishi poanijojo. Oya ca ca Eyacuiñajji nijje jjapeequi sa poa jamatii quea nee. <sup>26</sup> Jjashahuabaquia poa jama ba'a: —Eyacuiñajjiya huoojea'yo ojjaña jaahuanajji quea tai nee acaje'yo mimishi cuaa. Eya quea nee capoahua pea'ai o jayojjaya. Jamatii, jamaya quea pame nee. Ejito dejjaja aqui ana quea nahue ecuea yani. Jamatii cajaa eyaya ajeaje —Moisesi poa. Ojaya eba poa Eyacuiñajjiya oya quea pame acaje'yo quijje onijje jjapeequianijo.

<sup>27</sup> Moisesi Eyacuiñajjiya epeeji nei nei poa. Panaohua ca ca Eyacuiñajjiya epeeji Jodio cuana nahue sa aca poa ojaya echacoji sosema' epojji; quea tai, quea mase oya poa. Jamatii Moisesi Panaojo mete'ama poa: —Eyaya ca iña Eyacuiñajjiya epeeji Ejito meshijo ani cuayaqui meesahuaje'yo ecuanaja meshi yasijje epoqui'yojji —jamaya Moisesiya Panao aca poa mete'amaa nei. E'e, Eyacuiñajji Moisesija eba poa, jamatii Eyacuiñajji jjaba meequi ajjajojo ojaya ecojjaja ba jjima poa.

<sup>28</sup> Moisesiya Eyacuiñajjiya epeeji nei poaniya jjejojo Eyacuiñajjiya esohui jayojja huohuime aca poa Jodio cuana jama ba'a: —¡Ñajjajja cuiacue! Majoya cuia'yo majje jjeasijjeacue oja naa miquea esecue jjanijo esohuidojojjiya miquea ebacua ejja ecuiajeajji pojjeamajo, cojjasobo! Jamajjeya poeje shajjamaja bacua ejja cuiajeaa —Moisesiya aca poa.

Jamajjeya Moisesiya esohuidojojjiya Jodio cuanaja ebacua ejja cuia jjima amee ca poa. Majoya jamaya Jodio cuaa ojjaña shequiaja ojee ijji ca poa ebacua cuia'yo jjima aca poa shejo, epajea'yojji pojjeama jojaya.

<sup>29</sup> Jodio cuana Isaenija osecua cuana Eyacuiñajjiya epeeji poa yahuajo nei Moisesi Jodio cuana jaahuana coojji poa. Jamajjeya Eyacuiñajjiya oya cuana bae huo'o ojje miji yasijje poqui mee ca poa ejiojji jaboje. Ba majje Ejito dejja jama poa ba'a: —¡Cua'a! ¡Poquicue ma ecua Jodio dejja poquia bacue! —poa. Jamatii Ejito dejja epoquijji nisho po'ajja poa. Hui'i jeyojeyo'ya poa ojjaña. Enaa oya cuana jepajea ca poa.

<sup>30</sup> Isaenija osecua cuana Eyacuiñajjiya epeeji poa Josoe o huoojea'yojji poanijo pea'ai. Jamajjeya Eyacuiñajjiya esohui jayojja jama Jenico cuiñajji sahuajje jjajeacohuiqui nequi'ya poa. Quea huiso cahuime dobiqui jjima, me oeje pea beca cahuime, 7 cahuime aca poa. Eyacuiñajjiya mei peeyi jaabichajea meequi ca poa meshi yasijje. Jamaya aca poa Isaeni dejja cuaa. Ojjaña mimishi cuana jomajo ba'e quecua jeyojeyo meesahua ca poa, Eyacuiñajjiya.

<sup>31</sup> Epona Shajami bajjani, ma pea cojjoji yahuajo poa Eyacuiñajjiya epeeji po'yonaje. Jamajjeya Josoeja huoojea beca dejja Jenico cuiñajji quehua baa dobiqui Shajamiya oja equi yasijje iyaquehua ca poa onaa equecua ca poajeje. Jamajjeya Josoeja sohuinano cuaa dejja mimishi quecuajea'yo majje Shajami quecua'yo jjima poa. Josoeja huohui ca poa jama ba'a: —¡A'a Shajamija huapa pojjeama quecuajji! —aca poa.

*Jodio etiiquiana quea huiso Eyacuiñajjiya epeeji poa*

<sup>32</sup> Pea etiiquiiana quea huiso Eyacuiñajjija epeeji nei poa. Beca cuana ma bajjani poa ba'a: Jjeneoni bajjani, Banaca bajjani, pea Sanisohui bajjani, pea Jepete bajjani, pea Dabi bajjani, pea Samoeni bajjani. Quea huiso Eyacuiñajjija esohui huohuijji Jodio etiiquiiana poa. Jjeya ca ca eyaya ojaya cuanaja eba'ejjijo ehuohui jeyojeyojji pojjeama quea huisojojo. <sup>33</sup> Oya cuana Eyacuiñajjija epeeji nei poaninajejo oya cuana ameesahua canaje joya ecua peaa ajjima acani jama. Jamajjeya beca cuaa emeshi mese quea mimishi cuana jeabichajea ca poa. Pea cuana ona huoojeajji quea ja'a nee poa. Pea cuana quea ca'a poa, quea ja'a nee ba'e'ya poa. Ojaya esohui yahuajo jayojja ma ecua ohuaya yahuajo esohui huohui ca poa jamaya aca poa onajo, Eyacuiñajjiya. Pea cuana neonija, ibia naa ashaja ijia jjima poa Eyacuiñajjiya oya jjanaba cami meequi ca poa ojaya epeeji cuana e'ijjia ca'yo poaje jjejojya. <sup>34</sup> Pea cuana Eyacuiñajjiya jaahuana canajejo quiyo'yo jjima poa. Cuaqui jiji neijo nequi quiyo'yo jjima poa. Pea cuana quehuajje poquicuaji meesahua ca poa dejja maseya equecua ca poaje jjejojya. Pea epeeji cuana ca'a'ama. Jamatii Eyacuiñajjiya quea ca'a po mee ca poa; dejja mase quea huiso cuana jeabichajea ca poa, Eyacuiñajjija epeeji pojjeama mete mee ca poa. <sup>35</sup> Epona cuana quea yeno nee nee ebacua mano'yajo poa. Jamatii Eyacuiñajjiya ebacua cuana emano'yojaa shequi mee ca o'oya poa. Quea bihui nee po mee ca poa. Pea cuana ca ca dejja mimishiya quea nee nee po mee ca'ya poa. Quea nee neejo mano'ya poa. Oya cuana huohui ca poa dejja mimishiya: —¡Eyacuiñajji nijje jjapeequi pajea'yocue! ¡Cajaa acue! Majoya miya quecua'yo jjima poaje —poanaje cuana.

—Chojja. Eya Eyacuiñajjija epeeji nei. Oya cajaa a'ajja tii ecuea. Eya ca ca iña mete'ama emano'yojji —saja'ame aca poa Eyacuiñajjija epeeji cuaa.

Jamajjeya aje oe quecua ca'ya cuaa poa. Ma epeeji nei jjashahuabaquianinaje jama ba'a: —Eyacuiñajjiya e'e jojo nei eya quea pame nee ba'e tiitii mee caje'yo onijje eyajo quiije —poa mano jjimahua.

<sup>36</sup> Dejja mimishi cuana Eyacuiñajjija epeeji cuanajo soa neineinaje ojjaña ba canijo pea'ai. Napa canaje, cuiasejjajea canaje jjonohua, jeyo canaje cadenaaa, jeanobiajhea canaje. <sup>37</sup> Jajahuejjajea canaje meiya pea'ai. E'e, acui ijjiasejjameejjiya oya cuana ijjiasejjajea mee caninaje, esapa jajasejjajea ca poa baaa Eyacuiñajji a'a cajaa acaje'yo ebajji. Aema' poa; daquimajo ijjiacajji jee daqui huosho ca poa. Bobi yasijje po'ya poa. Quea naba taja nee nee pea'ai poa. E'e, ojjaña ba canaje dejja mimishi cuaa oya cuana quea tai nee nee aca poa, cajaa aca poa. Jama aca poa: —¡Dee! Jiquio dejja cuana quea tai, cajaa. ¡Ejjacuiajeaqui'yo! —aca cuaa poa.

<sup>38</sup> Jamajjeya oya cuana dejja masejo quea mete jjejojo quehuajje poquinaje. Cuajicuaji poquinaje meshi quima huasijje, eyiyo huasijje, jjani yasijje pea'ai. Equi chamajo jjanijo ba'ya poa.

<sup>39</sup> Jiquio Jodio etiiquiiana Eyacuiñajjija epeeji poa, quea pame nee. Eyacuiñajji jama poa ona nijje ba'a: —Miya ecuea epeeji nei quea pame nee nee, ecuea ehuohui jayojja jama aña.

Jamatii Eyacuiñajjija ejjashahuabaquijji quea pame nee ajjima poa ona nijje jiquio meshijo ba'yanijo. <sup>40</sup> Jamajjeya Eyacuiñajjiya oya cuana ishoa mee ca poa. E'e, Eyacuiñajji jjashahuabaquinaje ojjaña cuana quea boejea'yo epo mee'yojji; ojjaña yahuajo nei cuana ba'ya poa, eseya jjeya nei ba'e pea'ai quea boejea'yo epo mee'yojji. Jamajjeya ojjaña eseya ojee ba'e tiitije'yo quea boejea Eyacuiñajji nijje eyajo, ojjaña tii.

## 12

*¡Eyacuiñajjija epeeji yahuajo ba'ya poa jayojja ba'ecue Jesusaja epeeji nei!*

<sup>1</sup> Jamajjeya ojjaña Eyacuiñajjija epeeji yahuajo ba'ya poaa jjeya nei ecuana huohui cani jama ba'a: —¡Bacue! Ecuana Eyacuiñajjija epeeji nei poa. ¡Ecuana jayojja pocue! —poani.

Ecuana Jesusaja epeeji dejja cuajicuajiani jama. Mimishi ca ca aquiana quea biquee eba'o ba'e jayojja. Jamatii ecuaaya ca'a'amaa jjejojo mimishi acuajiaña. Jiquio ecua dejja

aquiana abo po jjima cuajicuajiani jayojja jama eseyaya mimishi ejjapajea neinei'yo Jesosaja epeeji nei epo'yojji. Oya, Jesosa esejaya ecuajicuaji meesahuajji jayojja. Jamajjeya ojaya ejjashahuabaquijji jayojja jama ejja'a tiitiqui'yo. <sup>2</sup> Jamajjeya ¡Jesosajo jjashahuabaquicue! Ohuaya yahuajo eseya onijje jjapeequi mee canaje. Jjeya ohuaya eseya onijje jjapee tiitiqui meesahua cani. Jesosa jama jjashahuabaqui ajja ba'a: —Chojja de, eya acui ecueata'apeejo emano'yojji pojjeama —jamaya po jjima poa.

Chojja. Jesosa jama poanaje ba'a: —E'e, ojjaña enijje quea mimishi nee nee poaje. Jamatii eya ecue Chiiya huohui ca poa jayojja jama mano'yome poaje acui ecueata'apeejo. Jamajjeya quijje eya ecue Chii nijje anioqueje quea bihui nee ojaya esohui jayojja jama amajje —jamaya Jesosa poanaje.

Jamajjeya Jesosa mano'yo majje Eyacuiñajji pejejo anioquenaje ebianeijje mijijje ojjaña huojjea'yojji.

<sup>3</sup> E'e, ¡jjashahuabaquicue Jesosajo! Yahuajo nei mimishi cuaa onijje quea quene nee nee po majje quea nee nee po mee canaje. Jamajjeya Jesosajo jjashahuabaquianijo miquianaya quea yeno epojji pojjeama onaa napa cajje. Onijje jjapeequi pajea'yo ajja poaje. <sup>4</sup> Yahuajo miquianaya ojee jjapeequianijo Jesosaja epeeji quea ja'a po'yonaje. Shajjama' po jjima. ¡Bacue! Jesosaa oja Chiija ehuhui jayojja ohua huohui cajo, mimishi cuaa quecua ca'ya poa. Miquianaya ca ca mimishi cuaa cuia'yo jjima Jesosa nijje jjapeequianijo. <sup>5</sup> ¡A'a pajea'yojji Eyacuiñajji esohui etehue'yo! Ejeajjiya oja bacua cuana tecuea cani ejjashajja'ajjaquijji jayojja jama Eyacuiñajji ese nijje miminaje:

<sup>6</sup> “Ecuea ebacua cuana, ¡eyaya miquianaya jjabahuejjaqui meeñaajo shajja'ajjacue mo! Eyaya miquianaya miquea mimishijo tecueñaajo ¡a'a quea yeno pojji! E'e, ojjaña joya ecuea quea jea nee nee eyaya jjabahuejjaqui meeña. Ecuea ebacua cuana eyaya tecueña mimishi'ama epojji”.

Jamaya Eyacuiñajjiya, eseja Chii aiya eseya aca poa.

<sup>7</sup> Jamajjeya Eyacuiñajjiya miquianaya jjabahuejjaqui mee canijo, ¡a'a quea yeno pojji! ¡Onijje mimicue jama ba'a: —Eyacuiñajji, miya ecue Chii ai. Miyaya eya quea nee po meeña eya miquea esohuijo ejjabahuejjaqui meeji —jamaya onijje mimicue!

E'e, ¡jiquio ecua seya esejaya ebacua cuana tecueña jamaya Eyacuiñajjiya eseya acani. Eseja bacua cuana eseyaya tecueña ejjabahuejjaquijji. <sup>8</sup> Ojjaña ejeajji cuaa oja bacua cuana niñeshe'a cani. Ejeajjiya oja bacua tecuea jjima acani shajjama' poanijo onaya mimije jama ba'a: —¡Dee! Oja bacua pojjeama pojja'a, jamajjeya mi jjabahuejjaqui mee cani. Jea jjima jama, de —acaje cuaa.

Oya jayojjaya Eyacuiñajjiya ojjaña ojaya ebacua cuana jjabahuejjaqui mee cani shajjama' epojji pojjeama. Ohuaya miquianaya jjabahuejjaqui mee jjima acani ca ca miquianaya oja bacua pojjeama, peaja bacua pojja'a.

<sup>9</sup> E'e, ejeajji cuaa eseya niñeshe'a cani esho'yahua ejjashajja'ajjaquijji. Jamajjeya oya jayojjaya esejaya Chii ai ejjashajja'ajja neinei'yo; ohuaya eseya ba'e tiitii mee cani. <sup>10</sup> Eyacuiñajjiya eseja Chii aiya ca ca eseya tecuea cani quea ja'a nee eba'eji. Jjabahuejjaqui mee cani o jayojja quea pame nee nee, quea boejea'yo nee epo tiitii meeji. Eseyaya ejeajjiya ca ca ojaya ejjashahuabaquijji jayojja jama eseya tecuea ca poa esho'yahua. <sup>11</sup> Jjeya Eyacuiñajjiya quea nee po mee cani ejjabahuejjaqui meeji eseya quea bihui pojjeama, quea yeno poani. Jamatii quijje jjabahuejja neinei'yo majje eseya quea jjashahuabaqui ja'a nee poaje, quea bei nee nee poaje.

<sup>12</sup> Jamajjeya ¡a'a quea yeno pojji jamatii quea camaja poanijo! ¡Quea ja'a nee oe jjapeequicue Eyacuiñajji nijje! <sup>13</sup> Jamajjeya ¡ejiojji epi jaji neijje poquiani jayojja jama pocue! ¡Quea ja'a nee jjapeequicue Jesosa nijje! ¡Pea cuana jjapee neinei'yo meesahuacue pea'ai Jesosa jayojja epojji!

*¡Jesosa nijje a'a jjapee pajeaqui'yojji!*

<sup>14</sup> Ecuea epeeji cuana, ¡quea bei ba'ecue ojjaña nijje! ¡Quea boejea'yo ba'ecue pea'ai! Quea boejea'yo ba'e'yo ajja aje oe Eyacuiñajji nijje eba'e tiitii'yojji pojjeama. <sup>15</sup> ¡Ba

neineicue! ¡Ojjaña Eyacuiñajji nijje jjapee neinei qui meesahuacue onijje eba'e tiitii'yoyji! A'a jja oe jama pojji ba'a: Acui iña quea cuaja nee nee pejeje nequi majje mano'yo chana'. Oya jayojja dejja tecueya ojjaña o pejeje ba'e quea tecue po mee cani. Quea tecue po tiitiani, quea huiso quea quene po mee cani. Quea huiso quea mimishi po mee cani pea'ai. Jamajjeya ja'a quea tecue po majajji! Quea tecue po majjeya Eyacuiñajji pajea'yo chana'. <sup>16</sup> ¡A'a pea cojjojji pojji pea'ai! ¡A'a etiiquiana Esao bajjani jayojja jama pojji pea'ai! Ojaya, Esaoja, yahuaño nei Eyacuiñajjija esohui boti'ama poa. Ojaya ejjashahuabaquijji jayojja jama poa jama ba'a: Oya cojjasobo poa. Jamajjeya oja chii mano'yajo, ojjaña ojaya aquiana equijjojea cajo Esaoja poaje'yo, cojjasoboja. Jamatii oja chahua huohui ca poa jama ba'a: —Cha, ¡che mo bobi quiacue! Quea shoe mo coma. Miya bobiaje soseje aje mi sosequiaje'yo; ma caca quiijjojea cajo eyaya miya quiaje'yo; ecuea pojjeama poaje'yo, miquea poaje'yo —aca poa oja chahua Esaohua, jjashahuabaqui jjima jayojja poa.

<sup>17</sup> Cojjasobojo Jodioja ejeajji cuana jama poaninaje ba'a: —Eyacuiñajji, ¡ecuea ecue bacua cojjasobo jaahuanacue, quea aquiana huiso po meecue! —poaninaje Jodio etiiquiana.

Jamajjeya quijje Esao oja chii nijje miminaje jama ba'a: —Ecue chii, ¡Eyacuiñajji nijje mimicue e jaahuanajji! —poa—. ¡Jama acue ba'a: “Eyacuiñajji, ¡ecuea ebacua cojjasobo Esao bajjani jaahuanacue!” acue! —jamaya Esaohua oja chii aca poa.

—Chojja, Esao. Yahuaño eya jamaya miminaje Eyacuiñajji nijje mique chahuaño, mijo pojjeama. Apoa —oja chiiya jama saja'ameya aca poa.

Jamajjeya Esao cajaa aca poa cojjasobo jayojja jama epojji pojjeama.

Jamajjeya Esao pa neineinaje, quea yeno nee nee poanaje oya chiija aquiana mesena'yo sajo. Jamatii oja chii ma ohua yahuaño esohui huohui ca poajo pajepajea'yo ajja poa pea esohui ehuohui o'oyajji. Eseyaya eba Esaoja esohui oja chahua nijje, oja chiija aquiana quia ca poa bobi soseje. Jamajjeya oja chiiya oya cojjasobo jayojja pojjeama aca'ya poa.

<sup>18</sup> Yahuaño nei nei pea'ai Eyacuiñajjiya eyiyo Sinai bajjanijo nequiya esohui huohui ca poa; Jodio etiiquiana Moisesi nijje nequi quea mete nee nee poa. E'e, yahuaño Jodio cuana eyiyo huasijje poe majje Sinai eyiyojo nequiñaquia poa. Eyiyo ba cañaquia poa jiji neinei qui. Quea bo moo eyiyo biaje nequia poa. Quea huichacha moo, quea misi poa. Quea beni quemo pea'ai poa eyiyo biaje. Pojjeje baa siyoo pea'ai po nequia poa.

<sup>19</sup> Taaa po neinei nequia poa, huaca she'ana quea quemo mia cani jayojja jama shajja'ajja ca poa Eyacuiñajjija emimi. Ma shajja'ajja majje quea mete nee nee poa etiiquiana cuana Eyacuiñajjiyo. Jama taaame aca poa ba'a: —¡Ecuana nijje a'a mimi o'oyajji! —taaa ca poa cuana quea ajjajja nee nee jjejojo.

<sup>20</sup> “¡A'a eyiyo huasijje jaasohuajji!” Eyacuiñajjiya aca poa. “¡A'a aquiana ehune' jaasohua meejji pea'ai! ¡Jaasohuaño ca jahahuejjajecue meiya!” Eyacuiñajjiya aca poa.

<sup>21</sup> Jamajjeya ojjaña tii quea mete nee nee poa. Ba majje etiiquiana Moisesi pea'ai quea ajjajja nee nee poa: —Eya quea mete nee nee jjejojo piopioani —Moisesi poa.

<sup>22</sup> Jjeya ca ca yahuaño jama pojjeama. Miquianaya ca ca Eyacuiñajjiya oja sohui ba mee canijo ja'a quea mete pojji! Miquianaya Eyacuiñajji ba'e yasijje poeyanaje. Ma eba'ejji eyiyo Sioni bajjani jayojja, ma Jenosanena eyacuajo nequi jayojja. Maya Eyacuiñajjija cuiñajji eyacua eyajo. Jomajo Eyacuiñajji ba'e tiitiani, eshe. Ma cuiñajjiyo Eyacuiñajjija esohuidojojji ejjanequichichaqui; quea bihui nee nee, quea huiso nee nee nequi, de. Sicosico meeme ajja, yajja sicome yajji quea huiso nee nee oya aña. <sup>23</sup> Jomajo Eyacuiñajjija epeeji cuana quea bihui nee nee Eyacuiñajji pejeje yani pea'ai ma yahuaño nei nei onijje jjapeequia poa. Eyacuiñajjiya oja bajjani cuana oja esohui etehue'yojo tehue ca poa eyajo. E'e, miquianaya Eyacuiñajji nijje jjapeequiani. Ohuaya ojjaña cuana meshijo ba'e sosequia caje ojjaña ma onaa acanaje soseje. Jomajo, eyajo Eyacuiñajjija epeeji emano'yo cuanaja edojjoshahua cuana yani, ma yahuaño mimishi cuijea ca'ya poa cuana. <sup>24</sup> E'e, miquianaya Jesosa nijje jjapeequiani. Ohuaya ca ca oe eseya esohui eyacua huohui canaje eba'e tiitii mee'yoyji. Esejo mano'yonaje pea'ai. Ojaya ena' cuayaquia

poa esejaya mimishi cuijea'yojji sosejje. Oya Jesosa Adanaja bacua ejja Abeni bajjani jayojja jama pojjeama. Abenija ena' cuayaquiajo oja o'i Eyacuiñajjiya tecuea neinei ca poa echahua mese cuia ca'yajo.

<sup>25</sup> ¡Jamajjeya Eyacuiñajjiya esohui shajja'ajjacue! ¡A'a shajjama' pojji! Yahuajo eyiyo Sinai pejjejo Moisesiya Eyacuiñajjiya esohui huohui majamaja ca poa etiiquianaja eshajja'ajjajji nisho. Jamatii aje oe shajjama' poa. Jamajjeya Eyacuiñajjiya oya cuana quea nee po mee ca poa. Jjeya Eyacuiñajjiya eyajo nequiya eseya huohui cani oja sohui eyacua, ma esejaya yahuajo shajja'ajja jjima. Shajjama' poajo e'e jojo nei ohuaya eseya quea nee nee po mee caje'yo, de. <sup>26</sup> E'e, yahuajo nei Eyacuiñajjiya eyiyo Sinai biajje sohuihuohui ca poajo, meshi huehuahuehua mee ca poa janobajjima nei. Jjeya oya jama poanaje ba'a: “Eyaya e'e jojo nei meshi, eyatahuatahua pea'ai huehuahuehua meeje'yo janobajjima nei” jamaya Eyacuiñajji poanaje.

<sup>27</sup> Jamajjeya Eyacuiñajjiya jama acajo ba'a: “Meshi, eyatahuatahua pea'ai huehuahuehua meeje'yo” acajo, esejaya eba ohuaya ojjaña oja pana huehuahuehua mee'yo majje chama'yo tii poaje'yo ojjaña aquiana yahuajo oja pana'yo. Ojjaña aquiana eyacua ehuehuahuehua'yojji pojjeama anije'yo tii tii.

<sup>28</sup> Eyacuiñajji ojjaña huoojea'yojji poani tii tii. Chama' o jeabichajjea'yojji epojji. Ese huoojea'yojji poani tii tii oya. Jamajjeya Eyacuiñajji ejjabihuaqui jama ba'a: —Jamaya Eyacuiñajji, miya quea pame nee nee poani tii. Miya ecuana huoojea'yojji quea ca'a nee nee.

E'e, ¡Eyacuiñajjiya esohui jayojja jama eba'e tii tii! ¡Oya ejjashajja'ajja tiitiiqui! ¡Quea mete epo tii tii; shajjama' pojjeama epo! <sup>29</sup> ¡Ojo ejjashahuabaqui! Jiquio ecua cuaquijo quiyo jeajea jeyojeyo yani jayojja jama Eyacuiñajjiya shajjama' cuana quea nee nee po mee caje'yo, de.

## 13

### *¡Jesosaja epeeji poanijo ba'ecue quea pame Eyacuiñajjiya quea boti nee e'ajji!*

<sup>1</sup> Ecuea epeeji cuana, ¡pea cuana Jesosaja epeeji pea'ai poanijo quea jea nee nee atiitiicue huapa pojjeama jama! <sup>2</sup> ¡Pea cuana miquianajaya ba jjima quea jea acue! ¡Equi yasijje poeyajo quea pame nee acue pea'ai! ¡Miquianajaya equi yasijje iyaacue! Yahuajo beca cuana jama poanijo esohuidojojji jaahuana ca poa, jamatii oya ojaya cuana ba jjima esohuidojojji poa. Jjashahuabaquia poa jama ba'a: —E'e, jiquio dejja cuana ecuea ba jjima eyaya bobiaje —esohuidojojji pojjeama poso aca poa.

<sup>3</sup> ¡Cuanaya baquicue Jesosaja epeeji joya ejeanobiajea jaa cuana! ¡A'a oya cuana pajea'yojji! ¡Jjashahuabaquicue jama ba'a: —Eya ona jayojja jama ejeanobiajea jaa jjemo quea shoe, quea yeno pome. Jamajjeya eyaya oya cuana baquije, bobi quiaje, onijje jjapeequije —pocue!

¡A'a pajea'yojji Jesosaja epeeji quea nee poani onaa napa cajo pea'ai! ¡Jjashahuabaquicue jama ba'a: —Onaa napa cajje eya quea nee pome, eya quea yeno pome. Jamajjeya eyaya oya cuana baquije quea bihui epojji. Ona nijje jjapeequije. Eyacuiñajji nijje mimije onajo pea'ai —pocue! ¡Jamajjeya oya cuana baquicue, ona nijje jjapeequicue!

<sup>4</sup> Jjashahuabaquicue jama ba'a: ¡A'a jjacojjoquijji! Yahueya, ¡miquea ehuanase oe nei jaahuanacue! ¡Onijje tii jaacue! Ojjañaja eba jamaya quea pame nee. Jamajjeya ¡a'a quea mimishi pojji! ¡A'a pea cojjojji pojji yahue, ehuanase pea'ai! Jama poajoya Eyacuiñajjiya e'e jojo nei miquianaya tecuea neinei majje quea nee nee po mee caje'yo.

<sup>5</sup> ¡A'a quea aquiana jea pojji! Eyacuiñajjiya eseya jama acanaje ba'a: “Eyaya miya epajea'yojji pojjeama nei nei. Eyaya miya ejeana'yojji pojjeama” poanaje.

<sup>6</sup> Jamajjeya miquea aquiana eba'e meeji yanijo ¡quea bei pocue! Esohui yahuajo etehue'yo jayojja jama mimicue jama ba'a:

“Eyacuiñajjiya, Emeshi Mese neiya eya jaahuana cani tii tii. Jamajjeya eya mete'ama poani. Dejja mimishi cuaa eya ejeabichajea'yojji pojjeama. Eyacuiñajjiya eya ejaahuana pajea'yojji pojjeama”.  
¡Jamaya mimi majamajacue!

*¡Jjapee tiitiqicue Jesosa nijje!*

<sup>7</sup> ¡A'a pajea'yojji Eyacuiñajjiya esohui huohuijji, yahuajo miquiana sohui huohuijji poa! ¡Jjashahuabaquicue oya cuana quea ja'a nee ba'enaje Jesosa nijje jjapeequianijo! Mano'ya poa Jesusaja epeeji nei. ¡O jayojjaya Jesosa nijje jjapee neineiquicue! <sup>8</sup> E'e, Jesosa Quito oja sohui jayojja jama poani, pajea'yo ajja tii tii. Ojaya ejjashahuabaquijji yahuajo nei jayojjaya nei acani tii. Quijje nei jamaya atiitii caje'yo pea'ai. <sup>9</sup> Jamajjeya ¡peapea ehuohui'yo Jesusaja esohui e'e nei jayojja jama pojjeama a'a shajja'ajjajji! Pea ehuohui'yo shajja'ajja majje o jayojja mimishi mi po'yo chana'. Eyacuiñajjiya eseya quea jea nee nee acanijo esohui e'e nei ba meesahua cani Jesusaja epeeji quea ca'a nee epojji. Pea cuaa ca ca shajja'ajjacani esohui quea quehua bobijo jama ba'a: —¡Beca bobi a'a ijjiijji Jesusaja epeeji nei epojji! —acani Jodio etii cuaa.

Ma esohui shajja'ajja cani cuaa eshajja'ajjajajji, de. Bobijo pojjeama Jesusaja epeeji nei poaje; ojaya esohui ba neinei majje.

<sup>10</sup> Ecuea epeeji cuana, yahuajo nei nei Jodio etiiquianaja Eyacuiñajji nijje emimijji cuaa, ma Eyacuiñajjiya daqui equijo chachacoaninajeya aquiana ehuone' dahua majje ijji ca poa. Jamatii Eyacuiñajjiya esohui eyacua ba mee jjima poa. Eyacuiñajjiya esohui eyacua bobi jayojja. Ojaya epeeji poanijo, ohuaya eseya oja esohui jayojja jama po mee cani, ma esohui bobi e'ijjiijji jayojja ba meesahua cani.

<sup>11</sup> Yahuajo nei Eyacuiñajji nijje emimijji etiiya aquiana na' dojobiaqui caninaje Eyacuiñajjiya equi yasijje, equecuayijji biso nei yasijje. Ojjaña shequiajajo oe dojobiaquime acaninaje ijjiacajji ehuone na'. Dojobiaqui majje jeasijjea caninaje Eyacuiñajjiya ebajji. Jeasijjea caninaje Eyacuiñajjiya etiiquianaja mimishi ecuijea'yojji sosejje. Ma aquiana etiiquianaja ijji jjima poa. Chojja. Dojocuayaqui caninaje cuiñajji esecue yasijje edahuajea'yojji. <sup>12</sup> Oya jayojja Jesosa mano'yajo ojaya ena' cuayaquia poa esejaya mimishi cuijea'yojji sosejje, mimishi'ama nei nei epo mee'yojji. Dejja mimishi cuaa oya dojobiaquime ca poa cuiñajji esecue yasijje equecua'yojji. <sup>13</sup> E'e, dejja mimishi cuaa oya quea tai aca poa. Jamatii Jesosa jjashahuabaqui jjima jama ba'a: —Chojja, eya acui ecueata'apeejo mano sa po'yo ajja —jama po jjimaya Jesosa. Jama poanaje ba'a: —Eya manoj'e'yo acui ecueata'apeejo mimishi sosequia'yojji —Jesosa poanaje.

Jamajjeya Jesosa jayojja jama epo tiitiijji. Jesosa nijje jjapeequianijo, mimishi cuaa eseya quea tai acajje jamatii Jesosa nijje ejjapee tiitiiqui. <sup>14</sup> Eseyaya eba jiquio meshijo eba'e tiitiijji pojjeama. Meshi esejaya eba'e tiijji yajji pojjeama. Quijje ca ca eseya ba'e tiitiije'yo eba'e'jji eyacuajo Jesosa nijje. Ma eba'e'jji eyacuajo eseya jjashahuabaquiani. <sup>15</sup> Jamajjeya Jesusaja epeeji poanijo ¡Eyacuiñajji ejjabihuia tiitiiqui! Jama ba'a: —Eyacuiñajji, miya quea pame nee nee. Pea chama' mi jayojja —ejja'a tiitiiqui.

Jesosa Eyacuiñajji nijje mimiani ese cuanajo. Jamajjeya eseyaya oya bihuiaña jama ba'a: —Jesosa, miya ecuanaja Emeshi Mese nei quea pame nee —oya bihuiaña.

<sup>16</sup> ¡Pea cuana quea pame nee atiitiicue pea'ai! ¡Nishehui'ama pocue, dejja tai'ama pocue! ¡A'a pajea'yojji! Jamaya poanijo Eyacuiñajji quea bhui nee poaje miquiana nijje.

<sup>17</sup> ¡Jesusaja epeeji jaahuanajji cuanaja esohui jayojja jama acue! ¡Shajja'ajjacue, miquianaaya! Quijje Eyacuiñajji cojja nei nequiya emeshi meseya, mi jaahuanajjiya huohui caje achajja miquianaya jaahuana canaje. Jamajjeya miquianaya jaahuana cani quea pame nee, Jesosa nijje ejjapee pajeaqui'yojji pojjeama. Miquiaa shajja'ajjajje ohuaya miya quea bhui nee ba'e meesahua caje'yo. Shajjama' poajo ca ca quea yeno nee poaje. Miquianaya quea yeno nee nee poaje pea'ai.

<sup>18</sup> Epeeji cuana, ¡Eyacuiñajji nijje mimicue ecuanajo! Eyacuiñajjiya eba ecua quea ja'a nee ba'e sa poani tii tii ojo. Ecuanaya jjabaquiani quea ja'a nee ba'yani ojaya esohui

jama. <sup>19</sup> Jamajjeya ꞑecuanajo mimicue Eyacuiñajji nijje jama ba'a: —Eyacuiñajji, ¡Pabo poe meesahua o'oyacue ecuana baa! ¡Jjeya nei oe poe meesahuacue! —acue!

*Esohui quijjeyje nei tehue'yo*

<sup>20</sup> Ecuea epeeji cuana, esejaya Emeshi Mese nei Jesosa oja epeeji cuana jaahuanajji poani, ñajjajja jaahuanajji nei nei jayojja oya poani. Mano'yajo, Eyacuiñajjiya Jesosa shequi mee ca o'oyanaje. Jamajjeya Jesosa shequi mee'yo majje Eyacuiñajji jama poanaje ba'a: —Ecuea Ebacua Ejja miquianajo mano'yonajejo, ojaya ena' cuayaquinajejo, ¡jjeya ecuea esohui eyacua jayojja jama atiitiicue! Jamajjeya miquianaya ba'e tiitii meeje'yo enijje eyajo —Eyacuiñajji poanaje.

<sup>21</sup> Miquianajo eya Eyacuiñajji nijje mimiani jama ba'a: —Eyacuiñajji, ¡miquea epeeji cuana ejjaba'echejjequi ba'eca cuana quea bei ba'e meesahuacue! ¡Chaco meesahuacue mijo quea pame nee nee! ¡Miquea ejjashahuabaquijji jayojja jama ameesahuacue pea'ai! Miquea Ebacua Ejja Jesosa Quito nijje jjapeequianijo, ¡jamaya ameesahuacue Jesosa quea bihui nee epojji! ¡Oya quea ca'a nee nee quea pame nee caba'e tiitii'yahua! Jamaya Eyacuiñajji —eya poani.

<sup>22</sup> Ecuea epeeji cuana, eyaya jiquio esohui tehueña miquiana quea bihui pojji. Eyaya oe pojji esohui tehueña. Jamajjeya ꞑecuea esohui shajja'ajja neineicue quea bihui nee!

<sup>23</sup> Eseyaya epeeji Timoteo ejeanobia jaa poa. Cuayaqui mee ca'yonaje. Quijje pishana oya e que poe'yo majje enijje poquije miquiana baa.

<sup>24</sup> Jamajjeya epeeji cuana, miquianajaya esohui huohuijji cuana ojjaña Eyacuiñajjiya epeeji cuana miquiana nijje ba'e pea'ai ꞑecuanaja esohui huohuicue jama ba'a: — ¡Achajja acuae nequiana ani so'o? —acue ecuanaja ebajji!

Ojjaña Eyacuiñajjiya epeeji cuana Itania meshijje poe miquianajo jjashahuabaquiani: — ¡Achajja ami ani so'o? —huohui'ajjame acani ojaya ebajji.

<sup>25</sup> ¡Eyacuiñajjiya, esejaya Chii aiya miquianaya cajaanuana cahua quea pame nee! Mahuiso ecuea esohui. Eyaya Pabo bajjaniya esohui tehuejeyonaje. Apoa.

## SATIACOJA ESOHUI ETEHUE'YO SANTIAGO

*Satiacohua esohui quea bihui nee tehue canaje Jesusaja epeeji cuana huasijje*

<sup>1</sup> Epeeji cuana, eyaya jiquio esohui quea bihui nee tehueaña miqúanajaya ebajji, ma ojjaña Jesusaja epeeji cuana ojjaña meshijo ba'eja ebajji. Eya Satiaco bajjani. Eyacuiñajjiya, esejaya Emeshi Mese nei Jesosa Quitohua pea'aiya eya huoojea canaje ojaya esohui huohuiya. Jamajjeya eyaya quea bihui nee chacoaña onijje.

*Eyacuiñajjiya Jesusaja epeeji cuana jjabahuejja meequi cani*

<sup>2</sup> Ecuea epeeji cuana, ¡shajja'ajjacue mo! Miquíanajaya eba'ejji quea camaja poanijo, jamatii ¡a'a quea yeno pojji! Chojja, quea bihui nee pocue jama ba'a: —E'e, Eyacuiñajjiya quea pame nee acani. Ohuaya eya jjashahuabaqui mee cani.

<sup>3</sup> E'e, miqúanajaya eba jama ba'a: Eba'ejji quea camaja poanijo Eyacuiñajjiya eseya jjashahuabaqui mee cani Jesosa Quito nijje quea pame nee ejjapeequijji. Jamajjeya miqúanaya yeno'ama Jesosa nijje jjapee tiitiquije'yo quea ja'a nee nee. <sup>4</sup> ¡Jesusaja epeeji quea ja'a nee po tiitiicue! ¡E'e jojo nei pocue! Jamajjeya Jesusajo jjashahuaba tiitiquianijo Eyacuiñajjiya miqúanaya quea ja'a nee ba'e mee caje mimishi'ama, apoa epo jayojja pea'ai.

<sup>5</sup> E'e pojja'a miqúanajaya ba jjima Eyacuiñajjiyo eba'ejji. Jamajjeya ¡Eyacuiñajji nijje mimicue ojaya ejjashahuabaqui'yojji ebajji! Ojaya miya etecueajji pojjeama. Miya quea jjashahuabaqui ja'a po mee caje, o jayojjaya. Joya ecua miyaya huohui'ajjaña jama saja'ameya aje mi acaje'yo quea bihui nee nee ojjaña cuana ojaya quea jea nee neejo. <sup>6</sup> Jamatii Eyacuiñajji nijje mimianijo jjashahuabaquicue quea pame nee! Jama ba'a: —Jiquio ecua eya onijje mimiani jamaya acaje'yo e'e jojo nei Eyacuiñajjiya.

A'a jjashahuaba taiquijji jama ba'a: —E'e pojja'a jiquio ecua eya onijje miminaje jamaya Eyacuiñajjiya e'ajji pojjeama.

¡Bacue! Joya quea jjashahuabaqui tai poani enashajo poani jama. Jiquio ecua beniya enashajo dojo cani oe miji yasijje, quijje pea miji yasijje dojo ca o'oyani jamaya oya cuana Jesusajo quea ja'a jjashahuabaqui jjima. Peapea jjashahuabaquime oya cuana poani. <sup>7</sup> Jamaya jjashahuabaquianijo quea tai; Eyacuiñajjiya oya cuana shajja'ajja jjima jayojja jama acaje. Jamajjeya jamaya jjashahuabaquianijo ¡a'a jama pojji ba'a: —Eyacuiñajjiya ma e onijje miminaje shajja'ajja cani. Eya ba'e meesahua caje pea'ai —a'a jamaya e'a caje poso jjabaquijji! Eyacuiñajjiya eshajja'ajjajji pojjeama miya. <sup>8</sup> E'e, Jesusajo quea quehua jjashahuabaqui majje quea pame eba'ejji pojjeama tii tii.

*Aema' cuana joya ecua quea aquiana huiso jama*

<sup>9</sup> Jesusaja epeeji aema' cuana, dejja etii pojjeama pea'ai quea bihui nee capoahua Eyacuiñajjiya oja mimishi cuana cuijea ca'yonajejo. Oya ba cani epeeji quea aquiana huiso jayojja, oya jayojjaya ba cani. <sup>10</sup> Jesusaja epeeji quea aquiana huiso quea bihui nee capoahua pea'ai, jamatii ojaya aquiana cuana chama' poajo. Joya quea aquiana huiso shasha jama. Nequi tiitii ajja. Chama'yo tii poaje'yo. <sup>11</sup> E'e, jiquio ecua eshequi jaasohuajo quea quiyo nee nee poajo sipone joca'yani, yaa'yo majje ojaya shasha jjahua'amaqui yani, majoya aje huojojjeani jama jayojjaya joya aquiana huisohuiso cuana poani. Aquiana cuana chicha majamaja cani tii oya cuana manaje'yo, chama'yo tii poaje'yo. Jamajjeya ojjaña Jesusaja epeeji cuana quea bihui nee capoahua Eyacuiñajjiya oya ba cani pea cuana jayojjaya. E'e, aema' cuana Eyacuiñajjiya ba cani pea cuana jayojjaya, joya quea aquiana huiso nee jayojjaya. Joya quea aquiana huiso ca ca ohuaya ba cani aema' jayojjaya.

*Eba'ejji quea camaja*



<sup>12</sup> Jesosaja epeeji quea pame nee eshahuaa iyaa cajje jjashajja'ajjaqui ajja poaje; quea mimishi po sa po'yo ajja poaje. Ohuaya Eyacuiñajjiya esohui jayojja jama atiitii cani. Jamajjeya joya cuana quea bihui nee nee capoahua! E'e, Eyacuiñajjiya huohui ca poa jama ba'a: —Eya ojaya quea jea nee nee poanijo, ecuea epeeji cuana ecuea esohui pajea'yo ajjajo eyaya oya cuana ba'e tiitii meeje'yo enijje eyajo.

<sup>13</sup> Mimishi amajje, quea tai jjashahuabaqui majje pea'ai beca cuana sijje poani jama ba'a: —Eyacuiñajjiya eya quea mimishi po mee cani —jama ohua acani posoya jjabaquiani.

Chojja, de. Ma miyame tii ca mi ca quea mimishi. Eyacuiñajjiya ca ca mimishi a'ajja nei nei. Jamajjeya ohuaya eseya quea mimishi epo meeji pojjeama nei nei. <sup>14</sup> Ojjaña aje oe quea mimishi po sa poanijo quea mimishi poani ojaya ejjashahuabaqui'yojjijo. Joya ecua oya jjashahuabaquiani jama quea mimishi po meeya poani. <sup>15</sup> Jamajjeya quea mimishi jjashahuabaqui majje mimishi acaje'yo. Mimishi amajje manojje'yo. Majoya Eyacuiñajjiya mimishi cuana quea nee nee po mee caje'yo tii tii quea mimishi poanaje jjoya.

<sup>16</sup> Ecuea epeeji cuana, ¡shajja'ajjacue mo oe! ¡A'a quea quehua jjashahuabaquiji Eyacuiñajjiyo! Ohuaya ca ca oe eseya quea ja'a nee po meesahua cani. <sup>17</sup> Ohuaya, eseya Chii aya yahuajo nei nei ojjaña aquiana eyajo nequi pana ca poa: eshequi, ba'i, majameta cuana pea'ai pana ca poa. Oya cuana quijje quea misi poaje'yo. Eyacuiñajji ca ca oe, chojja. Jiquio ecua oya jjeya nei nequi jama tii tiya nequi tiitii poquije. Ohuaya eseya quea pame nee nee acani. Jamajjeya ohuaya eseya ojjaña aquiana pame quia cani e'e jojo nei. <sup>18</sup> E'e, Eyacuiñajjiya ojjaña eseya babaca canaje ojaya epeeji nei epojji. Ohuaya esohui e'e nei huoojea canaje esejaya ebajji. Jamajjeya eseya Jesosa nijje jjapeequi meesahua cani. Eseyca ca ca ojaya quea boti nee nee poani; pea aquiana cuana oja pana ojaya iye botiboti poani.

*¡Eyacuiñajjiya esohui shajja'ajjacue e'e jojo nei!*

<sup>19</sup> Ecuea epeeji cuana, ¡shajja'ajjacue mo oe! ¡Ojjaña pojajajo Eyacuiñajjiya esohuiyo jjashajja'ajjaquicue! ¡Mimi jjimahuaajo quea ja'a nee jjashahuabaquicue pea'ai! ¡A'a quea quene pojji; pea cuana nijje a'a quenequene cuajjiji! <sup>20</sup> Quea quene poanijo Eyacuiñajjiya ejjashahuabaquiji quea ja'a nee jayojja jama yajji pojjeama. <sup>21</sup> Jamajjeya ¡a'a quea quene pojji! ¡Ojjaña ejjashahuabaquiji quea tai epojji, quea mimishi pajea'yocue! ¡A'a pea cuana jama ba'ejji! Eyacuiñajjiya eseya ojaya esohui ba meesahua cani. ¡Ojaya esohui shajja'ajjacue; jamaya ba'ecue quea bihui nee! Jamajjeya ohuaya eseya ba'e tiitii mee caje'yo onijje eyajo. <sup>22</sup> Eyacuiñajjiya esohui shajja'ajja majje jamaya po ajjajo miqianaya quea tai jjashahuabaquiani, quea quehua poani. ¡Eyacuiñajjiya esohui shajja'ajja majje ca oe shajja'ajja tiitiicueya!

<sup>23</sup> E'e, beca cuana Eyacuiñajjiya esohui shajja'ajja majje jamatii jjashajja'ajjaqui ajja poani. Jiquio ecua se ecojjabajjiyo jjacojjabaquiani jama poani: <sup>24</sup> Eseyca ecojja ba majje poquiani. Quijje pishana seya ecojja pajecuaji yaña: —¿Achajja shai ecuea ecojja poanaje? —se poani.

E'e, ecojja ba majje pajecuaji yaña jama jayojjaya beca cuana poani. Eyacuiñajjiya esohui quea pame nee shajja'ajja cani. Jamatii shajja'ajja majje pajecuaji ca'yani. Esohui jayojja jama ba'e ajja. <sup>25</sup> Pea cuana ca ca esohui shajja'ajja majje jjashahuaba neineiquiani. Pajeapajea'yo ajja poani. Jamajjeya ojjaña pojajajo esohui ba neinei cani; pajeapajea'yo ajjajo ma esohui jayojja jama po tiitiani. Eyacuiñajjiya oya cuana mimishi pajea meesahua ca'yani. Quea ja'a nee nee ba'e meesahua cani, quea bihui nee po mee cani pea'ai joya ojaya esohui jayojja jama ba'yanijo. <sup>26</sup> Beca cuana aje oe jjashahuabaquiani jama ba'a: —Eya Jesosa Quitoja epeeji poani —jama posoya jjabaquiani. Jamatii quea mimishi, quea mimijjequijea mimi tiitianiyo oya cuana Jesosa Quitoja epeeji pojjeama. Chojja, epeeji nisho poani.

<sup>27</sup> Eyacuiñajji esejaya Chii ai jama poanaje ba'a: —¡Ecuea epeeji e'e nei cuaa e'e jojo nei enijje jjapeequianiya quea pame nee ca'a cahua! Jama ba'a: ¡Esho'i echii mano'yo catii mee cahua quea pame nee! ¡Epona e'ahuemano quea yeno poani caba'e meesahua cahua quea pame nee pea'ai! ¡Eshahuaja epeeji quea mimishi jayojja jama a'a pojji! —acanjaje esejaya Chii aiya.

## 2

*¡Ojjaña cuana quea boti nee acue!*

<sup>1</sup> Ecuea epeeji cuana, ¡shajja'ajjacue mo oe! Eseyaya Emeshi Mese nei Jesosa Quito quea pame nee nee poani, quea ca'a nee nee poani pea'ai. Miquianaya onijje jjapeequianijo, jamaya pocue ba'a: ¡Ojjaña Jesusaja epeeji cuana pea jayojjaya acue! Jamajjeya ¡quea pame jjashahuabaquicue ojjañajo, aquianajji, aquianama' cuanajo pea'ai! <sup>2</sup> Jama ba'a: E'e pojja'a Jesusaja epeeji aquianajji Eyacuiñajji equi yasijje dobiqiani. Ojaya eme' bajji mei huo'o quea nahue, ojaya daqui quea nahue ehusho ba'e pea'ai miquianaaya baña. Majoya pea epeeji aema', daqui chijji Eyacuiñajji equi yasijje dobiqiani. <sup>3</sup> Miquianaya quea mimishi jjashahuabaquiani. Jamajjeya joya quea aquiana huiso nee quea boti añña jama ba'a: —Ma'aje, jiquio e'anioqueji quea pame nee. ¡jiquiojo anioquecuel! —añña.

Aema' nijje ca ca miquianaya jama poani ba'a: —¡Comajo tii ca miña nequicue! ¡Quea huesha anioquecuel pojja'a! —jamaya miquiaa ajje aema' cuana quea bicho poani. Jamaya quea tai.

<sup>4</sup> Miquianaya peaja aquianajo jjashahuabaquiani; jjaniñebaquiani jama ba'a: —Joya quea aquiana huiso quea pame poani. Aema' ca ca quea tai, cajaa —jamaya miquianaya quea tai jjashahuabaquiani.

<sup>5</sup> Ecuea epeeji cuana, ¡shajja'ajjacue mo oe! Eyacuiñajjiya Jesusaja epeeji cuana aema' cuana babaca canaje Jesusaja epeeji nei cuana epojji. Ohuaya huohui canaje jama ba'a: —Ojjaña joya ecuea esohui jayojja jama acani enijje nequi meeje eya ojjaña huooejji poaje —jamaya Eyacuiñajjiya huohui ca poa ojjaña joya Jesosa quea boti nee ajji poani.

<sup>6</sup> Jamatii miquiaaya aje oe aema' cuana quea bicho po meeña. ¿Ache dejja cuaa shai sohuinano huoojea cani mi dojhua emeshi meseja etecueajji? ¿A'a aema' cuaa? Chojja. Bejjojjiya ca mi ca miquianaya napa mee cani. <sup>7</sup> Ohuaya Jesosa Quito niñeba cani pea'ai. E'e, oya Jesosa Quito quea pame nee nee Eyacuiñajjiya huoojea canaje ese jaahuanaa. Jamatii mimishi cuaa oya niñeba cani.

<sup>8</sup> ¡Miquianaaya Eyacuiñajjiya esohui jayojja jama acue! Yahujajo ohuaya huohui ca poa jama ba'a: —Miya quea bhui nee ba'e sa poani. Jamajjeya ¡pea cuana quea bhui nee ba'e meesahuacue quea pame nee pea'ai! Jamajjeya ¡ojjaña cuana quea boti nee acue!

Jamaya e'e jojo nei añajo miquianaya quea pame nee poani. <sup>9</sup> Jamatii miquianaaya aje oe dejja quea aquiana huiso nee cuana quea jea añña. Aema' cuana ca ca quea bicho po meeña. Jamaya quea mimishi, Eyacuiñajjiya esohui jayojja jama pojjeama. Jamajjeya ohuaya miquianaya tecuea caje'yo ojaya esohui jayojja mi añajo, ma etiquiana Moisesiya tehue ca poa jayojja jama miya mi ajo. <sup>10</sup> Moisesiya etehue'yo quea huiso nee poa. Ojaya esohui etehue'yo oe nei ajjimajo miya shajjama' poani, ojjaña ojaya esohui etehue'yo ajjima amajje. <sup>11</sup> E'e, Eyacuiñajjiya Moisesi tehue mee ca poa jama ba'a: “¡A'a pea cojjojji pojji!” Ohuaya tehue mee ca poa jama pea'ai ba'a: “¡A'a pea quecua'yojji!” Jamajjeya joya pea quecua'yojji poani quea tai nee nee poani, jamatii pea cojjojji pojjeama poani. Eyacuiñajjiya esohui etehue'yo pajea ca'yani.

<sup>12</sup> Jamatii Jesusaja esohui jayojja jama añajo ca ca eseya mimishi'ama poani. Ma esohui jayojja jama añajo Eyacuiñajjiya eseya etecueajji pojjeama. Jamajjeya ¡Jesusaja esohui jayojja jama atitiicue quea pame nee! <sup>13</sup> Quijje Eyacuiñajjiya ojjaña cuana sosequia caje'yo ma ecua oya jiquio meshijo ba'enaje jama sosequia'yomeya acaje'yo. Ojjaña joya pea cuana nijje quea bei poanaje Eyacuiñajji onijje quea bei poaje pea'ai. Joya pea cuana nijje quea bei pojjeama poanaje ca ca Eyacuiñajjiya tecuea caje'yo. Jamatii Eyacuiñajji

quea mase pojjeama. Ohuaya ojjaña mimishi cuana pajea mee'yo sa acani, quea nee nee ese po mee sa po'yo ajja.

*Jesosaja epeeji cuana quea pame caba'e ca'yahual!*

<sup>14</sup> Ecuea epeeji cuana, ¡shajja'ajjacue mo oe! Beca cuana jama poani ba'a: —Eya quea pame nee nee, eya Jesosaja esohui jayojja jama poani —poso jjabaquiani.

Jamatii oya cuana Jesosaja epeeji pojjeama jayojja jama ba'yani, quea pame pojjeama. Jamajjeya ¿a'a Eyacuiñajjiya ojaya mimishi cuijea caje'yo? ¿A'a onijje ba'e tiitii mee caje'yo eyajo? Chojja de, ¡quea pame ca'a cahua pea'ai! Quea pame pojjeama ba'yanijo ca se ca oe emimijeajji eseya mimijeani jama ba'a: —Eya Jesosaja epeeji poani.

<sup>15</sup> Jamajjeya jama jjashahuabaquime pocue ba'a: Yani pojja'a Jesosaja epeeji cuana beshahua nei daquima', quea shoe pea'ai pojja'a. <sup>16</sup> Joya aema' cuana pojja'a miquianaaya huohuiaña jama ba'a: —¡Quea bihui nee pocue! ¡Huoe'ama, quea jeje pocue! —jamaya pojja'a miquianaaya oya ña. Jamatii quea dejja taiya jjejojo miyaya bobi, daqui pea'ai mi quiaña. Jamaya po ajjajo ehuhuijajji miquianaaya aema' huohuiaña jama ba'a: —¡Quea bihui, quea jeje pocue; huoe'ama pocue pea'ai!

<sup>17</sup> Oya jayojjaya beca cuana poani: —Eya Jesosaja epeeji poani.

Jamatii Jesosaja esohui jayojja jama mi acanijo oya Jesosaja epeeji nei pojjeama.

<sup>18</sup> Onaya jjamimicuijaje nobiajjeaquiani jama ba'a: —Eya Jesosaja epeeji. Eyacuiñajjiya esohui ecuea eba.

Pea ca ca jama poani ba'a: —Eyaya Eyacuiñajjiya esohui jayojja jama atiitiaña.

Eyaya ca ca huohuiaña jama ba'a: —Eyacuiñajjiya esohui jayojja jama a'ajjajo eyaya miquianaya baña Jesosaja epeeji pojjeama. Quea pame nee nee Eyacuiñajjiya esohui jayojja jama ñajjo ca ca ojjaña eba eseya Jesosaja epeeji nei poani —jamaya eyaya ña.

<sup>19</sup> Miquianajaya eba Eyacuiñajji oe nei yani tii tii. Jamaya quea pame nee, e'e jojo nei poani. Jamaya eshahua cuanaja eba pea'ai, ma Eyacuiñajji oe nei yani tii tii. Jamajjeya oya cuana quea mete tii tii poani, Eyacuiñajjiya oya cuana quea nee nee po mee caje'yo.

<sup>20</sup> Miquianaya jjashahuabaquiani quea quehua jama ba'a: —Eya Jesosaja epeeji poani.

Jamatii Jesosaja esohui quea pame jayojja jama a'ajja. Jamaya quea tai ba'yanijo miya Jesosaja epeeji pojjeama. Jamajjeya miquianajaya ejjashahuabaquijji eyaya jiquio esohui tehueña esejaya etiquiana Amajamajo. <sup>21</sup> Yahuajo nei nei esejaya etiquiana Amajamaa Eyacuiñajjiya esohui jayojja jama aca poa. Jamajjeya Eyacuiñajjiya oja mimishi cuana cuijea ca'ya poa. E'e, Amajamaa ojaya esohui a'a shajja'ajja caje ebajji Eyacuiñajjiya oya huohui ca poa jama ba'a: “Amajama, ¡miqua eba eba mei e'iyia biajje jeyo majje yacuajecue, eya quiacue!” Amajamaa Eyacuiñajji shajja'ajja ca poa. Oja bacua eja oe nei mei biajje jeyo majje Eyacuiñajji yasijje quia ca poa. Beshahua nei yacua ca'ya poa. Jamaya ojaya esohui ma ecua Eyacuiñajjiya huohui canaje jayojjaya Amajamaa aca poajo, Eyacuiñajjiya oya jama aca poa ba'a: “Amajama, miyaya ecuea esohui shajja'ajjaña ecuea eba miya ecuea epeeji nei. Eyaya miqua mimishi cuana cuijeaje'yo”. Jamaya Eyacuiñajjiya aca poa.

<sup>22</sup> ¿A'a miquianaya jjashahuabaquinaje Amajama Eyacuiñajjiya epeeji e'e jojo nei? E'e. Ohuaya huohui ca poa jama ba'a: —Eya Eyacuiñajjiya epeeji —aca poa.

Majoya ohuaya Eyacuiñajji shajja'ajja ca poa; Eyacuiñajjiya esohui jayojja jama aca poa. Jamajjeya oya e'e jojo nei Eyacuiñajjiya epeeji quea pame nee nee poa. <sup>23</sup> Jamajjeya Eyacuiñajjiya esohui yahuajo nei jama poa ba'a: —Amajamaa huohui ca poa jama ba'a: “Eya Eyacuiñajjiya epeeji” aca poa Amajamaa. Majoya ohuaya Eyacuiñajjiya esohui jayojja jama aca poa pea'ai. Jamajjeya Eyacuiñajji Amajama nijje jama poa ba'a: “Miyaya ecuea epeeji e'e jojo nei. Jamajjeya eyaya miqua mimishi cuana cuijeaje'yo” —jamaya Eyacuiñajji poanaje.

<sup>24</sup> Jamajjeya eseya Eyacuiñajji nijje mimianijo, ojaya esohui jama ñajjo pea'ai, Eyacuiñajjiya esejaya mimishi cuana cuijea ca'yani. Jamaya eyaya miquianaya ba mee yaña.

<sup>25</sup> Oya jayojjaya yahuajo nei nei Shajami poa, Amajama jayojjaya poa. E'e, yahuajo nei nei oe epona Shajami yaña poa. Shajami Jodio pojjeama poa. Oya quea mimishi pea

cojjojji nei nei poa. Jamatii ohuaya Eyacuiñajjiya epeeji quea pame nee aca poa. Nahue ca poa sohuinano cuaa equecuaca'yo poanijje. Jamajjeya Eyacuiñajjiya oja mimishi cuana cuijea ca'ya poa. E'e, Shajamiya Eyacuiñajjiya epeeji becanejjijji pea'ai quehuajje bobia ca poa, Jodio cuanaja esohui huohuijji cuana. Majoya oya cuana quehuajje poqui meesahua ca poa pea ejiojjijje, onaa equecua ca poaje jjejojya. E'e, Shajamija ejjashahuabaquijji Eyacuiñajjiyo quea pame nee poa.

<sup>26</sup> Jamajjeya esejaya eba jama ba'a: Eseyaya edojjoshahua poqui'yo majje esejaya eyami ihuije'yo, cajaa. Oya jayojjaya ojjaña joya Eyacuiñajjiya esohui shajja'ajja majje jjashajja'ajjaqui ajja poani maya Jesosaja epeeji pojjeama, cajaa pea'ai. Ehuohuijeajjiya huohui cani jama ba'a: —Eya Jesosaja epeeji poani.

### 3

<sup>1</sup> Ecuea epeeji cuana, ¡shajja'ajjacue mo oe! Eseyaya quea mimishi poajo, Eyacuiñajjiya tecuea caje'yo. Jamaya miquea eba. Eyacuiñajjiya esohui huohuijji cuana quea mimishi poajo ca ca Eyacuiñajjiya oya cuana tecuea neinei cañaje'yo janobajjima nei. Jamajjeya oe ¡a'a eseyaya quea huiso Eyacuiñajjiya esohui huohuijji po sa pojji!

#### *Beca cuanaja chama' esohui jjochijji*

<sup>2</sup> Ojjaña pojjaajo eseyaya quea mimishi pishana poani. Joya esohui quea mimishi mimi ajja tii tii, mimijjequijjequi'yo ajja poani ca ca ojaya ejjashahuabaquijji quea ja'a nee poani tii. Jamajjeya oya quea pame tii ba'yani. <sup>3</sup> Eseyaya baacui sisi mapichija enaba huasijje huananobiaña ehui jjequijjea poquiajji. Majoya eseyaya mapichi poqui meeaña cua ese poqui sa poaje yasijje. Jamatii baacui enabajo che biso nei ba'yani.

<sup>4</sup> Oya jayojjaya bishe quea quemo quea cuejipashi nei poquiani. Jamatii ebishe meseya bishe quijjo aniya bishe dojo cani cua o poqui sa poaje yasijje, quii ca'a cani, jamatii equiica'ajji biso neiya.

<sup>5</sup> Jiquio ecua bishe quiica'ajjiya bishe ai huijea cani jama jamatii che biso neiya jayojja jama esejaya enaba quea biso, jamatii beca cuana quea huiso esohui quea tecue mimiani. Quea miminaa poani bicho'ama.

¡Jashahuabaquicue cuaquijo pea'ai! Cuaqui cojjasha sisiya quijjo'yo jjimaa ebio quea jabo dahuajea cani, ebio quea quemo. <sup>6</sup> Ma jayojjaya beca cuanaja e'ana quea mimishi mimimimianijo yana cuaqui jayojja jama poani. Jamajjeya jiquio ecua cuaquiya ebio dahua tehuejea cani, acui cuana quea tehue po mee cani jama jayojjaya esohui quea mimishi mimianijo ejjashahuabaquijji quea tai po mee cani. E'e, esho'iquiana quea tai mimiani; tii majje quea tai mimiani pea'ai, quea mimishi. E'e, eshahua cuaa eseyaya quea tai nee nee mimi mee cani. Jamajjeya Eyacuiñajjiya ojjaña joya quea mimishi mimiani quea nee nee po mee caje'yo. <sup>7</sup> ¡Bacue! Eseyaya ojjaña ijjiacajji cuanaja ebacua huoniaña. Ijjiacajji mase cuanaja bacua cuana, cuichoijjiya bacua cuana huoniaña; shaneija bacua cuanaya huoniaña, nahuoo jai besijji cuana pea'ai. Jjabahuonequi meeaña. <sup>8</sup> Jamatii esejaya esohui quea tai, quea tecue ca ca quea mimipanajea epojji chama' esohui jjochijji, ca pea nijje emimijaji pajea'yojji. Jiquio ecua peyoja ese na jama quea nee nee poani jama esohui quea taijoya pea epeeji cuana quea yeno nee nee po mee cani. <sup>9</sup> Eseyaya aje oe Eyacuiñajji, esejaya Chii ai bihuaña esejaya enabaa. Jamatii majoya eseyaya pea cuana nijje mimijajiani, ma Eyacuiñajjiya pana ca poa o jayojja epojji nijjeya eseyaya mimijajiani. Jamaya quea tai. <sup>10</sup> E'e, esohui quea bei, quea pame mimi majje quijje pishana esohui quea tecue nee nee, quea mimishi nee mimiani pea'ai. Ecuea epeeji cuana, ¡a'a oe jamaya pojji! <sup>11</sup> ¡Jashahuabaquicue! Ena teohuejja cajje ena ihui'ama cuayani, sese'ama. Ena sese ena quea pame tejee teohuejja cajje cuaya ajja. Jiquio ecua ena quea pame cuaya majje ena sese cuaya ajja jayojja jama pojjeama esejaya enaba. Esohui quea pame mimi majje esohui quea mimishi mimiani, ena sese jama cuayani esohui. <sup>12</sup> Epeeji cuana, miquea eba jememe acuijo chama' esiye. Jememejo tii ajja esiye. Jjono cuanajo tii ajja acuijjajja, shihuijjajja pea'ai. Oya jayojja meshi eteohuejjajje ena quea pame cuayani; ena sese cuaya ajja. Jamajjeya esohui quea pame mimi majje ¡apiojji acuae nequiana esohui

quea mimishi mimiani, pea cuana niñebaña pea'ai? Jamaya se quea pame pojjeama nee nee.

*Eyacuiñajjiya eseya quea ja'a jjashahuabaqui mee cani*

<sup>13</sup> ¿A'a miqianaya quea ja'a jjashahuabaquiani? ¿A'a jjabahuejjaquinaje quea pame nee eba'eji? Jamajjeya ¿quea pame nee atiitiicue! ¿Tecue'ama pocue! Quea pame nee añajo pea cuaa ba caje miqianajaya ejjashahuabaquiji quea pame nee poani. <sup>14</sup> Pea cuanajo quea quene nee nee jjashahuabaquianijo, quea nishehui, quea dejja tai nee nee poanijo pea'ai ¿quea yeno pocue miqianaja mimishijo! ¿A'a sijje pojji Eyacuiñajji nijje jama ba'a: —Eya quea pame nee ba'yani —a'a jama sijje pomeya pojji! Chojja.

<sup>15</sup> Ojjaña joya quea tecue nee nee, quea nishehui pea'ai poani Eyacuiñajji Edojjoshahua Pame jayojja jama jjashahuabaqui ajja. Chojja. Oya cuana eshahuaja ejjashahuabaquiji jayojja jama poani quea mimijjequiea, quea mimishi. Mimishi cuana Eyacuiñajji esohui jayojja jama po ajja tii tii, Eyacuiñajji epeeji pojjeama. <sup>16</sup> Quea tecue po tiitianiyo, quea nahue po tiitianiyo pea'ai ojjaña peapea mimishi cuana acani tii tii pea'ai. Quea ja'a ba'e ajja. <sup>17</sup> Eyacuiñajji ejjashahuabaquiji quea pame nee nee. Ojaya ejjashahuabaquiji jayojja jama jjashahuabaquianijo eseya mimishi'ama poaje: Quene'ama. Nishehui'ama, dejja tai'ama. Shajjama' pojjeama. Quea bei poaje. Quea pame nee poaje'yo tii tii pea'ai. ¿A'a oe nei dejja quea jea ajji; ojjaña cuana oe quea jea acue! ¿Jesosaja epeeji e'e jojo nei pocue pea'ai, epeeji nisho pojjeama! <sup>18</sup> Jamajjeya ¿quea bei nee ba'ecue! ¿Pea cuana quea bei ba'e meesahuacue pea'ai! E'e, eseye nei quea bei poanijo, quea pame nee poanijo pea'ai, pea cuana quea pame nee poaje ese jayojjaya.

4

*¿Jesosaja epeeji pojjeama jayojja jama a'a ba'eji!*

<sup>1</sup> ¿Apiojji acuae quiana esohui quea tai nee nee mimiani so'o Jesosaja pea epeeji cuana nijje? ¿Apiojji acuae quiana jjamimicuiajea nobiajeaquiani pea'ai? Ecuea eba. Miquianaya quea huiso aquiana jea bañajo quea tecue nee nee poani, quea dejja tai poani pea'ai. <sup>2</sup> Miquianaya ca ca oe quea aquiana huiso po sa poani. Jamatii ejjesheji chamajojo ca ya ca oe mi jjesheaña. Jamajjeya ajeo ejjesheji pojjeamajojo ca ya ca oe pea quecua sa aña e'aquiana mejo'yojji. Onajaya aquiana jea ba majje miqianaya jjamimicuiajea nobiajeaquiani; jjacuiaquiani pea'ai. Jamatii miqianaya Eyacuiñajji nijje mimi ajja jama ba'a: —Eyacuiñajji, ¿che mo ma aquiana jjeshe meesahuacue! —jamaya Eyacuiñajji nijje mimi jjimajojo ca mi ca mi jjeshe meesahua cani aquiana cuana.

<sup>3</sup> Beca cuana aje oe Eyacuiñajji nijje mimiani aquiana sa poanijo. Jamatii ma aquianajo quea nahue nee poanijo ojaya miqianaya ma aquiana equia meeji pojjeama. Aquiana miquea miqueya nei epojji quea tai jjashahuabaquiani. Eyacuiñajji ejjashahuabaquiji jayojja jama a'ajjajo ojaya miya eshajja'ajjaji pojjeama. <sup>4</sup> ¿Bacue! Jiquio ecua ehuanase ojaya yahue boti'ama amajje pea dejja nijje poani jama jayojjaya miqianaya Eyacuiñajji nijje jjapeepajeaqui'yani mimishi cuana nijje ejjapeequi'yojji. Jamajjeya miqianaya Jesosaja epeeji pojjeama cuana nijje jjapee neineiuanijo miqianaaya Eyacuiñajji boti'ama aña. Quea mimishi ba'e sa poanijo Eyacuiñajji quecua'yojji jayojja poani. <sup>5</sup> Eyacuiñajji esohui yahuajo nei nei tehue ca poa cuaa jama ba'a:

“Eyacuiñajjiya ojaya Edojjoshahua Pame ojaya epeeji cuana huasijje huoojea ca'yonaje ojaya eyami yasijje dobiquiya. Edojjoshahua Pameya ojaya epeeji cuana nahue tiitii cani mimishi'ama epojji”.

Jamaya yahuajo nee tehue ca poa. ¿A'a Eyacuiñajjiya ma esohui etehuejajji tehue mee ca poa posoya aña miquiaaya?

<sup>6</sup> Eyacuiñajjiya eseya jaahuana cani quea ja'a nee. Ohuaya eseya ba'e meesahua cani quea pame nee. E'e, ojaya esohui yahuajo nei tehue mee ca poa jama ba'a:

“Eyacuiñajjiya ojjaña joya mimishijo bicho'ama poani, quea quene poani pea'ai jeabichajea cani. Quea yeno nee nee po mee cani pea'ai. Ojjaña quea bei poani, quene'ama poani pea'ai ohuaya ba'e meesahua cani quea pame nee”.

Jamaya yahuaajo nei tehue mee ca poa.

<sup>7</sup> Jamajjeya oe ¡Eyacuiñajjiya esohui jayojja jama pocue! ¡Edosiquiana nei nijje a'a jjapeequijji! ¡A'a oya shajja'ajjajji! ¡Oya huoojeacue! Jamajjeya miquianaya Jesusaja epeeji poanijo Edosiquiana miquiana huoojeajji pojjeama poani. Chojja, jjanequishinaqui majje oya poquije quea huesha nee. <sup>8</sup> ¡Jesusa nijje jjapee neineiquicue! Jamajjeya ohuaya miquianaya jaahuana tiitii caje'yo. ¡Miquea mimishi cuana pajea nei'yocue! ¡Jesusaja epeeji nisho a'a pojji! ¡Ojaya epeeji nei nei oe pocue Eyacuiñajjiya esohui etehue'yo jayojja jama! ¡Quea boejea ba'e neinei'yocue! <sup>9</sup> ¡Miquea mimishijo quea yeno nee pocue! ¡Pa neineicue! ¡Mimishi cuanajo quea bihui jayojja a'a soajji! ¡Mimishi cuana amajje a'a quea bei jayojja pojji! Chojja. <sup>10</sup> Quea tai po majje quea bicho nee nee mimicue Eyacuiñajji nijje jama ba'a: —Eyacuiñajji, jeya mimishi pajea meesahua'yocue! E'e, eya ca'a'ama. ¡Jaahuana neineicue mo oe, quea bei enijje pocue!

Jamaya onijje mimianijo Eyacuiñajjiya miquianaya shajja'ajja caje. Miquianajaya emimi onijje jayojja jama ohuaya acaje.

*¡A'a pea cuanajo maimajji!*

<sup>11</sup> Ecuena epeeji cuana, miquianaya Jesusaja epeeji cuana poani. Jamajjeya ¡Jesusaja pea epeeji cuana a'a niñebajji! Jesusaja epeeji cuana, beca cuana pea epeeji niñeba cani jama ba'a: —Oya Jesusaja epeeji quea pame pojjeama —jamaya acani Eyacuiñajjiya esohui jayojja jama a sa po'yo ajjaa jjejojo.

Jamajjeya ohuaya Eyacuiñajjiya esohui niñeba cani jama ba'a: —Eyacuiñajjiya esohui quea pame pojjeama poani.

Ohuaya Eyacuiñajjiya esohui jayojja jama a'ajja boti'ama jojoya. Jamajjeya oya cuana Eyacuiñajjiya esohui niñebajji poani. <sup>12</sup> ¡Bacue! Eyacuiñajji oe nei ojjaña huoojeajji poani quea pame nee. Oya oe nei quea ja'a nee nee jjashahuabaquiani ojaya epeeji cuanajo. Ohuaya ohuaye nei mimishi cuana cuijea ca'yani. Jamajjeya ohuaya ohuaye nei mimishi cuana quea nee nee po mee caje'yo tii tii. Jamajjeya ¡a'a pea epeeji cuana niñebajji! Miya ca ca Eyacuiñajji jayojja jama pojjeama.

*¡Eyacuiñajjiya ejjashahuabaquijji jayojja jama acue!*

<sup>13</sup> Beca cuana mimiani jama ba'a: —Mecahuajje pojja'a eya poquije pea cuiñajji yasijje. Jocuama eya nequije oe shequiajame. Chacochaco majje ejjesheji quea huiso jjesheje —poani.

<sup>14</sup> ¡Eya shajja'ajjacue! ¿Ae shai poaje mecahuajje? Miquianajaya eba pojjeama. ¿Ache shono manoj'e'yo eseya? Eseyaya ba jjima. ¡Bacue! Eseyaya huoja jama. Jiquio ecua eshequi jaasohua pishanajo huoja jjachamaqui'yani, poquiani jama jayojja miquianaya jiquio meshijo enequi tiitijji pojjeama; ca'a'ama. <sup>15</sup> Jamajjeya jama pocue ba'a: —Eyacuiñajjiya ecuana ba'e meesahua canijo, ecuana ba'eje quea pame nee. Ohuaya ecuana chaco sahua canijo, ecuaaya chacoje ma echacoji.

<sup>16</sup> Jamatii miquianaya bicho'ama mimiani jama ba'a: —Eya jamatii quea pame chacochacoani. Quea pame ba'yani jamatii.

Chojja. Miquianaya emimijeajji mimijeani. Jjashahuabaquiani quea quehua nee nee.

<sup>17</sup> Eyacuiñajjiya ojjaña quea pame nee ameesahua sa acani. Ma ba majje jamatii beca cuana quea pame po sa po'yo ajja. Jamaya poani jjejojya quea mimishi nee nee poani.

## 5

*Dejja quea aquiana huiso niñeshe'ajji*

<sup>1</sup> Quea dejja tai jjejojo ona dasiajji poani, ¡shajja'ajjacue mo oe! Jjeya miquianaya quea aquiana huiso poani. ¡Jamatii quea yeno nee nee pocue, pa neineicue pea'ai! Quijje aje oe quea yeno nee nee poaje, quea camaja nee poaje'yo. Quea nee nee poaje'yo

miquianaya. <sup>2</sup> Miquianajaya aquiana quea nahue cuana shaashaajeaje quea huiso. Mojojea caje. Miquea daqui quea nahue cuana huiñajeaje'yo, machichi aiya ijiahuiñajea caje'yo quiiteteya pea'ai. <sup>3</sup> Miquea aquiana mei huo'o quea nahue cuana, mei oshe quea nahue cuana, bejjo cuana pea'ai seejeaje'yo. Miquea aquiana cuana esee'yo, ehuiñajea'yo ba majje onaaya miya jama acaje ba'a: —Oya quea dejja tai; oya quea nishehui poanaje. Quea aquiana jeaa jjejojo aquiana quea huiso nee nee nahue tiitii canaje.

Miquea ejjeshejji chama'yo tii poaje'yo. Jiquio ecua cuaquijo quiyo'yo majje eseya quea nee nee poani jama jayojja miquea aquiana cuana chama'yo tii poajo miya quea yeno nee nee poaje'yo. Majoya Eyacuiñajjiya miya tecuea caje quea dejja tai poanaje jojoya, aquiana cuana quea huiso nee chicha majje nahuejje poanaje jojoya. <sup>4</sup> E'e, echacojji cuana mique que cuanajo chacocho'yonaje miquea sosequia'yo jjima. Ma echacojji cuana Eyacuiñajji nijje mimiani mijo; huohui cani, sosema' miya chaco mee canaje jjejojo. Onaaya mique que cuanajo bobi sosema' chicha ca'yonaje pea'ai. Majoya oya cuana taaani Eyacuiñajji yasijje mimi majje miquea sosequia'yo jjima jjejojo. Eyacuiñajji quea ca'a nee nee, ojjaña huoojea'yojji nei nei oya poani. Ohuaya echacojji cuana pa ani shajja'ajja canaje. Jamajjeya ohuaya miya tecuea cani quea dejja taijojo. <sup>5</sup> E'e, miyaya aje oe aquiana quea huiso jiquio meshijo chichanaje; miquea yajjijo quea huiso aquiana pame, quea nahue nee pea'ai chichanaje, siinaje pea'ai. Quea aquiana jea nee nee poanaje. Quea bobi huiso nee nee miya poanaje. Jamatii jeje ajja tii tii poanaje. Quea dejja tai poanaje; quea nishehui poanaje epona. Jamajjeya Eyacuiñajjiya miquianaya quea nee nee po mee caje'yo. <sup>6</sup> Miyaya aje oe aema' cuana, joya mimishi'ama quea pame nee poani pea'ai tecueanaje. Oya cuana quecuajejanaje pea'ai. Jamatii oya cuana minijje jjasoseaqui'yo ajja, jeabichajea sa po'yo ajja pea'ai. Eyacuiñajjiya ca ca oe miya quea nee nee po mee caje'yo tii tii ona miya mi sosequiajo. Jamaya eyaya miquianaya aña, edejja tai cuana. Mahuiso.

*¡Eyacuiñajji nijje mimicue eba'e meesahuajji!*

<sup>7</sup> Jamajjeya ecuea epeeji cuana, ¡Jesosaja epoe o'oyajjijo jja'ishoa'ajjaqui nequicue quea bei! Onaaya miquianaya quea mimishi acanijo, ¡jamatii Jesosa nijje jjapee tiiti-iquicue yeno'ama! Eseyaya shijje quecua majje ishoa'ajjaña shijje tii'yajo eso' yajji. Jiquio ecua seya ena ishoa'ajjaña shijje pohua'yojji jama ¡ishoa'ajjameya acue Jesosaja epoe o'oyajjijo! <sup>8</sup> E'e, quijje pishana esejaya Emeshi Mese nei Jesosa poeje o'oya. Jamajjeya oe ¡jjeja quea pame nee onijje jjapee neinei tiiti-iquicue e'e jojo nei!

<sup>9</sup> Ecuea epeeji cuana, ¡a'a Jesosaja pea epeeji cuana niñebajji Eyacuiñajjiya miquianaya etecueajji pojjeama! Poe majje Jesosaa huohui cañaje'yo joya quea pame poanaje; joya quea mimishi poanaje huohui cañaje'yo pea'ai. Jjeyahua nei esejaya Emeshi Mese nei Jesosa chipi nei nequi. Jjeyahua nei pojja'a oya poeje o'oya.

<sup>10</sup> Epeeji cuana, ¡shahuabacue Eyacuiñajjiya esohui huohuijji cuana ma yahuajo nei nei ba'ya poa! Ohuaya esejaya Emeshi Mese neijo huohui ca poa. ¡O jayojjaya jama quea bei pocue! E'e, yahuajo onaaya oya cuana cuia ca poa pea'ai. Jamatii Eyacuiñajji nijje jjapee tiitiqui nequia poa. <sup>11</sup> E'e, oya cuana napa ca poa cuaa quea huiso. Jamatii Eyacuiñajji nijje jjapeequi pajea'yo jjima poa. Jamajjeya eseya jama poani ba'a: —Oya cuana Eyacuiñajjiya epeeji quea bihui neeya poa, ma etiiquiana cuana.

E'e, ¡niñeba'yocue Eyacuiñajjiya epeeji yahuajo nei nei nequia poa etiiquiana! Jobi bojojea'ajja'ya poa; quea nee nee poa. Jamatii Eyacuiñajji nijje jjapeepajeaqui'yo jjima poa. Jamajjeya Eyacuiñajjiya oya quea pame nee aca poa. Jjajea meequi ca'ya poa. Jamaya miquea eba. Eyacuiñajjiya eseya quea jea nee poanijo quea pame nee nee acani, quea bei pea'ai.

<sup>12</sup> ¡Jiquio ecuea pea esohui ba neineicue, epeeji cuana! ¡A'a oe siajje pojji! ¡A'a oe jama pojji ba'a: —Eyacuiñajjiya eya ba canijo, eyaya e'e nei huohuiaña. Ecuea esohui e'e nei pojjeama jojjemo eya Eyacuiñajjiya quea nee po mee ca'yome. Ojjaña eyajo ba'e cuaa eya ba cani, ojjaña meshijo ba'e cuaa eya ba cani pea'ai eyaya e'e nei huohuiaña. Ecuea

esohui e'e nei pojjeama joggemo Edosiquiaa eya quea mano po mee ca'yome —a'a jamaya pojji!

Chojja, jesohui e'e nei huohuicue jama tii tii! Jamajjeya jchaco sa poanijo jama acue ba'a: —E'e, eyaya chaco sa aña —acue! Chacochaco sa po ajjajo jhuohuicue jama ba'a: —Chojja, eya chacochaco sa po'yo ajja —acue! jE'e jojo nei oe huohui poquiacue! jE'e jojo nei jayojja mimianijo Eyacuiñajjiya miya tecuea ca'yo chana'!

*jEyacuiñajji nijje mimicue emanojaa oja ehuaquia mee'yojji!*

<sup>13</sup> jA'a beca cuana quea yeno nee nee yani? Quea yeno po majje jEyacuiñajji nijje camimiahua! jA'a pea cuana quea bihui nee poani? Quea bihui nee po majje jEyacuiñajji cabihua cahua sohuicuayanijo! <sup>14</sup> jA'a emanojaa yani? jEyacuiñajji epeeji etii cuana ca'iyaa cahua! Oya cuana poe majje Eyacuiñajji nijje mimije emanojaa huaquia mee'yojji. Jamajjeya emanojaa bahua shicui caje acuijjajja seiya Jesusaja epeeji poanijo. Majoya Eyacuiñajji nijje mimije emanojaa huaquia'yojji, ejjaajaqui'yojji pea'ai. <sup>15</sup> Eyacuiñajji nijje mimianijo cjjashahuabaquiahua jama ba'a: —Ecuana Eyacuiñajji nijje mimiani emanojaa oja ehuaquia mee'yojji. Ohuaya e'e jojo nei ecuana shajja'ajja caje; emanojaa huaquia mee caje'yo —jamaya capoahua.

Jamaya jjashahuabaquianijo, Eyacuiñajjiya eseya onijje mimiajo shajja'ajja caje; jamaya acaje'yo e'e jojo nei. Emanojaa quea mano poani oja mimishijo, Eyacuiñajjiya oja mimishi cuana cuijea caje'yo pea'ai. <sup>16</sup> Jamajjeya mimishi amajje jquea yeno nee mimicue pea cuana nijje! jMiquea mimishi huohuicue! Jamajjeya Jesusaja pea epeeji cuaa miquiana mimishi apajea meesahua caje'yo. Majoya jmimicue Eyacuiñajji nijje pea cuanajo! Eyacuiñajjiya miquianaya huaquia mee caje'yo. E'e, Jesusaja epeeji mimishi'ama Eyacuiñajji nijje mimi neineiyajo Eyacuiñajjiya oya shajja'ajja caje; jamaya acaje ojo.

<sup>17</sup> Yahuajo nei nei esejaya etiiquiana Enia bajjani ba'ya poa. Oya ese jayojjaya poa. Jamatii oya miminequia poa Eyacuiñajji nijje ena chama' epo mee'yojji. Jamajjeya ena chama' poa beshahua nei ebeca pea pea'ai shequajame. <sup>18</sup> Meshi quea jabo nee nee poajo, Enia Eyacuiñajji nijje mimi o'oya poa ena epo'yojji. Eyacuiñajjiya Enia onijje mimiajo shajja'ajja ca poa; ena quea quemo po mee ca'ya poa. Eso' cuana equecua ani pohua mee ca'ya poa.

<sup>19</sup> Ecuea epeeji cuana, jbacue! Jesusaja epeejiya Eyacuiñajjiya esohui etehue'yo jayojja jama ba'e pajea'yajo, joya quea pame nee ba'e meesahua o'oyacue miquianaaya! Jamajjeya Eyacuiñajjiya esohui jayojja jama acaje o'oya ohuaya. <sup>20</sup> Jamajjeya Jesosa nijje jjapeequi meesahua o'oyañajo, oya cuana cuaqui yasijje epoqui'yojji pojjeama. Eyacuiñajjiya ojaya mimishi quea huiso cuana cuijea caje'yo.

Mahuiso ecuea esohui. Eyaya, Satiacohua esohui tehuenaje. Apoa.



## PENOA ETEHUE'YO EBIONEI 1 PEDRO

*Penohua tehue canaje Jesusaja epeeji yasijje ejjaba'echejjequi ba'eca huasijje*

<sup>1</sup> Eya Peno bajjani. Jesosa Quitohua eya huoojea canaje ojaya esohui huohuiya. Eyaya jiquio esohui tehueña miquiana huasijje, ma Jesusaja epeeji nei cuana huasijje. Miquianaya yahuajo ba'enaje Jodio meshijo. Jesusaja epeeji poanijojo onaaya miquianaya napa canaje. Jamajjeya miquianaya poquinaje quea huiso cuiñajji cuana huasijje, pea meshi cuana huasijje. Ma meshi cuana bajjani yasijje ba'a: Ponito meshi yasijje, Janata meshi yasijje, Capanosia meshi yasijje, Asia meshi yasijje, Bitinia meshi yasijje pea'ai poquinaje miquianaya. <sup>2</sup> Yahuajo nei Eyacuiñajjiya, esejaya Chii eyajo aniya miquianaya babaca canaje ojaya epeeji nei epojji. E'e, yahuajo nei oya miquianajo jjashahuabaquinaje jama ba'a: —Miquianaya ecuea epeeji cuana poaje quijje. Edo-jjoshahua Pameya miquianaya quea pame nee ba'e meesahua caje ecuea esohui jayojja. Jamajjeya miquianaya Jesosa Quitoja esohui shajja'ajjajji poaje. Jesosa Quito manojeyo miquiana quea bojea epo mee'yojji —jamaya Eyacuiñajji jjashahuabaquia poa esejo.

¡Eyacuiñajjiya miquianaya caba'e mee cahua quea pame nee nee! ¡Ohuaya miquianaya quea bei capo mee cahua pea'ai!

*Jesosa Quito jjeya eshe anijo ecuana quea bihui nee nee poani*

<sup>3</sup> ¡Eseyaya Eyacuiñajji ejjabihua tiitiiqui! Oya Jesosa Quitoja Chii. Oya esejaya mimishi cuanajo jjashahuabaqui tiitii ajja. Eseyaya quea jea nee poanijo, Jesosa Quito manojeyo, Eyacuiñajjiya oya shequi mee ca o'oyanaje. Jesosa Quito eshe o'oya poanijo, eseya Jesosa jayojjaya ba'e tiitii mee caje'yo Eyacuiñajjiya. Jamajje jjashahuabaquiani quea bihui nee Jesosa nijje eba'e tiitii'yojji. <sup>4</sup> Aquiana jiquiojo quea pame pishana, ani tiitii'yo ajja; ihui'yo majje chama'yo tii poaje'yo. Quijje ca ca Eyacuiñajjiya eseya ba'e tiitii mee caje'yo quea pame nee eyajo. Jamaya ohuaya huohui canaje. Ohuaya eseya pajeya'yo jjima acaje. <sup>5</sup> Miquianaya jjashahuabaquiani jama ba'a: —Eyacuiñajjiya ojaya esohui etehue'yo jayojja jama acaje'yo.

Jamaya jjashahuabaquianijo, Eyacuiñajjiya miquianaya jaahuana caje. Oya quea ca'a nee nee. Jamajjeya Jesosa Quito poe o'oyajo, Eyacuiñajjiya miquianajo huohui caje jama ba'a: —Miquianaya Jesusaja epeeji cuana poanijo ba'e tiitii mee'yo enijje eyajo.

<sup>6</sup> Jamajjeya ¡quea bihui nee po tiitiicue Eyacuiñajjiya miquianaya ba'e tiitii mee caje'yo jjejojo! E'e pojja'a oe pojji cahui cuanajo quea nee poaje onaaya miquianaya napa cani Jesosa nijje jjapeequianijo. Jamatii. <sup>7</sup> Quea nee poani Jesusaja epeeji poanijo, Eyacuiñajjiya ba caje miquianaya ojaya epeeji nei nei. Jama poani ba'a: Mei huo'o topo majje cuaquijo dahua cani cuaa mei shaa chama'yo epojji. Jamatii mei huo'o quea pame pishana; see'yo majje quea pame pojjeama poaje. Miquianaya ca ca Eyacuiñajjiya quea boti nee nee. Jiquio ecua mei huo'o cuaquijo dahua cani cuaa mei shaa chama'yo epojji jayojja jama onaa miquiana napa cajje Eyacuiñajjiya miquianajaya ejjashahuabaquijji tai chama'yo po mee caje'yo. Jesusaja epeeji e'e nei quea pame nee po mee caje'yo. Jamajjeya ojjaña Eyacuiñajji bihuia caje jama ba'a: —E'e, Jesosa Quitoja epeeji cuana quea pame nee. Jamajjeya ¡Eyacuiñajji ejjabihuaqui, oya ba'e tiitiani quea ca'a nee nee jjejojo!

<sup>8</sup> Jesosa Quito miquianajaya eba pojjeama ecojjaja. Jamatii oya miquianajaya quea boti nee nee. E'e, ojaya miquianajaya ba jjima eyami. Jamatii ojaya esohui jayojja jama poani. Jamajjeya miquianaya quea bihui nee nee poani. Pea cuanaja ba jjima Jesusaja epeeji quea bihui nee nee poani. <sup>9</sup> E'e, Jesosa nijje jjapeequi'yanijo, ohuaya miquianaja mimishi cuana cuijea ca'yonaje; ba'e tiitii mee caje'yo pea'ai, ohuaya.

<sup>10</sup> E'e, jjeya nei ohuaya miqianaya ba'e meesahua cani. Cuanaya ba'e tiitii mee caje'yo. Jamaya Eyacuiñajjiya esohui huohuijji yahuajo nei ba sa poa; jjashahuaba neinei quia poa pea'ai. Ohuaya yahuajo nei huohui ca poa jama ba'a: —Eyacuiñajjiya quijje dejja cuana ba'e tiitii mee caje'yo onijje eyajo —jamaya yahuajo nei aca poa.

<sup>11</sup> Edojjoshahua Pameya yahuajo nei ma esohui huohuijji cuana jjashahuabaqui mee ca poa jama ba'a: —Quijje Eyacuiñajjiya huoojea'yo ojjaña jaahuanajji poeje. Oya quea ca'a nee nee poaje. Jamatii quea nee nee poaje'yo. Quea nee po majje ojjaña quea pame nee ba'e tiitii mee caje'yo eyajo onijje —jamaya Edojjoshahua Pameya oya cuana jjashahuaba meequi ca poa.

Jamajjeya oya cuana jama poa pea'ai ba'a: —¿Ache shono shai oya Eyacuiñajjiya huoojea'yo ojjaña jaahuanajji poeje so'o? ¿Achajja shai ohuaya poe majje acaje'yo? —jamaya poa cuana.

<sup>12</sup> Eyacuiñajjiya ma esohui huohuijji cuana jjashahuaba meequi ca poa jama pea'ai ba'a: —Miqianajaya esohui cuanajo ojjaña cuana quijje nei quea bihui nee poaje. Jamatii jjeya miqianajaya maya ba jjima —jamaya yahuajo nei nei poa.

Jjeya Eyacuiñajjiya Edojjoshahua Pame huoojea canaje esohui huohuijji cuana huasijje Jesosa Quitojo huohui meesahuaa miqiana huasijje. Oya cuana esohui huohuijji esohui, ma yahuajo ba'ya poaja jayojja jama huohui cani. Ma esohui quea pame nee Jesosa Quitojo Eyacuiñajjiya esohuidojojji cuana eyajo nequi ba sa poani pea'ai.

*¡Eyacuiñajjiya esohui jama ba'ecue!*

<sup>13</sup> Jamajjeya jjeya ejjashahuabaquijji quea ja'a jama acue! ¡A'a quea quehua jjashahuabaquijji! Poe o'oya majje Jesosa Quitohua miqianaya ba'e tiitii mee caje'yo eyajo onijje. ¡Jamaya jjashahuaba neinei quicue! <sup>14</sup> ¡Eyacuiñajjiya esohui cuana jayojja jama atiitiecue! Jesosa Quito ba jjimahuajo miqianaya quea mimishi poanaje. ¡Jjeya miqianaya ejjashahuabaquijji quea mimishi yahuajo jama a'a pojji! <sup>15</sup> ¡Jjeya ca oe quea pame nee pocue! Eyacuiñajjiya miqianaya iyaa canaje onijje ejjapeequi'yojji. Oya quea pame nee nee. ¡Joya ecua ohuaya quea pame nee acani jamaya oe acue! <sup>16</sup> E'e, Eyacuiñajjiya esohui etehue'yo yahuajo nei jama poa ba'a:

“Eya quea pame nee nee poani; ¡e jayojjaya jama quea pame nee nee, quea boejea pea'ai oe pocue!”

Jamaya tehue ca poa yahuajo nei.

<sup>17</sup> Eyacuiñajji nijje mimianijo miqianaya jama poani ba'a: —Eyacuiñajji, miya ecuanaja Chii ai —poani.

¡Bacue oe! Eyacuiñajji oe dejjaja eba'ejjiyo jjashahuabaquiani, oya jayojjaya jjashahuabaquiani pea cuanaja eba'ejjiyo. E'e, ojjaña shajjama' cuana ohuaya huohui caje jama ba'a: —Miqianaya ca mi ca oe quea mimishi nee nee poanijo quea nee nee poaje'yo tii —acaje.

Quea pame poanijo ca ca eseya jama huohui caje'yo ba'a: —Jamaya quea pame nee, enijje ba'e tiitije'yo eyajo —Eyacuiñajji poaje.

Jiquio meshijo eseya ba'e tiitii ajja. Jamajjeya jiquio meshijo ba'yanijo ¡ojjaña pojjaajo Eyacuiñajjiya esohui jayojja jama acue! ¡Oya shajja'ajjacue! <sup>18</sup> Yahuajo miqianaya ba'e'yonaje etiiquiana cuanaja ehuhui jayojja jama quea mimishi. Oya cuana Moisesija esohui etehue'yo jayojja jama ba'e nishonaje. ¿A'a bejjo sosejje mimishi cuana cuijea mee ca'yojji? Chojja. Ejjeshajji, esodojjo quea nahue, mei quea nahue pea'ai quijje pishana sosema' poaje. <sup>19</sup> ¡Bacue oe! Jesosa Quitohua miqianajaya mimishi cuana cuijea'yojji sosejje sosequia ca'yonaje. E'e, jiquio ecua ñajjajja esho'i quea pame, tai'ama quecua ca'yaninaje cuaa jayojja jama Jesosa Quito quea pame nee, mimishi'ama quecua ca'yonaje cuaa esejaya mimishi cuijea'yojji. Oja ena' cuayaquinajejo, Eyacuiñajjiya esejaya mimishi cuana cuijea caje'yo. <sup>20</sup> Yahuajo nei nei meshi pana jjimahuajo Eyacuiñajji jjashahuabaquinaje quijje nei Jesosa Quito huoojeaje mimishi cuanajo mano'yohua. E'e, Eyacuiñajjiya Jesosa babaca canaje ese jaahuanajji. Jjeya epojja cuana

beshahua nei oe poanajejo Jesosa Quito poeyanaje esejaya mimishi cuijea'yohua, quea boejea ba'e mee'yohua pea'ai. <sup>21</sup> Miquianaya quea boejea acanajejo, jaahuana canajejo pea'ai Eyacuiñajji miquianajaya eba poaje. Cuanaya Eyacuiñajjiya Jesosa Quito shequi mee ca o'yanaje. Ojjaña huoojea'yojji quea ca'a nee nee po mee ca'yonaje pea'ai. Jamajjeya jjeya miquianaya Eyacuiñajjiya esohui jayojja jama poani. Ohuaya miquianaya jjashahuabaqui mee cani jama ba'a: —E'e, Eyacuiñajjiya ecuana ba'e tiitii mee caje'yo onijje eyajo.

<sup>22</sup> Jjeya miquianaaya Eyacuiñajjiya esohui jayojja jama añajo, mimishi cuana apajea mee ca'yonaje, Eyacuiñajjiya. Edojjoshahua Pameya miquianaya Jesusaja epeeji cuana quea jea nee amesahua canaje. Jamajjeya jajaña Jesusaja epeeji cuana quea jea nee atiitiicue! <sup>23</sup> Jesosa Quito miquianajaya mimishi cuanajo mano'yonajejo, Eyacuiñajjiya miquianaya pea ejjashahuabaquijji ba'e mee ca'yani. E'e, miquianaya quea pame nee ba'e tiitiani pea ejjashahuabaquijji, dejjaja bacua jayojja jama pojjeama. Oya cuana ca'a'ama, oe pojji shequiajame ba'yani. Eba'eji eyajo ca ca eba'e tiitii'yojji, oe po ajja.

<sup>24</sup> ¡Bacue oe! Eyacuiñajjiya esohui etehue'yo yahuajo nei nei jama poa ba'a: “Ojjaña dejja cuana sipone jama, ca'a'ama. Oe pojji cahuijo sipone shasha cuana quea pame. Jjeya nei joca'yo majje chama'yo tii poaje'yo.

<sup>25</sup> Eseyaya Emeshi Mese neija esohui cuana ca ca quea pame yani tiitijje'yo”. Yahuajo nei jamaya poa.

E'e, ma esohui quea pame nee Jesusaja esohui huohuijji cuaa miquiana huasijje huohui canaje, Jesusaja esohui.

## 2

### *¡Jesosa Quito nijje quea pame nee ba'ecue miquianaya!*

<sup>1</sup> ¡Jjeyahua nei ojjaña mimishi cuana pajea neinei'yocue! ¡Onaja aquiana a'a jea bajji! ¡A'a jjadasiaquijji pojji, siipojji pea'ai a'a pojji! ¡Siajjepojji a'a pojji! ¡A'a pea cuana nijje mimijajijji! ¡A'a epeeji nisho pojji! <sup>2</sup> ¡Eyacuiñajjiya esohui ba neineicue! ¡Jiquio ecua ebacua esho'lya tojjo quea boti nee, ojjaña pojja tojjo ishi neinei cani jayojja jama Eyacuiñajjiya esohuijo pocue miquianaya! ¡Ojjaña pojja esohui ba neineicue! ¡Ba majje Jesosa Quitoja epeeji quea ja'a nee pocue! <sup>3</sup> Eyacuiñajjiya esohui yahuajo nei jama poa ba'a: “Quito nijje jjapeequi majje miquianaaya oya banaje quea pame nee nee poani”.

<sup>4</sup> ¡Jjapeequicue Jesosa Quito nijje! Oya quea pame nee nee, quea ca'a nee nee pea'ai. Beca cuana onijje jjapeequi sa po ajja poa. Oya cuana jama poanaje ba'a: —Jesosa Quito cajaa. Ecuana onijje jjapeequi sa po ajja.

Eyacuiñajji ca ca Jesosa Quito quea jea nee neejo jama mimime poanaje ba'a: —Oya quea pame nee acui ca'a quea ja'a nee jama, equi yamajjana quea ca'a jama. Ecuea oya quea jea nee nee.

<sup>5</sup> Equijo acui ca'a eyamajjana cuana nequia cani cuaa. Oya jayojjaya ojjaña Jesusaja epeeji cuana Eyacuiñajjiya equi jayojja. ¡Equi yamajjana quea pame nee jayojja jama pocue! ¡Quea ca'a nee nequicue Jesosa Quitojo! Jamajjeya ¡Eyacuiñajji nijje emimijji cuana pea'ai pocue, miquianaya! ¡Jiquio ecua Jodioja Eyacuiñajji nijje emimijji cuaa chaco ca poa Eyacuiñajji bihuiajji jamaya oe acue! ¡Eyacuiñajji chacocue quea pame nee! ¡Jamaya oe acue Jesosa Quito miquianajaya mimishi cuanajo mano'yonajejo!

<sup>6</sup> Jamaya Eyacuiñajjiya esohui Jesosa Quitojo etehue'yo yahuajo poa ba'a:

“¡Bacue oe! Eyaya oya babacaje enequi tiitii mee'yojji ecuea cuiñajji Sioni bajjanijo. Oya acui ca'a equi yamajjana quea pame nee, quea ca'a nee pea'ai jayojja jama. Ojjaña joya jjeya nei onijje jjapeequiani quijje yeno'ama poaje”.

Jamaya yahuajo nei poa.

<sup>7</sup> E'e, jjeya ojjaña Jesusaja epeeji poanija oya quea jea nee. E'e, Jesosa quea pame nee nee ma equi yamajjana quea ca'a jayojja. Pea cuanaja Jesosa boti'ama, ma equi yamajjana quea ca'a jayojja boti'ama. Jamaya Eyacuiñajjiya esohui etehue'yo yahuajo nei Jesosa Quitojo poa ba'a:

“Ma equi yamajjana jayojja equi iyajji cuaa cajaa aca poa. Jamatii Eyacuiñajjiya ma equi yamajjana oe nei quea pame nequi tiitii mee cani, equi jaabicha ajja epojji”.

<sup>8</sup> Jamaya cuanaya pea esohui Jesosa Quitojo etehue'yo poa ba'a:

“Quea huiso cuaa oya ma equi yamajjana jayojja cajaa acaje'yo. E'e, jiquio ecua acuihuojjajo ejiojjijje jjaquecuata'aqui majje jaabichajeaquiani jayojja jama poaje ojjaña joya o cajaa ajji poaje'yo”.

Jamaya poa yahuajo. Onaaya Eyacuiñajjiya esohui Jesosa Quitoja cajaa acani shajja'ajja sa po ajjaa jjejojo. Yahuajo nei Eyacuiñajjiya eba poa jama ba'a: “Oya cuana ecuea esohui shajja'ajja sa po ajja poaje. Jamaya capo'yahua” poa.

<sup>9</sup> Miquianaya ca ca Eyacuiñajjiya ehabaca ojaya epeeji cuana epojji, onijje emimijji ojjaña cuanajo. Eyacuiñajjiya epeeji cuana quea pame nee poanaje miquianaya. E'e, Eyacuiñajji ojjaña emeshi mese cuana huoojeajji poani. Miquianaya babaca ca poa ma ohua huohui ca poa ehuohuijji. Jamajjeya miquianaaya huohuiaña jama ba'a: —Eyacuiñajjiya eseya babaca canaje. Mimishi cuana cuijea ca'yajje eseya ba'e mee cani quea ja'a nee nee, de.

E'e, yahuajo miquianaya ba'ya poa quea mimishi. Jjeya ca chojja. <sup>10</sup> Yahuajo Eyacuiñajjiya epeeji pojjeama poa. Jjeya ca ca miquianaya ojaya epeeji cuana poanaje. Yahuajo mi jaahuanajji chama' poa Eyacuiñajji miquianajaya boti'amajojo. Jjeya ca ca Eyacuiñajjiya miquianaya jaahuana cani quea pame nee. Onijje jjapeequianijo, miquianajaya Emeshi Mese nei oya poani.

*Eyacuiñajjiya echacojji poanijo miquianaya jama ba'ecue ba'a:*

<sup>11</sup> Ecuea epeeji cuana, ¡shajja'ajjacue mo! Miquianaya ca ca pea, ojjaña quea mimishi ojjaña meshi cuanajo ba'e jayojja jama pojjeama. Miquianajaya meshi eyajo yani. Jiquio meshijo ani tiitii ajja. Jamajjeya ja'a quea mimishi ba'eji! Mimishi cuana amajje miquianaya quea tai nequi tiitii'yo chana'. <sup>12</sup> Jesusaja epeeji pojjeamaa miquianajaya eba'e pame ba neinei cani. Jamajjeya ¡quea pame nee atiitiicue! Oya cuana miquianajo siajje poani jama ba'a: —Jesusaja epeeji cuana quea mimishi.

Jamatii miquianajaya eba'eji quea pame nee ba majje ma dejja cuanaa huohui caje Jesosa Quito poe o'oyajo jama ba'a: —Eyacuiñajjiya ojaya epeeji cuana quea pame ameesahua ca'yonaje —poaje ojjaña.

*¡Miquianaja emeshi meseja esohui shajja'ajjacue!*

<sup>13</sup> Epeeji cuana, ¡miquianaaya Jesusaja epeeji poanijo emeshi mese cuaa huohui cani jayojja jama acue! Jamajjeya miquiana ba majje Jesosa Quito niñeba ajja poaje. E'e, pea cuanaja emeshi mese ehuoojeajji pojjeama. Jamajjeya ¡oya shajja'ajjacue! <sup>14</sup> Emeshi meseja ojaya echacojji cuana huoojea cani ojjaña jaahuanaa. Jamajjeya oya cuana poeyani mimishi cuana napaa. Ojjaña quea pame poani nijje ca ca quea bihui nee poani. <sup>15</sup> Miquianaaya quea pame nee añajoya, shajjama' cuana esohui e'e nei pojjeama huohui paje caje'yo. Jamaya Eyacuiñajji sa poani.

<sup>16</sup> Yahuajo miquianaaya mimishi cuana a'yonaje, eme jeyo'yo jayojja jama poanaje. Jjeya ca ca Jesosa Quitohua ejeyo'yo jaa pichojea ca'yani jayojja jama amee cani. Jamatii, ja'a jama pojji ba'a: —Jesusaa eya epichojea'yo jayojja jama po mee ca'yani. Jamajjeya ¡eyaya jamatii mimishi ca'a majamaja'yahua! —a'a jamaya pojji! ¡Eyacuiñajjiya echacojji quea pame cuana pocue! <sup>17</sup> ¡Pea cuanajo a'a maimaijji! ¡Ojjaña Jesusaja epeeji cuana quea boti nee acue! ¡Eyacuiñajjiya esohui jama acue quea bihui nee! ¡Miquea emeshi meseja huohui canijo shajja'ajjacue pea'ai!

*Jesosa Quito quea nee nee poanaje jamatii oja Chiija esohui jayojja jama poanaje ¡Jesosa jayojja jama pocue!*

<sup>18</sup> ¡Bacue! ¡Mique emeshi meseja esohui shajja'ajjacue quea bihui nee! ¡Miquianajaya emeshi mese quea pameja esohui jayojja jama pocue! ¡Miquianajaya emeshi mese quea tecueja esohui jayojja jama acue pea'ai! <sup>19</sup> Miquianaaya quea pame chacoajo, e'e pojja'a

echacomeejji quea tecue miquiana nijje poani. Jamatii ¡Eyacuiñajjija esohui ba majje quea bei pocue! Jamaya quea pame. <sup>20</sup> Quea pame nee chachacoajo, miquianajaya emeshi meseya miquianaya quea yeno po mee caje'yo pojja'a. Jamatii Eyacuiñajjija miquianajo huohui caje jama ba'a: —Miquianaya ecuea epeeji cuana quea pame.

Quea tai miquiaa chacome ajo ca ca miquianajaya emeshi meseya napa caje. Jamatii ¡catecua cahua quea tai miquiaa chaconajejoya!

<sup>21</sup> Jesosa Quito esejaya mimishijo quea nee nee poanaje. Jamajjeya Eyacuiñajjija eseya huohui cani jama ba'a: —¡Jesosa Quito jayojja jama pocue! Oya quenequene cuaji ajja poa. Quea bei nee. ¡Jamaya pocue miquianaya!

<sup>22</sup> Yahuaajo nei esohui huohuijjiya esohui tehue ca poa Jesusajo jama ba'a: “Oya mimishi'ama. Oya sijjepojji pojjeama pea'ai”. <sup>23</sup> Pea cuana Jesosa Quito nijje mimijajajo, onijje mimijaji ajja Jesosa poa. Onaaya Jesosa Quito napa canaje. Jamatii oya tecueajea jjima. Chojja: —Ecue Chii, oya cuana ca ca enijje quea mase poanijo, ¡cajaa a'yocue! —jamaya ajjima Jesusaja.

Jama ca ca oe poanaje ba'a: —Ecue Chii, miya quea pame nee. Dejja cuana quea mimishi poani ba majje oya cuana quea nee nee po meeje'yo quijje, miyaya —Jesosa poanaje.

<sup>24</sup> ¡Jamaya capo'yahua! Jesosa Quito eseya mimishi cuanajo mano'yonaje acui ecueata'apeejo. Oya quea nee nee poanaje eseya mimishi cuijea'yojji. Jamajjeya eseya mimishi pajea mee ca'yani. Cuanaya ojo eseya Eyacuiñajjija esohui jayojja jama po tiitii mee caje'yo quea pame nee. Jesosa Quito cuiasejjajea canaje cuaa ejee ejeapashajjajaa. Quecua ca'yonaje. Ma ecuiasejjajo, equecua'yojo pea'ai eseya quea bojea po mee canaje Jesusaa. <sup>25</sup> Yahuaajo miquianaya ñajjajja oe nei ecuaquisho'yo jayojja jama poanaje. Jjeya Jesosa Quito ñajjajja cuiñajji jayojja jamaa miquianaya sa'ajja'yo majje jjeshe ca'yonaje ejaahuanajji.

### 3

#### *¡Yahue, ehuanase cuana pea'ai, ba'ecue quea pame!*

<sup>1</sup> Eyaya epona cuana jama aña ba'a: ¡Quea pame nee ba'ecue! Ehuanase cuana, ¡miquianajaya yahue cuana shajja'ajjacue! E'e pojja'a miquea yahue Jesusaja epeeji pojjeama. ¡Jamatii ohua huohui cani jayojja jama acue! Jamajjeya miya quea pame ba'yani ba majje miquea yahue Jesusaja epeeji poaje'yo jamatii, Jesusajo huohui majamaja jjima. <sup>2</sup> E'e, miya quea pame poanijo, miyaya oya shajja'ajjañajo pea'ai, yahue Jesusaja epeeji poaje pojja'a. <sup>3</sup> A'a jjashahuabaquijji jama ba'a: —Eya aquiana quea pame huosho'yo majje quea pame poaje. Eyijji quea pame yijje. Daqui quea nahue huoshoje. Ecuea sao ao ijjiaca'a meeje quea pame. Jamajjeya eya quea pame nee poaje.

<sup>4</sup> Chojja. Quea ja'a nee jjashahuabaquianijo, mimishi'ama poani pea'aijo miquianaya quea pame nee poaje. Jamaya Eyacuiñajjija quea boti nee nee. Jamajjeya ¡quea bei, tecue'ama, quea pame nee pea'ai pocue! <sup>5</sup> E'e, yahuaajo nei epona cuana Eyacuiñajjija epeeji poanijo ojaya esohui jayojja jama poa. Yahueja esohui shajja'ajja ca poa pea'ai. Jamajjeya ma epona cuana yahueja quea boti nee nee poa. <sup>6</sup> Yahuaajo nei epona Sana bajjani quea pame nee poa. Ojahueya Amajamaa huohui cani jayojjaya jama aca poa, Sanaa. Ojahue nijje jama poa ba'a: —Miya ecueahue, e huoojeajji.

Epona cuana, ¡miquianaya quea pame nee po sa poanijo Sana jayojja jama pocue quea pame nee! ¡Jesosa nijje jjapeequicue mete'ama nei pea'ai!

<sup>7</sup> Yahue cuana, ¡shajja'ajjacue mo pea'ai! Epona cuana ca'a'ama pishanajo, ¡ehuanase cuana jaahuanacue quea pame nee! Eyacuiñajjija yahue cuana, ehuanase cuana pea'ai ba'e tiitii mee caje'yo eyajo. Jamajjeya ¡ehuanase cuana quea boti nee acue! Jamaya poanijo, Eyacuiñajjija shajja'ajja caje miquiana onijje mimianijo.

#### *Pea cuaa Jesusaja epeeji napa caje pojja'a*

<sup>8</sup> ¡Jjeya pea esohui shajja'ajjacue! ¡Ojjaña miquianaya Eyacuiñajjija esohui jayojja jama pea nijje jjapeequicue! ¡Ojjaña Jesusaja epeeji cuana quea jea nee acue! ¡Huapa pojjeama

jayojja acue! ¡Quea bei pocue ojjaña cuana nijje; tecue'ama pocue! <sup>9</sup> ¡Pea cuana miqiana nijje quea mase poanijo, a'a onijje quea mase po pea'aijji! ¡Minijje mimijajianijo, a'a ona nijje mimijajijji pea'ai! Chojja. ¡Quea pame nee pocue! Jamaya Eyacuiñajjiya miqianaya huoojea canaje. Miqianaya iyaa canaje quea bihui nee epojji. Jamajjeya ¡pea cuana nijje quea pame nee pocue! <sup>10</sup> Eyacuiñajjiya esohui etehue'yo yahuajo nei jama poa ba'a:

“Quea pame ba'e sa poanijo, quea bihui nee ba'e sa poanijo pea'ai ¡esohui quea mimishi epojji a'a huohuijji! ¡A'a siajje pojji!

<sup>11</sup> ¡Mimishi pajea'yo majje quea pame nee oe atiitiicue! ¡Pea cuana nijje quea bei po tii tiicue pea'ai! <sup>12</sup> Eyacuiñajjiya esohui cuana jayojja jama quea pame añajo, ohuaya miqianaya jaahuana cani quea pame nee. Cuanaya ohuaya miqianaya shajja'ajja caje'yo onijje mimianijo. Ojjaña quea mimishi poani ca ca Eyacuiñajjiya tecuea caje'yo”.

Jamaya yahuajo nei tehue mee ca poa Eyacuiñajjiya.

<sup>13</sup> ¿A'a miqianaya napa caje cuaa miqiaaaya quea pame nee atiitiañajo? <sup>14</sup> E'e pojja'a. Jamatii Eyacuiñajjiya miqianaya quea bihui nee po mee caje. Jamajjeya ¡a'a quea mete pojji! ¡A'a quea yeno pojji pea'ai! Quea bei jjashahuabaquicue jama ba'a: <sup>15</sup> —Jesosa Quito quea pame nee poanaje; eya ojaya ehuhui jayojja jama poaje. Oya oe nei ecuea Emeshi Mese nei yani.

E'e pojja'a miqianaya huohui'ajja caje cuaa jama ba'a: —¿Yajjajje acuae miya quea bihui nee jjashahuabaquiani so'o Eyacuiñajjiya miya ba'e tiitii mee caje'yo?

Jamaya acajje ¡huohuicue miqianajaya ejjashahuabaquijji quea pame nee Jesosa Quitojo! <sup>16</sup> ¡Quea bei nee oe huohuicue, tecue'ama! E'e, ¡Jesosaja epeeji poanijo ba'ecue quea pame nee! Jamajjeya miqianaya bicho'ama poaje pea cuaa niñeba cajje. E'e, miqianaya quea pame nee ba'yanijo, oya cuana quea bicho poaje mi niñeba majje. <sup>17</sup> Miquiaa quea pame añajo, pea cuaa pojja'a nequiana napa caje. ¡Jamatii quea pame pocue! E'e pojja'a jamaya Eyacuiñajji miqianajo jjashahuabaquiani. Quea mimishi poanijo, pea cuaa miya cuia caje. ¡Jamaya ca'a cahua cuaa ca mimishi cuana! Jamajjeya ¡a'a quea mimishi pojji!

*Shequi'yo majje Jesosaa ma yahuajo mano'yo cuana nequica huasijje sohuihuohuiqui canaje*

<sup>18</sup> ¡Bacue! Jesosa Quito mimishi'ama nei nei. Jamatii oya mano'yonaje mimishi cuana cuijea mee'yojji. Apoa aje mimishi cuijea ca'yonaje. Ohuaya miqianaya Eyacuiñajjiya epeeji cuana po mee ca'yonaje. Oya Jesosa mano'yajo Edojjoshahua Pameya oya shequi mee ca'yonaje. <sup>19</sup> E'e, Jesosa Quito jjani yasijje ejeanobia jaajo ojaya edojjoshahua poquinaje ma yahuajo mano'yo cuana nequica huasijje esohui huohuiya jama ba'a: —E'e, iña mano'yonaje mimishi cuijea'yojji, apoa anaje —aca poa.

Ma yahuajo nei mano'yo cuana poqui mee jjima poa eyahuasijje; ejeanobia jaa jayojja poa. <sup>20</sup> Yahuajo nei mano'yo cuana Eyacuiñajji shajja'ajja sa po ajja poa. Noeya bishe ai quecua canijo, Eyacuiñajjiya shajjama' cuana ishoa'ajja ca'ya poa quea huiso shequijame ache shono ohua mimishi pajea caje'yo ebajji nisho. Jamatii oe pojji cuana, me oejje pea beca peejjima huisome, 8 huisome bishe ai yasijje dobiqui majje hui'i'yo jjima poa johuijo. Johuiya oya cuana bishejo ba'e jeajjee ca'ya poa quea pame nee.

<sup>21</sup> ¡Bacue! Johui yahuajo nei poa jjeya ca jiquio jama ba'a: Jjeya oe dejjaa pea cuana Eyacuiñajjiyo besa mee cani enajo. E'e, jiquio ecua dejja bishe ai dojjojo ani cuana johuiya jeajjee ca poa jayojjaya jama jjeya oe dejjaa pea cuana Eyacuiñajjiyo besa mee cani Edojjoshahua Pame ona que dobiqui'yajo. Jamajjeya ba'e tiitii mee cani Jesosa Quito nijje. Ena huasijje iñajejanobia cajje jamatii meshi topo caje. Mimishi cuana ca ca etopojeajji pojjeama. Jamajjeya Eyacuiñajji nijje e'e jojo nei mimiajo, ohuaya esejaya mimishi cuana cuijea ca'yajje pea jjashahuabaquime po mee ca'yani. Jamaya Eyacuiñajjiya acaje'yo Jesosa Quito ma emano'yojaa shequi mee ca o'oya poajojya. <sup>22</sup> Jjeya nei Jesosa Quito eyajo Eyacuiñajjiya ebianeimijije e'anioque ani. Ohuaya ojjaña

Eyacuiñajjija esohuidojojji cuana, esohuidojojji huoojeajji poani pea'ai huoojea cani quea pame nee ameeya. Ojjaña eshahua cuana quea mete poani Jesosa Quitohua tecuea cajje.

## 4

*¡Pea jjashahuabaqui'yome pocue!*

<sup>1</sup> Jamajjeya Jesosa Quito jiquio meshijo nequi quea nee nee poanaje. Dejja oya napa canaje Eyacuiñajjija esohui huohuijijijo. ¡Miquianaya Jesosa Quito jama pocue! Eyacuiñajjija esohui huohuiañajo quea nee poaje pojja'a. Jamatii quea nee poanijo ¡Jesosaja epeeji quea ca'a pocue, mimishi'ama! <sup>2</sup> Jamajjeya ¡Jesosaja epeeji quea ca'a nee poaniya ojjaña ejjashahuabaqui'yojji quea tai pajea'yocue! ¡Eyacuiñajjija ejjashahuabaquiiji jayojja jama ba'e tiitiicue quea pame nee! <sup>3</sup> Yahuajo nei quea huiso shequiajajo miquianaya quea mimishi ba'e'yonaje. Eshahuaja epeeji cuana jayojja ojjaña mimishi atiitii'yonaje, miquianaaya. Ejjashahuabaquiiji quea mimishi nee nee poanaje. Ehuoo jaa tiitiinaje pea'ai. Ojee quea shajjaquiijo ijia'ijjianaje quea mimishi jjejojo. Ojee ishi'ishi tiitiinaje pea'ai. Eyacuiñajji nisho pea'ai miquianaaya bihuia majamajanaje. Eshahua nijje miminaje pea'ai. Jamaya quea tai nee nee miquianaaya atiitiinaje yahuajo nei nei. <sup>4</sup> Jjeya ca ca miquea epeeji quea mimishi nijje jjapeequi'yo ajja onijje quea mimishi epojji. Jamajjeya oya cuana miquiana nijje quea tecue poani. Miquianaya niñeba cani pea'ai onijje mi jjapeequiajo. <sup>5</sup> Jamatii. Quijje ma dejja mimishi cuana Eyacuiñajjiya o cojja neijo nequi mee caje ojaya mimishijo huohui epojji. Majoya quea nee nee po mee caje'yo tii tii. Ojjaña etiiquiana mimishi yahuajo mano'yo cuana quea nee nee po mee caje'yo, ojjaña jjeya quea mimishi poani quea nee nee po mee caje'yo pea'ai, Eyacuiñajjiya. <sup>6</sup> Jamajjeya Eyacuiñajjiya esohui quea pame nee Jesosa Quitojo huohui mee ca'yonaje ojjaña yahuajo nei ba'ya poa huasijje mano'yo jjimahua. Jamajjeya mano'yajo, oya cuana ba'e tiitii mee ca'yonaje quea pame nee eyajo onijje. Jamatii ojjaña ma etiiquiana cuana mano'yonaje dejja quea pame, dejja quea mimishi pea'ai.

*Eyacuiñajjiya ojjana quea pame nee asahua cani*

<sup>7</sup> E'e, Jesosa Quitoja epoe o'oyajji beshahua nei apoa. Jamajjeya jjashahuabaquicue quea ja'a nee! ¡Ojaya esohui jama ba'ecue Eyacuiñajji nijje emimijji bicho'ama! <sup>8</sup> ¡Jiquio esohui shajja'ajja neineicue! ¡Ojjaña Jesosaja epeeji cuana quea jea nee nee acue! ¡Pea cuana quea jea nee poanijo onaja mimishi cuana pajea'yocue quene'ama! <sup>9</sup> Jesosaja epeeji cuana poe'yajo, ijjequinobiacue quea bihui neeya miquea equi yasijje aniya! <sup>10</sup> Eyacuiñajjiya ojjaña ojaya epeeji quea pame chaco meesahua cani ojo. Ojjaña ojaya epeeji pea jayojja jama chaco ajja. Peapea chacome ameesahua cani ojo ojjaña quea bihui nee eba'e meeji. ¡Ohuaya miquiana chaco meesahua canijo, ojjaña cuana quea bihui nee ba'e meesahuacue! Jama acue ba'a: <sup>11</sup> Esohui huohui sa po majje ¡Eyacuiñajjija esohui huohuicue! Pea cuana ba'e meesahua sa po majje ¡ba'e meesahuacue Eyacuiñajjiya miquiana ba'e meesahua canijo! Jamajjeya ojaya epeeji cuana quea pame nee poanijo ojjaña cuaa Eyacuiñajji bihuia caje: —E'e, Jesosa Quitohua esejaya mimishi cuana cuijea ca'yajo, quea pame nee onijje chachacoani —jamaya oya cabihuia tiitii cahua. ¡Oya ojjañaja Emeshi Mese quea ca'a nee capo tiitii'yahua pea'ai! ¡Jamaya capoahua!

*Pea cuaa Jesosaja epeeji cuana napa caje*

<sup>12</sup> Ecuea epeeji cuana, ¡shajja'ajjacue mo! ¡A'a quea yeno pojji pea cuaa miquianaya janobajjima napa canijo! A'a jjashahuabaquiiji jama ba'a: —Eya ee nei quea nee nee poani Jesosa Quito nijje jjapeequianijo.

Chojja, pea cuaa napa cani quea huiso Jesosaja epeeji cuana. <sup>13</sup> Jamajjeya onaa napa cajje ja'a quea yeno pojji! ¡Quea bihui nee pocue Jesosa Quito yahuajo nei onaa aca poa jayojjaya jamaya miquianaya acani jjeya! Onaa napa cajje Jesosa quea nee poanaje pea'ai. E'e, miquianaya jjeya quea nee o jayojjaya poanijo quijje quea bihui nee poaje Jesosa Quito quea pame nee nee, quea ca'a nee nee poe o'oyajo. <sup>14</sup> Jesosaja epeeji poanijo, pea

cuana minijje mimijajiajo jmatii quea bihui pocue! E'e de, Edojjoshahua Pame quea ca'a nee miqiana nijje nequi quea bihui nee miqiana po meejji. <sup>15</sup> ¡A'a quea mimishi pojji; a'a pea quecuajji; a'a siijji; a'a pea niñebajji pea'ai! ¡A'a jamaya pojji! Jamatii jamaya quea mimishi poanijo aje mi oe dejja etii cuaa napa caje. Quea nee nee po mee caje. <sup>16</sup> Jesosa Quitoja epeeji poanijo ca ca oe pea cuaa miqianaya napa cajje jmatii a'a quea bicho pojji! ¡Eyacuiñajji bihuiacue jama ba'a: —Eyacuiñajji, eya quea bihui nee Jesosa Quitoja epeeji poanijo, jmatii onaaya eya napa cani —acue! <sup>17</sup> ¡A'a oe Jesosaja epeeji pojjeama jayojja jama ba'ejji quea mimishi! ¡Bacue oe! Jjeya apoa. Jesosa Quito poeje'yo ojjaña cuanaja eba'ejjijo huohuiya. Ojjaña joya quea ja'a nee ba'yani quea pame nee acaje poe'yo majje. Ojjaña quea mimishi poani aje oe quea nee nee po mee caje'yo. Ebionei Jesosa Quitohua ojaya epeeji cuanaja eba'ejji cuanajo huohui caje. Majoya ojaya epeeji pojjeama quea mimishi nee tecuea caje. Ojaya epeeji quea mimishi tecuea cajo, ¡ache sohui tecue nei neiya huohui caje ojaya epeeji pojjeama! Tecuea neinei caje'yo. <sup>18</sup> E'e, Eyacuiñajji esohui etehue'yo jama poa ba'a:

“Quea camaja nee Quitoja epeeji neija mimishi cuijea'yojji, eyahuasijje edobiqui mee'y-ojji pea'ai. Jamajjeya Quitoja epeeji pojjeama, dejja quea mimishi pea'ai ¿yajja shai poaje? ¡Yahuasijje edobiqui mee'yojji pojjeama ca coma, de!”

<sup>19</sup> Jamajjeya dejja mimishiya eseya Jesusaja epeeji cuana napa cajo onijje jjapeequianijo jmatii Eyacuiñajji esohui a'a pajea'yojji! Jamaya Eyacuiñajji ejjashahuabaqui'yojji. Jamajjeya ¡quea pame nee nee atiitiicue! E'e, Eyacuiñajjiya eseya pana ca'ya poa. Ojaya esohui jayojja jama acaje'yo e'e jojo nei, epajea'yojji pojjeama Eyacuiñajji.

## 5

### *Penoja esohui etehue'yo Jesusaja epeeji jaahuanajji cuana huasijje*

<sup>1</sup> Jjeya eyaya Jesusaja epeeji jaahuanajji cuana huohuiaña. Eya ca iña Jesusaja epeeji cuana jaahuanajji pea'ai. Yahuajo pea cuaa Jesosa Quito cuia caqui eyaya oya ba poa. Jesosa Quito poe o'oyajo, eya o jayojja quea pame nee, quea ca'a nee nee poaje'yo. Jamajjeya eyaya tehueña jama ba'a: <sup>2</sup> ¡Miquianaaya Jesosa Quitoja epeeji cuana jaahuanajji poaniya oya cuana jaahuanacue quea pame nee! Eyacuiñajjiya miqianaya huoojea canaje ojaya epeeji cuana jaahuanajji. Jamajjeya ¡quea bihui nee oya cuana jaahuanacue, tecue'ama! Jesosa Quito miqianajaya quea jea nee neejo jojo chacocue quea bihui nee, ejjesheji quea huiso sa poanijo pojjeama! Eyacuiñajjiya miqianaya huoojea ca'yonaje ojaya epeeji jaahuanajji. <sup>3</sup> Jamajjeya jo huoojea'yojji quea tecue jama jayojja a'a pojji! Jamajjeya Jesusaja epeeji cuaa miqiana ba majje quea pame atiiti caje pea'ai; miqiana jayojjaya poaje. <sup>4</sup> E'e, Jesosa Quito ojaya epeeji cuana jaahuanajji huoojeajji poani. Jamajjeya poe o'oya majje ohuaya eseya o jayojja quea pame nee, quea ca'a nee po mee caje'yo.

<sup>5</sup> Cuanaya Jesusaja epeeji jjeya nei onijje jjapeequiani cuana eyaya huohuiaña jama ba'a: ¡Jesusaja epeeji jaahuanajji cuana shajja'ajjacue! ¡Quea bei pocue! Yahuajo nei Eyacuiñajji esohui etehue'yo jama poa ba'a:

“Beca cuana quea ca'a poso jjabaquianijo Eyacuiñajjiya oya cuana ba cani quea mimishi. Jamajjeya ohuaya oya cuana jeabichajea caje'yo. Pea quea bei poani ca ca jaahuana caje'yo, Eyacuiñajjiya”.

Jamaya yahuajo nei poa. <sup>6</sup> Jamajjeya ¡Eyacuiñajji ejjashahuabaquijji jayojja jama acue quea bei nee! Oya quea ca'a nee enequi tii tii. Jamajjeya quijje ohua apoa acajje miqianaya ona jaahuanajji quea ja'a nee po mee caje'yo. <sup>7</sup> Jjeya oya jjashahuabaquiani miqiana jaahuanajji. Jamajjeya mete'ama jjashahuabaquicue ojo jama ba'a: —E'e jojo nei Eyacuiñajjiya eya jaahuana caje'yo.

<sup>8</sup> ¡Quea jjashahuabaqui ja'a nee pocue! ¡Ojjaña ba neineicue! Edosiquiana quea mase poqui tiitiiani ojjaña dasiaa. Jiquio ecua ibia quea mase po ayequiani aquiana sa'ajjaa jayojja jama Edosiquiaa eseya sa'ajja cani edasijji. <sup>9</sup> E'e, miqianajaya eba Jesusaja



epeeji cuana ojjaña meshijo ba'e Edosiquiaa napa mee cajje quea nee poani miqiana jama. Jamajjeya ¡Jesosaja epeeji quea ca'a nee pocue! ¡Ojaya esohui a'a pajea'yoyji! <sup>10</sup> E'e, oe pojji cahuime miqianaya quea nee poaje Jesosa Quito nijje jjapeequianijo. Jamatii miqianaya ojaya epeeji cuana quea ja'a nee po mee caje'yo. Ohuaya miqianaya quea ca'a nee nee po mee caje'yo. Ojaya esohui cuana jayojja jama ba'e tiitii meesahua caje pea'ai. E'e de, Eyacuiñajjiya, ese jaahuanajjiya miqianaya babaca ca'ya poa. Miqianaya Jesosa Quito nijje jjapeequianijo, o jayojjaya quea ca'a nee, quea pame nee nee po tiitii mee caje'yo.

<sup>11</sup> ¡Eyacuiñajji ojjaña huoojea'yoyji oe nei quea ca'a nee nee po tiitiiani! ¡Jamaya capoahua!

*Penohua quea bei tehue cani Jesosaja epeeji cuana huasijje*

<sup>12</sup> Ecuea epeeji Simano bajjani enijje nequi. Ecuea eba oya Jesosa nijje jjapeequiani quea pame nee. Ohuaya jiquio esohui etehue'yo biso nei tehue meesahua cani. Ecuaaya miqiana que tehueña quea ja'a nee, quea bihui nee nee pea'ai ejjapeequi meesahuajji. Ecuea eba e'e jojo nei Eyacuiñajjiya miqianaya quea pame jaahuana cani. Jamajjeya ¡onijje jjapee tiitiicue!

<sup>13</sup> Jesosaja epeeji cuana jiquiojo, Babenonia cuiñajji jayojjajo ba'e Eyacuiñajjiya babaca ca'yonaje ojaya epeeji nei epojji, miqiana jayojjaya. Oya cuana, Macoso ma ecuea eba eba eja jayojja pea'ai miqianajo jjashahuabaquiani. —¿Achajja ami ani so'o? —ohuaya huohui'ajja mee cani.

<sup>14</sup> ¡Ojjaña Jesosaja epeeji cuana jomajo ba'e nijje quea bei nee mimi tiitiicue! Onijje jjapeequianijo, ¡Jesosa Quitohua miqianaya quea ja'a nee caba'e meesahua cahua! Eyaya, Peno bajjaniya jiquio esohui tehue'yonaje. Mahuiso. Apoa.

## PENOA ETEHUE'YO BECANEJJIJI PEA'AI 2 PEDRO

### *Penohua tehue ca o'oyanaje Jesusaja epeeji cuana huasijje*

<sup>1</sup> Eyaya Simohui Peno bajjaniya miquiana huasijje tehueaña. Eya Jesosa Quitoja esohui huohui ayequijji poani. Ohuaya eya huoojea ca'yonaje ojaya esohui huohuiya. Oya Jesosa Quito e'e jojo nei Eyacuiñajji, esejaya mimishi cuijea'yojji poani. Quea pame nee nee ojaya esohui. Ohuaya miquianaya ojaya esohui cuana jayojja jama ameesahua cani. Mimishi cuana cuijea ca'yajje ohuaya ecuanaya, miquianaya pea'ai quea bojea po mee ca'yonaje. <sup>2</sup> E'e, Eyacuiñajji, esejaya Emeshi Mese nei Jesosa Quito pea'ai miquianajaya eba nei nei. Jamajjeya jihuaya miquianaya cajaanahua cahua quea pame nee! ¡Quea bei nee capo mee cahua pea'ai!

### *Eyacuiñajjiya eseya babaca'yo majje iyaa canaje*

<sup>3</sup> E'e, Jesosa quea ca'a nee nee ba majje ohuaya eseya ojaya esohui jayojja jama ba'e meesahua cani quea pame nee. Eseya iyaa ca'yonaje ojaya epeeji nei epo meeji, o jayojja jama epojji. Quea ca'a nee, quea pame nee nee po mee cani pea'ai. <sup>4</sup> Jamajjeya ohuaya eseya iyaa majje huohui canaje jama ba'a: —Miquianaya e jayojja quea pame nee poaje e jayojja quea ca'a nee epo'yojji —aca poa.

Jamajjeya Eyacuiñajji ejjashahuabaqui'yojji jayojja jama jjashahuabaqui'yome poaje'yo. Esejaya ejjashahuabaqui'yojji quea mimishi, quea tai pea'ai pajea mee caje'yo. E'e, eseya pea quea mimishi jayojja pojjeama.

<sup>5</sup> Jamajjeya miquianaya Jesosa Quito nijje jjapeequianijo ¡quea pame ba'ecue! ¡Eyacuiñajji esohui cuana ba neineicue pea'ai! <sup>6</sup> ¡Quea ja'a nee jjashahuabaquicue! ¡Jesosa nijje jjapee tiitiquicue! ¡A'a onaa napa cani jjabaquijji! ¡Eyacuiñajji ejjashahuabaquijji jayojja jama jjashahuaba tiitiquicue! <sup>7</sup> ¡Eyacuiñajji epeeji cuana jaahuanacue quea pame nee! ¡Ojjaña quea jea nee nee acue pea'ai! E'e, ¡quea boti nee acue! <sup>8</sup> Jamajjeya miquiaaya jamaya atiitiañajo Emeshi Mese Jesosa Quitoja echacojji quea ja'a nee nee poaje, oya miquea eba poanijo. ¡Jesosa Quitoja esohui jama acue pea'ai! <sup>9</sup> Ojjaña jiquio esohui jama a'ajja aje oe cojjama' jayojja de, quea cojja jama jayojja poani. Quea jjashahuabaqui ja'a pojjeama. Jamajjeya pajea ca'yani ma Jesosa Quitohua yahuaajo ojaya mimishi cuana cuijea ca'yonaje.

<sup>10</sup> Jamajjeya epeeji cuana, ¡quea ja'a nee po tiiticue Jesosa Quitoja epeeji poanijo! Eyacuiñajjiyahuaajo miquianaya iyaa ca'ya poa quea ja'a nee eba'e'yojji. Cuanaya oya yahuaajo jjashahuabaquinaje jama ba'a: —Miquianaya ecuea epeeji nei poaje'yo.

Jamajjeya miquianaya Eyacuiñajji quea pame nee atiitiañajo quea mimishi epo o'oyajji pojjeama. <sup>11</sup> Eyacuiñajjiya miquianaya dobiqui mee caje'yo ojaya cuiñajji eyacua huasijje quea bihui nee. Ma cuiñajji Emeshi Mese Jesosa Quito ojjaña huoojea'yojji oe nei poaje'yo tii. Ohuaya miquianaya onijje ba'e tiitii mee caje'yo.

### *Penohua esohui e'e nei huohui ca o'oyanaje*

<sup>12</sup> Jiquio esohui e'e nei miquianajaya eba. Jamaya quea bihui nee atiitiañajo quea pame nee poani. Jamatii eyaya maya huohui majamajaña. Jamajjeya miquianaaya pajea'yo ajja esohui e'e nei. <sup>13</sup> Jiquio meshijo eshe nequiya jjeya nei eyaya miquianaya jjashahuabaqui tiitii meeje'yo ma esohui cuanajo. Jamaya quea pame miquianajo. <sup>14</sup> E'e, esejaya Emeshi Mese neiya, Jesosa Quitohua yahuaajo pishana eya huohui canaje jama ba'a: —Peno, quijje pishana miya manaje'yo.

<sup>15</sup> Jamajjeya jjeyahua nei eyaya miquiana huasijje esohui e'e nei huohui majamajaña miquianajaya epajea'yojji pojjeama e mano'yajo.

### *Jesosa Quito jiquio meshijo nequi Penohua ba ca poa*

<sup>16</sup> Ecuaya miqianaya huohuinaje Jesosa Quitoja epoe o'oyajjijo. Oya quea ca'a nee nee poeje'yo, Emeshi Mese nei poani. Ecuaya oya Eyacuiñajjija Ebacua Ejja banaje ecojjaa. Jamajjeya ecuanajaya esohui e'e nei ojo, etiiqianaja esohui yahuajo jayojja jama pojjeama; ojaya yahuajo ba jjimajo ca ca esohui e'e nei pojjeama. <sup>17</sup> E'e, eseja Chii ai Eyacuiñajji eyajo ani Jesosa Quito nije miminaje quea pame nee nee. Jesosa Quito oe nei quea ca'a nee nee poanijo miminaje Eyacuiñajji. E'e, Jesosa Quito nije nequiya eyaya Huani nije, Jacobo nije nequiya pea'ai shajja'ajjanaje Eyacuiñajji eyajo quea ja'a nee Jesosa nije mimiani. Jama poanaje ba'a: —Jesosa ecuea Ebacua Ejja oe nei quea pame nee. Oya ecuea quea jea nee nee. Ohuaya ecuea ejjashahuabaquijji jayojja jama acani —Eyacuiñajji poanaje.

<sup>18</sup> Eyacuiñajjiya ma esohui cuana eyajo huohui canijo, ecuaaya shajja'ajjanaje Jesosa nije eyiyo biaje nequiya. Eyiyojo Eyacuiñajji shajja'ajja majje ecuaa jjashahuabaquinaje jama ba'a: —Eyacuiñajji eyiyojo miminaje e'e jojo nei. Jamaya quea pame.

<sup>19</sup> Jamajjeya ecuanaja esohui Jesosa Quitoja epoe o'oyajjijo baña quea ja'a nee. Eyacuiñajjija esohui huohuijji cuanaja esohui yahuajo e'e nei poa. Jamajjeya ¡shajja'ajjacue! Ma esohui yahuajo nei cuaquijji jayojja jama poa. Jiquio ecua cuaquijjiya mecajje quea apo neejo jeaja'a cani jayojja jama jiquio esohui e'e neiya miqianaya Jesosa ba meesahua caje, jamatii esohui e'e nei pojjeama huohui cani cuaa quea huiso. Miqianaya Jesosaja poe o'oyajjijo quea ja'a nee baje ma esohui e'e nei ba neinei majje. Jamatii Jesosaja epoe o'oyajji ca ca jiquio ecua eshequi huiyejji jaasohua majje ja'a'aja'a'a pojebeani jama jjashahuabaqui meemeya se acaje Jesosaa.

<sup>20</sup> ¡Ba neineicue jiquio esohui! Eyacuiñajjiya esohui huohuijji yahuajo nei ba'eca poa esohui tehue mee ca poa. Ma esohui cuana onajaya ejjashahuabaquijji pojjeama, Eyacuiñajjija ejjashahuabaquijji. <sup>21</sup> E'e, yahuajo nei dejja cuanaja Eyacuiñajjija esohui jamatii tehue jjima. Onajaya ejjashahuabaquijji huohui jjima pea'ai. Chojja. Edojjoshahua Pameya Eyacuiñajjija epeeji quea pame nee cuana ojaya esohui huohui meesahua ca'ya poa.

## 2

### *Esohui huohuijji nisho cuana siajje poani Eyacuiñajjija esohuijo*

<sup>1</sup> Yahuajo nei Eyacuiñajjija esohui huohuijji nisho cuana siajje poa pea cuana huasijje. Jjeyahua nei pea esohui huohuijji nisho cuana miqiana que siajje poaje Eyacuiñajjija esohuijo. Ohua siajje acajje dejja cuana poquiquehua chana' cuaqui yasijje. Eseyaya Emeshi Mese nei, Jesosa onaja mimishi cuanajo mano'yonaje. Jamatii oja sohui siajje acanijo esohui huohuijji nishohua Jesosa cajaa acani. Jamajjeya Eyacuiñajjiya oya cuana quea nee nee po mee caje'yo, ojjañaja esohui huohuijji nisho. <sup>2</sup> Ona siajje poanijo, quea huiso dejja cuana quea mimishi nee poaje o jayojjaya. Jamajjeya esohui huohuijji nisho cuana siajje poani jojaya pea cuana Jesosaja esohui cuanajo mimijajije'yo. <sup>3</sup> Cuanaya esohui huohuijji nishohua quea huiso ejjeshejji sa poanijo miqiana que ojaya ejjashahuabaqui'yojji e'e nei pojjeama huohui caje. Quea bejjo jeaa jjejojo miqianaya dasia caje; dasia majje bejjo quea huiso chicha caje.

Yahuajo nei Eyacuiñajji jjashahuabaquia poa esohui huohuijji nisho napajji. Jama poa ba'a: —Esohui huohuijji nisho cuana eyaya baña. Eyaya oya cuana epajea'yojji pojjeama; quea nee nee po meeje'yo e'e jojo nei.

<sup>4</sup> ¡Bacue oe! Yahuajo nei nei esohuidojojji cuana eyajo quea mimishi poa. Jamajjeya Eyacuiñajjiya oya cuana quea huesha nee nee jea ca poa, quea misi nee nee yasijje jeajea ca'ya poa quea nee nee epojji. Jomajo oya cuana ecuaaya meequi'yojji pojjeama. Ejeyo'yo jama ani, de. Quijje Jesosa Quito poe o'oyajo, Eyacuiñajjiya ma esohuidojojji quea mimishi cuana tecuea neinei majje jeajea caje'yo cuaqui yasijje quea nee nee epo'yojji tii tii.

<sup>5</sup> Yahuajo nei nei ojjaña quea mimishi nee poanijo, Eyacuiñajjiya ena quea quemo nee nee huoojea ca poa; ojjaña mimishi cuana hui'i mee ca'ya poa. E'e, ojjaña meshi cuana

ohuajea mee ca poa. Oe dejjaa Noe bajjaniya Eyacuiñajjiya esohui jayojja jama aca poa. Jamajjeya oya hui'i'yo ajja poa. Ojaya bacua ejja, oja osecuajana quea pame cuana pea'ai hui'i'yo jjima pea'ai poa. Me oejje beca, 7 huisome cuana Noe nijje ani Eyacuiñajjiya jaahuana ca poa.

<sup>6</sup> Majoya ojjaña cuana Sonoma cuiñajjiyo ba'e, Jomosha cuiñajjiyo ba'e pea'ai quea mimishi nee nee poa. Jamajjeya Eyacuiñajjiya ma cuiñajji cuana quiyo jeyojeyo mee ca'ya poa. Chama'yo tii aca'ya poa dejja, equi, aquiana cuana pea'ai. Jamaya Eyacuiñajjiya ojjaña ba mee cani e'e jojo nei ohuaya ojjaña quea mimishi poani quea nee nee po mee caje'yo. Jamajjeya ojjaña quea mete mimishi epojji pocue! <sup>7</sup> E'e, yahuajo nei Sonoma cuiñajji quiyo'yo jjimahuaajo Eyacuiñajjiya ojaya epeeji Noti bajjani Sonomajo ba'e huoojeacuaya ca poa cuiñajji esecue yasijje quiyo'yo jjima epojji. Notiya Eyacuiñajjiya esohui jama atiitii ca poa. Jamajjeya oya quea yeno nee nee poa ojjaña jomajo quea mimishi ba'yanijo. <sup>8</sup> Ma cuiñajjiyo ba'eya Notiya ba majamaja caninaje dejja cuana quea mimishi nee nee; quea shajjaquijjo tii tii poani shajja'ajja caninaje pea'ai. Ohuaya, Notiya ma Eyacuiñajjiya huohui ca poa jayojja jama aca poa. Jamajjeya quea yeno nee nee poa dejja cuana quea mimishi po tiitiiyanijo.

<sup>9</sup> Jamajjeya jjeya ecuana ba mee cani jama ba'a: Eyacuiñajjiya ojjaña quea pame nee poani jaahuana cani. Jamajjeya dejja mimishi cuanaja ojaya epeeji cuana quea mimishi epo meeji pojjeama. Ecuana ba mee cani jjeya nei pea'ai Eyacuiñajjiya ojjaña quea mimishi poani quea nee nee po mee caje'yo. Quijje Jesosa Quito poe o'oyajo, ojjaña mimishi cuana quea nee nee po tiitii mee caje'yo, Eyacuiñajjiya. <sup>10</sup> Pea cuana quea mimishi, quea tai jjashahuaba tiitiiquiani. Jamaya oya cuana ba'e sa poani. Oya cuana emeshi mese cuanaja esohui shajja'ajja sa po ajja pea'ai. Jamajjeya Eyacuiñajjiya oya cuana quea nee nee po mee caje'yo.

Oya jayojjaya esohui huohuijji nisho cuana quea mase nee nee. Shajjama' pea'ai. Jesosa Quitoja esohuidojojji quea pame cuana niñeba cani mete'amaa jjejojo, bicho'amaa jjejojo pea'ai. <sup>11</sup> Jamatii mimishi cuana ca'a'ama ojjaña. Eyajo Eyacuiñajjiya esohuidojojji cuana ca ca quea ca'a nee nee poani. Ma dejjaja ba jjima acani pea'ai. Jamatii ohuaya esohui huohuijji nisho cuana jama niñebame ajjima acani ba'a: —Jesosa, jiquio esohui huohuijji nisho cajaa acue, cuiajea'yocue! —jamaya po ajja esohuidojojji cuana.

<sup>12</sup> Esohui huohuijji nisho cuana ca ca quea mase nee nee. Quea ja'a nee jjashahuabaqui ajja pea'ai. Jamatii ijjiacajji jjabahuonequi jjima jama ba'yani. Jiquio ecua ijjiacajji tiiyajo ojjaña sa'ajja cani equecua'yojji jayojja jama esohui huohuijji nisho quea nee nee po mee caje'yo Eyacuiñajjiya. E'e, oya cuana jjabahuejjaqui ajja nei nei. Eyacuiñajjiya esohui niñeba cani quea quehuajojo.

<sup>13</sup> Esohui huohuijji nisho cuana pea cuana quea yeno po mee cani. Jamajjeya Eyacuiñajjiya oya cuana quea yeno, quea nee nee po mee caje'yo. E'e de, quea bihui nee jayojja oya cuana mimishi cuana a sa poani ojjaña pojjaajo. Jamatii quea mimishi poani tii miquiana nijje ojee ijja sa poani Jesosa Quitoja bobi. Miquiana quea mimishi po mee sa poani pea'ai oya cuana. <sup>14</sup> E'e, esohui huohuijji nisho cuana epona mimishi cuana jea ba cani; onijje jaa sa poani. Jiquio ecua jeje ajja tii tii jayojja jama oya cuana quea mimishi po tiitiiyan, jjashahuaba tiitiiquiani quea mimishi epojji. Jesosaja epeeji ca'a'ama quea mimishi po mee cani pea'ai. Quea dejja tai poanijo pea cuana dasia majje aquiana sii cani pea'ai. Jamajjeya Eyacuiñajji quea quene poani esohui huohuijji nisho cuana nijje. Yahuajo jjashahuabaquinaje o huoojea'yojji cuaqui yasijje quea mimishi poanijo. <sup>15</sup> Esohui huohuijji nisho cuana Jesosaja ejiojji poqui pajea'yo majje cuaquisho'yonaje eshahuaaja ejiojji yasijje. Eyacuiñajjiya esohui huohuijji yahuajo nei ba'ya poa Beonija bacua ejja Banaami bajjani quea mimishi poa. Ejjesheji quea huiso sa poanijo Eyacuiñajjiya esohui jama a sa po ajja poa. Banaami jayojja jama esohui huohuijji nisho cuana poani, quea mimishi nee nee, de. <sup>16</sup> Eyacuiñajjiya Banaami tecuea ca'ya poa yahuajo nei, mimishijo. Mapichi sisi mimi mee ca poa Banaami nijje, Banaami

jayojja mimimeya poa. Mapichi sisiya tecuea cajje Banaami ojaya ejjashahuabaquijji quea mimishi pajea ca'yonaje.

<sup>17</sup> Jjeya ojjaña esohui huohuijji nisho cuana ena eteohuejja nama'yo, ejoca'yo jayojja jama poani, cajaa ya'yo jayojja. Cuanaya bo poeanijo beniya dojocuaji canijo, ena chama' poaje. Eso' equecua'yo epohua'yojji pojjeama quea jabojojo. Jiquio ecua bo dojocuaji cani jayojja ena chama' jayojja jama ojjaña esohui huohuijji nishohua Jesusaja esohui quea ja'a huohuihuohui ajja. Jamajjeya Eyacuiñajjiya oya cuana cajaa acaje; quea nee nee po mee caje'yo; quea huesha nee nee, quea misi nee nee yasijje jeajea caje'yo. <sup>18</sup> Esohui huohuijji nisho cuanaja ejjashahuabaquijji quea quehua nee. Jamatii quea miminaa, bicho'ama poani. Oya cuana jjashahuabaquiani quea mimishi. Pea cuana, ma yahuajo mimishi pajea'yojji poanaje quea mimishi po mee caje o'oya. <sup>19</sup> Esohui huohuijji nisho cuana mimishi pajea'yo ajja. Jamatii oya cuana siajje poani tii tii jama ba'a: —Ecuanaajaya esohui cuana shajja'ajja majje ¡miquianajaya ejjashahuabaquijji jayojja jama atiitiicue! —siajje poani.

Chojja, jamaya pojjeama. ¡Bacue! Ojjaña joya mimishi atiitiijji poani Edosiquiana o huoojeajji poani. Quea pame nee poanijo ca ca Eyacuiñajji o huoojeajji poani. <sup>20</sup> Jamajjeya beca cuaa mimishi pajea ca'yonaje; quea mase popajea ca'yonaje esejaya Emeshi Mese nei Jesusa Quito nijje ejjapeequijji. Jamatii onijje jjapeequi majje aje oe quea mimishi po o'oyanaje. Ojaya esohui shajja'ajja maja sa po'yo ajja poanaje. Yahuajo jama oya cuana ba'e o'oyanaje, Jesusaja epeeji pojjeama jama quea mimishi. Yahuajo Jesusa nijje jjapeequi jjimahuajo oja mimishijo Eyacuiñajjiya oya cuana tecuea caje. Jesusa nijje jjapeequi pajea'yajo ca ca tecuea neinei caje'yo. <sup>21</sup> Jamajjeya ojjaña joya Jesusaja esohui shajja'ajja majje pajea cani, quea mimishi po o'oyani Eyacuiñajjiya janobajjima nei tecueajea caje'yo. Quea nee nee po mee caje'yo. Pea cuanaja Jesusaja esohui shajja'ajja jjimahuajo quea mimishi poani Eyacuiñajjiya tecuea caje; quea nee pishana po mee caje'yo oja mimishi cuanajo. Esohui e'e nei Jesusajo shajja'ajja jjimajo mi tecuea neinei caje'yo. <sup>22</sup> E'e, jamaya acani cuaa ba'a: “Iñaehuaa bohuii majje bohuii ijja ca o'oyani. Cuanaya cuichi topo cajje cuichi quea boejea pepajo besaje o'oya”. Jiquio ecua iñaehua, cuichi pea'ai jjopi yasijje poqui o'oyani jayojja jama beca dejja cuana poani; Jesusaja esohui shajja'ajja majje pajea ca'yani, poqui o'oyani mimishi yasijje.

### 3

#### *Jesosa Quito poeje o'oya; ma ecua ohuaya huohui ca poa jamaya e'e jojo nei poaje*

<sup>1</sup> Epeeji cuana, eyaya becanejjijji pea'ai tehue'yome anaje ecuea esohui miquiana que. ¡Ecuea etehue'yo yahuajo, ecuea etehue'yo jjeya tehuejo pea'ai miquianaya jjashahuaba tiitiiquicue quea ja'a nee Jesusa Quitojo! <sup>2</sup> ¡Eyacuiñajjiya esohui huohuijji quea pame cuanaja esohui yahuajo nei a'a pajea'yojji! Eseyaya Emeshi Mese nei Jesusa ese ba'e tiitii mee'yojji. ¡Ojaya esohui pea'ai a'a pajea'yojji! Ohuaya ojaya epeeji cuana huoojea ca'yonaje ojaya esohui huohuiya miquiana huasijje.

<sup>3</sup> ¡Bacue jiquio esohui! Jesusa poe o'oya jjimahuajo pishana quea huiso quea mimishi poeje. Ojaya ejjashahuabaquijji quea mimishi nee nee poaje. Miquianaya soadojo caje Jesusaja epoe o'oyajjijo miquiaa huohuiañajo. <sup>4</sup> Minijje mimijajije jama ba'a: —¡Dee! Yahuajo Jesusaa huohui canaje ojaya epoe o'oyajjijo. Jamatii poe'yo jjima. Jesusa siajje poani, de. Yahuajo nei nei ecuanaja etiiquiana ba'ya poa meshi pana ca jeahuajo. Oya jayojjaya jama poani ojjaña jjeya nei. Jama tii tii. Poe o'oya ajja Jesusa —siajje poaje dejja mimishi cuana.

<sup>5</sup> Oya cuana aje oe quea mimishi; Eyacuiñajjiya pana'yo cuana yahuajo nei pajea'yo sa poani. Yahuajo nei nei Eyacuiñajjiya ojjaña aquiana cuana eyajo pana ca'ya poa. Majameta cuana, ba'i, eshequi pea'ai pana ca'ya poa. Meshi cuana pana ca'ya poa. Aquiana cuana ojjaña meshijo pana ca'ya poa, dejja cuana pea'ai. Yahuajo nei nei chama' meshi poa. Ena nei ania poa. Jamajjeya Eyacuiñajjiya ena huosa mee ca poa. Meshi ani coa poa. <sup>6</sup> Yahuajo nei Eyacuiñajjiya ena jjayehuejjequi mee ca o'oya poa. Ojjaña

mimishi cuana ojjaña meshijo ba'e hui'i'ya poa. <sup>7</sup> Jjeya nei aquiana cuana eyajo nequi, aquiana meshi cuanajo yani pea'ai. Eyacuiñajjiya ojjaña aquiana nequi mee cani. Quijje ojjaña aquiana eyajo nequi, ojjaña cuana meshijo nequi pea'ai quiyojea mee caje'yo. Chama'yo tii po mee caje'yo ojjaña aquiana cuana. E'e, Jesosa poe o'oyajo, ojjaña mimishi cuana quea nee nee po mee caje'yo quea mimishi poanaje sosejje, Eyacuiñajjiya. E'e, ojjaña quea mimishi poani quiyo tiitii nequije'yo cuaquijo.

<sup>8</sup> Ecuea epeeji cuana, ¡pea esohui ecuea shajja'ajjacue! ¡A'a pajea'yojji! Eyacuiñajji ba'e tiitiiani. Jamajjeya quea huiso nee nee, mil shequijame oe cahuime jayojjaya poani ojo, oya jayojjaya. <sup>9</sup> Eseyaya Emeshi Mese nei Jesusaja epajea'yojji pojjeama ojaya esohui o poe o'oyajjiyo. Jamaya acaje ohuaya e'e jojo nei. Pea cuana sijaje poani jama ba'a: —Jesusaa ojaya esohui pajea ca'yonaje, de; poe'yo ajja.

Chojja. Jesosa quea mase pojjeamaa jjejojo ishoa cani tii tii ojjaña cuanaja mimishi epajea'yojji. E'e, ese jeajea sa po ajja oya cuaqui yasijje. Quea boejea po mee sa acani ojjaña. <sup>10</sup> Quijje Emeshi Mese nei Jesosa poecuajije quea huiso ojo jjashahuabaqui ajja yanijo. Siipojji poecuajiani jayojja jama poecuajime Jesosa poaje. Oya poe o'oyajo, ojjaña aquiana eyajo chama'yo tii poaje; quiyojeyo'yo quea shajjaquijjo. Ojjaña meshi cuana, ojjaña aquiana meshijo nequi pea'ai quiyo'yo majje chama'yo tii poaje'yo. <sup>11</sup> E'e, quijje ojjaña aquiana quiyojeyo caje'yo. Jamajjeya ¿ae shai poaje miquianaya jjeya nei? ¡A'a quea mimishi pojji! ¡Ba'ecue quea pame nee nee! ¡Eyacuiñajjiya esohui jayojja jama acue quea bihui nee! <sup>12</sup> ¡Jamaya pocue Jesosa ishoa'ajja poani! E'e, jojo chaco tiitiicue! Jamajjeya Jesosa poecuajije jjeya nei pojja'a. Ojo chaco ajjajo, oya jjeya nei poe'yo ajja pojja'a, quijje pojja'a poeje'yo. Oya poe o'oyajo, ojjaña aquiana eyajo nequi quiyojeyo caje'yo. Ojjaña aquiana quiyo jeyojeyo'yo. <sup>13</sup> Yahuajo nei Eyacuiñajjiya huohui ca poa jama ba'a: —Quijje eyaya aquiana cuana eyajo panaje'yo eyacua. Meshi eyacua panaje'yo pea'ai eyaya. Jomajo ojjaña cuaa ecuea esohui jayojja jama atiitii caje'yo quea pame, mimishi'ama —jamaya Eyacuinajji poanaje.

Ecuaaya ishoaña meshi eyacua, eya eyacuajo pea'ai de, quea boejea'yo eba'e'yojji.

<sup>14</sup> Ecuea epeeji cuana, ¡bacue! ¡Miquianaya Jesusaja epoe o'oyajji ishoaña ba'ecue Eyacuiñajjiya esohui jayojja jama! Jamajjeya Eyacuiñajjiya ba caje miquianaya ojaya epeeji quea pame nee. ¡Jesosa nijje jjapeequicue e'e jojo nei! Jamajjeya Eyacuiñajji miquiana nijje quea bei po tiitiije'yo. <sup>15</sup> Jesosa quea tecue pocuaji ajja mimishi cuana nijje. Ishoa cani, jamajjeya mi poe'yani. Jamajjeya ¡jjeya onijje jjapeequi'yocue! Ohuaya eseya ba'e tiitii mee caje'yo onijje eyajo. Jamaya ecuanaja epeeji Pabohua tehue canaje pea'ai miquiana huasijje, ecuea etehue'yo jayojja. Jamaya Eyacuiñajjiya Pabo jjashahuabaqui meesahua ca'yonaje quea ja'a nee. <sup>16</sup> E'e, ecuea etehue'yo Jesusajo jayojja jama Pabohua tehue canaje quea huiso nee. Beca esohui ojaya esohui etehue'yo quea camaja ebajji. Jamajjeya beca cuana jjashahuaba quehuaquianijo quea ja'a nee huohui ajja Paboya esohui etehue'yo. Oya cuana sijaje poani esohuijo. Jamajjeya quijje Eyacuiñajjiya oya cuana quea nee nee po mee caje'yo.

<sup>17</sup> E'e epeeji cuana, jamaya miquianajaya eba. Jamajjeya ¡a'a shajja'ajjaji sijajepojji cuanaja esohui! Oya cuana shajja'ajja majje jjashahuaba quehuaqui chana'. E'e, esohui huohuijji nisho cuana Eyacuiñajjiya esohui jayojja jama a sa po ajja. ¡O jayojja jama a'a pojji! <sup>18</sup> E'e, Jesosa Quitohua, eseyaya Emeshi Mese neiya eseya quea boejea po mee'yo majje ba'e tiitii mee caje'yo onijje eyajo. ¡Ojaya epeeji quea ca'a nee nee po tiitiicue! Yahuajo miquianaya ojaya epeeji eyacua quea ca'a pishana poanaje. Jamajjeya oe pojji miquianajaya eba poanaje. ¡Ojjaña esohui cuana Jesosa Quitojo ba neinei poquiacue! Mahuiso ecuea esohui.

¡Ojjaña cuaa Jesosa Quito cabihuia tiitii cahua: —Jesosa Quito, miya quea pame nee nee —jamaya ca'a cahua!

Eyaya, Penohua jiquio esohui e'e nei cuana tehuejeyonaje. Apoa.

## HUANIJA ETEHUE'YO EBIONEI 1 JUAN

### *Huaniya tehue canaje eba'e tiitii'yojjjo*

<sup>1</sup> Epeeji cuana, eyaya, Huaniya miquiana que esohui tehueaña Jesosa Quitojo. Yahuajo nei nei meshi, aquiána cuana, dejja pea'ai pana coo jjimahuajo oya yaña tii tiia poa. Jamajjeya Jesosa Quitohua eseya Eyacuiñajji ba mee caní, eseya ba'e tiitii mee caní pea'ai. E'e jojo nei eyaya oya shajja'ajjanaje ecue eshajjaa. Eyaya oya banaje ecue ecojjaa. O ba neinei majje eya quea bihui nee poanaje. Oya ese jayojjaya poanaje, yamijji. Jamajjeya eya onijje jjapeequinaje. <sup>2</sup> E'e, Jesosa ese jayojja poeyanaje yamijji, ese ba'e tiitii mee'yohua. Eyaya oya banaje e'e jojo nei. Jamajjeya eyaya miquianaya jama huohuime aña ba'a: Yahuajo nei nei Jesosa Quito yaña tiitii poa Eyacuiñajji nijje, oja Chii nijje. Eseja Chii neiya Eyacuiñajjiya oya meshi yasijje huoojea canaje ese jayojja epojji, yamijji. Eseyaya mimishi cuijea'yo majje ohuaya eseya cuana ba'e tiitii mee caje'yo onijje eyajo. <sup>3</sup> E'e, eyaya oya, Jesosa Quito banaje; ojaya esohui shajja'ajjanaje pea'ai. Jamajjeya aje jja mi oe eyaya miquianaya huohuíaña enijje ejjapeequi'yojji. Jamajjeya eseya Eyacuiñajji nijje, eseja Chii nei nijje jjapeequiani, oja Bacua Ejja Jesosa Quito nijje pea'ai jjapeequi poquiani. <sup>4</sup> Jamajjeya jiquio esohui cuana eyaya tehueaña miquiana quea bihui nee nee po meeji. Jamajjeya Jesosaja epeeji poanijo quea bihui nee nee poaje'yo.

### *Eyacuiñajji quea ja'a nee nee enequi tii mimishi'ama*

<sup>5</sup> Epeeji cuana, eyaya Jesosa Quitoja esohui shajja'ajjanaje. Maya eyaya miquianaya huohuíaña jama ba'a: Eyacuiñajji quea ja'a nee nee poani tii. Jiquio ecua cuaquijjiya mecajje jijinequianiya ojjaña jeaja'a caní jayojja jama ohuaya eseya cuana, dejja mimishi cuana quea ja'a nee jjashahuabaqui mee caní. Eyacuiñajji mimishi'ama tii tii, quea tai pojjeama; Eyacuiñajji quea apo pojjeama epojjajo jama tii tii oya ba'e. <sup>6</sup> Jamajjeya joya mimishi po majje quea apo jayojja tii ba'yani mimiani jama ba'a: —Eya Eyacuiñajji nijje jjapeequiani —Eyacuiñajji nijje jjapeequiani poso oya jjabaquiani, siajje poani.

Chojja. Jjapee neineiquiani pojjeama mi coma, jjadasiaquiani jja mi coma. Jiquio ecua se mecajje quea misijo poquiquehuani jayojja jama oya poani. <sup>7</sup> Eyacuiñajji ca ca quea ja'a nee nee poani tii, quea boejea nee nee. Jamajjeya Eyacuiñajji jayojja jama quea ja'a nee ba'yanijo eseya jjapeequiani quea pame nee Jesosaja epeeji cuana nijje. Jesosa Quitoja ena' cuayaqui'yo majje oya esejo mano'yonaje. Jamajjeya onijje jjapeequiani, eseja Chii Eyacuiñajjiya eseyaya mimishi cuana cuijea ca poqui'yani.

<sup>8</sup> Ojjaña joya jama poani ba'a: —Iña ca ca mimishi'ama —jamaya quea quehua jjashahuabaquiani. Jamaya jjabaquiani Jesosa ojaya ba jjima nei nei.

<sup>9</sup> Eyacuiñajji nijje mimiajo ca ca ohuaya eseyaya mimishi cuana cuijea caje'yo. E'e, jama poajo ba'a: —Eyacuiñajji, eya quea mimishi poani. ¡Ecuea mimishi cuana cuijea'yocue! —jamaya mimiajo ohuaya ojaya esohui jayojja jama acaje'yo e'e jojo nei.

E'e, Jesosa eseyaya mimishi cuana mano'yonajejo ohuaya eseja mimishi cuana cuijea'yo majje mimishi pajea meesahua caje'yo. Eseyaya quea boejea po mee caje'yo. <sup>10</sup> E'e, Eyacuiñajjiya jama aca poa ba'a: —Ojjaña cuana quea mimishi nee nee poani —ohuaya aca poa.

Jamajjeya ojjaña joya jama poani ba'a: —Chojja, iña ca ca mimishi'ama —jama poaniya siajjepojji. Eyacuiñajji siajje poani posoya acani pea'ai. Jamajjeya ojjaña joya jama poani Eyacuiñajjiya esohui etehue'yo ba po jjima jayojja poani.

## 2

*Jesosa Quito esejo mimiani Eyacuiñajji nijje*

<sup>1</sup> E'e ecuea epeeji cuana, miquiana mimishi'ama po meesahuajji eyaya jiquio esohui tehueaña. Jamatii eseya quea mimishi poajo, Jesosa Quito esejo mimiani Eyacuiñajji nijje, oja Chii nijje jama ba'a: —Ecue Chii, eya mano'yonaje ecuea epeeji cuanaja mimishi cuana cuijea'yojji sosejje. Jamajjeya ja'a quea quene pojji onijje! —jamaya Jesosa poani.

Jesosa Quito ca ca oe mimishi'ama, quea pame nee nee. Jamajjeya Eyacuiñajjiya Jesosa onijje mimiajo shajja'ajja cani, jamaya acani esejo. <sup>2</sup> E'e, Jesosa acui ecueata'apeejo mano'ya poa eseya mimishi cuana cuijea'yojji sosejje. Ojjaña cuana ojjaña meshijo ba'eca cuanaja mimishi cuijea'yojji sosejje Jesosa mano'yonaje.

*¡Eyacuiñajjiya esohui jayojja jama ba'ecue!*

<sup>3</sup> E'e ecuea epeeji cuana, Jesusaja esohui cuana jayojja jama añajo eseya ojaya epeeji poani e'e jojo nei; onijje ba'e tiitiije'yo eyajo. Jamaya esejaya eba. <sup>4</sup> Beca cuana aje oe jama poani ba'a: —Eya ca iña Jesusaja epeeji poani —jama posoya jjabaquiani cuana.

Jamatii oya cuana aje oe Jesusaja esohui jayojja jama ba'e ajja. Jamajjeya oya cuana siajje poani. Jesosa ojaya ba jjima. <sup>5</sup> Ojjaña joya Eyacuiñajji quea jea nee nee ajji poani ca ca ojaya esohui jayojja jama ba'yani. Jamajjeya ¡Eyacuiñajjiya esohui jayojja jama ba'e tiitiicue Jesosa Quitoja epeeji quea ja'a nee epojji! <sup>6</sup> Jamajjeya ojjaña joya e'e jojo nei jama poani ba'a: —Eya Jesosa Quito nijje jjapeequiani —jamaya poanijo ¡quea pame nee nee caba'yahua, Jesosa Quitohua aca poa jayojja jama ca'a cahua! Jamaya ba'yanijo eseya e'e jojo nei ojaya epeeji jjabaquije.

*¡Pea cuana quea jea nee nee acue!*

<sup>7</sup> Epeeji cuana, yahuajo nei Eyacuiñajjiya esohui huohuijjiya esohui tehue ca poa miquianaja ebajji. Ma esohui miquianaaya shajja'ajjanaje Jesosa nijje jjapeequi jeahuaa. Ma esohui etehue'yo eyaya tehue o'oyaña miquiana jjashahuabaqui meeji. <sup>8</sup> Jamatii eyaya ma esohui tehue etii jayojjaya tehue o'oyaña miquiana huasijje jama ba'a: —¡Pea cuana quea jea nee nee acue!

Jiquio esohui jayojja jama aca poa Jesusaa; pea cuana quea jea nee nee aca poa. Yahuajo ojjañaja ejjashahuabaquijji cuana quea tai, quea quehua poa Eyacuiñajjiya esohui e'e nei shajja'ajja jjimahuajo. Jjeya ca ca miquianaaya Eyacuiñajjiya esohui jama pea cuana quea jea nee nee aña pea'ai. Ma esohui e'e nei cuaquijji jayojja jamaa ojjaña quea ja'a jjashahuabaqui meesahua cani. <sup>9</sup> Jamajjeya ojjaña joya jama poani ba'a: —Eya Jesusaja esohui jayojja jama ba'yani quea ja'a nee —jamaya poani aje oe siajje poani.

Jesosaja epeeji nijje quea quene nee poani tii tiijo quea mimishi nee ba'yani, Jesusaja esohui shajja'ajja nisho cani, Jesusaja epeeji e'e jojo nei pojjeama. <sup>10</sup> Ojjaña joya Jesusaja epeeji cuana quea jea nee nee acani ca ca quea ja'a nee nee ba'yani. Jesosa jayojja jama ba'yani. Jamajjeya ohuaya pea epeeji poquiquehua mee'yo jjima acani, quea mimishi po mee'yo jjima acani. <sup>11</sup> Ojjaña joya Jesusaja epeeji cuana nijje quea quene nee nee poani ca ca quea mimishi tii ba'yani. Jiquio ecua se ecojja bebo poqui taiyani jama, ejiojji ba jjima jayojja jama oya cuana poani quea mimishi ba'yani jjejojo.

*¡Jesusaja epeeji cuana etii, esho'i pea'ai quea ja'a nee ba'ecue!*

<sup>12</sup> Ecuea epeeji cuana, miquianaya Jesusaja epeeji poanijo, Eyacuiñajjiya miquea mimishi cuana cuijea ca'yonaje. Jamajjeya eyaya jiquio esohui tehueaña miquianajaya ebajji. <sup>13</sup> Yahuajo nei nei meshi pana jjimahuajo Jesosa eba'e tiitiia poa. Jesosa nijje jjapeequianijo eyaya miquiana huasijje esohui tehueaña edejja tii cuana huasijje. Shacuima' nequi cuana, miquianaya Edosiquiana jeabichajea'yojji epo. Jamajjeya eyaya miquiana huasijje esohui tehueaña pea'ai. Esho'i cuana, Eyacuiñajji eseya Chii nei miquianajaya eba. Jamajjeya eyaya miquiana huasijje tehueaña pea'ai. <sup>14</sup> E'e edejja tii cuana, Jesosa yahuajo nei nei eba'e tiitiia poa miquianajaya eba. Jamajjeya eyaya esohui tehueaña miquianajaya ebajji. E'e shacuima' nequi cuana, miquianaya quea ca'a poani, dejja tii'yo jjima. Eyacuiñajjiya esohui jayojja jama aña. Jamajjeya miquianaya Edosiquiana jeabichajea'yojji epo pea'ai. Jamajjeya eyaya miquiana huasijje tehueaña pea'ai.



*¡A'a yahuajo jama ba'e sa pojji Jesusaja epeeji pojjeama jama!*

<sup>15</sup> Epeeji cuana, ¡a'a yahuajo jama ba'e sa pojji quea mimishi, Jesusaja epeeji pojjeama jama! Aquiana cuana jiquio meshijo ani ¡a'a quea jea nee ajji! ¡A'a aquianajo jjashahuaba tiitiquijji! E'e, Jesusaja epeeji pojjeama jama ba'e sa poanijo, aquiana cuanajo jjashahuaba tiitiquianijo pea'ai Eyacuiñajji, eseja Chii nei miquea quea boti pojjeama. <sup>16</sup> E'e, Jesusaja epeeji pojjeama cuana Eyacuiñajjijo jjashahuabaqui ajja nei nei. Chojja, oya cuana jjashahuabaqui jiquio meshijo eba'ejjijo jama ba'a: Quea mimishi nee nee ba'e sa poani; aquiana cuana ba majje jea ba neinei cani pea'ai; quea dejja tai poani, quea nishelui pea'ai poani. Dejja quea dejja tai jayojja jama ba'e sa poani quea aquiana huiso nee nee. Ona huoojeajji po sa poani pea'ai. Jamaya ba'e sa poani eshahuaja epeeji cuana. <sup>17</sup> Jamatii joya aquiana ojjaña cuana sa neinei poani chama'yo tii poaje'yo. Ojjaña quea mimishi nee jjashahuabaqui, Jesusaja epeeji pojjeama quea nee nee poaje'yo tii tii. Ojjaña joya Eyacuiñajjija esohui jayojja jama ba'yani ca ca ba'e tiitije'yo onije eyajo. Jamajjeya ¡yahuajo jama a'a ba'ejji, Jesusaja epeeji pojjeama jama!

Jesosa Quito cuiajji epojji nisho poeje, Emeshi Mese nei nisho poaje. Esey a ca ca Jesusaja epeeji e'e jojo nei poani. <sup>18</sup> Ecuea epeeji cuana, ¡shajja'ajjacue mo! Yahuajo eyaya miquianaya huohuinaje jama ba'a: —Quijje Jesosa poe jjimahuajo oe dejja poeje. Oya pea, Edosiquiana neija epeeji; dejja jayojja nei neiya oya poeje. Jesosa Quito cuiajji nisho poaje; ojjañaja Emeshi Mese nei nisho poaje —jamaya eyaya huohuinaje.

Jamatii jjeya nei Jesosa Quito cuiapanajji poani yani, emeshi mese nei nisho quea huiso yani pea'ai. Jamajjeya esejaya eba Jesusaja epoe o'oyajji beshahua nei apoa. <sup>19</sup> Jiquio Jesosa Quito cuiapanajji poani cuana yahuajo pishana ese nijje nequinaje. Jamatii oya cuana Jesusaja epeeji nei pojjeama poa. Jamajjeya ese nijje nequi tiitii ajja poa. E'e, oya cuana Jesusaja epeeji nei epo jjemo ese nijje nequi tiitii'yo quiaye. Oya cuana ca ca poqui'yonaje. Jamajjeya esejaya eba oya cuana Jesusaja epeeji nei pojjeama.

<sup>20</sup> Miquiana que ca ca Jesosa Quitohua Edojjoshahua Pame huoojea canaje. Ohuaya miquianaya ojjaña Jesosa Quitoja esohui e'e nei ba mee canaje. <sup>21</sup> Jesusaja esohui e'e nei miquianajaya ebaajo eyaya jiquio esohui miquiana huasijje tehueaña. E'e, miquianajaya eba siajjepojji cuana Jesusaja epeeji pojjeama. <sup>22</sup> Siajjepojji cuaa aje oe jama huohuime acani ba'a: —Jesosa ca ca oma Eyacuiñajjija huoojea'yo ojjaña jaahuanajji pojjeama, Quito pojjeama.

Ojjaña joya jamaya Jesusajo poani aje oe Jesosa Quito Eyacuiñajjija Bacua Ejja pojjeama poso acani. Jamajjeya ohuaya Eyacuiñajji, eseja Chii nei cajaa acani pea'ai. E'e, oya cuana aje oe Jesosa Quito cuiapanajji poani. <sup>23</sup> E'e, ojjaña joya Jesosa Quito Eyacuiñajjija Bacua Ejja pojjeama poso ajji poani Eyacuiñajji nijje jjapeequi ajja pea'ai. Joya Eyacuiñajjija Bacua Ejja nijje jjapeequiani Jesosa nijje ca ca eseja Chii nei eyajo ani nijje pea'ai jjapeequiani.

<sup>24</sup> Jamajjeya esohui quea pame nee Jesusajo, ma miquiaa shajja'ajja cooa poa ¡a'a pajea'yojji! ¡Jamaya atiitiecue! E'e, ma esohui pajea'yo ajjajo miquianaya Eyacuiñajjija Bacua Ejja nijje jjapee tiitiquije'yo Jesosa nijje. Eyacuiñajji eseja Chii nei nijje jjapee tiitiquije'yo pea'ai. <sup>25</sup> E'e, yahuajo nei ecuana nijje nequiahuaa Jesosa Quitohua huohui ca poa jama ba'a: —Eyaya miquianaya, ecuea epeeji cuana ba'e tiitii meeje'yo enije eyajo —jamaya ecuana huohui ca poa Jesusaa.

<sup>26</sup> Ecuea epeeji cuana, eyaya jiquio esohui e'e nei tehuenaje miquiana huasijje siajjepojji cuanajo, ma Jesosa cuiapanajji epo cuanajo. Poquiquehua mee ca chana' mi. <sup>27</sup> Miquiana que ca ca Jesosa Quitohua Edojjoshahua Pame huoojea ca'yonaje. Oya, Edojjoshahua Pame miquiana nijje nequi tiitiani. Ohuaya miquianaya Jesusaja esohui ba meesahua cani quea ja'a nee. Jamajjeya pea esohui huohuijji chamajo jamatii Edojjoshahua Pameya miquianaya ojjaña Eyacuiñajjija esohui e'e nei ba meesahua cani quea ja'a nee. Oya siajjepojji pojjeama. Jamajjeya ¡ojaya esohui cuana jayojja jama ba'ecue Jesosa Quito nijje ejjapee tiitiqui'yojji!

*Jesosaja epeeji cuana*

<sup>28</sup> Jamajjeya ecuea epeeji cuana, ¡Jesosa Quito nijje jjapee tiitiquicue bicho'ama epojji! Jamajjeya Jesosa Quito poe o'oyajo ojo eseya mete'ama poaje. Ohua cojja ba neinei cajje eseya bicho'ama poaje'yo. <sup>29</sup> Miquianajaya eba Jesosa Quito mimishi'ama, quea pame nee nee. Jamajjeya ojjaña joya mimishi'ama, quea pame nee nee ba'yani Jesusaja epeeji cuana poani.

### 3

<sup>1</sup> ¡Jashahuabaquicue! Eseja Chii nei Eyacuiñajjiya eseya quea jea nee nee acani. Jamajjeya ohuaya jama acanaje ba'a: —Eyaya miquianaya ecue bacua cuana po meenaje —jamaya acanaje ohuaya.

E'e, ohuaya eseya oja bacua cuana po mee ca'yonaje. Jamajjeya pea cuana Jesosa nijje jjapeequi sa po ajjajo ese nijje jjapeequi ajja pea'ai.

<sup>2</sup> Ecuea epeeji cuana, jjeya eseya Eyacuiñajjiya bacua cuana. Jamatii quiije ¿ae jayojja eseya poaje'yo? Maya esejaya ba jjima jjeya. Jamatii esejaya eba Jesosa Quito poe o'oyajo eseyaya oya baje ecojja. Jamajjeya eseya jjashahuabaquiani jama ba'a: —E'e jojo nei Jesosa Quito poe o'oyajo eseya o jayojjaya nei nei poaje'yo.

<sup>3</sup> Quea pame nee nee Jesosa. Ojjaña joya jama jjashahuabaquime po'ani tii Jesosa Quitojo jja'ishoa'ajjaquiani. Mimishi cuana pajea neinei ca'yani pea'ai. Quea boejea ba'yani Jesosa Quito jayojja epo'yojjiya.

<sup>4</sup> Shajjama' cuaa ca ca mimishi acanijo Eyacuiñajjiya ejjashahuabaquiji quea pame nee jayojja jama po ajja. E'e, jamajjeya Eyacuiñajjiya esohuijo jjashajja'ajjaqui ajjaje quea mimishi poani. <sup>5</sup> Eseyaya eba Jesosa Quito mimishi'ama nei nei. Oya poeyanaje eseja mimishi cuana cuijea'yohua. <sup>6</sup> Jamajjeya Jesosa Quito nijje jjapeequi'yo majje eseya mimishi amaja sa po'yo ajja; pajea'yaña seya. Ojjaña joya mimishi atiitii sa poani ca ca Jesosa Quito nijje jjapeequi jjima, ojaya ba jjima, de.

<sup>7</sup> Ecuea epeeji cuana, ¡quea ja'a nee jjashahuabaquicue pea cuanaja miquianaya edasiajji pojjeama! Jesosa Quito quea pame nee nee, mimishi'ama. Jamajjeya ojjaña joya Jesosa Quito jayojja mimishi'ama ba'yani oya cuana quea pame nee pea'ai poani. <sup>8</sup> Joya mimishi ahuicha'a huicha'ajji poani ca ca eshahuaja epeeji poani. E'e, Edosiquiana nei yahuajo nei nei yaña poa meshijo. Ohuaya mimishi acoo ca poa. Eyacuiñajjiya Bacua Ejja Jesosa ca ca meshi yasijje poeyanaje ojjaña cuana mimishi pajea mee'yohua, eshahua cuana quea nee nee po meeya, eshahuaja epeeji cuana pea'ai.

<sup>9</sup> Eseyaya, Eyacuiñajjiya bacua cuana ca ca oe mimishi atiitii sa po'yo ajja, Edojjoshahua Pameya ecuana huasijje edobiquinequiya eyacua po mee cani. E'e, ohuaya eseya Eyacuiñajjiya ejjashahuabaquiji jayojja jama jjashahuabaqui mee cani. Jamajjeya eseya Eyacuiñajjiya bacua po majje mimishi epo maja'yojji pojjeama. <sup>10</sup> Jamajjeya eseyaya Eyacuiñajjiya bacua cuana baña jama ba'a: Ojjaña joya mimishi a sa po'yo ajja, Eyacuiñajjiya esohui jayojja jama ba'yani Eyacuiñajjiya bacua cuana. Ojjaña joya mimishi atiitijji poani, pea cuana quea jea a'ajja pea'ai, Jesusaja epeeji cuana nijje jjapeequi ajja pea'ai ca eshahuaja epeeji cuana, Edosiquianaja bacua cuana.

*¡Pea cuana oe quea jea nee ejja'aqui!*

<sup>11</sup> E'e ecuea epeeji cuana, ¡pea cuana oe quea jea nee nee ejja'aqui! Jamaya yahuajo onijje jjapeequi jeahuajo Jesusaa eseya huohui coo ca poa. <sup>12</sup> Jamajjeya ¡a'a Adanaja bacua Caini jayojja jama pojji! Oya eshahuaja epeeji poa. Jamajjeya oja chahua sapa cuiahuejjajea ca'ya poa. E'e, oja chahua quea pame poanajejojo Caini onijje quea quene nee poa; quea mimishiya jjejojya oja chahua cuiahuejjajea ca'ya poa. <sup>13</sup> Jamajjeya oya jayojjaya Jesusaja epeeji pojjeamaja miquianaya boti'ama pea'ai acajje a'a jjashahuabaquiji jama ba'a: —¿Apiojji shai eya onajaya boti'ama?

Oya cuana eshahuaja epeeji cuana, Caini jayojja. Eseyaya ca ca Jesusaja epeeji, echahua mese jayojja. Jamajjeya ese nijje quea quene nee poani.

<sup>14</sup> Eseyaya Jesusaja epeeji cuana quea jea nee nee añ. Jamajjeya esejaya eba e'e jojo nei eseya pea jjashahuabaquime poani, yahuajo jama pojjeama. Jamajjeya eseya

Eyacuiñajji nijje ba'e tiitiije'yo eyajo; cuaqui yasijje epoqui'yojji pojjeama. Joya pea cuana quea jea a'ajja ca ca quea nee nee poaje'yo, cuaqui yasijje poquije'yo tii tii pea jjashahuabaquime po'yo jjima jjejojo. <sup>15</sup> Joya pea cuana nijje quea quene nee nee poani aje oe pea quecuajji poani. Eseyaya eba pea quecuajji cuana eshahua nijje jjapeequiani tii; oya cuana eba'e tiitii'yojji pojjeama eyajo.

<sup>16</sup> Jesosa Quito esejo mano'ya poa eseja mimishi cuijea'yojji. Jamaya eseyaya eba e'e jojo nei eseya ojaya quea jea nee nee. Jamajjeya ¡Jesosaja epeeji cuana quea jea nee nee ejja'aqui pea'ai; oya cuana ejjaba'e meesahuaqui! <sup>17</sup> Epeeji quea dejja taiya ca ca quea aquiana huisohua ojaya epeeji aema' nei nei ba majje aquiana quia jjima acani; quea mano jaa, quea shoe nee ba majje jjashahuabaqui ajja, ba'e meesahua sa po'yo ajja ojaya quea jea pojjeama jojoya. Jamajjeya oya Eyacuiñajji jayojja jama po ajja Eyacuiñajji ojaya quea jea pojjeama jojoya. <sup>18</sup> Ecuea epeeji cuana, ¡shajja'ajjacue mo! Pea cuana eseyaya quea jea nee poanijo ¡jaya cuana quea pame nee nee ejjaba'e meesahuaqui! Jamaya quea pame nee. Eseyaya pea cuana quea pame ajjimajo ca ca jama siajje pome se poani ba'a: —Pea cuana ca ca ecuea quea jea nee poani —jama siajje pomeya se poani.

*¡Pea cuana quea jea ejja'aqui Eyacuiñajji bicho'ama epoji!*

<sup>19</sup> E'e, Jesosaja epeeji cuana quea jea nee eseya añajo Jesosaja esohui e'e nei jayojja jama ba'yaní, Jesosa nijje jjapeequiani quea pame nee nee pea'ai. Jamajjeya Eyacuiñajji cojja nei nequi majje bicho'ama eseya poaje'yo. <sup>20</sup> E'e pojja'a eseya quea yeno jjashahuabaquiani jama ba'a: —Eseyaya Eyacuiñajji eba nei nei. Ojaya eya eba quea mimishi poanaje —jamaya pojja'a poani.

¡Bacue! Eyacuiñajjiya eseya mimishi cuijea ca poqui yani. Jamajjeya ¡yeno'ama pocue! <sup>21</sup> E'e epeeji cuana, eseya ejjashahuabaqui jama ba'a: —Eya Jesosa nijje jjapeequiani. Jamajjeya Eyacuiñajjiya ecuea mimishi cuijea ca'yonaje. Enijje quea bei poani.

Jamaya e'e jojo nei poanijo eseya bicho'ama poani Eyacuiñajji nijje emimijji. <sup>22</sup> E'e, Eyacuiñajji esohui jayojja jama eseya añajo, Jesosa nijje jjapeequianijo pea'ai Eyacuiñajji quea bihui nee ese nijje poaje. Jamajjeya onijje mimiajo ohuaya eseya shajja'ajja caje. Ma ecua eseya onijje miminaje jamaya ohuaya acaje.

<sup>23</sup> E'e, Eyacuiñajjiya eseya huohui ca poa jama ba'a: —¡Ecue Bacua Ejja Jesosa Quito nijje jjapeequicue! ¡Jesosaja epeeji cuana quea jea nee nee acue pea'ai! —jamaya ohuaya eseya huohui ca poa.

<sup>24</sup> Ojjaña joya Eyacuiñajji esohui jayojja jama ajji poani Eyacuiñajji nijje jjapeequiani. Eyacuiñajji ona nijje jjapeequiani pea'ai. Eyacuiñajjiya Edojjoshahua Pame huoojea canaje ese que dobiquiya. Ohuaya eseya ba mee cani Eyacuiñajji ese nijje nequi.

#### 4

*Jesosaja epeeji nishohua mi dasia ca chana'*

<sup>1</sup> Ecuea epeeji cuana, ¡ojjaña esohui huohuijji cuanaja esohui a'a shajja'ajjajji! Chojja, beca cuana Edojjoshahua Pameja huoojea'yo pojjeama, esohui huohuijji nisho. Jamajjeya ¡ojjaña cuana ba neineicue! Quea ja'a nee jjashahuabaquicue jama ba'a: —¿A'a oya cuana Eyacuiñajji esohui e'e nei jayojja jama huohui cani?

E'e, quea huiso siajjepojji cuana ojjaña huasijje poquiani. Siajje poani jama ba'a: —Eyacuiñajjiya eya huoojea canaje ojaya esohui huohuiya.

<sup>2</sup> Jamajjeya Eyacuiñajji esohui huohuijji e'e nei miquea eba poaje jama ba'a: Edojjoshahua Pameya oya cuana huohui meesahua caje jama ba'a: —Jesososa Quito ese jayojjaya yamijji poeyanaje.

Jamajjeya jamaya ohua huohui cajo miquea eba oya cuana Edojjoshahua Pameja huoojea'yo esohui huohuijji poani.

<sup>3</sup> Pea cuana ca ca esohui huohuijji nishohua jamaya huohui ajja. Chojja, oya cuana siajje poani jama ba'a: —Jesososa Eyacuiñajji huoojea'yo ojjaña jaahuanajji pojjeama. Eyacuiñajji Bacua Ejja meshi yasijje poe jjima dejja jayojja yamijji —jamaya huohui

canijo aje oe miquianajaya eba oya cuana esohui huohuijji nisho, Jesosa Quito quecuajji nisho epo. Eyacuiñajjija oya cuana huoojea jjima.

Yahuajo eyaya miquianaya huohuinaje oya cuana poeje. Jjeyahua nei oya yani quea huiso. Ojjaña huasijje poquinaje jjadasiaquiya.

<sup>4</sup> Ecuea epeeji cuana, miquianaya ca ca Eyacuiñajjija bacua cuana poanaje. Jamajjeya ohuaya miquianaya dasia mee jjima acani Jesusaja epeeji pojjeama cuana. Miquianaya ona jeabichajeajji jayojja jama poani. E'e, Eyacuiñajjija Edojjoshahua Pame miquianajo nequi ca ca oe quea ca'a nee nee. Eshahua cuana, Edosiquiana quea ca'a pishana. Eshahuaa miquianaya quea mimishi po mee'ajja cani. <sup>5</sup> Esohui huohuijji nisho cuana eshahua nijje jjapeequianiya jjejojo Eyacuiñajjija esohui jayojja jama huohui ajja. Eba'ejji quea mimishi onaaya quea boti nee nee acani. Dejja mimishiya jayojjaya huohui cani. Jamajjeya mimishi cuaa oya cuana shajja'ajja cani. <sup>6</sup> Esey a ca ca Eyacuiñajjija bacua cuana poani. Jamajjeya Jesusaja epeeji cuana Eyacuiñajji nijje jjapeequiani pea'aiya jjejojo esejaya esohui shajja'ajja cani. Pea cuana Jesusaja epeeji pojjeama ca ca Eyacuiñajji nijje jjapeequi sa po'yo ajja; ecuanajaya esohui shajja'ajja sa po'yo ajja. Jamajjeya Jesusaja epeeji nei esejaya eba; ohuaya esejaya esohui shajja'ajja cani. Pea cuana, eshahuaaja epeeji cuana esejaya eba pea'ai; oya cuana esejaya esohui shajja'ajja sa po'yo ajja.

*Ojjaña Eyacuiñajjija quea boti nee poani*

<sup>7</sup> Epeeji cuana, miquianaya ecuea quea jea nee poani. Ojjaña cuana Eyacuiñajjija quea jea nee nee poani. Jamajjeya pea cuana quea jea nee nee ejja'aqui tii tii. E'e, jamajjeya eseya Eyacuiñajjija bacua poanijo o jayojja jama poani. Pea cuana quea jea nee nee ejja'aqui Jesosa nijje jjapeequianijo. <sup>8</sup> Ojjaña joya pea cuana boti'ama poani ca ca Eyacuiñajji nijje jjapeequi ajja, Eyacuiñajji ba po jjima pea'ai. E'e, Eyacuiñajjiya ojjaña cuana quea jea nee acani tii tii. <sup>9</sup> Esey a cuana ojaya quea jea nee nee. Jamajjeya ohuaya oja Bacua Ejja oe nei Jesosa huoojea ca poa ese que, jiquio meshi yasijje. Jama ohua acanajejoya, ojjañaja eba eseya Eyacuiñajjiya quea jea nee nee acani. E'e, Jesosa ese que poeyanaje esej a mimishi cuana cuijea'yohua. Jamajjeya eseya onijje ba'e tiitii mee caje'yo eyajo quea pame nee nee. <sup>10</sup> ¡Bacue! Yahuajo nei esejaya Eyacuiñajji boti'ama poa. Jamatii ohuaya ca ca oe ebionei eseya quea jea nee aca poa. Jamajjeya ohuaya ojaya Ebacua Ejja Jesosa Quito huoojea ca poa ese que, mano'yohua esej a mimishi cuijea'yojji sosejje. <sup>11</sup> Ecuea epeeji cuana, Eyacuiñajjiya eseya quea jea nee nee acanaje; jamajjeya jpea cuana quea jea nee nee ejja'aqui! <sup>12</sup> Yahuajo, jjeya nei pea'ai esejaya Eyacuiñajji ba jjima ecojjaja. Jamatii esejaya ojaya epeeji cuana quea jea poanijo tii Eyacuiñajji ese nijje nequiani. Ohuaya eseya pea cuana quea jea nee nee po meesahua cani. Jamaya Eyacuiñajji sa poani.

<sup>13</sup> E'e, Eyacuiñajjiya Edojjoshahua Pame ese que dobiqiiya huoojea canaje. Jamajjeya Edojjoshahua Pameya eseya ba meesahua cani Eyacuiñajji ese nijje nequiani, eseya onijje jjapeequiani pea'ai.

<sup>14</sup> Epeeji cuana, eyaya Jesosa banaje ecojja. Jamajjeya ojjaña huasijje jama huohuimeya aña. Eseja Chii nei eyajo aniya oja Bacua Ejja Jesosa huoojea canaje meshi yasijje mano'yohua, ojjaña cuana ojjaña meshijo ba'eca cuanaja mimishi cuana cuijea'yohua onijje eyajo eba'e tiitii mee'yojji. <sup>15</sup> Jamajjeya eseyaya jama huohuime aña ba'a: —Jesosa Eyacuiñajjija Bacua Ejja oe nei.

Ojjaña joya jama poaniya e'e jojo nei Eyacuiñajjija bacua cuana poani. Eyacuiñajji onijje nequiani pea'ai. <sup>16</sup> Eseyaya eba e'e jojo nei Eyacuiñajjiya eseya quea jea nee nee acani.

Eyacuiñajjiya ca ca oe ojjaña quea jea nee nee acani. Jamajjeya ojjaña joya pea cuana quea jea nee nee ajji poani pea'ai ca ca oe Eyacuiñajji nijje jjapee neineiquiani. Eyacuiñajji ma dejja cuana nijjeya nequiani pea'ai. <sup>17</sup> Jamajjeya Eyacuiñajji esejaya quea jea nee nee poanijo pea cuana quea jea nee nee ejja'aqui Jesosa Quito jayojja jama epojji. Jamajjeya eseya bicho'ama poaje Eyacuiñajji. Jesosa Quito poe o'oya majje ohuaya ojjaña eseya sosequia caje'yo ma eseya meshijo ba'eya anaje sosejje. Shajjama' cuana

ca ca ohuaya quea nee nee po mee caje'yo. Ojaya epeeji quea pame nee cuana ca ca ohuaya ba'e tiitii mee caje'yo onijje eyajo. <sup>18</sup> Eseyaya eba Eyacuiñajji, pea cuana pea'ai esejaya quea jea nee nee poanijo eseya mete'ama nei nei poaje. E'e, Eyacuiñajji esejaya quea jea neejejo eseya jjashahuabaquiani jama ba'a: —Eyacuiñajji enijje quea tecue epojji pojjeama.

Jamajjeya mete'ama poani. Ojjaña joya Eyacuiñajji quea jea a'ajja ca ca quea mete poani. Jjashahuabaquiani jama ba'a: —Eyacuiñajji enijje quea tecue nee nee poaje — jamaya jjashahuabaquianijo Jesosaja epeeji pojjeama poani. <sup>19</sup> E'e, yahuajo nei nei Eyacuiñajjiya Jesosaja epeeji pojjeama cuana quea jea nee nee acanaje. Jamajjeya Eyacuiñajji quea jea nee nee ejja'aqui, pea cuana eseyaya quea jea nee nee ejja'aqui pea'ai. <sup>20</sup> Beca cuana jama poani ba'a: —Ecuea Eyacuiñajji quea jea nee nee.

Jamatii oya cuana Jesosaja epeeji cuana quea jea nee a'ajja. Jamajjeya oya cuana siajje poani. Pea cuana cojja ba majje boti'ama acani. Jamajjeya ojaya Eyacuiñajji quea jea nee e'ajji pojjeama ca ba jjima ecojjaja. <sup>21</sup> Eyacuiñajjiya eseya huohui ca poa jama ba'a: —Eya, Eyacuiñajji miqianajaya quea jea nee nee poanijo jpea cuana quea jea nee acue pea'ai!

## 5

### *Jesosaa eseya Edosiquiana jeabichajea mee cani*

<sup>1</sup> Ojjaña Jesosaja epeeji cuana jjashahuabaquiani jama ba'a: —Jesosa Eyacuiñajjiya huoojea'yo ojjaña jaahuanajji.

Eseya jamaya jjashahuabaquianijo, Eyacuiñajjiya eseya oja bacua cuana po mee cani. Ojjaña joya Eyacuiñajji, esejaya Chii nei eyajo ani quea jea nee nee ajji poani Eyacuiñajjiya Bacua Ejja Jesosa quea jea nee ajji poani pea'ai. <sup>2</sup> Oya jayojjaya Eyacuiñajji esejaya quea jea nee neejejo, ojaya esohui jayojja jama poanijo pea'ai esejaya eba jama ba'a: Ojjaña Jesosaja epeeji cuana, Eyacuiñajjiya bacua cuana esejaya quea jea nee poani. <sup>3</sup> Eyacuiñajji e'e jojo nei esejaya quea jea nee poanijo jiquio ecua ojaya esohui etehue'yo cuana jayojja jama poani. Ohuaya eseya jamaya ameesahua canijo, ojaya esohui cuana camaja'ama. <sup>4</sup> E'e, eseya Jesosa nijje jjapeequiani. Jamajjeya eshahuaja epeeji cuana mimicuijjeanobiajeaña. Eyacuiñajjiya bacua cuana poanijo eseyaya mimishi cuana mimicuijjeanobiajeaña. Mimishi'ama ba'e mee aña pea'ai. <sup>5</sup> E'e jojo nei Jesosa Eyacuiñajjiya Bacua Ejja oe nei. Jamaya jjashahuabaquianijo, onijje jjapeequianijo eseya mimishi'ama ba'eje. Eshahuaja epeeji cuana mimicuijjeanobiajeaña pea'ai.

### *Ehuohui'yo Jesosa Quitojo*

<sup>6</sup> Jesosa Quito meshi yasijje poeyajo, Huaniya oya enajo besa mee ca poa Eyacuiñajjiyo. Majoya ojaya ena' cuayaquijajo Jesosa mano'ya poa eseja mimishi cuijea'yojji sosejje. Jamaya Edojjoshahua Pameya huohui ca poa Jesosa Quitojo. Ojaya esohui Jesosajo e'e nei poani. E'e, Edojjoshahua Pame siajje po ajja nei nei. <sup>7</sup> E'e, pea beca peejjimaa eyajo nequiya jamaya huohui cani Jesosa Quitojo. E'e, Echii neiya, Ebacua Ejja, Edojjoshahua Pameya pea'ai, mahuisohuaya oya jayojjaya huohui cani Jesosa Eyacuiñajjiya Bacua Ejja. <sup>8</sup> Jiquio meshijo pea'ai pea beca peejjimaa Jesosa Quitojo huohui cani pea'ai. E'e, Edojjoshahua Pameya jamaya huohui cani Jesosajo. Peaa Jesosa besa mee cajo Eyacuiñajjiya huohui ca poa jama ba'a: “Jesosa ecuea Ebacua Ejja quea jea nee nee” aca poa. Jesosa mano'yajo ojaya ena' cuayaqui'yonajejo pea'ai ojjaña jama aca poa ba'a: “Oya Jesosa e'e jojo nei Eyacuiñajjiya Bacua Ejja nei” poa. Mahuisohuaya oya jayojjaya Jesosa Quitojo huohui cani. Jamajjeya esejaya eba e'e jojo nei Jesosa Eyacuiñajjiya Bacua Ejja. <sup>9</sup> E'e, deja cuanaja Jesosa ba neinei jjima. Jamatii onajaya esohui eseyaya shajja'ajjaña. Eyacuiñajjiya esohui Jesosajo ca ca e'e nei nei. ¡Maya oe ejjashajja'ajja neineiqui! Ohuaya yahuajo huohui ca poa jama ba'a: —Jesosa ecue Bacua Ejja.

<sup>10</sup> Jamajjeya ojjaña joya jama poani ba'a: —Jesosa Eyacuiñajjiya Bacua Ejja e'e jojo nei —jamaya poanijo Edojjoshahua Pame ese nijje nequi. Jamaya jjashahuabaqui sa po'yo ajjajo ca ca siajje poani jama ba'a: —Chojja, Jesosa Eyacuiñajjiya Bacua Ejja pojjeama. Eyacuiñajjiya ecua siajje aca poa —jama siajje pomeya poani cuana.

<sup>11</sup> E'e, Eyacuiñajjiya eseya huohui canaje jama ba'a: —Eyaya ecue Ebacua Ejja Jesosa huoojeanaje miqiana ba'e tiitii mee'yohua. Onijje jjapeequiajo miqianaya ba'e tiitii meeje'yo eyajo onijje —Eyacuiñajji jamaya poanaje.

<sup>12</sup> Jamajjeya oja Bacua Ejja Jesosa nijje jjapeequiajo, Eyacuiñajjiya eseya cuana ba'e tiitii mee'caje'yo onijje eyajo. Onijje jjapeequi sa po'yo ajjajo ca se ca Eyacuiñajjiya Bacua Jesosa nijje eba'e mee'yojji pojjeama eyajo; quea nee nee poaje'yo tii tii.

*Eba'ejji quea pame nee eyajo*

<sup>13</sup> Ecuea epeeji cuana, miqianaya Eyacuiñajjiya Bacua Ejja Jesosa nijje e'e jojo nei jjapeequiani. Jamajjeya eyaya jiquio esohui tehueña miqiana ba' meeji e'e jojo nei onijje eba'e tiitii'yojji eyajo. <sup>14</sup> Eseyaya eba e'e jojo nei jama ba'a: Eseyaya ojaya ejjashahuabaquijji jayojja jama añajo, Eyacuiñajji eseya Chii nei nijje mimianijo ohuaya eseya shajja'ajja cani. <sup>15</sup> E'e, o jayojjaya jjashahuabaquime poanijo e'e jojo nei Eyacuiñajjiya shajja'ajja caje eseyaya emimi onijje. Jamajjeya eseyaya emimi onijje jayojja jama ohuaya acaje'yo. Jamajjeya eseya bicho'ama onijje emimijji.

*¡Eseyaya epeeji quea mimishi poanijo mimicue Eyacuiñajji nijje!*

<sup>16</sup> Epeeji cuana, Jesusaja epeeji quea mimishi poani ba' majje ¡ma epejjijoya oe mimicue Eyacuiñajji nijje oja mimishi ecuijea'yojji, o ba'e tiitii mee'yojji! Jamajjeya Eyacuiñajjiya oja mimishi cuijea caje'yo. Pea epeeji cuanajo, coya quea mimishi nee nee po tiitii'ianijo ecuea miqianaya ehuhuijji pojjeama ojo emimijji Eyacuiñajji nijje jama ba'a: —Eyacuiñajji, ¡a'a ma epeeji quea nee po meeji jamatii quea mimishi atiitii canijo! —chojja, ¡a'a jamaya mimijji Eyacuiñajji nijje ma dejjajo! Eyacuiñajjiya joya quea mimishi nee nee ajji poani cuana quea nee nee po mee'caje'yo. <sup>17</sup> Eyacuiñajjiya esohui jayojja jama a'ajjajo eseya quea mimishi poani. Jamatii mimishi amajje eseya Eyacuiñajji nijje mimi'yajo ohuaya eseyaya mimishi cuijea caje'yo. Joya mimishi quea tai nee nee ajji tii tii poani ca ca Eyacuiñajjiya quea nee nee po mee'caje'yo.

*Esohui quijjeyejje nei tehue*

<sup>18</sup> Ecuea epeeji cuana, eseyaya eba Eyacuiñajjiya bacua cuana, ma ohua quea pame nee po mee'ca'yonaje quea mimishi tii tii po'yo ajja, pajea ca'yonaje. Eyacuiñajjiya Bacua Ejja, Jesosa Quitohua ojaya epeeji cuana jaahuana cani, nahue cani Edosiquianaja quea mimishi epo mee'yojji pojjeama. <sup>19</sup> Eseyaya eba pea'ai eseya Jesusaja epeeji poani, Eyacuiñajjiya bacua cuana poani. Pea cuana ca ca eshahuaja epeeji poani. Edosiquiana aje oe ona huoojeajji poani. <sup>20</sup> Eseyaya eba pea'ai Eyacuiñajjiya Bacua Ejja, Jesosa meshi yasijje poeyanaje. Ohuaya eseya quea ja'a nee nee jjashahuabaqui meesahua cani. Jamajjeya ohuaya eseya Eyacuiñajji e'e nei ba meesahua cani. Jamajjeya eseya Eyacuiñajjiya Bacua Ejja oe nei nijje, Jesosa Quito nijje jjapeequi majje eseya Eyacuiñajjiya bacua cuana poani. Jesusaja Chii ca ca oe Eyacuiñajji e'e nei ese ba'e tiitii mee'yojji poani. <sup>21</sup> Jamajjeya ecuea epeeji cuana, ¡a'a eshahua cuana nijje mimijji, eyacuiñajji nisho nijje pea'ai a'a mimijji! Jamaya capoahua.

Mahuiso ecuea esohui. Eyaya, Huani bajjaniya jiquio esohui tehuenaje miqianajaya ebajji. Apoa.

## HUANIJA ETEHUE'YO BECANEJJIJI PEA'AI 2 JUAN

### *Huaniya tehue canaje epona quea pame nee que oja bacua cuana huasijje pea'ai*

<sup>1</sup> Eya Huani, Jesusaja epeeji jaahuanajji etii. Ecuea epeeji Senia, eyaya mi que tehueaña; miquea ebacua cuana huasijje pea'ai tehueaña. Miya epona quea pame nee, Jesusaja epeeji nei. Jamajjeya miya e'e jojo nei ecuea quea jea nee. Ojjaña Jesusaja epeeji cuaa miya quea jea nee acani pea'ai. <sup>2</sup> E'e, eseyaya Eyacuiñajjija esohui quea jea nee año. Ojaya esohui e'e nei. Jamajjeya eseya jjashahuabaquiani ma esohuijaya; pajea'yo ajja tii tii. Eyacuiñajjija esohui jayojja se ba'yani pea'ai. Jamajjeya ojaya epeeji cuana quea jea nee nee año, eseyaya.

<sup>3</sup> Eyacuiñajji esejaya Chii nei; ojaya Ebacua Ejja oe nei Jesosa Quito esejaya Emeshi Mese nei. ¡Ohuaya eseya caba'e meesahua cahua quea pame nee! ¡Esejo quea bei cajashahuabaquiahua pea'ai! Ohuaya eseya quea bei po mee cani mimishi cuijea ca'yajje. Jamajjeya eseyaya ojjaña Jesusaja epeeji cuana quea jea nee año e'e jojo nei.

### *Esohui e'e nei*

<sup>4</sup> Senia, eyaya miquea ebacua beca cuana banaje. Oya cuana Eyacuiñajjija esohui e'e jojo nei jama poani. Jamajjeya eya quea bhui nee nee poani. <sup>5</sup> Jamajjeya ecuea epeeji, eyaya Eyacuiñajjija esohui huohui o'oyaña mi que, ma eyaya yahuajo huohuinaje. Jiquio esohui eyacua pojjeama. E'e, yahuajo ojaya esohui jama poanaje ba'a: “¡Jesusaja epeeji cuaa ojjaña ojaya epeeji cuana quea jea nee ca'a cahua!” <sup>6</sup> Eyacuiñajji esejaya quea jea nee poanijo ojaya esohui jama epo tiitii'yo. Ojaya esohui yahuajo jama poa ba'a: “¡Pea cuana miquiaaya quea jea nee atiitiicue!”

<sup>7</sup> Epeeji, quea huiso esohui huohuijji nisho cuana poquiani ojjaña meshi cuana huasijje. Dasia cani, de. Jiquio esohui huohuijji nisho cuana jama siajje pome poani ba'a: —Jesosa Eyacuiñajji e'e jojo nei pojjeama, Eyacuiñajjija huoojea'yo dejja jaahuanajji Quito bajjani pojjeama. Quito dejja jayojjaya yamijji meshi yasijje poe'yo jjima —jama siajje pomeya poani cuana. Ma siajjepojji cuana Jesusaja epeeji pojjeama; o cuiapanajji poani. Quea huiso cuana dasia cani. <sup>8</sup> ¡Jashahuaba tiitiiquicue quea ja'a nee! Jamajjeya ojaya miquianaya edasia'yojji pojjeama. E'e, Jesusajo ba'yanijo, ojo chacoaña quea pame neejo pea'ai, quijje eseya quea huiso sosequia caje'yo Eyacuiñajjiya, eyajo. Ma siajjepojji cuaa miquianaya dasia ca chana'; onijje poquiquehuajo ca ca miquianaya aema' jayojja jama poaje'yo Jesosa poe o'oyajo.

<sup>9</sup> Joya Jesusaja esohui jama a sa po ajja aje oe Eyacuiñajjija epeeji pojjeama. Eseyaya Jesusaja esohui jama poanijo ca ca Eyacuiñajji nijje jjapeequiani e'e jojo nei; oja Bacua nijje, Jesosa Quito nijje jjapeequiani e'e jojo nei pea'ai. <sup>10</sup> Pea dejja cuana miquianajaya equi yasijje poeyanijo, oya cuana Jesusaja esohui e'e jojo nei huohui sa po ajjajo, ja'a jama ajji ba'a: —Epeeji, ¡ecuea equi yasijje dobiecúe! —a'a ajji! Chojja, oya Eyacuiñajjija epeeji pojjeama. <sup>11</sup> Onijje jjapeequianijo oya miyaya quea mimishi po meesahuaña. Jamaya quea tai.

### *Pea esohui oe neiya huohui cani Huaniya*

<sup>12</sup> Quea huiso esohui huohui sa eyaya año miquiana que. Ma esohui cuana ecuea etehuejji pojjeama. Quijje eya miquiana que poqui sa poani. Miquiana nijje nequi majje eyaya quea huiso pea esohui huohuije. E'e, eseya ojee po'yo majje quea bhui nee nee poaje'yo.

<sup>13</sup> Mique shehueva bacua cuaa jama acanaje ba'a: —A'i, ¿achajja acuae mi ani so'o?

Mahuiso ecuea esohui. Eyaya, Huaniya, Jesusaja epeeji jaahuanajji etiiya jiquio esohui tehuenaje. Apoa.

## HUANIJA PEA ETEHUE'YO PEA BECA PEEJJIMA 3 JUAN

### *Huanija pea etehue'yo, quijjeje nei oja tehue*

<sup>1</sup> Eya Huani, Jesusaja epeeji jaahuanajji etii. Ecuea epeeji Cayo, eyaya jiquio esohui tehueaña miquea ebajji. Eseyaya quea boti nee nee Jesusaja esohui e'e nei. Jamajjeya miya ecuea epeeji nei, ecuea quea boti nee nee. <sup>2</sup> Ecuea epeeji, eya Eyacuiñajji nijje mimiani mijo jama ba'a: —Eyacuiñajji, ¡ecuea epeeji Cayo jaahuanacue! Oya Jesusa nijje quea ja'a nee jjapeequiani. Jamajjeya ¡oya quea ja'a nee ba'e meesahuacue! —eya poani.

<sup>3</sup> Jesusaja pea epeeji cuana e que poeyanaje. Ohuaya eya huohui canaje jama ba'a: —Cayo quea pame nee nee ba'yani. Ohuaya Eyacuiñajji esohui jayojja jama atitii cani —eya acanaje pea cuaa.

E'e, miya Eyacuiñajji nijje jjapeequiani quea pame nee. Jamajjeya eya quea bihui nee nee poani mijo. <sup>4</sup> E'e, ojjaña Jesusaja epeeji cuana ecue bacua cuana jama. Jamajjeya Jesusaja esohui quea pame nee jama ba'yanijo, eya quea bihui nee nee poani shajja'ajja majje.

### *Huani quea bihui nee poani Cayojo*

<sup>5</sup> Ecuea epeeji Cayo, miyaya Jesusaja epeeji yahuajo miquea eba pojjeama cuana jaahuanaña quea pame nee, mi que poeyajo. <sup>6</sup> Jamajjeya Jesusaja epeeji cuaa poe majje ecua huohui canaje jama ba'a: —Cayohua Jesusaja epeeji cuana quea jea nee acani —jamaya onaaya eya acaña'yonaje.

¡Jesusaja epeeji cuana poqui meesahuacue! Jamaya quea pame nee. Eyacuiñajji chaco canijo, oya cuana ojaya quea boti nee. Jamajjeya ¡miyaya oya cuana jaahuanacue quea pame nee; a'a jaahuana pajea'yojji! <sup>7</sup> Oya cuana poquiani ojjaña meshi cuana huasijje Jesusaja esohui huohuiya. Poquije oya cuana Jesusaja epeeji pojjeama nijje mimi jjima poani jama ba'a: —¡Ba'e meesahuacue mo! —jama po ajjaya oya cuana. <sup>8</sup> Jamajjeya eseyaya Jesusaja epeeji poaniya ¡Jesusaja esohui huohuijji cuana poqui meesahuacue! Jamaya eseya o jayojjaya Jesusaja echacojji poani.

### *Dejja Diotepe bajjani quea mimishi poanaje*

<sup>9</sup> Eyaya esohui tehue'yonaje Jesusaja epeeji cuana jomajo tii ba'e yasijje. Jamatii Diotepeya ecuea etehue'yo jama a sa po'yo ajja. Jomajo tii oya Jesusaja epeeji cuana jaahuanajji oe nei nequi sa poani, Diotepe. Oya mimi sa po ajja jama ba'a: —E'e, Eyacuiñajjiya Huani huoojea ca'yonaje. Jamajjeya ¡Huanija esohui shajja'ajjacue!

<sup>10</sup> Miquiana que poe'yo majje eyaya huohuije'yo Diotepe ba'yani quea mimishijo. Oya ecuanajo maimaiyani, niñeba cani quea tai. Siajje poani. Jesusaja pea esohui huohuijji cuana oque poquijajo, Diotepe onijje jjapeequi'yo ajja. Oya o bobia ajja. Pea cuana bobia mee ajja pea'ai. Onaa bobia sa acanijo, oya quea tecue poani: —¡Pea esohui huohuijji bobia sa añajo miquianaya aje oe Jesusaja epeeji pojjeama! Jamajjeya ¡a'a ecua nijje jjapeequijji! —jamaya acani Diotepeya.

<sup>11</sup> Ecuea epeeji Cayo, ¡a'a dejja quea mimishi jama pojji! Dejja cuana quea pame poani cuana Jesusaja epeeji poani. Quea mimishi poani ca ca Jesusaja epeeji pojjeama.

### *Dejja Demetio bajjani quea pame poani*

<sup>12</sup> Ojjaña dejja cuana quea bihui nee mimiani Demetiojo jiquio jama ba'a: —Demetiohua quea pame nee acani —poani cuana. E'e, Edojjoshahua Pameya Demetiojo Jesusaja epeeji cuana mimi meesahua cani quea pame nee. Ecuea esohui ojo e'e nei poani. Jamaya miquea eba.

### *Esohui quea bihui nee epo meeji*



<sup>13</sup>Cayo, quea huiso esohui huohui sa poani eya mi que. Tehuetehue majamaja sa po ajja ca iña. <sup>14</sup>Jamajjeya quiije pishana eya poqui sa poani mi ba o'oyaa. Mi ba majje mimije o'oya. <sup>15</sup>¡Eyacuiñajjiya miya quea bei nee capo mee cahua! Ojjaña miquea epeeji cuana jiquiojo ba'eya jama acani ba'a: —¿Achajja acuae mi ani so'o, Cayo?

¡Ojjaña ecuanaja epeeji cuana nijje mimicue ejo jama ba'a: —¿Achajja acuae nequiana so'o? Huani poani —acue!

Mahuiso. Eyaya, Huaniya, Jesusaja epeeji cuana jaahuanajji etiiya jiquio esohui tehuenaje. Apoa.

## JODEJA ESOHUI JUDAS

### *Jodeya esohui tehue canaje Jesosaja epeeji cuana huasijje*

<sup>1</sup> Eya Jode, Satiacoja chahua. Eya Jesosa Quitoja huoojea'yo. Ecuea epeeji cuana, eyaya miquiana que tehueaña jama ba'a: Eseyaya Chii ai Eyacuiñajjiya miquianaya iyaa ca'yonaje onijje ejjapeequi meesahua'yojji. Miquianaya ojaya quea jea nee nee poani; Jesosa Quitohua miquianaya jaahuana cani pea'ai. <sup>2</sup> ¡Eyacuiñajjiya miquianaya quea jea nee ca'a cahua tii! ¡Miquianaya caba'e meesahua cahua quea ja'a nee! ¡Quea bei nee caba'e meesahua cahua pea'ai!

### *Esohui huohuijji nisho cuana*

<sup>3</sup> Ecuea epeeji cuana, yahuajo eya jjashahuaba neineiquinaje miquiana que esohui etehuejji, Jesosa Quitohua eseyaya mimishi cuana cuijea ca'yonajejo eba meeji. Jjeya ca ca quea huiso jjashahuabaqui majje eyaya pea esohui tehueaña miquiana que jama ba'a: ¡Huohui neineicue Jesosa Quitoja esohui! Eyacuiñajjiya ma esohui e'e jojo nei huoojea canaje ese que, ma ojaya epeeji nei cuana que. ¡Ma esohui quea pame nee a'a huohui taijji!

<sup>4</sup> E'e, eyaya jamaya huohuiaña Eyacuiñajjiya esohui huohuijji nisho cuanajo. Ma dejja quea mimishi cuana Jesosaja epeeji cuana nijje jjapee nishoquiiani. Quea mimishi atiitii sa poanijo oya cuana jama siajje pome poani ba'a: —Eyacuiñajji quea pame nee poani; dejja cuana quea mimishi jamatii caba'yahua; cuaqui yasijje ehoojea'yojji pojjeama Eyacuiñajjiya —jamaya poani esohui huohuijji nisho.

Ma esohui huohuijji nishohua Jesosa Quito, eseyaya Emeshi Mese nei oe nei cajaa aca'yonaje. Yahuajo nei nei Eyacuiñajjiya esohui tehuejji cuaa esohui tehue ca poa ma dejja quea mimishijoya. Jama tehueme aca poa ba'a: “Quijje Eyacuiñajjiya esohui huohuijji nisho cuana tecuea neinei caje'yo, de”.

<sup>5</sup> ¿Yajja acuae Eyacuiñajjiya aca poa yahuajo Isaeni etiiquiiana shajjama' poajo? Miquianajaya eba; jamatii miquianaya eyaya huohuije o'oya. Yahuajo Eyacuiñajjiya Ejito dejja quea mase cuana Isaeni cuana pichojea mee ca'ya poa; Ejito meshijo ba'e cuaya meesahuaqui ca'ya poa pea'ai. Jamatii quijje pishana Isaeni cuana ojaya esohui shajja'ajja sa po ajja poajo, quea huiso mano mee ca'ya poa. <sup>6</sup> Cuanaya yahuajo Eyacuiñajjiya esohuidojojji beca cuana quea mimishi poa eyajo ba'e. Eyacuiñajjiya ehuhui jayojja jama chaco tiitii sa po ajja poa. Jamajjeya Eyacuiñajjiya oya cuana iña majje jeyo ca'ya poa; quea huesha nee nee jeanobiajea ca'ya poa, cuayaqui mee'yo jjima aca'ya poa. Quijje Jesosa Quitohua poe o'oya majje esohuidojojji tai janobajjima nei tecueajea caje'yo quea nee nee epo mee tiitii'yojji. <sup>7</sup> Yahuajo nei Sonoma cuiñajji, Jomona cuiñajji pea'ai, pea cuiñajji sisi quea chipi nee yaña poa. Jomajo dejja quea huiso cuana quea mimishi nee nee poa. Pea dejja cuana see huejja cojjojji poa, de. Quea mimishi nee nee jjashahuaba tiitiiqui nequia poa. Esohuidojojji quea tai jayojja jama quea mimishi poa. Jamajjeya Eyacuiñajjiya oya cuana, ma dejja quea mimishi cuana pea'ai quiyo jeyojeyojea mee ca'ya poa cuaquiya. Jamajjeya ojjaña cuana jjeya ba'e ba mee caje Eyacuiñajji mimishijo quea quene nee nee poani; cuaquijo quea nee nee po mee caje'yo mimishi poani cuana. <sup>8</sup> Maya jiquio esohui huohuijji nishoja eba, ma jjeya nei miquiana que poeyanija eba. Jamatii jjeya oya cuana quea mimishi nee nee poani; yahuajo nei nei ba'e cuana jayojjaya jama poani. Ojaya ejjashahuabaqui'yojji quea tai poani cuanaya. Eyacuiñajjiya ehuhui'yo cuana shajja'ajja sa po'yo ajja pea'ai. Eyacuiñajjiya esohuidojojji quea ca'a cuana niñeba cani pea'ai jama ba'a: —Ecuanaja ejjacahuibaquiiji Eyacuiñajjiyo e'e nei.

<sup>9</sup> Jamatii Eyacuiñajjiya esohuidojojji quea ca'a nee nee Miyeni bajjani pea esohuidojojji quea mimishi nije mimijaji jjima poa. Yahuajo Moisesi mano'yajo, Miyeniya Moisesija eyami ohuajea sa aca poa; Edosiquiana ca ca Moisesija eyami ohuajea mee sa po ajja poa. Miyeniya Edosiquiana mimicuijajanobiajaja canaje, jamatii onijje mimijaji jjima poa. Jamaya miminaje ba'a: —¡Eyacuiñajjiya oe miya catecuea cahua, ca joya mimishishiqui! —aca poa.

<sup>10</sup> Miquiana nije nequi esohui huohuijji nishohua ca ca aquiana joya ojaya ba jjimajo niñeba cani quea mimishiya jjejojo. Jjashahuaba bamebamequi ajja oya cuana. Ijjiacajji jayojja jjejojo jjashahuabaqui ajja poani; quea ja'a po ajja. Jamajjeya quea mimishi tii poani jjejojo cuaquijo tii nequi tiitiije'yo. <sup>11</sup> Eyacuiñajjiya oya cuana quea yeno capo mee tiitii cahua jjashajja'ajjaqui ajja jojaya. Esohui huohuijji nisho cuana dejja bajjani Cainija ejjashahuabaqui'yojji jayojja jama poani, quea mase nee, quea bejjo nahue jjejojo. E'e, esohui huohuijji quea pame cuana niñeba cani tii tii. Mimijaji neinei. Quea mimishi tii tii poani, dejja Banaami bajjani jayojja jama poani, ma yahuajo nei quea bejjo nahue poaninaje. Jamajjeya ohuaya esohui huohui tai caninaje. Onaya cuana shajjama' poani, dejja Cone bajjani jayojja jama, ma yahuajo Eyacuiñajjiya esohui shajja'ajja sa po ajja poa. Jamajjeya Eyacuiñajjiya ma ecua dejja tai cuana yahuajo mano mee ca'ya poa jayojja jama jjeja esohui huohuijji nisho cuana acaje'yo.

<sup>12</sup> Jiquio esohui huohuijji nisho cuana quea mimishi nee nee. Miquianaya ojee Jesosa Quitoja bobi ijjiñajo, quea bhui nee poanijo, oya cuana jama poani ba'a: —Ecuana miquea epeejji poani.

Chojja. Miquianaya dasia cani. Miquiana nije ijji'ijjianijo jjeje ajja, quea bobi nee, bicho'ama poani, de. Oya cuana jama poani ba'a: Bo ba majje eseya jjashahuabaquiiani jama ba'a: —Ena poaje, de.

Jamatii beniya bo cuana dojo cuajicuaji canijo ena oque ajja que yasijje. Jamaya jiquio esohui huohuijji nisho cuana aje oe; esohui quea pame huohui ajja, de. Oya cuana acui jjajja ajja jama poani pea'ai. Acuijjajja shejo acui ba majje acuijjajja sa'ajja cani e'acuijjajja meseya. Ejjajja chamajo acui jajajea ca'yani. Jamaya esohui huohuijji nishohua esohui quea pame huohui ajjajo, Eyacuiñajjiya oya cuana cajaa acaje'yo. <sup>13</sup> Oya cuana enashajo jama poani: Bae ai'ajjo enashajo po majje meshi jeapohui cani; ena quea jehue nee poani. Enashajo jayojja jamaya jiquio esohui huohuijji nisho quea tai poani. Miquianaya quea mimishi ba'e mee ca chana' pea'ai; poquiquehua mee ca chana' eshahuaja ejiojji yasijje. Jamajjeya oya cuana cuaqui quea misi nee yasijje dobi tiitii meequi caje'yo. Majameta oquequi majje jijnanani, chama'yo tii ponanani, quea misi nee nee yasijje oquequi. Jamaya esohui huohuijji nisho; esohui e'e jojo nei huohui ajjajo cajaa acaje'yo Eyacuiñajjiya; quea huesha nee nee, quea tai nee nee yasijje huoojja caje'yo quea nee nee epo'yojji tii tii.

<sup>14</sup> Ebionei nei dejja Adanaja osecujaja osecua tii majje, ojaya osecua cuana tii majje pea'ai etiquiana Enoqui bajjani ba'ya poa. Yahuajo nei nei Enoqui miminaje jiquio esohui huohuijji nishojo pea'ai. Jama poa ba'a:

“¡Bacue oe! Eseyaya Emeshi Mese nei poeje'yo ojjaña esohuidojojji pame cuana nije.

<sup>15</sup> Oya poeje'yo ojjaña mimishi cuana janobajjima nei tecueajea'yohua. Ma dejja cuana quea mimishi poani; Eyacuiñajjiya esohui jayojja jama a sa po ajja. Eyacuiñajji niñebajji poani. Jamajjeya tecueajea neinei caje'yo Eyacuiñajjiya”.

Jamaya Enoqui yahuajo nei nei poa jiquio esohui huohuijji nisho cuanajo. <sup>16</sup> E'e, jiquio esohui huohuijji nisho cuaa esohui huohuijji quea pame cuana niñeba cani tii tii. Mimijaji neinei. Quea mimishi tii tii po sa poani. Onajaya ejjashahuabaquiijji quea miminaa poani bicho'ama. Pea dejja cuana nije mimi nishoani ejjadasiaquiiji.

*Pea esohui dejja mimishi cuanajo*

<sup>17</sup> Ecuea epeejji cuana, ja'a pajea'yojji esejaya Emeshi Mese nei Jesosa Quitoja huoojja'yo cuanaja esohui! Jamaya onaaya huohui canaje ba'a: <sup>18</sup> —Jesosa Quito poe o'oya jjimahuajo, ojjaña cuana quea mimishi nee nee poaje. Miquianaya Jesosa nije jjapee

neineiQuianijo, oya cuana mimijaji neineiJe miquiana nijje. Ojaya ejjashahuabaquijji quea mimishi nee jama atiitii caje'yo pea'ai —jamaya Jesusaja huoojea'yo cuaa acanaje.

<sup>19</sup> E'e, jiquio esohui huohuijji nisho cuana bicho'ama cuanaya, de; quea jjashahuabaqui tai nee nee. Oya cuana Edojjoshahua Pame nijje jjapeequi sa po ajja. Jamajjeya ojaya esohui quea quehuajo Jesusaja epeeji cuana ojee jjapeequi pajea mee ca'yani esohui e'e nei pojjeamajo.

<sup>20</sup> Ecuea epeeji cuana, ¡miquianaaya ca ca oe Jesosa Quitoja esohui jayojja jama oe atiitiicue quea ja'a nee! ¡Ba neineicue ojaya esohui, ojjaña tii! ¡Pea epeeji cuana ba meesahuacue ma esohui e'e nei pea'ai! Edojjoshahua Pameya miquianaya mimi meesahua canijo, ¡mimi neineicue Eyacuiñajji nijje! <sup>21</sup> Miquianaaya ishoaña esejaya Emeshi Mese nei Jesosa Quitoja epoe o'oyajjijo. Ohuaya miquianajaya mimishi cuana cuijea ca'yonajejo, cuaqui yasijje epoqui'yojji pojjeama; eyajo ba'e tiitii mee caje'yo onijje. ¡Eyacuiñajji esohui jayojja oe ba'ecue! Jamajjeya ohuaya miquianaya jaahuana caje'yo quea bei; tecuea jjima acaje'yo.

<sup>22</sup> Pea cuana jjashahuaba quehuaquianijo, ja'a onijje quea tecue nee nee pojji! ¡Esohui e'e jojo nei ba meesahua o'oyacue quea ja'a nee! <sup>23</sup> Jamajjeya oya cuana poqui ajja cuaqui yasijje mimishi ohua pajea ca'yajo. Jjashahuabaquicue jiquio jama ba'a: —¡Onajaya mimishi quea tai nee; mimishi cajaan!

Jamajjeya miquianaya quea mimishi po ajja, ma ecua onaya yahuaajo quea mimishi nee nee poanaje jayojja jama po ajja.

*¡Eyacuiñajji oe bihuicue!*

<sup>24</sup> Eyacuiñajji quea ca'a neeya miquianaya quea ja'a nee ba'e meesahua caje'yo; mimishi'ama nei nei po mee caje'yo. Jamajjeya miquianaya quea boejea nee nee, quea bei nee nee pea'ai nequi mee caje'yo eyajo, o ani cojja nei eseya nequije'yo. <sup>25</sup> Yani oe nei Eyacuiñajji e'e jojo nei. Jesosa Quito, esejaya Emeshi Mese nei esejo mano'yonajejo, Eyacuiñajjiya eseya ba'e tiitii mee caje'yo onijje eyajo. E'e jojo nei Eyacuiñajji oe nei eyajo yani tii tii quea ca'a nee nee, quea ja'a nee nee. Oya ojjañaja Emeshi Mese oe nei po tiitiije'yo. Ohuaya ojjaña amee tiitii caje'yo pea'ai. E'e nei jamaya oya poanaje yahuaajo, meshi pana jjimahuaajo; jjeyahua nei jamaya oya poani; quijje jamaya oya po tiitiije'yo.

Mahuiso. Eyaya, Jodeya, Jesosa Quitoja huoojea'yohua jiquio esohui tehuenaje. Apoa.

## HUANIYA TEHUE CANAJE MA JESOSA QUITOHUA QUIJJE OHUA ACANAJE'YO

### *Eyacuiñajjiya jjaja'aqui mee canaje quijje ohua acaje'yo*

<sup>1</sup> Eya Huani, Jesusaja epeeji jaahuanajji etii. Jesusa Quitohua eya tehue mee canaje jiquio esohui cuana ojjaña que jama ba'a: Eyacuiñajjiya jama acanaje ba'a: —Eyaya ecuea Ebacua Ejja Jesusa Quito ojaya ebajji jjaja'aqui meeje'yo ma eya quijje aje. Jamajjeya Jesusaa ojjaña ojaya epeeji jaahuanajji cuana ba mee caje ma eya quijje pishana aje —Eyacuiñajji poanaje.

Ba majje Jesusaa esohuidojojji huoojea canaje e que. Esohuidojojjiya ecuea ebajji jjanequipanaqui mee canaje quijje Eyacuiñajjiya acaje. <sup>2</sup> Esohuidojojjiya ba mee cajo, eyaya tehue'yonaje ojjaña ma ohua quijje acaje. Jiquio esohui ecue tehue Eyacuiñajjiya huohui caje. Jesusa Quitohua ecuea ebajji jjanequipanaqui mee canaje e'e jojo nei. <sup>3</sup> Ojjaña joya jiquio esohui etehue'yo e'e jojo nei bajji poani quea bihui nee poaje'yo. E'e, jiquio ejjanequipanaqui meeji ba majje, jiquio esohui jayojja jama amajje pea'ai quea bihui nee poaje'yo. Ojjaña jiquio etehue'yo jayojja quijje pishana apoa poaje'yo. Beshahua nei apoa.

### *Esohui etehue'yo Jesusaja epeeji cuana huasijje Asia meshijo ba'e yasijje*

<sup>4-5</sup> Eyaya Huaniya esohui tehueña Jesusaja epeeji cuana huasijje me oeje beca cuiñajjiyo ba'e yasijje Asia meshi yasijje pea'ai. Ecuea esohui etehue'yo jama ba'a: Eyacuiñajji yahuajo nei nei nequi tiitiia poa. Jjeya nei yani tii tii. Quijje oya ani tiitiije'yo pea'ai. E'e, oya poeje o'oya. Edojjoshahua Pame nequiani Eyacuiñajji e'anioque ani cojja nei. Jesusa Quito jomajo yani pea'ai. ¡Ohuaya miqianaya cajaanahua cahua quea pame nee; quea bei capo mee cahua pea'ai! E'e, Jesusa Quitohua e'e jojo nei huohui canaje Eyacuiñajjiyo. Oya mano'yo majje ebionei shequi o'oyanaje eba'e tiiti'yojji. Oya ojjaña emeshi mese cuana huoojeajji poani pea'ai. Jesusa ecuana quea jea nee poanijo mano'yonaje acui ecueata'apeejo. E'e, oya mano'yajo oja ena' cuayaquinaje esejaya mimishi cuana cuijea'yojji. <sup>6</sup> Oya ojjaña huoojeajji poanijo eseya ojjaña huoojeajji po mee cani onijje. Eseyá huoojea cani esohui huohuiya oja Chiija, Eyacuiñajjiya. ¡E'e, oya oe nei ojjaña huoojea'yojji quea ca'a capo'yahua tii tii! ¡Ojjaña oya cabihuia cahua tii tii! Jamaya capoahua.

<sup>7</sup> ¡Bacue! Oya poeje o'oya bo biajje. Ojjaña oya ba caje. O quecua'yojji epohua pea'aiya oya ba caje. Ojjaña dejja mimishi ojjaña meshijo ba'e o ba majje quea mete nee nee poaje'yo. Pa neineiye'yo jama ba'a: —¡Coya aje oe Jesusa poeyani esejaya mimishijo ese napaa! —ojjaña poaje. E'e, jamaya capoahua.

<sup>8</sup> —Eya yahuajo anitiitiia poa. Jjeya eya yani tii tii; quijje eya poeje o'oya pea'ai. Eyaya ojjaña jamaya ña —Eyacuiñajjiya jamaya acani. Oya ojjaña huoojea'yojji quea ca'a nee nee poani.

### *Huaniya Jesusa ba ca'ya poa ejjanequipanaqui nequi*

<sup>9</sup> Epeeji cuana, eya miqianajaya edoe mese jayojja jama poani eseya Jesusa nijje jjapeequianijo. Jesusaa eseya huoojea canijo ese nijje anije'yo. Onijje jjapeequianijo, pea cuaa eseya quea nee po mee cani. Eseyá quea nee poanijo jamatii Jesusa nijje jjapeequi pajea'yo ajja. E'e, eya iña majje pea cuaa aje iña oe eya nasi Patamoso bajjani yasijje huoojeajea canaje Eyacuiñajjiya esohui huohuijijjojo pea'ai. <sup>10</sup> Edojjoshahua Pameya eya ba mee canaje Jesusaja epoe o'oyajji. Oya jama poanaje ba'a: E daasajje nequi eyaya shajja'ajjanaje Jesusaja esohui. <sup>11</sup> Eshe'ana janobajjima nei emiajji jayojja jama Jesusaa eya huohui canaje jama ba'a: —Huani, eyaya miya quea huiso ba meeje. ¡Maya oe tehuecuel! ¡Tehue mee majje esohui huoojeacue ecuea epeeji cuana huasijje me oeje beca cuiñajjiyo ba'eca huasijje, Asia meshi yasijje! Ma cuiñajji huiso cuana huasijje

ba'a: Epeso cuiñajji, Esemina cuiñajji, Penamo cuiñajji, Tiatina cuiñajji, Sanisi cuiñajji, Pinanepia cuiñajji, Naonisea cuiñajji pea'ai yasijje —Jesosa poanaje.

<sup>12</sup> Majoya ojaya esohui shajja'ajja majje eyaya bajeanaje ae enijje mimiani ebajji. Eyaya banaje cuaquijji me oeje beca huisome cuaquijji nequijji nequi. <sup>13</sup> Cuaquijji yiyasamaneijo nequi eyaya banaje Jesosa, ojjañaja Edoe Mese. Oya ca ca oe quea pame nee nee nequi jama ba'a: Oja daqui quea ao nee nee ojaya ejiojji yasijje yee ba'e. Mei huo'o esipi quea nahuejo ejjayica'aqui dojjojjanijijje. <sup>14</sup> Ojaya ehujja ña quea oshe nee nee bo oshe jayojja. Ojaya ecojja quea jeajahua nee nee cuaqui jijiani jayojja. <sup>15</sup> Ojaya ejiojji ca ca quea siyo nee nee baa cuaquijo quea quiyo nee nee po majje quiyo huo'o huo'oani jayojja jama. Ojaya emimi'yo janobajjima nei ena quea cuejipashi nee mei pasaca biajje oquequiani jama. <sup>16</sup> Majameta me oeje beca huisome oja me jjotojo yani, ebiane meje. Oja enabajje cuayanaje esohui quea ja'a nee nee baa quea shejji jayojja; baa se beca jayojja. Ojaya ebose quea jeajahua nee nee eshequi quea jiji nee nee jayojja.

<sup>17</sup> O ba majje eya quea mete jjejojo jaabichaquinaje oja ejiojji pejejo, emano'yo jayojja mo jaanaje. Jamajjeya ohuaya eya napa'ajja canaje ebiane emejje. Jama poanaje ba'a: — ¡A'a quea mete pojji! Eya yahuajo nei nei nequi tiitiia poa. Eya nequi tiitiiani pea'ai. <sup>18</sup> Eya mano'yo majje shequi o'oyanaje. Eya eshe tii tii yani. Eya emano'yo huoojea'yojji. Eyaya oya cuana eshe o'oya po meeje'yo, yamijji po meeje'yo. Ecue esohuijo ojjaña mimishi cuana poquije'yo cuaqui yasijje. Ojjaña quea pame ca ca eyahuasijje poquije'yo. <sup>19</sup> Huani, eyaya miya ba meeña ojjaña ma ohua jjeya nei acani, quijje nei ohua acaje pea'ai. ¡Ba majje maya tehucue! <sup>20</sup> Eyaya miya ba meeje majameta me oeje pea beca huisome ecue me jjotojo ani, cuaquijji nequijji me oeje beca pea'ai. Maya miquea quea quehua. Jama poani ba'a: Mei huo'o cuaquijji nequijji quea nahue jayojja oya cuana, ecuea epeeji nei cuana ba'e ma me oeje beca cuiñajji ba'eca. Majameta cuana esohui huohuiji cuana jayojja, ecuea epeeji jaahuanajji jayojja pea'ai —Jesosa poanaje enijje.

## 2

### *Jesosaja esohui Huaniya tehue canaje Jesosaja epeeji cuana Epesojo ba'eca huasijje*

<sup>1</sup> Majoya Jesosaa huohui canaje jama ba'a: —Huani, ¡ecuea esohui tehucue esohui huohuiji Epesojo ba'e yasijje! Oya ecuea epeeji jaahuanajji. Jama tehucue acue ba'a: “Jamaya eyaya miya huohuiaña ba'a: Eya Jesosa Quito. Eyaya esohui huohuiji cuana majameta me oeje beca huisome jayojja jaahuanaña ecuea eme jjotojo. Eyaya ecuea epeeji ma cuaquijji nequijji jayojja jaahuanaña pea'ai. Jamaya eyaya miya huohuiaña ba'a: <sup>2</sup> Ecuea eba ojjaña miquianajaya eba'eji. Miquianaaya enijje ojjaña pojajo chaco neineiaña. Quea camaja. Jamatii enijje chaco pajea'yo ajja. Miquianaya jjapeequi ajja esohui huohuiji nisho cuana nijje. Oya cuana sijje poanaje jama ba'a: —Jesosaa ecua huoojea canaje oja sohui huohuiya.

“Jamatii miquianaaya ona shajja'ajja nei nei majje huohuinaje jama ba'a: —Chojja, miquianaya sijje poani. Esohui huohuiji nisho jja mi coma —miquiana poanaje. <sup>3</sup> E'e, miquianaaya enijje chaco neineiaña, chaco chaco pajea'yo ajja. Enijje chaco chaco anijo, pea cuaa miquianaya napa canaje quea huiso. Jamatii enijje miquianaya chaco chaco anijo tii. <sup>4</sup> Jamatii eya miquianajo quea yeno poani. E'e, yahuajo eya miquianajaya quea jea nee nee poanaje. Jjeya ca ca chojja, quea jea pishana. Jamaya quea mimishi. <sup>5</sup> Jamajjeya ¡jjashahuabaquicue! Yahuajo eya miquianajaya quea jea nee nee poanaje. ¡Eya quea jea nee nee a o'oyacue, ma ecua miquianaaya yahuajo anaje jamaya acue! ¡Bacue oe! Miquianaaya e shajja'ajja sa po ajjajo eya poecuajije miquiana que. Jiquio ecua cuaquijji quijjo'yo majje quea misi po'yani jayojja jama eyaya miquianaya ecuea esohui huohui pajea meeje'yo, ca miquianaya ma ecua yahuajo miquianaaya eya quea jea nee nee anaje jama mi a o'oyajo. <sup>6</sup> Jamatii pea miquianajaya ejjashahuabaquijji quea ja'a ecuea ejjashahuabaquijji jayojja jama poani ba'a: Dejjá Niconasi bajjanija epeeji cuana quea mimishi. Miquianajaya ojaya esohui boti'ama. Maya ecuea boti'ama pea'ai.

<sup>7</sup> “Jamajjeya ishajja'ajjacue Edojjoshahua Pameja esohui ojjaña ecuea epeeji cuana Asia meshijo ba'eca huasijje! ¿A'a miquianaya e shajja'ajjajji? ¿A'a shajja'ajja sa poani? Ojjaña joya enijje jjapee tiitiquiani eshahua jeabichajeajji poani. Jamajjeya eyaya oya cuana nequi tiitii meeje'yo Eyacuiñajji nijje eyajo. Eyaya oya cuana acuijjajja ijia meeje Eba'e tiitii mee'yoyji, ma Eyacuiñajji acui yiyejo nequi”.

—Jamaya eyaya, Jesusaa huoojeaña ecuea esohui etehue'yo ecuea epeeji cuana Epesojo ba'eca huasijje. ¡Jamaya tehucue, Huani! —Jesusaa eya acanaje.

*Jesosaja esohui ojaya epeeji cuana Esemina cuiñajji ba'eca huasijje*

<sup>8</sup> Majoya Jesusaa huohui ca o'oyanaje jama ba'a: —Huani, ¡ecuea esohui tehucue esohui huohuiji Eseminajo ba'e yasijje! Oya ecuea epeeji nei jaahuanajji. Ejo jama tehucue ba'a: “Eya Jesosa Quito. Jamaya eyaya miya huohuiaña: Eya yahuajo nei nei nequi tiitii poa. Eya nequi tiitiani pea'ai. Mano'yo majje eya shequi o'oyanaje. <sup>9</sup> Ecuea eba miquianaya enijje jjapeequianijo pea cuaa napa canaje. Jamajjeya miquianaya aema'. Jamatii ecuea epeeji poanijo miquiana quea aquiana huiso jayojja. Quea bei nee nee poani. Ecuea eba pea'ai beca cuaa miquianaya niñeba cani. Oya cuana sijje poani jama ba'a: —Ecuana Jodio cuana —poani.

“Chojja, Jodio cuana pojjeama oya, Eyacuiñajji epeeji pojjeama. Edosiquianaja epeeji cuana poani. <sup>10</sup> ¡Bacue! Quijje pishana miquianaya napa caje cuaa. Edosiquianaja epeeji cuaa miquianaya iña majje jeanobia caje enijje ejjapeequi pajea'yoyji nisho. Oe pojji cahuime miquianaya quea nee po mee caje, 10 cahuime. Jamatii ja'a quea mete pojji! ¡A'a enijje jjapeequi pajea'yoyji jamatii cuia cajje! E pajea'yo ajja tii tii eyaya miquianaya ba'e tiitii meeje'yo eyajo Eyacuiñajji nijje. <sup>11</sup> Jamajjeya ishajja'ajjacue Edojjoshahua Pameja esohui ojjaña ecuea epeeji cuana Asia meshijo ba'eca cuana huasijje! Ojjaña joya enijje jjapee tiitiquiani cuaqui yasijje epoqui'yoyji pojjeama”.

—Jamaya eyaya, Jesusaa huoojeaña ecuea esohui etehue'yo ecuea epeeji cuana Eseminajo ba'eca huasijje. ¡Jamaya tehucue, Huani! —Jesusaa eya acanaje.

*Jesosaja esohui ojaya epeeji cuana Penamo cuiñajji ba'eca huasijje*

<sup>12</sup> Majoya Jesusaa eya huohui ca o'oyanaje jama ba'a: —Huani, ¡ecuea esohui tehucue ecuea esohui huohuiji Penamo cuiñajji ba'e yasijje! E'e, esohui tehucue jama ba'a: “Eya Jesosa Quito. Eyaya esohui huoojeaje mi que. Baa ose miji pea'ai isho jama quea shejji nee nee, quea ca'a nee nee jayojja ecuea esohui. <sup>13</sup> Ecuea epeeji cuana, miquianaya ba'yani cuiñajji quea mimishijo. Beshahua nei ojjaña jomajo ba'e Edosiquiana nei nijje jjapeequiani. Jamatii miquianaaya ecuea esohui jayojja jama atiitiaña. Ecuea epeeji Anatipa bajjani miquiana nijje ba'e'yonaje. Ohuaya ecuea esohui huohui majamaja canaje quea pame nee. Jamajjeya oya pea cuaa quecua ca'yonaje. Jamatii miquianaya enijje jjapeequi pajea'yo ajja. <sup>14</sup> Jamatii eya miquianajo quea yeno. Quea mimishi poani miquianaya; Banaamija esohui jama aje oe poani beca cuana Penamojo ba'eca. Ohuaya, Banaamiya emeshi mese Banaca bajjani yahuajo nei nei ba mee ca poa Isaeni cuana quea mimishi, quea tai epo mee'yoyji. Miquianaya beca cuaa Isaeni cuana quea mimishi ba'ya poa jayojja jama poani. E'e, jjeya bobi, noe cuanaya eyacuiñajji nisho bihuiajji dahua majje dejja mimishi cuana nijje ojee ijia'ijjiani pea'ai. Pea epona cuana nijje quea mimishi poani pea'ai. <sup>15</sup> Cuanaya miquiana nijje jjapeequiani beca cuana quea mimishi. Dejja Niconasi bajjanija esohui quea tai pajea sa po'yo ajja. Quea mimishi nee nee. <sup>16</sup> Jamajjeya ¡miquianajaya mimishi cuana pajea'yocue! Pajea sa po'yo ajjajo eya poecujije miquiana que. Poe majje eyaya ecuea epeeji quea mimishi poani tecuea neineje'yo. Baa ose miji pea'ai isho jama quea shejji nee nee quea ca'a nee nee jayojja ecuea esohui poaje. Quea yeno nee nee po meeje'yo.

<sup>17</sup> “Jamajjeya ishajja'ajjacue Edojjoshahua Pameja esohui ojjaña ecuea epeeji cuana Asia meshijo ba'eca huasijje! Ojjaña joya enijje jjapee tiitiquiani Edosiquiana je-abichajeajji poani. Jamajjeya eyaya oya cuana ba'e meesahuaje'yo tii tii. E'e, yahuajo Eyacuiñajjiya ojjaña Moisesi nijje nequi pahui sisi eyajje oque ijia mee ca poa. Jamaya

eyaya aje o'oya miqianajaya. Maya ecuea epeeji pojjeamaja ba jjima. Ecuea epeeji cuana huasijje eyaya quiaje mei oshe sisi pea'ai. Mei oshe biajje bajjani eyacua etehue'yo yani, maya onajaya ba jjima. Emei oshe meseja eba ojaye nei”.

—Jamaya eyaya, Jesusaa huoojeaña ecuea esohui etehue'yo ecuea epeeji cuana Penamojo ba'eca huasijje. ¡Jamaya tehuecue, Huani! —eya Jesusaa acanaje.

*Esohui Jesusaja epeeji cuana huasijje Tiatina cuiñajjijo ba'eca huasijje*

<sup>18</sup> Majoya Jesusaa pea esohui huohui canaje jama ba'a: —Huani, ¡ecuea esohui jiquio eya huohuiaña tehuecue esohui huohuijji Tiatina cuiñajjijo ba'e yasijje! Jamaya tehuecue ejo ba'a: “Eyaya, Jesusaa, Eyacuiñajjija Bacua Ejjaa miqiana que tehueña. Ecuea ecojja cuaqui jijiani jayojja quea ja'a nee nee. Ecuea ejiojji cuana baa huo'o cuaqui quea quiyo nee neejo nequi jayojja quea jiji nee nee poani. <sup>19</sup> Ecuea epeeji, ojjaña joya miqiaaya aña cuana ecuea eba. Miqianaaya eya quea jea nee nee aña. Enijje jjapeequi pajea'yo ajja nei nei pea'ai. Quea camajajo jamatii enijje chaco pajea'yo ajja. Jamaya miqianaaya quea pame nee nee aña jjeya, yahuajo jama pojjeama; yahuajo quea pame pishana poa. <sup>20</sup> Jamatii eya quea yeno miqianajo, de. E'e, miqianaya quea mimishi poani. Epona quea mimishi Jesameni bajjani shajja'ajja cani beca cuaa. Oya aje oe sijjepojji jama poani ba'a: —Eya ca iña Eyacuiñajjija huoojea'yo oja sohui huohuiya — oya poani.

“Chojja, sijje poani oya. Ohuaya aje oe ecuea epeeji cuana dasia cani. Quea mimishi po mee cani. E'e, ojaya esohui quea mimishijo beca cuana bobi, noe cuanaya eyacuiñajji nisho bihuijji dahua majje ojee ijja mee cani mimishi cuana nijje. Pea epona cuana nijje quea mimishi poani ojaya esohui quea mimishijo. <sup>21</sup> Ecuea maya epona napa jjima; ohuaya pojja'a mimishi pajea caje'yo. Jamatii oya quea mimishi ca'a; pajea sa po'yo ajja. <sup>22</sup> Jamajjeya eyaya oya quea nee nee po meeje'yo, ojjaña cuana joya o jayojjaya quea mimishi poani pea'ai quea nee nee po meeje'yo, ca mimishi cuana pajea sa po'yo ajjajo. <sup>23</sup> Ojjaña joya o shajja'ajjaji poani eyaya mano meeje'yo. Chama'yo tii poaje'yo. Jamajoya ma ba majjeya ojjaña ecuea epeeji cuana jjabahuejjaquije e'e jojo nei ecuea eba ojjaña cuanaja ejjashahuabaquijji. Quehuajje ejjashahuabaqui meeji pojjeama. E'e, ojjañaja eba'ejji ba majje eyaya sosequiaje'yo. Quea mimishi poanijo quea nee nee po meeje'yo. Quea pame poanijo ca ca quea bihui nee nee po meeje'yo.

<sup>24</sup> “Jamatii miqianaya Tiatinajo ba'e quea huiso nee ma esohui quea mimishi jayojja jama po ajja. Edosiquianaja esohui quea quehua, quea mimishi cuana jayojja jama po ajja pea'ai. Ba sa po ajja pea'ai. Jamajjeya eyaya miqianaya jamaya huohuiaña: ¡A'a ecuea esohui pajea'yojji! Mahuiso. <sup>25</sup> Miqianaya ecuea epeeji cuana poani. ¡Ishoacue ecuea epoe o'oyajji! ¡A'a enijje jjapeequi pajea'yojji! <sup>26-27</sup> Ecue Chiiya eya ojjaña meshijo ojjaña huoojea'yojji po mee tiitii cani. Jamaya eyaya miqianaya ameeje'yo enijje jjapee tiitiiquianijo. E'e, miqianaaya eshahua jeabichajeaña. Ecuea esohui jayojja jama atiitiañajo, peaa miqianaya cuiajea caje'yo pojja'a. Jamatii eyaya miqianaya enijje ona huoojea'yojji nequi meeje'yo tii tii. Ojjaña huoojea'yojji quea ca'a nee nee poaje'yo, ojjaña cuana ojjaña meshijo ba'eca cuana huoojea'yojji nei nei quijje poaje'yo. Jiquio ecua meshimisi jajaajajea cani baaa jamaya shajjama' cuana ojjaña meshijo ba'eca jeabichajeaje'yo miqianaaya enijje ojjaña huoojea'yojji nequi'yo majje. <sup>28</sup> Eyaya miqianaya quiaje'yo pea'ai aquiana quea pame nee nee yohua jayojja ba'a: majameta ai, eshequi huiyejji mecajjeahua nei jaasohuani jayojja jama.

<sup>29</sup> “Jamajjeya ¡shajja'ajjacue Edojjoshahua Pameja esohui ojjaña ecuea epeeji cuana Asia meshijo ba'eca huasijje; jjashahuabaquicue!”

—Jamaya eyaya, Jesusaa huoojeaña ecuea esohui etehue'yo ecuea epeeji cuana Tiatinajo ba'eca huasijje. ¡Jamaya tehuecue, Huani! —eya Jesusaa acanaje.



<sup>1</sup> Majoya Jesosaa eya huohui canaje jama ba'a: —Huani, ¡ecuea esohui tehuecue esohui huohuijji Sanisi cuiñajjijo ba'e yasijje, ma ecuea epeejji nei cuana jaahuanajji yasijje! Tehuecue jama ba'a: “Eya Jesosa Quito. Eyaya Edojjoshahua Pame miqiana huasijje huoojeaña. Eyaya miqianaya huohuiaña: Ecuea epeejji cuana, ojjaña miqianajaya eba'ejji cuana eyaya baña. Pea cuaa miqianajo huohui canaje jama ba'a: —Jesosaja epeejji cuana Sanisijo ba'ecaa Jesosaja esohui jayojja jama acani —poanaje.

“Jamatii eyaya miqianaya baña beshahua nei ecuea esohui jayojja jama ba'e ajja. <sup>2</sup> Jamajjeya ¡ecuea esohuijjo jjashahuabaquicue quea ja'a nee! Quea mimishi poanijo miqianaya jjashahuabaquiani oe pojji. Beshahua nei jjashahuabaqui ja'a pajea'yonaje. Jamaya quea mimishi, de. Eyacuiñajjija esohui jayojja jama a'ajja miqianaaya. <sup>3</sup> Ecuea esohui huohuijjiya ecuea esohui huohui canaje miqiana huasijje. Jamajjeya ¡ecuea esohui jama acue! ¡Mimishi cuana pajea'yocue! Ejo jjashahuabaqui ajjajo aje oe eya miqiana que quehuajje poecuajje quea nee nee po meeya, siipojji quehuajje poeyani jayojja. Eya ache pojajjo miqiana que poeje o'oya miqianajaya ebajji pojjeama.

<sup>4</sup> “Jamatii beca cuana Sanisijo ba'e quea boejea'yo ba'e, mimishi'ama nei. Oya cuana enijje ba'e meeje'yo. Quea pame nee ba'e eyaya oya cuana daqui quea oshe nee nee huosho meeje'yo enijje eba'e tiitii'yojji. <sup>5</sup> E'e, ojjaña joya enijje jjapeequi pajea'yo ajja daqui quea oshe nee nee huosho meeje'yo. Ojaya ebajjani cuana eyaya tehue'yonaje eba'e tiitii mee'yojji. Maya ojaya ebajjani eyaya ecuijea'yojji pojjeama. Oya cuanajo ca ca eyaya ecue Chii huohuije jama ba'a: —E'e, oya cuana ecuea epeejji nei —jamaya eya poaje ojjaña esohuidojojji cojja neijo ani.

<sup>6</sup> “Jamajjeya ¡shajja'ajjacue Edojjoshahua Pameja esohui ojjaña ecuea epeejji cuana Asia meshijo ba'eca huasijje; jjashahuabaquicue!”

—Jamaya eyaya, Jesosaa huoojeaña ecuea esohui etehue'yo ecuea epeejji cuana Sanisijo ba'eca huasijje. ¡Jamaya tehuecue, Huani! —eya Jesosaa acanaje.

*Jesosaja esohui ojaya epeejji cuana huasijje, Pinanepia cuiñajjijo ba'eca huasijje*

<sup>7</sup> Majoya Jesosaa eya huohui canaje: —Huani, ¡ecuea esohui ecuea esohui huohuijji, ecuea epeejji jaahuanajji Pinanepia cuiñajjijo ba'e yasijje tehuecue pea'ai! Jama tehuecue acue ba'a: “Ecuea epeejji cuana, eyaya, Jesosa Quitohua quea ja'a nee nee añ, mimishi'ama, e'e jojo nei Eyacuiñajji. Yahuaajo nei etiiqiana Dabi Jodio cuanaja emeshi mese poanaje. Jjeya eya Eyacuiñajjija cuiñajji eyacua mese. Eyaya esecue ca'a majje pea edobiqui meeji pojjeama. Ca'apejo majje pea dobiqui meeje.

<sup>8</sup> “Ecuea epeejji cuana, miqianajaya eba'ejji ecuea eba. Miquianaya oe pojji yani. Jamatii ecuea esohui jayojja jama añ. Enijje jjapeequi pajea'yo jjima. Jamajjeya eyaya miqianaya esohui huohui meeje pea cuana huasijje. Eshahuaja epeejji cuaa miqianaya ehuhui pajea mee'yojji pojjeama. <sup>9</sup> Oya cuana siajje poani jama ba'a: —Ecuana Jodio, e'e jojo nei Eyacuiñajjija epeejji —oya cuana poani.

“Jamajjeya eyaya eshahuaja epeejji cuana miqiana que poe meeje ecui'oshajjajo nequiya miqiana bihuiaa jama ba'a: —E'e, miqianaya Eyacuiñajjija epeejji e'e jojo nei, ojaya quea jea nee nee.

<sup>10</sup> “Pea cuaa miqianaya napa cani. Jamatii miqianaya ecuea esohui jayojja jama enijje jjapee tiitiiquije'yo. Jamajjeya quijje eyaya baje ache cuana ecuea epeejji e'e jojo nei. Quijje eshahuaja epeejji ojjaña cuana quea nee nee po meeje'yo; eyaya miqianaya jaahuana neineije'yo. <sup>11</sup> Quijje pishana eya, Jesosa poeje o'oya miqiana que. Jamajjeya ¡ecuea esohui jayojja jama po tiitii'yo! Jamajjeya pea cuanaja miqianaya edasiajji pojjeama. Majoya Eyacuiñajjija ejjashahuabaqui'yojji miqianajo jama acaje ba'a: Miquianaya ba'e tiitii mee'yo onijje. <sup>12</sup> ¡Bacue! Ojjaña miqianaya enijje jjapeequi pajea'yo ajjajo eyaya eyajo nequi tiitii meeje'yo. Acui ca'a, equi yamajjana quea quemo, quea ca'a nequije'yo tii tii jayojja jama ecuea epeejji nei nequi tiitii'yo eyajo. Eyaya ojjaña cuana ba meeje miqianaya ecuea epeejji e'e jojo nei, Eyacuiñajjija pea'ai. Jiquio ecua e'acui meseya acuijo oja bajjani quecuatuehue cani jayojja jama eyaya

aje'yo; ecuea epeeji nei cuana tehueje. Jamajjeya miqianaya, ojjaña ecuea epeeji pea'ai ojee enijje eyajo ani meeje'yo. Enijje poeje'yo; Eyacuiñajjija cuiñajji eyacua, Jenosanena eyacua bajjani jayojja jama poeje. Ecuea bajjani eyacua poaje eya quea ca'a nequianijo. Maya eyaya ojjaña miqianaya ba meeje'yo.

<sup>13</sup> “Jamajjeya ¡shajja'ajjacue Edojjoshahua Pameja esohui ojjaña ecuea epeeji cuana Asia meshijo ba'eca huasijje; ¡jjashahuabaquicue!”

—Jamaya eyaya, Jesusaa huohuiaña ecuea epeeji cuana Pinanepiajo ba'eca huasijje. ¡Jamaya tehucue, Huani! —Jesusaa eya acanaje.

*Jesosaja esohui ojaya epeeji cuana huasijje Naonisea cuiñajjijo ba'eca huasijje*

<sup>14</sup> Majoya Jesusaa eya huohui ca o'oyanaje pea'ai jama ba'a: —Huani, ¡ecuea esohui huohuijji Naonisea cuiñajjijo ba'e yasijje tehucue ecuea esohui! Oya ecuea epeeji nei jaahuanajji. Jama oya tehucue ba'a: “Ecuea epeeji cuana, eya Jesosa e'e jojo nei Eyacuiñajjija huoojea'yo. Eyaya huohuiaña Eyacuiñajjija esohui e'e nei. Eyaya Eyacuiñajji nijjeya ojjaña pana coa poa. Eyaya miqianaya huohuiaña jama ba'a: <sup>15-16</sup> Ojjaña miqianajaya eba'eji cuana ecuea eba. Eyaya baña miqianaya enijje jjapee neinei qui sa po ajja. Jamatii e cajaa sa po'yo ajja pea'ai. ¡A'a epeeji nisho pojji! ¡E cajaa a sa amajje jja ca iña oe huohucue! E'ishijji quea quiyo pojjeama jayojja poani miqianaya. E'ishijji quea huoe pishana enabajo peajja, ena quea tai jama. Jiquio ecua seya chijjoco ena ishi'ajja majje ojjaña yaña jayojja jama eyaya miqianaya cajaa achana', ca ecuea esohui miqianaaya mi shajja'ajjajo. <sup>17</sup> Miqianaya aje oe jiquio jama ¡jjashahuaba quehuaquiani ba'a: —Eya ca iña Eyacuiñajjija epeeji quea pame nee poani —miqianaya jamaya poani. Jamaya pea'ai poani ba'a: —Eya dejja quea aquiana huiso jayojja jama poani.

“Chojja. Miqianajaya eba pojjeama Eyacuiñajjija miqianaya ba cani jama ba'a: Miqianaya aema' jayojja, daquima' jayojja, cojjama' jayojjaya. Miqianaya quea mimishi ba'yanijo Eyacuiñajji quea yeno nee nee poani miqianajo. <sup>18</sup> Jamajjeya eyaya miqianaya huohuiaña: ¡Eya sa neineicue! ¡Ecuea esohui shajja'ajja neineicue! Ecuea esohui mei huo'o quea nahue jayojja jama poanijo, miqianajaya eba'eji quea ja'a nee poaje. Eya miqianajo mano'yonaje miqianajaya mimishi cuijea'yojji. ¡Jamaya ¡jjashahuabaquicue! Maya ba majje miqianaya daqui oshe ehuosho'yo ba'e jayojja jama poaje, quea bojea nee. Jamajoya miqianaya bicho'ama poaje miqianajaya mimishijo. ¡Edojjoshahua Pame bacue! Oya ecojja shicuijji jayojja; ohuaya miqianaya ecuea esohui ba meesahua caje'yo, quea ¡jjashahuabaqui ja'a nee po mee caje'yo. <sup>19</sup> Ojjaña ecuea epeeji eyaya tanacuaña, tecueaña pea'ai ejjabahuejjaqui meeji ecuea quea jea nee neejo. Jamajjeya ca oe ¡ecuea esohui jayojja jama acue e'e jojo nei! ¡Ecuea epeeji nisho a'a po majajji! <sup>20</sup> ¡Bacue! Esecuejo nequiya iyaa cani edobiquijji, miqiana nijje ejjapeequijji. Oya jayojjaya eya poani. Eyaya miqianaya iyaaña. E shajja'ajja majje jama pocue ba'a: —¡Jesusa, dobiecúe! —jamaya poajo eya miqiana que dobiequije miqiana ¡jjashahuabaqui meeji. Miqianaya enijje jjapeequije pea'ai. Jiquio ecua epeeji cuana ojee ¡jjia'ijjiani jama poaje eseya. <sup>21</sup> E'e, ojjaña joya enijje jjapee tiitiquiani eshahua jeabichajeajji poani. Jamajjeya quijje eyajo eyaya huohuije jama ba'a: —¡Enijje nequicue! ¡Enijje ojjaña huoojea'yojji pocue!

“E'e, miqianaya e jayojja jama poaje. Eyaya quea ca'aa jjejojo Edosiquiana je-abichajejanaje. Jamajjeya ecue Chii nijje eya anioqueani; ojjaña huoojeajji poani tii tii. <sup>22</sup> Jamajjeya ¡shajja'ajjacue Edojjoshahua Pameja esohui; ojjaña ecuea epeeji cuana Asia meshijo ba'eca cuana ¡jjashahuabaquicue!”

—Jamaya eyaya, Jesusaa huoojeaña ecuea esohui etehue'yo ecuea epeeji cuana huasijje Naonisea cuiñajjijo ba'e yasijje. ¡Jamaya tehucue, Huani! —eya Jesusaa acanaje.

<sup>1</sup> Majoya esohuidojojjiya jjanequipana meequi canaje jama ba'a: Eya ba mee canaje esecue eca'apejo nequi jayojja eyajo. Jjanequipana cooqui mee canajejo Jesosa enijje miminaje. Ojaya esohui eshe'ana emiajji jayojja jama janobajjima nei huohui canaje yahuajo pishana. Jjeya ohuaya eya huohui ca o'oyanaje jama ba'a: —Huani, ¡poecue eyahuasijje e que! Eyaya miya ba meeje jiquio eya quijje aje —Jesosa poanaje.

<sup>2</sup> Jjeyahua nei Edojjoshahua Pameya eya ba mee canaje jama ba'a: Emeshi Mese nei e'anioque ani ojjaña huoojea'yojji. <sup>3</sup> ¡Oya ache bame nee nee poanaje! Quea jeajahua nee nee mei ca'a quea siyo jayojja: mei quea nahue jasepe bajjani jayojja, codinania mei bajjani jayojja pea'ai. Ojaya e'anioquejjijo eshijje copocopo jayojja yaninaje quea bame nee nee mei tahuua esemenana mei bajjaniya jeasiyo cani jayojja jama. <sup>4</sup> Quea huiso Jesusaja epeeji etii cuana, 24 huisome onijje e'anioque ani. Eyacuiñajji ca ca eyiyesama neijo ani. Onajaya daqui quea oshe nee nee. Esapajo iya mei huo'o ejaahuojja quea nahue ani emeshi mese epojji. <sup>5</sup> Eyacuiñajjiya ojaya e'anioquejjijo aniya pojjeje po mee cani, beni jjaqueyaqui mee cani, cueji taaa po mee cani pea'ai. O cojja neijo cuaquijiji me oeje beca huisome nequi. Jiquio cuaquijiji cuana jama ba'a: Edojjoshahua Pameya acani Jesusaja epeeji cuana nijje ma ecua me oeje beca cuiñajji ba'e jama. <sup>6</sup> Eyacuiñajji cojja nei eyaya banaje bae quea tahuua nee nee jayojja, quea coe nee nee, quea siyo nee nee jayojja.

Eyaya banaje pea'ai ebeca pee pea'ai aquiana eshe, quea cojja huiso nee nee Eyacuiñajji e'anioque ani pejeje, cojja beca jayojja, ecojja quipa huejjajje jjabaquiani pea'ai. <sup>7</sup> Oe aquiana eshe ibia jayojja. Pea ana'ai jayojja. Pea aquiana dejja jayojja cojjame, dejja cuichoiji jayojja. Pea huipa cuabesaba'e jayojja jama. <sup>8</sup> Ojjaña jiquio aquiana eshe cuichoiji cuabesajji de, ojjaña 6 cuichome, me oeje oe cuichome. Ojjaña cuana quea cojja huiso nee nee; ojaya ecuicho quimejeje pea'ai ecojja cuana yani. Ojjaña cuana sohuicuayani tii tii Eyacuiñajji bihuiajji; sohuicuaya pajea ajja nei nei mecajje ai quiana. Jamaya poani ba'a:

“Eyacuiñajji, miya ca ca oe quea pame, mimishi'ama, quea boejea nee nee. Miya ojjañaja Emeshi Mese nei quea ca'a nee nee. Miya yahuajo nei nei ani tiitiia poa, jjeya ani tiitiiani, quijje ani tiitiije'yo pea'ai”.

Jamaya oya cuana poani.

<sup>9</sup> E'e, ma aquiana eshe cuana sohuicuayani Eyacuiñajji bihuiajji. Jama poani ba'a: “Eyacuiñajji, miya oe nei quea pame nee nee, oe nei nequi tiitiiani, ¡ojjaña miya cabihuia cahua!” oya cuana jama sohuicuayameya poani.

<sup>10</sup> Ma shajja'ajja majjeya Jesusaja epeeji etii cuaa, ma 24 huisomeya ecui'oshajjajo nequiya Eyacuiñajji bihuia cani. E'e, oya oe nei e'anioque ani tii tii bihuia cani. Onajaya mei huo'o ejaahuojja quea nahue nee cajjajea majje Eyacuiñajji ejiojji pejeje iyaoquea cani. E'e, Eyacuiñajji oe nei quea ca'a nee nee. Jamajjeya oya bihuia cani cuaa jama ba'a:

<sup>11</sup> “Eyacuiñajji, miya oe nei ecuanaja Emeshi Mese nei. Miya oe nei quea pame nee nee. Jamajjeya ecuaaya miya bihuiaña. Miya oe nei ani tiitiije'yo, oe nei ojjaña huoojeajji. Miyaya ojjaña aquiana cuana pana coa poa. E'e, ojjaña aquiana miyaya saña. Jamajjeya pana majje nequi tiitii meeña, miyaya”.

Jamaya Eyacuiñajji bihuia cani ma 24 epeeji etii cuaa eyajo aniya.

## 5

### *Ejeejo esohui etehue'yo eyaya banaje*

<sup>1</sup> Majoya eyaya, Huaniya Eyacuiñajji e'anioquejjijo ani banaje. Ojaya eme' ebianeijje esohui ejeejo tehue e'iñabebo nequi eyaya banaje. Jiquio ejeejo quea huiso esohui etehue poanaje, omiji pea'ai tehume'ya poanaje. Tehuejeyo majje me oeje beca, 7 ijjiabaji meeme'ya poanaje. <sup>2</sup> Eyaya esohuidojojji quea ca'a nee nee banaje pea'ai. Ohuaya ojjaña cuana janobajjima nei huohui'ajja canaje jama ba'a: —¿A'ya cuae quea pame nee nee esohui etehue'yo hui isajji esohui etehue'yo ebajji? ¡Joya quea pame nee nee

Eyacuiñajji cojja nei nei nequicue esohui etehue'yo ecueabaji hui isajji! —esohuidojojji jama taaameya poanaje.

<sup>3</sup> Jamatii eyajo ba'e, meshijo ba'e pea'ai, yahuaajo emano'yo pea'ai chama' poanaje oe quea pame nee nee esohui cuiabaji hui isajji, ejee jjequijeapiihuijji. Chojja, chama' nei nei poanaje oe quea pame nee nee ma esohui ba meejji. <sup>4</sup> Jamajjeya chama' nei nei ba majje eya quea yeno poanaje. Pa neineinaje. <sup>5</sup> Majoya Jesusaja epeeji etii, ma Eyacuiñajji bihuia caniya pea 24 huisome cuana nijjeya eya huohui canaje: —¡A'a oe pajji! ¡Bacue! Oe dejja Jesosa bajjani yani, ma Jodaja osecua, emeshi mese Dabija osecua poa. Oya ca ca oeya esohui cueabajji hui isa majje ejee jjequijeapiihui caje'yo esohui ebajji. Oya quea ca'a nee nee, ibia naa asha jayojja jama ojjaña huoojea'yojji poani.

<sup>6</sup> Majoya eyaya banaje oe dejja Eyacuiñajji e'anioque ani pejjejo nequi. Oya ebeca pee pea'ai huisome aquiana eshe cuana yiyesama neijo nequi, Jesusaja epeeji etii quea ca'a quea huiso cuana yiyesama neijo nequi pea'ai. Oya ca ca jiquio jama ba'a, ñajjajja esho'i equecua'yo jayojja ojjañaja mimishi cuijea'yojji. Oya Emeshi Mese nei quea ca'ajo ñajjajja yahue she'anajji jayojja me oeje beca she'aname jayojja eyaya oya banaje. Ojjaña ojaya eba neineijo oya quea cojja huiso nee jayojja banaje eyaya, me oeje beca cojjame jayojja eyaya oya banaje, 7 cojjame. Ecojja cuana Edojjoshahua Pameya acani, ma Edojjoshahua Pameya Jesusaja epeeji cuana ojjaña meshijo ba'aja yajjijo acani jayojja. <sup>7</sup> Ma dejjaa ñajjajja equecua'yo jayojjaa Eyacuiñajji que jjanequichipiqui majje jjeshe canaje esohui etehue'yo oja ebiane meje iñanequia nequi. <sup>8</sup> Jamajjeya aquiana eshe cuaa ebeca pee pea'ai huisomeya Jesosa bihuia canaje. Jesusaja epeeji etii quea huiso 24 huisome pea'aiya Jesosa, ma ñajjajja equecua'yo jayojja bihuia canaje ecui'oshajjajo nequiya. Oya cuanaja e'iñaqueyajji yaninaje. Mei huo'o caneco madeja pohui jayojja anijji yaninaje pea'ai. Madeja pohui jayojja huichachanaje. Huichacha quea shiye Eyacuiñajjija epejjija emimi onijje jayojja. <sup>9</sup> Jesusaja epeeji etii cuana esohui eyacua sohuicuayanaje Jesosa bihuiajji jama ba'a:

“Jesosa Quito, ¡miya quea pame nee neejo esohui etehue'yo jjeshe majje ecueabaji hui isacue! E'e, miya quecua canaje cuaa. Miquea ena' cuayaquiajo mano'yonaje ojjaña cuanaja mimishi cuijea'yojji. Ojjaña miquea ejjeshe'yo jayojja. Jamajjeya Eyacuiñajji nijje jjapeequi meeña ojjaña cuana ojjaña meshijo ba'e, ojjaña cuiñajjijo ba'e, ojjaña pea esohuijo mimiani cuana pea'ai. <sup>10</sup> Jesosa, miya ojjaña huoojea'yojji poani. Jamajjeya ecua huoojeaje minijje ojjaña joya ojjaña meshijo ba'e huoojeaa, esejaya Chii aija esohui huohuiya pea'ai”.

Jama sohuicuayameya poanaje Jesosa bihuiajji.

<sup>11</sup> Majoya eyajo eyaya banaje esohuidojojji quea huiso nee nee. Eyaya onajaya esohuicuayajji shajja'ajjanaje pea'ai. Oya cuana quea huiso nee neejo sicosico ajja. ¡Ache huiso nei nei, de! Oya cuana ejjanequitoqui'yo nequinaje aquiana eshe cuana, Jesusaja epeeji etii cuana quea huiso pea'ai ejjanequitoqui nequi'yonaje. Ojjaña yiyesama neijo Eyacuiñajji e'anioque ani. <sup>12</sup> Onaya janobajjima nei sohuicuayanaje; Jesosa bihuia canaje jama ba'a:

“Jesosa, miya quea pame nee nee. Miya ojjañaja mimishijo mano'yonaje, ñajjajja sho'i equecua'yo jayojja jama poanaje. Miya oe nei ojjaña huoojeajji. Ojjaña aquiana miquea, ojjaña tii. Ojjaña miquea eba. Miyaya quea ca'a poaniya jjejojo ojjaña ña. Ecuanaaya miya shajja'ajjaña; ecuaanaaya miya bihuiaña. Ecuanaaya huohuiaña mijo jama ba'a: —Jamaya quea pame nee miyaya ña —poani”.

Jamaya esohuidojojji cuana poanaje eyajo.

<sup>13</sup> Majoya eyaya shajja'ajjanaje ojjaña Eyacuiñajjija pana cuana, ojjaña eyajo ba'eca cuana, ojjaña meshijo ba'eca cuana, ojjaña yahuaajo mano'yo cuana, ojjaña enajo ba'eca cuana pea'aiya sohuicuayani. Ojjaña cuana Eyacuiñajji e'anioquejjijo ani bihuia cani. Jesosa ma ñajjajja jayojja jama mano'yonaje pea'ai bihuia cani onaaya jama ba'a:

“Eyacuiñajji, miya ojjaña huoojeajji. Jesosa, miya ecuanajo mano'yonaje. Jamaya quea pame nee nee. Jamajjeya ojjaña ecuaanaaya miya bihuiaña. Miya shajja'ajjaña

pea'ai ecuanaaya. Quea ca'a nee neeya jjejojo miyaya ojjaña cuana aña. ¡Jamaya capoahua tii tii!"

Jamaya sohuicuayani ojjaña cuana.

<sup>14</sup> Majoya aquiana eshe cuana Eyacuiñajji pejejo ani jama poanaje ba'a: —E'e, ¡jamaya ojjaña miya cabihuia cahua tii tii!

Jesosaja epeeji etii cuaa, ma 24 huisomeya pea'ai Eyacuiñajji bihuia canaje ecui'osha-jjajo nequiya. Oya ca ca oe enequi tii tii. E'e, Jesosa etehue'yo ecueabajijji me oeje beca ecueabajime'ya hui isajea mee caje, Eyacuiñajjiya.

## 6

### *Esohui etehue'yo oe ecueabajijji'ya isajea canaje Jesosaa*

<sup>1</sup> Majoya eyaya, Huaniya banaje jama ba'a: Jesosa, ma ñajjajja sho'i equecua'yo jayojja yani. Ohuaya oe etehue'yo ecueabajijji'ya isajea canaje, ebionei. Majoya eyaya shajja'ajjanaje oe aquiana eshe eyajo mimiani. Ojaya esohui cueji taaani jayojja. Joya mapichi aija edaasa biajje ani yasijje taaanaje jama ba'a: —¡Poecue!

<sup>2</sup> Jjeya nei eyaya banaje mapichi oshe poeyani. Ohuaya mapichija edaasa biajje aniya mai ecohuijji iña canaje. Oya emeshi meseja ejaahuojja quea nahue nee quia canaje cuaa. Oya poquicuajinaje ojjaña jeabichajee, emeshi mese quea ca'a nee nee jayojjaya.

<sup>3</sup> Majoya Jesosaa pea ecueabajijji'ya isa canaje. Eyaya pea aquiana eshe eyajo shajja'ajjanaje. Ohuaya jama iyaame acanaje ba'a: —¡Poecue!

<sup>4</sup> Jjeya nei eyaya banaje mapichi ai quea huo'o nei nei. Dejja mapichija edaasa biajje ani baa ai quia canaje cuaa. Oya jama huohuime acanaje cuaa ba'a: —¡Poquicue miya! ¡Ojjaña jjaquecuaqui meecue pea cuana nijjeya! —jamaya poanijo ojjaña quea tecue nee nee po mee cani ojjaña pea cuana nijje.

<sup>5</sup> Majoya Jesosaa pea ecueabajijji'ya isajea ca o'oyanaje. Pea aquiana esheya iyaa canaje jama ba'a: —¡Poecue!

Majoya mapichi ai tehue poeyani eyaya banaje. Ohuaya mapichija edaasa biajje aniya e'ipia'ajjajji iña canaje, bobi ipia'ajjajji, oe pojji bobi yani jojoya.

<sup>6</sup> Majoya eyaya shajja'ajjanaje pea eyajo mimiani aquiana eshe yiyasamajje nequi. Jama poanaje joya mapichija edaasa biajje ani nijje ba'a: —¡Echacojji cuana oe pojajo chaco chaco majje oe pojji bobi quiacue chaco sosejje! ¡Anoso oe pojji, oe tepe iye quemo pojja'a quiacue; shijje iye huiso pea beca peejjima tepe pojja'a quiacue jjeyahua nei e'ijjajji! ¡A'a huana meejji quijje e'ijjia'yoyji! ¡Acuijjajja sei, acuijjajja na e'ishijji a'a quea nahue ameejji! —oya poanaje.

<sup>7</sup> Majoya Jesosaa pea ecueabajijji'ya isajea cajo eyaya shajja'ajjanaje pea aquiana eshe eyajo. Ohuaya jama iyaame acanaje ba'a: —¡Poecue!

<sup>8</sup> Jamajjeya jjeya nei eyaya banaje mapichi jahua poeyani. Ohuaya mapichija edaasa biajje aniya quea huiso nee nee mano mee caje'yo. Jamajjeya oya Jjamano meequi'yoyji bajjani. Mano mee ca'yajje ojjaña poqui mee caje'yo emano'yo sajaa huasijje. Oya huohui canaje cuaa jama ba'a: —¡Quea huiso nee nee mano mee'yocue ojjaña meshijo ba'eca! ¡Oe dejja mano mee'yocue; beca cuana a'a mano meejji! ¡Jamaya amajamajacue ojjaña meshijo ba'e cuana! ¡Quea huiso mano mee'yocue jjaquecuaquianijo; bobi chamajo pea'ai, emanomeejjijo pea'ai mano mee'yocue! ¡Ijjiacajji quea mase cuaa dejja quea huiso ijji mee'yocue pea'ai!

<sup>9</sup> Majoya Jesosaa, ma ñajjajja sho'i equecua'yo jayojjaa pea ecueabajijji'ya isajea cajo eyaya banaje quea huiso Jesosaja epeeji yahuajo mano'yo cuana eyajo nequi'yo. Pea cuaa oya cuana quecua ca'yonaje Eyacuiñajji esohui jama ajji poanijojo, Jesosaja esohui huohuijijjojo pea'ai. E'e, oya cuana jiquio jama ba'a: Jodio cuaa ñajjajjaja ebacua cuana mei e'iya biajje cuia cajje na' cuayaquianinaje mimishi cuijea'yoyji jayojja jama dejja cuaa Jesosaja epeeji cuana quecua ca'yajje onajaya ena' cuayaqui'ya poa. <sup>10</sup> Jamajjeya oya cuana taaanaje jama ba'a: —Emeshi Mese nei, miya quea pame nee; ojjaña miyaya aña.

Huohui majje jamaya poani. ¡Bacue oe, dejja mimishi cuaa ecuana quecua ca'yonaje! Jamajoya ¿ache shono shai ojjaña quea mimishi ojjaña meshi cuanajo ba'e quea nee nee po meeje'yo miyaya? —oya cuana poanaje.

<sup>11</sup> Eyacuiñajjiya oya cuana quia canaje daqui oshe quea ao nee nee. Ona nijje miminaje jama ba'a: —Pea cuaa miqianaya quecua ca'yonaje ecuea esohui huohuiji poanijojo. Miquea edoe mese cuana ecuea epeeji cuana enijje chacochoani pea cuaa quecua caje'yo pea'ai. Jamajeya ¡ishoa socue! Quecujeyo cajo, eyaya dejja mimishi cuana quea nee nee po meeje'yo —Eyacuiñajjiya acanaje.

<sup>12</sup> Majoya Jesosaa pea ecueabajji'ya isajea cajo eyaya banaje jama ba'a: Meshi huehuahuehuanaje janobajjima nei. Eshequi quea apo nee nee poanaje, daqui tehue nei jayojja poanaje. Ba'i quea huo'o nee, ena' jayojja poanaje. <sup>13</sup> Majameta cuana jjacajjaqui majje jijijioquenaje meshi yasijje, beni pajjiya acuijjajja etahua jeahuojjea cani jayojja poanaje. <sup>14</sup> Eyatahuatahua chama'yo tii poanaje. Jjahuejjajjaqui majje yoquise esipi ejjequiejapihui nequi jjajajjaqui'yani jayojja poanaje pea'ai. Eyiyo, nasi cuana pea'ai jjaajaajjaqui majje jjasheshojjaquinaje meshi huehuahuehuajo. <sup>15</sup> Jamaya emeshi mese cuana poanaje pea'ai; jeabichajja'yonaje ojjaña. E'e, jiquio jama poanaje ba'a: Emeshi mese cuana, dejja huoojajji cuana, dejja quea aquiana huiso cuana, sohuinano mese cuana, dejja etii cuana, dejja ehoojajjima' cuana, dejja ehoojajjijji cuana pea'ai jja'aniquehuaqui canaje jjani cuana huasijje, eyiyo cuana huasijje pea'ai. <sup>16</sup> Ojjaña jiquio dejja mimishi cuana quea mete nee nee poanijo siasianaje jama ba'a: —Eyacuiñajji ojjaña huoojajji oya yani. Jesosa ñajajja sho'i equecua'yo jayojja yani pea'ai. Eseyaya quea mimishi poanijo, oya cuana quea quene nee nee poani ese nijje. ¡Jamajoya eyiyo cuana, mei ai cuana pea'ai ecuana biajje ca'oqueahua, Eyacuiñajjiya eseyaya eba ca cuahuajje, Jesosaa eseyaya quea nee nee epo mee ca cuahuajje! <sup>17</sup> E'e, oya cuana poeyani ojjaña quea mimishi napaa. Ojjaña eseyaya manojje'yo, de —jama siasiameya dejja mimishi cuana poaje.

## 7

### *Jesosaja epeeji bahua tehue canaje Jodio cuanaja ojjañaja ebajji*

<sup>1</sup> Majoya eyaya banaje ebeca pee pea'ai esohuidojojji cuana. Eyacuiñajji onijje miminaje beni cuana ehoojajji pojjeamajo. Beni quea quemo dejja cuana napajji meshi cuana huasijje, bae ai cuana huasijje, acui cuana huasijje epoqui poaje jjejojya iña cani esohuidojojji cuaa. <sup>2</sup> Majoya eyaya pea esohuidojojji banaje; eshequi poeje mijijje poeyanaje. Ohuaya aquiana etehuejji ye canaje Eyacuiñajjiya epeeji cuana bahua tehuejji ojjañaja ebajji. Ma esohuidojojji ebeca pee pea'ai cuana huasijje taaanaje meshi cuana, bae cuana pea'ai enapa ca poaje jjejojo. Jama poanaje ba'a: <sup>3</sup> —¡Ishoa socue! ¡Meshi, bae ai, acui cuana pea'ai a'a jinapajji so'o! ¡Eyaya Eyacuiñajjiya epeeji Jodio cuana Eyacuiñajjiya bajjani ojjañaja ebajji cabahua tehuesahua! —ma esohuidojojji poanaje.

<sup>4</sup> ¿Ache huiso tehue canaje ebahuajje Eyacuiñajjiya bajjani ojjañaja ebajji? Eyaya shajja'ajjanaje jama ba'a: —Jodio cuana Eyacuiñajjiya bajjani quea huiso nee nee tehue canaje ebahuajje, 144.000 huisome. Jodio etiiquianaja Isaenija bacua ejja 12 cuana poa. Ojaya osecua cuana tehue canaje. <sup>5</sup> Jama tehueme acanaje ba'a:

Jodaja osecua cuana 12.000 huisome;

Shobenija osecua cuana 12.000 huisome;

Janeja oya jayojjaya 12.000 huisome;

<sup>6</sup> Aseneja oya jayojjaya 12.000 huisome;

Netanija jamaya pea'ai 12.000 huisome;

Manaseja osecua cuana 12.000 huisome;

<sup>7</sup> Simeonija osecua cuana 12.000 huisome;

Nemija osecua cuana 12.000 huisome;

Isacanjaya osecua cuana 12.000 huisome;

<sup>8</sup> Sabononija oya jayojjaya 12.000 huisome;

Joseja oya jayojjaya 12.000 huisome;

Bejamija jamaya pea'ai 12.000 huisome.  
Mahuisoya Eyacuiñajjija bajjani tehue mee canaje Jodio cuanaja ebahuaaje.

*Quea huiso nee nee ojee nequi daqui oshe huosho'yo epo*

<sup>9</sup> Majoya eyaya banaje quea huiso nee nee pea cuana, Jodio pojjeama ojee echicha'yo nequi, daqui oshe nee nee huosho'yo epo. Quea huiso nee nee poanijojo esicojji pojjeama. Oya cuana ojjaña meshijo ba'e, ojjaña cuiñajjijo ba'e pea'ai poeyani. Deja tehue cuana, Ese Ejja cuana, deja nei cuana, ojjaña de, poeyani. Ojjaña pea esohuijo mimiani cuana poeyani pea'ai. Ojjaña oya cuana Eyacuiñajji cojja nei nequi. Cuanaya Jesosa ñajjajja equecua'yo jayojja cojja nei nequi yasijje poeyani ojjaña. Onajaya daqui ao quea oshe nee nee. Onaaya jjememe iña jeasohua cani Jesosa bihuiajji. <sup>10</sup> Ojjaña cuana taaanaje jama ba'a:

“Eyacuiñajji, miyaya ojjaña huoojeaña. Jesosa, miya mano'yonaje ñajjajja equecua'yo jayojja. E'e, miyaya ecuanaya ba'e tiitii meeña”.  
Jamaya acanaje cuaa.

<sup>11</sup> Majoya ojjaña esohuidojojji eyajo cuana Jesusaja epeejji etii pejejo nequi, ebeca pee pea'ai aquiana eshe cuana pejejo nequi pea'ai, Eyacuiñajji ma ojjaña yiyesama neijje ani yasijje jjanequichipiquinaje. Eyacuiñajji ojjaña huoojea'yojji poani bihuia canaje esohuidojojji cuanaa ecui'oshajjajo nequiya. Jama poanaje ba'a:

“¡Jamaya capo'yahua, Eyacuiñajji! Miya quea pame nee nee. Ojjaña miquea eba. Miya shajja'ajjaña tii tii ecuaaaya. Miya ojjaña huoojeajji enequi tii tii. Ojjaña ecuaaaya miya bihuia tiitii aña. <sup>12</sup> Miya quea ca'a nee neejo ojjaña miyaya aña tii tii. ¡E'e, jamaya capo'yahua tii tii!”

Ojjaña esohuidojojji jamaya sohuicuayanaje.

<sup>13</sup> Majoya Jesusaja epeejji etiiya eya huohui'ajja canaje jama ba'a: —Huani, ojjaña jiquio echicha'yo nequi daqui oshe nei huosho'yo epo ¿a'a miquea eba? ¿Achejje shai oya cuana poeyani so'o?

<sup>14</sup> Jamajjeya eyaya oya jama anaje ba'a: —Chojja, ecuea ba jjima. Miyaya ca ya ca oe baña, de. ¡Che iña oe huohucue!

Ohuaya eya saja'a canaje jama ba'a: —Onaya ba'e'yonaje meshijo. Jesosa nijje jjapeequianijo, deja mimishi cuaa oya cuana napa huicha'ahuicha'a canaje. Jiquio ecua dejjaa daqui oshe tajja cajje quea boejea nee nee poani jayojja jama Jesusaa ojjañaja mimishi cuijea ca'yajje quea boejea nee nee poani. E'e, Jesosa ñajjajja sho'i equecua'yo jayojja poanaje. Ojaya ena' cuayaqui majje ojjañaja mimishi cuijea'yojji poanaje.

<sup>15</sup> Jamajjeya oya cuana nequi mee ca'yani Eyacuiñajji cojja neiyo eyajo. Jomajo onaaya Eyacuiñajji nijje chaco tiitii cani quea bihui nee nee. Eyacuiñajji ojjaña huoojea'yojji poani. Ohuaya ojaya epeejji cuana jaahuana tiitii cani. <sup>16</sup> Ojaya epeejji cuana quea shoe pojjeama poaje'yo. Quea nabataja po ajja pea'ai. Eshequijo quiyo'yo ajja, quea mano po'yo ajja pea'ai. <sup>17</sup> E'e, Jesosa ñajjajja equecua'yo jayojja Eyacuiñajji pejejo nequi. Jiquio ecua ñajjajja cuiñajjiya ñajjajja cuana jaahuana cani, ena eteo ishi mee cani jama jayojja Jesusaa ojaya epeejji cuana jaahuana cani. Ojaya e'ishijji ishi mee majje ba'e tiitii mee caje'yo onijje pea'ai eyajo. Eyacuiñajjiya jaahuana canijo, oya cuana quea yeno po ajja. Pa'yo ajja poaje'yo —jamaya Eyacuiñajjija epeejji etii poanaje.

## 8

*Pea ecueabajjiji'ya isa canaje ma me oejje beca oe poanaje*

<sup>1</sup> Majoya Jesusaa pea ecueabajjiji'ya isa canaje. Jamajjeya ojjaña ecueabajjiji'ya me oejje beca huisome'ya oeyejje nei isajea ca'ya poa. Jamajjeya oeyejje nei ecueabajjiji'ya isa ca'yajo, ojjaña cuana eyajo ani jeca neinei po'yonaje. <sup>2</sup> Quijje pishana eyaya banaje me oejje beca esohuidojojji Eyacuiñajji cojja nei nequi. Oya cuana huasijje eshe'ana ai jayojja me oejje beca quia mee canaje Eyacuiñajjiya emiajji.

<sup>3</sup> Majoya eyaya banaje pea esohuidojojji. Ohuaya shiyeshiye dahujji mei huo'o quea nahue ñanequia cani mei huo'o e'iyá aquiana dahujji pejejo. Oya quia canaje

cuaa madeja pohui jayojja quea shiye nee nee edahuajeajji Eyacuiñajji bihuiajji. Maya dahuaajea canaje mei huo'o e'iya biajje, ma Eyacuiñajji anioqueani pejejo. Jiquio ecua madeja pohui dahuaajea cajje huichacha quea shiye ba'esohuaquiani jayojja jama Eyacuiñajji epeeji cuanaja emimi onijje eyahuasijje ba'esohuaquianijo Eyacuiñajjiya shajja'ajja cani. <sup>4</sup> Jamajjeya madeja pohui jayojja quea shiye nee nee esohuidojojjiya eme jjotojo ani quiyo nequinaje. Huichacha ba'esohuaquinaje Eyacuiñajji yasijje. Ma huichacha ba'esohuaquianijo, Eyacuiñajjiya shajja'ajja canaje Jesusaja epeeji cuanaja emimi onijje. <sup>5</sup> Majoya ma esohuidojojjiya cuaqui cojja sha mei e'iya biajje ani iya canaje shiyeshiye dahuaajjijo. Majoya eyajo nequiya ohuaya cuaqui cojja sha shiyeshiye dahuaajjijo ani jeoqueajea canaje meshi yasijje. Majoya cueji cuana taaa poanaje janobajjima nei. Pojjeje baa siyoo cuana poanaje. Meshi huehuahuehuanaje pea'ai. Quea shajjaquijjo pea'ai poanaje.

### *Emiajji cuana*

<sup>6</sup> Majoya me oeje becaa, <sup>7</sup> esohuidojojji cuaa emiajji cuana iña canaje emiajji. <sup>7</sup> Ebionei esohuidojojjiya ojaya emiajji ana'ai she'ana jayojja mia canaje aquiana quea huiso meshijo edahuajeajji. Mia cajo, quea huiso meja jjacajjaquinaje oquequinaje meshi yasijje. Pojjejejea quea huiso meshi dahua canaje. Ena' oquequinaje meshi yasijje pea'ai. Jamajjeya meshi quea huiso quiyonaje. Oe meshi quiyonaje; beca quiyo jjima poanaje. Pea quiyonaje; beca quiyo jjima poanaje. Jamaya poanaje ojjaña meshijo. Acui cuana jamaya poanaje pea'ai. Oe acui quiyo'yonaje; beca acui quiyo jjima poanaje. Ojjaña huenihueni quiyo'yonaje. Chama'yo tii poanaje.

<sup>8</sup> Me oeje oe pea esohuidojojji cuanaja mia jjima ojaya emiajji cuana. Jamajjeya majoya pea esohuidojojjiya ojaya emiajji ana'ai she'ana jayojja mia canaje. Taaa'yo majje ohuaya aquiana eyiyo quea quemo nee, quea jiji nee jayojja jeoqueajea canaje bae ai cuana huasijje. Quea huiso bae ai quea huo'o poanaje ena' jayojja. Ena' jjejojo quea ihui poanaje. <sup>9</sup> Jamajjeya quea huiso nahuoo mano'yonaje. Oe nahuoo mano'yonaje; beca mano'yo jjima poanaje. Jamaya poanaje ojjaña nahuoo cuana. Quea huiso bishe ai hui'i'yonaje. Oe bishe hui'i'yonaje; beca hui'i'yo jjima poanaje. Jamaya poanaje ojjaña bishe cuana.

<sup>10</sup> Me oeje huiso esohuidojojji cuanaja emiajji cuana mia jjima so'o. Jamajjeya majoya pea esohuidojojjiya ojaya emiajji mia cajo oe majameta eyajo nequi quea jiji nei, cuaquijji quea quemo jayojjaya oquequinaje quea huiso cuei yasijje. <sup>11</sup> Maya majameta ma bajjani ba'a: Quea Pase Nee Nee bajjani. Jamajjeya quea huiso cuei, ena eteo pea'ai quea tai poanaje. Oe cuei quea pase nee nee; beca cuei pase'ama poanaje. Jamaya poanaje ojjaña ena. Jamajjeya quea huiso dejja cuana mano'yonaje ena quea pasejojo.

Ebeca pee pea'ai huisomeja esohuidojojji cuanaja emiajji mia jjima so'o. <sup>12</sup> Jamajjeya majoya pea esohuidojojjiya ojaya emiajji mia cajo eshequi jaasohua pishana majje jiji ajja, quea misi poanaje. Mecajje ba'i jamaya poanaje pea'ai. Jaasohua pishana majje quea misi poanaje. Majameta cuana quea misi poanaje pea'ai: Oe majameta jiji ajja; beca cuana jiji canaje. Jamaya poanaje ojjaña majameta.

<sup>13</sup> Majoya eyaya banaje huipa cuabesani. Oya taaanaje jama ba'a: —Quea yeno nee nee poaje ojjaña meshijo ba'eca cuana. E'e, pea beca pee jjimaa esohuidojojji cuaa emiajji eshe'ana jayojja mia caje. Mia cajo, quea nee nee poaje quea huiso dejja cuana —jama taaameya poanaje huipa. Jamaya poani eyaya banaje, Huaniya.

## 9

<sup>1</sup> Majoya pea esohuidojojjiya ojaya emiajji mia canaje. Mia cajo pea majameta jayojja meshi yasijje oquequiani eyaya banaje. Oya majameta jayojja huasijje quia mee canaje Eyacuiñajjiya esecue cojja quecuaca'apejo meeji, yave quia canaje jjani ai quea doe nee nee ca'apejojji. <sup>2</sup> Jjani ai quea doe nee nee ca'apejo cajje eyaya banaje huichacha quea quemo ba'esohuaquinaje que quea quemo nee nee dahuaajea cani jayojja, quea jiji nee nee poani jayojja. Eshequi quea misi poanaje huichacha quea quemojo. <sup>3</sup> Huichacha quea



quemajo ani satajje jayojja cuayaquinaje, satajje ejja pojja'a. Quea satajje moo nee nee poanaje. Meshi yasijje poeyanaje. Ma satajjeja ehua'o cuana aji jayojja, quimajji. <sup>4</sup> Satajje quimajji huohui canaje Eyacuiñajjiya jama ba'a: —¡A'a huenihueni napajji! ¡Acui sisi, acui quea quemo pea'ai a'a napajji! ¡A'a napajji ecuea epeeji ma ebahuaaje ecuea bajjani ecue etehue'yo! ¡Ecuea epeeji pojjeama ca ca napacue, ma ebahuaaje ecuea bajjani tehue jjima! <sup>5</sup> ¡Oya cuana a'a mano mee'yojji! ¡Quea nee nee oe po meecue me oeje ba'ime, 5 ba'ime! —poanaje.

Jamajjeya equimaa quecua majamaja cajje quea nee nee po mee canaje, ajiya quecua cani jayojja. <sup>6</sup> Jamajjeya dejja mimishi cuana mano'yo sa poaje ma me oeje ba'ime. Jamatii mano'yo jjima poaje.

<sup>7</sup> Ma satajje ejja cuana jiquio jayojja jama ba'a: Yamijji mapichi ai ejjaquecuaquijji DOJOJJI jayojja. Dejja jayojja cojjame. Mapichi mei huo'o quea nahueja sapa huahuo iya jayojja. <sup>8</sup> Satajje ejja cuana saojji de, epona jayojja. Ojaya ese' quea ao, ibia jayojjaya. <sup>9</sup> Ese'ojje baa daqui quea moo eba'e huana. Oya cuana cuichojji pea'ai. Ojaya ecuicho cuana quea shajjaquijjo, mapichi quea huiso nee nee cuajicuaajijebeani jayojja jama poani, mapichiya pea ejjaquecuaquijji DOJO cani pea cuana quecuaa. <sup>10</sup> Satajje ejja cuanaja ehua'o aji jayojja, quimajji. Dejja cuana quecua caje equimaa. Quea nee nee po mee caje'yo me oeje ba'ime. <sup>11</sup> Satajje ejja cuanaja ehoojeajji yani. Oya jjani ai cuiñajji, ma emano'yojaa nequi quea doe nee nee cuiñajji. Jodio cuanaja esohuijo ojaya bajjani Abodono bajjani; Jieno cuanaja esohuijo oya Aponiono bajjani; Ese Ejjaja esohuijo ojaya bajjani Ojjaña Quea Yeno Po Mee'yojji bajjani.

<sup>12</sup> Jamajjeya ebionei epojja cuana quea nee nee poani apoa acanaje. Quijje pishana quea camaja nee nee poaje. E'e, beca esohuidojojji cuanaja emiajji mia jjima.

<sup>13</sup> Majoya pea esohuidojojjiya ojaya emiajji mia canaje. Mia cajo eyaya pea shajja'aj-janaje. Oya mimiani ebeca pee pea'ai eshe'ana yiyesama neijo nequi. Ma eshe'ana cuana yani mei huo'o e'iya aa biajje, Eyacuiñajji cojja nei nequi. <sup>14</sup> Eyacuiñajji jama poanaje ba'a esohuidojojji nijje, ma jjeya nei mia canaje nijje ba'a: —Ebeca pee pea'ai esohuidojojji cuana yani cuei quea quemajo, Eopate cuei yobijo. ¡Maya esohuidojojji cuana jomajo ejeyo nequi pichojeaqui'yocue! —Eyacuiñajji poanaje—. <sup>15</sup> E'e, eyaya ma esohuidojojji cuana nequi meeña jjeya nei ehoojeajji jayojja. Jiquio shequiajajo, jiquio ba'ijo, jiquio pojajajo, jiquio eshequi nequi pojajajo pea'ai ehoojeajji. Poquije mimishi cuana quea huiso nee nee quecuaa. Jama quecuame acaje ba'a: Oe dejja quecua caje, becanejjijji pea'ai quecua jjima acaje. Jamaya acaje'yo ojjaña dejja cuana ojjaña meshijo ba'eca cuana —jamaya Eyacuiñajji poanaje.

E'e, ma esohuidojojji cuana pichojea mee'yo majje huoojea caje jjaquecuaquiya.

<sup>16</sup> Dejja mase mapichija edaasa biajje ani huoojea caje quea huiso nee nee. Peaa eya huohui canaje ache huiso dejja mase cuana mapichija edaasa biajje ani. Quea huiso nee nee, dosciento millone, 200.000.000 huisome poaje, de.

<sup>17</sup> E'e, Jesosaa eya, Huani ecuea ebajji ba mee canaje mapichi cuana, dejja cuana mapichija edaasa biajje ani pea'ai. Eyaya oya cuana banaje jama ba'a: Ojaya ese'ojje baa daqui quea moo ba'ehuana canaje ona equecua ca'yo poaje jjejojo. Baa daqui quea moo quea siyo, quea tahua nee, quea jahua nee jayojja pea'ai. Mapichi cuanaja esapa cuana ibia naa asha jayojja. Enabajje cuayani cuaqui jiji jayojja, huichacha, beni quea ihui, quea pase, mei quea ihui jayojja pea'aiya. <sup>18</sup> Oya cuaquijo, huichachajo, beni quea ihuijo pea'ai quea huiso dejja mimishi cuana manoj'e'yo. Oe dejja mano mee caje'yo; becanejjijji pea'ai mano'yo jjima poaje. Jamaya poaje ojjaña dejja mimishi cuana ojjaña meshijo ba'eca cuanaya. <sup>19</sup> Oya mapichi ai cuaa quea huiso nee nee mano mee caje'yo; cuaquijjiya ojaya enabajje cuayaniya mano mee caje'yo. Ojaya ehua'ohua pea'aiya dejja cuana quea nee nee po mee caje. Mapichi cuanaja ehua'o cuana peyo jayojja, sapame ehua'o icuijo enequi ese'. Maaya dejja mimishi cuana ijia cajje quea nee nee poaje'yo.

<sup>20</sup> E'e, Eyacuiñajjiya dejja mimishi cuana napa majamaja mee ca'yonaje. Jamatii, quea huiso ma pojajajo mano'yo jjima poanaje cuana. Jamatii onaya mimishi cuana pajea sa

po'yo ajja. Eshahua cuana bihuia pajea'yo ajja, eyacuiñajji nisho cuana bihuia pajea'yo ajja pea'ai. Eyacuiñajji nisho acanaje cuaa, mei huo'o quea nahue, mei oshe quea nahue, mei jahua quea nahue, mei nahue'ama, acui pea'ai eyacuiñajji nisho acanaje. Maya eyacuiñajji nisho cuana shajjama', jiojjima', cojjama' pea'ai. <sup>21</sup> E'e, maya dejja cuana quea mimishi tii tii poanaje pea quecuajji cuana, jjadasiacuijji cuana, siipojji cuana, pea cuana cojjojji poani cuana. Mimishi cuana pajea'yo ajja; quea mimishi po tiitii'yonaje.

## 10

### *Pea esohuidojojji Huaniya ba canaje*

<sup>1</sup> Majoya eyaya, Huaniya banaje eyajo pea esohuidojojji ba'eoqueani meshi yasijje. Oya bo oshe biajje nequi. Ojaya daqui bo oshe nei nei jayojja. Ojaya sapa biajje eshijje quea bame nee nee jayojja ejjanequitoqui'yo nequiani. Ojaya ecojja quea jiji nee nee eshequi jayojjaya poani. Ojaya equise jijiani, equi yamajjana acui ca'a jijiani jayojja jama poani. <sup>2</sup> Ohuaya ejee etehue'yo iña cani emeya. Ecueabajjiji'ya oeyejje nei isajea ca'yajo jjajeapichojjojojji'yonaje. Oya epii nequi. Ojaya ebiane jiojji bae ai biajje nequi; shani jiojji ca meshi yasijje nequi. <sup>3</sup> Oya taaanaje janobajjima nei ibia quea quemo nee nee mimiani jayojja. Ojaya esohui me oejje beca huiso cueji jayojja poanaje. <sup>4</sup> Cueji cuana jayojja shajja'ajja majje eyaya ojaya esohui tehue'ajjanaje. Esohui tehue jjimahuaajo pea eyajo nequi enijje miminaje jama ba'a: —Chojja. ¡Me oejje beca cuejija esohui a'a tehuejji! ¡A'a huohuijji ojaya esohui! —poanaje.

<sup>5</sup> Majoya ma esohuidojojjiya bae ai biajje nequiya, meshijo nequiya pea'aiya oja eme' ebiane eme' jeasohua canaje eyahuasijje. <sup>6</sup> Majoya oya miminaje jama ba'a: —Eyacuiñajjiya ojaya esohui ma ecua ohuaya yahuajo huohui canaje jamaya e'e jojo nei jjeyahua nei acaje'yo. Oya quea ca'a nee nee poani. E'e, oya ba'e tiitiani; eya cuana, ojjaña aquiana eyajo nequi pea'ai pana ca'ya poa; meshi cuana, ojjaña aquiana cuana meshijo nequi pea'ai pana ca'ya poa. Bae cuana, ojjaña aquiana cuana bajio ani pea'ai pana ca'ya poa, Eyacuiñajjiya —jamaya esohuidojojji ma ebiane jiojjijje enajo nequi, shani jiojjijje meshijo nequi poanaje; ohuaya huohui canaje jama ba'a: —Jjeya apoa. Ma ecua ohuaya huohui canaje jamaya jjeyahua nei Eyacuiñajjiya acaje'yo. <sup>7</sup> Yahuajo Eyacuiñajjiya ojaya esohui huohuijji cuana huohui mee ca poa ma ohua quijje nei acaje. Quijje pishana pea esohuidojojjiya quijjeyejje neiya ojaya emiajji mia caje. E'e, ojjaña ba mee caje Eyacuiñajjiya acaje cuana ma yahuajo oja dejja cuana ba mee jjima poa, ma ohua quijje acaje pea'ai, maya yahuajo nei onajaya quea quehua poanaje —jamaya ma esohuidojojji poanaje.

Me oejje oe esohuidojojji cuaa emiajji cuana mia canaje. <sup>8</sup> Majoya oya eyajo nequi mimi o'oyanaje enijje jama ba'a: —Huani, ¡ejee etehue'yo jjeshecue! ¡Ma esohuidojojji meshijo, ena ojjojo pea'ai jiojji nequi emejo nequi ejee etehue'yo jjeshecue!

<sup>9</sup> Jamajoya eya poquinaje esohuidojojji yasijje. Eyaya oya huohuinaje jama ba'a: —¡Quiacue mo ejee etehue'yo!

Jamajjeya eya ohuaya huohui canaje jama ba'a: —E'e Huani, ma'aje. ¡Ejee etehue'yo ijjiacue! Miya ijjiacue quea biquia nee poaje huini jayojja. Jamatii miya ijjiacue quea pase nee nee see aijo poaje —ma esohuidojojji poanaje.

<sup>10</sup> Jamajoya eyaya ejee etehue'yo jjeshe majje ijjianaje. Quea biquia huini jayojja poanaje. Jamatii eya ijjiacue quea pase nee poanaje see aijo. Jamajjeya eyaya banaje ma esohui etehue'yojo quea huiso cuana quea nee nee poaje'yo. <sup>11</sup> Majoya pea eyajo nequiya eya huohui ca o'oyanaje jama ba'a: —Huaniya, ¡quea huiso dejja cuana huasijje, ojjaña meshi cuana huasijje ojjaña pea mimime cuana huasijje, quea huiso emeshi mese yasijje pea'ai huohuiquicue ma Eyacuiñajjiya quijje acaje'yo! —jamaya poanaje eyajo nequi.

## 11

### *Beca esohui huohuijjiya esohui huohui canaje*

<sup>1</sup> Majoya Eyacuiñajjiya pea eyajo nequiya eya quia mee canaje acui e'ipia'ajjajji. Ohuaya eya huohui canaje jama ba'a: —Huani, ¡Eyacuiñajjiya equi ipia'ajjacue! ¡Mei e'iyaa aquiana dahuaaji pea'ai ipia'ajjacue! ¡Dejja cuana jomajo nequi Eyacuiñajji bihuiaaji pea'ai sicocue! <sup>2</sup> ¡Jodio pojjeamaja e'anijji Eyacuiñajjiya equi pejejo ani a'a ipia'ajjajji! Jodio pojjeama cuaa Eyacuiñajjiya epeeji cuana napa caje beshahua nei ebeca pee pea'ai shequiajame, 42 ba'ime. Jodio ojaya epeeji cuana Eyacuiñajjiya quea boti nee, ojaya Jenosanena cuiñajji quea boti nee jayojjaya. <sup>3</sup> Eyaya ecuea becanejjijji pea'ai esohui huohuijji huoojeaje dejja cuana huasijje ecuea esohui huohuiya. Eyaya oya cuana ecue sohui huohui meeje quea huiso cahuijo, 1.260 cahuime. Ohuaya pea daqui huosho caje, dejja emano'yojo quea yeno nee nee poani jayojjaya. Jamajjeya ojjaña ba caje ojjaña meshijo ba'eca cuana quea nee nee poaje. <sup>4</sup> Ma ecuea becanejjijji pea'ai esohui huohuijji cuana beca onimo acui cuana jayojja. Oya cuana beca cuaquijji nequijji Eyacuiñajji cojja nei nequi jayojja pea'ai. Jamajjeya ojjaña ba caje Eyacuiñajjiya oya cuana jaahuana cani. <sup>5</sup> E'e, onaa esohui huohuijji napa cajo cuaqui cuayani ojaya enabajje, o napajji poani quiyojeaje dejja mimishi cuana. Jamaya ojjaña manoj'e'yo, ma beca esohui huohuijji napajji poani. <sup>6</sup> Eyacuiñajjiya jiquio esohui huohuijji quea ca'a po mee cani. Jamajjeya ohuaya jama acaje'yo ba'a: Eyacuiñajjiya esohui huohuijji poaniya ohuaya ena chama' po mee cani. Quea jabo po mee cani. Ohuaya sa majje ena' jayojja po mee cani cuei cuana, bae cuana pea'ai. Ohuaya sa majje ojjaña cuana napa cani pea'ai.

<sup>7</sup> Majoya jiquio beca esohui huohuijji cuaa huohui pajea majje, oe aquiana quea mase nee nee ma jjani ai quea doe neejo ba'e poeje ma esohui huohuijji cuana cuiajeaa. Jeabichajea majje cuiajea caje'yo. <sup>8</sup> Oya cuana manoj'e'yo majje jamatii jaaje ejiojjijo, Jenosanena cuiñajjiyo. Ma cuiñajjiyo pea cuaa yahuajo Jesosa, ese jaahuanajji acui ecueata'apeejo ba'ehuanasohuajea canaje. Dejja cuana Jenosanena cuiñajjiyo ba'eca quea mimishi poaje, ojjaña Sonoma meshijo yahuajo nei ba'ya poa jayojja, Ejito meshijo ba'eca jayojjaya pea'ai quea mimishi poaje. <sup>9</sup> Jamajjeya quea mimishi poaniya jjejojo Eyacuiñajjiya esohui huohuijji poani manoj'e'yo emojajji pojjeama. Ejiojjijo tii oya jamatii jaajeaje pea beca peejjima cahuime. Ojjaña cuiñajjiyo ba'eca cuana, ojjaña pea esohuijo mimiani cuana ojjaña meshijo ba'e pea'ai poeje ma esohui huohuijji emano'yojaa baa. <sup>10</sup> Ojjaña dejja mase cuana quea bihui nee nee poaje ma esohui huohuijji manoj'e'yo. Jamajjeya aquiana quia caje onajaya epeeji cuana huasijje sosema'. E'e, ma esohui huohuijjiya ojjaña quea mimishi poani napa canaje quea huiso cahuime. Jamajjeya o manoj'e'yo quea bihui nee poaje ojjaña mimishi cuana.

<sup>11</sup> Jamatii pea beca peejjima cahuime poajo Eyacuiñajjiya ma beca esohui huohuijji shequi mee caje o'oya. Nequisohua mee caje o'oya pea'ai. Jamajjeya ojjaña dejja mimishi cuana oya cuana eshe o'oya ba majje quea mete nee nee poaje. <sup>12</sup> Majoya ma esohui huohuijjiya shajja'ajja caje pea eyajo nequi mimi nequi onijje jama ba'a: —¡Yacua oe poe'yocue!

Jamajjeya oya cuana bo oshe biajje nequi sohuaquije'yo eyahuasijje. Sohuaquije'yo o quecua'yojji epo cuaa ba caje. <sup>13</sup> Majoya dejja mimishi cuaa ba caquijo tii, Eyacuiñajjiya meshi huehuahuehua mee caje'yo. Quea huiso equi jaabichajea meequi caje'yo. Dejja cuana Jenosanenajo ba'e manoj'e'yo quea huiso nee nee, 7.000 huisome. Pea cuana manoj'e'yo jjima poaje. Oya cuana quea mete nee nee poaje'yo. Jama poaje ba'a: —E'e de, Eyacuiñajji eyajo ba'e quea pame nee nee, quea ca'a nee nee —jamaya quea huiso poaje.

<sup>14</sup> E'e, jamaya ma beca esohuidojojjiya mia majje dejja mimishi napa caje'yo. Quijje pishana pea esohuidojojjiya mia cajo dejja mimishi cuana ojjaña meshi cuanajo ba'eca cuana napa caje'yo pea'ai.

#### *Pea esohuidojojjiya mia canaje*

<sup>15</sup> Majoya pea esohuidojojjiya ojaya emiajji mia canaje. Mia cajo pea cuana eyajo ba'e janobajjima nei sohuicuayanaje jama ba'a:

“Eyacuiñajji, miya ojjaña huoojeajji poani, ojjaña meshijo ba'eca cuana huoojeajji poani. Miyaya huoojeanaje Quito, mique huoojea'yo ojjaña cuana jaahuanajji. ¡Jesusa Quito ojjaña huoojeajji po meecue! ¡Ohuaya ojjaña cuana cahuojea cahua tii tii!”

Jamaya oya cuana poanaje.

<sup>16</sup> Majoya quea huiso Jesusaja epeeji etii cuanaa, 24, Eyacuiñajji cojja nei e'anioque aniya Eyacuiñajji bihuia canaje ecui'oshajjajo nequiya. Jama poanaje ba'a:

<sup>17</sup> “Eyacuiñajji, miya oe nei quea ca'a nee nee po tiitiiani, ojjaña huoojeajji poani tii tii pea'ai. Ecuaya miya bihuiaña miya quea pame nee nee poanijo. E'e, miya yahujajo nei nei ani tiitia poa. Jjeya miya ani tiitiiani pea'ai. Ecuaya miya bihuiaña miya ojjaña huoojeajjijajo. E'e, miya quea ca'a nee nee po tiitianijo miya oe nei ojjaña huoojeajji poani tii tii. <sup>18</sup> Ojjaña dejja mimishi cuaa miya jeabichajea sa acani. Jamatii miya ona nijje quea quene nee nee poaje jjeya nei; quea nee nee po meeje'yo. E'e, jjeya miyaya dejja mimishi cuana quea nee nee po meeje, oya ojjaña meshijo ba'e napajji poanajejo. E'e, ojjaña yahujajo nei emano'yo jjeya miyaya huohuije miquea ejjashahuabaquijji onajaya eba'ejjijo. Dejja quea mimishi poa quea nee nee po meeje'yo. Miquea esohui huohuijji cuaa, Jesusaja epeeji cuaa miquea esohui jayojja jama acanijo ca ca miyaya quea bihui nee po meeje'yo. Minijje ani tiitii meeje'yo pea'ai ojjaña miquea epeeji, esho'i cuana, etii cuana pea'ai”.

Jamaya Jesusaja epeeji etii cuana poaje.

<sup>19</sup> Majoya eya ba mee canaje Eyacuiñajjija equi eyajo ani. Eyiye dojjo ba mee canaje. Jomajo Eyacuiñajji yani. Jomajo yani acui equecua quea bame nee, Eyacuiñajjija esohui etehue'yo huanajji. Ma esohui etehue'yo etiiquianaa Moisesi nijjeya tehue ca poa. Ma esohui etehue'yo eya bajo, pojjeje quea huiso jeaja'a canaje, baa siyoo taaa poanaje, cueji poanaje pea'ai, meshi huehuahuehuanaje, meja jjacajjajeaquinaje, quea huiso nee oquequinaje pea'ai. E'e, jamaya eyaya banaje.

## 12

### *Epona eshequi jayojja sa'o huo'o jayojjaa napa canaje*

<sup>1</sup> Majoya eyaya banaje aquiana ai'ai eyajo, ma Eyacuiñajjiya quijje ohua acaje. Jiquio jama poaje ba'a: Eyaya banaje epona eyajo. Ojaya daqui quea jiji nee eshequi jayojja. Oya nequinaje ba'i biajje. Ojaya esapa huahuo yani majameta cuana, jiojji miji beca, 12 majameta. <sup>2</sup> Oya siasianaje ebacua neejo. <sup>3</sup> Majoya eyaya banaje aquiana ai'ai eyajo, sa'o ai jayojja quea huo'o, sa'o ai ejja pojja'a. Oya quea sapa huiso, me oeje beca, 7 sapame. Oya quea she'ana huiso pea'ai, ome miji pea'ai she'aname, 10 she'aname. Oja sapa cuanajo ejaahuojja jayojja yani pea'ai, me oeje beca ejaahuojja. <sup>4</sup> Ohuaya iña canaje quea huiso majameta cuana ehua'ohua. Iña majje majameta cuana jeoqueajea canaje meshi yasijje. Oe majameta iña canaje, beca iña jjima poanaje. Jamaya ojjaña majameta cuana acanaje ma aquiana sa'o ai jayojjaa. Oya sa'o ai jayojja epona pejeje nequinaje oja bacua ijiajji nisho, cuayajo. <sup>5</sup> Jamajjeya ma eponaja ebacua cuayanaje dejja sho'i. Oya ojjaña huoojeajji quea ca'a nee nee poaje'yo. Ohuaya ojjaña shajja'ajja mee caje'yo ojaya esohui. Jamajjeya sa'o ai jayojjaja oya ijia jjimahua peaa ma ebacua dojo canaje eyahuasijje Eyacuiñajji e'anioque ani yasijje. <sup>6</sup> Majoya ma epona poquicujicujinaje quea huesha, meshi quima huasijje. Jomajo Eyacuiñajjiya eponaja eba'e meeji acanaje. Jomajo Eyacuiñajjiya oya jaahuana canaje quea cahui huiso, 1.260 cahuime.

<sup>7</sup> Majoya eyajo quea huiso nee nee jjaquecuaquinaje. Jama poanaje ba'a: Ma sa'o ai jayojjaa ojaya esohuidojojji quea mimishi, quea huiso nee nee cuana nijjeya jjaquecuaquinaje esohuidojojji pame cuana nijje, Miyeni ojaya esohuidojojji quea pame nee nee quea huiso nee nee nijje. <sup>8</sup> Miyeni quea ca'a nee nee, sa'o ai jayojja quea ca'a pishana. Jamajjeya Miyeniya sa'o ai jeabichajea majje jeoqueajea canaje meshi yasijje. E'e, sa'o ai, ojaya esohuidojojji cuana pea'ai nequi tiitii mee jjima acanaje eyajo.

<sup>9</sup> Miyeniya oya cuana jeoqueajea canaje meshi yasijje. Ma sa'o aija pea bajjani cuana jama ba'a: Peyo nei yahuajo nequia poa bajjani, eshahua nei bajjani pea'ai, Edosiquiana nei bajjani pea'ai, Satanasa. Ohuaya beshahua nei ojjaña cuana ojjaña meshijo ba'eca cuana dasia cani, quea mimishi po mee cani. E'e, ma sa'o ai ojaya esohuidojojji cuana nijje jeoqueajea canaje meshi yasijje Miyeniya, esohuidojojji quea pameya.

<sup>10</sup> Majoya pea eyajo nequi enijje miminaje janobajjima nei. Jama poanaje ba'a: — Jjeya nei Eyacuiñajjiya ecuana ba'e tiitii mee cani. Ohuaya Edosiquiana nei jeabichajea ca'yonaje. Jamajjeya oya ojjañaja Emeshi Mese nei poani. Ohuaya, Quitohua ojjaña huoojea cani pea'ai. Oya Eyacuiñajjiya huoojea'yo ojjaña jaahuanajji. Ma sa'o ai jayojjaa, Edosiquiana neiya ojjaña Jesusaja epeeji cuana niñeba cani tii tii, ohuaya esohui sijje acani Eyacuiñajji yasijje. <sup>11</sup> Cuanaya Jesusa Quitohua, ma ñajjaja sho'i equecua'yo jayojjaa ojaya epeeji cuana quea boejea po mee cani oya na' cuayaquia poaa jjejojo, poquijeyonajeya jjejojo. Ohuaya ojaya epeeji cuana Edosiquiana nei jeabichajea meesahua cani. Ojaya epeeji cuaa Jesusaja esohui huohui canaje. Edosiquiana jeabichajea mee canaje pea'ai. Mimishi cuaa oya cuana quecua canaje Jesusaja esohui huohuiji poanijojo. Jamatii ohuaya mete'ama, yeno'ama pea'ai esohui huohui tiitii canaje. <sup>12</sup> Jamajjeya ojjaña eyajo nequi, ¡quea bihui nee pocue! Ojjaña meshi cuanajo ba'e, miqianaya quea nee nee poaje'yo Edosiquiana miqiana que jeoqueajea ca'yonaje jojoya. Oya quea mase nee nee poani. Ojaya eba jama poaje ba'a: Quijje pishana Eyacuiñajjiya oya jeajea caje'yo cuaqui yasijje. Jamajjeya oya ojjaña meshijo ba'e nijje quea mase nee nee poaje —jamaya peaa eyajo ba'eya eya huohui canaje.

<sup>13</sup> Ma sa'o ai jayojja meshi yasijje oquequi'yo majje quea quene nee nee poanaje. Jamajjeya ohuaya epona, ma bacuajji poanaje enaese ocuecuaji canaje eshajomano meejea'yojji nisho. <sup>14</sup> Eyacuiñajjiya ma epona quia canaje beca ecuicho, huipa jayojja cuichomeya ecuabesajji. Jamajjeya oya cuabesanaje quea huesha, meshi quima huasijje. Jomajo Eyacuiñajjiya oya jaahuana canaje ma sa'o ai jayojjaa enapa ca poaje jjejojo. Eyacuiñajjiya oya jaahuana canaje quea huiso nee nee calhuime, beshahua nei ebeca pee pea'ai shequiajame. <sup>15</sup> Majoya sa'o ai jayojjaa enabajje ena quea quemo ojjajea canaje cuei quea quemo jayojja epona hui'i mee'yojji nisho. <sup>16</sup> Jamatii Eyacuiñajjiya epona jaahuana canaje. E'e, meshi jjaajjejequi mee majje ma ena quea quemo meshi yasijje shajadobiqui mee canaje. Oya epona jja'aniquehuaquiñaquinaje quea huesha. <sup>17-18</sup> Jamajjeya aje oe sa'o ai jayojja quea quene nee nee po majje poquinaje ma eponaja pea ebacua cuana nijje jjaquecuaquiya. Ojjaña joya Eyacuiñajjiya esohui jayojja jama ba'yani, Jesusaja esohui e'e jojo nei huohui tiitijji poani pea'ai quecua sa acanaje ma sa'o ai jayojjaa. Jamaya eyaya, Huaniya banaje.

## 13

### *Aquiana mase bae ai'ajjo ani etaja huasijje nequisohuaquinaje*

<sup>1</sup> Majoya eya jjacahuibaquinaje bae ai'ai sahuajo nequi. Jomajo eyaya banaje sa'o ai jayojjaa ishoa cani pea aquiana mase shanei ai jayojja, shanei ejja pojja'a. Oya bae ai'ajjo ani cojja cuaya majje nequisohuanaje etaja huasijje. Oya quea sapa huiso, me oeje beca, 7 sapame. Ojaya eshe'ana quea huiso yani pea'ai, ome miji pea'ai, 10 she'aname. Ojjaña eshe'anajo yani ejaahuojja jayojja. Ojjaña esapajo yani etehue'yo quea tai pea'ai, Eyacuiñajji niñebajji tehue'yo. <sup>2</sup> Ma shanei ai ejja jiquio jama ba'a: Oya ibia ecojjopia'yo ai jayojja, ibia chehue ai jayojja jiojjime. Oya ibia naa asha se' quemoajja, quea se' quemo nee nee. E'e, oya quea mase nee. Edosiquiana neiya, Satanasa, sa'o ai jayojjaa pea'aiya ma shanei ai ejja quea mase o jayojjaya po mee canaje, Edosiquiana nei jayojjaya poanaje. Jamajjeya oya quea ca'a nee poani, quea huiso huoojeajji poani. <sup>3</sup> Oya equecua'ajja'yo jayojja sapame poanaje, ma shanei ai ejjaja esapa. Jamatii jjajeaqui mee ca'yonaje. Jamajjeya quea huiso dejja cuaa meshi cuanajo ba'eya ma shanei ai ejjajo quea meteya jjejojo ojaya esohui jayojja jama acanaje. <sup>4</sup> E'e, sa'o ai jayojjaa shanei ai ejja ojjaña huoojeajji po mee canaje. Jamajjeya ojjaña sa'o ai jayojja bihuia ca'yonaje ecui'oshajjajo

nequiya. Shanei ai ejja quea ca'a nee nee poso bihuia canaje cuaa pea'ai jama ba'a: —Pea o jayojja chama'. Chama' o jeabichajea'yojji epo, de —acanaje cuaa.

<sup>5</sup> Shanei ai ejja ojjaña meshijo ba'e huoojeajji poaje quea huiso ba'ijo, 42 ba'ime. Quea mimi tai nee nee poanaje. Jamajjeya Eyacuiñajji onijje quea quene nee nee poanaje.

<sup>6</sup> Ohuaya Eyacuiñajji eyajo ani ojjaña huoojeajji poani niñeba canaje. Ojjaña Eyacuiñajji nijje nequi niñeba canaje pea'ai, shanei ai ejjaa. <sup>7</sup> Jamatii Eyacuiñajjiya oya jeabichajea jjima. Jamajjeya ohuaya Jesusaja epeeji cuana nijje jjapee nishoqui majje jeabichajea canaje. Jamajjeya ojjaña ojava esohui jayojja jama acanaje. <sup>8</sup> E'e, ojjaña meshijo ba'ecaa oya bihuia canaje. Jesusaja epeeji cuanaja ca ca oya shanei ai jayojja bihuia jjima. E'e, meshi pana jjimahuajo tii Jesusaa, ma ñajjajja sho'i equecua'yo jayojjaa ojjaña ojava epeeji bajjani tehue canaje eba'e tiitii mee'yojji. Jamajjeya ohuaya shanei ai jayojja bihuia jjima acani.

<sup>9</sup> ¡Shajja'ajjacue oe; jjashahuabaquicue oe! <sup>10</sup> Joya jja'iñaquiani ejeanobiajji quijje onaa oya iña majje jeanobia caje'yo pea'ai. Ojjaña joya jjajajaquiani manaje'yo; yacua pea'ai caje'yo cuaa. Jamajjeya ojjaña Jesusaja epeeji cuana quea nee poanajo jamatii mete'ama cajjapee tiitiquiahua onijje.

<sup>11</sup> Majoya eyaya, Huaniya banaje pea aquiana quea mase pea'ai shaijjami ai quea mase nee jayojja, shaijjami ejja. Oya meshi quipajo ani cuayanaje. Ojava eshe'ana becanejjijji pea'ai ñajjajja yahue jayojja. Jamatii ojava esohui sa'o ai jayojja quea ajjajja epo meejji.

<sup>12</sup> Ebionei shanei ai ejjaa jiquio jjeya meshi quipajo ani cuayanaje shaijjami ai ejja o jayojja ojjaña huoojeajji po mee ca'yonaje. Jamajjeya pea shaijjami ejjaa ma meshi quipajo ani cuayaa ojjaña huoojea canaje ma shanei ai ejja esapa jaja'ajja bihuiaa. <sup>13</sup> Ohuaya, ma meshi quipajo ani cuayaa ma dejjaa ajjima acani acanaje quea huiso nee. E'e, ojjaña dejjaja ebajji ohuaya cuaqui oque mee canaje meshi yasijje. <sup>14</sup> Ohuaya jamaya acanaje ojjaña ma ebionei shanei ai bihuia meejji. Ma dejjaa ajjima acani amajjeya ohuaya ojjaña cuana dasia canaje. E'e, ohuaya dejja cuana ebionei shanei ai nisho pana mee canaje epana'yo, ma shanei ai esapa jaja'ajja jjajaequi'yonaje nisho pana mee canaje. <sup>15</sup> Majoya ma meshi quipajje cuaya poa shaijjami ai ejjaa shanei ai nisho epana'yo eshe jayojja mimi meeme po mee canaje. Jamajjeya ohuaya jama acanaje ba'a: —¡Ojjaña joya e bihuia ajja iñacue, quecuajea'yocue, oe! —poanaje shanei ai nisho epana'yo.

<sup>16</sup> Majoya shanei aiya huohui canaje jama ba'a: —¡Ojjaña cuana, ojjaña tii tehucue ebahuajje, ebiane emejje pojja'a ecuea bajjani! ¡Ojjaña esho'i, ojjaña etii pea'ai, ojjaña echacojji cuana, ojjaña echacomeejji cuana, ojjaña quea aquiana huiso poani cuana, ojjaña aema' cuana pea'ai jamaya tehucue ecuea bajjani, ecuea ebajji! <sup>17</sup> Ojjaña joya jjatehue meequi jjima aje oe ¡a'a aquiana cuana jjeshe meejji! ¡A'a aquiana quia meejji pea'ai! —oya poanaje.

<sup>18</sup> ¡Bacue oe! ¡Ojjaña quea jjashahuabaqui ja'a, shanei aija ebajjani etehue'yo bacue! Ojava etehue'yo ojava bajjani jama ba'a: 666.

## 14

*Quea huiso nee ojava epeeji nei Jesosa nijje jjaja'a meequi canaje, 144.000 huisome*

<sup>1</sup> Majoya Eyacuiñajjiya eya eyahuasijje ba mee canaje Jesosa Sioni eyiyo biajje nequi. Eya ba mee canaje ojava epeeji cuana quea huiso nee nee Jesosa nijje nequi, 144.000 huisome. Onaya ebahuajje etehue'yo Jesusaja ebajji, Echii aija ebajji pea'ai ojava jojaya.

<sup>2</sup> Majoya eyaya shajja'ajjanaje eyajo ojjaña ma epeeji cuana sohuicuayani, Jesosa bihuia poani. Eyaya oya cuana shajja'ajjanaje ena tii tii poani jayojja, cueji baa siyoo poani jayojja, quea huiso e'iñaqueyajji cuana iñaqueya cani cuaa jayojja. <sup>3</sup> Ojjaña Jesusaja epeeji cuana quea huiso nee nee sohuicuayanaje Eyacuiñajji cojja nei nequi, ebeca pee pea'ai aquiana eshe cojja nei nequi, Jesusaja epeeji etii 24 huisome cojja nei nequi pea'ai. Jomajo ojee nequi Jesusaja epeeji quea huiso nee nee cuana sohuicuayanaje, esohuicuayajji eyacua. Ma esohuicuayajji eyacua pea cuanaja eyajo ba'e cuanaja ebajji pojjeama. Ma esohui esohuicuayajji Jesusaja epeeji yahuajo meshijo ba'yahua mimishi

cuijea'yo cuana ca ca oe sohuicuayani. <sup>4-5</sup> Quea boejea'yo ba'enaje, epana'yo bihuia jjima poanaje onajaya. Siajje po ajja nei nei pea'ai, mimishi'ama nei nei pea'ai. Oya cuana Jesosa nije jjapee neineiquinaje, ma ñajajja sho'i equecua'yo jayojja nije. Onijje tii poquiani. Jesosa acui ecueata'apeejo mano'yonaje onaja mimishi cuana sosequia'yojji. Jiquio ecua ebana coojji jjajjani quea pame nee jama jayojja oya cuana quea pame nee. E'e, jiquio ecua ebana coojji ebionei jjajjani quea pame nee poani Jodio cuaa Eyacuiñajji yasijje quia cani ojaya epojji jama jayojjaya oya cuana Eyacuiñajji nije ba'e tiitiije'yo Jesosa nije pea'ai jiquio 144.000 Jodio cuana. Jamaya eya, Huani cahuibanaje.

*Pea esohuidojojjiya huohui canaje Jesosa poe o'oyajji*

<sup>6</sup> Majoya eyaya banaje pea esohuidojojji eyajo cuabesani. Eyacuiñajjiya oya huoojea canaje ojjaña cuana huasijje Jesosa ojjaña cuana ba'e tiitii mee canijo huohuiya. E'e, ohuaya Jesusajo huohui cani ojjaña cuana ojjaña esohuijo mimiani yasijje. <sup>7</sup> Ohuaya jama acanaje ba'a: —¡Eyacuiñajji shajja'ajjacue! Oya jama acue ba'a: “Eyacuiñajji, miya quea pame nee nee”. ¡Oya bihuiaacue! Ohuaya ojjaña eyajo ba'e pana canaje; meshi, bae ai'ai cuana, cuei cuana pea'ai pana canaje. E'e, jamaya acue oya; jjeyahua nei ohuaya ojjaña mimishi cuana quea nee nee po mee cajel —esohuidojojjiya ojjaña acanaje.

<sup>8</sup> Ma ebionei esohuidojojji huohui cajo, pea esohuidojojji poeyanaje. Huohui canaje jama ba'a: —Ojjaña ma cuiñajji quea quemajo ba'e quea mimishi poanijo quea nee nee po mee cajel, Babinonia cuiñajji bajjanijo ba'e cuana. Jiquio ecua oe epona quea mimishiya quea huiso dejja cuana quea mimishi po mee cani jama jayojja dejja cuana jomajo ba'eya pea cuana pea cuiñajji cuanajo ba'e quea mimishi po mee ca'yonaje —jamaya ma esohuidojojji poanaje.

<sup>9</sup> Majoya pea esohuidojojji poeyanaje. Huohui canaje jama ba'a: —Ojjaña joya shanei ai jayojja bihuijji poani shanei nisho'ya pea'ai bihuiajji poani, shanei aija bajjani jayojja ebahuajje, emejje pojja'a jjatehue meequi pea'ai quea nee nee po mee cajel'yo Eyacuiñajjiya. <sup>10</sup> E'e, jamaya acajo Eyacuiñajjiya ona nije quea quene nee nee poaje'yo. Cuaquijo, huichacha quea ihui nee nee quea nee nee po tiitiije'yo. Ojjaña esohuidojojji quea pame neeya ba cajel, Jesusaa ma ñajajja equecua'yo jayojja pea'aiya oya cuana ba cajel'yo cuaquijo nequi. <sup>11</sup> E'e, oya cuana quea nee nee poaje'yo tii tii; cuaqui huichacha ba'esohuaquije'yo tii tii. Ojjaña joya shanei ai jayojja bihuiajji poani, shanei nisho bihuiajji poani pea'ai, shaneija bajjani jayojja ebahuajje jjatehue meequi pea'ai quea nee nee poaje'yo tii tii, quea nee po pajea'yo ajja tii epojjajo, mecajje pea'ai —jamaya poanaje esohuidojojji.

<sup>12</sup> Jamajjeya ojjaña Jesusaja epeeji cuana dejja mimishiya napa cajo jamatii mete'ama cajjapee tiitiiquiahua, ma Jesosa nije jjapeequi pajea'yo ajja, ojjaña Eyacuiñajjiya esohui jayojja jama acani pea'ai.

<sup>13</sup> Majoya eyaya, Huaniya shajja'ajjanaje pea eyajo mimiani jama ba'a: —Huani, jiquio ecuea esohui tehucue! Eyacuiñajjiya jjeya nei, quijje pea'ai quea bihui nee nee po mee cajel'yo ojjaña Jesusaja esohui huohuijji ma esohui huohuijjiyo dejja mimishiya quecua cajel —poanaje.

Majoya Edojjoshahua Pameya jama acanaje ba'a: —E'e jojo nei Jesusaja epeeji cuana ojaya esohui huohuijjiyo mano'yajo ba'e tiitii mee cajel'yo Eyacuiñajjiya, jomishoca mee cajel'yo; oya cuana sosequia cajel'yo esohui huohui canaje sosejje.

Jamaya eya, Huani Jesusaa cahui ba mee canaje.

*Eyacuiñajjiya dejja mimishi cuana napa neinei mee canaje*

<sup>14</sup> Majoya eyaya, Huaniya eyahuasijje banaje pea jama ba'a: Oe Dejjaja Bacua Ejja jayojjaya bo oshe biajje anioqueani. Ejaahuojja mei huo'o quea nahue esapajo ani ye'oquea canaje, baa ai shehuihui baa quea shejji iña canaje ebiane meje. <sup>15</sup> Majoya eyajo pea esohuidojojji Eyacuiñajjiya equijo ani cuayanaje. Cuaya majje taaanaje joya bo oshe biajje ani yasijje. Jama poanaje ba'a: —Dejja mimishi cuana meshijo ani anoso ai yiye ejahua nee nee jayojja. Jamajjeya janoso ai jahuajo jajasejja ca'yani baa ai

shehuihuiya echicha'yojji jayojja jama jjeya nei dejja mimishi cuana acue! ¡Oya cuana chichacue, oe! —jama taaameya poanaje.

<sup>16</sup> Jamajjeya ohuaya bo oshe biajje aniya ojjaña mimishi cuana meshijo ba'eca jaja ca'yonaje; chicha canaje ojjaña. Apoa aca'yonaje.

<sup>17</sup> Majoya eyaya, Huaniya banaje pea esohuidojojji eyajo Eyacuiñajji equijo ani cuayanaje. Ojaya baa ai shehuihui yani pea'ai. <sup>18</sup> Majoya pea esohuidojojji mei e'lya pejejo ani, ma cuaqui jijiani pejejo ani poeyanaje. Oya taaanaje esohuidojojji baa aijji ani yasijje. Jama poanaje ba'a: —Ojjaña mimishi cuana meshijo ba'e acui jjajja ejahua nee nee jayojja jama. ¡Jamajjeya ejajja jahuajo sejja cani jayojja jjeya nei dejja mimishi cuana acue! ¡Quea mimishi poanijo quea nee nee po meecue! —ma esohuidojojji poanaje.

<sup>19</sup> Jamajjeya meshi yasijje poe majje ma esohuidojojjiya ojjaña mimishi cuana meshijo ba'eca cuana jaja majje chicha canaje quea nee nee epo mee'yojji. E'e, Eyacuiñajji quea quene poaje mimishi cuanajo. Eca ijja pashajji yasijje nequia cani jayojja jama acaje'yo dejja mimishi cuana.

<sup>20</sup> Jiquio ecua eca jajasejja majje cuiñajji pejejo ijjiapasha mee cajje eca na cuayaquiani jayojja jama ojjaña quea mimishi poani acaje'yo cuaa. Eyacuiñajji ba sa po'yo ajjajo quea huiso nee nee mano'yonaje; jjaquecuaqui'yo majje ena' cuayaquinaje cuei quea quemo jayojja jama, de.

## 15

### *Esohuidojojji cuaa ye canaje me oeje beca mimishi cuana napajji*

<sup>1</sup> Majoya Eyacuiñajjiya ecuea ebajji jjaja'aqui mee canaje ma quiijeyejje nei ohua acaje. Eyaya banaje pea aquiiana ai'ai eyajo nequi. Ba majje quea ajjajja nee nee poanaje. Ma aquiiana ai'ai jama ba'a: Me oeje beca esohuidojojji eyaya banaje, Eyacuiñajji huojea cuana ojjaña meshijo ba'eca cuana quea nee nee po meejji. Ojjaña napajji me oeje beca huisome eyaya banaje. Ona napa majje chama' pea enapajji poaje. E'e, Eyacuiñajji ejjashahuabaquijji ojjaña napajji apoa poaje'yo. <sup>2</sup> Majoya eyaya banaje bae ai quea siyo tahuoo quea siyo jayojja cuaquijji quea jeajahua tejje. Ma bae ai sahuajo nequi ojjaña Jesusaja epeejji cuana. Maaya shanei ai ejja jeabichajea ca'yonaje, shanei ai nisho jeabichajea ca'yonaje pea'ai. Jesusaja epeejji cuaa shanei aija bajjani tehue mee jjima acanaje onajaya ebahuaje. Onijje jjapeequi'yo ajja pea'ai. Jamajjeya Eyacuiñajjiya Jesusaja epeejji cuana huasijje quia canaje e'iñaqueyajji cuana esohuicuayajji. <sup>3</sup> Jamajjeya Jesusaja epeejji cuana sohuicuayanaje Jesosa bihuiajji, Eyacuiñajji bihuiajji pea'ai. E'e, Moisesi, Eyacuiñajji esohui huohuijji sohuicuaya poa jayojja jamaya sohuicuayame poanaje Jesusaja epeejji cuana, Jesosaa quea pame nee acanajejo. Jesosa bihuia canaje jama ba'a:

“Eyacuiñajji, miya oe nei quea ca'a nee nee poani tii tii. Ecuana quea boejea nee po mee'yonaje. Jamaya quea pame nee. E'e, miya quea pame nee nee poani, e'e jojo nei pea'ai. Miya ojjaña huojeajji po tiitiani.

<sup>4</sup> Ecuana Emeshi Mese Jesosa, ojjaña miquea esohui cashajja'ajja tiitii cahua, camimi cahua jama ba'a: —Jesosa, miya quea ca'a nee nee po tiitiani —capoahua. E'e, ojjaña miya bihuia caje'yo. E'e Jesosa, miya oe nei quea pame nee nee poani tiitijjo Eyacuiñajji miya quea boti nee. Eyacuiñajjiya ojjaña miquea eba'ejji quea pame ba mee canajejo, ¡ojjaña meshijo ba'eca cuaa miya cabihuia cahua, mi pejejo nequia!”

Jamaya poanaje ojjaña Jesusaja epeejji cuana.

<sup>5</sup> Majoya eyaya eyajo banaje Eyacuiñajji equi. Eyacuiñajji equi equicuayajji biso nei esecue eca'apejo nequi banaje. Jomajo yani Eyacuiñajji esohui etehue'yo. <sup>6</sup> Eyaya banaje me oeje beca esohuidojojji Eyacuiñajji equijo nequi cuayanaje. Ojaya emejo yani dejja mimishi napajji, ojjaña meshijo ba'eca cuana napajji. Ojaya daqui quea oshe nee nee quea jeajahua nee. Ese'ojje baa daqui ehuosho ba'e mei huo'o quea nahue nee.

<sup>7</sup> Majoya eyaya banaje eyajo ma ebeca pee pea'ai aquiiana eshe cuana Eyacuiñajji pejejo



ani. Oe aquiana esheya caneco cuana quia canaje ma esohuidojojji cuana. Me oeje beca caneco cuana quia canaje. Ma caneco cuanajo yani aquiana dejja mimishi cuana quea nee nee epo meeji. Eyacuiñajji enequi tii tii quea quene nee nee poani ojjaña quea mimishi poani nijje. <sup>8</sup> Jamajjeya Eyacuiñajjija equijo aninaje huichacha quea quemo nee nee; Eyacuiñajji quea ca'a, quea jeajahua, quea jiji nee nee pea'ai jayojja jomajo nequinaje. Jamajjeya ojjaña cuana Eyacuiñajjija equi yasijje dobiqúi mee jjima poanaje. Quijje me oeje beca esohuidojojjiya me oeje beca aquiana dejja mimishi cuana quea nee epo meeji apoa amajje pea cuana Eyacuiñajjija equi yasijje eyajo dobiqúi mee caje'yo.

## 16

### *Me oeje beca aquiana cuana dejja mimishi napajji*

<sup>1</sup> Majoya eyaya Eyacuiñajji shajja'ajjanaje ojaya equijo mimiani. Ohuaya me oeje beca esohuidojojji cuana huohui canaje jama ba'a: —¡Aquiana miquianajaya canecojo ani shojeacue ojjaña meshijo ba'e yasijje ojjaña quea nee nee po meeji!

E'e, Eyacuiñajjiya ona nijje quea quene neejo quea nee nee po mee caje'yo. <sup>2</sup> Jamajjeya majoya ebionei esohuidojojjiya ma aquiana ojaya canecojo ani shojea canaje ojjaña meshijo ba'e yasijje. Jamajjeya ojjaña cuana ma shanei aija bajjani jayojja ebahuajje tehue'yo chiji po mee canaje quea nee nee. Quea nee nee po mee ca'yonaje ohua shanei ai jayojja bihuia canajejo, shanei ai nisho epana'yo bihuia canajejo pea'ai.

Me oeje oe pea esohuidojojjiya pea aquiana caneco cuanajo ani shojea jjima so'o. <sup>3</sup> Majoya pea esohuidojojjiya aquiana ojaya canecojo ani shojea canaje bae ai yasijje. Jamajjeya bae ena quea huo'o nee equecua'yo na' cuayaquiani jayojja po'yonaje, quea ihui po'yonaje ojjaña aquiana enajo nequica mano'yojji.

Me oeje esohuidojojjiya aquiana caneco cuanajo ani; shojea jjima so'o. <sup>4</sup> Majoya pea esohuidojojjiya aquiana ojaya canecojo ani shojea canaje cuei quea quemo cuana huasijje, cuei sisi cuana huasijje pea'ai. Jamajjeya ojjaña ena quea huo'o, quea ihui po'yonaje nahuoo cuana mano'yojji. <sup>5</sup> Majoya esohuidojojjiya, ena jaahunajji poaniya huohui canaje jama ba'a: —Jesosa, miquea ejjashahuabaquijji cuana, miquea esohui cuana ojjaña mimishi cuanajo quea pame nee, e'e jojo nei pea'ai. E'e, miya quea pame nee poani jojaya miya Eyacuiñajjija quea jea nee nee. Miya yahuaajo nei nei yania poa; jjeya nei miya yani tii tii pea'ai. Jamajjeya ojjaña mimishi cuanajo miquea esohui quea ja'a nee. <sup>6</sup> E'e Jesosa, ojjaña dejja mimishi cuaa miquea epeejji cuana, miquea esohui huohuijji cuana pea'ai quecua ca'yajje ena' cuayaquinaje, jjashojeajequinaje. Jamajjeya miyaya mimishi cuana ena', equecua'yo cuanaja ena' cuayaquiani jayojja ishi meeña quea ihui o manojea'yojji. ¡Jamaya capo'yahua! —poanaje.

<sup>7</sup> Majoya eyaya shajja'ajjanaje pea eyajo mei e'iya pejejo nequi. Oya jama poanaje ba'a: —E'e Eyacuiñajji, miya quea ca'a nee, ojjaña huoojeaña. Miquea ejjashahuabaquijji cuana e'e jojo nei quea pame nee. ¡Pea quea mimishi poanijo napacue! ¡Jamaya capoahua!

<sup>8</sup> Ebeca pee pea'ai esohuidojojjiya aquiana ojaya canecojo ani shojea jjima so'o. Majoya pea esohuidojojjiya aquiana ojaya canecojo ani shojea canaje eshequi yasijje. Jamajjeya eshequi quea quiyo nee nee po'yonaje. Quea quiyo nee nee po majjeya ojjaña meshijo ba'e dahua canaje. <sup>9</sup> Eyacuiñajjiya ojaya esohuidojojji cuana huoojea canaje dejja mimishi cuana quea nee nee po meeya. Jamajjeya eshequiya dahua cajje Eyacuiñajji niñeba canaje cuaa. Jamatii dejja mimishi cuaa ojaya mimishi pajea'yo ajja quea mimishi nee nee jjejojo. Eyacuiñajji bihuia'yo ajja pea'ai.

Pea beca peejjima esohuidojojjiya aquiana ojaya caneco cuanajo shojea jjima ani so'o. <sup>10</sup> Jamajjeya majoya pea esohuidojojjiya aquiana ojaya canecojo ani shojea canaje shanei ai jayojja que, ma ojaya epeejji cuana meshijo ba'e huoojeajji poani que. Jamajjeya quea misi nee nee poanaje. Ojjaña quea nee nee poanaje. Quea nee neejo jja'ana ijjaajjeaqui canaje. <sup>11</sup> Quea nee poanijo, chiji poanijo pea'ai ojjaña cuaa Eyacuiñajji eyajo ba'e niñeba canaje. Jamatii ma shanei ai ejja, ojaya epeejji cuana pea aiya mimishi cuana pajea'yo ajja poanaje.

Beca esohuidojojjiya aquiana ojaya caneco cuanajo ani shojea jjima so'o. <sup>12</sup> Jamajjeya majoya pea esohuidojojjiya aquiana ojaya canecojo ani shojea canaje cuei ai yasijje, Eopate cuei yasijje. Esohuidojojjiya ma cuei huosa mee ca'yonaje. Huosa'yajo emeshi mese cuana meshi eshequi poejji mijijje ba'eca poeje sohuinano quea huiso nee nee cuana nijje jjaquecuaquiya.

<sup>13</sup> Majoya eyaya banaje pea beca peejjima eshahua cuana, shona hui jayojja. Oya cuana cuayanaje ma sa'o aija enabajje, shanei ai ejjaja enabajje, esohui huohuijji nisho esiajje pojjiya enabajje pea'ai cuayanaje. <sup>14</sup> Jiquio eshahua cuaa ma dejjaa ajjima acani quea huiso acanaje. Oya cuana poquije ojjaña meshi yasijje ojjaña emeshi mese chichaa Eyacuiñajji nijje ejjaquecuaquiiji. Majoya Jesosa poeje'yo sa'o ai jayojja jeabichajee.

<sup>15</sup> Majoya eyaya shajja'ajjanaje Jesosa mimiani jama ba'a: —¡Shajja'ajjacue mo! Beca cuana ejo ishoa aija. Jamatii eya poecuajije siipojji poecuajicuajiani jayojja. Joya ejo ishoa'ishoa'ajja ani tii tii quea bihui nee nee poaje. E'e, eyaya oya cuana quea boejea po meeje'yo. Oya cuana daquiji jayojja jama poaje e poe o'oyajo. Jamajjeya oya cuana bicho'ama poaje e poe o'oyajo.

<sup>16</sup> Majoya ma eshahua cuaa ojjaña emeshi mese cuana jjachichacui mee canaje oe meshi yasijje eyiyo Majeno bajjani yasijje, ma Jodioja esohuijo Amayeno meshi bajjani yasijje.

<sup>17</sup> Oe esohuidojojjiya aquiana ojaya canecojo ani shojea jjima so'o. Majoya ohuaya ma aquiana ojaya canecojo ani shojea canaje beni yasijje. Shojea cajo eyaya shajja'ajjanaje pea eyajo Eyacuiñajjiya equijo nequi janobajjima nei taaanaje jama ba'a: —Apoa. Eyacuiñajjiya dejja quea mimishi cuana quea nee nee po mee ca'yonaje.

<sup>18</sup> Majoya pojjeje baa siyoo po majamajanaje, taaanaje, cueji po majamajanaje pea'ai. Meshi huehuahuehuanaje janobajjima nei nei pea'ai; yahuajo nei meshi huehuahuehuanaje oe pojji. <sup>19</sup> Jamajjeya Babinonia cuiñajji quea quemajo meshi jjamijisisi jeaquinaje, pea beca peejjima jjamijisisi jeaquime poanaje. Ojjaña pea cuiñajji cuana ojjaña meshijo jaabichajeaquinaje pea'ai. Eyacuiñajjiya Babinonia cuiñajji quea quemajo jjashahuabaqui majje ojjaña dejja jomajo ba'e quea nee nee po mee ca'yonaje. Ojjañaja mimishijo quea quene nee nee poanaje Eyacuiñajji. <sup>20</sup> Huehuahuehua majje ojjaña nasi ai cuana chama'yo tii poanaje. Ojjaña eyiyo cuana chama'yo tii poanaje pea'ai. Jamajjeya dejja cuaa eyiyo ba'yo jjima acaje. <sup>21</sup> Meja na ejjajjacajjaqui cuana quea quemo nee nee, 50 quinome biquieme oquenaje dejja cuana biajje. Jamajjeya dejja mimishi cuaa quea nee nee po majje Eyacuiñajji niñeba neinei canaje.

## 17

### *Epona quea mimishi*

<sup>1</sup> Majoya oe esohuidojojji e que poeyanaje, ma aquiana canecojo ani shojea canaje. Oya enijje miminaje jama ba'a: —¡Cua'a! Eyaya miya ba meeje ache nee nee poaje ba'a ojjaña ma cuiñajji quea mimishijo ba'e. Ojjaña cuana epona pea cojjoji jayojja nei nei poani. Oya quea huiso bae biajje anioqueani jayojja jama quea huiso nee nee quea mimishi po mee cani. <sup>2</sup> Ohuaya quea huiso emeshi mese cuana quea mimishi po mee cani onijje, bejjo sosejje. Ojjaña meshijo ba'e cuana quea mimishi jjashahuabaqui mee cani, ojjaña cuana onijje quea mimishi po tiitii mee cani. E'e, oya cuana ehoo nei jayojja jama poani. Jiquio ecua dejja huoo majje quea cachasa sei nee jayojja jama oya cuana quea mimishi tii tii po sa poani.

<sup>3</sup> Majoya ma esohuidojojjiya eya dojo canaje meshi quima huasijje. Edojjoshahua Pameya eya jjashahuabaqui mee canaje. Jamajjeya eyaya jomajo pea epona banaje. Oya shadaa ai huo'o jayojjaja edaasa biajje aninaje. Ma shadaa ai jayojjaja edaasajo yani bajjani cuana etehue'yo, Eyacuiñajjiya bajjani cuana jayojja. Jamaya Eyacuiñajjiya boti'ama, de. Ma shadaa ai jayojja, shadaa ai ejja pojja'a quea sapa huiso, me oeje beca sapame, 7 sapame. Oya she'anajji pea'ai, quea huiso she'aname ome miji pea'ai, 10 she'aname. <sup>4</sup> Ma eponaja daqui quea huo'o nee nee. Ojaya eyiiji quea huiso nee nee, mei

huo'o cuana, mei oshe quea nahue cuana, ojjaña mei nahue cuana pea'ai. Oja me cuanajo yani oe caneco quea nahue, mei huo'o caneco. Ma mei huo'o canecojo ani aquiana quea tai. Maya ojjaña ojaya ejjashahuabaquijji quea mimishi cuana jayojja, quea huiso dejja cuana nijje quea tai poanaje pea'ai jayojja. <sup>5</sup> Ebahuajje ojaya bajjani etehue'yo poanaje ma ojjaña dejja cuanaja quea quehua. Ese ejjaja esohuijo jama bajjani ba'a: “Babinonia cuiñajji quea quemo ojjaña mimishi cuana ba'ejji” bajjani. Jama tehueme'yaya ojaya ebahuajo jaa. <sup>6</sup> Majoya eyaya oya banaje quea mimishi nee nee. Ohuaya quea huiso Jesusaja epeeji cuana quecua ca'yonaje Jesusaja esohui huohuijjiyojo. Jamajjeya ma epona ehoo jayojja quea bihui nee poani Jesusaja epeeji quecua ca'yajo. Ma epona quea mimishi ba majje eya quea ajjajja nei poanaje. <sup>7</sup> Majoya ma esohuidojojjiya eya huohui canaje jama ba'a: —Huani, ¿apiojji acuae miya quea ajjajja nee epona quea mimishijo? ¿Ae jayojja jama ma epona quea mimishi nee, ma shadaa ai jayojja pea'ai? Eyaya miya huohuije: Jjeya miquea eba pojjeama ma shadaa ai quea sapa huiso, me oeje beca sapame, quea she'ana huiso pea'ai, ome miji pea'ai, 10 she'aname. <sup>8</sup> ¡Bacue! Oya shadaa ai jayojja yahuajo nei nei nequia poa meshijo. Jamatii jjeya oya chama' meshijo. Quijje oya quea huesha nee jaa poeje o'oya, jjani aijo ma mimishi cuana mano'yo majje poqui'yanijje jaa poeje o'oya. Majoya Eyacuiñajjiya oya quea nee nee po mee caje'yo. Jamajjeya Jesusaja epeeji pojjeama quea huiso meshijo ba'e, ma Eyacuiñajjiya yahuajo nei nei meshi pana coo jeahuajo onajaya bajjani cuana tehue jjima ojaya etehue'yo eba'e tiitii'yojjiyo, maya cuana ma shadaa ai jayojja ba majje quea ajjajja nee nee poaje. E'e, ma shadaa ai jayojja yahuajo nei nei nequia poa; jjeya ca chama' meshijo; jamatii quijje quea huesha nee jaa poeje o'oya Jesusa jeabichajeaa nisho —esohuidojojji poanaje.

<sup>9</sup> Majoya esohuidojojjiya eya huohui canaje jama ba'a: —¡Quea ja'a nee jjashahuabaquicue shadaa aija sapa quea huiso, epona quea mimishi pea'ai ebajji! ¡Bacue! Shadaa aija me oeje beca sapa eyiyo cuana jayojja poani. Jiquio eyiyo cuana biajje anioqueani epona quea mimishi. Jiquio eyiyo cuana jayojjaya me oeje beca emeshi mese cuana poani. <sup>10</sup> Me oeje emeshi mese cuana chama'yo tii poanaje. Oe emeshi mese jjeya nei enequi. Pea emeshi mese quijje pishana poeje. Poe majje oya nequije oe pojji cahuime. <sup>11</sup> Ma shadaa ai jayojja, shadaa ai ejja yahuajo nei nequia poa meshijo. Jjeya oya chama'. Quijje oya poeje o'oya; emeshi mese quijjejeje nei nequi poaje me oeje beca emeshi mese cuana apoa poajo. Oya poe jjimahuajo me oeje beca emeshi mese cuana eyiyo cuana jayojja nequinaje. Ona nijje shadaa ai ejja jayojjaya emeshi mese nequinaje pea'ai. Majoya Eyacuiñajjiya oya chama'yo tii po mee caje'yo. <sup>12</sup> Huani —Esohuidojojjiya eya acanaje—, miyaya banaje ome miji pea'ai huiso eshe'ana, shadaa ai ejjaja eshe'ana. Ma eshe'ana cuana ome miji pea'ai emeshi mese cuana jayojja. Oya cuana quijje emeshi mese cuana poaje. Shadaa ai ejja nijjeya ojjaña cuana huoojea caje'yo oe pojji cahuime cuana. <sup>13</sup> Ojjaña emeshi mese pea emeshi mese cuana jayojjaya jama jjashahuabaquije Jesusa jeabichajeajji. E'e, ojjaña emeshi mese quea mimishi cuana shadaa ai ejja shajja'ajja caje'yo. Dejja mase cuana huoojea caje shadaa ai ejja nijjeya Jesusa nijje jjaquecuaquiya. <sup>14</sup> E'e, ojjaña quea mimishi cuana ojee poquije Jesusa quecuaa nisho. E'e, Jesusa quecua sa acaje cuana. Jamatii Jesusa quea ca'a nee nee. Ojjaña huoojea caje'yo. Ojjaña emeshi mese cuana huoojeajji oe nei Emeshi Mese nei poaje'yo Jesusa. Jamajjeya Jesusaa ojaya epeeji cuana nijjeya ojjaña quea mimishi poani quecuadehuejea caje'yo. E'e, Jesusa nijje ani ojjaña ojaya epeeji cuana. Jesusaa oya cuana babaca'yo majje iyaa canaje ojaya epeeji epojji —esohuidojojjiya eya acanaje.

<sup>15</sup> Majoya ma esohuidojojjiya eya huohui canaje jama ba'a: —Huani, miyaya banaje bae jayojja quea huiso, quea quemo cuana. Ma bae cuana biajje anioquenaje epona pea cojjojji nei nei. Ma bae jayojja cuana dejja quea huiso nee nee jayojja, ojjaña meshijo ba'eca cuana, ojjaña pea esohuijo mimiani cuana pea'ai. Quea huiso nee nee, de —esohuidojojji poanaje—. <sup>16</sup> Huani, miyaya banaje shadaa ai ejja quea she'ana huiso, ome miji pea'ai she'aname, 10 she'aname. Maya ome miji pea'ai, 10 emeshi mese jayojja, de. Maya onajaya ma epona pea cojjojji jayojja boti'ama nei nei poaje. Jamajjeya ma

epona jeabichajea caje'yo. Jeabichajea majje jeajea caje'yo epona quea mimishi daquima' jayojja; dahuajea caje'yo. Jiquio ecua ijjiacajjiya aquiana iña majje ijjiya cani jayojja jama epona mimishi chama'yo tii acaje'yo ma emeshi mese cuaa. <sup>17</sup> E'e, Eyacuiñajjiya ma emeshi mese cuana ojaya esohui jayojja jama amee caje'yo. Jjashahuabaqui mee caje'yo jama ba'a: “Ecuaya ma shadaa ai ejja huasijje huoojeaje'yo ecuanaja dejja mase cuana quea huiso nee nee oya quea ca'a nee epo meejji”. Jamajjeya ojjaña dejja mase cuana huoojea caje'yo cuaa shadaa ai ejja quea ca'a nee nee epojji. Jamaya Eyacuiñajjiya huohui canaje ma ohua quijje nei acaje —esohuidojojjiya eya jamaya acanaje—. <sup>18</sup> Huani, miyaya banaje ma epona pea cojjojji jayojja. Ma epona cuiñajji quea quemoo nee ojjaña quea mimishi ba'ejji jayojja. Maaya ojjaña pea emeshi mese cuana huoojea cani —jamaya esohuidojojjiya eya acanaje.

## 18

### *Eyacuiñajjiya ojjaña Babinonia cuiñajjijo ba'e quea nee nee po mee caje'yo*

<sup>1</sup> Majoya eyaya, Huaniya banaje pea esohuidojojji. Oya eyajo nequi nequioquenaje dejja cuana huasijje. Eyacuiñajjiya oya quea ca'a po mee canaje. Jamajjeya esohuidojojjiya ojjaña huoojea canaje. Quea jeajahua nee nee poaniya jjejojo meshi cuana jeaja'ajea canaje. <sup>2</sup> Jama taaame poanaje ba'a: —Ojjaña quea mimishi Babinoniajo ba'e Eyacuiñajjiya quea nee nee po mee caje'yo, chama'yo tii po mee caje'yo. Jamajjeya ma cuiñajjijo ba'equije'yo edosiquiana cuana, eshahua cuana pea'ai, ojjaña cuichojji quea tai ijjiya ca ajja pea'ai jomajo ba'equije'yo. <sup>3</sup> Ojjaña cuana quea mimishi nee nee ma cuiñajjijo ba'e. Jamajjeya ojjaña dejja cuana pea cuiñajji cuanajo ba'e quea mimishi po mee ca'yonaje. E'e, dejja cuana quea mimishi ba'e ehoo nei jayojja quea jjashahuabaqui tai poani. Jamaya dejja cuana ma cuiñajji quea quemoo ba'eya pea cuana ehoo nei jayojja jama po mee cani. Ojjaña pea emeshi mese cuana quea mimishi poani dejja cuana ma cuiñajji quea quemoo ba'e jayojjaya. Ma cuiñajji quea mimishi, quea quemoo yani quea huiso aquiana. Jamajjeya dejja quea aquiana huiso cuana peapea aquiana quea huiso nee jjeshe cani jomajo —jamaya ohuaya eya acanaje.

<sup>4</sup> Majoya eyaya, Huaniya shajja'ajjanaje pea eyajo aniya Jesusaja epeejji cuana iyaa cani jama ba'a: —Ecua epeejji cuana, ¡a'a anijji ma cuiñajji quea mimishijo! Ona jayojja quea mimishi mi po chana'. ¡A'a jomajo ba'e majajji; miquianaya quea nee nee po chana', onaya jayojjaya! E'e, Eyacuiñajjiya ojjaña cuana jomajo ba'e quea nee nee po mee caje'yo quea mimishi poanijojo. <sup>5</sup> Eyacuiñajjiya ba canaje onajaya mimishi cuana quea huiso nee nee. Jamajjeya oya jjashahuabaquiani ona napajji quea mimishi nee nee poanijo. <sup>6</sup> Ojjaña jomajo ba'eya miquianaya napa canaje ecua epeejji poanijo. Jama napa'yomeya Eyacuiñajjiya oya cuana acaje'yo. Onaaya miquianaya quea nee nee po mee canaje enijje jjapeequianijo. Jamajjeya Eyacuiñajjiya oya cuana quea nee nee po tiitii mee caje'yo. Oya cuana miquianaya quea yeno po mee canaje. Jamajjeya Eyacuiñajjiya oya cuana quea yeno po tiitii mee caje'yo. <sup>7</sup> Ojjaña ma cuiñajji quea mimishijo ba'eya jjeshe canaje aquiana cuana quea huiso nee nee. E'e, onajaya aquiana quea huiso nee nee. Ma aquiana oja jjeshe huisoajjaya Eyacuiñajjiya oya cuana quea nee nee po mee caje'yo, quea yeno po mee caje'yo pea'ai. E'e, ojjaña jomajo ba'eya huohui canaje jama ba'a: “Ecuanaajaya cuiñajji quea pame emeshi meseja epona jayojja jama poani, quea huiso aquiana quea nahue yani. E'ahuemano jayojja jama pojjeama. Quea jaji nee nee. Ojjaña jiquiojo ba'eca quea yeno po ajja tii tii” poanaje cuiñajji quea mimishijo ba'eca cuana —jamaya poanaje pea eyajo ani enijje. <sup>8</sup> —Jamatii quijje Eyacuiñajjiya ojjaña ma cuiñajjijo ba'eca quea nee nee po mee caje'yo. Quea yeno po mee caje'yo. Quea shoe po mee caje'yo pea'ai. Ojjaña quiyo jeyojeyo mee caje'yo pea'ai. E'e, Eyacuiñajji quea ca'a nee nee ma dejja quea mimishi cuanajo jjashahuabaquije quea nee nee epo meejji —poanaje pea eyajo ani.

<sup>9</sup> Emeshi mese cuana dejja mimishi cuana ma cuiñajjijo ba'e nijje quea mimishi nee nee poanaje. Jamajjeya ma cuiñajji jijianijo huichacha ba majje emeshi mese cuana paje'yo

jama ba'a: —Ecuanaja epeeji cuana ma cuiñajji ba'e quiyo'yoqui. Onajaya aquiana quea huiso ecuanajaya quea boti nee nee. Quiyo'yo majje aquiana quea nahue, quea pame chama'yo tii poaje, de —jamaya emeshi mese quea mimishi paje quea yeno jjejojo.

<sup>10</sup> Cuiñajji quea quemo quiyo'yanijo emeshi mese cuana quea huesha nee nequije'yo quea mete jjejojo. Quea yeno poaje pea'ai. Quea yeno po majje janobajjima nei paje jama ba'a: —¡Bacue oe! Babinonia cuiñajji etii quea quemo nee nee quiyo'yoqui. Ecuanaja epeeji cuana jomajo ba'e quea nee nee po'yoqui. Jjeya nei ojjaña jomajo ba'e mano cuaji'yonaje. Chama'yo tii poaje'yo —emeshi mese mimishi paje'yo.

<sup>11</sup> Ojjaña dejja quea aquiana huiso ojjaña meshijo ba'e quea yeno poaje Babinonia quiyo'yajo. Oya cuana paje jama ba'a: —Ojjaña Babinoniajo ba'e chama'yo poanaje. Yahuajo ecuanajaya ohuaya aquiana quea huiso nee jjeshe canaje. Jjeya ejjeshe maja'yojji pojjeama. <sup>12</sup> E'e, yahuajo aquiana jjeshe canaje jama ba'a: Mei huo'o quea nahue, mei oshe quea nahue, mei sisi quea nahue cuana, mei oshe sisi quea copo pena bajjani cuana jjeshe canaje, daqui quea huiso quea nahue, daqui huo'o quea bame, daqui beje nei quea nahue, daqui huo'ohuo'o quea nahue cuana jjeshe canaje; ojjaña acui equecuashiyo quea shiye cuana quea nahue, ojjaña aquiana bame pea'ai jjeshe canaje yahuajo; acui ejehui quea nahue cuana, ijjiacajji cuanaja ese' ai'ai, mei jahua edahua, baa edahua cuana, mei ejaja bame cuana pea'ai yahuajo jjeshe canaje ma cuiñajji etiijo ba'eca cuaa. <sup>13</sup> Bobi quea shiye, quea johua po meeji cuana jjeshe canaje pea'ai ma bajjani ba'a: canela, eña quea shiye cuana, madeja jayojja pohui quea shiye cuana, pea shiyeshiye pohui, jjonojjajja na sese, acuijjajja sei, anoso pohui jayojja, bobi anoso jayojja pea'ai jjeshe canaje. Ana'ai quea huiso cuana, ñajjajja quea huiso cuana, mapichi quea huiso cuana, mapichija aquiana edojjji quea huiso cuana, echacojji sosema' cuana, ojjaña chaco tiitii mee cani pea'ai jjeshe canaje cuaa ma cuiñajji etiijo ba'eya —jama pa animeya ojjaña dejja cuana poaje Babinonia quiyoqui ba majje.

<sup>14</sup> Majoya esohuidojojji eyajo nequi ojjaña Babinoniajo ba'e nijje miminaje jama ba'a: —Yahuajo miquianaya ojjaña aquiana cuana jomajo ani jjeshe sa poanaje. Jjeya chama'. Ojjaña miquianajaya aquiana chama'yo tii tii poanaje. Eba'ejji quea pame chaco jjima chama' poanaje. Miquianajaya aquiana quea huiso nee nee ejjeshe o'oyajji pojjeama — esohuidojojji poanaje.

<sup>15</sup> Majoya eya ohuaya huohui canaje jama ba'a: —Huani, Babinonia dejja cuaa aquiana quea huiso nee nee yahuajo jjeshe canaje. Jamajjeya dejja aquiana quiajji cuaa quea huiso nee nee aquiana Babinonia dejja huasijje quia huicha'a huicha'a canaje quea huiso nee nee bejjo sosejje. Jjeya Babinonia dejja cuana quiyo'yonaje, quea nee nee po'yonaje. Jamajjeya aquiana quiajji cuana quea huesha nee nequije quea mete jjejojo. Quea yeno poaje pea'ai. <sup>16</sup> Pa neineije jama ba'a: “¡Oya bacue oe! ¡Babinonia cuiñajji etii quiyo'yonaje! Ecuanaja epeeji cuana jomajo ba'e quiyo jeyojeyo'yonaje. Ojjaña jomajo ba'e daqui quea nahue, daqui huo'o quea nahue, emeshi meseja daqui huo'ohuo'o jayojja quea nahue pea'ai huosho canaje. Eyijji mei huo'o quea nahue, mei sisi quea siyo, quea nahue, mei oshe sisi quea copo pena bajjani pea'ai daquijo ba'ehuana canaje. <sup>17</sup> Jjeya nei ojjaña jomajo ba'e manocuaji'yonaje. Chama'yo tii po'yonaje” dejja quea aquiana huiso pa ani, achacua ojaya aquiana equia'yojji pojjeamajojo. Cuanaya ojjaña bishe ai mese cuana, ojjaña bishe aijo poquiani pea'ai, ojjaña echacojji bishe aijo chaco cani, ojjaña jai jjequicuayajji poani cuana pea'ai quea huesha nee nequije. <sup>18</sup> Onaaya huichacha quea quemo ba caje ma cuiñajji etii quiyo'yanijo. Huichacha ba majje huohui caje jama ba'a: “Babinonia quea pame nee, de. Pea cuiñajji quea pame pishana. ¡Chama' pea cuiñajji Babinonia jayojja!” pa neineije.

<sup>19</sup> Babinonia quiyo'yani ba majje dejja cuana quea yeno nee poaje. Jamajjeya oya cuana quea yeno jjejojo meshi pohuiya jjasapa natajjaquije. Janobajjima nei pa neineije'yo pea'ai jama ba'a: —¡Oya bacue oe! ¡Babinonia cuiñajji etii quiyo'ya! Ojjaña dejja cuana bishe ai cuanajo chacochoani quea bejjo huiso poanaje; quea huiso nee nee aquiana

cuana jjeshe canaje Babinonia dejja cuaa bejjo sosejje —jamaya ojjaña bishe ai cuanajo nequi paje.

<sup>20</sup> Majoya esohuidojojji miminaje jama ba'a: —Ojjaña eyajo ani, ¡quea bihui nee nee pocue! E'e, Babinonia cuiñajji quea mimishi nee nee quiyo'yonaje. ¡Ojjaña Jesusaja epeeji cuana, o shajja'ajjajji cuana pea'ai, ojjaña Eyacuiñajji esohui huohuijji cuana, Jesusaja huoojea'yo esohui huohuiya pea'ai quea bihui nee pocue! Eyacuiñajjiya Babinonia quiyojea mee ca'ya, ojjaña jomajo ba'e pea'ai quiyojea mee ca'yonaje, miqianaya ohua napa canaje sosejje.

<sup>21</sup> Majoya esohuidojojjiya quea ca'a nee neeya mei quea quemo nee nee, shijje cuiapojomeejji mei quea quemo jayojja jeaoqueajea canaje bae ai yasijje. Mei chama'yo tii poanaje. Mei jeaoqueajea majje huohui canaje jama ba'a: —Eyaya mei janobajjima nei jeaoqueajea'yonaje. Jamaya eyaya Babinonia chama'yo tii po meeje'yo; janobajjima nei napaje'yo. E'iya o'oyajji pojjeama tii tii poaje'yo. <sup>22</sup> Yahuajo quea huiso jomajo ba'eya e'ñaqueyajji cuana ñaqueya canaje esohui cuayajji, dehue mia canaje, emiajji eshe'ana jayojja mia canaje pea'ai. Jamaya oya cuana yahuajo poanaje. Quijje ca chojja, jamaya epo o'oyajji pojjeama. Chama'yo tii poaje'yo. Quea huiso jomajo ba'e yahuajo chacoconaje. Jjeya chama'yo tii echacojji cuana poaje'yo. Quea huiso anoso ai cuana cuiapasha canaje cuaa yahuajo, meiya. Jjeya anoso ai cuiapashajji chama'yo tii poaje'yo quiyo'yo majje. <sup>23</sup> Jomajo cuaquijji ejji o'oyajji pojjeama tii tii, quea misi po tiitiije'yo. Jomajo jjahueaqui ajja tiitii poaje'yo. Chama' poaje'yo yahue esho'i oja huanase esho'i nijje emimijji quea bihui nee. Chama'yo tii tii. Yahuajo ojjaña jomajo ba'e quea aquiana huiso nee nee poanaje; pea cuiñajji cuanajo quea aquiana huiso pishana poanaje. Yahuajo Babinonia dejja cuaa quea huiso pea cuana dasia ca'yonaje. <sup>24</sup> Quea huiso Jesusaja esohui huohuijji cuana quecua ca'yonaje cuaa pea'ai esohui huohuijji jojoya. Quea huiso pea cuana jomajo ba'e quecua ca'yonaje pea'ai, Babinonia dejja cuaa quea maseya jjejojo, de —ma esohuidojojji quea ca'a nee jamaya poanaje.

## 19

### *Eyajo ojjaña Eyacuiñajji bihuia canaje*

<sup>1</sup> Majoya eyaya shajja'ajjanaje quea huiso nee nee eyajo ba'e. Oya cuana janobajjima nei sohuicuayani jama ba'a:

“Eyacuiñajji quea pame nee nee poani. Ohuaya ojaya epeeji cuana ba'e tiitii mee cani eyajo. Oya oe nei ba'e tiitiani. Oya oe nei quea ca'a nee nee nequi tiitiani. <sup>2</sup> E'e, ojaya ejjashahuabaqui'yojji dejja mimishi cuanajo e'e nei poani. Ma epona pea cojjojji nei nei quea nee nee po mee ca'yonaje. Maaya quea huiso meshi cuanajo ba'e cuana quea mimishi nee po mee canaje. Jamajjeya Eyacuiñajjiya oya quea nee nee po mee ca'yonaje. Cuanaya ma epona taiya Jesusaja epeeji cuana quea huiso quecua ca'yonaje Eyacuiñajjiya oya quea nee nee po mee ca'yonaje”.

<sup>3</sup> Majoya ojjaña eyajo ba'e janobajjima nei taaa o'oyanaje jama ba'a: —Eyacuiñajji quea pame nee nee poani. Ohuaya ojjaña quea mimishi ma cuiñajji aijo ba'eca quiyo tiitii mee caje'yo.

<sup>4</sup> Majoya eyajo Jesusaja epeeji etiiya quea huiso cuaa, ma 24 huisomeya, aquiana eshe cuaa ma ebeca pee pea'ai huisomeya ecui'oshajjajo nequiya Eyacuiñajji bihuia ca'yonaje. Jama taaame poanaje ba'a: —Eyacuiñajji, miya quea pame nee nee. ¡Ojjaña miya cabihuia cahua! ¡Jamaya capo'yahua! —jamaya onaaya Eyacuiñajji e'anioque ani bihuia canaje.

<sup>5</sup> Majoya pea eyajo Eyacuiñajji pejeje nequi taaanaje jama ba'a: “Ojjaña Eyacuiñajji epeeji cuana, ojjaña Eyacuiñajji esohui shajja'ajjajji poaniya, ojjaña etiiya, ojjaña esho'i cuaa pea'ai, ¡Eyacuiñajji bihuia!”  
Jamaya pea eyajo nequi taaanaje.

<sup>6</sup> Majoya eyaya shajja'ajjanaje pea cuana quea shajjaquijjo. Quea huiso cueji taaani jayojja, cuei quea quemo, quea cuejipashi nee mei pasaca biajje oqueani jayojja. E'e, ojjaña Eyacuiñajji janobajjima nei bihuia canaje jama ba'a:

“Eyacuiñajji quea pame nee nee. Eyacuiñajji quea ca'a nee nee ani tiitiije'yo. Ohuaya ojjaña huoojea tiitii cani. <sup>7</sup> ¡Eseya ojo quea bihui nee capo'yahua! ¡Eseya ojo quea bihui nee camimi'yahua pea'ai! Jama ba'a: Eyacuiñajji ecuana quea bihui nee nee. Oya oe nei quea ca'a nee po tiitiani. Oya oe nei yani tii tii. Jesosa, ma ñajjajja equecua'yo jayojja quea pame nee. Jjeya oya quea pame nee nequi yahue ejjahuaquijji jayojja. Ojjaña ojaya epeeji cuana epona ejjahueaquijji apoa jayojja jama quea boejea nee. E'e, Jesosa poeje o'oya ojaya epeeji cuana jaahuanaa. <sup>8</sup> Ojjaña ojaya epeeji cuana daqui oshe quea pame, quea boejea, quea jeajahua huosho majje enequi. Jiquio ecua eponaja daqui oshe quea boejea ejjahueaquijji jayojja jama Jesosaja epeeji cuana quea pame quea boejea'yo pea'ai ba'e”.

Jamaya pea cuaa eyajo nequiya Eyacuiñajji bihuia canaje.

<sup>9</sup> Majoya esohuidojojji eyajo nequiya eya huohui canaje jama ba'a: —Huani, esohui tehuecue jama ba'a: “¡Jesosa ejjahuaquijji jayojja ojjaña ojaya epeeji cuana ojee ca'ijji-a'ijjia mee cahua onijje! ¡Ojjaña onijje ojee ijji'a'ijjia ani quea bihui nee capo'yahua!” E'e, jiquio ecua esohui e'e nei nei poani. Jamaya Eyacuiñajji poani —eya jamaya acanaje esohuidojojjiya.

<sup>10</sup> Majoya ojaya esohui shajja'ajja majje eya esohuidojojji pejejo ecui'oshajjajo nequinaje o bihuiajji. Jamatii oya enijje miminaje jama ba'a: —Chojja, Huani. ¡A'a eya bihuiajji! Eya Jesosaja echacojji poani mi jayojjaya, miquea epeeji cuana jayojjaya pea'ai. E'e, miquianaaya Jesosaja esohui jayojja jama añña pea'ai. Edojjoshahua Pameya ojjaña Jesosaja epeeji cuana Jesosaja esohui ba mee cani quea ja'a nee, Huani. Jamajjeya ¡Eyacuiñajji oe nei bihuiaque! —ohuaya eya acanaje.

*Huaniya Jesosa ba canaje mapichi osheja edaasa biajje ani*

<sup>11</sup> Majoya eyaya, Huaniya ojjaña eyajo ba neinei'yonaje. E cojja neiyo mapichi oshe nequi. Oya mapichija edaasa biajje ani quea pame nee nee. Ojaya esohui e'e nei. Ojaya esohui pea cuanaja eba'ejjijo e'e nei pea'ai. Ohuaya ojjaña quea mimishi poani quecua cani, oya cuana quea nee nee po mee cani quea mimishi poanijo. <sup>12</sup> E'e, oya mapichija edaasa biajje ani quea cojja jiji nee, cuaquijji jayojja cojjame; ojaya ejaahuojja yani pea'ai. Ohuaya quea huiso emeshi mese cuana huoojea cani. Quea huiso cuaa oya shajja'ajja cani. Ojaya bajjani etehue'yo yani. Jamatii pea cuanaja maya ebajjani quea quehua. Ojaya eba ojaye nei ojaya bajjani. <sup>13</sup> Ojaya daqui ao quea huo'o nee nee, ena' jayojja jama enajo iyanobiajea jayojjaya. Oya ca ca oe Eyacuiñajji esohui bameejji. <sup>14</sup> Quea huiso eyajo ba'e o quishishijji poquije jjaquecuaquiya. Ojjaña quea huiso nee nee cuana mapichi osheja edaasa biajje poquije. Ojjañaja daqui oshe quea pame nee, quea nahue, quea boejea nee, de. <sup>15</sup> Ojaya enabajje yani esohui quea ja'a nee baa quea ca'a, quea shejji nee jayojjaya. Ma esohui huohui majje ojjaña dejja cuana ojjaña meshi cuanajo jeabichajja caje'yo. Quea ca'a nee nee poanijo ohuaya ojjaña dejja ojaya esohui jayojja jama amee caje'yo. Ojjaña shajja'ajja mee caje'yo pea'ai. E'e, Eyacuiñajji ojjaña dejja mimishi ojjaña meshijo ba'e nijje quea quene nee nee poanijo ohuaya, ma mapichi osheja edaasa biajje aniya quea tecue ojjaña huoojea caje'yo. Jiquio ecua acuijjajja quecuapasha cani cuaa jayojja jama Jesosa Quitohua ojjaña dejja cuana acaje'yo; mete mee majje shajja'ajja mee caje'yo. <sup>16</sup> Ojaya daqui aojo, ojaya huachinequi quea quemojo pea'ai yani ebajjani tehue'yo jama ba'a:

“Ojjaña emeshi mese cuana huoojeajji; ojjaña cuana huoojea'yojji poani”.

<sup>17</sup> Majoya eyaya, Huaniya pea esohuidojojji banaje eshequijo nequi. Ohuaya janobajjima nei iyaa canaje ojjaña be'o cuabesa ba'e; jama acanaje ba'a: —¡Be'o cuana! ¡Miquianaya poecue! ¡Ojee ijji'a'ijji huacue! Eyacuiñajjiya dejja mimishi quea huiso quecua mee caje'yo. <sup>18</sup> E'e, ijjeyahua nei emeshi mese cuana ijji huacue, dejja mase

cuanaja mese cuana, dejja ca'a cuana, mapichi cuana, mapichija edaasa biajje ani cuana, dejja mimishi quea huiso, echacojji sosema' cuana, echacojji bejjo sosejje chaco cani cuana, esho'i cuana, etii cuana pea'ai ojjaña ijiahuacue! —ohuaya acanaje be'o cuana.

<sup>19</sup> Majoya eyaya banaje ma shanei ai ejja quea huiso emeshi mese nijje, quea huiso dejja mase nijje pea'ai ojee poquiiani Jesosa quecuua nisho, ma mapichi osheja edaasa biajje ani quecuua nisho, quea huiso cuana Jesosa nijje nequi quecuua nisho pea'ai. Ojjaña poquinaje Jamayeno meshi yasijje jjaquecuquiya. <sup>20</sup> Majoya Jesusaa shanei ejja, esohui huohuijji nisho pea'ai iña canaje. E'e, ohuaya iña canaje esohui huohuijji nisho, ma shanei ejja nijje tiya quea huiso ma dejjaa ajjima acanaje ojjaña cuana dasia'yoyji, shanei ejja bihuia mee'yoyji, ma shanei ejja nisho oja a'yo bihuiajji dasia'yoyji, ojjaña joya shanei ejjaja dasia'yo majje oja bahua tehue pea'ai iña canaje. Jamajjeya ma shanei ejja, ma esohui huohuijji nisho pea'ai iña'yo majje Jesusaa oya cuana jeajea ca'yonaje bae ai jijiani yasijje, bae quea ihui yasijje. Jomajo tii quea nee nee po tiitiije'yo. <sup>21</sup> Majoya Jesusaa mapichi oshejo e'anioque aniya ojjaña ejjaquecuquiiji cuana quea mimishi quecuua jeyojeyo ca'yonaje baa jayojjaa, oja esohui'ya. E'e, ojaya enabajo baa jayojja yani, ojaya esohui. Majoya ojjaña dejja mimishi cuana mano'yajo, be'o cuana poeyanaje quea huiso nee nee. Emano'yo cuana ijia neinei ca'yonaje. Quea jeje nee nee poanaje be'o cuana ojjaña equecu'yo cuana ijia'yo majje. Jamaya eya, Huani cahuiba mee canaje.

## 20

### *Edosiquiana nei jeyo canaje quea shequiaja huiso nee nee 1.000 shequiajame*

<sup>1</sup> Majoya eyaya banaje pea esohuidojojji. Oya eyajo nequi meshi yasijje poeyani. Ohuaya jjani ai ma emano'yo cuana nequi quea doe nee nee nequi cuana cojja yahuejajji ye cani emejo, aquiiana quea ca'a cadena quea quemo jayojja pea'ai ye cani. <sup>2</sup> Ohuaya iña cañaquinaje, jeabichajea canaje Edosiquiana nei, sa'o ai quea mase nee Satanasa bajjani, ma yahujajo nei nei pea'ai esejaya etiiquiiana pana coo ca jeahua dasiajji poa. Iña majje ma esohuidojojjiya Edosiquiana jeyo canaje cadena quea quemohua quea shequiaja huiso nee nee, 1.000 shequiajame ejeanobiajajji. <sup>3</sup> Jeyo majje oya jeajea canaje jjani ai yasijje, ma emano cuana nequi yasijje quea doe nee nee yasijje. Capa canaje. Capa majje ca'a canaje. Ca'a majje cojjaahuejaja canaje. Enaba capajji'yajo tehue canaje jama ba'a: “Edosiquiana nei ecuayaqui'yoyji pojjeama quea shequiaja huiso nee nee, 1.000 shequiajame nequije'yo ojjaña meshijo ba'eca cuana dasia'yo jjima ya'yoyji”. Jamaya tehue canaje esohuidojojjiya. Jamatii quijje nei ma shequiaja huiso nee nee apoa po majjeya Edosiquiana nei ma emano cuana huasijje, jjani ai quea doe nee nee yasijje ejeyo nequi cacuyaqui'yahua beca ba'i cuanajo dejja mimishi cuana dasia o'oyajji.

### *Ebionei eshequi mee o'oyajji*

<sup>4</sup> Majoya quijje pishana eyaya banaje ona huoojajji cuana e'anioque ani. Eyacuiñajjiya oya cuana huoojaja canaje ojaya epeejji cuana huoojaja Jesosa nijjeya. Eyaya banaje pea'ai quea huiso nee nee Jesusaja esohui huohuijji cuana ma onaa sapa jajasejjajea ca poa. Mano mee ca'ya poa dejja mimishi cuana Jesusaja esohui huohuijji poanijojo, Eyacuiñajjiya esohui cuana huohuijji poanijojo pea'ai. Jesusaja epeejji cuana yahujajo pishana shanei ejja quea mase pishana bihuia jjima, shanei ejja quea mase pishana nisho, meshi epana'yo pea'ai bihuia jjima. Ojaya ebahujaje, emejje pea'ai etehue'yo chama' shanei ejjaja eba'yoyji, ma 666 jayojja tehueme'ya chama'. Eyaya oya cuana banaje shequije o'oya. Shequi o'oya mee majje Eyacuiñajjiya oya cuana Jesosa Quito nijje ojjaña huoojajji po mee caje'yo quea huiso nee nee shequiajame. E'e, 1.000 shequiajame Jesosa Quito nijje anije'yo. <sup>5</sup> Pea emano'yo cuana ma quea mimishi mano'yo cuana shequi o'oya jjima; 1.000 shequiajame apoa po jjimahuajo oya cuana shequi o'oya jjima. Joya shequi o'oyani 1.000 shequiajame po jjimahuajo bajjani ebionei eshequi mee'yoyji. <sup>6</sup> Joya ebionei shequi mee caje o'oya quea bihui nee nee, quea pame nee nee poani. Oya cuana nee'ama poaje'yo. Epoqui'yoyji pojjeama cuacui yasijje. Joya ecua pea cuana quea mimishi poani



jayojja jama epo'yojji pojjeama Jesusaja epeeji cuana. Chojja, oya cuana Eyacuiñajji nijje emimijji poaje'yo. Oya cuana ojjaña huoojeajji poaje'yo Jesosa Quito nijje pea'ai quea shequiaja huiso nee nee, 1.000 shequiajame.

*Edosiquiana nei jeajea caje'yo cuaqui yasijje*

<sup>7</sup> Quijje nei ma 1.000 shequiajame po majje Eyacuiñajjiya Edosiquiana nei pichojea mee caje'yo. Jamajjea oya poquije'yo. <sup>8</sup> E'e, Edosiquiana nei poquije'yo ojjaña meshijo ba'eca dasiaa. Ohuaya ojjaña Co meshijo ba'e, Maco meshijo ba'e pea'ai dasiaqui caje'yo. Ohuaya oya cuana ojee epojji iyaa caje Eyacuiñajji quecuajji nisho. Ojjaña oja dasia'yo cuana Edosiquiana nei nijje nequije'yo. Oya cuana quea huiso nee nee poaje ojjaña meshijaji sope huisoajja. <sup>9</sup> Jamajjea oya cuana quea mase nee nee poaje. Poquije'yo ojjaña meshi cuana huasijje ojjaña jeabichajee. Eyacuiñajjiya epeeji queya caje'yo quecuajji. E'e, Jenosanena queya caje'yo Eyacuiñajjiya epeeji cuana jomajo nequi quecuajji nisho. Jamatii Eyacuiñajjiya eyajo aniya dejja mimishi cuana ba majje cuaqui jeoqueajee caje ona biajje. Oya cuana Jesusaja epeeji queya'yo epo tii nequi manodehuejaje'yo, ojjaña. Ojjaña quiyo jeyojeyo caje'yo. Chama'yo tii poaje'yo. <sup>10</sup> Majoya Eyacuiñajjiya Edosiquiana nei jeajea caje'yo bae quea jiji nee jayojja huasijje, bae quea ihui, quea pase yasijje. Ma oja dasia'yo cuana pea'ai jeajea caje'yo bae jijiani yasijje, Eyacuiñajjiya. Pea shanei ejja nijje, pea Eyacuiñajjiya esohui huohuijji nisho quea mimishi pea'ai nijje oya cuana quea nee nee po tiitijje'yo bae jijiani yasijje.

*Ojjaña quea mimishi cuaqui yasijje jea caje'yo ecuayaqui'yojji pojjeama*

<sup>11</sup> Majoya eyaya banaje jama ba'a: Epojja oe poajo Eyacuiñajjiya ojjaña huoojea caje'yo enapa'yojji. Oya Eyacuiñajji quea jeajahua nee, quea oshe nee nee bo oshe quea jeajahua nee jayojja. Ojjañaja Emeshi Mese nei oya. Ojjaña meshijo nequi, ojjaña eyajo nequi pea'ai quea ajjajja nee poani ojo. Jamatii oya cuana quehuajje poqui meemee ajja, achacua epoquijji. <sup>12</sup> Majoya eyaya banaje ojjaña dejja cuana ma yahuajo mano'yo cuana, jjea nei mano'yo pea'ai; ojjaña etiiquiana cuana, ojjaña esho'i cuana pea'ai. Ojjaña nequinaje Eyacuiñajji cojja nei. Eyacuiñajjiya esohui etehue'yo cuana she'a canaje. Pea esohui etehue'yo she'a canaje pea'ai. Maya o ba'e tiitii mee'yojji oja tehue. Ma esohui etehue'yo ba majje Eyacuiñajjiya huohui canaje ojaya ejjashahuabaqui'yojji ojjaña ba'ya poa cuanajo. E'e, ma esohui etehue'yo ba majje ojjaña huoojea caje'yo. Ojaya epeeji cuana, ojjaña joya quea boejea poani cuana quea bihui nee nee po mee caje'yo. Ojjaña joya quea mimishi po nequia poa cuana ca ca quea nee nee po mee caje'yo. <sup>13</sup> Ojjaña ma yahuajo bae ai'aijo hui'i'yo cuana shequije o'oya. Ojjaña ma yahuajo mojea ca poa cuana, ojjaña emano'yojaa cuana pea'ai shequije o'oya. Ojjaña joya quea boejea poa cuana quea bihui nee po mee caje'yo Eyacuiñajjiya. Ojjaña joya quea mimishi poa cuana ca ca quea nee nee po mee ca'yoquije tii tii. <sup>14</sup> Majoya apoa. Ojjaña mimishi cuana bae ai jayojja jijiani yasijje jeajea caje'yo ecuayaqui'yojji tii tii pojjeama. Ma bae jijiani bajjani Emano Beca'yojji, quea nee nee nee epo nequi'yojji. <sup>15</sup> E'e, ojjaña joya ebajjani tehue'yo pojjeama Eyacuiñajjiya etehue'yojo o ba'e tiitii mee'yojji aje oe jeajea caje'yo cuaqui jijiani yasijje, bae ai jayojja quea jiji nee nee yasijje, de.

21

*Eyacuiñajjiya Huani ba mee canaje meshi cuana, eyatahuatahua pea'ai eyacua*

<sup>1</sup> Majoya Eyacuiñajjiya eya, Huani ba mee canaje eyatahuatahua, meshi cuana pea'ai eyacua. Eyatahuatahua, meshi cuana pea'ai yahuajo jama pojjeama. Bae ai'ai cuana chama'yo tii poanaje. <sup>2</sup> Eyaya Jesusaja epeeji cuana quea pame nee nee, quea boejea nee banaje. E'e, Jenosanena cuiñajji eyacua jayojja poanaje. Oya cuana eyajo Eyacuiñajji nijje nequi ojee nequioquenaje. ¡Oya cuana ache bame nee nee! Epona ejjahueaquijji jayojja, daqui eyacua quea pame nee huosho cani jayojja, ojaya ejjahuoja quecuaca'aquijji jayojja. ¡Jamaya Eyacuiñajjiya cuiñajji eyacua, ache bame nee nee! <sup>3</sup> Eyaya shajja'ajjanaje pea Eyacuiñajji pejejo nequi enijje janobajjima nei mimiani jama ba'a: —Huani, ¡bacue

oe! Meshi eyacuajo Eyacuiñajji dejja cuana nijje ba'e tiitiiani. Oya cuana Eyacuiñajjiya jama acaje ba'a: "Jiquio dejja cuana ecuea epeeji cuana poani. Eya ona nijje ani tiitije'yo". <sup>4</sup> E'e. Jamajjeya Jesusaja epeeji cuana quea yeno po ajja tii tii, mano beca'yo ajja, pa ajja, shoe'ama, nee'ama poaje'yo tii tii. Yahuajo jama pojjeama poaje'yo — poanaje pea eyajo nequi.

<sup>5</sup> Majoya Eyacuiñajjiya ojjaña huoojeajjiya eya huohui canaje jama ba'a: —Eyaya ojjaña eyacua ameeña. Ecuea esohui e'e jojo nei. Jamaya eyaya aje, Huani. Jamajjeya jecuea esohui tehuecue! —poanaje.

<sup>6</sup> Majoya Eyacuiñajjiya eya jama acanaje ba'a: —Eya yahuajo nei nei ani tiitiia poa. Quijje nei eya ani tiitije'yo pea'ai. ¡Ojjaña joya quea naba taja jayojja poani poecue e que! Eyaya e'ishijji ishi meeje sosema'. Enijje jjapeequi sa neinei poanijo quea naba taja jayojja jama poani. Jamajjeya eyaya oya ba'e tiitii meeje'yo. <sup>7</sup> Ojjaña joya enijje jjapee tiitiquiani Edosiquiana nei jeabichajeajji poani. Jamajjeya eyaya oya cuana ecuea ebacua cuana po meeje'yo. E'e eya, Eyacuiñajji ona nijje ani tiitije'yo. <sup>8</sup> Pea cuana, chojja. Ojjaña quea mete jjejojo enijje jjapee pajeaqui'yani, eshahuaaja epeeji cuana, ojjaña quea mimishi ba'e cuana, pea quecuajji cuana, pea cojjojji cuana, eyamiquecua cuana, ojjaña quea tai acani, eyacuiñajji nisho bihuiajji cuana, ojjaña siajjejojji cuana, edasiajji cuana pea'ai poquije'yo cuaqui yasijje, bae ai jayojja jijiani yasijje poquije'yo. Maya bajjani Emano Beca'yojji quea nee nee epo nequi'yojji —Eyacuiñajjiya eya jamaya acanaje.

#### *Huaniya ba canaje Jenosanena cuiñajji eyacua*

<sup>9</sup> Majoya oe esohuidojojji enijje mimiya poeyanaje. Yahuajo pishana oya me oejje oe esohuidojojji cuana nijjeya me oejje beca caneco iñajji poanaje. Maaya dejja cuana me oejje beca napame acanaje. E que poe majje ma esohuidojojji jama poanaje ba'a: —Huani, ¡poecue enijje! Ojjaña Jesusaja epeeji cuana epona ejjahueaquijji jayojja eyaya miya ba meeje —ohuaya eya acanaje Jesusajo, ma ñajjajja sho'i equecua'yo jayojjajo.

<sup>10</sup> Majoya Edojjoshahua Pameya eya dojo canaje eyiyo ao'ao daasa huasijje. Ohuaya eya ba mee canaje cuiñajji eyacua ojaya quea jea nee Jenosanena eyacua bajjani. Ma cuiñajji eyajo ani Eyacuiñajji anijo anioqueani Jenosanena eyacua. <sup>11</sup> Eyacuiñajji ma cuiñajji nequi quea jeaja'a nee nee poani. Jasipe mei bajjani jayojja poani quea jeaja'a nee, tahuoo oshe eshequiya jeaja'a cani jayojja. <sup>12</sup> Ma cuiñajji peeyi quea ao nee nee, quea quemo nee nee. Yani quea huiso esecue cuana, oe ejiojji beca, 12 secueme. Esohuidojojjiya oe ejiojji beca huisome esecue cuana cuiña cani. Esecue cuanajo Isaenija bacua ejja cuanaja bajjani etehue'yo yani, oe ejiojji beca, 12 bajjanime. <sup>13</sup> Eshequi poeje mijijje pea beca peejjima esecue jaa; eeno poeje mijijje pea beca peejjima esecue cuana jaa; ena poeje mijijje pea beca peejjima esecue cuana jaa; eshequi dobiquije mijijje pea'ai pea beca peejjima esecue cuana jaa. <sup>14</sup> Ma cuiñajji quibo iya 12 meija quibo iya. Ma mei biajje etehue'yo yani, Jesusaja huoojea'yoja, 12 huisome cuanaja bajjani.

#### *Jenosanena eyacua ipia'ajja canaje esohuidojojjiya*

<sup>15</sup> Esohuidojojjiya ma enijje miminajeya ma cuiñajji ipia'ajja canaje mei huo'o baacuiya. Esecue cuana ipia'ajja canaje pea'ai. Jiyo ipia'ajja canaje pea'ai. <sup>16</sup> Jamaya poanaje ba'a: Ojjaña cuiñajji ejjapeequijji'ya oya quemajja pea'ai. Ipia'ajja majje ba canaje ache quemo nee nee poanaje ba'a: Quea quemo nee nee 2.200 kilometro quemome. Oya aohuajja pea'ai, 2.200 kilometro aome. <sup>17</sup> Ejjapeequijji'ya quea moo nee nee, 64 metro moome. Ohuaya ipia'ajja canaje esejaya e'ipia'ajjajji jayojjaa. <sup>18</sup> Ejjapeequijji'ya jasipe mei quea ca'a, quea jeaja'a. Cuiñajji mei huo'o oopana quea nahue nee nee, quea ja'a, tahuoo quea ja'a jayojja. Quea bame nee nee. <sup>19</sup> Ejjapeequijji'ya quibojo yani quea huiso mei e'iya quea bame nee nee epojji, peapea mei cuana quea nahue nee nee jama ba'a: Jasipe mei cuana, sapino mei quea tahua jiji, asata mei cuana, esemeana mei cuana quea tahua jiji, <sup>20</sup> onise cuana quea huo'o siii oshe, caneniani cuana quea huo'o jiji, quesonite cuana quea jahua siyo, benio cuana quea jeajahua, topasio cuana jahuajahua jijijiji, quisopasa cuana iye tahuatahua. Jasine mei cuana pea'ai, ameta

mei cuana iye huo'ohuo'o pea'ai. Mahuiso mei cuana ejjapeequijji'ya quibojo e'iya ani. Quea pame nee nee, sho acui iñajo ani eshequiya jeaja'a cajje jahua, huo'o, tahua poani jayojjaya. <sup>21</sup> Oe ejiojji beca, 12 esecue jjani cuana ejaa. Ma esecue jjani cuana mei copo oshe pena ai bajjani cuana jayojja, quea nahue nee nee. Ejiojji cuana cuiñajji jaa mei huo'o oopana quea nahue, tahuoo oshe quea ja'a jayojjaya.

*Huaniya cuiñajji eyacua quea jeajahua nee ba canaje*

<sup>22</sup> Ma cuiñajji ecuea ba jjima equi Eyacuiñajji bihuiajji jayojja. E'e, Eyacuiñajji quea ca'a nee nee ma cuiñajji ba'yani, Jesosa ma ñajjajja equecua'yo jayojja jomajo ba'yani pea'ai. Jamajjeya jamatii oya cuana bihuia cani, ojjaña. <sup>23</sup> Jomajo Eyacuiñajjiya ojjaña jeaja'a cani. Jesosaa ma ñajjajja equecua'yo jayojjaa ejijijjiya jeajiji cani jayojjaya. Jamajjeya quea ja'a nee nee poanijo eshequi, ba'i pea'ai chama' poani. <sup>24</sup> Jesosaa ojaya epeejji cuana quea bame nee nee po mee canajejo oya cuana ba'e mee caje'yo quea ja'a nee. Emeshi mese cuana ojjaña meshijo ba'eca cuaa Eyacuiñajji bihuia caje'yo jama ba'a: —Ojjaña aquiana quea pame miquea poani.

<sup>25</sup> Cuiñajji esecue cuana eca'apejo tii nequije'yo sine'yo ajja jojaya. <sup>26</sup> Ojjaña cuana cuiñajji eyacua huasijje dobiqijje Eyacuiñajji bihuiaa jama ba'a: —Eyacuiñajji, miya quea pame nee nee.

<sup>27</sup> Jomajo ca ca ojjaña cuana quea mimishi cuana, quea tai cuana pea'ai, jjadasiaquijji cuana pea'ai edobiquijji pojjeama nei nei. Joya ebajjani tehue'yo cuana ca ca oe dobiqii mee caje'yo, Eyacuiñajjiya. Jesosaa, ma ñajjajja equecua'yo jayojjaa tehue canaje ojjaña ojaya epeejji cuanaja bajjani eba'e tiitii'yojji oja tehue.

## 22

*Ena oshe eba'e tiitii mee'yojji*

<sup>1</sup> Majoya pea esohuidojojjiya eya cuei quea tahua, quea pame nee eyajo ba mee canaje. Ma cuei Eyacuiñajji e'anioque ani pejejo yobi nequi. Jesosa nequi pejejo cuei shaja cuayaqui pea'ai. Ojjaña joya ma ena ishi cani ba'e tiitii mee cani Jesosaa, Eyacuiñajjiya pea'ai. <sup>2</sup> Eyacuiñajjiya cuiñajji eyacuajo ejaa ejiojji quea quemo. Ma ejiojji tii ma cuei quea pame jaa. Cui sahuajo, beca mijijje yani acui bajjani Eba'e tiitii'yojji. Ojjaña ba'ijo jjajja huicha'a huicha'ani. Ma acui iña cuana ijia majje ojjaña jomajo ba'e quea ja'a nee ba'e tiitii'yo. <sup>3</sup> Yahuaajo ojjaña quea mimishi poanijo Eyacuiñajjiya quea camaja po mee canaje ojjaña meshi cuanajo ba'eca. Eyajo eba'ejji camaja'ama poaje mimishi cuana chama'yo poanijo. Eyacuiñajji eyajo ma cuiñajji quea pamejo anioqueani. Jesosa, ma ñajjajja equecua'yo jayojja, jomajo yani pea'ai. Jomajo Jesosaja epeejji cuaa oya bihuia tiitii caje'yo. <sup>4</sup> Jesosaja epeejji cuaa oya ba caje'yo ecojjaa. Ojaya etehue'yo ebahuajje tehue canaje ojjañaja ebajji ojjaña ojaya epeejji cuana. <sup>5</sup> Cuanaya Eyacuiñajji quea cojja ja'a nee, quea jeajahua nee poanijo ma cuiñajji quea ja'a nee po tiitii'yo, misi'ama tii tii. Jamajjeya jomajo chama' cuaquijji. Chama' eshequi pea'ai. Ojjaña ojaya epeejji cuana onijje nequi tiitii'yo emeshi mese jayojja quea pame nee, ojjaña huoojeajji jayojja.

<sup>6</sup> Majoya ma esohuidojojji enijje miminaje jama ba'a: —E'e, ecuea esohui e'e jojo nei. Jamajjeya ¡shajja'ajjacue! Emeshi Mese neiya Eyacuiñajjiya yahuaajo Edojjoshahua Pame huoojea canaje ojaya esohui huohuijji huohui meesahuaa. Eyacuiñajjiya eya, ojaya esohuidojojji huoojea canaje mi que, ma ohua quijje pishana acaje'yo ejjanequipana meequi'yojji —jamaya eya acanaje esohuidojojjiya.

<sup>7</sup> Majoya Jesosa enijje miminaje jama ba'a: —Huani, eya, Jesosa Quito poeje o'oya quijje pishana. Ojjaña jiquio esohui etehue'yo ma eya quijje aje'yo eyaya miya ba meeaña e'e nei. Ojjaña joya jiquio esohui e'e jojo nei jama ajji poani quea bihui nee nee capohua —Jesosa Quitohua eya acanaje.

<sup>8</sup> E'e, eya, Huani ma esohuidojojji shajja'ajja majje ecuea ebajji ohua jjanequipana meequi cajo pea'ai, eya o pejejo ecui'oshajjajo nequinaje o bihuiajji. <sup>9</sup> Jamatii ohuaya eya jama acanaje ba'a: —¡A'a eya bihuiajji! Chojja. Eya Jesosaja echacojji poani mi jayojjaya, miquea epeejji cuana ma Eyacuiñajjiya esohui huohuijji cuana jayojjaya, ojjaña ojaya

epeeji cuana jayojjaya jama poani pea'ai, eya. E'e, oya cuana jiquio esohui etehue'yo jayojja jama acani e'e jojo nei. Jamajjeya ¡Eyacuiñajji oe bihuiacue e'e jojo nei! —ohuaya eya acanaje.

<sup>10</sup> Majoya ma esohuidojojji miminaje enijje jama ba'a: —Huani, quijje pishana ojjaña jiquio esohui jayojja jama acaje'yo Eyacuiñajjiya. Jamajjeya tehue majje ejeejo ¡esohui etehue'yo a'a jjajajji! ¡A'a esohui cuiabajji! ¡Ojjaña ba meecue Eyacuiñajjiya ma ohua quijje pishana acaje'yo! <sup>11</sup> Ojjaña joya quea mimishi poani Eyacuiñajjiya huohui caje jama ba'a: “Ojjaña quea mimishi poani jamatii quea mimishiya capo tiitiquiahua. Ojjaña quea tai jjashahuabaquiani jamatii quea taiya cjjashahuabaqui nequiahua tii tii. Jesusaja epeeji cuana ca ca quea ja'a nee canequi tiitii'yahua. Ojjaña Jesusaja epeeji quea pame nee canequi tiitii'yahua quea pame nee” poani Eyacuiñajji —jamaya ma esohuidojojji poanaje.

*Jesosaja esohui ecuanajaya eshajja'ajjaji*

<sup>12</sup> Majoya Jesosa enijje mimi o'oyanaje jama ba'a: —¡Bacue oe! Quijje pishana eya meshi yasijje poeje o'oya. Poe majje eyaya ojjaña sosequiaje'yo, onajaya eba'eji sosejje. Ojjaña quea mimishi poani aje oe quea nee nee po meeje'yo. Ojjaña quea pame ba'enaje ca ca quea bihui nee nee po meeje'yo, eyaya. <sup>13</sup> Yahua jo nei ojjaña pana jjimahuajo eya yania tii tiia poa. Quijje ojjaña meshijo chama'yo tii poajo eya ani tiitii'e'yo. <sup>14</sup> Ojjaña ecuea epeeji cuana quea boejea, daqui quea boejea jayojja quea bihui nee poaje. Oya cuana acuijjajja eba'e tiitii mee'yojji ijia meeje. Eyacuiñajjiya cuiñajji eyacua huasijje dobiqui meeje'yo esecuejje. <sup>15</sup> Ojjaña joya quea mimishi poani epoquijji pojjeama eyahuasijje Eyacuiñajji ani yasijje. Oya cuana iñahuehua jayojja jama quea tai, quea mase; jjajiojji cuiquijji cuana, pea cojjoji cuana, jjaquecuaquijji cuana pea'ai, eshahuaja epeeji cuana pea'ai, siajjepojji cuana pea ai, siajje po majje quea bihui nee poani cuana pea'ai —Jesosa poanaje.

<sup>16</sup> —Eyaya, Jesosaa huoojeanaje ecuea esohuidojojji miquiana que ecuea esohui huohuiya. E'e, ohuaya miquiana nijjeya huohui caje ecuea esohui ecuea esohui huohuiji cuana huasijje Asia meshijo ba'eca huasijje. Jodio cuanaja etiiquiana Dabi yahua jo nei Jodio cuanaja emeshi mese poa. Eya ca ca iña Dabija osecua poani. E'e, eya, Jesosa oe nei quea ja'a nee nee nequi, eshequi huiyejji majameta jayojja —Jesosa poanaje.

<sup>17</sup> E'e, eya, Huani jama poani ba'a: —Edojjoshahua Pameya ojjaña iyaa cani Jesosa nijje ejjapeequi'yojji. Jesusaja epeeji cuana ojjaña nijje mimiani jama ba'a: “¡Poecue ojjaña, Jesosa nijje jjapeequicue!”

Jamajjeya shajja'ajja majje ojjaña huohuicue jama ba'a: “¡Ojjaña poecue, Jesosa nijje jjapeequicue!”

¡Ojjaña quea naba taja nee nee jayojja poecue Jesosa que! E'e, ba'e tii tii sa poanijo ¡poecue Jesosa que! ¡Ena eba'e tiitii'yojji ishihuacue sosema! Jesusaja esohui cuana ena eba'e tiitii'yojji jayojjaya.

<sup>18</sup> Eyaya, Huaniya miquianaya esohui huohuiaña jama ba'a: Jiquio Jesusaja esohui shajja'ajja majje jama acue ba'a: ¡Pea esohui e'e nei pojjeama a'a huohuiji! Pea esohui e'e nei pojjeama miya huohuiajo Eyacuiñajjiya quea nee nee tii tii po mee caje'yo. E'e, esohuidojojji cuanaja aquiana quea nee nee epo meejiya miquianaya quea nee nee po mee caje'yo. <sup>19</sup> Jiquio Jesusaja esohui jayojja jama huohui sa po ajja shajjama' poanijo Eyacuiñajjiya ma shajjama' cuana cajaa acaje'yo. Jamajjeya shajjama' cuana eba'e tiitii mee'yojji pojjeama Jesosa nijje. E'e, ma acuijjajja eba'e tiitii mee'yojji ijia mee jjima acaje'yo. Eyacuiñajjiya cuiñajji quea pame nee yasijje dobi meequi jjima acaje'yo. Jiquio esohui esohuidojojjiya huohui cajo eyaya tehue'yonaje.

<sup>20</sup> E'e, Jesosa Quitohua ojjaña jiquio esohui etehue'yo cuana huohui canaje. Ohuaya huohui cani jama ba'a: —¡E'e jojo nei eya quijje pishana poeje o'oya!

<sup>21</sup> E'e, ¡jamaya capoe'yahua! ¡Jesosaa ojjaña Eyacuiñajjiya epeeji cuana cahaahua caha quea pame nee!

Mahuiso Jেসosaa jjanequipana meequi canaje ecuea ebajji ojjaña ohua acaje quiije. Eya, Huani jiquio esohui tehuenaje. Apoa.